

Tí Nuevo Testamento cuènte Inchéni Je- sucristo C'óna Nquìva

San Juan Atzingo Popoloca New Testament

This Bible is copyrighted by BibleLeague International (BibleLeague.org) and translation was provided by Wycliffe Bible Translators (Wycliffe.org). This Bible is printed with permission and produced at cost by the Digital Bible Society (dbs.org) for non-commercial use.

This Bible

SAN MATEO.....	4
SAN MARCOS.....	42
SAN LUCAS.....	66
SAN JUAN	106
LOS HECHOS.....	135
ROMANOS.....	169
1 CORINTIOS	183
2 CORINTIOS	197
GALATAS	206
EFESIOS	211
FILIPENSES.....	216
COLOSENSES	220
1 TESALONICENSES	223
2 TESALONICENSES	226
1 TIMOTEO.....	228
2 TIMOTEO.....	232
TITO	235
FILEMÓN	237
HEBREOS.....	238
SANTIAGO	248
1 PEDRO	252
2 PEDRO	256
1 JUAN	259
2 JUAN	263
3 JUAN	264
SAN JUDAS	265
APOCALIPSIS	267

SAN MATEO

Tí sín k'uaxrjeníxin ch'ín Jesús (Lc. 3.23–38)

1 Tíhi mé chrónka nkexro kaín tí sín k'uaxrjeníxin ch'ín Jesucristo. Mé jehe ch'án k'uaxrjeníxin ch'án tí ch'ín David la ko tí ch'ín Abraham. ² Ch'ín Abraham mé it'é tí ch'ín Isaac la ko ch'ín Isaac mé it'é tí ch'ín Jacob la jehe ch'án mé it'é tí ch'ín Judá la ko kaín kíchó ch'án. ³ Ch'ín Judá mé it'é tí ch'ín Fares la ko ch'ín Zara la tí iné sín mé it'in Tamar. Ch'ín Fares mé it'é tí ch'ín Esrom la jehe ch'án mé it'é tí ch'ín Aram. ⁴ Ch'ín Aram mé it'é tí ch'ín Aminadab la jehe mé it'é tí ch'ín Naasón la jehe mé it'é tí ch'ín Salmón. ⁵ Ch'ín Salmón mé it'é tí ch'ín Booz la iné mé tjan Rahab. Ch'ín Booz mé it'é tí ch'ín Obed la iné tí ch'ín Obed mé tjan Rut. Tí ch'ín Obed mé it'é tí ch'ín Isaí. ⁶ Ch'ín Isaí mé it'é tí rey David la jehe ch'án la ko tí tjan k'uéchjién ch'ín Urías mé táha it'é la ko iné tí ch'ín Salomón.

⁷ Ch'ín Salomón mé it'é tí ch'ín Roboam la jehe mé it'é tí ch'ín Abías la jehe ch'án mé it'é tí ch'ín Asa. ⁸ Ch'ín Asa mé it'é tí ch'ín Josafat la ch'ín Josafat mé it'é tí ch'ín Joram la ch'ín Joram mé it'é tí ch'ín Uzías. ⁹ Ch'ín Uzías mé it'é tí ch'ín Jotam la ch'ín Jotam mé it'é tí ch'ín Acáz la ch'ín Acáz mé it'é tí ch'ín Ezequías. ¹⁰ Ezequías mé it'é tí ch'ín Manasés la ch'ín Manasés mé it'é tí ch'ín Amón la ch'ín Amón mé it'é tí ch'ín Josías. ¹¹ Ch'ín Josías mé it'é tí ch'ín Jeconías la ko kíchó ch'án. Tí sín a mé k'uéjó sín tí yaon a ntá xrináhya ikui tí sín Babilonia sákjuiko sín tí sín israelita kixin ts'e-jóhjiina sín tí chjasén sín Babilonia.

¹² Ntá kjuixin sákjuí sín mé ch'ín Jeconías mé it'é tí ch'ín Salatiel la ch'ín Salatiel mé it'é tí ch'ín Zorobabel. ¹³ Ch'ín Zorobabel mé it'é tí ch'ín Abiud la ch'ín Abiud mé it'é tí ch'ín Eliaquim la ko ch'ín Eliaquim mé it'é tí ch'ín Azor. ¹⁴ Ch'ín Azor mé it'é tí ch'ín Sadoc la ko ch'ín Sadoc mé it'é tí ch'ín Aquim la ko ch'ín Aquim mé it'é tí ch'ín Eliud. ¹⁵ Ch'ín Eliud mé it'é tí ch'ín Eleazar la ch'ín Eleazar mé it'é tí ch'ín Matán la ch'ín Matán mé it'é tí ch'ín Jacob. ¹⁶ Ch'ín Jacob mé it'é tí ch'ín José la ch'ín José mé k'óna xí tjan María la jehe tjan María mé iné tí ch'ín Jesús. Tí ch'ín Jesús la mé nchek'in sín Cristo.

¹⁷ Mé xikaha catorce t'áchrji k'uaxrjeníxin tí ch'ín Abraham ntá kjuák'e ch'ín David la í jnko catorce t'áchrji k'uaxrjeníxin tí ch'ín David la ntá tí sín Babilonia sákjuiko tí sín israelita chjasén sín la ntá í jnko catorce t'áchrji k'uéjó la ntá kokjiji Cristo.

Kokjiji Jesucristo (Lc. 2.1–7)

¹⁸ Tí kokjiji Jesucristo mé xikihí kónhen. Tí tjan María iné ch'án mé tsotēhe tjan ch'ín José. A ntá naxá kuák-jahya kíchó sín ntá kónoxín kixin jehe tjan la ó tjejá tjan kixin tíha la kjuachaxién Nchakuen Dios. ¹⁹ Ch'ín José mé tí nkexro ts'óna xí tjan María, mé ijnko chojni jína la tjinkakonhya ch'án noxín chrók'óxroan ch'án tjan ntá kjuenkayáxin ch'án imó chrókjuákehe ch'án tjan kixin tjinkaon ch'án kixin ninkexró tsonohya. ²⁰ Ntá tí naxá tjenkayáxin ch'án kixin xikaha sich'e ch'án ntá kotáchríen ch'án chrónkaxín titàya k'uikuén ch'án ikui ijnko ángel kuénte Ìnchéni nixja, chrónka kixin:

—José jaha mé k'uaxrjeníxin David. Tóxakuanhya la ko chrakonhya chrókuákjá tjan María ts'óna ichjián kixin tí xjan tsochónta tjan la kjuachaxin kuénte Nchakuen Dios ikui mé k'óna tí xjan a. ²¹ Sinchekokjiji tjan ijnko xjan ntoá la its'in xjan Jesús mé xikaha its'in xjan kixin jehe xjan tsjakjiin ijí chojni —mé xikaha chrónka tí ch'ín ángel.

²² Kaín tíha kónhen kixin tsoxiteyá tí nkehe chrónka Ìnchéni k'uénixja tí sín k'uéchrónka itén ch'án ósé. Mé ntáchró xikihí:

²³ Ijnko tjan naxá chóntahya chojni ntoá mé tsjak'eyá tjan la tsochónta tjan ijnko xjan, la sinchek'in sín ch'án Emanuel, † la tíha t'axrjéxin kixin Dios tjejókoni. Mé xikaha chrónka itén Dios.

²⁴ Ntá k'uàya ch'ín José ntá kjuínchexiteyá ch'án tí nkehe k'uētōan tí ángel kuénte Ìnchéni la kuákja ch'án tjan María ts'óna ichjién ch'án. ²⁵ A ntá kjónté xikaha la naxá kójnkojiéhya sín tí naxá kokjiehya xjan la ntá tí xjan mé kjuínchek'in sín Jesús.

Tí sín mago kjuítsjehe sín xjan

2 Tí kokjiéxin ch'ín Jesús tí chjasin Belén estado Judea la tí yaon a kjuák'e ijnko ch'ín rey it'in Herodes mé k'uētuenhen ch'án tí nación a. A ntá xrináhya iso chojni ntoá kjuixín ijnko chjasin nó tjitōxin yaon mé kjuíji sín chjasin Jerusalén. Jehe sín mé sín mago mé tónoexín sín tí konotsé. ² Ntá kjuanchankí sín kixin:

—¿Nketí tjan tí xjan tsíkokjiji ts'óna tí rey ts'ētuenhen tí sín judío? K'uikonxinni tí konotsé kuénte ch'án

† Isaías 7.14

nó tjitoxin yaon na ntá ó kjuini kixin tsochjéheni ch'án kjuasáya —ichro sín.

³ Ntá kuínhin tí ch'ín rey Herodes tí xikaha ichro sín ntá imá tóxakonhen ch'án la ko tóxakonhen kaín tí sín chjasin Jerusalén. ⁴ Ntá tí ch'ín rey k'ueṭoan kixin síxrakoa kaín tí sín ncha'tá t'etṭoan la kaín tí sín tjako tí ley la ntá kjuanchankíhi sín ch'án nketí chrókokjéxín tí nkexro Cristo. ⁵ Ntá jehe sín kjuátehe sín kixin:

—Tsokjéxín xjan chjasin Belén estado Judea mé xikaha tsíkjin tí sín tsíchrónka itén Dios. Ntáchro xíkíhi:

⁶ Jaha chjasin Belén nonte Judá, jaha la jehya ijnko chjasin imá ntsí; kixin tí nonte ts'axrjéxín tí nkexro antsí t'etṭoan, la jehe ch'án ts'ayakonhen tí chjasin kuéntana mé chjasin Israel. †

Mé xikaha nixja itén Dios.

⁷ Ntá imó k'uíyehé ch'ín Herodes tí sín mago la kjuanchankíhi ch'án sín nkesá kjuankíxín k'uíkon sín tí konotsé. ⁸ Ntá chrónka sín ntá tuénxín k'ueṭoan ch'án kixin sátsji sín chjasin Belén la ntáchro ch'án kixin:

—Sátjirá ntiha la tjéyará tí xjan la tió ts'itjará xjan la tsochrónkará kixin ntá kjaxian janhan sátsjia ntiha tsotjahá xjan kjuasáya —mé xikaha k'ueṭoan ch'ín Herodes.

⁹ Ntá kuínhin tí sín mago tí nkehe k'ueṭoan tí ch'ín rey ntá sákjuí sín la xík'ikon sín tí konotsé inaá la kjuítaón va ntja la ntá chréhe sín hasta kjuák'e va chrítaón tí nchia tjen tí xjan a. ¹⁰ Ntá tió k'uíkon tí sín mago nketí kjuák'e tí konotsé la imá kóchéhe sín. ¹¹ La k'uixenhen sín tí nchia la k'uíkon sín tí xjan kjuák'eko tí tjan María iné xjan. Ntá k'uejóxín toch'in sín la chjéhe sín kjuasáya ntá kuakitjehé sín tí nkehe kjuikao sín la kjuanjon sín chica oro la ko ihnti tsochéxín chjincó la ko xroan xraxé náxrjón. ¹² Ntá chr'éxín kotáchrién sín chrónkaxín kixin chrókjanhya sín tí tjen ch'ín Herodes. Méxra kjanxin sín í jnko ntja la sákjuí sín chjasén sín.

Ch'ín José la ko tjan María sákjuí sín chjasin Egipto

¹³ Ntá tió kjuixin sákjuí tí sín mago la ntá kotáchrién ch'ín José chrónkaxín titàya k'uíkon ch'án ijnko ángel kuènte Ìnchéni chrónka kixin:

—T'àyá sátsjioa xjan la ko iné xjan la sátsjirá chjasin Egipto la ntahó ts'ejorá hasta tsóxrjankajia, kixin tí ch'ín Herodes xritjeyá tí xjan chrók'óyán ch'án xjan —mé xikaha chrónka tí ángel.

¹⁴ Ntá ch'ín José k'uàya la ntá sákjuíko ch'án xjan la ko iné xjan la sákjuí sín chjasin Egipto tí tie a. ¹⁵ Ntahó k'uejó sín hasta ik'uén ch'ín Herodes. Mé xikaha kónhen kixin tsoxiteyá kaín tí nkehe chrónka Ìnchéni, k'ueñixja tí sín tsíchrónka itén ch'án. Mé ntáchro sín kixin: “Chjasin Egipto kjuák'e xjana ntá k'uíyaha ch'án”. ††

Ch'ín Herodes mé k'ueṭoan its'en xjan

¹⁶ A ntá kónohe ch'ín rey Herodes kixin tí sín mago mé kjuích'iyehé sín ch'án ntá imá kóninkaon ch'án la

k'ueṭoan ch'án kixin its'en kaín tí chánjan ntoa síin chjasin Belén ó chóna iyó nánó la ko tí xjan naxa chón-tahya iyó nánó. Mé xikaha k'ueṭoan ch'án kixin ó xraxinkaon ch'án nkehe kuínhin ch'án chrónka tí sín mago. ¹⁷ Mé xikaha ó xiteyá tí nkehe tsíkjin tí ch'ín Jeremías ntáchro ch'án kixin:

¹⁸ Kuínhin sín itén chojni chjasin Ramá mé tsjánka sín.

Tíha mé tí tjan Raquel la tsjánkamā tjan xjeen tjan. Kohya nkexro sinchechéhe tjan kixin ó kaín xjan tsík'en xjan. ‡

Mé xikaha chrónka itén Dios.

¹⁹ Ntá tió kjuixin k'uén ch'ín Herodes ntá ijnko ángel kuènte Ìnchéni mé k'uíkonxín ch'ín José kotáchrién ch'án tí kjuák'e ch'án chjasin Egipto mé ntáchro kixin:

²⁰ —T'àyá sátsjioa tí xjan la ko tí iné xjan la tsokjan chjasin Israel kixin ó kjuixin k'uén tí nkexro chrók'óyán tí xjan a —mé xikaha k'ueṭoan tí ch'ín ángel.

²¹ Ntá ch'ín José mé k'uàya ch'án la sákjuíko ch'án tí xjan la ko tí iné xjan la sákjuí sín chjasin Israel. ²² A ntá kuínhin ch'ín José kixin ch'ín Arquelao xjeen ch'ín Herodes mé k'ueṭoan ch'án tí estado Judea la ntá chrakon ch'án la sáchrókjuihya ch'án ntiha. A ntá kotáchrién ch'án chrónkaxín Dios kixin sáchrókjuí ch'án estado Galilea. ²³ Ntá tió kjuíji sín ntiha ntá sákjuí sín ijnko chjasin it'in Nazaret la ntaha k'uejó sín. Mé xikaha xiteyá tí nkehe tsíchrónka tí sín k'ueñixja itén Dios senó. K'ueñtáchro sín kixin jehe ch'án mé tsíkítexín sín nazareno.

Juan el Bautista mé kjuák'e ch'án nteje

(Mr. 1.1–8; Lc. 3.1–9, 15–17; Jn. 1.19–28)

3 A ntá tí yaon a kjuák'e ch'ín Juan Bautista nteje Judea la kjuako ch'án. ² Ntáchro ch'án kixin:

—Títóherá ijjará la tjínkirá tí nkehe tjenkayáxinrá kixin í séhya itsi kjuachaxién Dios.

³ Tí ch'ín Isaías, mé ijnko ch'ín tsíchrónka itén Dios, mé tsíkjin ch'án kuènte tí ch'ín Juan mé chrónka ch'án kixin:

Tsinhin sín itén ijnko nkexro tsjak'e nteje ts'èya tson-táchro kixin:

“Tóxakonhanrá ncheyóxinrá ntja tsixín Ìnchéni.

Takitjehérá ijnko ntja ntoí.” ††

⁴ Tí iké ch'ín Juan mé tsík'óna kaxrre kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko itsjen kotsjenta tónoxín nteje. ⁵ Itsjé chojni kuixín sín chjasin Jerusalén la ko í so chjasin síin estado Judea la ko chjinaxón tí ntario Jordán kixin tsinhin sín nkexr' tjechrónka ch'án. ⁶ Ntá chrónka sín ijje sín ntá ch'ín Juan kuíkítexín ch'án sín tí ntario Jordán.

⁷ Ntá xrinahya k'uíkon ch'ín Juan ikui nchónhya tí sín fariseo la ko tí sín saduceo kixin tjinkaon chrókuikite sín la ntá ntáchro ch'án kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkéhérá tí kjuanínkaon kuènte Dios ó tsi? ⁸ T'ichjánxin kixin chrók'uejorá jnkojina

† Miqueas 5.2 †† Oseas 11.1

‡ Jeremías 31.15 †† Isaías 40.3

chrókjuákoxinrá kixin chaxín kjuítoxinhínrá tí nkehe tjenkayáxinrá. ⁹Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjan kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ¹⁰Tí chica hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche. ¹¹Janhan mé intá tikítexián chojni kixin tsjakoxin sín kixin ó kjuítoxinhin sín ntíé sín. A ntá tí nkexro itsi chr'éxin mé tsikítexínrá tí Nchakuen Dios la ko xrohi. Antsí tjetóxin t'etóan ch'án a ntá janhan la kánhyó. Méxra chrókósuàna sáchrókjuíkian tokaté ch'án. ¹²Jehe ch'án la ó tjebraá ch'án pala sinchetjuáxin ch'án noatrigo kixin tí ntachjiji trigo la ókjé ts'ejo ch'án a ntá tí noatrigo la tsjenájin ch'án la ts'enkächjina ch'án. A ntá tí ntachjiji trigo la tsjakaxín ch'án ijnko xrohi ts'ankahya jnkochríxín —mé xikaha kjuako ch'ín Juan.

Kuíkite ch'ín Jesús (Mr. 1.9-11; Lc. 3.21-22)

¹³Ntá ch'ín Jesús kjuixín ch'án nó estado Galilea ikui ch'án tí ntárió Jordán tí tjen ch'ín Juan kixin ch'ín Juan tsikíte tí jehe ch'án. ¹⁴A ntá tí saxín chrohya ch'ín Juan chrókjuíkite tí ch'ín Jesús ntáchró ch'án kixin: —Náhi. Jeheni t'ichjánxinhinni jaha chrókuíkite tí jeheni. A ntá jaha k'uinka kixin jeheni chrókuíkítia tí jaha —ichro ch'ín Juan.

¹⁵Ntá kjuátehe ch'ín Jesús kixin:

—A ntá jie la títóhé tí xikaha tjenkayáxian kixin t'ichjánxin tsikiteni kixin sinchexiteyáni tí nkehe k'uetoan Dios.

Ntá ch'ín Juan kuítekaon ch'án la xikaha kjuích'e ch'án. ¹⁶Ntá tió kuíkite tí ch'ín Jesús la ntá xrinahya titáya xitjehe nkajni la k'uíkon ch'án tí Nchakuen Dios, éxi kontóá tsjehe, k'uínkajinxin nkaya nkajni ntá kjuák'e chrítaón kja ch'ín Jesús. ¹⁷Ntá xrinahya kuínhin sín ijnko tan kuixín nkaya nkajni ntáchró kixin:

—Tíhi mé xjanna la imá tjuahá ch'án la imá chàna kixin nchexiteyàna ch'án.

Ch'ín Tsochren chrókjuachroe ch'ín Jesús (Mr. 1.12-13; Lc. 4.1-13)

4 Ntá tí Nchakuen Dios mé sákjuíko ch'ín Jesús tí nteje a ntá ch'ín Tsochren tjinkaon chrókjuachroe ch'ín Jesús. ²Tí nteje a mé kjuák'e ch'án kjónehya ch'án cuarenta yaon la ko cuarenta tie la ntá chr'éxin kónohe ch'án ik'uén ch'án kjinta. ³Ntá ch'ín Tsochren mé kóchjinehe tí ch'ín Jesús kixin tjinkaon chrókjuachroxín ch'án. Ntáchró ch'án kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴Ntá kjuátehe ch'ín Jesús ntáchró kixin:

—Náhi. Ntáchró xroon itén Dios kixin: “Jehya niotja ó chrók'uejóchónxin chojni. Náhi. Kaín tí tán nixja Dios tjejóchónxin chojni” † —ichro ch'án.

† Deuteronomio 8.3

⁵Ntá ch'ín Tsochren mé sákjuíko ch'ín Jesús tí chjasin tjóá mé chjasin Jerusalén, la sákjuíko ch'án tí chrítaón tí kja njnko a ⁶la ntáchró ch'án kixin:

—Tí chaxín Xjeen Dios jaha la títóhé t'anótjexian tí noi ntihi kixin ntáchró xroon itén Dios kixin:

Dios mé ts'etuñhen tí sín ángel kuente ch'án kixin ts'ayakonhan sín.

Tsotsé sín itjá kixin tsotéhya totá ts'itja xro tí ts'anótjen †† —ichro ch'ín Tsochren.

⁷Ntá kjuátehe ch'ín Jesús ntáchró ch'án kixin:

—Náhi. Kjaxin ntáchró xroon itén Dios kixin:

“Chjinihya chrókjuásixián kjuaxroan kjuachaxin kuente Ìnchéni Dios” ‡ —ichro ch'ín Jesús.

⁸A ntá tió kjuixín sákjuíko ch'ín Tsochren tí ch'ín Jesús ijnko jnā imá noi ntá kjuako tí jínahya kaín xín tí nación siín chjasintajni la ko tí nkehe t'etóan kuente.

⁹La ntáchró ch'ín Tsochren kixin:

—Kaín tíha mé tsotjaha tí tsjak'éxian tóch'ian tsjikosáyana tí janhan —mé xikaha ichro ch'ín Tsochren.

¹⁰Ntá kjuátehe ch'ín Jesús ntáchró ch'án kixin:

—Sátjia Satanás kixin xroon itén Dios ntáchró kixin:

“Chrókjuíkosáyehé Ìnchéni Dios la jehó ch'án chrókjuích'ehé xra” †† —ichro ch'ín Jesús.

¹¹A ntá ch'ín Tsochren mé kuítóhe tí ch'ín Jesús la iso tí sín ángel ikui tsjinkitsa tí jehe ch'án.

Ch'ín Jesús kjuankixin ch'án tí xra kuente ch'án estado Galilea (Mr. 1.14-15; Lc. 4.14-15)

¹²A ntá ch'ín Jesús mé kuínhin ch'án kixin tí ch'ín Juan mé tjechjina ch'án ntóechiso a, a ntá jehe ch'án mé sákjuí ch'án estado Galilea. ¹³Kuítóehya ch'án chjasin Nazaret ntiha. Náhi. Sákjuí ch'án chjasin Capernaum la kjuák'e ch'án ntiha. Tí chjasin a mé tjen chrínta ntayaon chjino estado Zabolón la ko estado Neftalí. ¹⁴Mé xikaha kjuích'e ch'án kixin tsoxiteyá tí nkehe tsikjin ch'ín Isaías, ijnko nkexro k'uéchrónka itén Dios. Ntáchró ch'án kixin:

¹⁵Tí estado Zabolón la ko Neftalí tí ntja chrínta ntayaon la tí nó chók'á tjitoxin yaon tí ntárió Jordán,

mé tí estado Galilea tí tjejó tí sín jehya judío.

¹⁶Mé ntiha tjejó tí sín siín tí sítie mé ts'ikon sín ijnko xrohi jíé,

la tí sín éxi tsík'en xritjejó sín mé ts'inkaséyanxín ts'ejó sín.

¹⁷Ntá kjuankixin kjuako ch'ín Jesús ntáchró ch'án kixin:

—Tjitóxinhinrá ntjará. Tsákjára ijnko ntja njxin kixin kjuachaxin kuente Dios tjen nkaya nkajni la í séhya tsi.

†† Salmo 91.11-12 ‡ Deuteronomio 6.16 †† Deuteronomio 6.13

Ch'ín Jesús k'uíyehē noó chojni k'uétsé koche

(Mr. 1.16-20; Lc. 5.1-11)

¹⁸ Ntá sákjuí ch'ín Jesús chr'inta ntayaon Galilea ntá xrinahya k'uíkon ch'án yaá sín jnkokóá kichó sín, ijnko mé it'in Simón mé kjaxin it'in ch'án Pedro la ko í jnko it'in Andrés. Jehé sín mé koche xritsé sín. Ntá tinkák'e sín nchísén chrínkí ntá. ¹⁹ Ntá ch'ín Jesús nixjehē sín ntáchro ch'án kixin:

—Chr'éhéra tí janhan ntá tsotjahará xrá tsjéyará chojni.

²⁰ Ntá tuénxín kuítoghe sín tí nchísén k'uétséya sín koche, ntá sákjuíko sín ch'án.

²¹ Ntá k'ínhya kjuíji ch'án ntá k'uíkon ch'án ijnko yaá sín, jnkokóá kichó sín, mé tí ch'ín Jacobo la ko ch'ín Juan, mé xjeen tí ch'ín Zebedeo. Tjejóko sín it'é sín tí ntabárcō la tzejótjōnīte sín tí nchísén tséya sín koche. Ntá kjaxin tí sín a k'uíyehē ch'ín Jesús. ²² La ntá tuénxín kuítoghe sín tí ntabárcō la ko tí it'é sín ntá sákjuíchréhe sín tí ch'ín Jesús.

Kjuakohē ch'ín Jesús nchónhya chojni

(Lc. 6.17-19)

²³ Ntá sákjuí ch'ín Jesús nkuíxín tí estado Galilea la kjuakoxin ch'án tí njnko Israel siín jnkojnko chjasin mé kjuako ch'án tí tan jína chrónka nkexrí tí kjuachaxin kuènte Dios la ko kjuínchekitoghe ch'án jína kaín chojni chóna kaín xín chin la ko kaín kjuatjoté. ²⁴ Ntá kaín xín tí sín tzejó tí estado Siria mé kuínhin sín kuènte Jesús la kjuíkəo sín kaín xín tí sín níhi chóna kaín chin la ko tí sín imá tjetéhe sín la ko tí sín chóna nchakuen tí jínahya la ko tí sín t'aniáte sín la ko tí sín síxénká tōté sín, la ntá ch'ín Jesús mé kjuínchekitoghe ch'án sín jína. ²⁵ Ntá itsjé chojni kjuíchréhe tí ch'ín Jesús, mé kjuíxin sín estado Galilea la ko tí chjasin chjinaxón Decápolis la ko chjasin Jerusalén la ko kuenté tí estado Judea la ko tí nó chók'á tjitōxin yaon tí ntárió Jordán.

Kjuakoxin ch'ín Jesús ijnko jna

5 K'uíkon ch'ín Jesús kixin k'uéjō nchónhya chojni la ntá chriin ch'án ijnko jna la ntaha kjuák'etjāxin ch'án. Ntá tí sín k'uájiko ch'án a mé kóchjina sín chjinaxón tzejóntaxin sín tí tjen ch'án. ² Ntá ch'ín Jesús kjuankixin kjuakohē ch'án sín kixin:

Tí nkexro tzejó náxrjón

(Lc. 6.20-23)

³ —Náxrjón tzejó tí sín nohe kixin t'ichjánxinhin sín nkehe kuènte Dios kixin ntá jehe sín mé tsochóna sín tí kjuachaxin kuènte Dios.

⁴ Náxrjón tzejó tí sín t'ává kixin Dios mé sinchechéhe asén sín.

⁵ Náxrjón tzejó tí sín hnkehya asén kixin jehe sín mé ts'áyéhē sín tí nonte tsjanjon Dios.

⁶ Náxrjón tzejó tí sín éxí yóhē chrók'uenxín sín kjinta la chrók'uenxín sín ntá kixin xikaha imá tjinkaon sín

sinchexiteyéhe sín Dios ntá Dios tsjinkitsa sín kixin ts'áyéhē sín tí nkehe tjinkaon sín.

⁷ Náxrjón tzejó tí sín tikonóhē kichó sín kixin ntá Dios kjaxin tsikonóhē tí jehe sín.

⁸ Náxrjón tzejó tí sín kótjóa asén kixin ntá jehe sín sátsjik'ikon sín Dios.

⁹ Náxrjón tzejó tí sín tjinkaon kjuaxróxin kixin Dios sinchek'in ch'án xjeen ch'án tí jehe sín.

¹⁰ Náxrjón tzejó tí sín kjónté tzejótjasótexín sín kixin kjuínchexiteyéhe sín Dios kixin ntá jehe sín mé kuènte sín nkaya nkajní.

¹¹ Náxrjón tjejorá kjónté t'ántaxínhanrá sín la ko ntachakonrá sín la ko kaín nkehe náxrjónhya ntáchro sín kixin tinkachónkirá tí janhan. ¹² Chrókócháhará la ko kjuaxróxin chrók'uejorá kixin ntá chr'éxin jahará ts'ayéhéra ijnko nkehe antsí má jína nkaya nkajní. Mé xikaha kjuasóte tí sín k'uéjō ósé k'uéchrónka sín tí itén Dios.

Jahará la éxí yóhē xijnta la ko éxí xrohi t'inkaséyanxín chjasintajni

(Mr. 9.50; Lc. 14.34-35)

¹³ Jahará mé yóhē éxí xijnta chjasintajni. A ntá tí chrók'uánkéhé tí jní tí xijnta la ntá xitjahya chrókójní inaá. Ninkehó chrókjuich'ehya xrá la chrók'uikitjí ntója la ko chrókuinkátja chojni.

¹⁴ A ntá jahará la mé tí xrohi t'inkaséyanxín chjasintajni. Ijnko chjasin itjen chrítaón jna la xitjahya tsjak'emá. ¹⁵ La ko kohya nkexro sinchek'ákjen ijnko lámpara ntá tsjak'e chrínkí ijnko ntacajón. Íchá jína tsjak'e ch'án xrohi noi kixin ntá ts'inkaséyanxín kaín nkexro siín tí nchia ntiha. ¹⁶ Mé xikaha tí jahará chrókóyohará éxí tí xrohi t'inkaséyanxín kixin ts'ikon kaín chojni tí xrá jína tjejoch'erá la ntá chrókjuanchehe sín kjuasáyé It'eni tjen nkaya nkajní.

Kjuako ch'ín Jesús kuènte tí ley

¹⁷ Jahará chróntáchrohyará kixin k'uinka kixin tsjakíyan tí ley tsík'etōan ch'ín Moisés la ko tí nkehe kjuako tí sín k'uéchrónka itén Dios. Náhí. Jehya xikaha k'uinka kixin tsjakíyan tíha. Náhí. K'uinka janhan kixin tsjakoxian nkehe chaxín t'axrjéxin tíha. ¹⁸ Chaxín xrjan-ka kixin tí naxā tjen nkajní la ko chjasintajni la kohya ninkehó ley tsjiihnyá, mé tsjiihnyá nijnko punto la nijnko letra kuènté tí ley tsjixinjian tsoxiteyá kaín tí nkehe t'ichjánxin tsoxiteyá. ¹⁹ Mé xikaha tí nkexro tsitekakonhya tí nkehe k'uētōan tí ley kjónté ijnko nkehe imá intsí, la ko chrókjuako kixin xikaha chrókuitekakonhya chojni, la jehe sín la imá tsontsí sín tí tsi tí kjuachaxin kuènte Dios. A ntá tí nkexro tsitekaon la ko tsjakohē ókjé nkexro tsitekaon sín, mé antsí imá ts'etōan sín tí tsi kjuachaxin kuènte Dios.

²⁰ Méxrā tjonkārā kixin t'ichjánxin kixin antsí jína ts'ejorá la tsyóahyará tí sín tjako ley la ko tí sín fariseo kixin tí tsyóohará sín la ntá xitjahya tsákjára tí kjuachaxin kuènte Dios tjen nkaya nkajní.

Kjuako ch'in Jesús kuènte tí kjuanínkaon
(Lc. 12.57-59)

²¹ 'Jahará tsíkinhínrá kixin tí sín ósé tsík'ítuenhen sín kixin: "T'oyánhyará kichuára † kixin tí nkexro t'óyán kichó mé t'ichjánxin tsjasóte sín." ²² A ntá janhan tjonkará kixin jnkojín nkexro tsonínkakonhen kichó mé t'ichjánxin tsjasóte. A ntá tí nkexro t'ántaxínhín kichó la mé tí sín t'etōan mé sinchekitōexín ijje ch'án. La ntá tí nkexro tsontáche kichó kixin tsíxénká ch'án la tíha mé sátsji tsjasótexín tí siín xrohi. ²³ A ntá tí tsjikuehéra Dios nkehe tsochjehéra ch'án ntá tsjasánrá tí altar ntá tsoxráxinkáonrá tí jnkojín kichuára kjuanjónkoará sín ²⁴ la ntá tí xikaha la tjtōhéra tí nkehe tí altar la sátsjirá tsonixjehéra ch'án jnkojína kixin í tsokohya kjuanínkaon. La ntá tsjixín la ntá tsjihará tsjánjonrá tí nkehe tjinkáonrá tsjánjonrá.

²⁵ Tí siín jnkojín nkexro tjanchia jje tí jahará la tjinkaon chrókjuikoará ch'án juzgado, a ntá íchá jína jnkokoá chrókjuenkayáxinrá, jehe ch'án la ko jahará, ntja ó, kixin ntá sáchrókjuihyará tí tjen ch'ín juez. Kixin sáchrókjuirá tí tjen ch'án ntá jehe ch'án ts'etueñhen ch'án tí policía kixin ts'ixenhenrá ntōechiso. ²⁶ A ntá chaxín tjonkará kixin tí ts'ikjahará sín ntōechiso la ts'axrjéxinhyará ntiha tsjixinjian tsjenkeherá sín kaín xín chichaon chontará.

Ch'in Jesús kjuako kixin chrókjuasinhyá sín jje,
chróchóntahya sín chojni chjin ókjé

²⁷ 'Jahará tsíkinhínrá tí nkehe tsík'ítuenhen tí sín ósé ntácho kixin: "Chrókjuásinhyará jje, chróchóntahyará chojni chjin ókjé." ^{†28} A ntá janhan tjonkará kixin tí nkexro tsokomá ijnko tjan ókjé tjak'e asén chrókuákja ch'án la ó kjuixin kjuasin ch'án jje nkaya asén ch'án.

²⁹ A ntá tí ikuan chjina chrókjuásixián jje la chrókuakitsjenkiá ikuan la chróchr'an ikjín kixin íchá jína ts'itjáyán it'ō cuerpo kuéntá kixin jehya kuenté cuerpo kuéntá sátsji tsjasótexín tí siín xrohi. ³⁰ A ntá tí itja chjina chrókjuásixián jje la chrókóchrínjian tí tjá a la chróchr'an ikjín kixin íchá jína ts'itjáyán it'ō cuerpo kuéntá kixin jehya kuenté cuerpo sáchrókjuí tsjasóte tí siín xrohi.

Ch'in Jesús kjuako kixin chrók'uitjehya kichó sín
(Mt. 19.9; Mr. 10.11-12; Lc. 16.18)

³¹ 'Kjāxin tsík'ítuenhen tí sín ósé kixin tí nkexro tjinkaon chrók'uitjíhi ichjién t'ichjánxin ts'óna xroon tsakja tí ichjién kixin ts'itjéxín kichó sín. ^{†32} A ntá janhan tjonkará kixin ijnko nkexro tsjákehe ichjién tí chróchóntahya tjan ókjé nkexro la jehe ch'án kuitōhe ch'án tjan kixin tsjasín tjan jje. A ntá tí nkexro tsotēhe ijnko tjan tsíkítsínkehe la kjāxin ó kjuasin ch'án jje.

Ch'in Jesús kjuako kixin chjiníhya chrók'uákjexiní ih-
nié Dios

³³ 'Kjāxin tsíkinhínrá tsík'ítuenhen tí sín ósé kixin: "T'ichjánxin sinchexiteyará tí nkehe tsintáchorá kixin chrók'uákjexinhyará ihnié Ìnchéni chjiní." ^{†34} A ntá janhan mé tjonkará kixin chrók'uákjexinhyará ihnié Dios ninkehó la ko chrók'uákjexinhyará nkajní kixin ntaha tjen Dios t'etōan. ³⁵ La ko chrók'uákjexinhyará chjasintajni kixin ntaha tjejókjén toté ch'án la ko chrók'uákjexinhyará chjasín Jerusalén kixin ntiha la itjen tí Rey t'etōan. ³⁶ La tjenkayáxinhyará ikjára ó kixin jahará xitjahya tsjakéra ijnko kaxíhi tjóá o nijnko kaxíhi tié. ³⁷ Tí nkehe tsontáchorá chaxín la chaxín la tí nkehe náhi la náhi la kohya nkehe chrókjuakét'oxinrá chróchronkará. A ntá ichrén nkehe tjakét'oxinrá tsochronkará la táha mé jínahya.

Ch'in Jesús tjako ch'án kuènte tí sín t'itjáyenhyá ichrén
kjuanínkaon
(Lc. 6.29-30)

³⁸ 'Jahará mé ó tsíkinhínrá tsík'ítuenhen tí sín ósé kixin tí takitsjenkí sín ikonrá la kjāxinrá chrókuakitsjenkíra ikon sín. A ntá tí chrókuakitsjenkí sín nēnorá la kjāxinrá chrókuakitsjenkíra neno sín kjāxin. ^{†39} A ntá janhan mé tjonkará kixin tí jnkojín nkexro ichrén nkehe jínahya sit'ahará la jahará ch'ehyará xikaha. Náhi. Tí chjéhe ijnko nkexro ijnko tuāan la ntá tjóka tí í jnko nānko tuāan. ⁴⁰ La tí siín jnkojín nkexro tjanchia jje la tjinkaon sín chrókuakitsjaha sín camisá la tjtōhé sín sátsjiko sín tí ka t'ínkayate kjāxin. ⁴¹ La tí t'etūanhanrá sín tsámárá nkehe ijnko kilómetro la tjakét'oxinrá í yaá kilómetro. ⁴² Tí jnkojín nkexro tsjanchia nkehe la tí tjinkaon ch'án nkehe la chróntáchrohyará kixin "náhi", chrókjuinchejenrá ch'án.

Tjuéhérá tí sín nínkakonhanrá sín
(Lc. 6.27-28, 32-36)

⁴³ 'Kjāxin ó tsíkinhínrá tsík'ítuenhen tí sín ósé kixin: "Tjuéhérá tí nkexro choxinrá la tsonínkákohénrá tí sín jínahya kjuít'ahará." ^{†44} A ntá janhan mé tjonkará kixin chrótjuéhérá tí sín nínkakonhanrá la chrókjuincheyaonrá tí sín jínahya kjuít'ahará la jína chrókjuinkitsará tí sín tjinkakonhyá tí jahará la chrónixjehérá Dios kixin chrókjuinkitsa ch'án tí sín t'ántaxínhanrá la ko tí sín t'ahará tí jínahya. ⁴⁵ Tí xikaha s'ich'era la ntá jahará chaxín xjeen It'eni tjen nkaya nkajní kixin jehe ch'án mé t'etōan ch'án tsjiton yaon ts'inkaséyenhen tí sín jínahya la ko tí sín jína la ko kjāxin t'etōan ch'án kixin ts'aniá ichrén tí siín tí sín jína la ko tí sín jínahya. ⁴⁶ Tí jehó tjuéhérá tí nkexro tjuáhará, ¿la ntá nkehe chrókjuachará? A ntá kjāxin tí sín nchekjènkj la xikaha ch'e sín. ⁴⁷ La tí jehó nixjehérá tí sín kichuára la ntá, ¿á chaxín imá jína tíha ní? Kixin tí xikaha la kjāxin tí sín chónhyá Dios la xikaha ich'e sín. ⁴⁸ Kjāxinrá ja-

† Éxodo 20.13; Deuteronomio 5.17 †† Éxodo 20.14; Deuteronomio 23.21 ‡ Deuteronomio 24.1-4

†† Números 30.2; Deuteronomio 23.21 ††† Éxodo 21.24; Levítico 24.20; Deuteronomio 19.21 †††† Levítico 19.18

hará ntoá chrók'uejorá kixin It'eni tjen nkaya nkajni la antsí má ntoá tjen ch'án.

Kjuako ch'ín Jesús kuènté tí xrə jína

6 'Chrókjuásixínhyará kjuaxroan tí nkehe tin-kachónkirá kixin tjinkáonrá chrók'uikon chojni ó. A ntá jahará tí xikaha chrókjuich'erá ntá It'eni tjen nkaya nkajni la ninkehó nkehe tsotjáhyará ch'án. ² Tí tjínkĩsará ijnko chojni nòla la ninkexró chróchenkahyará. Jahará chrókóyóahyará tí sín ntoáhya tjenkayáxin ixri t'óxroan kixin mé xikaha ch'e sín t'óxroan sín nkaxehen nĩnko la ko tí ntja kixin chrók'uikon chojni la chrókjuikosáyehe sín tí jehe sín kixin jína tjejóch'e sín. A ntá janhan ntáxrjan kixin ó kjuixin k'uáyéhe sín nkehe la í ts'áyèhya sín inaá. ³ A ntá tí jahará tió chrókjuínkĩsará ijnko chojni chaxín nòla la íchá jína kixin chrókónoehya ninkexró kjónté ijnko nkexro tjuá jína. ⁴ A ntá jahará tí chrókjuánjonrá ichrén nkehe la ninkexró chrókónoehya la ntá tí It'eni ts'ikon ch'án kixin xikaha ch'erá la ninkexró noehya la ntá tí jehe ch'án mé tsotjáhará ch'án nkehe.

Tjako ch'ín Jesús nkexrí tsonixjeheni Dios

(Lc. 11.2-4)

⁵ A ntá tió nixjehérá Dios la jehya éxi tí sín jnkójínxónhya tjenkayáxin sín chrónixjará. Jehe sín mé tóxrjínhin sín ts'ejóxin toté sín nkaxehen nĩnko la ko ts'ejó sín esquina calle kuènte ntsin kixin ts'ikon kaín chojni kixin tjejónixjehé sín Dios. Ntá janhan chaxín ntáxrjan kixin jehe sín la xikaha kjuich'e sín la ó kjuixin k'uáyéhe sín nkehe la í ts'áyèhya sín inaá. ⁶ A ntá tió nixjehérá Dios la t'ixenhénrá nchia ntqará la t'ikjehérá tí puerta la nixjehérá It'eni kixin ntaha tjekoará ch'án. A ntá jehe ch'án ts'ikon kixin xikaha ninkexró ts'ikonhya ntá jehe ch'án tsjanjon ch'án nkehe ts'ayéhérá.

⁷ Ntá tió chrónixjehérá Dios la chrókjatèehya chrónixjará kixin chrókóyóahyará éxi tí sín chónhya Dios kixin jehe sín tjenkayáxin sín kixin nchónhya tsonixja sín, la mé xikaha mé chrókuinhin Dios, ichro sín. ⁸ A ntá jahará chrókóyóahyará éxi tí jehe sín. It'eni ó nohe ch'án nkehe t'ichjánxínhanrá kjónté naxa tjanchéhyará ch'án. ⁹ Méxrə xikihi chróntáchorá: It'eni tjen nkaya nkajni jaha imá tjóá.

¹⁰ Chrókui tí kjuachaxin kuènta.

Chrókjuich'e tí nkehe tóxrjínhan jaha ntihi chjasintajni éxi tjech'e nkaya nkajni.

¹¹ Ijie la tsjánjuan tí niqtja t'ichjánxínhinni.

¹² T'oxíka tí nkehe jínahya kjuich'eni kixin kjaxin jeheni ts'itjáyhenneni tí nkehe kjuich'eheni chojni.

¹³ Títqéhyani kixin xrəhya chrókjuasinni jie. Nchekaáni kaín tí jínahya chrókónhenni,

kixin jaha mé kuèntá tí kjuachaxin kixin ó noheni kixin jaha tjetétoan tí kjuachaxin jnkochrín. Amén.

¹⁴ Tí jahará ts'itjáyanhanrá tí nkexro kjuasinhánrá ichrén jie la mé kjaxin It'eni tjen nkaya nkajni mé ts'ikon ch'án kixin xikaha kjuich'erá la ntá kjaxin jehe ch'án ts'oxíka ch'án tí jie kjuásinrá. ¹⁵ A ntá tí jahará ts'itjáyanhyará tí jie kjuasinhánrá í jnko chojni la ntá

kjaxin It'eni tjen nkaya nkajni ts'ikon kixin xikaha kjuich'erá k'uitjáyanhyará la ntá kjaxin jehe ch'án la ts'oxíkahya ch'án tí jie chontará.

Ch'ín Jesús kjuako kixin chrók'óxroanhya sín kixin kjónehya sín

¹⁶ A ntá tí jahará tí naxə kjóntehyará kixin tjinkáonrá tsonixjehérá Dios la ntá chrók'uejohyará éxi t'avará éxi ch'e tí sín jehya jnkójínxón tjenkayáxin sín. Mé xikaha ch'e sín kixin tjinkaon sín ts'ikon chojni kixin naxə kjónehya sín. Tí xikaha ch'e sín la janhan ntáxrjan kixin ó kjuixin k'uáyéhe sín nkehe la í ts'áyèhya sín inaá. ¹⁷ A ntá tí jahará kjónté naxə kjóntehyará kixin tjinkáonrá tsonixjehérá Dios la t'ontirá ikonrá la tjéntoará kjará ¹⁸ kixin tsonoehya chojni kixin naxə kjóntehyará. Jehó It'eni tjekoará ntiha mé jehe ch'án nohe ch'án xikaha ntá tsjanjon ch'án nkehe ts'ayéhérá.

Tí nkehe chaxín tjeite siín nkaya nkajni

(Lc. 12.33-34)

¹⁹ Jahará chrókjuásitonhyará nkehe tjeite ntihi chjasintajni kixin ntihi la ts'ín kué tí nkehe tjeite sinchek'itjáyanhanrá va la ko tsochjisen tí chichaon la ko xíchee ts'ixenhen tsaáhará. ²⁰ Íchá jína tjásitonrá tí nkehe tjeite nkaya nkajni kixin ntaha kohya iko sinchek'itjayan nkehe la tsochjisenhya tí nkehe la ko kohya xíchee ts'ixenhen tseé. ²¹ A ntá tí nkaya nkajni tsochontará nkehe tjeite la ntá tí nkehe tjenkayáxinrá la kjaxin ntaha tjen.

Tí xrohi t'inkaséyanxín cuerpo

(Lc. 11.34-36)

²² Tí ikonrá mé éxi yóhe ijnko xrohi t'inkaséyanxín tí cuerpo kuèntará. Tí jína ikonrá la ntá kjaxin kuènté tí cuerpo kuèntará mé chóna xrohi. ²³ A ntá tí ikonrá la jínahya la ntá kuènté tí cuerpo kuèntará la sítié tjen. A ntá tí chrókjuak'ehya tí xrohi la ntá antsí má chrókjuinchetié tí sítié.

Dios la ko tí chichaon

(Lc. 16.13)

²⁴ Kohya ninkexró tsjacha sich'ehe xrə yaá lamó. Tí xikaha chrókjuich'e ch'án la ntá ijnko tsonínkakohen ch'án la tí í jnko tsotjuèhe ch'án o ijnko la tsitekakohen ch'án la tí í jnko la tsitekakuenhya ch'án. Méxrə xitjahya chrókjuich'ehe chojni xrə Dios tí tjinkaon sín chróchóna sín itsjé chichaon.

Dios mé t'áyakonhen tí xjeen ch'án

(Lc. 12.22-31)

²⁵ A ntá ntáxrjan kixin chrókóxakuanhyará tí nkehe chrókjónterá o tí nkehe chrók'uirá o tí ka chrók'uítsará. ¿Á jehya antsí má sínkí tí kjuachón chróchontará, a ntá kánhyó sínkí tí nkehe chrókjónterá, la á jehya antsí má sínkí tí cuerpo kuèntará, a ntá kánhyó sínkí tí ka chrók'uítsará? ²⁶ Xráxinkáonrá nkexrí siín tí koxroxé xritjaka. Jehe va la t'enkahya va noa la ko tjáhya va la

ko chóntahya va nketí ts'inkachjinayá va tí noa, la kjánchó It'eni tjen nkaya nkajní la tjanjon ch'án nkehe sine va. A ntá jahará mé antsí tjetóan a ntá tí koxroxé la kénhyó. ²⁷ ¿Á tjejó jnkojínra tjenkayáxinra kixin tí chrókóxakonhanrá imá a ntá naxá chrók'uankirá it'ó metro ntétoxinra ínaá?

²⁸ ¿Nkekuénté kixin imá tóxakonhanrá ikará ó? Tsjeherá nkexrí sí't'ánkí tí catsjo síin nteje. Tí itsjo la ní ch'ehya xrá la ko tjonhya. ²⁹ La tjonkará kixin kjónté ch'ín rey Salomón k'uéchóna itsjé chichaon la naxá kjuíncheyóehya ch'án nkexrí náxrjón tsjehe tí tsjo a. ³⁰ A ntá tí Dios la nchek'itsa tí ka yoa síin nteje kjónté ijie síchón ka la ntóye tsochexín tí nkaxenhen tja, a ntá jahará mé antsí chrókjuintak'itsará ch'án. ¿A ntá nkekuénté titekákonhyará ch'án? ³¹ Méxra xikaha chrókóxakuanhyará chrókjuanchankíhyará kixin nkehe chrókjónterá o nkehe chrók'uirá o nkehe chrók'uitsará. ³² Kaín tí nkehe la tí sín chónhya Dios mé tóxakonhen sín tíha. A ntá jahará chontará It'eni tjen nkaya nkajní la mé nohe ch'án kaín nkehe t'ichjánxinhanrá. ³³ A ntá senó mé chrókjuéyará tí kjuachaxin kuénté Dios la chrókjuínchexiteyará tí nkehe jína tjinkaon ch'án, a ntá jehe ch'án mé tsjanjon ch'án kaín nkehe t'ichjánxinhanrá. ³⁴ Tóxakuanhyará tí nkehe tsonhen ntóye xikaha kixin ntóye la í jnko yaon táha la jnkojnko yaon tjikao kjuaxikaon kuénte.

Chrók'uantaxienhyará kichuára

(Lc. 6.37-38, 41-42)

7 'Chrókuékahyará ókjé chojni jie kixin ntá Dios kjaxin chrókjuanchahya jie tí jahará. ² A ntá Dios la tsjanchia ch'án jie tí jahará tí tsékará ókjé chojni jie. A ntá tí xikaha sích'erá la mé xikaha tsonhanrá kjaxin. ³ ¿A ntá nkekuénte tsjehé tí chjínínó ntsí tjenkánkí ikon tí kichuá tí naxá ántosán tí inta jie tjenkánkí ikuan? ⁴ A ntá tí chonta jaha tí nta jie tjenkánkí ikuan, ¿a ntá nkexrí kixin chróntáche tí kichuá kixin: "Títóhé tsakit-sjenkíni tí chjínínó ntsí tjenkánkí tí kuan?" ⁵ A ntá jaha la ntoáhya tjenkayáxian. Senó chrókuakitsjenkiá tí nta jie tjenkánkí ikuan kixin ntá chrók'uikuan tsakitsjenkiá chjínínó ntsí tjenkánkí ikon tí kichuá.

⁶ Chróchjeéhyará tí nkehe tsíkótjójá tí koniá kixin jehe va tsokjan va tsonínakonhanrá va ntá sinchekuenrá va. La ko kjaxin chróchjeéhyará tí cochíno tí xro perla tjete kixin tsinkátja va la tsokuen.

Tjanchia la tjeyá la t'inka puerta

(Lc. 11.9-13; 6.31)

⁷ Tjanchiará nkehe la Dios tsotjáhará. Tjeyará nkehe la ts'itjará. T'inkará puerta la ntá tsoxitjehe. ⁸ Kixin tí nkexro tjanchia nkehe la ts'áyéhe tí nkehe la tí nkexro tjeyá nkehe la ts'itja la tí nkexro t'ínka puerta la tsoxitjehe.

⁹ ¿Á tjejó jnkojín nkexro ntihi chrókjuanjón xro chrókjóné xjeen tí chrókjuanchia xjan niotja? Kja náhi. ¹⁰ O tí chrókjuanchia xjan ijnko koche la, ¿a chróchjehe ch'án tí xjeen ch'án konche chrókjóné ní? Kja náhi. ¹¹ A ntá jahará kjónté jínahyará la ó nohará nkehe jína

chjehérá xjaanrá. A ntá It'eni tjen nkaya nkajní kjaxin antsí tsochjehe ch'án nkehe jína tí nkexro tsjanchia nkehe.

¹² Méxra xikaha chrókjuíkosáyehérá kichuára éxi yóhe nkexrí tjinkáonrá chrókjuíkosáyahará sín mé xikaha k'uetoan ch'ín Moisés la ko xikaha ntácho tro xroon kuénte tí sín k'uéchónka itén Dios ósé.

Tí puerta tekahya

(Lc. 13.24)

¹³ T'ixeenxínra tí puerta tekahya. Kixin tí puerta la ko tí ntja ts'itjáyaxín chojni la imá iton la ko teka la nchónhya chojni sátsji tí ntja ntiha. ¹⁴ A ntá tí puerta la ko tí ntja sátsjixinni tí kjuachón la tekahya ntiha la ko tsjéhya chojni ts'itja tí ntja a.

Tí to mé tjátsqanxíni tí nta

(Lc. 6.43-44)

¹⁵ Méxra tóxakonhanrá tí ts'ikonrá itsi tí sín ch'ia tsontácho sín kixin kjaxin sín nixja sín itén Dios. Jehe sín la chrítaón ó tjoé kolélo ó, a ntá nkaya la kolobo jiehe. ¹⁶ Jahará la chrókjuátsqanxínra tí jehe sín kixin tí xrá ch'e sín kixin tí ntach'i la xitjahya chrók'óna to uva la ko tí kach'i xitjahya chrók'óna to higo. ¹⁷ Méxra kaín inta jína la t'óna to jína la ntá tí nta jínahya la kjaxin tí to la jehya to jína. ¹⁸ Tí nta jína la xitjahya chrók'óna to jínahya, la ko tí nta jínahya xitjahya chrók'óna to jína. ¹⁹ Kaínxín tí nta t'ónahya to jína mé tsochrínjin la tsoche. ²⁰ Mé xikaha chrókjuátsqanxínra jahará tí sín jehya jína kixin tí xrá tjejóch'e sín.

Jehya kaín chojni ts'ixenhen tí kjuachaxién Dios tjen nkaya nkajní

(Lc. 13.25-27)

²¹ Kénhya chojni tsontácho: "Ínchéni, Ínchéni", mé ts'ixenhen sín tí kjuachaxién Dios tjen nkaya nkajní. Náhi. Jehó tí nkexro sinchexiteyá tí nkehe tóxrjínjin T'aná t'etoan tjen nkaya nkajní. ²² Tsixraká tí yaon a la ntá itsjé sín tsontácho sín kixin: "Ínchéni, Ínchéni, k'uénixjaxíni ihniá la ko tí ihniá mé kuakitsjexíni nchakuen tí jínahya la ko kjuachaxién ihniá kjuasixíni nchónhya kjuaxroan." ²³ A ntá janhan tsjatahā kixin: "Janhan la chonhya tí jahará. Tjtonará sájtjirá kixin jahará imá jínahyará."

Ch'ín Jesús kjuíncheyóexin ch'án kixin yaá nchia

(Lc. 6.47-49; Mr. 1.22)

²⁴ Méxra tí nkexro tinhin tí nkehe ntáxrjan la titekaon ch'án la jehe ch'án mé éxi yóhe ijnko nkexro chóna kjuaxrexinkaon jína la kjuích'ena nchia chrítaón tjo. ²⁵ A ntá xrínghya xrakoa chrin, ikui yeé ntāninche la tjān chjéhe xrínto la kjónté xikaha la xíkahya tí nchia kixin itjo tjekjen nchia. ²⁶ A ntá tí nkexro tinhin tí xrjan-ka la titekakonhya mé jehe la éxi yóhe ijnko nkexro lontj la kjuích'ena ch'án ijnko nchia tí síin nchesen. ²⁷ La ntá xrínghya xrakoa chrin ntá antsí kóyeé ntāninche tí tsaka la ko chjéhe xrínto la ntá xíka tí nchia, la ijnko kjuachrakon kónhen tíha.

²⁸ A ntá tió kjuixin nixja ch'ín Jesús la ntá imá chrakon tí chojni kixin nkexrí kjuako ch'án. ²⁹ Kíxin kjuako ch'án éxi ijnko nkexro chóna imá kjuachaxin la tóyóghya ch'án tí sín maestro kjuako tí ley.

Ch'ín Jesús kjuínchekitohe jína ijnko chojni chóna chin lepra

(Mr. 1.40-45; Lc. 5.12-16)

8 A ntá ch'ín Jesús k'uínkajinxin ch'án tí jna la chréhe nchónhya chojni. ² La ntá kóchjina ijnko ch'ín níhi chóna chin lepra la kjuák'exín toh'in ch'án nkayakon ch'ín Jesús la ntáchro ch'án kixin:

—Ínchéni tí tjinkávan la jína chrókjuínchekitohéni jína —ichro ch'án.

³ Ntá ch'ín Jesús mé kjuak'etja itja ch'án chrítaón tí ch'ín a la ntáchro ch'án kixin:

—Méxra xíkaha tjinkávan. Ntá jie sintakitoha jína.

A ntá tuénxín kuitohe ch'án jína la ó kjuiin tí chin k'uéchóna ch'án.

⁴ La ntá ntáchro ch'ín Jesús kixin:

—Ninkexró chenkahya ntihi. Jehó sáttja tjákohe tí ch'ín nchát'á kixin kuitoha jína la ko sáttjioa tí nkehe tsík'etqan ch'ín Moisés † kixin ntá xíkaha tsonoexín kaín xín chojni kixin ó kuitoha jína —mé xíkaha k'ueqan ch'ín Jesús.

Ch'ín Jesús kjuínchekitohe jína ijnko nkexro ch'ehe xra ijnko capitán romano

(Lc. 7.1-10)

⁵ A ntá tió k'uixenhen ch'ín Jesús chjasin Capernaum la ntá xrínahya kóchjina ijnko capitán romano la chróna ch'án ⁶ ntáchro ch'án kixin:

—Ínchéni ntqeni itjen ijnko ch'ín ch'ehe ni xra mé níhi ch'án, tjetsínka ch'án, tsík'en toté ch'án la imá tjtóhé ch'án —ichro ch'án.

⁷ A ntá ch'ín Jesús kjuátehe ch'án ntáchro ch'án kixin:

—¿Á sátsjia sintakitoha jína tí ch'ín a? —ichro ch'án.

⁸ Ntá tí ch'ín capitán kjuátehe kixin:

—Náhi, Ínchéni, tósuèheni kixin chrók'uixenhen ntqeni kixin jehya chojni jínani. Jehó chrókjuánjuan kjuachaxin kuéntá, ntá tí ch'ín ch'ehe ni xra chrókuitohe ch'án jína. ⁹ Janhan na kjaxin chonta chojni t'etuanna la ko kjaxin janhan tétuñhan tí sín soldado. Tió tétuñhan ijnko sín sátsji sín la ntá ó sátsji sín. La kjaxin tió tétuñhan ijnko sín kixin xrakoa sín la mé tji sín. La ko tió tétuñhan ijnko nkexro ch'ena xra kixin sich'e xra la ich'e xra —ichro ch'án.

¹⁰ Ntá kuínhin ch'ín Jesús ntá kóxakonhen ch'án kixin xíkaha chro tí ch'ín a, ntá nixjehé ch'án tí sín chréhe ch'án ntáchro ch'án kixin:

—Chaxín ntáxrjan kixin kuenté tí nación Israel la k'uitjahya janhan ninkexró tinkáchónki xíkaha éxi tinkáchónki tí ch'ín i. ¹¹ Janhan xrjanca kixin nchónhya chojni ókjé tjixin tí tjitoxin yaon la ko tí tjiátóxin yaon la sineko sín tí ch'ín Abraham la ko Isaac la ko Jacob tí tjen tí kjuachaxin kuénte Dios. ¹² A ntá itsjé tí sín chrók'uejó tí tjen tí kjuachaxin kuénte Dios la ts'axr-

† Levítico 14.1-32

jéxín sín ntiha, sátsji sín tí sítié la ntaha tsotsjánka sín la sinetaón neno sín.

¹³ La ntá ch'ín Jesús mé nixjehé ch'án tí ch'ín capitán ntáchro ch'án kixin:

—Sáttja ntqo. Éxi kúitekávan jaha la tsoxiteyá tsonhen tíha —ichro ch'án.

La ntá tí ch'ín ch'e xra la o tuénxín tí hora a tsíkitohe ch'án jína.

Ch'ín Jesús kjuínchekitohe ich'ee ch'ín Pedro jína

(Mr. 1.29-31; Lc. 4.38-39)

¹⁴ A ntá sákjuí ch'ín Jesús tí ntqo ch'ín Pedro la ntaha k'uíkon ch'án kixin tí ich'ee ch'ín Pedro la níhi tjan tjet-sínka tjan la chóna tjan sóa. ¹⁵ Ntá itsé ch'án itja tjan la ntá kjuiinhin tjan tí sóa la ntá k'uínkatjen tjan la kjuankixin yaxinhin tjan kixin tsjanjon tjan nkehe sine sín.

Ch'ín Jesús kjuínchekitohe nchónhya tí sín níhi jína

(Mr. 1.32-34; Lc. 4.40-41)

¹⁶ La ntá tí ó kóntanonte ntá kjuikohe sín ch'ín Jesús nchónhya chojni chóna nchakuen tí jínahya. La ntá jnkokoá nixja ch'án la k'uaxrjéxín tí nchakuen tí jínahya tí jehe sín la kjaxin kjuínchekitohe ch'án jína kaín tí sinníhi. ¹⁷ Mé xíkaha kjuích'e ch'án kixin tsoxiteyá tí nkehe tsíchrónka tí ch'ín Isaías tí ch'ín k'uéchrónka itén Dios. Mé ntáchro ch'án xíkahi: "Jehe ch'án kuákja ch'án tí chin chóntani la ko jehe ch'án kuámá ch'án tí kjuatjoté." †† Mé xíkaha ichro itén Dios.

Tí sín tjinkaon tsochréhe tí ch'ín Jesús

(Lc. 9.57-62)

¹⁸ Tió k'uíkon ch'ín Jesús kixin nchónhya chojni k'uán-tatjen sín ch'án la ntá k'ueqan ch'án kixin ts'átòye sín íjnko chrínta ntá. ¹⁹ La ntá ijnko tí sín maestro tjako tí ley mé kóchjinehe ch'án tí ch'ín Jesús la ntáchro ch'án kixin:

—Maestro tjinkaonni chróchréheni tí jaha kjónté nketí tjinkávan sátsjia —ichro tí ch'ín a.

²⁰ La ntá kjuátehe ch'ín Jesús ntáchro ch'án kixin:

—Tí koxróntá chóna va itjuéé va la ko tí koxroxé chóna va káké va. A ntá tí Xjeen Dios K'óna Chojni mé chóntahya nketí ts'ok'èxin ch'án.

²¹ A ntá ijnko tí chojni k'uájiko ch'án, mé ntáchro ch'án kixin:

—Ínchéni, tjtóhéni senó sátsjikjaváni it'èni —ichro ch'án.

²² La ntá kjuátehe ch'ín Jesús ntáchro ch'án kixin:

—Náhi, chréhé tí janhan. Tjtóhé kixin tí chojni tsík'en la jnkokón sín tsík'en tsjavá kichó sín —mé xíkaha ichro ch'ín Jesús.

Ch'ín Jesús kjuínchek'ixrata tí xrinto la ko tí ntá

(Mr. 4.35-41; Lc. 8.22-25)

²³ Ntá ch'ín Jesús k'uixenhen tí ntabárcqo la k'uixenko ch'án tí sín k'uájiko ch'án. ²⁴ La ntá xrínahya imá síchri-

†† Isaías 53.4

ca ntə la ó chjina sítikia ntə tí ntabárcə. La kjánchó ch'ín Jesús la tjejua ch'án. ²⁵ La ntá tí sín k'uájiko ch'án kjuínchek'àya sín ch'án la ntáchro sín kixin:

—Ínchéni nchekaáni kixin tí ntabárcə la ó meró ts'aniánki ntə —ichro sín.

²⁶ Ntá kjuátehe ch'án ntáchro ch'án kixin:

—¿Nkekuénté kixin imá chrakonrá? Intsíkoá tin-kachónkirá Dios —ichro ch'án.

Kjuixin ntáchro ch'án xikaha ntá k'uàya ch'án la k'uətuənhen ch'án tí xríntə la ko tí ntayaon la ntá tuénxín k'uixrata. ²⁷ La ntá imá chrakon sín la ntáchro sín kixin:

—¿Xá nkexro tíhi? Kjónté xríntə la ko ntayaon la mé nchexiteyéhe ch'án —ichro sín.

Tí sín chóna nchakuen tí jínahya tí nonte Gadara

(Mr. 5.1-20; Lc. 8.26-39)

²⁸ Ntá tió k'uátòye ch'ín Jesús tí ntayaon a ntá kjuíji sín tí nonte Gadara. La ntá yaá chojni chóna nchakuen tí jínahya k'uaxrjexín tòye chojni tsík'en la kóchjinehe sín ch'án. Jehe sín mé imá jijehe sín la koha ninxeró tjacha ts'atsínka tí ntja ntiha. ²⁹ La ntá kjuankíxin k'óyako sín ntáchro sín kixin:

—Tjiatéhya jaha tí jeheni jaha Jesús mé Xjeen Dios. ¿Á k'uinka ntihi kixin sijnchekjasóteni kjónte naxə kjuixrakáhya tí yaon tsjasóteni? —ichro sín.

³⁰ A ntá ntiha kánhyó kjín siín itsjé cochíno xrine va. ³¹ La ntá tí nchakuen tí jínahya mé chrónóehə tí ch'ín Jesús kixin:

—Tí tsétəan kixin sátsjini la chrókjuánjuan kjuachaxin chrók'uixenhenni tí cochíno —ichro sín.

³² Ntá ntáchro ch'ín Jesús kixin:

—Tí xikaha la sáttja —ichro ch'án.

La ntá tí nchakuen tí jínahya a mé k'uaxrjexín tí chojni la k'uixenhen tí cochíno. La ntá kaín xín tí cochíno kuinká va, k'uínkajínxín va ntiha kjuítsínkayá va tsəka, ntá kjuítsínkankí va ntə, kjuínhin va ntə.

³³ La ntá tí chojni t'ayakonhen tí cochíno mé chrakon sín ntá kuinká sín sákjuí sín chjasin la kjuankíxin chrónka sín kaín tí nkehe kónhen la ko kaín nkehe kónhen tí sín k'uéchóna tí nchakuen tí jínahya. ³⁴ A ntá kaín tí sín chjasin ntiha sákjuítsjehe sín ntá kjuíji sín tí tjen ch'ín Jesús ntá k'uíkon sín kixin xikaha tsíkónhen la chrónóehə sín ch'án kixin sáchrókjuí ch'án ókjé.

Ch'ín Jesús kjuínchekitohe jína ijnko chojni tsík'en toté

(Mr. 2.1-12; Lc. 5.17-26)

⁹ La ntá kjuixin tíha ntá ch'ín Jesús mé k'uixenhen ch'án ijnko ntabárcə la k'uátsínka ch'án í jnko lado chrínta ntə la kjuíji ch'án chjasén ch'án. ² A ntá ntiha kuikəo sín ijnko ch'ín tsík'en toté la tjetsínkaták'á ijnko kania. Ntá k'uíkon ch'ín Jesús kixin chaxín tin-káchónki sín ch'án la ntá nixjehə ch'án tí sijníhi ntáchro ch'án kixin:

—Xjeenni nchechéhé əsán. Tí jje chonta la ó kjuixin kjuíinhan —ichro ch'án.

³ La ntá iso tí sín maestro tjako tí ley mé jehó sín ikjo sín əsén sín, ntáchro sín kixin:

—Tí ch'ín i mé ncheyóhə ch'án əsén ch'án Dios kixin xikaha nixja ch'án.

⁴ Ntá ch'ín Jesús mé ó nohe ch'án kixin nkehe tí kjo sín əsén sín ntá ntáchro ch'án kixin:

—¿Nkekuénté kixin xikaha jínahya tjenkayáxinrá?

⁵ ¿Nkehe əntsí xrahya chróntátjan ch'án? ¿Á əntsí xrahya chróntátjan ch'án kixin ó kjuixin kjuíinhin ch'án tí jje yámá ch'án o á əntsí xrahya chróntátjan ch'án kixin chrók'uínkatjen ch'án sáchrókjuí ch'án? ⁶ Méxra tsjákoxiə kixin tí Xjeen Dios K'óna Chojni mé ntihi chjasintajni chóna kjuachaxin tsjakjiinhin ijje chojni.

Ntá ntáche ch'án tí sijníhi a kixin:

—Ijie la t'ínkatjen tjatsíyan kaniəa na sátsjia ntəa —ichro ch'án.

⁷ Ntá tí ch'ín tsík'en toté na tuénxín k'uínkatjen ch'án la sakjuí ch'án ntəe ch'án. ⁸ Ntá kaín tí sín siín ntiha k'uíkon sín kixin xikaha kónhen la imá chrakon sín la kjuanchehe sín Dios kjuasáya kixin tí nkexro imá kjuəkoxiə ch'án kjuachaxin kuénte Dios.

Ch'ín Jesús k'uíyehə ch'án tí ch'ín Mateo

(Mr. 2.13-17; Lc. 5.27-32)

⁹ A ntá ch'ín Jesús sákjuíxin ch'án ntiha la k'uíkon ch'án ijnko ch'ín it'in Mateo tjetjəxin ch'án ntiha nchekjènkí ch'án. Ntá ntáchro ch'ín Jesús kixin:

—Chréhé tí janhan —ichro ch'án.

Ntá ch'ín Mateo tuénxín k'uínkatjen ch'án chréhə ch'án tí ch'ín Jesús.

¹⁰ A ntá chr'éxin ch'ín Jesús kjuák'e ch'án ntəe tí ch'ín Mateo la ntaha xranjon nkehe sine ch'án la ntá itsjé tí sín nchekjènkí la ko í so sín chóna jje mé kjuíji sín la kjaxin kjóneko sín tí ch'ín Jesús la ko tí sín k'uájiko ch'án. ¹¹ La ntá tí sín fariseo kjaxin k'uíkon sín xikaha la kjuanchankíhi sín tí sín k'uájiko ch'ín Jesús, ntáchro sín kixin:

—¿Nkekuénté kixin tí ch'ín maestro kuéntará mé neko ch'án tí sín nchekjènkí la ko tí í so sín chóna jje? —ichro sín.

¹² Ntá ch'ín Jesús la kuínhin ch'án nkehe tí tjo sín la ntáchro ch'án kixin:

—Tí sín níehya la t'ichjánxjenhya sín nkexro sich'e xroə. Náhí. Jehó tí chojni níhi mé t'ichjánxínhin sín nkexro sich'ehe sín xroə. ¹³ Sáttjirá la ts'ítjará nkexrí t'axrjexín tí nkehe ntáchro xroon itén Dios. Mé ntáchro kixin: "Janhan tjínkəvan kixin chrókjuíkonəhéhérá chojni la tjínkəkonhya kixin chrók'oyánrá iko chrókjuánjonrá." † Mé xikaha ichro itén Dios. Janhan na k'uinkahya ntihi kixin chrók'uíyahə chojni jína tjejó. Náhí. K'uinka kixin ts'íyahə tí chojni chóna jje kixin chrókjuítohe sín tí ijje sín ntá chrókjuíki sín tí tjenkayáxin sín —ichro ch'án.

Kjuanchankí sín kuénte tí nehya sín

(Mr. 2.18-22; Lc. 5.33-39)

¹⁴ Ntá iso tí sín k'uék'ajiko tí ch'ín Juan Bautista mé kóchjinehe sín ch'ín Jesús la kjuanchankíhi sín ch'án, ntáchro sín kixin:

† Oseas 6.6

—Jeheni la ko tí sín fariseo la jnkoyaxon nehyani, a ntá tí sín xrikoá la, ¿nkekuente xikahya ch'e sín? —ichro sín.

¹⁵ Ntá kjuátehe ch'ín Jesús, ntáchro ch'án kixin:

—¿Xá chrók'uává kaín tí sín tsík'íyehē sín tsqchjina tsqtehe ijnko chojni kixin naxa tjen tí ch'ín tsíkótehe tjejóko sín ntiha? A ntá tsjixraká ijnko yaon tsotsé sín tí ch'ín tsíkótehe sátsjiko sín ch'án ntá kaín tí sín tsíkóchjina mé ts'ává sín la í sinehya sín.

¹⁶ Nijanko chojni chrókjuak'eniēhe tí ka ó ntaxin it'ó ka nixin kixin ntá chrókjuixéhe tí ka nixin chrók'uitjjan tí ka ntaxin ntá antsí má chrók'uichje. ¹⁷ La ko kjaxin éxi yóhe chrókuikiahya chojni xranvino nixin ijnko tjuaxran ó ntaxin kixin tí xikaha chrókjuich'e sín ntá chrók'uichje ti tjuaxran ntaxin. Ntá chrók'uitjýan tí xran la ko chrok'uitjýan tí tjuaxran. Ntá tí xranvino nixin chrókuikia ijnko tjuaxran nixin la ntá xikaha la yóí nkehe chrók'uitjýanhya.

Ch'ín Jesús kjuínchexechón tí tjachjin xjeen ch'ín Jairo la ko kjuínchekitohe jína ijnko tjan kuákóxin iké ch'án
(Mr. 5.21-43; Lc. 8.40-56)

¹⁸ Ntá naxa tjenixja ch'ín Jesús la ntá ikjui ijnko ch'ín t'etqan kuente tí sín judío la kjuák'exín toch'in ch'án nkayakon tí ch'ín Jesús la chrónóehē ch'án kixin:

—Tí xjanna na ntá kjuixin k'uén. Xrjanóaha sáchrókjuini chrókjuakétja tjá jehe tjan ntá chróxechón tjan —ichro ch'án.

¹⁹ Ntá k'uínkatjen ch'ín Jesús ntá sákjuíko ch'án tí ch'ín a la ko sákjuíkotoxin ch'án tí sín k'uájiko ch'án.

²⁰ A ntá itjen ijnko chojni chjin níhi tjan, ó teyó nánó chóna tjan ijnko chin ts'itji tjan jni. Ntá kóchjina tjan nóton tí ch'ín Jesús ntá kuákóxin tjan tí iké ch'án ²¹ kixin tjenkayáxin tjan kixin kjónté chrínta iké ch'án ó chrókuákóxin tjan, la táhó chrókuítqexín tjan jína.

²² Ntá nkátjía ch'ín Jesús la k'uíkon ch'án tí tjan a ntá ntáchro ch'án kixin:

—Xjeenni, nchechéhé asán jaha. Jaha la ó kuítqha jí-na kixin kuítekavan tí janhan —ichro ch'án.

Na ntá tuénxín ó kuítqhe tjan jína.

²³ Ntá tió kjuíji ch'ín Jesús ntqē tí ch'ín judío t'etqan la k'uíkon ch'án kixin ó yaxínhin tí sín músico kixin ó sátsjixravá xjan. La kaín tí chojni tsíkójnkotsé la tsjánkà-ma sín xjan. ²⁴ La ntá ntáchro ch'ín Jesús kixin:

—Tí xjan méhe tjtqherá, kixin tsík'enhya xjan, la tje-jua xjan ó —ichro ch'an.

Ntá kjuanoá sín ch'án. ²⁵ A ntá tí k'uaxrje kaín chojni la ntá ch'ín Jesús la k'uíxenhē ch'án la itsé ch'án itja tí tjan a la ntá tuénxín k'uínkatjen tjan. ²⁶ Ntá kuenté chjasin ntiha la kuínhin sín kixin xikaha kónhen.

Ch'ín Jesús kjuínchekitohe jína yaá sín t'ikonhya

²⁷ Ntá sákjuíxin ch'ín Jesús ntiha la ntá yaá chojni t'ikonhya kjuíchréhe tí jehe ch'án la k'uíyehē sín ch'án ntáchro sín kixin:

—Tikonóehéni jaha tsík'axrjenixian David.

²⁸ Ntá k'uíxenhē ch'ín Jesús ijnko nchia na ntá kóchjina tí yaá sín t'ikonhya la ntá ch'ín Jesús kjuanchankíhi sín ch'án, ntáchro ch'án kixin:

—¿Á titekavan kixin tsjácha sít'a xikaha? —mé xikaha kjuanchankí ch'án.

Ntá kjuátehe sín kixin:

—Jeén, Ìnchéni, titekaonni.

²⁹ Ntá ch'ín Jesús kjuak'etja tja ch'án chrítaón ikon sín la ntáchro ch'án kixin:

—Tí xikaha kuítekavan la tsoxiteyá —mé xikaha ichro ch'án.

³⁰ La ntá tuénxín ó jína t'ikon sín. Ntá ch'ín Jesús k'uetqenhen sín ch'án kixin:

—Ninkexró tsochenkahyará —ichro ch'án.

³¹ Ntá tuénxín sákjuí sín la nkuíxin chjasin ntiha chrónka sín tí kjuaxroan kjuasin ch'ín Jesús.

Ch'ín Jesús kjuínchekitohe jína ijnko ch'ín nósin

³² Tió sákjuí tí sín k'uék'ikonhya, a ntá iso chojni kjuikqo sín ijnko ch'ín nósin ch'án la chóna ch'án nchakuen tí jínahya. ³³ Ntá ch'ín Jesús kuakitsje tí nchakuen tí jínahya ntá tí ch'ín nósin la ó kjuankixin nixja ch'án. Ntá kaín chojni la k'uíkon sín la ntáchro sín kixin:

—Nunca t'ikonhyéni ijnko kjuaxroan xikaha kuenté tí nación Israel —ichro sín.

³⁴ A ntá tí sín fariseo ntáchro sín kixin:

—Tí nkexro t'etqenhen tí nchakuen tí jínahya tsíkjanjon kjuachaxin mé xikaha takitsje tí ch'ín í tí nchakuen tí jínahya —mé xikaha ichro sín.

Ch'ín Jesús kuíkonóehē ch'án chojni

³⁵ Ntá k'uátsínka ch'ín Jesús itsjé chjasin jíé la ko chjasin ntsí la kjuakqoxin ch'án jnkojnko nínko Israel. Chrónka ch'án tí tan jína nkexrí tjen tí kjuachaxin kuente Dios. La ntá kjuínchekitohe ch'án jína chojni níhi chóna kaín xín chin la ko chojni chóna kjuatjoté.

³⁶ K'uíkon ch'án kixin nchónhya chojni k'uéjé sín ntá kuíkonóehē ch'án sín kixin imá tóxakonhen sín la k'uéjé sín éxi kolélo chóntahya nkexro t'ayakonhen.

³⁷ Ntá ntáche ch'án tí sín k'uájiko ch'án kixin:

—Chaxín ntáxrjan janhan kixin imá tsík'óna, kjánchó chojni sich'e xra mé tsjéhya. ³⁸ Chrókjuancheherá tí Ìnché tí nonte kixin chróchr'án ch'án itsjé chojni chrókjuich'e xra —mé xikaha ichro ch'ín Jesús.

Ch'ín Jesús kjueyá teyó sín ts'ajiko ch'án

(Mr. 3.13-19; Lc. 6.12-16)

10 Ntá ch'ín Jesús mé kjueyá ch'án teyó sín ts'ajiko ch'án la kjuanjon ch'án kjuachaxin tsakitsje sín kaín tí nchakuen tí jínahya t'etqenhen asén chojni la ko sinchekitohe sín jína kaín chojni chóna kaín chin la ko kaín xín kjuatjoté.

² Na mé tí teyó sín k'uájiko ch'án mé it'in sín xikihi: saoxín mé ch'ín Simón na mé kjaxin it'in ch'án Pedro la ko kichó ch'án Andrés la ko ch'ín Jacobo la ko kichó ch'án Juan mé tí xjeen ch'ín Zebedeo. ³ La ko kjaxin

ch'ín Felipe la ko ch'ín Bartolomé la ko ch'ín Tomás la ko ch'ín Mateo mé tí ch'ín nchekjènkjì la ko ch'ín Jacobo xjeen ch'ín Alfeo la ko ch'ín Lebeo, mé jehe ch'án kjàxin it'in ch'án Tadeo. ⁴ La ko kjàxin ch'ín Simón, mé kuènte tí sín cananista, la ko kjàxin ch'ín Judas Iscariote, mé tí nkexro chr'èxìn kjuínchekji tí ch'ín Jesús.

Ch'ín Jesús k'uetuēnhen tí teyó sín kixin sátsjikjako sín kjuachaxin kuènte Dios

(Mr. 6.7-13; Lc. 9.1-6)

⁵ Ntá k'uetuēnhen ch'ín Jesús tí teyó sín kixin sátsji sín la k'uetuēn ch'án kixin:

—Tjìhyará tí tjejó tí sín jehya judío la ko t'ixēnhyará tí chjasin siín estado Samaria. ⁶ Náhí. Íchá jína sátsjírà tí tjejó tí chojni éxí kolélo kjuíchroē kuènte nación Israel. ⁷ Sátsjírà tjákohérà sín kixin kjuachaxiēn Dios tjen nkaya nkajní la í séhya tsi. ⁸ Sínchekitohérà jína chojni níhi la ko sínchekitohérà jína tí sín chóna chin lepra la ko sínchexechónrà chojni tsík'en la takítsjerà tí nchakuen tí jínahya. Jahará kjàxin kuitōnhānrà tí kjuachaxiēn Dios, méxra chrókjuachahyarà jahará kjàxin.

⁹ Chrókjuikuahyarà ninkehó chichaon oro la ko ninkehó chichaon plata la ko ninkehó chichaon cobre ¹⁰ la ko tí sátsjírà ntja la chrókjuikuahyarà ka bolsa la chrókjuikuahyarà yaá ka chrók'uínkayaterà la ko chrókjuankahyarà tokatárà la ko chrókjuikuahyarà nta tjixinrà. Tí nkexro ch'e xra la jehí siín kjuachaxin ntiha chrókjónē.

¹¹ A ntá tió tsjasánrà ijnko chjasin jìē o ijnko chjasin ntsí la tjéyará ijnko nkexro tsjanjon kjuachaxin la ntōē sín ntaohó chrókuitōharà ntá tsjixin tí xra ntá sátsjírà. ¹² A ntá tió t'ixēnhénrà ntōē sín la nixjehérà sín tjákox-ijnrà jnkojína. ¹³ A ntá tí chaxín jína asén sín la ts'áyēhe sín tí kjuaxróxin, a ntá tí náhi la sátsjikorà tí kjuaxróxin. ¹⁴ A ntá tí tsochrohya sín tsjanjon sín kjuachaxin tsi-tōharà la tjínkakhonhya sín tsinhin sín tí nkehe tsochroñkarà na mé t'axrjéxínrà tí ntōē sín o tí chjasén sín la t'oxènjínrà tí inche chóna totárà. ¹⁵ A ntá chaxín tjōnkarà kixin tió tsjixrakà tí yaon tsjixixín na mé tí sín chjasin Sodoma la ko tí sín Gomorra kjónté imá k'uéchóna sín jìē la kánhyó tsjasóte sín, a ntá tí sín chjasin a la antsí tsjasóte sín kixin k'uéjóróxinhya sín tí tan chrókuaáxin sín.

Ókjé sín tsonínkakhonhen tí sín kuènte Cristo

¹⁶ Janhan tsochr'an tí jahará éxí yóhe chróchr'an kolélo ts'ejóyakan kolóbo. Listo chrók'uejorà éxí konche xikaha la chrók'uejorà éxí kontóá chrókójiāhyará. ¹⁷ Chrókóxakōnhānrà kixin itsi chojni tsotsé sín tí jahará la sátsjikōarà sín tí tjejó tí sín t'etōan la ko nkaxenhen tí njnqōé sín tsjatiāxínrà sín. ¹⁸ La ntá tsjikaánrà sín tí tjejó tí sín t'etōan la ko tí siín tí sín rey kixin tinkachónkirà tí janhan. Ntá jína tsochroñkarà kixin tinkachónkirà tí janhan nkayakon tí jehe sín la ko nkayakon tí sín chónhya Dios. ¹⁹ A ntá tió sátsjikōarà sín tí tjejó tí sín t'etōan la tóxakuanhyará nkehe tson-táchrórà o nkexrí tsonixjarà kixin tió tsjixrakà tí hora la ntá Dios mé tsjinkjtsarà tsonixjarà. ²⁰ Kixin jehya jahará

tsonixjarà. Náhí. Tí Nchakuen It'èni mé tsochrónka nkehe tsonixjarà.

²¹ 'Ntá iso chojni mé tsjikaán sín tí kichó sín kixin its'en la ko tí it'é mé tsjikaán tí xjeen. A ntá tí xjan mé tsokjan tsonínkakhonhen tí it'é kixin its'en. ²² Kainxín chojni chjasintajni tsonínkakhonhanrà sín kixin tinkachónkirà tí janhan. A ntá tí nkexro tsítōehya tsinkáchónki sín tí janhan hasta tsjéje chjasintajni mé tsaá. ²³ Tió má chónkíharà sín ijnko chjasin la ntá sátsjírà í jnko chjasin. La ntá chaxín tsoxrxjanka kixin tí Xjeen Dios K'óna Chojni mé tsokjan tí naxa tjixinhya ts'atsínkarà kaín tí chjasin Israel.

²⁴ Tí nkexro xrakōhē la kánhyó tjetōan la tí maestro la antsí tjetōan, la ko kjàxin tí nkexro ch'e xra la tjetōanhya la antsí tjetōan tí lamo. ²⁵ A ntá tí nkexro xrakōhē chrókjuakōxín ch'án éxí tí nkexro kjuakōhē ch'án la ko tí nkexro ch'e xra chrókjuakōxín ch'án éxí tí lámōé ch'án ch'ehe ch'án xra. Tí ch'ín inché nchia la kjàxin nchek'in sín Beelzebú la kjàxin tí sín kjéhya xikaha nchek'in sín.

Nkexro tí chróchrakhonhénrà

(Lc. 12.2-9)

²⁶ Méxra chróchrakuénhyará chojni. Kohya ninkehó nkehe imó chrókónoehya chojni la ko kohya nkehe tjemá ijie kixin chrókónoehya chojni chr'èxìn. ²⁷ Tí nkehe tjōnkarà sítíē la t'ichjānxín tsochroñkarà tió itsi xrohi t'inkaséyanxín tí yaon. La ko tí nkehe tjōnkarà ijie ninkexró noehya la t'ichjānxín chroñkarà chrókuinhin kaín sín. ²⁸ Chróchrakuénhyará tí sín t'óyán cuérpōē chojni kixin asén chojni xitjahya ts'óyán sín. Íchá jína chróchrakhonhénrà tí nkexro tsjacha sinchek'itjāyanxín cuérpōē chojni la ko asén chojni tí xrohi ts'ankahya.

²⁹ ¿Á chrókóxixínhya yaá koxroxē ntsíntí ijnko chichaon ntsí? A ntá kjónté xikaha la chrók'uánótjēnhyā niijnko tí jehe va nonte tí chrókjuanjōnhyā It'èni kjuachaxin. ³⁰ A ntá kjónté tí kaxihí chóna ikjára la ó nohe ch'án nkekjaín ka chontará. ³¹ A ntá jahará chróchrakhonhyará kixin tóyōghyarà tí koxroxē kixin antsí sínkí tí jahará, a ntá tí koxroxē, kjónté nchónhya va, la kánhyó sínkí tíha.

Tí sín tósuèhya tsochrónka sín kixin tinkáchónki sín Cristo nkayakon chojni

(Lc. 12.8-9)

³² Kaín tí chojni tsochrónka kixin tinkáchónkina sin nkayakon chojni la janhan mé kjàxin tsoxrxjanka kixin choxian tí jehe sín nkayakon T'aná tjen nkaya nkajní. ³³ A ntá tí nkexro sinchemána tson-táchrō sín kixin chónhya sín tí janhan nkayakon chojni la kjàxin janhan tson-táxrxjan kixin chonhya tí jehe sín nkayakon T'aná tjen nkaya nkajní.

Jnkoqóahya tsjenkayáxin chojni kixin ó kui Ìnchéni Jesús

(Lc. 12.51-53; 14.26-27)

³⁴ Tjenkayáxinhyará kixin k'uinkakian kjuaxróxin chjasintajni. Náhí. Janhan k'uinkakianhya kjuaxróxin. Ts-

janjonko kichó chojni kixin k'uinka janhan. ³⁵ Janhan k'uinka kixin tsonínkakonhen chojni it'é, la ko tí xjeen sín chjin mé tsonínkakonhen iné, la ko tí tikintá tsonínkakonhen ich'ee. ³⁶ Mé xikaha tí sín tsonínkakonhen kichó la mé tí sín naxá kjéhya sín.

³⁷ A ntá tí nkexro antsí tjuèhe it'é sín la ko iné sín la kánhyó tjuèhe tí janhan la mé xitjahya ts'óna sín kuèntàna, la ko tí nkexro antsí tjuèhe xjeen sín la kánhyó tjuàna sín la mé xitjahya ts'óna sín kuèntàna. ³⁸ La tí nkexro tamáhya ntacruz, chrèhya sín tí janhan la mé xitjahya ts'óna sín kuèntàna. ³⁹ Tí nkexro tjinkaon kixin kohya nkehe chrókónhen sín mé ts'itjayan sín, a ntá tí nkexro chrókjuinçek'itjayanxín asén kixin tinkáchónki sín tí janhan la mé tsaá sín.

Tí nkexro ts'áyéhe nkehe

(Mr. 9.41)

⁴⁰ Tí nkexro chrókjuanjón kjuachaxin chrók'uejorá la mé éxi chrók'uáyéhe sín tí janhan la ko tí nkexro chrók'uáyéhe tí janhan la éxi yóhe chrók'uáyéhe sín tí nkexro ichr'ánna k'uinka. ⁴¹ La tí nkexro chrókjuanjón kjuachaxin tsjak'e ijnko nkexro nixja itén Dios kixin táha la Dios ichr'án la mé ts'áyéhe nkehe éxi ts'áyéhe tí nkexro kjuako. La ko tí nkexro chrókjuanjón kjuachaxin tsjak'e ijnko chojni jina kixin jina ch'án mé xikaha ts'áyéhe sín nkehe éxi ts'áyéhe tí nkexro jina. ⁴² A ntá tí nkexro sinčekitõnhen ijnko vaso ntá kin kjónté ijnko chojni noehya má, chrèhe tí janhan, la mé chaxín ntáxrjan kixin tí ch'ín a mé chaxín ts'áyéhe ch'án nkehe jina kixin xikaha kjuích'e ch'án.

Ch'ín Juan Bautista k'uètuènen iso sín

(Lc. 7.18-35)

11 Ntá ch'ín Jesús kjuixin kjuakõhe ch'án tí teyó sín xriko ch'án la ntá sákjuixin ch'án ntiha la sákjuikjako ch'án iso chjasin chjinaxón ntiha.

² A ntá ch'ín Juan mé tjechjina ch'án ntõechiso ntá xrinahya kuínhin ch'án nkerí xra tjech'e Cristo. La ntá k'uètuènen ch'án iyó tí sín k'uék'ajiko ch'án kixin sát-sjitsjehe sín tí ch'ín Jesús. ³ Ntá sákjuí sín kjuíji sín ntiha ntá kjuanchankíhi sín ch'án ntáchro sín kixin:

—¿Á jaha tí nkexro itsi ní o á naxá tsochónhenni í jnko nkexro? —ichro sín.

⁴ A ntá kjuátehe ch'ín Jesús, ntáchro ch'án kixin:

—Sátjirá tjichenkará tí ch'ín Juan tí nkehe k'uíkonrá la ko tí nkehe kuínhírá. ⁵ Chenkará ch'án kixin tí sín k'uék'ikonhya la ó t'ikon sín jie la tí sín xitjahya k'uékji la ó tji sín la ko tí sín k'uéchónta chin lepra la ó kótjóá sín kuítõhe sín jina la ko tí sín k'uékienhya la ó tinhin sín jie. Kjaxin tí sín tsík'en na ó xechón sín inaá la ko kaín tí sín nõa mé síxrakõhe sín tí tan jina tsaáxin sín. ⁶ Méxra imá náxrjón tí nkexro kohya nkehe t'inkákonhen tinkáchónki tí janhan.

⁷ Tió sákjuí sín ntá ch'ín Jesús kjuankixin nixjehe ch'án tí sín k'uéjõ la chrónka ch'án kuènte ch'ín Juan ntáchro ch'án kixin:

—Tí sákjuítsjehérá ch'ín Juan nteje la, ¿nkexrí k'uíkonrá tí jehe ch'án? ¿Á k'uíkonrá ch'án éxi ijnko tji

nchexrayehe xrintõ? ⁸ Tí náhi, la ¿nkehe k'uíkonrá? ¿Á k'uíkonrá ch'án éxi ijnko nkexro tsík'itsa jina? Jahará ó nohará kixin chojni tsík'itsa jina la tjejó sín tí nchia kuènte tí sín rey. ⁹ ¿A ntá nkehe k'uíkonrá? ¿Á ijnko nkexro chrónka itén Dios? Jehe chaxín la antsí chónta ch'án kjuachaxin la tí sín k'uéchrónta itén Dios la kánhyó. ¹⁰ Ch'ín Juan mé tí nkexro kui éxi xikaha chrónka xroon itén Dios ósé. Mé ntáchro xikíhi:

Janhan mé tsochr'an ijnko nkexro tsochrónka itan kuèntàna tsitónxin ntia,

kixin tsjasiyóxin ch'án ntia kuèntá. †

Mé xikaha chrónka itén Dios. ¹¹ Ntá ijnko nkehe chaxín tsõtjõnkará kixin kaín tí nkexro k'uéjõ senó la kánhyó tjetõan sín la antsí tjetõan tí ch'ín Juan Bautista.

Kjánchó ijnko nkexro kjónté tjetuanhya la tí ts'áyéhe sín tí kjuachaxièn Dios tjen nkaya nkajni la antsí tjetõan sín la ntá jehe ch'ín Juan la kénhyó.

¹² Tí ikui ch'ín Juan Bautista hasta ijie la imá tjanjõnxin tí sín tjinkaon ts'ikon sín tí kjuachaxin kuènte nkaya nkajni. La jehó tí sín imá chónta kjuachaxin mé tsjacha sín. ¹³ Kaín tí sín profeta la ko tí ley kuènte ch'ín Moisés mé chrónka nkexrí tí kjuachaxin kuènte Dios hasta ikui ch'ín Juan. ¹⁴ A ntá tí jahará chrókuítekáonrá tíhi; kixin ch'ín Juan la mé ikui kixin tí xra kuènte ch'ín Elías tsjintaxín sich'e ch'án kixin ch'ín Elías la t'ichjánxin chrókui ch'án inaá. ¹⁵ Tí nkexro tjinkaon chrókuinhin la chrókuinhin.

¹⁶ ¿Nkexrí chrókjuintayõaxian tí chojni tjejó ijie? Tóyõhe sín tí chánjan tjejõtjõxin sín ntsin tsítan sín la t'iyõhe sín kichó sín ¹⁷ ntáchro sín kixin: “K'uánoani flauta kjánchó jahará la tehyará. Itsjeni isón kuènte chojni tsík'en la ntá k'uaváhyará la ko tsjankahyará.” ¹⁸ Kixin tí ikui ch'ín Juan la kjónehya ch'án la k'uíhya ch'án vino la jahará ntáchrórá kixin ijnko nchakuen tí jinahya mé chónta ch'án. ¹⁹ A ntá tió kui tí Xjeen Dios K'óna Chojni ntá kjóne ch'án la ko ik'ui ch'án, ntá ntáchrórá kixin imá itsjé kjóne ch'án la imá ik'ui ch'án la ko imá t'ito ch'án tí chojni chónta jje la ko tí sín nchekjènkj, ichrorá. A ntá tí kjuachaxin kuènte Dios mé tjakõxin tí xjeen ch'án.

Tí chjasin titekakonhya

(Lc. 10.13-15)

²⁰ Ntá ch'ín Jesús mé kjuankixin ch'án ntáche ch'án tí sín tjejó iso tí chjasin imá kjuasixin ch'án kjuaxroan kixin kjónté xikaha la naxá kuinkáchónkihya sín Dios.

²¹ Ntá ntáchro ch'án kixin:

—Nòará jahará tjejorá chjasin Corazín la ko nõará jahará tjejorá chjasin Betsaida. Tí chrók'uxin tí kjuaxroan tí chjasin Tiro la ko chjasin Sidón éxi k'uíkonrá jahará ntá tí chrókójehe sín la tjoka chrókuinkáchónki sín Dios la tjoka chrókjuakõxin sín chrók'uinkáya sín ka tié la ko nteso chrókjuinçek'ia sín asén sín. ²² Ntá ntáxrjan kixin tí yaon tsitõexín ijie chojni a ntá jahará antsí tsjasótiará, a ntá tí sín chjasin Tiro la ko chjasin Sidón la kénhyó tsjasóte sín. ²³ A ntá jahará chojni chjasin Capernaum tjenkayáxinrá kixin

† Malaquías 3.1

imá nohará a ntá sátsjírá nkaya nkajní, ichrorá, kjánchó chaxínhya. Jahará la tsjasinkajinxinrá ntiha sátsjírá tsjasótiará tí síin tí sín tsík'en. Tí chrókjuásian tí kjuaxroan tí chjasin Sodoma éxí kjuásian chjasánrá la tí chjasin la kjá naxa chrók'uixin sín naxa chrók'uitjáyanyha sín tí yaon ijie kixin tjoka chrókuitekaon sín. ²⁴ A ntá tjonkara kixin tió sincheki-tóéxín Dios ijie chojni la antsí tsjasótiará la tí sín chjasin Sodoma la kénhyó tsjasóte sín.

Xrákirá tí tjén janhan la ts'ok'áhará
(Lc. 10.21-22)

²⁵ Ntá tí yaon a ch'ín Jesús mé nixjehé ch'án It'é ch'án ntáchro ch'án kixin:

—Tjáncháha kjuasáya It'éni mé Ìnché nkaya nkajni la ko chjasintajni kixin jaha kjuánjonhya kjuachaxin chrók'uitja tí sín imá nohe a ntá kjuánjuan kjuachaxin kixin ts'itja tí sín noehya. ²⁶ Mé xikaha It'éni jaha kóxr-jínhan kixin xikaha tsonhen —ichro ch'ín Jesús.

²⁷ Ntá ntáchro ch'ín Jesús kixin:

—T'aná mé chjina kaín xín nkehe. Kohya ninkexró chaxín chóxin tí Xjeen ch'án. Jehó It'é ch'án mé chóxin ch'án la kohya ninkexró chóxin tí It'é ch'án. Jehó tí Xjeen ch'án mé chóxin ch'án la ko tí sín tsíkjejá ch'án tsochóxin sín ch'án. ²⁸ Xrákirá kaín rá tí tjén janhan tí jahará imá tsíkóxrjérá kjuích'erá xra la yamára nkehe iye la ntá janhan mé sjintak'ok'áhará. ²⁹ Tákjára tí xra kuèntana la ts'itjará kuèntana kixin janhan mé jina asenná la ntahnkehya. Ntaha mé ts'itjará ts'ok'èxin asánrá. ³⁰ Tí xra tsotjahára la xrahya la tí nkehe tsotjahára la yehya.

Tí sín k'uajiko ch'ín Jesús mé ik'uín sín iso noatrigo ijnko yaon t'ok'éhe tí sín Israel
(Mr. 2.23-28; Lc. 6.1-5)

12 A ntá ijnko yaon la ch'ín Jesús k'uátsínka ch'án ijnko nonte síin noatrigo tí yaon t'ok'éhe tí sín Israel. Na ntá tí sín xriko ch'án mé tsík'en sín kjinta la ntá kjuankixin sín ik'uín sín iso noatrigo a kixin sine sín. ² A ntá iso tí sín fariseo k'uíkon sín kixin xikaha kjuích'e tí sín xriko ch'ín Jesús la ntá ntáchro sín kixin:

—Tsjehe tí sín xrikoa mé tjejóch'e sín xra tí yaon t'ok'éheni na mé kohya kjuachaxin tsonhen xra tí yaon i —ichro sín.

³ Ntá kjuátehe ch'ín Jesús kixin:

—Jahará za kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? ⁴ A ntá jehe sín mé k'uixenhen sín tí nchia kuènte Dios la kaín sín kjóne sín tí niotja tsíkóyaon kuènte Dios kjónté kohya kjuachaxin sine ch'án ni tí sín k'uájiko ch'án. Jehó síin kjuachaxin sine tí sín nchat'á. ⁵ Jahará zá nchekuáxinhyará tí xroon tsíkjin ch'ín Moisés ntáchro kixin tí sín nchat'á kuènte njnko mé t'ok'èhya sín tí yaon sábado la kjónté xikaha la jehya jie tíha? ⁶ Ntáxrjan kixin itjén janhan la antsí má chonta kjuachaxin la ntá tí njnko la kénhyó. ⁷ Jahará la tiénxinhyará nkexrí t'axrjexín tí nkehe ntáchro xroon itén Dios. Mé ntáchro kixin: "Janhan Dios tjínka-

van kixin chrókujikonógherá chojni la tjínkaonhya kixin chrók'oyánrá iko chrókjuánjonrá." [†] Tí chrókuiénxinrá tíha la ntá chrókóninkákuénhyará tí janhan kixin ninkehó jie chontahya. ⁸ A ntá tí Xjeen Dios K'óna Chojni mé chónta kjuachaxin ts'etqan nkexrí tsonhen tí yaon t'ok'éheni —ichro ch'ín Jesús.

Ch'ín Jesús kjuínchekitohe jina ijnko chojni tsíxámá tja
(Mr. 3.1-6; Lc. 6.6-11)

⁹ Ntá ch'ín Jesús mé sákjuixin ch'án ntiha la k'uixenhen ch'án ijnko njnko Israel. ¹⁰ Mé ntiha itjen ijnko ch'ín tsíxámá tja. Na ntá tjejóntaxín iso sín fariseo a tjínkaon sín tsjanchia sín jie. La ntá kjuanchankíhi sín ch'án kixin:

—Zá síin kjuachaxin sinchekitohe jina ijnko chojni níhi tí yaon t'ok'éheni ní? —ichro sín.

¹¹ Ntá kjuátehe ch'ín Jesús ntáchro ch'án kixin:

—Jnkojín tí jahará chontará ijnko kolélo chrókjuí-sínkaya ijnko tòye tí yaon t'ok'éheni zá chrókjuíhyará chrókuakitsjetaónrá va tòye ní? ¹² Kjánchó tí chojni antsí má tjete sínká a ntá tí kolélo la kénhyó. Méxra jina sich'eni tí xra jina kjónté tí yaon t'ok'éheni.

¹³ Méxra nixjehé ch'án tí ch'ín níhi a, ntáchro ch'án kixin:

—Tjéntoá tja —ichro ch'án.

A ntá tí ch'ín níhi tja kjuentoá tja ch'án la ó kjuixin kuítohe jina éxí tí í jnko tja ch'án xikaha. ¹⁴ Ntá tí sín fariseo kónínkaon sín k'uaxrjexín sín ntiha sákjuí sín la kjuenkayáxin sín nkexrí ts'óyan sín tí ch'ín Jesús.

Itén Dios senó chrónka kuènte ch'ín Jesús

¹⁵ A ntá ch'ín Jesús mé kónohe ch'án kixin xikaha tjenkayáxin sín la ntá sákjuíxin ch'án ntiha la itsje sín chréhe sín ch'án. Kjuínchekitohe ch'án jina kaín tí sjn-níhi ¹⁶ la k'uetqan ch'án kixin tsochrónkahya sín noxín kixin nkexro tí jehe ch'án. ¹⁷ Mé xikaha ó xiteyá tí nkehe chrónka ch'ín Isaías, tí nkexro chrónka itén Dios ósé, mé tsíntáchro ch'án xikihi:

¹⁸ Ntihi tjen tí nkexro ch'ena xra la janhan mé kjuéyá ch'án,

janhan tjuahá ch'án la chána kixin itjen ch'án.

Tsotjahá ch'án tí nchakuenná

la jehe ch'án mé tsochrónka ch'án nkexrí sjntakitqax-ian ijie chojni chjasintajni.

¹⁹ Tsonínkakuenhya ch'án chojni la chjíníhya ts'óyako ch'án,

la ko kohya nkexro tsinhin itén ch'an tí ntja.

²⁰ Ts'óchjenjinhya ch'án kjónté itji tsíxréya,

la ts'ók'ankahya ch'án kjónté ijnko nkehe sínhchikoá. Jehe ch'án naxa sich'e ch'án xra tsjixrakája tí yaon ts'etqan ch'án.

²¹ La kaín xín chojni chjasintajni mé tsitekaon sín tí jehe ch'án. ^{††}

Mé xikaha chrónka itén Dios ósé.

† Oseas 6.6 †† 12.18-21 Isaías 42.1-4

Tí sín fariseo mé ntáchro sín kixin ch'ín Tsochren t'etueñhen asén tí ch'ín Jesús
(Mr. 3.19-30; Lc. 11.14-23; 12.10)

²² Ntá iso chojni sákjuikohe sín ch'ín Jesús ijnko ch'ín t'ikonhya la ko nixjahya kixin chóna ch'án nchakuen tí jínahya. A ntá ch'ín Jesús mé kjuínchekitohe ch'án jína la ntá jína nixja ch'án la ko jína t'ikon ch'án. ²³ Ntá kaín xín chojni la chrakon sín la tjanchankíhi kichó sín ntáchro sín kixin:

—¿Á jehya xjeen David tíhi? —ichro sín.

²⁴ Ntá kuínhin tí sín fariseo la ntáchro sín kixin:

—Tí ch'ín a takitsje ch'án nchakuen tí jínahya kixin chóna ch'án tí kjuachaxin kuente ch'ín Beelzebú, mé tí ch'ín mé Tsochren t'etueñhen kaín tí nchakuen tí jínahya.

²⁵ Ntá ó kónohe ch'ín Jesús tí nkehe tjenkayáxin sín ntá ntáchro ch'án kixin:

—Jnkojín gobierno jnkokoáhya tjenkayáxin sín ntá tjanjonko kichó sín na mé ts'itjáyán tí kjuachaxin ts'e-tqanxín sín, la ko kjaxin tí sín jnkokoá chjasin o tí sín jnkokoá nchia jnkokónhya tjenkayáxin sín la kjaxin xikaha ts'itjáyán sín. ²⁶ A ntá tí chaxín ch'ín Tsochren chrókuakitsjexín asén ntihi kja í chróchóntahya kjuachaxin naxa chrók'uetqan. ²⁷ Jahará ntáchrórá kixin janhan kuakítsjexián tí nchakuen tí jínahya kjuachaxin kuente ch'ín Beelzebú. A ntá tí chaxín xikaha la ntá nkexro chjehe kjuachaxin tí sín chréhe tí jahará kixin tjacha sín takitsje sín nchakuen tí jínahya? Jehé sín mé tjakoxín sín kixin ntoáhya tjenkayáxinrá. ²⁸ A ntá janhan mé kuakítsjexián tí nchakuen tí jínahya kjuachaxin kuente Nchakuen Dios la tíha mé chrókónoaxínrá kixin tí kjuachaxién Dios mé ó kui tí tjejórá.

²⁹ ¿Nkexrí chrók'uixenhen ijnko nkexro ijnko ntqe ijnko ch'ín jjehe la chrókuakitsjehe ch'án tí nkehe chóna ch'án? Senó la chrókónteto ch'án kixin jína chrókueéhe sín ch'án.

³⁰ Tí nkexro titekakonhya tí janhan la mé nínkakonna sín. A ntá tí nkexro tjinkakonhya tí janhan mé t'inkákonhen tí xra it'a.

³¹ Méxra xrxanka kixin Dios tsjakjiin jnkojnko jje tjasin chojni la ko kaín nkehe jínahya nixja sín. A ntá tí t'ántaxínhín sín Nchakuen Dios la xitjahya tsjiin ijje sín.

³² La ko xrxanka kixin kaín nkehe t'ántaxínhínrá tí Xjeen Dios K'óna Chojni la tsjakjiin Dios. A ntá tí ts'ántaxínhínrá Nchakuen Dios la ntá mé í tsjiinhya tí ijará kjónté ntihi chjasintajni la ko kjónté tí chr'éxin.

Tí nta chrókjuatsqanxín sín tí to jína
(Lc. 6.43-45)

³³ Tí nta tsík'ánkí jína la t'óna to jína la tí nta tsík'ánkíhya jína la t'ónahya to jína. Méxra tí nta mé chrókjuatsqanxíni tí to a. ³⁴ Jahará tsík'axrjeníxinrá konche. ¿Nkexrí jína chróntáchrórá jahará tí jehya jínará? Tí nixja ir'vará la éxí ntáchro asánrá mé nixja ir'vará. ³⁵ Ijnko chojni jína mé jína nixja kixin jína asén ch'án. A ntá ijnko chojni jínahya mé nixja tí nkehe jí-

nahya kixin tí asén ch'án kjaxin jínahya. ³⁶ Ntá tjonkará kixin itsi tí yaon tsjixixín tió sinchekitoqéxín Dios ijje chojni ntá tsonohará kaín nkehe chjini tsínixjará. ³⁷ Kixin tí nkehe nixjará tsjakoxín á kjuásinrá jje ní o náhi.

Tí sín jehya jína tjanchehe sín ch'ín Jesús kixin tsjakoxín ch'án ijnko kjuaxroan jíe
(Mr. 8.12; Lc. 11.29-32)

³⁸ Ntá iso tí sín fariseo la ko tí sín maestro tjako tí ley mé nixjehe sín ch'ín Jesús ntáchro sín kixin:

—Maestro, tjinkaonni chrók'uikonni chrókjuásian ijnko kjuaxroan náxrjón tsonoexíni kixin nkexro jaha —ichro sín.

³⁹ Ntá kjuátehe ch'ín Jesús ntáchro ch'án kixin:

—Tí sín jínahya la ko tí sín kuítóhe Dios mé tjanchia sín chrókjuásian kjuaxroan náxrjón. Kjánchó tsjakoxínhya í jnko kjuaxroan la jehó tí kjuaxroan kónhen ch'ín Jonás, tí nkexro k'uéchrónka itén Dios ósé. ⁴⁰ Éxí yóhe kjuák'e ch'ín Jonás iní yaon la iní tie nkaxenhen tsee koche jíe mé xikaha tí Xjeen Dios K'óna Chojni tsjak'e nkaxenhen tóye tsoxravá iní yaon la iní tie. ⁴¹ A ntá tí yaon tsitqéxín ijje chojni la ntá tí sín chjasin Nínive mé tsjanchia sín jíe kixin tí sín tjejó jie, kixin tí sín chjasin Nínive mé kuítóhe sín ijje sín tió kuínhin sín itén Dios chrónka ch'ín Jonás. A ntá ijje itjén janhan la antsí má chonta kjuachaxin. A ntá tí ch'ín Jonás la kénhyó k'uéchóna ch'án kjuachaxin, kjánchó jahará kuitekákonhyará tí janhan. ⁴² Kjaxin tí yaon tsitqéxín ijje chojni la tí tjan reina k'uetqan kjuixín nó Sur mé tsjanchia tjan jíe kixin tí sín tjejó ijje kixin jehe tjan kjuixín imá ikjín kixin chrókuinhin tjan tí kjuaxrexinkaon jína k'uékjako ch'ín Salomón. A ntá ijje itjén janhan la janhan antsí má nõna a ntá ch'ín Salomón la kénhyó k'uénohe ch'án.

Tiό tsokjan tí nchakuen tí jínahya
(Lc. 11.24-26)

⁴³ A ntá ijnko nchakuen tí jínahya tsík'axrxjexín ijnko chojni la mé ixri tí nonte xámá xritjeyá nketí náxrjón ts'ok'éhe. A ntá k'uitjahya nketí náxrjón ts'ok'éhe. ⁴⁴ La ntá kjuenkayáxin kixin: “Áxri tsokjan ntqna k'uaxrxjéxian”, ichro. A ntá tió ikjan tí nchakuen la t'ikon éxí ijnko nchia kohya ninkexró la éxí ijnko chojni tsík'ánjón ntqe la náxrjón tsjehe tí nkaxenhen nchia. ⁴⁵ A ntá k'uikon tí jínahya xikaha tjen nchia la ntá sákjuikakjín í jnko yato nchakuen tí jínahya antsí má jínahya. A ntá kaín k'uixenhen tí ntiha. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen kaín tí sín síin ijje titekakonhya.

Tí iné la ko kichó ch'ín Jesús
(Mr. 3.31-35; Lc. 8.19-21)

⁴⁶ Ntá ch'ín Jesús naxa tjenixjehe ch'án chojni la ntá xrinahya kjují iné ch'án la ko kichó ch'án. Ntá kuítóhe sín ntója ó la tjinkaon sín chrónixjehe sín ch'ín Jesús.

⁴⁷ Ntá ijnko nkexro ntiha sákjuichénka tí ch'ín Jesús, ntáchro ch'án kixin:

—Íná la ko kichua tjejó sín ntója la tjinkaon sín chrónixjaha sín tí jaha.

⁴⁸ A ntá ch'ín Jesús kjuátehe ch'án nixjehe ch'án tí nkexro chrónka a, ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

⁴⁹ Ntá kjuakoxin tja ch'án tí sín xriko ch'án la ntáchro ch'án kixin:

—Tí sín i la mé nana la ko kichiná. ⁵⁰ Tí jnkofín sín i nchexiteyá nkehe tjinkaon T'aná tjen nkaya nkajni na mé táha mé nana la ko kichiná mé xikaha t'íkuan tí jehe sín —ichro ch'án.

Ch'ín Jesús mé kjuíncheyóexin ch'án éxi ijnko chojni t'enka nontee
(Mr. 4.1-9; Lc. 8.4-8)

13 A ntá tí yaon a ntá ch'ín Jesús k'uaxrjexín ch'án nchia la sákjuí ch'án kjuák'etjajin ch'án chrínta ntayaon. ² Ntá k'uixikóchjina nchónhya chojni tí tjen ch'án la ntá jehe ch'án mé k'uit'ótjen ch'án ijnko ntabarco kjuák'etjajin ch'án la kaín sín na tí chrínta ntá ó kuítóhe sín. ³ A ntá nchónhya nkehe kjuako ch'án kjuíncheyóexin ch'án, ntáchro ch'án kixin:

—Éxi ijnko ch'ín sákjuík'enka nontee ⁴ mé xikaha sákjuík'enka ch'án iso tí noatriga a. Ntá iso noa la tsík'ánótjen ntja ntá ikui koxroxé k'uinka va noa. ⁵ A ntá iso noa na mé k'uitji chrík'á xró tí kohya itsjé nche ntá tjoka k'uayan kixin ntaha tjinhya chóna nche. ⁶ Ntá tí kjuiton yaon la ntá tí ka la xamá kixin njinkahya chóna nuèe. ⁷ A ntá í so noa kjuítsínkak'á tí síin kach'í na k'uánkí tí kach'í a na ntá í xitjahya k'uánkí tí noatriga a kixin tsíkjate tí kach'í. ⁸ A ntá tí noa tsík'itjí nche jí na na ntá tió k'uánkí la mé k'óna jína. Iso tí no na jnkokoá noatje mé k'óna ciento neno noa, a ntá í jnko mé k'óna sesenta neno noa, a ntá í jnko mé k'óna treinta. ⁹ Tí nkexro tjinkaon chrókuinhin la chrókuinhin —ichro ch'ín Jesús.

Nkekuèté kjuíncheyóexin ch'ín Jesús
(Mr. 4.10-12; Lc. 8.9-10)

¹⁰ Ntá iso tí sín k'uájiko ch'ín Jesús mé kóchjinehe ch'án sín la ntá kjuanchankíhi sín kixin:

—¿Nkekuèté xikaha nixjehé sín ncheyóexián? —ichro sín.

¹¹ A ntá ch'ín Jesús kjuátehe ch'án ntáchro ch'án kixin:

—Jahará la Dios me tsjinkítsa tsonohará tí nkehe noehya í so chojni kuènte tí kjuachaxin kuènte Dios. A ntá tí jehe sín a la náhi. ¹² Tí nkexro ó chóna nkehe la antsí ts'áyehé sín kixin antsí má tsochóna sín. A ntá tí nkexro chónahya la kjónté tí ntsí chóna sín la ts'axr-jehe sín. ¹³ Mé xikaha kjuíntayóaxuán kjuákuaxian sín kixin jehe sín t'ikon sín la ntá kjónté tjátsoanhya sín la tjejótinhin sín a ntá kjónté kiexínhya sín. ¹⁴ Mé xikaha ó xiteyá tí nkehe k'uéchrónka ch'ín Isaías tí nkexro k'uéchrónka itén Dios, mé ntáchro ch'án xíkíhi:

Jehe sín tsinhin sín a ntá tsienxínhya sín la ts'ikon sín la tsjatsqanhya sín tí nkehe ts'ikon sín.

¹⁵ Imá icha asén tí sín chjasin i.

Chóna sín ntatsjon kjánchó ts'íkjehe la chóna sín ikon sín kjánchó t'ikonhya sín, kixin chrók'uikonhya sín la chrókuienhya sín la ko xitjahya kiexín sín,

kixin í tjinkakonhya sín chrókjan sín kixin janhan mé chrókjuíntakitohá sín jína. †

Mé xikaha tsíkjin ch'ín Isaías.

¹⁶ Ntá ntáchro ch'ín Jesús inaá kixin:

—A ntá jahará la imá náxrjón tjejórá kixin t'ikonrá la ko tinhínra. ¹⁷ Chaxín xrjanka kixin itsjé tí sín k'uéchrónka itén Dios la ko tí sín jína mé k'uétjinkaon sín chrók'uikon sín tí nkehe t'ikonrá la ntá k'uikonhya sín la ko k'uétjinkaon sín chrókuinhin sín tí nkehe tje-jotinhínra la ntá kuénhya sín.

Ch'ín Jesús chrónkaxín nkexrí t'axrjexín tí nkexro sákjuík'enka

(Mr. 4.13-20; Lc. 8.11-15)

¹⁸ Tinhínra nkexrí t'axrjexín tí ch'ín sákjuík'enka nontee. ¹⁹ Tí nkexro kuínhin tí itén Dios chrónka nkexrí tí kjuachaxin kuènte Dios la ntá kiexínhya sín la yóhe tí noa xenjintja ntja. Ó kui ch'ín Tsochren ntá kjuínchek'itjayan ch'án tí itan jína kuínhin sín. ²⁰ A ntá tí tje kjuítsínkak'á xró la mé t'axrjexín kixin tí chojni kuínhin itén Dios la tjoka kóxrjínhin sín la kuinkáchónki sín. ²¹ Kjánchó njinkahya chóna nuèe na ntá itsí tí kjuaxróxinhya o tsochónkíhi sín chojni chrók'óyan sín kixin tí itén Dios kuítekaon sín, a ntá tsítóhe sín tí tinkáchónki sín Dios. ²² A ntá tí tje kjuítsínkak'á kach'í na mé éxi yóhe ijnko chojni kuínhin itan jína kjánchó tje-toxienhya ntje sín kixin tóxakonhen sín tí xrá chóna sín chjasintajni la ko tjinkaon sín tsochóna sín itsjé nkehe. Kaín tíha mé t'inkákonhen tí itén Dios kuínhin sín la ntá xikaha xitjahya sich'ehe sín xrá Dios. ²³ A ntá tí tje k'uínka tí nonte chóna nche jína na mé yóhe tí chojni kuínhin tí itén Dios na ko kiexín sín la ntá xikaha jína ch'ehe sín Dios xrá. Na iso sín la yóhe éxi tí tje k'óna ijnko ciento neno noa la iso sín la yóhe tí k'óna sesenta neno noa la iso sín la yóhe tí k'óna treinta neno noa —mé xikaha chrónka ch'ín Jesús.

Ch'ín Jesús kjuíncheyóexin ch'án éxi tí kajnto k'uánkíkué tí noatriga

²⁴ Ntá ch'ín Jesús kjuíncheyóexin ch'án inaá ntáchro ch'án kixin:

—Tí kjuachaxin kuènte Dios mé yóhe ijnko ch'ín k'uénka noa jína nontee ch'án. ²⁵ A ntá tió k'uéjjuá kaín sín ntá ikui ijnko nkexro nínkakonhen sín la k'uénka ch'án kajnto chrík'á tí noa a la ntá sákjuí ch'án. ²⁶ La ntá tí noatriga k'uánkí la ntá ó sítintaa la ntá ntilha kjaxin kónoxixin k'uánkí tí kajnto. ²⁷ Ntá tí sín ch'e xrá mé sákjuínixjehe sín tí lámqo sín la ntáchro sín kixin: “Tí noa k'uénká nontaa la noa jína tíha. A ntá ¿nketí kjuixín tí kajnto tsík'ayan?” ichro sín kjuanchankí

† 13.14-15 Isaías 6.9-10

sín. ²⁸ Ntá kjuáteḡhe tí ìnché tí nonte ntáchro kíxín: “Kjá ijnko nkexro nínkakonna mé kjuích'e xíkaha”, ichro ch'án. Ntá tí sín ch'e xrā mé kjuanchankí sín kíxín: “¿Á tjinakávan kíxín sátsjini tsakitsjenkíni tí kajnto?” ichro sín. ²⁹ A ntá kjuáteḡhe ch'án kíxín: “Náhí. Tí sátsjia tsakít-sjenkiá tí kajnto la kjá chónṡe tí katrigo ts'axrjenkí. ³⁰ Íchá jína títōhé kíxín ts'ánkíkué tsjixin tsotjájiani. Ntá ts'etueñhenni tí sín tsotjá kíxín senó ts'ejo sín tí kajnto la sinchenteto sín kíxín tsoche la ntá chr'éxín tsotjá sín tí noatrigo ntá ts'inkachjina tí noa a” —mé xíkaha chrónka ch'ín Jesús.

Ch'ín Jesús kjuíncheyóexin ch'án éxí tí xroḡan ijnko ntayoa it'in mostaza
(Mr. 4.30-32; Lc. 13.18-19)

³¹ Ntá ch'ín Jesús kjāxin kjuíncheyóexin ínaá ntáchro ch'án kíxín:

—Tí kjuachaxin kuènte Dios mé éxí yóḡe ijnko tje mostaza k'uēnkā ijnko chojni nontḡe ch'án. ³² Tí tje a mé ḡntsí má ntsí la ntá tí í so tje la kánhyó, a ntá chr'éxín ntá ts'ayan tí nta mostaza la ts'ánkí ijnko nta imá jíé la tí í so nta la kánhyó. Ntá koxroxé xritjaká mé itsi va sích'ēna va kāké va tí chrík'á tí chaon nta.

Ch'ín Jesús kjuíncheyóexin ch'án éxí tí xroḡan t'ánkíxín niotja
(Lc. 13.20-21)

³³ Kjāxin kjuíncheyóexin ch'án tíhi mé ntáchro ch'án kíxín:

—Tí kjuachaxin kuènte Dios mé éxí yóḡe tí xroḡan t'ánkíxín niotja. Kjuinkíjāxín ijnko chojni chjin iní medida harina ntá tí ch'o mé k'uánkí.

Tí nkehe kjuíncheyóexin ch'ín Jesús tí nixja ch'án
(Mr. 4.33-34)

³⁴ Ch'ín Jesús kjuākōḡe ch'án tí chojni la kjuíncheyóexón ch'án la nixjahya ch'án ninkehó tí kohya nkehe chrókjuíncheyóexin ch'án. ³⁵ Mé xíkaha kjuako ch'án kíxín tsoxiteyá tí nkehe tsíchronka ijnko nkexro k'uéchrónka itén Dios ntáchro xíkíhi:

Mé tsoníxjāxian s̄intayóaxiōn nkehe tsontáxrjan tí nkehe ninkexró noehya desde k'óna chjasintajni. †

Ch'ín Jesús chrónkaxín ch'án nkexrí t'axrjéxín tí kjuíncheyóexin ch'án tí kajnto la ko tí notrigo

³⁶ Ntá kjuixin nixjeḡe ch'ín Jesús tí sín a ntá sákjuí sín kaín sín la jehe ch'án k'uixenhen ch'án nchia. Ntá kóchjina tí sín k'uájiko ch'án la ntáchro sín kíxín:

—Chrónkaxián nkexrí t'axrjéxín tí kajnto k'uánkíkué tí noa trigo tí nonte —ichro sín.

³⁷ Ntá ch'ín Jesús kjuáteḡhe ch'án ntáchro ch'án kíxín: —Tí nkexro k'uēnkā tí noa jína mé tí Xjeen Dios K'óna Chojni. ³⁸ A ntá tí nonte mé chjasintajni tíha. Tí noa jína mé éxí yóḡe tí chojni kuákja kjuachaxin kuènte Dios. La ntá tí kajnto mé éxí yóḡe tí chojni t'etueñhen

Tsochren. ³⁹ Tí nkexro nínkakonhenni mé k'uēnkā tí kajnto mé Tsochren tíha. A ntá tí tsotjá sín la mé tsjeje chjasintajni. A ntá tí sín tsotjá la mé tí sín ángel. ⁴⁰ Éxí xrenájín tí kajnto la tsoche mé xíkaha tsonhen tió tsjixixín tsjeje chjasintajni. ⁴¹ Tí Xjeen Dios K'óna Chojni mé ts'etueñhen tí sín ángel kíxín tsakitsjéxín sín tí tjet'etōan Dios kaín tí chojni tjachroe í so chojni la ko tí sín ch'e tí nkehe jínahya. ⁴² La tsochr'án sín sátsji sín tí tja siín xrohi la ntaha tsotsjánka sín la sinetaón neno sín. ⁴³ Ntá kaín xín tí sín nchexiteyá tí nkehe tjinkaon Dios mé éxí tí yāon xíkaha tsotsjehe sín tí tjet'etōan It'ēni Dios. Tí nkexro tjinkaon chrókuinhin la chrókuinhin —mé xíkaha ichro ch'ín Jesús.

Ch'ín Jesús kjuíncheyóexin ch'án éxí ijnko nkehe tjete tjemá

⁴⁴ Tí kjuachaxin kuènte Dios mé éxí yóḡe ijnko nkehe tjete tjemá ijnko nonte. Ijnko chojni k'uitja ch'án tí nkehe tjete la ntá kjuāk'ēmā ch'án ínaá ntahó. Ntá chéḡe ch'án sákjuí ch'án la kjuínchekji ch'án kaín nkehe chónṡa ch'án la ntá ikjan ch'án la k'uēna ch'án tí nonte a.

Ch'ín Jesús kjuíncheyóexin éxí ijnko xroḡ perla tjete

⁴⁵ Ntá ntáchro ch'ín Jesús kíxín:

—Kjāxin tí kjuachaxin kuènte Dios mé éxí yóḡe ijnko nkexro tjeýá xroḡ perla náxrjón. ⁴⁶ Ntá tió ts'itja ch'án ijnko xroḡ imá tjeṡe la ntá sátsji ch'án sinchekji ch'án kaín nkehe chónṡa ch'án kíxín ts'ēna ch'án tí xroḡ perla.

Ch'ín Jesús kjuíncheyóexin éxí ijnko nchísén tséya sín koche

⁴⁷ Ntáchro ch'ín Jesús kíxín:

—Kjāxin tí kjuachaxin kuènte Dios mé éxí yóḡe ijnko nchísén tséya chojni koche t'enkí sín tí ntāyaon la ntá tsotsé nchónhya clase koche. ⁴⁸ Ntá tió tsíkaón koche tí nchísén tséya sín va la ntá tsakitsjenkí sín la tsjak'e sín chrínta ntā la ntaha ts'ejótjāxín sín la tsíchéhe sín koche jína la t'enkā sín ntaxra. La ntá tí jehya koche jína la it'e sín. ⁴⁹ Mé xíkaha tsonhen tió tsjeje chjasintajni. Sátsji tí sín ángel la tsakitsjekjan sín chojni jínahya la tsitōhe tí chojni jína. ⁵⁰ La tsochr'án sín tí sín jínahya sátsji sín tí tjen tja tí siín xrohi la ntaha tsotsjánka sín la ko sinetaón neno sín.

Tí nkehe tjeṡe nixín la tí nkehe tjeṡe ntaxin

⁵¹ Ntá ch'ín Jesús mé kjuanchankí ch'án kíxín:

—¿Á tiénxinrá jahará kaín tí nkehe ní? —ichro ch'án. Ntá kjuáteḡhe sín kíxín:

—Jeén, Ínchéni, ó kíenxínni —ichro sín.

⁵² Ntá ntáchro ch'ín Jesús kíxín:

—Ijnko maestro nohe tí nkehe kuènte ley la ntá ó nohe ch'án kuènte tí kjuachaxin kuènte Dios la jehe ch'án la éxí yóḡe ijnko ìnché nchia chónṡa itsjé nkehe tjeṡe tjejóchjina la ntá nohe ch'án tsakitsje tí nkehe tjeṡe nixín la tí nkehe tjeṡe ntaxin —mé xíkaha ichro ch'ín Jesús.

† Salmo 78.2

Ch'ín Jesús kjuák'e ch'án chjasin Nazaret

(Mr. 6.1-6; Lc. 4.16-30)

⁵³ Ntá kjuixin nixja ch'ín Jesús kjuíncheyóexin ch'án tíha na ntá sákjuixin ch'án ntiha. ⁵⁴ La ntá sákjuí ch'án chjasén ch'án Nazaret. Ntaha kjuankíxin kjuakoxin ch'án tí njnko Israel. Ntá itsjé sín la kóxakonhen sín kuínhin sín tí tjako ch'án la ntáchro sín kixin:

—Tí ch'ín i la, ¿nketí tsíxrakohé ch'án kixin imá nohe ch'án la ko nkexrí kixin tjasin ch'án kjuaxroan? ⁵⁵ ¿Á jehya tíhi xjeen tí ch'ín carpintero la iné ch'án mé María? La ko chóxinni tí kichó ch'án a mé ch'ín Jacobo la ko ch'ín José la ko ch'ín Simón la ko ch'ín Judas. ⁵⁶ Kjaxin tí sín chjin kichó ch'án na ntihi tjejó sín. Méxra ¿nkexrí nohe ch'án kaín tí nkehe? —ichro sín.

⁵⁷ Mé xikaha chrohya sín tsitekakonhen sín ch'án. Ntá ntáchro ch'ín Jesús kixin:

—Nkuíxín tjikosáyehe chojni ijnko nkexro chrónka itén Dios. A ntá tí sín chjasén ch'án la ko kaín tí sín ntóe ch'án mé tjikosáyehya sín ch'án —ichro ch'án.

⁵⁸ A ntá tsjéhya kjuaxroan kjuasin ch'án ntiha kixin kuitekakuenhya sín ch'án.

Ik'uén ch'ín Juan Bautista

(Mr. 6.14-29; Lc. 9.7-9)

14 A ntá tí yaon a ntá tí ch'ín Herodes mé tí nkexro k'ueṭṭoan tí estado Galilea mé kuínhin ch'án nkexrí ichro ch'ín Jesús. ² Ntá nixjehé ch'án tí sín ch'e-he ch'án xra, ntáchro ch'án kixin:

—Kjá tíha la ch'ín Juan Bautista ó tsíxechón ch'án inaá. Mé xikaha chóna ch'án kjuachaxin tjasin ch'án kjuaxroan —ichro ch'ín Herodes.

³ Méxra tí ch'ín Herodes mé tsík'etṭoan kixin ch'ín Juan tsontetoxín cadena la ko tsjak'echjina ch'án. Mé xikaha kjuich'e ch'án kixin xikaha tsíkjanchia tí tjan Herodías, tí tjan ichjién tí ch'ín Felipe, kichó ch'án. ⁴ Tí ch'ín Juan tsíntáche ch'án tí ch'ín Herodes kixin:

—Jehya jina tsochonta tí ichjién tí kichuá —mé xikaha tsíntáchro ch'án.

⁵ Ntá ch'ín Herodes tjinkaon ch'án chrók'óyán ch'án tí ch'ín Juan kjánchó chrakonhen ch'án tí chojni kixin kaín sín ntáchro sín kixin ch'ín Juan mé nixja itén Dios, ichro sín. ⁶ A ntá tí yaon kia tsíkjitoxinhin nánó ch'ín Herodes la tí xjeen tjan Herodías mé ité tjan tí tjejó tí chojni tsík'íyehé ch'án. A ntá imá kóxrjinhin ch'ín Herodes nkexrí ité tjan. ⁷ La ntá nixjehé ch'án tjan k'uákjénxín ch'án ihnié Dios ntáchro ch'án kixin tsochjéhe ch'án tjan kjónté jnkojín nkehe tsjanchia tjan, ichro ch'án. ⁸ Ntá jehe tjan la senó kjuikjan-chankíhi tjan iné tjan ntá iné tjan tsíntachro kixin ikja ch'ín Juan mé tsjanchia tjan ntá jehe tjan mé nixjehé tjan tí ch'ín Herodes inaá ntáchro tjan kixin:

—Chjehéni ijnko plato tsjak'enkáya kja ch'ín Juan Bautista —ichro tjan kjuanchia tjan.

⁹ Na ntá ch'ín Herodes la mé imá k'uává ch'án kixin xikaha kjuanchia tjan. Na ntá kaín tí sín siín ntiha ó kuínhin sín kixin kjuínchenohe ch'án Dios kixin ichrén nkehe tsjanchia tjan tsjanjon ch'án. ¹⁰ Méxra k'ueṭṭoan

ch'án kixin ts'óchrínjin sín ikja ch'ín Juan tí tjan ch'án ntóechiso. ¹¹ Ntá kjuikao sín kjuikoyá sín tí kja ch'ín Juan ijnko plato la chjéhe sín tí tjan tjarisoá ntá jehe tjan la sákjuikénhen tjan iné tjan.

¹² Ntá tí sín k'uék'ajiko ch'án a mé sákjuikakitsje sín tí cuérpóé ch'án la sákjuikjává sín. La ntá chr'éxin la sákjuí sín sákjuíchénka sín tí ch'ín Jesús kixin xikaha tsíkónhen ntiha.

Ch'ín Jesús kjuínchekjine ch'án in'ó mil chojni

(Mr. 6.30-44; Lc. 9.10-17; Jn. 6.1-14)

¹³ Ntá tí kuínhin ch'ín Jesús kixin xikaha tsíkónhen la ntá jehó ch'án sákjuí ch'án k'uit'ótjen ch'án ijnko ntabárcṭo la sákjuí ch'án ijnko nonte ninkexró tjihya. A ntá kaín tí chojni la kuínhin sín nketí tjan ch'án la ntá k'uaxrxéjin sín chjasén sín la ntá totó sín sákjuíchréhe sín ch'án. ¹⁴ A ntá k'uaxrxéjin ch'ín Jesús tí ntabárcṭo a, a ntá k'uíkon ch'án kixin nchónhya chojni siín ntiha ntá kuikonóehé ch'án tí jehe sín na ntá kjuínchekitohé ch'án jina tí sín níhi tsíkjkjao sín. ¹⁵ La ntá ó k'uíxin tie na ntá tí sín k'uájiko ch'ín Jesús a mé kóchjinehe sín ch'án, ntáchro sín kixin:

—Ntá ó kóntó la kohya nkexro tjejó ntihi. Na ntá jaha chrókuétuēnhén sín kixin sátsji sín tí chjasin ntsí chjinaxon tsjik'ena sín nkehe sine sín —ichro sín.

¹⁶ Ntá kjuátehe ch'ín Jesús, ntáchro ch'án kixin:

—T'ichjánxinhya sátsji sín. Chjehérá sín nkehe sine sín —ichro ch'án.

¹⁷ Ntá kjuátehe sín kixin:

—Chóntahyani itsjé nkehe. Jehó in'ó niotja la ko yaá koche chóntani —ichro sín.

¹⁸ Ntá ntáchro ch'ín Jesús kixin:

—Xrakoanará tí nkehe méhe ntihi —ichro ch'án.

¹⁹ Ntá k'ueṭṭoan ch'án kixin kaín xín sín ts'ixitjaxín sín tí chrítaón kaxi a. Ntá kuákja ch'án tí in'ó niotja la ko tí yaá koche ntá konta ch'án nkajni la kjuanchehe ch'án kjuasáyé Dios. Ntá kóchrít'o ch'án tí niotja chjéhe ch'án tí sín k'uájiko ch'án la jehe sín mé k'óxikayehé sín chjéhe sín tí chojni siín a. ²⁰ Ntá kaín sín kjuixin kjóne sín kókjehe sín. Ntá kjuixin ntá tí sín k'uájiko ch'ín Jesús kjuenájín kaín tí nkehe síxèhe sín la mé teyó ntaxra kaón. ²¹ Na mé in'ó mil chojni ntoa kjóne sín, la tí chojni chjin la ko chánjan la kuákjahya sín cuenta nkekjaín tí sín a.

Ch'ín Jesús mé tjetjitaón ch'án ntá

(Mr. 6.45-52; Jn. 6.16-21)

²² Ntá kjuixin tíha ntá k'ueṭuēnhen ch'ín Jesús tí sín k'uájiko ch'án kixin ts'it'ótjen sín tí ntabárcṭo ts'atòye sín í jnko nánko ntayaon. Ntá jehe ch'án naxa kuítóhe ch'án nixjehé ch'án tí sín siín ntiha. ²³ Ntá kjuixin xikayehé sín na ntá jehó ch'án chriin ch'án ijnko jna tsonixjehé ch'án It'é ch'án tjan nkaya nkajni. Na ntá ó k'uíxin tie la jehó ch'ín Jesús itjen ch'án ntiha. ²⁴ La ntá tí ntabárcṭo na mé tjenkátaón ntá jnkosiné ntayaon. Ntá imá chjéhe ntá tí ntabárcṭo kixin tí xrínto la chjéhe la xitjahya sátsji ntabárcṭo. ²⁵ Na ntá las tres nantóye a mé sákjuíchréhe ch'án sín. Totó ch'án mé sákjuítónxin

ch'án tí ntayaon la ntá kóchjinehe ch'án tí tjejó sín.
²⁶ Na ntá tí sín k'uájiko ch'án mé k'uíkon sín kixin tjetjitaón ch'án tí ntayaon na ntá imá chrakon sín la k'óyako sín. Ntáchro sín kixin kjuacha sín ichro sín, chrakon sín.

²⁷ Na ntá nixjehe ch'ín Jesús tí jehe sín ntá ntáchro ch'án kixin:

—Nchefuéerte asánrá, chrakonhyará. Janhan kjuihá —ichro ch'án.

²⁸ Ntá ch'ín Pedro mé nixjehe ch'án Ìnchéni, ntáchro ch'án kixin:

—Ìnchéni tí chaxín jaha la ntá chrókjuánjuan kjuachaxin chrókjuitaónni tí ntá tsjjini tí tjen jaha —ichro ch'án.

²⁹ Ntá ntáchro ch'ín Jesús kixin:

—Xrákiá.

Ntá k'uínkajinxin ch'ín Pedro tí ntabárcō la kjuankixin ch'án tjetjitaón ch'án ntá sákjuíchréhe ch'án tí tjen ch'ín Jesús. ³⁰ A ntá xríñahya ntá kónohe ch'án kixin imá chjéhe xríntō chrítaón ntá, ntá chrakon ch'án la kjuankixin tinkák'aniánki ch'án ntá, ntá k'uèya ch'án ntáchro ch'án kixin:

—Ìnchéni, nchekaáni —ichro ch'án.

³¹ A ntá tuénxín ch'ín Jesús mé itsé ch'án tja ch'ín Pedro la ntáchro ch'án kixin:

—Intsíkoá tinkachónkia tí janhan. ¿Nkekuèté títekákonhya? —ichro ch'án.

³² Na ntá tió k'ujt'ótjen sín yóí sín tí ntabárcō la ntá tuénxín k'uixratá tí xríntō. ³³ Ntá kaín xín tí sín tjejóxehen tí ntabárcō mé k'uéjóxin tochr'in sín nkayakon ch'ín Jesús la ntáchro sín kixin:

—Jaha mé chaxín Xjeen Dios —ichro sín.

Ch'ín Jesús mé kjuínchekitōhe jína tí chojni níhi nonte

Genesaret
(Mr. 6.53-56)

³⁴ Ntá tió k'uátōye sín tí ntayaon ntá kjuíji sín tí nonte Genesaret. ³⁵ Ntá tí sín síin ntiha tjoka kjuátsoan sín kixin jehe ch'ín Jesús tíha, ntá kuínhin tí sín chjasin chjínaxón ntiha la ntá kujkōo sín kaín tí sín níhi tí tjen ch'án. ³⁶ Na ntá chrónōhehe sín ch'án kixin chrókuitōhe ch'án kixin kjónté chrínta iké ch'án chrókuákōxin sín, la ntá kaín tí sín kuákōxin iké ch'án mé kuitōhe sín jína.

Tí jje tjasin chojni

(Mr. 7.1-23)

15 A ntá chjasin Jerusalén kjuixin iso sín fariseo la ko iso tí sín maestro tjako tí ley la kjuíchréhe sín tí ch'ín Jesús. Ntá kjuanchankíhi sín ch'án kixin:

² —¿Nkekuèté kixin tí sín xrikoa la nchexiteyáhya sín tí nkehe k'uékinkáchónki tí sín tsík'axrjeníxinni kixin t'óntiha sín itja sín ntá kjónté ine sín? —ichro tí sín fariseo a.

³ A ntá kjuanchankí ch'ín Jesús kixin:

—¿Nkekuèté jahará kjaxin títekákonhyará nkehe tsík'etōan Dios? A ntá jahará tjinkáonrá naxa chrókuínkachónkirá tí nkehe kuínkáchónki tí sín tsík'axrjeníxínrá. ⁴ Ntáchro Dios kixin: “Tsochontehérá

kjuasáya it'ará la ko ìnará”, la ko ntáchro ch'án kixin: “Tí nkexro t'ántaxínhin it'é la ko ìné la chrók'uen.” ¹⁵ A ntá jahará tsíntáchrorá kixin ó nchōxon kixin ijnko nkexro tsochénka it'é la ko ìné kixin: “It'éni, ìnéni, chrokjuahya tsjinkítsani tí jaha kixin kaín nkehe chón-tani la ó chjéheni Dios.” ⁶ A ntá jnkojín nkexro tson-táchro ch'án tíhi ntá í t'ichjánxinhya tsjinkítsa tí it'é la ko tí ìné, mé xíkaha tsixrorá. Mé xíkaha jahará kujtōhérá tí nkehe k'uetōan Dios kixin tjinkáonrá chrókjuích'erá éxi kjuích'e tí sín tsík'axrjeníxínrá. ⁷ Jahará la jehya jnkojínxón tjenkayáxinrá. Ntoá tsíntáchro tí ch'ín Isaías, tí nkexro k'uéchrónka itén Dios ósé. Mé chrónka ch'án kixin nkexrí tjejórá la xíkaha tsíkjin ch'án kixin:

⁸ Tí chojni tí chjasin i ir'va ó xraxinkakonxín sín tí janhan

a ntá tí asén sín la ikjín kuitōhe sín tí janhan.

⁹ Méxra ó chónko tóchjina sín xraxinkaon sín tí janhan

kixin tí nkehe tjako sín la tí nkehe tsík'etōan chojni ó. †

Mé xíkaha ichro itén Dios.

¹⁰ Ntá k'uíyehē ch'ín Jesús tí chojni inaá la ntáchro ch'án kixin:

—Chrókuiñhínrá la ko chrókuiénxínrá. ¹¹ Kaín nkehe ine chojni la ó nchōxon, jehya jje. Tí jje la tí nkehe t'axr-jexín ir'va chojni —mé xíkaha ichro ch'ín Jesús.

¹² A ntá tí sín k'uájiko ch'ín Jesús mé kóchjinehe ch'án la ntáchro sín kixin:

—¿Á noha kixin tí sín fariseo mé kónínkaon sín tí kuínhin sín tí nkehe ntáche sín? —ichro sín.

¹³ Ntá kjuátehe ch'án ntáchro ch'án kixin:

—Kaín tí ka jehya T'aná tjen nkaya nkajni k'uēnkaxin la mé ts'axrjeníxín nuèe. ¹⁴ Ntá tjtōhé sín. Tí jehe sín la ntakótán sín la t'etueñhen sín í so sín ntakótán. A ntá tió ijnko chojni ntakótán tjitaón ntja la ntá yóí sín ts'anótjenyá sín ichrén tòye —ichro ch'án.

¹⁵ Ntá ntáchro ch'ín Pedro kixin:

—Chrónka nkexrí t'axrjexín tíha —ichro ch'án.

¹⁶ Ntá kjuátehe ch'ín Jesús ntáchro ch'án kixin:

—¿Á kjaxinrá jahará tiénxinhya? ¹⁷ ¿Á tiénxinhya kixin kaín tí nkehe ineni na sátti nkaya tseeni na ko xík'axrjexín tí cuérpōeni inaá? ¹⁸ A ntá tí nkehe t'axr-jexín ir'va chojni la t'axrjeníxín asén chojni la tíha la mé tí jje tjasín chojni. ¹⁹ Kaín tíha mé t'axrjeníxín asén chojni, mé tí jínahya tjenkayáxin sín la ko tí t'óyán kichó sín la ko tí tjàchēhe kichó sín la ko tí chón-ta sín í jnko chojni chjín ókjé la ko teé sín la ko tí kjuach'ia la ko tí t'ántaxínhin kichó sín. ²⁰ Tí nkehe a mé tjasín chojni jje. A ntá tí sineni kjónté nchexiteyáhyani ts'ónti tjani la tíha la jehya jje —mé xíkaha ichro ch'ín Jesús.

Ijnko tjan jehya sín israelita mé kuínkáchónki tí ch'ín

Jesús

(Mr. 7.24-30)

²¹ Ntá ch'ín Jesús mé k'uaxrjexín ch'án ntiha la ntá sákjuí ch'án nó chjasin Tiro la ko chjasin Sidón. ²² Ntá

† Éxodo 20.12; 21.17; Levítico 20.9 †† 15.8-9 Isaías 29.13

ikui ijnko chojni chjin na mé ijnko tjan cananea na kjuák'e tjan tí chjasin ntiha. Kóchjinehe tjan tí ch'ín Jesús la k'uèya tjan ntáchro tjan kíxin:

—Ínchéni, Xjeen David, tikonóehéni kíxin tí xjeenni chjin la mé níhi tjan chóna tjan ijnko nchakuen tí jínahya —ichro tí tjan a.

²³ A ntá ch'ín Jesús la ninkehó kjuátēehya ch'án. A ntá tí sín k'uájiko ch'án na kóchjina sín la ntáche sín ch'án kíxin:

—Tétuēnhén tjan sátsji tjan kíxin tinkák'óyako tjan chréhe tjan tí jeheni —ichro sín.

²⁴ Ntá ntáchro ch'ín Jesús kíxin:

—Dios mé ichr'ánna tsjéyá jehó tí kolélo kjuíchroē kuēnte nación Israel —ichro ch'án.

²⁵ A ntá tí tjan a kóchjina la kjuák'exín toch'in tjan nkayakon tí ch'ín Jesús la ntáchro tjan kíxin:

—Ínchéni, tjinkjtsani —ichro tjan.

²⁶ A ntá ch'ín Jesús kjuátēhe ch'án ntáchro ch'án kíxin:

—Jehya tí jína chrókuakitsjahā niotjā tí xjan ntá chrótjāhā koniā chrókjónē va —ichro ch'án.

²⁷ A ntá jehē tjan la ntáchro tjan kíxin:

—Chaxín xikaha, inchéni. Kjánchó kjónté tí koniā na tí nkehe tsjixènjinnkí mesa kuēnte inché la ine va —ichro tjan.

²⁸ Ntá ntáchro ch'ín Jesús kíxin:

—Jaha imá tinkachónkia tí janhan. Tí nkehe tjinkávan la tsoxiteyá —ichro ch'án.

Ntá tuénxín tí hora la tí xjeen tjan ó kuítóhe jína.

Ch'ín Jesús mé kjuínchekitōhe jína nchónhya chojni níhi

²⁹ Ntá ch'ín Jesús mé sákjuíxin ch'án ntiha la kjuíji ch'án chrínta ntayaon Galilea. Ntá chriin ch'án ijnko jnā la ntiha kjuák'etjāxín ch'án. ³⁰ Ntá kójnkotsé itsjé chojni tí tjan ch'án la kjuíkāo sín tí sīnníhi, mé tí sín xitjahya tji la ko tí sín t'ikonhya la ko tí sín nixjahya la ko tí sín tsixénká la kaín xín tí í so sīnníhi. K'uejo sín tí sīnníhi toté tí ch'ín Jesús kíxin jehē ch'án mé sinchekitōhe ch'án sín jína. ³¹ Kaín chojni la imá chrakon sín kíxin k'uíkon sín kíxin tí sín k'uénixjahya la ó nixja sín la tí sín tsixénká la tsíkitohe sín jína la tí sín xitjahya tji la ó tji sín la ko tí sín k'uék'ikonhya la ó t'ikon sín. Méxra kjuanchehe sín kjuasáyé tí Dios kuēnte tí sín Israel.

Ch'ín Jesús mé kjuínchekjine noó mil chojni

(Mr. 8.1-10)

³² Ntá k'uíyēhe ch'ín Jesús tí sín k'uájiko ch'án la ntáchro ch'án kíxin:

—Imá tikonóahā kaín tí chojni kíxin ó ní yaon tjejókoni sín ntá kjuēhe sín nkehe sine sín. Tjinkakonhya chrókuétuānhān sín sáchrókjui sín ntōe sín kíxin naxā nehya sín la ntjā ó tsotienxín sín kjinta —ichro ch'án.

³³ Ntá ntáchro tí sín k'uájiko ch'án kíxin:

—Ntá jaha la ó noha kíxin nteje tjejóni la kohya nkehe tsochjéheni kaín xín tí chojni a —ichro sín.

³⁴ Ntá ch'ín Jesús mé kjuanchankíhi sín, ntáchro ch'án kíxin:

—¿Nkekjaín niotjā chontará? —ichro ch'án.

Ntá ntáchro sín kíxin:

—Yato niotjā chóntani la ko iso koche ntsíntsí —ichro sín.

³⁵ Ntá ch'ín Jesús k'uētōan ch'án kíxin kaín xín sín ts'ixitjāxín sín nonte, ichro ch'án. ³⁶ Ntá kuákja ch'án tí yato niotjā la ko tí koche ntsíntsí la kjuanchehe ch'án kjuasáyé Dios. Ntá kóchrít'ō ch'án tí niotjā a la ntá k'uētuenhen ch'án tí sín k'uájiko ch'án kíxin ts'óxikayēhe sín tí niotjā la ko tí koche kaín xín tí sín siín a, sine sín. ³⁷ Na mé kaín xín sín kjóne sín na kókjehe sín ntá kjuenájín sín yato ntaxra tot'ō tí nkehe naxā tsíxehē. ³⁸ A ntá tí sín kjóne mé noó mil chojni ntoa. A ntá tí chojni chjin la ko chánjan la mé kuákjahya sín cuenta nkekjaín tí sín a. ³⁹ Ntá ch'ín Jesús mé nixjehē ch'án sín sákjuí sín la ntá k'uit'ótjen ch'án ntabárcō la sákjuí ch'án nó Magdala.

Tí sín fariseo la ko tí sín saduceo tjanchia ijnko kjuaxroan náxrjón

(Mr. 8.11-13; Lc. 12.54-56)

16 A ntá iso tí sín fariseo la ko iso tí sín saduceo mé sákjuítsjehē sín tí ch'ín Jesús. Tjinkaon sín chrókjuāchaxín sín ch'án la kjuanchehe sín ch'án kíxin chrókjuākoxín ch'án ijnko kjuaxroan kíxin á chaxín jehē ch'án tsíkixín ch'án tí tjan Dios. ² A ntá ch'ín Jesús na kjuátēhe ch'án, ntáchro ch'án kíxin:

—Jahará ntáchrórā kíxin ijie ntá kónjín ó tsi ijnko yaon jína kíxin kjátse nkajní. ³ La ntá nchítjen ntáchrórā kíxin ijie la náxrjónhya kíxin kjátse nkajní la tjenkáya tjuí. Méxra jahará ntoáhya tjenkayáxinrá. Ó nohará tjátsōanrá tí nkajní, a ntá tjátsōanhyará tí kjuaxroan sítónhen jie. ⁴ Tí sín jínahya la tí sín titekakonhya la tjanchia sín ijnko kjuaxroan jíé. A ntá ts'ikonhyará í jnko kjuaxroan, jehó tí kjuaxroan kuēnte ch'ín Jonás mé ts'ikonrá —mé xikaha ichro ch'ín Jesús. Ntá kuítóhe ch'án sín la sákjuí ch'án.

Ch'ín Jesús ntáchro kíxin chrókuitekakonhya sín tí nkehe tjako tí sín fariseo

(Mr. 8.14-21)

⁵ Ntá tí sín k'uájiko ch'ín Jesús mé k'uátōyē sín ntayaon la ntá k'uitjāyēhenen sín tsíkjikohya sín niotjā.

⁶ Ntá ntáchro ch'ín Jesús kíxin:

—Chrókóxakonhanrá kíxin tí xroān ts'ánkíxin niotjé tí sín fariseo la ko tí sín saduceo.

⁷ Ntá tí sín k'uájiko tí ch'ín Jesús mé ikjo sín kíchó sín ntachro sín kíxin:

—Mé xikaha ichro ch'án kíxin tsíkjikohyani niotjā —ichro sín.

⁸ Ntá kónohe ch'ín Jesús kíxin nkehe tí kjo sín kíchó sín, ntá ntáchro ch'án kíxin:

—¿Nkekuēnté tjórā kíxin chontahará niotjā? Jahará la intsíkoá tinkachónkirá tí janhan. ⁹ Jahará zá naxā tiénxinhyará la ko á xráxinkákonhyará tí in'ó niotjā k'óxikayēheni kjóne tí in'ó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehē? ¹⁰ La ko zá xráxinkákonhyará jahará tí yato

niotja xikayehé kjóne tí noó mil chojni la ko á xráxinkákonhyará nkekjaín ntaxra kjuenájínrá tí nkehe tsíxehé? ¹¹ A ntá ¿nkekuénté kixin kuiénxínhyará kixin janhan la jehya kuénte niotja tjénixja tió ntáxrjan kixin chrókóxakonhanrá kixin tí xroan ts'ánkíxin niotjé tí sín fariseo la ko tí sín saduceo? —mé xíkaha ichro ch'ín Jesús.

¹² Na ntá kuiénxín sín kixin nixjahya ch'án kuénte tí xroan t'ánkíxin niotja. Náhí. Tjenixja ch'án kixin chrókóxakonhen sín kixin tí nkehe tjako tí sín fariseo la ko tí sín saduceo.

Chrónka ch'ín Pedro kixin ch'ín Jesús mé tí nkexro Cristo

(Mr. 8.27-30; Lc. 9.18-21)

¹³ Kjuíji ch'ín Jesús chjino tí chjasin Cesarea de Filipo ntá jehe ch'án mé kjuanchankíhi ch'án tí sín k'uájiko ch'án, ntáchro ch'án kixin:

—¿Nkehe tjo sín kixin nkexro tí Xjeen Dios K'óna Chojni? —ichro ch'án.

¹⁴ Ntá jehe sín kjuátehe sín ntáchro sín kixin:

—Iso sín mé ntáchro sín kixin Juan Bautista, ichro sín. A ntá í so sín na mé ntáchro sín kixin Elías, ichro sín. A ntá í so sín mé ntáchro sín kixin Jeremías o í jnko nkexro k'uéchrónka itén Dios —ichro sín.

¹⁵ Ntá ntáchro ch'ín Jesús kixin:

—¿A ntá jahará nkechorá kixin nkexro tí janhan? —ichro ch'án.

¹⁶ A ntá ch'ín Simón Pedro kjuátehe ch'án ntáchro ch'án kixin:

—Jaha mé tí Cristo mé Xjeen Dios tjechón —ichro ch'án.

¹⁷ Ntá kjuátehe ch'ín Jesús ntáchro ch'án kixin:

—Náxrjón tjen jaha Simón xjeen Jonás kixin kohya ni jnko chojni kjuakóha tíha. Jehó T'aná tjen nkaya nkajní mé kjuakóha tíha. ¹⁸ Méxra ntáxrjan kixin jaha mé Pedro mé t'axrjéxín kixin ijnko xro la chrítaón tí xro mé sít'ána njnko la kjónté tí kjuachaxin kuénte kjuach'én la tsjachahya sinchek'itjáyan. ¹⁹ Méxra jaha mé tsot-jaha tí llave kuénte kjuachaxin nkaya nkajní la ntá tí nkehe tjánjonhya kjuachaxin tsonhen ntihi chjasintajni la kjaxin nkaya nkajní tsochóntahya kjuachaxin. A ntá tí nkehe tsjánjuan kjuachaxin tsonhen ntihi chjasintajni la ntá kjaxin nkaya nkajní síin kjuachaxin.

²⁰ Ntá ch'ín Jesús mé k'uetuénhen ch'án tí sín k'uájiko ch'án kixin ninxeró tsochénkahya sín kixin jehe mé tí Cristo.

Ch'ín Jesús chrónka ch'án kixin its'en ch'án

(Mr. 8.31—9.1; Lc. 9.22-27)

²¹ Ntá ch'ín Jesús kjuankíxin ch'án chénka ch'án tí sín k'uájiko ch'án kixin t'ichjánxín satsji ch'án chjasin Jerusalén la ntaha la tí sín t'etóan kuénte njnko la tí sín nch'at'á tjetóan la ko tí sín maestro tjako ley mé imá sinchekjasóte sín ch'án. La chrónka ch'án kixin ts'óyan sín ch'án kjánchó tí nixin yaon mé tsoxechón ch'án inaá. ²² Ntá ch'ín Pedro mé kuakitsjenta ch'án tí ch'ín Jesús la kjuankíxin nixjehe ch'án ntáchro ch'án kixin:

—Kjá Dios tsjanjonhya kjuachaxin xíkaha tsonhan Ìnchéni kixin jaha la xitjahya tsjasóte xíkaha —ichro ch'ín Pedro.

²³ A ntá ch'ín Jesús mé kuinkátjá ch'án la nixjehe ch'án tí ch'ín Pedro, ntáchro ch'án kixin:

—Sátjia ntáha, Sátanas. Tjiatehya tí jaha tí nkehe tsonna. Jaha chrók'uínkakónhén tí nkehe tjinkaon Dios. Jaha tjenkayáxinhya éxi tjinkaon Dios. Náhí. Tjenkayáxian éxi tjenkayáxin chojni ó —ichro ch'ín Jesús.

²⁴ Ntá nixjehe ch'ín Jesús tí í so sín k'uájiko ch'án, ntáchro ch'án kixin:

—Jnkojínrá tjinkáonrá tsochréhérá tí janhan la t'ichjánxín tsítóhérá kaín tí nkehe tjaké asánrá, ntá tsámárá tí ntacruz kuéntará, a ntá tsochréhérá tí janhan. ²⁵ A ntá tí nkexro tjinkaon jehó sinchekaá asén la ts'itjáyan. A ntá tí nkexro chrókjuinchek'itjáyanxín asén kixin tinkáchónki sín tí janhan la tsaá. ²⁶ ¿A ntá nkehe tsonhen tí chrókjuacha ijnko chojni chróhónta kaín nkehe síin chjasintajni a ntá tí kjuachón chrókjuinchek'itjáyan? ¿Nkehe chrókjuenká chojni kixin chróhónta tí kjuachón? ²⁷ Tí Xjeen Dios K'óna Chojni tsíkao ch'án tí kjuachaxin jié kuénte It'é ch'án tjen nkaya nkajní la kaín tí sín ángel tsíkao ch'án na ntá tsjenkehe ch'án jnkojnko chojni nkexrí tí xra kjuích'e jnkojnko tí jehe sín. ²⁸ Chaxín xrjanka kixin isorá tjejorá ntihi la naxa ts'énhyará naxa ts'ikonjiará kixin nkexrí tí kjuachaxin tsochónta tí Xjeen Dios K'óna Chojni tí tsíkao ch'án kjuachaxin jié —ichro ch'ín Jesús.

Ch'ín Jesús mé k'uixitóxín nkexrí tsjehe ch'án

(Mr. 9.2-13; Lc. 9.28-36)

17 Ntá injón yaon chr'éxín ntá ch'ín Jesús mé sákjuíko ch'án ch'ín Pedro la ko ch'ín Jacobo la ko ch'ín Juan, kichó ch'ín Jacobo, la k'uit'ótjen sín ijnko jna imá noi. ² Ntá ntiha tjejó sín ntá xrínahya k'uíkon sín kixin ch'ín Jesús mé k'uixitóxín nkexrí tsjehe ch'án. Tí nkayakon ch'án la imá tjákini tsjehe éxi yaon la ko iké ch'án la k'óna imá tjóá la tsjehe éxi yóhé ijnko xrohi t'inkaséyan. ³ Na ntá xrínahya k'uíkon sín itjen ch'ín Moisés la ko tí ch'ín Elías tjejótjo sín tí ch'ín Jesús.

⁴ Na ntá ch'ín Pedro mé ntáche ch'án tí ch'ín Jesús kixin:

—Ìnchéni, jína kixin tjejóni ntihi. Tí tjinkávan la chrókjuich'énani iní nchia la mé ijnko kuéntá jaha la ijnko kuénte ch'ín Moisés la í jnko kuénte ch'ín Elías —ichro ch'án.

⁵ Ntá naxa tjenixja ch'ín Pedro na ntá xrínahya ikui ijnko tjuí imá t'inkaséyan kjuák'etja chrítaón tí jna tjejó sín. Ntá xrínahya chríkjan tí tjuí kuínhin sín itén ijnko nkexro nixja na mé ntáchro kixin:

—Tíhi mé xjanna. Imá tjuahá ch'án la ko chàna kixin itjen ch'án. Chrókuinhínrá tí nkehe tjako ch'án —ichro Dios.

⁶ Kuínhin tí sín k'uájiko ch'án xíkaha la ntá kjuítsínka sín nonte kixin imá chakon sín. ⁷ Na ntá ch'ín Jesús mé kóchjina tí tjejó sín la kuákóxín sín ch'án la ntáchro ch'án kixin:

—T'aya chrakonhyará —ichro ch'án.

⁸ Na ntá xrínghya k'uíkon sín kixin kohya ninkexró. Jehó ch'ín Jesús mé tjen.

⁹ Na ntá tí k'uínkajinxin sín tí jnā ntá k'ueṭoan ch'ín Jesús, ntáchro ch'án kixin:

—Ninkexró chenkahyará tí nkehe k'uíkonrá ijie hasta tsoxechónjian tí Xjeen Dios K'óna Chojni —ichro ch'án.

¹⁰ Ntá tí sín k'uájiko ch'ín Jesús mé kjuanchankí sín, ntáchro sín kixin:

—¿Nkekuènté ntáchro tí sín maestro tjako tí ley kixin saoxín itsi tí ch'ín Elías la ntá chr'éxín itsi tí nkexro tsaáxinni? —ichro sín.

¹¹ Ntá kjuátehe ch'ín Jesús, ntáchro ch'án kixin:

—Chaxín senó itsi ch'ín Elías kixin tsjasíyóxin ch'án kaín nkehe. ¹² Kjánchó ó xrjanka kixin chaxín ó kui ch'ín Elías la tí sín chjasintajni la mé kjuátsoanhyá sín ch'án la kjuínchekjasóte sín ch'án éxí kóxrjínhín sín. Mé xíkaha kjaxin tí Xjeen Dios K'óna Chojni la mé kjaxin sinchekjasóte tí jehe sín —mé xíkaha ichro ch'ín Jesús.

¹³ Ntá tí sín k'uájiko ch'án mé kónohe sín kixin ch'ín Jesús la nixja ch'án kuènte Juan Bautista.

Ch'ín Jesús mé kjuínchekitohe jína ijnko xjan t'aniáte
(Mr. 9.14-29; Lc. 9.37-43)

¹⁴ Ntá tió k'uíji sín tí siín nchónhya chojni la ntá kóchjina ijnko ch'ín tí tjen ch'ín Jesús la kjuák'exin toch'in ch'án nkayakon ch'án. La ntáchro ch'án kixin:

¹⁵ —Inchéni, tikonóehéni kixin xjeenni la níhi, chóna ch'án chin t'aniáte. Nchónhya veces tjítsinkate ch'án xrohi la tjítsinkankí ch'án ntá. ¹⁶ Ntá kjuíkəoni ch'án ntihi la tí sín xrikoá la kjuachahya sín kjuínchekitohe ch'án jína.

¹⁷ A ntá kjuátehe ch'ín Jesús ntáchro ch'án kixin:

—Jahará la chaxínhya tinkachónkirá tí janhan la imá tjásinrá jje. ¿Xá hasta nkesá tjinkáonrá naxa ts'ejóni? ¿Hasta nkesá tsjácha tsjak'é tsjákoahará? Xrakoa tí xjan méhe ntihi —ichro ch'án.

¹⁸ Ntá ch'ín Jesús mé k'ueṭuēhen ch'án tí nchakuen tí jínahya la ntá k'uaxrjexín tí nchakuen tí jínahya tí chánjan la tuénxín kuítəhe xjan jína.

¹⁹ Ntá kjuixin sákjuí sín la jehó ch'ín Jesús tjen ch'án la ntá tí sín k'uájiko ch'án mé kjuanchankíhi sín ch'án, ntáchro sín kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

²⁰ Ntá ntáchro ch'ín Jesús kixin:

—Jahará la kjuachahyará kuakítsjerá nchakuen tí jínahya kixin intsíkoá tinkachónkirá tí janhan. Chaxín xrjanka kixin tí chrókuinkachónkirá kaín asánrá kjónté intsíkoá éxí ijnko tje mostaza intsí la ntá chróntácherá tí jnā kixin: “Sátjixian ntihi la sátsjia ókjé”, chróchrórá chróntácherá tí jnā la ntá tí jnā sáchrókjuixin ntiha. Mé xíkaha kaín nkehe chrókjuachará chrókjuich'erá tí chaxín tinkachónkirá tí janhan. ²¹ A ntá tí tsakítsjerá ijnko nchakuen tí jínahya la t'ichjánxín tsonixjehérá Dios la ko sintehyará.

Ch'ín Jesús chrónka ch'án inaá kixin its'en ch'án

(Mr. 9.30-32; Lc. 9.43-45)

²² Naxa k'uék'aji sín jnkokoá tí estado Galilea la ntáchro ch'ín Jesús kixin jehe ch'án tí Xjeen Dios K'óna Chojni mé tsotsé sín ch'án la ko tsjikaán sín ch'án tí siín chojni t'etəan sinchekjasóte sín ch'án ²³ la ts'óyán sín ch'án. A ntá tí yaon níxin ntá tsoxechón ch'án inaá, ichro ch'án. Ntá tí sín k'uájiko ch'án mé kuínhin sín la imá k'uává sín.

Ch'ín Jesús kjuenkə ch'án tí nkehe kjuanchia tí sín kuènte nínko

²⁴ Ntá tió kjuíji ch'ín Jesús la ko tí sín k'uájiko ch'án tí chjasin Capernaum la ntá tí sín nchekjènkí kuènte nínko mé sákjuítsjehe sín tí ch'ín Pedro la kjuanchankí sín kixin:

—Tí maestro kuèntá la, ¿a tjenkahya ch'án tí nkehe tjanchia tí sín nchekjènkí kuènte nínko? —ichro sín.

²⁵ Ntá kjuátehe ch'ín Pedro, ntáchro ch'án kixin:

—Kjá tjenkə ch'án —ichro ch'án.

Ntá k'uíxēhen ch'ín Pedro tí nchia la ch'ín Jesús mé senó nixja ch'án ntáchro kixin:

—¿Nkechrua, Simón? ¿Nkexro chrókjuenkə tí nkehe tjanchia tí sín t'etəan chjasintajni, á tí sín kuènte ntiho ó á tí sín tsíkjixín ókjé? —ichro ch'ín Jesús.

²⁶ Ntá kjuátehe ch'ín Pedro, ntáchro ch'án kixin:

—Tí sín tsíkjixín ókjé mé tjenkə sín —ichro ch'án.

Ntá ntáchro ch'ín Jesús kixin:

—A ntá tí sín chjasén sín la t'ichjánxínhya chrókjuenkə sín. ²⁷ Kjánchó tjínkəkonhya tsonínkaon ninkexró ntihi. La ntá sátsjia tí ntayaon sátsjikoá tí ichjōn chóna gancho tséxin sín koche la ntaha itsé tí chjōn chrínki ntayaon. Ntá tsákjá tí koche saoxín sítsé gancho. Ntá takitjehe nkaya ir'va va la ts'itja ijnko chichaon. Táha mé tsjacha tsjenkə kaín tí tjásikáhə sín la ko tí tjásikehé sín jaha. Táha mé sátsjikoá tjenka —ichro ch'ín Jesús.

¿Nkexro tí imá ts'etəan?

(Mr. 9.33-37; Lc. 9.46-48)

18 A ntá tí yaon a tí sín k'uájiko ch'ín Jesús mé kóchjinehe sín ch'án ntá kjuanchankíhi sín ch'án kixin:

—¿Nkexro tí antsí má ts'etəan tí kjuachaxin kuènte nkaya nkajní? —ichro sín.

² Ntá ch'ín Jesús mé k'uíyehə ch'án ijnko chánjan la kjuak'e jnkōsiné tí tjejó tí jehe sín ³ la ntáchro ch'án kixin:

—Chaxín xrjanka kixin tí ts'ónahyará éxí ijnko xjan ntsí ntá xitjahya tsákjárá tí kjuachaxin kuènte Dios. ⁴ Tí jnkōjín nkexro ts'óna éxí tí chánjan ihnkehya la mé antsí tjeəan ntiha. ⁵ A ntá tí nkexro ts'áyéhə ijnko chánjan kixin tinkáchónki sín tí janhan la mé xíkaha éxí chrók'uáyéhə sín tí janhan —mé xíkaha ichro ch'ín Jesús.

Tí chojni tjasin jie mé tsjasóte sín

(Mr. 9.42-48; Lc. 17.1-2)

⁶Tí jnkojín nkexro chrókjuachroe ijnko chánjan ntsí tinkáchónki tí janhan la íchá jína chrókjuincheteyá sín ch'án ijnko xṛó tsík'óna xṛochṛe ntá chrókjuíkákánki ch'án ntayaon nin̄ka. ⁷Imá náxrjónhya tjejó tí sín chjasintajni kixin siín nkehe tjasixín chojni jie. Xráxín la jehí siín, a ntá nõa tí nkexro tjasin tí nkehe tsjasixín chojni jie.

⁸Tí itjá o totá tjasixián jie na chrókójina chrókochrínjian chróchr'an ikjín kixin íchá jína chróchonta kjuachón kjónté it'óó itjá o it'óó totá. Á ntá tí yóí itjá o yóí totá chróchonta tsjásixián jie la tíha mé sátsjixián tí síche xrohi jnkochrín. ⁹La ko kjaxin tí ikuan tjasixian jie na chrókójina chrókuakitsjenkiá tí ikuan chróchr'an ikjín kixin kjónté náyo ikuan na chróchonta kjuachón. A ntá tí yóí ikuan chróchonta tsjásixián jie la tíha mé sátsjixián tí síche xrohi jnkochrín.

Kjuíncheyóexin ch'ín Jesús éxí ijnko kolélo tsík'itjayan

(Lc. 15.3-7)

¹⁰Chrókókjoniéhyará nijnko tí chánjan ntsíntsi. Tjonkará kixin nkaya nkajní la tí sín ángel kuente tí xjanntsi la xráxín tjejó sín tí tjen T'aná nkaya nkajní.

¹¹Tí Xjeen Dios K'óna Chojni la mé ikui kixin chrókjuinchekaá tí chojni xrichroe.

¹²¿Jahará nkechorá? Ijnko chojni chóna ijnko ciento kolélo ntá chrók'uitjayan ijnko va na ¿á chrókuítqehya ch'án tí noventa y nueve va tí jnā ó a ntá á chrókjuikjeyáhya ch'án tí ijnko tí ko k'uitjayan ní? ¹³A ntá tí tsjacha ch'án ts'itja ch'án va ntá antsí tsöchéhe ch'án kixin tí kolélo k'uitja ch'án la ntá kánhyó tsöchéhe ch'án kixin tjejó tí noventa y nueve ko tsík'itjayanhya va. ¹⁴Mé xikaha kjaxin It'eni tjen nkaya nkajní la tjinkakonhya ch'án kixin chrók'uitjayan ninkexró kjónté ijnko chojni kánhyó tjetoo.

Chrók'uitjayanhanrá tí jie kjuasinhánrá kichuárá

(Lc. 17.3)

¹⁵Tí kichuá tí chrókjuit'aha ichrén nkehe jínahya la ntá jahvá chrónixjehé ch'án la nchexraxinkaon ch'án tí jie kjuasin ch'án. A ntá tí kjuacha nixjehé tí kichuá la í kohya kjuanínkaon. ¹⁶A ntá tí tahya ch'án kuentá nkechrúa la ntá ntáche á jnko o yaá chojni sáttjioa kixin tsinhin sín á chaxín titekakonhya ch'án. ¹⁷A ntá tí kjónté xikaha naxá titekakuenhya ch'án sín la ntá chenka tí sín tsíkójnkotsé nkehe tí jie kjuasin ch'án la ntá tí naxá titekakuenhya ch'án tí sín tsíkójnkotsé la ntá ts'ikonrá ch'án éxí ijnko chojni tinkáchónkihya Dios o éxí ijnko chojni nchekjènkj.

¹⁸Chaxín ntáxrjan kixin tí tsjánjonhyará kjuachaxin nkehe tsonhen ntihi chjasintajni la ntá kjaxin nkaya nkajni tsjanjonhya Dios kjuachaxin la ko tí tsjánjonrá kjuachaxin nkehe tsonhen ntihi chjasintajni la kjaxin ntaha nkaya nkajni tsjanjon Dios kjuachaxin.

¹⁹Kjaxin ntáxrjan kixin tí tjejó yaará ntihi chjasintajni la tí jnkokoá tjejóttjenkayáxinrá chrókjuancheherá Dios

ijnko nkehe tjinkáonrá la ntá jehe ch'án mé tsotjáhará ch'án. ²⁰Kixin tí tjejó yaá o iy'á chojni tjejó jnkokoá t'ákjenxin sín nin̄a la janhan koína tjéntaxian tí tjejó sín ntiha.

²¹Ntá kóchjina ch'ín Pedro mé kjuanchankí ch'án ntáchro ch'án kixin:

—Ínchéni, ¿nkekjaín veces chrók'uitjayenhenni tí jie kjuasin kichó ní? ¿Á yato veces ó ní? —ichro ch'án.

²²Ntá kjuátehe ch'ín Jesús, ntáchro ch'án kixin:

—Náhí, jehya yato veces ó. Náhí, hasta setenta veces tí yato.

Ch'ín Jesús kjuíncheyóexin ch'án ijnko chojni ch'exón xṛá k'uitjayanhya ch'án ijje kichó ch'án

²³Tí kjuachaxin kuente Dios la éxí yóhe ijnko rey tjinkaon ch'án tsjentoáko ch'án kuentá tí sín ch'ehe ch'án xṛá. ²⁴Ntá kjuankixin ch'án tsítsinkaxin cuenta la ntá xrináhya kóchjina ijnko ch'ín ch'e xṛá síká nchónhya millones chichaon. ²⁵Tí ch'ín a mé chóntahya ch'án chichaon ts'ókjenhen ch'án tí ch'ín rey la ntá tí ch'ín rey mé k'uetqan ch'án kixin tí nkexro a mé tsqxi ch'án la koí tí ichjién ch'án la ko xjeen ch'án la ko kaín nkehe kuente ch'án kixin ntá xikaha mé tsoxenka kaín tí síká ch'án. ²⁶A ntá tí nkexro ch'e xṛá mé kjuák'exin toch'in ch'án nkayakon tí rey la chrónóqehé ch'án, ntáchro ch'án kixin: "Jaha Ínchéni tikonóqehéni la kjónté kjaxón tsjenkahani kaín tí sikáhani", ichro ch'án. ²⁷A ntá tí ch'ín rey kujkonóqehé ch'án tí ch'ín a kjónté itsjé síká ch'án, ntá kuítóhe ch'án sákjuí. ²⁸A ntá tí sákjuí tí ch'ín a ntá xrináhya xéta ch'án ijnko nkexro ch'eko ch'án xṛá mé ijnko nkexro síkéhe ch'án iso chichaon. La ntá tí ch'ín a mé tsénkíhi ch'án isin la ntáchro ch'án kixin: "¿Tsjénkana tí nkehe tjasikàna ní o náhí!" ichro ch'án. ²⁹A ntá tí ch'ín chóxin ch'án mé kjuák'exin toch'in ch'án nkayakon ch'án la chrónóqehé ch'án ntáchro ch'án kixin: "Tikonóqehéni ijje la kjónté kjaxón tsjenkahani kaín tí nkehe sikáhani", ichro ch'án. ³⁰A ntá jehe ch'án la kujkonóqehya ch'án. K'uetqan ch'án kixin tí ch'ín a mé tsjak'echjina ch'án tsjixinjian tsjenka ch'án kaín tí síká ch'án. ³¹Ntá tí í so sín ch'exón xṛá mé k'uíkon sín la ntá imá kóxakonhen sín la sákjuíchénka sín tí lámoé sín nkexrí kaá kónhen tí ch'ín síká. ³²A ntá tí lamo mé k'uetqan tsjik'iyehé sín tí nkexro jínahya la ntá ntáchro ch'án kixin: "Imá jínahya jaha. Janhan mé kjuíntak'itjayanhan tí nkehe tjasikàna kixin jaha chrónóqana. ³³A ntá jaha mé kjaxin chrókujkonóqehé tí nkexro choxian éxí janhan kujkonóqaha tí jaha", ichro tí ch'ín lamo. ³⁴A ntá imá kónínkaon tí lamo a la k'uetqan ch'án kixin tsjasóte tí ch'ín a tsjixinjian tsjenka ch'án kaín tí síká ch'án.

³⁵A ntá tí ch'ín Jesús ntáchro ch'án kixin:

—Mé xikaha T'aná tjen nkaya nkajní xikaha sit'ahará jahará tí jehya kaín asánrá ts'itjayanhanrá tí jie chóna kichuárá —ichro ch'ín Jesús.

Tjako ch'ín Jesús kuènte tí sín t'itjìhi kichó

(Mr. 10.1-12; Lc. 16.18)

19 A ntá kjuixin nixja ch'ín Jesús kaín tíha, ntá sákjuixin ch'án estado Galilea la kjuíji ch'án estado Judea nó tóhe tí ntário Jordán. ² Ntá nchónhya chojni kjuíjichréhe sín ch'án ntá ntaha mé kjuínchekitqhe ch'án jína tí chojni níhi.

³ Ntá iso sín fariseo mé kóchjinehe sín tí ch'ín Jesús kjuanchankíhi sín ch'án kixin tsotsjehe sín nkexrí tsixro ch'án, ntáchro sín kixin:

—¿Á siín kjuachaxin tsjákehe jnkójín chojni ichjién kjónté kohya jié jié? —mé xíkaha kjuanchankí sín.

⁴ Ntá kjuátqhe ch'ín Jesús ntáchro ch'án kixin:

—¿Á nunca kjuínchekuáxinhyará jahará kixin ntáchro xroon itén Dios kixin tí nkexro kjuích'éna kaín chojni siín chjasintajni tí xrankíxixín, la tí nkexro mé “kjuích'éna ch'án chojni ntoa ko chojni chjin”? ¹⁵ La ko ntáchro kixin: “Mé xíkaha tí chojni ntoa la tsítqhe sín it'é sín la ko ìné sín la tsakja sín ichjién sín la yóí sín la éxí ó jnko chojni xíkaha ts'óna sín.” ¹⁶ Mé xíkaha la í jehya yaá chojni tí jehe sín. Náhí. Ó jnko chojni k'óna tí jehe sín la mé Dios kjuanjon kjuachaxin kixin kuákja kichó sín, la í xitjahya ts'itjìhi kichó sín.

⁷ Ntá tí sín fariseo mé kjuanchankíhi sín ch'án kixin:

—¿Ntá nkexrí kixin tí ch'ín Moisés k'uetqan kixin ts'óna ijnko xroon tsakja tí ichjién kixin tsjákeexín kichó sín? [†] —ichro tí sín fariseo.

⁸ Ntá ntáchro ch'ín Jesús kixin:

—A ntá jahará títekákonhyará. Méxrā ch'ín Moisés kjuanjon ch'án kjuachaxin kixin ts'óna tí xroon ts'itjìxín kichuárá. Kjánchó tí xrankíxixín la xíkaha kónhen. ⁹ Méxrā ntáxrjan kixin jnkójín sín tjákehe ichjién tí kjuasinhya jié, chóntahya tjan í jnko chojni, ntá kjuákehe ch'án tjan ntá tsakja ch'án í jnko chjin mé xíkaha la ó jié tíha. La ko kjaxin tí ijnko chojni chjin tsíkítsínkehe ntá tsakja í jnko chojni la kjaxin jié tíha.

¹⁰ La ntá tí sín k'uájiko ch'ín Jesús ntáchro sín kixin:

—Tí xíkaha tjanjonko kichó sín chrók'uitjìhi kichó sín la íchá jína chrókóteehya sín.

¹¹ Ntá ntáchro ch'ín Jesús kixin:

—Kénhya chojni tsjacha tienxín tíha. Jehó tí sín kjuanjon Dios kjuachaxin tienxín sín. ¹² Siín iso chojni tí tsík'ónaxín sín la chóntahya sín kojé sín la xitjahya tsochónta sín ichjién sín. La í so sín la chrokjuahya tsakja kichó sín kixin ókjé chojni kjaxin kjuích'ehe sín xíkaha, la ko í so sín la takjahya kichó sín kixin tjinkaon Dios kixin xíkaha sich'ehe sín ch'án xrā. Tí sín tsjacha sich'e tíha la chrókjuich'e sín xíkaha.

Ch'ín Jesús mé kjuíncheyaon ch'án chánjan

(Mr. 10.13-16; Lc. 18.15-17)

¹³ Ntá ikjui chojni kjuíkqao sín iso xjan kixin tjinkaon sín tsjak'etja tja ch'ín Jesús chrítaón tí chánjan la sincheyaon ch'án sín. Ntá tí sín k'uájiko ch'án mé

kóninkakonhen sín tí sín kjuíkqao tí xjan. ¹⁴ A ntá ntáchro ch'ín Jesús kixin:

—Nté tjtqherá tsoxrakoa xjan tí tjén janhan la t'ínkakuènyhará xjan kixin tí sín kuènte kjuachaxin nkaya nkajní la mé tóyóhe éxí tí jehe xjan —ichro ch'án.

¹⁵ Ntá kjuak'etja tja ch'án chrítaón tí xjan la ntá kjuixin ntá sákjuí ch'án ókjé.

Ijnko ch'ín ntasoá rico mé kjuínixjehe ch'án tí ch'ín Jesús

(Mr. 10.17-31; Lc. 18.18-30)

¹⁶ A ntá ijnko ch'ín ntasoá sákjuítsjehe ch'án tí ch'ín Jesús la kjuanchankíhi ch'án kixin:

—Jaha la ijnko Maestro jína. La ntá znkehe jína chrókjuich'eni kixin chróchóntani kjuachón jnkochrín? —ichro ch'án.

¹⁷ Ntá ch'ín Jesús kjuátqhe ch'án, ntáchro ch'án kixin:

—¿Nkekuènté ntáchrúa kixin jína tí janhan? Jehó jnkokoá nkexro la mé jína la tíha mé Dios. A ntá tí tjinkávan tsochonta kjuachón jnkochrín la títekávan tí nkehe k'uetqan Dios —ichro ch'ín Jesús.

¹⁸ Ntá ntáchro tí ch'ín ntasoá kixin:

—¿Nkehe tíha? —ichro ch'án.

Ntá ntáchro ch'ín Jesús kixin:

—Chrók'oyánhya chojni la ko chrókjuich'iyehya nijnko chojni chjin la ko chrókueehya la ko chrókjuich'énahya kjuach'ia kuènte ókjé chojni ¹⁹ la ko chrókjuíkósáyehé it'á la ko ìná la ko chrótjuèhé kichuá éxí tjuèxian asán. ^{††} —mé xíkaha ichro ch'ín Jesús.

²⁰ Ntá ntáchro tí ch'ín ntasoá kixin:

—Kaín tíha la kjuínchexiteyáni desde tí ntasoáni. ¿A ntá nkehe tí naxā t'itjáyán? —ichro ch'án.

²¹ Ntá ntáchro ch'ín Jesús kixin:

—Tí tjinkávan antsí ntoá sijnchexiteyá la sátjia sijnchekjia kaín tí nkehe chonta la sijnchekitqonhén tí sín nõa. Ntá kaín tí nkehe tjehe la tsochonta nkaya nkajní. Ntá tsjixin ntá tsjihá la chréhé tí janhan —ichro ch'ín Jesús.

²² Ntá kuínhin tí ch'ín ntasoá a xíkaha ntá t'ává ch'án sákjuí ch'án kixin imá itsjé nkehe chónta ch'án.

²³ Ntá ch'ín Jesús mé nixjehe ch'án tí sín k'uájiko ch'án, ntáchro ch'án kixin:

—Chaxín tjonqará kixin tí chojni chónta imá itsjé nkehe na imá xrā ts'áyéhe sín tí kjuachaxin kuènte nkaya nkajní. ²⁴ Kjatqee xrjanka kixin antsí xrāhya chrók'uat-sínka ijnko kocamello ijnko tjar'i ntachica tjexrja. A ntá antsí xrā kixin tí sín chónta itsjé nkehe chrók'uáyéhe tí kjuachaxin kuènte Dios —ichro ch'ín Jesús.

²⁵ Ntá tí sín k'uájiko ch'án mé kuínhin sín la imá chrakon sín, la jehe sín kjuanchankíhi kichó sín kixin:

—Tí xíkaha la zchá nkexro chrókjuacha chrókuaá? —ichro sín.

²⁶ Ntá komá ch'ín Jesús tí jehe sín la ntáchro ch'án kixin:

—Chojni chjasintajni la xitjahya xíkaha sich'e. A ntá Dios mé tsjacha sich'e xíkaha —ichro ch'ín Jesús.

† 19.4: Génesis 1.27; 5.2 †† Génesis 2.24 ‡ Deuteronomio 24.1-4

†† Éxodo 20.12-16; Deuteronomio 16.20; Levítico 19.18

²⁷ Ntá ntáchro ch'ín Pedro kixin:

—Ínchéni, jeheni kaín ni la kúitoheni kaín nkehe chóntani kixin tsochréheni tí jaha. A ntá znkehe ts'áyéheni? —ichro ch'án.

²⁸ Ntá kjuátehe ch'ín Jesús kixin:

—Chaxín ntáxrjan kixin tió itsi tí yaon tsonixin kaín nkehe la tí Xjeen Dios K'óna Chojni la mé tsjak'e tí trono tsochónta kjuachaxin jié la ntá kjaxinrá jahará chréhérá tí janhan la ts'ejorá teyó trono sijncheki-tōexínrá ijíé kaín tí sín tsík'axrjenixin tí teyó xjeen ch'ín Israel. ²⁹ La ko kaín tí sín kúitōhe sín ntōe sín la ko kúitōhe sín tí kíchó sín la ko kúitōhe sín it'é sín o ñné sín la ko kúitōhe sín ichjién sín la ko xjeen sín la ko nontēe sín kixin tinkáchónki sín tí janhan, na ntá antsí má tsochónta sín la ko kjaxin tsochónta sín kjuachón jnkochrixín. ³⁰ A ntá nchónhya tí sín t'etōan ijie, mé tsjixixín tsochréhe sín. A ntá nchónhya tí sín t'ítuenhen ijie la tí sín a mé ts'etōan sín tí ntiha.

Ch'ín Jesús kjuíncheyóexin ch'án éxí tí sín ch'e xrā

20 'Tí kjuachaxin kuente Dios la éxí yóhe ijnko chojni chónta xrā nontēe ch'án la ntá ijnko yaon imá nchítjen sákjuikjeyá ch'án chojni tsotjéhe ch'án to uva. ² Ntá tí k'uitja ch'án tí sín sich'ehe ch'án xrā ntá ikjo ch'án sín kixin ijnko denario tsjenkehe ch'án sín tí xrā sich'e sín nontēe ch'án tí yaon a. ³ Ntá chr'éxín como las nueve nchítjen ntá sákjuí ch'án ntain la k'uíkon ch'án í so sín tjejó ntain chóntahya sín xrā. ⁴ Ntá nixjehe ch'án sín ntáchro ch'án kixin: "Kjaxinrá sáchrókjuirá chrókjuich'erá xrā nontēeni la jína chrókjuénkahará", ichro ch'án. La ntá jehe sín sákjuí sín. ⁵ A ntá tí ñché nonte la sákjuí ch'án inaá chonkixin naxā xík'itja ch'án í so sín ch'ehe ch'án xrā la nta tí las tres kónjín la xíkaha naxā xík'itja ch'án í so sín inaá. ⁶ A ntá las cinco kónjín sáxíkji ch'án ntain inaá la k'uitja ch'án í so chojni ntaha chóntahya sín xrā la ntá kjuanchankíhi ch'án sín kixin: "¿Nkekuèté tjejórá ntihi ch'e-hyará xrā kuenté yaon? —ichro ch'án.

⁷ Ntá ntáchro sín kixin: "Kohya nkexro kjuanjon xrā chrókjuich'eni", ichro sín. Ntá ntáchro ch'án kixin: "Kjaxinrá chrókjuirá chrókjuich'erá xrā nontēeni la jína chrókjuénkahará", ichro ch'án. ⁸ A ntá ó kóntó ntá tí ñché nonte mé nixjehe ch'án tí ch'ín t'etōan sítónhen xrā nontēe ch'án la ntáchro ch'án kixin: "T'iyehé kaín tí sín kjuích'e xrā tjénkehé sín. Tjankíxian tjénkehé tí sín saoxín k'uíxenhén xrā la chr'éxín tjénkehé tí sín sín saoxín k'uíxenhén xrā", ichro ch'án. ⁹ A ntá kóchjina kaín tí sín k'uíxenhén xrā las cinco kónjín la jnkoinko sín k'uáyéhe sín jnkoinko denario. ¹⁰ Ntá chr'éxín, tió kóchjina tí sín k'uíxenhén xrā nchítjen la ntá kjuenkayáxin sín kixin antsí itsjé chichaon chrókjuacha sín, ichro sín. Kjánchó kjaxin sín k'uáyéhe sín jnkoinko denario ó. ¹¹ A ntá tí kjuachahya sín tjeje ntá kjuankíxín sín kónínkakonhen sín tí ñché nonte ¹² la ntáchro sín kixin: "Tí sín ikui kjuixixín la kjuích'e sín xrā jnkokoá hora la ntá kjaxin kjuénkehé sín jnkokón éxí kjuacha tí jeheni. La ntá jeheni kjuích'eni xrā kjónté sóa la kuenté yaon kjuích'eni xrā", ichro sín. ¹³ A ntá kjuátehe tí ñché

nonte nixjehe ch'án ijnko tí jehe sín, ntáchro ch'án kixin: "Janhan la kjuít'ayahará ninkehó. Ó kúitōexínni kixin ijnko denario tsjénkahará tí yaon. ¹⁴ Ntá tsákjá chíchakōan la sátjia. Janhan tjínkavan tsjénkahā tí sín k'uíxenhén kjuixixín éxí tí kjuénkahā jaha. ¹⁵ ¿Á chon-tahya janhan kjuachaxin xíkaha chrókjuénkahā sín kixin tíha la chíchakōanna? ¿Nkekuèté tóchjinoxínhan jaha kixin xíkaha kjuénkahā sín?" ichro ch'án. ¹⁶ Mé xíkaha iso tí sín tsjixixín chréhe sín la tí sín a senóxin ntiha la ntá itsjé tí sín senó la mé tsjixixín tsochréhe sín ntiha kixin nchónhya sín k'uíyahā kjánchó tsjéhya sín k'uitja —ichro ch'ín Jesús.

Chrónka ch'ín Jesús inaá kixin its'en ch'án

(Mr. 10.32-34; Lc. 18.31-34)

¹⁷ Ntá ch'ín Jesús sákjuí ch'án ntja nó chjasin Jerusalén la ntá k'uaxrjentako ch'án tí teyó sín k'uájiko ch'án la ntáchro ch'án kixin:

¹⁸ —Jahará ts'ikonrá ó sátsjini chjasin Jerusalén la ntá tí Xjeen Dios K'óna Chojni mé tsotsé chojni tsjikaán sín ch'án tí siín tí sín nchāt'á t'etōan la ko tí sín maestro tí tjako ley. Ntá jehe sín ts'etōan sín kixin its'en ch'án. ¹⁹ Ntá tsjikaán sín ch'án tí siín chojni jehya judío la jehe sín mé tsjanoá sín ch'án la ko tsjate sín ch'án ntá tsjak'enkani sín ch'án ijnko ntacruz kjánchó yaon nixin mé tsoxechón ch'án inaá —mé xíkaha chrónka ch'ín Jesús.

Tí nkehe kjuanchia tí ñné ch'ín Jacobo la ko ch'ín Juan

(Mr. 10.35-45)

²⁰ A ntá tí ñné tí xjeen ch'ín Zebedeo mé kjuikao tí jehe sín mé ch'ín Jacobo la ko ch'ín Juan mé kóchjinehe tjan tí ch'ín Jesús. Kjuák'exín toch'in tjan nkayakon tí ch'ín Jesús la chrónóhehe tjan ch'án. ²¹ Ntá ch'ín Jesús kjuanchankíhi ch'án tjan kixin:

—¿Nkehe tjinkávan? —ichro ch'án.

Ntá kjuátehe tjan ntáchro tjan kixin:

—Tió tsétoanxián tí kjuachaxián jié la tsjánjuan kjuachaxin kixin tí iyó xjeenni chrók'uejó sín ijnko la itjá chjina la í jnko la itjá ikjon —ichro tjan.

²² Ntá kjuátehe ch'ín Jesús, ntáchro ch'án kixin:

—Jahará la noahyará nkehe tjanchará.

¿Á chrókjuachará chrók'uirá tí nkehe itsjá its'ia janhan la ko á chrókjuachará chrókuikiterá éxí tsikite janhan? —ichro ch'án.

Ntá kjuátehe sín, ntáchro sín kixin:

—Kja tsjachani —ichro sín.

²³ Ntá ntáchro ch'ín Jesús kixin:

—Chaxín kjónté chrókjuachará chrók'uirá éxí tí nkehe itsjá its'ia la ko chrókuikiterá éxí tsikite janhan, kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná ikjon kixin janhan la tónahya tocar kixin tsjánjuan tíha. Jehó T'aná tjen nkaya nkajní mé nohe kixin nkexro tsíkjeyá ch'án ts'áyéhe tíha —ichro ch'ín Jesús.

²⁴ Ntá kuínhin tí ite sín kixin xikaha tsíkjanhia tí sín a ntá kóninkakonhen sín tí yaá a. ²⁵ A ntá ch'ín Jesús mé k'uíyehé ch'án tí jehe sín ntá ntáchro ch'án kixin:

—Jahará ó nohará kixin tí sín t'etōan chjasintajni la imá t'etuenhen sín kaín chojni la tí sín t'etōan imá nchehnkehe asén sín kixin ihyé sín t'etōan sín.

²⁶ Kjánchó jahará la xikahya chrókjuich'erá. Náhí. Tí jnkójnra tjináonra chrókuétōanra la chrókjuinkitsará tí í so sín. ²⁷ A ntá tí jnkójnra tjináonra chrókuétōanra mé t'ichjánxin senó chrókjuákoxinra chrókjuich'eherá kichuárá xra. ²⁸ Mé xikaha tí Xjeen Dios K'óna Chojni mé kuihya kixin chojni chrókjuich'ehe xra. Náhí. Ikui ch'án kixin sich'ehe ch'án sín xra la ko ts'enyákonhen chojni kixin tsaáxin nchónhya sín.

Ch'ín Jesús kjuínchekitohe jína yaá chojni t'ikonhya

(Mr. 10.46-52; Lc. 18.35-43)

²⁹ Ntá k'uaxrjexín sín chjasin Jericó la nchónhya chojni chréhe tí ch'ín Jesús. ³⁰ Ntá ntaha chrínta ntja tjejó-tjāxin yaá sín t'ikonhya. La ntá kuínhin sín kixin k'uat-sínka ch'ín Jesús la ntá kjuankíxin t'íyehé sín ch'án ntáchro sín kixin:

—Ínchéni, jaha tsík'axrjeníxian David, tikonógehéni —ichro sín.

³¹ Ntá nchónhya chojni mé ntáche sín tí sín t'ikonhya kixin:

—Tánirá tí jahará —ichro sín.

Ntá tí jehe sín antsí itsén k'uèya sín, ntáchro sín kixin:

—Ínchéni, jaha tsík'axrjeníxian David, tikonógehéni —ichro sín.

³² Ntá ch'ín Jesús kjuák'echónhen ch'án ntá k'uíyehé ch'án tí sín t'ikonhya la kjuanchankíhi ch'án sín ntáchro ch'án kixin:

—¿Xá nkehe tí tjináonra chrókjuít'ahará? —ichro ch'án.

³³ Ntá jehe sín kjuátehe sín ntáchro sín kixin:

—Jaha Inchéni, tjinakonni chrókjuínchek'ikuanni —ichro sín.

³⁴ Ntá ch'ín Jesús mé kuikonógehé ch'án tí jehe sín la kjuínchekuákoxin tja ch'án tí ikon tí sín t'ikonhya. Ntá tuénxín k'uíkon sín la chréhe sín tí ch'ín Jesús.

K'uixenhen ch'ín Jesús chjasin Jerusalén

(Mr. 11.1-11; Lc. 19.28-40; Jn. 12.12-19)

21 Ntá kjuíji chjina sín chjasin Jerusalén, mé kjuíji sín tí chjasin ntsí Betfagé itjen chjinaxón tí jnā Olivo. Ntá ch'ín Jesús k'uētuēnhen ch'án iyó tí sín k'uájiko ch'án ² ntáchro ch'án kixin:

—Sátjirá tí chjasin ntsí itjen tóhe ntiha. Ntiha mé ts'ít-jará ijnko kolócho tjechroé va la ko ijnko kolóchóxjan. Ntá tjasintānkehérá va ntá tsjúkuaná va ntihi. ³ A ntá tí jnkójn nkebro tsjančankíhará nkekuénté tjasintānkehérá va la ntá tsontáchorá kixin “Ínchéni t'ichjánxinhin va la ntá tió tsjixin ntá tuénxín tsjikaáni va”, ichrorá —ichro ch'ín Jesús.

⁴ Mé xikaha kónhen kixin tsoxiteyá tí nkehe chrónka ijnko ch'ín k'uéchrónka itén Dios ósé ntáchro xíkíhi:

⁵ Ntáche tí chojni chjasin Sión kixin:

“Tsjeherá ó kui tí ch'ín Rey kuéntará.

Ihnkehya ch'án la ijnko kolócho ó tjejkjen ch'án, mé ijnko kolóchóxjan, xjeen ijnko kolócho támá nkehe.” †

Mé xikaha ichro tí itén Dios ósé.

⁶ Ntá tí iyó sín mé sákjuí sín la kjuínchexiteyá sín tí nkehe k'uētoan ch'ín Jesús. ⁷ Ntá kjuíkáo sín kolócho la ko xjeen va la kuakitsje sín ika titsáte sín ntá kjuínchekamá sín va ntá kjuák'ekjen ch'ín Jesús. ⁸ Ntá itsjé chojni kuakitsje sín ka titsáte sín na kjuentoá sín ka tinkák'ikjínxin sín ka tí ntja ts'atsínkaxín ch'ín Jesús. La iso sín xraá kajni la ko chaon nta yoa tsíkóchrínjin sín la tinkákjasin sín ntja a. ⁹ Ntá iso sín tsítaón ntja la ko í so sín chréhe iton ch'án mé kjuankíxin sín itsje sín kixin:

—Tjancheheni kjuasáyé tí nkexro k'uaxrjeníxin tí rey David. Jína tí nkexro kjuíxin kjuachaxiēn ihníé Inchéni. Tjancheheni kjuasáyé Dios —ichro sín itsje sín.

¹⁰ Ntá k'uixenhen ch'ín Jesús tí chjasin Jerusalén la ntá kaín tí sín ntiha mé kóxakonhen sín la itsjé sín kjuanchankí sín kixin:

—¿Xá nkexro tíhi? —ichro sín.

¹¹ La ntá nchónhya sín kjuátehe sín ntáchro sín kixin:

—Tíhi mé tí nkexro Jesús chrónka itén Dios kjuíxin ch'án chjasin Nazaret estado Galilea —ichro sín.

Ch'ín Jesús kjuínchetjóá tí njnko

(Mr. 11.15-19; Lc. 19.45-48; Jn. 2.13-22)

¹² A ntá ch'ín Jesús mé k'uixenhen ch'án tí njnko la ntá kuakitsje ch'án kaín tí sín nchekjixin nkehe ntiha la ko tí sín t'ēna nkehe ntiha. La kótéka ch'án tí mesa tjinítóxixín sín chichaon la ko tí silla tjejókjen tí sín nchekji kontóá. ¹³ La ntá ntáchro ch'án kixin:

—Tí xroon itén Dios tsíkjin sín ósé mé ntáchro kixin: “Tí ntōna imé it'in nchia tsonixjanaxian sín.” A ntá jahará tí nchia i tsíkjich'énará itjuéé xíchee †† —mé xikaha ichro ch'ín Jesús.

¹⁴ Ntaha nkaxenhen njnko kóchjinehe ch'ín Jesús iso tí sín t'ikonhya la ko iso tí sín xitjahya tji la ntá ch'ín Jesús mé kjuínchekitohe ch'án sín jína. ¹⁵ A ntá tí sín nchāt'á tjeoan la ko tí sín maestro tjako tí ley mé k'uíkon sín kaín tí kjuaxroan kjuíche ch'án la ko kuínhin sín kixin iso chánjan mé itsje sín nkaxenhen njnko ntáchro sín kixin: “Chjéheni kjuasáyé tí nkexro k'uaxrjeníxin rey David”, ichro sín. Ntá kuínhin tí sín a xikaha ntá kóninkaon sín ¹⁶ la nixjehé sín tí ch'ín Jesús ntáchro sín kixin:

—¿Á kuínhín tí nkehe itsje tí chánjan? —kjuanchankí sín.

Ntá ntáchro ch'ín Jesús kixin:

—Ó kuínhan. Kjánchó, ¿á nunca kjuínchekuáxinhyará tí xroon itén Dios? La xíkíhi chro:

Jaha kjuánjuan kjuachaxin kixin tí sín chánjan hyé la ko chánjan naxā tjejótakí mé tsotsje sín ‡

† Isaías 62.11; Zacarías 9.9 †† Isaías 56.7; Jeremías 7.11 ‡ Salmo 8.2

—mé xikaha ichro ch'ín Jesús.

¹⁷ Ntá jehe ch'án mé kuítóhe ch'án sín la k'uaxrjexín ch'án chjasin Jerusalén la sákjuí ch'án chjasin Betania la ntiha k'ók'éhe ch'án tí tie a.

Ch'ín Jesús kónínkakonhen ch'án ijnko nta t'óna to higo

(Mr. 11.12-14, 20-26)

¹⁸ A ntá tí kóygon nchítjen ntá kjan sín chjasin Jerusalén inaá la ikui sín ntá ch'ín Jesús mé ik'uén ch'án kjinta. ¹⁹ Ntá k'uíkon ch'án itjen ijnko nta t'óna to higo chjino ntá. La ntá sákjuítsjehe ch'án tí nta, ntá k'uíkon ch'án kixin jehó ka itsa tí nta, naxa k'ónahya to. A ntá jehe ch'án mé nixjehe ch'án tí nta, ntáchro ch'án kixin:

—Í nunca ts'ónahya to inaá —ichro ch'án.

Ntá tí nta t'óna to higo mé tuénxín xámá. ²⁰ Ntá tí sín k'uájiko ch'ín Jesús mé k'uíkon sín kixin xikaha kónhen tí nta, ntá chrakon sín la kjuanchankíhi sín tí ch'ín Jesús kixin:

—¿Nkeuènté kixin tí nta t'óna to higo tuénxín xámá? —ichro sín.

²¹ Ntá kjuátehe ch'ín Jesús, ntáchro ch'án kixin:

—Ntá chaxín ntáxrjan kixin tí tinkachónkirá Dios chaxín la ntá jehya jehó tí nta xikaha kónhen, la kjaxin chrónixjeherá tí jna i kixin: “Sátjixian ntihi sátjijkjankiá ntayaon”, la mé xikaha tsonhen. ²² Tí tinkachónkirá Dios kaín nkehe tsjancheherá ch'án la ts'ayéhérá —ichro ch'ín Jesús.

Tí kjuachaxin chóna ch'ín Jesús

(Mr. 11.27-33; Lc. 20.1-8)

²³ Ntá kjuixin ntá ch'ín Jesús mé k'uíxenhén ch'án tí njnko ntiha. Ntá tió tjetjako ch'án ntá kóchjina iso tí sín nchát'a t'etqan la ko tí sín táda judío t'etqan la kjuanchankíhi sín ch'án ntáchro sín kixin:

—¿Nkehe tí kjuachaxin chonta kixin xikaha ch'e la ko nkexro tí kjuanjon kjuachaxin? —mé xikaha kjuanchankí sín.

²⁴ Ntá kjuátehe ch'ín Jesús ntáchro ch'án kixin:

—Ntá kjaxian janhan tsjanchánkíhará ijnko nkehe siná tsjateherá ntá janhan tsotjonkará nkehe tí kjuachaxin chonta tjet'á tí xra i. ²⁵ ¿A ntá nkexro k'uétuñhen ch'ín Juan kixin tsíkíte ch'án chojni? ¿Á Dios ní o á chojni ó? —mé kjuanchankí ch'ín Jesús.

Ntá jehe sín itjo sín kichó sín kixin:

—A ntá tí tsontáchroni kixin Dios tsík'etuñhen tí ch'ín Juan ntá tsjanchankí tí ch'ín a kixin nkeuènté kuítekakuenhyani ch'án. ²⁶ A ntá tí tsontáchroni kixin chojni ó tsík'etuñhen ch'án la ntá chrakonhenni tí chojni kixin kaín sín kuítekaon sín kixin ch'ín Juan la nixja ch'án itjen Dios —ichro sín.

²⁷ A ntá kjuátehe sín ntáche sín tí ch'ín Jesús kixin:

—Náhi, noehyani —ichro sín.

Ntá ntáchro ch'án kixin:

—La ko kjaxin janhan tsóxrjankahya nkexro kjuanjon kjuachaxin kixin tjet'á tí xra —ichro ch'án.

Ch'ín Jesús mé kjuíncheyóexin ch'án kixin éxí yaá xjan

²⁸ Ntá ntáchro ch'ín Jesús kixin:

—¿Nkehe tsixrorá? Itjen ijnko chojni chóna yaá xjeen ch'án la ijnko yaon nixjehe ch'án ijnko xjan ntáchro ch'án kixin: “Xjeenni ijie la sátsjia t'akjínjián to uva nonteeni”, ichro ch'án. ²⁹ Ntá kjuátehe tí xjan kixin: “Náhi tjinkakonhyani”, ichro ch'án. A ntá chr'éxin ntá k'uítixoxin tí kjuenkayáxin ch'án la sákjuíkijich'e ch'án tí xra a. ³⁰ A ntá tí it'é xjan a mé kjuínixjehe ch'án tí í jnko xjan la jnkokón k'uétuñhen ch'án la kjuátehe tí xjan kixin: “Jeén, ó sátsjini”, ichro ch'án. La ntá chaxínhya sátsíkji ch'án —ichro ch'ín Jesús.

³¹ Ntá kjuanchankí ch'ín Jesús kixin:

—¿Nkexéhe tí yaá chánjan kjuínchexiteyá tí nkehe k'uétuñhen it'é? —ichro ch'án.

Ntá kjuátehe sín kixin:

—Tí xjan saó —ichro sín.

Ntá ntáchro ch'ín Jesús kixin:

—Méxra chaxín tjonkará kixin tí sín nchekjènkj la ko tí chojni chjin ch'iehe nchónhya chojni ntoa la saoxín ts'ixenhen sín tí kjuachaxin t'etqan Dios la ntá jahará la náhi. ³² Kixin ch'ín Juan Bautista mé ikui ch'án kjuakohará ch'án nkexrí chrók'uejorá la ntá jahará kuítekákuenhyará tí chrónka ch'án. A ntá tí sín nchekjènkj la ko tí chojni chjin ch'iehe nchónhya chojni ntoa mé kuítekaon sín. A ntá jahará kjónté xikaha k'uíkonrá la kjuítixiñhyará tí tjenkayáxinrá la ko kuítekákonyará —ichro ch'ín Jesús.

Ch'ín Jesús kjuíncheyóexin ch'án kixin éxí chojni ch'e xra la jínahya asén sín

(Mr. 12.1-12; Lc. 20.9-19)

³³ Ntá ch'ín Jesús ntáchro ch'án kixin:

—Tsinhínrá ijnko nkehe sintayóaxian. Éxí ijnko ch'ín k'uenkaxin ch'án itsjé ntao t'óna to uva nontee ch'án. Ntá kjuích'éna ch'án ijnko corral. La ko ijnko tjo kjuích'éna ch'án tòye kixin ts'énya sín ìnté to uva. La ko kjuích'éna ch'án ijnko tjet'ó noi kixin ts'it'ótjen ch'án tsotsjehe ch'án nkuíxin. †

A nta kjuínchekjen ch'án tí nontee ch'án iso tí sín ch'e xra ntá kjuixin ntá sákjuí ch'án imá ikjín. ³⁴ A ntá tí kjuixraká tí yaon k'óna nkehe ntá jehe ch'án mé ich'án ch'án iso tí chojni ch'ehe ch'án xra kixin tsjik-janchehe sín tí sín ch'e xra nontee ch'án kixin tsjanjon sín tí nkehe tsakja ch'án. ³⁵ A ntá tí sín t'ayakonhen tí nonte mé itsé sín tí sín kjuíkjanchia tí nkehe la kjuate sín iso la ko í so la k'óyán sín la í so la ixro k'uíchexín sín. ³⁶ A ntá tí ìnché nonte a xich'án ch'án iso chojni ch'ehe ch'án xra inaá, a ntá tí sín ch'e xra la kjaxin xikahó kjuích'ehe sín tí sín kjuíji.

³⁷ A ntá xikaha tsíkónhen ntá kjuenkayáxin ch'án ich'án ch'án tí xjeen ch'án, la kjá chróchónthehe sín kjuasáyé tí xjeen ch'án, ichro ch'án. ³⁸ A ntá tí k'uíkon tí sín ch'e xra tí xjeen ch'án la ntá jehó sín kjuenkayáxin sín kixin: “Tí ch'ín i mé ts'áyéhe ch'án kaín nkehe.

† *Isaías 5.1-7*

Ts'óyánni ch'án kixin ntá tsitgekoni kaín tí nkehe kuènte ch'án", ichro sín. ³⁹ Ntá itsé sín tí xjeen ch'án ntá kuakitsjexin sín ch'án tí nonte ntaha ntá k'óyán sín ch'án —mé xikaha kjuako ch'ín Jesús.

⁴⁰ Ntá kjuanchankíhi ch'ín Jesús tí sín kóchjina, ntá chro ch'án kixin:

—Tió itsi tí inché tí nonte a la, ¿nkehe sich'ehe ch'án tí sín ch'e xra? —ichro ch'ín Jesús.

⁴¹ Ntá kjuátehe sín kixin:

—Mé tsjiji ch'án la tsikonóghya ch'án tí sín jínahya la ts'óyán ch'án sín la tsjeyá ch'án ókjé chojni sinchekjen ch'án tí nonte a. Tsjeyá ch'án chojni jína tsjanjon tí to tsjixraká tí yaon ts'ínjin sín to —ichro sín.

⁴² Ntá ntá chro ch'ín Jesús kixin:

—¿Á nunca kjuinchekuáxinhyará tí xroon itén Dios tsíkjin sín ósé? Mé ntá chro xíkíhi:

Tí xro náxrjónhya kuitgenta tí sín ch'éna tját'ó, a ntá mé jie k'óna tí xro tjeoan.

Mé xikaha kjuích'e Inchéni Dios, na ntá tíha mé ijnko nkehe kjuachrakon k'uíkonni. † Mé xikaha ichro itén Dios.

⁴³ Ntá ntá chro ch'ín Jesús kixin:

—Tjonkará kixin Dios tsakitsjehará tí kjuachaxin kuènte ch'án la ntá sinchek'áyéhe ch'án tí sín ch'e xra jína. ⁴⁴ A ntá jnkójín nkexro tsjitsínka chrítaón tí xro i mé tsókuen ch'án la tí ts'ánótjen tí xro tsoxratja ijnko chojni la jehe sín ts'óna inche —mé xikaha ichro ch'ín Jesús.

⁴⁵ Ntá tí sín nchát'á tjeoan la ko tí sín fariseo mé kuínhin xikaha kjuíncheyóexin ch'ín Jesús ntá kienxín sín kixin kaín tí ntá chro ch'án kjuíncheyóexin ch'án kixin tí jehe sín xikaha tsonhen sín. ⁴⁶ La ntá tjinkaon sín chrókjuinchekjásóte sín ch'án kjánchó chrakonhen sín tí chojni kixin kaín sín ntá chro sín kixin chaxín tí nkehe nixja ch'ín Jesús la kuènte Dios.

Ch'ín Jesús kjuíncheyóexin éxi ijnko kia kótehe sín

22 Ntá ch'ín Jesús mé kjuankixin nixja ch'án inaá la kjuíncheyóexin ch'án ntá chro ch'án kixin:

² —Tí kjuachaxin kuènte Dios mé éxi yóhe ijnko ch'ín rey kjuasin ch'án ijnko kia kixin tsotéhe xjeen ch'án.

³ K'ueuñenhen ch'án tí sín ch'ehe ch'án xra kixin tsjik'íyehé sín tí sín kjuéyá ch'án, kjánchó jehe sín mé tjinkakonhya sín tsóchjina sín. ⁴ A ntá k'ueuñenhen ch'án inaá í so tí sín ch'ehe ch'án xra ntá chro ch'án kixin: "Chenka tí sín ó k'uíyahá kixin kaín tí nkehe sineni la ó tjechónhen. Ó kuétoan its'en tí koxinta la ko í so ko tsanká la kaín nkehe la ó síchónhen. A ntá chróxrakoa sín tí síin kia", mé xikaha k'ueuñenhen ch'án.

⁵ A ntá tí sín tsík'íyehé ch'án mé ántosén sín. Ijnko sín la sákjuí nontee la í jnko la sákjuí ch'án í jnko xra chóntha ch'án. ⁶ La í so tí sín a mé tsítsé sín tí sín tsík'etueñen tí ch'ín rey la k'óka tí sín a hasta ik'uén tí jehe sín.

⁷ Ntá tí ch'ín rey mé kónínkaon ch'án ntá k'ueuñenhen ch'án tí sín soldado kixin its'en tí sín kjuàya la ko tsoche tí chjasén sín. ⁸ Ntá nixjehe ch'án tí sín ch'ehe ch'án xra inaá ntá chro ch'án kixin: "Kaín nkehe la ó

síchónhen kixin tí nkexro tsotéhe la ntá tí sín k'uíyahá kuítekakonhya sín la kjuíhya sín. ⁹ Méxra sátsjirá tí esquina tí ntja jíe la t'iyehé kaín tí sín tsoxetará kixin itsji sín tí kia", ichro ch'án. ¹⁰ Ntá tí sín ch'e xra mé sákjuí sín la k'uíyehé sín kaín tí sín t'átsínka tí ntja ntiha, mé chojni jína la ko chojni jínahya hasta k'uíxikaón chojni tí nchia ntiha.

¹¹ Ntá tí ch'ín rey mé kuitsjehe kaín tí sín tsík'íyehé ch'án la ntá k'uíkon ch'án ijnko ch'ín ntiha chónthaha ka jína kuènte tí kia a. ¹² La ntá nixjehe ch'án, ntá chro ch'án kixin: "Amigo, ¿nkexrí k'uíxehén kixin tsík'ít-sahya kuènte kié chojni tsotéhe?" ichro ch'án. Ntá tí ch'ín a kjuáteheya ch'án ninkehó. ¹³ A ntá tí ch'ín rey mé k'uíyehé ch'án tí sín ch'ehe ch'án xra la ntá chro ch'án kixin: "Sínchenteto toté la ko itja tí ch'ín a la ité ntoón sítie la nta ntiha a mé tsotsjánka ch'án la sine-táon ch'án neno ch'án."

¹⁴ Ntá ntá chro ch'ín Jesús kixin:

—Nchónhya sín k'uíyahá la séhya sín k'uitja —mé xikaha kjuako ch'án Jesús.

Ch'ín Jesús ntá chro ch'án kixin ó nchoxon tsjenkehe sín gobierno

(Mr. 12.13-17; Lc. 20.20-26)

¹⁵ Ntá tí sín fariseo mé sákjuí sín ókjé la jnkokoá kjuenkayáxin sín kixin tsjachaxín sín tí ch'ín Jesús kixin ách'e ichrén jie tsjasin ch'án la ntá tsjanchia sín jie.

¹⁶ Ntá ichr'án sín iso tí sín ch'ehe sín xra la iso tí sín ch'ehe tí ch'ín Herodes xra kixin tsjachaxín sín tí ch'ín Jesús. Ntá tí sín a nixjehe sín ch'án ntá chro sín kixin:

—Maestro, ó noheni kixin tí nkehe ntá chrua jaha la chaxín, la ko ntoá tjákua ntje Dios, la ko jehya nkexrí tsjehe chojni tjenkayáxixián kixin á jína sín. ¹⁷ A ntá jaha chronka nkehe tjenkayáxian. ¿Á jína chrókjuenkeheni tí gobierno romano o náhi? —ichro sín kjuanchankí sín.

¹⁸ Ntá ch'ín Jesús kónohe ch'án kixin ntoáhya tjenkayáxin sín ntá ntá chro ch'án kixin:

—Jahará ntoáhya tjenkayáxinrá. ¿Nkekuènte chrókjuáchaxínráni? ¹⁹ Tjákonará tí chichaon tjenkehé sín méhe —mé xikaha k'ueuñenhen ch'ín Jesús.

Ntá kjuikohe sín ch'án tí chichaon a. ²⁰ Ntá k'uíkon ch'ín Jesús ntá kjuanchankí ch'án kixin:

—¿Nkexro tí tsík'axrjexin tjenkání tí chichaon méhe la ko nkexro ihníé chóntha? —ichro ch'án.

²¹ Ntá kjuátehe sín kixin:

—Tí ch'ín t'etóan mé tjenkání ch'án —ichro sín.

Ntá ntá chro ch'ín Jesús kixin:

—Chróchjehérá tí ch'ín gobierno t'etóan tí nkehe kuènte ch'án la kjaxin tí nkehe kuènte Dios la chróchjehérá Dios —mé xikaha chro ch'ín Jesús.

²² Ntá tí kuínhin sín xikaha la chrakon sín la komá sín ch'án ntá sákjuí sín.

Kjuanchankí sín kixin á tsoxechón chojni

(Mr. 12.18-27; Lc. 20.27-40)

²³ Ntá tí yaon a la iso sín saduceo sákjuítsjehe sín tí ch'ín Jesús. A ntá tí sín saduceo mé titekakonhya sín

† Salmo 118.22-23

kíxin tsoxechón chojni tsík'en la mé xíkaha chrókjuachaxin sín ch'ín Jesús. Ntáchro sín kixin:

²⁴ —Maestro, tsintáchro ch'ín Moisés kixin tí its'en ijnko chojni la naxa itjen tí ichjién ch'án la tsík'ikonhya sín xjeen sín, ntá tí kichó tí nkexro tsík'en chrókuakja ch'án tí tjan k'án, a ntá tí xjeen sín mé ts'óna éxi xjeen tí ch'ín saó tsík'en. ²⁵ Ntá ntihi k'uejó yato sín jnkokoá kichó sín. Ntá tí ch'ín saó kótehe ch'án. La ntá ik'uéen ch'án. A ntá k'uéchóntahya sín xjeen sín la ntá tí ichjién ch'án kótehe tjan tí ch'ín tsoyo. ²⁶ A ntá tí ch'ín yóxin ik'uéen kjaxin la tí ch'ín nixin kuákja ch'án tjan la ntá xíkaha kónhen inaá. La kayatoé tí sín k'uéchónta sín tjan xíkaha kónhen sín kaín sín ik'uéen sín. ²⁷ A ntá kjuixixín ntá kjaxin tjan ik'uéen tjan. ²⁸ Ntá tió tsoxechón kaín xín chojni tsík'en, ¿ntá nkexro ts'óna xii tí jehe tjan kixin kayatoé sín kótehe tjan? —mé xíkaha kjuanchankíhi sín tí ch'ín Jesús.

²⁹ Ntá ch'ín Jesús kjuátehe ch'án ntáchro ch'án kixin:

—Jahará la ntoáhya tjenkayáxinrá kixin noahyará nkehe chro xroon itén Dios la ko chonhyará tí kjuachaxin kuènte Dios. ³⁰ A ntá tí chojni tsík'en tió tsoxechón la tsótehya sín la ko tsótehya tí xjeen sín kixin tí sín tsík'en la éxi tí sín ángel kuènte Dios ts'ejó sín nkaya nkajní. ³¹ A ntá tí kaín tí sín tsík'en tsoxechón, ¿á kjuinchekuáxinhyará nkehe ntáchro Dios? Jehe ch'án xíkahi chro ch'án: ³² “Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob.” † Méxra tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón —mé xíkaha ichro ch'ín Jesús.

³³ Ntá kuínhin sín nkexrí kjuako ch'án ntá chrakon sín.

Ch'ín Jesús chrónka tí nkehe imá tjetean

(Mr. 12.28-34)

³⁴ Ntá tí sín fariseo mé tsíkójnkotsé sín tió kónohe sín kixin nkehe chro ch'ín Jesús la ninkehó kjuáteheya tí sín saduceo. ³⁵ La ijnko tí sín maestro tjako tí ley mé tjinkaon ch'án chrókjuachaxin ch'án tí ch'ín Jesús. Ntá kjuanchankí ch'án kixin:

³⁶ —Maestro, ¿nkexéhe tí nkehe imá tjetean kuènte tí ley? —ichro ch'án.

³⁷ Ntá ntáchro ch'ín Jesús kixin:

—“Chrótjuèhérá Ìnchéni Dios kaín asánrá la ko kaín kjuaxrexinkaon kuèntará.” †³⁸ Mé tíha mé tí ley imá tjetean la ko saoxín k'uetean Dios tíha. ³⁹ A ntá tí nkehe yóxin la tóyóhe la mé ntáchro xíkahi: “Chrótjuèhérá kichuárá éxi tjuèxinrá asánrá.” †⁴⁰ Tí iyó nkehe i la mé antsí tjetean kuènte tí ley tsík'etean Moisés la ko tí nkehe kjuako tí sín k'uéchónka itén Dios.

¿Xá nkexro it'é tí Cristo?

(Mr. 12.35-37; Lc. 20.41-44)

⁴¹ A ntá tí sín fariseo la naxa jnkokoá tjejó sín ⁴² la ntá ch'ín Jesús mé kjuanchankí ch'án ntáchro ch'án kixin:

—¿Nkehe tjenkayáxinrá jahará? ¿Nkexro tí Cristo la nkexro tí tsík'axrjeníxin ch'án? —kjuanchankí ch'án.

Ntá ntáchro sín kixin:

—Tí Cristo mé tsík'axrjeníxin ch'án ch'ín David —ichro sín.

⁴³ Ntá ntáchro ch'ín Jesús kixin:

—¿Ntá nkexrí kixin Nchakuen Dios chénkaxin ch'ín David kixin David chróntáchro ch'án kixin Ìnché ch'án tí Cristo? Ntáchro ch'ín David xíkahi:

⁴⁴ Ìnchéni Dios ntáche tí Ìnchéni kixin:

“Tjak'e tjaná chjina ntihó tsétoan, tsjixinjian kaín xín tí sín nínkakonhan la tsjachahya sín ts'etean sín kixin jahvá mé tsétoan.” †⁴⁵ Mé xíkaha chro itén Dios. ⁴⁵ A ntá ¿xá nkexrí kixin Cristo chrók'óna xjeen David a ntá jehe ch'ín David kuíkítexin ch'án Ìnché ch'án tí Cristo? —ichro ch'ín Jesús.

⁴⁶ A ntá nkexró xitjahya kjuátehe sín ninkehó la desde tí yaon a chrakon sín la í ninkehó kjuanchankíehya sín ch'án.

Ch'ín Jesús tjanchia jje tí sín fariseo la ko tí sín maestro tjako tí ley

(Mr. 12.38-40; Lc. 11.37-54; 20.45-47)

23 Ntá kjuixin tíha ntá ch'ín Jesús mé nixjehe ch'án tí chojni la ko tí sín k'uájiko ch'án, ntáchro ch'án kixin:

² —Tí maestro tjako tí ley la ko tí sín fariseo mé chón-ta sín kjuachaxin tsochrónkaxin sín tí ley kjuako ch'ín Moisés. ³ Méxra chrókjuinchehexiteyéhérá kaín tí nkehe t'etean sín la ko chrókjuich'erá kaín nkehe ntáchro sín kjánchó chrókuankíehyará tí jehe sín kixin jehe sín la ijnko nkehe ntáchro sín la ókjé nkehe ch'e sín.

⁴ T'etuenhen sín chojni tsamá ijnko nkehe imá ye, mé ijnko nkehe chrókjuachahya chrókuamá chojni. A ntá jehe sín na nijnko dedo tja sín chrókjuinkítsa sín tí nkehe imá ye yamá chojni. ⁵ Ich'e sín kaín xín nkehe kixin tsotsjehe chojni. Tóxrjínhin sín tsjak'enkáni totjen sín la ko itja sín ijnko xroon kjinjin iton ts'ínixín itén Dios la tjinkaon sín iké sín síxinkáni nkehe tjákiní. ⁶ Tjinkaon sín tsochóna sín silla jina ts'ejókjen sín sine sín tió sát-sji sín tí síin kia la ko xritjeyá sín tí silla antsí náxrjón chrók'uejóya sín nkaxenhen njnko. ⁷ La ko tjinkaon sín kixin chojni chrókjuikosáyehe sín tsoxeta sín tí ntja la ko tjinkaon sín kixin tsontáchro chojni kixin maestro tí jehe sín.

⁸ A ntá jahará la tjetóehyará kixin tsontáchro sín kixin maestro tí jahará kixin jehe sín la ko jahará la ó jnkokónrá, la jahará chontará jnkokoá Maestro la mé Cristo tíha. ⁹ La ntá chróntáchrohýará kixin nkexró mé it'ará ntihi chjasintajni kixin jahará la chontará jnkokoá It'ará mé itjen nkaya nkajní. ¹⁰ La ko jehe sín chróntáchrohýa sín kixin jefe tí jahará kixin jehó Cristo mé jefe. ¹¹ Tí nkexro antsí tsjinkítsa iso chojni la jehe ch'án mé antsí t'etean ch'án. ¹² Kixin tí nkexro ntáchro kixin imá ijié la mé imá tsontsí. A ntá tí nkexro nchehnkehya la antsí tsojié.

¹³ N'òará tí jahará maestro tjàkorá tí ley la ko tí jahará chojni fariseo. Jahará la jnkójínxónhya tjenkayáxinrá.

† Éxodo 3.6 †† Deuteronomio 6.5 † Levítico 19.18

†† Salmo 110.1

Jahará la t'ikjéherá tí puerta ts'ixenxín chojni tí kjuachaxin kuènte Dios kixin t̄toéhyará ts'ixenhen ókjé chojni. A ntá ni jahará la xitjahya t'ixenhyará la ko t̄jánjonhyará kjuachaxin ts'ixenhen tí sín tjinkaon chrók'uixenhen.

¹⁴ Nòará tí jahará maestro tjàkorá tí ley la ko chojni fariseo. Jnkojínxónhya t̄jenkayáxinrá. Jahará takitsjehérá nt̄e tí chojni tsíkók'án la ntá isé nixjehérá Dios kixin ch'iyexínrá chojni kixin jína tí jahará. A ntá xikaha kjuich'erá jahará la ǎntsí tsjasótíará.

¹⁵ Nòará tí jahará maestro tjàkorá tí ley la ko chojni fariseo. Jahará la jnkojínxónhya t̄jenkayáxinrá. Jahará s̄átjirá nonte la chrítaón nt̄ayaon kixin tsjákohérá ijnko chojni tsinkáchónki xikaha tí tinkachónkirá la ntá tió kjuachará kjuachroerá sín la ntá jehe sín ǎntsí má tsjasótexin sín tí xrohi la kánhyó jahará.

¹⁶ Nòará tí jahará kixin t̄etoanrá kjánchó ntakótánrá. Ntáchrorá kixin tí jnkojín chojni tsontácho kixin sinchexiteyá sín nkehe la t'ákjenxin sín tí n̄inko la ntá t'ichjánxinhya sinchexiteyá sín. A ntá tí tsontácho sín kixin sinchexiteyá sín nkehe la t'ákjenxin sín tí chica oro siín nkaxenhen n̄inko la ntá t'ichjánxin sinchexiteyá sín. ¹⁷ Imá l̄ontjirá la ko ntakótánrá. ¿Á imá t̄jetoan tí chica oro o á imá t̄jetoan tí n̄inko kixin tí n̄inko mé kótjuáxin tí chica oro? ¹⁸ K̄j̄axin ntáchrorá kixin: "Tí jnkojín chojni tsontácho sín kixin sinchexiteyá sín nkehe la t'ákjenxin sín tí altar la ntá t'ichjánxinhya sinchexiteyá sín. A ntá tí tsontácho sín kixin sinchexiteyá sín nkehe la t'ákjenxin sín tí nkehe t̄jok̄eh̄e sín Dios chrítaón tí altar la ntá t'ichjánxin sinchexiteyá sín tí nkehe tsintácho sín." ¹⁹ Imá l̄ontjirá la ko ntakótánrá. ¿Á imá t̄jetoan tí nkehe tsochjehérá Dios o á imá t̄jetoan tí altar kixin tí altar mé tótjuáxin tí nkehe tsj̄ánjonrá? ²⁰ Kixin tí nkexro tsontácho kixin sinchexiteyá nkehe la t'ákjenxin ch'án tí altar la jehya t'ákjenxin ch'án tí altar ó. Náhí. K̄j̄axin t'ákjenxin ch'án kaín tí nkehe siín chrítaón ntiha. ²¹ A ntá tí nkexro tsontácho kixin sinchexiteyá ch'án nkehe la t'ákjenxin tí n̄inko la jehya t'ákjenxin ch'án n̄inko ó. Náhí. K̄j̄axin t'ákjenxin ch'án tí Dios itjen ntiha. ²² A ntá tí nkexro t'ákjenxin nkaya nkajní la ntá k̄j̄axin t'ákjenxin sín tí trono kuènte Dios la ko tí nkexro t̄jet'etoan ntiha.

²³ Nòará jahará maestro tjàkorá ley la ko jahará chojni fariseo. Jahará jnkojínxónhya t̄jenkayáxinrá. Jahará la chjehérá Dios ijnko ite parte kaín tí kaxroǎn tsjiko tí nkehe ineni, mé tí menta la ko anís la ko comino. Kjánchó tahyará kuentá tí nkehe imá t̄jetoan kuènte tí ley. Mé ntoá chrókjuenkayáxinrá la ko chrókujikonóehérá kichuárá la ko chrókuinkachónkirá Dios. Tíhi la ǎntsí t̄jetoan chrókjuinchexiteyará la k̄j̄axin chrókujit̄oéhyará chrokjuich'erá tí í so nkehe. ²⁴ Jahará la t̄etoanrá kjánchó ntakótánrá. Jahará la nchek'ankihirá k̄j̄onté ijnko kochjisen intsí chóna tí nkehe its'irá, a ntá ijnko kocamello k̄j̄onté ijié va la t'ínkará.

²⁵ Nòará tí jahará maestro tjàkorá ley la ko jahará fariseorá. Jahará la jnkojínxónhya t̄jenkayáxinrá. Jahará la imá nchetjóará chrítaón tí vaso la ko tí plato, a ntá tí nkaxenhen tsíkaón kjuach̄e la ko jahorá tjinkáonrá

chróchontará itsjé nkehe. ²⁶ Jahará chojni fariseorá imá ntakótán jahará. S̄axóin chrókjuinchetj̄oárá tí nkehe nkaxenhen tí vaso la ko tí plato la ntá ó chrókótj̄oá tí chrítaón k̄j̄axin.

²⁷ Nòará jahará maestro tjàkorá tí ley la ko chojni fariseorá. Jnkojínxónhya t̄jenkayáxinrá. Jahará la éxi yóh̄e ijnko t̄oye tsíxravá chojni, imá náxrjón tsjehe ntója, a ntá nkaxenhen mé tsíkaón huésoé chojni tsík'en la ko kaín nkehe t̄juáhya. ²⁸ Mé xikaha tí jahará la tsjehe éxi chojni jína xikaha, a ntá jnkojínxónhya t̄jenkayáxinrá la ko jínahyará.

²⁹ Nòará tí jahará maestro tjàkorá ley la ko chojni fariseorá. Jahará la jnkojínxónhya t̄jenkayáxinrá. Jahará la kjuich'énará t̄jat'ó náxrjón chrítaón tí t̄oye tsíxravá tí sín k'uékjako itén Dios ósé la ko nchek'ítsará t̄jat'ó chrítaón t̄oye kuènte tí sín jína ǎsén. ³⁰ La ntá ntáchrorá kixin tí chrók'uejorá tí k'uéj̄o tí sín tsík'axrjenixinrá la ntá chrókjuink̄itsahyará chrók'uén tí sín kjuako itén Dios. ³¹ Méxra xikaha jahorá ntáchrorá kixin chaxín tsík'axrjenixinrá tí sín k'óyán tí sín k'uékjako itén Dios. ³² Méxra ijie la tjinkáonrá tsjixinhanrá tí xra kjuich'e tí sín tsík'axrjenixinrá.

³³ Jahará la tsík'axrjenixinrá konche. ¿Ntá nkexrí chrókuaárá kixin itsi tí tsjasótíará? ³⁴ Méxra janhan mé tsétuǎnhan chojni chrónka itén Dios la ko chojni imá nohe la ko chojni tjako, itsi sín. A ntá jahará la ts'oyánrá sín ts'ejoyánirá sín ntacruz la í so sín la tsjatexinrá sín nkaxenhen n̄inko la ko tsochonkíhirá sín chjasin la chjasin. ³⁵ Méxra jahará la yamará tí j̄ie kixin tí sín jína k'uítjixín ijnié senó. Méxra tsamará tí j̄ie kixin ik'uén ch'ín Abel, tí nkexro jína, la ko kaín tí í so sín hasta ik'uén ch'ín Zacarías, x̄jeen Berequías, tí nkexro k'oyánxinrá chjino tí altar. ³⁶ Chaxín t̄jonkará kixin kaín tí j̄ie a mé yámá tí chojni siín ijie.

Tsjánka ch'ín Jesús

(Lc. 13.34-35)

³⁷ Ntá ntáchro ch'ín Jesús kixin:

—Jerusalén, Jerusalén, jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuink̄itsará. Nchónhya veces tjinkavan chrókójnkotsérá la chrók'uáyakonhánrá éxi ijnko cochiká mé t'ayakonhen x̄jeen va chrínkí kan̄enee va mé xikaha tjinkavan chrók'uáyakonhánrá tí jahará. Kjánchó jahará la tjinkáonhyará xikaha. ³⁸ Ntá jie la Dios la tsít̄ohe tí jahará. ³⁹ Ntáxrjan kixin í ts'ikonhyará tí janhan inaá tsjixrakájia tí yaon tsontáchorá kixin: "Imá jína tí nkexro k̄j̄axin kjuachaxién ihnié Ìnchéni" —mé xikaha ichro ch'ín Jesús.

Chrónka ch'ín Jesús kixin ts'itjáyan tí n̄inko

(Mr. 13.1-2; Lc. 21.5-6)

24 Ntá ch'ín Jesús k'uaxrxjén ch'án tí n̄inko la ntá ó sáchrókjuí ch'án la ntá tí sín k'uájiko ch'án mé kóchjina sín kixin tsochónhen ch'án kixin k̄j̄axin ch'án chrótsjehe ch'án kixin náxrjón tsík'óna tí n̄inko a. ² A ntá ch'ín Jesús mé kjuát̄ehe ch'án kixin:

—Jahará ¿á tjejotsjehérá kaín tíha? Chaxín tjonkará kixin tsjixraká tí yaon ts'oya kuenté nínko. Nijnko xro ts'ejókjehya kichó kixin kaín tíha la tsqxíka —ichro ch'án.

Tí nkehe tsonhen tió tsjixixín (Mr. 13.3-23; Lc. 21.7-24; 17.22-24)

³ Ntá sákjuí sín chrítaón tí jna Olivo la ch'ín Jesús kjuák'etjaxín ch'án la ntá tí sín k'uájiko ch'án mé kjuanchankíhi sín ch'án kixin:

—Tjinkaonni tsochronka nkesá tsonhen tíha. ¿Nkexrí tsonoxéinni tió ts'inka tí jaha la ko nkexrí tsonoxéinni tí itsi tí tsjixixín chjasintajni? —ichro sín.

⁴ Kjuátēhe ch'ín Jesús kixin:

—Tóxakonhanrá titoéhyará kixin ninkexró chrókjuít'áyahará. ⁵ Nchónhya chojni itsi sich'iyaxín njina tsonáchro kixin: “Janhan mé tí Cristo” tsixro sín, la sich'iyehé sín nchónhya chojni. ⁶ A ntá tió tsinhínrá tsonáchro chojni kixin ó siín kjuanínkaon la ko ts'ixin kjuachrakon kixin tsjanjonko kichó sín la kjónté xikaha tsonhen la chrakonhyará. Ó jehí tsonhen tíha tí naxá ts'itjáyanhya chjasintajni. ⁷ Ijnko nación tsjanjonko í jnko nación la tsjanjonxín sín tí xra ts'etqan sín. La ko itsjé chjasin na tsokjinta la ko tsoníhi chojni la ko ntihi la ntaha tsinkí nonte. ⁸ Kaín tíha la ntá tsoxrankixixón tí kjuatjoté tsonhen chojni.

⁹ A ntá tsotsérá chojni la tsjikaánrá sín tí tjejó tí síxreé kixin sinchekjasótíará sín la ntá ts'oyánrá sín. La ko kaín xín chojni siín chjasintajni tsonínkakonhanrá sín kixin tinkachónkirá tí janhan. ¹⁰ Ntá tí yaon a la itsjé sín la tsitqhe sín tsinkáchónkihya sín tí janhan la ko tsonínkakonhen sín kichó sín la ko sinchekji kichó sín. ¹¹ Ntá itsi nchónhya chojni ntoáhya tsjako la ntá sich'iyehé sín nchónhya chojni. ¹² La ts'ixin nchónhya jje jínahya la ntá ts'ixin itsjé chojni tsojuehya sín kichó sín. ¹³ A ntá tí nkexro naxá tjejótkáchónki tí janhan hasta tí tsjixixín la mé tsaá. ¹⁴ La ko tí itán jina chrónka nkexrí tjen tí kjuachaxin kuente Dios la t'ichjánxín tsin-hin sín kuenté chjasintajni, la tió tsjixin tsinhin sín kuenté chjasintajni la ntá ó ts'itjáyan chjasintajni.

¹⁵ Ch'ín Daniel k'uéchrónka itén Dios mé tsíkjín ch'án kixin tsjixraká ijnko yaon tsjak'e ijnko nkehe jínahya nkaxenhen nínko tjóá. † Ntá jahará ts'ikonrá tíha. A ntá tí nkexro nchekuáxin mé tsiénxín nkehe tíha. ¹⁶ Ntá kaín tí sín tjejó estado Judea tsochriin sín jna sátsji sín. ¹⁷ A ntá tí sín tjejó chrítaón nchia ntóé sín la í xitjahya tsakitsje sín ninkehó. ¹⁸ Ntá tí tjejóch'e sín xra nontēe sín la kjá í tsokjanhya sín tsjikakja sín iké sín. ¹⁹ Ntá nòla tí chojni chjin tjejóyá sín la ko nòla tí sín nchekakí xjan tí yaon a. ²⁰ Chrókjuancheherá Dios kixin tí tsonhen tíha la chrókójehya nchakuen kin la ko chrókójehya tí yaon t'ok'éhe chojni. ²¹ Kixin tíha mé ijnko kjuachrakon imá ijié la desde tí xrankixixín chjasintajni la nunca xikahya kónhen. ²² Ntá tí chrók'uetqanhya Dios kixin tjoka ts'atsínka tíha ntá chrókuaáhya ninkexró. Ntá ts'etqan ch'án kixin tjoka ts'atsínka tí kjuachrakon jíe

kixin jehe ch'án mé imá tjuèhe ch'án tí sín tsíkjejá ch'án.

²³ 'Ntá tí tsonáchro chojni kixin: “Tsjehe ntihi itjen Cristo”, o “Tsjehe ntiha itjen ch'án”, la ntá chrókuítekákueñhyará sín. ²⁴ Kixin ntá itsi iso sín tsonáchro sín kixin Cristo tí jehe sín la ko kjaxin itsi í so sín ntoáhya tsjako la ko tsjasin sín kjuaxroan jíe kixin tjinkaon sín chrókjuich'iyehé sín chojni kjónté tí sín tsíkjejá Dios. ²⁵ Ó xrxanka senó nkehe tsonhen kixin tsonohará. ²⁶ Méxra tí chróntáchro sín kixin: “Tsjeherá tí nteje ntiha tjen ch'án”, la ntá tsjihyará nó ntiha. O tí chróntáchro sín kixin: “Tsjeherá ntihi tí cuarto mé tjen ch'án”, la chrókuítekákonhyará. ²⁷ Méxra éxi tsjonkixín la t'ikon chojni t'inkaséyanxín tí tjitoxín yaon hasta tsj-atóxin yaon mé xikaha ts'ikon chojni tió itsi tí Xjeen Dios K'óna Chojni. ²⁸ Mé éxi yóhe tí tjen ijnko cuerpo tsík'en la ntiha tsojnkotsé tí kontexjuen.

Tsokjan tí Xjeen Dios K'óna Chojni (Mr. 13.24-37; Lc. 21.25-33; 17.26-30, 34-36)

²⁹ A ntá séhyó tí tsjixixín tí kjuachrakon jíe la ntá tí yaon la tsotie a ntá tí nitjó la í ts'inkaséyanxínhya. La ko tí konotsé la tsoxènjinxín nkajni la kjaxin kaín nkehe siín nkaya nkajni la tsinkí. ³⁰ La ntá ts'ikon chojni kixin nkajni tsixín tí Xjeen Dios K'óna Chojni. La ntá kaín chojni chjasintajni tsochrakon sín la tsotsjánka sín la ts'ikon sín kixin itsi tí Xjeen Dios K'óna Chojni, mé chríkjan tjuí mé tsjak'enkakjan ch'án tsíkqao tí kjuachaxin jíe. ³¹ Ntá tsochr'án Dios tí sín ángel kixin ts'ánoa sín tí trompeta itsen kixin tsochjina kaín tí nkexro kjueyá Dios tsjixín kangé lado chjasintajni.

³² Chrók'uitjará nkexrí sintayóaxian kuente ijnko nta to higo. Éxi yóhe tió chóna ntahtē la ko ts'ixin kayoa la nta tsonoxáxinrá kixin í séhya tsokjan ichrin. ³³ Mé xikaha tí ts'ikonrá ts'atsínka kaín tíha la ntá xikaha tsonoxáxinrá kixin í séhya itsi Inchéni. ³⁴ Ntá tjonkará chaxín kixin kaín tíha senó tsonhen tí naxá ts'enhya tí chojni siín jie. ³⁵ A ntá tí nkajni la ko tí chjasintajni mé ts'itjáyan. A ntá tí nkehe ntáxrxan la nunca ts'itjáyanhya tsoxiteyá tíha.

³⁶ A ntá tí yaon la ko tí hora tsoxiteyá tíha la kohya ninkexró nohe. Ni tí sín ángel tjejó nkaya nkajni noehya sín la ko ni tí Xjeen Dios noehya. Ó jehó tí It'é mé nohe.

³⁷ Éxi yóhe tí nkehe kónhen tí yaon k'uékjak'e ch'ín Noé mé xikaha tsonhen tí tsokjan tí Xjeen Dios K'óna Chojni. ³⁸ Tí naxá titjiéhya sín ntá la kaín chojni la jina k'uéjó sín la kjóne sín la ko ik'uí sín la ko sítotēhe sín kjuixrakájia tí yaon k'uixenhen ch'ín Noé ntabárcq. ³⁹ A ntá jehe sín mé kienxínhya sín hasta kuijia tí k'uaniá chrin ntá ikui ntá la k'uátjoá kaín sín. Mé xikaha tsonhen tió itsi tí Xjeen Dios K'óna Chojni. ⁴⁰ A ntá yaá chojni ntoa tjejóch'e sín xra nonte la ntá ijnko la sátsji la í jnko la tsitqhe. ⁴¹ La ko yaá chojni chjin mé tjejó'to sín la ijnko la sátsji la í jnko la tsitqhe.

⁴² Chrók'uejotsjehérá kixin noahyará nkehora la ko nkesá ts'inka janhan. ⁴³ Chrókónohará tíhi: tí

† Daniel 9.27

†† Génesis 6.5-8

chrókónohe ijnko inché nchia nkehora tie chrókjui ijnko nkexro tseeé la ntá chrókjuak'echónhen tí inché tí nchia ntá xitjahya ts'ixenhen tí nkexro tjinkaon chrókueé. ⁴⁴ Méxra jahará la jína chrók'uejorá kixin tí Xjeen Dios K'óna Chojni me titàya itsi.

Tí nkexro jina ch'e xra la tí nkexro ch'ehya xra jina
(Lc. 12.41-48)

⁴⁵ Tí nkexro chaxín ch'e xra jína la ko imá nohe la ntá tí lámoeé ch'án ts'etuenhen kixin ts'ayakonhen ch'án tí sín siín ntøe ch'án la ko tsjanjon ch'án nkehe sine sín chjntji tí hora a. ⁴⁶ Náxrjón tjen tí nkexro ch'e xra tió itsi tí lamo la ts'ikon kixin xikaha tjenchexiteyá ch'án tí xra k'uítuenhen ch'án. ⁴⁷ Chaxín tí lamo la tsjanjon ch'án kaín tí xra chóna ch'án ts'etøan tí ch'ín a. ⁴⁸ A ntá ijnko chojni ch'ehya xra jína la ntá tsjenkayáxin ch'án kixin kjá tjokahya tsokjan tí lámøe ch'án ⁴⁹ la ntá tsjankíxin ch'án tsjanjonko ch'án tí í so sín ch'e xra la ko tsjankíxin sineko ch'án la ko its'ikao ch'án kaín tí sín sítókoan. ⁵⁰ Ntá xrinahya tsokjan tí lamo ijnko yaon la ko ijnko hora noehya tí nkexro ch'e xra. ⁵¹ La ntá jehe ch'án la sinchekjasóte tí ch'ín kuitøhehe xra kjuínchexiteyáhya la ts'etøan ch'án kixin tsjasóte tí ch'ín a éxi tí sín jnko-jínxónhya tjenkayáxin. Ntá ntiha la tsotsjánka ch'án la ko sinetaón neno ch'án.

Ch'ín Jesús kjuíncheyóexin ch'án kixin ite sín tjarisoá

25 Ntá chro ch'ín Jesús kixin:
—Tí kjuachaxin kuènte Dios mé éxi yóhe ite sín tjarisoá sátsji tí tsøtøhe chojni chuénko linterna tjá aceite la sákjuíchónhen sín tí ch'ín tsíkótehe. ² In'ó sín la tsíkóyaxíenhya sín la in'ó sín ó tsíkóyaxínhin sín. ³ Tí sín tsíkóyaxíenhya na kjaxin la tsíkijjiko sin linterna kjánchó tsíkijjikhoya sín aceite tsíkja ínaa. ⁴ A ntá tí sín tsíkóyaxínhin la sátsíkijiko sín xro tjá aceite la ko tí linterna kuènte sín. ⁵ A ntá tí ch'ín tsíkótehe la tjokahya kui ch'án la ntá jehe sín mé tsíkíhi sín kotáchrín la tsík'ejóhua sín kaín sín. ⁶ A ntá kuichjina k'áxrøtjen la kuínhin sín t'èya ijnko chojni kixin: “Ó kui tí ch'ín tsíkótehe na t'axrjerá ntója tsoxetará ch'án”, ichro ch'án. ⁷ A ntá kaín tí sín tjarisoá la k'uàya sín la kjuasiyóxin sín tí linterna kuènte sín. ⁸ A ntá tí in'ó sín tsíkóyaxíenhya la nixjehe sín tí sín in'ó tsíkóyaxínhin ntá chro sín kixin: “Chjehéni intsí aceite kuèntará kixin ó k'uànká aceite tjá linternéni”, ichro sín. ⁹ A ntá tí sín tsíkóyaxínhin mé ntá chro sín kixin: “Náhí, tí aceite tí xikaha tsjanjonni intsí jahará la antsí jeheni la tsjachahya. Íchá jína sáttik'ènará tí sítoxín ntiha”, ichro sín. ¹⁰ Ntá tí in'ó tí sín kóyaxíenhya mé sákjuik'èna sín aceite la ntá ó kui tí ch'ín tsíkótehe. Tí in'ó sín tjejóchónhen mé sákjujko sín ch'án tí kia tsíkótehe sín la ntá ó tuénxín k'uikjéhe tí puerta. ¹¹ Ntá chr'éxin ikui tí in'ó sín tjarisoá tsíkóyaxíenhya la t'ínka sín puerta ntá chro sín kixin: “Ó kuini takitjehé nchia.” ¹² A nta jehe ch'an kjuátøhe ch'án ntá chro ch'án kixin: “Chaxín tí jahará la ní chonhyará”, ichro ch'an.

¹³ Ntá ntá chro ch'ín Jesús ínaa kixin:

—Méxra xikaha tí jahará chrók'uejótshjehé kixin noahyará nkeyaon la nkehora itsi tí Xjeen Dios K'óna Chojni —ichro ch'án.

Ch'ín Jesús kjuíncheyóexin ch'án kuènte chichaon

¹⁴ Ntá ntá chro ch'ín Jesús kixin:

—Tí kjuachaxin kuènte Dios la yóhe ijnko chojni tjinkaon sáchrókjui ch'án í jnko nación la ntá k'uíyøhe ch'án tí sín ch'ehe ch'án xra la ntá chjéhe ch'án sín tí chichaon a kixin ts'ayakonhen sín.

¹⁵ Tjnko ch'án la k'uáyéhe ch'án in'ó mil chichaon, la í jnko la k'uáyéhe ch'án iyó mil chichaon, la í jnko la k'uáyéhe ijnko mil chichaon. Tí nkexro kjuanjon chichaon la mé kónohe ch'án nkexro tí tsjacha sich'e jnkojnko xra. Ntá jehe ch'án tió kjuixin kjuanjon ch'án la ntá sakjuí ch'án ikjín. ¹⁶ Ntá tí nkexro k'uáyéhe in'ó mil chichaon la kjuích'eko ch'án xra tí chichaon kuákja ch'án la kjuacha ch'án í jnko in'ó mil. ¹⁷ Kjaxin tí nkexro k'uáyéhe iyó mil chichaon mé xikjacha ch'án í jnko iyó mil. ¹⁸ A ntá tí nkexro k'uáyéhe ijnko mil chichaon mé sákjuí ch'án la kjuích'èna ch'án ijnko tøyø kjuavá ch'án tí chichaon kuènte lámøe ch'án.

¹⁹ A ntá nchónhya nánó k'uátsínka la ntá ikjan tí lámøe sín kixin ntá tsjentoáko sín ch'án cuenta. ²⁰ Saóxin kui tí nkexro k'uáyéhe tí in'ó mil la chjéhe ch'án tí lamo í jnko in'ó mil la ntá chro ch'án kixin: “Jaha me chjehéni in'ó mil la ó kjuachani í jnko in'ó. Tákjá tjinhin tí chichaon í”, ichro ch'án. ²¹ Ntá tí lamo mé ntá chro kixin: “Nchøxon tí xikaha. Jaha la ijnko chojni jína ch'e xra. La ó kjuínchexiteyá jína. Kjónté jehya xra jíé la kjuínchexiteyá jína la ntá tsøtjaha ijnko xra antsí jíé la tjak'e tsøchéheni.” ²² Ntá chr'éxin ikui tí nkexro k'uáyéhe iyó mil la ntá chro ch'án kixin: “Jaha mé chjehéni iyó mil la kjuachani í jnko iyó. Tákjá tjinhin tí chichaon í”, ichro ch'án. ²³ La ntá tí lamo ntá chro kixin: “Nchøxon jaha mé ijnko nkexro jína ch'e xra la ó kjuínchexiteyá. Kjónté jehya xra jíé la kjuínchexiteyá jína la ntá tsøtjaha í jnko xra antsí jíé. Tjak'e tsøchéheni”, ichro ch'án. ²⁴ A ntá ikui tí ch'ín k'uáyéhe ijnko mil la ntá chro ch'án kixin: “Ó nòna kixin ijnko chojni imá jiehe tí jaha la itjæa tí nonte jehya jaha k'uénkaxian la tsákjá nkehe kjónté k'uénkahya. ²⁵ Méxra chrakonni la sákjuíkjak'emáni tí chichaon chrínki nche. Tákjá chichakøan tjinhin”, ichro ch'án. ²⁶ A ntá kjuátøhe tí lamo kixin: “Jaha ijnko chojni jínahya la ko séhe. Jaha la ó noha kixin chrótjæa tí nonte k'uénkahya la chrókuákjaá tí nkehe k'uénkahya. ²⁷ A ntá tí chichaon chróchr'an banco. Ntiha chrókjuich'exin xra ntá tí ikjan janhan ntá chrók'uayáha antsí itsjé chichaon chrókjuacha kichó chica”, ichro tí lamo. ²⁸ A ntá nixjehe ch'án tí í so sín tjejó la ntá chro ch'án kixin: “Takitsjehérá tí mil chóna ch'án la chjehérá tí nkexro chóna tí ite mil chichaon ²⁹ kixin tí nkexro kjónté itsjé chóna la mé ts'áyéhe antsí la ntá tí nkexro chónahya la kjónté tí intsí chóna la ts'axrjehe. ³⁰ A ntá tí nkexro ch'ehya xra la tsétuènhén sátsji ch'án tí sítié ntója la ntá ntiha la tsotsjánka ch'án la ko sinetaón ch'án neno ch'án.”

Tsitōexín ijíe chojni chjasintajni

³¹ A ntá tí tsi tí Xjeen Dios K'óna Chojni la tsíkəo ch'án kjuəchəxién jíé éxí ijnko Réy la ko tsíkəo ch'án kaín xín tí sín ángel ntá ntaha tsjak'etjəxín ch'án tí trono ts'etəoxín tí kjuəchəxién jíé. ³² Ntiha kaín xín tí chojni tsíkjixín nkuíxín nacióon tsəochjina tí tjen ch'án la jehe ch'án tsakitsjekjan ch'án ijnko la í jnko. Éxí ijnko nkexro t'ayakonhen kolélo mé tsakitsjekjan ch'án tí kolélo la ókjé ts'ixín va la ko tí kotəntsə la ókjé ts'ixín. ³³ Méxra ts'etəox ch'án kixin tí kolélo la ts'ixín nó tja ch'án chjina, a ntá tí kotəntsə la nó ti tja ch'án kjon. ³⁴ Ntá tí Rey tsonixjehe tí sín tjejó tja ch'án chjina tson-táchro kixin: "Xrákirá jahará ti tjen kjuachaxín kuənte T'aná kixin T'aná ó kjuíncheyaonrá ch'án. Tí naxə kjuích'énahya Dios chjasintajni la xráxín kjuenkəyáxín ch'án xikaha tsəonhen. ³⁵ Janhan mé k'uén kjinta la jahará kjuánjonrá nkehe kjoné. La ik'uén ntə la jahará kjuánjonrá nkehe ik'uia, la k'uájia éxí ijnko chojni kjuixín ikjín la jahará kjuánjonrá nketí k'ok'àna. ³⁶ La ko k'uéchontahya kaná la jahará kjuánjonrá ika k'uítsə, la ko kónina la jahará kjuasántsjehérá ti janhan, la kjuak'échjina la ntá jahará kjuasántsjehérá tí janhan." ³⁷ A ntá tí sín jína la tsjanchankí sín kixin: "Ínchéni, zńkesá k'uíkonní kixin ik'uén kjinta ntá kjuanjonní nkehe kjónte? zLa nkesá k'uíkonní kixin ik'uén ntə la kjuanjonní nkehe ik'uia? ³⁸ zLa ko nkesá k'uíkonní kixin ikjín kjuixían ntá kjuanjonní nketí k'ok'àna? zLa ko nkesá k'uíkonní kixin chontahya iká la kjuanjonní ika k'uítsə? ³⁹ zLa nkesá k'uíkonní kixin kóniha o kjuák'echjina la ntá kjujitsjeheni tí jaha?" mé xikaha tsjanchankíhí sín ch'án. ⁴⁰ A ntá tí Rey tsontáchro kixin: "Tió kjuínkítsará ijnko kichó ni kjónté ijnko chojni nóe la mé yóhe kixin tí janhan chrókjuínkítsará." ⁴¹ A ntá tí Rey t'etəox mé tsonixjehe tí sín tjejó nó tja ch'án kjon tsontáchro kixin: "Sátjirá jahará kixin jahará tsjasótiará. Sátjirá tsjasótiará tí tjen tí xrohi ts'ankahya. Mé tí xrohi tjechónhen kixin tsoche tí ch'ín Tsochren la ko kaín tí sín ángel kuənte ch'án. ⁴² Tí ik'uén kjinta la jahará kjuánjonhyará nkehe kjoné la ko ik'uén ntə la jahará kjuánjonhyará nkehe ik'uia. ⁴³ K'uájia éxí ijnko nkexro kjuixín kjín la jahará kjuánjonhyará nketí k'ok'àna la ko k'uéchontahya kaná la jahará kjuánjonhyará ka chrók'uítsə la ko k'uénina la kjuak'échjina la jahará kjuasántsjehyará tí janhan." ⁴⁴ Ntá tí jehe sín la tsjanchankí sín kixin: "Ínchéni, zńkesá k'uíkonní kixin ik'uén kjinta la ik'uén ntə la ko kjuixían kjín la ko chontahya iká la ko níha la ko kjuák'echjina? zMé nkesá k'uíkonní xikaha la ntá kjuínkítsahyani ti jaha?" tsixro sín. ⁴⁵ La ntá tí Rey tsjatehe ch'án tsontáchro ch'án kixin: "Tí xikaha kaín tíha kjuínkítsahyará ijnko chojni imá nóe la éxí xikaha kjuínkítsahyará tí janhan." ⁴⁶ A ntá tí sín jínahya xikaha kjuích'e la mé sátsjixín sín ntihi tsjasóte sín jnkochríchín. A ntá tí sín jína la sátsji sín ts'áyéhe sín kjuachón jnkochríchín —mé xikaha chrónka ch'ín Jesús.

Tí sín nínkakonhen ch'ín Jesús tjenkəyáxín sín kixin nkexrí ts'óyán sín ch'án

(Mr. 14.1-2; Lc. 22.1-2; Jn. 11.45-53)

26 Ntá kjuixín chrónka ch'ín Jesús kaín tíha, ntá nixjehe ch'án tí sín k'uájiko ch'án, ntáchro ch'án kixin: ² —Jahará ó nohará kixin t'itjəyan iyó yəon ntá tsjasín sín tí kia pascua la ntá tí Xjeen Dios K'óna Chojni mé tsotsé sín ch'án tsjikaán sín ch'án tí tjejó tí sín t'etəox ntá tsjak'enkəni sín ch'án ijnko ntacruz —ichro ch'ín Jesús. ³ Ntá tí sín nchət'á t'etəox la ko tí sín maestro tjako tí ley la ko tí sín táda kuənte tí sín judío mé kójnkotsé sín tí ntəsin kuənte tí nchia kjuák'e ch'ín Caifás tí ch'ín nchət'á t'etəox. ⁴ Ntaha tjenkəyáxín sín kixin nkexrí tsotsé sín ch'ín Jesús la ts'óyán sín ch'án. ⁵ A ntá ntáchro sín kixin: —Tí siín kia la chrótsəhyani ch'án kixin imá tsəonínkaon tí chojni —ichro sín.

Ijnko tjan kjuikəo aceite xraxé kjuikite tjan ikja ch'ín Jesús

(Mr. 14.3-9; Jn. 12.1-8)

⁶ Ch'ín Jesús tjen chjasín Betania ntəox ch'ín Simón tí ch'ín k'uéchóna chinlepra. ⁷ Ntá xrinəhya kóchjina ijnko tjan kjuikəo tjan ijnko xro tsík'óna xro mármol mé kuíkaón aceite xraxé náxrjón la imá tjeje k'uíte. A ntá tí tjene ch'ín Jesús ntá tí tjan a mé kjuikite aceite ikja ch'án. ⁸ A ntá tí sín k'uájiko ch'ín Jesús mé k'uíkon sín xikaha ntá kónínkaon sín la ntáchro sín kixin: —zNkekuənté kóxénhen tí xroə a? ⁹ Íchá jína chrókóxixín itsjé chichaon tí xroə ntá tí chichaon a chrókjuínkítsa tí sín nóe a —ichro sín. ¹⁰ Ntá kuínhin ch'ín Jesús tí nkehe tjo sín, ntá ntáchro ch'án kixin: —zNkekuənté t'antaxínhínrá tí tjan i? Ó nchəoxon ijnko nkehe jína kjuích'e tjan. ¹¹ Tí sín nóe la ó xráxín ts'ejókoará sín, a ntá janhan la jnkochríchínnya ts'ejóni. ¹² Tí nkehe kjuích'e tjan mé kjuíncheka tjan aceite xraxé tí cuerpo kuəntəna la mé xikaha kjuəkoxín tjan kixin xikaha tsəoxravána. ¹³ Ntá chaxín tjonkərá kixin kuenté chjasintajni tió tsjako sín tí tán jína tsaáxín sín ntá tsochrónka sín kixin xikaha kjuích'e tjan ntá tsəoxraxinkakonxín sín kixin nkehe tí kjuích'e tjan —ichro ch'ín Jesús.

Ch'ín Judas kjuínchekji tí ch'ín Jesús

(Mr. 14.10-11; Lc. 22.3-6)

¹⁴ A ntá ijnko tí teyóxín sín k'uájiko ch'ín Jesús mé it'in Judas Iscariote sákjuínixjehe ch'án tí sín nchət'á t'etəox ¹⁵ la ntáchro ch'án kixin: —zNkekjəín tsochjínarə tsəoxrjanka nketí tjen tí ch'ín Jesús? —mé xikaha chro tí ch'ín Judas. Ntá tí sín nchət'á t'etəox kjuenkəhe sín ch'án treinta chichaon plata. ¹⁶ Ntá tuénxín tí hora tí ch'ín Judas mé xritjeyá ch'án nkexrí tsochénka ch'án sín nketí tjen tí ch'ín Jesús.

Kjuixín kjóneko sín tí ch'ín Jesús

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Ntá ikui tí yaon xrankíxín kia sine sín niotja tsíkjikohya tí xroan t'ánkíxín niotja. Ntá tí sín k'uájiko ch'ín Jesús mé kóchjina sín kjuanchankíhi sín ch'án kíxín:

—¿Inchéni, nketí tjinkávan sincheyaxíxinni tí sineni tí kia pascua? —ichro sín.

¹⁸ Ntá ntáchro ch'án kíxín:

—Sátsjirá Jerusalén la tsjasánrá ntøe ijnko ch'ín la nixjehérá ch'án tsontáchrórá kíxín: “Ntáchro Maestro kuénténi kíxín í séhya naxa tsjak'e ch'án la ntá ijie ntøa ntihi tsoyaxíxín kíxín sineko ch'án tí sín xriko ch'án tí kia pascua”, tsixrorá —mé xíkaha ichro ch'ín Jesús.

¹⁹ A ntá tí sín k'uájiko ch'ín Jesús mé kjuínchexiteyá sín la kjuíncheyaxíxín sín ntiha tí nkehe sine sín kia pascua.

²⁰ Tió ntá kóntó la ntá ch'ín Jesús k'uéjoko tí teyó sín k'uájiko ch'án kjóne sín. ²¹ La ntá tió naxa tjejóne sín la ntáchro ch'ín Jesús kíxín:

—Chaxín tjonkará kíxín jnkojínrá tjejorá ntihi mé sinchekjirána —ichro ch'án.

²² Ntá kaín sín la kjuankíxín kóxakonhen sín k'uává sín la ntá kjuankíxín sín jnkojnko sín kjuanchankíhi sín tí ch'ín Jesús kíxín:

—Inchéni, ¿á jeheni ní? —ichro sín.

²³ Ntá kjuátehe ch'ín Jesús kíxín:

—Tí nkexro tsochr'ánkíkian niotja tí plato a mé tí nkexro a mé sinchekjina ch'án. ²⁴ Tí Xjeen Dios K'óna Chojni xíkaha tsjasóte ch'án éxí nixja xroon itén Dios, a ntá nda tí ch'ín sinchekji ch'án. Íchá jína chrókokjehya ch'án —mé xíkaha ichro ch'ín Jesús.

²⁵ Na ntá tí ch'ín Judas tí ch'ín sinchekji ch'ín Jesús, mé ntáchro ch'án kíxín:

—Maestro, ¿á janhan? —ichro ch'án.

Ntá ntáchro ch'ín Jesús kíxín:

—Méxra xíkaha tsintáchrúa —ichro ch'án.

²⁶ Ntá tió tjejóne sín na ch'ín Jesús mé kuákja ch'án tí niotja ntá kjuanchehe ch'án kjuasáyé Dios. Ntá kóchrít'o ch'án tí niotja ntá chjéhe ch'án kaín tí sín k'uájiko ch'án sine sín. Ntá ntáchro ch'án kíxín:

—Sinterá tíhi mé cuerpo kuéntana —ichro ch'án.

²⁷ Na ntá kuákja ch'án ijnko vaso tjíá înté to uva na ntá kjuanchehe ch'án kjuasáya Dios ntá kjuixín ntá chjéhe ch'án kaín tí sín tjejóko ch'án ik'ui sín. Ntá ntáchro ch'án kíxín:

—Tíhi mé kaín rá it'irá ²⁸ kíxín tíhi mé jnina mé chrónkaxín ijnko nkehe nixin tsonhen. Mé tí jnina ts'ítji na mé tsjacha tsjinkitsa nchónhya chojni kíxín ts'íjmáxin íjje sín. ²⁹ Tjonkará kíxín ts'íhya janhan tí înté to uva inaá tsjixrakájia tí yaon ts'ayàjia kjuachaxin kuènte T'aná ntá xík'ini înté to uva inaá —mé xíkaha ichro ch'ín Jesús.

Ntá chrónka ch'ín Jesús kíxín ch'ín Pedro sinchemá ch'án kíxín chónhya ch'án tí ch'ín Jesús

(Mr. 14.26-31; Lc. 22.31-34; Jn. 13.36-38)

³⁰ Ntá itsje sín ijnko himno ntá kjuixín ntá sákjuí sín tí jna Olivo. ³¹ Ntá ntáchro ch'ín Jesús kíxín:

—Jahará tsítønaráni kaín rá ijie tie kíxín ntáchro tí xroon itén Dios kíxín: “Its'en tí nkexro Pastor t'ayakonhen kolélo ntá kaín tí ko mé tsjichroe va.” ¹³² Na ntá tió tsoxechónna ntá sátsjia senó estado Galilea, a ntá jahará la chr'éxin tsochréhérá —ichro ch'án.

³³ Ntá kjuátehe ch'ín Pedro ntáchro ch'án kíxín:

—Kjönté kaín sín tsítøha sín ntá janhan la náhi —ichro ch'án.

³⁴ Ntá ntáchro ch'ín Jesús kíxín:

—Chaxín tsoxrjanka kíxín tí tie i naxa tsotsjehya kochíntøa la ó sinchemána níya —ichro ch'án.

³⁵ Ntá ntáchro ch'ín Pedro kíxín:

—Kjönté koína its'én la sjntamáhya tí jaha —ichro ch'án.

La ntá kaín tí sín k'uájiko ch'án na xíkaha ichro sín kaín sín.

Ch'ín Jesús chrónóehø ch'án It'é ch'án tí tjen ch'án tí Huerto Getsemaní

(Mr. 14.32-42; Lc. 22.39-46)

³⁶ Ntá ch'ín Jesús la ko tí sín k'uájiko ch'án mé kjuíji sín tí nonte ntiha mé nchek'in sín Getsemaní. Ntá jehe ch'án mé ntáchro ch'án kíxín:

—Tjejorá ntiho ntá janhan sátsjia tsonixjahø T'aná —ichro ch'án.

³⁷ Ntá sákjuiko ch'án tí ch'ín Pedro la ko tí iyó xjeen ch'ín Zebedeo la kjuankíxín kóxakonhen ch'án la ko k'uává ch'án. ³⁸ Ntá ntáche ch'án tí iy'á sín kíxín:

—Imá t'ává asenná éxí its'én ntá ts'axrje asenná. Ntá jahará ntiho tsítøhará ts'ejotsjehekoárána —ichro ch'án.

³⁹ Ntá sákjuí ch'án antsí kjínxin ntá kjuák'exín toch'in ch'án k'uísén ch'án hasta caxín kja ch'án nonte ntá chrónóehø ch'án It'é ch'án tjen nkaya nkajní, ntáchro ch'án kíxín:

—It'éni, tí tjinkávan chrókjuínchekaáni kíxín chrók'uihyani tí nkehe tsjá tjíá tí copa i. Kjánchó jehya éxí tjinkaonni jeheni. Náhi. Éxí tjinkávan jaha —ichro ch'án.

⁴⁰ Ntá ikjan ch'án tí kuítøhe sín la ó k'uíkon ch'án kíxín tjejójua sín. Ntá nixjehø ch'án tí ch'ín Pedro ntáchro ch'án kíxín:

—Xá xitjahya chrók'uejótsehekoarána ijnko hora.

⁴¹ Titøhará tjejotsjehérá la nixjehérá Dios kíxín tsjinkít-sará ch'án kíxín chrókjuachroehyará ch'ín Tsochren. Asánrá tóxrjínhín kjánchó tí cuerpo chontará la imá ntá —mé xíkaha ichro ch'ín Jesús.

⁴² Ntá sákjuí ch'án yóxin inaá chrónóehø ch'án It'é ch'án, ntáchro ch'án kíxín:

† Zacarías 13.7

—Jaha It'eni tí xitjahya tsjakjían tí nkehe tsjasótexín- ni la ntá tjinkaonni éxí jaha tjinkávan —mé xíkaha ichro ch'án.

⁴³ Ntá ikjan ch'án la k'uíkon ch'án tjejójua tí sín k'uájiko ch'án inaá kixin tjeheya sín kotáchrin. ⁴⁴ Ntá kuitoge ch'án sín inaá la nixin sáxíkji ch'án ntá ó xíkahó xínixja ch'án inaá. ⁴⁵ Ntá kjan ch'án tí k'uéjéjó sín la ntáchró ch'án kixin:

—¿A ntá jie, tjeochrinrá la t'ok'áhará ní? Ntá ó tjen. Ntá jie kjuixraká tí hora ntá tí Xjeen Dios K'óna Chojni tsotsé tí sín chóna jie tsjikaán sín ch'án. ⁴⁶ Ntá ijie t'inkatjenrá sátsjini kixin ó kjuí tí ch'ín sinchekjina —ichro ch'án.

Sákjuíko sín tí ch'ín Jesús tsjak'echjina ch'án ntóechiso
(Mr. 14.43-50; Lc. 22.47-53; Jn. 18.2-11)

⁴⁷ Ntá naxá tjenixja ch'ín Jesús ntá xrínahya kui ch'ín Judas, mé ijnko tí teyóxin sín k'uájiko ch'án. A ntá jehe ch'án kjuíkao ch'án nchónhya chojni kjuíjiko sín chica espada la ko inta. Na mé kjuachaxién tí sín nchat'á t'etōan la ko tí sín táda kuènte tí sín judío mé kui sín.

⁴⁸ Ntá ch'ín Judas, tí ch'ín kjuínchekji, mé tsintáchró ch'án kixin:

—Tí ch'ín tsákihā tuēen ch'án na mé tsonoxínrá kixin jehe ch'án. Ntá itsérá ch'án —mé xíkaha tsintáchró ch'ín Judas.

⁴⁹ Ntá kóchjinehe ch'án tí ch'ín Jesús la nixjehe ch'án ntáchró ch'án kixin:

—¿Á jina tjen, Maestro? —ichro ch'án.

Ntá kjonéko ch'án kochíto. ⁵⁰ Ntá kjuátehe ch'ín Jesús, ntáchró ch'án kixin:

—Amigo, á ó k'uinka tí xrā tjinkávan s'ich'e?

Ntá xíkaha kaín sín kóchjinehe sín ch'án la itsé sín ch'án.

⁵¹ Ntá ijnko ch'ín k'uájiko ch'ín Jesús mé kuakitsje ch'án chica espada kóchrínjin ch'án t'atsjon ijnko tí sín ch'ehe tí nchat'á t'etōan xrā. ⁵² Ntá ntáchró ch'ín Jesús kixin:

—Chr'axenhén tjoē chica espada méhe. Kaínxín tí sín tjàyxín chica espada la xíkaha ts'enixín sín. ⁵³ ¿Á noahyará kixin janhan jina chrókjuáncháha T'aná la ntá tuénxín chróchr'án ch'án teyó ejército sín ángel?

⁵⁴ Kjánchó tí xíkaha chrókónhen la chróxiteyáhya éxí nixja xroon itén Dios kixin itén Dios mé chrónka kixin t'ichjánxín ó jehí xíkaha tsonhen —ichro ch'ín Jesús.

⁵⁵ Ntá ch'ín Jesús mé ntáche ch'án tí sín ikui kixin:

—Jahará k'uinkakoará chica espada la ko inta kixin tsotsérana éxí chrótsérá ijnko síchēe xíkaha. A ntá kaín yaon kjuak'é nkaxenhen njnko kjuákua zna ntá nkexrí ntiha mé tsexinhyarána? ⁵⁶ Kjánchó jehí kaín tíha tsonhen kixin tsoxiteyá tí chrónka tí sín tsíkjin xroon itén Dios ósé —ichro ch'án.

Mé xíkaha ntá kaín tí sín k'uájiko ch'ín Jesús na mé kuitoge sín ch'án, ntá sákjuí sín.

Ch'ín Jesús kóchjina ch'án tí síxreé t'etōan
(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Ntá tí sín itsé ch'ín Jesús la sákjuíko sín ch'án ntōe ch'ín Caifás, tí nchat'á t'etōan. Ntaha mé tsikójnkotsé kaín tí sín maestro tjako tí ley la ko tí sín t'etōan kuènte njnko. ⁵⁸ Ntá ch'ín Pedro ikjín tinkáchrēhe ch'án ntá kjuíji ch'án tí ntāsin ntōe tí nchat'á t'etōan la kjaxin k'uixenhen ch'án tí ntāsin la kjuák'eko ch'án tí sín policía kuènte njnko kixin tsotsjehe ch'án nkerí tsonhen.

⁵⁹ Ntá tí sín nchat'á t'etōan la ko tí sín táda la ko kaín tí sín t'etōan mé kjuéyá sín nkexrí ts'eka sín jie tí ch'ín Jesús kixin jina chrók'óyán sín ch'án. ⁶⁰ Ntá kjoné nchónhya chojni kuikjanchia sín jie kjánchó k'uitjahya sín nkerí jie t'íká ch'án. Ntá kjoné la kóchjina iyó testi-go ntoáhya chrónka sín ⁶¹ la ntáchró sín kixin:

—Ó kuínhinni ntáchró ch'án kixin: "Janhan na ts'oxíka tí njnko kuènte Dios la ntá iní yaon koá la ó tsjaké inaá" † —mé xíkaha chro sín.

⁶² Ntá tí nchat'á t'etōan k'uínkatjen la kjuanchankíhi ch'án tí ch'ín Jesús, ntáchró ch'án kixin:

—¿Nkekuènté tjáteéhya ninkehó? ¿Á chaxín xíkaha tsintáchrúa éxí xíkaha ichro sín? —ichro ch'án.

⁶³ Ntá ch'ín Jesús la tánikoá ch'án nixjahya ch'án. Ntá ntáchró tí nchat'á t'etōan kixin:

—Kjuachaxién ihnjé tí Dios tjechón t'akjénxian chrónka ntoá, ¿á jaha tí Cristo Xjeen Dios? —kjuanchankí ch'án.

⁶⁴ Ntá kjuátehe ch'ín Jesús ntáchró ch'án kixin:

—Éxí tí ntáchrúa jaha. Ntá kjaxin xrjanka kixin chr'éx-jín ts'ikuan kixin tí Xjeen Dios K'óna Chojni mé tsjak'et-jaxín nángo tí tja chjina Dios chóna kaín xín kjuachaxin la ko ts'ikuan itjuí mé tsixín ch'án nkaya nkajni —ichro ch'ín Jesús.

⁶⁵ Ntá kuínhin tí nchat'á t'etōan la ntá imá kóninkaon ch'án ntá kótséchje ch'án tí iké ch'án la ntáchró ch'án kixin:

—Tí ch'ín a k'uántaxínhin ch'án Dios kixin xíkaha nixja ch'án. Méxrā t'ichjánxínhya í so chojni tsochrónka. La ntá jahará la ó kuínhínrá kixin nkexrí nixja ch'án.

⁶⁶ ¿A ntá jahará la, ¿nkechorá? —mé ichro tí nchat'á a.

Ntá kjuátehe sín ntáchró sín kixin:

—Chóna ch'án jie la chrók'uen ch'án —ichro sín.

⁶⁷ Ntá iso sín la kjuíte sín ntāte sín nkayakon ch'án na í so sín na kjuate sín ch'án la í so la chjéhe sín ikon ch'án. ⁶⁸ La ntáchró sín kixin:

—Tí chaxín tí Cristo jaha la tónoha nkexro kjuatia —ichro sín.

Ch'ín Pedro kjuínchemá ch'án kixin chónhya ch'án tí ch'ín Jesús

(Mr. 14.66-72; Lc. 22.56-62; Jn. 18.15-18, 25-27)

⁶⁹ Ntá ch'ín Pedro naxá tjetjaxín ch'án tí ntāsin la ntá ikui ijnko tjan ch'e xrā ntiha kóchjinehe ch'án, la ntáchró tjan kixin:

† Juan 2.19

—Kjāxian xríkoa tí ch'ín Jesús tsíkijixín estado Galilea —ichro tjan.

⁷⁰ A ntá ch'ín Pedro kjuínchemá ch'án nkayakon kaín sín la ntáchro ch'án kixin:

—Nonahya nkehe tí ntáchrua —ichro ch'án.

⁷¹ Ntá sákjuí ch'án kjuíji ch'án chjina tí puerta. La ntá íjko tjan k'uíkon tí jehe ch'án la nixjehē tjan kaín sín tjejótaxín, la ntáchro tjan kixin:

—Tí ch'ín i la kjāxin k'uájiko ch'án tí ch'ín Jesús tsíkijixín chjasin Nazaret —ichro tjan.

⁷² Ntá ch'ín Pedro kjuínchemá ch'án inaá, k'uákjexjín ch'án ihnié Dios, ntáchro ch'án kixin:

—Chonhya tí nkexro a —ichro ch'án.

⁷³ Ntá antsí chr'ēxjín tí sín k'uējótaxín kóchjinehe sín ch'ín Pedro la ntáchro sín kixin:

—Chaxín jaha kjāxin jnkojín tí sín a kixin tjátsōanxín-ni tí nixja jaha —ichro sín.

⁷⁴ Ntá k'uákjexjín ch'án ihnié Dios ntáchro ch'án kixin:

—Chonhya tí nkexro a —ichro ch'án.

Na ntá xríngħya itsje kochíntōa. ⁷⁵ Ntá ch'ín Pedro mé xraxinkaon ch'án kixin nkexrí chrónka ch'ín Jesús senó kixin: “Naxā tsotsjehya kochíntōa mé ó tsjixin sijnchemána niya kixin chonhyana.” † Ntá xjkaha xraxinkaon ch'ín Pedro ntá k'uaxrjenta ch'án ntiha la imá tsjánka ch'án la ó mero ts'enxín ch'án tí kjuancheníhi, la sákjuí ch'án.

Kjuikénhen sín ch'ín Jesús tí ch'ín Pilato

(Mr. 15.1; Lc. 23.1-2; Jn. 18.28-32)

27 Ntá tí kóyāon k'uínkaséyan ntá kaín sín nchāt'á t'etōan la ko tí sín t'etōan kuente tí sín judío kjuenkayáxin sín nkexrí ts'óyán sín tí ch'ín Jesús. ² Ntá tjechronteto ch'án sákjuiko sín ch'án tí tjan tí ch'ín Poncio Pilato, tí ch'ín gobernador romano.

Ik'uén ch'ín Judas

³ Ntá tí ch'ín Judas, tsíkjinchekji ch'ín Jesús, mé k'uíkon ch'án kixin ts'óyán sín tí ch'ín Jesús. La ntá xraxinkaon ch'án tí jje kjuasin ch'án la sákjuikénhen ch'án sín inaá tí treinta chichaon plata kuákja ch'án, mé chjéhe ch'án tí sín nchāt'á t'etōan la ko tí sín táda.

⁴ La ntá ntáchro ch'án kixin:

—Ó kjuasinni jje kixin kjuínchekjini ijnko nkexro tjóá —ichro ch'án.

A ntá jehe sín kjuátehe sín kixin:

—Ntá janhanna la nonahyana tíha. Tíha la ó jje kuènta —ichro sín.

⁵ Ntá ch'ín Judas mé sákjuík'e tí chichaon nkaxenhen njnko ntá sákjuí ch'án kjuisik'á isin ch'án nta.

⁶ Ntá tí sín nchāt'á t'etōan kjuenájín sín tí chichaon la ntáchro sín kixin:

—Tí chichaon la kóxixjín ijnié chojni la chrokjuahya chr'áxenhenni tí caja kuente ofrenda —ichro sín.

⁷ La ntá kjuenkayáxin sín jnkokoá kixin tí chichaon la ts'enaxín sín ijnko nonte it'in Nontēe Tí Ch'ín Ch'éna

† Mateo 26.34

Nchésen kixin tsochónta sín nketí tsoxravá tí chojni tsíkijixín ikjín. ⁸ Mé xjkaha kjuínchek'in sín tí nonte mé Campo Kuènte Jnī la hasta ijie la naxā xjkaha nchek'in sín. ⁹ Mé xjkaha ó xiteyá tí nkehe k'uéntáchro profeta Jeremías, ntáchro ch'án kixin: “Kuákja sín tí treinta chichaon plata (tí chichaon kjuanjón tí sín israelita kuènte tí ch'ín a), ¹⁰ la k'uēnaxín sín tí nonte kuènte tí ch'ín ch'éna nchésen kixin xjkaha kjuínchexiteyá sín tí nkehe k'uētūanna Ìnchéni.” ††

Ch'ín Jesús kóchjina nkayakon tí gobernador Pilato

(Mr. 15.2-5; Lc. 23.3-5; Jn. 18.33-38)

¹¹ Na ntá ch'ín Jesús sákjuiko sín ch'án nkayakon tí ch'ín gobernador la ntá jehe ch'án kjuanchankí ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátehe ch'ín Jesús, ntáchro ch'án kixin:

—Éxí ntáchrua jaha —ichro ch'án.

¹² Na ntá tí sín nchāt'á t'etōan la ko tí sín táda t'etōan t'eka sín jje tí ch'ín Jesús kjánchó la ch'ín Jesús la ninkehó kjuáteehya.

¹³ A ntá ch'ín Pilato kjuanchankí ch'án kixin:

—¿Á kiénhya kaín tí jje t'eka sín tí jaha? —ichro ch'án.

¹⁴ Kjánchó ch'ín Jesús la ninkehó kjuáteehya ch'án. Ntá tí ch'ín gobernador la chrakon ch'án.

K'uētōan sín kixin its'en ch'ín Jesús

(Mr. 15.6-20; Lc. 23.13-25; Jn. 18.38—19.16)

¹⁵ A ntá tí kié pascua mé kuènen tí ch'ín gobernador kixin jnkojnko nánó takitsjexín ch'án ntōechiso ijnko chojni tjechjina. Ntá tí chojni mé tsjanchia sín nkexro tí tsítóhe ch'án sátsji. ¹⁶ Ntá tjechjina ijnko ch'án, mé kaín sín ntiha ó nohe sín kixin jínahya ch'án, mé it'in ch'án Barrabás. ¹⁷ Ntá itsjé chojni kójnko tsé la ntá ch'ín Pilato mé kjuanchankí ch'án kixin:

—¿Nkexro tjinkáonrá ts'atjánta, á tí ch'ín Barrabás o á tí ch'ín Jesús nchek'in sín Cristo? —ichro ch'án.

¹⁸ Kixin tí ch'ín Pilato la ó nohe ch'án kixin kjuachjijínōxínhin chóna tí sín kjuíkaán tí ch'ín Jesús.

¹⁹ Ntá jehe ch'án naxā tjetjāxjín ch'án tí nchekitōexjín ch'án ijje chojni la ntá tí ichjién ch'án mé k'uētūenhen tjan ijnko chojni tsjichénka ch'án kixin tsjiatéhya ch'án tí nkexro jina kixin kóntó náxrjónhya k'uíkonxín tjan kotáchríen tjan kixin tí jehe ch'án.

²⁰ A ntá tí sín nchāt'á t'etōan la ko tí sín táda t'etōan a mé nixjehē kaín tí chojni tsíkóchjina kixin

chrókjuanchia sín kixin chrókuítóhe ch'án tí ch'ín Barrabás sáchrókjuí, a ntá ch'ín Jesús mé chrók'uen.

²¹ A ntá tí ch'ín gobernador mé nixjehē ch'án sín inaá kjuanchankí ch'án kixin:

—¿Nkexro tí yaá sín tjejó ntihi tjinkáonrá ts'atjánta? —ichro ch'án.

Ntá kjuátehe sín ntáchro sín kixin:

—Ch'ín Barrabás mé chrók'uatjánta ch'án —ichro sín.

²² A ntá ch'ín Pilato mé kjuanchankí ch'án kixin:

†† Zacarias 11.12-13

—¿A ntá nkehe sít'ahá tí ch'ín Jesús tí ch'ín nchek'in-rá Cristo? —ichro ch'án.

Ntá kaín sín kjuátehe sín kixin:

—¡Tsjak'enkáni ch'án ntacruz! —ichro sín.

²³ Ntá ch'ín Pilato kjuanchankí ch'án ntáchro ch'án kixin:

—¿Xá nkehe tí kjuích'e tí ch'ín i kixin? —ichro ch'án.

Ntá antsí má itsen k'uixite sín, k'óyako sín, ntáchro sín kixin:

—¡Tsjak'enkáni ch'án ntacruz! —ichro sín.

²⁴ Ntá ch'ín Pilato k'uíkon ch'án kixin í kohya tsjitóxin-hin sín tsjenkayáxin sín la antsí má k'uixité sín, nínkaon sín, la ntá kjuanchia ch'án xrakao sín ìnta, la nkayakon kaín tí sín tsíkójnkotsé ntaha k'ònti ch'án tja ch'án. La ntáchro ch'án kixin:

—Janhan tsámáhya jié tí its'en tí nkexro í chóntahya jié. Jahará xikaha tjinkáonrá tsonhen —ichro ch'án.

²⁵ Ntá kaín sín kjuátehe sín kixin:

—Jeheni la ko xjeenni mé yámáni tí jié tí its'en tí nkexro i —ichro sín.

²⁶ Ntá ch'ín Pilato kuítóhe ch'án kixin sáchrókjui tí ch'ín Barrabás. Ntá tuénxín k'ueṭoan ch'án kixin tsjate sín tí ch'ín Jesús la ntá kjuínchek'áyéhe ch'án tí sín tsjak'enkani sín ch'án ntacruz.

²⁷ A ntá tí sín soldado a mé sákjuíko sín tí ch'ín Jesús tí palacio kuènte tí ch'ín gobernador. Ntaha kójnkot-séxin kaín tí sín soldado romano la k'uántatjen sín tí jehe ch'án. ²⁸ Ntá kuakitsjehe sín tí iké ch'án la ntá kjuínchek'inkáya sín ch'án ijnko ka kjátse tié. ²⁹ La kjuak'enkaya sín kja ch'án ijnko corona tsíkijch'éna sín ntach'i la ko kjuanjon sín ijnko nta vara kixin tjenkáya tja ch'án chjina. La ntá k'uejóxin toch'in sín nkayakon ch'án la kjuanoá sín ch'án, ntáchro sín kixin:

—Jnkochrín tsjak'é tsétuēnhén tí sín judío —ichro sín.

³⁰ La ko kjaxin ntaté sín kjuíkite sín nkayakon ch'án la ko kuákja sín tí nta tjeextraá ch'án la t'íchjéxin sín kja ch'án. ³¹ Ntá kjuixin kjuanoá sín ch'án na ntá kuakitsjehe sín ch'án tí ka kjátse tié ntá kjuínchek'inkáya sín tí iké ch'án xráxin. Ntá sákjuíko sín ch'án kixin tsjak'enkani sín ch'án ntacruz.

Kjuák'enkáni ch'ín Jesús ntacruz

(Mr. 15.21-32; Lc. 23.26-43; Jn. 19.17-27)

³² A ntá sákjuíxin sín ntiha la xéta sín ijnko ch'ín kjuix-in ch'án chjasin Cirene, mé it'in ch'án Simón. Ntá k'ueṭuēnhen sín ch'án kixin tsámá ch'án tí ntacruz tsjak'enkáni ch'ín Jesús.

³³ Ntá kjuíji sín ijnko tjo it'in Gólgota na mé nkívee sín t'axrjéxin Nta Hueso Kja Chojni Tsík'en. ³⁴ Ntá chjéhe sín ch'ín Jesús xranvino tsík'ixinkíkjanxín xroan tsjá kjánchó jehe ch'án k'uíhya ch'án.

³⁵ A ntá tí sín soldado kjuixin kjuak'enkani sín ch'án tí ntacruz ntá tí iké ch'án kjuích'exín sín suerte kixin nkexro tsakja. Mé xikaha xiteyá tí nkehe nixja tí sín k'uechrónka itén Dios ósé, ntáchro kixin: "Nchónhya suerte kjuích'exín sín tí kaná." ^{†36} Ntá tí sín soldado nta-

ha k'uejóna sín t'ayakonhen sín ch'án. ³⁷ Ntá kjuak'enkani sín tí ikja tí ntacruz ijnko ntachiso ntáchro kixin: "Ch'ín Jesús mé tí ch'ín Rey t'etueñhen tí sín judío."

³⁸ Kjaxin yaá tí síchee k'uejójáni sín ntacruz ijnko la nó tja chjina la í jnko la nó tja kjon. ³⁹ Ntá tí sín tinkátjía kja sín ⁴⁰ la ntáchro sín kixin:

—Jaha ntáchrúa kixin chrók'oxíka tí njnko a ntá iní koá yaon la ó chrókjuixin chrókjuích'éna inaá, ^{††} ichrua. Méxra ijie jahvá nchekaá asán. Tí chaxín jaha Xjeen Dios la jahvá tjasinkajinxían tí ntacruz méhe —ichro sín.

⁴¹ La ntá kjaxin tí sín nchat'á t'etōan la ko tí sín maestro tjako tí ley la ko tí sín fariseo la ko tí sín k'ueṭoan kuènte njnko kjuanoá sín ch'án, ikjo sín kichó sín kixin:

⁴² —Jehe ch'án mé kjuínchekaá ch'án ókjé chojni ntá jehe ch'án xitjahya sinchekaá asén ch'án. Kja tí chaxín jehe ch'án tí Rey kuènte Israel ntá jehó ch'án chrókjuinkajinxín ch'án asén ch'án tí ntacruz kixin ntá kjaxinni chrókuitekaonni tí jehe ch'án. ⁴³ Jehe ch'án tsintáchro ch'án kixin Dios tjinkítsa tí jehe ch'án la ntá tsotsjeheni á chaxin tjinkaon Dios sinchekaá tí jehe ch'án kixin tsintáchro ch'án kixin Xjeen Dios tí jehe ch'án —ichro sín.

⁴⁴ Kjaxin tí síchee sínkáni ntacruz k'uántaxínhin sín ch'án.

Ik'uéen ch'ín Jesús

(Mr. 15.33-41; Lc. 23.44-49; Jn. 19.28-30)

⁴⁵ Ntá chonkixin hasta las tres kónjin mé k'uíxin tie chjasintajni. ⁴⁶ Ntá tí hora a ch'ín Jesús itsen k'uèya ch'án, ntáchro ch'án kixin:

—Elí, Elí, ¿lama sabactani? —mé tíhi t'axrjéxin kixin: It'éni, It'éni, ¿nkekuènté kuitóhény? [‡] —mé xikaha ichro ch'án.

⁴⁷ Ntá iso sín tjejontaxín kuínhin sín ntá ntáchro sín kixin:

—Tí ch'ín a mé t'íyēhe tí ch'ín profeta Elías —ichro sín.

⁴⁸ Ntá ijnko ch'ín kuinká ch'án sákjuíakja ch'án ijnko ka ntá chr'ánkí ch'án xranvino isán ntá tí ka a kjuak'ek-jen ch'án ijnko nta kjinjin ntá kjuínchechriin ch'án kixin chrók'ui ch'ín Jesús.

⁴⁹ Ntá í so sín ntáchro sín kixin:

—Nté tjtóhé ch'án. Tsotsjeheni á tsi ch'ín Elías sinchekaá tí jehe ch'án —ichro sín.

⁵⁰ Ntá ch'ín Jesús itsen k'uíyato ch'án inaá, ntá kjuixin ik'uéen ch'án. ⁵¹ Mé ntá tuénxín k'uíchje tí ka tjenkákuēnxín nkaxenhen njnko. Mé k'uíchje tí ka k'ó-na yaá tí kjuankíxixín noi hasta nonte. La ko kuínkí nonte la ko tí tjo la kjaxin xitjehe. ⁵² La ko ó xitjehe tí tòye tsíxravá chojni la ko ó xechón itsjé tí sín k'uekinkáchónki Dios. ⁵³ Kaín tí sín a mé k'uaxrjéxin sín tí tòye, la tió kjuixin xechón ch'ín Jesús ntá k'uixenhen sín tí chjasin tjóá mé chjasin Jerusalén la ntaha itsjé chojni k'uíkon kixin xíxechón tí sín a.

† Salmo 22.18

†† Juan 2.19‡ Salmo 22.1

⁵⁴ Ntá tí ch'ín capitán la ko tí sín k'uéjoko ch'án, mé tí sín t'ayakonhen ch'ín Jesús, na ntá k'uíkon sín kuínki nonte la kaín tí í so nkehe la ntá imá chrakon sín, la ntáchro sín kixin:

—Chaxín tí nkexro a mé Xjeen Dios.

⁵⁵ Ntá ntiha nchónhya chojni chjin ikjín tjejó sín, tje-jótsjehe sín. Jehe sín k'uékinkáchréhe sín ch'ín Jesús tí kjuixín ch'án estado Galilea kixin mé ntiha kjuankixixín sín k'uékjinkitsa sín ch'án. ⁵⁶ Ntaha kjaxin tjen tjan María Magdalena la ko tjan María, iné tí ch'ín Jacobo, la ko ch'ín José la ko tí iné tí xjeen tí ch'ín Zebedeo.

Ntá xrává ch'ín Jesús

(Mr. 15.42-47; Lc. 23.50-56; Jn. 19.38-42)

⁵⁷ Ntá tí ó ntá kóntó ikui ijnko ch'ín it'in José, mé ijnko ch'ín rico. Chjasén ch'án mé Arimatea la jehe ch'án kjaxin k'uéchréhe ch'án tí ch'ín Jesús. ⁵⁸ Ntá tí ch'ín José sákjuítsjehe ch'án ch'ín Pilato kjuíkjanhia ch'án tí cuérpóe tí nkexro Jesús. Ntá ch'ín Pilato mé kjuanjon ch'án kjuachaxin. ⁵⁹ Ntá ch'ín José mé kuákja ch'án tí cuerpo ntá kjuínchek'isímá ch'án ijnko ka tjóá. ⁶⁰ Na ntá kjuak'enkaya ch'án ijnko tòye nixin kuènte ch'án kixin senó tsíkijich'ena ch'án. Ntá ijnko xro jie k'uíkjèxin ch'án tí ntója tí tjo, ntá kjuixin ntá sákjuí ch'án. ⁶¹ Ntaha kjuak'e tí tjan María Magdalena la ko í jnko tjan María tjejótxaxín sín ntoí chok'èxin tjen tòye.

Tí sín soldado k'uáyakonhen tí tòye xrává ch'ín Jesús

⁶² A ntá tí yaon ó kjuixin kjuasiyóxin sín nkehe kuènte tí yaon t'ok'éhe sín, la ntá tí sín nchat'á t'etóan la ko tí sín fariseo sákjuítsjehe sín tí ch'ín Pilato ⁶³ la ntá ntáchro sín kixin:

—Ó xraxinkaonni kixin tió naxa kjuak'echón tí nkexro kjuích'ia la tsintáchro ch'án kixin ts'atsínka iní yaon ntá tsoxechón ch'án inaá, tsíchro ch'án. ⁶⁴ Méxra tsétuèhén tí sín soldado kixin ts'ayakonhen sín tí tòye tsoxétjajia tí nixin yaon. Tí náhí, la kjá tie itsi tí sín k'uájiko ch'án la tsee sín tí cuerpo kuènte ch'án la ntá chr'éxin tsochénta sín chojni kixin ó xíxechón tí nkexro a, mé xikaha sich'ia sín. La ntá tí xikaha sich'e sín antsí má sich'ia sín que tí xrankixixín —mé xikaha ichro sín.

⁶⁵ Ntá ntáchro ch'ín Pilato kixin:

—Ntihi tjejó soldado. Sátsjirá la ts'ayakonhenrá jina tí tòye éxi tjinkáonrá —ichro ch'án.

⁶⁶ Na ntá sákjuí sín la kjuak'e sín ijnko sello chrítaón tí xro tjejkèxin tí tòye la kuítóhe sín tí sín soldado ntahó kixin ts'ayakonhen sín.

Ó xechón ch'ín Jesús

(Mr. 16.1-8; Lc. 24.1-12; Jn. 20.1-10)

28 Ntá ó k'uátsínka tí yaon t'ok'éhe sín. Ntá chjino t'inkaséyan tí yaon xrankixixín semana, la ntá tjan María Magdalena la ko tí í jnko tjan María sákjuítsjehe sín tí tsíkixravá Jesús. ² Ntá xrinahya kuínki nonte imá tjian kixin ijnko ángel kuènte Inchéni k'uínkajinxín nkaya nkajní la kjuíji ch'án tí tsíxravá Jesús la kjuakjiin ch'án tí xro a tjejkèxin tòye la ntá chrí-

taón tí xro a kjuak'ekjen ch'án. ³ Tí ángel la imá tjákiñi tsjehe éxi ijnko xrohi la tí iké ch'án la imá tjóá tsjehe éxi chrinta. ⁴ Tí sín soldado mé k'uíkon sín xikaha la ntá síxranká sín chrakon sín la éxi tsík'en sín xikaha k'uéjó sín. ⁵ La ntá tí ángel mé ntáche ch'án tí chojni chjin kixin:

—Chrakonhyará. Janhan ó nòna kixin xritjéyará tí nkexro Jesús mé tí nkexro tsíkjak'enkání ntacruz.

⁶ Kjánchó í kohya ch'án ntihi ó tsíxechón ch'án inaá éxi chrónka ch'án senó. Xrákirá tsjehérá tí tsíkjak'e sín ch'án, í kohya ch'án. ⁷ Ntá sátsjirá tjoka tjíchénkará tí sín k'uájiko ch'án kixin: “Tí nkexro la ó tsíxechón. Ó kuítónxin ch'án ntja sátsji ch'án estado Galilea. Ntiha ts'ikonrá ch'án”, mé xikaha tsochroñkará. Kaín tíha mé tjonkará —mé xikaha chrónka tí ch'ín ángel.

⁸ A ntá tí chojni chjin tjoka sákjuíxin sín tí tsíxravá tí nkexro Jesús, la chrakon sín la ko chéhe sín la sákjuíchénka sín tí sín k'uék'ajiko ch'ín Jesús. ⁹ Ntá xrinahya titàya k'uíkuèn sín kixin itjen tí ch'ín Jesús la nixjehe sín ch'án. Ntá kóchjinehe sín ch'án la kjóá sín toté ch'án, kuítekaon sín ch'án. ¹⁰ La ntáchro ch'án kixin:

—Chrakonhyará sátsjirá tjíchénkará tí sín kichó ni kixin sáchrókjui sín estado Galilea la ntaha ts'ikon sín tí janhan —mé xikaha ichro ch'ín Jesús.

Tí nkehe chrónka tí sín soldado

¹¹ Tió sátsíkji tí chojni chjin la nta iso tí sín soldado k'uáyakonhen tí tsíxravá ch'ín Jesús mé sákjuí sín chjasin Jerusalén la chénka sín tí nchat'á t'etóan kaín tí nkehe tsíkónhen tí k'uéjó sín ntiha. ¹² Ntá tí sín nchat'á t'etóan kjuínixjehe sín tí sín táda la ntá jnkokóá kjuenkayáxin sín ntá chjéhe sín nchónhya chichaon tí sín soldado. ¹³ La ntáchro sín kixin:

—Chroñkará kixin tí tie naxa tjejochrinrá ikui tí sín k'uék'ajiko tí nkexro Jesús, mé kueé sín cuerpo kuènte ch'án, ichrorá. ¹⁴ A ntá tí chrókónohe tí ch'ín gobernador tíha la ntá jeheni tsonixjeheñi ch'án kixin tsonínkakuanhyará ch'án —mé xikaha ichro tí sín nchat'á.

¹⁵ La ntá tí sín soldado k'uáyéhe sín tí chichaon la sákjuí sín la xikaha kjuích'e sín éxi k'uítuèhen sín. La mé xikaha chrónkaxín tí sín judío, la hasta tí yaon ijie la xikahó ichro sín, chrónkaxín sín.

Ch'ín Jesús k'uétuèhen ch'án tí sín k'uék'ajiko ch'án tí xra sich'e sín

(Mr. 16.14-18; Lc. 24.36-49; Jn. 20.19-23)

¹⁶ A ntá tí tejnko sín k'uék'ajiko ch'ín Jesús sákjuí sín ijnko jna estado Galilea kixin xikaha tsík'etóan ch'ín Jesús. ¹⁷ Ntá k'uíkon sín ch'ín Jesús la ntá kuínkáchónki sín ch'án kjónté iso sín naxa kjuenkayáxin á chaxín jehe ch'án o náhí. ¹⁸ Ntá ch'ín Jesús kóchjinehe tí jehe sín la ntáchro ch'án kixin:

—Dios mé chjina kaín xín kjuachaxin nkaya nkajní la ko chjasintajni. ¹⁹ Méxra sátsjirá kaín xín nación la tjákoherá chojni kixin tsitekaon sín tí janhan. Tikítexínrá sín kjuachaxièn ihnié It'èni la ko ihnié tí Xjeen la ko Nchakuèn Dios. ²⁰ Tjáhokherá sín kixin sinchexiteyá sín

kaín xín nkehe kuétuǵhanrá. Ijie la ó nohará kixin ts-
jak'é ts'ejokoará jnkochrín hasta tsjeje chjasintajni.
Mé xíkaha tsǵnhen. Amén —ichro ch'ín Jesús.

SAN MARCOS

Nteje mé kjuakoxin ch'ín Juan Bautista

(Mt. 3.1-12; Lc. 3.1-9, 15-17; Jn. 1.19-28)

1 Xjikihi mé xrankixixin tí tan jína kuènte Jesucristo mé tí Xjeen Dios.
² Ósé mé kjuák'e ch'ín Isaías mé ijnko nkexro tsíchr'án Dios chrónka itén ch'án k'uékjin ch'án nkexrí nixjehe Dios tí Xjeen ch'án ntáchro kixin: Janhan tsochr'an ijnko nkexro tsochrónka tan kuènta-na tsitónxin ntja, kixin tsjasiyóxin ch'án ntja kuèntá. †
³ Ntá tsinhin sín itén ijnko nkexro tsjak'e nteje ts'èya tsontáchro kixin: “Tóxakonhanrá ncheyóxinrá ntja tsixin Ìnchéni, takit-jehérá ijnko ntja ntoí.” ††
⁴ Tíha mé xíteyá ikui ch'ín Juan Bautista, mé xikaha kjuák'e ch'án nteje kujkíte ch'án chojni. Kjuakohé ch'án chojni ntiha kixin chrókjuinkí sín tí nkehe tjenkayáxin sín chrókuítóhe sín tí ijé sín ntá chrókuikite sín kixin xikaha mé chrókjuini ijé sín. ⁵ Itsjé chojni kujxin estado Judea la ko tí chjasin Jerusalén ikui sín tí kjuák'e ch'ín Juan kuínhin sín tí nkehe kjuako ch'án ntá chrónka sín tí jje yámá sín ntá ch'ín Juan mé kujkítexín sín ch'án ntárió Jordán.
⁶ Tí ké ch'ín Juan mé tsík'óna kaxrree kocamello la ko tí nkehe chr'ínkat'óxin ch'án mé tsík'óna tjoa. A ntá tí nkehe kjóne ch'án mé kochjoá la ko tsjen kotsjenta tónoxin nteje. ⁷ Mé kjuák'ekjakohé ch'án chojni ntáchro ch'án kixin:
 —Itón tí janhan mé tsichréhe ijnko nkexro antsí má chóna kjuachaxin, a ntá janhan la kánhyó. Méxra chrókósuàna chrókjuasintanká tí Correa tí tokaté ch'án. ⁸ Janhan mé ìntá ó kuíkítexínrá. Ntá jehe ch'án mé tsíkítexínrá ch'án tí Nchakuen Dios —ichro ch'ín Juan.

Ch'ín Juan kujkíte ch'án tí ch'ín Jesús

(Mt. 3.13-17; Lc. 3.21-22)

⁹ Ntá tí yaon a ch'ín Jesús, k'uaxrjexin ch'án chjasin Nazaret estado Galilea. Na ntá ch'ín Juan mé kujkítexín ch'án tí ntárió Jordán. ¹⁰ Tió k'uaxrjenkixin ch'ín Jesús tí ìntá, ntá xrinahya titàya k'uikuèn ch'án na ó xitjehe nkajní la ntá tí Nchakuen Dios éxí kontóá k'uínkajinxin ntiha ntá kjuák'e chrítaón kja ch'án. ¹¹ Ntá xrinahya kuínhin sín nixja Dios nkaya nkajní, ntáchro kixin:
 —Janhan mé xjanna imá tjuaha tí jaha. Imá chàna kixin nchexiteyàna tí jaha —mé xikaha kuínhin sín.

† Malaquías 3.1 †† Isaías 40.3

Ch'ín Tsochren chrókjuachroe tí ch'ín Jesús kixin chrókjuasin ch'án jje

(Mt. 4.1-11; Lc. 4.1-13)

¹² Ntá tí Nchakuen Dios mé sákjuíko tí ch'ín Jesús nteje. ¹³ Kjuák'e ch'án cuarenta yaon tí nteje la ko ntiha mé k'uixin ko jjehe ntá ch'ín Tsochren a na mé tjinkaon chrókjuachroe ch'án. La ntá tí sín ángel kui k'uàyakonhen tí jehe ch'án.

Ch'ín Jesús kjuankixixin kjuako ch'án estado Galilea

(Mt. 4.12-17; Lc. 4.14-15)

¹⁴ Kjuixin kjuák'echjina ch'ín Juan ntqechiso ntá ch'ín Jesús na mé sákjuí ch'án nó estado Galilea sákjuík-jakohé ch'án tí sín ntiha tí tan jína kuènte Dios. ¹⁵ Ntá ntáchro ch'án kixin:

—Ó kjuixraká tí yaon, la ó tsi tí kjuachaxin kuènte Dios ts'etqan ch'án. Chrókuítóhérá tí nkehe jínahya k'uékjenkayáxinrá a ntá chrókuítekáonrá tí tan tsaáxinrá —mé xikaha kjuako ch'ín Jesús.

Ch'ín Jesús k'uíyehé noó tí sín itsé koche

(Mt. 4.18-22; Lc. 5.1-11)

¹⁶ Ch'ín Jesús tjetji ch'án chrínta ntayaon Galilea ntá xrinahya k'uíkon ch'án tí ch'ín Simón la ko tí kichó ch'án mé it'in Andrés, mé koche xritsé sín, ntá tinkák'e sín tí nchísén chrínkí ntá. ¹⁷ Ntá ntáchro tí ch'ín Jesús kixin:

—Chréhérá tí janhan, ntá tsotjahará xra tsjéyará chojni —ichro ch'án.

¹⁸ Ntá tuénxín kuítóhe sín tí nchísén k'uétséya sín koche ntá sákjuíko sín ch'án.

¹⁹ Ntá kjinahya kjuíji ch'ín Jesús ntá k'uíkon ch'án tí yaá xjeen ch'ín Zebedeo. Ijnko mé it'in Jacobo. A ntá tí íjnko la mé it'in Juan. Jehe sín la ko tí it'é sín tjejóxehen sín tí ntabarcq tjejójtjónité sín tí nchísén tséya sín tí koche. ²⁰ Na ntá ch'ín Jesús mé k'uíyehé tí jehe sín kixin kjaxin tsochréhe sín ch'án. A ntá tuénxín kuítóhe sín tí it'é sín ch'ín Zebedeo kuítóeko ch'án tí ntabarcq la ko tí sín tjinkitsa ch'án ch'e xra. A ntá jehe sín sákjuíko sín ch'ín Jesús.

Ijnko chojni chóna ijnko nchakuen tí jínahya

(Lc. 4.31-37)

²¹ Ntá kjuíji sín tí chjasin it'in Capernaum. Na ntá tí yaon t'ok'éhe sín mé k'uixenhen ch'in Jesús tí njnko Israel. Na ntá ntaha mé kjuankixin ch'án kjuako ch'án.

²² A ntá tí chojni síin ntiha mé chrakon sín kuínhin sín tí

nkehe kjuako ch'án kixin kjuakoxin ch'án kixin chóna ch'án kjuachaxin, la jehya éxi tí sín maestro tjako tí ley, ichro sín. ²³ Ntá tí nínko Israel chjasin ntiha itjen ijnko chojni chóna ijnko nchakuen tí jínahya k'uíyato ntáchro kixin:

²⁴ —¿Nkekuènté tjiaté tí jeheni kaín ni? Jaha Jesús kjuixian Nazaret. ¿Á k'uinka kixin sinchek'itjáyanni? Janhan mé ó kjuátsqan tí jaha, la ko nòna kixin jaha tí nkexro tjóá kuènte Dios —mé xikaha ichro tí nchakuen tí jínahya.

²⁵ Ntá ch'ín Jesús mé k'uetuènenhén tí nchakuen tí jínahya ntáchro ch'án kixin:

—Tániá, t'axrjéxian tí jehe ch'án —mé xikaha ichro ch'ín Jesús.

²⁶ A ntá tí nchakuen tí jínahya mé kjuínchek'aniáte tí ch'ín a la ko k'uíyatoxin tsen ntá k'uaxrjéxín tí ch'ín a.

²⁷ A ntá kaín sín chrakon sín ntá kjuanchankíhi sín kichó sín, ntáchro sín kixin:

—¿Xá nkexro tíha kixin tjako ch'án nkehe nixin? Jehe ch'án chóna kjuachaxin kixin t'etuènenhén ch'án tí nchakuen tí jínahya la titekakonhen —mé xikaha ichro sín.

²⁸ A ntá imá tjoka k'uíxikónohe kaín xín sín estado Galilea kixin nkexrí tí kjuachaxin chóna tí ch'ín Jesús a.

Ch'ín Jesús kjuínchekitohe jína tí ich'ee tí ch'ín Simón Pedro

(Mt. 8.14-15; Lc. 4.38-39)

²⁹ Ntá tí ch'ín Jesús mé k'uaxrjéxín ch'án tí nínko, a ntá tuénxín sákjuiko ch'án ch'ín Jacobo la ko ch'ín Juan, sákjuí sín ntqè ch'ín Simón la ko ch'ín Andrés.

³⁰ Ntá tí ich'ee ch'ín Simón na tjetsínka tjan, níhi tjan kixin chóna tjan sóa. Ntá chénka sín tí ch'ín Jesús.

³¹ Ntá kóchjina ch'án tí tjetsínka tjan ntá itsé ch'án tjan tjan k'uínkatjen tjan. Ntá tuénxín kjuíinhin tjan tí sóa chóna tjan. Ntá kjuanjón tjan nkehe sine sín.

Ch'ín Jesús kjuínchekitohe jína nchónhaya chojni níhi

(Mt. 8.16-17; Lc. 4.40-41)

³² A ntá tió kjuíataón yaon tió k'uíxin tie kujkohe sín tí ch'ín Jesús kaín tí sín níhi la ko tí sín chóna nchakuen jínahya; ³³ na ntá kuenté chjasin kójnkotsé sín k'uíxintankí sín ntója tí nchia a. ³⁴ Ntá kjuínchekitohe ch'án jína kaín tí chojni níhi chóna nchónhaya clase chin la ko kuakitsje ch'án kaín tí nchakuen tí jínahya. Na í kjuanjónhaya ch'án kjuachaxin kixin tsonixja tí nchakuen tí jínahya kixin ó kjuátsqan tíha nkexro tí jehe ch'án.

Ch'ín Jesús mé kjuako ch'án estado Galilea

(Lc. 4.42-44)

³⁵ Ntá naxá sítié k'uàya ch'ín Jesús k'uaxrjéxín ch'án tí chjasin a sákjuí ch'án nteje kixin ntiha nixjeexín ch'án It'é ch'án tjan nkaya nkajíní. ³⁶ Ntá ch'ín Simón la ko tí sín xriko ch'án mé sákjuíkjejá sín ch'án. ³⁷ Ntá k'uitja sín ch'án ntá chénka sín kixin:

—Kaín sín xritjejá sín tí jaha —ichro sín.

³⁸ Ntá ntáchro ch'ín Jesús kixin:

—Sátsjini ókjé chjasin chjinaxón kixin ntaha kjaxin tsjákoḡa sín tí tan jína, kixin xikaha mé tí k'uaxrjéxian chjasin ntiha.

³⁹ Ntá nkuíxín estado Galilea sákjuí ch'án kuinkákjako ch'án jnkojnko nínko la ko kuakitsje ch'án tí nchakuen tí jínahya chóna sín.

Ch'ín Jesús kjuínchekitohe jína ijnko ch'ín chóna chinlepra

(Mt. 8.1-4; Lc. 5.12-16)

⁴⁰ Ntá kui ijnko ch'ín chóna chinlepra kjuák'exín toch'in ch'án nkayakon ch'ín Jesús ntá chrónóeḡe ch'án ntáchro ch'án kixin:

—Tí tjinkávan jaha la jína chrókjuínchekitohéni jína —ichro ch'án.

⁴¹ Ntá ch'ín Jesús na imá kujkonóeḡe ch'án tí ch'ín a na ntá kjuentoá tja ch'án kjuak'e tja ch'án chrítaón tí ch'ín níhi a ntá ntáchro ch'án kixin:

—Méxra xikaha tjínkavan. Ntá jie sintakitohá jína —ichro ch'án.

⁴² A ntá xikaha ntáchro ch'án ntá tuénxín kjuíin tí chinlepra ntá kuitohé ch'án jína. ⁴³ Ntá k'uetuènenhén ch'ín Jesús tí ch'ín a kixin tjoka sátsji ch'án, ntáchro ch'án kixin:

⁴⁴ —Ninkexró chenkahya ntihi; jehó sátsja tjákoḡé tí ch'ín nchát'á kixin ó kjuíinhan tí chinlepra la ko tjánjuan tí nkehe tsík'etqan ch'ín Moisés † kixin tsonoexín kaín xín chojni kixin ó kuitohá jína —ichro ch'án.

⁴⁵ A ntá tí ch'ín tsíkitohe jína, a ntá sákjuí ch'án kjuankíxín ch'án chénka ch'án kaín xín chojni kixin nkexrí kuitohé ch'án jína. Méxra xitjahya ts'ixenhen ch'ín Jesús noxín nijnko chjasin na ntá k'uaxrjenta ch'án tí kohya chojni. Ntá kjónté la kjuitsjehe sín ch'án kjuixín sín nkuíxín chjasin.

Ch'ín Jesús mé kjuínchekitohe jína ijnko chojni tsík'en toté

(Mt. 9.1-8; Lc. 5.17-26)

2 Ntá ó k'uátsínka iso yaon ntá ch'ín Jesús mé xíkjan ch'án chjasin Capernaum. Ntá k'uíxikónohe chojni kixin ijnko nchia ntiha kjuák'e ch'án. ² Ntá tuénxín nchónhaya chojni kóchjina ntá kjuachahya tí nchia k'uíxixenhen sín la ko kjaxin kjuachahya tí ntója nchia chrók'uíxintankí sín. A ntá ch'ín Jesús kjuako tí tan jína kuènte Dios. ³ Ntá kui noó sín tinkátsénkí sín ijnko ch'ín tsík'en toté ch'án. ⁴ Kjánchó xitjahya kóchjina sín tí tjan ch'ín Jesús kixin nchónhaya chojni síin. La ntá k'ujt'ótjen sín tí chrítaón nchia a ntá k'óxrat'q sín. Na ntá ijnko hno kjuak'ete sín tí kania tjenkáya tí sín-níhi a ntá kjuinkajin sín ntoí tí tjan ch'ín Jesús a. ⁵ Tió k'uíkon ch'ín Jesús tí nkehe kjuíich'e sín ntá ó nohe ch'án kixin chaxín imá tinkáchónki sín tí jehe ch'án. Ntá nixjeḡe ch'án tí sín-níhi ntáche ch'án kixin:

—Xjeenni, ó kjuixín kjuíinhan tí jie chonta —mé xikaha ichro ch'án.

⁶ Na ntá iso tí sín maestro tjako tí ley tjejótjaxín sín ntiha na ntá jehó sín mé kjo sín asén sín kixin:

† Levítico 14.1-32

⁷ “¿Nkekuènté xikaha nixja tí ch'ín i ncheyóhē ch'án ǎsén ch'án Dios? Kíxín ninkexró xitjahya tsjatsiín ijie kíxín jehó Dios mé chónṭa kjuachaxin tsjatsen ijie chojni”, mé xikaha ikjo sín ǎsén sín. ⁸ Ntá ch'ín Jesús la ó nohe ch'án nkehe tjenkayáxin sín. Ntá ntáchro ch'án kíxín:

—¿Nkekuènté kíxín xikaha tjenkayáxinrá? ⁹ ¿Nkehe ǎntsí má xrahya chróntátjan ch'án? ¿Á ǎntsí xrahya chróntátjan ch'án kíxín ó kjuixin kjuíinhin ch'án tí jie yámá ch'án, ǒ á ǎntsí xrahya chróntátjan ch'án kíxín chrók'uinkatjen ch'án chrókjuenájin ch'án kaniēe ch'án ntá sáchrókjuí ch'án? ¹⁰ Méxra jie tsjákoxián kíxín tí Xjeen Dios K'óna Chojni mé ntihi chjasintajni chónṭa kjuachaxin tsjakjiinhin ijie chojni —ichro ch'án.

Ntá ntáche ch'án tí ch'ín xitjahya tji kíxín:

¹¹ —Jaha tétuanhan t'inkatjen, tjenájían kaniāa na sátjia ntōa —ichro ch'án.

¹² Á ntá tí sǐnníhi na tuénxín k'uínkatjen ch'án kjuák'exín toté ch'án na kjuenájin ch'án kaniēe ch'án na kuámá ch'án k'uaxrxjén ch'án nchia sákjuí ch'án. Na ntá kaín tí sín sǐín a tsjehe sín nkexrí kónhen na chrakon sín la ko kjuanchehe sín Dios kjuasáyé. Ntá ntáchro sín kíxín:

—K'uíkonhyéni tí nkehe i —ichro sín.

Ch'ín Jesús k'uíyehē ch'ín Leví

(Mt. 9.9-13; Lc. 5.27-32)

¹³ Á ntá chr'éxin ch'ín Jesús mé sáxíkji ch'án inaá chrínta ntayaon. Ntá kaín xín chojni kóchjina sín tí tjen ch'án ntá kjuako ch'án. ¹⁴ Ntá k'uátsínka ch'án k'uíkon ch'án tí ch'ín Leví xjeen ch'ín Alfeo tjetjāxin ch'án tjenchekjènkj ch'án. Ntá ch'ín Jesús mé k'uíyehē ch'án, ntáchro ch'án kíxín:

—Chr'éhé tí janhan —ichro ch'án.

Ntá ch'ín Leví mé tuénxín k'uínkatjen ch'án chréhe ch'án tí ch'ín Jesús.

¹⁵ Á ntá ch'ín Jesús kjuák'e ch'án ntōe tí ch'ín Leví, la ntá kjuanjon sín nkehe sine ch'án la ko kjaxin k'uéjé nchónhya tí sín nchekjènkj la ko kjaxin í so chojni chónṭa jie. Mé kaín tí sín a mé tjejótxāxin sín tjejóneko tí ch'ín Jesús la ko tí sín k'uájiko ch'án, kíxín nchónhya chojni chréhe sín tí jehe ch'án. ¹⁶ Na ntá tí sín maestro tjako tí ley la ko tí sín fariseo k'uíkon sín kíxín ch'ín Jesús tjejóneko kaín ti sín nchekjènkj la ko tí í so sín chónṭa jie, ǎ ntá ntáche sín tí sín k'uájiko ch'án kíxín:

—¿Nkekuènté kíxín tí maestro kuèntará neko ch'án la ko t'ikāo ch'án tí sín nchekjènkj la ko tí í so sín chónṭa jie? —ichro sín.

¹⁷ Na ntá ch'ín Jesús kuínhin ch'án nkehe tí tjo sín a. Ntá nixjehē ch'án tí sín a ntáchro ch'án kíxín:

—Tí sín níehya t'ichjánxienhya sín nkexro sich'e xroān. Náhí. Jehó tí sín níhi mé t'ichjánxīnhin sín nkexro sich'ehe sín xroān. Janhan na k'uinkahya ntihi kíxín chrók'uíyahā chojni jína tjejó sín. Náhí. K'uinka kíxín ts'iyahā chojni chónṭa jie —ichro ch'án.

Tjanchankíhi sín tí ch'ín Jesús kíxín á chrókjónehya sín tió tsonixjehē sín Dios

(Mt. 9.14-17; Lc. 5.33-39)

¹⁸ Ijnko yaon na mé kaín xín tí sín k'uék'ajiko ch'ín Juan Bautista la ko tí sín fariseo a mé kjónehya sín kuenté yaon kíxín mé xikaha ts'áyehē sín kjuaxróxin, ichro sín. A ntá kui iso chojni nixjehē sín tí ch'ín Jesús ntáchro sín kíxín:

—¿Nkekuènté kíxín tí sín k'uék'ajiko sín tí ch'ín Juan la ko tí sín fariseo la nehya sín jie, ǎ ntá tí sín xrikoa la ine sín? —ichro sín.

¹⁹ Ntá kjuátehe ch'ín Jesús ntáchro ch'án kíxín:

—¿Xá chrókjónehya tí chojni tsík'íyehē sín kóchjina ijnko kia tsotēhe chojni tí naxā tjejóko sín tí nkexro tsotēhe? Tí naxā tjen tí nkexro tsotēhe la xitjahya kíxín chrókjónehya sín. ²⁰ Á ntá itsi ijnko yaon itsi chojni sátsjiko sín tí ch'ín tsíkótēhe, ntá tí yaon la chaxín sinehya sín.

²¹ 'Ninkexró chrókjuak'eniēhe ijnko ka ó ntaxin it'ō ka nixin kíxín ntá chrókjuixéhe tí ka nixin ntá ǎntsí má chrók'uichje tí ka ntaxin a. ²² La ko kjaxin ninkexró chrókuiqia xran vino nixin ijnko tjuaxran ó ntaxin; kíxín tí xran vino nixin la chrókótséchje tí tjuaxran ntaxin ntá chrók'uitjāyan tí xran la ko tí tjoā. Méxra tí xran vino nixin chrókuikia ijnko tjuaxran nixin —mé xikaha ichro ch'ín Jesús.

Tí sín k'uájiko ch'ín Jesús mé ik'uín sín iso neno noatriggo ijnko yaon t'ok'éhe sín

(Mt. 12.1-8; Lc. 6.1-5)

²³ Ijnko yaon t'ok'éhe sín na ch'ín Jesús la ko tí sín k'uájiko ch'án mé k'uátsínka sín ijnko nonte sǐín noatriggo. Na ntá tí sín k'uájiko ch'án kjuankíxín sín ik'uín sín iso noatriggo. ²⁴ Na ntá iso tí sín fariseo kjuanchankíhi sín tí ch'ín Jesús a kíxín:

—¿Nkekuènté kíxín tí sín xrikoa tjejóch'e sín xra ijie? Na mé kohya kjuachaxin tsonhen xra tí yaon t'ok'éheni —ichro sín.

²⁵ Ntá kjuátehe ch'án ntáchro ch'án kíxín:

—¿Á kjuinchekuáxinhyará jahará tí xroon chrónka nkehe kjuích'e ch'ín David la ko tí sín k'uájiko ch'án tí k'uén sín kjinta? ²⁶ A ntá jehe ch'án k'uixenhen ch'án ntōe Dios tió kjuák'e nchat'á Abiatar k'uētoan, ǎ ntá kjóne ch'án tí niotjā tsíkóyaon kjónté jehó tí sín nchat'á mé k'uéchónṭa kjuachaxin sine sín la kjaxin chjéhe ch'án tí sín k'uájiko ch'án † —ichro ch'ín Jesús.

²⁷ Kjaxin ntáchro ch'ín Jesús kíxín:

—K'óna tí yaon ts'ok'éhe chojni kíxín t'ichjánxin sín, la jehya kíxín chrókjuikosáyehe tí yaon a. ²⁸ Á ntá tí Xjeen Dios K'óna Chojni mé chónṭa kjuachaxin ts'e-toan nkehe tsonhen tí yaon t'ok'éheni —ichro ch'án.

† 1 Samuel 21.1-6; Levítico 24.5-9

Ijnko chojni tsíxámá tja

(Mt. 12.9-14; Lc. 6.6-11)

3 Ntá ch'ín Jesús k'uixenhen ch'án injko njnko Israel inaá. Na mé ntiha tjen injko ch'ín tsíxámá injko tja ch'án. ² Na ntá kóchjina iso chojni tsáyehe sín ch'ín Jesús ts'ikon sín kixin á sinchekitohe ch'án jína tí ch'ín tsíxámá tja tí yaon t'ok'éhe sín kixin mé jína ts-janchia sín jię, ichro sín. ³ Ntá ch'ín Jesús mé ntáche ch'án tí ch'ín tsíxámá tja a kixin:

—T'inkatjen, tjak'e jnkosiné ntihi —ichro ch'án.

⁴ A ntá kjuanchankíhi ch'ín Jesús tí sín siín ntiha kixin:

—¿Nkehe siín kjuachaxin tsonhen tí yaon t'ok'éheni? ¿Á chrókjuich'eni tí jína ní o á chrókjuich'eni tí jínahya? ¿Á chrókjuinchekitohe chojni jína ní o á chrók'óyánni chojni? —ichro ch'án.

A ntá jehe sín la táníkoá sín. ⁵ Na ntá ch'ín Jesús la nínkaon ch'án komá ch'án tí jehe sín la ko t'ává ch'án kixin tjinkakonhya sín tsíkonóhehe sín chojni. Na ntá k'uetuenhen ch'án tí ch'ín a kixin:

—Tjéntoá tjá —ichro ch'án.

A ntá kjuéntoá ch'án tja ch'án la ó kuítóhe tja ch'án jína. ⁶ Na ntá tí sín fariseo a k'uaxrjexín sín njnko sákjuí sín k'uíto sín tí sín kuénte ch'ín Herodes ntá kjuenkayáxinko kichó sín kixin nkexrí chrók'óyán sín tí ch'ín Jesús.

Nchónhya chojni siín chrínta ntayaon

⁷ Ntá ch'ín Jesús la ko tí sín k'uájiko ch'án sákjuí sín chrínta ntayaon a. A ntá nchónhya chojni kjuíjichréhe sín tsíkixín sín nó estado Galilea la ko kjaxin tsíkixín sín nó estado Judea ⁸ la ko chjasin Jerusalén la ko estado Idumea la ko ikjé sín kuixín sín nó tóhe ntarío Jordán la ko iso sín tsíkixín sín nó chjasin Tiro la ko nó chjasin Sidón. Na mé kaín sín tsíkinhin sín kixin nkexrí tí kjuaxroan jié kjuasin ch'ín Jesús ntá kuichréhe sín ch'án kixin chrók'uíkon sín tíha kjaxin. ⁹ Ntá k'uetuenhen ch'án tí sín k'uájiko ch'án a kixin ntabó chrókjuak'echonhen sín injko ntabárcō. A ntá tí imá chrók'uíxítja sín ch'án ntá chrók'uíxenhen ch'án tí ntabárcō, a ntá ntiha chrókjuak'e ch'án tsochrónka ch'án. ¹⁰ Kixin itsjé chojni tsíkjinchekitohe ch'án jína, na ntá kaín xín tí sín níhi k'uíxítja sín ch'án kixin tjinkaon sín chrókuákóxin sín ch'án. ¹¹ Kjaxin tí sín chóna nchakuen tí jínahya na mé tió k'uíkon sín tí ch'ín Jesús ntá k'uéjoxín sín toh'in sín nkayakon ch'án. Ntá k'óyako tí nchakuen tí jínahya a ntáchro kixin:

—Jaha mé tí Xjeen Dios.

¹² A ntá ch'ín Jesús ntáche ch'án tí nchakuen tí jínahya kixin kohya kjuachaxin tsochrónka kixin nkexro tí jehe ch'án.

Ch'ín Jesús kjueyá ch'án teyó sín ts'ajiko ch'án

(Mt. 10.1-4; Lc. 6.12-16)

¹³ A ntá chr'éxin chriin ch'ín Jesús injko jna, a ntá ntiha k'uíyehe ch'án tí sín tjinkaon ch'án chrók'uajiko ch'án ntá kóchjinehe sín ch'án. ¹⁴ Ntá kjueyá ch'án teyó

tí sín ts'ajiko ch'án kixin ts'etuenhen ch'án sín sátsji sín tsjako sín tí tan jína. ¹⁵ Kjuanjon ch'án kjuachaxin sinchekitohe sín chojni níhi jína la ko tsakitsje sín nchakuen tí jínahya chóna chojni. ¹⁶ A ntá tí sín i mé tí teyó sín tsíkjeýá ch'án mé it'in sín xíkíhi: Simón na mé kjuínchek'in ch'án Pedro; ¹⁷ la ko Jacobo la ko tí kicho ch'án Juan mé xjeen ch'ín Zebedeo. Kjaxin kjuínchek'in ch'án sín Boanerges mé t'axrjexín kixin Xjeen Sítjonta. ¹⁸ La ko Andrés la ko Felipe la ko Bartolomé la ko Mateo la ko Tomás la ko Jacobo, it'é mé it'in Alfeo, la ko Tadeo la ko íjnko Simón tíhi mé kuénte tí sín cananista, ¹⁹ la ko Judas Iscariote, mé kjuínchekji tí ch'ín Jesús chr'éxin.

Ntáchro sín kixin ch'ín Jesús chóna kjuachaxin kuénte tí jínahya

(Mt. 12.22-32; Lc. 11.14-23; 12.10)

Na ntá chr'éxin ch'ín Jesús la ko tí sín k'uájiko ch'án k'uíxenhen sín injko nchia. ²⁰ A ntá inaá kójnkotsé nchónhya chojni, a ntá xitjahya sine sín. ²¹ Ntá kónohe tí sín naxa kjéhya ch'ín Jesús ntá ikui sín sátsjiko sín ch'án kixin ntáchro sín kixin ó tsík'ixikján ch'án.

²² Kjaxin tí sín tjako ti ley kuixín sín Jerusalén, ntáchro sín kixin:

—Tí ch'ín i chóna ch'án tí ch'ín Beelzebú, mé ch'ín Tsochren, mé tí nkexro t'etuenhen kaín tí nchakuen tí jínahya ntá xíkaha tjacha ch'án takitsje ch'án nchakuen tí jínahya a —ichro sín.

²³ Ntá ch'ín Jesús k'uíyehe ch'án tí sín ntá kjuíncheyóexin ch'án ntáchro ch'án kixin:

—¿Nkexrí kixin jnkokón ch'ín Tsochren chrókuakitsje asén? ²⁴ A ntá tí sín t'etōan injko nación tjanjonko kichó la tsjachahya ts'etōan. ²⁵ La ko kjaxin tí sín jnkokoá ntōe jnkokoáhya tjenkayáxin sín ntá xitjahya ts'ejóko kichó sín. ²⁶ A ntá tí chaxín ch'ín Tsochren jnkokónhya tjenkayáxin tjanjonko kichó la ntá ts'itjāyan kjuachaxin kuénte.

²⁷ Ninkexró tsjacha ts'ixenhen ntōe injko chojni jięhe kixin ts'axrjehe tí nkehe chóna ch'án. Náhí. T'ichjánx-ín saoxín sinchenteto ch'án tí ch'ín jięhe kixin jína tseéhe ch'án nkehe chóna tí ch'ín a.

²⁸ Tjnko nkehe chaxín tsōtjonkará kixin tió tsoxraxinkaon injko chojni tí jię chóna la ko tsochronóhehe Dios la ntá tsjakjinhin ch'án kaín tí jię la ko kaín tí nkehe jínahya tsintáchro sín. ²⁹ A ntá tí nkexro ts'ántaxinhin tí Nchakuen Dios na mé xitjahya tsjiin tí jię na mé jnkochrín tsochóna sín tí jię a —ichro ch'án.

³⁰ Mé xíkaha ichro ch'án kixin tí sín a tsintáchro sín kixin injko nchakuen tí jínahya mé chóna tí jehe ch'án.

Tí iné la ko kichó ch'ín Jesús

(Mt. 12.46-50; Lc. 8.19-21)

³¹ A ntá kui iné ch'ín Jesús la ko kichó ch'án tjejó sín ntója ó na ntá k'uetuenhen sín injko chojni tsjik'íyehe ch'án. ³² A ntá tí sín tjejótjāxin tí tjen ch'ín Jesús ntiha chénka sín ch'án kixin:

—Ína la ko kichuá tjejó sín ntója xritjeyá sín ti jaha. —ichro sín.

³³ Ntá ntáchro ch'án kixin:

—¿Xá nkexro tí nana la ko nkexro tí kichiná? —ichro ch'án.

³⁴ Ntá komá ch'án tí chojni tjejójtjəxín tí tjen ch'án ntá ntáchro ch'án kixin:

—Jahará mé nana la ko kichiná. ³⁵ Kaín tí sín nchexiteyá tí nkehe tjinkaon Dios na mé tí sín a mé kichiná la ko nana —ichro ch'án.

Kjuíncheyóəxin ch'án éxi ijnko chojni t'enka nonte

(Mt. 13.1-9; Lc. 8.4-8)

4 Ch'ín Jesús mé kjuankíxin ch'án kjuəkoəxín ch'án chrínta ntəyaon ínaa. A ntá ntiha mé kójnkotsé nchónhya chojni tí tjen ch'án. Ntá ijnko ntabárcə tjenkátaón ntə k'uit'ótjen ch'án, ə ntá ntaha kjuák'e ch'án kjuəkoəxín ch'án. Ntá kaín tí sín tsíkójnkotsé mé kuitəhe sín chrínta ntəyaon k'uejókinhin sín. ² Nchónhya nkehe kjuako ch'án kjuíncheyóəxin ch'án. Ntá ntáchro ch'án kixin:

³ —Tinhínrá tíhi: Ijnko chojni sákjuík'enka nontəe.

⁴ Mé xikaha sákjuík'enka ch'án iso tí noatrigo a. Ntá iso noa la tsík'ánótjen ntə ntá kui koxroxé k'uínka va tí noa. ⁵ A ntá iso noa na mé k'uitji chrík'á xro tí kohya it-sjé nche ntá tjoka k'uayan kixin tjínhya chóna nche.

⁶ A ntá tió kjuítəon yəon la ntá tí ka la chján; la ko chón-tahya nuèe ə ntá xamá. ⁷ A ntá í so noa kjuítsínkak'á tí síin kach'í la ntá tí kach'í k'uánkí la ntá tí noa í k'ónahya kixin sítja tí kach'í. ⁸ A ntá íso tí noa k'uitji nche jína la ntá k'uayan la ko k'uánkí ntəto la ko k'óna jína. A ntá ijnko noa la mé k'óna treinta neno noa. A ntá í jnko la mé k'óna sesenta neno noa, ə ntá í jnko la k'óna ijnko ciento neno noa —ichro ch'án.

⁹ Ntá ntáchro ch'án kixin:

—Tí nkexro tjinkaon chrókuinhin la chrókuinhin —ichro ch'án.

Ch'ín Jesús chonkaxín nkexrí t'axrjexín tí nkehe ntáchro ch'án

(Mt. 13.10-17; Lc. 8.9-10)

¹⁰ A ntá chr'éxin, tió kuitəhe ch'ín Jesús jehó ch'án, ə ntá tí sín tjejó chjinaxón tí tjen ch'án la ko tí teyó sín k'uájiko ch'án mé kjuanchankíhi sín ch'án kixin nkexrí t'axrjexín tí nkehe kjuíncheyóəxin ch'án. ¹¹ Ntá ntáchro ch'án kixin:

—A ntá jahará la Dios mé sintanohará tí nkehe tienxínhya chojni kuente tí kjuachaxin kuente Dios, ə ntá tí sín titekakonhya la ó kjuíntayóəxuán kaín nkehe kuínhin sín. ¹² Kixin kjónté ts'ikon sín la éxi k'uíkonhya sín, la ko kjónté tsinhin sín la tsienxínhya sín kixin ntá chrók'uíxítəxínhya tí tjenkəyáxin sín a la ko chrókjuíin-hya tí íjíé sín † —ichro ch'án.

Ch'ín Jesús chrónkaxín nkexrí t'axrjexín tí nkexro sákjuík'enka

(Mt. 13.18-23; Lc. 8.11-15)

¹³ Ntá ntáche ch'án sín kixin:

—¿Á kiénxinhya jahará nkexrí t'axrjexín tí nkehe kjuíntayóəxian ní? ¿A ntá nkexrí chrókiénxinrá tí í so nkehe naxə sítayóəxian? ¹⁴ A ntá tí nkexro sákjuík'enka tí tje a mé yóhe ijnko nkexro sákjuík'jako itén Dios. ¹⁵ A ntá iso chojni la éxi tí tje kjuítsínka ntə; kixin kuínhin sín itén Dios, ntá chr'éxin ó kui ch'ín Tsochren kjuínchek'itjəyan ch'án tí tan jína kuínhin sín. ¹⁶ A ntá í so chojni la éxi yóhe tí tje kjuítsínkak'á xro: mé kuínhin sín itén Dios ntá tjoka kóxrjínhin sín kuitəkaon sín. ¹⁷ Kjánchó njnkahya chóna nuèe, ə ntá séhya kuitəhe; ə ntá itsi tí kjuaxróxinhya tsənhen sín, ə tsochónkíhi sín chojni kixin tí itén Dios kuitəkaon sín ntá tsítəhe sín tí tinkáchónki sín Dios. ¹⁸ A ntá í so chojni la éxi yóhe tí tje k'uínka chrík'á kach'í na mé kuínhin sín itén Dios ¹⁹ kjánchó tóxakonhen sín tí nkehe síin chjasintajni la ko tí nkehe tjetə tóxrjínhin sín la ko tjinkaon sín tsochóna sín kaín xín nkehe. Kaín tíha mé t'ínkəkonhen tí itén Dios kuínhin sín a, la tí chojni xikaha la xitjahya sich'ehe sín xra Dios. ²⁰ A ntá í so chojni kuínhin tí itén Dios na kuínkáchónki sín la ntá xikaha jína ch'ehe sín Dios xra. La iso sín la éxi yóhe tí tje k'uínka tí nonte jína k'óna treinta neno noa la ko iso sín la yóhe tí tje k'óna sesenta neno noa la ko iso sín la yóhe tí tje k'óna ciento neno noa —mé xikaha ichro ch'ín Jesús.

Ch'ín Jesús mé kjuíncheyóəxin éxi ijnko xrohi tjeche

(Lc. 8.16-18)

²¹ Kjaxin ntáchro ch'ín Jesús kixin:

—¿Á chrókjuíkəonni xrohi tjeche chrókjuak'emá chrínkí ntacajón ə chrínkí cama? Kjá náhi. Tí xrohi la noi chrókjuak'e ts'inkaséyanxín. ²² Mé xikaha kaín tí nkehe tjejó má jie tsənoxín chr'éxin la ko kaín tí nkehe ninkexró noehya jie la tsənoxín chr'éxin. ²³ A ntá tí nkexro tjinkaon chrókuinhin la chrókuinhin tíhi —ichro ch'án.

²⁴ Kjaxin ntáchro ch'án kixin:

—Chrókjuenkəyáxinrá jína tí nkehe tjejótinhinrá. Tí nkehe tjáchoayará jahará la Dios la kjaxin tíha tsjáchoayá ch'án tí nkehe ts'ayéhérahá jahará, ə ntá antsí má ts'ayéhérahá tí jahará tjejontinhinrá. ²⁵ A ntá tí nkexro chóna nkehe la antsí má ts'ayéhe sín. A ntá tí nkexro chónahya la kjónté tí ntsí chóna la ts'axrjehe —ichro ch'án.

Ch'ín Jesús mé kjuíncheyóəxin ch'án éxi ijnko tje ts'ayan ts'ánkí

²⁶ Kjaxin ntáchro ch'ín Jesús kixin:

—Tí kjuachaxin t'ətoan Dios tóyóhe ijnko chojni sát-sjik'enka nonte. ²⁷ Ntá sákjuík'ajua ch'án tí tie la ko k'uàya ch'án tí nchítjen. A ntá xikahó k'uátsínka iso yəon la ko iso tie, ə ntá tí tje la k'uayan la k'uánkí. A

† *Isaiás 6.9-10*

ntá tí nkexro k'uęnką la noehya ch'án nkexrí kónhen tíha. ²⁸ A ntá tí nche mé kjuích'e xrą jehó. Senó k'uayan tí chaon tí ka, ą ntá kjuıntą, ą ntá chr'ęxin ichta tí noa tsjinjin; ²⁹ ą ntá tió tsícha tí noa, ą ntá tsakjinjin sín tí noa kixin ó kjuixraká tí yąon tsotjá sín.

Ch'ín Jesús kjuíncheyóęxin ch'án éxí ijnko tje it'in mostaza

(Mt. 13.31-32; Lc. 13.18-19)

³⁰ Kjąxin ntáchro ch'ín Jesús kixin:

—¿Nkehe chrókóyóęhę tí kjuachaxin t'ęęan Dios, nkehe chrókóyóęxin tíha? ³¹ Mé éxí yóęhę tí tje it'in mostaza tsík'inka nonte. Tíha mé ijnko tje imá ntsí, ą ntá tí í so tje siín chjasintajni la kénhyó. ³² A ntá jnkonaá tsík'inka tí tje la tsík'ayan tsík'ánkí imá ihyé, ą ntá tí í so nta la kánhyó. A ntá kjąxin tí chaon tí nta tsík'ánkí imá ihyé, ą ntá kjónté koxroxę xritjaka la jína ts'ok'éhe va chrínkí tí ts'van chaon tí nta.

Nkehe tí xrą kjuích'e tí nkehe kjuíncheyóęxin ch'ín Jesús

(Mt. 13.34-35)

³³ Mé xikaha ch'ín Jesús kjuąkóęhę ch'án tí jehe sín, kjuíncheyóęxin ch'án nchónhya nkehe éxí tí nkehe a kixin chrókjuacha chrókienxín sín tíha. ³⁴ Kaínxín nkehe kjuąkóęhę ch'án tí jehe sín la kjuíncheyóęxin ch'án. A ntá jehó tí sín k'uájiko ch'án la chrónka ch'án nkexrí t'axrxjxín kaín tí nkehe kjuíncheyóęxin ch'án.

Ch'ín Jesús k'ųętuęnhen ch'án tí xrįnto la ko tí ntą síchrica kixin ts'ixita

(Mt. 8.23-27; Lc. 8.22-25)

³⁵ A ntá tí yąon a la ntá ó kóntó ntá ntáche ch'ín Jesús tí sín k'uájiko ch'án a kixin:

—Sátsjini tóhe tí ntąyaon —ichro ch'án.

³⁶ Ntá kuítóęhę sín kaín tí chojni a ntá sákjuiko sín tí ch'ín Jesús nąxą tjenkáya ch'án tí ntabárcę la ko kjąxin í so ntabárcę sákjuí koí. ³⁷ Ntá xrínąhya tjiąn chjéhe xrįnto la ntá síchrica ntą t'ixenhen tí ntabárcę, ó mero tsokaón ntą tí ntabárcę. ³⁸ A ntá ch'ín Jesús na mé tjejua ch'án tí tjar'i nóton tí tjejó sín nkaxenhen tí ntabárcę a tjejkón ch'án ijnko ka. Na ntá kjuínchekjąya sín ch'án ntáchro sín kixin:

—¡Maestro! ¿Á ntąsán kixin ts'itjáyanni, ts'aniánkíni ntą ní? —ichro sín.

³⁹ A ntá ch'ín Jesús k'uąya ch'án, k'ųętuęnhen ch'án tí xrįnto la ko tí ntą kixin ts'ixita, ntáchro ch'án kixin:

—Tániá, tjak'eta —ichro ch'án.

Na ntá tí xrįnto la ko tí ntą k'uíxratá. ⁴⁰ Ntá kjuanchankíhi ch'án tí sín k'uájiko ch'án ntáchro ch'án kixin:

—¿Nkekuénté kixin imá chrakonrá? ¿Á nąxą tin-kachónkihyará Dios? —ichro ch'án.

⁴¹ Ntá imá chrakon sín ntá kjo sín kíchó sín kixin:

—¿Xá nkexro tíhi? Kjónté xrįnto la ko ntąyaon la mé kjuínchexiteyęhę ch'án —ichro sín.

Ijnko chojni chóntha nchónhya nchąkuen tí jínahya nonte Gadara

(Mt. 8.28-34; Lc. 8.26-39)

5 Ntá tió k'uátóyę sín tí ntąyaon, ą ntá kjuíji sín tí nonte Gadara. ² Ntá k'uínkajinxín ch'ín Jesús tí ntabárcę a. Ntá xrínąhya xeta ch'án ijnko ch'ín kujxin nó tsíkjixravá chojni mé chóntha ch'án ijnko nchąkuen tí jínahya. ³ Tí ch'ín a mé kjuák'e ch'án tí tsíkjixravá chojni. Ninkexró tjachahya sinchenteto ch'án kjónté cadena tjachahya. ⁴ Nchónhya veces kjuínchentetoxín sín ch'án cadena toté ch'án la ko itja ch'án, la kjónté kóchrítõn ch'án kjuínchekuen ch'án tí cadena. Kohya ninkexro tjacha ts'ętuęnhen tí jehe ch'án. ⁵ K'uék'aji ch'án nchąkotjin la ko tie t'lyato ch'án nó jną la ko tí tsíkjixravá chojni la ko chjéhe ąsén ch'án xrę. ⁶ Na ntá k'uíkon ch'án kixin kui ch'ín Jesús kjónté ikjín la kuinká ch'án kjuíji ch'án kjuák'exín toch'in ch'án nkayakon ch'ín Jesús a ⁷ k'óyako ch'án ntáchro ch'án kixin:

—¿Nkekuénté tjiaté jaha tí jeheni, jaha Jesús Xjeęn Dios tjen nkaya nkajni? Dios nchenoheni kixin xrjanóąha nchekjasótehyani —ichro ch'án.

⁸ Mé xikaha ichro ch'án kixin tsíntáchro ch'ín Jesús kixin:

—Jaha nchąkuen tí jínahya, tjtóhé tí ch'ín i —ichro ch'án.

⁹ Ntá ch'ín Jesús mé kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátęhe ch'án ntáchro ch'án kixin:

—Legión mé it'inni kixin nchónhyani —ichro ch'án.

¹⁰ Ntá imá chrónóęhę ch'án tí ch'ín Jesús kixin tsochr'ánhya ch'án ókjé tí nchąkuen tí jínahya. ¹¹ Na ntá siín nchónhya cochíno xrine va chjinaxón tí jną ntiha. ¹² A ntá chrónõą tí nchąkuen tí jínahya ntáchro kixin:

—Tętuęnhęnni sátsjini tí siín tí cochíno, tjtóhé ts'ixen-henni tí jehe va —ichro tí nchąkuen tí jínahya a.

¹³ Ntá ch'ín Jesús mé kjuanjõn ch'án kjuachaxin. Ntá kaín xín tí nchąkuen tí jínahya a mé k'uaxrxjxín tí ch'ín a sákjuí kjuík'ixenhen tí cochíno a. Na ntá kaín xín tí ko a mé chjina iyó mil va siín va xrine va. Na mé kaín xín va k'uínkajinxín va ntiha kjuítsínkayá va tsąka ntá kjuítsínkankí va ntąyaon ntá kjuínhin va ntą.

¹⁴ Na ntá tí chojni t'ayakonhen tí cochíno a na mé kuinká sín kixin chrakon sín na ntá sákjuí chrónka sín chjasén sín la ko nontęę chojni. Na ntá itsjé chojni mé kuitsjehe sín nkehe tí tsíkónhen ntiha. ¹⁵ Ntá kjuíji sín tí tjen ch'ín Jesús a na k'uíkon sín kixin itjen tí ch'ín k'uéchóntha tí nchónhya nchąkuen tí jínahya senó la ó jína tjen ch'án tjetjįxin ch'án tjenkáya ch'án iké ch'án, na ntá chrakon sín. ¹⁶ A ntá tí sín tsík'ikon mé chrónka sín nkexrí k'uék'aji tí ch'ín k'uéchóntha tí nchąkuen tí jínahya la ko nkexrí kónhen tí cochíno a. ¹⁷ Ntá kjuankixín sín chrónóęhę sín tí ch'ín Jesús a kixin sáchrókjuixin ch'án ntiha.

¹⁸ A ntá ó ts'it'ótjen ch'ín Jesús tí ntabárcę na ntá tí ch'ín k'uéchóntha nchąkuen tí jínahya na mé chrónõą

ch'án kixin kjaxin ch'án sáchrókjuiko sín ch'án, ichro ch'án. ¹⁹ Ntá ch'ín Jesús kjuanjonhya ch'án kjuachaxin sátsjiko sín ch'án. Náhí. K'ueṭoan ch'án kixin:

—Sátjia ntōa tǵichenka tí sín naxa kjéhya tí jaha kixin nkexrí kaín tí kjuaxroan jíe kjuasin Dios kjuínchekitoḡa jína kuiḡonóḡa ch'án tí jaha —ichro ch'án.

²⁰ Na ntá tí ch'ín a sákjuí ch'án kjuankíxin chrónka ch'án kaín tí chjasin kuènte Decápolis kixin nkexrí kaín tí nkehe kjuích'e ch'ín Jesús kjuínchekitoḡe ch'án jína. A ntá kaín tí sín kuínhin na chrakon sín.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Lc. 8.40-56)

²¹ Ntá tió xíkjangao ch'ín Jesús tí ntabárcō tóhe tí ntayaon inaá ntá kóchjina nchónhya chojni ntá ntaḡo chrínta ntá kuitōhe ch'án inaá. ²² Na ntá ikui ijnko ch'ín t'etōan kuènte nḡnko mé it'in ch'án Jairo. A ntá tió k'uíkon ch'án kixin itjen ch'ín Jesús ntá kjuák'exín toch'in ch'án chrínkí toté ch'ín Jesús a ²³ imá chrónóḡe ch'án kixin:

—Tí ijnko xjanna chjin ó tjet'en xjan. Xrjanóḡa chrókjuini chrókjuak'etja itjá chrítaón kja xjan ntá chrókuitōhe xjan jína —ichro ch'án.

²⁴ Ntá ch'ín Jesús sákjuíko tí ch'ín a. Na nchónhya chojni chréḡe sín tinkák'ixitja sín ch'án inaá. ²⁵ A ntá kjaxin tjenkákjan sín ijnko chojni chjin níhi tjan, ó chónṡa teyó nánó sítji tjan jni. ²⁶ Imá tjote tjan kixin nchónhya chojni kjuanjon xroḡan kónhen tjan na ó kjuixin kjuéhe tjan kaín xín nkehe k'uechónṡa tjan. Ó jehí titōehya tjan jína la íchá ntsí tinkákótao tjan. ²⁷ A ntá tió kuínhin tjan chrónka chojni nkehe tí kjuaxroan kjuasin ch'ín Jesús ntá kui tjan kjuák'enkákjan tí chojni kóchjina nóton ch'ín Jesús ntá kuákóxin tjan tí ké ch'án, ²⁸ ntáchro tjan kixin kjónté iké ch'án ó chrókuakóxin tjan na ó tíhó mé chrókuitōhe tjan jína, ichro tjan. ²⁹ Ntá tuénxín tí jni na mé ó kjuixié tjan la ko kónohe tjan kixin ó kjuixin kuitōhe tjan jína ti chin k'uechónṡa tjan. ³⁰ Ntá ch'ín Jesús na ó kónohe ch'án kixin kjuachaxién ch'án mé kuitōexín ijnko chojni jína ntá kuinkátjía ch'án kjuanchankíhi ch'án tí chojni síin a kixin:

—¿Nkexro kuákóxin tí kaná? —ichro ch'án.

³¹ Ntá kjuáteḡe tí sín k'uajiko ch'án a ntáchro sín kixin:

—Ó noha kixin nchónhya chojni sítja, ¿ntá nkekuènté kixin naxa tjanchankiá kixin nkexro tí kuákóxian? —ichro sín.

³² Ntá kuinkátjía ch'án tsjehe ch'án nkuíxín kixin tsonohe ch'án nkexro tí kuákóxin tí ké ch'án. ³³ Ntá tí tjan a na mé chrakon tjan síxránkā tjan ó nohe tjan kixin ó kuitōhe tjan jína ntá xrakoa tjan kjuák'exín toch'in tjan nkayakon ch'ín Jesús ntá ntoá chrónka tjan kaín nkehe kónhen tjan. ³⁴ Ntá ntáchro ch'ín Jesús kixin:

—Xjeenni, kaín ḡsán kuinkachónkia tí janhan ntá kuitōḡa jína. Ijie la kjuaxróxin sátsjia ntōa la ó kuitōḡa jína a —ichro ch'án.

³⁵ Na ntá naxa tjenixja ch'án ntá ó kui chojni kuxin sín ntōe tí ch'ín t'etōan tí nḡnko. Ntá chénka sín ch'án kixin:

—Xjaan na ó kjuixin k'uén. ¿Nkekuènté naxa chjeḡe xra tí Maestro a? —ichro sín.

³⁶ Ntá ch'ín Jesús na ántosén ch'án tí chrónka sín ntá nixjeḡe ch'án tí ch'ín t'etōan tí nḡnko ntáchro ch'án kixin:

—Chrakonhya jaha, jehó tsinkachónke tí janhan —ichro ch'án.

³⁷ Ntá kjuanjonhya ch'án kjuachaxin kixin sátsji kaín sín, na ó jehó ch'ín Pedro la ko ch'ín Jacobo la ko ch'ín Juan mé kichó ch'ín Jacobo, sátsji sín. ³⁸ Na ntá tió kjuíji sín tí ntōe tí ch'ín t'etōan tí nḡnko na k'uíkon sín kixin imá sítjité sín tsjánkāmā sín tí xjan a. ³⁹ Ntá k'uíxenhén ch'ín Jesús nchia kjuanchankí ch'án kixin:

—¿Nkekuènté ánta tjasitérá tsjánkāmārā tí xjan a? Tí xjan na tsík'enhya xjan na tjejuā xjan —ichro ch'án.

⁴⁰ A ntá kjuanoá sín ch'án. Ntá k'ueṭoan ch'án kixin kaín sín sátsji sín ntója. Ntá kjuíko ch'án tí it'é la ko tí iné xjan la ko tí iy'á sín xriko ch'án ntá k'uíxenko sín ch'án tí tjen tí xjan a. ⁴¹ Itsé ch'án tja xjan ntá nkívee xjan mé nixjeexín ch'án ntáchro ch'án kixin:

—Talita, cumi —mé t'axrjexín kixin: Lonchí, tétuḡanhan kixin t'áya.

⁴² A ntá tí xjan a ó chónṡa tjan teyó nánó na mé tuénxín k'uíkatjen tjan ó jína tji tjan. Ntá kaín tí chojni síin ntiha la chrakon sín k'uíkon sín xikaha. ⁴³ Ntá fuerte k'ueṭoan ch'ín Jesús kixin chróchenkahya sín ninkexró. La kjaxin k'ueṭoan ch'án kixin tsjanjon sín nkehe sine tjan.

Ch'ín Jesús kjuák'e ch'án chjasin Nazaret

(Mt. 13.53-58; Lc. 4.16-30)

6 A ntá chr'éxin k'uaxrjexín ch'án chjasin ntiha. Ntá jehé ch'án la ko tí sín k'uájiko ch'án na mé sákjuí sín Nazaret tí chjasin tsík'ánkíxin ch'án. ² Na ntá tió kui tí yaon t'ok'éhe sín ntá kjuankíxin ch'án kjuakóxin ch'án tí nḡnko ntiha. Na ntá nchónhya chojni kuínhin sín ntá chrakon sín ntáchro sín kixin:

—¿Nketí síxrakōḡe tí ch'ín i kaín tíhi? ¿Nketí kuxin tí kjuaxrexinkaon chónṡa ch'án la ko tí kjuaxroan tjasin ch'án? ³ ¿Á jehya ch'án tí ch'ín ch'éna nta na mé xjeen tí tjan María, la tí kichó ch'án a na mé ch'ín Jacobo, la ch'ín José, la ch'ín Judas, la ch'ín Simón? ¿A kjaxinhya ntihi tjejókoni tí kichó ch'án chjin? —ichro sín.

Méxraḡa taha sín kuentá nkerí ch'e ch'án. ⁴ Na ntá ntáchro ch'ín Jesús kixin:

—Kaín chojni tjikosáyehe sín ijnko nkexro chrónka iten Dios. Ntá tí chjasén ch'án la ko kaín tí sín kjéhya ch'án la ko tí sín ntōe ch'án na mé tjikosáyeḡa sín ch'án —ichro ch'án.

⁵ Méxraḡa ninkehó kjuaxroan xitjahya kjuasin ch'án ntiha, la jehó kjuak'etja tja ch'án chrítaón ikja iso chojni níhi kjuínchekitoḡe ch'án sín jína. ⁶ Ntá chrakon ch'án kixin xikaha kuitékakuenhya sín ch'án. Na ntá k'uáji ch'án tí chjasin ntsínsí chjinaxón ntiha kjuako ch'án.

**Ch'ín Jesús mé ichr'án tí teyó sín kixin sátsji sín tsjik-
jako sín itén Dios**
(Mt. 10.5-15; Lc. 9.1-6)

⁷ Na ntá k'uíyehē ch'ín Jesús tí teyó sín k'uajiko ch'án a. Ntá kjuankixin k'uētuenhen ch'án kixin yóyó yóyó sín sátsji sín la ko kjaxin kjuanjon ch'án kjuachaxin kixin tsakitsje sín nchakuen tí jínahya chóna chojni. ⁸ La ko k'uētōan ch'án kixin ninkehó tsjikohya sín kuente ntia. Jehó tí nta tjaxín sín mé tsjiko sín. Na mé tsjikohya sín kabolsa la ko tsjikohya sín nkehe sine sín la ko tsjikohya sín chichaon. ⁹ Na ko tōkātē ó tsjanka sín la ko tsjiko sín jehó tí ka tjejóya sín ó. ¹⁰ Kjaxin ntáchro ch'án kixin:

—A ntá tí ts'ixenhénra ijnko nchia a ntá ntaha tsjanjon sín kjuachaxin na ntahó chókuitōhará. A ntá tsjixinjian tí xrā ntá sátsjixinrá ntiha. ¹¹ Na ntá tí tsjasánra ijnko chjasin ntá tsochrohya sín tsjanjon sín kjuachaxin ts'ejókoará sín ntiha na ko tsotjinkakonhya sín tsinjin sín tí nkehe chrókjuákohérá sín na ntá t'axrjéxinrá tí chjasin a ntá ts'oxènjínra tí nche chóna totárá kixin xikaha tsjákoxinrá kixin ntoáhya kjuích'e tí jehe sín. A ntá chaxín ntáxrjan kixin tí yaon tsitōexín ijje chojni ntá antsí má tsjasóte tí chojni tí chjasin a, a ntá tí sín chjasin Sodoma la ko Gomorra la kánhyó tsjasóte sín.

¹² Na ntá sákjuí sín kuinkákjakohē sín tí chojni a kixin mé chrókjuítōxinhin sín ntje sín. ¹³ La ko kjaxin kuakitsje sín itsjé tí nchakuen tí jínahya chóna chojni. Na ko aceite mé kuikite sín itsjé chojni níhi a la ntá kuítōhe sín jína.

Ik'uén ch'ín Juan Bautista

(Mt. 14.1-12; Lc. 9.7-9)

¹⁴ Na ntá tí ch'ín rey Herodes mé kuínhin ch'án nkehe tí kjuaxroan kjuasin ch'ín Jesús. Na ntáchro ch'ín Herodes kixin:

—Kjá tí ch'ín Juan Bautista mé ó tsíxechón ch'án inaá kixin xikaha tí kjuachaxin chóna tí ch'ín a —ichro ch'ín Herodes a.

¹⁵ A ntá iso sín ntáchro sín kixin:

—Kjá ch'ín Elías k'uéchrónka itén Dios —ichro sín.

A ntá í so sín mé ntáchro sín kixin:

—Kjá ijnko nkexro yóhē tí sín k'uékjako itén Dios ósé —ichro sín.

¹⁶ Ntá kuínhin ch'ín Herodes tíha ntá ntáchro ch'án kixin:

—Kjá ó jehe tí ch'ín Juan tí kuétōan chrínjin kja ch'án, mé ó tsíxechón ch'án jie —ichro ch'án.

¹⁷ Méxra tí ch'ín Herodes mé tsík'ētōan ch'án kixin tsontetoxín tí ch'ín Juan cadena tsjak'echjina ch'án kixin xikaha tsíkjanjan tí tjan Herodías. A ntá tí tjan Herodías k'uéchjién tí ch'ín Felipe. A ntá tí savé ch'án Herodes mé kuákja tí tjan a kixin ts'óna ichjién ch'án. ¹⁸ A ntá tí ch'ín Juan tsintáche ch'án tí ch'ín Herodes kixin:

—Kohya kjuachaxin tsochonta tí ichjién tí kichuá —ichro ch'án.

¹⁹ Mé xikaha tí tjan Herodías mé imá kónínkakonhen tjan tí ch'ín Juan ntá chrók'óyan tjan ch'án, kjánchó xitjahya ²⁰ kixin tí ch'ín Herodes mé chrakonhen ch'án tí ch'ín Juan kixin ó nohe ch'án kixin tí ch'ín a mé ijnko nkexro jína la ko tjóá asén la méxra kuítōehya ch'án kixin jehe tjan chrók'óyan tjan ch'án. A ntá kénhyó kienxín ch'án la kjónté kóxrjínhin ch'án tí nkehe kuínhin ch'án kjuako ch'ín Juan. ²¹ A ntá tí tjan Herodías mé kjuacha tjan tí yaon kia tsíkjitōxinhin nánó tí ch'ín Herodes a kixin tsík'íyehē ch'án tí síxreé la ko tí sín k'uētuenhen tí sín soldado la ko tí sín t'ētōan estado Galilea kixin itsi sín ntōe ch'án kixin síin kia. ²² A ntá tí xjeen tí tjan Herodías mé k'uixenhen tí tjejó sín, a ntá ité tjan, la kóxrjínhin ch'ín Herodes la ko kaín tí sín tjejóneko ch'án ntiha. Na ntá tí ch'ín rey ntáche ch'án tí tjan tjarisoá a kixin:

—Tjanhana tí nkehe tjinkávan na tsotjahá —ichro ch'án.

²³ Ntá kjuínchenohe ch'án Dios ntáchro ch'án kixin tsjanjon ch'án tí nkehe tsjanchia tjan kjónté jnkosiné tí chjasin t'ētōan ch'án. ²⁴ Ntá jehe tjan na mé kuínhin tjan ntá sákjuí tjan chénka tjan iné tjan kixin tsintáchro ch'ín Herodes kixin tí ichrén nkehe chrókjuanchia tjan chrókjuanjon ch'án. Ntá kjuanchankí tjan kixin:

—¿Nkehe tí chrókjuanchiani? —ichro tjan.

Ntá tí iné tjan mé ntáchro kixin:

—Ijie la itja tjanchia tí kja tí ch'ín Juan Bautista, ichrua —ichro tjan.

²⁵ A ntá tí tjarisoá ikjan tjan tjoka k'uixenhen tjan tí tjan tí ch'ín rey, ntá ntáchro tjan kixin:

—A ntá ijie tjinkaonni ijnko plato tsjak'enkáya ikja ch'ín Juan Bautista tsochjehéni —ichro tjan.

²⁶ Na ntá tí ch'ín rey la mé imá k'uává ch'án kixin xikaha kjuanchia tjan kjánchó tsíkjinchenohe ch'án Dios la ko tsíkinhin kaín tí sín tsík'íyehē ch'án, la ntá xitjahya tsontáchro ch'án "Náhi" tí nkehe kjuanchia tjan. ²⁷ Na ntá tuénxín k'uētuenhen ch'án ijnko ch'ín soldado kixin tsjikāo ch'án tí kja ch'ín Juan a. ²⁸ Ntá tí ch'ín soldado mé sákjuí ntōechiso, ntá kóchrínjin ch'án ikja tí ch'ín Juan a. Ntá ijnko plato kjuikoyá ch'án tí kja ch'án a ntá chjéhe ch'án tí tjan tjarisoá a. Ntá jehe tjan sákjuikénhen tjan iné tjan.

²⁹ Na ntá kuínhin kaín tí sín k'uék'ajiko ch'ín Juan kixin xikaha tsíkónhen. Na ntá sákjuíkakja sín tí cuérpōe ch'án ntá kjuikāo sín ntá sákjuikjává sín.

Ch'ín Jesús mé kjuanjon nkehe kjóne in'ó mil chojni

(Mt. 14.13-21; Lc. 9.10-17; Jn. 6.1-14)

³⁰ A ntá chr'éxin tí sín k'uájiko ch'ín Jesús a na mé ó kjan sín tí tjan ch'án inaá, chrónka sín nkexrí tí xrā kjuích'e sín na ko nkexrí kjuako sín. ³¹ A ntá ntáchro ch'ín Jesús kixin:

—Ts'axrjentani sátsjini nteje tí kohya chojni ntá ts'ok'áhará ntsí —ichro ch'án.

Mé xikaha ntáchro ch'án kixin sásitji la ko síti nchónhya chojni na ntá xrankahya ts'ejó sín sine sín. ³² Na ntá ch'ín Jesús la ko tí sín k'uájiko ch'án jehó sín k'uit'ótjen sín ijnko ntabárcō sákjuí sín ijnko nonte je-

hó tjen. ³³ Na ntá itsjé chojni k'uíkon sín kixin sákjuí sín la ko kjuátsqan sín kixin ch'ín Jesús. Ntá xrákuaxin sín chjasén sín kuinká sín na ntá senó kjuíji sín tí chrínta ntayaon tí tsjiji ch'ín Jesús. ³⁴ Ntá k'uínkajinxin ch'án tí ntabárcq, a ntá k'uíkon ch'án kixin nchónhya chojni síin ntiha ntá kuikonóhē ch'án tí jehe sín na mé éxí yóhē kolélo tjejó sín chóntahya va nkekro ts'ayakonhen va. Ntá kjuankíxin ch'án kjuakohē ch'án sín nchónhya nkehe a. ³⁵ Na ntá ó kóntó na ntá tí sín k'uájiko ch'ín Jesús a mé kóchjina sín tí tjen ch'án ntáchro sín kixin:

—Ntá ó kóntó la kohya ninkexró tjejó ntihi ³⁶ na ntá jaha chrókuitohé sín kixin sátsji sín tí chjasin chjinaxón a tsjik'ena sín nkehe kixin chóntahya sín nkehe sine sín —ichro sín.

³⁷ A ntá ch'ín Jesús kjuátehe ch'án ntáchro ch'án kixin:

—Chjehé sín nkehe sine sín —ichro ch'án.

Ntá kjuátehe sín ntáchro sín kixin:

—¿Á tsjik'enani iyó ciento denario niotja tsochjeheni sín sine sín ní? —ichro sín.

³⁸ Ntá ch'ín Jesús mé kjuanchankíhi ch'án sín kixin:

—¿Nkejaín niotja chontará? Sátjitsjehérá —ichro ch'án.

Ntá sákjuítsjehe sín na ntá chrónka sín kixin:

—In'ó niotja la ko yaá koche mé síin —ichro sín.

³⁹ Na ntá k'ueqoan ch'án kixin kaín sín sín chrók'uixitjaxin sín tí chrítaón tí ka yoa a. ⁴⁰ Na ntá xikaha kójnkójié sín ciento sín la ko cincuenta sín k'uixitjaxin sín.

⁴¹ Na ntá ch'ín Jesús kuákja ch'án tí in'ó niotja na ko tí yaá koche ntá konta ch'án nkajni ntá kjuanchia ch'án kjuasáyé Dios. Na ntá kóchrít'q ch'án tot'qo tí niotja a ntá chjéhe ch'án tí sín k'uájiko ch'án kixin ts'óxikayēhe sín sine tí sín síin a la ko kjaxin kóchrít'q ch'án tí yaá koche ntá k'óxikayēhe sín kixin sine sín kaín sín. ⁴² Ntá kaín sín sín kjóne sín kókjehe sín. ⁴³ A ntá kjuixin kjóne sín ntá tí sín k'uájiko ch'ín Jesús na mé kjuínchekaón sín teyó ntaxra tot'qo tí niotja la ko tí koche tsíxehe. ⁴⁴ A ntá tí sín kjóne na mé in'ó mil chojni ntoa.

Ch'ín Jesús mé tjitaón ntayaon

(Mt. 14.22-27; Jn. 6.16-21)

⁴⁵ A ntá tuénxín k'ueqoan ch'ín Jesús tí sín k'uájiko ch'án kixin ts'it'ótjen sín tí ntabárcq a ts'atòye sín ntayaon sátsji sín nó chjasin Betsaida, ichro ch'án. Na ntá jehe ch'án na mé naxa kuítóhe ch'án nixjehe ch'án kaín tí sín síin a. ⁴⁶ Kjuixin nixjehe ch'án sín na ntá jehe ch'án chriin ch'án ijnko jna tsonixjeexin ch'án Dios. ⁴⁷ A ntá tió k'uíxin tie ntá tí ntabárcq na mé ó kjuíji jnkosiné ntayaon, a ntá jehe ch'án jehó ch'án kjuíji ch'án chrínta ntayaon. ⁴⁸ Ntá kotohe ch'án k'uíkon ch'án kixin imá xra tjiko sín tí ntabárcq a kixin tí xrinto imá chjéhe. Nantóye a mé sákjuíchréhe ch'án sín. Totó ch'án mé sákjuítónxin ch'án tí ntayaon na ntá kóchjinehe ch'án tí tjejó sín chrók'uátsínké ch'án sáchrókjuí ch'án. ⁴⁹ A ntá tí k'uíkon sín kjuítaón ch'án ntá, ntá kjuenkayáxin sín kixin kjuacha sín, ichro sín, ntá k'óyako sín ⁵⁰ kixin kaín sín k'uíkon sín ch'án la

chracon sín. Na ntá jehe ch'án mé tuénxín nixja ch'án ntáchro ch'án kixin:

—Chraconhyará. Janhan tíhi —ichro ch'án.

⁵¹ Ntá k'uit'ótjen ch'án tí ntabárcq tí tjejó sín, a ntá tí xrinto la ó k'uíxratá. Ntá imá chracon sín kixin xikaha kónhen ⁵² kixin kienxínhya sín tí kjuaxroan kjuích'e ch'án kuénte tí niotja kixin naxa kénhya asén sín kuinkáchónki sín ch'án.

Ch'ín Jesús mé kjuínchekitohē jina tí chojni níhi tí nonte Genesaret

(Mt. 14.34-36)

⁵³ Ntá tió k'uatòye sín tí ntayaon ntá kjuíji sín tí nonte Genesaret ntá kjuak'echroē sín tí ntabárcq a tí chrínta ntá. ⁵⁴ Na ntá tió k'uínkajinxin sín tí ntabárcq, a ntá tí sín síin ntiha tjoka kjuátsqan sín tí ch'ín Jesús. ⁵⁵ Ntá sákjuí sín nkuíxin chjinaxón ntiha kjuankíxin sín kuikao sín tí síníhi tinkátsénki sín kuikao sín tí tjen ch'ín Jesús. ⁵⁶ La ko kaín nketí kjuíji ch'án, á chjasin ntsí, á chjasin hyé, á nontee sín ó kjuíjiko sín tí síníhi a chrínta ntá. Na ntá chrónóhē sín tí ch'ín Jesús kixin kjónté chrínta iké ch'án ó chrókuákóxin sín, ichro sín. Na kaín xín tí sín kuákóxin iké ch'án mé kuítóhe sín jina.

Tí nkehe nchekjita asén chojni

(Mt. 15.1-20)

7 A ntá iso sín fariseo la ko iso tí sín tjako tí ley kujxin sín chjasin Jerusalén ntá kóchjinehe sín tí ch'ín Jesús. ² Tí sín a, tió k'uíkon sín kixin iso tí sín k'uájiko ch'ín Jesús mé k'óntihya sín tja sín na kjónté ine sín mé t'axrxjén kixin kjuínchexiteyáhya sín tí ley, ntá kjonta tí sín a. ³ (Mé xikaha kjuích'e sín kixin tí sín fariseo la ko kaín tí sín judío mé kuinkáchónki sín éxí k'uékjich'e tí sín táda ósé kixin ná t'ontó itja sín ntá sine sín. ⁴ Na ko tí tsqkjanxin sín ntsin ná t'ónti sín ntá sine sín. Na ko kjaxin itsjé í so nkehe tinkáchónki sín, éxí tjonemá sín tí vaso t'iyá sín nkehe la ko tí nchésen la ko tí chj chjányan nkehe ne sín la ko tí kámé sín nchetjóá sín.) ⁵ Méxra tí sín fariseo la ko tí sín maestro tjako tí ley a na mé kjuanchankíhi sín tí ch'ín Jesús kixin:

—¿Nkekuénte kixin tí sín xrikoa la nchexiteyáhya sín tí nkehe k'uékinkáchónki tí sín táda k'uéjó ósé? Na mé tí sín xrikoa t'óntihya sín tja sín ntá kjónté ine sín —ichro sín.

⁶ Kjuátehe ch'ín Jesús ntáchro ch'án kixin:

—Ntoá tsíchrónka ch'ín Isaías ósé k'uechrónka iten Dios tsíntáchro ch'án kixin ntoáhya tsjenkayáxinrá tí jahará kixin xikihí tsikjin ch'án ntáchro ch'án kixin:

Tí chojni tí chjasin i ir'va ó xraxinkakonxín sín tí janhan,

a ntá tí asén sín ikjín kuítóhe sín tí janhan

⁷ Méxra ó chónkó tóchjina sín xraxinkaon sín tí janhan,

kixin tí nkehe tjako sín la tí nkehe tsík'etqoan chojni ó.

†

Mé xikaha ichro itén Dios. ⁸ Ntá jahará kuítóhéra tí nkehe tsík'etqoan Dios ntá chréhéra tí nkehe ch'e cho-

jni, a la mé tjonemará nchésen, la ko tí vaso t'íará nkehe, la ko kǵaxin í so nkehe yóhē tinkachónkirá —ichro ch'án.

⁹ Kǵaxin ntáchro ch'án kixin:

—Jahará chréhérá tí nkehe k'uékjich'e chojni ntá xikaha tǵtohérá ntáha tí nkehe tsík'etǵoan Dios. ¹⁰ Tsín-táchro ch'ín Moisés kixin: “Tsochonteherá kjuasáyé it'árá la ko ínárá”, la ko “A ntá tí nkexro t'ántaxínhñ it'é o ìné la chrók'óyán sín.” ¹¹ A ntá jahará ntáchrorá kixin ó nchǵon kixin ijnko nkexro tsochénka it'é la ko iné kixin: “It'éni, Ìnéni, chrokuahya tsjinkǵtsani tí jaha kixin kaín tí nkehe chóntani mé k'óna Corbán” (mé t'axr-jexín kixin kaín tí chichaon k'uáyéhē Dios). ¹² A ntá xikaha jnkojín nkexro tsontáchro ch'án tíhi ntá jahará tsontáchrorá kixin í t'ichjánxínhya tsjinkǵtsa ch'án tí it'é ch'án la ko tí ìné ch'án. ¹³ A ntá tí xikaha la tǵtohérá tí nkehe tsík'etǵoan Dios éxí sínkíhya, a ntá ókjé nkehe ich'erá, ntá tánkíhará chojni. Mé xikaha ich'erá nchónhya nkehe tóyóhē tíha —ichro ch'ín Jesús.

¹⁴ Na ntá k'uíyéhē ch'ín Jesús tí chojni ínaá ntáchro ch'án kixin:

—Tínhínrá kaín rá tí nkehe ntáxrjān la ko tiénxinrá.

¹⁵ Tí nkehe ine chojni la jehya jǵe tíha. Tí nkehe t'axr-jeníxin asén chojni mé jǵe tíha. ¹⁶ Tí tjinkáonrá chrókuinhínrá la chrókuinhínrá —ichro ch'án.

¹⁷ A ntá tió kuítǵhe ch'án kaín tí sín tsíkóchjina a na ntá jehe ch'án la ko tí sín k'uájiko ch'án mé k'uixenhen sín nchia. Na ntá kjuanchankíhi sín ch'án kixin nkexrí t'axrjexín tí nkehe kjuako ch'án a. ¹⁸ Na ntá ntáchro ch'ín Jesús kixin:

—¿Á kǵaxinrá tiénxinhyará? ¿Á noahyará kixin tí nkehe ineni na jehya jǵe ¹⁹ kixin jehya asénni sátsji? Tí nkehe ineni na sátsji nkaya tseeni na ko xik'axrje ínaá —ichro ch'án.

Mé t'axrjexín kixin tí nkehe sineni la jehya jǵe.

²⁰ Ntá ntáchro ch'ín Jesús kixin:

—A ntá tí nkehe t'axrjeníxin chojni na mé jǵe táha.

²¹ Nkaya asánrá mé t'axrjeníxin tí jínahya tjenkayáxinrá, la ko tí tǵachéhē kichuárá, la ko tí tjinkáonrá tsochontará chojni chjin ókjé, la ko tí t'oyán kichuárá ²² la ko tí chrókuđerá, la ko tí tjaké asánrá tí nkehe chóntha ókjé sín, la ko tí jínahya ch'ehérá kichuárá, la ko tí kjuach'ia xríkoará la ko tí jínahya tjenkayáxinrá, la ko tí chjǵnǵxínhanrá, la ko tí ch'énará kjuach'ia, la ko tí kjuahnke chontará, na kó ti chontahyará kjuaxrexinkaon jína. ²³ Kaín tí nkehe jínahya a mé t'axr-jeníxin chojni, la mé tjasixín sín jǵe.

Ijnko tjan tsíkǵjǵin kǵin mé kuítekaon tjan tí ch'ín Jesús
(Mt. 15.21-28)

²⁴ Ntá ch'ín Jesús mé sákjuíxin ch'án ntiha ntá sákjuí ch'án nó chjasin Tiro la ko chjasin Sidón. Ntá k'uixenhen ch'án ijnko nchia kixin tjinkakonhya ch'án kixin chrókónohe chojni kixin ntaha tjen ch'án. Kjánchó xitjahya kjuák'emá ch'án ntiha. ²⁵ Na ntá ijnko ìné ijnko tjan tjarisoá chóntha ijnko nchǵakuen tí jínahya mé kuínhin nkehe tí xrǵ ch'e ch'ín Jesús kixin tjasin ch'án

kjuaxroan, ntá tuénxín kui tjan kjuák'exín toch'in tjan chrínkí toté ch'ín Jesús. ²⁶ Na mé jehe tjan tsíkǵjǵin kǵin, na mé tsíkǵjǵin tjan nó nación Sirofenicia. Na ntá jehe tjan a mé kui tjan chrónóhē tjan tí ch'ín Jesús kixin chrókuakitsje ch'án tí nchǵakuen tí jínahya chóntha xǵeen tjan.

²⁷ Ntá ntáchro ch'ín Jesús kjuátehe ch'án kixin:

—Tǵtohé senó chrókǵjóné tí xjan. Jehya tí jína chrókuakítsǵahǵ xjan tí niotǵa ntá chrótǵahǵ konǵa chrókǵjóné va —ichro ch'án.

²⁸ Ntá jehe tjan kjuátehe tjan ntáchro tjan kixin:

—Chaxín xikaha, Ìnehéni. Kjánchó kǵjóné tí konǵa tje-joyánkí mesa ine tí tot'ǵ niotǵa tóxènjín tí chánjan —ichro tjan.

²⁹ Na ntá ntáchro ch'ín Jesús kixin:

—Táha la chaxín ntoá ntáchrua. Sátjia kixin tí nchǵakuen tí jínahya ó k'uaxrjexín tí xǵaan —ichro ch'án.

³⁰ A ntá tió kjuíji tjan ntǵe tjan, na ntá k'uíkon tjan kixin tí xǵeen tjan na mé ó ntoá tjetsínkaták'á xjan tí cama kixin ó tsík'axrje tí nchǵakuen tí jínahya a.

Ch'ín Jesús mé kjuínchekitǵhe jína ijnko ch'ín tienhya la ko nixjahya

³¹ Ntá ch'ín Jesús mé ó k'uaxrjexín ch'án ínaá nó chjasin Tiro ntá k'uátsínka ch'án chjasin Sidón la ko k'uátsínka ch'án tí estado Decápolis ntá kjuíji ch'án nó ntǵayaon Galilea. ³² Ntá kuikǵao sín ijnko ch'ín tienhya na ko ntoáhya nixja ch'án. Ntá chrónóhē sín tí ch'ín Jesús a kixin tsjak'etja tja ch'án chrítaón kja tí ch'ín a kixin tsitǵhe ch'án jína. ³³ Na ntá ch'ín Jesús k'uaxrjenta ch'án tí ch'ín tienhya, k'uaxrjenta sín tí kohya chojni. Na ntá tí dedo tja ch'án mé chr'áxenhen ch'ín Jesús tǵtsjon tí ch'ín tienhya. La ko kǵaxin tí dedo tja ch'án mé kuikǵite ch'án ntǵaté ch'án ntá kjuínchekákóxǵin ch'án nejen tí ch'ín nixjahya a. ³⁴ Ntá konta ch'án nkǵjní k'uáváxin ch'án na ntá nixǵéhē ch'án tí ch'ín tienhya a, ntáchro ch'án kixin:

—Efata —mé t'axrjexín nkívee sín kixin: ¡Tsoxitǵéhē!

³⁵ Na ntá tuénxín xítǵéhē tǵtsjon tí ch'ín tienhya ntá kuínhin ch'án la ko kuítǵhe jína tí nejen ch'án, ntá jína nixja ch'án. ³⁶ Ntá ch'ín Jesús k'uǵetǵoan ch'án kixin ninkexró tsochenkahya sín. Ntá kǵjóné imá k'uǵetǵoan ch'án ntá ántǵosén sín kǵjóné íchá xrichronka sín. ³⁷ Na mé imá chrakon sín ntá ntáchro sín kixin:

—Kaín nkehe ch'e ch'án la jína. Tí chojni tienhya la tinhin sín la ko tí chojni nixjahya la nixja sín —ichro sín.

Ch'ín Jesús mé kjuanjon nkehe kǵjóné noó mil chojni
(Mt. 15.32-39)

8 A ntá ijnko yǵon nchónhya chojni k'uíxikóchjina ínaá. A ntá chóntahya sín nkehe sine sín. Na ntá ch'ín Jesús mé k'uíyéhē ch'án tí sín k'uájiko ch'án, a ntá ntáchro ch'án kixin:

² —Imá tǵikonǵahǵ kaín tí sín i kixin ó ní yǵon tjékǵian sín ntihi ntá chóntahya sín nkehe sine sín. ³ Ntá chrókuétuǵnhya sín sáchrókǵui sín ntǵe sín tí nǵaxǵa ne-

† Éxodo 20.12; 21.17

hya sín kixin ntja ó chrókótiēnxin sín kixin iso sín la imá kjín tsíkijxin sín —ichro ch'ín Jesús.

⁴ Na ntá kjuátehe tí sín k'uájiko ch'án ntáchro sín kixin:

—¿Nkexrí chrókónoxín nchónhya niotja chrókjóne kaín tí sín a kixin kohya nchia tí tjejóni? —ichro sín.

⁵ Na ntá ntáchro ch'ín Jesús kixin:

—¿Nkekjaín niotja chontará jahará? —ichro ch'án.

Ntá jehe sín kjuátehe sín ntáchro sín kixin:

—Yato niotja chóntani —ichro sín.

⁶ Na ntá ch'ín Jesús k'uetuēnhen ch'án kaín xín sín kixin ts'ixitjxin sín nonte. Ntá kuákja ch'án tí yato niotja ntá kjuanchehe ch'án kjuasáyé Dios ntá kóchrít'ò ch'án tí niotja a. Ntá chjéhe ch'án tí sín k'uájiko ch'án kixin jehe sín ts'óxíkayēhe sín tsakja kaín xín tí sín siín a. ⁷ Na ko iso koche ntsíntí chónta sín. Ntá ch'ín Jesús kjuanchia ch'án kjuasáya ntá k'uetōan ch'án ts'óxíkayēhe sín kjaxin. ⁸ Na mé kaín xín sín kjóne sín na kókjēhe sín. Ntá chr'éxin naxa kjuínchekaon sín yato ntaxra tí tot'ò tí nkehe tsíxehe. ⁹ Na mé chjina noó mil chojni kjóne sín. Ntá ch'ín Jesús mé nixjēhe ch'án sín sákjuí sín ¹⁰ ntá tuénxín jehe ch'án la ko tí sín k'uájiko ch'án na mé k'uit'ótjen sín tí ntabárcō a sákjuí sín nó tí nonte Dalmanuta.

Tí sín fariseo tjanchia sín ijnko kjuaxroan jíé

(Mt. 16.1-4; Lc. 12.54-56)

¹¹ Na ntá kui iso sín fariseo kjuankixin sín tjo sín tí ch'ín Jesús kjuanchehe sín ch'án kixin chrókjuakoxin ch'án ijnko kjuaxroan jíé kuēnte nkaya nkajín kixin tjinkaon sín chrókjuachaxin sín ch'án. ¹² A ntá ch'ín Jesús na mé k'uávaxin ch'án ikjín kjanxin asén ch'án ntá ntáchro ch'án kixin:

—¿Nkekuēnté kixin tí chojni i na mé tjanchia sín ijnko kjuaxroan jíé? Ijie la ninkehó kjuaxroan tsjákoxinhya —ichro ch'án.

¹³ Na ntá kuítóhe ch'án tí sín a, ntá xík'it'ótjen ch'án tí ntabárcō ntá sákjuí ch'án í jnko tóhe ntayaon inaá.

Tí xroan nchek'ánkí tí niotjé tí sín fariseo

(Mt. 16.5-12)

¹⁴ Ntá k'uitjāyēnhen sín tsíkjikohya sín nkehe sine sín. Jehó jnkokóá niotja chónta sín nkaxēnhen tí ntabárcō a. ¹⁵ Ntá ch'ín Jesús k'uetuēnhen ch'án tí jehe sín kixin:

—Chrókóxakonhanrá kixin tí xroan nchek'ánkí niotjé tí sín fariseo la ko niotjé tí ch'ín Herodes a —ichro ch'án.

¹⁶ Ntá tí sín xriko ch'án mé kjo sín kíchó sín kixin:

—Mé xíkaha ichro ch'án kixin tsíkjikohyani niotja.

¹⁷ Ntá kónohe ch'ín Jesús kixin nkehe tí kjo sín kíchó sín ntá ntáchro ch'án kixin:

—¿Nkekuēnté tjórá kixin chontahará niotja? ¿Á naxa tiénxinhyará la ko naxa noahyará? ¿Á kénhya asánrá tinkachónkirá Dios? ¹⁸ ¿Á t'ikonxinhyará ikonrá la ko á tiénxinhyará tátsjinrá? ¿Á xráxinkákonhyará? ¹⁹ Tió kóchrít'və tí n'ó niotja kjóne in'ó mil chojni na ¿nkek-

jaín ntaxra tí tot'ò niotja naxa kjuenájinnrá? —ichro ch'án.

Ntá jehe sín kjuátehe sín ntáchro sín kixin:

—Teyó ntaxra tí nkehe kjuenájinni —ichro sín.

²⁰ Xíntáchro ch'ín Jesús inaá kixin:

—Na ko tí kóchrít'və tí yato niotja kjóne noó mil chojni na ¿nkekjaín ntaxra tí tot'ò niotja kjuenájinnrá? —ichro ch'ín Jesús.

Ntá ntáchro sín kixin:

—Yato ntaxra —ichro sín.

²¹ Ntá ch'ín Jesús ntáchro ch'án kixin:

—Kjóté xíkaha la, ¿á naxa tiénxinhyará? —ichro ch'án.

Ch'ín Jesús mé kjuínchekitohe jina ijnko ch'ín t'ikonhya tí chjasin Betsaida

²² A ntá chr'éxin kjuíi sín chjasin Betsaida, a ntá ikui iso sín kuikao ijnko ch'ín t'ikonhya. Ntá chrónóēhe sín tí ch'ín Jesús kixin chrókjuínchekitohe ch'án jina tí ch'ín a. ²³ Ntá ch'ín Jesús mé itsé ch'án tja tí ch'ín t'ikonhya a ntá k'uaxrjentako ch'án ikon tí chjasin a. Na ntá kuikitehe ch'án ntáté ch'án ikon tí ch'ín t'ikonhya a la ko kjuak'etja tja ch'án ntá kjuanchankíhi ch'án kixin:

—¿Á ó t'ikuan ntsí? —ichro ch'án.

²⁴ Ntá ntáchro tí ch'ín t'ikonhya kixin:

—T'ikonni chojni, kjánchó éxi nta tsjehe itji —ichro ch'án.

²⁵ Ntá ch'ín Jesús mé xíkjak'etja tja ch'án inaá tí kon tí ch'ín t'ikonhya a. A ntá tí ch'ín k'uíkonhya kuítóhe ch'án jina la jina t'ikon ch'án kaín nkehe. ²⁶ Na ntá ch'ín Jesús mé k'uetuēnhen ch'án tí ch'ín k'uék'ikonhya kixin sátsji ch'án ntqē ch'án ntáchro ch'án kixin: —Chrók'uixēnhyā chjasin la ko ninkexró chróchenkahya ntiha —ichro ch'án.

Ch'ín Pedro chrónka ch'án kixin ch'ín Jesús mé tí nkexro Cristo

(Mt. 16.13-20; Lc. 9.18-21)

²⁷ A ntá tí ch'ín Jesús la ko tí sín k'uájiko ch'án sákjuí sín tí chjasin ntsí chjino Cesarea de Filipino. A ntá tí ntja mé kjuanchankíhi ch'ín Jesús tí sín k'uájiko ch'án kixin:

—¿Nkehe ntáchro chojni kixin nkexro tí janhan?

—ichro ch'án.

²⁸ Ntá ntáchro sín kixin:

—Iso sín mé ntáchro sín kixin jaha mé ch'ín Juan Bautista, ichro sín. A ntá í so sín na mé ntáchro sín kixin jaha mé ch'ín Elías, ichro sín. A ntá í so sín mé ntáchro sín kixin jaha mé ijnko tí sín tsíchrónka itén Dios ósé —ichro sín.

²⁹ Ntá kjuanchankíhi ch'án sín inaá kixin:

—¿A ntá jahará nkechorá kixin nkexro tí janhan? —ichro ch'án.

Ntá kjuátehe ch'ín Pedro ntáchro ch'án kixin:

—Jaha mé tí Cristo, ichroni —mé chro ch'án.

³⁰ Ntá k'uetōan ch'ín Jesús kixin tsochenkahya sín ninkexró.

Ch'ín Jesús chrónka ch'án kixin ts'en ch'án

(Mt. 16.21-28; Lc. 9.22-27)

³¹ Na ntá kjuankixin kjuako ch'ín Jesús kixin tí Xjeen Dios K'óna Chojni mé t'ichjánxin kixin imá tsjasóte ch'án la ko tsotjinkakonhya kaín tí sín táda kuènte njnko la ko tí sín t'etqan kuènte tí sín nchat'á la ko tí sín maestro tjako tí ley. A ntá tí sín a mé ts'óyan sín ch'án. Kjánchó tí nixin yaon na ó tsoxechón ch'án inaá. ³² Kaín tíha mé ntoá chrónka ch'án. A ntá ch'ín Pedro mé kuakitsjenta ch'án tí ch'ín Jesús chrókjuentuéhe ch'án. ³³ Na ntá kuinkátjía ch'ín Jesús komá ch'án kaín tí sín k'uájiko ch'án a. Ntá kjuentuéhe ch'án tí ch'ín Pedro a ntá chro ch'án kixin:

—Sátjia ntáha, Satanás! Jaha la tjenkayáxinhya éxi tjenkayáxin Dios. Náhí. Jaha tjenkayáxian éxi tjenkayáxin chojni ó —ichro ch'án.

³⁴ Ntá ch'ín Jesús mé k'uíyehé ch'án tí sín k'uájiko ch'án la ko tí sín tsíkóhjin a. Ntá ntá chro ch'án kixin:

—Tí jnkójnra tjináonra tsochréhéra tí janhan na t'ichjánxin tsitohéra kaín tí nkehe tjaké asanra na ntá tsamará tí ntacruz kuéntará, a ntá tsochréhéra tí janhan. ³⁵ A ntá tí nkexro tjinakon jehó sinchekaá asén mé ts'itjáyan. A ntá tí nkexro sinche'itjáyanxín asén kixin tinkáchónki tí janhan la ko chrónkaxín tí tan tsjanjon kjuachón mé tsaá. ³⁶ ¿A ntá nkehe tsonhen tí chrókjuacha ijnko chojni chróhónta kaín nkehe síin chjasintajni, a ntá kjuachón chrókjuinche'itjáyan? ³⁷ ¿Nkehe chrókjuenka chojni kixin chróhónta tí kjuachón? ³⁸ A ntá jnkójn nkexro tsosuehé kixin tinkáchónki tí janhan la ko tí tan kuéntana nkayakon tí chojni jínahya chóna jie la kjaxín tí Xjeen Dios K'óna Chojni tsosuehé ch'án tsontá chro ch'án kixin chóxin ch'án tí jehe sín tió tsokjan ch'án tsjkaó ch'án tí kjuachaxin jié kuènte It'é la ko tsjkaó tí sín ángel.

9 Na ko kjaxín chrónka ch'ín Jesús kixin:

—Chaxín ntáxrjan kixin isorá tjejorá ntihi la naxa ts'énhyará ts'ikonjia it'si tí kjuachaxin ts'etqan Dios —ichro ch'án.

Ch'ín Jesús mé k'uixitoxin nkexrí tsjehe ch'án

(Mt. 17.1-13; Lc. 9.28-36)

² Ntá k'uátsínka injon yaon ntá ch'ín Jesús mé sákjuiko ch'án ch'ín Pedro la ko ch'ín Jacobo la ko ch'ín Juan sákjuj sín jehó sín ijnko jna noi. Ntá ntiha mé xrinahya k'uixitoxin ókjé nkexrí tsjehe ch'án k'uíkon tí jehe sín. ³ A ntá iké ch'án tsík'óna imá tjájin la ko imá tjóá éxi chrinta tsjehe, a ntá ntihi chjasintajni kohya ninkexró chrókjuen tí ka chrókuitóhe imá tjóá xikaha. ⁴ Na ntá titáya k'uíkuèn sín ntiha itjen tí ch'ín Elías la ko tí ch'ín Moisés tjejótjo sín tí ch'ín Jesús. ⁵ A ntá ch'ín Pedro mé ntáche ch'án tí ch'ín Jesús kixin:

—Maestro, jina kixin tjejóni ntihi. Chrókjuich'éneni iní nchia la mé ijnko kuéntá la ko ijnko kuènte ch'ín Moisés la ko ijnko kuènte ch'ín Elías.

⁶ Mé xikaha ichro ch'án kixin kaín sín la imá chrakon sín la tí ch'ín Pedro la mé í noehya ch'án nkehe tsixro ch'án. ⁷ Na ntá xrinahya ikui ijnko tjuj kjuák'etja chrí-

taón kaín sín tí tjejó sín. Na ntá chríkjan tí tjuj kuínhin sín itén ijnko nkexro nixja na mé ntá chro kixin:

—Tí nkexro i mé xjanna. Imá tjuahá ch'án. Chrókuin-hínra tí nkehe tjako ch'án.

⁸ Na ntá tió tsjehe sín nkuíxín tí tjejó sín la í kohya tí iyó sín a. Jehó tí ch'ín Jesús tjejóko sín.

⁹ A ntá tí ó k'uínkajinxín sín tí jna ntá k'uetqan ch'ín Jesús kixin tsochenkahya sín ninkexró tí nkehe k'uíkon sín hasta tsoxechónjian tí Xjeen Dios K'óna Chojni.

¹⁰ Ntá ninkexró chenkahya sín tí nkehe k'uíkon sín. Na ntá jehó sín mé tjejótjo sín kixin nkehe t'axrxjén tí nkehe chrónka ch'án kixin tsoxechón ch'án inaá. ¹¹ Na ntá kjuanchankíhi sín tí ch'ín Jesús ntá chro sín kixin:

—¿Nkekuènte kixin ntá chro tí sín tjako tí ley kixin saoxín itsi tí ch'ín Elías la ntá chr'éxin itsi tí nkexro tsaáxinni? —ichro sín.

¹² Ntá ntá chro ch'ín Jesús kixin:

—Chaxín saoxín itsi ch'ín Elías la ntá tsjasíyoxin ch'án kaín sín nkehe. ¿A ntá nkehe ntá chro xroon itén Dios kixin nkehe tsonhen tí Xjeen Dios K'óna Chojni? Na mé ntá chro kixin t'ichjánxin tsjasóte la ko tsotjinkakonhya sín. ¹³ Kjánchó ó xrjanca kixin chaxín ó tsíki ch'ín Elías, ntá kjuínchekjásóte sín ch'án éxi kóxrjínhin sín éxi nixja tí xroon itén Dios kixin xikaha tsonhen —mé xikaha chrónka ch'ín Jesús.

Ch'ín Jesús mé kjuínchekitóhe jina ijnko xjan chóna ijnko nchakuen tí jínahya

(Mt. 17.14-21; Lc. 9.37-43)

¹⁴ A ntá tió ikjan sín tí kuítóhe tí í so sín k'uájiko ch'án ntá k'uíkon sín kixin nchónhya chojni tsík'antatjen tí jehe sín. Kjaxín ntaha síin tí sín tjako tí ley ikjo tí jehe sín.

¹⁵ A ntá tuénxín tió k'uíkon sín tí ch'ín Jesús na ntá kaín sín kóchehé sín tinká sín sákjuíchréhe sín ch'án, tsonixjehé sín ch'án. ¹⁶ Ntá ch'ín Jesús kjuanchankíhi ch'án sín ntá chro ch'án kixin:

—¿Nkehe tí tjórá tí sín í? —ichro ch'án.

¹⁷ Ntá tjen ijnko ch'án tjenkákjan sín ntiha kjuátehe ch'án kixin:

—Maestro, ntihi kjuíkian ijnko xjanna chóna nchakuen tí jínahya na mé nchenixjahya xjan. ¹⁸ Kjonté nkerí tjen xjan la tí nchakuen tí jínahya mé tjáka xjan nonte, ntá ntáloxrjo sítixín ir'va xjan na netaón xjan neno xjan na méxra tjeheya xjan. Ntá xrjanóahá tí sín xrikoa kixin chrókuakitsje sín tí nchakuen tí jínahya a. Kjánchó kjuachahya sín —ichro ch'án.

¹⁹ Ntá ch'ín Jesús kjuátehe ch'án ntá chro ch'án kixin:

—Jahará chojni kénhya asánra tinkachónkirá Dios. ¿Xá hasta nkesá tjináonra naxa ts'ejóni? ¿Xá hasta nkesá tsjácha tsjak'é tsjáko hará? Xrákoará ntihi tí xjan méhe —ichro ch'án.

²⁰ Na ntá kóhjinako sín tí xjan a. Na ntá tí nchakuen tí jínahya mé k'uíkon tí ch'ín Jesús ntá kjuínche'aniáte tí xjan a kjuítsínka xjan nonte la kjaminkítaón xjan nonte la sítji ntáloxrjo ir'va xjan. ²¹ Ntá ch'ín Jesús mé kjuanchankíhi tí it'é tí xjan a ntá chro ch'án kixin:

—¿Á ósé xikaha tónhen xjan? —ichro ch'án.

Ntá ntá chro tí it'é tí xjan kixin:

—Desde naxa xjanntsí xjan. ²² A ntá jnkoyaxón tí nchakuen tí jínahya a mé tjákáte xjan xrohi la ko tjákánkí xjan intá kixin tjinkaon chrók'óyán tí xjan a. A ntá jaha zá tsjácha tsjínkítsani? La tikonóehéni tsjínkítsani —ichro ch'án.

²³ Ntá ntáchro ch'ín Jesús kixin:

—¿Nkekuènté tjanchankina kixin á tsjácha? Tí tsitekávan la kaín nkehe la jína tsonhen, kixin tí nkexro tsitekaon Dios la jína tsonhen kaín nkehe —ichro ch'án.

²⁴ Ntá tuénxín itsen kjuátehe tí it'é xjan, ntáchro ch'án kixin:

—Ó titekaonni. Tsjínkítsani kixin antsí má tsitekaonni tí jaha —ichro ch'án.

²⁵ Ntá k'uíkon ch'ín Jesús kixin itsjé chojni kóchjina. Ntá nixjehé ch'án tí nchakuen tí jínahya chóna tí xjan a ntáchro ch'án kixin:

—Jaha la ijnko nchakuen tí jínahya nchenixjahya chojni la ko nchekienhya chojni. Ijie la tétuanhan kixin t'axrjéxian tí xjan na ko tsitohé xjan la í tsokjanhya inaá —ichro ch'án.

²⁶ Ntá tí nchakuen tí jínahya a na mé k'óyato la ko kjuínchek'aniáte tí xjan a inaá, ntá k'uaxrjéxín ntiha. Na éxí tsík'en xjan xikaha tsjehe xjan. Ntá itsjé sín ntáchro sín kixin ó tsíkixín tsík'en xjan, ichro sín. ²⁷ Na ntá ch'ín Jesús mé tséhe tja tí xjan kjuínchek'inkatjen ch'án xjan.

²⁸ Ntá ch'ín Jesús la ko tí sín k'uájiko ch'án k'uixenhen sín ijnko nchia. Ntá jehe sín kjuanchankíhi sín ch'án kixin:

—¿Nkekuènté kixin kjuachahyani kuakitsjeni tí nchakuen tí jínahya a? —ichro sín.

²⁹ Ntá ntáchro ch'án kixin:

—Tíhi la t'ichjánxín kixin nchónhya tsochronóehérá T'aná la ko sintehyará —ichro ch'án.

Yóxin chrónka ch'ín Jesús kixin its'en ch'án

(Mt. 17.22-23; Lc. 9.43-45)

³⁰ A ntá tió sákjuíxín sín ntiha ntá k'uátsínka sín estado Galilea. A ntá ch'ín Jesús tjinkakonhya ch'án kixin ninkexró ntiha tsonhe sín ³¹ kixin tinkákjakohé ch'án tí sín k'uájiko ch'án a. Na mé chrónka ch'án ntáchro ch'án kixin:

—Tí Xjeen Dios K'óna Chojni mé tsotsé sín ch'án la ko tsjikaán sín ch'án na ko ts'óyán sín ch'án. Kjánchó tí yáon níxín na ó tsoxechón ch'án inaá —ichro ch'án.

³² Ntá jehe sín mé kienxínhya sín nkehe tí ntáchro ch'án la chrakon sín chrókjuanchankíhi sín ch'án nkexrí t'axrjéxín tíha.

¿Nkexro tí imá tjetoan?

(Mt. 18.1-5; Lc. 9.46-48)

³³ Ntá kjuíji sín chjasin Capernaum; a ntá tí tjejó sín tí nchia ntiha ntá ch'ín Jesús mé kjuanchankíhi ch'án sín ntáchro ch'án kixin:

—¿Nkehe tí tinkakjórá kichuárá tí kuini ntja? —ichro ch'án.

³⁴ Ntá jehe sín la táníkoá sín kixin tí ntja kui sín tinkákjo kichó sín kixin nkexro tí imá ts'etōan. ³⁵ Ntá ch'ín Jesús mé kjuák'etjāxín ch'án ntá k'uíyehé ch'án tí teyó sín k'uájiko ch'án, a ntá ntáche ch'án sín kixin:

—Tí jnkójínrá tjínkáonrá chrókuétōanrá má ntá t'ichjánxín kixin tsjixixín tsochréhérá kaín sín, ts'ítuanhanrá la ko tsjínkítsará kaín sín sín —ichro ch'án.

³⁶ Ntá tséhe ch'án tja ijnko chánjan kjuak'e ch'án jnkosiné tí tjejó tí jehe sín a, ntá kjóa ch'án tí xjan a. Ntá ntáchro ch'án kixin:

³⁷ —Tí jnkójín nkexro chrók'uáyéhe ijnko chánjan kixin tinkáchónki sín tí janhan la mé xikaha chrók'uáyéhe sín tí janhan la ko kjaxín éxí chrók'uáyéhe sín tí nkexro ichr'ánna —ichro ch'án.

Tí nkexro nínkakuenhyani tí jeheni la tjínkítsa tí jeheni

(Lc. 9.49-50; Mt. 10.42)

³⁸ A ntá ch'ín Juan mé ntáchro ch'án kixin:

—Maestro, k'uíkonni ijnko chojni na mé kjuachaxin ihnjá mé takitsjexín ch'án nchakuen tí jínahya chóna chojni. Ntá k'uétuēnhenni ch'án kixin xikaha chrókjuich'e ch'án kixin xrikohyani ch'án —ichro ch'án.

³⁹ Ntá ntáchro ch'ín Jesús kixin:

—Nté títōhé ch'án kixin ninkexró tjasixín kjuaxroan kjuachaxin njina la tuénxín chrókjuacha chrók'uántaxína sín. ⁴⁰ Tí nkexro nínkakuenhyani la mé tjínkítsa tí jeheni. ⁴¹ A ntá jnkójín nkexro tsotjáhará kjónté ijnko vaso intá tsjanjonxín sín njina kixin jahará la tinkáchónkirá Cristo, ntáxrjan kixin chaxín ts'áyéhe sín nkehe.

Tí chojni tjasin jie mé tsjasóte sín

(Mt. 18.6-9; Lc. 17.1-2)

⁴² A ntá jnkójín nkexro chrókjuachroe ijnko xjan kixin chrókjuasin xjan jie tió tinkáchónki xjan tí janhan la íchá jína chrókjuincheteyá sín ch'án ijnko xro jie tsík'óna xrochre la chrókjuikákánkí sín ch'án ntayáon. ⁴³ A ntá tí itjá tjasixián jie na mé íchá chrókójina chrókochrínjian kixin kjónté jnkokoá tjá mé tsochontaxián kjuachón. A ntá tí yóí tjá la tíha mé sáchrókjuixian tí siín xrohi xitjahya ts'anka, ⁴⁴ tí siín kosintō t'enhya la ko síche xrohi ts'ankahya. ⁴⁵ A ntá kjaxín tí totá tjasixián jie na íchá jína chrókochrínjian kixin kjónté jnkokoá totá mé tsochontaxián kjuachón. A ntá tí yóí totá la tíha sáchrókjuixian tí siín xrohi xitjahya ts'anka, ⁴⁶ tí siín kosintō t'enhya la ko síche xrohi ts'ankahya. ⁴⁷ A ntá tí ikuan tjasixián jie na íchá jína chrókuakitsjenkiá tí kuan a kixin kjónté jnkokoá kuan mé sáchrókjuia tí tjen Dios t'etōan. A ntá tí yóí kuan la tíha mé sáchrókjuixian tí síche xrohi ⁴⁸ tí siín kosintō t'enhya la ko siín xrohi ts'ankahya.

⁴⁹ A ntá kaín nkexro t'ichjánxín tsjasóte. A ntá kaín nkehe ts'áyéhe Dios chóna xjinta. ⁵⁰ Tí xjinta la jína. A ntá tí chrók'uankehe tí jní la ntá xitjahya chrókójní inaá. Jahará mé chrókóyohará éxí xjinta kixin kjuaxróxin chrók'uejokoará kichuárá —ichro ch'án.

Tjako ch'ín Jesús kixin chrókjuákehya kichó sín
(Mt. 19.1-12; Lc. 16.18)

10 Na ntá ch'ín Jesús mé k'uaxrjexín ch'án chjasin Capernaum sákjuí ch'án nó estado Judea la ko nó tóhe ntarío Jordán. Ntá nchónhya chojni kójnkotsé sín tí tjen ch'án ntiha. Ntá kjuákohe ch'án tí jehe sín kixin xíkaha kuèhnen ch'án. ² Ntá iso sín fariseo mé kóchjinehe sín ch'án kjuanchankíhi sín ch'án nkehe, chrókjuachaxín sín ch'án. Ntáchro sín kixin:

—¿Á síin kjuachaxin tsjákehē chojni ntoa ichjién? —ichro sín.

³ Ntá kjuátehe ch'án ntáchro ch'án kixin:

—¿Nkehe tí k'uētuanhanrá tí ch'ín Moisés? —ichro ch'án.

⁴ Ntá ntáchro sín kixin:

—Ch'ín Moisés kjuanjon ch'án kjuachaxin kixin ts'óna ijnko xroon tsakja tí ichjién kixin ts'itjéxín kichó sín —ichro sín.

⁵ Ntá ch'ín Jesús ntáchro ch'án kixin:

—Ntá jahará icha asánrá títékákonhyará ntá k'uētuan ch'án ts'óna tí xroon a. ⁶ Kjánchó tí xrankixixín tió kjuích'éna Dios kaín xín nkehe la kjuích'éna ch'án ijnko chojni ntoa la ko ijnko chojni chjin. ⁷ Méxra tí chojni ntoa tsítóhe ch'án tí it'é ch'án la ko iné ch'án kixin tsakja ch'án ichjién ch'án ⁸ ntá yóí sín ts'óna sín éxí jnkokoá chojni. Méxra jehya yaá chojni. Náhí, jnkokoá. ^{††9} Na mé xíkaha tí kjuachaxin kuènte Dios kójnkojiéxín sín ntá jehe sín chrók'uitjéhyá kichó sín —ichro ch'án.

¹⁰ A ntá tjejó sín nchia ntá tí sín k'uájiko ch'án a mé kjuanchankíhi sín ch'án inaá kixin á xitjahya ts'itjíhi kichó sín. ¹¹ Na ntá ntáchro ch'ín Jesús kixin:

—Tí jnkojín nkexro tsjákehē ichjién ntá tsakja ch'án í jnko chjin na mé xíkaha tsjákehē ch'án tí tjan tsítkótehe ch'án saoxín. ¹² La ko kjaxin tí chojni chjin tsíkjákehē xii tsakja tjan í jnko chojni ntoa na mé xíkaha kjaxin tjan tjasin tjan jje —ichro ch'án.

Ch'ín Jesús kjuíncheyaon ch'án xjan

(Mt. 19.13-15; Lc. 18.15-17)

¹³ Ntá kjuíkao sín xjan kixin tjinkaon sín tsjak'etja tja ch'ín Jesús tí xjan a. Ntá tí sín k'uájiko ch'án mé kóninkakonhen sín tí sin kjuíkao xjan. ¹⁴ Ntá k'uíkon ch'ín Jesús ntá kónínkaon ch'án ntáchro ch'án kixin:

—Nté tjtóhérá tí xjan tsoxrakoa tí tjén janhan la t'inkakuènhyará xjan kixin tí sín kuènte kjuachaxin kuènte Dios la mé tóyóhé éxí tí xjan a. ¹⁵ Ntá chaxín ntáxrjan kixin tí nkexro ts'ónahya éxí ijnko chánjan xitjaha ts'ejó sín tí ts'etuan Dios tí kjuachaxin kuènte ch'án —ichro ch'án.

¹⁶ Ntá kjóa ch'án tí xjan a kjuak'etja tja ch'án xjan la kjuíncheyaon ch'án.

Ijnko ch'ín ntasoá rico nixjehē ch'án tí ch'ín Jesús
(Mt. 19.16-30; Lc. 18.18-30)

¹⁷ A ntá tió sákjuí ch'ín Jesús inaá ntá xrakoa ijnko ch'ín tinká ch'án kjuák'exín toch'in ch'án nkayakon tí ch'ín Jesús kjuanchankí ch'án kixin:

—Jaha, maestro jína. ¿Nkexrí chrókjuich'eni kixin chrók'uitjani kjuachón jnkochrín? —ichro ch'án.

¹⁸ Ntá ntáche ch'ín Jesús tí jehe ch'án kixin:

—¿Nkekuènté ntáchrua kixin jína tí janhan? Jehó jnkokoá nkexro mé jína la tíha mé Dios. ¹⁹ Ntá jaha ó noha kixin nkexrí k'uētuan Dios kixin:

“Chrókjuacheéhya kichuá la chrók'oyánhya chojni la chrókueghya la chrókjontahya kichuá la chrókjuich'ihya la ko chróchontehé kjuasáya it'á la ko iná” ‡ —ichro ch'án.

²⁰ A ntá jehe ch'án kjuátehe ch'án ntáchro ch'án kixin:

—Maestro, kaín tíha kjuínchexiteyáni desde ntasoáni —ichro ch'án.

²¹ Ntá ch'ín Jesús mé komá ch'án la ko tjuèhe ch'án tí ch'ín a. Ntá ntáchro ch'án kixin:

—Naxa t'itjayan jnkokoá nkehe chrókjuich'e. Sátjia nchekjia kaín tí nkehe chonta. A ntá tí chichaon sijnchekjixián tí nkehe chonta la mé nchekjtonhén tí chojni nòa, a ntá tí nkehe tjete tsochonta nkaya nkajní. A ntá tió tsjixin tsjánjuan kaín ntá tsjihá tamá tí ntacruz kuènta la chréhé tí janhan —ichro ch'án.

²² Ntá tió kuínhin ch'án xíkaha ntá k'uává ch'án sákjuí ch'án, kixin imá tsjé nkehe chóna ch'án.

²³ Ntá ch'ín Jesús komá ch'án tí sín síin ntiha ntáche ch'án tí sín síin k'uájiko ch'án kixin:

—Imá xra ijnko chojni chóna imá tsjé nkehe ts'ixenhen sín tí tjen Dios t'etuan —ichro ch'án.

²⁴ Ntá tóxakonhen tí sín k'uájiko ch'án kixin xíkaha ntáchro ch'án. Ntá chrónka ch'án inaá kixin:

—Tí sín tjekonhen tí nkehe chóna sín na imá xra ts'ixenhen sín tí tjen Dios t'etuan. ²⁵ Antsí xrahya chrók'uátsínka ijnko kocamello ijnko tjar'in ntachica tjexrja. A ntá antsí má xra ijnko ch'ín chóna itsjé nkehe chrók'uixenhen ch'án tí tjen Dios t'etuan —ichro ch'án.

²⁶ Ntá jehe sín kuínhin sín xíkaha ntá imá chrakon sín. Ntá tjanchankíhi kichó sín kixin:

—Tí xíkaha la, ¿xá nkexro chrókjuacha chrókuaá? —ichro sín.

²⁷ Ntá komá ch'ín Jesús tí jehe sín ntáchro ch'án kixin:

—A ntá chojni ó tsjachahya sich'e tíha, a ntá Dios jína sich'e kaín nkehe, kixin Dios la kohya nkehe tsjachahya sich'e —ichro ch'án.

²⁸ Ntá ch'ín Pedro ntáchro ch'án kixin:

—Inchéni, kaín ni mé kuítóheni kaín nkehe chónani ntá chréhēni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Chaxín ntáxrjan kixin jnkojín nkexro tsítóhe nteó sín la o tí kichó ntoa o tí kichó chjin la o it'é o iné sín o ichjién sín o xjeen sín o nontee kixin tinkáchónki sín tí

† Génesis 1.27; 5.2 †† Génesis 2.24

‡ Éxodo 20.12-16; Deuteronomio 5.16-20

janhan la ko tjinkaon sín chrókjuako sín tí tan tsjanjon kjuachón ³⁰ na mé ntihi chjasintajni tsochónta sín ciento veces nchónhya ntqe sín la ko éxí kichó sín la ko éxí iné sín la ko éxí xjeen sín ts'ikon sín itsjé chojni kjé la ko éxí nontee sín xikaha ts'ikon sín itsjé nonte. Kjonté tsjasóte sín ntihi chjasintajni ntá chr'éxín tsochónta sín tí kjuachón jnkochrín. ³¹ A ntá itsjé tí sín t'etqan ijie mé tsjixín tsochréhe sín. A ntá itsjé tí sín t'ítuenhen ijie, na mé tí sín a mé ts'etqan sín tí ntiha.

Níxin chronka ch'ín Jesús kixin its'en ch'án

(Mt. 20.17-19; Lc. 18.31-34)

³² Ntá tjejótti sín chriin sín tí ntja sátsji chjasin Jerusalén. Ntá ch'ín Jesús mé tjetaón ch'án ntja ntá tí sín k'uájiko ch'án mé tóxakonhen sín chrakon sín chréhe sín. Ntá k'uíyehé ch'án jehó tí teyó sín inaá ntá kjuankíxin ch'án chénka ch'án sín nkexrí tí nkehe tsonhen ch'án. ³³ Ntá ntáchro ch'án kixin:

—Ijie sátsjini Jerusalén. Na ntá tí Xjeen Dios K'óna Chojni mé tsotsé sín ch'án tsjikénhen sín tí sín nchat'á t'etqan la ko tí sín tjako tí ley. Ntá ts'etqan sín kixin its'en ch'án. Ntá sinchek'áyehé sín ch'án tí sín jehya judío. ³⁴ Ntá jehe sín la tsjanoá sín tí jehe ch'án la ko ntaté sín tsíkíte sín ch'án la ko tsjate sín ch'án ntá ts'óyán sín ch'án. Kjánchó tí yaon níxin mé tsoxechón ch'án inaá —mé xikaha ichro ch'ín Jesús.

Ch'ín Jacobo la ko ch'ín Juan tjanchia sín nkehe

(Mt. 20.20-28)

³⁵ A ntá tí ch'ín Jacobo la ko ch'ín Juan mé xjeen ch'ín Zebedeo mé kóchjinehe sín tí ch'ín Jesús ntá ntáchro sín kixin:

—Maestro, tjanchahani ijnko xra —ichro sín.

³⁶ Ntá kjuanchankí ch'ín Jesús ntáchro ch'án kixin:

—¿Nkehe tí xra tjinkáonrá chrókjuít'ahará? —ichro ch'án.

³⁷ Ntá ntáchro sín kixin:

—Tió tsétoanxián tí kjuachaxián jié na tjinkaonni kixin ijnkoni chrókjuak'eni itjá chjina a í jnkoni chrókjuak'eni itjá kjon —ichro sín.

³⁸ Ntá ntáche ch'ín Jesús tí jehe sín kixin:

—Jahará la noahyará nkehe tí tjanchanará. ¿Á chrókjuachará chrók'uirá tí nkehe itsjá its'ia janhan la ko á chrókjuachará chrók'ukiterá éxí tsikite janhan? —ichro ch'án.

³⁹ Ntá jehe sín kjuátehe sín ntáchro sín kixin:

—Kja tsjachani —ichro sín.

Ntá ntáche ch'ín Jesús tí jehe sín kixin:

—Chaxín its'irá éxí tí nkehe tsjá its'ia la ko tsikiterá éxí tsikite janhan. ⁴⁰ Kjánchó janhan xitjahya tsjánjuan kjuachaxin kixin ijnkorá chrókjuak'erá tjaná chjina la í jnkorá chrókjuak'erá tjaná kjon kixin janhan na tónahya tocar tsjánjuan tíha kixin tí sín a la xráxín ó tsíkónoxín —ichro ch'án.

⁴¹ A ntá tió kuínhin tí ite sín xikaha tsintáchro tí sín a ntá kjuankíxin kónínkakonhen sín tí ch'ín Jacobo la ko tí ch'ín Juan. ⁴² Ntá k'uíyehé ch'ín Jesús kaín tí jehe sín ntá ntáche ch'án sín kixin:

—Ó nohará kixin tí sín t'etqan chjasintajni la imá t'etuenhen sín kaín chojni la ko tí sín imá tjetqan mé imá nchehnkehe asén sín kixin ihyé sín ts'etqan sín. ⁴³ Kjánchó jahará la xikaha chrókjuich'erá. Náhí. Tí jnkojínrá tjinkáonrá chrókuétoanrá la chrókjuínkítsará tí í so sín. ⁴⁴ A ntá tió jnkojínrá antsí chrókuétoanrá mé t'ichjánxín senó chrókjuákoxínrá chrókjuich'eherá kichuárá xra. ⁴⁵ Kixin tí Xjeen Dios K'óna Chojni mé kuihya ch'án kixin chojni chrókjuich'ehe ch'án xra. Náhí. Ikui ch'án kixin sich'ehe ch'án sín xra la ko ts'enyákonhen nchónhya chojni kixin tsaáxin sín ch'án —ichro ch'án.

Ch'ín Bartimeo k'uék'ikonhya ch'án ntá ch'ín Jesús kjuínchekitohe ch'án jina

(Mt. 20.29-34; Lc. 18.35-43)

⁴⁶ Ntá kjuíji sín chjasin Jericó. Ntá ch'ín Jesús la ko tí sín k'uájiko ch'án la ko nchónhya chojni k'uaxrjexín sín tí chjasin ntiha. Ntá ntiha tjen ijnko ch'ín t'ikonhya mé it'in ch'án Bartimeo ntá it'é ch'án mé it'in Timeo. Tjetjaxín ch'án chrínta ntja tjanchak'á ch'án. ⁴⁷ Ntá kuínhin tí ch'ín t'ikonhya kixin ó kuichjina ch'ín Jesús, mé tí nkexro kjuixín chjasin Nazaret, ntá tí ch'ín t'ikonhya kjuankíxin t'èya ch'án ntáchro ch'án kixin:

—Jaha Jesús, tsík'axrjeníxian ch'ín David tikonóehéni —ichro ch'án.

⁴⁸ Ntá nchónhya sín k'uétuenhen sín ch'án kixin tsotáni ch'án. Ntá íchá antsí má tsen t'èya ch'án ntáchro ch'án kixin:

—Jaha, tsík'axrjeníxian ch'ín David tikonóehéni —ichro ch'án.

⁴⁹ Ntá ntahó kjuák'e ch'ín Jesús. Ntá k'uétqan ch'án kixin:

—T'iyehérá tí ch'ín a —ichro ch'án.

Ntá k'uíyehé sín tí ch'ín t'ikonhya ntá chénka sín ch'án kixin:

—Tócháha la t'inkatjen kixin tjet'iyaha ch'án. —ichro sín.

⁵⁰ Ntá kjuak'e ch'án tí ka titsáte ch'án ntá chrika k'uínkatjen ch'án kóchjinehe ch'án tí tjen ch'ín Jesús.

⁵¹ Ntá ch'ín Jesús kjuanchankíhi ch'án tí ch'ín a kixin:

—¿Xá nkehe tjinkávan chrókjuít'ahá? —ichro ch'án.

Ntá kjuátehe tí ch'ín t'ikonhya ntáchro ch'án kixin: —Maestro, tjinkaonni kixin chrók'uikonni —ichro ch'án.

⁵² Ntá ntáche ch'ín Jesús tí ch'ín a kixin:

—Ijie la jina sátsjia. Ó kuítóha jina kixin kuítekáván tí janhan —ichro ch'án.

Ntá tuénxín tí ch'ín t'ikonhya la ó k'uíkon ch'án ntá chréhe ch'án tí ch'ín Jesús.

Ntá ch'ín Jesús k'uixenhen ch'án chjasin Jerusalén

(Mt. 21.1-11; Lc. 19.28-40; Jn. 12.12-19)

11 Ntá tió kjuíji chjina sín chjasin Jerusalén chjina xón tí chjasin Betfagé la ko chjasin Betania chok'èxin tí jna Olivo ntá k'uétuenhen ch'ín Jesús iyó tí sín k'uájiko ch'án, ² ntáchro ch'án kixin:

—Sátjirá tí chjasin ntsí chok'èxin ntiha. Ntá ikon chjasin ts'ikonrá kixin ntaha tjechroé ijnko kolócho naxa ninkexró tjiták'áhya va. Ntá tjasintankehérá va ntá tsjikoanará va ntihi. ³ A ntá tí jnkójín chojni tsjan-chankíhará sín kixin nkekuènté xikaha ch'erá ntá tson-táchrórá kixin: “Tí Maestro mé t'ichjánxinhin va ntá tió tsoxéhe va la tsjikaáni va”, ichrorá —ichro ch'án.

⁴ Ntá jehe sín mé sákjuí sín k'uitja sín tí kolócho tjechroé va chjinaxón ntója nchia ntá kjuasintankehé sín va. ⁵ Ntá iso tí chojni tjejó ntiha kjuanchankí sín kixin:

—¿Nkekuènté xikaha ch'erá tjasintankehérá tí kolócho a? —mé chro sín.

⁶ Ntá kjuáteexín sín éxí k'uetjoan ch'ín Jesús. Ntá kjuanjon sín kjuachaxin sátsjiko sín va. ⁷ Ntá tí kolócho mé kjuikohe sín ch'ín Jesús. Na ntá iké sín kjuínchekamá sín va, ntá kjuák'ekjen ch'ín Jesús. ⁸ Ntá itsjé chojni kuakitsje sín iké sín la kjuentoá sín tinkák'ikjínxín sín ka tí ntja ts'atsínkaxín ch'án. Ntá iso sín la mé tóchrínjin sín chaon nta itsá kayoa ntá xráko sín tinkát'itjí sín ntja.

⁹ A ntá tí sín tsítaón ntja la ko tí sín chréhe iton kjuankixin sín itsje sín chéhe sín ntáchró sín kixin:

—Tsjancheheni kjuasáyé Dios. Jína tí nkexro kuixín kjuachaxin ihnjé Ìnchéni. ¹⁰ Jína tí kjuachaxién Dios itsi mé ts'etuñhen tí nkexro k'uaxrjeníxín it'éni David. Ntá tsjancheheni kjuasáyé Dios tjen nkaya nkajní —ichro sín.

¹¹ Ntá k'uixenhen ch'ín Jesús chjasin Jerusalén la ko kjaxin k'uixenhen ch'án tí njnko jíe tsjehe ch'án nkuixín tí nkaxenhen. Ntá ó kóntó ntá ch'ín Jesús sákjuíko ch'án tí teyó sín k'uájiko ch'án sákjuí sín chjasin Betania.

Ch'ín Jesús kóninkakonhen ch'án ijnko nta t'óna to higo tsík'ónahya to

(Mt. 21.18-19)

¹² A ntá tí kóyaoon ntá kjanxín sín chjasin Betania ntá ch'ín Jesús mé k'uén ch'án kjinta. ¹³ Ntá k'uíkon ch'án kjín kixin itjen ijnko nta t'óna to higo itsá kayoa. Ntá sákjuitsjehe ch'án tí nta kixin ákué tsahya to. Ntá k'uíkon ch'án kixin jehó ka itsa tí nta a kixin jehya tí yaoon ts'óna to. ¹⁴ Ntá nixjehe ch'ín Jesús tí nta t'óna to higo k'uetuñhen ch'án tí nta kixin:

—Í ninkexró sinehya tí to ts'óna tí jaha inaá —ichro ch'án.

A ntá tí sín k'uájiko ch'án mé kuínhin sín xikaha.

Ch'ín Jesús kjuínchetjóá ch'án njnko

(Mt. 21.12-17; Lc. 19.45-48; Jn. 2.13-22)

¹⁵ Ntá kjuíji sín chjasin Jerusalén. Ntá k'uixenhen ch'ín Jesús nkaxenhen njnko a. Ntá kjuankixin ch'án k'uínkité ch'án tí sín nchekjixín nkehe ntiha la ko tí sín t'ena nkehe ntiha. A ntá kótéka ch'án tí mesa tjínkítóxixín sín chichaon la ko tí silla tjejókjén tí sín nchekji kontóá ¹⁶ la ko kjuanjonhya ch'án kjuachaxin kixin tsamá sín nkehe ts'ajixenhen sín njnko. ¹⁷ Ntá kjuakohé ch'án sín ntáchró ch'án kixin:

—Ntáchró xroon itén Dios kixin: “Tí ntóna i mé it'ín nchia tsonixjanaxín chojni nkuixín nación”, a ntá jahará tsíkjich'énará itjueé xíchee † —ichro ch'án.

¹⁸ Ntá tí sín nchat'á t'etjoan la ko tí sín maestro tjako tí ley na mé kuínhin sín tíha, ntá kjuéyá sín nkexrí chrók'óyán sín ch'án, kjánchó chrakon sín kixin kóxrjínhin tí chojni tí nkehe kjuako ch'án. ¹⁹ Kjánchó ntá ó kóntó ntá k'uaxrjéxín ch'án tí chjasin a sákjuí ch'án.

Ó tsixámá tí nta t'óna to higo

(Mt. 21.20-22)

²⁰ A ntá tí nchítjen k'uátsínka sín tí tjen tí nta t'óna to higo ntá k'uíkon sín kixin ó tsixámáxín nuèe tí nta. ²¹ A ntá ch'ín Pedro xráxinkaon ch'án ntáche ch'án tí ch'ín Jesús kixin:

—Maestro, tsjehé tí nta t'óna to higo kóninkakonhén jna na ó tsixámá nta —ichro ch'án.

²² Ntá kjuátehe ch'ín Jesús ntáchró ch'án kixin:

—Tinkachónkirá Dios. ²³ Chaxín ntáxrjan kixin jnkójínrá chróntácherá tí jna i kixin: “Sátjixián ntihi tjíkjikaníá ntayaon”, a ntá tí kaín asánrá chrókuinkachónkirá Dios kixin chróxiteyá tí nkehe tsontáchrórá, ntá xikaha chaxín tsonhen. ²⁴ Mé xikaha ntáxrjan kixin kaín tí nkehe tsjanchehérá Dios tí tsitékáonrá kixin chaxín ts'ayéhérá ntá xikaha tsonhen tsoxiteyá. ²⁵ A ntá tió tjejonixjehérá Dios ntá jnkójín nkexro naxa ninkákonhénrá, la chrók'uitjáyahanhárá tíha kixin It'ará tjen nkaya nkajní kjaxin chrókjuinçek'itjáyán ch'án tí jie chontará. ²⁶ A ntá tí sinček'itjáyánhyará tí ijje chojni ntá It'ará tjen nkaya nkajní la kjaxin sinček'itjáyánhya ch'án tí jie chontará.

Tjanchankíhi sín tí ch'ín Jesús nkehe tí kjuachaxin chóna ch'án

(Mt. 21.23-27; Lc. 20.1-8)

²⁷ Ntá xíkjan sín chjasin Jerusalén inaá. Ntá xritjak'e ch'án nkaxenhen njnko ntá kóchjina tí sín nchat'á t'etjoan la ko tí sín tjako tí ley la ko tí sín táda t'etjoan njnko ²⁸ kjuanchankíhi sín ch'án kixin:

—¿Nkehe tí kjuachaxin chonta jaha kixin xikaha ch'e? ¿Nkexro tjáha tí kjuachaxin kixin xikaha kjuích'e? —ichro sín.

²⁹ Ntá kjuátehe ch'ín Jesús ntáchró ch'án kixin:

—Ntá kjaxin janhan tsjánchánkíhárá ijnko nkehe, siná á chrókjuáteherá, ntá tsotjonkará nkehe tí kjuachaxin chonta janhan kixin xikaha it'a. ³⁰ ¿A ntá nkexro k'uetuñhen ch'ín Juan kixin tsíkite ch'án chojni? ¿Á Dios ní ó á chojni ó? A ntá jie la tjáteherá —ichro ch'án.

³¹ Ntá kjuankixin jehó sín tjo sín kichó sín kixin:

—Tí tsontáchróni kixin Dios tsík'etuñhen tí ch'ín Juan ntá tsjanchankí tí ch'ín a kixin nkekuènté kuítekakuenhyani ch'án. ³² ¿Á chróntáchróni kixin chojni ó tsík'etuñhen ch'án? —ichro sín.

Kjánchó chrakonhen sín tí chojni chjasin kixin kaín sín kuítekaon sín kixin ch'ín Juan mé k'uénixja ch'án itén Dios. ³³ Ntá ntáche sín tí ch'ín Jesús kixin:

† Isaías 56.7; Jeremías 7.11

—Noehyani —ichro sín.

Ntá ntáchro ch'ín Jesús kixin:

—La ko kjaxin janhan tsqxrxankahya nkexro kjuanjon kjuachaxin kixin xikaha t'a —ichro ch'án.

Ch'ín Jesús mé kjuíncheyóexin ch'án éxí chojni ch'ehya xra jína

(Mt. 21.33-46; Lc. 20.9-19)

12 Ntá ch'ín Jesús kjuíncheyóexin ch'án inaá ntáchro ch'án kixin:

—Itjen ijnko ch'ín k'uęnkaxin ch'án itsjé ntanò a t'óna to uva nontee ch'án la ko kjuích'éna ch'án corral la ko kjuích'éna ch'án ijnko tòye ts'énya sín to uva. A ntá kjuích'éna ch'án ijnko tjt'ò noi kixin ts'it'ótjen ch'án tsokotohe ch'án.

A ntá kjuínchekjen ch'án tí nonte iso chojni ch'e xra. Ntá sákjuí ch'án kjin. ² Ntá tí kjuixraká tí yaon ts'óna to ntá k'uętuęnen ch'án ijnko tí nkexro ch'ehe ch'án xra kixin sátsjikjanchehe ch'án tí sín ch'e xra jnkosiné tí to tsakja ch'án. ³ Ntá tí sín ch'e xra mé tsé sín tí ch'ín a, kjuate sín ch'án ntá ninkehó chjéhya sín ch'án ntá sákjuí ch'án. ⁴ A ntá tí inché tí nonte mé xichr'án ch'án tí í jnko nkexro ch'ehe ch'án xra. Ntá kjuíji ch'án ntiha ntá chjéhe sín ch'án xro kjuíncheníhi sín kja ch'án la ko k'uántaxinhin sín ch'án. ⁵ Ntá tí inché tí nonte a xichr'án ch'án í jnko chojni sákjuitsjehe ntiha. Ntá kjuíji ch'án ntiha ntá k'óyan sín ch'án. Ntá chr'éxin tí inché mé xichr'án ch'án í so nkexro ch'ehe ch'án xra sákjuít-sjehe sín, kjánchó iso sín k'uékon sín la í so sín la k'óyan sín.

⁶ Ntá jehe ch'án chóna ch'án jnkokoáxón xjeen ch'án na imá tjuèhe ch'án tí xjan a. Ntá kjuixixín chr'án ch'án tí xjan sákjuí xjan kixin kjuenkayáxin ch'án kixin: "Tsochóntehe sín kjuasáyé tí xjanna", ichro ch'án. ⁷ A ntá tí sín ch'e xra a tjo sín kichó sín kixin: "Tí ch'ín í mé ts'áyéhe kaín nkehe sín ntihi. A ntá jie ts'óyánni ch'án, a ntá jeheni ts'áyéhe ni kaín tí nkehe a", ichro sín. ⁸ Ntá xikaha itsé sín ch'án k'óyan sín ch'án ntá kuakitsjexin sín ntoe ch'án tí nontee ch'án.

⁹ A ntá kjuanchankí ch'ín Jesús ntáchro ch'án kixin:

—¿A ntá nkehe chrókjuich'e tí inché tí nonte a? Chrókui ch'án chrók'óyan ch'án tí sín ch'e xra, a ntá chróchjéhe ch'án ókjé chojni. †

¹⁰ ¿A kjuínchekuáxinhyará jahará tí xroon itén Dios? Ntáchro xikihí:

Tí xro náxrjónhya kuitpenta tí sín ch'éna tjt'ò, mé jie k'óna tí xro tjetoo.

¹¹ Mé xikaha kjuích'é Ìnchéni Dios, na ntá tíha mé ijnko nkehe kjuachrakon k'uífkonni †† —ichro ch'ín Jesús.

¹² Ntá chrótsé sín tí ch'ín Jesús chrókjuak'echjina sín ch'án kixin kienxín sín kixin kaín tí ntáchro ch'án la jehe ch'án k'uántaxinhin tí jehe sín. Kjánchó chrakon sín kixin nchónhya chojni kóchjina ntá kuitpente sín ch'án ntá sákjuí sín.

¿A jína chrókjuenkehe sín gobierno?

(Mt. 22.15-22; Lc. 20.20-26)

¹³ A ntá ichr'án sín iso tí sín fariseo la ko iso tí sín kuènte ch'ín Herodes kixin tsjanchankíhi sín ch'án iso nkehe kixin tí ntoáhya chrókjuatehe ch'án ntá jína chrók'ueka sín ch'án jie. ¹⁴ Ntá kjuíji sín tí tjen ch'ín Jesús ntáchro sín kixin:

—Maestro, ó noheni kixin tí nkehe chronka la chaxín tíha la ko jehya nkexrí tsjehe chojni tjenkayáxixián kixin á jína sín, la ko ntoá tjakua ntje Dios. ¿A jína chrókjuenkeheni tí gobierno tí chichaon tjanchia? ¿A chrókjuenkeheni sín ní o náhi? —ichro sín.

¹⁵ Ntá ch'ín Jesús kjuátsqan ch'án kixin jehya jína tjenkayáxin sín ntáchro ch'án kixin:

—Jehya jína kixin tjáchaxinráni. Xrákoar á ijnko tí chichaon tjanchia sín tsotsjáha —ichro ch'án.

¹⁶ Ntá xrákao sín ijnko tí chichaon tsotsjehe ch'án. A ntá kjuanchankí ch'án kixin:

—¿Nkexro tí tsík'axrxén tjenkáni tí chichaon i la ko nkexro ihnjé chóna? —ichro ch'án.

Ntá jehe sín kjuátehe sín kixin:

—Tí ch'ín t'ętoan mé tjenkáni ch'án —ichro sín.

¹⁷ Ntá kjuátehe ch'ín Jesús ntáchro ch'án kixin:

—Chróchjehérá tí ch'ín gobierno t'ętoan tí nkehe kuènte ch'án; a ntá tí nkehe kuènte Dios la chróch-jehérá Dios —ichro ch'án.

Ntá chrakon sín kixin xikaha kjuátehe ch'án.

Kjuanchankí sín kixin á chaxín tsoxechón chojni

(Mt. 22.23-33; Lc. 20.27-40)

¹⁸ A ntá iso sín saduceo kuitsjehe sín tí ch'ín Jesús. A ntá tí sín saduceo mé ntáchro sín kixin chaxínhya tsoxechón chojni tsík'en mé xikaha chrókjuachaxin sín tí ch'ín Jesús ntáchro sín kixin:

¹⁹ —Maestro, ch'ín Moisés mé tsíkjin ch'án xroon ntáchro kixin tí ts'en ijnko savé chojni la ko naxa tjen tí ichjién ch'án na ko tsíkjich'énahya sín xjeen sín ntá tí kichó tí nkexro tsík'en mé chrókuakja tí tjan k'án a ntá tí xjeen sín mé ts'óna éxí xjeen tí nkexro tsík'en.

²⁰ Kjánchó k'uéjó yato sín jnkokoá kichó sín. Ntá tí ch'ín saó mé kuákja ch'án ichjién ch'án. Ntá ik'uén ch'án, kjánchó ninkehó xjan tsíkjich'énahya sín. ²¹ Ntá tí ch'ín tsoyo yóxin kuákja ch'án tí tjan k'án ntá k'uén ch'án koí ch'án. Ntá kjaxin tsíkjich'énahya sín xjan. A ntá tí ch'ín níxin kuákja ch'án tí jehe tjan ntá xikaha kónhen inaá. ²² Ntá kayatoé sín k'uéchóna sín tjan la ko kaín sín ik'uén sín la ko ninkehó xjan kjuích'énahya sín kaín sín. Ntá kjuixixín ntá k'uén tjan kjaxin tjan.

²³ Ntá tió tsoxechón kaín xín chojni la, ¿Ntá nkexro ts'óna na xii tjan kixin kayatoé sín tsíkótehe tjan? —ichro sín.

²⁴ Ntá kjuátehe ch'ín Jesús ntáchro ch'án kixin:

—Ntoáhya tjenkayáxinrá kixin tiénxinhyará nkehe ntáchro tí xroon itén Dios la ko chonhyará tí kjuachaxién Dios. ²⁵ A ntá tió tsoxechón tí chojni tsík'en la tsotęehya sín la ko tsjanjonhya sín xjeen sín kixin tsotęehya sín kixin tí sín tsík'en la éxí sín ángel ts'ejó sín

† Isaías 5.1-7 †† Salmo 118.22-23

‡ Deuteronomio 25.5

nkaya nkajní. ²⁶ A ntá tí tsoxechón tí sín tsík'en, ¿á kjuínchekuáxinhyará tí xroon tsíkjin ch'ín Moisés chrónka nkexrí k'uénixjéexín Dios ijnko nta yoa tjeche ntáchro ch'án xíkíhi: "Janhan mé tí Dios tinkáchónki ch'ín Abraham la ko ch'ín Isaac la ko ch'ín Jacob?" ²⁷ Méxra tí Dios i la jehya tinkáchónki tí sín tsík'en. Náhí. Jehe ch'án mé Dios tinkáchónki tí sín tjejóchón. Ntá jahará la imá tiénxinhyará kixin xíkaha ichrorá tjanchankirá —ichro ch'án.

Tí nkehe antsí imá tjeoan tsík'etōan Dios

(Mt. 22.34-40)

²⁸ Ntá kui ijnko ch'ín tjako tí ley kjuák'ekinhin ch'án nkexrí kjuachaxín sín ch'ín Jesús. Ntá kuínhin ch'án kixin imá jína kjuátehe ch'ín Jesús. Ntá kjuanchankí ch'án ntáchro ch'án kixin:

—¿Nkehe tí antsí tjeoan tsík'etōan Dios? —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Tí nkehe antsí tjeoan tsík'etōan Dios mé tíhi: "Tinhínra kaín rá chojni Israel kixin Ìnchéni Dios la mé jnkokoá la kohya í jnko nkexro. ³⁰ Ntá kaín asánra la ko kaín kjuaxrexinkaon kuéntará la ko kaín fuerza kuéntará chrótjuèxínra." ^{††} Mé xíkaha tí nkehe antsí tjeoan tsík'etōan Dios. ³¹ A ntá tí nkehe yóxin tsík'etōan Dios la mé tóyohé na mé ntáchro xíkíhi: "Chrótjuèhéra kichuára éxi tjuèxínra asánra," [‡] la kohya í jnko nkehe antsí má tjeoan tsík'etōan ch'án —ichro ch'ín Jesús.

³² A ntá kjuátehe tí ch'ín tjako nínko a ntáchro ch'án kixin:

—Ntoá ntáchrúa tíha, Maestro kixin chaxín itjen jnkokoáxon Dios la ko kohya í jnko Dios. ^{††33} Noheni kixin kaín asénni la ko kaín kjuaxrexinkaon kuénténi la ko kaín fuerza kuénténi chrótjuèxínni Dios la ko chrótjuèheni kichó ni éxi tjuèxínni asénni. ^{††} Tíha mé antsí má sínkí. A ntá kaín tí ko chrók'óyánni chrókjuanjónni chróchjánxin chrítaón altar la kánhyó tjeoan tíha —ichro ch'án.

³⁴ A ntá tíó k'uíkon ch'ín Jesús kixin jína kjuenkayáxin ch'án kjuátehe ch'án ntá ntáchro ch'án kixin:

—Jaha la kjinhya tjen tí kjuachaxin kuénte Dios —ichro ch'án.

Ntá kóxakonhen sín ntá ninkexró kjuanchankíehya sín ch'án í so nkehe.

¿Xá nkexro It'é tí Cristo?

(Mt. 22.41-46; Lc. 20.41-44)

³⁵ Ntá ch'ín Jesús kjuák'ekjako ch'án tí nínko jíé. Ntá kjuanchankí ch'án ntáchro ch'án kixin:

—¿Nkexrí kixin tí sín tjako tí ley mé ntáchro sín kixin tí Cristo mé ts'axrjenixin tí ch'ín David? ³⁶ A ntá tí Nchakuen Dios mé kjuínkítsa tí ch'ín David ntáchro ch'án kixin:

Ìnchéni Dios ntáche tí Ìnchéni kixin:
"Tjak'e tjaná chjina ntiho tsétoan,

tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétoan" ^{†††}

³⁷ ¿Xá nkexrí kixin Cristo chrók'óna xjeen ch'ín David kixin jehe ch'ín David ntáchro ch'án kixin Ìnché ch'án tí Cristo a? —ichro ch'án.

Ntá itsjé chojni k'uéjókinhin sín kóxrjinhin sín tí nkehe kjuako ch'án.

Ch'ín Jesús chrónka nkexrí ch'e tí sín tjako tí ley

(Mt. 23.1-36; Lc. 11.37-54; 20.45-47)

³⁸ Ntá ch'ín Jesús kjuako ch'án ntáchro ch'án kixin:

—Tankíehyará tí sín tjako tí ley. Jehe sín mé tóxrjinhin sín chrók'uinkáya sín ka kjinjin la ko tjinkaon sín kixin kaín tí chojni tsoxeta sín ntia mé tsjikosáyehe sín. ³⁹ Jehe sín xritjeyá sín tí nta antsí náxrjón ts'ejóyá sín tí nkaxenhen nínko. La ko kjaxin tíó sátsji sín tí sine sín xritjeyá sín tí nta antsí náxrjón ts'ejókjen sín sine sín. ⁴⁰ La ko takitsje sín ntōe chojni k'án. La ko ch'iyexín sín chojni kixin isé nixjehé sín Dios kixin chrókuinhin chojni chróntáchro sín kixin imá jína tí jehe sín. Tí sín a mé antsí má tsjasóte sín —ichro ch'án.

Tí ofrenda kjuanjon ijnko tjan k'án

(Lc. 21.1-4)

⁴¹ A ntá jnkonaá mé ch'ín Jesús tjetjaxin ch'án nkaxenhen nínko chók'èxin tjen tí ntacajón tjetóxyóyá ofrenda. Ntá tjetsjehe ch'án kixin nchónhya chojni tinkáki sín chr'áxenhen sín chichaon tí ntacajón. La ko kjaxin nchónhya tí sín rico chr'áxenhen sín nchónhya chichaon tí ntacajón a. ⁴² Ntá kjaxin ntiha mé kjuí ijnko tjan k'án nòa tjan ntá chr'áxenhen tjan tí ntacajón yaá chichaon kánhyó tje té sínkí. ⁴³ Ntá ch'ín Jesús k'uíyehé ch'án tí sín k'uájiko ch'án ntáchro ch'án kixin:

—Chaxín ntáxrjan kixin tí tjan k'án nòa tjan antsí tje té k'uíkon Dios tí chichaon chr'áxenhen tjan tí ntacajón, a ntá tí sín í so la kánhyó ⁴⁴ kixin kaín sín la ó chichaon xéhe sín kjuanjon sín. Ntá jehe tjan la kjónté nòa tjan la kjuanjon tjan kaín tí chichaon k'uéchóna tjan chrók'uite nkehe chrókjóné tjan —ichro ch'án.

Ch'ín Jesús chrónka kixin tsoxíka nínko

(Mt. 24.1-2; Lc. 21.5-6)

13 A ntá tíó k'uaxrjexín ch'ín Jesús tí nínko jíé ntá ijnko tí sín k'uájiko ch'án ntáchro ch'án kixin:

—Maestro, kjuánchí náxrjón tí xro la ko tí nchia tsík'óna —ichro ch'án.

² Ntá kjuátehe ch'ín Jesús ntáchro ch'án kixin:

—¿Á tsjehé jaha tí nchia jíé tsík'óna ní? Tsjixraká tí yaon la í ninkehó xro ts'ejókjenhya kichó, la kaín tíha la tsoxíka —ichro ch'án.

Tí nkehe tsonhen chjina tí tsjixixín

(Mt. 24.3-28; Lc. 21.7-24; 17.22-24)

³ A ntá sákjuí sín chrítaón tí jna Olivo chók'èxin tjen tí nínko a. Ntiha kjuák'etjaxin ch'ín Jesús. Ntá ntiha ch'ín Pedro, la ko ch'ín Jacobo, la ko ch'ín Juan, la ko ch'ín

† Éxodo 3.6 †† Deuteronomio 6.4-5 ‡ Levítico 19.18 †† Deuteronomio 4.35 †† Oseas 6.6

††† Salmo 110.1

Andrés kjuanchankíhi sín ch'án nkehe, ntáchro sín kixin:

⁴—Tjinkaonni tsochronka nkesá tsonhen tíha la ko nkexrí tsoñoexínni nkesá tsoxiteyá kaín tíha —ichro sín.

⁵Ntá ch'ín Jesús kjuátehe ch'án ntáchro ch'án kixin: —Tóxakonhanrá tjoéhyará kixin ninkexró chrókjuít'ayahyará. ⁶Nchónhya chojni tsi tsontáchro sín kixin jehe sín mé Cristo. Ntá xikaha sich'iyehé sín nchónhya chojni.

⁷Á ntá tió tsinhínra kixin tjanjonko kichó sín la t'óyan kichó sín la chrakonhyará tóxakuanhyará ó jehí tsonhen tíha. Kjonté xikaha naxa tsejehya chjasintajni.

⁸Ijnko nación tsjanjonko íjnko nación. La ntíha la ntaha la tsinkí nonte la ko itsjé chjasin na tsokjinta la ko ts'ixité sín tsonínkaon sín. Tíha na ntá xrankixixón tí kjuatjoté.

⁹Tóxakonhanrá jahará kixin mé tsjikaánra sín nkayakon tí sín t'etōan ntá tí nkaxenhen nínko ntíha mé tsjatiáxínra sín. Jahará t'ichjánxín tsochjinará tí tjejó tí sín gobernador la ko tí sín rey kixin tinkachónkirá tí janhan; ntá tsjachará tsochronkara nkexrí tinkachónkirá tí janhan nkayakon tí jehe sín. ¹⁰Tí naxa ts'itjáyanyha chjasintajni la mé t'ichjánxín tsinhin chojni kaín sín nación tí tan jína tsaáxin sín. ¹¹Tiό sátsjikoará sín tsjikaánra sín tí tjejó tí sín t'etōan, la tóxakuanhyará nkehe tsjateherá la ko nkehe tsjenkayáxinra. Náhí. Chronkara tí nkehe kjuanjon Dios tsontáchrora tí hora a, kixin jahyará tsonixjará. Náhí. Nchakuen Dios mé tsonixja. ¹²Iso chojni kjonté naxa kjéhya sín tsjikaán tí kichó sín kixin its'en. La ko kjaxin xikaha iso chojni tsjikaán tí xjeen sín la ko kjaxin iso sín tsonínkakonhen sín tí it'é la ko ñé la tsjikaán sín kixin its'en. ¹³Kaínxín chojni chjasintajni tsonínkakonhanrá sín kixin tinkachónkirá tí janhan. Á ntá tí sín tsítōehya tinkáchónki sín tí janhan hasta tsjixixín ná mé tsaá sín.

¹⁴Tsjixraká íjnko yaon ts'ikonrá tsjak'e tí nkehe jínahya tí chrókjuak'ehya éxí tsintáchro profeta Daniel † —ntá tí chojni sinchekuáxin tí xroon i mé chrókuiénxín sín tíha—, a ntá tí chojni tjejó estado Judea ts'ikon sín xikaha la sátsji sín tsochrín sín jna tsjik'ejómá sín. ¹⁵Á ntá tí sín tjejó chrítaón nchia la í chrók'uínkajinyha sín, chrók'uixenhyha sín nkaxenhen nchia chrókuakitsje sín ichrén nkehe chóna sín. ¹⁶Ntá tí sín tjejó nontee sín la í chrókjanhyha sín naxa chrókjuikakja sín iké sín. ¹⁷Ntá nòa tí chojni chjin ts'ejóyá tí yaon a la ko tí sín tjejónekakí xjeen. ¹⁸Chrókjuancheherá Dios kixin jehya nchakuen kin chrókónhen tíha. ¹⁹Á ntá tí yaon a mé imá kjuaxróxinyha ts'ejó chojni kixin ninkehó yaon kuénhyha xikaha desde ti kjuankixixín Dios kjuich'éna ch'án chjasintajni la ko kjá xikahya tsonhen chr'éxín inaá. ²⁰Á ntá tí chrókjuanjon Ìnchéni Dios kjuachaxin kixin isé chrókónhen tíha, ntá ninkexró chrókjuacha chrókuaá. Á ntá náhi la kujkonóehé ch'án tí sín tsíkjeýá ch'án ntá k'uetōan ch'án kixin tjoka ts'atsínka tí kjuachrakon a.

²¹Á ntá jnkojín nkexro tsontáchro kixin: “Tsjehe, ntíhi itjen tí Cristo”, o tsontáchro sín kixin: “Tsjehe, ntíha tjen ch'án”, la titekákuénhyará sín. ²²Na mé itsi iso sín tsontáchro sín kixin Cristo tí jehe sín la ko kjaxin itsi iso sín ntoáhya tsjako sín la ko tsjasin sín kjuaxroan jíe tjinkaon sín chrókjuich'iyexín sín chojni, kjonté tí sín tsíkjeýá Dios. ²³Á ntá jahará chroxákonhanrá kaín tíha. Tjéjtjonkara senó kixin tsonohará kixin xikaha tsonhen.

Itsi tí Xjeen Dios K'óna Chojni

(Mt. 24.29-35, 42-44; Lc. 21.25-36)

²⁴Ntá ts'atsínka tí kjuachrakon la ntá tí yaon la ts'inkaséyanhyha, a ntá tí nitjó la tsjanjonhyha xrohi. ²⁵Á ntá tí konotsé la ts'anótjénxín nkajni la ko tí kjuachaxin siín nkaya nkajni la kjaxin tsinkí. ²⁶Ntá ts'ikon sín tí Xjeen Dios K'óna Chojni itsi chríkjan tjuí tsíkao tí kjuachaxin jíe. ²⁷Ntá tsochr'án ch'án tí sín ángel sátsji sín kuente chjasintajni tsjikjenájín sín kaín chojni tsíkjeýá ch'án.

²⁸Chrókiénxínra tí nkehe sintayóaxian. Éxí yóhe tí nta t'óna to higo tió sít'ayan kahnte ntá nohará kixin ts'ixenhen nchakuen sóa ²⁹mé xikaha tió ts'ikonrá xikaha tsonhen kaín tíha ntá tsoñoaxínra kixin ó kuichjina tí tseje chjasintajni. ³⁰Chaxín ntáxrjan kixin kaín tíha tsonhen tí naxa t'enhya tí chojni siín chjasintajni. ³¹Á ntá tí nkajni la ko tí chjasintajni mé ts'itjáyán. Á ntá tí nkehe ntáxrjan la ts'itjáyanyha, tsoxiteyá tíha.

³²Á ntá tí yaon la tí hora tsoxiteyá tíha la ninkexro noehya. Kjaxin noehya tí sín ángel tjejó nkaya nkajni la ko kjaxin tí Xjeen Dios K'óna Chojni la noehya. Ó jehó It'eni mé nohe.

³³Méxra chrók'uejotsjehérá, chrók'uejochonhénra chrónixjehérá Dios kixin noahyará nkesá la ko nkehora tsonhen tíha. ³⁴Éxí yóhe íjnko chojni sátsji kjín, a ntá tí naxa sátxixínhyha ch'án ntōe ch'án la senó tsochjéhe ch'án xra tí sín ch'ehe ch'án xra ts'ayakonhen sín ntōe ch'án, la jnkojnko sín ts'áyéhe sín jnkojnko xra kuente sín. La ko ts'etūenhen ch'án íjnko ch'ín tsjak'e ts'ayakonhen ch'án tí ntója nchia. ³⁵Méxra jahará chrók'uejotsjehérá kixin noahyará nkesá tsokjan tí ñché tí nchia a, á íjnko tsonantonete o á íjnko k'áxrótjen o á íjnko tjetee tsje cochiká o á íjnko ts'inkaséyan. ³⁶Ntá xrínahya tsi ch'án ts'itjaxín ch'án kixin tjejochrinra. ³⁷Mé xikaha tjonkara la ko xikaha ntátjan kaín chojni kixin chrók'uejotsjehe sín —ichro ch'án.

Tjoyá sín kixin nkexrí tsotsé sín tí ch'ín Jesús

(Mt. 26.1-5; Lc. 22.1-2; Jn. 11.45-53)

14 Naxa t'itjáyán iyó yaon ntá tsjasin sín tí kia pascuá, la ko sine sín tí niotja tsíkjikohya tí xroan nchek'ánki niotja.

Ntá tí sín nchat'á t'etōan la ko tí sín maestro tjako tí ley mé kjuéyá sín kixin nkexrí sich'iyehé sín tí ch'ín Jesús kixin tsotsé sín ch'án a ntá ts'óyán sín ch'án.

²Ntá ntáchro sín kixin:

—Kjánchó jehya yaon kia chrókónhen tíha kixin chrók'uixitéhya chojni chrókónínkaon sín —ichro sín.

† Daniel 9.27; 11.31; 12.11

Ijnko tjan kuiķitexín aceite náxrjón xraxé ikja ch'ín Jesús

(Mt. 26.6-13; Jn. 12.1-8)

³ A ntá ch'ín Jesús kjuák'e ch'án chjasin Betania ntq̄e ch'ín Simón, tí ch'ín k'uéchón̄ta chinlepra. A ntá tí tjene ch'ín Jesús ntá xrin̄ghya ikui ijnko tjan kuiķao tjan ijnko xro mé tjiá tí aceite xraxé itsjo nardo, imá tjete tsík'ite. Ntá tí tjan a mé kuakitjeh̄e tjan tí xro a ntá kuiķite tjan kja ch'ín Jesús tí aceite a. ⁴ A ntá iso tí sín tjejó n̄tiha kóninkakonhen sín tjan ntáchro sín kixin:

—¿Nkekuente kjuínchexénhen tjan tí aceite náxrjón xraxé? ⁵ Íchá jina chrókox̄ix̄in iní ciento chichaon denario tí aceite a ntá tí chichaon a mé chrókuj̄tonhen tí chojni n̄o —mé x̄ikaha ichro sín k'uántaxín̄h̄in sín tjan.

⁶ Ntá ntáchro ch'ín Jesús kixin:

—Nté t̄j̄toherá tjan; ¿nkekuente t'antaxín̄h̄inrá tjan? Ó nch̄oxon tí nkehe kjuích'ena tjan. ⁷ A ntá tí chojni n̄o la ó x̄r̄axín ts'ejókoará sín la jina tsjín̄k̄itsará sín jnkoj̄in yaon. Ntá janhan la jnkochr̄ix̄ín̄h̄ya ts'ejóni.

⁸ Ntá jehe tjan kjuích'e tjan kaín nkehe tjinkaon tjan tsjanjon tjan. Ó senó kjuíncheka tjan xrōan cuerpo kuènt̄ana kixin tsoxravána. ⁹ Chaxín ntáxr̄jan kixin tí tsjako sín tí tan jina tsaáxin chojni nkuíxin chjasintajni ntá tsochronka sín kixin x̄ikaha kjuích'e tí jehe tjan, a ntá x̄ikaha tsoxraxinkakonxín sín tjan kixin x̄ikaha kjuích'e tjan —ichro ch'án.

Ch'ín Judas kjuinchekji ch'án tí ch'ín Jesús

(Mt. 26.14-16; Lc. 22.3-6)

¹⁰ A ntá ch'ín Judas Iscariote mé ijnko teyóxin sín k'uájiko ch'ín Jesús a mé sákjuítsjehe ch'án tí sín nch̄at'á t'et̄oan kixin tsochrónka ch'án nkexrí tsotsé sín tí ch'ín Jesús. ¹¹ A ntá jehe sín la chéhe sín kuín̄hin sín ntá ntáchro sín kixin chaxín tsjanjon sín chichaon ts'áyeh̄e tí ch'ín Judas. Ntá kjuankixin ch'án kjueyá ch'án nkexrí tsochrónka ch'án kixin tsotsé sín tí ch'ín Jesús.

Kjóneko sín tí ch'ín Jesús

(Mt. 26.17-29; Lc. 22.7-23; Jn. 13.2-30; 1 Co. 11.23-26)

¹² A ntá kui tí yaon xrankix̄ix̄in kia sine sín niotja tsík̄jikohya tí xrōan nchek'ánk̄i nio tió ts'óyán sín tí kolélo kuente kia pascua. A ntá tí sín k'uájiko ch'ín Jesús mé kjuanchankíhi sín ch'án kixin:

—¿Nketí tjinkávan sátsjini sincheyax̄ix̄inni kixin sineni kuente tí kia pascua? —ichro sín.

¹³ Ntá k'uetuēnhen ch'án iyó tí sín k'uájiko ch'án ntáchro ch'án kixin:

—Sátjirá chjasin Jerusalén ntá n̄tiha tsoxetará ijnko ch'ín yámá toa tjiá nt̄a. Tí ch'ín a tsochréhérá. ¹⁴ A ntá tí nchia ts'ixenhen ch'án la tsjanchankíhírá tí inché nchia, tsontáchrórá kixin: "K'uet̄oan tí Maestro kixin: ¿Nketí t̄jen tí cuarto sinexínko ch'án tí sín xriko ch'án tí kia pascua a?" x̄ikaha mé tsixrorá. ¹⁵ Ntá tsjakohará ch'án ijnko cuarto jíé, yóxin piso mé chón̄ta kaín nkehe

t'ichján̄xin. Mé ntaha mé sincheyax̄ix̄inrá tí nkehe sineni —ichro ch'án.

¹⁶ Ntá jehe sín la sákjuí sín chjasin Jerusalén na ntá éxí chrónka ch'ín Jesús mé x̄ikaha k'uitja sín. Ntá tí cuarto a mé kjuíncheyax̄ix̄in sín tí nkehe sine sín kuente tí kia pascua.

¹⁷ A ntá ó kóntó ntá ó kjuíji ch'ín Jesús la ko tí teyó sín k'uájiko ch'án tí nchia n̄tiha. ¹⁸ Ntá k'uejó sín, a ntá tió tjejóne sín ntá ntáchro ch'ín Jesús kixin:

—Chaxín ntáxr̄jan kixin ijnko tí jahará tjejóne jnkokoá n̄tihi mé sinchekjiráni —ichro ch'án.

¹⁹ Ntá jehe sín mé kjuankixin k'uává sín. Ntá kjuankixin sín jnkojnko kjuanchankíhi sín tí jehe ch'án kixin:

—¿Á janhan ní? —ichro sín.

²⁰ Ntá kjuátehe ch'ín Jesús ntáchro ch'án kixin:

—Jehe ch'án mé ijnko tí teyóxinrá, mé tí nkexro t̄jen̄kian jnkokoá plato n̄tihi. ²¹ Chaxín tí Xjēn Dios K'óna Chojni mé t̄sonhen éxí nixja xroon itén Dios. Kjánchó n̄o tí ch'ín sinchekji ch'án. Íchá jina tí ch'ín a la chrókokj̄ieh̄ya ch'án —mé x̄ikaha ichro ch'án.

²² A ntá nachrohe tjejóne sín na ch'ín Jesús kuákja ch'án ijnko niotja, ntá kjuanchia ch'án kjuasáyé Dios. Ntá kjuixin ntá kóchrít'ō ch'án tí niotja ntá kjuanjon ch'án k'uáyeh̄e sín. Ntá ntáchro ch'án kixin:

—Interá, tíhi mé cuerpo kuènt̄ana —ichro ch'án.

²³ Na ntá kjaxin kuákja ch'án ijnko vaso na ntá kjuanchia ch'án kjuasáyé Dios ntá chjéhe ch'án sín ik'uí sín kaín sín tí nkehe tjiá. ²⁴ Ntá ntáchro ch'án kixin:

—Tíhi mé j̄n̄ina mé chrónkaxín kixin chaxín tsoxiteyá tí nkehe n̄xin t̄sonhen na mé ts'itj̄i kixin tsaáxin nchón̄h̄ya chojni. ²⁵ Chaxín ntáxr̄jan kixin ts'íh̄ya janhan tí inté to uva inaá tí nax̄a tsjixrakáh̄ya tí yaon itsi kjuachaxin kuente Dios, a ntá ti yaon a xik'ía inté to uva n̄xin —mé x̄ikaha ichro ch'ín Jesús.

Ntá ch'ín Jesús chrónka ch'án kixin ch'ín Pedro sinchemá ch'án kixin chón̄h̄ya tí jehe ch'án

(Mt. 26.30-35; Lc. 22.31-34; Jn. 13.36-38)

²⁶ Ntá kjuixin itsje sín ijnko himno kuente Dios ntá sákjuí sín tí jn̄a Olivo. ²⁷ Ntá ch'ín Jesús ntáchro ch'án kixin:

—Ijie tie kaín rá tsochrakonrá ntá ts̄j̄tonará. Ntá tsoxiteyá éxí ntáchro xroon iten Dios kixin: "Ts'óyán sín tí nkexro t'ayakonhen tí kolélo ntá tsokohya nkexro ts'ayakonhen va, a ntá tsjichroe va." ¹²⁸ A ntá tió tsoxechón̄na ntá sátsjia estado Galilea ntá n̄tiha tsoxetani —ichro ch'án.

²⁹ Ntá ntáchro ch'ín Pedro kixin:

—Kjonté kaín sín tsítōha sín ntá janhan la náhi —ichro ch'án.

³⁰ Ntá ntáchro ch'ín Jesús kixin:

—Chaxín ntáxr̄jan kixin ijie tie tí nax̄a tsjeh̄ya kochín̄tōa yáya, la jaha mé sinchemána níya kixin chonhyana, tsixrua —ichro ch'án.

³¹ Ntá itsen kjuátehe ch'ín Pedro ntáchro ch'án kixin:

† Zacarías 13.7

—Kjónté koína its'én la s̄intamáhya tí jaha —ichro ch'án.

La ko x̄ikaha ntáchro sín kaín sín.

Ch'ín Jesús nixjeexín ch'án Dios tí Huerto Getsemaní
(Mt. 26.36-46; Lc. 22.39-46)

³² Ntá kjuíji sín ijnko nonte mé it'in Getsemaní. Ntá k'uetuēnhen ch'ín Jesús tí sín k'uájiko ch'án kixin:

—Tjejorá ntihyó nachrohe janhan tsonixjahā Dios —ichro ch'án.

³³ Ntá sákjuíko ch'án tí ch'ín Pedro la ko tí ch'ín Jacobo la ko tí ch'ín Juan. Ntá kjuankixin imá k'uává asén ch'án kóxakonhen ch'án. ³⁴ Ntá ntáche ch'án sín kixin:

—Imá t'ává asenná éxí chrók'uén x̄ikaha. Ijie la nti-hyó titohará tjejotsjehérá —ichro ch'án.

³⁵ Ntá sákjuí ch'án ijnko kjinhya ntá kjuák'exín toch'in ch'án. Ntá kjuankixin chrónóehē ch'án Dios kixin chrókjuanjon ch'án kjuachaxin kixin chrókjuasótehya ch'án tí nkehe chrókónhen ch'án tí yaon a. ³⁶ A ntá ntáchro ch'án kixin:

—It'eni jaha. Jaha mé chonta kaín xín kjuachaxin na ntá chrónóahani tsjakjínhinni kaín tí jínahya tsonhenni tsjasóteni jie. Jehya kixin chrókónhen éxí tjinkaonni jeheni. Náhí. Éxí tjinkávan jaha —ichro ch'án.

³⁷ Ntá kjan ch'án ntá k'uitjaxín ch'án tí sín kuítóhe la tjejójua sín. Ntá ntáche ch'án tí ch'ín Pedro kixin:

—Simón, tjechrian jaha. ¿Xá xitjahya chrókjuak'etsjehé ijnko hora? ³⁸ Ijie la tjejotsjehérá la ko chrónóehérá Dios kixin títqehya ch'án tí jínahya chrókjuichroerá. Tí asánrá ntáchro kixin chrókjuinchexiteyará tí jína kjánchó tí cuérporá la tsjachahya —ichro ch'án.

³⁹ Ntá sákjuí ch'án inaá chrónóehē ch'án Dios. Ntá ó jehe x̄ikahó xínixja ch'án. ⁴⁰ Ntá ikjan ch'án la ó tjejójua sín inaá kixin kuih̄i sín kotáchrin. Ntá í noehya sín nkexrí chrókjuatehe sín. ⁴¹ Ntá níxin sáxíkji ch'án ntá kjan ch'án ntá ntáchro ch'án kixin:

—A ntá jie tjejochrinrá t'ok'áhará. Ntá ó tjen. A ntá jie kjuixraká tí hora kixin tí Xjeen Dios K'óna Chojni ts'áyéhē tí sín chóna jie sinchekjasóte sín ch'án. ⁴² Ntá t'ayará sátsjini kixin ó kjuí tí nkexro sinchekjina.

Sákjuíko sín tí ch'ín Jesús tsjak'echjina ch'án
(Mt. 26.47-56; Lc. 22.47-53; Jn. 18.2-11)

⁴³ Naxā tjenixja ch'ín Jesús ntá xrinahya kjuíji ch'ín Judas, mé ijnko tí teyóxin sín k'uájiko ch'ín Jesús. Nchón-hya chojni kjuíkāo ch'án kjuíjiko sín chica espada la ko inta. Na mé kjuachaxiēn tí sín nchāt'á t'etōan la ko tí sín maestro tjako tí ley la ko tí sín táda t'etōan njnko mé kjuix̄in sín.

⁴⁴ A ntá tí ch'ín Judas mé tí ch'ín sinchekji tsintáchro ch'án kixin:

—Tí ch'ín sinekian kochíto mé jehe tíha la itserá ch'án sájtikoará ch'án —ichro ch'án.

⁴⁵ Ntá kjuí sín ntá tuénxín kóchjinehe ch'ín Judas tí ch'ín Jesús ntá ntáchro ch'án kixin:

—Maestro, Maestro —ichro ch'án.

Na ntá kjóneko ch'án kochíto. ⁴⁶ A ntá tí sín kjuíji mé tsé sín tí ch'ín Jesús, sákjuíko sín ch'án.

⁴⁷ A ntá ijnko ch'ín tjentaxín ntiha mé kuakitsje ch'án chica espada kóchrínjin ch'án t̄atsjon tí ch'ín ch'ehe tí nchāt'á t'etōan x̄rā. ⁴⁸ Ntá ch'ín Jesús mé ntáche ch'án tí sín a kixin:

—¿Nkekuénté kixin éxí chrótserá xíchee mé x̄ikaha k'uinkakoará chica espada la ko inta kixin tsotseráni?

⁴⁹ Kaín yaon kjuak'é nkaxenhen njnko kjuákoahará, ¿ntá nkekuénté tsehyaráni? Kjánchó t'ichjánx̄in x̄ikaha tsonhen kixin tsoxiteyá tí nkehe nixja xroon itén Dios —ichro ch'án.

⁵⁰ Ntá kaín tí sín k'uájiko ch'án na mé kuítóhe sín ch'án jehó ch'án ntá sákjuí sín.

Ijnko ch'ín ntasoá sákjuixín ch'án ntiha

⁵¹ A ntá ijnko ch'ín ntasoá mé kjaxin tinkáchrēhe ch'án ntiha, a ntá jehó ijnko kamantá tjetsáte ch'án, ntá kjaxin itsé sín ch'án. ⁵² Kjánchó tí ké ch'án ó tsítsé sín ntá kjónté tjóchin ch'án sákjuí ch'án.

Ch'ín Jesús kóchjina ch'án tí tjejó tí sín t'etōan
(Mt. 26.57-68; Lc. 22.54-55, 63-71; Jn. 18.12-14, 19-24)

⁵³ Ntá sákjuíko sín tí ch'ín Jesús tí ntōe tí nchāt'á imá t'etōan. Ntaha mé tsíkójnkotsé kaín tí sín nchāt'á t'etōan la ko tí sín táda t'etōan njnko la ko tí sín maestro tjako tí ley. ⁵⁴ Ntá ch'ín Pedro la ikjín tjechrēhe ch'án ntá kjuíji ch'án tí ntāsin ntōe tí nchāt'á imá t'etōan a. Ntaha síche xrohi. A ntá ntiha tjejótjāx̄in tí sín policía tjejóchjix̄rohe sín, ntá kjaxin ch'án ntahó kuítóhe ch'án tjechjix̄rohe ch'án.

⁵⁵ Ntá tí sín t'etūnhen tí sín nchāt'á la ko kaín tí sín t'etōan kjueyá sín chojni kixin tsochrónka sín nkehe tí jie chóna ch'ín Jesús kixin jína chrók'óyán sín ch'án. Kjánchó ninkexró k'uitjahya sín tsjinkitsa tsochrónka. ⁵⁶ Kjánchó itsjé sín ntáchro sín kjuach'ia ó t'eka sín ch'án jie kixin jnkokónhya tí nkehe ntáchro sín. ⁵⁷ Ntá k'uínkatjen iso sín ntá chaxínhya tí jie kjuanchia sín. Ntá ntáchro sín kixin:

⁵⁸ —Jeheni ó kuínhinni kixin ntáchro ch'án kixin ts'óxíka ch'án tí njnko tsíkjich'énaxin chojni tja ntá iní yaon koá la ó tsjak'e ch'án í jnko njnko jehya chojni sich'éna † —ichro sín.

⁵⁹ Kjónté x̄ikaha la jnkokónhya tí nkehe chrónka sín.

⁶⁰ Ntá tí ch'ín t'etūnhen tí sín nchāt'á k'uínkatjen ch'án tí tjejó kaín sín ntá kjuanchankíhi ch'án tí ch'ín Jesús kixin:

—¿Á ninkehó tjatēehya jaha? ¿Á chaxín tí jie t'eka sín tí jaha? —ichro ch'án.

⁶¹ Ntá ch'ín Jesús tání ch'án la ninkehó tjatēehya ch'án. Ntá xikjanchankí tí nchāt'á t'etōan ntáchro ch'án kixin:

—¿Á jaha tí Cristo Xjeen Dios imá tjóá? —ichro ch'án.

⁶² Ntá ntáchro ch'ín Jesús kixin:

—Chaxín janhan tíha. Ntá chr'éx̄in ts'ikonrá kixin tí Xjeen Dios K'óna Chojni mé tsjak'etjāx̄in ch'án tí tja chjina kjuachaxin kuēnte Dios la ko itjuí mé ts'inkajinx̄in ch'án nkaya nkajní —ichro ch'án.

† Juan 2.19

⁶³ A ntá tí nchat'á t'etōan kótséchje ch'án tí iké ch'án kjuakoxin ch'án kixin imá nínkaon ch'án ntáchro ch'án kixin:

—T'ichjánxinhya í so chojni tsochrónka nkehe. ⁶⁴ Jahará ó kuínhínrá kixin k'uántaxínhin ch'án Dios. ¿Ntá nkehe tsixrorá? —ichro ch'án.

Ntá kaín sín kjuátēhe sín kixin chrók'uen ch'án.

⁶⁵ Ntá ikjé sín la kjuankixin sín kujukite sín ch'án ntate sín. Na iso sín na k'uíkjehe sín ikon ch'án na ntá kjuate sín ch'án na ko kjuanchankíhi sín ch'án kixin:

—Tónoha kixin nkexro kjuatia —ichro sín.

A ntá tí sín policia kuènte nínko chjéhe sín nkayakon ch'án.

Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.69-75; Lc. 22.56-62; Jn. 18.15-18, 25-27)

⁶⁶ Ntá tí ntāsin nonte itjen ch'ín Pedro. Ntá ikui ijnko tjan ch'ehe tjan xra tí nchat'á t'etōan. ⁶⁷ Ntá k'uíkon tjan kixin tjechjixrohe ch'ín Pedro. Ntá komá tjan ch'án ntá ntáchro tjan kixin:

—Jaha la kjaxin xrikoa tí ch'ín Jesús kjuixín chjasin Nazaret —ichro tjan.

⁶⁸ Ntá ch'ín Pedro kjuínchemá ch'án ntáchro ch'án kixin:

—Chonhya ch'án la ko nonahya tí nkehe ntáchrua —ichro ch'án.

Ntá k'uaxrjexín ch'án ntiha sákjui ch'án ntója. Ntá xrinahya itsje ijnko kochíntōa. ⁶⁹ Ntá tí tjan a mé k'uíkon tjan tí jehe ch'án ntá chénka tí sín síntaxín ntaha kixin:

—A ntá tí ch'ín i mé jnkojín tí sín a —ichro tjan.

⁷⁰ Kjánchó kjuínchemá ch'án inaá. Ntá antsí chr'ēxin tí sín k'uéjontaxín ntáche sín tí ch'ín Pedro kixin:

—Chaxín kjaxian jaha tsíkjixian estado Galilea kixin tjatsoanxínni kixin nixja jaha éxi nixja tí jehe sín —ichro sín.

⁷¹ Ntá ch'ín Pedro kjuankixin ch'án kjuínchenohe ch'án Dios ntáchro ch'án kixin:

—Chonhya tí ch'ín ntáchrorá jahará —ichro ch'án.

⁷² Ntá yóxin itsje kochíntōa. Ntá ch'ín Pedro mé xraxinkaon ch'án kixin nkexrí ó chrónka ch'ín Jesús kixin: "Naxa tsotsjehya kochíntōa yáya mé ó tsjixin sijnchemána níya kixin chonhyana." † Ntá xraxinkaon ch'án tíha la ntá kjuankixin ch'án tsjánka ch'án kixin ntoáhya kjuích'e ch'án kjuínchemá ch'án tí ch'ín Jesús.

Ch'ín Jesús nkayakon tí ch'ín Pilato

(Mt. 27.1-2, 11-14; Lc. 23.1-5; Jn. 18.28-38)

15 A ntá ó k'uínkaséyan ntá tí sín nchat'á t'etōan kójnkotséko sín tí sín táda la ko tí sín tjako tí ley la ko kaín tí sín t'etōan kuènte nínko mé kójnkotsé sín ikjo kichó sín. Ntá kjuixín ntá kjuínchenteto sín tí ch'ín Jesús ntá kjuíkaán sín ch'án tí tjan tí ch'ín Pilato. ² Ntá tí ch'ín Pilato mé kjuanchankí ch'án ntáchro ch'án kixin:

—¿Á jaha tí Rey kuènte tí sín judío? —ichro ch'án.

Ntá kjuátēhe ch'ín Jesús ntáchro ch'án kixin:

—Kjaxian jaha ntáchrua —ichro ch'án.

³ A ntá tí sín nchat'á t'etōan mé k'ueka sín ch'án nchónhya jje. ⁴ Ntá ch'ín Pilato xíkjanchankí ch'án inaá ntáchro ch'án kixin:

—¿Jaha, nkekuènté tjetēheya ninkehó? Tsjehé kixin nchónhya jje t'eka sín tí jaha —ichro ch'án.

⁵ A ntá ch'ín Jesús la ninkehó kjuátēheya ch'án. Ntá ch'ín Pilato la í noehya ch'án nkehe tsjenkayáxin ch'án.

K'uáyēhe ch'ín Jesús kixin sinchekjasóte sín ch'án ntá its'en ch'án

(Mt. 27.15-31; Lc. 23.13-25; Jn. 18.38—19.16)

⁶ A ntá ch'ín Pilato mé kuènnen ch'án kixin tí kia a tsjanjon ch'án kjuachaxin kixin sátsji ijnko chojni tjechjina, éxi tjinkaon tsjanchia tí sín tsíkójnkotsé tí kia a. ⁷ A ntá ntiha tjechjina ijnko ch'ín mé it'in Barrabás, la ko í so sín kuítekakuenhya sín tí síxreé ntá k'óyán sín chojni. ⁸ Ntá kui nchónhya chojni kjuankixin sín kjuanchehe sín tí ch'ín Pilato kixin chrókjuich'e ch'án éxi kaín nánó xíkaha. ⁹ Ntá kjuátēhe ch'ín Pilato kixin:

—¿Á tjinkáonrá tsitōha sátsji tí ch'ín Rey t'etūenhen tí sín judío? —ichro ch'án.

¹⁰ Mé xíkaha ichro ch'án kixin jehe ch'án la ó nohe ch'án kixin kjuachjinoxínhin xriko tí sín nchat'á t'etōan, a ntá tsé sín tí ch'ín Jesús kjuíkénhen sín ch'án. ¹¹ A ntá tí sín nchat'á t'etōan a mé kjuínchekóninkaon sín kaín tí chojni síin, ntáche sín kixin íchá jina chrókjuanchia sín kixin chrók'uatjánta ch'án tí ch'ín Barrabás. ¹² Ntá ch'ín Pilato kjuanchankí ch'án ntáchro ch'án kixin:

—A ntá tí ch'ín tíkítexínrá kixin ch'ín Rey t'etūenhen tí sín judío la ¿nkehe tjinkáonrá sít'aha ch'án? —ichro ch'án.

¹³ Ntá jehe sín kjuátēhe sín k'óyako sín kjuanchia sín kixin:

—¡Tjakénkãnia ch'án ntacruz!

¹⁴ Ntá ch'ín Pilato mé kjuanchankíhi ch'án tí jehe sín kixin:

—¿Xá nkehe tí jínahya kjuích'e ch'án? —ichro ch'án.

Kjánchó antsí má itsen k'óyako sín kjuanchia sín kixin:

—¡Tjakénkãnia ch'án ntacruz! —ichro sín.

¹⁵ Ntá ch'ín Pilato mé tjinkaon ch'án sinchexiteyá ch'án tí nkehe kjuanchia tí sín k'uúixité ntá kuítōhe ch'án kixin sátsji tí ch'ín Barrabás. Ntá k'uetōan ch'án kixin tsjate sín tí ch'ín Jesús. Ntá kjuixín ntá kjuanjon ch'án kjuachaxin kixin tí sín soldado sátsjiko sín ch'án tsjak'enkãni sín ch'án ntacruz.

¹⁶ Ntá tí sín soldado a mé sákjuíko sín ch'án tí ntāsin tí palacio. Ntaha kójnkotséxin kaín tí sín soldado. ¹⁷ Ntá ntiha kuakitsje sín iké ch'án ntá kjuínchek'inkáya sín ch'án ijnko ka kjátse tié la ko kjuak'enkãya sín kja ch'án ijnko corona tsík'óna ntach'í. ¹⁸ Ntá kjuankixin k'uúixité sín ntáchro sín kixin:

—Jnkochríxín tsjak'e tsétūenhen tí sín judío —ichro sín.

¹⁹ Na ntá ntavara chjéhe sín ikja ch'án na ko ntáté sín kujukite sín ch'án. K'uéjoxín toch'in sín nkayakon ch'án

† Marcos 14.30

kjuích'eyáxixín sín éxí imá chrókjuikosáyehe sín ch'án.²⁰ Ntá tió kjuixín xíkaha kjuích'ehe sín ch'án kjuanoá sín ch'án ntá kuakitsjehe sín ch'án tí ka kjátse tié tsíkjinchek'inkáya sín ch'án ntá kjuínchek'inkáya sín ch'án iké ch'án xráxín inaá. Ntá kuakitsjexín sín ch'án ntiha sákjuíko sín ch'án kixín ntá tsjak'enkani sín ch'án ntacruz.

Ntá kjuak'enkani sín ch'ín Jesús ntacruz

(Mt. 27.32-44; Lc. 23.26-43; Jn. 19.17-27)

²¹ A ntá ijnko ch'ín tsíkjin chjasin Cirene, mé it'in ch'án Simón, mé xjeen ch'án mé tí ch'ín Alejandro la ko tí ch'ín Rufo, mé tsíkjin ch'án nontee ch'án, ntá k'uátsinka ch'án ntiha. Ntá tí sín soldado a mé k'uetuñhen sín ch'án kixín tsochréhe ch'án tсамá ch'án tí ntacruz tsjak'enkáni ch'ín Jesús.

²² A ntá sákjuíko sín tí ch'ín Jesús ijnko tjo it'in Gólgota, na mé nkívee sín t'axrjexín kixín Tjo Calavera.²³ Ntá ntiha chjéhe sín ch'án xranvino tsík'ixinkíjanxín xroan mirra chrók'ui ch'án, kjánchó k'uíhya ch'án.²⁴ Ntá tí sín soldado kjuak'enkani sín ch'án tí ntacruz a. Kjuixín ntá kjuích'exín sín suerte tí ké ch'án kixín tsoñohe sín nkexéhe tí ka sátsjiko sín jnkojnko sín.

²⁵ A ntá ó las nueve nchítjen tí kjuak'enkani sín ch'án tí ntacruz a.²⁶ Ntá ikja tí ntacruz kjuak'enkani sín ijnko ntachiso ntsí tsíkjin sín nixja nkekuente kjuínchekjasóte sín ch'án na mé ntá chro kixín: "Jehe ch'án mé Rey kuente tí sín judío".²⁷ Na ko kjaxin k'uejójáni sín ntacruz yaá tí síchee la ijnko la nángo chjina la í jnko la nó kjon tí tjen ch'ín Jesús.²⁸ Na mé xíkaha xiteyá éxí nixja xroon itén Dios ntá chro kixín: "Éxí yóhe ijnko chojni kjuasin jie mé k'uíkon sín ch'án" †.

²⁹ Ntá tí sín k'uatsinka ntiha mé kjuanoá sín ch'án la ko k'uántaxínhin sín ch'án tinkátjía kja sín ntá chro sín kixín:

—Kjá na ntá chrua kixín chrók'oxíka tí njnko, a ntá iní yaon koá la ó chrókjuixín chrókjuích'éna inaá, †† ichrua.³⁰ Nchekaá asán jahvá tjasinkajinxían tí ntacruz méhe —ichro sín.

³¹ Ntá tí sín nchat'á t'etōan la ko tí sín tjako tí ley mé kjuanoá sín ch'án ikjo sín kichó sín kixín:

—Ó kjuínchekaá ch'án chojni ókjé ntá jehe ch'án mé xitjahya sinchekaá ch'án asén ch'án.³² A ntá chaxín jehe ch'án tí Cristo tí Rey kuente tí nación Israel ntá chrók'uikonni kixín jehó ch'án chrókjuinkajinxín ch'án asén ch'án tí ntacruz ntá kjaxin chrókuitekaonni ch'án —ichro sín.

Kjonté tí yaá sín kjaxin tjejóyáni ntacruz mé k'uántaxínhin sín ch'án.

Ntá k'uén ch'ín Jesús

(Mt. 27.45-56; Lc. 23.44-49; Jn. 19.28-30)

³³ A ntá tió kui chonkixín mé k'uíxin tie kuenté chjasintajni, kóxrjenhen tí sítie hasta las tres kónjin³⁴ ntá tí hora a mé itsen k'uèya ch'ín Jesús ntá chro ch'án kixín:

—Eloi, Eloi, ¿lama sabactani? —tí nkívee sín mé t'axrjexín kixín: It'éni, It'éni, ¿nkekuente kuitōhēni?, ‡ mé xíkaha ichro ch'án.

³⁵ Ntá iso sín siín ntiha kuínhin sín, ntá ntá chro sín kixín:

—Tinhínrá kixín t'íyehē ch'án tí ch'ín Elías tí ch'ín k'uéchrónka itén Dios ósé —ichro sín.

³⁶ Ntá ijnko tí jehe sín siín ntiha kuínka ch'án kuákja ch'án ijnko ka ntá kjuínchekjataxín ch'án vino náxrjónhya ntá kjuak'ekjen ch'án ijnko nta kijnjin ntá kjuínchechjina ch'án tí tjen ir'va ch'ín Jesús chrók'ui ch'án tí vino náxrjónhya. Ntá chro tí ch'ín a kixín:

—Tsítōhēni tsotsjehēni á chaxín tsi tí ch'ín Elías tsjinkajin tí jehe ch'án —ichro ch'án.

³⁷ Ntá ch'ín Jesús itsen k'uíyato ch'án ntá kjuixín k'uén ch'án.³⁸ A ntá tí ka tjenkakuénxín nkaxenhen njnko mé yaá k'óna k'uichje kjuankixín noi la hasta nonte k'uichje.³⁹ Ntá tí ch'ín capitán romano mé tjen ch'án chok'èxin tí tjen ch'ín Jesús ntá k'uíkon ch'án kixín xíkaha ó kjuixín k'uén ch'án ntá ntá chro ch'án kixín: —Chaxín tí nkexro i la Xjeen Dios —ichro ch'án.

⁴⁰ Kjaxin ntiha k'uejó iso chojni chjin, ikjín k'uejó sín tsjehe sín. Tjejóko sín tjan María Magdalena la ko í jnko tjan María na mé ijnko xjeen tjan it'in Jacobo na mé tí ch'ín tsoyo, ichro sín, la ko í jnko mé it'in José. La ko kjaxin ntaha kjuák'e tí tjan Salomé.⁴¹ A ntá tí chojni chjin i mé kuínkchréhe sín tí ch'ín Jesús ntá kjuíkajo sín ch'án kixín k'uekjinkitsa sín ch'án tí k'uekjak'e ch'án estado Galilea la ko kjaxin í so chojni chjin inaá chréhe sín ch'án sákjuíko sín ch'án chjasin Jerusalén.

Ntá xrává ch'ín Jesús

(Mt. 27.57-61; Lc. 23.50-56; Jn. 19.38-42)

⁴² A ntá ó kóntó tí yaon a mé tí yaon t'óyaxínhin sín kixín tí xrankixín tí yaon t'ok'éhe sín,⁴³ mé kui ijnko ch'ín it'in José chjasén ch'án mé Arimatea. Jehe ch'án mé koí ch'án t'etōan ch'án tí xra kuente tí síxreé. Kjaxin jehe ch'án tjechónhen ch'án itsi tí kjuachaxin kuente Dios. Chrakonhya ch'án sákjuí ch'án ntōe ch'ín Pilato kjuíkjanchia ch'án tí cuerpo kuente ch'ín Jesús.⁴⁴ Ntá ch'ín Pilato chrakon ch'án kixín ó tsíkjin tsík'en ch'ín Jesús, ntá k'uíyehē ch'án tí ch'ín capitán a kjuanchankíhi ch'án kixín á chaxín xíkaha kónhen.⁴⁵ Ntá chrónka tí ch'ín capitán kixín chaxín ó kjuixín k'uén ch'án. Ntá kuínhin ch'ín Pilato xíkaha ntá kjuanjon ch'án kjuachaxin kixín tsjikakja ch'ín José tí cuerpo kuente ch'ín Jesús.⁴⁶ Ntá ch'ín José mé k'uèya ch'án ijnko ka sávana náxrjón. Ntá kjuinkajin ch'án tí cuerpo kuente ch'ín Jesús, a ntá jehe tí ka a mé kjuínchek'isímá ch'án tí cuerpo kuente ch'án. Ntá kjuak'enkaya ch'án ijnko tòye síxrayá itjo. Ntá ijnko xro jie mé k'uíkjèxin ch'án tí ntója tí tòye.⁴⁷ A ntá tí tjan María Magdalena la ko tí tjan María ìné ch'ín José mé k'uíkon sín nketí xrává ch'án.

† *Isaías 58.12* †† *Marcos 14.58; Juan 2.19*

‡ *Salmo 22.1*

Ó xechón ch'ín Jesús

(Mt. 28.1-10; Lc. 24.1-12; Jn. 20.1-10)

16 A ntá tió k'uátsínka tí yaon t'ok'éhe sín ntá tí tjan María Magdalena la ko tí tjan María ìné ch'ín Jacobo la ko tí tjan Salomé mé k'uena sín xroan xraxé sátsjiko sín sincheka sín tí cuerpo kuènte ch'ín Jesús. ² Ntá imá nchítjen tí yaon xrankíxixín tí semana mé kjuíji sín tí tòye síxravá ch'án, na mé ó kjuítjon yaon. ³ A ntá jehe sín mé tinkákjo kíchó sín kixin: —Xá nkexro tí chrókuakjiinhinni tí xro tjejkèxin tí tòye? —ichro sín.

⁴ A ntá xríngaha k'uíkon sín kixin ó tsíkjinín tsíkjinín tí xro jíe tjejkèxin tí tòye kixin í tjenhya éxí k'uékjak'e senó. ⁵ Ntá kjuíji sín ikon tí tòye ntá k'uíkon sín kixin tjetjəxin ijnko ch'ín ntasoá tí tja sín chjina tjenkáya ch'án ka kjinjin tjóá ntá imá chrakon sín k'uíkon sín. ⁶ Ntá ntáchro ch'án kixin:

—Chrakonhyará. Ó nõna kixin xritjéyará jahará tí ch'ín Jesús tsíkjinín chjasin Nazaret kjuák'enkáni ch'án ntacruz. Ntá ó tsíxechón ch'án í kohya ch'án ntihi. Tsjeherá tí tsíkjak'e sín ch'án. ⁷ Ntá sáttjirá tíjchenkará tí sín k'uék'ajiko ch'án la ko tí ch'ín Pedro kixin tí ch'ín Jesús senó sátsji ch'án estado Galilea ntá ntaha tsoxetará ch'án éxí tsíchrónka ch'án —mé xíkaha chrónka tí nta-soá a.

⁸ Ntá tí chojni chjin a mé sákjuíxin sín tí síxravá tí ch'ín Jesús imá síxránka sín chrakon sín. Ntá naxa chenkahya sín ninkexró kixin chrakon sín.

Ch'ín Jesús titàya xeta tí tjan María Magdalena

(Jn. 20.11-18)

⁹ Tió tsíkjinín tsíxechón ch'ín Jesús nchítjen tí yaon xrankíxixín semana ntá titàya xeta ch'án saoxín tí tjan María Magdalena na mé jehe tjan tsíkakitsjexín ch'án yato nchəkuen tí jínahya. ¹⁰ Ntá sákjuíchenka tjan tí sín k'uék'ajiko tí jehe ch'án t'ává sín tsjánka sín. ¹¹ A ntá tió kuínhin sín kixin tjechón tí ch'ín Jesús kixin xíkaha tsík'ikon tjan la kjónté kuítekakonhya sín.

Iyó sín k'uék'ajiko ch'ín Jesús titàya k'uíkuèn sín tí jehe ch'án

(Lc. 24.13-35)

¹² A ntá chr'éxin ntá iyó tí sín a titàya k'uíkuèn sín tí ch'ín Jesús, ókjé nkexrí tsjehe ch'án. Tí sín a mé tjejótti sín ntja sátsji sín ijnko nonte. ¹³ A ntá jehe sín sákjuíchenka sín tí sín í so a; la kjónté xíkaha la kuítekakonhya sín. †

Ch'ín Jesús k'uətuənhen ch'án tí sín k'uék'ajiko ch'án tí xra sich'e sín

(Mt. 28.16-20; Lc. 24.36-49; Jn. 20.19-23)

¹⁴ A ntá tió kjuixixín la titàya k'uíkon tí tejnko sín tí jehe ch'án tí tjejóne sín. Ntá nixjehe ch'án sín kixin nkekuènté icha asén sín tsíkitekakuenhya sín tí sín tsík'ikon kixin síxechón ch'án. ¹⁵ Ntá ntáche ch'án sín kixin:

—Sáttjirá kuenté chjasintajni tjákohérá kaín xín chojni tí tan jína tsaáxin sín. ¹⁶ Tí nkexro tsitekaon la tsikite la mé tsaá. A ntá tí nkexro tsitekakonhya na mé tsjasóte. ¹⁷ Ntá tí sín tsinkáchónki tí janhan mé tsjasin sín kjuaxroan kixin kjuachaxin njina tsakitsjexín sín tí nchəkuen tí jínahya chóna chojni la ko tsonixja sín ókjé nkiva. ¹⁸ Kjónté konche chrótsé sín la kohya nkehe tsonhen sín la ko kjónté chrók'ui sín ijnko ntə chóna veneno la kohya nkehe tsonhen sín. Kjaxin ts'ejotja tja sín chojni níhi la tsitəhe sín jína.

Ch'ín Jesús chriin ch'án nkaya nkajní

(Lc. 24.50-53)

¹⁹ Ntá ó kjuixin nixjehe Ìnchéni Jesús tí jehe sín ntá sákjuí ch'án nkaya nkajní. A ntá ntiha kjuák'etjəxin ch'án tí tja chjina Dios. ²⁰ A ntá jehe sín sákjuí sín nkuíxín sákjuíkako sín tí tan jína tsaáxin chojni. A ntá jehe Ìnchéni mé kjuínkítsa ch'án tí sín a la ko kjuəchəx-ién ch'án mé kjuasixín sín kjuaxroan kixin tíha mé tso-noexín tí sín tjejóttinín kixin chaxín nkehe kuènte Dios kjuako sín. Amén.

† Lucas 24.13-35

SAN LUCAS

Tíhi mé xrankíxixín tí xroon i

1 Nchónhya chojni tjinkaon chrókjin sín ntoá kaín xín nkehe nkexrí kónhen k'uátsínka Ìnchéni tí k'uéjóni. ² Éxí kjuakoheni tí sín tsík'ikonxín kon sín tí xrankíxixín nkehe k'uátsínka ch'án la ntá k'uáyéhe sín tí xrá sákjuíchronka sín tí tan jína ³ a ntá janhan kjaxian kjuánchánkiá jína kaín nkehe k'uátsínka tí xrankíxixín. Ntá nòna jína ikjian kaín tíha éxí tsíkónhen ntá tsochr'anhan jaha Teófilo kixin imá tjuaha ⁴ kixin ntá jaha tsonoha jína tí nkehe chaxín tsíkjakoha sín.

Ijnko ángel mé chrónka kixin tsokjíhi Juan Bautista

⁵ A ntá tí ch'ín rey Herodes k'uetōan ch'án tí estado Judea la ko ntiha kjuák'e injnko nchat'á mé it'in Zacarías. Jehe ch'án mé kuènte tí sín tsík'axrjeníxín tí ch'ín Abías. [†] A ntá ichjién ch'án mé it'in Elisabet. Jehe tjan mé tsík'axrjeníxín tjan tí nchat'á Aarón. ⁶ Yóí sín na mé jína sín kixin éxí tjinkaon Dios la mé kjuínchexiteyéhe sín kaín nkehe k'uetōan ch'án. Méxra ninkexró chrók'uekahya jie tí jehe sín. ⁷ A ntá jehe sín chóntahya sín xjeen sín kixin ó jehí tsík'itōenhya tjan Elisabet kixin sich'éna tjan xjan la ko ntá jie la ó táda ch'án la ko ó nána tjan.

⁸ A ntá injnko yaon tónhen tocar ch'ín Zacarías la ko tí í so sín tjejóko ch'án sich'e sín xrá nchat'á kuènte Dios. ⁹ A ntá xikaha kuènten tí sín nchat'á a ntá jie ch'ín Zacarías mé kónhen tocar ts'ixenhen ch'án tí cuarto tjóá kuènte njnko tsjak'e ch'án chjincō chrítaón tí altar kuènte Dios. ¹⁰ Ntá kjuák'e ch'án ntiha kjuak'e ch'án tí chjincō la nachrohe kaín tí chojni k'uéjóni sín ntója nixjehe sín Dios. ¹¹ Ntá xringhya k'uíkon ch'ín Zacarías injnko ángel kuènte Dios tjexín toté ch'án nánko chjina tí altar tjak'exín sín chjincō. ¹² A ntá tió k'uíkon ch'ín Zacarías tí ángel la imá kóxakonhen ch'án la ko imá chrakon ch'án. ¹³ A ntá ntáchro tí ch'ín ángel kixin:

—Zacarías, chrakonhya jaha. Ó kuínhin Dios tí nkehe tjanchehé ch'án la ntá ichjián Elisabet sich'éna tjan injnko xjan ntoá na mé sijnchek'ian xjan Juan. ¹⁴ Jaha la tsqcháhá má la ko itsjé chojni tsqchéhe sín kixin tsokjíhi xjan ¹⁵ kixin imá tjetoan tsjak'e tí xjaan éxí tóxrjinhjín Dios. Ninkehó xran vino la ko ninkehó í jnko xran ts'ihya ch'án. Tsochónta ch'án kjuachaxin kuènte Nchakuen Dios kjónté naxá tokjéhya ch'án. ¹⁶ Jehe ch'án mé tsjakohé ch'án tí chojni nación Israel a ntá itsjé sín tsokjan sín tsinkáchónki sín Ìnché sín Dios. ¹⁷ Jehe ch'ín Juan tsítaón ch'án ntja tsixín Ìnchéni. Éxí

k'uékjako ch'ín Elías ósé mé tsjako ch'án la ko tsochónta ch'án kjuachaxin éxí k'uéchónta ch'ín Elías kixin tí sín it'é xjan la mé jína ts'ejóko xjeen sín la ko kjaxin tí sín titekakonhya mé tsitekaon sín. Mé xikaha tsonixjehe ch'án chojni kixin ó itsi Ìnchéni la chrókuinkáchónki sín tí jehe ch'án.

¹⁸ A ntá tí ch'ín Zacarías kjuanchankíhi ch'án tí ch'ín ángel ntáchro ch'án kixin:

—Nkexrí chrókónhona kixin chaxín chrókónhen tíhi? Janhan la ó tádana la ko tí chjin chonta la kjaxin ó nána tjan —ichro ch'án.

¹⁹ Ntá kjuátehe tí ch'ín ángel ntáchro ch'án kixin:

—Janhan mé Gabriel la mé t'ahá xrá Dios. A ntá jehe ch'án mé k'uetuanna k'uinka tsonixjaha tsqxrjanka tí nkehe jína tsonhen. ²⁰ A ntá jie kuítekákonyha tí nkehe xrjanka a ntá tsonósian jaha xitjahya tsonixja jaha tsoxitjajia tí yaon tsokjíhi tí xjaan. Mé xikaha tsoxiteyá kaín tíha —ichro ch'án.

²¹ A ntá tí í so sín ntiha k'uéjochónhen sín ntója njnko kixin ts'axrje ch'ín Zacarías, ntá kóxakonhen sín kixin imá sé kóxrjenhen ch'án nkaxenhen njnko. ²² Ntá tió k'uaxrjexín ch'ín Zacarías tí nkaxenhen njnko la í xitjahya nixja ch'án. Ntá kónohe sín kixin ichrén kjuaxroan kuènte Dios tsík'ikon ch'án tí nkaxenhen njnko. Ntá itja ch'án ó tjakoxín ch'án tí nkehe chróntáchro ch'án kixin í xitjahya nixja ch'án.

²³ A ntá tió kjuixin tí yaon kjuích'e ch'ín Zacarías xrá njnko ntá sákjuí ch'án ntqé ch'án. ²⁴ A ntá chr'éxín ntá kjuák'eyá tí ichjién ch'án Elisabet. Ntá ntqé tjan ó kuítqhe tjan in'ó nitjó kjuenkayáxín tjan kixin: ²⁵ “Mé xikaha injnko kjuaxroan kjuanjon Ìnchéni kixin chrók'uán-taxiéhnyani chojni kixin ó tsochóntani xjeenni jie chrókjuikosáyeheni sín”, ichro tjan.

Ijnko ángel chrónka kixin tsokjíhi Jesús

²⁶ A ntá k'uátsínka injnko nitjó ntá Dios k'uetuēnhen tí ch'ín ángel Gabriel kixin sátsji ch'án injnko chjasin estado Galilea mé it'in Nazaret, ²⁷ sátsji nixjehe ch'án injnko tjan tjarisoá naxá kuákjahya tjan chojni ntoá mé it'in tjan María. Jehe tjan mé tsíkjatēhe tjan kixin tsqtehe tjan injnko ch'ín mé it'in José, mé tsík'axrjeníxín ch'án tí ch'ín rey David. ²⁸ A ntá tí ch'ín ángel k'uíxenhen tí tjan tjan ntá ntáchro ch'án kixin:

—K'uinka nixjaha jaha kixin Dios kjuínkítsa tí jaha. Ìnchéni Dios tjekoa tí jaha. A ntá jaha imá kjuíntayavan ch'án ntá tí í so chojni chjin la kénhyó —ichro ch'án.

²⁹ Kjánchó tió k'uíkon tjan tí ch'ín ángel na mé kóxakonhen tjan kjuenkayáxín tjan kixin nkekuènte xikaha

† 1 Crónicas 24.10

nixjeheni ch'án, ichro tjan. ³⁰ A ntá ntáchro tí ch'ín ángel kixin:

—Chrakonhya, María. Dios la imá tjetjinkitsa tí jaha.

³¹ A ntá jie la tsjak'èyá jaha, tsochonta ijnko xjan ntoa la ko sijnchek'ian xjan Jesús. ³² Imá ts'etōan ch'án la ko its'in ch'án Xjeen Dios nkaya nkajni. Inchéni Dios mé tsjanjon ch'án kjuachaxin ts'etōan ch'án éxi ijnko rey éxi k'uetōan ch'ín David, tí nkexro ts'axrjenixin ch'án. ³³ Jnkochrixín tsjak'e ch'án ts'etueñhen ch'án tí sín naciōn Israel, la mé tsjejehya tí kjuachaxin ts'etōan ch'án —ichro tí ch'ín ángel.

³⁴ Ntá kjuanchankíhi tjan María tí ch'ín ángel kixin:

—¿Nkekuente kixin xikaha chrókónhen kixin janhan la naxá chontahya chojni ntoa? —ichro tjan.

³⁵ Ntá kjuatehe tí ch'ín ángel, ntáchro ch'án kixin:

—Tí Nchakuen Dios mé ts'inkajin éxi ijnko tjuí la ko tí kjuachaxin kuente Dios mé tsjak'etja tí jaha, a ntá ts'óna tí xjan. Mé xikaha tí xjan tsokjíhi la mé tjóá xjan la mé its'in xjan Xjeen Dios. ³⁶ La ko kjaxin tjan Elisabet kjéhya jaha kjónté ó nána tjan la mé tjeýá tjan. Senó la k'uéchóntahya tjan xjan, a ntá jie la ó injon nitjó tjeýá tjan. ³⁷ Kixin tí kjuachaxiēn Dios la tsjacha tsōnhen kaín xín nkehe —ichro tí ch'ín ángel.

³⁸ Ntá ntáchro tjan María kixin:

—Janhan mé t'ahá Inchéni Dios xrā. Ó nchōxon tí nkehe k'uetōan ch'án sintaxiteyáha ch'án éxi chronka jaha —ichro tjan.

A ntá kjuixin chrónka tí ch'ín ángel ntá sákjuí ch'án.

Tjan María sákjuitsjehe tí tjan Elisabet

³⁹ A ntá ijnko yaon tí tjan María tjan sákjuí tjan ijnko chjasin tjan tí jnā estado Judea. ⁴⁰ Ntá kjuíji tjan tí chjasin ntiha ntá k'uixenhen tjan ntōe ch'ín Zacarías la ntá nixjehē tjan tí tjan Elisabet. ⁴¹ A ntá tió kuínhin tjan Elisabet nixja tjan María ntá chrika tí xjan nkaya tsee tí tjan Elisabet. Ntá antsí k'uáyéhē tjan kjuachaxiēn Nchakuen Dios ⁴² ntá itsen nixja tjan ntáchro tjan kixin:

—Dios imá kjuíntayavan la ntá tí í so chojni chjin la kénhyó la ko kjaxin kjuíncheyaon ch'án tí xjāan. ⁴³ ¿Xá nkexro tí janhan kixin kjuínixjana iné Inchéni? ⁴⁴ Tió kuínhan nixjana ntá tí xjan la chrika xjan nkaya tsēna kixin chéhe xjan kjuíha. ⁴⁵ Ntá jaha la cháha kixin kuítékávan kixin Inchéni Dios sinchexiteyá tí nkehe ntáchro ch'án —ichro tjan.

⁴⁶ Ntá ntáchro tjan María kixin:

Asenná imá tjikosáyehe Inchéni Dios

⁴⁷ la ko chéhe asenná kixin Dios sinchekaáni ch'án.

⁴⁸ Kixin Dios ikuá kuentá ijnko tí chojni chjin nōe ch'exón xrā kuente ch'án.

A ntá ijie la ko jnkochrixín tsontáchro chojni kixin náxrjón tjēn janhan, tsixro sín.

⁴⁹ Kixin Dios chóna kaín kjuachaxin ntá janhan mé kjuasixinna ch'án ijnko kjuaxroan jíé;

imá tjóá tí ihnié ch'án.

⁵⁰ Jnkochrixín tsikonóehē ch'án kaín tí sín tjikosáyehe sín ch'án.

⁵¹ Tsíkjasin ch'án itsjé kjuaxroan jíé;

kuakitsjehe ch'án tí kjuachaxin chóna tí sín nchehnke.

⁵² Kuakitsjehe ch'án tí kjuachaxin chóna tí sín t'etōan,

A ntá tí sín nōa k'uék'etueñhya senó la mé jie chjéhe ch'án kjuachaxin ts'etōan sín.

⁵³ A ntá tí sín t'enxín kjinta la kjuanjon ch'án kaín nkehe tsicháxinhin sín, a ntá tí sín rico xráxín jehó tja sín sákjuí sín.

⁵⁴ Kjuínkitsa ch'án tí sín naciōn Israel kixin tjejóch'ehe sín ch'án xrā;

k'uitjáyenhya ch'án tí jehe sín kuikonóehē ch'án sín,

⁵⁵ éxi k'uéchenka ch'án tí sín k'uaxrjenixinni k'uéjō sín ósé,

na mé tí ch'ín Abraham la ko kaín tí sín naxá ts'axrjenixin ch'án —mé xikaha ichro tjan María.

⁵⁶ A ntá tjan María kuítōeko tjan tí tjan Elisabet iní nitjó la ntá chr'éxin xíkjan tjan ntōe tjan.

Kokjíhi ch'ín Juan Bautista

⁵⁷ Ntá xétja tí yaon sinchekokjíhi tjan Elisabet tí xjeen tjan, a ntá kjuínchekokjíhi tjan ijnko xjan ntoa. ⁵⁸ A ntá tí sín chjinaxón ntōe la ko tí sín kjéhya tjan mé kjuíit-sjehe sín kixin tsōchéheko sín tjan kixin kuínhin sín kixin Dios imá tsíkikonóehē tí jehe tjan. ⁵⁹ Ntá tí yaon jnix-in ikui sín sincheka sín xjan tí xroye kuente tí sín judío. Ntá chrókjuinchek'in sín xjan Zacarías éxi it'in it'é.

⁶⁰ Kjánchó ntáchro iné xjan kixin:

—Náhi. T'ichjánxin its'in xjan Juan —ichro tjan.

⁶¹ Ntá ntáchro sín kixin:

—¿Nkekuente kixin xikaha chrók'uín xjan? Kohya nkexro naxá kjéhya xikaha it'in —ichro sín.

⁶² A ntá kaín tí sín kjéhya kjuakoxin sín tja sín kjuanchankíhi sín tí it'é xjan kixin nkexrí tjinkaon ch'án chrók'uín tí xjan. ⁶³ A ntá tí it'é xjan mé kjuanchia ch'án ijnko ntachiso ntsí tsokjin ch'án ntá kjin ch'án kixin:

“Ihnjé xjan mé Juan.” A ntá kaín tí sín tjejó sín ntiha la chrakon sín kuínhin sín xikaha kónhen. ⁶⁴ A ntá xri-nahya ch'ín Zacarías kjuankixin ch'án nixja ch'án inaá kjuanchehe ch'án Dios kjuasáya. ⁶⁵ A ntá kaín tí sín chjinaxón ntōe sín mé chrakon sín. La ntá nkuíxín tí jnā kuente estado Judea mé kjo sín kichó sín chrónka sín kixin xikaha tsíkónhen. ⁶⁶ A ntá kaín tí sín kuínhin mé kjuenkayáxin sín kjuanchankíhi sín kichó sín kixin:

—¿Xá nkehe tí xrā tsíkítōnhen tí xjan i? —ichro sín.

Kixin chaxín Inchéni Dios tsíkjincheyaon ch'án tí xjan.

Tí ch'ín Zacarías itsje ch'án

⁶⁷ A ntá it'é tí xjan mé ch'ín Zacarías, mé antsí k'uáyéhē ch'án kjuachaxin kuente Nchakuen Dios ntá xikaha nixja ch'án itén Dios ntáchro ch'án kixin:

⁶⁸ Imá jina Inchéni, na mé tí Dios kuente tí naciōn Israel,

kixin ikui ch'án tí tjejóni kjuínchekaá ch'án naciōn kuenténi.

⁶⁹ La ko kjuanjon ch'án ijnko nkexro t'etōan sinchekaáni ch'án

na mé ijnko nkexro k'uaxrjeníxin tí ch'ín David, tí nkexro k'uékjich'ehe Dios xra.

⁷⁰ Éxí k'uéchronkaxín tí sín kjueyá Dios k'uéchronka itén Dios ósé,

⁷¹ k'uéchronka Dios kixin sinchekaáni ch'án kixin ntá tsjachahya kaín tí sín nínkakohenni,

⁷² tsíkonóehē ch'án tí sín k'uaxrjeníxinni ósé, ts'itjáyenhya ch'án tí nkehe tsíchronka ch'án tsoxiteyá.

⁷³ Tíhi mé tsíkjo Dios tí ch'ín Abraham ósé kixin nkehe chaxín tsoxiteyá chr'éxin

⁷⁴ kixin sinchekaáni ch'án kixin kohya nkehe sich'e-heni tí sín nínkakohenni kixin jína sich'e-heni ch'án xra tsochrakonhyani,

⁷⁵ la ntá jína ts'ejóni sinchetjóáni ch'án kaín yaon tí naxa tjejóchóni.

⁷⁶ A ntá jaha xjeenni mé tsontácho Dios kixin jaha ijnko nkexro tsochrónka itén Dios tjen nkaya nkajní.

Jaha tsítónxian ntja tsixín Ìnchéni la ko jaha tsjásiyóxi-an ntja tsixín ch'án.

⁷⁷ Jaha tsjákohé tí chojni chjasintajni nkexrí tsjiin tí jie chóna sín, ntá tsaá sín.

⁷⁸ A ntá Dios mé tjuèheni ch'án la ko kujkonóehēni ch'án, kixin nkajní kuixín ijnko xrohi nixin ts'inkaséyanxín tí yaon nixin.

⁷⁹ Tíha mé tsíkjo tí xrohi ts'inkaséyanxín tí sín tjejó sítié la ko tí sín chrók'uitjáyan, la ko ts'ikonxínni tí ntja tsjanjon kjuaxróxin.

Na mé kaín tíhi chrónka tí ch'ín Zacarías.

⁸⁰ A ntá tinkák'ánkí tí xjan a la ko Dios kjuínchek'ánkí tí kjuaxrexinkaon kuènte xjan kixin antsí tsonhe xjan nkexrí tjen Dios. A ntá kjuák'e xjan nteje k'uánkí xjan kjuixrakájia tí yaon kjuankíxin kjuakohē ch'án tí chojni naciòn Israel.

Kokjíhi ch'ín Jesús

(Mt.1.18-25)

2 A ntá tí yaon a na mé tí ch'ín imá t'etōan mé it'in Augusto César na mé k'uētōan ch'án kixin

ts'ínixín ihníé kaín xín chojni siín tí chjasin t'etōan

ch'án kixin tsonhe ch'án nkekjaín chojni siín. ² Tí xrankíxixín k'uínixín ihníé sín tió Cirenio mé k'uégob-

ernador k'uētōan estado Siria. ³ Kaínxín chojni

t'ichjánxín sátsji sín chjasén sín kixin ntaha ts'ínixín ih-

níé sín. ⁴ Mé xíkaha ch'ín José kjaxín k'uaxrjexín ch'án

tí chjasin Nazaret estado Galilea ntá sákjuí ch'án tí es-

tado Judea na mé sákjuí ch'án chjasin Belén tí tsíkokjéxín

tí ch'ín rey David kixin jehe ch'ín José mé tsík'axrjeníxin

ch'án tí ch'ín David. ⁵ Sákjuí ch'án ch-

jasin Belén sákjuíko ch'án tí tjan María kixin ntiha

ts'ínixínko ihníé ch'án tjan kixin jehe tjan tsíkatehe

kixin tsoṭehe ch'án. A ntá jehe tjan na mé ó tjejá tjan. ⁶ A ntá xíkaha kónhen nachrohe k'uéjó sín chjasin

Belén, ntá kjuixraká tí yaon tsokjíhi xjeen tjan María. ⁷ A ntá ntiha kokjéxín tí xjeen tjan saō. Ntá kjuínchek'ísímá tjan xjan ka, a ntá kjuak'enkaya tjan ijnko nta neyá iko kixin jehe sín la k'uitjahya sín nchia xranka ts'ok'èxín sín mé kjónté ntiha k'uéjó sín.

Tí sín ángel la ko tí sín k'uáyakonhen kolélo

⁸ Kjaxín chjinaxón tí chjasin Belén tjejó iso chojni nteje ó la ntá ntahó titohe sín tí tie a kixin t'ayakonhen sín kolélo. ⁹ A ntá titàya k'uíkuèn sín ijnko ángel kuènte Dios la ko nkuíxín tí tjejó sín la k'uínkaséyan kixin tí kjuachaxín jie kuènte Dios kujkaō ch'án. Ntá jehe sín la imá chrakon sín. ¹⁰ A ntá tí ch'ín ángel ntácho kixin:

—Chrakonhyará jahará. Ijie k'uinka tsōtjōnkārā nkehe jína nixin kixin tsochéhē kaín xín chojni ¹¹ kixin ijie tí chjasén ch'ín David kokjéxín tí nkexro tsaáxinrá jahará na mé Ìnchéni Cristo tíha. ¹² Ntá tsonoxínrá jahará kixin tí xjan a kixin ika tjechr'ísímá xjan la ko ijnko nta neyá iko mé tjetsínkayá xjan —mé xíkaha chrónka tí ch'ín ángel.

¹³ A ntá titàya k'uíkuèn sín kixin nchónhya sín ángel kuixín nkaya nkajní tjejóko tí ch'in ángel tjejótsje sín tjanchehe sín Dios kjuasáya, ntácho sín kixin:

¹⁴ Kjuasáyé Dios tjen nkaya nkajní kixin imá chóna ch'án kjuachaxín. Ntá chjasintajni ts'ixín kjuaxróxin tí tjejó tí sín sinchexiteyéhē ch'án. Mé xíkaha ichro sín.

¹⁵ A ntá tí sín ángel xíkjan sín nkaya nkajní, a ntá tí sín t'ayakonhen kolélo ikjo sín kíchó sín ntácho sín kixin:

—Ìntá sátsjini tí chjasin Belén tsjitsjeheni tí nkehe tsíkónhen kixin Ìnchéni k'uētōan kui tí nkexro kjuínchenoheni —ichro sín.

¹⁶ Ntá tjiān sákjuí sín ntiha la k'uitja sín tí tjan María la ko tí ch'ín José la ko tí xjan a tjetsínkayá nta neyá iko. ¹⁷ A ntá tió k'uíkon sín xíkaha ntá chrónka sín tí nkehe tsíchrónka tí ángel kixin nkexrí tjen tí xjan a.

¹⁸ Ntá chrakon kaín tí sín kuínhin kixin xíkaha chrónka tí sín k'uáyakonhen kolélo. ¹⁹ Kjánchó tí tjan María la asén tjan ó xraxinkakonxín tjan kaín tíha. ²⁰ A ntá tí sín k'uáyakonhen kolélo la sákjuí sín ntja kuinkákjanchehe sín Dios kjuasáya kixin kaín tí nkehe tsíkinhin sín la ko k'uíkon sín kixin ó xiteyá kaín nkehe éxí tsíchrónka tí ángel.

Sákjuíko sín tí xjan Jesús tí nínko Jerusalén

²¹ A ntá tió xétja tí ijni yaon ntá kjuíncheka sín xjan xroye kuènte tí sín israelita ntá kjuínchek'in sín xjan Jesús éxí tsíntácho tí ch'ín ángel chénka tí tjan María tí naxa kjuák'eyáhya tjan.

²² A ntá tió kuítohe tjan María jína éxí chrónka ley kuènte Moisés † ntá sákjuíko sín tí xjan tí chjasin Jerusalén kixin tsochjéhe sín Dios kjuasáya. ²³ Éxí ntácho tí xroon ley kuènté Ìnchéni Dios kixin: "A ntá kaín xjan ntoa tsokjíhi saōxín la mé tsochjéhe sín Dios tí xjan a sich'ehe xjan xra Dios." ††²⁴ Ntá xíkaha sákjuí sín kixin ntaha tsjanjon sín iko ts'enxín ntiha tsochjéxín sín Dios kjuasáyé éxí t'etōan tí ley kuènte ch'án na mé yaá kontóá najni o yaá kontóá nteje chrókjuanjon sín.

† Levítico 12.1-8 †† Éxodo 13.2,12

²⁵ A ntá tí yaon a kjuák'e chjasin Jerusalén ijnko ch'án ó táda ch'án mé it'in ch'án Simeón. Jehe ch'án ijnko chojni jína la ko jnkochrín xraxinkaon ch'án Dios la ko kjuák'echónhen ch'án kixin itsi tí nkexro tsaáxin tí nació Israel. Tí Nchakuen Dios tjeko tí ch'ín Simeón ²⁶ tsíkjinchenohe ch'án kixin naxa ts'enhya ch'án ts'ikonjia ch'án tí nkexro Cristo, na mé tí nkexro tsochr'án Inchéni Dios. ²⁷ A ntá tí Nchakuen Dios kjuínchexraxinkaon tí ch'ín a kixin sátsji ch'án njnko. A ntá tió kui tí iné la ko it'é xjan Jesús k'uixenko sín xjan nkaxenhen njnko kixin sinchexiteyéhe sín tí nkehe t'etōan tí ley ²⁸ ntá ch'ín Simeón kuakja ch'án tí xjan a kjóa ch'án ntá kjuanchehe ch'án Dios kjuasáya ntáchro ch'án kixin:

²⁹ Ijie jaha Inchéni Dios, tsjánjuan kjuachaxin kixin kjuaxróxin its'én janhan

kixin jaha ó kjuínchexiteyá tí nkehe tsintáchrúa

³⁰ kixin ó k'uikōnxin kuān tí nkexro tsaáxinni,

³¹ mé xikaha kjuich'e kixin ts'ikon kaín xín chojni.

³² Jehe ch'án mé tí xrohi ts'inkaséyanxín ntje tí sín jehya kuènte Israel,

la ko jehe ch'án tsjikosáyehe ch'án tí chjasín kuèntá Israel,

mé ichro ch'ín Simeón.

³³ Ntá ch'ín José la ko tí iné ch'ín Jesús la chrakon sín kixin xikaha kuínhin sín ntáchro ch'ín Simeón kixin nkexrí tjen tí xjan. ³⁴ Ntá ch'ín Simeón kjuíncheyaon ch'án sín ntá chénka ch'án tí tjan María mé tí iné xjan Jesús kixin:

—Tí xjan i tsíkikao itsjé xra la itsjé tí sín Israel tsitekakuenhya sín xjan la tsítóhe sín la ko itsjé sín tsitekaon sín antsí tsonohe sín la ko nchónhya chojni tsotjinkakonhya tsinhin sín tí nkehe tsjako ch'án. ³⁵ Mé xikaha tsonoxín nkexrí tjenkayáxin jnkojnko asén chojni. Kjánchó kaín tíha tsoyóhe éxi ijnko chica espada chróchr'áte asán na mé tsoxakonhan la ko ts'avá má —ichro ch'án nixjehé ch'án tí tjan María.

³⁶ Kjaxin ntaha kjuák'e ijnko tjan chrónka itén Dios mé it'in tjan Ana, it'é mé it'in Fanuel, la mé tsik'axr-jeníxin ch'án tí ch'ín Aser. Jehe tjan la ó nána tjan. Tí naxa k'uétjarisoá tjan la kótehe tjan. Ntá yatokoá nánó kjuák'eko tí xii tjan ³⁷ ntá jie ochenta y cuatro nánó tsíkók'án tjan. Kuítōehya tjan tí xra kuènte njnko la mé ntahó tjen tjan ch'ehe tjan Inchéni Dios xra nchakotjin la ko tie la jnkoyaxón nehya tjan kixin jína tsonixjehé tjan Dios. ³⁸ Ntá kóchjina tí tjan Ana tí yaon, a ntá kjuixin kjuanchehe tjan kjuasáyé Dios ntá kjuankixin chrónka tjan nkexrí tjen tí xjan Jesús nixjehé tjan kaín tí sín tjejóchónhen kixin itsi nkexro sinchekaá tí chjasin Jerusalén.

Ntá kjan sín chjasin Nazaret

³⁹ Na ntá tió kjuixin kjuínchexiteyá sín kaín nkehe t'etōan tí ley kuènte Dios ntá kjan sín estado Galilea na mé chjasén sín chaxín Nazaret. ⁴⁰ A ntá tí xjan a mé k'uánkí xjan la ko tsankā xjan la ko imá kónohe xjan kixin Dios imá tjinkitsa tjencheyaon xjan.

Tí xjan Jesús kjuák'e xjan tí njnko Jerusalén

⁴¹ Tí it'é la ko iné tí xjan Jesús xráxin k'uékji sín kaín nánó tí chjasin Jerusalén kixin tí kia pasqua. ⁴² A ntá tió xetjehé ch'ín Jesús tí teyó nánó, ntá sákjuí sín kaín sín tí chjasin Jerusalén kixin xikaha kuènten sín kixin tí kia a. ⁴³ A ntá kjaxin sín ntiha sáchrókjuí sín chjasén sín tió k'uátsínka kia la tí xjan Jesús ó tsíkítōhe xjan Jerusalén ntahó, kjánchó iné xjan la ko ch'ín José xraxinkakonhya sín kixin kohya tí xjan. ⁴⁴ Jehe sín mé kjuenkayáxin sín kixin ách'e tí sín kuichréhe mé kuikao sín xjan la ntá xikaha chjina ijnko yaon ó tjejóyá sín ntja tsíkji sín. A ntá kjueyá sín xjan tí tjejó tí sín kjéhya la ko tí sín chóxin sín ⁴⁵ kjánchó k'uitjahya sín xjan. Ntá kjan sín tí chjasin Jerusalén kixin tsjeyá sín xjan ntiha.

⁴⁶ Ntá k'uátsínka iní yaon ntá k'uitja sín xjan la mé nkaxenhen njnko ntiha tjetjaxin xjan jnkōsiné tí tjejó tí sín maestro tjako tí ley la tjetinhin xjan tí nkehe ntáchro sín la ko tjetjanchankíhi xjan tí jehe sín. ⁴⁷ Ntá kaín tí sín tjejótaxín tjejótinhin sín mé chrakon sín kixin xikaha imá nohe xjan la ko xikaha tjetehé xjan kaín nkehe tjananchankíhi sín xjan. ⁴⁸ Ntá tió k'uikōn iné la ko it'é la chrakon sín. Ntá ntáchro iné kixin:

—Xjeenni, ¿nkekuènte xikaha kjuich'e? It'á la ko janhan imá kóxakonhenni kjueyáni tí jaha —ichro tjan.

⁴⁹ Ntá ntáchro ch'ín Jesús kixin:

—¿Nkekuènte tjejá tí jeheni? ¿Á noahya jaha kixin tóxakonhenni kixin tí xra kuènte It'éni? —ichro ch'án.

⁵⁰ Kjánchó kíenxínhya sín nkexrí t'axrjexín tí nkehe ntáchro ch'án.

⁵¹ Ntá kjan sín chjasin Nazaret. A ntá ntiha naxa kuítekakonhen xjan tí jehe sín. A ntá tí iné la ntá asén tjan xráxin ó nohe kixin xikaha kónhen. ⁵² La ko naxa k'uánkí xjan kónteto xjan la ko k'uánkí tí kjuaxrexinkaon kuènte xjan la ko Dios kóxrjínhin nkexrí kjuínchexiteyá xjan la ko kjaxin kaín chojni kóxrjínhin sín kixin jína tjen xjan.

Ch'ín Juan Bautista kjuák'e nteje kjuako itén Dios

(Mt. 3.1-12; Mr. 1.1-8; Jn. 1.19-28)

3 A ntá quince nánó k'uék'etōan ch'ín Tiberio tí xra gobierno, la ko tí ch'ín Poncio Pilato k'uégobernador tí estado Judea, la ko tí ch'ín Herodes k'uégobernador tí estado Galilea, la ko tí kichó ch'án Felipe mé k'uégobernador estado Iturea la ko estado Traconite, la ko ch'ín Lisaniás k'uégobernador tí estado Abilinia. ² A ntá ch'ín Anás la ko ch'ín Caifás k'uéchónta sín xra nchāt'á t'etōan. A ntá Dios mé kjuanjon kjuachaxin k'uáyéhe ch'ín Juan itjen ch'án nteje tsochrónka ch'án itén Dios. Ntá jehe ch'án it'é ch'án Zacarías. ³ Ch'ín Juan k'uátsínka ch'án kaín tí chjasin chjino tí ntario Jordán kjuakōhe ch'án chojni ntiha kixin chrókjuinkí sín tí nkehe tjenkayáxin sín chrókuitōhe sín tí ijje sín ntá chrókuite sín kixin xikaha mé chrókjuiin ijje sín. ⁴ Mé xikaha kónhen éxi k'uéchronka la ko tsíkjin ch'ín Isaías, mé tí nkexro k'uéchronka itén Dios ósé kixin: Tsinhin sín itén ijnko nkexro tsjak'e nteje ts'èya tson-táchro kixin:

“Tóxakonhanrá ncheyóxinrá ntja tsixin Ìnchéni Takítjehérá ijnko ntja ntoí.

⁵ Kaínxín tsaka mé tsoyóxin, la ko kaín xín jnā la ko kaín xín itjo tsitōhe yóxin, la ko tí ntja tsíxrèya mé tsoxrentoá, la ko kaín tí ntja yóxinhya la mé tsoyóxin;

⁶ Xikaha mé kaín xín chojni chjasintajni mé ts'ikon sín kixin Dios mé chrókuaáxin sín.” †

Mé xikaha ichro itén Dios.

⁷ A ntá tió kjuíji chojni ntíha kixin ch'ín Juan chrókujk-ite ch'án sín ntá ntáche ch'án tí jehe sín kixin:

—Jahará tsík'axrjeníxinrá konche. ¿Xá nkexro kjuíntanohará kixin chrókuinkeherá tí kjuanínkaon kuènte Dios ó tsí? ⁸ T'ichjánxín kixin chrók'uejorá jnkojína chrókjuákoxinrá kixin chaxín kjuítōxinhínrá tí nkehe tjenkayáxinrá. Jahará nchehnerá ntáchrórá kixin k'uaxrjeníxinrá ch'ín Abraham. Janhan ntáxrjān kixin kjónté tí xro i la Dios tsjacha chrókjuich'éna ch'án chojni k'uaxrjeníxin ch'ín Abraham. ⁹ Kixin tí chicha hacha ó tjechónhen tsochrínjinxín tí nta. A ntá kaín xín nta t'ónahya to jína mé tsochrínjin kixin tsoche —ichro ch'án.

¹⁰ A ntá tí chojni mé kjuanchankíhi sín ch'án kixin:

—A ntá tí xikaha, ¿a ntá jeheni nkehe tí chrókjuich'eni? —ichro sín.

¹¹ Ntá kjuátehe ch'ín Juan kixin:

—Tí nkexro chóntha yaá camisa la chrókjuinchejtōnhen tí nkexro chónthahya. La ko tí nkexro chóntha nkehe sine chróchjéhe sín tí nkexro chónthahya nkehe sine —ichro ch'án.

¹² Kjaxin ikui iso tí sín nchekjènkj kixin chrókukite sín. Ntá kjuanchankíhi sín tí ch'ín Juan kixin:

—Maestro, ¿nkehe chrókjuich'eni jeheni? —ichro sín.

¹³ Ntá ntáchrō ch'ín Juan kixin:

—Jehó éxí tí tsík'ítuanhanrá chrókjuinchejkjènkjirá —ichro ch'án.

¹⁴ Kjaxin iso sín soldado kjuanchankíhi sín ch'án kixin:

—¿Kjaxin jeheni nkehe chrókjuich'eni? —ichro sín.

Ntá kjuátehe ch'án kixin:

—Teéhyará ninkexró tí chjchakōen sín la ko ninkexró sych'énéhyará kjuach'ia la ko kjónté tí chichaon tjachará ó la kjuaxróxin chrók'uejorá —ichro ch'án.

¹⁵ Kaín tí chojni chjasin k'uéjóchónhen sín tóxakonhen asén sín tjinkaon sín tsoñohe sín kixin á tí ch'ín Juan mé tí Cristo. ¹⁶ Kjánchó chénka ch'ín Juan kaín tí sín tjejó a kixin:

—Janhan mé ìntā tíkítexián chojni. A ntá tí nkexro itsi chr'éxin mé tsíkítexínrá tí Nchakuen Dios la ko xrohi. Antsí t'etōan ch'án a ntá janhan la kánhyó. Méxra chrókósuàna chrókjuasintankahā ch'án tí correa tí tokaté ch'án. ¹⁷ Jehe ch'án la ó tjexraá ch'án pala sinchetjuáxin ch'án noatrigo kixin tí ntáchjiji trigo la ókjé tsjejo ch'án a ntá tí noatrigo la tsjenájín ch'án la ts'enkāchjina ch'án. A ntá tí ntáchjiji trigo la tsjakaxín ch'án ijnko xrohi ts'ankahya jnkochríxín —mé xikaha ichro ch'ín Juan.

¹⁸ Mé xikaha chronkaxín ch'án la ko itsjé í so nkehe kjuínchexraxinkaon ch'án chojni mé xikaha kjuakōexín ch'án sín tí tan jína. ¹⁹ Kjaxin kjuentuéhe ch'án tí ch'ín Herodes kixin chóntha ch'án tí tjan Herodías, mé tí ichjien kichó ch'án Felipe, la ko kjuentuéhe ch'án tí ch'ín Herodes kixin tí í so nkehe jínahya tsíkjich'e ch'án. ²⁰ Kjánchó ch'ín Herodes ántōsén ch'án kjónté kuínhin ch'án la kjuínchek'ánkí ch'án tí ijje ch'án inaá kixin kjuak'echjina ch'án tí ch'ín Juan tí ntōechiso.

Kuíkite ch'ín Jesús

(Mt. 3.13-17; Mr. 1.9-11)

²¹ A ntá naxā kuènhya tíha naxā kjuák'e ch'ín Juan kjuíkite ch'án chojni ntá kjaxin ch'ín Jesús mé kuíkite ch'án. A ntá tjenixjehe ch'án Dios ntá xitjehe nkajní ²² ntá k'uínkajin Nchakuen Dios éxí ijnko kontóá tsjehe la kjuák'e chrítaón kja ch'án. Ntá xringhya kuínhin sín itén nkexro nkaya nkajní ntáchrō kixin:

—Jaha mé xjanna la tjuāha tí jaha. Imá chàna kixin nchexiteyána tí jaha.

Tí sín tsík'axrjeníxin ch'ín Jesucristo

(Mt. 1.1-17)

²³ Ch'ín Jesús k'uéchóntha ch'án chjino treinta nánó tió kjuankixin kjuako ch'án. Ntá kjuenkayáxin sín kixin it'é la mé ch'ín José. Ntá it'é tí ch'ín José la mé ch'ín Elí. ²⁴ A ntá it'é tí ch'ín Elí la mé ch'ín Matat; a ntá it'é tí ch'ín Matat la mé ch'ín Leví, a ntá it'é tí ch'ín Leví la mé ch'ín Melqui; a ntá it'é tí ch'ín Melqui la mé ch'ín Jana; a ntá it'é tí ch'ín Jana la mé ch'ín José. ²⁵ A ntá it'é tí ch'ín José la mé ch'ín Matatías, a ntá it'é tí ch'ín Matatías la mé ch'ín Amós, a ntá it'é tí ch'ín Amós la mé ch'ín Nahum, a ntá it'é tí ch'ín Nahum la mé ch'ín Esli; a ntá it'é ch'ín Esli la mé ch'ín Nagai, ²⁶ a ntá it'é tí ch'ín Nagai la mé ch'ín Maat, a ntá it'é tí ch'ín Maat la mé ch'ín Matatías, a ntá it'é tí ch'ín Matatías la mé ch'ín Semei, a ntá it'é tí ch'ín Semei na mé ch'ín José, a ntá it'é tí ch'ín José na mé ch'ín Judá, ²⁷ a ntá it'é tí ch'ín Judá na mé ch'ín Joana, a ntá it'é tí ch'ín Joana la mé ch'ín Resa, a ntá it'é tí ch'ín Resa na mé ch'ín Zorobabel, a ntá it'é tí ch'ín Zorobabel na mé ch'ín Salatiel, a ntá it'é tí ch'ín Salatiel na mé ch'ín Neri, ²⁸ a ntá it'é tí ch'ín Neri na mé ch'ín Melqui, a ntá it'é tí ch'ín Melqui na mé ch'ín Adi, a ntá it'é tí ch'ín Adi na mé ch'ín Cosam, a ntá it'é tí ch'ín Cosam na mé ch'ín Elmodam, a ntá it'é tí ch'ín Elmodam na mé ch'ín Er, ²⁹ a ntá it'é tí ch'ín Er na mé ch'ín Josué, a ntá it'é tí ch'ín Josué na mé ch'ín Eliezer, a ntá it'é tí ch'ín Eliezer na mé ch'ín Jorim, a ntá it'é tí ch'ín Jorim na mé ch'ín Matat, ³⁰ a ntá it'é tí ch'ín Matat la mé ch'ín Leví, a ntá it'é tí ch'ín Leví na mé ch'ín Simeón, a ntá it'é tí ch'ín Simeón na mé ch'ín Judá, a ntá it'é tí ch'ín Judá na mé ch'ín José, a ntá it'é tí ch'ín José na mé ch'ín Jonán, a ntá it'é tí ch'ín Jonán na mé ch'ín Eliaquim, ³¹ a ntá it'é tí ch'ín Eliaquim na mé ch'ín Melea, a ntá it'é tí ch'ín Melea na mé ch'ín Mainán, a ntá it'é tí ch'ín Mainán na mé ch'ín Matata, a ntá it'é tí ch'ín Matata na mé ch'ín Natán, ³² a ntá it'é tí ch'ín Natán na mé ch'ín David, a

† 3.4-6 Isaías 40.3-5

ntá it'é tí ch'ín David na mé ch'ín Isaí, a ntá it'é tí ch'ín Isaí na mé ch'ín Obed, a ntá it'é tí ch'ín Obed na mé ch'ín Booz, a ntá it'é tí ch'ín Booz na mé ch'ín Salmón, a ntá it'é tí ch'ín Salmón na mé ch'ín Naasón, ³³ a ntá it'é tí ch'ín Naasón na mé ch'ín Aminadab, a ntá it'é tí ch'ín Aminadab na mé ch'ín Aram, a ntá it'é tí ch'ín Aram na mé ch'ín Esrom, a ntá it'é tí ch'ín Esrom na mé ch'ín Fares, a ntá it'é tí ch'ín Fares na mé ch'ín Judá, ³⁴ a ntá it'é tí ch'ín Judá na mé ch'ín Jacob, a ntá it'é tí ch'ín Jacob na mé ch'ín Isaac, a ntá it'é tí ch'ín Isaac na mé ch'ín Abraham, a ntá it'é tí ch'ín Abraham ná mé ch'ín Taré, a ntá it'é tí ch'ín Taré na mé ch'ín Nacor, ³⁵ a ntá it'é tí ch'ín Nacor na mé ch'ín Serug, a ntá it'é tí ch'ín Serug na mé ch'ín Ragau, a ntá it'é tí ch'ín Ragau na mé ch'ín Peleg, a ntá it'é tí ch'ín Peleg na mé ch'ín Heber, a ntá it'é tí ch'ín Heber na mé ch'ín Sala, ³⁶ a ntá it'é tí ch'ín Sala na mé ch'ín Cainán, a ntá it'é tí ch'ín Cainán na mé ch'ín Arfaxad, a ntá it'e tí ch'ín Arfaxad na mé ch'ín Sem, a ntá it'é tí ch'ín Sem na mé ch'ín Noé, a ntá it'é tí ch'ín Noé na mé ch'ín Lamec, ³⁷ a ntá it'é tí ch'ín Lamec na mé ch'ín Musalén, a ntá it'é tí ch'ín Musalén na mé ch'ín Enoc, a ntá it'é tí ch'ín Enoc na mé ch'ín Jared, a ntá it'é tí ch'ín Jared na mé ch'ín Mahalaleel, a ntá it'é tí ch'ín Mahalaleel na mé ch'ín Cainán, ³⁸ a ntá it'é tí ch'ín Cainán na mé ch'ín Enós, a ntá it'é tí ch'ín Enós na mé ch'ín Set, a ntá it'é tí ch'ín Set na mé ch'ín Adán, a ntá Dios mé xjeen ch'ín Adán.

Ch'ín Tsochren chrókjuachroe tí ch'ín Jesús

(Mt. 4.1-11; Mr. 1.12-13)

4 A ntá ch'ín Jesús imá chóna ch'án kjuachaxién Nchakuen Dios ntá kjanxin ch'án tí ntarío Jordán. Ntá tí Nchakuen Dios sákjuiko ch'án nteje. ² Ntaha kjuák'e ch'án cuarenta yaon na ntá tí ch'ín Tsochren tjinkaon chrókjuachroe tí jehe ch'án. Kjónehya ch'án ninkehó tí cuarenta yaon a, a ntá chr'éxin ntá xrinahya ik'uén ch'án kjinta. ³ Ntá ntáchro tí ch'ín Tsochren kixin:

—Tí chaxín jaha Xjeen Dios la ntáche tí xro i kixin chrók'óna niotja.

⁴ A ntá kjuátehe ch'ín Jesús ntáchro ch'án kixin:

—Náhi. Ntáchro xroon itén Dios kixin: "Jehya niotja ó chrók'uejóchónxin chojni. Náhi. Kaín tí tan nixja Dios tjejóchónxin chojni" † —ichro ch'án.

⁵ Ntá sákjuiko ch'ín Tsochren tí ch'ín Jesús ijnko jna imá noi ntá kjuako tí Jínahya kaín tí nación siín chjasintajni. ⁶ Ntá ntáchro tí ch'ín Tsochren kixin:

—Janhan tsotjaha kaín tí kjuachaxin la ko kaín tí nkehe tjete chóna kaín tí nación a. Janhan na k'uayáha kaín tíha la ntá jie tsotjaha tí nkexro tjínkavan tsotjaha. ⁷ Tí tsjak'éxian tóch'ian tsjkosáyana tí janhan ntá kaín tí nkehe la ts'óna kuénta —ichro ch'án.

⁸ Ntá kjuátehe ch'ín Jesús ntáchro ch'án kixin:

—Sátjia Satanás, kixin xroon itén Dios ntáchro kixin "Chrókjuikosáyehé Ìnchéni Dios la jehó ch'án chrókjuich'ehé xra" †† —ichro ch'án.

† Deuteronomio 8.8 †† Deuteronomio 6.13

⁹ A ntá ch'ín Tsochren mé sákjuiko ch'ín Jesús tí chjasin Jerusalén la sákjuiko ch'án tí chrítaón tí kja ninko, a ntá ntáchro ch'án kixin:

—Tí chaxín Xjeen Dios jaha la títoghé t'anótjenxian tí noi nihi ¹⁰ kixin ntáchro xroon itén Dios kixin:

Dios mé ts'etuñhen tí sín ángel kuénte ch'án kixin ts'ayakonhan sín. ‡

¹¹ Tsotsé sín itjá

kixin tsotéhya totá ts'itja xro tí ts'anótjen †† —mé xikaha ichro ch'ín Tsochren.

¹² Ntá kjuátehe ch'ín Jesús ntáchro ch'án kixin:

—Náhi. Kjaxin ntáchro xroon itén Dios kixin:

"Chjinihya chrókjuásixián kjuaxroan kjuachaxin kuénte Ìnchéni Dios" †† —ichro ch'ín Jesús.

¹³ Mé xikaha tió kjuachahya tí ch'ín Tsochren kaín nkehe chrók'ueñhen tí ch'ín Jesús ntá k'uaxrjenta ch'án iso yaon.

Ch'ín Jesús kjuankixin ch'án tí xra kuénte ch'án estado Galilea

(Mt. 4.12-17; Mr. 1.14-15)

¹⁴ Ntá ch'ín Jesús xíkjan ch'án estado Galilea inaá na imá chóna ch'án kjuachaxin kuénte Nchakuen Dios. Ntá tjejóto sín nkuíxin ntiha kixin nkexro tí jehe ch'án. ¹⁵ Kjuakoxin ch'án tí ninko sín kaín chjasin la ko kaín xin chojni kjuanchia sín kjuasáya kixin kóxrjinhin sín tí kjuako ch'án.

Ch'ín Jesús kjuák'e ch'án chjasin Nazaret

(Mt. 13.53-58; Mr. 6.1-6)

¹⁶ Ntá ch'ín Jesús sákjuí ch'án chjasin Nazaret na mé tí chjasin tsík'ánkixin ch'án. Ntá tí yaon t'ok'éhe sín mé k'uixenhen ch'án ijnko ninko Israel kixin xikaha kuénhen ch'án. Ntá kjuák'exin toté ch'án kixin sinchekuáxin ch'án tí xroon itén Dios. ¹⁷ Chjéhe sín ch'án tí xroon kuénte tí profeta Isaías. Ntá kuakitjehé ch'án tí xroon ntá k'uitja ch'án nketí nixja xikihí:

¹⁸ Tí Nchakuen It'éni Dios tjetjinkitsana má, kixin kjuéyána ch'án kixin tsóxrjanka tí tan jína kuénte Dios tsjakohá tí sín ña.

K'ueñuanna ch'án kixin sintakitohá jína tí sín t'ává asén kixin chónahya sín nkerí tsaáxin sín, la ko tsjakohá tí sín tjejóchjina kixin nkexrí tsaá sín, la ko sintak'ikuñ tí sín t'ikonhaya, la ko sintakaá kaín tí sín tjejóttasóte kohya nkehe tsaáxin sín,

¹⁹ la ko tsóxrjanka kixin ó kjuixraká tí yaon kixin tí nkexro tsitekaon la tsaá sín. †††

²⁰ A ntá ch'ín Jesús kjuixin kjuínchekuáxin ch'án tí xroon, a ntá chjéhe ch'án tí ch'ín tjínkitsa tí xra ninko ntá kjuák'etjaxin ch'án. Ntá kaín tí sín tsíkójkotsé ntiha ninko naxá tjejókomá sín tí jehe ch'án. ²¹ Ntá kjuankixin chronkaxin ch'án ntáchro ch'án kixin:

—Ntá ijie la ó xiteyá tí nkehe kjuintakuáxin tí xroon itén Dios kuínhínrá —ichro ch'án.

‡ Salmo 91.11 †† Salmo 91.12 †† Deuteronomio 6.16 ††† 4.18-19 Isaías 61.1-2

²² Ntá kaín sín kóxrjínħin sín tí kjuako ch'ín Jesús la ko chrakon sín kixin náxrjón tí nkehe nixja ch'án. Ntá kjuanchankíhi sín kichó sín ntáchro sín kixin:

—¿A jehya xjeen ch'ín José tíhi? —ichro sín.

²³ Ntá kjuátehe ch'ín Jesús ntáchro ch'án kixin:

—Kjá tsontáchrorá kixin janhan ijnko chojni ch'e xroaṅ chrókjuíntakítōḡá jína aṣenná senó, la ko tson-táchrorá kixin tí nkehe kuínhínrá kjuít'a tí chjasin Capernaum xíkaha chrókjuít'a ntihi chjasenná, tsixrorá —ichro ch'án.

²⁴ Naxa tjenixja ch'án ntáchro ch'án kixin:

—Ijnko nkehe chaxín tsotjonkara kixin tí sín chjasén ijnko nkexro chrónka itén Dios la mé xráxin chónthya sín kjuasáyé tí nkexro a. ²⁵ Chaxín ntáxrjan kixin k'uéjō itsjé chojni chjin tsíkók'án tí naciōn Israel tió kjuák'e ch'ín Elías tí nkexro k'uéchrónka itén Dios la ntá í k'uániáhya chrin iní nánó ko t'ō la ko imá kókjinta nkuixín chjasin ntiha. ²⁶ Kjánchó Dios la k'uētuēnhya ch'ín Elías sáchrókjuitsjehe ch'án nijnko chojni chjin tsíkók'án tí naciōn Israel. Náhi. Dios k'uētuēnhen ch'án kixin sátsjitsjehe ch'án ijnko chojni chjin tsíkók'án itjen chjasin Sarepta chjino chjasin Sidón. ²⁷ Kjaxin naciōn Israel k'uéjō nchónhya chojni chóntha chinlepra tió kjuák'e ch'ín Eliseo chrónka ch'án itén Dios, kjánchó nijnko sín kuitōehya sín jína la mé jehó ch'ín Naamán kjuixin ch'án naciōn Siria mé kuitōehya ch'án jína † —mé xíkaha ichro ch'án.

²⁸ A ntá tió kuínhin sín xíkaha ntáchro ch'ín Jesús la ntá kaín tí chojni k'uéjōxenhen nijnko la mé imá kóninkaon sín. ²⁹ K'uínkatjen sín itsé sín ch'án sákjuiko sín ch'án tí ikon chjasin la sákjuiko sín ch'án chrítaón tí tjo tí tjen tí chjasin a chrókjuinček'anótjenxin sín ch'án tí tjo a. ³⁰ A ntá ch'ín Jesús k'uátsínka jnkōsiné tí siín tí jehé sín la sákjuí ch'án.

Ijnko chojni chóntha ijnko nchakuen tí jínahya

(Mr. 1.21-28)

³¹ A ntá ch'ín Jesús sákjuí ch'án tí chjasin Capernaum na mé ijnko chjasin estado Galilea, na ntá ntaha kjuankixin ch'án kjuakōhe ch'án chojni tí yaon t'ok'éhe sín. ³² Chrakon sín kixin nkexrí kjuako ch'án kixin kjuakōxin ch'án kixin chóntha ch'án kjuachaxin.

³³ A ntá nkaxenhen nijnko kjuák'e ijnko ch'ín chóntha ijnko nchakuen tí jínahya k'óyaxoxín itén tí ch'ín a, ntáchro kixin:

³⁴ —Tjítōhéni; ¿nkekuènte tjjáté tí jeheni kaín ni, jaha Jesús kjuixian chjasin Nazaret? ¿Á k'uinka kixin sijnček'itjáyani? Ó tjátsōan tí jaha la ko nōna kixin jaha mé tí nkexro tjóá kuènte Dios —ichro tí nchakuen tí jínahya.

³⁵ Ntá ch'ín Jesús jjehe k'uētuēnhen tí nchakuen tí jínahya ntáchro ch'án kixin:

—Tániá. T'axrjéxian tí ch'ín a —ichro ch'án.

A ntá tí nchakuen tí jínahya kjuáka tí ch'ín a kjuítsínka ch'án nonte jnkōsiné tí siín sín la k'uaxrje tí nchakuen tí jínahya la kohya ninkehó kónhen tí ch'ín

kjuítsínka. ³⁶ A ntá kaín sín chrakon sín itjo sín kichó sín kixin:

—¿Xá nkexrí kixin xíkaha nixja tí ch'ín i? Jehé ch'án chóntha kjuachaxin kixin k'uētuēnhen ch'án tí nchakuen tí jínahya k'uaxrjéxín tí nkexro i —ichro sín.

³⁷ A ntá nkuixín ntiha ikjo sín kichó sín kixin nkerí kjuaxroan kjuích'e ch'ín Jesús.

Ch'ín Jesús kjuínčekitōhe jína tí tjan ich'ee ch'ín

Simón Pedro

(Mt. 8.14-15; Mr. 1.29-31)

³⁸ Ntá ch'ín Jesús k'uaxrjéxín ch'án tí nijnko la ntá k'uixenhen ch'án ntōe ch'ín Simón. A ntá tí tjan ich'ee ch'ín Simón mé níhi tjan chóntha tjan ijnko sóa jíé ntá chrónōēhe sín ch'án kixin chrókjuinčekitōhe ch'án tjan jína. ³⁹ Ntá k'uísén ch'ín Jesús tí tjen tjan ntá k'uētuēnhen ch'án tí sóa a ntá kjuiin. Ntá tuénxín k'uàya tjan la ntá kjuanjōn tjan nkehe sine sín.

Ch'ín Jesús kjuínčekitōhe ch'án jína itsjé chojni níhi

(Mt. 8.16-17; Mr. 1.32-34)

⁴⁰ A ntá kuétaón yaon ntá kaín tí sín chóntha sín sijn-níhi chóntha sín nchónhya clase chin mé kjuikao sín tí tjen ch'ín Jesús. Ntá kjuak'etja tja ch'án jnkōjnko tí jehé sín a ntá xíkaha kuitōehya sín jína. ⁴¹ La ko nchónhya chojni níhi chóntha nchakuen tí jínahya la mé k'uaxrje tí nchakuen tí jínahya la k'óyako la ko ntáchro kixin:

—Jaha mé Xjeen Dios —mé ichro tí nchakuen tí jínahya.

Kjánchó ch'ín Jesús k'uētuēnhen ch'án tí nchakuen tí jínahya la kjuanjōnhya ch'án kjuachaxin kixin tsonixja kixin ó nohe tí nchakuen tí jínahya kixin jehé ch'án na mé tí nkexro Cristo.

Ch'ín Jesús kjuako ch'án tí estado Galilea

(Mr. 1.35-39)

⁴² A ntá tí kóyaon k'uínkaséyan ntá ch'ín Jesús k'uaxrjenta ch'án chjasin sákjuí ch'án nteje. A ntá kaín tí chojni kjuíkjejá sín ch'án la k'uitja sín tí tjen ch'án. Tjinkaon sín chrókjuinčekxrenhen sín ch'án kixin sáchrókjuihya ch'án ókjé. ⁴³ Kjánchó kjuátehe ch'ín Jesús ntáchro ch'án kixin:

—T'ichjánxin kixin sátsjia kaín chjasin ókjé tsōxrjanka tí tan jína kuènte Dios kixin nkexrí tí kjuachaxin t'etōan Dios, kixin xra ó mé k'uinka —ichro ch'án.

⁴⁴ A ntá xíkaha k'uájkjako ch'ín Jesús kaín tí nijnko Israel tí estado Galilea.

Kjuaxroan itsé sín koche

(Mt. 4.18-22; Mr. 1.16-20)

5 Ntá ijnko yaon kjuák'e ch'ín Jesús chrínta ntayaon Genesaret ntá kóchjina nchónhya chojni na mé k'uixitja kichó sín kixin tjinkaon sín chrókuinhin sín itén Dios. ² Ntá k'uíkon ch'ín Jesús kixin tjejó iyó ntabárcō jehó chjino chrínta ntayaon. A ntá tí sín itsé koche mé tsík'axrjéxín sín ntiha la k'uéjō sín tjentoá sín la ko tjejótjōnemá sín tí nchísén tséya sín koche.

³ Ntá ch'ín Jesús k'ujt'ótjen ch'án ijnko tí ntabárcō nti-

† 4.25,26 1 Reyes 17.9;18.1 †† 2 Reyes 5.1-14

ha na mé ntabárcɔ kuènte ch'ín Simón na ntá chronóɛɛ ch'án tí ch'ín Simón kixin sátsjiko ch'án ntabárcɔ ijnko chrínta ntá kjinhya. Ntá ntahó kjuák'enkáya ch'ín Jesús tí nta kjuák'etjaxin ch'án kjuakɔɛ ch'án nchónhya chojni síin chrínta ntá. ⁴ A ntá tió kjuixin nixja ch'án ntá ntáche ch'án tí ch'ín Simón kixin:

—Tjíkoa ntabárcɔ tí tjíá ntá ninka ntá itérá tí nchísén tseyará koche —ichro ch'án.

⁵ Ntá kjuáteɛ ch'ín Simón ntáchro ch'án kixin:

—Maestro, kjuích'eni xrá kuenté tie la tséhyani ninkehó koche. Kjánchó tí jaha xíkaha kuétuɛnhéni la mé tsochr'ánni tí nchísén inaá —ichro ch'án.

⁶ Na ntá xíkaha kjuích'e sín la ntá nchónhya koche tsítsé tí nchísén la ntá tí nchísén kjuankíxin tinkák'iche. ⁷ Ntá k'uèyaxin sín tja sín kixin chróxrakoa tí sín ch'eko sín xrá tjejóxehen tí í jnko ntabárcɔ kixin tsjinkítsa sín. Ntá xráko sín ntabárcɔ kuènte sín ntá kjuínchekaón sín yóí tí ntabárcɔ ntá chrókjuachahya tí ntabárcɔ na tjinkaon chrók'uániánkí ntá. ⁸ Ntá xíkaha k'uíkon ch'ín Simón Pedro ntá kjuák'exín toch'in ch'án nkayakon ch'ín Jesús ntá ntáchro ch'án kixin:

—Tjítóhéni Ìnchéni kixin jeheni ijnko chojni chóna jie —ichro ch'án.

⁹ Mé xíkaha ichro ch'ín Simón kixin chrakon ch'án la ko kjaxin chrakon tí í so sín tjejóko ch'án kixin xíkaha kónhen xrenájín nchónhya koche. ¹⁰ La ko ch'ín Jacobo la ko ch'ín Juan, xjeen ch'ín Zebedeo, na mé jnkokoá ch'eko sín xrá ch'ín Simón, la kjaxin chrakon sín. Kjánchó ntáche ch'ín Jesús tí ch'ín Simón kixin:

—Chrakonhya. Senó la koche k'uétse la nta jie la náhi la mé chojni tsjéyá —ichro ch'án.

¹¹ Ntá tió kjuíjiko sín tí ntabárcɔ tí chrínta ntá la kuítóhe sín kaín nkehe kuènte sín ntá chréɛ sín sákjuíko sín tí ch'ín Jesús.

Ch'ín Jesús kjuínchekitohe ch'án jína ijnko chojni chóna chinlepra

(Mt. 8.1-4; Mr. 1.40-45)

¹² Kjuák'e ch'ín Jesús ijnko tí chjasin, ntá kui ijnko chojni níhi chóna chinlepra. A ntá tió k'uíkon ch'án tí ch'ín Jesús ntá kjuák'exín toch'in ch'án chronóɛɛ ch'án jnkojína ntáchro ch'án kixin:

—Ìnchéni, tí tjínkávan jaha la jína chrókjuínchekitohéni jína —ichro ch'án.

¹³ Ntá ch'ín Jesús kjuéntoá tja ch'án ntá kjuak'etja tja ch'án chrítaón tí sijníhi ntáchro ch'án kixin:

—Méxra xíkaha tjínkávan. Ntá jie sjntakitoha jína —ichro ch'án.

Ntá xíkaha ichro ch'án ntá tí chinlepra tuénxín kjuíin hin tí sijníhi. ¹⁴ A ntá k'uétuɛnhen ch'ín Jesús tí ch'ín a kixin chróchenkahya ch'án ninkexró. Ntáchro ch'án kixin:

—Sátjia tjítsjehé tí nchat'á la tsjánjuan tí nkehe tsík'etɔan ch'ín Moisés ts'áyéɛ Dios † kixin ntá tso-noexín kaín xín chojni kixin ó kuítóha jína —ichro ch'án.

† Levítico 14.4-8

¹⁵ Kjánchó antsí k'uíxikónohe sín nkexrí tí kjuaxroan kjuasin ch'ín Jesús, ntá nchónhya chojni k'uíxikóchjinehe sín ch'án kixin tsinhin sín nkehe tsjako ch'án, la ko tsitɔexín sín jína tí chin chóna sín. ¹⁶ Kjánchó ch'ín Jesús la k'uaxrjenta ch'án tí kohya chojni la ntaha nixjéxín ch'án Dios.

Ch'ín Jesús kjuínchekitohe ch'án jína ijnko ch'ín tsík'en toté

(Mt. 9.1-8; Mr. 2.1-12)

¹⁷ A ntá ijnko yaon kjuák'ekjako ch'ín Jesús na ntá ntiha k'uéjótjaxin iso sín fariseo la ko iso tí sín tjako tí ley, tsíkjixin sín kaín tí chjasin ntsí estado Galilea la ko kaín tí chjasin ntsí estado Judea la ko tí chjasin Jerusalén. Ntá tí kjuachaxin kuènte Dios kjuakɔxin ch'án kixin sinchekitohe ch'án chojni jína. ¹⁸ Ntá kui iso chojni tinkátsénkí sín ijnko ch'ín tsík'en tɔte tjenkáya ijnko kania. Ntá tjinkaon sín chrók'uixenko sín ch'án tí nchia kixin chrókjuak'e ch'án tí tjen ch'ín Jesús tjetjako ch'án. ¹⁹ Kjánchó xitjahya ts'ixenhen sín kixin nchónhya chojni síxenhen nchia. Ntá k'uít'ótjen sín tí chrítaón nchia, ntá kjuakjiiin sín iso teja la ko tí nta sít'ó ntá ntiha kjuinkajinxin sín tí ch'ín níhi tjenkáya kania ntoí tí tjen ch'ín Jesús. ²⁰ Na ntá tió k'uíkon ch'ín Jesús kixin imá tinkáchónki sín ch'án ntá nixjéɛ ch'án tí ch'ín níhi, ntáchro ch'án kixin:

—Jaha, ó kjuixin kjuíinhan tí jie chonta —ichro ch'án.

²¹ A ntá tí sín maestro tjako tí ley la ko tí sín fariseo kjuankíxin sín kjo sín asén sín kixin: “¿Xá nkexro tíhi ch'ia ch'án ncheyóɛ ch'án asén ch'án Dios? Ninkexró xitjahya tsjakjiiin jie kixin jehó Dios mé chóna kjuachaxin tsjatsen ijie chojni”, mé xíkaha kjuenkayáxin sín.

²² Ntá ch'ín Jesús la ó nohe ch'án tí nkehe tjenkayáxin sín ntá ntáchro ch'án kixin:

—¿Nkekuènte kixin xíkaha tjenkayáxinrá? ²³ ¿Nkehe antsí xrahya chróntátjan ch'án? ¿Á antsí xrahya chróntátjan ch'án kixin ó kjuixin kjuíinhin ch'án tí ijie yámá ch'án, ó á antsí xrahya chróntátjan ch'án kixin chrók'uínkatjen ch'án sáchrókjui ch'án? ²⁴ Méxra ijie tsjákoxiā kixin tí Xjeen Dios K'óna Chojni mé chóna kjuachaxin ntihi chjasintajni tsjakjiiinhin ijie chojni —ichro ch'án.

Ntá k'uétuɛnhen ch'án tí ch'ín tsík'en tɔte ntáchro ch'án kixin:

—Jaha tétuɛnhan t'inkatjen tjatsíyan kaniā la sátjia ntɔa —ichro ch'án.

²⁵ Ntá tuénxín k'uínkatjen tí ch'ín tsík'en tɔte nkayakon kaín tí sín síin a la kuákja ch'án kaniɛ ch'án k'uékjak'etak'á ch'án ntá sákjuí ch'án ntɔe ch'án la kjuanchehe ch'án Dios kjuasáya. ²⁶ Ntá kaín sín imá chrakon sín la kjuanchehe sín Dios kjuasáya kjónté chrakon sín la ntáchro sín kixin:

—Ijie mé k'uíkonni antsí má kjuaxroan jie —ichro sín.

Ch'ín Jesús k'uíyehē ch'án tí ch'ín Leví

(Mt. 9.9-13; Mr. 2.13-17)

²⁷ Ntá chr'éxjñ ntá ch'ín Jesús k'uaxrjexín ch'án nchia ntá k'uíkon ch'án ijnko ch'ín nchekjènkjì mé it'in ch'án Leví tjetjajxín ch'án tjech'e ch'án xrā nkaxenhen tí nchia ntsí tí xenkaxín chichaon a. Ntá ntáchro ch'án k'íxin:

—Chr'éhé tí janhan —ichro ch'án.

²⁸ Ntá ch'ín Leví mé tuénxín k'uínkatjen ch'án la ntá kuitōhe ch'án kaín xín nkehe ntá chr'éhē ch'án tí ch'ín Jesús.

²⁹ Ntá chr'éxjñ ch'ín Leví ch'óna ch'án ijnko kia jíé ntōe ch'án kjuikosáyehe ch'án tí ch'ín Jesús. Kjāxin k'uéjō itsjé tí sín nchekjènkjì la ko itsjé í so chojni ch'óna jíé k'uéjōtjāxínko sín tí ch'ín Jesús chjino tí mesa a. ³⁰ A ntá tí sín fariseo la ko tí sín maestro tjako tí ley la mé kjuankíxin sín tjonta sín tí sín k'uájiko ch'ín Jesús ntáchro sín k'íxin:

—¿Nkekuènte ntekoará la ko t'ikoará tí sín nchekjènkjì la ko tí sín ch'óna jíé? —ichro sín.

³¹ A ntá kjuátehe ch'ín Jesús ntáchro ch'án k'íxin:

—Tí chojni níehya t'ichjānxjenhya sín nkexro sich'e xroān. Náhí. Jehó tí sín níhi mé t'ichjānxjnhin sín nkexro sich'ehe sín xroān. ³² Janhan la k'uinkahya ntihi k'íxin chrók'uíyāhā tí sín jína tjejó. Náhí. Janhan k'uinka k'íxin ts'íyāhā tí sín ch'óna jíé k'íxin chrókuítōhe sín tí ijíé sín ntá chrókjuinkí sín tí tjenkayáxin sín —ichro ch'án.

Tjančankíhi sín tí ch'ín Jesús k'íxin á chrókjónehya sín tió tsonixjehē sín Dios

(Mt. 9.14-17; Mr. 2.18-22)

³³ A ntá kjuanchankíhi sín tí ch'ín Jesús k'íxin:

—¿Nkekuènte k'íxin tí sín k'uék'ajiko ch'ín Juan jnkoyaxón nehya sín na nixjehē sín Dios, la ko kjāxin xikaha ch'e tí sín xriko tí sín fariseo, a ntá tí sín xrikoa la ine sín la ko it'i sín? —ichro sín.

³⁴ Ntá kjuátehe ch'ín Jesús k'íxin:

—¿Xá chrókjuachará chrókuétuēnhenrá kaín tí sín tsík'íyehē sín tsíkóchjina tí tjejó tí sín tsíkótehe k'íxin chrókjónehya sín tí naxā tjejóko sín tí ch'ín tsíkótehe? ³⁵ Kjānchó tsjixraká tí yāon itsi chojni tsotsé sín tí ch'ín tsíkótehe sátsjiko sín ch'án. Ntá tí sín tsíkóchjina la ts'ává sín la í sinehya sín —ichro ch'án.

³⁶ Kjāxin kjuíncheyóexin ch'án ntáchro ch'án k'íxin:

—Ninkexró chrókuaté ijnko camisa nixín ntá chrókjuak'eniehe ijnko camisa ntaxín k'íxin xikaha chrókjuich'e sín ntá chrók'uitjāyan tí camisa nixín la ko kjāxin tí t'ō ka k'uaxrjexín tí camisa nixín tsoyóehya tí camisa ntaxín. ³⁷ Kjāxin chrókuíkijāhyarā xranvino nixín ijnko tjuaxran ntaxín k'íxin tí xikaha chrókjuich'erá la chrók'uičje tí tjuaxran ntaxín ntá chrók'uitjāyan tí xran la ko chrók'uitjāyan tí tjuaxran. ³⁸ A ntá tí xranvino nixín chrókuikia ijnko tjuaxran nixín k'íxin yóí la chrók'uitjāyanhya. ³⁹ La ko kjāxin ninkexró tió tsík'i tí xran ntaxín naxā chrókóxrjinhjñ chrók'ui xran nixín.

Náhí. Tsontáchro ch'án k'íxin íchá jína tí xran ntaxín, tsixro ch'án —mé xikaha ichro ch'ín Jesús.

Tí sín k'uájiko ch'ín Jesús mé k'uín sín iso noatrigo ijnko yāon t'ok'éhe tí sín israelita

(Mt. 12.1-8; Mr. 2.23-28)

6 Ijnko yāon t'ok'éhe sín la ch'ín Jesús k'uátsínka ch'án iso nonte t'óna noatrigo. Na ntá tí sín k'uájiko ch'án mé ik'uín sín iso noatrigo la kjuankíxin sín nkaya tja sín ó k'óntajinyá sín tí noa ntá kjóne sín.

² Ntá iso tí sín fariseo kjuanchankí sín k'íxin:

—¿Nkekuènte k'íxin tjejoch'erá xrā jie? La mé kohya kjuachaxin tsoñhen xrā tí yāon t'ok'éheni —ichro sín.

³ Ntá kjuátehe ch'ín Jesús k'íxin:

—¿Jahará á kjuínchekuáxinhyará tí xroon chrónka nkehe kjuích'e ch'ín David la ko tí sín k'uájiko ch'án tió k'uén sín kjinta? ⁴ Na mé jehe ch'án mé k'uíxnen ch'án ntōe Dios la kjóne ch'án tí niotjā tsíkóyaon, la ko kjāxin chjéhe ch'án tí niotjā tí sín k'uájiko ch'án kjónté jehó siín kjuachaxin sine tí sín nčat'á † —ichro ch'ín Jesús.

⁵ Kjāxin ntáchro ch'án k'íxin:

—A ntá tí Xjeen Dios K'óna Chojni mé ch'óna kjuachaxin ts'etōan nkexrí tsoñhen tí yāon t'ok'éheni —ichro ch'án.

Ch'ín Jesús kjuínchekitōhe jína ijnko ch'ín tsíxámá tja

(Mt. 12.9-14; Mr. 3.1-6)

⁶ A ntá í jnko yāon t'ok'éhe chojni ntá k'uíxnen ch'ín Jesús ijnko njnko Israel la ntá kjuankíxin kjuako ch'án. A ntá ntaha kjuák'e ijnko ch'ín tsíxámá tja ch'án chjina. ⁷ Na ntá tí sín tjako tí ley la ko tí sín fariseo tjejó sín tsáyehe sín tí ch'ín Jesús chrók'uikon sín á sinchekitōhe ch'án chojni jína tí yāon t'ok'éhe sín k'íxin ntá chrók'ueka sín ch'án jie. ⁸ Kjānchó jehe ch'án ó nohe ch'án nkehe tjenkayáxin asén sín ntá nixjehē ch'án tí ch'ín tsíxámá tja ntáchro ch'án k'íxin:

—T'ínkatjen, tjak'e jnkosiné ntihi —ichro ch'án.

Ntá k'uínkatjen tí ch'ín a kjuák'exín tōte ch'án. ⁹ Ntá nixjehē ch'ín Jesús tí í so sín ntáchro ch'án k'íxin:

—Tsjānchánkíhárá ijnko xrā. Tí yāon t'ok'éheni la, ¿á jína chrókjuich'eni ijnko nkehe jína ní o á chrókjuich'eni ijnko nkehe jínahya? ¿Á chrókjuinchekitōheni chojni jína ní o á chrók'óyánni chojni? —ichro ch'án.

¹⁰ Ntá ch'ín Jesús komá ch'án kaín tí chojni siín ntiha ntá nixjehē ch'án tí ch'ín níhi ntáchro ch'án k'íxin:

—Tjéntoá tjá —ichro ch'án.

A ntá tí ch'ín a xikaha kjuích'e ch'án ntá kuitōhe tja ch'án jína. ¹¹ Kjānchó tí sín fariseo tjejó mé kónínkaon sín mé ntá kjo sín kichó sín k'íxin tjinkaon sín chrók'óyán sín tí ch'ín Jesús.

† 6.3-4 1 Samuel 21.6; Levítico 24.5-9

Ch'ín Jesús kjueyá ch'án tí teyó sín ts'ajiko ch'án

(Mt. 10.1-4; Mr. 3.13-19)

¹² A ntá ijnko yaon ch'ín Jesús sákjui ch'án ijnko jnā kixin ntaha tsonixjexín ch'án Dios la ntá ntahó kjuák'e ch'án kuenté tie tjenixjehē ch'án Dios. ¹³ A ntá tí k'uínkaséyan a na mé k'uíyehē ch'án tí sín chréhē sín ch'án ntá kjueyá ch'án teyó sín kixin ts'óna sín apóstol ts'ajiko sín ch'án. ¹⁴ A ntá tí sín í mé xíkhi it'in sín. Na mé ch'ín Simón la ntá ch'ín Jesús kjuínchek'in ihnjé ch'án Pedro kjaxin; la ko kichó ch'án ch'ín Andrés; la ko ch'ín Jacobo la ko ch'ín Juan, la ko ch'ín Felipe, la ko ch'ín Bartolomé, ¹⁵ la ko ch'ín Mateo, la ko ch'ín Tomás, la ko ch'ín Jacobo la mé it'é mé it'in Alfeo; la ko í jnko ch'ín Simón na mé tí ch'ín a mé k'uék'aji tí partido cananista; ¹⁶ la ko ch'ín Judas la kichó ch'án mé it'in Jacobo; la ko ch'ín Judas Iscariote tí ch'ín kjuínchekji tí ch'ín Jesús.

Ch'ín Jesús kjuakohē ch'an nchónhya chojni

(Mt. 4.23-25)

¹⁷ Ntá ch'ín Jesús la ko tí jehe sín k'uínkajinxin sín tí jnā ntá k'uéjó sín nonte yóxin jehe ch'án la ko tí sín kjueyá ch'án. Kjaxin k'uixikóchjina nchónhya chojni kjuixin nkuixín estado Judea la ko chjasin Jerusalén la ko tí chrínta ntayaon tí siín tí chjasin Tiro la ko tí chjasin Sidón. Ó kjuí sín kixin tsinhin sín tí nkehe tsjako ch'ín Jesús la ko tsitohē sín jína. ¹⁸ A ntá tí sín kjuaxróxinhya k'uéjó k'uéchónta sín nchakuen jínahya na mé kuitohē sín jína kjaxin. ¹⁹ Kaín chojni tjinkaon chrókuákóxin sín tí ch'ín Jesús kixin kjuínchekitohē ch'án jína kaín xín chojni kixin jehe ch'án chóntha ch'án kjuachaxin jié.

Tí kjuachéhē la ko tí kjuaxróxinhya

(Mt. 5.1-12)

²⁰ Ntá komá ch'ín Jesús tí sín k'uájiko ch'án ntá ntáchro ch'án kixin:

—Náxrjón tjejorá jahará nõará kixin chontará kjuachaxién Dios.

²¹ Náxrjón tjejorá jahará t'énxinrá kjinta ijie kixin chr'éxin sinterá jína.

'Náxrjón tjejorá jahará tsjankará ijie kixin chr'éxin tsjanorá.

²² Náxrjón tjejorá jahará nínkakonhanrá chojni la ko ts'inkítíará sín sátsjirá ókjé, la ko t'ántaxínhanrá sín la ko t'ákjénxin sín ihniárá éxi ijnko nkehe jínahya kixin tinkachónkirá tí Xjeen Dios K'óna Chojni. ²³ Tsocháhā mā la ko imá tsochontará kjuachéhē tí yaon a kixin ts'ayéhérá nkehe kuènte nkaya nkajní. A ntá xíkaha tí t'áchrji tí sín jínahya ch'e la mé ósé kjuate sín tí sín k'uéchronka itén Dios.

²⁴ A ntá jahará rícorá kjuaxróxinhya ts'ejorá chr'éxin kixin ó kjuixin k'uayéhérá kaín nkehe.

²⁵ A ntá jahará kjónterá jína, kjuaxróxinhya ts'ejorá chr'éxin kixin ts'énxinrá kjinta.

A ntá jahará tjanorá jie, kjuaxróxinhya ts'ejorá chr'éxin kixin ts'avará la ko tsotsjankará.

²⁶ Kjuaxróxinhya ts'ejorá tió kaín chojni tsjikosáyahará sín kixin xíkaha tí t'áchrji sín kjuikosáyehe tí sín ntoáhya k'uéchronka itén Dios ósé.

Tsotjuèheni tí sín nínkakonhenni

(Mt. 5.38-48; 7.12)

²⁷ A ntá jahará tjejotinhínrá mé tjéxrjanka kixin chrótjuèhérá tí sín nínkakonhanrá la ko jína chrókjuínkítsará tí sín tjinkakonhya tí jahará. ²⁸ Jína nixjehérá tí sín t'ántaxínhanrá la ko tjanchehérá Dios kixin tsjinkítsa ch'án tí sín chónkíhará sín. ²⁹ Tí chjéhe ijnko nkexro ijnko tuānará chrókjóka tí í jnko nánko kixin chróchjéhe sín tíha kjaxin. La ko tí siín ijnko nkexro tjinkaon sín tsakitsjaha sín tí chamara tjín t'inkayate na mé tjtóhé kixin kjaxin sátsjiko sín camisá kjaxin. ³⁰ Tí jnkojín nkexro tjančaha nkehe chonta la chjehé sín. A ntá tí tsakja sín nkehe kuèntá la tjanchehya sín kixin naxā ts'ókjanhan sín. ³¹ Méxra chrókjuikosáyahérá kichuárá éxi yóhé nkexrí tjinkáonrá chrókjuikosáyahará tí jehe sín kjaxin.

³² Tí jehó tjuèhérá tí nkexro tjuāhará la tí xíkaha la kohya ninkehó tsjachahyará. Kjónté tí sín jínahya tjasin jié la xíkaha ch'e sín. ³³ A ntá tí tjíkosáyahérá jehó tí sín tjíkosáyahará la kohya ninkehó tsjachahyará xíkaha. Kjónté tí sín jínahya tjasin jié mé kjaxin xíkaha ch'e sín. ³⁴ La ko tí nchekjenrá chichaon jehó tí sín tjenkayáxinrá kixin ts'ókjanhanrá sín tí chichaon, la tí xíkaha kohya ninkehó tsjachahyará. Kjónté tí sín jínahya tjasin jié xíkaha ch'e sín nchekjen kichó sín chichaon la ko chónhen sín kixin tsokjan tí chichakōen sín inaá. ³⁵ Kjánchó jahará chrótjuèhérá tí sín nínkakonhanrá la ko jína chrókjuich'eherá sín xra la ko chrókjuínchekjenrá sín chichaon la chróchoénhyará kixin chrókjan tí chichakōanrá inaá. Mé xíkaha chrókjuich'erá la imá tsjachará la ko ts'ónará xjeen Dios nkaya nkajní kixin jehe ch'án ch'ehe ch'án jína tí sín chóntehya ch'án kjuasáya la ko tí sín jínahya. ³⁶ Chrókuiikonóehérá kichuárá éxi yóhé It'ará nkaya nkajní tikonóehē ch'án chojni.

Chrók'uántaxienhyani kichó ni

(Mt. 7.1-5)

³⁷ Chrókuékahyará jié ókjé chojni kixin ntá Dios chrókjuanchahya ch'án jié tí jahará. Chrókuétuānhyará kixin chrókjuasóte í jnko chojni kixin Dios kjaxin chrókjuinchekjasótiahyará ch'án tí jahará.

Chrók'uitjāyanhanrá ichrén jié kjuasinhanrá í jnko chojni kixin ntá Dios chrókjuinchek'itjāyanhanrá ch'án tí jié kjuásinrá. ³⁸ Chjehérá í so sín tí nkehe ts'áyéhē sín kixin ntá Dios tsotjáhará ch'án nkehe jína kjaxin, tjetóxin ijnko medida jína chrókjuanjon ch'án, icha tsík'enka ch'án kixin tsík'ótsjéyehe ch'án tí nkehe tsík-jachroayá ch'án tjetóxin tsjanjon ch'án. Dios tsotjáhará xíkaha yóhé éxi tsíchjehérá í so chojni.

³⁹ Ntá kjuíncheyóexin ch'ín Jesús ntáchro ch'án kixin: —Xá á chrókójina ijnko chojni t'ikonhya chrókjuiko í jnko chojni t'ikonhya? Tí xíkaha la yóí sín chrók'uanót-jenyá sín ichrén tòye. ⁴⁰ Ijnko nkexro xrakohē la noe-

hya éxi tí nkexro tjako. Kjánchó tió tsjixin tsoxrakohe ch'án ntá tsonohe ch'án éxi nohe tí nkexro kjuakokohe ch'án.

⁴¹ ¿A ntá nkekuènté tsjehé tí chjínínó ntsí tjenkánkí ikon tí kíchuá, tí naxa ántosán tí nta jíé tjenkánkí ikuan? ⁴² Mé xíkaha nkexrí kixin chróntáche kíchuá kixin chrókuítóhe ch'án kixin chrókuakitsjenkíhí ch'án tí chjínínó ntsí tjenkánkí ikon ch'án tí naxa ántosán tí nta jíé tjenkánkí ikuan? Jaha la ntoáhya tjenkayáxian ch'ia jaha. Senó chrókuakitsjenkiá tí nta jíé tjenkánkí ikuan kixin ntá chrók'uikuan chrókuakitsjenkiá chjínínó ntsí tjenkánkí ikon tí kíchuá.

Tí nta mé tjatsoanxínni tí to tsík'óna

(Mt. 7.17-20; 12.34-35)

⁴³ Kohya nta jína chrók'óna to jínahya, la ko kjaxin kohya nta jínahya chrók'óna to jína. ⁴⁴ Jnkojnko tí nta mé tjatsoanxínni tí to t'óna. Tí ntach'í xitjahya tsjakjinnjinni to higo la ko xitjahya ts'inni to uva. ⁴⁵ Jnko chojni jína la jína nixja ch'án kixin jína asén ch'án. A ntá ijnko chojni jínahya la mé nixja tí nkehe jínahya kixin jínahya asén ch'án. Kixin éxi tjenkayáxian asén mé xíkaha nixja ir'va.

Ch'ín Jesús kjuíncheyóexin éxi yaá nkexro kjuích'éna nchia

(Mt. 7.24-27)

⁴⁶ ¿Nkekuènte ntáchrórá kixin janhan Ìnchárá, la ntá tahyará kuenté tí nkehe tétuanhanrá? ⁴⁷ Méxra kaín tí nkexro tóchjina tinhin tí nkehe ntáxrjan la ko titekaon sín la mé tsontáxrjan nkexro tí tóyóhe sín. ⁴⁸ Na mé jehe sín tóyóhe ijnko nkexro kjuích'éna nchia la senó k'óxraya ch'án tòye njnka kixin ntá sich'éna ch'án nchia chrítaón tí tjo a. A ntá tió k'uánkí tí ntário la ikui tí ntá k'uántate tí nchia, kjónté xíkaha la k'uátjoákohya la ní kuínkíhya tí nchia a kixin jína tsík'óna chrítaón tjo tjekjen. ⁴⁹ A ntá tí nkexro tinhin tí nkehe ntáxrjan la ntá tahya sín kuenté la mé tóyóhe ijnko nkexro kjuích'éna nchia chrítaón nche la kohya tjo chrínkí. A ntá tió k'uánkí tí ntário la ikui tí ntá k'uántate tí nchia la ntá k'uátjoáko ntá tí nchia la ntá kuenté tí nchia la k'úitjáyan —mé ichro ch'ín Jesús.

Ch'ín Jesús kjuínchekitohe jína ijnko ch'ín ch'ehe ijnko soldado romano xra

(Mt. 8.5-13)

7 Ntá ch'ín Jesús kjuixin nixjehe ch'án tí chojni a ntá sákjuí ch'án chjasin Capernaum. ² Ntaha kjuák'e ijnko capitán romano la mé chóna ch'án ijnko nkexro ch'ehe ch'án xra imá tjuèhe ch'án la ntá jie níhi tí ch'ín a tjet'en ch'án. ³ A ntá tió kuínhin tí ch'ín capitán itjo sín nkexrí tjen ch'ín Jesús ntá ichr'án ch'án iso sín tada judío tsjijitsjehe sín tí ch'ín Jesús tsochronóhehe sín ch'án kixin chrókuíjii ch'án chrókuínchekitohe ch'án jína tí ch'ín ch'ehe ch'án xra. ⁴ Ntá kjuíjii sín kóchjinehe sín tí ch'ín Jesús kjuankixin chrónóhehe sín ch'án ntáchró sín kixin:

—Imá jína tí ch'ín capitán la mé tjinkaon ch'án chrókuínkítsa ch'án ⁵ kixin tjuèhe ch'án tí nació kuènteni la ko jehe ch'án kjuínkítsa ch'án la ko k'uetóan kixin ts'óna ijnko njnko kuènteni —ichro sín.

⁶ Ntá ch'ín Jesús sákjuiko sín ch'án. Ntá ó kjuíjichjina sín chjino tí nchia la mé tí ch'ín capitán k'uetuènen ch'án iso chojni chóxin ch'án tsontáche sín tí ch'ín Jesús kixin:

—Tadá. Tjinkakonhya ch'án chrótjáha ch'án xra kixin jehe ch'án la jehya chojni jína la ko chrókósuèhe kixin chrók'uixenhen ntøe ch'án. ⁷ Mé xíkaha chrókósuèhe ch'án chrókuíjii ch'án chrókuíjueyá ch'án tí jaha. Méxra tí kjuachaxin chrónixja ó chrókuítøexin jína tí ch'ín ch'ehe ch'án xra. ⁸ Kixin jehe ch'án kjaxin t'ítuènen ch'án la ko kjaxin chóna ch'án soldado t'etuènen ch'án inaó. Tió t'etuènen ch'án ijnko sín kixin sátsji la mé sátsji la ko tió t'etuènen ch'án í jnko sín kixin xrákoa la mé xrákoa la ko tió t'etuènen ch'án í jnko sín kixin sich'e ijnko xra la mé nchexiteyá ch'án —mé xíkaha ichro tí sín kui.

⁹ Ntá ó kuínhin ch'ín Jesús xíkaha ntá chrakon ch'án kixin xíkaha tjenkayáxian tí ch'ín a, a ntá nkátjía ch'án komá ch'án tí chojni chréhe ntáchró ch'án kixin:

—Ntáxrjan kixin naxa k'úitjahya njnko nkexro israelita xíkaha tinkáchónki éxi tí ch'ín i —ichro ch'án.

¹⁰ A ntá ó kjan nchia tí sín tsík'ítuènen la ó k'uíkon sín kixin ó tsíkítóhe jína tí ch'ín níhi.

Ch'ín Jesús kjuínchexechón tí xjeen ijnko tjan k'án chjasin Naín

¹¹ Ntá chr'éxin ntá sákjuí ch'ín Jesús ijnko chjasin it'in Naín la ko sákjuíko ch'án tí sín k'uájiko ch'án la ko nchónhya í so chojni. ¹² Tió kjuíjichjina sín tí chjasin a la k'uíkon sín nchónhya chojni sákjuíkjava sín ijnko chojni tsík'en na mé tí jnkokoá xjeen ijnko tjan k'án. Itsjé chojni chjasin ntiha sákjuíkotoxin sín tjan. ¹³ Ntá tió k'uíkon Ìnchéni tí tjan a ntá kuíkonóhehe ch'án tjan ntáchró ch'án kixin:

—Tsjankahya —ichro ch'án.

¹⁴ Ntá ch'ín Jesús kóchjinehe ch'án tí sín tinkátsénki tí nkexro tsík'en la kjuak'etja tja ch'án tí nkehe tinkátsénkía sín tí ch'ín tsík'en. A ntá tí sín kuámá nta k'uéjóchónhen sín. Ntá ch'ín Jesús nixjehe ch'án tí ch'ín tsík'en ntáchró ch'án kixin:

—Ntásoá. Tétuanhan t'áya —ichro ch'án.

¹⁵ Ntá tí ch'ín tsík'en tuénxín kjuák'etjaxin ch'án la ko kjuankixin nixja ch'án. Ntá ch'ín Jesús kjuínchek'áyéhe ch'án ìné tí ch'ín ntasoá la sákjuíko. ¹⁶ A ntá tió k'uíkon sín xíkaha kónhen la kaín sín imá chrakon sín la ko kjuankixin kjuanchehe sín Dios kjuasáya ntáchró sín kixin:

—Dios mé ichr'án ijnko chojni imá t'etóan chrónka itén Dios ts'ejókoni —ichro sín.

Kjaxin ntáchró sín kixin:

—Ó kui Dios tsjinkítsa ch'án chjasén ch'án —ichro sín.

¹⁷ A ntá nkuíxín estado Judea la ko kaín tí chjasin chjinaxón mé kuínhin sín kixin nkehe tí kjuaxroan kjuích'e ch'ín Jesús.

Tí sín ichr'án ch'ín Juan Bautista

(Mt. 11.2-19)

¹⁸ A ntá tí sín k'uájiko ch'ín Juan mé chénka sín ch'án kaín tí nkehe tsikónhen. Ntá k'uíyehé ch'án iyó tí sín k'uájiko ch'án ¹⁹ k'uētuenhen ch'án sín sátsjtsjehe sín tí ch'ín Jesús tsjikjanchankíhi sín ch'án kixin á jehe ch'án tí nkexro tsi ɔ á tsochónhen sín í jnko nkexro, tsixro sín. ²⁰ A ntá tí sín ichr'án ch'ín Juan mé kóchjina sín tí tjen ch'ín Jesús ntá chro sín kixin:

—Ch'ín Juan Bautista k'uētōan ch'án kuini tsikjan-chankíhani kixin á jaha tí nkexro tsi ní ɔ á tsochónhen ní í jnko nkexro —ichro sín.

²¹ A ntá tí yaon kjuíji sín na mé ch'ín Jesús kjuínchekitōhe ch'án itsjé chojni jina la mé kjuatsen ch'án kaín tí chin chóna sín la ko kuakitsje ch'án tí nchakuen jinahaya chóna sín la ko kjuínchek'ikon ch'án itsjé chojni t'ikonhaya. ²² A ntá kjuátehe ch'ín Jesús ntá chro ch'án kixin:

—Sátjirá tjíchenkará tí ch'ín Juan kaín nkehe k'uíkonrá la ko kaín nkehe kuínhínrá kixin tí sín k'uíkonhaya la ó t'ikon sín jie, la ko tí sín k'uékjihya la ó tji sín jie, la ko tí sín k'uéchóna chinlepra la ó kuitōhe sín jina, la ko tí sín kíenhya la ntá jie la ó tinhin sín, la ko tí chojni tsík'en la ó síxechón sín jie, la ko tí sín nòa síxrakōhe sín tí tan jina tsaáxin sín. ²³ Ntá náxrjón tjen tí nkexro kohya nkehe t'inkákonhen tí tinkáchónki sín tí janhan —mé ichro ch'án.

²⁴ Tió sátsíkji tí sín ichr'án ch'ín Juan ntá kjuankixin nixjehé ch'ín Jesús tí sín k'uéjō ntiha kixin nkexrí tjen ch'ín Juan ntá chro ch'án kixin:

—Tió sákjuítsjehérá ch'ín Juan nteje, ¿nkexrí k'uíkonrá tí jehe ch'án? ¿Á k'uíkonrá ch'án éxí ijnko tji nchexrayehe xriñtō? ²⁵ Tí náhí, ¿la ntá nkehe k'uíkonrá? ¿Á k'uíkonrá ch'án éxí ijnko nkexro tsík'itsa jina? Jahará ó nohará kixin chojni tsík'itsa jina la ko chóna kaín nkehe náxrjón la mé ntōe rey tjejó sín. ²⁶ ¿A ntá nkexrí k'uíkonrá ch'án? ¿Á k'uíkonrá ch'án éxí ijnko nkexro chrónka itén Dios? Na mé xriñka kixin chaxín xikaha jehe ch'án na mé antsí t'etōan ch'án la ntá tí sín k'uéchónka itén Dios ósé la kánhyó. ²⁷ Ch'ín Juan mé tí nkexro kui éxí chrónka tí xroon itén Dios ósé ntá chro kixin:

Janhan mé tsochr'an ijnko nkexro tsochrónka itan kuèntana tsitónxin ntja,

kixin tsjasiyóxin ch'án ntja kuèntá. † Mé xikaha chrónka tí xroon itén Dios. ²⁸ Ntá ijnko nkehe chaxín tsōtjōnkará kixin kaín tí nkexro k'uéjō senó k'uéchónka itén Dios la kánhyó tjetōan sín la antsí tjetōan tí ch'ín Juan Bautista. Kjánchó ijnko nkexro kjónté tjetuanhya la tí ts'áyehé sín tí kjuachaxién Dios nkaya nkajní la antsí tjetōan sín a ntá jehe ch'ín Juan la kánhyó —ichro ch'ín Jesús.

²⁹ A ntá tió kuínhin sín tíhi la ntá kaín tí chojni la ko tí sín nchekjènkj tsíkikite ch'ín Juan la ó kjuátsōan sín kixin Dios la jina ch'án. ³⁰ Kjánchó tí sín fariseo la ko tí maestro tjako tí ley tsíkikitehya ch'ín Juan la mé tjinkakonhya sín tí nkehe tjinkaon Dios chrókjuinkitsa tí jehe sín. ³¹ Ntá ntá chro Ínchēni kixin:

—¿Nkexrí chrókjuintayóaxian tí chojni tjejó jie? ¿Nkehe chrókóyóhe sín? ³² Tóyóhe sín tí chánjan tjejótxajin sín tí ntain tsítán sín la t'íyehé kíchó sín ntá chro sín kixin: “Kjuínchentáchroni flauta la tēhyará la ko tsjeni isón kuènte chojni tsík'en la tsjankahyará.” ³³ Kixin ó kui ch'ín Juan Bautista la kjónehya ch'án niōtja la ko k'uíhya ch'án vino la ntá jahará ntá chrorá kixin ijnko nchakuen tí jinahaya chóna ch'án. ³⁴ A ntá kjaxin ikui tí Xjeen Dios K'óna Chojni la kjóne ch'án la ko ik'ui ch'án la ntá chrorá kixin imá kjóne ch'án la ko imá ik'ui ch'án vino la ko t'ito ch'án tí sín tjasin jie la ko tí sín nchekjènkj. ³⁵ A ntá tí xjeen Dios mé tjakōxin sín kaín tí nkehe tjinkaon Dios.

Ch'ín Jesús mé kjuák'e ch'án ntōe ijnko ch'ín fariseo it'in Simón

³⁶ Ijnko ch'ín fariseo mé chronóehé ch'án tí ch'ín Jesús kixin tsjiji ch'án ntōe ch'án sineko sín ch'án. Ntá sákjui ch'án ntōe tí ch'ín a, a ntá ntiha kjuák'etjaxin ch'án tí tjen mesa. ³⁷ A ntá itjen ijnko tjan nchónhya jie chóna tjan. Itjen tjan tí chjasin ntiha la ntá kónohe tjan kixin tsíkijji ch'ín Jesús ntōe tí ch'ín fariseo la ko ntaha sineko sín ch'án. Ntá kui tjan ntiha kuikao tjan ijnko xro tjeje tsíkaón aceite xraxé náxrjón. ³⁸ Ntá tsjánka tjan kóchjina tjan toté ch'ín Jesús ntá ntakon tjan kjuátanxin toté ch'án la ko kaxihi tjan kjuínchexámáxin tjan toté ch'án la ko kjóneko kochíto toté ch'án la ko kjuíncheka tjan toté ch'án tí aceite xraxé náxrjón. ³⁹ A ntá tió k'uíkon tí ch'ín fariseo tsík'íyehé tí ch'ín Jesús ntá kjo ch'án asén ch'án kixin: “Tí chrókóchaxín tí nkexro i ijnko ch'ín chrónka itén Dios ntá chrókónohe ch'án kixin nkexrí xéhe tí tjan tjetákóxin ch'án kixin ijnko tjan jinahaya tíha”, ichro ch'án. ⁴⁰ Ntá ch'ín Jesús ntáche ch'án tí ch'ín fariseo kixin:

—Simón, janhan chonta ijnko nkehe tsonixjaha —ichro ch'án.

Ntá kjuátehe tí ch'ín fariseo ntá chro ch'án kixin:

—Chronka, Maestro —ichro ch'án.

⁴¹ Ntá ntá chro ch'ín Jesús kixin:

—K'uéjō yaá chojni ntoa síkéhe sín chichaon ijnko ch'ín nchekjen chojni chichaon. Ijnko la síká ch'án quinientos denario. A ntá tí í jnko a la síká ch'án cincuenta denario. ⁴² A ntá kjuachahya sín k'ókjenhen sín tí chichaon tí ch'ín síkéhe sín ntá kuikonóehé ch'án sín ntá k'óxika ch'án tí cuenta síká yóí sín. A ntá jie chrónka jaha kixin nkexro tí yóí sín antsí chrótjuèhe tí nkexro kuikonóehé ch'án —ichro ch'ín Jesús.

⁴³ Ntá kjuátehe tí ch'ín Simón ntá chro ch'án kixin:

—Janhan ntá xriñan tí nkexro kuikonóehé má —ichro ch'án.

Ntá ntá chro ch'ín Jesús kixin:

† Malaquías 3.1

—Ntoá tjenkayáxian —ichro ch'án.

⁴⁴ Ntá ch'ín Jesús komá ch'án tí tjan a ntá ntáche ch'án tí ch'ín Simón kixin:

—¿Á t'ikuan tí tjan a ní? Janhan na mé k'uixanhan ntqa la ntá jaha la kjuánjonhya ntá chrók'ontia totená. Kjánchó jehe tjan ti ntakon tjan kjuínchek'óntixín tjan totená la ko kaxíhi tjan kjuínchexámáxin tjan. ⁴⁵ A ntá jaha la kjóntekoahyana kochíto. Kjánchó jehe tjan nax-á kuítqehya tjan neko kochíto totená. ⁴⁶ Jaha la kuíkí-texinhya aceite kja. A ntá jehe tjan kuíkíte tjan aceite xraxé náxrjón totená. ⁴⁷ Mé xíkaha ntáxrjan kixin imá tjuana tjan kixin kaín tí nchónhya jie kjuasin tjan la mé kjuíinhin tjan. A ntá ijnko nkexro kjuíinhin íntsíkoá jie la mé xíkaha íntsíkoá tjáqxín kixin tjuana sín —ichro ch'án.

⁴⁸ Ntá nixjehe ch'án tí tjan a ntáchro ch'án kixin:

—Ó kjuíinhan tí jie chonta —ichro ch'án.

⁴⁹ A ntá kaín tí sín tsíkóchjina sín k'uéjótjaxín sín tí tjan ch'án mé kjuankixin kjo sín kichó sín ntáchro sín kixin:

—¿Xá nkexro tíhi kixin tjakjiihin ch'án íjie chojni?

⁵⁰ A ntá ch'ín Jesús ntáche ch'án tí tjan a kixin:

—Ó kuaá jaha kixin kuítekavan tí janhan. A ntá jie kjuaxróxin sátsjia ntqa —ichro ch'án.

Iso chojni chjin kjuínkítsa tí xrá kjuích'e ch'ín Jesús

8 A ntá chr'éxin ntá ch'ín Jesús k'uáji ch'án itsjé chjasin hyé la ko chjasin ntsíntí kjuako ch'án la ko chrónka ch'án tí tan jína kixin nkexrí tí kjuachaxin t'etqan Dios. A ntá tí teyó sín mé k'uájiko ch'án. ² Kjaxin chréhe iso chojni chjin tsíkjinchekitohe ch'án jína tsíkakitsje ch'án tí nchakuen tí jínahya k'uéchónta sín la ko tsíkjatsen ch'án tí chin k'uéchónta sín. Ijnko tjan mé it'in María la ko kjaxin tikitexín tjan Magdalena na mé tsík'axrje yato nchakuen tí jínahya k'uéchónta tjan, ³ la ko íjnko tjan it'in tjan Juana ne mé xii mé it'in ch'án Chuza. Jehe ch'án mé ch'ehe ch'án xrá tí ch'ín Herodes t'etqan ch'án, la ko íjnko tjan mé it'in tjan Susana, la ko itsjé í so sín k'uéjótjín. A ntá kaín sín kjuanjon sín tí nkehe k'uéchónta sín kjuínkítsa sín tí ch'ín Jesús la ko tí sín k'uájiko ch'án.

Ch'ín Jesús kjuíncheyóexin ch'án éxí ijnko ch'ín k'uenkā nonte

(Mt. 13.1-9; Mr. 4.1-9)

⁴ Ntá nchónhya chojni kójnkotsé sín kjuítsjehe sín tí ch'ín Jesús, k'uaxrjexín sín kaín tí chjasin ntiha. A ntá ch'ín Jesús kjuíncheyóexin ch'án ntáchro ch'án kixin:

⁵ —Éxí ijnko ch'ín sákjuík'enkā noatrigo nontee ch'án. Mé xíkaha sákjuí ch'án ik'ue ch'án tí noatrigo a. Ntá iso noa la k'uanótjen chrínta ntja ntá nkaxénjin chojni tí noa a la ko kjaxin tí koxroxé k'uínkā va. ⁶ A ntá í so la k'uítji chrík'á xró ntá k'uayan la xamá kixin kánhyó síin tjo. ⁷ A ntá í so la kjuítsínkák'á kach'í ntá k'uánkí kach'í la ntá í xitjahya k'uánkí tí no a kixin tsík-jate tí kach'í. ⁸ A ntá í so la mé tsík'itjé nche jína. A ntá tió k'uánkí la k'óna jína la mé jnkojnko noatje k'óna ciento neno noa —mé xíkaha ichro ch'án.

Na ntá kjuixin kjuako ch'ín Jesús kaín tíha ntá itsen ntáchro ch'án kixin:

—Tí tjinkáonrá chrókuinhínrá la tinhínrá —ichro ch'án.

Ch'ín Jesús chronkaxín nkekuente kjuíncheyóexin ch'án

(Mt. 13.10-17; Mr. 4.10-12)

⁹ Ntá tí sín k'uájiko ch'án kjuanchankíhi sín ch'án kixin nkexrí t'axrjexín tí nkehe kjuíncheyóexin ch'án.

¹⁰ Ntá ntáchro ch'án kixin:

—Dios mé tsjinkítsa kixin tsonohará tí nkehe noehya í so chojni nkexrí t'etqan Dios. Kjánchó tí í so sín tjáqohā sín kjuíntayóaxoán kixin ntá k'uíkon sín la kjónté tsjátsqanhya sín la ko kuínhin sín na kjónté nax-á tienxínhya sín.

Ch'ín Jesús chronkaxín nkexrí t'axrjexín tí ch'ín k'uenkā nonte

(Mt. 13.18-23; Mr. 4.13-20)

¹¹ Ntá tsqxrjanka nkexrí t'axrjexín tí nkehe kjuíntayóaxoán. Tí noatje mé tí itén Dios. ¹² A ntá tí noa k'uanótjen chrínta ntja la mé tóyóhe tí sín kuínhin tí tan a. A ntá ó kui ch'ín Tsochren ntá kjuínchek'itjáyán ch'án kaín tí itén Dios kuínhin sín chrókuaáxin sín kixin ntá chrókuitekakonhya sín tí nkehe chrókuaáxin sín.

¹³ A ntá tí noa kjuítsínkák'á xró la éxí yóhe tí chojni kuínhin itén Dios la tjoka kóxrjínhin sín kuínkáchónki sín. Na ntá itsi tí kjuaxróxinhya, a ntá tsítóhe sín tí itén Dios kuínhin sín kixin naxā nínkahya chóna nuè. ¹⁴ A ntá tí noa kjuítsínkák'á kach'í na mé éxí yóhe ijnko chojni kuínhin tí tan jína kjánchó tjitoxienhya ntje sín kixin tóxakonhen sín tí xrá chóna sín la ko tjinkaon sín tsochónta sín itsjé nkehe la ko kaín tí nkehe tóxrjínhin sín mé t'ínkákónhen kixin xíkaha la xitjahya sich'ehe sín xrá Dios. ¹⁵ A ntá tí noa k'uínka nonte jína na mé éxí yóhe tí chojni kuínhin tí itén Dios a ntá kaín asén sín kuítekaon sín la ntá kuítqehya sín tí tan, a ntá xíkaha la jína ch'ehe sín Dios xrá.

Ch'ín Jesús mé kjuíncheyóexin éxí ijnko xrohi tjeche

(Mr. 4.21-25)

¹⁶ Nijnko nkexro chrókjuínchek'ákjen xrohi chrókjuak'emā nkaxenhen chī o chrókjuak'emā chrínkí cama. Náhí. Noi chrókjuak'e xrohi kixin ntá tí sín ts'ix-enhen nchia ts'ikonxín sín tí t'ínkaséyan. ¹⁷ Kohya nkehe chrók'uejómá a ntá chr'éxin chrókónoxínhya; la ko kohya nkehe mó chrókónoehyani chr'éxin kixin kaín nkehe la tsonoxíxin tí xrohi a. ¹⁸ A ntá chrókuinhínrá jí-na kixin tí tjan ijnko nkexro chóna nkehe la mé ts'áyéhe ch'án má. A ntá tí nkexro chóntahya nkehe la mé ts'axrjehe ch'án kjónté tí nkehe ntsí tónhen ch'án kixin chóna ch'án.

Tí ìné la ko tí kichó ch'ín Jesús

(Mt. 12.46-50; Mr. 3.31-35)

¹⁹ A ntá kjuíji ìné la ko kichó ch'ín Jesús tí tjan ch'án. Ntá xitjahya tsqchjinehe sín ch'án kixin nchónhya cho-

jni siín. ²⁰ A ntá ijnko sín ntiha tsíkjiichenka ch'ín Jesús kixin:

—Ína la ko kichuá tjejó sín ntója la tjinkaon sín chrók'uikon sín tí jaha —ichro sín.

²¹ Kjánchó kjuátehe ch'án ntáchro ch'án kixin:

—Tí sín tinhin itén Dios la ko titekaon sín na mé t'íkuan tí jehe sín éxi naná la ko kichiná —ichro ch'án.

Ch'ín Jesús k'uętuęnenhén tí xrinto la ko tí ntá kixin ts'ixi-ta

(Mt. 8.23-27; Mr. 4.35-41)

²² Ntá ijnko yaon k'uixenhen ch'ín Jesús ijnko ntabárcō la koí tí sín k'uájiko ch'án. Ntá ntáchro ch'án kixin:

—Sátsjini tóhe ntayaon —ichro ch'án.

Ntá sákjuí sín. ²³ Ntá nachrohe tjejó'tatoye sín a ntá ch'ín Jesús mé kjuák'ejua ch'án. A ntá xrinahya tjiān chjéhe xrinto chrítaon ntá ntá xrankixin sítikia ntá tí ntabárcō ntá chrakon sín kixin ts'aniankí ntá tí ntabárcō. ²⁴ Ntá kjuínchekjayehe sín tí ch'ín Jesús, ntáchro sín kixin:

—Maestro, Maestro. Tjejó't'aniankíni ntá —ichro sín.

Ntá ch'ín Jesús k'uàya ch'án ntá k'uętuęnenhén ch'án tí xrinto la ko tí ntá kixin ts'ixita, a ntá náxrjón k'uixita tí ntá la ko tí xrinto. ²⁵ Ntá ntáche ch'án tí sín k'uájiko ch'án kixin:

—¿Á naxá tinkachónkihyará Dios? —ichro ch'án.

Kjánchó jehe sín mé chrakon sín itjo sín kichó sín kixin:

—¿Xá nkexro tíhi kixin t'ętuęnenhén ch'án xrinto la ko tí ntá la titekakonhen ch'án?

Ijnko ch'ín nonte Gadara chóna nchakuen tí jínahya

(Mt. 8.28-34; Mr. 5.1-20)

²⁶ Ntá kjuíji sín tí nonte Gadara, na mé tóhe ntayaon ntoí chók'èxin estado Galilea. ²⁷ Ntá k'uínkajinxin ch'ín Jesús tí ntabárcō ntá kóchjina ijnko ch'ín chjasin ntiha. Ntá ó má sé chóna ch'án nchakuen tí jínahya. Na ntá ni ké ch'án t'inkáyahya ch'án, la ko jehya ntōe ch'án k'uékjak'e ch'án na mé tjen ch'án tí panteón. ²⁸ Tió k'uíkon ch'án tí ch'ín Jesús ntá kjuák'exín toch'in ch'án nkayakon tí ch'ín Jesús, ntá k'óyako ch'án ntáchro ch'án kixin:

—¿Nkeuente tjiaté tí jeheni, jaha Jesús Xjeen Dios itjen nkaya nkajni? Chronóghani nchekjasótehyani —ichro ch'án.

²⁹ Xikaha ntáchro ch'án kixin ch'ín Jesús tsík'ętuęnenhén tí nchakuen tí jínahya kixin ts'axrjexín tí jehe ch'án. Nchónhya veces tí nchakuen tí jínahya k'uék'ętuęnenhén tí jehe ch'án; a ntá tí chojni k'uétsé sín ch'án k'uékjinchenteto sín tja ch'án la ko toté ch'án la mé cadena tsíkóntetoxin ch'án kixin tjinkaon sín chrókjuak'e ch'án. Kjánchó k'uékóchrínjin ch'án tí nkehe tsíkóntetoxin ch'án kixin nchakuen tí jínahya tjinkaon sáchrókjuíko ch'án nteje. ³⁰ Ntá ch'ín Jesús kjuanchankíhi ch'án tí ch'ín a kixin:

—¿Nkexrí it'ian? —ichro ch'án.

Ntá kjuátehe ch'án ntáchro ch'án kixin:

—Legión mé it'inni —ichro ch'án.

Ntáchro ch'án xikaha kixin nchónhya nchakuen tí jínahya chóna ch'án. ³¹ A ntá kaín tí nchakuen tí jínahya chronóęhe tí ch'ín Jesús kixin chrók'ueęanhya ch'án kixin chrókjuitsínkayá tí tōye njnka. ³² A ntá ntiha tí jna siín nchónhya cochino xrine va. A ntá tí nchakuen tí jínahya chronóęhe tí ch'ín Jesús kixin chrókjuanjon ch'án kjuachaxin chrók'uixenhen tí cochino a. A ntá kjuanjon ch'án kjuachaxin. ³³ A ntá tí nchakuen tí jínahya k'uaxrjexín tí ch'ín a, a ntá k'uixenhen tí cochino a. A ntá kaín tí cochino kuinká va sákjuí va nó nkaya tsaka k'uánótjenkí va ntá kjuínhin va ntá.

³⁴ A ntá tí sín sít'ayakanhen tí cochino k'uíkon sín kixin xikaha kónhen ntá chrakon sín kuinká sín sákjuíchronka sín tí chjasén sín la ko tí rancho. ³⁵ A ntá tí chojni k'uaxrjexín sín chjasin sákjuitsjehe sín nkehe tí tsíkónhen. A ntá kjuíji sín ntiha tí tjen ch'ín Jesús ntá k'uíkon sín kixin ntaha tjen tí ch'ín tsík'axrjexín tí nchakuen tí jínahya. Ntaha tjetjāxin ch'án chrínkí toté tí ch'ín Jesús, ó tsík'inkáya ch'án iké ch'án kixin ó jina tjen ch'án, a ntá chrakon sín tí k'uíkon sín xikaha. ³⁶ A ntá tí jehe sín tsík'ikon sín kixin xikaha kónhen la chrónka sín kixin nkexrí kuítóhe jina tí ch'ín k'uéchóna tí nchakuen tí jínahya. ³⁷ A ntá kaín tí chojni chjasin Gadara kjuankixin chronóęhe sín tí ch'ín Jesús kixin sáchrókjuixin ch'án ntiha kixin imá chrakon sín. A ntá tí ch'ín Jesús k'ujt'ótjen ch'án tí ntabárcō sákjuíxin ch'án ntiha. ³⁸ A ntá tí ch'ín tsík'axrjexín tí nchakuen tí jínahya chronóęhe ch'án tí ch'ín Jesús kixin á chrókjuanjonhya ch'án kjuachaxin sáchrókjuí ch'án koí ch'án. Kjánchó ch'ín Jesús k'uętuęnenhén ch'án kixin tsi-tōhe ch'án ntáchro ch'án kixin:

³⁹ —Titōha satjia ntōa la ko chrónka nkexrí tí kjuachaxin jié kuente Dios kuítóaxián jina jaha —ichro ch'án.

A ntá sákjuí tí ch'ín a chrónka ch'án nkuíxin tí chjasén ch'án kixin ijnko kjuaxroan jié kjuích'e ch'ín Jesús kjuínchekitōhe ch'án jina.

Tí xjeen ch'ín Jairo la ko tí tjan kuákóxin iké ch'ín Jesús

(Mt. 9.18-26; Mr. 5.21-43)

⁴⁰ Tió ch'ín Jesús kjan ch'án tí í jnko chrínta ntá ntá nchónhya chojni siín ntiha la chéhe sín kjuíji ch'án ntiha, kixin kaín sín tjejóchónhen sín ch'án. ⁴¹ Ntá kui ijnko ch'ín it'in Jairo na mé ijnko ch'ín t'ęęan kuente njnko. A ntá kjuák'exín toch'in ch'án tote tí ch'ín Jesús chronóęhe ch'án kixin sáchrókjuí ch'ín Jesús ntōe ch'án ⁴² kixin chóna ch'án jnkokoáxon xjeen ch'án chjin chóna teyó nánó la ó mero tjet'en tjan. A ntá sákjuí ch'ín Jesús la ntá nchónhya chojni chréhe k'uixitja kichó sín.

⁴³ Ntá siín sín ntiha. Na mé ntiha tjenkákjan ijnko chojni chjin níhi tjan sítji tjan jni na mé chóna tjan teyó nánó titōehya tjan jina. A ntá kaín nkehe k'uéchóna tjan kjuenkehe tjan tí sín ch'e xroan la ko nijnko sín kjuachahya sín kjuínchekitōhe sín tjan jina. ⁴⁴ A ntá jehe tjan kóchjina tjan nóton tí ch'ín Jesús na ntá kuákóxin tjan tí iké ch'án, a ntá tuénxin tí jni la í kjuíhya tjan.

⁴⁵ Ntá kjuanchankí ch'ín Jesús kixin:

—¿Nkexro tí kuákóxiinna? —ichro ch'án.

À ntá kaín sín ntáchro sín kixin ninkexró, ichro sín. À ntá ch'ín Pedro la ko tí sín k'uéjoko ch'án ntáchro sín kixin:

—Maestro, nchónhya chojni síin la ko tótéka sín la ntáhi ntáha, ¿ntá nkekuènte kixin naxá tjanchankiá kixin nkexro tí kuákóxiinan? —ichro sín.

⁴⁶ Kjánchó ntáchro ch'ín Jesús kixin:

—Jnkojín nkexro kuákóxiinna kixin kónòna kixin kjuachaxin kuèntaná kuítogéxín ijnko chojni jína —ichro ch'án.

⁴⁷ À ntá tió k'uíkon tjan kixin ó kónoxín ntá kóchjina tjan chrakon tjan kjuák'exín tjan toh'in tjan chrínkí toté tí ch'ín Jesús. Ntá chrónka tjan nkayakon kaín xín chojni kixin nkekuènte kuákóxiin tjan iké ch'án la ko nkexrí kuítogéxín tjan jína xikaha.

⁴⁸ Ntá ntáchro ch'án kixin:

—Jaha, xjeenni, ó kuítoga jína kixin kuítekáván tí janhan. Kjuaxróxin sátjia —ichro ch'án.

⁴⁹ Naxá tjejtjo sín ntiha ntá xrínghya ikui ijnko nkexro kjuixín ntogé tí ch'ín t'etogán kuènte njnko, à ntá chénka ch'án tí ch'ín t'etogán kixin:

—Xjaan na mé ó kjuixín k'uén. Áxri í chjeéhya xrá tí maestro —ichro ch'án.

⁵⁰ À ntá tió kuínhin ch'ín Jesús la kjuátéhe ch'án ntáchro ch'án kixin:

—Chrakonhya. Títekáván tí janhan la tsitoghe xjaan jína —ichro ch'án. À ntá sákjuí sín.

⁵¹ À ntá tí kjujijik'ixenhen sín nchia ntá kuítogehya ch'ín Jesús kixin ókjé nkexro chrók'uixenhen ch'án nchia. Jehó ch'ín Pedro la ko ch'ín Jacobo la ko ch'ín Juan la ko tí it'é la ko tí iné tí xjachjín chrók'uixenhen sín tí tjen tí xjan a. ⁵² Kaín tí sín tjejó ntaha tsjánkàmá sín tí xjan a. Kjánchó jehe ch'án ntáchro ch'án kixin:

—Tsjan kahyará. Tí xjan la tsík'enhya la tjejua xjan —ichro ch'án.

⁵³ Ntá tjanoá sín ch'án kixin jehe sín la ó nohe sín kixin tsík'en xjan. ⁵⁴ À ntá jehe ch'án itsé ch'án tja xjan ntá itsen k'uíyehé ch'án tí xjan ntáchro ch'án kixin:

—Tjarisoá, t'aya —ichro ch'án.

⁵⁵ Ntá kjan asén tjan ntá tuénxín k'uínkatjen tjan. Ntá k'uetogán ch'ín Jesús kixin tsjanjon sín nkehe sine tjan.

⁵⁶ Ntá it'é la ko iné xjan la chrakon sín. À ntá ch'ín Jesús k'uetuènen ch'án sín kixin ninkexró chróchenkahya sín kixin xikaha kónhen.

Ch'ín Jesús ichr'án ch'án tí teyó sín

(Mt. 10.5-15; Mr. 6.7-13)

9 Ntá ch'ín Jesús k'uetogán kixin tsochjina tí teyó sín k'uájiko ch'án. Ntá chjéhe ch'án sín kjuachaxin tsakitsje sín kaín tí nchakuen tí jínahya chóna chojni la ko sinchekitoghe sín chojni jína. ² Ntá k'uetogán ch'án kixin sátsjikjako sín nkexrí tí kjuachaxin t'etogán Dios la ko sinchekitoghe sín chojni jína. ³ La ko k'uetogán ch'án kixin:

—Ninkehó nkehe sátsjikohyará ntja sátsjirá, ni tí nta tixínrá la náhi, ni bolsa la náhi, ni niotja, ni chichaon,

la ko tsjikoará jehó tí ka tjejóyará ó. ⁴ À ntá tí tsjasánrá ijnko nchia tsjanjon sín kjuachaxin la ntahó tsitoghará la tsjixixín tí xrá ntá sátsjixinrá ntiha. ⁵ À ntá tí tsjasánrá ijnko chjasin la ntá tsjanjonhya sín kjuachaxin tsjikorá ntá t'axrjéxinrá tí chjasén sín ntiha tsotsénkará tí nche chóna totará tsjakoxiiná xikaha kixin Dios sinchek-jasóte tí jehe sín —ichro ch'án.

⁶ Ntá sákjuí sín kaín tí chjasin ntsíntí sákjuíchronka sín tí tan jína tsaáxin chojni la ko kjuínchekitoghe sín chojni jína kaín chjasin.

Ik'uén ch'ín Juan Bautista

(Mt. 14.1-12; Mr. 6.14-29)

⁷ À ntá tí ch'ín Herodes t'etogán kuínhin ch'án kaín tí xrá tjech'e ch'ín Jesús la tóxakonhen ch'án kixin iso sín ntáchro sín kixin ch'ín Juan Bautista la ó tsíxechón ch'án, ichro sín. ⁸ À ntá iso sín ntáchro sín kixin ch'ín Elías tsíxechón ch'án mé tí nkexro k'uéchronka itén Dios ósé. À ntá í so sín la ntáchro sín kixin jnkojín tí sín k'uéchronka itén Dios ósé la mé ó tsíxechón, ichro sín. ⁹ Kjánchó ntáchro ch'ín Herodes kixin:

—Janhan mé kuétogán kóchrínjin sín kja ch'ín Juan. ¿Á chrókóchaxín jehe ch'án kixin nchónhya kjuaxroan kuínhan tí tjech'e ch'án? —ichro ch'án. À ntá kjaxín jehe ch'án tóxakonhen ch'án sáchrókjuitsjehe ch'án tí ch'ín Jesús.

Ch'ín Jesús kjuanjón nkehe kjóne in'ó mil chojni

(Mt. 14.13-21; Mr. 6.30-44; Jn. 6.1-14)

¹⁰ À ntá tió kjan tí sín k'uájiko ch'ín Jesús ntá chénka sín tí jehe ch'án kaín tí xrá kjuích'e sín. Ntá k'uaxrjentaako sín ch'án tí kohya ninkexró chjinaxón chjasin Bet-saida. ¹¹ Ntá tió k'uixikónohe chojni kixin ntaha tjen ch'ín Jesús ntá sákjuíchréhe sín ch'án. À ntá kjuanjón ch'án kjuachaxin ts'ejó sín. Ntá kjuankixin chrónka ch'án nkexrí tjen tí kjuachaxin t'etogán Dios la ko kjuínchekitoghe ch'án chojni jína.

¹² À ntá ó ntá kóntó ntá tí teyó sín k'uájiko ch'ín Jesús kóchjinehe sín ch'án ntáchro sín kixin:

—Nixjehé tí chojni kixin sátsjí sín tí chjasin ntsí la ko tí ichrén nchia chjinaxón sátsjik'ok'éhe sín la ko sátsjik-jeyá sín nkehe sine sín kixin jaha la ó noha kixin nteje tjejóni la kohya nkehe tsochjéheni sín —ichro sín.

¹³ Kjánchó ch'ín Jesús ntáche ch'án sín kixin:

—Chjehérá sín nkehe sine sín —ichro ch'án.

Ntá kjuátéhe sín ntáchro sín kixin:

—Chóntahyani itsjé nkehe; jehó in'ó niotja la ko yaá koche chóntani. ¿Á tjinkáván sátsjik'énani nkehe sine kaín tí chojni síin? —ichro sín.

¹⁴ Kixin síin chjina in'ó mil chojni ntoa. À ntá ch'ín Jesús ntáche ch'án tí sín xriko ch'án kixin:

—Ntácherá sín tsojnkoié sín ts'ixitjaxín sín jnkojnko cincuenta sín —ichro ch'án.

¹⁵ À ntá xikaha kjuích'e sín k'uetogán sín, à ntá k'uixit-jaxín sín kaín sín. ¹⁶ À ntá ch'ín Jesús kuákja ch'án tí n'ó niotja la ko tí yaá koche. Ntá konta ch'án nkajní kjuanchehe ch'án kjuasáyé Dios kixin kjuanjón tí nkehe sine sín. Ntá kóchrít'og ch'án tí niotja la ko tí koche

la chjéhe ch'án tí sín xriko ch'án. A ntá jehe sín k'óxikeyehe sín chjéhe sín kaín tí chojni síin. ¹⁷ A ntá kaín sín kjóne sín la kókjehe sín. A ntá chr'éxin kjuenájín sín kaín tí nkehe síxehé mé teyó ntaxra kjuínchekaón sín.

Ch'ín Pedro mé chrónka kixin ch'ín Jesús mé tí Cristo
(Mt. 16.13-19; Mr. 8.27-29)

¹⁸ Ntá ijnko yaon ch'ín Jesús k'uaxrjenta ch'án tjenixjehe ch'án Dios. Ntá tjejóko ch'án tí sín xriko ch'án ntá kjuanchankíhi ch'án tí jehe sín kixin:

—¿Nkehe ichro tí chojni kixin nkexro tí janhan?
—ichro ch'án.

¹⁹ A ntá jehe sín kjuátehe sín ntáchro sín kixin:

—Iso sín ntáchro sín kixin jaha tí Juan Bautista. A ntá í so sín ntáchro sín kixin jaha la tí ch'ín Elías. A ntá í so sín ntáchro sín kixin jaha ijnko nkexro k'uéchrónka itén Dios ósé mé ó tsíxechón —ichro sín.

²⁰ A ntá kjuanchankíhi ch'ín Jesús tí jehe sín kixin:

—A ntá jahará, ¿nkechorá, nkexro tí janhan? —ichro ch'án.

Ntá ntáchro ch'ín Pedro kixin:

—Jaha tí Cristo ichr'án Dios —ichro ch'án.

Ch'ín Jesús chrónka kixin its'en ch'án
(Mt. 16.20-28; Mr. 8.30—9.1)

²¹ Ntá ch'ín Jesús k'uətuənhen ch'án sín kixin ninkexró tsochenkahya sín kixin nkexro tí jehe ch'án.

²² Ntá chénka ch'án sín kixin:

—Tí Xjeen Dios K'óna Chojni t'ichjánxin tsjasóte nchónhya nkehe tsonhen la ko tsitekakuenhya tí sín t'ətoan kuente njnko la ko tí sín t'ətoan kuente tí sín nchat'á la ko tí sín maestro tjako tí ley. Ts'óyan sín tí jehe ch'án, kjánchó tí nixin yaon na ó tsoxechón ch'án inaá —ichro ch'án.

²³ Ntá chr'éxin chénka ch'án kaín sín kixin:

—Tí chaxín tsochréhérá tí janhan na t'ichjánxin tsjtohérá kaín tí nkehe tjaké asánrá, ntá tсамará tí ntacruz kuentará jnkojnko yaon, a ntá tsochréhérá tí janhan. ²⁴ Tí nkexro tjinkaon jehó sinchekaá asén mé ts'itjáyan. A ntá tí nkexro sinche'itjáyanxín asén kixin tinkáchónki tí janhan la tsaá. ²⁵ ¿A ntá nkehe tsonhen tí chrókjuacha ijnko chojni chróhónka kaín nkehe síin chjasintajni a ntá kjuachón chrókjuinchek'itjáyan ch'án? ²⁶ A ntá jnkojín chojni chrókósuèhé kixin tinkáchónki tí janhan la ko tí nkehe tjákua, a ntá kjaxin tí Xjeen Dios K'óna Chojni mé tsosuehé chróntáchro ch'án kixin chóxin ch'án tí jehe sín tió tsi ch'án éxí ijnko rey tsjkaon ch'án tí kjuachaxin kuente It'é ch'án la ko tí sín ángel jina. ²⁷ Tíhi mé ntoá xrjanka kixin iso chojni tjejó ntihi tjejótinhin sín naxa ts'enhya sín ts'ikon sín kixin Dios ts'ətoan tí kjuachaxin kuente ch'án.

K'uixitóxin nkexrí tsjehe ch'ín Jesús
(Mt. 17.1-8; Mr. 9.2-8)

²⁸ A ntá k'uátsínka ijní yaon tí tsíchronka ch'án tíhi ntá sákjujko ch'án ch'ín Pedro la ko ch'ín Juan la ko ch'ín Jacobo la chriin sín ijnko jna kixin tsonixjehe

ch'án Dios. ²⁹ Ntá ch'ín Jesús tjenixjehe ch'án Dios ntá k'uixitóxin nkexrí tsjehe ch'án la ko tí iké ch'án la tjóá la ko tjákini tsjehe. ³⁰ Ntá xrinahya k'uikon sín yaá chojni tjejótjo sín tí jehe ch'án na mé jehe sín la tí ch'ín Moisés la ko tí ch'ín Elías. ³¹ Imá t'inkáséyan jnkontatjen tí tjejó sín tjejótjo sín tí ch'ín Jesús kixin nkexrí its'en ch'án la ko nkexrí tsjasótexin ch'án tí chjasin Jerusalén. ³² A ntá ch'ín Pedro la ko tí sín tjejóko ch'án la imá kuihi sín kotáchrin; kjónté la k'uéjótsehe sín k'uikon sín tí kjuachaxin kuente ch'ín Jesús la ko k'uikon sín tí yóí chojni ntoa tjejóko sín ch'án. ³³ A ntá tió sátsji tí yóí sín tjejóko ch'ín Jesús ntá ch'ín Pedro ntáche ch'án tí ch'ín Jesús kixin:

—Maestro, jina kixin tjejóni ntihi. Chrókjuich'éneni iní nchia la mé ijnko kuentá la ijnko kuente ch'ín Moisés la ko ijnko kuente ch'ín Elías —ichro ch'án.

Kjánchó ch'ín Pedro í noehya ch'án nkehe chróntáchro ch'án kixin chrakon ch'án. ³⁴ A ntá naxa tjenixja ch'án ikui ijnko tjuí kjuák'etja tí jna tjejó sín. Ntá chrakon sín tjejó sín chrínki tí tjuí. ³⁵ Ntá xrinahya kuínhin sín chríkjan tí tjuí itén nkexro ntáchro kixin:

—Tíhi mé Xjanna, imá tjuahá ch'án. Tinhínrá tí nkehe tsochronka ch'án la ko tí nkehe tjako ch'án.

³⁶ A ntá tió kjuixin kuínhin sín tí tan nixja ntá k'uikon sín kixin jehó ch'ín Jesús tjen. A ntá tí jehe sín la táni sín kixin xikaha k'uikon sín tí yaon a la ninkexró chenkahya sín tí nkehe k'uikon sín.

Ch'ín Jesús kjuínchekitóhe jina ijnko chánjan chónka nchakuen tí jínahya
(Mt. 17.14-21; Mr. 9.14-29)

³⁷ A ntá tí yaon chr'éxin k'uínkajinxín sín jna la ntá nchónhya chojni sákjuixinhin sín ntja ch'ín Jesús. ³⁸ A ntá ijnko chojni tjenkákjan ch'án tí chojni kjuíji ntá itsen nixja ch'án ntáchro ch'án kixin:

—Maestro, chrónóhahi kixin chrótsjehé tí xjeenni kixin jnkokoxón ó chóntani a ntá níhi xjan. ³⁹ Chónka xjan nchakuen tí jínahya la ntá nchek'iyato xjan la ko nchek'aniáte xjan nchexránkā xjan kixin tjejótjehe xjan la ko ntalóxrjo sítjixín ir'va xjan la ko nchenihi xjan, na mé chrohya tsjiinhin xjan. ⁴⁰ A ntá chrónóeheni tí sín xríkoa chrókuakitsje sín tí nchakuen tí jínahya, kjánchó kjuachahya sín —ichro ch'án.

⁴¹ Ntá kjuátehe ch'ín Jesús ntáchro ch'án kixin:

—Jahará chaxínhya chojni tinkáchónki tí janhan. Jehya jina tjenkaxínrá. ¿Xá hasta nkesá tjinkáonrá ts'e-jóni tsjákohará kixin nunca t'itjáhyará? Xrákoa tí xjan ntihi —ichro ch'án.

⁴² A ntá kóchjina tí chánjan. A ntá tí nchakuen tí jínahya kjuáka xjan nonte la ko kjuínchek'aniáte xjan inaá. Kjánchó ch'ín Jesús jjehe k'uətuənhen tí nchakuen tí jínahya kixin ts'axrjéxín xjan. Ntá k'uaxrje tí nchakuen tí jínahya ntá kuítóhe xjan jina. A ntá ch'ín Jesús kjuínchek'áyéhe tí it'é xjan. ⁴³ A ntá kaín sín chrakon sín kixin k'uikon sín tí kjuachaxin jié kuente Dios.

Ch'ín Jesús chrónka ch'án inaá kixin its'en ch'án

(Mt. 17.22-23; Mr. 9.30-32)

Naxa chrakon sín kaín sín kixin tí kjuaxroan kjuich'e ch'ín Jesús la ntá ntáche ch'án tí sín xriko ch'án kixin:

⁴⁴ —Tinhínrá jína tíhi la ko t'itjáyanhyará. Tsotsé sín tí Xjeen Dios K'óna Chojni la ko tsjikaán sín ch'án tí tjejó tí sín t'etqan —ichro ch'án.

⁴⁵ Kjánchó jehe sín kienxínhya sín tí nkehe ntáchro ch'án kixin naxa kjuanjonhya Dios kjuachaxin kixin chrókuienxín sín, ntá chrakon sín na kjuanchankíehya sín ch'án kixin nkexrí t'axrjexín tí nkehe ntáchro ch'án.

Nkexro tí imá tjeotan ts'etqan

(Mt. 18.1-5; Mr. 9.33-37)

⁴⁶ A ntá tí sín k'uájiko ch'ín Jesús kjuankixin sín itjo sín kichó sín kixin nkexro tí jehe sín qntsí má tjeotan ts'etqan. ⁴⁷ Kjánchó ch'ín Jesús kónohe ch'án nkehe tjenkayáxin qсэн sín. Ntá kuákja ch'án ijnko chánjan ntá kjuak'e ch'án tí tjen ch'án ⁴⁸ ntá ntáche ch'án sín kixin:

—Tí jnkojín nkexro chrók'uáyéhe tí xjan i kixin tinkáchónki sín tí janhan mé xikaha chrók'uáyéhe sín tí janhan. A ntá jnkojín nkexro chrók'uáyéhe tí janhan mé xikaha chrók'uáyéhe tí nkexro chr'ánna k'uinka. A ntá tí jnkojín nkexro qntsí chrókjuinchehnkehya la mé qntsí chrók'uáyéhe kjuachaxin chrók'uqetqan.

Tí nkexro nínkakuenhya tí jeheni la mé tóxrjínhín ch'án tí xra ch'eni

(Mr. 9.38-40)

⁴⁹ Ntá ntáchro ch'ín Juan kixin:

—Maestro, k'uíkonni ijnko nkexro kjuachaxin ihnjá kuakitsjexín ch'án nchakuen tí jínahya chóna chojni. A ntá chénkani ch'án kixin xikahya chrókjuich'e ch'án kixin xrikohyani ch'án.

⁵⁰ Kjánchó ch'ín Jesús ntáchro ch'án kixin:

—Xikahya chróntáche ch'án kixin tí nkexro nínkakuenhya tí jeheni la kjá tóxrjínhín tí xra ch'eni —ichro ch'án.

Ch'ín Jesús kjuentuéhe ch'án tí ch'ín Jacobo la ko tí ch'ín Juan

⁵¹ A ntá ó kóchjina tí yaon sátsji ch'ín Jesús nkaya nkajíní, na ntá táhó kjuenkayáxin ch'án sátsji ch'án chjasin Jerusalén. ⁵² Ichr'án ch'án chojni kuitónxin ntja a ntá jehe sín sákjuí sín ijnko chjasin ntsí estado Samaria sákjuikjeyá sín nchia ts'ok'èxin sín. ⁵³ Kjánchó tí sín samaritano kjuanjonhya sín kjuachaxin chrók'uejó sín kixin k'uíkon sín kixin ó xra ó sátsji ch'án chjasin Jerusalén. ⁵⁴ A ntá tió k'uíkon tí sín k'uájiko ch'án la mé ch'ín Jacobo la ko ch'ín Juan la ntáchro sín kixin:

—Inchéni, zá tjinkávan kixin chrókjuanchiani xrohi chrók'uinkajinxín nkaya nkajíní chrókjuinчек'itjáyan tí jehe sín éxí kjuanchia tí ch'ín Elías? † —ichro sín.

⁵⁵ Ntá ch'ín Jesús kuinkátjía ch'án komá ch'án tí jehe sín ntá kjuentuéhe ch'án sín ntáchro ch'án kixin:

—Jahará la kjá noahyará nkexro nchakuen chontará.

⁵⁶ Kixin tí Xjeen Dios K'óna Chojni kuihya ch'án kixin chrókjuinчек'itjáyan ch'án chojni. Náhí. Xra ó ikui ch'án sinchekaá ch'án chojni —ichro ch'án.

Ntá sákjuí sín í jnko chjasin ntsí.

Tí sín tjinkaon chróchréhe sín tí ch'ín Jesús

(Mt. 8.19-22)

⁵⁷ A ntá jehe sín sákjuí sín ntja inaá. Ntá xeta sín ijnko nkexro ntáche ch'án tí ch'ín Jesús kixin:

—Inchéni, tjinkaonni chróchréheni tí jaha nketí tjinkávan sátsjia —ichro ch'án.

⁵⁸ Ntá ch'ín Jesús kjuátéhe ch'án ntáchro ch'án kixin:

—Tí koxróntá chóna va itjuéé va la ko tí koxroxé chóna va káké va. A ntá tí Xjeen Dios K'óna Chojni chónahya nketí ts'ok'èxin ch'án —ichro ch'án.

⁵⁹ A ntá ntáche ch'án í jnko nkexro:

—Chr'éhe tí janhan —ichro ch'án.

Kjánchó kjuátéhe ch'án kixin:

—Inchéni, tjtóhéni senó sátsjikjaváni it'eni —ichro ch'án.

⁶⁰ Ntá kjuátéhe ch'ín Jesús ntáchro ch'án kixin:

—Tjtóhé kixin tí chojni tsík'en la jnkokón sín tsík'en tsjavá kichó sín. A ntá jaha la sátsjikjækua nkexrí tjen tí kjuachaxin t'etqan Dios —ichro ch'án.

⁶¹ Ntá ntáchro í jnko nkexro kixin:

—Inchéni, tjinkaonni tsochr'éheni tí jaha. Jehí tjtóhé tsjinixjeheni tí sín siín nqeni —ichro ch'án.

⁶² Kjánchó ntáchro ch'ín Jesús kixin:

—Tí nkexro kjuankixin tsotsé ch'án arado ntá chrókjan chrókotónhen nóton mé xikaha xitjahya sich'ehe ch'án Dios xra.

Ch'ín Jesús k'uqetqenhen setenta chojni sátsjikjako sín

10 Ntá chr'éxín Inchéni kjueyá ch'án í jnko setenta chojni ntá k'uqetqenhen ch'án sín sátsji sín yóyó sín sátsji sín tsitónxin sín ntja tí kaín chjasin na ko nkuíxín tjinkaon ch'án sáchrókjuí ch'án. ² Ntá ntáchro ch'án kixin:

—Chaxín ntáxrjan kixin imá tsík'óna, a ntá tí chojni ch'e xra mé tsjéhya. Chrókjuanchehérá tí Inché nonte kixin chróchr'án ch'án itsjé chojni chrókjuich'e xra.

³ Sátjirá jahará. Xráxinkáonrá kixin tétuqanhanrá sátsjirá éxí kolélo ts'ejóyáqjanrá chríkjan tí kolobo. ⁴ Tsjikoahyará kabólsa la ko tjoa t'inka chichaon la ko toqate tjikoahyará la ko tí nixjehérá chojni tí ntja tjtóqéhyará kixin chrókjuintaxrjanhanrá sín. ⁵ A ntá tió ts'ixenhenrá jnkojín nchia la senó nixjehérá sín ntáchrórá kixin ts'áyéhe sín kjuaxróxin, tsixrorá. ⁶ A ntá tí tjejó sín kjuaxróxin ntiha la nixjehérá sín la ts'áyéhe sín kjuaxróxin. A ntá tí la náhí, a ntá tí kjuaxróxin chrók'uáyéhe sín na sátsjikoará inaá. ⁷ A ntá tí nchia ntiha chrókjuanjon sín kjuachaxin chrókuithará, nta-ha mé tsjanjon sín nkehe chóna sín sinterá la ko it-s'irá, kixin tí nkexro ch'e xra la siín kjuachaxin tsox-enkehe. Tsjíhyará í jnko nchia la ko í jnko nchia. ⁸ A ntá

† 1 Reyes 18.30-40

tsjasánrá ijnko chjasin tsjanjon sín kjuachaxin ts'ejorá ntiha ntá interá tí nkehe tsjanjon sín. ⁹ Nchekitqherá chojni níhi jína. Ntá chenkará sín kixin tí kjuachaxin t'etōan Dios la kjinhya tjen tí tjejó sín, ichrorá. ¹⁰ A ntá tió tsjasánrá ijnko chjasin a ntá tsjanjonhya sín kjuachaxin la ntá t'axrjéxinrá ntōe sín sájtirá tí ntja chjasin ntiha ntá ntáchrórá kixin ¹¹ kjónté tí nche tsík'ixitja totará tsotsénkará kixin tsjákoxinrá kixin tí kjuaxróxinhya ts'áyéhe sín chr'éxin. Kjánchó chrókónohe sín kixin tí kjuachaxin t'etōan Dios la kjinhya tjen tí tjejó sín, ichrorá. ¹² Ntáxrjan kixin tí yaon tsjejéxin chjasintajni la kjuaxróxinhya ts'atsínka tí chjasin a. Antsí náxrjónhya tí nkehe ts'atsínka sín, a ntá tí nkehe ts'atsínka chjasin Sodoma † la kénhyó —ichro ch'án.

Iso chjasin titekakonhya

(Mt. 11.20-24)

¹³ Nòará jahará chjasin Corazín. Nòará jahará chjasin Betsaida. Tí chrók'uixin tí kjuaxroan tí chjasin Tiro la ko chjasin Sidón éxi k'uíkonrá jahará, ntá chrókójehe sín la tjoka chrókjuítóxinhin ntje sín, tjoka chrók'uinkáya sín ka tié la ko chrókjuikjanjin sín ikja sín nteso, kixin chrókjuákoxin sín kixin t'ává sín. ¹⁴ A ntá tí yaon tsi-tōexín ijje chojni a ntá jahará antsí tsjasótíará, a ntá tí sín kuente chjasin Tiro la ko chjasin Sidón la kénhyó tsjasóte sín. ¹⁵ A ntá jahará chjasin Capernaum, tjenkayáxinrá kixin imá nohará a ntá sátsjírá nkaya nkajíní, ichrorá. Chaxínhya. Jahará la tsjasinkajínrá sátsjírá tí tsjasótéxin tí sín tsík'en.

¹⁶ Tí nkexro tinhin tí nkehe ntáchrórá la mé xikaha tinhin tí nkehe ntáxrjan la ko tí sín titekakonhya sín tí jahará na mé xikaha titekakonnahya sín tí janhan. A ntá tí nkexro titekakonnahya sín tí janhan xikaha titekakonhya sín tí nkexro chr'ánna k'uinka.

Ó kjan tí sín setenta sátsíkji

¹⁷ A ntá ó kjan tí sín setenta sátsíkji la imá chéhe sín ntáchró sín kixin:

—Inchéni, kjónté tí nchakuen tí jínahya titekakonhenni tió t'ákjénxínni ihníá —ichro sín.

¹⁸ Ntá ntáchró ch'ín Jesús kixin:

—Kja chaxín k'uíquān kixin ch'ín Tsochren k'uánót-jénxin nkajíní éxi ijnko kjónkixin xikaha kónhen. ^{††19} Ó tjahará kjuachaxin kixin kjónté konche la ko konchja tsinkátjará la ko tsjachahya ninkehó tí kjuachaxin kuente tí ch'ín Tsochren kixin ninkehó tsoanhyará.

²⁰ Kjánchó jehya tíha chrókóchàxinrá kixin tí nchakuen tí jínahya kuítetekonhanrá. Náhí. Chrókóchàxinrá kixin ihníárá ó ts'ínixín nkaya nkajíní —ichro ch'án.

Tí Xjeen Dios nixjehe It'é ch'án

(Mt. 11.25-27; 13.16-17)

²¹ A ntá tuénxín tí Nchakuen Dios kjuínchechéhe tí ch'ín Jesús ntá ntáchró ch'án kixin:

—Tjáncháha kjuasáya It'eni Inché nkaya nkajíní la ko chjasintajni kixin kjuánjonhya kjuachaxin chrók'uitja tí

sín imá nohe, a ntá kjuánjuan kjuachaxin kixin ts'itja tí sín noehya. Mé xikaha It'eni, jaha kóxrjínhan kixin xikaha tsohnen.

²² T'aná mé chjina kaín sín nkehe. Ninkexró noehya nkexro tí Xjeen ch'án. Na mé jehó It'é ch'án mé nohe. La ko ninkexró noehya nkexro tí It'é ch'án. Na mé jehó tí Xjeen ch'án mé nohe ch'án la ko tí sín tsíkjejá ch'án kixin tjinkaon ch'án tsohohe sín nkexro It'é ch'án —ichro ch'án.

²³ Ntá komá ch'án tí sín k'uájiko ch'án ntá ntáche ch'án tí jehó sín kixin:

—Chéhe tí sín k'uíkonxín kon sín éxi k'uíkonrá.

²⁴ Ntáxrjan kixin nchónhya tí sín k'uéchronka itén Dios ósé la ko nchonhya tí sín rey k'uétjinkaon sín chrók'uikon sín éxi t'ikonrá, kjánchó k'uíkonhya sín, la ko k'uétjinkaon sín chrókuinhin sín tí nkehe tjejetin-hínrá jie, kjánchó í kienhya sín —ichro ch'án.

Ch'ín Jesús kjuíncheyóexin éxi ijnko samaritano jína

²⁵ Ntá ijnko maestro tjako tí ley k'uínkatjen ch'án nixjehe ch'án tí ch'ín Jesús tjinkaon ch'án tsohoexín ch'án á chaxín nohe ch'án tsjatehe ch'án ntá kjuanchankí ch'án kixin:

—Maestro, ¿nkexrí chrókjuich'eni chrók'uitjani tí kjuachón jnkochrín? —ichro ch'án.

²⁶ Ntá kjuátehe ch'ín Jesús ntáchró ch'án kixin:

—¿Nkexrí nixja tí ley? ¿Nkexrí tiénxian? —ichro ch'án.

²⁷ A ntá tí maestro tjako tí ley mé kjuátehe ch'án ntáchró ch'án kixin:

—Chrótjuèheni Inchéni Dios kaín asénni la ko kaín fuerza chóntani la ko kaín kjuaxrexinkaon kuénténi la ko chrótjuèheni kichó ni éxi tjuèxínni asénni ‡ —ichro ch'án.

²⁸ Ntá ntáchró ch'ín Jesús kixin:

—Jína kjuátehe. A ntá tí jaha xikaha sích'e la tsochon-ta kjuachón —ichro ch'án.

²⁹ Ntá tí maestro tjako tí ley mé tjinkaon chrókjuachaxín ch'án tí ch'ín Jesús ntá kjuanchankí ch'án ínaá kixin:

—¿Xá nkexro tí kichó ni chrótjuèheni, ichrua? —ichro ch'án.

³⁰ Ntá ch'ín Jesús kjuátehe ch'án ntáchró ch'án kixin:

—Ijnko chojni k'uínkajínxin nó ntja kjuixín chjasin Jerusalén sátsji ch'án chjasin Jericó, ntá kuátóhe ntja iso síchee kueéhe sín ch'án kaín nkehe sáchrókjuiko ch'án, la ko iké ch'án tsíkakitsjehe sín ch'án, la tsíkate sín ch'án, la ntá sátsíkji sín tsíkitohe sín ch'án la ó mero tjet'en ch'án. ³¹ Ntá xrinahya k'uátsínka ijnko nchát'á tí ntja ntiha ntá k'uíkon ch'án xikaha ntá ántōsén ch'án k'uátsínké ch'án. ³² A ntá kjaxin ijnko ch'ín levita k'uátsínka chjinaxón ntiha. Ntá k'uíkon ch'án xikaha ntá ántōsén ch'án k'uátsínké ch'án kjaxin. ³³ A ntá ijnko ch'ín kjuixín estado Samaria k'uátsínka tí ntja ntiha ntá k'uíkon ch'án xikaha tjetsínka tí nkexro ntá kuíkonóhehe ch'án. ³⁴ Ntá kóchjinehe ch'án tí nkexro tsíkóníhi ntá kjuích'ehe ch'án xroan tí síchrit'o chjehe ch'án aceite la ko vino la ko kjuínchentetoxín ch'án ka.

† Génesis 19.24-28 †† Isaías 14.12

‡ Deuteronomio 6.5; Levítico 19.18

Ntá kjuixin ntá kjuínchekíták'á ch'án tí kolóchoe ch'án. Ntá sákjuíko ch'án ijnko nchia t'ok'èxin chojni ntiha la k'uáyakonhen ch'án. ³⁵ Ntá tí kóyaon ntá sátsji tí ch'ín samaritano kuakitsje ch'án iyó tí chichaon la chjéhe ch'án tí ìnché tí nchia ntáchro ch'án kixin: "T'ayakonhén tí nkexro i, a ntá antsí má ts'ichjánxinhin ch'án la tió tsokjan ntá tsjénkaha ts'ókjanhan kaín tíha," ichro ch'án. ³⁶ A ntá tí iní nkexro k'uátsínka ntja la, ¿nkexro tjuéhe tí nkexro kjuíncheníhi tí síchee? —mé kjuanchankí ch'ín Jesús.

³⁷ A ntá kjuátehe tí maestro tjako tí ley kixin:

—Tí nkexro kuikonóhehe tí jehe ch'án —ichro ch'án.

Ntá ntáchro ch'ín Jesús kixin:

—Sátjia jaha la xíkaha chrókjuich'e —ichro ch'án.

Ch'ín Jesús sákjuí ch'án ntøe tjan Marta la ko tjan María

³⁸ Naxa tjetji ch'ín Jesús kjuíji ch'án ijnko chjasin ntsí. A ntá ntiha itjen ijnko tjan it'in Marta, a ntá kjuanjon tjan kjuachaxin kuítóhe ch'án ntøe tjan ntiha. ³⁹ A ntá tjan Marta chóna tjan ijnko kichó tjan it'in María. A ntá jehe tjan kjuák'etjaxin tjan chrínkí toté tí ch'ín Jesús tjetinhin tjan nkehe tí tjechro ch'án. ⁴⁰ A ntá tjan Marta tóxakonhen tjan kixin nchónhya xra chóna tjan, ntá kóchjinehe tjan tí ch'ín Jesús ntáchro tjan kixin:

—Ìnchéni, ¿á tóxakuanhya kixin tí tjan kichó ni kuítóheni tjan, a ntá jehóni tjech'eni kaín xra? Ntáche tjan kixin tsjinkitsani tjan —ichro tjan.

⁴¹ Kjánchó ch'ín Jesús kjuátehe ch'án ntáchro ch'án kixin:

—Marta, Marta, jaha imá tóxakonhan kixin t'inkákonhen nchónhya xra chonta. ⁴² Kjánchó jnkokoá nkehe t'ichjánxin. A ntá tjan María kjueyá tjan tí nkehe antsí jina la ko ninkexró tsakitsjehya tjan tíha —ichro ch'án.

Ch'ín Jesús tjako ch'án nkexrí tsonixjeheni Dios

(Mt. 6.9-15; 7.7-11)

11 A ntá jnkonaá ch'ín Jesús tjenixjehé ch'án Dios ijnko lugar tjen. Ntá kjuixin la ijnko tí sín xriko ch'án ntáchro kixin:

—Ìnchéni, tjákhéni nkexrí tsonixjeheni Dios kixin xíkaha ch'ín Juan kjuakohe ch'án tí sín k'uájiko ch'án.

² Ntá ch'ín Jesús ntáchro ch'án kixin:

—Tió nixjehérá Dios ntáchrórá kixin:

It'èni tjen nkaya nkajní, jaha imá tjóá.

Chrókui ti kjuachaxin kuéntá.

Chrókjuich'e tí nkehe tóxrjínhan jaha ntihi chjasintajni éxi tjech'e nkaya nkajní.

³ Ijie tsjánjuan tí niotja t'ichjánxinhinni jnkoinko yaon.

⁴ T'óxíka tí nkehe jínahya kjuích'eni kixin kjaxin jeheni ts'itjáyenhenni tí nkehe kjuích'eheni chojni.

Titøehyani jeheni xrahya chrókjuasinni jje. Nchekaáni kaín tí nkehe jínahya chrókónhenni

—mé xíkaha ichro ch'ín Jesús.

⁵ Kjaxin ntáchro ch'án kixin:

—A ntá jnkójínrá chróchontará ijnko chojni choxian, a ntá sáchrókjuia ntøe ch'án k'áxrótjen chróntáche

ch'án kixin: "Amigo, nchekjenni iy'á niotja ⁶ kixin nantá ó kui ijnko chojni chóxinni kuixin ch'án kjin kjuíji ch'án ntøeni ntá chóntahyani ninkehó tsochjeheni ch'án." ⁷ A ntá tí chrókjuatehe tí nkexro choxian tjen nkaxenhen chróntáchro kixin: "Chjéehyani xra. Tí ntója ntøeni méhe t'ikjéhe. A ntá xjeenni tjejó't'ok'èkoni xjan. Ntá xitjahya ts'àyani tsotjáhani nkehe", ichro ch'án.

⁸ Ntáxrjan kixin kjónté chrók'uayahya ch'án chrótjáhya ch'án nkehe kjónté chóxian ch'án, kjá ts'aya ch'án tsotjáha ch'án kaín nkehe t'ichjánxinhan kixin tjinkakonhya ch'án kixin naxa chrókjuak'é chrók'uèya jaha. ⁹ Mé xíkaha ntáxrjan kixin: Tjanchiará nkehe la Dios tsotjáhará; tjéyará nkehe la ts'itjará; t'inkará puerta la tsoxitjehé. ¹⁰ A ntá tí nkexro tjanchia nkehe la ts'áyéhe tí nkehe; la ko tí nkexro tjeyá nkehe la ts'itja; la ko tí nkexro t'ínka puerta la tsoxitjehé.

¹¹ ¿Xá jnkójínrá chontará xjaanrá chrókjuanchahará xjan niotja la ¿á chrókjuánjonrá ijnko xro? O chrókjuanchahará xjan koche la ¿a chróchjehérá ijnko konche?

¹² O chrókjuanchahará xjan koja la ¿á chrókjuánjonrá ijnko konchía? ¹³ A ntá jahará kjónté jínahyará la ó nohará nkehe jina tsochjehérá xjaanrá, la mé antsí chrókónohará kixin It'èni tjen nkaya nkajní tsotjáhará Nchakuen ch'án tí jnkójínrá chrókjuancheherá ch'án —ichro ch'ín Jesús.

Tjanchia sín jje kixin ch'ín Jesús chóna kjuachaxin tí Jínahya

(Mt. 12.22-30; Mr. 3.19-27)

¹⁴ Ntá ch'ín Jesús kuakitsje ch'án ijnko nchakuen tí jínahya tsíkjinchenósín ijnko chojni. A ntá tió tsík'axrje tí nchakuen tí jínahya a ntá tí ch'ín xitjahya nixja la jina nixja ch'án. Ntá kaín chojni chrakon sín kixin xíkaha tsíkijich'e ch'án. ¹⁵ A ntá jnkójín tí jehe sín ntáchro sín kixin:

—Tí ch'ín a mé takitsje ch'án nchakuen tí jínahya kixin chóna ch'án kjuachaxién tí ch'ín Beelzebú mé tí ch'ín Tsochren, na mé jehe ch'án mé t'etuènen kaín tí nchakuen tí jínahya —ichro sín.

¹⁶ A ntá iso sín tjinkaon sín chrókjuachaxin sín tí ch'ín Jesús ntá kjuanchehe sín ch'án ijnko kjuaxroan náxrjón kuénte nkaya nkajní. ¹⁷ Kjánchó jehe ch'án ó nohe ch'án nkehe tjenkayáxin sín la ntáchro ch'án kixin:

—Jnkójín gobiernó jnkokónhya tjenkayáxin sín ntá tjanjonko kichó sín na mé ts'itjáyán tí kjuachaxin ts'etøanxín sín, la ko tí sín jnkokoá nchia jnkokónhya tjenkayáxin sín xitjahya ts'ejóko kichó sín jnkokoá. ¹⁸ A ntá kjaxin tí ch'ín Tsochren chrókjuánjonko kichó ch'án, ¿la nkexrí chróchóna ch'án kjuachaxin naxa chrók'uètoan ch'án tí chrók'uaxrje tí jínahya? A ntá jahará ntáchrórá kixin janhan takitsjé nchakuen tí jínahya kixin tí kjuachaxién ch'ín Tsochren chonta janhan, ichrorá. ¹⁹ A ntá tí xíkaha la, ¿ntá nkexro chjéhe kjuachaxin tí sín chréhe tí jahará kixin tsjacha sín tsakitsje sín nchakuen tí jínahya? Jehe sín mé tjakoxin sín kixin jahará ntoáhya tjenkayáxinrá. ²⁰ A ntá tí kjuachaxién Dios mé takitsjéxian tí nchakuen tí jínahya na mé

chrókónoaxínrá kixin tí kjuachaxién Dios t'etōan ch'án mé ó kui tí tjeorá.

²¹ A ntá ijnko chojni jiehe yamá ch'ica t'ayakonhen ch'án ntōe ch'án kixin tí nkehe ch'onta ch'án ts'itjáyanya. ²² A ntá itsi ijnko nkexro antsí má tsehe, a ntá tsjanjonko ch'án tí ñché nchia, a ntá tsjacha tsakitsjehe tí ñché nchia kaín tí ch'ica yamá ch'án kixin imá jieexín ch'án. A ntá tí ch'ín antsí tsehe mé tsakja ch'án kaín nkehe siín ntiha. ²³ Tí nkexro titekakonhya tí janhan mé nínkakonna ch'án. A ntá tí nkexro tjinkĩtsahya tí janhan mé t'inkákonhen tí xrá t'a —ichro ch'án.

Ijnko tí nchakuen tí jínahya mé tsokjan ínaá

(Mt. 12.43-45)

²⁴ A ntá ijnko nchakuen tí jínahya tsík'axrjexín ijnko chojni na mé ixri tí nonte xamá xritjeyá nketí náxrjón ts'ok'éhe. A ntá tí k'uitjahya ntá tjenkayáxin kixin: “Áxri tsokjan ntōna k'uaxrjéxian.” ²⁵ A ntá tió kjan la éxi ijnko chojni tsík'ánjón ntōe la náxrjón tsjehe tí nkaxenhen nchia. A ntá k'uikon tí jínahya xikaha tjen nchia ²⁶ a ntá sákjuikakjín yato nchakuen tí jínahya antsí má jínahya. A ntá antsí má jínahya kónhen tí ch'ín a, a ntá tí senó la kénhyó. Mé xikaha tsonhen ijnko chojni kénhya asén tinkáchónki Dios —ichro ch'án.

Tí kjuachéhe chaxín

²⁷ Ntá ch'ín Jesús tjenixja ch'án chrónka ch'án kaín tíha ntá ijnko chojni chjin tjenkákjan tí jehe sín a itsen nixja tjan ntáchro tjan kixin:

—Chéhe tí nkexro k'uaxrjenixin tí jaha kjuíntak'ánkiá —ichro tjan.

²⁸ Ntá jehe ch'án kjuátehe ch'án ntáchro ch'án kixin: —Antsí chéhe tí nkexro tinhin tí itén Dios la ko titekaon sín —ichro ch'án.

Tí sín jínahya mé tjanchia sín ijnko kjuaxroan náxrjón

(Mt. 12.38-42; Mr. 8.12)

²⁹ Ntá nchónhya chojni sítójnoktsé sín tí tjen ch'ín Jesús ntá jehe ch'án kjuankixin nixja ch'án ntáchro ch'án kixin:

—A ntá tí chojni siín jie la jínahya sín, a ntá tjanchia sín kixin chrókjuásian ijnko kjuaxroan náxrjón. Kjánchó tsjáqoxínhya í jnko kjuaxroan la jehó tí nkehe tsíkónhen ch'ín Jonás. ³⁰ Ntá éxi yóhe kónhen ch'ín Jonás kónoxín tí sín chjasin Nínive mé xikaha tsonhen tí Xjeen Dios K'óna Chojni la ts'ikon tí chojni siín jie. ³¹ A ntá tí yaon tsitōexín ijje chojni tjejó jie la mé tí tjan reina k'uetōan kjuixín nó Sur mé ts'inkatjen tjan tsjanchia tjan jie kixin tí sín tjejó jie. Kixin jehe tjan imá kjín kjuixín tjan tsinhin tjan nkexrí imá k'uénohe ch'ín Salomón. † A ntá jie itjèn janhan antsí chonta kjuachaxin, a ntá ch'ín Salomón la kénhyó. ³² La ko tí sin chjasin Nínive kjaxin ts'inkatjen sín tió tsitōexín ijje chojni la tsjanchia sín jie kixin tí sín tjejó jie la ko tsontáchro sín kixin chrókjuasóte tí chojni tjejó jie kixin tió kuínhin tí sín Nínive chrónka ch'ín Jonás itén Dios la kjuitóxinhin sín

ntje sín. A ntá jie itjèn janhan antsí má chonta kjuachaxin, a ntá ch'ín Jonás la kénhyó.

Xrohi t'inkaséyanxín cuerpo kuènte chojni

(Mt. 5.15; 6.22-23)

³³ 'Nijnko chojni chrokjuinckek'ákjen ijnko xrohi chrókjuak'ema ch'án la ko chrókjuak'ehya ch'án chrínki ijnko ntacajón. Náhí. Noi chrókjuak'e xrohi chrókjuak'enkáya candelero kixin ts'ikonxín chojni tí t'inkaséyan. ††³⁴ Tí ikonrá mé éxi yóhe ijnko xrohi t'inkaséyanxín tí cuerpo kuèntará. A ntá tí chontará ikonrá jína la ntá kuènte cuerpo kuèntará ch'onta xrohi. A ntá tí chontará ikonrá jínahya la ntá kuènte cuerpo kuèntará la sítié tjen. ³⁵ Chrókóxakonhanrá kixin chrók'uayakonhénrá tí xrohi chontará kixin chrók'uankahya kixin chrók'uixitiéhya tí tjeorá. ³⁶ A ntá tí kuènte tí cuerpo kuèntará chróch'onta xrohi la ko nit'ō chrók'uixitiéhya la ntá kuènte la chrók'uikonrá jína la éxi ijnko lámpara kuènte ch'e xrá jína.

Ch'ín Jesús chrónka kixin ntoáhya tjako tí sín fariseo la ko tí sín tjako ley

(Mt. 23.1-36; Mr. 12.38-40; Lc. 20.45-47)

³⁷ A ntá tió kjuixin nixja ch'ín Jesús ntá ijnko ch'ín fariseo chrónóhehe ch'án tí ch'ín Jesús kixin sátsjiko ch'án ntōe ch'án sineko ch'án. Ntá tió kjuíji sín ntiha la k'uixenhen sín nchia ntá kjuák'etjāxin ch'ín Jesús chjino tjen tí mesa a. ³⁸ A ntá tí ch'ín fariseo chrakon ch'án k'uikon ch'án kixin ch'ín Jesús k'óntihya ch'án tja ch'án senó tí sine ch'án éxi tinkáchónki tí jehe sín. ³⁹ Kjánchó ñchéni ntáchro ch'án kixin:

—Jahará fariseorá nchetjóará tí ntója tí vaso la ko tí plato. A ntá nkaxenhen la tsíkaón kjuachee la ko kjuachjinoxínhin. ⁴⁰ Jahará lōntjirá. ¿A noahyará kixin tí nkexro kjuich'ena tí ntója la koí tí nkaxenhen kjuich'éna ch'án? ⁴¹ Tí chrókjuinckekjtonhénrá chojni nōa kaín asánrá tí nkehe chontará la ntá chrókóxakuanhyará tí chrók'ónti chojni o náhi.

⁴² 'Nòará jahará fariseorá. Jahará chjehérá Dios ijnko ite parte kaín kaxroan tsjiko tí nkehe sineni. A ntá tahyará kuèntá tí nkehe ntoá la ko nkexrí chrótjuèhéra Dios la ko nkexrí chrótjuèhéra kichuárá. Jína chróchjehérá Dios nkehe la ko chrók'uitjáyanyarhá tí chrókjuínkĩtsará kichuárá.

⁴³ 'Nòará jahará fariseorá. Tjinkáonrá ts'ejokjenrá tí silla náxrjón nkaxenhen njnko la ko tjinkáonrá kixin jnkojína tsonixjahará sín tió tsoxétará sín ntasin.

⁴⁴ 'Nòará jahará maestro tjákorá tí ley la ko jahará fariseorá. Ntoáhya tjenkayáxinrá ch'iará. Jahará éxi yóhe tōye tsíxravá chojni tsík'en t'ikonhya chojni la t'atsínka sín nátaón la noehya sín kixin tsíxravá chojni ntiha.

⁴⁵ A ntá kjuátehe ijnko tí maestro tjako tí ley ntáchro ch'án kixin:

—Maestro, xikaha ntáchrua la, ¿a kjaxinhya jeheni kaín ni t'ántaxinhíni ní? —ichro sín.

⁴⁶ A ntá ntáchro ch'ín Jesús kixin:

† 1 Reyes 10.1-10

†† Lucas 8.16

—Kjāxin nòará tí jahará tjàkorá tí ley. Tétuēnhénra chojni tsamá sìn ijnko nkehe imá ye chrókjuachahya chojni chrókuamá. A ntá jahará nijnko dedo tjára chrókjuinkitsará tí nkehe imá ye yámá sìn.

⁴⁷ Nòará tí jahará. Ch'énará tjàt'oe tí sìn k'uéchrónka itén Dios ósé tsík'óyán tí sìn k'uaxrjenixinrá. ⁴⁸ Xíkaha jahará tjákoxinrá kixin ó nchxon tí nkehe kjuich'e tí sìn k'uaxrjenixinrá ósé kixin jehe sìn k'óyán sìn tí nkexro k'uéchrónka itén Dios ósé. A ntá jahará ch'é-nará tjàt'oe tí tsíxravá sìn.

⁴⁹ Mé xíkaha Dios chóna kjuaxrexinkaon imá jína ntá ntáchro ch'án kixin tsochr'án ch'án chojni tsochrónka itén ch'án la ko tsochr'án ch'án chojni tsjik-jako itén ch'án. A ntá chojni ts'óyán jnkojín tí jehe sìn la ko tsochónkíhi tí í so sìn, ichro ch'án. ⁵⁰ A ntá Dios mé tsjanchia jje tí chojni síin jie kixin k'úitji iijné kaín tí sìn k'uéchrónka itén ch'án ósé desde tí xrankíxin k'óna chjasintajni ⁵¹ la mé xrankíxin k'úitji iijné ch'ín Abel la mé kjuixixín k'óyán sìn ch'ín Zacarías k'óyánxin sìn ch'án jnkosiné tí tjen tí altar la ko tí njnko. Ntá Dios sinchekjasóte ch'án tí sìn síin jie kixin xíkaha ik'uén kaín tí sìn a.

⁵² Nòará jahará maestro tjàkorá tí ley. Jahará tjinkákonhyará kixin í so chojni tsoñohe sìn tí nkehe chaxín la ni jahará tjinkákonhyará sinchexiteyará la ko tjtóéhyará kixin í so chojni chrókjuinchexiteyá sìn —ichro ch'án.

⁵³ A ntá kjuixin nixja ch'ín Jesús kaín tíha ntá tí sìn maestro tjako tí ley la ko tí sìn fariseo imá kónínkakohen sìn ch'án ntá kjuankíxin sìn kjuanchankíhi sìn ch'án nchónhya nkehe ⁵⁴ chrókjuachaxín sìn ch'án kixin ách'e ntoáhya chrókjuatehe ch'án ntá chrókjuanchia sìn jje tí jehe ch'án.

Ch'ín Jesús chrónka kixin ntoáhya ch'e tí sìn fariseo

12 A ntá nchónhya mil chojni kójnkotsé sìn ntá tinkák'íntate kichó sìn. Ntá ch'ín Jesús sáoxín kjuankíxin chénka ch'án tí sìn k'uájiko ch'án ntáchro ch'án kixin:

—Chrókuítekákonyará tí nkehe ntoáhya tjenkayáxin tí sìn fariseo ch'ia sìn, na mé éxí yóhe tí xroan nchek'ánkí niotjā tí nkehe tjako sìn. ² Kohya nkehe mó jie chrókónoxínhya chr'éxin la ko kohya nkehe tjemá jie chrókónoahya chojni chr'éxin. ³ A ntá kaín nkehe ntáchrórá tí sítié la chr'éxin tsinhin chojni tí nchakotjin; la ko kaín nkehe mó ntáchrórá k'uikjéhérá nchia la chr'éxin ts'èya sìn chrítaón nchia tsinhin kaín xín chojni.

Nkexro tí chróchrakonhenni

(Mt. 10.26-31)

⁴ Jahará chojni chónin kichó ni mé tjonkará kixin chróchrakonyará tí chojni t'óyán tí cuerpo, a ntá chr'éxin la kohya nkehe tsjacha sìn chrókjuich'e sìn. ⁵ Kjánchó tjonkará kixin nkexro chróchrakonhénra. Chróchrakonhénra Dios mé tí nkexro tsakitsje kjuachón ntá chóna kjuachaxin tsochr'án chojni tí síin

xrohi tsjasótexín sìn. Tí nkexro a mé chróchrakonhénra ch'án má.

⁶ ¿Á chrókóxinhya in'ó koxroxe yaá chichaon ntsínsi? Kjánchó Dios la ts'itjáyenhya ch'án nijnko tí jehe va. ⁷ Kjonté tí kaxihí chóna ikjára la nohe ch'án nkekjain ka chontará. Méxra chrakonhyará tí jahará kixin antsí má tjehe sínkí tí jahará. A ntá kjonté nchónhya koxroxe la kánhyó sínkí tíha.

Chróchrónkani kixin tinkáchónkini Ìnchéni Jesucristo nkayakon chojni

(Mt. 10.32-33; 12.32; 10.19-20)

⁸ Ntáxrjan kaín tíhi kixin tí nkexro tsochrónka kixin tinkáchónkina sìn nkayakon chojni la kjāxin tí Xjeen Dios K'óna Chojni tsochrónka kixin chónin ch'án tí jehe sìn nkayakon tí sìn ángel kuènte Dios. ⁹ A ntá tí sìn sinchemá sìn kixin chónhyana sìn nkayakon chojni la ntá kjāxian janhan sjntamá kixin chonhya tí jehe sìn nkayakon tí sìn ángel kuènte Dios.

¹⁰ A ntá jnkojín nkexro ts'ántaxínhin sìn tí Xjeen Dios K'óna Chojni naxa jína ts'itjāyan tí jje k'uántaxínhin sìn. A ntá tí nkexro ts'ántaxínhin tí Nchakuen Dios la xit-jahya tsjiin tí jje tí xíkaha tsixro sìn.

¹¹ Tió tsjikoará sìn nkaxenhen njnko Israel la ko tí tjejó tí sìn t'etōan la ko tí tjejó tí síxreé la tóxakuanhyará nkehe tsjateherá la ko tóxakuanhyará nkehe tsixrorá ¹² kixin tió tsonixjará la tí Nchakuen Dios sinchexraxinkaonrá nkehe tsixrorá —ichro ch'án.

Tí kjuaxikaon tsochóna chojni itsjé nkehe

¹³ Ijnko nkexro tjenkákjan tí sin tsíkójnkotsé ntáche ch'án tí ch'ín Jesús kixin:

—Maestro, ntáche tí kichó ni a kixin tsjanjon ch'án tí nkehe tónhenni tocar tsíkitohe it'eni tsakjani —ichro ch'án.

¹⁴ Ntá kjuátehe ch'ín Jesús ntáchro ch'án kixin:

—Lontia jaha. ¿Nkekuènte chrókjuich'énará juez tí janhan chrók'oxikayaha tí nkehe chrókuakjará jahará? —ichro ch'án.

¹⁵ Kjāxin ntáchro ch'án kixin:

—Tóxakonhanrá tí chróchontará itsjé nkehe. Jehya tí nchónhya nkehe chróchontará ntá náxrjón chrók'uejorá —ichro ch'án.

¹⁶ Ntá kjuíncheyóexin ch'án ntáchro ch'án kixin:

—Kjuák'e ijnko chojni rico, a ntá tí nontee ch'án na mé imá k'óna. ¹⁷ A ntá tí ch'ín rico kjuenkayáxin ch'án ntáchro ch'án kixin: “¿Nkexrí chrókjuít'a jie kixin chontahya nketí ts'ínkachjina tí noa k'ónana?” ichro ch'án. ¹⁸ Ntá kjuenkayáxin ch'án ntáchro ch'án kixin: “Ó nòna nkehe sít'a jie. Ts'oxíka tí t'inkachjinayá noa chonta ntá sít'ána ijnko antsí jie ts'inkachjinayá kaín nkehe k'ónana jie chonta. ¹⁹ Ntá tsontátjan asenná kixin: Asenni, nchónhya nkehe chonta jaha tsíchjina tsjacha nchónhya nánó. Ntá jie t'ok'áha la inte la its'ia la tócháha,” ichro ch'án. ²⁰ Kjánchó ntáche Dios tí jehe ch'án kixin: “Lontia xíkaha ichrua la, kixin ijie tie itsi nkexro tsjanchia asán. A ntá tí nkehe kjuásichjina la, ¿xá nkexro kuènte tíha?” ichro ch'án. ²¹ Mé xíkaha tsoñhen tí

nkexro chóna nchónhya nkehe chjasintajni ntihi, a ntá naxa kjueyáhya ch'án nkehe kuènte nkaya nkajni —mé ichro ch'ín Jesús.

Dios mé t'ayakonhen tí xjeen ch'án

(Mt. 6.25-34)

²² Ntá chr'éxin ntáche ch'ín Jesús tí sín k'uájiko ch'án kixin:

—Tjonkará kixin chrókóxakuanhyará tí nkehe chrókjónterá la ko tí ka chrók'uitsará. ²³ Antsí sínkí tí kjuachón, a ntá tí nkehe chrókjónterá la kánhyó sínkí. La ko antsí sínkí tí cuerpo kuèntará, a ntá kánhyó sínkí tí ka chrók'uitsará. ²⁴ Xráxinkáonrá nkexrí síin tí kontálo. T'enqahya va la ko tjáhya va la ko chóntahya va nketí ts'inkachjinayá va tí noa. Kjánchó Dios la tjanjon nkehe sine va. A ntá jahará la antsí tjetóan, a ntá tí ko xritjaka la kénhyó. ²⁵ ¿Á tjejó jnkójnra tjenkayáxinrá kixin tí chrókóxakonhanrá má ntá naxa chrók'uankirá it'ó metro ntétoxinrá ínaa? ²⁶ A ntá xitjahya chrókjuich'erá tíha kjónté ijnko nkehe ntsí, ¿a ntá nkehe tsonhen tóxakonhanrá í so nkehe síin?

²⁷ Xráxinkáonrá nkexrí sí't'ánkí tí catsjo lirio ch'ehya xra la ko tjonhya. Ntá kjónté ntáxrjan kixin tí ch'ín rey Salomón kaín ka náxrjón k'uék'inkáya ch'án naxa kjuíncheyóehya ch'án kixin antsí náxrjón tí tsjo a. ²⁸ A ntá xikaha Dios mé nchek'itsa ch'án kaín kayoa kjónté ijie síchón la ntóye tsoche, la mé xikaha tsjanjon ch'án tí nkehe chrok'uitsará jahará. ¿Ntá nkekuènte kixin naxa titekákonhyará ch'án? ²⁹ ¿Ntá nkekuènte ixrirá tóxakonhanrá xritjeyará nkehe sinterá la ko nkehe it-s'irá? ³⁰ A ntá tí chojni chjasintajni xritjeyá sín kaín tí nkehe a. Kjánchó It'ará ó nohe ch'án kixin t'ichjánxinhanrá kaín tí nkehe a. ³¹ Senó chrókjuéyará tí kjuachaxin kuènte Dios, a ntá jehe ch'án mé tsjanjon ch'án kaín nkehe t'ichjánxinhanrá.

Tí nkehe tje te síin nkaya nkajni

(Mt. 6.19-21)

³² Chrakonhyará jahará kolélo kuèntana. Kjónté tsjéhyará la It'ará tóxrjínjin ch'án tsotjáhará ch'án tí kjuachaxin kuènte ch'án. ³³ Nchekjirá kaín nkehe chontará la ntá chjeherá tí chichaon tí sín chóntahya. A ntá xikaha sich'erá la tí tjoa t'inka ch'ichakóanrá tsontaxinhya kixin tí nkehe tje te síin nkaya nkajni tsjejehya la ko ntaha kohya xichee la ko ts'ínhya kué la ko ts'itjáyanyha. ³⁴ A ntá tí nkaya nkajni tsochontará nkehe tje te la ntá tí nkehe tjenkayáxinrá la kjaxin ntaha tjen.

T'ichjánxin listo chrók'uejóchónhenni

³⁵ T'ichjánxin listo ts'ejochonhénra la ko tsjak'ekoará xrohi tjeche. ³⁶ Listo chrók'uejorá éxi chojni ch'e xra tjejóchónhen sín tsokjanxin tí lámqoe sín tí tsíkótehe chojni kixin tió tsi ch'án la ts'èya ch'án, la ntá tsakitjehe sín tí puerta tjoka. ³⁷ Náxrjón tí nkexro ch'e xra tió chrókjan tí lámqoe sín chrók'uikon ch'án kixin naxa tjejótsjehe sín. Ntá chaxín ntáxrjan kixin tí ch'ín lamo ts'etóan ch'án kixin ts'ejótjaxin sín tí tjen mesa ntiha

ntá tsjanjon ch'án nkehe sine sín. ³⁸ Kjónté chrókui ch'án k'áxrótjen ó chrókui ch'án nantóye mé xikaha chrók'uikon ch'án kixin tjejótsjehe sín la náxrjón tí sín ch'ehe ch'án xra. ³⁹ Chrókónohará tíhi kixin tí chrókónohe tí inché nchia nke hora chrókui tí xichee ntá chrókjuak'etsjehe ch'án chrókuitóehya ch'án chrók'uixenhen xichee tí ntqoe ch'án chrókueé. ⁴⁰ Ntá jahará kjaxinrá xikaha chrók'uejotsjehérá kixin titàya tsi tí Xjeen Dios K'óna Chojni.

Tí nkexro jina ch'e xra la ko tí ch'ín ch'ehya xra jina

(Mt. 24.45-51)

⁴¹ A ntá ch'ín Pedro kjuanchankí ch'án kixin: —Inchéni, ¿a jehóni kaín ni kjuíncheyóéxian nkehe ntáchrúa ó kaín chojni? —ichro ch'án.

⁴² Ntá ntáchró Inchéni kixin:

—¿Nkexro tí t'etóan tí xra jina, a ntá tí lámqoe ts'etóenhen kixin ts'ayakonhen ch'án tí chojni síin tí nchia ntiha kixin tsjanjon ch'án nkehe sine sín xintii tí hora a? ⁴³ Náxrjón tjen tí nkexro a tió tsi tí lámqoe ts'ikon ch'án kixin naxa tjech'e tí xra. ⁴⁴ Tíhi mé chaxín tsontáxrjan kixin tí ch'ín lamo tsochjéhe ch'án kaín xra chóna ch'án ts'etóan tí ch'ín a. ⁴⁵ A ntá tí ch'ín t'etóan sítonhen xra tsjenkayáxin kixin tjokahya tsokjan tí lámqoe ch'án, a ntá tsjankixin ch'án tsonínkakonhen ch'án tsjanjonko ch'án tí í so chojni ch'é xra, tí chojni ntoa la ko tí chojni chjin, a ntá jehe ch'án sine ch'án la its'i ch'án la tsokoan ch'án. ⁴⁶ A ntá tí lamo tsokjan tí yaon tjenkayáxinhya tí ch'ín ch'e xra, na mé ijnko hora noehya ch'án. A ntá imá sinchekjasóte ch'án tí ch'ín kuítóhehe xra la ntá tsjasóteko ch'án tí sín titekakonhya.

⁴⁷ A ntá tí nkexro nohe ch'án nkehe tí xra tjinkaon tí lámqoe ch'án la tóxakuenhya ch'án la titekakonhya ch'án la mé tí ch'ín a imá tsjasóte ch'án ts'ekon ch'án. ⁴⁸ A ntá tí nkexro noehya nkehe tí xra tjinkaon tí lámqoe ch'án ntá ch'e ch'án nkehe chrókjuasótéxín ch'án la kjónté kánhyó tsjasóte ch'án ts'ekon ch'án. A ntá tí nkexro k'uáyéhe nchónhya nkehe la antsí tsjé xra ts'áyéhe ch'án sich'e ch'án; la ko antsí tsjé xra tsoxranchehe tí nkexro k'uáyéhe itsjé nkehe.

Jnkoqóahya tsjenkayáxin chojni kixin ó kui Inchéni Jesús

(Mt. 10.34-36)

⁴⁹ Janhan k'uinka kixin sintak'ákjen xrohi chjasintajni. Ach'e ntáxrjan kixin ó tjechr'ákjen tí xrohi a ntá naxa náhi. ⁵⁰ T'ichjánxin nchónhya tsona tsjasótena. Tóxakonna tsoxiteyáxia kaín tíha. ⁵¹ ¿Á tjenkayáxinrá kixin k'uinkakian kjuaxróxin tí chjasintajni ní? Méxra ntáxrjan náhi. Jnkoqóahya tsjenkayáxin chojni xikaha. ⁵² Kixin ijie xrankixixín in'ó chojni naxa kjéhya jnkoqóahya tsjenkayáxin sín. Tí iní tsonínkakonhen tí yaá. Tí yaá tsonínkakonhen tí iní. ⁵³ A ntá tí it'é tsonínkakonhen tí xjeen ntoa, la ko tí xjeen ntoa tsonínkakonhen tí it'é. A ntá tí iné tsonínkakonhen tí xjeen chjin, la ko tí xjeen chjin tsonínkakonhen tí iné. Tí ich'ee tsonínkakonhen tí tikíntee la ko tí tikíntee tsonínkakonhen tí ich'ee tjan.

Tí nkehe chronkaxín nkehe tsonhen

(Mt. 16.1-4; Mr. 8.11-13)

⁵⁴ Ch'ín Jesús kjaxin ntáche ch'án tí chojni siín kixin: —A ntá ts'ikonrá ts'áya tjuí tí tjiatóxin yaon, a ntá ntáchrórá kixin ts'aniá chrin, a ntá xikaha chaxín tsonhen ts'aniá chrin. ⁵⁵ A ntá tí chjéhe xrinto nó sur ntá ntáchrórá kixin tsósóá, a ntá xikaha chaxín tsósóá. ⁵⁶ Jahará ntoáhya tjenkayáxinrá. Ó nohará tjenkayáxinrá nkexrí tsonhen nkajní la ko chjasintajni. ¿Ntá nkexrí naxá tiénxinhyará nkehe sítónhen tí tjejórá jie?

Chrókóxakonhenni kjuaxróxin chrók'uejókoní tí sín nínkakonhenni

(Mt. 5.25-26)

⁵⁷ ¿Nkekuènte tjéyáhyará jahará nkehe tí jína? ⁵⁸ Tí jnkojín nkexro tsjanchia jie sájtikoará ch'án nkayakon tí sín t'etqan na tí ntja ó chrónkakjórá ch'án kixin tsoyóxin ts'ixinhya kjuanínkaon kixin sátsjikoaahyará nkayakon tí ch'ín juez, kixin tí ch'ín juez chrók'uetqan ch'án kixin sátsjikoaará tí sín comandante. A ntá tí ch'ín comandante chróchr'áxanhanrá ch'án ntqechiso. ⁵⁹ Ntáxrjan kjá ni chrók'uaxrjéxinhyará ntiha tsjenkajjará kaín xín chichaon chonta.

T'ichjánxin chrókjuinkí chojni tí nkehe tjenkayáxin sín

13 A ntá tí yaon k'uejó iso sín chénka sín tí ch'ín Jesús kixin nkexrí kjuích'e ch'ín Pilato k'uetqan its'en iso chojni tsíkjin estado Galilea k'uitji ijnié sín kójnkojiéko tí ijnié tí ko k'óyán sín kjuanchexín sín kjuasáyé Dios. ² A ntá kjuátehe ch'ín Jesús ntáchro ch'án kixin:

—¿Á tjenkayáxinrá kixin xikaha kónhen tí sín tsíkjin estado Galilea kixin antsí jie chóna sín, a ntá tí í so sín chjasén sín la á náhí ní? ³ Ntáxrjan tíhi kjá náhí. A ntá jahará tí tjínkíhyará tí tjenkayáxinrá la kaín rá xikaha its'enrá kjaxin. ⁴ ¿Á tjenkayáxinrá kixin antsí má k'uéchóna jie tí dieciocho chojni ik'uén xrátja sín tí torre Siloé, a ntá tí í so sín chjasin Jerusalén la á náhí ní? ⁵ Ntáxrjan tíhi kjá náhí. A ntá jahará tí tjínkíhyará tí tjenkayáxinrá la kaín rá xikaha ts'itjáyanrá kjaxin.

Ch'ín Jesús kjuíncheyóexin ch'án éxí ijnko nta to higo t'ónahya to

⁶ A ntá ch'ín Jesús kjuíncheyóexin ch'án ntáchro ch'án kixin:

—Ijnko chojni chóna ijnko nta to higo nóntee ch'án. Ntá sákjuítsjehe ch'án á k'óna to. A ntá náhí k'uitjahya ch'án ninkehó to. ⁷ Ntá ntáche ch'án tí nkexro t'ayakonhen tí nonte a kixin: “Ó ní nánó t'inkatsjahá tí nta la k'uitjáhya ninkehó to higo. T'ochrínjian tí nta kixin tsoxéhe tí nonte a.” ⁸ A ntá tí ch'ín t'ayakonhen nonte kjuátehe ch'án ntáchro ch'án kixin: “Áxri, tjtóhé ijie nánó kixin sjntantá nche la ko tsjiko nchekatjehe. ⁹ A ntá tí xikaha ách'e ts'óna to. A ntá tí náhí na ntá ts'ochrínjian chr'éxin.”

Ch'ín Jesús kjuínchekitohe jína ijnko tjan níhi tí yaon t'ok'éhe chojni

¹⁰ Ch'ín Jesús kjuák'e ch'án ijnko njnko kjuakoxin ch'án ijnko yaon t'ok'éhe chojni. ¹¹ Ntiha tjen ijnko chojni chjin chóna dieciocho nánó chonta tjan ijnko nchakuen tí jínahya kjuíncheníhi tjan tjesékoá tjan xitjahya xrentoá tjan. ¹² A ntá ch'ín Jesús k'uíkon ch'án kixin xikaha tjen tjan ntá k'uíyehé ch'án tjan ntáchro ch'án kixin:

—Naná, ó kjuíinhan tí chin chonta —ichro ch'án.

¹³ A ntá jehe ch'án kjuak'etja tja ch'an chrítaón tí jehe tjan a ntá tuénxín xrentoá tjan ntá chjéhe tjan kjuasáyé Dios. ¹⁴ A ntá tí ch'ín t'etqan kuènte njnko kónínkaon ch'án kixin ch'ín Jesús kjuínchekitohe jína ijnko chojni ijnko yaon t'ok'éhe sín, ntá ntáche ch'án tí chojni a kixin:

—Siín injon yaon mé chrókónhen xra chrók'uinkará chrókuitqohará jína na jehya tí yaon t'ok'éheni chrókónhen tíha —ichro ch'án.

¹⁵ A ntá Ìnchéni kjuátehe ch'án ntáchro ch'án kixin:

—Ntoáhya tjenkayáxinrá jahará. ¿Á chrókjuasin-tankeehyará tí koxintaará la o tí kolóchoará chrókjuíkoará va ntá tí yaon t'ok'éheni ní? ¹⁶ A ntá tí tjan mé tsík'axreníxin tí ch'ín Abraham na mé ó chóna dieciocho nánó tsíkjinchenteto ch'ín Tsochren tí jehe tjan, ¿á jehya jína kjaxin chrókjuasintanká tí nkehe tsíkóntetoxín tjan tí yaon t'ok'éheni? —ichro ch'án.

¹⁷ Ntá xikaha ichro ch'ín Jesús la ntá kaín tí sín kónínkakonhen ch'án la kósuèhe sín. A ntá kaín tí chojni siín ntaha chéhe sín k'uíkon sín kaín tí kjuaxroan jie kjuakoxin tí jehe ch'án.

Kjuíncheyóexin ch'ín Jesús éxí ijnko tje ntsí kuènte nta mostaza

(Mt. 13.31-32; Mr. 4.30-32)

¹⁸ Ntá ntáchro ch'ín Jesús kixin:

—¿Nkehe tóyóexin tí t'etqan Dios tí kjuachaxin kuènte ch'án la ko nkehe jína chrókjuíntayóaxian? ¹⁹ Éxí yóhe ijnko tje kuènte nta mostaza k'uenká ijnko chojni nontee ch'án. A ntá tió k'uánkí kóyóhe éxí ijnko nta jie. A ntá tí koxroxé xritjaká mé kui va kjuích'éna va káké va chrík'á tí chaon tí nta.

Ch'ín Jesús kjuíncheyóexin éxí tí xroqan t'ánkíxin niqtja

(Mt. 13.33)

²⁰ Ntá ntáchro ch'ín Jesús inaá kixin:

—¿Nkehe chrokjuíntayóaxian tí t'etqan Dios tí kjuachaxin kuènte ch'án? ²¹ Éxí yóhe tí xroqan nchek'ánkí niqtja kjuinkíkjanxin ijnko chojni chjin ini medida harina. A ntá tí ch'o la k'uánkí.

Tí puerta tekahya

(Mt. 7.13-14, 21-23)

²² K'uátsínka ch'ín Jesús kaín chjasin hyé la ko kaín chjasin ntsíntsi nkákjako ch'án tí tan jína kixin jehe

ch'án ó sátsji ch'án chjasin Jerusalén. ²³ A ntá ijnko nkexro kjuanchankí ch'án kixin:

— Ìnchéni, zá tsjéhya tí sín tsaá? — ichro ch'án.

A ntá jehe ch'án kjuátehe ch'án ntáchro ch'án kixin:

²⁴ — Tóxakonhanrá t'ixéenxínrá tí puerta tekahya kixin nchónhya sín tjinkaon sín chrók'uixenhen sín, kjánchó tjachahya sín. ²⁵ A ntá tí ìnché nchia ts'ikjéhe ch'án tí puerta. A ntá chr'éxin jahará ts'ejorá ntója ts'èyará ts'inkará tí puerta tsontáchrórá kixin: “Tadá, takítjéhé nchia”, tsixrorá. Kjánchó jehe ch'án tsjatehe ch'án tsontáchró ch'án kixin: “Nonahya nketí k'uinkaxínrá jahará”, tsixro ch'án. ²⁶ A ntá tsjankixínrá tsontáchrórá kixin: “Kjóneni la ko k'uíni jnkokoá la ko jaha kjuákoxi-an tí ntásjinni”, tsixrorá. ²⁷ A ntá jehe ch'án tsjatehe ch'án tsontáchró ch'án kixin: “Ó ntáxrjan janhan kixin chonhya tí jahará. Tjtohérá tí janhan sájtjirá ókjé kaín tí jahará jínahya kjuích'erá.” ²⁸ Ntaha tsotsjankará la ko sintetaónrá nénorá tió ts'ikonrá kixin ch'ín Abraham la ko ch'ín Isaac la ko ch'ín Jacob la ko kaín tí sín k'uéchronkaxín itén Dios mé tjejó sín tí tjen Dios t'etóan ch'án, a ntá jahará la ts'axrjéxínrá ntója ntiha. ²⁹ Tsjixín chojni nó tjitoxín yaon la ko nó tjíatóxin yaon la ko nó norte la ko nó sur ntá ts'ejótjaxín sín tí tjen Dios t'etóan ch'án la sine sín. ³⁰ A ntá iso tí sín k'uítuenhen senó la mé ts'etóan sín, la ko iso tí sín k'uék'etóan senó la mé ts'ítuenhen sín.

T'ává ch'ín Jesús

(Mt. 23.37-39)

³¹ A ntá tí yaon a ikui iso sín fariseo ntáche sín tí ch'ín Jesús kixin:

— Sátjixian ntihi kixin ch'ín Herodes tjinkaon chrók'óyan ch'án tí jaha — ichro sín.

³² A ntá jehe ch'án kjuátehe ch'án ntáchro ch'án kixin:

— Sátjirá chenkará tí ch'ín jínahya ch'ia kixin: “Ijie la ko ntóye tsakítsje nchakuen tí jínahya la ko sintakítóha chojni níhi jína la ntá tí níxin yaon a ntá tsjixinna tí xra kuéntana,” tsixrorá. ³³ Kjánchó t'ichjánxín kixin naxa sájtjia tí jie yaon la ko ntóye la ko tí yaon chr'éxin kixin t'ichjánxín kixin ijnko nkexro chrónka itén Dios chrók'uenxín ch'án chjasin Jerusalén.

³⁴ Jerusalén, Jerusalén. Jahará t'oyánrá tí sín tjako itén Dios la chjehérá xro tí sín ichr'án ch'án ikui chrókjuínkítará. Imá itsjé veces tjínkavan chrókójnkot-sérá la chrók'uáyakonhanrá éxi ijnko cochíká mé t'ayakonhen xjeen va chrínkí kanenee va mé xikaha tjínkavan chrók'uáyakonhanrá tí jahará. Kjánchó jahará la tjínkakhayará xikaha. ³⁵ Chrókónohará kixin Dios la tsítóhe ch'án tí jahará la ts'ikonhyará tí janhan tsjixrakájia tí yaon tsontáchrórá kixin: “Jína tí nkexro kjuixín kjuachaxin ihnié Ìnchéni Dios.”

Ch'ín Jesús kjuínchekitöhe jína ijnko nkexro tsík'atjoyé kuenté

14 A ntá tí yaon t'ok'éhe sín sákjuí ch'ín Jesús ntöe ijnko ch'ín fariseo t'etóan kixin ntaha sineko sín ch'án. A ntá tí í so sín fariseo tinkáchréhe sín tsotsjehe

sín nkehe sich'e ch'án. ² A ntá ntiha ntoí chók'èxin tí tjen ch'án itjen ijnko chojni tsík'atjoyé kuenté. ³ A ntá ch'ín Jesús kjuanchankíhi ch'án tí sín maestro tjako tí ley la ko tí sín fariseo kixin:

— Zájá síin kjuachaxin sinchekitoheni jína ijnko chojni níhi tí yaon t'ok'éheni o náhi? — ichro ch'án.

⁴ A ntá jehe sín la tání sín. A ntá ch'ín Jesús sákjuíko ch'án tí ch'ín níhi la kjuínchekitöhe ch'án jína la k'uétuenhen ch'án kixin sátsji ch'án. ⁵ A ntá ntáche ch'án tí sín fariseo kixin:

— Jnkójín tí jahará chontará kolóchoará o koxintáará chrókjuítsínkáya va tóye zá senóhya chrókuakítsjetaónrá va tóye kjónté yaon t'ok'éheni ní? — ichro ch'án. ⁶ A ntá jehe sín ninkehó kjuáteehya sín kixin xikaha ichro ch'án.

Tí sín tsík'iyehé sín sátsji sín kia tsíkótöhe chojni

⁷ Ntá k'uíkon ch'ín Jesús kixin tí sín tsíkóchjina tí kia a kjuéya sín silla náxrjón ts'ejóya sín tí tjen mesa ntá kjuíncheyóexin ch'án ntáchro ch'án kixin:

⁸ — Tió jnkójín nkexro ts'iyaha sín kixin tsjasán ijnko kia tsotöhe chojni la tjéyáhya tí nta silla kuénte tí sín t'etóan kixin ách'e tsi jnkójín nkexro antsí t'etóan ⁹ a ntá tí nkexro k'uíyghará yóirá itsi ch'án tsjanchará ch'án kixin t'inkátjenxian tí tjen jaha méhe kixin ntaha tsjak'e í jnko nkexro, tsixro ch'án. Ntá tsosuaaha sátsjia tsjak'etjaxian tí silla kjuixín. ¹⁰ Íchá jína tió t'iyaha sín chrókjuak'etjaxian tí silla tjetuanhya, kixin ntá chrókui tí ch'ín tsík'iyaha tsontáchró ch'án kixin: “Jína tjoni la t'atsínka tjak'etjaxian tí silla antsí náxrjón”, kixin ntaha tsjikosáyaha sín nkayakon kaín tí sín ts'ejótjaxínkoa sín ntiha. ¹¹ Kixin tí nkexro sinchekitöhe asén kixin imá chrók'uétóan ch'án la mé chr'éxin Dios tsjanjonhya kjuachaxin kixin ts'etóan ch'án. A ntá tí nkexro k'uék'etóanhya la mé chr'éxin Dios tsjanjon kjuachaxin kixin antsí ts'etóan ch'án.

¹² Kjaxin ntáche ch'án tí nkexro tsík'iyehé ch'án kixin:

— Tió tsjásian kia it'ó yaon la o tsonjin la t'iyéehya tí sín choxian la ko tí sín kichuá la ko tí sín naxa kjéhya la ko tí sín rico chjino ntöa, kixin jehe sín la chr'éxin ts'iyaha sín inaá la xikahó la ó kjuixín kjan tí k'uiyehé sín. ¹³ Íchá jína chrók'uiyehé tí sín nòla la ko tí sín tsixénká toté sín la ko tí sín xitjahya tji la ko tí sín t'ikonhya. ¹⁴ Ntá chrókócháha jaha kixin jehe sín xitjahya ts'iyaha sín tsjasin sín kia. A ntá tió tsoxechónjian tí sín jína la mé Dios mé tsjenkaha kixin kjuínkítsa tí jehe sín.

Ch'ín Jesús kjuíncheyóexin ch'án éxi ijnko kia jié

¹⁵ A ntá kuínhin ijnko tí sín tjejótjaxín sín chjino tí mesa, a ntá ntáche ch'án tí ch'ín Jesús kixin:

— Náxrjón tí sín sine niotja tí tjen Dios t'etóan ch'án — ichro ch'án.

¹⁶ Ntá ntáchro ch'ín Jesús kixin:

— Ijnko chojni kjuasin ijnko kia jié ijnko kónjín la k'uiyehé ch'án nchónhya chojni tsi sín tí kia a. ¹⁷ A ntá ó kuichjina tí hora sine sín ntá k'uétuenhen ch'án ijnko

chojni ch'ehe ch'án xr̄ tsjichenka ch'án kaín tí sín ó tsík'iyeh̄e ch'án kixin chrókóchjina sín kixin ó tje-jóchónhen kaín nkehe sine sín. ¹⁸ Ntá kaín sín kjuankíxin sín chrónòda sín kixin xitjahya tsjiji sín sine sín. A ntá tí ch'ín s̄oxín kjuítsjehe ch'án ntáchro ch'án kixin: "Na ntá k'ueñani ijnko nonteeni la t'ichjánx̄in tsjitsjeheni la xitjahya tsjijini tí t'iyeh̄eni ch'án, ntá chénka ch'án kixin chrókónínkakuenhyani ch'án", ichro ch'án. ¹⁹ A ntá í jnko ch'ín ntáchro ch'án kixin: "Na ntá k'ueñani in'ó yunta koxinta, a ntá t'ichjánx̄in tsotsjeheni á jina ch'e va xr̄, ntá chénka ch'án kixin chrókónínkakuenhyani ch'án", ichro ch'án. ²⁰ A ntá í jnko ch'ín ntáchro kixin: "Na ntá kóteheni, méxr̄ xitjahya tsjijini", ichro ch'án. ²¹ Ntá ó kjan tí ch'ín ch'e xr̄ chénka ch'án tí ch'ín lámo kaín tí nkehe tsintáchro sín. A ntá tí ch'ín lámo kuínhin ch'án x̄ikaha la ntá kónínkaon ch'án ntá ntáche ch'án tí ch'ín ch'ehe ch'án xr̄ kixin: "Tjoka s̄átjia kaín nt̄ia ch-jasin i la tsjioa ntihi tí sín nòda la ko tí sín tsixénká toté sín la ko tí sín xitjahya tji la ko tí sín t'ikonhya", ichro ch'án. ²² A ntá chr'èx̄in ntá kjan tí ch'ín ch'e xr̄ chénka ch'án tí lámo kixin: "Ó kjuínchexiteyáni x̄ikaha kuétuenhenni la kjónté n̄ax̄a xr̄anka chrókui chojni", ichro ch'án. ²³ A ntá tí ch'ín lámo ntáche ch'án tí ch'ín ch'ehe ch'án xr̄ kixin: "S̄átjia kaín nt̄ia jié la ko kaín nt̄ia ntsí la tétuenhén chojni siín chrókui sín chrók'uixixenhen nchia nt̄ona n̄ax̄a xr̄anka. ²⁴ Kixin ntáxr̄jan kixin nijnko tí sín k'uíȳah̄a senó chrókui sín chrókjone sín tí nkehe chrótjah̄a sín", ichro ch'án.

Ixr̄ tsochrèh̄eni Cristo

²⁵ Nchónhya chojni nkáchrèh̄e sín tí ch'ín Jesús, ntá jehe ch'án kuinkátjía ch'án kotónhen ch'án ton ch'án ntáchro ch'án kixin:

²⁶ —A ntá jnkojín chojni tsotjinkaon tsochrèh̄e tí janhàn la āntsí má tjetòan chrótjūana sín la kjónté kénhyó chrótjuèhe it'é sín la ko ìné sín la ko ichjién sín la ko xjeen sín la ko kichó sín ntoa la ko kichó sín chjin la ko kjónté kénhyó chrótjuèhe āsén sín. A ntá náhi la xitjahya ts'óna discípulo kuènt̄ana jehe sín. ²⁷ Tí nkexro tsamáhya tí ntacruz kuènte sín tsochrèhya sín tí janhàn la xitjahya ts'óna discípulo kuènt̄ana. ²⁸ A ntá jnkojín tí jahará chrókjuich'énar á jnko t̄jat'ò nt̄eto, çá senóhya chrókjuenkayáxinrá kixin nkekjaín chichaon ts'ichjánx̄in ts'ixenhen chrótsjehérá á nchoxon chrókjuixixín chrók'ónaxín tí t̄jat'ò a? ²⁹ A ntá tió ts-jankíxinrá s̄ich'énar á tí t̄jat'ò ntá chr'èx̄in xitjahya tsjix-in s̄ich'énar á, ntá kaín chojni ts'ikon sín tsjanoárá sín ³⁰ tsontáchro sín kixin jaha kjuankíxian kjuich'éna, a ntá jie xitjahya s̄inckekjixian ts'óna, tsixro sín. ³¹ A ntá jnkojín tí ch'ín rey t'et̄oan tsjanjonko í jnko rey t'et̄oan k̄j̄axin násenó chrókjuenkayáxin ch'án kixin ite mil soldado chóna ch'án, á chrókjuacha ch'án chrókjuach̄ax-in ch'án tí kán mil soldado chóna tí í jnko ch'ín t'e-t̄oan. ³² A ntá ti chrókjuachahya ch'án chrókjuanjonko ch'án tí í jnko ch'ín rey, ntá n̄ax̄a ikjín tjen ch'án la íchá jina chróchr'án ch'án jnko nkexro tsochronóeh̄e ch'án kixin chrók'uixinhya kjuanínkaon. ³³ Mé x̄ikaha jnkojín

tí jahará tí ts̄it̄oéhyará kaín nkehe ntoáhya tjenkayáxin-rá xitjahya ts'óna discípulo kuènt̄ana.

Tí x̄ijnta tsík'ánkèhé tí jní

(Mt. 5.13; Mr. 9.50)

³⁴ A ntá jina tí x̄ijnta, kjánchó tí chrók'uánkèhé tí jní la ntá xitjahya chrókójni inaá. ³⁵ Ntá tí x̄ikaha la ni tí nche xitjahya tsjiko la chrók'ónahya nkehe la chrok'uitjini ntója. Tí nkexro tjinkaon chrókuinhin la chrókuinhin kaín tíhi —ichro ch'in Jesús.

Kjuíncheyóexin ch'ín Jesús éxí ijnko kolélo tsik'itjayan

(Mt. 18.10-14)

15 Kaín tí sín nchekjènkj̄ la ko tí sín chóna nchónhya jié kóchjinehe sín tí ch'ín Jesús kixin tjinkaon sín chrókuinhin sín tí nkehe tjechronka ch'án. ² A ntá tí sín fariseo la ko tí sín maestro tjako tí ley kjuankíxin sín tjonta sín ch'án ntáchro sín kixin:

—Tí ch'ín i la kjónté tí sín chóna nchónhya jié la t'ito ch'án la ko neko ch'án —ichro sín.

³ Ntá ch'ín Jesús kjuíncheyóexin ch'án ntáchro ch'án kixin:

⁴ —A ntá jnkojín tí jahará, tí chontará ijnko ciento kolélo ntá chrók'uitjayan ijnko va, çá chrókuit̄oéhyará tí noventa y nueve va tí nteje ó, a ntá á chrókjuikjéyáhyará tí ko tsík'itjayan hasta chrók'uitjajará va ní? ⁵ A ntá tí ts'itjjará va ntá tsamárá va tsöchah̄ará. ⁶ Ntá tió tsokjanrá nt̄oará ntá ts'iyehérá kaín tí sín choxinrá tjórá jina la ko tí sín chjinaxón nt̄oará ntá tsontácherá sín kixin: "Tsöchéh̄eni ts'ejóni jie kixin ó k'uitj̄á tí kolélo tsík'itjayan." ⁷ Na mé k̄j̄axin x̄ikaha tsotjonkará kixin āntsí tsöchéh̄e kaín tí sín siín nkaya nkajni tió ijnko chojni tsít̄ohe kaín tí jie tsíkjenkayáxin ch'án. Ntá kánhyó tsöchèxin tí sín nkaya nkajni kixin tí noventa y nueve chojni jina t'ichjánx̄ienhya chrókjuinkí sín tí nkehe tjenkayáxin sín.

Kjuíncheyóexin ch'án éxí chichaon k'uitjayan

⁸ A ntá ijnko chojni chjin chóna ite chichaon, a ntá tí chrókjuinckek'itjayan tjan ijnko tí chichaon a la, çá chrókjuinckek'ákjenhya tjan xrohi kixin chrókjuéyáxin tjan la ko chrok'uánjón tjan tí nchia kixin chrótsjehe tjan jina hasta chrók'uitjajia tjan? ⁹ A ntá tió chrók'uitja tjan la ts'iyeh̄e tjan kaín tí chojni chjin jina tjo tjan la ko tí sín chjinaxón nt̄ohe tjan la ntá tsontáche tjan sín kixin: "Tsöchéh̄eni ts'ejóni kixin ó k'uitjani tí chichaon kjuínckek'itjayanni." ¹⁰ Ntá k̄j̄axin x̄ikaha tsotjonkará kixin imá tsöchéh̄e kaín tí sín ángel kuènte Dios tió ijnko chojni tsít̄ohe kaín tí jie tsíkjenkayáxin ch'án.

Ch'ín Jesús kjuíncheyóexin ch'án éxí ijnko ch'ín kuicháxinhin chichaon

¹¹ K̄j̄axin ntáchro ch'ín Jesús kixin:

—Ijnko nkexro chóna yaá xjeen ch'án. ¹² A ntá tí ch'ín tsoyo ntáche ch'án tí it'é ch'án kixin: "It'èni, chjehéni kaín nkehe chróchjehéni." A ntá tí it'é sín k'óchrít'oghe ch'án tí nkehe chóna ch'án. A ntá tí ch'ín

tsoyo k'uáyéhe tí nkehe kuènte ch'án. ¹³ A ntá kánhyó tsjé yaon chr'éxin tí xjeen ch'án tsoyo kjuínchekji ch'án kaín nkehe tsík'áyéhe ch'án, ntá sákjuíko ch'án tí chichaon sákjuí ch'án ókjé chjasin kjín. A ntá ntiha kjuínchexénhen ch'án kaín chichaon chóna ch'án kixin jehya tí jína kjuích'e ch'án. ¹⁴ A ntá tió kjuixin kjuéhe ch'án tí chichaon kuicháxinhin ch'án ntá xrinahya kókjinta tí chjasin ntiha ntá kohya nkehe sine kaín sín. A ntá jehe ch'án kjuankixin ch'án t'énxin ch'án kjinta. ¹⁵ Ntá jehe ch'án sákjuíkjeýá ch'án xra sich'e ch'án. Ntá chjasin ntaha tjen ijnko ch'ín kjuanchehe ch'án xra. Ntá tí ch'ín a kjuanjon ch'án xra ntá k'uetqan ch'án kixin sátsji ch'án nontee ch'án kixin ntiha ts'ayakonhen ch'án cochíno. ¹⁶ A ntá jehe ch'án t'énxin ch'án kjinta ntá tjinkaon ch'án chrókjóne ch'án tí nkehe ine tí cochíno kixin ninkexró tí ntiha chrohya tsjanjon nkehe sine ch'án. ¹⁷ Ntá jehe ch'án kjuák'e ch'án kjuenkayáxin ch'án kixin: "Nchónhya chojni síin ntqe t'aná ch'e sín xra la chóna sín nkehe sine sín. Ntá janhan tjét'énxian kjinta ntihi. ¹⁸ Ntá jie tsokjan tí tjen t'aná la ntá tson-táxrjan kixin: It'éni, kjuasinni jie kuítekakuenhya It'éni nkaya nkajní la ko kjuasinhanni jie kuítekakuanhyani tí jaha. ¹⁹ Tósuèheni tsontáchrúa kixin xjaan tí jeheni. Ch'énani éxi ijnko chojni t'aha xra", mé xikaha kjuenkayáxin ch'án tsontáchrú ch'án. ²⁰ Ntá kuákja ch'án ntja xrakoa ch'án tí ntqe it'é ch'án.

A ntá kjónté naxa kjín kui ch'án a ntá tí it'é ch'án la ó tsík'ikon ntá kuikonóhe ch'án tí xjeen ch'án. Ntá kuínka ch'án la kjuíxinhin ch'án ntja la kjóa ch'án la ko kjóneko ch'án kochíto. ²¹ Na ntá ntáchrú tí xjeen kixin: "It'éni kjuasinni jie kuítekakuanhyani Dios la ko kjuasinhanni jie kuítekakuanhyani tí jaha. Tósuèheni tsontáchrúa kixin xjaan tí jeheni", ichro ch'án. ²² A ntá tí it'é ch'án k'uíyehé ch'án tí sín ch'ehe ch'án xra ntáchrú ch'án kixin: "Xrákoará tí ka antsí jína nchek'inkáyará ch'án la ko chr'axenhenrá dedo tja ch'án ijnko koch'áninko la ko nchekjankará ch'án totjoa. ²³ La ko tjicakjínra koxintáxjan tsanká la t'oyánra va kixin sinekoni ch'án tsjasiñhinni ch'án kia. ²⁴ Kixin tí xjanna i la éxi ó tsík'en ch'án xikaha ntá jie la éxi ó xechón ch'án la tsík'itjáyan ch'án la ntá jie la ó kónoxín ch'án inaá", ichro ch'án. Ntá kjuankixin sín kjuasin sín kia.

²⁵ A ntá tí xjeen ch'án saó la nonte tjech'e ch'án xra. A ntá tió kjan ch'án kui ch'án chjinaxón nchia ntá kuínhin ch'án síin són la ko ité sín. ²⁶ Ntá k'uíyehé ch'án ijnko ch'ín ch'e xra ntá kjuanchankíhi ch'án kixin nkekuènte xikaha sítónhen. ²⁷ A ntá tí ch'ín a ntáchrú ch'án kixin: "Kíchuá la ó tsíkjan. A ntá it'á la k'uetqan k'uén koxintáxjan tsanká kixin jína xikjan ch'án", ichro ch'án. ²⁸ A ntá tí ch'ín saó la kónínkaon ch'án chrohya ch'án ts'ixenhen ch'án nchia. A ntá tí it'é ch'án k'uaxrjexín nchia chrónóhe ch'án kixin chrók'uixenhen nchia. ²⁹ Kjánchó jehe ch'án kjuátehe ch'án ntáche ch'án it'é ch'án kixin: "Nchónhya nánó t'ahani xra, la xráxín kuítekakonhanni kaín nkehe kuétoan la kjuánjonhya nijnko koténtsó chrókjónekoni tí sín chóxinni. ³⁰ A ntá jie ikui tí xjaan i kjuínchek'itjáyan ch'án kaín nkehe chjehé ch'án kjuínchek'itjáyanxín ch'án chojni

chjin. A ntá jie ikjan ch'án la naxa t'oyán koxintáxjan tsanká", ichro ch'án. ³¹ A ntá ntáchrú tí it'é ch'án kixin: "Xjeenni jaha, xráxín tjejóko kichó ni ntihi. Kaínxín nkehe kuèntana la kuènta jaha kjaxin. ¿Nkekuènte ninkávan? ³² A ntá jie la t'ichjánxin tsjasiñhinni kíchuá kia tsochéheni kixin éxi tsík'en ch'án la ntá jie la ó tsíxechón, la tsík'itjáyan ch'án xikaha la ntá jie la kónoxín ch'án inaá."

Ch'ín Jesús kjuíncheyóexin ch'án éxi tí ch'ín k'uáyéhe xra la ntá kjuích'ehya xra jína

16 Kjaxin ntáche ch'ín Jesús tí sín k'uájiko ch'án kixin:

—Kjuák'e ijnko ch'ín lamó ricó chóna ch'án ijnko nkexro chjéhe ch'án kjuachaxin kixin ts'etqan tsonhen xra. Ntá kui ijnko nkexro chénka tí lamó kixin: "Tí nkexro t'etqan nchexénhen ch'án tí nkehe chonta", ichro ch'án. ² A ntá tí ch'ín lamó k'uíyehé ch'án tí ch'ín ch'ehe ch'án xra ntáche ch'án kixin: "¿Á chaxín xikaha ch'e kixin xikaha ichro sín? A ntá jie tsjánjuan jaha kuentá tí xra kjuích'e kixin ijie í sich'ehya xra tsétoan ntihi", ichro ch'án. ³ A ntá tí ch'ín t'etqan tónhen xra kjuenkayáxin ch'án kixin: "¿Nkehe chrókjuit'a jie kixin tí lamó la í tsjanjonhya ch'án xra sit'a? La ko janhan la chontahya fuérza sit'a xra nontee chojni la ko tósuàna kixin chrók'uájia chrókjuañchák'á nkehe. ⁴ Ó nòna nkehe sit'a kixin ntá tsochonta nkexro tsjanjon kjuachaxin tsjak'é ntqe sín tí í tsochontahya xra sit'a", ichro tí ch'ín t'etqan. ⁵ Ntá k'uíyehé ch'án jnkojnko jnkojnko tí sín síkéhe tí lámqe ch'án. A ntá tí ch'ín saó kui ntá tí ch'ín t'etqan mé kjuanchankíhi ch'án kixin: "¿Nkekjaín tjasikéhe lámqeni?" ichro ch'án. ⁶ A ntá jehe ch'án kjuátehe ch'án ntáchrú ch'án kixin: "Síkani ijnko ciento ntabarril aceite", ichro ch'án. A ntá tí ch'ín t'etqan ntáchrú ch'án kixin: "Ntihi tjen xroon tsjénkaxian a. Tjak'e nonte tjoka la ch'éna í jnko xroon la í cincuenta ó ténixián", ichro ch'án. ⁷ Ntá chr'éxin la kjuanchankíhi ch'án í jnko nkexro kixin: "A ntá jaha, ¿nkekjaín tjasiká?" ichro ch'án. Ntá ntáchrú ch'án kixin: "Ijnko ciento medida noatrigó síkani", ichro ch'án. A ntá ntáchrú tí ch'ín t'etqan kixin: "Tí xikaha la ntihi tjen tí xroon tsjénkaxian. A ntá jie la ch'éna ochenta ó", ichro ch'án. ⁸ A ntá tí ch'ín lamó kjuátsoan ch'án kixin kjónté jehya xra jína kjuích'e tí ch'ín t'etqan kjuích'ehe ch'án xra la kjánchó tí kjuích'ia ch'án la antsí nohe ch'án kjuích'ia ch'án. Méxra tí sín chjasintajni antsí nohe sín ch'iyehe kichó sín, a ntá tí sín ixri tí t'inkaséyan la xikahya chrókjuenkayáxin sín chrókjuech'ia sín, chrókjuenkayáxin sín tí jína.

⁹ Janhan la tétuñhanrá kixin chrókuicháxinhanrá tí chichaon síin chjasintajni kjónté tjuáhya kixin tsjínkit-sará chojni kixin ntá itsjórá sín jína. A ntá tió tsjeje kaín chichaon ntá jehe sín ts'ejóchónhen sín nkaya nkajní ts'áyáhará sín jnkochríxín.

¹⁰ Tí nkexro k'uáyakonhen tí nkehe chóna kjónté tsjéhya la kjaxin chrókjuaacha chrók'uáyakonhen itsje nkehe chróchóna. A ntá tí nkexro kjuachahya k'uáyakonhen tí nkehe tsjéhya chóna la kjaxin

chrókjuachahya chrók'uáyakonhen tí tsjé nkehe chróchónta ch'án. ¹¹ Mé xíkaha tí xitjahya t'ayakonhén-rá tí chichaon kuènte chjasintajni ntiho la, ¿ntá nkexrí chrók'uayéhérá nkehe tjete chaxín kuènte nkaya nkajní? ¹² Mé xíkaha tí kjuachahyará k'uáyakonhén-rá tí chichaon kuènte ókjé nkexro, ¿ntá nkexro chrórtjáhará jahará tí nkehe chaxín tjete chrók'uáyakonhén-rá?

¹³ Nijanko nkexro xitjahya sich'ehe yaá lamó xrá kixin ijanko la tsonínkakonhen ch'án la ko tí í jnko tsotjuèhe ch'án, o ijanko la tsitekakonhen ch'án, la tí í jnko la tsitekakuenhya ch'án. Xitjahya chrókjuich'ehe chojni xrá Dios tí tjinkaon sín tsochónta sín itsjé chichaon —ichro ch'án.

¹⁴ A ntá tí sín fariseo imá kóxrjínhjn sín chichaon, ntá kuínhin sín kaín tíha nkerí ichro ch'ín Jesús, ntá kjuanoá sín ch'án. ¹⁵ Na ntá ch'ín Jesús ntáche ch'án sín kixin:

—A ntá jahará tjinkáonrá chrók'uejójnra jína nkayakon chojni. A ntá Dios la chóxin ch'án asánra. A ntá tí nkehe imá tóxrjínhjn ch'e chojni la Dios la tóxrjénhya ch'án.

Tí ley la ko tí t'etqan Dios tí kjuachaxin kuènte ch'án

¹⁶ Naxá kjuakohya ch'ín Juan la k'uékjako sín tí ley kuènte ch'ín Moisés la ko tí nkehe k'uékjin tí sín k'uéchronka itén Dios ósé. A ntá kui ch'ín Juan la chrónka ch'án tí tan jína nkexrí ts'etqan Dios tí kjuachaxin kuènte ch'án ntá kaín chojni imá tjinkaon sín chrókjuacha sín chrók'uejójnra sín tí tjen Dios t'etqan ch'án.

¹⁷ Antsí xrahya chrók'uitjáyan tí nkehe siín nkajní la ko chjasintajni. A ntá xitjahya kixin chróxiteyáhya kjónté ijanko nkehe ntsí t'etqan tí ley.

Ch'ín Jesús tjako ch'án kixin chrókjuákehya kichó chojni

(Mt. 19.1-12; Mr. 10.1-12)

¹⁸ A ntá ijanko chojni tsjakéhe ichjién la ntá tsakja ch'án í jnko chojni chjn la ijié tíha. A ntá tí ch'ín tsakja ijanko tjan tsíkítsinkehe la kjaxin ijié tíha.

Tí ch'ín rico la ko tí ch'ín Lázaro

¹⁹ Ntá kjuák'e ijanko ch'án imá rico ch'án la ko k'uítsá ch'án ka imá tjete náxrjón kjátse tié la ko kaín yaon kjuasin ch'án kia. ²⁰ A ntá ntója ntqé ch'án kjuák'etjax-jn ijanko ch'ín nò mé it'in ch'án Lázaro tjanchak'á ch'án la ko níhi ch'án tsíchr'enka kuenté ntqé ch'án. ²¹ A ntá tí ch'ín nò la imá kjuak'e asén ch'án chrókjóné ch'án la ko chrókókjéxín ch'án tí nkehe tot'q' tsjixènjinkixin mesa kuènte tí ch'ín rico. A ntá tí konjá la kjuamá va tí tosóa chónka ch'án. ²² A ntá ijanko yaon mé ik'uén tí ch'ín nò. A ntá tí sín ángel mé sákjujiko ch'án tí náxrjón tjen ch'ín Abraham. La ko kjaxin ik'uén tí ch'ín k'uéríko la sákjuíkjává sín ch'án. ²³ Ntá tjen ch'án tí sátsji tí sín tsík'en tjetjasóte ch'án. Ntá konta ch'án k'uíkon ch'án kixin ikjín náxrjón tjen ch'ín Abraham tjeko ch'án tí ch'ín Lázaro. ²⁴ Ntá k'uèya

tí ch'ín k'uéchónta tsjé nkehe ntáchro ch'án kixin: “It'eni Abraham, tikonóana tétuènhén tí ch'ín Lázaro kixin sinchekjataxín ch'án kóhe dedo tja ch'án intá ntá tsi ch'án tsjak'etak'á ch'án nejen kixin tsoxruéhe kixin tjinahya sóa tí xrohi siín ntihi”, ichro ch'án. ²⁵ Kjánchó ntáchro ch'ín Abraham kixin: “Xjeenni, xráxinkávan kixin tió kjuák'e chjasintajni na ó k'uayéhé itsjé nkehe náxrjón. A ntá ch'ín Lázaro mé k'uayéhe ch'án nkehe náxrjónhya. A ntá jie ntihi kjuaxróxin tjen ch'án, a ntá jaha tjetjasótia méhe. ²⁶ A ntá kjaxin jnkosiné tjen tsaka imá jie xitjahya ts'átòye tí sín siín ntihi tsjihya sín tí tjen jaha la ko kjaxin tí sín siín méhe xitjahya ts'átòye sín itsji sín ntihi”, mé ichro ch'ín Abraham. ²⁷ A ntá tí ch'ín k'uéríko mé ntáchro ch'án kixin: “Ntá xrjanógha jaha It'eni Abraham kixin tétuènhén tí ch'ín Lázaro sátsji ch'án ntqé t'aná ²⁸ kixin ntaha kuítqhe in'ó tí sín kichiná, ntá chróchenka ch'án sín kixin chrókuihya sín ntihi chrókjuasótehya sín kixin imá náxrjónhya ntihi”, mé ichro ch'án. ²⁹ Kjánchó kjuátehe ch'ín Abraham ntáchro ch'án kixin: “Ó chónka sín tí nkehe tsíkjin ch'ín Moisés la ko tí sín k'uéchronka itén Dios ósé a. Chrókuinhin sín tí nkehe tsíntáchro tí sín a”, ichro ch'án. ³⁰ Ntá ntáchro tí ch'ín a inaá kixin: “Náhi, It'eni Abraham. Chrókójina sáchrókjuitsjehe ijanko chojni tsík'en ntá chrókuitekaon sín chrókuítqhe sín ijié sín”, ichro ch'án. ³¹ Ntá ntáchro ch'ín Abraham kixin: “Tí tsitekakonhya sín tí nkehe tsíntáchro ch'ín Moisés la ko tí nkehe tsíntáchro tí í so sín tsíchronka itén Dios ósé, ntá kjaxin tsitekakonhya sín kjónté chróxechón ijanko chojni tsík'en chrókjuichronka inaá”, ichro ch'án.

Tí kjuaxikaon naxá tjasin chojni jie

(Mt. 18.6-7, 21-22; Mr. 9.42)

17 Ch'ín Jesús ntáche ch'án tí sín k'uájiko ch'án kixin:

—Xráxín siín nkehe tsjasixín chojni jie. Kjánchó nò tí nkexro tjasin tí nkehe tsjasixín chojni jie. ² Íchá jína chrókjuincheteyá sín ch'án ijanko xro tsík'óna xrochre chrókjuikákánki sín ntayaon kixin tjasin ch'án tí nkehe tjasixín jie ijanko chánjan naxá noehya. ³ Tóxakonhanrá kixin xíkahya chrókjuásinra nkehe.

A ntá tí kichuára chrókjuasinhanrá ch'án ichrén jie chrónixjehérá ch'án chróchenkará ch'án kixin jehya jí-na tí xíkaha kjuít'ahará ch'án. A ntá tí chrókuitekaon ch'án chrókjuitoxinhin ch'án tí tjenkayáxin ch'án, ntá chrók'uitjáyanhanrá tí nkehe kjuít'ahará ch'án. ⁴ Kjónté chrókjuasinhanrá ch'án jie yato veces jnkokóá yaon la ko yato veces chróntáchro ch'án kixin í xíkahya tsjasin ch'án jie inaá, la t'ichjánxin ts'itjáyanhanrá tí nkehe kjuít'ahará ch'án tí xíkaha ntáchro ch'án.

Tí kjuachaxin chóntani kixin tinkáchónkini Cristo

⁵ Ijanko yaon tí sín k'uájiko Ìnchéni ntáche sín ch'án kixin:

—Tjínkítsani kixin antsí chrókuinkáchónkini tí jaha —ichro sín.

⁶ A ntá Ìnchéni ntáchro ch'án kixin:

—Kjónté intsí chrókuinkachónkirá tí janhan éxi jíéxin ijnko tje ntsí kuènte nta mostaza la jína chrókuétuēnhénrá tí nta sicómoro kíxin chrók'uaxrjenkíxin tí tjen ntihi sáchrókjui chróxenkaxín jnkosiné ntayaon ntiha, a ntá tí nta la chrókjuinchexiteyá tí xíkaha chrón-táchrorá.

Nkexrí chrókjuinchexiteyá tí nkexro ch'e xra

⁷Jnkojín tí jahará tí chróchontará ijnko nkexro t'ahará xra, a ntá tí chrókjanxín ch'án nontaará kjuínchenta ch'án nche o k'uàyakonhen ch'án tí ko kuèntará, ¿á chróntácherá ch'án kíxin senó chrókjuak'e ch'án chrókjóné ch'án? ⁸Kjá náhi. Kjá chrókuétuēnhénrá ch'án kíxin senó chrókjuinchechján ch'án tí nkehe sinte la ko chrókóyaxínhin ch'án kíxin tsjanjon ch'án nkehe nachrohe chrókjonte la ko chrók'uia. A ntá tsjixin sinte la ntá tsjak'e ch'án sine ch'án la ko its'i ch'án. ⁹¿Á chrókjuancheherá ch'án kjuasáya kíxin kjuínchexiteyá ch'án tí nkehe kuétuēnhénrá ch'án? Kjá náhi. ¹⁰Mé kjaxin xíkaha tí jahará tió chrókjuixin kaín tí xra k'uətuəhanhá Dios chrón-táchrohyará kíxin jína kjuich'erá xra kíxin ó jehó tí nkehe k'uituanhanhá kjuinchexiteyará, tsixrorá.

Ch'ín Jesús kjuínchekitōhe ch'án jína ite chojni chóna chinlepra

¹¹Ntá sátsji ch'ín Jesús chjasin Jerusalén ntá k'uátsínka ch'án nó estado Samaria la ko estado Galilea. ¹²Ntá kjuíji ch'án ijnko chjasin ntsí ntá xeta ch'án ite chojni ntoa nihi chóna sín chinlepra. Kjánchó ikjín tjejóchónhen sín ¹³ntá itsen k'uíyēhe sín ch'án ntáchro sín kíxin:

—Jesús, Maestro, tikonóehéni kaín ni —ichro sín.

¹⁴Ntá k'uíkon ch'ín Jesús tí jehe sín ikjín tjejó sín ntáche ch'án sín kíxin:

—Sátsjirá tjákohérá tí sín nchət'á kíxin ó kuítōhará jína, ichrorá.

Nachrohe sákjuí sín tinkákitōhe sín jína. ¹⁵Ntá ijnko tí jehe sín tió kónohe ch'án kíxin kuítōhe ch'án jína ntá kjan ch'án chjéhe ch'án kjuasáya Dios la itsen nixja ch'án. ¹⁶Kjuák'exín toch'ín ch'án chrínkí toté ch'ín Jesús k'uísén ch'án xrákjanyani ch'án nonte kíxin kjuanchia ch'án kjuasáya. A ntá tí ch'ín a mé tsíkijixín ch'án estado Samaria. ¹⁷A ntá ch'ín Jesús ntáchro ch'án kíxin:

—¿Xá jehya ite chojni kuítōhe jína? ¿Xá kjá tí sín ina?

¹⁸¿Á jehó tí ch'ín i kjónté ikjín tsíkijixín ch'án ikjan ch'án kjuanchehe ch'án kjuasáyé Dios ní? —ichro ch'án.

¹⁹A ntá ntáche ch'án tí ch'ín a kíxin:

—T'ínkatjen sátsja. Kíxin tí kuítékávan Dios la kuítōha jína —ichro ch'án.

Itsí tí kjuachaxién Dios

(Mt. 24.23-28, 36-41)

²⁰A ntá tí sín fariseo kjuanchankíhi sín tí ch'ín Jesús kíxin nkesá tsi tí kjuachaxin kuènte Dios. A ntá jehe ch'án kjuátēhe ch'án ntáchro ch'án kíxin:

—A ntá tí tsi kjuachaxin kuènte Dios la me tíha ijnko nkehe xitjahya ts'ikon chojni. ²¹Xitjahya tsontáchrórá kíxin: “Ntihi tjen,” o “Ntiha tjen”; kíxin tí kjuachaxin kuènte Dios itjen jnkosiné tí tjejorá —ichro ch'án.

²²Ntá ntáche ch'án tí sín k'uájiko ch'án kíxin:

—A ntá itsí tí yaon tsotjinkáonrá jnkojín yaon chrók'uikonrá tí Xjeen Dios K'óna Chojni, ntá í ts'ikonhyará ch'án. ²³Tsontáchro sín kíxin ntihi tjen ch'án, o ntiha tjen ch'án. Kjánchó sáchrókjuihyará la ko chróchréhyará sín. ²⁴Kíxin éxi ts'ikonrá tsjonkíxín ts'inkaséyanxín kuènté nkajní mé xíkaha tsōnhen tió itsí tí Xjeen Dios K'óna Chojni. ²⁵T'ichjánxín senó tsjasóte ch'án nchónhya la ko tí sín siín jie tsitekakuenhya sín ch'án. ²⁶Éxi kónhen tí yaon kjuák'e ch'ín Noé mé xíkaha tsōnhen tió tsokjan tí Xjeen Dios K'óna Chojni. ²⁷K'uékjine sín la ko k'uék'i sín la ko kótehe tí xjeen sín. A ntá xrinahya kui tí yaon k'uixenhen ch'ín Noé tí ntabárcō ntá k'uániá chrin, a ntá tí sín kuítōhe ntója la kaín sín k'uitjāyan sín. ²⁸Mé kjaxin xíkaha kónhen tí kjuák'e ch'ín Lot k'uékjine sín la ko k'uék'i sín la ko k'uék'ēna sín nkehe la ko k'uékjinchekji sín nkehe la ko k'uék'ēnkā sín nontēe sín la ko k'uékjich'ēna sín nchia. ²⁹A ntá tí yaon k'uaxrjéxín ch'ín Lot tí chjasin Sodoma, na mé nkajní kujixín xrohi la ko azufre, na mé tíha k'uēnxín kaín xín tí sín ntiha. ³⁰Mé xíkaha tsōnhen tí yaon itsí tí Xjeen Dios K'óna Chojni.

³¹A ntá tí yaon i tí tjejó jnkojín nkexro chrítaón nchia tjejót'ok'éhe sín, a ntá ichrén nkehe chóna sín kuítōhe sín nkaxenhen nchia la í chrók'uinkajinhya sín chrókuakitsje sín tí nkehe chóna sín, tjoka sáchrókjui sín ókjé. Kjaxin xíkaha jnkojin chojni tjejó sín nontēe sín la í chrókjanhya sín ntōe sín. ³²Xráxinkáonrá nkehe kónhen ichjién ch'ín Lot. ³³Tí nkexro tjinkaon kíxin kohya nkehe chrókónhen na mé ts'itjāyan. A ntá tí nkexro chrókjuinchek'itjāyanxín asén kíxin chróchronka itén Dios la mé tsaá. ³⁴A ntá tsontáxrjan kíxin tí tie a jnkokōá ts'ejóua yaá chojni la ijnko la sátsji la ko tí í jnko la tsitōhe. ³⁵Yaá chojni chjin its'o sín jnkokōá, la ijnko la sátsji la ko ijnko la tsitōhe. ³⁶Yaá chojni ts'ejóch'e sín xra nonte, la ijnko la sátsji a ntá ijnko la tsitōhe —ichro ch'án.

³⁷Ntá kuínhin sín tíha ntá kjuanchankíhi sín ch'án kíxin:

—¿Xá nketí tsōnhen tíha, Ìnchéni? —ichro sín.

A ntá jehe ch'án kjuátēhe ch'án ntáchro ch'án kíxin:

—Tí tjen tí cuerpo kuènte chojni tsík'en la mé ntiha tsotjnkotsé tí kontexjuēn —ichro ch'án.

Ch'ín Jesús kjuíncheyóexin ch'án éxi ijnko tjan k'án la ko ijnko ch'ín juez

18 A ntá ch'ín Jesús kjuíncheyóexin ch'án kjuakoxín ch'án kíxin jnkochríxín chrónixjehe chojni Dios la ko chrókóxrjéhya sín. ²Ntá ntáche ch'án sín kíxin:

—Ijnko chjasin kjuák'e ijnko ch'ín juez kjuikosáyehya ch'án Dios la ko k'uéchóntehya ch'án kjuasáyé ninkexró. ³Kjaxin chjasin ntiha kjuák'e ijnko tjan k'án,

† 17.26–27 Génesis 6.5–7.24 †† 17.28–29 Génesis 18.20–19.25 ‡ Génesis 19.26

jnkojaxon sákjuítsjehe tjan tí ch'ín juez kjuanchia tjan jie ntáchro tjan kixin chrókuitogexín kixin ijnko chojni nínkakonhen tjan ntiha. ⁴ Nchónhya veces tjitsjehe tjan tí ch'ín juez la chrohya ch'án chrókjuinchekitogexín ch'án. Ntá chr'èxín kjuenkayáxin ch'án ntáchro ch'án kixin: “Kjónité í tsjikosáyàhya Dios la ko ninkexró tsjikosáyàhya ⁵ a ntá tí tjan k'án jnkoyaxon tjanchia tjan jie, la tsjinkítsa tjan tsitogexín tí jie tjanchia tjan kixin í jnkoyaxonhya itsi tjan tsochronòa tjan kixin ó kjuixin kóninkavan jie”, ichro ch'án.

⁶ Ntá ntáchro Ìnchéni kixin:

—Mé xíkaha ichro tí ch'ín juez jínahya. ⁷ ¿Xá chrókjuinkítsahya Dios tí sín kjueyá ch'án tí chróchronóehé sín ch'án nchakotjin la ko tie? ¿Á tjokahya chrókjuatehe chrókjuinkítsa sín ch'án? ⁸ Ntáxrjan kixin kjá tjoka chrókjuinkítsa sín ch'án. A ntá tió itsi tí Xjeen Dios K'óna Chojni, ¿á naxá chrók'uitja ch'án chojni tinkáchónki tí jehe ch'án ntihi chjasintajni? —mé chro ch'án.

Ch'ín Jesús kjuíncheyogexin ch'án éxí ijnko ch'ín fariseo la ko ijnko ch'ín nchekjènkj

⁹ Ntá ch'ín Jesús kjuíncheyogexin ch'án nixjehe ch'án iso chojni tjenkayáxin sín kixin imá jína sín a ntá tí í so sín la náhí, ichro sín. Ntá ntáchro ch'án kixin:

¹⁰ —Iyó sín ntoa sákjuí nkaxenhen njnko kixin tsonixjehe sín Dios. Ijnko la fariseo la ko ijnko la ch'ín nchekjènkj. ¹¹ A ntá tí ch'ín fariseo tjexín ch'án toté ch'án nixjehe ch'án Dios ntáchro ch'án kixin: “It'èni Dios, kjuasáya tjàhá kixin jeheni la chóntahyani jie éxí tí sín í so kixin teé sín la ko ch'iyehé kichó sín la ko ch'iyehé sín chojni chjin. Kjaxin jeheni la jehya éxí tí ch'ín nchekjènkj tjinhin. ¹² Jeheni la nehyaní iyó yaon jnkojnko semana la ko kjaxin tjanjonni tí chichaon tjachani tí diezmo kuèntá”, ichro ch'án. ¹³ A ntá tí ch'ín nchekjènkj la imá kjín kuitoghe ch'án kóxakonhen ch'án chrókonta ch'án nkajní la mé chjéhe ch'án ntakuin ch'án ntáchro ch'án kixin: “It'èni Dios tikonogéhéni tí jeheni kixin nchónhya jie chóntani”, ichro ch'án. ¹⁴ Tjonkará kixin tí ch'ín nchekjènkj tió kjan ch'án ntoghe ch'án la Dios kujkonogehé tí jehe ch'án la kjuinhin ch'án tí jie chónta ch'án, a ntá tí ch'ín fariseo la náhí. Kixin kaín chojni nchehnkehe asén kixin imá jína tí jehe sín la mé imá tsontsí. A ntá tí chojni nchehnkehya asén la imá ts'ánkí tí kjuaxrexinkaon kuènte sín.

Ch'ín Jesús kjuíncheyaon ch'án chánjan

(Mt. 19.13-15; Mr. 10.13-16)

¹⁵ Kjaxin kjuikao sín chánjan ntsintí tí tjan ch'ín Jesús kixin chrókjuíncheyaon ch'án xjan. Kjánchó tió k'uíkon tí sín k'uájiko ch'án la í kjuanjonhya sín kjuachaxin kixin tsochjinako sín xjan. ¹⁶ A ntá ch'ín Jesús k'uíyehé ch'án sín ntáchro ch'án kixin:

—Tjtoherá chánjan méhe xrakoa tí tjèn janhan la t'ínkakuènyará xjan kixin tí sín kuènte kjuachaxin kuènte Dios la mé tóyohé tí jehe xjan. ¹⁷ Ntá chaxín ntáxrjan kixin tí nkexro ts'ónahya éxí ijnko chánjan xit-

jahya ts'ejó sín tí ts'etogon Dios tí kjuachaxin kuènte ch'án.

Ijnko ch'ín ntasoá ríco kjuínixjehe ch'án tí ch'ín Jesús

(Mt. 19.16-30; Mr. 10.17-31)

¹⁸ Ijnko ch'ín t'etogon kuènte njnko kjuanchankíhi ch'án tí ch'ín Jesús kixin:

—Jaha la ijnko maestro jína la, ¿nkehe naxá t'itjayan chrókjuich'eni kixin chróchóntani kjuachón jnkochrín? —ichro ch'án.

¹⁹ Ntá kjuátehe ch'ín Jesús ntáchro ch'án kixin:

—¿Nkekuènte ntáchrúa kixin jína tí janhan? Jnkokoá nkexro la mé jína la tíha mé Dios. ²⁰ Jaha la ó noha nkehe tí k'uetogon Dios kixin chrókjuacheéhya kichuárá, la ko chrók'oyánhya chojni, la ko chrókuèehya, la ko chróntáchróhya ninkehó nkehe chaxínhya kuènte ókjé chojni, la ko chrókjuíkosáyehé it'á la ko ìná —ichro ch'án.

²¹ A ntá jehe ch'án kjuátehe ch'án ntáchro ch'án kixin:

—Kaín tíha kjuínchexiteyáni desde xjanntsíni —ichro ch'án.

²² A ntá kuínhin ch'ín Jesús kaín tíha ntá jehe ch'án ntáchro ch'án kixin:

—A ntá jnkokoá nkehe naxá t'itjayan chrókjuich'e, chrókjuínchekjia kaín nkehe chonta la chróchjehé tí chichaon tí sín nòa. A ntá tí nkehe tjete la tsochonta nkaya nkajní. A ntá tió tsjixin sijnchekjtonhén sín nkehe, a ntá tsjihá ntá chréhé tí janhan —ichro ch'án.

²³ A ntá tí ch'ín a kuínhin ch'án xíkaha la kóxakonhen ch'án kixin imá itsjé nkehe chónta ch'án. ²⁴ Tió k'uíkon ch'ín Jesús kixin kóxakonhen tí ch'ín a la ntá ntáchro ch'án kixin:

—Imá xrá kixin tí chojni chónta itsjé nkehe chrók'uixenhen sín tí tjan Dios t'etogon. ²⁵ Antsí xráhya chrók'u-atsínka ijnko kocamello ijnko tjar'i ntachica tjejrja, a ntá antsí má xrá kixin ijnko chojni chónta itsjé nkehe chrókjuak'e tí t'etogon Dios —ichro ch'án.

²⁶ A ntá kuínhin sín kixin xíkaha ntáchro ch'án ntá ntáchro sín kixin:

—¿Xá nkexro chrókjuacha chrókuaá? —ichro sín.

²⁷ Ntá ntáchro ch'ín Jesús kixin:

—Tí nkehe tsjachahya chojni chrókjuínchexiteyá, la Dios la tsjacha ch'án sich'e ch'án kaín tíha —ichro ch'án.

²⁸ A ntá ch'ín Pedro ntáchro ch'án kixin:

—Ìnchéni, jeheni la ó kuitogheni kaín nkehe chóntani kixin tsochréhéni tí jaha —ichro ch'án.

²⁹ Ntá kjuátehe ch'ín Jesús ntáchro ch'án kixin:

—Ntá chaxín tsotjonkará kixin jnkójnra chrókuitogherá ntoghe, la o chrókuitogherá it'á la ko ìná, la o chrókuitogherá kichuárá, la o chrókuitogherá ichjiánra, la o chrókuitogherá xjaanra kixin chrókjuich'erá xrá kuènte Dios ³⁰ la antsí nkehe ts'ayéherá ntihi chjasintajni la ko tí chr'èxín la ts'ayéherá kjuachón jnkochrín —ichro ch'án.

Ch'ín Jesús chrónka ch'án inaá kixin its'en ch'án

(Mt. 20.17-19; Mr. 10.32-34)

³¹ Ntá ch'ín Jesús k'uíyehē ch'án jehó tí teyó sín k'uájiko ch'án ntá chrónka ch'án kixin:

—Íjie sátsjini Jerusalén. A ntá ntaha tsoxiteyá kaín tí nkehe tsíkjin tí sín tsíchronka itén Dios ósé nkexrí tsonhen tí Xjeen Dios K'óna Chojni. ³² Tsjikaán sín ch'án tí tjejó tí sín jehya judío la ko tsjanoá sín ch'án la ko ts'ántaxínhín sín ch'án la ko ntáte sín tsíkite sín ch'án. ³³ Tsjate sín ch'án, a ntá chr'éxin la ts'óyán sín ch'án. A ntá nixin yaon tsoxechón ch'án —ichro ch'án.

³⁴ A ntá jehe sín la ninkehó kiexínhya sín tí nkehe nixja ch'án kixin tíha ijnko nkehe naxā tsjachahya sín chrókiexín sín.

Ch'ín Jesús kjuínchekitohe ch'án jína ijnko chojni

t'ikonhya chjasin Jericó

(Mt. 20.29-34; Mr. 10.46-52)

³⁵ A ntá ch'ín Jesús tió chjina chrók'uixenhen ch'án chjasin Jericó ntá ntiha chrínta ntja tjetjāxin ijnko ch'ín t'ikonhya tjanchak'á ch'án. ³⁶ Ntá xrínahya kuínhin tí ch'ín t'ikonhya kixin sít'atsínka nchónhya chojni, ntá kjuanchankí ch'án kixin:

—¿Xa nkerí sítónhen? —ichro ch'án.

³⁷ Ntá chénka sín ch'án kixin ch'ín Jesús tsíkijixín chjasin Nazaret ts'atsínka ch'án ntiha.

³⁸ Ntá k'uèya ch'án ntáchro ch'án kixin:

—Jaha Jesús tsík'axrjeníxian ch'ín David, tikonóghéni —ichro ch'án.

³⁹ A ntá tí sín tsítaón ntja la k'uētuenhen sín ch'án kixin tsotáni ch'án. Kjánchó jehe ch'án antsi tsen k'uèya ch'án ntáchro ch'án kixin:

—Jaha tsík'axrjeníxian ch'ín David, tikonóghéni —ichro ch'án.

⁴⁰ A ntá ch'ín Jesús ntá ntahó kjuák'echónhen ch'án ntá k'uētōan ch'án kixin tsjikakjín sín tí ch'ín a. Ntá tió kuíkao sín ch'án tí chjinaxón tjen ch'ín Jesús ntá kjuanchankí ch'ín Jesús kixin:

⁴¹ —¿Nkehe tjinkávan sít'aha? —ichro ch'án.

Ntá kjuátehe tí ch'ín t'ikonhya ntáchro ch'án kixin:

—Jaha Ínchéni, tjinkaonni chrókjuínchek'ikuanni —ichro ch'án.

⁴² Ntá ntáchro ch'ín Jesús kixin:

—Ó ts'ikuan. Ó kuítóha jína kixin kuítekávan tí janhān —ichro ch'án.

⁴³ Ntá tuénxín k'uíkon tí ch'ín k'uék'ikonhya, a ntá jehe ch'án chréhe ch'án tí ch'ín Jesús la ko kjuanchehe ch'án kjuasáyé Dios. La ko kaín tí sín k'uíkon kixin xíkaha kónhen kjuanchehe sín kjuasáyé Dios.

Ch'ín Jesús la ko ch'ín Zaqueo

19 A ntá ch'ín Jesús k'uixenhen ch'án chjasin Jericó la ntá k'uátsínka ch'án tí chjasin a. ² A ntá ntiha tjen ijnko chojni ríco it'in ch'án Zaqueo, t'etuenhen ch'án tí sín nchekjènkj. ³ Tjinkaon ch'án chrókjuatsōan ch'án nkexro tí ch'ín Jesús, kjánchó nchónhya chojni

siín la xitjahya t'ikon ch'án kixin intsí ch'án. ⁴ Ntá kuinká ch'án kuítaón ch'án ntja kixin tjinkaon ch'án chrók'uikon ch'án. Ntá kuátsé ch'án ijnko nta sicómoro chjinaxón tí ts'atsínka ch'ín Jesús. ⁵ A ntá tió k'uátsínka ch'ín Jesús ntiha konta ch'án tí nta ntáchro ch'án kixin:

—Zaqueo, tjoka tjasinkajján kixin ntōa ntahó tsitōna jie —ichro ch'án.

⁶ Ntá ch'ín Zaqueo la tjoka k'uínkajin ch'án kóchéhe ch'án. ⁷ Ntá kaín sín k'uíkon sín xíkaha ntá kjuankixin sín tjonta sín tí ch'ín Jesús, ntáchro sín kixin ntōe ijnko chojni chóna nchónhya jie tsitōhe ch'án. ⁸ Ntá ch'ín Zaqueo kjuák'exín tōté ch'án ntáche ch'án Ínchéni kixin:

—Jaha Ínchéni, chrókónoha kixin tsjánjuan jnkosiné tí nkehe chonta sntakítōnhan tí sín nōa. A ntá tí jnkōjín nkexro kjuít'áyahā kuaáha la noó veces ts'okjanhan sín tí chichaon jie —ichro ch'án.

⁹ A ntá ntáchro ch'ín Jesús kixin:

—A ntá jie la tsaá chojni tí nchia i kixin tí ch'ín a mé k'uaxrjeníxian ch'ín Abraham. ¹⁰ A ntá tí Xjeen Dios K'óna Chojni mé kuikjeyá la ko sinchekaá tí chojni chóna jie.

Ch'ín Jesús kjuíncheyóexin ch'án éxí ite chichaon imá tjeje sínkí

¹¹ A ntá tí chojni siín ntiha nachrohe tjejótinhen sín nkerí tjechro ch'ín Jesús, a ntá jehe ch'án kjuíncheyóexin ch'án nkehe kixin ó tjen ch'án chjinaxón chjasin Jerusalén, a ntá jehe sín kjuenkayáxin sín kixin tí kjuachaxin kuénte Dios la ách'e ó tuénxín tsi, ichro sín. ¹² A ntá ntáchro ch'án kixin:

—Ítjen ijnko nkexro tsík'axrjeníxian ijnko nkexro imá k'uék'etōan. Ntá sákjuí ch'án ókjé nación kixin ts'áyéhe ch'án kjuachaxin ts'óna ch'án rey, a ntá chr'éxin la xíkjan ch'án inaá. ¹³ A ntá tió chjina sátsji ch'án ntá k'uíyehē ch'án ite tí sín ch'ehe ch'án xrā ntá chjéhe ch'án jnkōjnko tí jehe sín jnkōjnko chichaon imá tjeje sínkí. Ntá k'uētōan ch'án kixin: “Tsjankixinrá ch'ekoará xrā tí chichaon hasta tí tsokjanjian”, ichro ch'án. ¹⁴ A ntá tí sín chjasén ch'án ntiha imá kónínkakonhen sín ch'án, ntá ich'án sín iso chojni chréhe sín tí sákjuí ch'án tsochenka sín tí sín siín ntiha kixin tjinkakonhya sín tí nkexro a ts'óna rey ts'etuenhen sín. ¹⁵ Kjonté xíkaha ichro tí sín a la k'uáyéhe ch'án kjuachaxin ts'óna ch'án rey. Ntá kjan ch'án chjasén ch'án. Ntá k'uētōan ch'án xrakoa tí sín ch'ehe ch'án xrā, na mé tí sín tsík'áyéhe tí chichaon, kixin tsonōhe ch'án nkehe tí xrā kjuích'eko sín tí chichaon k'uáyéhe sín. ¹⁶ A ntá tí ch'ín xrankíxixín kóchjina la ntáchro ch'án kixin: “Tí chjichakōan la kjuachani ite chichaon inaá”, ichro ch'án. ¹⁷ A ntá kjuátehe tí ch'ín rey kixin: “Ó nchōxon tí xíkaha jaha la ijnko chojni jína ch'e xrā. Jína kjuích'e xrā kjonté jehya xrā jie ntá tsjánjuan kjuachaxin tsētōan ite chjasin”, ichro ch'án. ¹⁸ A ntá kóchjina tí ch'ín íjnko a inaá ntáchro ch'án kixin: “Tí chjichakōan la kjuachani in'ó chichaon inaá”, ichro ch'án. ¹⁹ A ntá xíkaha inaá kjuátehe tí ch'ín rey kixin: “Tsjánjuan kjuachaxin tsētōan in'ó chjasin”, ichro ch'án. ²⁰ A ntá kóchjina tí

ch'ín nixin ntáchro ch'án kixin: "Tí chichakōan la tjinhin. K'uánkintani panítóeni ²¹ kixin chrakonhanni kixin jaha la jiāha la tjinkávan tsákjá tí nkehe jehya jaha kjuaké la ko tsotja tí nkehe jehya jaha kuènkaxian", ichro ch'án. ²² A ntá tí rey ntáchro ch'án kixin: "Jehya chojni jina ch'e xra jaha. Tí nkehe ntáchrua tsjáncháxi-an jie. Jaha la ó noha kixin jiena janhan tsákjaá tí nkehe kjuakéhya, ichrua, la ko tsotja tí nkehe kuènkahya. ²³ ¿Ntá nkekuènte kixin chr'anhya tí chichaon ijnko banco chrókjuich'exín xra? A ntá tió kjan ntōna la antsí tsjé chichaon chrók'uayáha tí chrókjuacha kichó chica", ichro ch'án. ²⁴ A ntá ntáche ch'án tí sín siín ntiha kixin: "Takítsjehérá ch'án tí chichaon tsík'áyéhe ch'án la ntá chjehérá tí ch'ín chóna ite chichaon", ichro ch'án. ²⁵ A ntá jehe sín ntáchro kixin: "¿Nkekuènte chrók'uáyéhe ch'án kixin ó chóna ch'án ite chichaon?" ichro sín. ²⁶ A ntá tí ch'ín rey kjuátehe ch'án ntáchro ch'án kixin: "Kjonté jnkojín nkexro itsjé chóna la ts'áyéhe má. A ntá tí nkexro chónahya la kjonté tí ntsí chóna ch'án la ts'axrjehe ch'án. ²⁷ A ntá tí sín nínkakonna sín tjinkakonhya sín kixin ts'ónana rey la xrákoará sín ntihi ts'íkōnxín kuān ts'ochrínjinrá kja sín."

Ch'ín Jesús k'uixenhen ch'án chjasin Jerusalén

(Mt. 21.1-11; Mr. 11.1-11; Jn. 12.12-19)

²⁸ Tió kjuixin ntáchro ch'ín Jesús tíhi ntá chriin ch'án sátsji ch'án chjasin Jerusalén. ²⁹ A ntá ó kjujji chjinaxón tí chjasin Betfagé la ko chjasin Betania chjinaxón tí jna nchek'in sín Olivo, ntá k'uetuēnhen ch'án iyó tí sín k'uájiko ch'án ³⁰ ntáche ch'án sín kixin:

—Sátjirá tí chjasin ntsí chok'èxin ntihi, a ntá tió tsjasánrá ntiha ts'itjará ijnko kolocho tjechroé va naxa ninkexró tjiták'áhya va. Tjasintānkehérá va la tsjikuanará va ntihi. ³¹ A ntá tí jnkojín nkexro tsjanchankíhará nkekuènte tjasintānkehérá va la ntácherá sín kixin: "Ínchéni ts'ichjānxīnhin va", tsixrorá.

³² A ntá tí sín k'uituenhen sákjuí sín k'uitja sín éxi ntáchro ch'án. ³³ A ntá tió tjejótjasintānkehē sín va la ntá tí sín inché va kjuanchankíhi sín kixin:

—¿Nkekuènte tjasintānkehérá tí kolócho? —ichro sín.

³⁴ A ntá jehe sín kjuátehe sín kixin:

—Ínchéni ts'ichjānxīnhin va —ichro sín.

³⁵ Ntá sákjuíkohe sín va tí ch'ín Jesús, la ntá tí iké sín kjuínchekamá sín va, ntá kjuíták'á ch'ín Jesús tí kolócho a. ³⁶ A ntá tinkákji tí kolócho tjejkjen ch'án la tinkák'íkjinxin sín tí iké sín ntja kixin nátaón tí ka ts'atsínka tí kolocho tjejkjen ch'án. ³⁷ Ntá tió kjujichjina sín tí chjinaxón tí t'inkājīnxīn chojni tí jna Olivo, a ntá kaín tí sín kuítekaon tí jehe ch'án chréhe sín kjuankíxin sín itsen nixja sín chéhe sín kjuanchehe sín kjuasáyé Dios kixin kaín tí kjuaxroan k'uíkonxín kon sín. ³⁸ Ntá ntáchro sín kixin:

—Jína tí nkexro Rey kjuixín kjuachaxin ihnié Dios. Tsjak'e kjuaxróxin nkaya nkajín la ko kjuasáyé Dios tjen nkaya nkajín —ichro sín.

³⁹ A ntá iso tí sín fariseo tjejóyákjan sín í so chojni tjejónxexroan sín ntiha ntáchro sín kixin:

—Maestro, tétuēnhén tí sín chréhe tí jaha kixin tsotání sín —ichro sín.

⁴⁰ A ntá ch'ín Jesús kjuátehe ch'án ntáche ch'án sín kixin:

—A ntá tí sín i tsotání sín la ixro tsotsje —ichro ch'án.

⁴¹ A ntá tió kjujichjina ch'án chjasin Jerusalén ntá k'uíkon ch'án tí chjasin la ntá tsjánka ch'án kixin kuítekakonhya sín ⁴² ntáchro ch'án kixin:

—Chrókuiēnxinrá la ko chrókónohará nkexrí chrók'uayēxinrá tí kjuaxróxin, kjánchó jahará kuítekakonhyará. A ntá ó kjuixin k'uátsínka tí kjuaxróxin chrók'uikonrá la xitjahya ts'ikonrá jie. ⁴³ A ntá tsi iso yaon jínahya itsi tí sín nínkakonhanrá la sich'éna sín ijnko tjat'ō ts'ántatjen tí chjasin tjejorá ntihi ts'inkákonhēn kixin xitjahya ts'axrjēxinrá chjasin ntihi kixin nkuíxin ts'ejó sín ts'inkákonhanrá sín ⁴⁴ ntá ts'óxíka sín kaín tí tjat'ō siín ntihi la ko ts'óyán sín kaín tí chojni siín la ko tsítōehya sín kixin nínkehó xro naxa ts'ejójkjen kichó, kixin jahará kjuátsqanhyará kixin kuitsjehe Dios tí chjasin tjejorá ntihi.

Ch'ín Jesús kjuínchetjóá ch'án nkaxenhen njnko

(Mt. 21.12-17; Mr. 11.15-19; Jn. 2.13-22)

⁴⁵ A ntá ch'ín Jesús k'uixenhen ch'án tí njnko jie, a ntá kjuankíxin ch'án kuakitsje ch'án tí sín nchekji nkehe la ko tí sín t'ēna nkehe ntiha. ⁴⁶ Ntá ntáchro ch'án kixin:

—A ntá ntáchro xroon itén Dios chrónka kixin: "Tí ntōna i mé it'in nchia tsonixjanaxián chojni", † ichro. A ntá jahará tí nchia i tsíkjich'énará itjuéé xíchee —ichro ch'án.

⁴⁷ A ntá tí njnko ntiha kjuák'e ch'ín Jesús kjuako ch'án kaín yaon. A ntá tí sín nchāt'á t'etōan la ko tí maestro tjako tí ley la ko kjaxin tí sín t'etōan tí chjasin ntiha kjuayá sín nkexrí chrók'óyán sín ch'án. ⁴⁸ Kjánchó k'uitjahya sín nkexrí chrók'óyán sín ch'án kixin kaín chojni tjejótinhin tí nkehe tjechronka ch'án.

Tí kjuachaxin chóna ch'ín Jesús

(Mt. 21.23-27; Mr. 11.27-33)

20 A ntá ijnko yaon kjuák'e ch'ín Jesús tí njnko ntiha kjuakōhe ch'án chojni tí tan jina tsaáxin sín. A ntá kjui tí sín nchāt'á t'etōan la ko tí sín maestro tjako tí ley la ko kjaxin tí sín t'etōan kuènte njnko. ² Ntá kjuanchankíhi sín ch'án kixin:

—Chronka nkehe tí kjuachaxin chonta kixin xikaha ch'e. ¿Nkexro kjuanjon tí kjuachaxin a? —ichro sín.

³ Ntá kjuátehe ch'ín Jesús ntáchro ch'án kixin:

—Kjaxin janhan tsjánchánkíhará ijnko nkehe siná nkexrí tsjateherá. ⁴ ¿A ntá nkexro k'uetuēnhen tí ch'ín Juan kixin tsíkite ch'án chojni? ¿Á Dios ní o chojni ó? —ichro ch'án.

⁵ Ntá kjuankíxin sín tjo sín kichó sín ntáchro sín kixin:

—¿Nkehe chrókjuatehēni? A ntá tí tsontáchroni kixin Dios tsíchr'án tí ch'ín Juan la ntá tsjanchankí ch'án kixin nkekuènte kuítekakuenhyani ch'án. ⁶ A ntá tí tson-

† Isaías 56.7

táchroni kixin chojni ó k'uetuēhen sín ch'án la ntá kaín chojni tsonínkaon sín la ixro ts'óyánxinni sín kixin tjenkayáxin sín kixin ch'ín Juan chaxín k'uékjako ch'án itén Dios —mé xíkaha ikjo sín.

⁷ Ntá kjuátehe sín kixin noehya sín nkexro tsíchr'án tí ch'ín Juan. ⁸ Ntá ntáchro ch'ín Jesús kixin:

—Kjāxin janhan tsoxrjankahya nkexro kjuanjon kjuachaxin tjet'a tíhi —ichro ch'án.

Ch'ín Jesús kjuíncheyóexin ch'án éxí tí sín ch'ehya xra jína

(Mt. 21.33-44; Mr. 12.1-11)

⁹ Ntá tuénxín kjuankíxin ch'ín Jesús nixjehē ch'án chojni kjuíncheyóexin ch'án ntáchro ch'án kixin:

—Kjuák'e ijnko chojni k'uēnkāxin ch'án nta to uva tí nontēe ch'án, a ntá chr'éxín kjuínchekjen ch'án tí iso tí sín ch'e xra. A ntá kjuixin ntá sákjuí ch'án imá sé. ¹⁰ A ntá kui tí yaon tsakjinjin sín to uva. Ntá k'uetuēhen ch'án ijnko nkexro ch'ehe ch'án xra kixin tsjikjanchehe ch'án tí sín ch'e xra nontēe ch'án kixin tsjanjon sín tí to tónhen ch'án tocar. A ntá jehe sín kjuate sín tí ch'ín a la ntá k'uinkité sín ch'án la ninkehó tsíchjéhya sín ch'án. ¹¹ A ntá tí ch'ín nontēe ichr'án ch'án í jnko nkexro ch'ehe ch'án xra. A ntá kjāxin k'uántaxínhjn sín ch'án la ko kjuate sín ch'án la ko kjāxin ninkehó tsíchjéhya sín ch'án inaá. ¹² A ntá tí ch'ín nontēe ichr'án ch'án í jnko nkexro. A ntá tí sín ch'e xra kjāxin xikahó tsikjich'ehe sín inaá, tsik'inkité sín ch'án.

¹³ Ntá tí ch'ín nontēe ntáchro ch'án kixin: “¿Nkexrí chrókjuít'a jie? Tsochr'an tí xjāna imá tjuahā. Ách'e chrókuitekakonhen sín ch'án chróchóntehe sín ch'án kjuasáya”, ichro ch'án. ¹⁴ A ntá kjónté kui ch'án la k'uíkon tí sín ch'e xra ntá chénka sín kíchó sín kixin: “Tí ch'ín i mé ts'áyéhē ch'án kaín nkehe kuēnte it'é ch'án. Ts'óyánni ch'án kixin jeheni tsitpekoni kaín tí nkehe a,” ichro sín. ¹⁵ A ntá kuakitsjexín sín ch'án tí nonte ntiha la k'óyán sín ch'án.

A ntá kjuanchankí ch'ín Jesús kixin:

—A ntá tí inché nonte la, ¿nkehe chrókjuich'e ch'án kixin xíkaha kónhen tí xjeen ch'án? ¹⁶ Chrókui ch'án chrókjuinçek'itjáyan ch'án tí sín ch'e xra kixin xíkaha kjuích'e sín k'óyán sín tí xjeen ch'án, a ntá chróchjéhe ch'án í so nkexro chrókjuich'e xra tí nonte a —ichro ch'án.

A ntá tió kuínhin sín xíkaha ntáchro sín kixin:

—Kjá Dios la xíkahya tjinkaon ch'án —ichro sín.

¹⁷ A ntá ch'ín Jesús komá ch'án tí jehe sín ntáchro ch'án kixin:

—¿A ntá nkehe t'axrjexín tí nkehe ntáchro xroon itén Dios ntáchro xíkahi?:

Tí xro náxrjónhya kuitōenta tí sín ch'éna tjat'ō, a ntá mé jie k'óna tí xro tjetōan. †

¹⁸ A ntá jnkojín chojni tsjtsínka chrítaón tí xro i tsokuen ch'án. A ntá ts'ánótjen tí xro i tsoxratja ijnko chojni la tsokuen, ts'óna nche.

Tí xra tsjenkehe sín gobierno

(Mt.21.45-46; 22.15-22; Mr.12.13-17)

¹⁹ A ntá tí nchāt'á t'etōan la ko tí maestro tjako tí ley tjinkaon sín chrótsé sín tí ch'ín Jesús tuénxín tí hora a kixin ó kónohe sín kixin jehe sín kuakitsjexín tí nkehe nixja ch'án. Kjānchó xitjahya tsotsé sín ch'án kixin chrakonhen sín tí chojni síin. ²⁰ Ntá k'uetuēhen sín chojni tsotsáyehe sín ch'án, éxí chojni chóna kjuasáye ch'án chrókjo sín ch'án jnkojína kixin ách'e ichrén nkehe ntoáhya tsonixja ch'án. A ntá jína tsjanchaxín sín jie tsjikaán sín ch'án tí tjen tí ch'ín gobernador. ²¹ Mé xíkaha kjuanchankíhi sín ch'án nkehe, a ntá ntáchro sín kixin:

—Maestro, ó noheni kixin kaín nkehe ntáchrúa la ko kaín nkehe tjákua la chaxín ntoá la ko jehya nkexrí tsjehe chojni tjenkayáxixián kixin á jína sín, la ntá ntoá tjákua ntje Dios. ²² A ntá jie la chrónka, ¿á jína chrókjuēnkēheni tí gobierno romano o náhi? —ichro sín.

²³ A ntá ch'ín Jesús la ó kónohe ch'án kixin ntoáhya tjenkayáxin sín ntá ntáchro ch'án kixin:

—¿Nkekuēnte chrokjuachaxínrání? ²⁴ Tjākonará ijnko tí chichaon méhe. ¿Nkexro tí tsík'axrjexín tjenkání tí chichaon i la ko nkexro ihnié chóna méhe? —ichro ch'án.

Ntá kjuátehe sín kixin:

—Tí ch'ín t'etōan mé tjenkání ch'án —ichro sín.

²⁵ Ntá ntáchro ch'án kixin:

—Chróchjehérá tí ch'ín gobierno t'etōan tí nkehe kuēnte ch'án; a ntá tí nkehe kuēnte Dios chróchjehérá Dios —ichro ch'án.

²⁶ A ntá ninkehó kjuachahya sín kjuachaxín sín ch'án tí nkehe ntáchro ch'án nkayakon chojni chjasin ntiha. A ntá chrakon sín kuínhin sín kaín nkehe kjuátehe ch'án la ntá tí sín kjuanchankí la tání sín kohya nkehe ichro sín.

Kjuanchankí sín kixin á tsoxechón chojni

(Mt.22.23-33; Mr.12.18-27)

²⁷ A ntá chr'éxín iso tí sín saduceo sákjuítsjehe sín tí ch'ín Jesús. Kjānchó tí sín saduceo titekakonhya sín kixin tsoxechón chojni tsík'en. Xíkaha ntáche sín tí ch'ín Jesús kixin:

²⁸ —Maestro, ch'ín Moisés tsíkjin ch'án tí xroon ley ntáchro kixin tió ts'en ijnko chojni la ntá tsitōhe ichjién, tí chónahya sín xjeen, la t'ichjánxín kixin kíchó tí ch'ín tsík'en tsotēhe tí tjan k'án kixin tsochóna sín xjeen sín éxí xjeen tí ch'ín saō tsík'en ts'ikon sín. †²⁹ A ntá k'uéjō sín yato sín jnkokoá kíchó sín. A ntá tí ch'ín saō la kótehe ch'án. Ntá k'uén ch'án la chónahya ch'án ninkehó xjeen ch'án. ³⁰ A ntá tí ch'ín yóxin kíchó ch'án la kótehe tí tjan k'án. Kjāxin k'uén ch'án chónahya sín xjeen sín. ³¹ A ntá tí ch'ín níxin xíkótehe jehe tjan inaá. Kjāxin xíkaha kayatoé sín. Kaín sín k'uén sín ninkehó xjeen sín chónahya sín. ³² A ntá kjuixixín kjāxin jehe tjan ik'uén tjan. ³³ A ntá tió tsoxechón chojni

† Salmo 118.22

†† Deuteronomio 25.5

tsík'en, ¿ntá nkexro tí jehe sin ts'óna ichjién tí jehe tjan kixin yato tí jehe sín kótehe tjan? —ichro sín.

³⁴ Ntá ch'ín Jesús kjuátehe ch'án ntáchro ch'án kixin: —Ntihi chjasintajni tí chojni ntoa la ko ti chojni chjin tótehe sín takja kichó sín. ³⁵ A ntá tí sín kuítekaon sín tí janhan ntá tsjacha sín tsoxechón sín inaá la í tsotēehya sín la koí tsotēehya tí xjeen sín. ³⁶ Kixin tí sín a la xitjahya ts'en kixin éxí tí sín ángel ts'ejó sín kixin xjeen Dios tí jehe sín kixin Dios kjuínchexechón ch'án sín. ³⁷ Kjaxin ch'ín Moisés tió chrónka ch'án kuente tí nta tjeche kjuínchenoheni ch'án kixin tí sín tsík'en tsoxechón sín. Ntáchro ch'án kixin Inchéni Dios na mé tí Dios tinkáchónki ch'ín Abraham la ko ch'ín Isaac la ko ch'ín Jacob. ^{†38} Tí Dios i la jehya tinkáchónki tí sín tsík'en. Náhí. Tí Dios i la tinkáchónki tí sín tjejóchón, la Dios la t'ikon ch'án kixin kaín chojni la síchón —ichro ch'án.

³⁹ A ntá iso tí sín tjako tí ley la ntáchro sín kixin: —Jína kjuákua la ko jína ntáchrúa, Maestro— ichro sín.

⁴⁰ A ntá chrakon sín la í ninkehó kjuanchankíehya sín ch'án.

¿Xá nkexro tí it'é tí Cristo?

(Mt. 22.41-46; Mr. 12.35-37)

⁴¹ Ntá ntáchro ch'ín Jesús kixin:

—¿Nkexrí kixin ntáchro sín kixin tí Cristo mé ts'axrenjínxín tí ch'ín David? ⁴² A ntá ch'ín David ikjin ch'án tí libro Salmos la ntáchro ch'án kixin:

Inchéni Dios ntáche tí Inchéni kixin:

“Tjak'e tjaná chjina ntiho tsétoan

⁴³ tsjixinjian kaín xín tí sín nínkakonhan la tsjachahya sín ts'etóan sín kixin jahvá mé tsétoan.” ^{††}

⁴⁴ ¿Xá nkexrí kixin Cristo chrók'óna it'é David, kixin jehe David kuikítexín ch'án Inché ch'án tí Cristo? —ichro ch'ín Jesús.

Ch'ín Jesús kjuanchia ch'án jié tí sín tjako tí ley

(Mt. 23.1-36; Mr. 12.38-40; Lc.11.37-54)

⁴⁵ Kaín chojni tjejótinhin sín nixjehé ch'ín Jesús tí sín k'uájiko ch'án ntáchro ch'án kixin:

⁴⁶ —Chrókóxakonhanrá chrókuankíehyará tí sín maestro tjako tí ley. Tóxrjínhin sín chrók'uinkáya sín ka kjinjin la ko tjinkaon sín kixin kaín chojni chrókjuikosáyehe sín tsoxeta sín ntasin la ko tjejá sín silla antsí náxrjón chrók'uejóyá sín nkaxenhen njnko la ko tjejá sín kixin jína chrók'uejó sín tí sátsji sín kia, ⁴⁷ la ko kjaxin takit-sjehe sín ntóe tí chojni chjin k'án. A ntá kjuixin kjuích'iyehé sín chojni ntá náxrjón nixjehé sín Dios. A ntá jehe sín antsí má sinchekjasóte sín Dios kixin xikaha kjuích'ia sín.

Tí chichaon kjuanjon ijnko tjan k'án nò

(Mr. 12.41-44)

21 A ntá tí nkaxenhen njnko ch'ín Jesús k'uíkon ch'án kixin tí sín ricó kjuikáo sín chichaon chr'áx-

enhen sín tí ntacajón tjetóxyéya chichaon. ² A ntá kjaxin k'uíkon ch'án ikjui ijnko tjan k'án nò la ntá jehe tjan chr'áxenhen tjan yaá chichaon ntsintsí. ³ Ntá ntáchro ch'ín Jesús kixin:

—La chaxín ntáxrjan kixin tí tjan k'án i nòla tjan kjánchó antsí tjeje sínkí tí chichaon kjuanjon tjan kixin kaín asén tjan kjuanjon tjan, a ntá tí sín kjuanjon nchónhya la náhí. ⁴ Kixin kaín tí chichaon kjuanjon sín la chichaon síxèhe sín. A ntá jehe tjan kjónté nòla tjan na kjuanjon tjan kaín tí chichaon chrókuicháxinhin tjan —ichro ch'án.

Ch'ín Jesús ntáchro ch'án kixin tí njnko ts'itjáyan

(Mt. 24.1-2; Mr. 13.1-2)

⁵ Iso sín tjejóto sín kixin nkexrí tsjehe njnko tsík'óna xro náxrjón la ko í so nkehe tsíkjanjon chojni éxí ijnko nkehe chjéhe sín Dios. A ntá ch'ín Jesús ntáchro ch'án kixin:

⁶ —A ntá tsi ijnko yaon tí njnko tjejokomará ntihi la tsoxíka. A ntá tsokohya ninkehó xro ts'ejókjen kichó inaá —ichro ch'án.

Tí nkehe tsonhen tí naxa ts'itjáyanhya chjasintajni

(Mt. 24.3-28; Mr. 13.3-23)

⁷ Ntá kjuanchankíhi sín ch'án kixin:

—Maestro, ¿nkesá tsonhen tíha? ¿Nkexrí tsonhen tí tsonoexinni tí nkehe tsonhen? —ichro sín.

⁸ Ntá ntáchro ch'ín Jesús kixin:

—Chrókóxakonhanrá tjtóehyará sit'áyahará chojni. Nchónhya chojni tsi tsontáchro sín kixin jehe sín tí Cristo, tsixro sín, la ko tsontáchro sín kixin: “Ijie mé tsoxiteyá tsonhen.” Kjónté xikaha tsontáchro sín la chrókuitekákuenhyará tí jehe sín. ⁹ A ntá tió tsinhínra tsontáchro chojni kixin ó siín kjuanínkaon tjanjonko kichó sín, kjónté xikaha naxa chróchrakonhyará kixin kaín tíha t'ichjánxín ts'atsínka senó tí naxa tsjixixínhya ts'itjáyan chjasintajni —ichro ch'án.

¹⁰ Naxa tjechrónka ch'án ntáchro ch'án kixin:

—Ijnko nación la tsjanjonko í jnko nación la ko ijnko chjasin tsjanjonko í jnko chjasin. ¹¹ Kjaxin imá tjan tsínkí nonte la ko tsokjinta la ko tsoníhi chojni nchónhya chjasin, a ntá nkajni nchónhya kjuachrakon jie ts'ixín ts'ikon chojni.

¹² Naxa ts'atsínkahya tíha la tsonínkakonhanrá sín tsotsérá sín sátsjikoará sín tí njnko tsjanchia sín jié la ko sátsjikoará sín ts'íkjahará la ko sátsjikoará nkayakon tí sín rey la ko tí sín gobernador kixin tinkachónkirá njna. ¹³ A ntá tí yaon xikaha tsonhen la ts'ixín kjuachaxin kixin tsóchronkará nkexro tinkachónkirá. ¹⁴ Tóxakuanhyará senó nkexrí tsjateherá tí nkehe tsjanchankíhará sín ¹⁵ kixin janhan la tsjanjuan kjuaxrexinkaon jína tsonixjará kixin njnko tí sín nínkakonhanrá xitjahya tsontáchro sín kixin ntoáhya tí nkehe tsjateherá. ¹⁶ Kixin kjónté it'ará la ko kichuárá la ko tí sín kjéhyará la ko tí sín tjórá jína mé sintakjirá sín. Jehe sín ts'óyán sín jnkojínra. ¹⁷ Kaín chojni chjasintajni tsonínkakonhanrá sín kixin tinkachónkirá njna.

¹⁸ Kjánchó xikaha la njnko kaxihí chóna kjará

† Éxodo 3.6 †† 20.42-43 Salmo 110.1

ts'itjáyanhya. ¹⁹ Tí tsitōéhyará tinkachónkirá tí janhan la tsochontará kjuachón jnkochrín.

²⁰ A ntá tió ts'ikonrá kixin kuenté chjasin Jerusalén tsík'ántatjen sín soldado ntá tsoñoaxínrá kixin í séhya ts'itjáyan tí chjasin a. ²¹ A ntá tí sín tjejó sín Judea la t'ichjánxín sátsjixín sín ntiha sátsji sín jnā. A ntá tí sín siín chjasin Jerusalén kjaxin t'ichjánxín sátsjixín sín ntiha la ko ti sín tjejó sín nontēe sín la í xitjahya tsokjan sín chjasin. ²² Kixin tí yaon ts'ixin tsjasóte chojni tsoxiteyá tsoñhen kaín nkehe nixja xroon itén Dios. ²³ Nòà tí chojni chjin tjejóyá tí yaon a la ko tí sín chóna xjanhntē naxā nchekakí sín. Kixin tí yaon a la ts'ixin kjuatjoté tí chjasin la Dios tsjanjon kjuachaxin kixin imá tsjasóte chojni ntiha. ²⁴ Jnkojínrá ts'énxínrá tí siín kjuanínkaon ntiha la ko jnkojínrá tsotsérá sín sátsjikoará sín sinchekjasótiarā kaín tí í so nación. A ntá tí sín jehya judío tsjixín ókjé nación tsinkátja sín chjasin Jerusalén kixin Dios mé tsjanjon kjuachaxin iso yaon xikaha tsoñhen. A ntá chr'éxín tsoñtácho ch'án kixin: "La í kohya nkehe tsoñhen."

A ntá tió itsi ti Xjeen Dios K'óna Chojni

(Mt. 24.29-35, 42-44; Mr. 13.24-37)

²⁵ A ntá tsoñoaxínrá nkexrí tsoñhen tí yaon la ko nkexrí tsoñhen nitjó la ko nkexrí tsoñhen konotsé. A ntá chjasintajni tsokohya kjuaxróxin kaín nación la ko tsochakon chojni kixin imá tsojnā ntayaon. ²⁶ A ntá chojni la tsoñhín sín kixin tsochakon sín tsjenkayáxin sín nkehe tsoñhen chjasintajni kixin kaín tí nkehe sínkáni nkajíní la tsínkí. ²⁷ Ntá xikaha ts'ikon chojni kixin itsi tí Xjeen Dios K'óna Chojni itsi ch'án chríkjan ijnko tjuj tsíkāo ch'án tí kjuachaxin jié kuente nkaya nkajíní. ²⁸ A ntá tió tsoxrankíxin tsoñhen kaín tíha chrókócháhará chrókjuaya kjárá ntá chróntáchorá kixin kijnhya tjen tí nkexro tsaáxinrá —ichro ch'án.

²⁹ Kjaxin kjuíncheyóexin ch'án í jnko nkehe ntácho ch'án kixin:

—Tjenkayáxinrá nkexrí siín tí nta t'óna to higo la ko kaín tí í so nta. ³⁰ Tió ts'ikonrá kixin tinkák'ayan kahnte tí nta, ntá tsoñoaxínrá kixin í séhya ts'ixenhen nchakuen chrin. ³¹ Mé kjaxin xikaha tió ts'ikonrá kixin kaín tí nkehe sitónhen, ntá tsoñoaxínrá kixin tí kjuachaxin kuente Dios la ó chjino tjen.

³² Mé chaxín ntáxrjan kixin kaín tíhi tsoñhen senó naxā t'enhya chojni tjejó jie. ³³ A ntá tí nkajíní la ko tí chjasintajni mé ts'itjáyan. A ntá tí nkehe ntáxrjan la ts'itjáyanhya, tsoxiteyá tíha.

³⁴ Chrókóxakonhanrá chrókuitōéhyará kixin chrókjuichròerá kixin tí imá chrókjónterá la ko tí chrókókoanrá. Kixin tí xikaha la ntá titàya tsi tí yaon la chrók'uejochoénhyará. ³⁵ Na mé éxi ijnko trampa xriñahya ts'ikjehé mé xikaha itsi tí yaon a, la ko xikaha tsoñhen kaín chojni siín chjasintajni tí ts'ejóchóenhya sín. ³⁶ Méxra listo chrók'uejorá la ko chrónixjehérá Dios kaín yaon chronóghérá ch'án kixin tió tsi kaín tí kjuaxikaon xikaha la ntá tsjinkjtsará ch'án tsaará kixin ntá tsjachará tsochjineherá tí tjen tí Xjeen Dios K'óna Chojni —ichro ch'án.

³⁷ Ch'ín Jesús kjuák'ekjākojín ch'án tí njnko ntiha jnkojnko yaon, a ntá tie la sákjuí ch'án tí jnā nchek'in sín Olivo, la ntaha kuitōge ch'án. ³⁸ A ntá kaín chojni kóchjina sín tí njnko jnkojnko nchítjen kixin tsinhin sín tí nkehe tsochronka ch'án.

Imó kjuenkayáxin sín nkexrí tsotsé sín tí ch'ín Jesús

(Mt. 26.1-5,14-16; Mr. 14.1-2, 10-11; Jn. 11.45-53)

22 Ntá kuichjina tí yaon kia sine sín tí niotja tjikohya tí xroan t'ánkíxin niotja na mé tí kia nchek'in sín pascua. ² Ntá tí nchāt'á t'etōan la ko tí sín maestro tjako tí ley kjuenkayáxin sín nkexrí chrók'óyán sín tí ch'ín Jesús kixin chrakonhen sín tí chojni chjasin ntiha.

³ A ntá ch'ín Tsochren k'uixenhen asén ch'ín Judas, mé kjaxin it'in ch'án Iscariote, mé jehe ch'án ijnko tí teyó tí sín k'uájiko ch'ín Jesús. ⁴ Tí ch'ín a mé sákjuítsjehé tí sín nchāt'á t'etōan la ko tí sín t'etōan kuente njnko, ikjo kichó sín kixin nkexrí tsjikaán sín tí ch'ín Jesús. ⁵ Ntá jehe sín kóchéhé sín la ko ntácho sín kixin tsjenkehe sín tí ch'ín Judas. ⁶ Ntá kjuátehe ch'án sinchexiteyá ch'án ntá kjueyá ch'án nkexrí tsotsé sín tí ch'ín Jesús tí kohya chojni.

Kjuixixín kjoneko sín tí ch'ín Jesús

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Ntá ó kui yaon kia sine sín niotja tjikohya tí xroan t'ánkíxin niotja, a ntá t'ichjánxín ts'óyán sín tí kolélo sine sín kuente tí kia pascua. ⁸ A ntá ch'ín Jesús k'ueñenhen ch'án tí ch'ín Pedro la ko tí ch'ín Juan kixin sátsji sín sincheyaxín sín tí nkehe sine sín kuente tí kia pascua. ⁹ Ntá jehe sín kjuanchankíhi sín ch'án kixin: —¿Nketí tjinkávan sincheyaxíxinni? —ichro sín.

¹⁰ Ntá kjuátehe ch'án kixin:

—Tió ts'ixenhenrá chjasin Jerusalén tsoxetará ijnko chojni ntoa yámá ijnko toa tjiá ntā. Chréhérá ch'án sátsjirá tí nchia ts'ixenhen ch'án. ¹¹ Tsoñtácherá tí inché tí nchia kixin: "Ntácho Maestro kixin: ¿Nketí tjen tí cuarto tsjánjuan kjuachaxin tsoyaxíxin sineko ch'án tí sín teyó xriko ch'án tí yaon pascua?" tsixrorá. ¹² A ntá jehe ch'án tsjakohará ch'án ijnko cuarto jié tí yóxin piso la ntiha siín nkehe t'ichjánxín, la ntaha sincheyaxíxinrá tí sineni tsoñjín —ichro ch'án.

¹³ A ntá jehe sín sákjuí sín k'uitja sín kaín nkehe éxi tsíchronka ch'ín Jesús. Ntá ntiha kjuíncheyaxíxin sín sine sín kuente pascua.

¹⁴ A ntá kui tí hora, a ntá ch'ín Jesús la ko tí sín k'uájiko ch'án kjuíji sín ntiha k'uejótjāxín sín tí tjen tí mesa. ¹⁵ Ntá ntácho ch'ín Jesús kixin:

—Imá tjínkavan kixin tsjasinni kia sinekianrá tí yaon pascua naxā ts'énhya janhan. ¹⁶ Ntáxrjan kixin sinehya janhan xikaha inaá tí naxā tsoxiteyáhya tíha tió tsi kjuachaxin kuente Dios —ichro ch'án.

¹⁷ Ntá kuákja ch'án tí nkehe tjiá ìnté to uva ntá chjéhe ch'án kjuasáya Dios ntá ntácho ch'án kixin:

—Tákjárá tíhi la its'irá kaín rá ¹⁸ kixin ntáxrjan kixin xík'ikianhyará tí ìnté to uva tí naxā tíhya tí kjuachaxin kuente Dios —ichro ch'án.

¹⁹ A ntá kjuixin ntá kuákja ch'án tí niotja ntá kjuanchehe ch'án kjuasáyé Dios, ntá kóchrít'ó ch'án chjéhe ch'án tí jehe sín ntáchro ch'án kixin:

—Tíhi mé cuerpo kuèntana kixin ts'ényákonhanrá. Mé xikaha tsoxráinkákonxínrá tí janhan —ichro ch'án.

²⁰ Kjaxin xikaha kjuanjon ch'án tí nkehe tjáá inté to uva tió kjuixin kjóne sín la ntáchro ch'án kixin:

—Tí nkehe tjáá tí vaso chronkaxín tí nkehe nixin tsonhen tsoxiteyá kixin tí jnina ts'itjítj tsotjuáxin tí ijjárá.

²¹ Tí nkexro sinchekjina mé tjejian tí tjen mesa ntihi.

²² Méxra tí Xjeen Dios K'óna Chojni its'en éxi k'uítuenhen; kjánchó nòà tí ch'ín sinchekji ch'án kixin tsjasóte ch'án —ichro ch'án.

²³ A ntá jehe sín kjuankixin sín tjanchankíhi kichó sín: —¿Xá nkexro sinchekji ch'án? —ichro sín.

Ikjo sín kixin nkexro tí imá ts'etqan

²⁴ A ntá jehe sín mé tjo sín kixin nkexro antsí ts'e-tqan. ²⁵ A ntá ntáchro ch'ín Jesús kixin:

—Tí sín reyes kuènte tí naciones imá t'etqan sín. A ntá tí chojni mé ntáchro sín kixin tí sín t'etqan la mé chojni ch'e xra jina. ²⁶ A ntá jahará xikaha chrókjuich'erá. Íchá jina tí nkexro imá t'etqan chrók'óna éxi tí nkexro antsí ntasoá chróchóxin chrók'uítuenhen, na mé tí nkexro t'etqan chrók'óna éxi ijnko nkexro ch'exón xra. ²⁷ ¿A ntá nkexro tí antsí t'etqan, á tí nkexro lámq tjetjaxín tí tjen mesa ntá sine ch'án, ó á antsí t'etqan tí nkexro kuikao tí nkehe sine ch'án? Náhí. Tí nkexro tjetjaxín tí tjen mesa mé antsí t'etqan ch'án. Mé xikaha janhan tjénkajánrá éxi ijnko nkexro ch'exón xra tí janhan.

²⁸ Jahará xráxin k'uéjontaxínrá k'uíkonrá kaín nkehe náxrjónhya kónna. ²⁹ Méxra janhan tsjánjuan kjuachaxin tsétqanrá éxi chjina T'aná tí tétqan janhan ³⁰ kixin sinterá la ko its'irá tí tsjak'e mesa kuèntana tí tsétqan janhan nkaya nkajní la ko tsétqanrá sinchekitqexínrá tí ijjé kaín tí sín k'uaxrjenixin tí teyó xjeen ch'ín Israel.

Ch'ín Jesús chrónka ch'án kixin ch'ín Pedro sinchemá kixin chónhya tí jehe ch'án, tsixro ch'án

(Mt. 26.31-35; Mr. 14.27-31; Jn. 13.36-38)

³¹ Ntá ntáchro Ìnchéni kixin:

—Simón, Simón, chrókónoha jaha kixin ch'ín Tsochren kjuanchia ch'án tí jahará chrók'ótsjéyehe ch'án tí jahará éxi noatrigo. ³² Kjánchó janhan xr-janógha T'aná kixin jaha chrókujitqéhya tí tinkachónkia tí janhan. A ntá jaha kjónté tsjásian jje, a ntá tsokjan inaá ts'itjányanhya tinkachónkia tí janhan ntá sinchechéhé kichuárá —ichro ch'án.

³³ A ntá ntáchro ch'ín Simón kixin:

—Ìnchéni, listo tjenni sátsjini ts'ikjéhekoani la jehya ts'ikjéheni ó la kjaxin ts'enkoani —ichro ch'án.

³⁴ A ntá kjuátehe ch'ín Jesús ntáchro ch'án kixin:

—Pedro, ntáxrjan kixin ijje jaí naxa tsjehya kochíntqan sinchemána iníya kixin chonhya tí janhan, tsixrua —ichro ch'án.

Ntá ó kuichjina tí hora xikaha tsonhen ch'án

³⁵ Ntá ch'ín Jesús kjuanchankíhi ch'án tí jehe sín kixin:

—Tió kuétuanhanrá sákjuirá kjuíkoahyará kabolsa la ko kjuíkoahyará tí nkehe t'inka chichaon la ko kjuíkoahyará tqkatē na, ¿á naxa t'itjányan ichrén nkehe ní? —ichro ch'án.

Ntá kjuátehe tí jehe sín ntáchro sín kixin:

—Náhí. Ninkehó nkehe t'itjányanhya —ichro sín.

³⁶ Ntá ntáchro ch'án kixin:

—A ntá jie tí nkexro chónka kabolsa la tsakja sátsjiko la ko kjaxin tí nkehe t'inka chichaon. A ntá tí nkexro chóntahya chica espada chrókjuinchekji ch'án tí ka t'inkáya ch'án kixin chrók'uénaxín ch'án ijnko chica. ³⁷ Ntáxrjan kixin t'ichjánxin tsoxiteyá tsona éxi nixja xroon itén Dios ntáchro kixin: “Éxi yóhe ijnko chojni kjuasin jje mé xikaha ts'ikon sín ch'án.” † Mé xikaha kaín nkehe chrónka xroon itén Dios kixin tsona mé t'ichjánxin tsoxiteyá —ichro ch'án.

³⁸ A ntá jehe sín ntáchro sín kixin:

—Ìnchéni, ntihi tjejó yaá chica espada —ichro sín.

Ntá kjuátehe ch'án kixin:

—Kjónté ó táhó la ó nchqxon —ichro ch'án.

Ch'ín Jesús nixjeexín ch'án Dios tí Huerto Getsemaní

(Mt. 26.36-46; Mr. 14.32-42)

³⁹ Ntá ch'ín Jesús sákjuixin ch'án chjasin Jerusalén sákjuí ch'án ijna Olivo kixin xikaha kuènnen ch'án k'uékjich'e ch'án la koí tí sín k'uájiko ch'án tinkáchréhe sín. ⁴⁰ Ntá kjuíji sín ntiha ntá ntáchro ch'án kixin:

—Nixjehérá Dios kixin tsjinkitsa ch'án tí jahará kixin tsjásinhyará jje —ichro ch'án.

⁴¹ Ntá ch'ín Jesús k'uaxrjenta ch'án tí jehe sín sákjuí ch'án ijnko kjínxin éxi chrók'ue chojni xro. Ntá kjuák'exín toch'in ch'án kixin tsonixjehé ch'án Dios.

⁴² Ntá ntáchro ch'án kixin:

—It'eni, tí tjinkávan chrókjuinchekaáni kaín nkehe náxrjónhya chrók'uatsínkani. Kjánchó jehya éxi tjinkaonni jeheni chrókónhenni. Náhí. Éxi tjinkávan jaha —ichro ch'án.

⁴³ Ntá xrínghya k'uíkon ch'án itjen ijnko ángel tsíkixín nkaya nkajní kixin tsjinkitsa ch'án. ⁴⁴ A ntá imá tóx-akonhen ch'án, a ntá antsí fuerte nixjehé ch'án Dios, ntá k'uixin ch'án ntáchjin éxi yóhe jni xikaha k'uítji k'uánótjen nonte.

⁴⁵ Ntá tió kjuixin nixjehé ch'án Dios ntá k'uínkatjen ch'án ntá sákjuí ch'án tí tjejó tí sín k'uájiko ch'án, ntá k'uitjaxín ch'án kixin tjejójua tí jehe sín kixin kjuachahya sín imá t'ává sín. ⁴⁶ A ntá ntáchro ch'án kixin:

—¿Nkekuènte tjejochrinrá? T'àyará. Nixjehérá Dios kixin tsjinkitsará ch'án kixin tsjachroehyará ch'ín Tsochren —ichro ch'án.

† Isaías 53.12

Itse sín tí ch'ín Jesús

(Mt. 26.47-56; Mr. 14.43-50; Jn. 18.2-11)

⁴⁷ A ntá ch'ín Jesús naxa tjenixja ch'án ntá xríngnya kui nchónhya chojni yámá chica. Tí ch'ín it'ín Judas, ijnko tí teyo sín k'uájiko ch'ín Jesús, kuítaón ch'án ntja, ntá kóchjinehe ch'án tí ch'ín Jesús kixin sineko ch'án kochíto. ⁴⁸ A ntá ntáchro ch'ín Jesús kixin:

—Judas, zá ijnko kochíto ó sìnchekjixian tí Xjeen Dios K'óna Chojni? —ichro ch'án.

⁴⁹ A ntá tí sín tjejóko ch'ín Jesús tió k'uíkon sín kixin xikaha kónhen ntá kjuanchankíhi sín ch'án kixin:

—Ínchéni, zá chrókuatéxinni sín chica espada? —ichro sín.

⁵⁰ A ntá ijnko tí jehe sín kjuíncheníhi ch'án ijnko ch'ín ch'ehe xra nchat'á t'etōan, kóchrínjin ch'án ntatsjon ch'án chjina.

⁵¹ A ntá ntáchro ch'ín Jesús kixin:

—Táhó, tjtōhé, ó tjen —ichro ch'án.

Ntá ch'ín Jesús itse ch'án tí ntatsjon tí ch'ín ch'e xra a, ntá kjuínchekitōhe ch'án jina. ⁵² Ntá tuénxín ch'ín Jesús ntáche ch'án tí sín nchat'á t'etōan la ko tí sín t'etōan kuente njnko la ko tí sín táda t'etōan mé tí sín tsíki sátsjiko sín ch'án ntáchro ch'án kixin:

—¿Nkekuente k'uinkakoará chica espada la ko inta éxí chrótserá ijnko xíchee? ⁵³ A ntá kaín yaon kjuak'é janhan k'uejóni kjuákoáxinrá tí njnko ntiha la ninkehó tsehyará tí janhan. A ntá jie mé tí hora kuentará ntá kjuacha tí kjuachaxin kuente sítié —ichro ch'án.

Ch'ín Pedro kjuínchemá ch'án kixin chónhya ch'án tí ch'ín Jesús

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Ntá itse sín tí ch'ín Jesús kjuínchenteto sín ch'án sákjuíko sín ch'án ntōe nchat'á t'etōan. A ntá ch'ín Pedro ikjín tinkáchréhe ch'án. ⁵⁵ A ntá tí ntāsin ntiha kjuaka sín xrohi síxrohe sín. A ntá ch'ín Pedro kjaxin kjuák'entaxín ch'án tí tjejó sín ntiha. ⁵⁶ A ntá ijnko tjachjin ch'e xra tió k'uíkon tjan kixin koí ch'ín Pedro tjechjixrohe ch'án ntiha ntá komá tjan tí jehe ch'án ntá ntáchro tjan kixin:

—Kjaxin tí ch'ín i xriko tí ch'ín Jesús —ichro tjan.

⁵⁷ Ntá ch'ín Pedro kjuínchemá ch'án ntáchro ch'án kixin:

—¿Nkekuente xikaha ichrua jaha? Ni chonhya tí nkexro a —ichro ch'án.

⁵⁸ A ntá antsíkoá chr'éxjin ikui í jnko chojni k'uíkon tí jehe ch'án ntá ntáchro kixin:

—Kjaxin jaha xríkoa tí nkexro a —ichro.

Ntá ch'ín Pedro ntáchro ch'án kixin:

—Náhí, janhya —ichro ch'án.

⁵⁹ Ntá éxí ijnko hora chr'éxjin ntá nixja í jnko ch'ín chénka tí í so sín kixin:

—Tí ch'ín i chaxín xriko tí ch'ín Jesús kixin kjaxin tsíkjin ch'án estado Galilea —ichro ch'án.

⁶⁰ Ntá ntáchro ch'ín Pedro kixin:

—Nonahya janhan nkehe tí ntáchrúa —ichro ch'án.

Ntá tuénxín naxa tjenixja ch'án ntá xríngnya ó tsje kochíntōa. ⁶¹ Ntá Ínchéni kuinkátjía ch'án komá ch'án tí ch'ín Pedro. Ntá ch'ín Pedro xraxinkaon ch'án kixin xikaha tsíchronka Ínchéni kixin: “Naxa tsotsjehya kochíntōa sìnchemána iníya.” ⁶² Ntá ch'ín Pedro sákjuí ch'án ntója, tsjánka ch'án xraxinkaon ch'án tí jie kjuasin ch'án.

Kjuanoá sín tí ch'ín Jesús

(Mt. 26.67-68; Mr. 14.65)

⁶³ Tí sín sákjuíko ch'ín Jesús kjuanoá sín ch'án la ko kjuate sín ch'án. ⁶⁴ K'uikjéhe sín ka kon ch'án ntá kjuate sín ch'án ntá kjuanchankíhi sín ch'án kixin:

—Ijie la tónoha nkexro kjuatia —ichro sín.

⁶⁵ La ko í so nkehe ntáchro sín k'uántaxínjin sín ch'án.

Ntá sákjuíko sín tí ch'ín Jesús nkayakon tí sín t'etōan

(Mt. 26.59-66; Mr. 14.55-64; Jn. 18.19-24)

⁶⁶ A ntá kóyaon nchakotjin la kójnkotsé kaín tí sín táda t'etuenhen tí sín judío, la ko tí nchat'á t'etōan, la ko tí sín maestro tjako tí ley la sákjuíko sín tí ch'ín Jesús nkayakon tí sín imá t'etōan. Ntá ntiha kjuanchankiéxín sín ch'án kixin:

⁶⁷ —Ijie la chrónka, zá jaha tí Cristo? —ichro sín.

Ntá jehe ch'án kjuatéhe ch'án kixin:

—Tí tsontáxrjan kixin chaxín janhan na tsitekákonhyará. ⁶⁸ A ntá tí chrókjuánchánkíhará ichrén nkehe la chrókjuatéehyará la ko chrók'uatjántahyarána. ⁶⁹ A ntá jie tí Xjeen Dios K'óna Chojni mé tsjak'etjajin tí tja chjina kuente Dios chóna kaín xín kjuachaxin —ichro ch'án.

⁷⁰ A ntá tuénxín kaín sín kjuanchankíhi sín ch'án kixin:

—¿Á chaxín jaha tí Xjeen Dios? —ichro sín.

A ntá kjuatéhe ch'ín Jesús ntáchro ch'án kixin:

—Chaxín janhan xikaha ntáchrórá tí jahará —ichro ch'án.

⁷¹ Ntá kjo sín kíchó sín kixin:

—¿Nkehe tsonhen naxa chróchrónka í so chojni? Jeheni kaín ni kuínhinni nkehe k'uaxrjexín ir'va ch'án —ichro sín.

Sákjuíko sín tí ch'ín Jesús nkayakon tí ch'ín Pilato

(Mt. 27.1-2, 11-14; Mr. 15.1-5; Jn. 18.28-38)

23 Ntá kaín sín k'uínkatjen sín ntá sákjuíko sín tí ch'ín Jesús nkayakon tí ch'ín Pilato. ² A ntá ntiha kjuankixin sín t'eka sín jie tí jehe ch'án ntáchro sín kixin:

—K'uitjani tí nkexro i tjachroe ch'án chojni nación kuénténi ntáchro ch'án kixin chrókjuenkeehyani tí gobierno romano, la ko kjaxin ntáchro ch'án kixin jehe ch'án mé Cristo ch'án, na mé ijnko rey tíha —ichro sín.

³ A ntá ch'ín Pilato kjuanchankíhi ch'án tí ch'ín Jesús ntáchro ch'án kixin:

—¿Á jaha tí Rey t'etueñhen tí sín judío a ní? —ichro ch'án.

Ntá ch'ín Jesús kjuátehe ch'án ntáchro ch'án kixin:

—Chaxín xikaha ntáchrúa jaha —ichro ch'án.

⁴ A ntá ch'ín Pilato ntáche ch'an tí sín nch'at'á t'etöan la ko tí chojni tsíkikao sín kixin:

—T'itjáhya nijnko jje ch'óna tí nkexro i —ichro ch'án.

⁵ A ntá jehe sín antsí itsen nixja sín ntáchro sín kixin:

—Tjachroe ch'án kaín xín chojni estado Judea kixin tí nkehe tjako ch'án. Kjuankixin ch'án kjuako ch'án estado Galilea, a ntá jie ó kui ch'án ntihi la xikaha tjako ch'án —ichro sín.

Sákjuíko sín tí ch'ín Jesús nkayakon tí ch'ín Herodes

⁶ A ntá kuínhin ch'ín Pilato xikaha ntáchro sín ntá kjuanchankí ch'án á tí ch'ín i la á Galilea tsíkijxin ch'án. ⁷ A ntá kjuátehe sín kixin ntaha tsíkijxin ch'án, ntá k'ue-
töan ch'ín Pilato kixin sátsjiko sín ch'án tí tjen ch'ín Herodes kixin jehe ch'án mé gobernador tí estado Galilea kixin kjaxin ch'án tjen ch'án chjasin Jerusalén tí yaon a. ⁸ A ntá ch'ín Herodes k'uíkon ch'án kjuíji tí ch'ín Jesús ntá imá kóchéhe ch'án kixin isé tjinkaon ch'án chrók'uikon ch'án tí ch'ín Jesús kixin tsíkinhin ch'án chrónka chojni nkexrí tjako ch'án, ntá tjinkaon ch'án chrók'uikon ch'án ijnko kjuaxroan chrókjuakoxin ch'ín Jesús. ⁹ Nchónhya nkehe kjuanchankíhi ch'án tí ch'ín Jesús, kjánchó ch'ín Jesús ninkehó kjuáteehya ch'án. ¹⁰ Kjaxin ntiha k'uejó tí sín nch'at'á t'etöan la ko tí sín maestro tjako tí ley la ntá nchónhya jje k'ueka sín ch'án kixin nínkakonhen sín ch'án.

¹¹ A ntá ch'ín Herodes la ko tí sín soldado kuente ch'án kjuankixin sín kjuikosáyehya sín ch'án la ko kjuanoá sín ch'án kjuínchek'inkáya sín ch'án ka tjete náxrjón éxí t'inkáya tí sín rey. A ntá tuénxín ch'ín Herodes k'uetöan ch'án kixin sátsji ch'án inaá tí tjen ch'ín Pilato. ¹² A ntá tí yaon a ch'ín Pilato la ko ch'ín Herodes kjuankixin sín tjuèhe kichó sín kixin tí senó la k'uénínkakonhen kichó sín.

K'uetöan sín kixin its'en ch'ín Jesús

(Mt. 27.15-26; Mr. 15.6-15; Jn. 18.39—19.16)

¹³ A ntá ch'ín Pilato k'uíyehé ch'án tí nch'at'á t'etöan la ko tí sín gobernador la ko kaín chojni chjasin ntiha kixin tsojnkotsé sín ¹⁴ ntá ntáche ch'án sín kixin:

—Jahará kjuíkuanará tí nkexro i ntáchrórá kixin ntoáhya tjakohe ch'án chojni kixin chrókónínkakonhen sín tí gobierno. Kjánchó janhan kjuánchánkíhā ch'án itsjé nkehe kuínhínrá ntá k'uíkonrá kixin k'uitjáhya ninkehó tí jje tékará ch'án. ¹⁵ La ko kjaxin ch'ín Herodes k'uitjáhya ch'án tí jje tékará tí ch'ín Jesús ntá chr'án ch'án inaá ntihi. Ó k'uíkonrá kixin ninkehó jje ch'ónahya ch'án chrók'uenxín ch'án. ¹⁶ Sín takjasóte ch'án ntá chr'éxin tsjánjuan kjuachaxin sátsji ch'án —ichro ch'án.

¹⁷ A ntá tí yaon kia a la t'ichjánxin kixin ch'ín Pilato tsjanjon kjuachaxin sátsji ijnko chojni tjechjina kixin xikaha kuénhen sín ósé. ¹⁸ Ntá kaín sín kjuankixin sín k'óyako sín ntáchro sín kixin:

—Tí nkexro la náhí! ¡Ch'ín Barrabás mé t'atjánta! —ichro sín.

¹⁹ A ntá ch'ín Barrabás tsík'ikjéhe sín ch'án kixin jehe ch'án la ko í so chojni kónínkakonhen sín tí chjasin ntiha la ko tsík'óyán ch'án chojni. ²⁰ A ntá ch'ín Pilato tjinkaon ch'án chrókjuanjon ch'án kjuachaxin sáchrókjui ch'ín Jesús. A ntá xíkjanchankíhi ch'án tí chojni siín ntiha inaá. ²¹ Kjánchó jehe sín antsí má tsen k'óyako sín ntáchro sín kixin:

—¡Tjakékānirá ch'án ntacruz! ¡Tjakékānirá ch'án ntacruz! —ichro sín.

²² Nixin xíkjanchankí ch'ín Pilato ntáchro ch'án kixin:

—¿Xá nkehe ntoáhya kjuích'e ch'án? Janhan la k'uitjáhya ninkehó jje ch'óna ch'án chrók'uenxín ch'án. Sín takjasóte ch'án la ntá chr'éxin tsjánjuan kjuachaxin sátsji ch'án —ichro ch'án.

²³ Kjánchó jehe sín antsí tsen kjuanchia sín ntáchro sín kixin chrókjuak'enkáni ch'án ntacruz. A ntá k'óyako sín la ko k'óyako tí sín nch'at'á t'etöan ntá kjuacha sín kjuanchia sín tí nkehe tsonhen. ²⁴ A ntá ch'ín Pilato kjuanjon ch'án kjuachaxin xikaha tsonhen tí nkehe kjuanchia sín. ²⁵ A ntá kjuanjon ch'ín Pilato kjuachaxin sátsji tí ch'ín Barrabás éxí kjuanchia sín, na mé tí ch'ín k'uikjéhe sín kixin k'uekje ch'án kjuáninkaon la ko k'uek'óyán ch'án chojni. A ntá ch'ín Pilato kjuanjon ch'án kjuachaxin kixin sátsjiko sín tí ch'ín Jesús sinchekjasóte sín ch'án éxí tjinkaon sín.

Kjuak'enkāni sín ch'án ijnko ntacruz its'en ch'án

(Mt. 27.32-44; Mr. 15.21-32; Jn. 19.17-27)

²⁶ A ntá tió sákjuíko sín ch'ín Jesús tsjak'enkāni sín ch'án ntacruz, ntá itsé sín ijnko ch'ín tsíkijxin chjasin Cirene it'in ch'án Simón, mé kjuixin ch'án nontee ch'án, ntá kjuínchekamá sín ch'án tí ntacruz tsjak'enkáni ch'ín Jesús la tinkáchréhe ch'án.

²⁷ Kjaxin chréhe nchónhya chojni ntoa la ko nchónhya chojni chjin chréhe sín tsjánkāmā sín ch'án.

²⁸ Kjánchó ch'ín Jesús nkátjía ch'án komá ch'án tí jehe sín kixin tsjánka sín ntáchro ch'án kixin:

—Jahará chojni chjin chjasin Jerusalén, chrótsjánka-māhyará tí janhan. Chrótsjánkará kixin tí nkehe tsonhanrá jahará la ko xjaanrá. ²⁹ Kixin itsi yaon tson-táchrórá kixin náxrjón tí sín ch'ónahya xjan la ko tí sín kjuínchekokjéheya xjan la ko tí sín kjuínchekakíhya ninkehó xjan. ³⁰ Ntá tsjankixin chojni tson-táche sín tí jnā kixin tsoxrátja sín la ko tson-táche sín tjo kixin tsjavá sín. ³¹ Kjónté tí nta yoa la ó sítónhen kaín tíhi la íchá tió chróxámá tí nta la ¿nkehe tí kaá chrókónhen tí nta tsíxámá? —ichro ch'án.

³² Kjaxin sákjuíko sín iyó sín tsíkjasin jje kixin ts'óyánko sín ch'ín Jesús. ³³ Ntá tió kjuíji sín tí jnā tiki-texin sín tí jnā Nta Hueso Kja Chojni, na mé ntiha kjuak'enkāni sín ch'ín Jesús tí ntacruz la ko kjaxin tí iyó sín ch'óna jje, la ijnko la tja ch'án chjina la íjnko la tja ch'án kjon tjejóyáni sín ntacruz kjaxin. ³⁴ Ntá tió kjuixin kjuak'enkāni sín tí ch'ín Jesús tí ntacruz ntá nixjehé ch'án tí It'é ch'án Dios ntáchro ch'án kixin:

—It'eni, tónínkakuènhya sín kixin tí nkehe kjuích'e-heni sín kixin noehya sín nkehe tí kjuích'e sín —ichro ch'án.

À ntá tí sín soldado k'óxikeyehe sín iké ch'án ch'exín sín suerte kixin tsoñoexín sín nkexro tsakja tí ka a.

³⁵ Kaín chojni chjasin ntiha tzejótsjehe sín kixin xikaha sítónhen la ko kjaxin tí sín t'etōan tjanoá sín tí jehe ch'án ntáchro sín kixin:

—Kjuínchekaá ch'án ókjé chojni, à ntá jie jehe ch'án chrókjuínchekaá ch'án asén ch'án tí chaxín jehe ch'án tí Cristo tí nkexro tsíkjejá Dios —ichro sín.

³⁶ La ko kjaxin tí sín soldado kjuanoá sín ch'án kóchjinehe sín ch'án kjuíkaō sín xranvino náxrjónhya ch'jéhe sín ch'án chrók'ui ch'án, ³⁷ ntáche sín ch'án kixin:

—Tí jaha chaxín rey kuènte tí sín judío ntá jahvá chrókjuínchekaá asán —ichro sín.

³⁸ Kjaxin ntiha ikja tí ntacruz kjuak'enkani sín ijnko ntachiso ntsí tsíkjin sín nkiva griego la ko nkiva latín la ko nkiva hebreo ntáchro kixin: “Tíha mé Rey kuènte tí sín judío”, ichro.

³⁹ Ijnko tí sín chóna jie tjenkáni ntacruz k'uántaxín-hjn ch'án tí ch'ín Jesús ntáchro ch'án kixin:

—Tí jaha chaxín Cristo, jahvá chrókjuínkajian asán, ntá tsjixin ntá chrókjuínkajian tí jeheni —ichro ch'án.

⁴⁰ À ntá tí ch'ín jnko a k'uētuenhen tí í jnko ch'ín a kixin tsotání ch'án, ntáchro ch'án kixin:

—Ntáchrohya xikaha. ¿Á chrakuenhya Dios kixin xikaha ichrua kixin kjaxin jeheni na ó tzejótjasóteni?

⁴¹ Yóini na nchōxon tzejótjasóteni tzejótjenkani tí jie kjuasinni. À ntá tí nkexro í ninkehó nkehe jínahya kjuích'e ch'án, la ntá koí ch'án tjetjasóte ch'án —ichro tí ch'ín a.

⁴² Ntá ntáchro ch'án kixin:

—Jesús, xráinkávan tí janhan tió ts'ayéhé kjuachaxin tsétōan jaha —ichro ch'án.

⁴³ Ntá kjuátehe ch'ín Jesús ntáchro ch'án kixin:

—Chaxín ntáxrjan kixin ijie jaí ts'ejóko kichó ni nkaya nkajní —ichro ch'án.

Ntá ó k'uén ch'ín Jesús

(Mt. 27.45-56; Mr. 15.33-41; Jn. 19.28-30)

⁴⁴ Ntá ó chjina chonkixin. À ntá k'uíxin tie kuenté chjasintajni hasta las tres kónjín. ⁴⁵ Ik'uén yaon, la ko tí ka t'inkákuènxín nkaxenhen njnko k'uichje jnkōsiné.

⁴⁶ Ntá ch'ín Jesús k'uèya ch'án itsen ntáchro ch'án kixin:

—It'eni tjen nkaya nkajní, jaha ts'ayéhé asénni —ichro ch'án.

Xikaha ichro ch'án ntá k'uén ch'án.

⁴⁷ À ntá k'uíkon tí ch'ín capitán romano kaín xikaha kónhen ntá kjuanchehe ch'án kjuasáyé Dios ntáchro ch'án kixin:

—Chaxín tí nkexro la jína la ninkehó jie chóntahya —ichro ch'án.

⁴⁸ À ntá kaín tí chojni tsíkójnkotsé ntiha k'uíkon sín xikaha kónhen ntá sákjuíxin sín ntiha chrakon sín tjate sín ntakuin sín kixin xikaha kónhen. ⁴⁹ À ntá kaín tí sín

chóxin ch'ín Jesús la ko kjaxin tí chojni chjin k'uékinkáchónki sín ch'án tsíkjixín sín estado Galilea ikjín tjejó sín tzejótsjehe sín nkerí sítónhen.

Sákjuíkjává sín tí ch'ín Jesús

(Mt. 27.57-61; Mr. 15.42-47; Jn. 19.38-42)

⁵⁰ À ntá ntiha tjen ijnko ch'ín it'in José, chjasén ch'án mé Arimatea estado Judea. Kjaxin jehe ch'án ijnko tí sín imá t'etōan kuènte tí sín judío, jehe ch'án mé ijnko nkexro jína. ⁵¹ Jehe ch'án kjuák'echónhen ch'án itsi tí kjuachaxin kuènte Dios. Méxra kóxrjénhya ch'án nkexrí kjuích'e tí sín í so t'etōan. ⁵² Méxra sákjuítsjehe ch'án tí ch'ín Pilato kjuíkjanchia ch'án tí cuerpo kuènte ch'ín Jesús. À ntá ch'ín Pilato kjuanjon ch'án kjuachaxin. ⁵³ Ntá sákjuí sín tsjinkajinxín sín ch'án ntacruz. Ntá kjuixin kjuinkajin sín ch'án ntá kjuínchek'ísímá sín ch'án ijnko ka jie, ntá sákjuíko sín tsoxravá ch'án ijnko tòye xráxin tsíkjich'ena ch'ín José jehó tjō la ko naxa ninkexró tsíxraváhya ntiha. ⁵⁴ Kaín tíha kónhen tí yaon viernes kónjín. Tí yaon mé tzejóyaxínhin sín kixin í séhya tsoxránkixin tí yaon t'ok'éhe sín sábado kixin ko-hya kjuachaxin sich'e sín ninkehó xra.

⁵⁵ À ntá tí chojni chjin nkáchréhe kjuíkokóxin ch'ín Jesús estado Galilea kjaxin sákjuíko sín sákjuítsjehe sín tí tòye tsoxravá ch'án la ko k'uíkon sín jína nkexrí kjuak'e sín tí cuerpo kuènte ch'án. ⁵⁶ À ntá tió kjan sín tí nchia tjejó sín k'óyaxínhin sín kjuéyá sín xroan xraxé náxrjón itsa ntóé ch'án kixin xikaha k'uékinkáchónki tí sín judío. À ntá k'ok'éhe sín tí yaon sábado éxí t'etōan tí ley.

Ó xechón ch'ín Jesús

(Mt. 28.1-10; Mr. 16.1-8; Jn. 20.1-10)

24 Tí yaon domingo, mé tí yaon xrankixín semana tí chojni chjin na xíkjan sín inaá tí tsíxravá ch'ín Jesús sákjuíko sín xroan xraxé tsík'ena sín. La ko í so chojni chjin sákjuíkotoxin sín. ² Ntá ó kjuíji sín ntiha k'uíkon sín tí xro tsíkjèxin tí tòye la í xikahya tjen tí sákjuí sín. ³ Ntá k'uíxenhen sín tòye ntá k'uitjahya sín cuerpo kuènte Ìnchéni Jesús. ⁴ Ntá chrakon sín ntá noehya sín nkehe sich'e sín. Ntá xrinahya k'uíkon sín iyó chojni ntoa tjejóxin toté chjinaxón tí tjejó sín, la iké sín la tjákjini tsjehe. ⁵ À ntá tí chojni chjin kjuínchek'isén kja sín tzejótsjehe sín nonte kixin imá chrakon sín, à ntá tí chojni ntoa ntáchro sín kixin:

—¿Nkekuènte xritjéyará tí nkexro tjechón tí síin tí sín tsík'en? ⁶ Tjenhya ch'án ntihi la ó xechón ch'án.

Xráinkáonrá nkehe ntáchro ch'án tí kjuák'e ch'án estado Galilea ⁷ ntáchro ch'án kixin jehe ch'án tí Xjeen Dios K'óna Chojni t'ichjánxin tsotsé tí sín chóna jie tsjak'enkani sín ch'án ntacruz la ko tí nixin yaon tsox-echón ch'án inaá —ichro sín.

⁸ À ntá tí síhjin xráinkaon sín kixin nkexrí tsíchronka ch'ín Jesús, ⁹ à ntá tió kjanxin sín tí tsíxravá ch'án ntá chénka sín tí tejnko tí sín k'uék'ajiko ch'án la ko kaín tí í so sín. ¹⁰ À ntá tí sín sákjuíchenka tí sín apóstol la mé tjan María Magdalena la ko tjan Juana la ko tjan María iné ch'ín Jacobo la ko tí í so chojni chjin. ¹¹ À ntá

tí sín apóstol kuínhin sín éxí ijnko nkehe chaxínhya tí nkehe chrónka tí jehe sín ntá kuítekakonhya sín.

¹² Kjánchó ch'ín Pedro k'uaxrjexín ch'án nchia tinká ch'án sákjuítsjehe ch'án tí tsíkijixravá ch'ín Jesús. Ntá kjuíji ch'án k'uíkon ch'án tí nkaxenhen tòye k'uíkon ch'án kixin jehó tí ka tsík'ísímá ch'án ntaha tjen. Ntá kjan ch'án tí nchia tjen ch'án chrakon ch'án kixin xíkaha tsíkónhen.

Tí ntja Emaús sákjuí sín la kjuíjichréhe Ìnchéni

(Mr. 16.12-13)

¹³ A ntá tí yaon a iyó sín sákjuí sín ijnko chjasin ntsí it'in Emaús, mé kjínxín tejnko kilómetro tí chjasin Jerusalén. ¹⁴ Tinkákjo sín kichó sín kixin kaín tí nkehe tsíkónhen tí chjasin Jerusalén. ¹⁵ A ntá nachrohe nixja sín tinkákjo sín, a ntá ch'ín Jesús kóchjinehe ch'án tí jehe sín sákjuíko sín ch'án. ¹⁶ Kjóté k'uíkon sín ch'án la kjuanjonhya Dios kjuachaxin kixin chrókjuatsqan sín tí jehe ch'án. ¹⁷ A ntá ch'ín Jesús kjuanchankíhi ch'án sín ntáchro ch'án kixin:

—¿Nkehe tí tinkakjórá tí k'uinkará ntja? ¿Nkekuènte kixin t'avará? —ichro ch'án.

¹⁸ A ntá ijnko tí jehe sín mé it'in Cleofas, mé kjuátehe ch'án kixin:

—Kaín chojni ó nohe sín nkehe tí tsíkónhen chjasin Jerusalén. A ntá jaha kjaxin kjuák'e ntiha la ¿á jahvá noahya nkehe tí tsíkónhen tí yaon a ní? —ichro ch'án.

¹⁹ A ntá jehe ch'án kjuanchankíhi ch'án tí jehe sín kixin:

—¿Xá nkehe tsíkónhen? —ichro ch'án.

Ntá chénka sín ch'án kixin:

—Tí nkehe tsíkónhen ch'ín Jesús tsíkijixín ch'án chjasin Nazaret. Jehe ch'án na ijnko nkexro k'uéchronka itén Dios, na mé kjuakoxín ch'án kjuachaxin kuènte nkaya nkajní kaín tí nkehe k'uékjich'e ch'án la ko kaín nkehe k'uéntáchro ch'án mé xíkaha k'uíkon Dios la ko k'uíkon tí chojni. ²⁰ A ntá tí nchát'á t'etqan la ko tí sín gobiernu kjuínchek'áyéhe sín ch'án kixin its'en ch'án la tsjak'enkani sín ch'án ntacruz. ²¹ A ntá jeheni k'uejóchónhenni kixin jehe ch'án chrókjuínchekaá ch'án tí sín Israel. A ntá jie ó chóna iní yaon xíkaha kónhen. ²² A ntá iso chojni chjin kjaxin k'uékinkáchónki sín ch'án kjuínchekrakon sín tí jeheni kixin jehe sín tsíkijt-sjehe sín tí tsíxravá ch'án imá nchítjén ²³ la mé tsík'it-jahya sín tí cuerpo kuènte ch'án, ntá kjan sín chrónka sín kixin tsík'ikon sín iyó sín ángel chrónka sín kixin ch'ín Jesús la tjechón ch'án, ichro sín. ²⁴ Ntá tuénxín iyó tí sín k'uájikoni kjaxin sákjuítsjehe sín tí tsíxravá ch'án la kuik'itja sín éxí chrónka tí chojni chjin, kjánchó ch'ín Jesús la k'uíkonhya sín —ichro tí yaá sín a.

²⁵ Ntá kjuátehe ch'ín Jesús ntáchro ch'án kixin:

—Lontirá jahará la tjokahya kuítekáonrá tí nkehe k'uéchronka tí sín profeta k'uéjé ósé. ²⁶ ¿Xá t'ichjánxínhya chrókjuasóte Cristo senó ntá chrók'uáyéhe ch'án tí kjuachaxin chrók'uetqan ch'án? —ichro ch'án.

²⁷ Ntá kjuankixin ch'án chronkaxín ch'án nkexrí t'axr-jexín kaín tí nkehe nixja xroon itén Dios kixin nkehe tsqonhen tí jehe ch'án la mé kjuankixixín ch'án

chronkaxín ch'án tí nkehe tsíkjin ch'ín Moisés la ko kjuintaxín chronkaxín ch'án tí nkehe tsíkjin tí í so sín profeta.

²⁸ Ntá kjuíji sín tí chjasin ntsí a, a ntá ch'ín Jesús tsjehe ch'án éxí naxá sáchrókjui ch'án kjín. ²⁹ A ntá jehe sín mé chronóehé sín ch'án kixin ntahó chrókuitqhe ch'án, ntáchro sín kixin:

—Titqha ts'ejóni ntihi kixin ntá ó kóntó la ó ts'ixitie —ichro sín.

Ntá ch'ín Jesús la k'uíxenhen ch'án nchia kixin tsi-toeko sín ch'án. ³⁰ A ntá tjejótjaxínko sín ch'án tí tjen tí ntamesa, ntá ntiha xranjon nkehe sine sín, ntá kuákja ch'án tí niqtja la kjuanchehe ch'án kjuasáyé Dios la kóchrít'o ch'án kuákja tí jehe sín. ³¹ Ntá tuénxín xraxinkaon sín ntá kjuátsqan sín tí jehe ch'án. Ntá tuénxín k'uitjáyankoá ch'án. ³² Ntá jehe sín itjo sín kichó sín ntáchro sín kixin:

—¿Á chaxínhya chéhe asénni tí kuíkqoni ch'án ntja kixin chronkaxín ch'án nkexrí t'axrjexín tí itén Dios tsíkjin sín ósé? —ichro sín.

³³ Ntá tuénxín k'uínkatjen sín kjan sín chjasin Jerusalén. A ntá ntaha k'uitja sín tí tejnko sín jnkokqá tjejé sín la ko tí í so sín. ³⁴ A ntá tí sín ntiha chrónka sín kixin:

—Chaxín tjechón Ìnchéni la mé ch'ín Simón tsík'ikon ch'án tí jehe ch'án —ichro sín.

³⁵ Ntá jehe sín kjaxin chrónka sín nkehe tsíkónhen tí ntja sákjuí sín kixin nkexrí kjuátsqanxín sín tí ch'ín Jesús tí kóchrít'o ch'án niqtja kjuanjon ch'án.

Titayá k'uíkuèn sín ikui ch'ín Jesús

(Mt. 28.16-20; Mr. 16.14-18; Jn. 20.19-23)

³⁶ A ntá jehe sín naxá tjejótjo sín kaín tí nkehe tsíkónhen, a ntá xríngahya ch'ín Jesús kjuák'e jnkosiné tí tjejé sín, nixjehé ch'án tí jehe sín ntáchro ch'án kixin:

—¿Á kjuaxróxin tjejorá? —ichro ch'án.

³⁷ A ntá jehe sín la imá chrakon sín kjuenkayáxin sín kixin k'uíkon sín ijnko xrintqoe chojni.

—Ách'e kjuachani —ichro sín.

³⁸ A ntá ntáche ch'ín Jesús tí jehe sín kixin:

—¿Nkekuènte chrakonrá? ¿Nkekuènte xíkaha tjenkayáxin asánrá? ³⁹ Tsehérá tjaná la ko totená kixin chaxín janhan. Itsérana la ko komárana, kixin ijnko xrintqoe chojni chónahya nto la ko chónahya hueso éxí t'ikonrá kixin chonta janhan —ichro ch'án.

⁴⁰ A ntá xíkaha ichro ch'án ntá kjuako ch'án itja ch'án la ko toté ch'án. ⁴¹ Ntá kjóté xíkaha k'uíkon sín la naxá kuítekakonhya sín kixin chéhe sín la ko chrakon sín. A ntá ch'ín Jesús ntáchro ch'án kixin:

—¿Á chontará ichrén nkehe sineni ntihi ní? —ichro ch'án.

⁴² Ntá chjéhe sín ch'án it'o koche tsíchjántaón xrohi la ko ijnko t'o katjé kotsjenta tjiá tsjen. ⁴³ A ntá jehe ch'án kuákja ch'án kjóne ch'án k'uíkonxín kon sín.

⁴⁴ Na ntá ntáchro ch'án kixin:

—Kaín tí nkehe k'uátsínka tí janhan mé k'uéntáxrjan tí naxá k'uék'ejóni senó; kixin t'ichjánxín tsoxiteyá kaín tí nkehe chrónka tí ley tsíkjin ch'ín Moisés la ko tí nke-

he tsíkjin tí sín profeta la ko tí nkehe ntáchro tí salmo kixin nkexrí tsgna janhan —ichro ch'án.

⁴⁵ Ntá kjuanjon ch'án kjuachaxin kixin tsienxín sín tí xroon itén Dios tsíkjin sín ósé. ⁴⁶ Ntá chénka ch'án sín kixin:

—Mé xíkaha nixja tí xroon itén Dios kixin tí Cristo la t'ichjánxìn ts'en, la nixin yaon t'ichjánxìn tsoxechón ch'án. ⁴⁷ A ntá t'ichjánxìn tsjakoxìn sín ihnjé ch'án ts-jankíxixín sín chjasin Jerusalén la ko chrókuinhin chojni kuenté chjasintajni kixin chrókuítqhe sín ijjié sín chrókuitekaon sín tí jehe ch'án kixin jehe ch'án mé chrókjuincheyaon tí ijjié sín. ⁴⁸ A ntá jahará mé tsochrónkaxínrá kixin xíkaha k'uíkonrá kaín tíha. ⁴⁹ Ntá tsochr'an janhan tí Nchakuen T'aná éxí tsintáchro

ch'án. Kjánchó chjasin Jerusalén ntahó titqhará tsox-iteyájjia ts'ayéhérá kjuachaxin tsixìn nkaya nkajní.

Ch'ín Jesús sákjuí ch'án nkaya nkajní

(Mr. 16.19-20)

⁵⁰ A ntá ch'ín Jesús sákjuíko sín ch'án k'uaxrjexín sín chjasin Jerusalén sákjuí sín chjasin Betania. Ntá kjuàya ch'án tja ch'án kjuíincheyaon ch'án tí jehe sín. ⁵¹ A ntá kjuixin kjuíincheyaon ch'án sín ntá k'uaxrjenta ch'án tí jehe sín ntá sákjuí ch'án nkaya nkajní. ⁵² A ntá jehe sín k'uíkon sín xíkaha, a ntá xraxinkaon sín ch'án, ntá kjan sín chjasin Jerusalén chéhe sín. ⁵³ A ntá kaín yaon tjejó sín nkaxenhen nínko tjanchehe sín Dios kjuasáya. Amén.

SAN JUAN

Tí nkexro chrónkaxín nkexrí tjen Dios mé k'óna ijnko chojni chjasintajni

1 12A ntá tí xrankíxixín naxa k'ónahya tí chjasintajni a na mé xráxín tjen tí nkexro chrónkaxín nkexrí tjen Dios, na mé Cristo tíha, na mé kjuák'eko Dios na mé kjaxin Dios tíha. 2 Tí xrankíxixín na mé tí nkexro xráxín kjuák'eko Dios 3 la ko kjuachaxin kuènte ch'án na mé k'ónaxín kaín xín nkehe síin jie. A ntá kohya ninkehó nkehe k'ónakoá, na mé kaín xín nkehe síin na mé k'ónaxín tí kjuachaxin kuènte ch'án. 4 Jehé ch'án na mé kjuanjón kjuachaxin kaín nkehe síchón síin chjasintajni la ko jehe ch'án mé xrohi t'inkaséyanxínhin jnkoinko ntje chojni chjasintajni. 5 Tí xrohi a mé t'inkaséyanxín tí sítié a. A ntá tí sítié a mé tjinkaon chrók'ók'anka tí xrohi a, kjánchó kjuachahya k'ók'anka.

6 Ntá kjuák'e ijnko chojni k'uętuęnen Dios kui mé it'in ch'án Juan. 7 Ikui ch'án kjuák'echrónka ch'án nkexrínchi tjen tí xrohi t'inkaséyanxín chjasintajni kíxin kaín xín chojni chrókuitekaon sín tí tjechrónka ch'án a. 8 A ntá tí ch'ín Juan la jehya tí xrohi a. Ó k'uítuęhón ch'án kui ch'án kíxin tsochrónka ch'án nkerí kuènte tí xrohi a. 9 A ntá tí xrohi chaxín t'inkaséyanxínhin kaín xín chojni na ó tsíki ch'án chjasintajni jie.

10 Kjuák'e ch'án chjasintajni na mé Dios tsíkijich'é-naxín ch'án chjasintajni tí kjuachaxin kuènte tí nkexro a na kjónté kjuák'e ch'án chjasintajni na naxa kjuát-sqanhya sín ch'án. 11 Ikui ch'án tí tjejó tí sín judío k'uaxrjeníxin ch'án, kjánchó kuítekakuenhya sín ch'án. 12 A ntá tí sín kuítekaon sín ch'án mé k'uáyéhe sín kjuachaxin kíxin ts'óna sín xjeen Dios. 13 Ntá yóęhya ts'axrjeníxin sín it'é sín chjasintajni ntiyhó la ko yóęhya ijnko it'é chrókjuenkayáxin ch'án chrókjuich'éna ch'án ijnko xjan. Náhí. Dios mé kjueyá ch'án nkexro ts'óna xjeen ch'án.

14 A ntá tí nkexro chrónkaxín nkexrí tjen Dios na mé k'óna ijnko chojni chjasintajni kjuák'enkákjanni ch'án na mé imá k'uétjuéhé ch'án chojni chjasintajni la ko imá ntoá chrónka ch'án. Kuayeni k'uíkoni kíxin imá t'ętoan ch'án kíxin jehe ch'án mé tí jnkokoqáxon Xjeen It'éni tjen nkaya nkajní na mé xíkaha imá t'ętoan ch'án.

15 Ch'ín Juan mé chrónka ch'án nkexrí tjen tí nkexro a. Ntáchro ch'án kíxin:

—Senó k'uékjákohará kíxin chr'éxin tsi tí nkexro a, na mé ęntsí má t'ętoan ch'án, a ntá janhan la náhí kíx-

in tí janhan naxa kohyana la tí jehe ch'án la ó xráxín tjen ch'án —mé xíkaha chrónka ch'ín Juan.

16 Kaínni ó k'uáyéęeni tí kjuachaxin jie tjetjanjon ch'án la ko ęntsí má tjencheyaonni ch'án la ko tjencheyaonni ch'án. 17 Dios mé tsík'ętuęnen ch'ín Moisés kíxin tsokjin ch'án tí ley. A ntá İnchéni Jesucristo mé kjuakoxin ch'án kíxin nkexrí imá tjuéhé Dios tí chojni chjasintajni. A ntá kaín nkehe chrónka ch'án mé ęntsí ntoá. 18 Kohya ninkekró chjasintajni k'uíkon sín Dios a. A ntá tí jnkokoqáxon Xjeen ch'án na mé xráxín jnkokoqá tjenkayáxinko It'é ch'án la mé jehe ch'án mé ó kjuínchekónoheni ch'án nkexrí tjen It'é ch'án nkaya nkajní.

Ch'ín Juan mé chrónka ch'án nkexrínchi tjen ch'ín Jesús

(Mt. 3.11-12; Mr. 1.7-8; Lc. 3.15-17)

19 Iso tí sín judío k'uéjó sín chjasin Jerusalén na ntá ichr'án sín iso chojni nchát'a la ko iso tí sín levita, ikui sín kuinixjehe sín tí ch'in Juan kjuanchankíhi sín ch'án kíxin:

—¿Nkexro tí jaha? —ichro sín.

20 Ntá kjuínchemáhya ch'án, ntáchro ch'án kíxin:

—Náhí. Jehya janhan tí Cristo —ichro ch'án.

21 Ntá xíkjanchankíhi sín ch'án inaá, ntáchro sín kíxin:

—¿Xá nkexro tí jaha? ¿Á jaha tí profeta Elías? —ichro sín.

Ntá ch'ín Juan la xíkjatęhe ch'án ntáchro ch'án kíxin:

—Náhí. Jehya janhan Elías —ichro ch'án.

Ntá xíkjanchankíhi sín ch'án inaá kíxin:

—¿Á jaha tí nkexro tjejóchónhenni itsi tsochrónka itén Dios? —ichro sín.

Na ntá ntáchro ch'ín Juan inaá kíxin:

—Náhí. Janhya —ichro ch'án.

22 Ntá kjuanchankíhi sín ch'án inaá kíxin:

—¿Ntá nkexro jaha? T'ichjánxin tsonoheni tsochénkani tí sín ichr'ánni ikuini. ¿Nkehe tsochrónka kíxin nkexro tí jaha? —ichro sín.

23 Ntá kjuátęhe ch'ín Juan ntáchro ch'án kíxin:

—Janhan mé tí nkexro tsjak'e nteje ts'ęya tsqxrjanka kíxin: "Takitjehérá ijnko ntja ntoí tsixin İnchéni" —mé xíkaha ichro ch'án kjuátęxin ch'án itén ch'ín Isaías k'uéchrónka xroon itén Dios ósé. †

24 A ntá tí sín fariseo mé tsíchr'án tí jehe sín kuikjan-chankíhi sín tí ch'ín Juan. 25 A ntá kjuanchankíhi sín ch'án kíxin:

† Isaías 40.3

—Ó ntáchrúa kíxin jahya tí Cristo tí nkexro tsaáxin chojni la ko jahya tí Elías, la ko jahya nijnko tí nkexro k'uéchrónka itén Dios ósé. ¿A ntá nkekuènté tíkíte chojni tí xíkaha? —mé ichro sín.

²⁶ Ntá ntáchrú ch'ín Juan kíxin:

—Janhan na mé ìntà ó tíkítexián chojni. Ó ntihi tjenkákjan ijnko nkexro naxá tjátsqanhyará. ²⁷ Jehe ch'án mé tsi ch'án nóton tí janhan. A ntá antsí má t'etqan ch'án, a ntá janhan na kénhyó. A ntá tósuàna chrókjuasintanka tí correa tokaté ch'án —ichro ch'án.

²⁸ Kain tíha mé tsíkónhen tí chjasin it'in Betábara tí nó tjitoxin yaon tóhe tí ntarío Jordán tí kjuák'e ch'ín Juan kúikíte chojni.

Ch'ín Jesús na mé éxí yóhē ijnko kolélo kuènte Dios

²⁹ A ntá tí yaon chr'éxin mé k'uíkon ch'ín Juan kíxin ó tjequi ch'ín Jesús. Ntá nixjehē ch'án tí sín tsíkóchjina ntáchrú ch'án kíxin:

—Tsjehérá tí nkexro tjequi mé tí Kolélo kuènte Dios jehe ch'án. Tíha mé tsjìinxín ijíé chojni chjasintajni.

³⁰ Janhan mé k'uéxrjanka kíxin tí iton tí janhan mé tsichréhe ijnko nkexro antsí t'etqan, a ntá janhan la kénhyó tétqan kíxin naxá kohyana na jehe ch'án la ó xráxín tjen ch'án. ³¹ Kjaxin janhan naxá chonhya nkexro tíha. A ntá xra ó k'uinka kjuak'é kuíkítexián chojni ìntà kíxin tí chojni nación Israel mé chrókjuát-sqanxín sín ch'án —ichro ch'ín Juan

³² Kjuintaxín ntáchrú ch'ín Juan kíxin:

—Ó k'uíkuan kíxin tí Nchakuen Dios mé k'uínkajinxin nkaya nkajni na éxí yóhē ijnko kontóá k'uínkajin la ko kjuák'e va ntoí tí tjen ch'án. ³³ A ntá janhan kjaxin naxá chonhya nkexro tíha. A ntá tí nkexro k'uetuanna kíxin tsjak'é tsíkítexián chojni ìntà mé tsíchronka ch'án kíxin tí Nchakuen Dios mé ts'inkajin tsjak'e ntoí tí tjen ijnko chojni na mé tsjatsqanxián janhan kíxin tí nkexro a mé tsjíkítexín ch'án Nchakuen Dios chojni. ³⁴ A ntá janhan jie mé ó k'uíkonxín kuan kíxin xíkaha kónhen tí jehe ch'án, a ntá xrjankaxián kíxin táha mé Xjeen Dios tíha —mé xíkaha chrónka ch'án.

Tí sín saoxín kjueyá ch'ín Jesús

³⁵ Tí yaon chr'éxin kjuák'e ch'ín Juan la ko iyó tí sín k'uájiko ch'án, ³⁶ a ntá xrinahya k'uíkon ch'án k'uátsínka ch'ín Jesús. Ntá ntáchrú ch'ín Juan kíxin:

—Tsjehérá tí nkexro i mé tí Kolélo kuènte Dios —ichro ch'án.

³⁷ Ntá kuínhin tí yóí sín k'uájiko ch'ín Juan na ntá sákjuíchréhe sín tí ch'ín Jesús. ³⁸ Ntá kuinkátjía ch'ín Jesús k'uíkon ch'án kíxin tinkáchréhe sín ntá kjuanchankíhi ch'án sín kíxin:

—¿Xá nkehe xritjéyará? —ichro ch'án.

Ntá ntáchrú sín kíxin:

—Maestro, ¿xá nketí nchia itjen? —ichro sín.

³⁹ Ntá kjuátēhe ch'án ntáchrú ch'án kíxin:

—Ìntá sátsjini ts'ikonrá nketí —ichro ch'án.

Ntá kuinkáchréhe sín ch'án k'uíkon sín nketí nchia kjuák'e ch'án ntá k'uéjóko sín ch'án kuenté tí kónjín kíxin kjuíji sín ntiha como las cuatro kónjín.

⁴⁰ A ntá yóí sín tsíkinhin sín tí chrónka ch'ín Juan ntá sákjuíchréhe sín tí ch'ín Jesús na mé ijnko mé it'in Andrés. Jehe ch'án chónka ch'án ijnko savé mé it'in Simón Pedro. ⁴¹ Na ntá tuénxín tí ch'ín Andrés sákjuíkjeýá ch'án tí savé ch'án Simón. Ntá chénka ch'án tí savé ch'án kíxin:

—Ó k'uitjani tí nkexro Mesías —ichro ch'án. Tíha mé t'axrjexín kíxin Cristo.

⁴² A ntá ch'ín Andrés mé kúikao ch'án tí savé ch'án Simón tí tjen ch'ín Jesús. Ntá ch'ín Jesús mé komá ch'án tí ch'ín Simón ntáchrú ch'án kíxin:

—Jaha mé Simón, it'á mé it'in Jonás. Ntá jie sjintak'ian Cefas —ichro ch'án. A ntá tí palabra Cefas la ko tí palabra Pedro na mé yóí mé t'axrjexín kíxin ixró tíha.

Ch'ín Jesús mé kjueyá ch'án tí ch'ín Felipe la ko tí ch'ín Natanael

⁴³ A ntá tí yaon chr'éxin mé sáchrókjui ch'ín Jesús tí estado Galilea. Ntá k'uitja ch'án tí ch'ín Felipe, na ntá ntáche ch'án kíxin:

—Chr'éhé tí janhan —ichro ch'án.

⁴⁴ A ntá tí ch'ín Felipe mé chjasén ch'án mé it'in Betsaida tí chjasén ch'ín Andrés la ko ch'ín Pedro. ⁴⁵ Ntá tí ch'ín Felipe mé sákjuíkjeýá ch'án tí ch'ín Natanael na ntá chénka ch'án kíxin:

—Ó k'uitjani tí nkexro tsi éxí k'uéchrónka tí ch'ín Moisés tí tsíkjin ch'án tí xroon chrónka tí nkehe k'uetqan Dios. Kjaxin tí sín k'uéchrónka tí itén Dios chr'éxin mé k'uéchrónka sín kíxin itsi tí nkexro a. Na ntá ó k'uitjani ch'án na mé jehe ch'án mé it'in Jesús, la it'é mé it'in José, la mé chjasén ch'án mé Nazaret —ichro ch'ín Felipe.

⁴⁶ A ntá ntáchrú ch'ín Natanael kíxin:

—¿Xá kjuánchí má chrókójina tí nkehe chrók'uaxrjexín tí chjasin Nazaret a? —ichro ch'án.

Ntá kjuátēhe ch'ín Felipe ntáchrú ch'án kíxin:

—Xrákiá ts'ikuan —ichro ch'án.

⁴⁷ Na ntá k'uíkon ch'ín Jesús kíxin ó kui tinkákóchjina ch'ín Natanael, na ntáchrú ch'án kíxin:

—Ó kui ijnko ch'ín chaxín israelita la kohya nijnko kjuach'ia xriko ch'án —ichro ch'án.

⁴⁸ Na ntá ntáchrú ch'ín Natanael kjuanchankíhi ch'án tí ch'ín Jesús kíxin:

—¿Nkexrí kíxin tjátsqanna? —ichro ch'án.

Ntá kjuátēhe ch'ín Jesús ntáchrú ch'án kíxin:

—Naxá nixjaahya tí ch'ín Felipe mé k'uíkuan tí jaha tjenkankiá tí nta t'óna to higo —ichro ch'án.

⁴⁹ Na ntá ntáchrú ch'ín Natanael kíxin:

—Maestro, jaha la chaxín tí Xjeen Dios tjen nkaya nkajni tsétuēnhén tí nación Israel —ichro ch'án.

⁵⁰ Ntá kjuátēhe ch'ín Jesús ntáchrú ch'án kíxin:

—Jehya tí nkehe ntáxrjan k'uíkuan tjenkankiá nta t'óna to higo, jehya táhó tsítékákonxian. Náhí. Chr'éxin xikí íjnko kjuaxroan antsí má jíé ts'ikuan, a ntá tíhi la kénhyó —ichro ch'án.

⁵¹ Kǵaxin ntáchro ch'ín Jesús kixin:

—Ijnko nkehe ntoá tsoxrǵanka kixin tsoxitǵeǵe tí nkajíní ts'íkonrá itsi itsǵé tí sín ángel kuènte Dios mé ts'ít'ótjen la ko ts'inkajin tí tǵén janhan mé tí Xǵeen Dios K'óna Chojni —ichro ch'án.

Chjasin Caná estado Galilea kóteǵe ijnko chojni

2 A ntá iní yǵon chr'éxin ntá kóteǵe ijnko ch'ín chjasin Caná estado Galilea. Mé koí tí iné ch'ín Jesús tsík'iyǵe sín tǵan la ntiha tǵen tǵan koí. ² Kǵaxin tsík'iyǵe sín tí ch'ín Jesús la ko tí sín k'uájiko ch'án kixin sátsǵi sín tí tsíkóteǵe sín ntiha. ³ Ntá ó tsík'anǵeǵe sín tí xranvino ik'uí sín na ntá tí iné ch'ín Jesús mé ntáche tǵan tí jehe ch'án kixin:

—Ó tsík'ànkǵa xranvino its'i sín —ichro tǵan.

⁴ Ntá ntáchro ch'ín Jesús kixin:

—Naná, ǵnkehe tǵonhen chrǵnka? Nǵxǵa kǵuixrakǵhya tí yǵon tsǵásian kǵuaxroan —ichro ch'án.

⁵ A ntá tí iné ch'án na mé ntáche tǵan tí sín ch'e xǵǵa kixin:

—Tí chrén nkehe chrók'ueǵuǵanhanrá ch'án chrókǵuǵnchexiteyará —ichro tǵan.

⁶ A ntá síin ntiha injon chǵi tsík'óna xǵǵo na mé tíha tǵjá ntǵa t'ònti sín kixin xǵǵaha mé ts'axrǵehe tí jǵe chóna sín koí, mé xǵǵaha kuinkáchónki tí sín judío. Na mé jnkoko chǵi mé tǵacha tikia ochenta litro la ǵo ciento litro ntǵa. ⁷ Ntá k'ueǵuǵnhen ch'ín Jesús tí sín ch'e xǵǵa kixin:

—Tíkǵarǵa ntǵa kaín tí chǵi a tǵǵokaón —ichro ch'án.

Ntá kǵuǵnchexiteyǵa sín kǵuǵnchekaón sín ntǵa jnkokojnkó tí chǵi a. ⁸ A ntá ntáche ch'ín Jesús tí jehe sín inaá kixin: —Tǵkǵá intsí ntǵa tǵjá chǵi tǵǵkuehé tí ch'ín t'ǵǵoǵan tí kia a —ichro ch'án.

Ntá xǵǵaha kǵuǵich'e sín kǵuǵnchexiteyǵa sín. ⁹ A ntá tí ch'ín t'ǵǵoǵan tí kia a mé tsǵjǵin ch'án tí ntǵa tsík'óna xranvino kǵjónǵe noehya ch'án nketí kǵuǵxin tí xran a. Jehó tí sín ch'e xǵǵa kǵuǵǵo sín mé nohe sín kixin jehe sín mé tsíkakitsǵe sín ntǵa. Ntá tí ch'ín t'ǵǵoǵan mé k'uǵyǵe ch'án tí ch'ín tsíkóteǵe. ¹⁰ Ntáche ch'án kixin:

—Xrǵxín tí sín tǵasin kia la senó tí xranvino náxǵjón tǵanjon sín na tió chrók'uihya tí sín tsíkóchǵina na ntá tǵanjon sín tí xranvino náxǵjónhya. A ntá jaha la náhí. Senó kǵuakéchǵina tí xranvino ǵntsí má náxǵjón, ǵ ntá tí jǵe tǵǵtǵánjuan jaha —ichro ch'án.

¹¹ Tí kǵuaxroan a kǵuǵich'e ch'ín Jesús chjasin Caná estado Galilea mé tí kǵuaxroan sǵoxín kǵuasin ch'án mé kǵuǵkǵoxín ch'án nkexrí imá jíé tí kǵuachaxin kuènte ch'án, ǵ ntá tí sín k'uájiko ch'án mé kuítekaon sín tí jehe ch'án.

¹² Ntá ó k'uátsínka kia, ǵ ntá sǵkǵuǵi ch'án chjasin Capernaum, sǵkǵuǵi ch'án iné ch'án la ko kǵíchó ch'án la ko tí sín k'uájiko ch'án, kóxrǵnhen sín ntiha iso yǵon.

Ch'ín Jesús mé kǵuǵnchetǵóá ch'án tí nǵnko jíé

(Mt. 21.12-13; Mr. 11.15-18; Lc. 19.45-46)

¹³ A ntá ó kuichǵina tí yǵon kia kuènte pascua kuènte tí sín judío. Ntá ch'ín Jesús sǵkǵuǵi ch'án chjasin Jerusalén. ¹⁴ Ntá nkaxenhen tí nǵnko jíé ntiha k'uíkon ch'án tí sín nchekǵixin koxinta la ko kolélo la ko kontóá.

La ko ntiha kǵaxin tǵejótǵaxin tí sín tǵjnkǵixín chichaon.

¹⁵ Ntá ch'ín Jesús mé kuákǵa ch'án ihǵo tsíxeǵe sín ntiha, kǵuǵich'éna ch'án ijnko chikoté, ntá kuakitsǵjǵin ch'án sín nkaxenhen nǵnko kaín xín sín la ko tí kolélo la ko tí koxinta. Na ntá tí ntamesa tǵjnkítóxixin sín tí chichaon mé kótéka ch'án tsíkǵaminkí xǵnjin tí chichaon a. ¹⁶ Ntá k'ueǵuǵnhen ch'án tí sín nchekǵi tí kontóá a kixin:

—Takítsǵjerǵa kaín tí nkehe a. Ch'énahyarǵa ijnko ntasin tí ntǵe T'aná ntihi —ichro ch'án.

¹⁷ Ntá xrǵxínkaon tí sín k'uájiko ch'án tí nkehe tsíkǵjin sín ósé kixin: “Éxí xrohi k'uákǵjen ǵsenná nǵnkǵavan kixin tí ntǵa tǵǵkosáyehya sín.” †

¹⁸ Ntá tí sín judío mé kǵuanchankíhi sín ch'án kixin:

—ǵXǵa nkerí kǵuaxroan tsǵásixián tsǵǵkǵoxian nketí kǵuachaxin chonta kixin xǵǵaha kǵuǵich'e tíhi? —ichro sín.

¹⁹ Ntá kǵuáteǵe ch'ín Jesús kixin:

—Tí ts'oxikarǵa tí nǵnko i ntá iníkoá yǵon la ó sǵt'ána nǵxin tsǵak'e inaá —ichro ch'án.

²⁰ Na ntá ntáchro tí sín judío a kixin:

—Cuarenta y seis nánó k'uéjǵo sín kǵuǵich'éna sín tí nǵnko i, ǵ ntá jaha ntáchrua kixin iní yǵon koá sǵich'éna inaá, ichrua —ichro sín.

²¹ Kǵjánchó kienxínhya sín kixin tí nǵnko ntáchro ch'ín Jesús la tí cuerpo kuènte ch'án. ²² Ntá tió kǵuǵxin xechón ch'án ntá xrǵxínkaon tí sín k'uájiko ch'án kixin xǵǵaha tsíchrónka ch'án, ntá kuítekaon sín tí xroon itén Dios tsíkǵjin sín ósé la ko tí nkehe tsíchrónka ch'án.

Ch'ín Jesús mé nohe nkehe tónhen ǵsén kaín xín chojni

²³ Tió kǵuák'e ch'ín Jesús chjasin Jerusalén tí kia pascua, ǵ ntá itsǵé chojni kuinkáchónki sín tí jehe ch'án kixin ó k'uíkon sín tí kǵuaxroan kǵuasin ch'án.

²⁴ Kǵjánchó ch'ín Jesús la kuítekakuenhya ch'án tí jehe sín kixin jehe ch'án la ó nohe ch'án jína nkexrí tónhen ǵsén jnkokojnkó chojni ²⁵ ǵ ntá t'ichǵánxǵienhya ch'án kixin ninkexró chróchenka ch'án nkexrí tǵenǵayǵxin chojni kixin ó kónohe ch'án kaín nkehe tónhen ǵsén kaín xín chojni.

Ch'ín Nicodemo kuinixǵeǵe ch'án tí ch'ín Jesús

3 Kǵuák'e ijnko ch'án kuènte tí sín fariseo a mé it'in ch'án Nicodemo. Jehe ch'án mé ijnko nkexro imá tǵjetoan kuènte tí sín Israel. ² A ntá ijnko tie kǵuǵchréǵe ch'án tí ch'ín Jesús a nixǵeǵe ch'án ntáchro ch'án kixin:

—Maestro, kónoheni kixin It'éní tǵen nkaya nkajíní mé tsíchr'án k'uinka tsǵǵkohéni kixin tí jehya Dios chrókǵuak'ekoa la xitǵahya chrókǵuásian kǵuaxroan jíé —ichro ch'án.

³ Ntá kǵuáteǵe ch'ín Jesús ntáchro ch'án kixin:

—A ntá tǵǵtǵjonka ijnko nkehe imá tǵjetoan. Tí nkexro tsokǵjéhya nǵxien mé xitǵahya ts'íkon tí kǵuachaxin ts'ǵǵoǵan Dios —ichro ch'án.

† Salmo 69.9

⁴ A ntá ch'ín Nicodemo kjuanchankí ch'án ntáchro ch'án kixin:

—Ó tádana, ¿nkexrí chrókokjína nixien? ¿Á chrók'uix-anhan tsee naná inaá ntá chrókokjína nixien ní? —ichro ch'án.

⁵ Ntá kjuátehe ch'ín Jesús ntáchro kixin:

—Ntá tsotjonka ijnko nkehe imá tjetooan. Jehó tí sín tsíkokjéxín ntá la ko kjaxin tsíkokjéxín Nchakuen Dios mé ts'áyéhe sín tí kjuachaxin kuènte Dios. ⁶ Tió ijnko xjan ts'axrjeníxin chojni na mé tí xjan mé chojni ó. A ntá tí Nchakuen Dios tsokjéxín nixien ijnko chojni na ntá ts'áyéhe sín tí Nchakuen Dios a. ⁷ Chrakonhya tí nkehe xrxanka kixin “Kaín chojni t'ichjánxin tsokjíhi nixien.” ⁸ Éxí yóhe tí tinhín tí chjéhe xrinto ntá noahya nketí kuixín tí xrinto la ko noahya nketí sátsji na mé kjaxin xikaha kónhen kaín tí nkexro tsíkokjéxín Nchakuen Dios —ichro ch'án.

⁹ Ntá xíkjanchankí ch'ín Nicodemo inaá kixin:

—¿Nkekuènté kixin xikaha chrókónhen? —ichro ch'án.

¹⁰ Ntá kjuátehe ch'ín Jesús ntáchro ch'án kixin:

—¿Jaha ijnko maestro imá t'etooan tí nación Israel ntá naxa tiénxinhya tí nkehe ní? ¹¹ Chaxín tjetjonka tí nkehe nõna la ko tí nkehe k'uikuán ntá titekákonnahya jaha. ¹² Tí nkehe tjetjonka la kuènte chjasintajni ó ntá kjónté la titekákonnahya jaha. ¿Ntá nkexrí chrókuítekáván tí chrótjonka nkehe kuènte nkaya nkajní? ¹³ Kohya í jnko nkexro k'uit'ótjen chjasin nkaya nkajní. Jehó tí Xjeen Dios K'óna Chojni mé kjuák'e chjasin nkaya nkajní la ko ntiha kuixín ch'án. ¹⁴ Éxí yóhe ch'ín Moisés tió k'uixín sín tí nteje, a ntá Dios mé k'uetooan kixin sinchekjanoya ch'án ijnko konche tsjak'enkanı ch'án ijnko nta, ntá xikaha kjuích'e ch'án kjuak'enkanı ch'án tí konche tí nta a komá sín tí konche ntá kuaá sín k'uénhya sín, † mé xikaha tsonhen tí Xjeen Dios K'óna Chojni mé t'ichjánxin kixin tsjak'enkáni ch'án ijnko ntacruz ¹⁵ kixin mé xikaha kaín nkexro tsinkáchónki tí jehe ch'án mé tsaá sín tsochón-ta sín kjuachón jnkochríxín.

Dios imá tjuèhe ch'án tí chojni chjasintajni

¹⁶ Kixin Dios mé imá tjuèhe ch'án chojni chjasintajni ntá kjuanjon ch'án jnkokoáxón Xjeen ch'án, kixin ntá jnkojnko chojni tsinkáchónki tí Xjeen ch'án mé ts'itjáyanhya sín tsochón-ta sín kjuachón jnkochríxín.

¹⁷ Chr'ánhya Dios tí Xjeen ch'án chjasintajni kixin sinchekjasóte chojni kixin tí jie kjuasin sín. Náhí. Ó jehí ichr'án ch'án tí Xjeen ch'án chjasintajni kixin sinchekaá chojni.

¹⁸ Na mé tí sín tsitekaon tí Xjeen Dios la tsjasótehya sín. A ntá tí sín titekakuenhya sín na mé ó kjuixin kjuínchekitogexín Dios tí ijje sín tsjasóte sín kixin titekakuenhya sín tí jnkokoáxón Xjeen Dios. ¹⁹ Na mé xikaha Dios sinchekjasóte sín jnkochríxín kixin ó kui tí nkexro t'inkaséyanxín chjasintajni na kjónté ntá antsí má tóxrjínhin sín tí sítíe a. A ntá tí t'inkaséyan la náhi kixin naxa tóxrjínhin sín tí nkehe jínahya tjejóch'e sín.

† *Números 21.9*

²⁰ Kaín tí sín tjejóch'e nkehe jínahya na mé tóxrjénhya sín t'inkaséyan chrókóchjinehya sín kixin tsonoxinhya tí nkehe jínahya tjejóch'e sín. ²¹ A ntá tí sín tjejóch'e sín tí jína a na mé chéhe sín tóchjinehe sín tí t'inkaséyan kuènte Dios kixin tsonoxín tí nkehe ch'e sín kixin ntá kaín xín chojni mé tsjatsqan sín kixin tjejóch'e sín tí nkehe tóxrjínhin Dios.

Ch'ín Juan Bautista chrónka inaá kuènte ch'ín Jesús

²² Na ntá chr'éxín ch'ín Jesús la ko tí sín k'uájiko ch'án na sákjuí sín estado Judea. Ntaha k'uéjoko sín ch'án kuikite ch'án chojni. ²³ Kjaxin ch'ín Juan kjuák'e ch'án chjasin Enón chjino tí chjasin Salim na mé ntiha kjuák'e kuikite ch'án chojni kixin ntiha mé yeé ntá siín. Na ntá nkáki sín kuikite sín. ²⁴ Mé xikaha kónhen naxa kjuák'echjinhya ch'ín Juan.

²⁵ Ntá tí sín k'uájiko ch'ín Juan la ko tí sín judío mé kjuachaxin kichó sín kixin nkexrí íchá jína chrókótjuáxin chojni, ichro sín. ²⁶ A ntá tí sín k'uájiko ch'ín Juan sákjuitsjehe sín ch'án chénka sín ch'án kixin:

—Maestro, tí ch'ín kjuák'ekoa tóhe ntarío Jordán, na mé tí nkexro tsíchronka kuènte ch'án, la mé itjen ch'án tikite ch'án chojni la ko kaín xín chojni mé tjichréhe sín ch'án —ichro sín.

²⁷ Na ntá ntáchro ch'ín Juan kixin:

—Tí chrókjuanjonhya Dios kjuachaxin ntá chrokjuahya chrók'uáyéhe chojni. ²⁸ Ó kuínhínra ntoá k'uéxrxanka senó kixin janhya tí Cristo. Náhí. Janhan ó kuítuannuá kuítónxián ntja tsóxrxanka kixin ó tsi ch'án. ²⁹ Éxí yóhe ijnko ch'ín tsotehe na mé jehe ch'án mé ts'áyéhe ch'án tí ichjién ch'án. A ntá tí ch'ín chóxin ch'án mé chéhe asén ch'án tjetinhin ch'án tjenixja tí ch'ín ts'áyéhe ichjién a. Mé xikaha janhan imá chàna kixin xikaha sítónhen kixin itsje chojni sítóchjinehe sín tí ch'ín Jesús tsinhin sín nkehe tí tjenixja ch'án. ³⁰ A ntá jehe ch'án t'ichjánxin antsí ts'etooan ch'án. A ntá janhan la kénhyó —mé chro ch'ín Juan.

Tí nkexro kuixín nkaya nkajní

³¹ Tí nkexro kuixín nkaya nkajní mé kaín nkehe t'etuènen ch'án. A ntá ijnko chojni kuènte chjasintajni ó mé chrónka kuènte chjasintajni ó. A ntá tí nkexro kuixín nkaya nkajní mé kaín nkehe t'etuènen ch'án.

³² Jehe ch'án mé chrónka ch'án tí nkehe tsík'ikon ch'án la ko tí nkehe tsíkinhin ch'án. Kjánchó kohya chojni titekaon sín tí nkehe chrónka ch'án. ³³ A ntá jnkojín nkexro titekaon sín tí nkehe chrónka ch'án na mé xikaha tjakoxín ch'án jie kixin chaxín ntoá chrónka Dios

³⁴ kixin tí nkexro ichr'án Dios mé nixja itén Dios kixin jehya intsíkoá tí Nchakuen Dios k'uáyéhe ch'án. Náhí. ³⁵ It'éni Dios mé tjuèhe ch'án tí Xjeen ch'án na mé xikaha ó tsíchjéhe ch'án kjuachaxin kixin kaín xín nkehe ts'etuènen ch'án. ³⁶ A ntá tí nkexro tsitekaon tí Xjeen Dios mé xikaha tsochón-ta sín tí kjuachón jnkochríxín. A ntá tí sín titekakuenhya sín tí Xjeen Dios mé tsochón-tahya sín tí kjuachón jnkochríxín xikaha. Tí sín a mé Dios sinchekjasóte sín jnkochríxín.

Ch'ín Jesús ikjo ch'án ijnko tjan samaritana

4 A ntá tí sín fariseo mé kónohe sín kixin antsí tsjé chojni chréhe sín tí ch'ín Jesús kujkíte ch'án sín na ntá tí chojni chréhe sín tí ch'ín Juan la kánhyó tsjé sín. ² Kjánchó jehya ch'ín Jesús kujkíte ch'án chojni. Méxra tí sín k'uájiko ch'án mé kujkíte sín chojni. ³ A ntá tíó kónohe ch'ín Jesús kixin xikaha tsíkinhin tí sín fariseo ntá k'uaxrjéxín ch'án tí estado Judea xíkjan ch'án estado Galilea ínaá.

⁴ Ntá t'ichjánxin ts'átsínka ch'án estado Samaria. ⁵ A ntá kjuíji ch'án ijnko chjasin mé it'in Sicar kuènte estado Samaria, mé chjino tí nonte tsíkjinchekitonhen ch'ín Jacob tí xjeen ch'án José. ⁶ La ó chjino tjen tí tòye takitsje chojni inta mé it'in Ìnté Jacob. Na ntá ó chonkixin kjui sín ntiha. Méxra tí ch'ín Jesús la imá kóxrjé ch'án kixin imá kjín tí ntja kjuixín ch'án ntá kjuák'etjaxín ch'án chrínta tí tòye takitsje sín inta. ⁷ Ntahó kuítóhe ch'án. A ntá tí sín k'uájiko ch'án sákjuí sín tí chjasin chjinaxón sákjuik'ena sín nkehe sineko sín ch'án. Ntá séhyó ikui ijnko tjan kuènte estado Samaria ikui tjan tsakitsje tjan inta. Ntá ntáchro tí ch'ín Jesús kixin:

—Chjina intsí ntá its'ia —ichro ch'án.

⁹ A ntá tí tjan samaritana mé kjuanchankíhi tjan tí ch'ín Jesús kixin:

—¿Nkekuènté kixin jaha ijnko chojni judío mé chrókjuanchana ntá kixin janhan ijnko chojni samaritana? —mé chro tí tjan a.

(Mé xikaha kjuanchankí tjan kixin tí sín judío mé ninkehó t'ikonhya tí sín samaritano.) ¹⁰ Na ntá ntáchro ch'ín Jesús kixin:

—Chrókónoha tí nkehe tjanjon Dios la ko chrókjuatsoan jaha nkexro tí tjetjanchaha ntá ntá chrókjuanchana ntá, ntá chrótjaha tí ntá tjechón chaxín —ichro ch'ín Jesús.

¹¹ Na ntá ntáchro tí tjan a kixin:

—¿Ntá nkexrí kixin xraahya jaha ninkehó nkehe tsakítsjeyá ntá kixin tí tòye i la imá njinka? ¿Ntá nkexrí tsochjina tí ntá tjechón tjimé? ¹² Tí nkexro k'uaxrjeníxinni mé Jacob mé kuítóeheni tí tòye tjíá ntá ntihi la ko kjaxín ik'uí ch'án tí ntá la ko kjaxín ik'uí tí xjeen ch'án la ko tí iko kuènte ch'án. ¿A ntá xá jaha la xá antsí má tjetjoan jaha, a ntá jehe ch'án la kénhyó ní? —mé kjuanchankíhi tjan tí ch'ín Jesús.

¹³ Na ntá kjuátehe ch'ín Jesús ntáchro ch'án kixin:

—Tí sín it'i sín tí ntá ntihi tí tòye i nántaxón its'en sín ntá ínaá. ¹⁴ A ntá tí sín its'i sín tí ntá sintakitonhan sín mé í ts'enhya sín ntá ínaá. Tí ntá sintakitonhan sín mé ts'óna éxí yóhe ijnko ntá ts'axrje nkaya asén sín mé tsinkákjanjon tí kjuachón tsochóna sín jnkochrín —ichro ch'án.

¹⁵ Ntá ntáchro tí tjan a ínaá kixin:

—Chjina tí ntá, a ntá ts'énhyana ntá ínaá la ko ts'inkahya ntihi tsakítsje ntá —ichro tjan.

¹⁶ Ntá k'uetjoan ch'ín Jesús kixin:

—Sátjia tjík'iyehé xiá ntá ts'inkará ntihi ínaá —ichro ch'án.

¹⁷ Ntá ntáchro tjan kixin:

—Chontahya xíná —ichro tjan.

Ntá ntáchro ch'ín Jesús kixin:

—Chaxín ntáchrúa kixin chontahya jaha xiá. ¹⁸ K'ué-chonta jaha in'ó xiá, a ntá tí ch'ín chonta jie jehya xiá. Na mé chaxín tí nkehe ntáchrúa kixin chontahya xiá chaxín —ichro ch'án.

¹⁹ Na ntá kuínhin tjan tíha ntá ntáchro tjan kixin:

—T'íkuan kixin jaha ijnko nkexro chrónka itén Dios.

²⁰ A ntá tí sín k'uaxrjeníxinni k'uixin ósé mé k'uéxraxinkakonxín sín Dios tí jna ntihi. Kjánchó jahará chojni judío mé ntáchrórá kixin tí njnko jíe chjasin Jerusalén kaín ni chróxraxinkakonxinni Dios —ichro tjan.

²¹ Ntá ch'ín Jesús ntáche ch'án tjan kixin:

—Títekavan kixin tjetsi tí hora a tsoxráxinkákonxín-hyará It'éni Dios tí jna ntihi la ko tsoxráxinkákonxín-hyará ch'án chjasin Jerusalén kjaxín. ²² Jahará chojni samaritano chonhyará tí nkexro xráxinkáonrá. Ntá kaín ni chojnini judío mé chóxinni tí nkexro xráxinkaonni. Méxra tí nkexro tsjakjiihin chojni tí jie yámá sín mé ts'axrjeníxín tí sín judío. ²³ Ntá tjetsi tí hora a na mé tí jie ó kui tí hora a na tí sín chaxín tjinkaon sín chróxraxinkaon sín It'éni la mé asén sín ó tsoxráxinkakonxín sín It'éni Dios. Dios mé tóxrjínhin ch'án kixin chojni xikaha chrókjuich'e sín chróxraxinkakonxín sín ch'án. ²⁴ Jehe Dios na mé nchakuen ó, a ntá tí sín chróxraxinkaon sín ch'án na mé t'ichjánxin kixin asén sín ó tsoxráxinkakonxín sín ch'án —mé xikaha chrónka ch'ín Jesús.

²⁵ A ntá ntáchro tí tjan a kixin:

—Ó nóna kixin itsi tí nkexro Mesías, tí nkexro a mé Cristo. Tíó tsi ch'án ntá tsjakoheni ch'án kaín xín nkehe —ichro tjan.

²⁶ Ntá ntáchro ch'ín Jesús kixin:

—Tí nkexro a la mé janhan tjetjuá jie —ichro ch'án.

²⁷ Na ntá tí sín k'uájiko ch'án mé kjanxin sín tí chjasin a, ntá chrakon sín k'uíkon sín kixin tjenixjehé ch'án ijnko chojni chjin. Kjánchó nijnko sín kjuanchankíehya sín ch'án kixin nkehe tjinkaon ch'án na nkekuènté nixjehé ch'án tí tjan a. ²⁸ A ntá tí tjan mé kjuak'e tjan tí tóa nonte ntá sákjuí tjan tí chjasin ntaha ntáche tjan tí sín ntaha kixin:

²⁹ —Íntará sátsjitsjeheni ijnko ch'ín chrónka ch'án kaín xín nkehe kjuít'a tí senó a. ¿Xá chrókójehya tí nkexro i Cristo? —ichro tjan.

³⁰ Na ntá tí chojni a mé xrákuaxín sín tí chjasin a ntá kuitsjehe sín tí ch'ín Jesús. ³¹ Naxa tihya sín nachrohe tí sín k'uájiko ch'án mé chrónóehé sín ch'án ntáchro sín kixin:

—Maestro, kjaxian chrókjónte nkehe —ichro sín.

³² Kjánchó ntáchro ch'án kixin:

—Ó chonta janhan nkehe siné. Jahará la kjá naxa noahyará —ichro ch'án.

³³ A ntá tí sín k'uájiko ch'án mé kjuanchankíhi sín kichó sín kixin:

—¿Xá jnkójín sín tsíkikao sín nkehe kjóne ch'án? —ichro sín.

³⁴ Kjánchó ntáchro ch'ín Jesús kixin:

—Éxí yóhē chrókjoné nkehe mé tí sít'a tí xrā la ko tsjixinna tí xrā kuente tí nkexro chr'ánna k'uinka.

³⁵ Ntáchrorá kixin: “Noó nitjō naxā t'itjāyan tsochón-henni ntá tsotjāni noatrigo”, ichrorá. Kjánchó ntáxrjan kixin chrótsjehérá tí no a kixin ó tsícha la ko ó tin-káxamá kixin ó jína chrótjāni. ³⁶ Tí sín ch'e xrā tjá sín mé tsoxenkehe sín. A ntá tí nkehe tjá sín mé ts'áyéhe kjuachón jnkochr'ín. Ntá tí sín k'uēnkā sín nonte la ko tí sín tjá sín jnkokón tsochéhe sín. ³⁷ Mé xikaha tsox-iteyá tí nkehe ntáchro sín kixin: “Ijnko nkexro mé t'ēnkā noa, a ntá ókjé sín tsotjā sín tí noa a”, ichro sín. ³⁸ A ntá janhan ichr'an tí jahará tsotjará ijnko nonte tsík'ēnkahyará. Na mé ókjé sín kjuích'e sín xrā ntá jahará tsjachará tí xrā kjuích'e tí sín a —ichro ch'án.

³⁹ A ntá itsjé tí sín samaritano kuente tí chjasin ntiha mé kjuankixin kuinkáchónki sín tí jehe ch'án kixin xikaha chrónka tjan kixin jehe ch'án ó chrónka ch'án kaín xín nkehe kjuích'e tjan tí senó a. ⁴⁰ A ntá tió kuínhin sín tí nkehe chrónka tjan ntá kui sín tí tjen ch'ín Jesús ntá chrónóehē sín ch'án kixin tsitōhe ch'án ntiha. Ntá kuítōhe ch'án ntiha iyó yaon. ⁴¹ Ntá itsjé sín kjaxin kuinkáchónki sín ch'án kixin tí nkehe kuínhin sín nixja ch'án. ⁴² Ntá ntáche sín tí tjan a kixin:

—Ntá jie jehya jehó tí nkehe chrónka kuítekaonni. Náhí. Tí jie ó kuínhinni nixja ch'án ntá kónoheni kixin jehe ch'án chaxín tí nkexro Cristo sinchekaá tí chojni chjasintajni —ichro sín.

Ch'ín Jesús kjuínchekitōhe jína ijnko xjeen ijnko ch'ín ch'ehe xrā gobierno

⁴³ A ntá k'uátsínka iyó yaon ntá ch'ín Jesús k'uaxr-jexín ch'án estado Samaria ntá sákjuí ch'án nó estado Galilea. ⁴⁴ A ntá jehe ch'án tsintáchro ch'án kixin tí nkexro chrónka itén Dios la tí chjasén sín mé tjikosáye-hya sín ch'án. ⁴⁵ Kjánchó tió kjuíji ch'án tí estado Galilea na mé k'uáyéhe sín ch'án la ko kjuikosáyehe sín ch'án jína kixin kjaxin sín sátsíkji sín tí kia pascua chjasin Jerusalén tsík'ikon sín kaín tí kjuaxroan kjuasixín ch'án tí kia ntiha.

⁴⁶ Ntá xíkjan ch'ín Jesús inaá chjasin Caná, estado Galilea, na mé ntiha tsíkjinchekjainca ch'án tí ntā tí xranvino a. Ntaha mé kjuák'e ijnko ch'ín ch'ehe xrā go-bierno. A ntá níhi tí xjeen ch'án ntoa itjen chjasin Capernaum. ⁴⁷ Ntá kuínhin tí ch'ín ch'ehe xrā gobierno kixin itjen ch'ín Jesús tí estado Galilea tsíkixín ch'án estado Judea ntá sákjuíchréhe ch'án chrónóehē ch'án tí ch'ín Jesús kixin sáchrókjuí ch'ín Jesús ntōe ch'án sinchekitōhe jína tí xjeen ch'án ó tjet'en xjan. ⁴⁸ Ntá ntáchro ch'ín Jesús kixin:

—Kja tí jahará tí chrók'uikonhyará kjuaxroan chrókjuásian la chrókuinkáchónkihyará tí janhan —ichro ch'án.

⁴⁹ Ntá chrónōa tí ch'ín ch'ehe xrā gobierno ntáchro ch'án kixin:

—¿Á chrókójínahya sáchrókjuíni ntōna jaí kixin xjan-na ó tjet'en? —ichro tí ch'ín a.

⁵⁰ Ntá kjuátehe ch'ín Jesús ntáchro ch'án kixin:

—Ikjan sátjia ntōa kixin tí xjaan na ó jína tjen jie —ichro ch'án.

Ntá kuítekaon ch'án nkerí ichro ch'ín Jesús ntá sákjuí ch'án. ⁵¹ A ntá kjuíji ch'án chjino ntōe ch'án ntá xri-nahya tí sín ch'ehe sín ch'án xrā kjuíxinhin sín ntja chrónka sín kixin:

—Xjaan la ó jína tjen —ichro sín.

⁵² Ntá kjuanchankíhi ch'án sín kixin nkehora kjuankixin kuítōhe xjan jína, na ntá chrónka sín kixin: —Ijna la una kónjín mé kjuíin tí sóa —ichro sín.

⁵³ Ntá kónohe tí it'é xjan kixin xikaha tí hora tsín-táchro ch'ín Jesús kixin tí xjeen ch'án na ó jína tjen. A ntá jehe ch'án la ko kaín tí sín siín ntōe ch'án mé kuinkáchónki sín tí ch'ín Jesús.

⁵⁴ Tíha mé tí yóxin kjuaxroan kjuasin ch'ín Jesús tió kuíxín ch'án estado Judea ikjan ch'án estado Galilea.

Ch'ín Jesús kjuínchekitōhe jína ijnko ch'ín tsík'en tōte chjasin Betesda

5 Ntá chr'éxin tí sín judío mé kjuasin sín ijnko kia na ntá ch'ín Jesús xíkjan ch'án chjasin Jerusalén inaá. ² A ntá ntaha chjino tí ntōja t'ixenxín kolélo chjasin mé tjen ijnko pila tóxyoyéya ntā mé nkiva hebreo tí ntā mé it'in Betesda. A ntá chrínta tí pila siín in'ó cuarto ntsínsí. ³ Ntaha tjejótsínka nchónhya chojni níhi, iso sín t'ikonhya la ko iso sín xitjahya tji la ko iso sín tsík'en tōté. Tjejóchónhen sín kixin nkehora tsinkí ntā ⁴ kixin nántaxón k'uínkajin ijnko ángel kjuíánkí ntā kjuínchekinkí ntā. A ntá tí nkexro senó tsjiánkí ntā mé tsitōhe jína kjónté cualquiera chin chóna. ⁵ A ntá nta-ha kjuák'e ijnko ch'ín na mé chóna ch'án treinta y ocho nánó níhi ch'án. ⁶ A ntá tió k'uíkon ch'ín Jesús kixin tjetsínka tí ch'ín a la ko kónohe ch'án kixin ósé níhi ch'án, ntá kjuanchankí ch'án kixin:

—¿Á tjinkávan tsitōha jína? —ichro ch'án.

⁷ Ntá ntáchro tí sijníhi kixin:

—Chóntahyani ninkexró tsjinkitsani tsjiánkíni ntā. A ntá tí tjinkaonni chrókjuíánkíni ntā la ntá ókjé nkexro tjitaón ntja tjíánkí ntā senó —mé chro tí sijníhi.

⁸ A ntá k'uētoan ch'ín Jesús kixin:

—Ijie la t'inkatjen, tjatsíyan kaniāa, itjia —ichro ch'án.

⁹ Ntá tuénxín kuítōhe ch'án jína, ntá kjuatsen ch'án kaniēe ch'án kjuankixin itji ch'án. Kjánchó yaon sábadō tíha mé tí yaon t'ok'éhe sín. ¹⁰ Mé xikaha tí sín judío ntáche sín tí ch'ín kuítōhe jína kixin:

—Ijie tí yaon t'ok'éheni ntá kohya kjuachaxin tsamá kaniāa —ichro sín.

¹¹ A ntá ntáchro tí ch'ín a kixin:

—Tí nkexro kjuínchekitōna jína mé k'uētuanna kixin tsjatsíyan kaniāna la ko sátsjia —ichro ch'án.

¹² Ntá kjuanchankíhi sín ch'án kixin:

—¿Nkexéhe tí nkexro k'uētuānhan kixin tsjatsíyan kaniāa la ko sátsjia? —ichro sín.

¹³ A ntá tí ch'ín tsíkítōhe jína na í kjuátsōanhya ch'án tí nkexro kjuínchekitōhe ch'án jína kixin ntaha la siín nchónhya chojni, a ntá ntahó k'uítjāyanxín ch'ín Jesús.

¹⁴ A ntá chr'éxin ch'ín Jesús xeta ch'án tí ch'ín a nkaxenhen tí njnko jié ntá ntáchro ch'án kixin:

—Tsjehe kixin ijie la ó jina tjen jaha la í tjásinhya jie inaá. A ntá tí tsjásian jie inaá a ntá antsí má jínahya tsonhan —ichro ch'án.

¹⁵ A ntá sákjuí tí ch'ín a ntá chénka ch'án tí sín judío kixin jehe ch'ín Jesús mé kjuínchekitohe ch'án jina.

¹⁶ Mé xikaha tí sín judío kjuankixin sín chónkíhi sín tí ch'ín Jesús la ko chrók'óyán sín ch'án kixin kjuínchekitohe ch'án chojni jina tí yaon t'ok'éhe sín. ¹⁷ Kjánchó ch'ín Jesús ntáche ch'án tí jehe sín kixin:

—Méxra T'aná naxa tjech'e ch'án xra. A ntá janhan kjaxin tjét'a xra —ichro ch'án.

¹⁸ Méxra xikaha tí sín judío antsí tjinkaon sín chrók'óyán sín ch'án kixin kuítékakuenhya ch'án tí ley kuente tí yaon t'ok'éhe sín la ko kjaxin ntáchro ch'án kixin tí It'é ch'án la mé Dios, mé xikaha ncheyóhe ch'án asén ch'án Dios.

Tí kjuachaxin chóna tí Xjeen Dios

¹⁹ Ntá ntáche ch'ín Jesús tí jehe sín kixin:

—Ijnko nkehe tjeoan tsotjonkará kixin tí Xjeen Dios nkaya nkajni tí jehó kjuachaxin kuente ó la mé xitjahya sich'e xra. Jehó tí xra t'ikon ch'án tjech'e It'é ch'án mé kjaxin ch'án xikaha ch'e ch'án. ²⁰ A ntá tí It'é mé tjuèhe tí Xjeen ch'án, la ko tjakohé ch'án kaín xín xra ch'e ch'án, la ko antsí tjeoan tí xra naxa tsjakohé ch'án kixin ntá tsochrakonrá kixin ts'ikonrá tí xra sich'e ch'án.

²¹ Tí It'é mé chóna kjuachaxin nchexechón tí sín tsík'en la ko chjéhe ch'án sín kjuachón. A ntá tí Xjeen kjaxin chóna kjuachaxin tsochjéhe kjuachón tí nkexro tjinkaon tsochjéhe ch'án. ²² A ntá It'é la í sinchekitoxínhya ch'án ijié ninkexró. Kaín tí kjuachaxin kuente ch'án chjéhe ch'án tí Xjeen kixin sinchekitoxín ch'án ijié chojni chjasintajni ²³ kixin ntá kaín chojni tsjikosáyehe sín tí Xjeen éxi yóhe tjikosáyehe sín tí It'é ch'án. Tí sín tjikosáyeheya tí Xjeen xikaha kjaxin tjikosáyeheya sín tí It'é kixin jehe ch'án mé tsíchr'án tí Xjeen.

²⁴ Ijnko nkehe tjeoan tsotjonkará kixin tí jnkójínrá tjejotinhínrá tí nkehe tjákua la ko tinkachónkirá tí T'aná, mé tí nkexro ichr'ánna, na mé xikaha ó chontará tí kjuachón la ko tsjasótiahýará, na mé kuítóhérá tí ntja chrók'uénxínrá, la ntá jie kjuankixinrá tsochontará tí kjuachón jnkochrín. ²⁵ Ijnko nkehe tjeoan tsotjonkará kixin ó tsi tí yaon, na mé jie tíha, mé xikaha tsonhen kixin tí sín tsík'en tsinhin sín tsonixja tí Xjeen Dios. A ntá tí sín tsitekaon sín na mé ts'ejóchón sín.

²⁶ Tí It'é mé chóna ch'án kjuachaxin tsjanjon ch'án tí kjuachón la ko jehe ch'án mé chjéhe ch'án kjuachaxin tí Xjeen kixin kjaxin tí Xjeen tsjanjon tí kjuachón ²⁷ la ko kjaxin chjéhe ch'án kjuachaxin tí Xjeen ch'án sinchekitoxín tí ijié chojni chjasintajni kixin jehe mé tí Xjeen Dios K'óna Chojni. ²⁸ Chrakonhyará tjétjonkará xikaha. Na mé ó tsi tí yaon kixin kaín tí sín tsík'en mé tsinhin sín tsonixja ch'án. ²⁹ A ntá ts'axrjéxín sín tí tòye la tí sín kjuích'e sín xra jina mé tsoxechón sín ntá tsochóna

sín tí kjuachón. A ntá tí sín kjuích'e sín xra jínahya na mé kjaxin tsoxechón sín ntá sátsji sín tsjasóte sín.

Tí kjuachaxin chóna ch'ín Jesús

³⁰ Tí jehó kjuachaxin kuéntana xitjahya sit'a ninkehó xra. A ntá jie ntákitoxián tí ijié éxi k'uetuanna T'aná. A ntá tí nkehe ntákitoxián la jina ntoá kixin tjínkakhonhya sit'a éxi tjínkavan. Náhí. Éxi tjínkaon T'aná, tí nkexro ichr'ánna, mé xikaha tjét'a. ³¹ A ntá tí chróxrjan-ka kixin nkexrí imá jina janhan la tíha la ninkehó kjuachaxin chróchóntahya. ³² Tjen í jnko nkexro tjechrónka nkexrí tjén janhan a ntá ó nòna kixin tí nkehe chrónka ch'án la sinkí. ³³ Jahará tsíkétuénhénrá chojni kjuíkjanchankíhi sín tí ch'ín Juan kixin nkexrínchi tjén janhan. A ntá tí nkehe tsíkjetéhe ch'án la chaxín ntoá tíha. ³⁴ Kjánchó chontixínhya tí nkehe tsochrónka nijnko chojni chjasintajni nkexrínchi tjén janhan. Jehí ntáxrjan tíha kixin jahará jina chrókuaará. ³⁵ Tí ch'ín Juan kjuák'e éxi yóhe ijnko xrohi kjuák'eche k'uínkaséyanxín la ko jahará kócháhará xikaha, kjánchó séhya kóxrjínhanrá tí xrohi a. ³⁶ Kjánchó siín nkehe antsí tjeoan tjakoxín nkexrí tjén janhan, a ntá kánhyó tjeoan tí nkehe tsíchrónka tí ch'in Juan. Tí xra tjét'a, mé tí xra kjuanjon T'aná sit'a tsjixinna tí xra, na mé tíha mé tjakoxín kixin chaxín T'aná tsíchr'án k'uínka. ³⁷ Kjaxin jehe T'aná, tí nkexro ichr'ánna, mé chrónkaxín ch'án nkexrí tjén janhan. A ntá jahará naxa kiénhyará tí nkehe nixja ch'án la ko k'uíkonhyará ch'án ³⁸ la ko kjaxin itén ch'án kuítóehya nkaya kjará kixin tjínkákonhyará tsítekáonrá tí Xjeen Dios tsíchr'án tsíki. ³⁹ Jahará nchekuáxinrá jina tí xroon tsíkjin tí sín tsíchrónka itén Dios ósé kixin ntáchrórá kixin ntaha ts'itjaxínrá tí kjuachón tsochontará jnkochrín. A ntá tí nkehe tsíkjin sín ósé mé chrónka kuente janhan. ⁴⁰ Kjánchó jahará tjínkákonhyará tsochjinará tí tjén janhan kixin chrók'uayéhérá tí kjuachón a.

⁴¹ Janhan na tjéyáhya kixin chojni chrókjuikosáyana sín. ⁴² A ntá janhan ó nòna kixin jahará la tjuèhyará Dios. ⁴³ Mé k'uinkaxian janhan tí kjuachaxin kuente T'aná. Kjánchó jahará la títekákonnahýará. A ntá tí chrókui í jnko nkexro kjuachaxin chrókuakitsjenínxín asén ó, a ntá tíha mé tjínkáonrá chrókuítekákonhénrá. ⁴⁴ ¿Nkexrí chrókuítekáonrá jahará kixin tjéyará kixin tí chojni chjasintajni chrókjuikosáyahará sín, a ntá tjéyáhyará tí kjuachaxin chrókjuanjon jnkokoá Dios? ⁴⁵ Tsontáchróhyará kixin janhan tsjánchá jíe tí jahará nkayakon T'aná. Náhí. Ch'ín Moisés mé tsjanchia ch'án jíe tí jahará kixin tsontáchrórá kixin jehe ch'án kuinkachónkirá. ⁴⁶ Kja tí jahará chrókuítekáonrá nkehe tsíntáchró ch'ín Moisés ntá chrókuítekáonrá tí janhan kixin tí xroon tsíkjin ch'án mé chrónka kuente tí janhan. ⁴⁷ A ntá tí títekákonhyará tí nkehe tsíkjin ch'án, ¿ntá nkexrí chrókuítekákonará nkehe ntáxrjan janhan? —ichro ch'án.

Ch'ín Jesús kjuanjon ch'án nkehe kjóne in'ó mil chojni
(Mt. 14.13-21; Mr. 6.30-44; Lc. 9.10-17)

6 A ntá chr'éxin ntá sákjuí ch'ín Jesús k'uátòye ch'án tí ntayaon Galilea na mé tí ntayaon Tiberias tíha. ² A ntá nchónhya chojni tinkáchréhe sín kixin k'uíkon sín tí kjuaxroan jíe kjuasin ch'án kjuínchekitóhe ch'án jína tí sinníhi. ³ A ntá jehe tí ch'ín Jesús chriin ch'án ijnko jnā na ntá ntaha kjuák'etjāxin ch'án la koí tí sín k'uájiko ch'án a. ⁴ A ntá í séhya ts'ixin tí kia pascua a mé kié tí sín judío a. ⁵ A ntá tí ch'ín Jesús k'uíkon ch'án kixin nchónhya chojni chriin sín kjuichréhe sín ch'án ntá kjuanchankíhi ch'án tí ch'ín Felipe kixin:

—¿Nketí chrók'ueñani nkehe sine kaín tí chojni a? —ichro ch'án.

⁶ Mé xíkaha ntáchro ch'án kixin siná nkehe tsixro ch'ín Felipe. A ntá tí ch'ín Jesús la ó nohe ch'án nkehe tí kjuaxroan tsjasin ch'án. ⁷ Ntá kjuátehe ch'ín Felipe ntáchro ch'án kixin:

—Kjonté doscientos chichaon denario chróchóntani chrók'uináxin tí niotjā la naxā chrókjuachahya chrók'úáyéhe jnkojnko sín tot'ò tí niotjā a —ichro ch'án.

⁸ A ntá ch'ín Andrés, ijnko tí sín k'uájiko ch'ín Jesús la savé mé ch'ín Simón Pedro mé ntáchro ch'án kixin:

⁹ —Ntíhi tjen ijnko xjan ntoá chóna in'ó niotjā tsík'óna noa cebada la ko chóna ch'án yaá koche. ¿Xá chrókjuacha tíhó kixin nchónhya chojni siín? —ichro ch'án.

¹⁰ A ntá ntáchro ch'ín Jesús kixin:

—Tétuēnhén tí sín siín a kixin ts'ixitjāxin sín —ichro ch'án.

A ntá nchónhya ika yoa siín na ntá ntaha k'uixitjāxin sín na mé éxi in'ó mil chojni k'uixin sín. ¹¹ A ntá ch'ín Jesús kuákja ch'án tí niotjā ntá kjuanchehe ch'án Dios kjuasáya ntá chjéhe ch'án tí sín k'uájiko ch'án. A ntá jehe sín k'óxikayéhe sín chjéhe sín kaín tí sín sítjāxin a. Xíkaha kjaxin k'óxikayéhe sín tí koche. A ntá sín k'jóné sín éxi tjinkaon sín. ¹² Kjuixin kjóne sín ntá k'uetuēnhen ch'ín Jesús tí sín k'uájiko ch'án ntáchro ch'án kixin:

—Tjénájínrá tí nkehe tot'ò síxèhe sín kixin ts'itjāyanhya ninkehó —ichro ch'án.

¹³ Ntá xíkaha jehe sín kjuenájín sín kjuínchekaón sín teyó ntaxra tí tot'ò tí in'ó niotjā tsík'óna noa cebada síxèhe sín tí kjuixin tsíkjine sín. ¹⁴ A ntá tí sín kjóne tí niotjā k'uíkon sín tí kjuaxroan jíe kjuasin ch'ín Jesús ntáchro sín kixin:

—Jehe ch'án mé chaxín tí nkexro tsíchr'án Dios kixin itsi tí chjasintajni tsjakohēni ch'án —ichro sín.

¹⁵ Kjánchó ch'ín Jesús mé kónohe ch'án kixin tjinkaon sín sáchrókjuiko sín ch'án chróchr'áxēnhen sín ch'án tí xrā rey kixin chrók'uetōan ch'án. A ntá jehe ch'án tjinkakonhya ch'án tíha ntá jehó ch'án sáxíkji ch'án nteje inaá kjuák'e ch'án ntiha.

Éxi ijnko ntā xíkaha kjuítaón ch'ín Jesús tí ntayaon
(Mt. 14.22-27; Mr. 6.45-52)

¹⁶ A ntá ó kóntó ntá tí sín k'uájiko ch'ín Jesús k'uínka-jjnxin sín jnā sákjuí sín chrínta ntayaon ¹⁷ k'uit'ótjen sín ijnko ntabárcō kjuankíxin sín ts'atòye sín ntayaon sátsji sín chjasin Capernaum. Na ó k'uixin tie na naxā kjanhya ch'ín Jesús. ¹⁸ Ntá kjuankíxin chjéhe xríntō tsankā ntá kjuankíxin tinkákjaminkí ntā. ¹⁹ A ntá tió kjuacha sín á in'ó o injon kilómetro ntá xrināhya k'uíkon sín tí ch'ín Jesús tinkákóchjinehe ch'án tí ntabárcō, éxi ijnko ntā tjetjitaón ch'án tí ntā, ntá k'uíkon sín ntá imá chrakon sín. ²⁰ Kjánchó ntáchro ch'án kixin:

—Janhan tíha. Chrakonhyará —ichro ch'án.

²¹ Ntá imá chéhe sín k'uit'ótjen ch'án tí ntabárcō. Ntá ó tuénxín kjuíji sín tí chjasin sátsji sín.

Tí chojni xritjeyá sín tí ch'ín Jesús

²² A ntá tí yāon chr'éxin na mé tí sín kuitōhe tóhe ntayaon na mé ó nohe sín kixin jnkokoáxón ntabárcō k'uékjak'e ntiha la ko ó nohe sín kixin ch'ín Jesús kjá ní sátsíkjhohya sín ch'án na mé k'uíkon sín kixin jehó tí sín k'uájiko ch'án sátsíkji sín. ²³ Kjánchó siín ntabárcō tixin chjasin Tiberias tinkákóchjinehe tí nó kjónexín sín tí niotjā kjuanchaxín ch'ín Jesús kjuasáyé Dios. ²⁴ A ntá tió k'uíkon sín kixin kohya ch'ín Jesús la ko kjaxin kohya tí sín k'uájiko ch'án, ntá jehe sín mé k'uit'ótjen sín iso ntabárcō ntá sákjuí sín chjasin Capernaum sákjuík-jeyá sín tí ch'ín Jesús.

Inchéni Jesús mé éxi niotjā tjanjon kjuachón

²⁵ A ntá tóhe ntayaon xéta sín tí ch'ín Jesús ntá kjuanchankíhi sín ch'án kixin:

—Maestro, ¿nkesá k'uinka ntihi? —ichro sín.

²⁶ Ntá kjuátehe ch'ín Jesús ntáchro ch'án kixin:

—Ó nōna kixin jahará tjéyará tí janhan kixin kjónterá niotjā kókjahará, la jehya kixin kiénxinrá tí kjuaxroan kjuásian. ²⁷ Chrókjuich'ehyará tí xrā chrók'uite tí nkehe chrókjónterá tjoka tsjeje ó. Náhí. Chrókjuéyará tí nkehe chrókjuejehya chrókjónterá chrók'uayéxínrá tí kjuachón jnkochrín. Tí nkehe tjanjon tí Xjeen Dios K'óna Chojni mé chrókjónterá kixin It'é ch'án mé tjāqoxin ch'án kixin tí Xjeen ch'án mé chóna kjuachaxién tí jehe ch'án —ichro ch'ín Jesús.

²⁸ A ntá kjuanchankíhi sín ch'án kixin:

—¿Nkexrí chrókjuich'eni chrokjuinchexiteyáni nkexrí tjinkaon Dios? —ichro sín.

²⁹ A ntá kjuátehe ch'ín Jesús ntáchro ch'án kixin:

—Dios mé tjinkaon ch'án kixin chrókuinkachónkirá tí nkexro tsíchr'án ch'án —ichro ch'án.

³⁰ Ntá kjuanchankíhi sín ch'án kixin:

—¿Nkehe tí kjuaxroan chrókjuáqóxianni chrók'uikonni kixin ntá chrókuitekaonni tí jaha? ¿Nkehe tí xrā ch'e jaha? ³¹ Tí sín tsík'axrjeníxinni k'uéjó sín ósé mé kjóne sín maná k'óna niotjā tió k'uixin sín nteje mé xíkaha tí xroon kuēnte Dios tsíkjin ijnko nkexro ósé

ntáchro kixin: "Kjuanjon ch'án tí nkehe kjóne sín mé niotja tsíkixin nkaya nkajní" † —ichro sín.

³² A ntá kjuátehe ch'ín Jesús ntáchro ch'án kixin:

—Ijnko nkehe tjetjoan tjonkará kixin jehya ch'ín Moisés kjuanjon tí maná k'óna niotja k'uínkajinxin nkaya nkajní. Náhí. T'aná mé tjetjanjon tí niotja chaxín jína k'uínkajinxin nkaya nkajní. ³³ Tí niotja tjanjon Dios mé tí nkexro k'uínkajinxin nkaya nkajní tjejóchónxin chojni chjasintajni —ichro ch'án.

³⁴ Na ntá kjuanchia sín kixin:

—Jaha Inchéni, jnkochrín chjehéni tí niotja a —ichro sín.

³⁵ A ntá ntáchro ch'ín Jesús kixin:

—Janhan mé tí niotja tjanjon kjuachón. Tí sín tóchjina sín tí janhan í ts'enhya sín kjinta, la ko tí sín tsitekaon sín tí janhan í ts'enhya sín ntá. ³⁶ Kjánchó éxí k'uétjonkará senó na ó k'uíkonrá tí janhan na kjónté naxá titekákonhyará. ³⁷ A ntá kaín tí sín chjina T'aná la tsochjina sín tí janhan. A ntá kaín tí sín tjejótochjinehe sín tí janhan la tsétuanyha sín kixin sátsji sín. ³⁸ Janhan k'uínkaxian nkaya nkajní jehya tí xra tóxrjina chrókuít'a. Náhí. K'uinka kixin chrókuít'a tí xra tóxrjinhin tí nkexro tsíchr'ánna. ³⁹ A ntá T'aná mé tí nkexro tsíchr'ánna mé tjinkaon ch'án kixin sjintak'itjányanhyha ninkexró tí sín chjina ch'án na mé tjinkaon ch'án kixin janhan mé sjintaxechón kaín sín tí yaon tsjixixín. ⁴⁰ Mé xikaha tjinkaon tí nkexro tsíchr'ánna kixin kaín tí sín ts'ikon sín tí janhan mé tí Xjeen Dios la ko tsitekaon sín tí janhan chrók'uáyéhe sín kjuachón jnkochrín. A ntá janhan sjintaxechón sín tí yaon tsjixixín —ichro ch'án.

⁴¹ A ntá tí sín judío kjuankixin sín kjonta sín tí ch'ín Jesús kixin tsintáchro ch'án kixin jehe ch'án mé tí niotja k'uínkajinxin nkaya nkajní. ⁴² Mé ntáchro sín kixin:

—¿Á jehya tí Jesús, it'é mé it'ín José, na mé chóxinni tí it'é la ko tí iné ch'án? ¿Ntá nkekuènté ntáchro ch'án kixin nkajní k'uínkajinxin ch'án? —ichro sín.

⁴³ Ntá kjuátehe ch'ín Jesús ntáchro ch'án kixin:

—Tjtoherá tjóntahyará tí janhan. ⁴⁴ Kohya nkexro chrókóchjina tí tjén janhan tí chrókuínkítsahya T'aná. A ntá tí sín tóchjina na mé sjintaxechón sín tí yaon tsjixixín. ⁴⁵ Na mé tí sín k'uéchrónka itén Dios ósé mé tsíkjin sín xroon ntáchro kixin: "Dios mé tsjakohé ch'án kaín chojni." †† A ntá kaín tí sín tsíkinhin tí nixja T'aná la ko kjuakohé ch'án sín mé sítóchjina sín tí tjén janhan.

⁴⁶ Jehya kixin itjen ijnko chojni tsík'ikon T'aná. Náhí. Jehó tí nkexro kujxin tí tjen Dios mé tsík'ikon ch'án Dios. ⁴⁷ Chaxín tí nkehe tjéxrjanka kixin tí sín titekaon sín tí janhan mé ó tsochóna sín kjuachón jnkochrín. ⁴⁸ Janhan na mé tí niotja tjanjon kjuachón. ⁴⁹ Tí sín k'uaxrjenixinrá k'uéjó ósé kjóne sín tí maná k'óna niotja tió k'uéjó sín nteje, a ntá kjónté ik'uén sín k'uítjayan sín. ⁵⁰ Tí nkehe xrxanka mé tí niotja k'uínkajinxin nkaya nkajní, a ntá tí sín sine tí niotja a mé ts'enhya sín.

⁵¹ Janhan mé tí niotja tjechón k'uínkajinxin nkaya nkajní. A ntá tí sín sine tí niotja a mé ts'ejóchón sín jnkochrín. Tí niotja tsjánjuan ts'ejóchónxin chojni chjasintajni mé ntóna tíha —ichro ch'ín Jesús.

⁵² A ntá tí sín judío mé sítjité sín itjo sín kichó sín ntáchro sín kixin:

—¿Nkexrí chrókjuanjon ch'án ntöe ch'án chrókjóneni? —ichro sín.

⁵³ A ntá kjuátehe ch'ín Jesús ntáchro ch'án kixin:

—Ntá tsotjonkará kixin tí sintehyará ntöe tí Xjeen Dios K'óna Chojni, la ko tí ts'ihyará ijnié ch'án, ntá tsochontahyará kjuachón jahará. ⁵⁴ Tí sinterá ntóna la ko it'irá jnina ntá tsochontará kjuachón jnkochrín la ko janhan mé sjintaxechónrá tí yaon tsjixixín. ⁵⁵ Kixin ntóna na mé chaxín nkehe ine chojni la ko jnina na mé chaxín nkehe it'i chojni. ⁵⁶ Tí sín ine ntóna la ko it'i sín jnina mé jnkokóá tjenkayáxinkian sín la ko janhan mé xríkian sín. ⁵⁷ T'aná tsíchr'án ch'án tí janhan mé chóna kjuachaxin, a ntá janhan mé tjechónxin tí jehe ch'án. Ntá tí sín sine tí ntóna mé ts'ejóchónxin sín tí janhan.

⁵⁸ A ntá tjénixja kuènte tí niotja k'uínkajinxin nkaya nkajní na mé yóehya tí maná tsík'óna niotja kjóne tí sín tsík'axrjenixinrá ósé kixin jehe sín na kjóne sín na kjónté k'uén sín. A ntá tí sinterá tí niotja k'uínkajinxin nkaya nkajní ntá ts'ejochónrá jnkochrín —mé chro ch'ín Jesús.

⁵⁹ Kaín tíha mé kjuakohé ch'án tí sín tsíkójnkotséxin tí njnko Israel chjasin Capernaum.

Tí nkehe chrónka ch'ín Jesús mé tjanjon kjuachón jnkochrín

⁶⁰ A ntá tió kuínhin sín tí nkehe kjuako ch'ín Jesús ntá itsjé tí sín k'uájiko ch'án ntáchro sín kixin:

—Imá xra tí nkehe chrónka ch'án. ¿Xá nkexro chrókuinhin tíha? —ichro sín.

⁶¹ A ntá kónohe ch'ín Jesús kixin xikaha tóxakonhen sín kíenxínhyha sín tí nkehe tsintáchro ch'án ntá kjuanchankíhi ch'án sín kixin:

—¿Á kjáxinrá tjinkákonhyará tsinhínrá tíhi? ⁶² ¿Ntá nkexrí tsonhen chrók'uikonrá kixin tí Xjeen Dios K'óna Chojni mé sátsji ch'án inaá tí nó tsíkixin ch'án tí tsíkjak'e ch'án ósé? ⁶³ Tí Nchakuen Dios mé tjanjon tí kjuachón, a ntá tí nto la ninkehó sínkíhyha. Na ntá tí nkehe tjetjonkará na mé kuènte tí Nchakuen Dios na mé tjejóchónxin chojni. ⁶⁴ Kjánchó isorá naxá titekákonahyará —ichro ch'án.

Mé xikaha ichro ch'án kixin tí xrankíxixín ó kónohe ch'án kixin nkexro tí sín tsitekakuenhyha sín ch'án la ko kónohe ch'án kixin nkexro sinchekji ch'án. ⁶⁵ A ntá ntáchro ch'án kixin:

—Méxra xikaha k'uétjonkará kixin ninkexró tsochjina tí tjén janhan tí tsjinkítsahya T'aná —ichro ch'án.

⁶⁶ A ntá kjuixin tíha ntá nchónhyha tí sín k'uék'ajiko ch'ín Jesús ntá xrinahya kútohe sín, í chrèhyha sín ch'án. ⁶⁷ Ntá kjuanchankíhi ch'án tí teyó sín k'uájiko ch'án ntáchro ch'án kixin:

—¿Á kjáxinrá tjinkáonrá xikaha sáchrókjuirá? —ichro ch'án.

⁶⁸ Ntá kjuátehe ch'ín Simón Pedro kixin:

—Jaha Inchéni, ¿nkekuènté tjanchankíhini á sáchrókjuini ókjé? Jaha tí tan chrónka a mé tsochón-taxínni kjuachón jnkochrín ⁶⁹ ntá kútekaonni ntá ó

† Salmo 78.24 †† Isaías 54.13

noheni chaxín kixin jaha tí Cristo mé Xjeen Dios tjechón —ichro ch'án.

⁷⁰ Ntá kjuátehe ch'ín Jesús ntáchro ch'án kixin: —Janhan kjuéyá tí kaín rá teyórá la ko jnkojinrá ntihi mé ts'ónará ijnko jínahya —ichro ch'án.

⁷¹ Tíha mé t'axrjexín tí ntáchro ch'ín Jesús chrónka ch'án kixin ch'ín Judas Iscariote, tíha it'é mé it'in Simón, mé ijnko tí teyó sín tsíkjeýá ch'án ntá kjónté sinchekji ch'án tí ch'ín Jesús.

Tí sín jnkokoá kichó ch'ín Jesús mé kuítekakuenhya sín ch'án

7 Ntá kjuixin tíha ntá k'uáji ch'ín Jesús tí estado Galilea. Chrók'uajihya ch'án tí estado Judea kixin tí sín judío tjinkaon sín chrók'óyán sín ch'án. ² Kjánchó ó kuichjina tí yaon kia ntá tí sín judío sich'éna sín itsjé it-s'van tsjasixín sín kia. ³ A ntá tí sín kichó ch'ín Jesús ntáche sín ch'án kixin:

—Chrókuítqahya ntihi. Sáchrókjuia estado Judea kixin ntá kjaxin tí sín chréhe tí jaha tjejó ntiha chrók'uikon sín tí kjuaxroan tsjásian. ⁴ Kixin tió tjinkaon ijnko nkexro kixin chojni tsochóxin sín ch'án ntá móhya chrókjuich'e ch'án xra. A ntá tí chaxín tjetjásian kjuaxroan la jehya mó chrókjuásian kjuaxroan. Náhí. Chrók'uikon kaín xín chojni síin chjasintajni —mé chro sín.

⁵ Xíkaha ntáchro tí sín kichó ch'án kixin kjaxin jehe sín titekakuenhya sín tí jehe ch'án. ⁶ A ntá kjuátehe ch'ín Jesús ntáchro ch'án kixin:

—Naxa kjuixrakáhya tí hora kuéntana tsjásian kjuaxroan. Ntá jahará la cualquier hora tjinkáonrá jína chrók'uikonrá kjuaxroan. ⁷ Tí sín chjasintajni xitjahya tsonínkakonhanrá sín tí jahará. Ntá janhan na imá nínkakonna sín kixin ntátjan sín kixin jehya jína tí nkehe tjejóch'e sín. ⁸ Jahará la sájtírá tí kia a. A ntá janhan la tjíhya kixin naxa kjuixrakáhya tí hora kuéntana —ichro ch'án.

⁹ Mé xíkaha ntáchro ch'án ntá kuítqhe ch'án estado Galilea.

Itjen ch'ín Jesús tí kia a

¹⁰ A ntá ó kjuixin sátsíkji tí sín jnkokoá kichó ch'ín Jesús ntá jehe ch'án la kjaxin sákjuí ch'án tí kia a kjánchó noxínhya xritjak'e ch'án. ¹¹ A ntá tí sín judío mé xriteyá sín ch'án tí kia a la ntáchro sín kixin:

—¿Xá nketí tjen tí ch'ín a? —ichro sín.

¹² A ntá itsjé sín ntiha mé kjo sín kichó sín kixin nkexrí tjen ch'án. Iso sín ntáchro sín kixin: “Jína ch'án”; kjánchó í so sín ntáchro sín kixin: “Jehya chojni jína ch'án, méxra imá ch'iyehé ch'án chojni”, ichro sín.

¹³ Kjánchó noxínhya kjo sín xíkaha kixin chrakonhen sín tí sín judío a.

¹⁴ A ntá ó kjuíji jnkosiné tí kia a ntá k'uixenhen ch'ín Jesús tí njnko jíé ntá kjuankixin ch'án kjuako ch'án. ¹⁵ A ntá tí sín judío chrakon sín komá sín ch'án ntáchro sín kixin:

—¿Xá nkexrí nohe tí ch'ín i nchónhya tí nkehe kixin tsíxrakqehya ch'án? —ichro sín.

¹⁶ Ntá kjuátehe ch'ín Jesús ntáchro ch'án kixin:

—Tí nkehe tjákua la jehya kuéntana na mé tí xra kuénte tí nkexro tsíchr'ánna k'uinka. ¹⁷ Tí jnkojinrá tjinkáonrá chrókjuinchexiteyéhérá éxí tóxrjinhin Dios la tsonohará á chaxín kuénte Dios tí nkehe tjákua o á kuéntana tíha. ¹⁸ A ntá tí nkexro tjako tí nkehe t'axrjenixin kja sín ó mé xíkaha ch'e kixin tjinkaon sín kixin tí chojni ó mé chróchóntehe sín ch'án kjuasáya. A ntá tí nkexro tjinkaon kixin tí chojni a mé chrókjuikosáyehe sín tí nkexro tsíchr'án ch'án na mé jehe ch'án mé tjako ch'án tí nkehe chaxín ntoá la ko ninkehó ch'iyahya tí jehe ch'án.

¹⁹ ¿Á jehya ch'ín Moisés tjáhará tí itén Dios chrókuítekáonrá? Kjánchó nijnkorá kuítekákuenhyará tí nkehe tsíkjin ch'án. ¿Méxra nkekuénte tjinkáonrá chrók'oyánrá tí janhan? —ichro ch'án.

²⁰ Ntá kjuátehe tí sín a ntáchro sín kixin:

—Jaha chonta ijnko nchakuen tí jínahya. ¿Xá nkexro chrók'óyán tí jaha? —ichro sín.

²¹ Ntá kjuátehe ch'ín Jesús ntáchro ch'án kixin:

—Jnkokoá kjuaxroan kjuásian tí yaon t'ok'éheni ntá chrakonrá. ²² A ntá ch'ín Moisés tsík'etqan kixin xjaanrá ntoá ita xjan xroye, (kjánchó jehya ch'ín Moisés kjuankixin ch'án kjuako ch'án tíha, na mé tí sín tsík'axrjenixinrá kjuankixin sín kjuako sín tíha). Mé xíkaha nchekará xjan tí xroye a kjónté yaon t'ok'éheni. ²³ A ntá xíkaha nchekará xjan xroye tí yaon t'ok'éheni kixin xíkaha chrókjuinchek'itjáyankíhyará ninkehó tí nkehe k'uetqan ch'ín Moisés, ¿ntá nkekuénte kixin nínkakonará tí janhan kixin kjuíntakítqha jína ijnko chojni tí yaon t'ok'éheni? ²⁴ Chrókjuanchahyará jíe kixin tí nkehe t'ikonxínrá ikonrá ó. Chrókjuenkayáxinrá tí nkehe jína tóxrjinhin Dios —mé chro ch'ín Jesús.

Ch'ín Jesús chrónka kixin nketí k'uaxrjenixin ch'án

²⁵ A ntá iso sín chjasin Jerusalén kjuankixin sín kjo sín kichó sín kjuanchankí sín kixin:

—¿Á jehya tí ch'ín a xritjeýá sín chrók'óyán sín? ²⁶ Ntá jie noxín tjen ch'án nixja ch'án kohya nínkexró nínkakonhen ch'án. Kjá tí síxreé titekaon sín kixin tí nkexro a chaxín Cristo tíha. ²⁷ Kjánchó ó noheni nketí tsíkjin ch'án. A ntá tió tsi tí nkexro Cristo ntá nínkexró tsonoehya nketí tsixin ch'án —ichro sín.

²⁸ A ntá ch'ín Jesús kjuák'ekjako ch'án tí njnko jíé ntá kuínhin ch'án kixin xíkaha kjo sín, ntá itsen nixja ch'án ntáchro ch'án kixin:

—Chaxín choxinrá tí janhan la ko nohará nketí chjasin tsíkjinian. Kjánchó jehya kixin k'uinka sintaxiteyá tí nkehe ntáchro asenná ó. Ó k'uinka kixin ichr'ánna tí nkexro chaxín tjechón tjen nkaya nkajní. Jahará naxa chonhyará tí nkexro a. ²⁹ Janhan la choxian ch'án kixin ntaha tsík'inkaxian na mé jehe ch'án mé tsíchr'ánna ch'án —ichro ch'ín Jesús.

³⁰ Ntá chrótsé sín ch'án chrókjuak'e chjina sín ch'án ntá kjónté nínkexró tséhya sín ch'án kixin naxa kjuan-

† Levítico 23.34

†† Juan 5.2-9

jonhya Dios kjuachaxin chrótsé sín ch'án. ³¹ Kjánchó it-sjé chojni kuítekaon sín tí jehe ch'án. A ntá ntáchro sín kixin:

—A ntá tió chrókui tí Cristo la, ¿á má jié kjuaxroan chrókjuasin ch'án, a ntá tí ch'ín i la kénhyó ní? —ichro sín.

Tí sín fariseo ichr'án sín chojni policia tsotsé sín tí ch'ín Jesús tsjak'echjina sín ch'án

³² A ntá tí sín fariseo kuínhin sín nkehe tí ntáchro chojni kixin nkexrí tjen ch'ín Jesús, ntá jehe sín la ko tí sín nch'at'á t'et'otan k'u'et'ughen sín iso sín policia kuénte njnko tsotsé sín ch'án tsjak'echjina sín ch'án.

³³ A ntá ntáchro ch'ín Jesús kixin:

—Kjixin í séhya tsjak'é ntihi ts'ejóni ntá sáxikjiya tí tjen tí nkexro ichr'ánna. ³⁴ A ntá jahará tsjéyará tí janhan na ts'itjahyará kixin xitjahya tsjasánrá tí tsjak'é janhan —ichro ch'án.

³⁵ A ntá tí sín judío kjuankixin sín kjuanchankíhi sín kichó sín kixin:

—¿Ntá nketí nó sátsji ch'án kixin tsjachahyani ts'it-jani ch'án? ¿Xá sátsjichréhe ch'án tí sín judío tjejóyák-jan tí sín nixja nkiva griego kixin ntá tsjakohé ch'án tí sín griego? ³⁶ ¿Nkexrí t'axrxén tí nkehe ntáchro ch'án kixin tsjeyáni ch'án na kjónté ts'itjahyani ch'án la ts-jachahyani tsjichréheni ch'án tí tsjak'e ch'án? —ichro sín.

Ntario tjechón

³⁷ A ntá tí yaon tsjixixín tí kia a mé tí yaon jié mé k'uínkatjen ch'ín Jesús, a ntá itsen nixja ch'án ntáchro ch'án kixin:

—Kja tí jnkojínrá ik'uénrá ntá xrákirá its'irá ntá. ³⁸ A ntá éxi ntáchro xroon Itén Dios kixin tí sín titekaon sín tí janhan na mé nkaya asén sín ts'óna ijnko río ts'axrje ñntá tjechón —ichro ch'án.

³⁹ Mé xikaha chrónkaxín ch'ín Jesús nkexrí tjen tí Nchakuen Dios ts'áyéhe tí sín tsitekaon sín tí jehe ch'án. Kjánchó naxá tihya tí Nchakuen Dios kixin ch'ín Jesús naxá sátiñhya ch'án nkaya nkajni.

Jnkokoáhya kjuenkayáxin tí chojni

⁴⁰ A ntá iso sín tió kuínhin sín tí nkehe ntáchro ch'ín Jesús ntá ntáchro sín kixin:

—Kja chaxín tí ch'ín i mé tí profeta ó tsíkji —ichro sín.

⁴¹ Ikjé sín ntáchro sín kixin:

—Jehe ch'án mé tí nkexro Cristo —ichro sín.

A ntá í so sín ntáchro sín kixin:

—¿Xá nkekuénté chrókjuixín Galilea tí nkexro Cristo?

⁴² Tí xroon tsíkjin sín ósé mé chrónka kixin tí nkexro Cristo mé ts'axrjenixín tí sín k'uaxrjenixín tí ch'ín rey David la ko tsjixín ch'án chjasin Belén mé tí chjasin k'uékjak'e ch'ín David —ichro sín.

⁴³ Mé xikaha jnkokoáhya kjuenkayáxin sín kain sín kixin nkexro tí ch'ín Jesús. ⁴⁴ Iso sín tjinkaon sín sáchrókjuiko sín ch'án chrókjuikjehe sín ch'án kjánchó ninkexró kjuích'ehya xikaha.

Tí síxreé kuítekakonhya sín tí ch'ín Jesús

⁴⁵ A ntá tí sín policia kuénte njnko mé kjan sín tí tjejó tí sín fariseo la ko tí sín nch'at'á t'et'otan. Ntá tí sín a mé kjuanchankíhi sín tí sín policia kixin:

—¿Nkekuénté kjuikoahyará ch'án? —ichro sín.

⁴⁶ Ntá kjuátehe tí sín policia kixin:

—Kohya ninkexró nixja éxi xikaha nixja tí ch'ín a —ichro sín.

⁴⁷ Ntá ntáche tí sín fariseo tí sín policia kixin:

—¿Á kjaxinrá kujtohéra kjuít'ayahará ch'án? ⁴⁸ ¿Á kuítekaon tí jehe ch'án jnkojín tí sín t'et'otan kuénténi o tí sín fariseo? ⁴⁹ A ntá tí sín a mé chónhya sín tí ley na mé tsjasóte sín —ichro sín.

⁵⁰ A ntá tí ch'ín Nicodemo, tí ch'ín kjuítsjehe tí ch'ín Jesús ijnko tie senó na mé jehe ch'án fariseo ch'án na ntá ntáche ch'án sín kixin:

⁵¹ —Tí ley kuénténi la kohya kjuachaxin sinchek-jasóteni ijnko chojni tí naxá kienhyani nkehe nixja ch'án la ko kienhyani tí jié kjuasin ch'án —ichro ch'án.

⁵² Ntá kjuátehe sín ntáchro sín kixin:

—¿Á kjaxian jaha kjuixian estado Galilea ní? Nchekuáxian tí xroon itén Dios ntá tsonoha kixin njnko tí sín k'uéchrónka itén Dios tsíkjiñhya sín tí estado Galilea —ichro sín.

Ijnko tjan kjuasin jie chóna ókjé chojni ntoa

⁵³ Ntá jnkojnko tí sín xika sín sákjuí sín ntóe sín.

8 Ntá ch'ín Jesús mé sákjuí ch'án tí jnā Olivo. ² Ntá tí kóyāon nchítjen ikjan ch'án k'uixenhen ch'án tí njnko jié a la ko kain sín tí chojni mé kóchjinehe sín ch'án. Ntá kjuák'etjāxin ch'án kjuankixin ch'án kjuako ch'án. ³ Ntá tí sín tjako tí ley la ko tí sín fariseo mé kjuikāo sín ijnko tjachjin kónoxixin kixin chóna tjan ókjé chojni ntoa. Ntá kjuak'ē sín tjan jnkosiné tí sín tjejó ntiha. ⁴ Ntá ntáche sín tí ch'ín Jesús kixin:

—Maestro, tí tjan i kónoxixin kixin kjuasin tjan jie chóna tjan ókjé chojni ntoa. ⁵ A ntá tí ley tsíkjin ch'ín Moisés mé t'et'otan kixin ixro chrók'óyānxinni tí chojni chjin xikaha ch'e. ¿A ntá jaha, nkechrua? —ichro sín.

⁶ Mé xikaha ichro sín kixin tjinkaon sín kixin ách'e ntoáhya chrókjuatehe ch'ín Jesús ntá chrókjuanchia sín jie. Ntá ch'ín Jesús mé k'uísén ch'án kjinxin ch'án dedo tja ch'án nonte a. ⁷ Ntá naxá tinkákjanchankíhi sín ch'án. Ntá k'uínkatjen ch'án k'u'et'otan ch'án kixin:

—Xá nkexro tí tjejorá ntihi chónahya ninkehó jie mé saoxín chróchjéhe sín tjan xro —ichro ch'án.

⁸ Ntá xík'isén ch'án inaá ikjin ch'án tí nche inaá. ⁹ Ntá tí sín a mé kuínhin sín tí nkehe k'u'et'otan ch'ín Jesús ntá kósuèhe sín kixin koí sín chóna sín jie, ntá jnkojnko jnkojnko sín, sásítji sín na mé saoxín tí ch'ín antsí má táda ch'án sákjuí ch'án, ntá kain tí sín í so a sákjuí sín kjāxin sín.

Ntá jehó tí ch'ín Jesús la ko tí tjan a kuít'ohé sín ntiha.

¹⁰ Ntá xrentoá ch'án la kjuanchankíhi ch'án tjan kixin:

—¿Nkekjá tí sín kjuanchia jie? ¿Á kohya ninkexró kjuínchekjasótiahya ní? —ichro ch'án.

¹¹ Ntá ntáchro tjan kixin:

—Náhi, Ìnchéni, ninkexró —ichro tjan.

Ntá ntáchro ch'ín Jesús kixin:

—Kjāxin janhan s̄intakjasótiahya. Sátjia la í tjásinhya jje ínaá —ichro ch'án.

Ch'ín Jesús mé xrohi t'inkaséyanxín chjasintajni

¹² Ntá ch'ín Jesús xínixjehē ch'án tí sín tsíkóchjina ínaá ntáchro ch'án kixin:

—Janhan mé xrohi t'inkaséyanxín chjasintajni. Tí tsochréhérá tí janhan ntá ts'ajirá tí t'inkaséyan tsochontaxínrá tí kjuachón a la ko í ts'ajihyará tí sítíe a —ichro ch'án.

¹³ Ntá tí sín fariseo ntáchro sín kixin:

—Jahvá tjechronka nkexrí tjen jaha na mé chaxínhya tíha kixin jahvá tjechronka —ichro sín.

¹⁴ Ntá kjuátehe ch'ín Jesús ntáchro ch'án kixin:

—Janhván tjetjōnkārá nkexrí tjeñ na kjónté chaxín xrxjanka kixin ó nōna nketí nó k'uinkaxian la ko nōna nketí sátsjiyá. A ntá jahará noahyará nketí k'uinkaxian la ko noahyará nketí sátsjiyá. ¹⁵ Jahará la éxí chojni chjasintajni ó tékará jje. A ntá janhan la tékahya jje ninkexró. ¹⁶ Kjánchó ntoá chrókjuintakitōaxián ijje chojni kixin jehya janhván t'ā tíha, T'aná tjejkian, na mé tí nkexro k'ueṭuanna k'uinka ntihi na mé jehē ch'án mé tjejkian ch'án ntihi ntakitōaxínkian ijje chojni. ¹⁷ A ntá tí ley tsíkjin ch'in Moisés mé ntáchro kixin tí tsonoxín iyó sín tsochrónka á chaxín xikaha tsíkónhen ntá chrókuitekaon chojni. ¹⁸ Ntá janhan na mé tjéxrxjanka nkexrí tjeñ janhan la ko kjāxin T'aná mé tí nkexro k'ueṭuanna k'uinka mé jehē ch'án kjāxin chrónka ch'án nkexrí tjeñ janhan —ichro ch'án.

¹⁹ Ntá kjuanchankíhi sín ch'án kixin:

—¿Nketí tjeñ It'á? —ichro sín.

Ntá kjuátehe ch'ín Jesús ntáchro ch'án kixin:

—Jahará la chonhyará tí janhan la ko kjāxin chonhyará T'aná. Tí chrókóchoxinrá tí janhan ntá kjāxin chrókóchoxinrá tí T'aná —ichro ch'án.

²⁰ Mé xikaha chro ch'ín Jesús tí kjuák'ekjāqōxin ch'án tí nínko jje chjino ntacajón tjetóxyéya chichaon tjanjon sín. Kjánchó ninkexró tséhya sín ch'án kixin naxā kjuixrakáhya tí hora tsotsé sín ch'án.

"Xitjahya tsjasánrá tí nó sátsjiyá janhan"

²¹ Ntá ch'ín Jesús ntáche ch'án sín ínaá kixin:

—Ntá sátsjiyá janhan. Ntá jahará tsjéyará tí janhan, ntá tió ts'énrá naxā yamárá ijjará. Xitjahya tsjasánrá tí nó sátsjiyá janhan —ichro ch'án.

²² Ntá ntáchro tí sín judío ikjo sín kichó sín kixin:

—¿Á ts'óyán ch'án asén ch'án kixin xikaha ntáchro ch'án kixin xitjahya tsjijini tí nó sátsji ch'án? —ichro sín.

²³ Ntá ntáche ch'ín Jesús tí jehē sín kixin:

—Jahará la nonte ntihi k'uaxrxjénixínrá. A ntá janhan la nkaya nkajni k'uaxrxjénixian. Jahará la kuènte chjasintajni ntihi. A ntá janhan la janhya kuènte chjasintajni.

²⁴ Mé xikaha tjonkará kixin tió ts'énrá naxā tsochontará ijjará kixin tí tsitekákonhyará tí janhan, mé tí

nkexro xráxín tjeñ, † ntá kjónté ts'énrá naxā tsochontará tí ijjará —ichro ch'án.

²⁵ Ntá kjuanchankí sín ntáchro sín kixin:

—¿Nkexro tí jaha? —ichro sín.

Ntá kjuátehe ch'ín Jesús ntáchro ch'án kixin:

—Tí xrankíxixín kjuankíxian tjonkará kixin nkexro tí janhan. ²⁶ Itsjé nkehe chonta chróntáxrjan kixin chrókjuintakitōaxián tí jje chontará. Kjánchó tí nkexro k'ueṭuanna k'uinka na mé tí nkehe chrónka ch'án la chaxín. A ntá jehó tí nkehe kuínhan chrónka ch'án mé tjákōhā tí sín chjasintajni —ichro ch'án.

²⁷ Kjánchó jehē sín mé kíenxínhya sín kixin nixja ch'án kuènte It'é ch'án tjeñ nkaya nkajni. ²⁸ A ntá ntáchro ch'án kixin:

—Tió s̄inchek'it'ótjenrá noi tí Xjeen Dios K'óna Chojni, ntá tsonohará kixin janhan mé tí nkexro xráxín tjeñ. †† Ntá tsonohará kixin jehya janhan tētoan tí xrxjtét'ā. Náhi. Jehó tí nkehe kjuakōna T'aná mé tjetjākua. ²⁹ Tjékian tí nkexro k'ueṭuanna k'uinka kixin jehí xráxín T'aná la kuítōnahya janhván kixin xráxín ntāxiteyáhā tí nkehe tóxrjínhjn ch'án —ichro ch'án.

³⁰ Mé xikaha ntáchro ch'án ntá nchónhya chojni kuítekaon sín tí jehē ch'án.

Nkexrí tjejó tí sín xjeen Dios la ko nkexrí tjejó tí sín chrokjuahya tsitōhe sín ijje sín

³¹ Ntá nixjehē ch'ín Jesús tí sín judío kuinkáchónki sín ch'án ntáchro ch'án kixin:

—Tí tsitōéhyará tí tan kjuákoohará ntá jahará chaxín discípulo kuèntāna ³² la ko tsjātsōanrá tí nkehe chaxín, la ko tí nkehe chaxín mé tsotjāhará kjuachaxin tsaáxinrá, a ntá tsokohya nkehe ts'inkákonhēn —ichro ch'án.

³³ Ntá kjuátehe sín ntáchro sín kixin:

—Jeheni mé tsík'axrxjénixinni ch'ín Abraham na í xráxín kohya nkexro k'ueṇa tí jeheni. ¿Nkekuènté ntáchrúa jaha kixin ts'áyéhēni kjuachaxin tsaáxinni? —ichro sín.

³⁴ Ntá ntáchro ch'ín Jesús kixin:

—Tjetoan tí nkehe tjetjōnkārá kixin tí sín tjasin jje mé éxí chojni k'uíná chrokjuahya tsitōhe sín ijje sín. ³⁵ A ntá ijnko chojni k'uíná la jnkochríxínhya tsjak'e ch'án tí ntōe tí nkexro a. A ntá tí xjeen tí nkexro na mé jnkochríxín tsitōhe ntihi. ³⁶ Ntá tí tsaáxinrá tí Xjeen Dios ntá chaxín tsochontará kjuachaxin, a ntá tsokohya nkehe ts'inkákonhēn. ³⁷ Ó nōna kixin jahará tsík'axrxjénixínrá ch'ín Abraham. Kjánchó tjinkáonrá chrók'oyánrá tí janhan kixin titekákonhyará tí nkehe tjéxrxjanka. ³⁸ Janhan xrxjanka tí nkehe k'uikuān kixin nkexrí tjeñ T'aná. A ntá jahará tjejonchexiteyéhérá tí nkehe kuínhínrá chrónka it'árá —ichro ch'án.

³⁹ A ntá jehē sín kjuátehe sín ntáchro sín kixin:

—It'éni mé ch'ín Abraham —ichro sín.

Kjánchó ntáchro ch'ín Jesús kixin:

—A ntá tí jahará chrókóchaxín xjeen ch'ín Abraham ntá chrókjuich'erá éxí kjuích'e ch'án. ⁴⁰ A ntá tjetjōnkārá tí tan chaxín kuínhan chrónka Dios na kjónté chrók'oyánrá tí janhan. A ntá ch'ín Abraham xikahya

kjuích'e ch'án. ⁴¹ Jahará tjejoch'erá éxí kjuích'e it'ará —ichro ch'án.

Ntá ntáchro sín kixin:

—Jehya k'ónamá tí jeheni. Náhí. Chóntani jnkokoá It'éni mé Dios —ichro sín.

⁴² Ntá ntáche ch'ín Jesús tí jehe sín kixin:

—Tí chrókóchaxín kixin Dios mé It'ará la ntá chrótjuanará kixin janhan kjaxin k'uaxrjeníxina Dios k'uinkaxian tí tjen ch'án. Jehya kixin janhván k'uinka. Náhí. Dios mé ichr'ánna k'uinka. ⁴³ ¿Nkekuénté kixin tiénxinyará tí nkehe tjonkará? Jehí tjinkákonhyará chrókuinhínrá tí nkehe xrjanka. ⁴⁴ Jahará mé xjeen Tsochren la ko jahará tsík'axrjeníxínrá ch'án la ko tjinkáonrá sijnchexiteyará tí nkehe tjinkaon ch'án. Tsochren mé xrankíxín kjuaya ch'án. Nunca k'uénixja ch'án ntoá. Xrácín ch'ia ch'án kixin xikahó tjenkayáxin ch'án. Jehe ch'án mé it'é kaín tí kjuach'ia. ⁴⁵ A ntá janhan tjétjonkará nkehe ntoá ntá titekáonnahará. ⁴⁶ ¿Á tjejorá jnkojínrá nohará nkerí jje kjuásian janhan? A ntá tí ntáxrjan tí nkehe ntoá, ¿ntá nkekuénté titekáonnahará? ⁴⁷ Tí sín tinkáchónki Dios mé tjinkaon sín chrókuinhín sín itén Dios. A ntá jahará la tinkáchónkihyará Dios ntá tjinkákonhyará chrókuinhínrá itén ch'án —ichro ch'ín Jesús.

Cristo la ó xrácín tjen ntá chr'éxin kjuák'e ch'ín Abraham

⁴⁸ A ntá tí sín judío ntáche sín tí ch'ín Jesús kixin:

—Chaxín ntoá ntáchroni kixin jaha mé ijnko chojni samaritano la ko chonta ijnko nchakuen tí jínahya —ichro sín.

⁴⁹ Ntá kjuátehe ch'ín Jesús ntáchro ch'án kixin:

—Janhan chontahya ninkehó nchakuen tí jínahya. Tí xrá t'a mé tjikosáyaha T'aná. Ntá jahará mé chontahyará kjuasáyé tí janhan. ⁵⁰ Janhan na tjéyáhya nkexro tsjikosáyana. Kjánchó itjen ijnko nkexro tjinkaon ch'án chrókjuikosáyana chojni, a ntá jehe ch'án mé tsjanchia jje tí sín kuítékakonhya. ⁵¹ Imá tjetoan tí nkehe tjétjonkará kixin tí tsítékáonrá tí nkehe tjákua la í ts'énhyará —ichro ch'án.

⁵² Ntá kjuátehe tí sín judío ntáchro sín kixin:

—Ntá ó noheni kixin chaxín chonta ijnko nchakuen tí jínahya. Ch'ín Abraham la ko kaín tí sín k'uéchrónka itén Dios ósé la mé ik'uén sín. Ntá jaha ntáchrúa kixin tí tsítékáonni tí nkehe tjákua jaha ntá í ts'énhyani, ichrua. ⁵³ ¿Xá imá tétqan jaha la ntá kánhyó t'etqan it'éni Abraham? Jehe ch'án la ik'uén ch'án la ko kjaxin ik'uén tí sín k'uéchrónka itén Dios ósé. ¿Xá nkexro tí jaha, ichrua? —mé chro sín.

⁵⁴ Ntá kjuátehe ch'ín Jesús ntáchro ch'án kixin:

—Tí chrókjuíkosáyaha asenná na mé sínkíhya tíha. A ntá T'aná mé tjikosáyana ch'án na ntá jahará ntáchrórá kixin jehe ch'án mé Dios kuéntará.

⁵⁵ Kjánchó chonhyará ch'án. A ntá janhan choxian ch'án. Tí chróntáxrjan kixin janhan chonhya ch'án ntá chrókóyóna tí jahará chrókjuít'ayahará. Kjánchó janhan na choxian ch'án la ko ntáxiteyáha tí nkehe t'etqan ch'án. ⁵⁶ Ch'ín Abraham tí nkexro tsík'axrjeníxínrá

la imá kóchéhe ch'án kixin ts'ikon ch'án tí yaon ts'inka janhan. Ntá ó kjuixin k'uíkon ch'án ntá kóchéhe ch'án —ichro ch'án.

⁵⁷ A ntá tí sín judío ntáche sín tí ch'ín Jesús kixin:

—Jaha naxa chontahya cincuenta nánó, ¿na ntá nkekuénté ntáchrúa kixin ó k'uíkuan tí ch'ín Abraham? —ichro sín.

⁵⁸ Ntá kjuátehe ch'ín Jesús ntáchro ch'án kixin:

—Imá tjetoan tí nkehe tjétjonkará kixin naxa kohya ch'ín Abraham mé xrácín itjen janhan —ichro ch'án.

⁵⁹ Ntá kuákja sín xró chróchjéhe sín tí ch'ín Jesús.

Kjánchó kjuák'emá ch'án nínko ntá chr'éxin k'uaxrjéxin ch'án ntiha. K'uátsínka ch'án jnkosiné tí tjejó sín sákjuí ch'án.

Ch'ín Jesús kjuínchekitohe jína ijnko ch'ín tsíkokjéxin t'ikonhya ch'án

9 K'uátsínka sín ijnko ntja ntá k'uíkon ch'ín Jesús ntiha tjen ijnko ch'ín tsíkokjéxin t'ikonhya ch'án.

² Ntá tí sín k'uájiko ch'ín Jesús kjuanchankíhi sín ch'án kixin:

—Maestro, ¿Nkekuénté tsíkokjéxin ch'án t'ikonhya ch'án? ¿Á ijje it'é o ñé ch'án o á ijje ch'án? —ichro sín.

³ Ntá kjuátehe ch'ín Jesús ntáchro ch'án kixin:

—Jehya ijje ch'án la ko jehya ijje it'é la ko ñé ch'án. Náhí. Jehí xikaha tsíkonhen ch'án kixin tí kjuachaxién Dios tsjakoxin kixin tsitoxin ch'án jína. ⁴ Naxa nchakotjin t'ichjánxin sít'a tí xrá tjinkaon tí nkexro tsíchr'ánna. Ntá ts'ixin tie ntá kohya ninkexró tsjacha sich'e xrá. ⁵ Naxa itjen janhan mé ntihi chjasintajni na mé janhan xrohi t'inkaséyanxín tí chjasintajni —ichro ch'án.

⁶ Ntá ó kjuixin ntáchro ch'án tíha ntá kjuíte ch'án ntaten ch'án intsi nche k'óna nchet'o ntá kuátematóxin ch'án ikon tí ch'ín t'ikonhya. ⁷ Ntá k'uetuñhen ch'án tí ch'ín t'ikonhya kixin:

—Sátjia tí pila tjiá ntá it'in Siloé t'ontia kuan —ichro ch'án. (A ntá tí ihnjé Siloé mé t'axrjéxin nkívee sín kixin K'uítuñhen.)

Ntá sákjuí tí ch'ín t'ikonhya k'ónti ch'án ikon ch'án ntá kjan ch'án k'uíkon ch'án. ⁸ Ntá tí sín ntqo chjinaxón ntqo ch'án la ko tí sín k'uék'ikon sín kixin t'ikonhya ch'án mé ntáchro sín kixin:

—¿Á jehya tí ch'ín i k'uékjak'etjaxin ch'án k'uékjan-chak'á ch'án? —ichro sín.

⁹ Iso sín ntáchro sín kixin:

—Kjá chaxín jehe ch'án —ichro sín.

Ikjé sín ntáchro sín kixin:

—Náhí, jehya jehe ch'án. Tóyóhó ch'án tí ch'ín a —ichro sín.

Kjánchó jehe ch'án kjuátehe ch'án kixin:

—Chaxín janhan —ichro ch'án.

¹⁰ Ntá kjuanchankíhi sín ch'án kixin:

—¿Nkexrí kixin jaí t'ikuan jaha? —ichro sín.

¹¹ Ntá kjuátehe ch'án ntáchro ch'án kixin:

—Ijnko ch'ín mé it'in Jesús mé kjuíchéna ch'án nchet'o kuátematóxin ch'án kuan la ntá k'uetuñna ch'án kixin satsjia ti pila tjiá ntá nchek'in sín Siloé

ts'ontia kuḡ, ichro ch'án. Ntá sákjuia k'ontia, ntá xrí-nahya ó k'uíkuaḡ —ichro ch'án.

¹² Ntá kjuanchankíhi sín ch'án ntáchro sín kixin:

—¿Nketí tjen tí ch'ín a? —ichro sín.

Ntá kjuáteḡe ch'an ntachro ch'an kixin:

—Nonahya janhan —ichro ch'an.

Tí sín fariseo tjanchankíhi sín tí ch'ín k'uék'ikonhya kuítḡe jína

¹³ Ntá tí sín a sákjuíko sín tí ch'ín k'uék'ikonhya sákjuíchréḡe sín tí sín fariseo a. ¹⁴ A ntá tí yaḡon t'ok'éhe sín mé tsíkjih'éna ch'ín Jesús tí nchet'ḡo kjuínchekitḡexín jína tí ch'ín k'uék'ikonhya. ¹⁵ A ntá tí sín fariseo xíkjanckankíhi sín ch'án inaá kixin nkexrí kuítḡe ch'án jína t'ikon ch'án jie. Ntá kjuáteḡe ch'án ntáchro ch'án kixin:

—Kuátematóxín ch'án nchet'ḡo kuḡ, ntá k'ontia kuḡ ntá jie t'íkuḡ —ichro ch'án.

¹⁶ Ntá iso tí sín fariseo ntáchro sín kixin:

—Tí chojni a jehya kuènte Dios kixin chóntahya ch'án kjuasáyé tí yaḡon t'ok'éheni —ichro sín.

Kjánchó ikjé sín ntáchro sín kixin:

—¿Xá nkexrí chrókjuasin ch'án kjuaxroan jíé tí chóntha ch'án jie? —ichro sín.

Mé xíkaha jnkokónhya kjuenkayáxin tí jehe sín. ¹⁷ Ntá xíkjanckankíhi sín tí ch'ín k'uék'ikonhya inaá kixin:

—¿Ntá jaha nkechrua nkexro tíha tí nkexro kjuín-tak'íkuan? —ichro sín.

Ntá kjuáteḡe ch'án ntáchro ch'án kixin:

—Janhan ntáxrjan kixin jehe ch'án mé ijnko nkexro chrónka itén Dios —ichro ch'án.

¹⁸ Kjánchó tí sín judío kuítekakonhya sín kixin chaxín k'uék'ikonhya ch'án ntá jie t'ikon ch'án. Ntá k'uíyḡe sín tí it'é la ko tí ìné tí ch'ín tsíkítḡe jína. ¹⁹ Kjuanchankíhi sín ntáchro sín kixin:

—¿Á xḡan tíhi tí ntáchrórá kixin tí tsíkókjéxín ch'án t'ikonhya ch'án? ¿Ntá nkexrí jie t'ikon ch'án? —ichro sín.

²⁰ Ntá kjuáteḡe tí it'é la ko tí ìné ch'án ntáchro sín kixin:

—Ó noheni kixin xḡenni ch'án la ko noheni kixin tí kokjéxín ch'án t'ikonhya ch'án. ²¹ Kjánchó noehyani nkexrí kixin t'ikon ch'án jie la ko noehyani nkexro kjuínchekitḡe ch'án jína. Tjanckankíhírá ch'án, ó ntḡeto ch'án, ntá jehe ch'án tsochrónka ch'án kixin nkexrí kuítḡe ch'án jína —ichro sín.

²² Mé xíkaha kjuáteḡe tí it'é la ko tí ìné ch'án kixin chrakonhen sín tí sín judío kixin ó kjuixin chrónka tí sín judío kixin tsjanjonhya sín kjuachaxín ts'ixenhen nḡnko tí sín titekaon kixin ch'ín Jesús mé tí nkexro Cristo.

²³ Mé xíkaha ntáchro tí it'é la ko tí ìné ch'án kixin chrókjuanchankíhi sín ch'án, ó ntḡeto ch'án, ichro sín.

²⁴ Ntá yóxin xík'iyḡe tí sín judío tí ch'ín k'uék'ikonhya ntá k'uḡtuḡenhen sín ch'án kixin:

—Tjetsjehe Dios ntá ntoá chrónka kixin ó noheni kixin tí ch'ín a na chóntha ch'an jie —ichro sín.

²⁵ Ntá tí ch'ín k'uék'ikonhya kjuáteḡe ch'án kixin:

—Nonahya á chóntha ch'án jie ḡ á chóntahya ch'án jie. Jnkokḡá nkehe nòna kixin senó k'uék'íkonhya ntá jie t'íkuḡ —ichro ch'án.

²⁶ Ntá xíkjanckankíhi sín ch'án inaá kixin:

—¿Nkexrí kjuích'e ch'án kixin kjuíntak'íkuan ch'án? —ichro sín.

²⁷ Ntá kjuáteḡe ch'án ntáchro ch'án kixin:

—Ó kjuixin tjonkará kjánchó titekákonhyará.

¿Nkekuènté tjinkáonrá kixin tsotjonkará inaá? ¿Á kjax-inrá tjinkáonrá tsochréhérá ch'án? —ichro ch'án.

²⁸ Ntá kónínkakonhen sín ch'án la k'uántaxínḡin sín ch'án la ko kjuáteḡe sín kixin:

—Jaha la chréhé tí chojni a. A ntá jeheni na chréhéni tí nkehe k'uḡḡoan ch'ín Moisés. ²⁹ Ó noheni kixin Dios k'uénixjḡe ch'ín Moisés. A ntá tí ch'ín a la noehyani nketí tsíkjixín ch'án —ichro sín.

³⁰ Ntá kjuáteḡe tí ch'ín ntáchro kixin:

—Imá ókjé tíha. Tí ch'ín a mé kjuíncheck'ikonka. A ntá jahará ntáchrórá kixin noahyará nketí tsíkjixín ch'án.

³¹ Ó noheni kixin tienhya Dios tí nkehe tjanchia tí chojni chóntha jie. Jehó tinḡin ch'án tí nkehe tjanchia tí sín titekaon Dios la ko nchexiteyḡe sín tí nkehe tjinkaon ch'án. ³² Nunca kienhyéni kixin ijnko nkexro chrókjuinckek'ikon ijnko chojni tsíkókjéxín t'ikonhya.

³³ A ntá tí nkexro a tí chrókjuixínhya ch'án tí tjen Dios la kjá ninkehó nkehe xitjahya chrókjuich'e ch'án —ichro ch'án.

³⁴ Ntá kjuáteḡe tí sín fariseo ntáchro sín kixin:

—Jaha la nchónhya jie chonta tió kokjíha. A ntá jie ¿á tjinkávan kixin jaha chrókjuákohéni ní? —ichro sín.

Ntá kótéka sín tí ch'ín a kixin ts'axrxjéxín ch'án tí nḡnko a sátsji ch'án.

Ntakótán nchakuen sín

³⁵ Ntá kuínḡin ch'ín Jesús kixin xíkaha k'uḡtuḡenhen tí sín judío kixin ts'axrxjéxín nḡnko tí ch'ín k'uék'ikonhya. Ntá xeta ch'ín Jesús tí ch'ín a ntá kjuanchankí ch'án kixin:

—¿Á tinkachónkia tí Xḡeen Dios K'óna Chojni? —ichro ch'án.

³⁶ Ntá kjuáteḡe tí ch'ín a ntáchro ch'án kixin:

—Tjákohéni nkexro tíha kixin ntá tsínkáchónkini ch'án.

³⁷ Ntá kjuáteḡe ch'ín Jesús ntáchro ch'án kixin:

—Ó k'uíkuan jaha. Janhan mé tí nkexro tjetjuá jaha —ichro ch'án.

³⁸ Ntá kjuák'exín toch'in ch'án toté ch'ín Jesús ntáchro ch'án kixin:

—Ijie kuítekavan tí jaha Ìnchéni —ichro ch'án.

³⁹ Ntá ntáchro ch'ín Jesús kixin:

—K'uinka ntihi chjasintajni kixin sḡntakitḡaxián ijjé chojni kixin ntá tí sín t'ikonhya la mé ts'ikon sín, ḡ ntá tí sín t'ikon jie la í ts'ikonhya sín —ichro ch'án.

⁴⁰ A ntá iso tí sín fariseo k'uéjontaxín kuínḡin sín kixin xíkaha ntáchro ch'ín Jesús, ntá kjuanchankíhi sín ch'án kixin:

—¿Xá kjaxin jeheni ntakótáni? —ichro sín.

⁴¹ Ntá kjuáteḡe ch'ín Jesús ntáchro ch'án kixin:

—A ntá tí jahará tí chaxín chrók'uikonhyará ntá chró-chontahyará jie. Kjánchó ntáchrorá kixin t'ikonrá. Méxra chontará jie —ichro ch'án.

Ch'ín Jesús ncheyóexin tí t'inkachjina kolélo

10 Ntá ntáchro ch'ín Jesús kixin: —Imá tjetóan tí nkehe tjetjónkará kixin tí ts'ix-enhen ijnko chojni tí t'inkachjina kolélo ntá jehya puerta tí corral t'ixenxín ch'án na mé ókjé chrok'uixenxín ch'án na mé xíchee tíha la tjinkaon chrókueé. ² A ntá tí nkexro t'ixenxín tí puerta na mé nkexro t'ayakonhen tí kolélo a. ³ La ko tí ch'ín tjet'ayakonhen tí puerta a mé tsakitjehé ch'án tí puerta a kixin ts'ixenhen tí nkexro chaxín t'ayakonhen tí kolélo a. A ntá tí kolélo a mé ts-jatsqan va itén ch'án. Ntá t'iyexin ch'án jnkojnko ihñje jnkojnko tí kolélo kuènte ch'án ntá ts'axrjexin va ntq̄e va. ⁴ Ntá t'ikon ch'án kixin k'uaxrje kaín va ntá kuítonhen ch'án va ntja ntá tinkáchréhé va kixin tjatsqan va itén ch'án. ⁵ Chrohya va tjichréhé va ijnko chojni ókjé na mé tsinkéhe va tí chojni a kixin tjatsqanhya va itén ókjé chojni —ichro ch'án.

⁶ Mé xíkaha ntáchro ch'ín Jesús kjuíncheyóexin ch'án. Kjánchó tienxínhya sín nkexrí t'axrjexin tíha.

Ch'ín Jesús mé tí pastor jína

⁷ Ntá chrónka ch'ín Jesús inaá ntáchro ch'án kixin: —Ijnko nkehe tjetóan tsotjónkará kixin janhan la éxi tí puerta t'ixenxín tí kolélo tí t'inkachjina va. ⁸ Kaín tí sín kuitónxin ntja kui senó mé xíchee la ko chrókueé. La ntá tí kolélo la ántosén va tí nkehe ntáchro tí jehe sín. ⁹ Janhan mé tí puerta a mé t'ixenxínrá tí janhan mé tsaará la mé tsoyóhará tí kolélo siín kjuachaxin ts'axrjexin va tí kórré va sátsjikjine va la ko siín kjuachaxin ts'ixenhen va tí ts'inkachjina va inaá.

¹⁰ A ntá xíchee mé jehó chrókueé la ko tjinkaon chrók'óyán la ko chrókjuinçek'itjáyan kaín nkehe. A ntá janhan k'uinka kixin tsochontaxinrá kjuachón na mé kjuachón jnkochríxín. ¹¹ Janhan mé ijnko pastor jína a ntá tí pastor jína mé ts'enyákonhen tí kolélo a. ¹² A ntá tí nkexro ch'e xra tjinkaon chrókjuacha ó na mé ts'ikon ch'án itsi ijnko kolobo tsítq̄he ch'án tí kolélo sátsji ch'án kixin jehe ch'án la jehya tí nkexro t'ayakonhen tí kolélo la ko jehya kolélo kuènte ch'án. Ntá tí kolobo mé tsotsé va tí kolélo ntá tsinká va la sátsjichroe va. ¹³ Mé xíkaha tí chojni tjinkaon chrókjuacha tí xra chrókjuich'e ó la mé sátsji. A ntá tí kolélo la ántosén ch'án kuáhya ch'án kuenté tí jehe va.

¹⁴ A ntá janhan mé ijnko pastor jína. Mé xíkaha T'aná chóxin ch'án tí janhan la ko kjaxin janhan choxian tí jehe ch'án mé xíkaha choxian janhan tí sín éxi kolélo kuèntana la ko jehe sín mé chóxin sín tí janhan. Ntá ts'enyákonhan tí sín éxi kolélo kuèntana. ¹⁶ Kjaxin chonta kolélo naxa jehya kórré va ntihi mé kjaxin t'ichjánxin sátsjicakján va. A ntá tí tsitekakonna va ntá ts'óna jnkokoá kórré va la ko jnkokoá nkexro ts'ayakonhen va.

¹⁷ Tjuana T'aná kixin kjónté its'én la tsoxechónna inaá. ¹⁸ Kohya nkexro tsakitsjena tí kjuachón chonta janhan tí chrókjuánjonhya kjuachaxin. Chonta janhan kjuachaxin its'én la ko chonta janhan kjuachaxin tsoxechónna inaá. Tíhi mé k'uętuanna T'aná —ichro ch'ín Jesús.

¹⁹ Tió kuínhin tí sín judío tí nkehe ntáchro ch'ín Jesús ntá kjuankixin jnkokoáhya kjuenkayáxin sín. ²⁰ Nchónhya tí jehe sín ntáchro sín kixin:

—¿Nkekuènté tinhínrá tí nkehe ntáchro ch'án? Jehe ch'án mé chóna ch'án nchakuen tí jínahya la ko lóco ch'án —ichro sín.

²¹ Ntá ikjé sín ntáchro sín kixin:

—Xíkaha chrónixja ijnko chojni chóna nchakuen tí jínahya. ¿Á ijnko nchakuen tí jínahya la á jína chrókjuinçek'ikon ijnko chojni t'ikonhya? —ichro sín.

Tí sín judío kuítékakuenhya sín tí ch'ín Jesús

²² A ntá tí nchakuen kin tí chjasin Jerusalén k'uúxin kia xraxinkakonxín sín tí yaon tsíkjin sín tsík'óna njnko.

²³ Ntá ch'ín Jesús itjen ch'án tí njnko tí ntasin kuènte Salomón. ²⁴ Ntá tí sín judío k'uántatjen sín tí ch'ín Jesús kjuanchankíhi sín ch'án kixin:

—¿Hasta nkesá ts'ejóchónhenni tsinhinni jína? A ntá jie chronka ntoá kixin á chaxín jaha tí Cristo —ichro sín.

²⁵ Ntá kjuátehe ch'ín Jesús kixin:

—Ó tjonkará ntá naxa títekákonhyará. Kaín tí xra tjet'a janhan tí kjuachaxin kuènte T'aná mé tjakoxin nkexro tí janhan. ²⁶ Kjánchó jahará títekákonhyará kixin jahará la jehya kolélo kuèntana éxi tjonkará senó.

²⁷ Tí kolélo kuèntana mé tjatsqan va tí tanná la ko kjaxin janhan tjátsqan tí jehe va la ko jehe va mé chréhé va tí janhan. ²⁸ Janhan mé tjahá va tí kjuachón jnkochríxín la í ts'itjáyanhya va la ko ninkexró tsjachahya tsakit-sjexin va tjaná. ²⁹ Ó kjuanjon T'aná, mé tí nkexro tjetóxin t'ętq̄an, na ninkexró tsjacha tsakitsjexin va tí tja ch'án. ³⁰ Janhan la ko T'aná na mé jnkokoá nkexro tíha —ichro ch'án.

³¹ Ntá tí sín judío kuákja sín xro chróchjéhe sín ch'án inaá. ³² Ntá kjuátehe ch'ín Jesús ntáchro ch'án kixin:

—Nchónhya nkehe jína k'uíkonrá kjuákoxiān kjuachaxin kuènte T'aná. ¿Ntá nkekuènté chróchjínará xro? —mé chro ch'án.

³³ Ntá kjuátehe tí sín judío kixin:

—Jehya tí kjuaxroan jína tjásian chrótjiáxiānni xro. Náhí. Jaha ijnko chojni ó ntá kjuíncheyóhé asán Dios na mé tsotjiáxiānni xro —ichro sín.

³⁴ Ntá ntáchro ch'ín Jesús kixin:

—Ntá ntáchro xroon itén Dios tsíkjin sín ósé kixin ntáchro Dios kixin: “Kjaxinrá éxi Dios tí jahará.” ¹³⁵ Ntá ó noheni nkehe ntáchro xroon itén Dios na ntá xit-jahya tsitekakonhyani tíha. Mé xíkaha ntáchro Dios kixin éxi Dios jnkojnko nkexro k'uáyéhé itén ch'án. ³⁶ A ntá kjuéyána Dios ichr'ánna ch'án chjasintajni, ¿ntá nkekuènté ntáchrorá kixin k'uántaxínhan Dios kixin janhan ntáxrjan kixin Xjeen Dios tí janhan? ³⁷ Kja tí

chrókuít'ahya tí xṛa ich'e T'aná la chrókuítekákon-hyará. ³⁸ A ntá kjónté tjét'a tí xṛa a kjónté títekákon-hyará tí janhan na mé chrókuítekákonrá tí xṛa tjét'a chrókónoaxínrá chrókiénxinrá kixin T'aná la ko janhan mé jnkokóá tjékian ch'án —ichro ch'án.

³⁹ Mé xíkaha chrótsé sín tí ch'ín Jesús inaá chrók'uikjéhe ch'án ntá kjuachahya sín ntá sákjuí ch'án.

⁴⁰ Ntá ch'ín Jesús xíkjan ch'án tí í jnko lado ntárió Jordán inaá tí k'uékjak'e ch'ín Juan k'uékikítexín ch'án chojni senó. ⁴¹ Ntá nchónhya chojni sákjuíchréhe sín ch'án ts'ikon sín ch'án ntáchro sín kixin:

—Chaxín ch'ín Juan kjuasinhya ch'án kjuaxroan jíé la kjónté ntoá tí nkehe chrónka ch'án kuènte tí ch'ín i —ichro sín.

⁴² Ntá nchónhya sín kuítekaon sín tí ch'ín Jesús tí kjuíji sín ntiha.

Ik'uén ch'ín Lázaro

11 Itjen ijnko ch'ín níhi mé it'in ch'án Lázaro, ch-jasén ch'án na mé Betania, mé tí chjasén tí tjan María la ko tí kvavé tjan Marta. ² Tí tjan María mé jnkokóá kichó tí ch'ín Lázaro mé tí ch'ín níhi na mé jehé tjan mé tí tjan kuíkítexín aceite xraxé toté Ìnchéni la ko kjuínchexámáxin tjan kaxjhi tjan toté ch'án. ¹³ A ntá yóí tí kichó ch'án chjin ichr'án sín ijnko nkexro tsochénta tí ch'ín Jesús kixin:

—Ìnchéni jaha, tí nkexro choxian tjuèhé la níhi ch'án —ichro ch'án.

⁴ Ntá kuínhin ch'ín Jesús ntá ntáchro ch'án kixin:

—Tí chin chóna ch'án jehya kixin ónaá chrók'uitjáyanxón ch'án tí ts'en ch'án. Náhí. Tíha mé tsjakoxín tí kjuachaxin jíé kuènte tí Xjeen Dios —ichro ch'án.

⁵ A ntá tí ch'ín Jesús la imá tjuèhé ch'án tí tjan Marta la ko tí tjan kichó tjan la ko tí ch'ín Lázaro. ⁶ Na ntá tió kuínhin ch'án kixin níhi ch'ín Lázaro na kjónté kuítóhe ch'án iyó yaon inaá tí nó kjuák'e ch'án. ⁷ A ntá chr'éxin ntáche ch'án tí sín k'uájiko ch'án kixin:

—Sátsjini estado Judea inaá —ichro ch'án.

⁸ Ntá kjuátéhe tí sín k'uájiko ch'án kixin:

—Maestro, naxa séhya tí sín judío ntiha chrótjáha sín xṛo tjinkaon sín chrók'óyánxian sín xṛo. ¿Á tjinkávan sátsjia ntiha inaá? —ichro sín.

⁹ Ntá ntáchro ch'ín Jesús kixin:

—Jnkojnko yaon mé chóna teyó hora. Tió ixri chojni nchakotjin tsóténkixínhya sín ninkehó kixin t'inkaséyanxín xrohi chjasintajni a. ¹⁰ Tí sín ixri tie mé tsóténkixín sín nkehe kixin chónahya sín xrohi —ichro ch'án.

¹¹ Ntá chr'éxin ntáche ch'ín Jesús tí sín k'uájiko ch'án kixin:

—Ó k'uájua tí nkexro chóxinni mé ch'ín Lázaro. Ntá sátsjia sjintakjayahá ch'án —ichro ch'án.

¹² Ntá ntáchro tí sín k'uájiko ch'án kixin:

—Ìnchéni, tí k'uájua ch'án la mé chrókuitohe ch'án jí-na —ichro sín.

¹³ Kjánchó tí nkehe ntáchro ch'ín Jesús mé t'axrjéxín kixin ó tsíkjin tsík'en tí ch'ín Lázaro. Ntá tí sín k'uájiko ch'án kjuenkayáxin sín kixin ó jehí tjeua ch'ín Lázaro.

¹⁴ Ntá ntoá chrónka ch'ín Jesús kixin:

—Ó tsík'en ch'ín Lázaro. ¹⁵ Ntá chàna kixin kohyana ntiha kixin mé xíkaha tsítekákonxinrá. A ntá jie ìntará sátsjitsjeheni ch'án —ichro ch'án.

¹⁶ Ntá ch'ín Tomás, kjaxin tikítexín sín ch'án ch'ín

Nóhé, mé ntáche ch'án tí í so sín kixin:

—Sátsjini kóini kaín ni ts'enkaoni Ìnchéni —ichro ch'án.

Ch'ín Jesús ntáchro ch'án kixin sinchexechón ch'án chojni inaá

¹⁷ Ntá kjuíji ch'ín Jesús kuínhin ch'án kixin ch'ín Lázaro la ó chóna noó yaon tsíkjinravá ch'án. ¹⁸ A ntá tí chjasin Betania mé chjinaxón tí chjasin Jerusalén, chóna iyó kilómetro ko t'ó kijnxin. ¹⁹ A ntá itsjé tí sín judío sátskjitsjehe sín tí tjan Marta la ko tí tjan María tjeónixjéhe sín kixin kánhyó ts'ává sín kixin tsík'én tí kichó sín a. ²⁰ Ntá kuínhin tjan Marta kixin ó kui ch'ín Jesús ntá k'uaxrjéxín tjan nchia tsjixinhin ntja. A ntá tí tjan María kuítóhe tjan nchia. ²¹ Ntá tí tjan Marta ntáche tí ch'ín Jesús kixin:

—Ìnchéni jaha. Chrókjuak'e ntihi ntá chrók'uenhya kichó ni. ²² Kjánchó ó nõna kixin Dios tsotjáha kaín nkehe tsjanchehé ch'án —ichro tjan.

²³ Ntá ntáchro ch'ín Jesús kixin:

—Tsoxechón kichuá inaá —ichro ch'án.

²⁴ Ntá ntáchro tjan Marta kixin:

—Ó nõna kixin tsoxechón ch'án tió tsoxechón kaín tí sín tsík'en, tí yaon tsjixixín —ichro tjan.

²⁵ Ntá ntáchro ch'ín Jesús kixin:

—Janhan mé ntáxechón chojni la ko tsochóna sín kjuachón. Tí nkexro tsitekaon sín tí janhan na kjónté ó tsík'en sín la naxa sjintaxechón sín inaá. ²⁶ La ko kaín xín tí sín naxa tjejóchón sín la tsitekaon sín tí janhan na ts'enhya sín. ¿Á títekávan xíkaha ní? —ichro ch'án.

²⁷ Ntá ntáchro tjan kixin:

—Chaxín Ìnchéni títekávan kixin jaha mé Cristo, mé Xjeen Dios, mé tí nkexro kui chjasintajni —ichro tjan.

Tsjánka ch'ín Jesús tí tsíkjinravá nkexro Lázaro

²⁸ Ó kjuixin ntáchro tjan Marta xíkaha ntá sákjuík'íyehé tjan kichó tjan María ntá imó chénka tjan kixin:

—Ntiha tjan Maestro t'iyahá ch'án —ichro tjan.

²⁹ Ntá kuínhin tjan María ntá tuénxín k'uínkatjen tjan sákjuitsjehe tjan tí ch'ín Jesús. ³⁰ Naxa tsík'ixenhya ch'án chjasin naxa tjan ch'án tí xéta ch'án tjan Marta.

³¹ Ntá tí sín judío tjeónixjéhe tjan María kixin kánhyó ts'ává tjan, mé k'uíkon sín kixin tjoka k'uaxrjéxín tjan nchia, ntá kjuíchréhe sín tjan kjuenkayáxin sín kixin sátsji tjan tí tsíkjinravá kichó tjan, ntaha tsjitsjánkama tjan ch'án, ichro sín.

³² Ntá tí tjan María mé kjuíji tjan tí tjan ch'ín Jesús ntá kjuák'exín toch'in tjan toté ch'án ntáchro tjan kixin:

—Ïnchéni jaha, chrókjuak'e jaha ntihi ntá chrók'uenhaya kichiná —ichro tjan.

³³ Ntá k'uíkon ch'ín Jesús kixin tsjánka tí tjan María la ko tí sín judío kjuikotoxin tjan ntá imá k'uává ch'án kóxakonhen asén ch'án. ³⁴ Ntá kjuanchankí ch'án kixin:

—¿Nketí kjuavará ch'án? —ichro ch'án.

Ntá ntáchro sín kixin:

—Ïnchéni, ¿á sátsjitsjehé? —ichro sín.

³⁵ Ntá tsjánka ch'ín Jesús. ³⁶ Ntá ntáchro tí sín judío kixin:

—Tsjehérá kixin imá tjuèhe ch'án tí ch'ín tsík'en —ichro sín.

³⁷ Kjánchó í so sín ntáchro sín kixin:

—Jehe ch'án mé kjuínchek'ikon tí ch'ín t'ikonhya. ¿Á xitjahya chrókjuanjon ch'án intsí kjuachaxin chrók'uenhya tí ch'ín Lázaro ní? —ichro sín.

Ó xechón ch'ín Lázaro

³⁸ Ntá imá t'ává asén ch'ín Jesús kóchjinehe ch'án tí tòye. Tí tòye mé ijnko tjo, a ntá tí ntója tí tjo mé tsík'ikjèxin ijnko xro. ³⁹ Ntá k'uetoan ch'ín Jesús kixin:

—Tjakjían tí xro a —ichro ch'án.

A ntá tí tjan Marta mé kichó tí nkexro k'uén mé ntáchro tjan kixin:

—Ïnchéni, kjá noha kixin kjá imá xra kixin ó chóna noó yon tsík'en ch'án —ichro tjan.

⁴⁰ Ntá kjuátehe ch'ín Jesús ntáchro ch'án kixin:

—Ó tjonka kixin tsítékávan ntá ts'ikuan tí kjuachaxin jíe kuente Dios —ichro ch'án.

⁴¹ Ntá kjuakjiin sín tí xro a. Ntá ch'ín Jesús konta ch'án nkajní ntáchro ch'án kixin:

—It'eni, tjáncháha kjuasáya kixin ó kuínhín tí nkehe ntáxrjan. ⁴² Janhan na ó nõna kixin xráxin tjetinhín tí nkehe ntáxrjan ntá xikaha ntáxrjan jie kixin tsinhín tí sín tjejontaxín ntihi ntá tsitekaon sín kixin jaha mé kuétoan k'uinka —mé ichro ch'ín Jesús.

⁴³ Ntá kjuixin nixja ch'án tíha ntá itsen k'uèya ch'án kixin:

—¿Lázaro, t'axrjéxian méhe! —ichro ch'án.

⁴⁴ Ntá tí ch'ín tsík'en k'uaxrjéxín ch'án tòye, na tí tja ch'án la ko tí toté ch'án naxa tjejóchróntetoxín ka la ko tí nkayakon ch'án tjejkjèxin ijnko ka. Ntá k'uetoan ch'ín Jesús kixin:

—Tjasintankará tí ka chróntetoxín ch'án kixin jina tsji ch'án —ichro ch'án.

Imó kjuenkayáxin sín kixin nkexrí ts'óyan sín tí ch'ín Jesús

(Mt. 26.1-5; Mr. 14.1-2; Lc. 22.1-2)

⁴⁵ Ntá itsjé tí sín judío sákjuikotoxin sín tí tjan María mé k'uíkon sín tí kjuaxroan kjuasin ch'ín Jesús ntá kuítekaon sín tí jehe ch'án. ⁴⁶ Kjánchó iso tí jehe sín sákjuitsjehe sín tí sín fariseo kjuíchénska sín tí kjuaxroan tsíkjasin ch'ín Jesús. ⁴⁷ Ntá tí sín fariseo la ko tí sín nchat'á t'etoan jnkokoá kójnkotséko sín tí sín antsí t'etoan, la ntáchro sín kixin:

—¿Xá nkexrí chrókjuich'eheeni tí ch'ín a kixin jehe ch'án mé tjasin ch'án kjuaxroan jíe? ⁴⁸ A ntá tí chrókui-

tóheni ch'án xikahó ntá kaín xín chojni chrókuitekaon sín tí jehe ch'án, ntá tsi tí sín romano t'etoan sinchek'itjáyan sín tí ninkoéni la ko tí xra chóntani la ko tí nación kuenténi —ichro sín.

⁴⁹ Ntá ch'ín Caifás mé tí nkexro t'etuñhen tí sín nchat'á tí nánó a ntáche ch'án tí jehe sín kixin:

—Jahará la noahyará ninkehó tíha ⁵⁰ la ko kjá ní tjenkayáxinhyará kixin íchá jina kixin jnkokoá chojni chrók'uenyákonhen chjaséni kixin ntá chrók'uitjáyanhya kuenté tí nación kuenténi —ichro ch'án.

⁵¹ Kjánchó ch'ín Caifás la jehya jehó ch'án chrókjuenkayáxin ch'án tíha. Náhi. Jehe ch'án mé k'uetoñhen tí sín nchat'á tí nánó, a ntá tí Nchakuen Dios kjuínchekónohe ch'án kixin ch'ín Jesús mé ts'enyákonhen tí nación judía. ⁵² A ntá jehya tí nación kuente sín ó chrók'uenyákonhen ch'án. Náhi. Kjéxin kixin sinchekaá ch'án kaín tí sín ts'óna xjeen Dios tjejó sín kuente chjasintajni. ⁵³ A ntá tí yon a tí sín t'etuñhen tí sín judío mé kjuankixin sín kjuenkayáxin sín kixin chrók'óyan sín tí ch'ín Jesús.

⁵⁴ A ntá ch'ín Jesús la í noxinhya k'uájí tí k'uéjó tí sín judío, na mé k'uaxrjéxín ch'án tí estado Judea, sákjuí ch'án chjinaxón nteje, tí tjan ijnko chjasin it'in Efraín. Ntaha kuítgeko ch'án tí sín k'uájiko ch'án.

⁵⁵ Ntá í séhya ntá ts'ixin tí kia pascua mé ijnko kié tí sín judío. Ntá itsjé chojni k'uaxrjéxín sín chjasén sín sákjuí sín chjasin Jerusalén kixin ntaha tsoyaxinhín sín kixin tsotjóá sín kjónté naxa xrankixinhya ts'ixin tí kia pascua. ⁵⁶ Ntaha k'uájikjeyá sín tí ch'ín Jesús k'uéjóxenhen sín tí ninko jíe ntá kjuanchankíhi sín kichó sín kixin:

—¿Jahará nkechorá? ¿Á chrókjuí ch'án tí kia ní o náhi? —ichro sín.

⁵⁷ A ntá tí sín fariseo la ko tí sín t'etuñhen tí sín nchat'á na ó k'uetoan sín kixin tí sín ijnko nkexro nohe nketí tjan ch'ín Jesús chróchrónka sín kixin ntá jina chrókjuítsé sín ch'án chrókjuinchenteto sín ch'án la ko chrókjuak'echjina sín ch'án.

Ijnko tjan kjuíncheká tjan aceite xraxé náxrjón toté tí ch'ín Jesús

(Mt. 26.6-13; Mr. 14.3-9)

12 Naxa t'itjáyan injon yon ntá ts'ixin tí kia pascua. A ntá ch'ín Jesús sákjuí ch'án chjasin Betania tí tjan ch'ín Lázaro. Tí ch'ín Jesús mé tsíkjinchexechón ch'án. ² Ntá ntiha kjóne sín ijnko kónjín kjuikosáyehe sín tí ch'ín Jesús. A ntá tí tjan Marta mé kjuíncheyaxín tjan. A ntá tí ch'ín Lázaro la ko í so sín k'uéjó sín kjóneko sín tí ch'ín Jesús. ³ Ntá tjan María kuikao tjan it'o litro aceite tsík'óna xroan nardo imá tjeje tsík'enaxín tjan ntá kjuíncheka tjan toté ch'ín Jesús ntá kaxíhi tjan kjuínchexámáxin tjan tí toté ch'án. Na mé kuente nkaxenhen nchia kókaxraxé tí xroan.

⁴ Ntá ch'ín Judas Iscariote, it'é ch'án mé it'in Simón, jehe ch'án mé ijnko tí sín k'uájiko ch'ín Jesús, na mé tí ch'ín sinchekji tí ch'ín Jesús chr'éxin, mé ntáchro ch'án kixin:

⁵ —¿Nkekuènté kóxiha tí xroan xraxé, chrókóxiin iní ciento chichaon denario kíxin chrókuinkĩtsa tí sín nòà? —ichro ch'án.

⁶ Kjánchó ch'ín Judas la Jehya ntáchro ch'án xíkaha kíxin chrókuikonóhē ch'án tí sín nòà. Náhí. Ntáchro ch'án tíhi kíxin xráxin chē ch'án kíxin jehe ch'án t'ayakonhen ch'án tí nkehe tjínká chichaon ntá xráxin teé ch'án tí chichaon tsixrenájín ntiha. ⁷ Ntá ntáchro ch'ín Jesús kíxin:

—Nté t̄t̄ohérá tjan. Tsíkjak'echjina tjan tí xroan a kíxin tí yaon tsoxrávána. ⁸ Tí sín nòà jnkochrínin ts'e-jokoará sín. A ntá janhan jnkochríninnya ts'ejóni —ichro ch'án.

Tí sín judío itjo sín nkexrí chrók'óyán sín tí ch'ín Lázaro

⁹ A ntá itsjé tí sín judío k'uixikónohe sín kíxin ch'ín Jesús kjuák'e ch'án tí chjasin Betania, a ntá sákjuí sín ntiha. Jehya kíxin chrókuitsjehe sín tí ch'ín Jesús ó. Náhí. Kjaxin tjinkaon sín chrókjuitsjehe sín tí ch'ín Lázaro mé tí ch'ín tsíkjinchexechón ch'ín Jesús. ¹⁰ Ntá tí sín nchát'á t'et̄oan mé kójnkotsé sín kjuenkayáxin sín chrók'óyán sín tí ch'ín Lázaro kjaxin ¹¹ kíxin itsjé tí sín judío kuítekaon sín tí ch'ín Jesús kíxin xíkaha kjuínchexechón ch'án tí ch'ín Lázaro ntá k'uaxrjek-janxín sín tí sín nchát'á.

K'uixenhen ch'ín Jesús chjasin Jerusalén

(Mt. 21.1-11; Mr. 11.1-11; Lc. 19.28-40)

¹² Nchónhya chojni sátsíkji sín chjasin Jerusalén kíxin tí kia pascua. A ntá tí yaon chr'éxin k'uixikónohe sín kíxin tsjiji ch'ín Jesús tí chjasin ntiha. ¹³ Ntá kóchrínjin sín chaan ntakajni kjuixinhin sín nt̄ja itsji ch'ín Jesús, itsje sín, ntáchro sín kíxin:

—Tjancheheni Dios kjuasáya. Imá jína tí nkexro kjuixin tí kjuachaxién It'eni t̄jen nkaya nkajní. Imá jína tí ch'ín Rey ts'et̄uēnhen tí nación Israel —ichro sín itsje sín.

¹⁴ Ntá tsík'itja ch'ín Jesús ijnko kolócho la ntá kjuák'ekjen ch'án, éxí nixja itén Dios kíxin:

¹⁵ Chrakonhyará jahará tjejórá chjasin Jerusalén, tsjehérá ó tjekui tí ch'ín Rey kuèntará, tjekjen ch'án ijnko kolócho. †

¹⁶ A ntá tió kónhen tíha kíenxínnya tí sín k'uájiko ch'ín Jesús kíxin nkekuènté xíkaha kónhen. A ntá chr'éxin tió kjuixin sákjujia ch'án nkaya nkajní ntá xraxinkaon sín kíxin xíkaha tsíkjin tí sín k'uéchrónka itén Dios ósé nkexrí tsonhen ch'án, na ntá xíkaha chaxín xiteyá tí chrónka sín senó kíxin xíkaha tsonhen ch'án.

¹⁷ Mé xíkaha kaín tí sín tsíkójnkotsé tí kjuák'e ch'ín Jesús tió k'uíyehē ch'án tí ch'ín Lázaro kíxin ts'axrjéxin ch'án tí tòyē tsíkjinxravá ch'án ntá xechón ch'án mé tí sín a mé chrónka sín tí nkehe k'uíkon sín. ¹⁸ Mé xíkaha sákjuixinhin sín tí nt̄ja tsjixin ch'ín Jesús, k'uixikónohe sín kíxin xíkaha tsíkjasin ch'ín Jesús tí kjuaxroan jíé.

¹⁹ Mé xíkaha ntáchro tí sín fariseo itjo sín kíchó sín kíxin:

—Tsjeherá kaín rá, ninkehó tsjachahyani sich'eni kíxin kaín xín chojni sákjuíchréhē tí jehe ch'án —ichro sín.

Iso sín nkivee griego tjejá sín tí ch'ín Jesús

²⁰ Iso sín nixja griego k'uéjójákjan tí sín sákjuí sín tí kia chjasin Jerusalén tsoxraxinkakonxín sín Dios. ²¹ Ntá kóchjinehe sín tí ch'ín Felipe, chjasén ch'án mé Betsaida, estado Galilea, chrónóhē sín ch'án kíxin:

—Tjinkaonni chrók'uikonni tí ch'ín Jesús —ichro sín.

²² Ntá ch'ín Felipe sákjuíchenka ch'án tí ch'ín Andrés. Na ntá yóí sín sákjuíchenka sín tí ch'ín Jesús. ²³ Ntá ntáchro ch'ín Jesús kíxin:

—Ó kjuixraká tí yaon, a ntá tí Xjeen Dios K'óna Chojni mé sátsji ch'án ts'áyehē ch'án tí kjuachaxin kuènte It'é. ²⁴ A ntá tsotjonkará ijnko nkehe chaxín kíxin tí chrókjuítsínkahya ijnko noatrigó tí nche chrók'uenhya tí noa a, ntá jnkokqá noa chrókjuak'e. A ntá tí chrók'uen tí noa a ntá chrók'óna nchónhya noa kíxin chrótjá sín. ²⁵ A ntá tí nkexro imá tjuèhē asén kíxin kohya nkehe chrók'uatsínka na mé tsochóntahya ch'án kjuachón jnkochrínin. A ntá tí nkexro tjejuènhya asén kjónté chrók'uénxin ntihi chjasintajni tí chrónka ch'án itén Dios na mé chr'éxin tsochónta ch'án kjuachón jnkochrínin. ²⁶ A ntá tí jnkójín nkexro tjinkaon chrókjuich'ena sín xr̄a t'ichjánxin tsochréhē sín tí janhan. A ntá tí t̄jén janhan na mé kj̄axin tjejó tí sín ch'ena sín xr̄a. A ntá jnkójín sín sich'ena sín xr̄a xíkaha na mé T'aná mé tsjikosáyehe tí jehe sín.

Ch'ín Jesús chrónka ch'án kíxin its'en ch'án

²⁷ Ntá jie imá tóxakonhen asenná. ¿Nkehe chróntáxran? ¿A chrókjuáncháha T'aná kíxin sinchekaána ch'án tí nkehe tsona jie o náhi? Kjánchó xr̄a ó k'uinka xíkaha tsona. ²⁸ Jaha It'eni, tjákoxian tí kjuachaxin kuènte ih-njá —ichro ch'án.

Ntá kuínhin sín nixja ijnko nkexro nkajní ntáchro kíxin:

—Ó kjuixin kjuákoxian tí kjuachaxin la ko xíkaha xikjákoxian inaá.

²⁹ A ntá tí sín tjejóntaxín tsíkinhin sín mé ntáchro sín kíxin kjónta, la ko í so sín ntáchro sín kíxin:

—Ijnko ch'ín ángel nixjehē ch'án —ichro sín.

³⁰ Kjánchó ntáchro ch'ín Jesús kíxin:

—Náhí. Jehya kíxin janhan tí jie chrókujinhan tí nixja ch'án. Náhí. Nixja ch'án kíxin tsinhínrá jahará. ³¹ Ntá jie tsit̄oexín tí ijje chojni chjasintajni na mé tí nkexro t'et̄oan chjasintajni mé ts'axrjehe ch'án tí xr̄a t'et̄oan ch'án. ³² A ntá tió tsjak'énkania ijnko ntacruz ntá nchónhya sín ts'ikon sín ntá tsitekaon sín tí janhan —ichro ch'án.

³³ Mé xíkaha chrónkaxín ch'án kíxin nkexrí ts'enxín ch'án. ³⁴ A ntá kjuátehe tí sín ntiha ntáchro sín kíxin:

—Kuínhinni nchekuáxin sín tí xroon tsíkjin sín ósé chrónka kíxin Cristo la jnkochrínin tsjak'e ch'án. ¿Ntá nkekuènté ntáchrúa kíxin tí Xjeen Dios K'óna Chojni

† Zacarías 9.9

t'ichjánxìn tsjak'enkání ch'án ijnko ntacruz? ¿Xá nkexéhe tí Xjeen Dios K'óna Chojni? —ichro sìn.

³⁵ Ntá ntáchro ch'ín Jesús kixin:

—Naxa tjen tí xrohi tjejókoará, kjánchó í séhya tsjak'e. Chrók'uajirá tí naxa tjen tí xrohi t'inkaséyanxìn ntja. A ntá náhi la ó ts'ixín tie. A ntá tí sìn ixri tí sítié a mé noehya sìn nketí sátsji sìn. ³⁶ Títekáonrá tí xrohi tí naxa tjen t'inkaséyan kixin mé ts'ónará chojni kuènte t'inkaséyan —ichro ch'án.

Ntá kjuixin chrónka ch'ín Jesús tíha ntá sákjuí ch'án kjuák'eméhe ch'án tí jehe sìn.

Tí sìn judío kuítekakonyha sìn tí ch'ín Jesús

³⁷ K'uékjasin ch'ín Jesús nchónhya kjuaxroan jíé k'uíkonxìn kon sìn ntá kjónté kuítekakuenhya sìn ch'án ³⁸ kixin mé xikaha tsoxiteyá tí nkehe tsíntáchro ch'ín Isaías tsíkjin ch'án ósé kixin:

Ìnchéni, kohya nkexro kuítekaon tí nkehe chrónkani.

Kohya nkexro kjuínchenohe Dios tí kjuachaxin jíé kuènte ch'án. †

³⁹ Méxra kuítekakuenhya sìn tí ch'ín Jesús éxi tsíkjin ch'ín Isaías kjaxin kixin:

⁴⁰ Dios kjuínchek'ikonhya ch'án sìn la ko kjuínchecha ch'án asén sìn,

kixin ntá chrók'uikonhya sìn,

la ko chrókienxínhya sìn,

kixin ntá chrókóchjinehya sìn tí janhan kixin

chrókjuíntakitohá sìn jína. ††⁴¹ Xikaha k'uéchrónka ch'ín Isaías imá ósé kixin k'uék'ikon ch'án tí kjuachaxin jíé kuènte Jesús ntá k'uéchrónka ch'án nkexrí tsjak'e tí ch'ín Jesús.

⁴² Kjánchó itsjé tí sìn judío t'etöan kuítekaon sìn tí ch'ín Jesús kjánchó noxínhya chrónka sìn. Chrakonhen sìn tí sìn fariseo kixin chrókóninkaon sìn la í chrókjuanjonyha sìn kjuachaxin chrók'uixenhen sìn tí njnköe sìn judío. ⁴³ Mé xikaha imá kóxrjínhìn sìn kixin chojni chjasintajni chrókjuikosáyehe sìn ntá kánhyó kjueyá sìn kixin chrókjuikosáyehe sìn Dios.

Tí nkehe ntáchro ch'ín Jesús mé tsitöexixin ijié chojni

⁴⁴ Ntá itsen nixja ch'ín Jesús ntáchro ch'án kixin:

—Tí titekáonrá tí janhan na mé jehya janhván titekáonrá na mé kjaxin titekáonrá T'aná, mé tí nkexro k'uetuanna k'uinka. ⁴⁵ Éxi tí t'ikonrá tí janhan mé xikaha t'ikonrá tí nkexro k'uetuanna k'uinka. ⁴⁶ A ntá janhan mé xrohi k'uinka chjasintajni kixin tí sìn titekaon sìn tí janhan ts'ejóhya sìn tí sítié a. ⁴⁷ A ntá tí njkojínrá tinhínrá tí nkehe xrjanka ntá titekákonahyará la jehya janhan sintakjasótíará kixin jehya kixin k'uinka sintakjasóte chojni chjasintajni. Náhi. K'uinka kixin sintakaá chojni. ⁴⁸ A ntá tí titekákonhyará tí janhan la ko titekákonhyará tí tan kuèntana la ó síin nkexrí tsi-töexixin ijiará, na mé éxi tí tan xrjanka mé Dios sinchekitöexín ijiará tí yaon tsjixín chjasintajni. ⁴⁹ Jehya tí nkehe kuèntana tjéxrjanka. Náhi. T'aná na mé tí nkexro k'uetuanna k'uinka mé k'uetuanna nkehe

tsöxrjanka la ko nkehe tsjakua. ⁵⁰ A ntá nòna kixin tí nkehe k'uetoan T'aná mé xranjonxìn tí kjuachón jnkochrín. Mé xikaha tí nkehe ntáxrjan mé tjéxrjanka kixin T'aná mé k'uetuanna.

Ch'ín Jesús kjuínchek'önti ch'án toté tí sìn k'uájiko ch'án

13 A ntá tí yaon xjka tí ntóye tsjasin sìn tí kia pas-cua. A ntá ch'ín Jesús ó nohe ch'án kixin ó kjuixraká tí hora tsítóhe ch'án chjasintajni sátsjichréhe ch'án It'é ch'án. Xrácín tjuèhé ch'án tí sìn kuènte ch'án chjasintajni, a ntá jie tsjakoxìn ch'án kixin imá tjuèhe ch'án tí jehe sìn.

² A ntá tí ch'ín Tsochren tsík'etuñhen asén ch'ín Judas Iscariote, it'é mé it'in Simón, kixin sinchekji ch'án tí ch'ín Jesús. ³ Ntá ch'ín Jesús la ó nohe ch'án kixin tsíkixìn ch'án tí tjen Dios la ko xikjan ch'án sátsjichréhe ch'án Dios inaá. La ko ó nohe ch'án kixin It'é ch'án tsíkjanjon kjuachaxin ts'etuñhen ch'án kaín xín nkehe. ⁴ Ntá naxa tjejóne sìn ntá k'uínkatjen ch'ín Jesús kuakitsje ch'án tí ka titsáte ch'án la kuákja ch'án ijnko ka xámáxin chojni t'ónti k'uínkat'óxin ch'án. ⁵ Ntá kujk-ja ch'án ijnko nkehe ntá, ntá kjuankixin ch'án kjuínchek'önti ch'án toté jnkojnko tí sìn k'uájiko ch'án la ko kjuínchexámáxin ch'án tí ka k'uínkat'óxin ch'án.

⁶ Na ntá tió kjuíjixraká tí tjen ch'ín Pedro, a ntá ntáchro ch'ín Pedro kixin:

—Jaha Ìnchéni la, ¿nkekuènté chrókjuínchek'öntia toténi? —ichro ch'án.

⁷ Ntá kjuátehe ch'ín Jesús ntáchro ch'án kixin:

—Jaha la naxa tiénxinhya tí nkehe tjét'a janhan. Chr'éxìn ntá tsiénxian nkekuènté tjét'a tíha —ichro ch'án.

⁸ Ntá ntáchro ch'ín Pedro kixin:

—Jaha la sijnchek'óntihya toténi —ichro ch'án.

Ntá ntáchro ch'ín Jesús kixin:

—Tí sintak'óntihya tí jaha la kjá ninkehó tsochontahya tí janhan —ichro ch'án.

⁹ Ntá kjuátehe ch'ín Simón Pedro ntáchro ch'án kixin:

—Náhi, Ìnchéni. Jehya tí toténi ó chrókjuínchek'öntia. Kjaxin itjani la ko ikjani chrókjuínchek'öntia —ichro ch'án.

¹⁰ Ntá ntáchro ch'ín Jesús inaá kixin:

—Tí sìn tsíkjin tsík'önti la t'ichjánxínhya kuenté sìn ts'ónti sìn inaá. Náhi. Jehó toté sìn ó mé t'ichjánxìn naxa ts'ónti kixin kuenté la ó tjóá. A ntá jahará la ó tjóará, kjónté kénhyará —ichro ch'án.

¹¹ Mé xikaha ntáchro ch'ín Jesús kixin kénhya sìn tjóá sìn kixin ó nohe ch'án nkexro sinchekji ch'án.

¹² Ntá tió kjuixin kjuínchek'önti ch'án toté sìn kaín sìn ntá xík'inkáya ch'án inaá tí ka kuítsáte ch'án ntá kjuák'etjaxìn ch'án tí k'uínkatjenxìn ch'án. Ntá ntáchro ch'án kixin:

—¿Á kiénxinrá tí nkehe kjuít'a? ¹³ Jahará la ntáchrórá kixin janhan Maestro kuèntará la ko Inchará. Chaxín ntoá ntáchrórá kixin janhan tíha. ¹⁴ Janhan tí Maestro kuèntará la ko Inchará kjuíntak'öntia totará. A ntá jahará kjaxin xikaha chrókjuínchek'öntirá toté kíchuará.

† Isaías 53.1 †† Isaías 6.10

¹⁵ Janhan mé kjuákoxiān kixin xikaha chrókjuich'era éxi kjuít'a janhan. ¹⁶ Ijnko nkehe chaxín tsotjonkará kixin tí sín ch'exón xrā mé t'etōanhya sín éxi t'etōan tí lámōe sín, la ko tí sín k'uáyéhe sín ijnko xrā t'etōanhya sín éxi t'etōan tí sín kjuanjon tí xrā a. ¹⁷ Tí chrókiénxinrá nkehe tíha la ko chrókjuinchexiteyará la chrókócháhará má.

¹⁸ Jehya kaín rá xikaha ntáxrjan. Ó ñona kixin nkexro kjuéyá janhan. Kjánchó t'ichjánxin tsoxiteyá tí nkehe tsíkjín sín ósé ntáchro kixin: "Ijnko nkexro t'jénekián mé tsjanjonkian." ¹⁹ Mé xikaha t'jétkjonkará senó kixin tió ts'atsínka tíha ntá tsítékáonrá kixin janhan mé tí nkexro xráxín t'jen. ²⁰ Ijnko nkehe t'jetoan t'jétkjonkará kixin tí tsjánjonrá kjuachaxin tsitōhe tí chojni ichr'an janhan, mé éxi yóhe chrókjuánjonrá kjuachaxin chrókuitōhe tí janhan, a ntá tí tsjánjonrá kjuachaxin tsitōna janhan mé éxi yóhe chrókjuánjonrá kjuachaxin chrókuitōhe tí nkexro k'uētōanna k'uinka —ichro ch'ín Jesús.

Ch'ín Jesús chrónka kixin ch'ín Judas sinchekji ch'án
(Mt. 26.20-25; Mr. 14.17-21; Lc. 22.21-23)

²¹ Ntá kjuixin chrónka ch'ín Jesús tíha, ntá kóxakonhen asén ch'án má ntá ntoá chrónka ch'án kixin:

—Ijnko nkehe t'jetoan tsotjonkará kixin jnkojínrá t'jedorá ntihi mé s'inchekjiráni —ichro ch'án.

²² Ntá tí sín k'uájiko ch'án kjuanjixin komáxin la ko í komáxin kichó sín kixin noehya sín nkexro tí ntáchro ch'án. ²³ A ntá ijnko ch'ín k'uájiko ch'ín Jesús imá t'juéhe ch'án itjen ch'án chjinaxón tí t'jen ch'ín Jesús t'jéjóné sín. ²⁴ Ntá ch'ín Simón Pedro kjuakōexín seña k'uētōnhen ch'án tí í jnko ch'ín a kixin:

—Tjanchankíhí ch'án nkexro tíha —ichro ch'án.

²⁵ A ntá tí ch'ín a na mé antsí kóchjinehe ch'án tí ch'ín Jesús, ntá kjuanchankí ch'án ntáchro ch'án kixin:

—Inchéni, ¿nkexro tíha? —ichro ch'án.

²⁶ A ntá kjuátehe ch'ín Jesús ntáche ch'án tí ch'ín a kixin:

—S'íntakjata it'ō niotja, a ntá tí nkexro tsotjaha tí t'ō niotja a mé tí nkexro a —ichro ch'án.

A ntá mé xikaha kjuínchekjata ch'ín Jesús it'ō niotja ntá ch'jéhe ch'án tí ch'ín Judas Iscariote, it'é ch'án mé it'in Simón. ²⁷ Ntá k'uáyéhe ch'án tí niotja ntá tuénxín k'uíxenhen asén ch'án tí ch'ín Tsochren. Ntá ntáche ch'ín Jesús tí jehe ch'án kixin:

—Tí xrā tjinkávan s'ich'e la jaí tóxakonhan —ichro ch'án.

²⁸ Kjánchó nijnko tí sín t'jéjóné ntiha kienxínhya sín nkekuénté xikaha ntáchro ch'án. ²⁹ Ch'ín Judas la t'ayakonhen ch'án tí nkehe tjinká chichaon ntá iso sín kjuenkayáxin sín kixin ách'e ch'ín Jesús mé k'uētōnhen ch'án tí ch'ín Judas kixin ichrén nkehe sátsjik'ēna ch'án kuénte tí kia a, o ách'e ichrén nkehe sinchekjōnhen ch'án tí sín ñona a. ³⁰ Ntá k'uáyéhe ch'ín Judas tí niotja, a ntá k'uaxrjéxín ch'án ntiha. A ntá ó k'uíxín tie.

Ijnko nkehe nixin k'uētōan ch'ín Jesús

³¹ A ntá ó kjuixin sátsíkji ch'ín Judas, ntá ntáchro ch'ín Jesús kixin:

—A ntá jie tsōnoxín tí kjuachaxin jie kuénte tí Xjeen Dios K'óna Chojni la ko tsjakōxin ch'án tí kjuachaxin jie kuénte Dios. ³² Na mé xikaha tí Xjeen Dios K'óna Chojni mé tsjakōxin tí kjuachaxin jie kuénte Dios. A ntá Dios mé tsjakōxin ch'án tí kjuachaxin kuénte Xjeen ch'án la tjoka tsoxiteyá. ³³ Xjeenni, í séhya ñaxā tsjak'é janhan ts'ejókoará ntihi. Ntá jahará mé ts'ajikjéyará tí janhan. Ntá éxi yóhe k'uétjanka tí sín judío mé t'jonkará kjaxinrá kixin: Ninkexró xitjahya tsjiji sín tí sátsjijá janhan. ³⁴ Ijnko nkehe nixin tétuānhanrá ijie kixin chrótjuéhérá kichuárá éxi yóhe t'juahará mé xikaha chrótjuéhérá kichuárá. ³⁵ Tí tsotjuéhérá kichuárá ntá tsōnoexín kaín xín chojni síin chjasintajni kixin tinkachónkirá tí janhan —ichro ch'án.

Chrónka ch'ín Jesús kixin ch'ín Pedro sinchemá ch'án kixin chónhya ch'án tí jehe ch'án
(Mt. 26.31-35; Mr. 14.27-31; Lc. 22.31-34)

³⁶ Ntá kjuanchankíhi ch'ín Simón Pedro tí ch'ín Jesús kixin:

—Inchéni, ¿nketí sátsjia? —ichro ch'án.

Ntá kjuátehe ch'ín Jesús ntáchro ch'án kixin:

—Tí nó sátsjijá xitjahya tsochréhérá jaí. Ntá chr'éxin tsjasánchréhérá ntiha —ichro ch'án.

³⁷ A ntá ntáchro ch'ín Pedro kixin:

—¿Nkekuénté xitjahya tsochráha tí jaha jaí? Kjónté chrók'uényákonhán —ichro ch'án.

³⁸ Ntá kjuátehe ch'ín Jesús ntáchro ch'án kixin:

—¿Á chaxín ts'enyákōnna jaha? Ijnko nkehe chaxín tsotjonka kixin ñaxā tsotsjehya tí kochíntōa la ó tsjixin s'inchemána níya kixin chonhyana, tsixrua.

Jesús mé ntia sátsjixinni tí t'jen It'ēni t'jen nkaya nkajni

14 'Tóxakuanhyará jahará. Títekáonrá Dios la ko kjaxin títekáonrá tí janhan. ² Ntōe T'aná nchónhya nchia síin ts'ejóni. A ntá tí xikahya chrók'uixin la xikahya chrótjonkará. Méxra sátsjijá s'íntayóxian tí chrók'uejóni. ³ A ntá tí sátsjijá s'íntayóxian, ntá tió tsjixin ntá ts'ínka ínaá, ntá sátsjini kixin jahará kjaxin chrók'uejorá ntiha tí tsjak'é janhan. ⁴ Jahará la ó nohará nketí sátsjijá la ko ó nohará tí ntia a —ichro ch'án.

⁵ Ntá kjuátehe ch'ín Tomás ntáchro ch'án kixin:

—Inchéni, noehyani nketí sátsjia jaha. ¿A ntá nkexrí chrókónoheni tí ntia a? —ichro ch'án.

⁶ Ntá kjuátehe ch'ín Jesús ntáchro ch'án kixin:

—Janhan mé tí ntia la ko janhan mé tí tan chaxín la ko janhan mé tsjánjuan tí kjuachón. Jehó tí nkexro tsitekaon tí janhan mé jina tsjiji tí t'jen T'aná. ⁷ Tí chrókjuátsoanrá tí janhan ntá xikaha chrókjuátsoanrá T'aná kjaxin. Na ntá ó choxínrá ch'án jie la ko ó t'jéjokomará ch'án —ichro ch'án.

⁸ Ntá ntáchro ch'ín Felipe kixin:

—Ínchéni, tjtóhéni kixin tsochóxinni It'á. Táhó mé tjinkaonni —ichro ch'án.

⁹ Ntá kjuátehe ch'ín Jesús ntáchro ch'án kixin:

—Felipe, ósé tjejóni, ¿a ntá naxa tjátsoanhya tí janhan ní? A ntá xikaha tí t'ikonrá tí janhan na mé xikaha chrók'uíkonrá T'aná. ¿Nkekuèté tjanchàna kixin chrókuijóha chrók'uíkonrá tí T'aná? ¹⁰ ¿Á titekákonhya jaha kixin janhan jnkokóá tjékjan T'aná, la ko T'aná tjen tí tjén janhan? Tí nkehe níjja janhan la jehya kuèntana. Náhí. T'aná tjékjan janhan mé tjech'e ch'án tí xra kuènte ch'án. ¹¹ Titekáonrá kixin jnkokóá tjékjan T'aná, a ntá T'aná tjen tí tjén janhan. Kjónté kuitekákonhyará xikaha la chrókuitekáonrá kixin tí kjuaxroan jje kjuákoxian k'uíkonrá. ¹² Ijnko nkehe chaxín tjonkará kixin tí chaxín tsitekáonrá tí janhan ntá kjaxinrá tsjachará s'ich'erá xra yóhe tjet'a la ko kjaxin ixra antsí jje tsjachará s'ich'erá kixin janhan la ó sátsjiyá tí tjen T'aná. ¹³ Kaín nkehe tsjanchatóxixínrá tí njina na mé tsjánjuan kixin xikaha tsjákoxian tí kjuachaxin kuènte T'aná. ¹⁴ Tí chrén nkehe tsjanchatóxixínrá njina la janhan la tsjánjuan.

Ch'ín Jesús chrónka ch'án kixin chaxín tsochr'án ch'án tí Nchakuen Dios

¹⁵ Tí chaxín tjuèhéra tí janhan ntá chrókjuinchexiteyéhéra tí nkehe kuètuñhanrá. ¹⁶ Ntá tsoxrxannógha T'aná kixin tsochr'án ch'án Nchakuen ch'án kixin tsjinkitsa tí jahará la ko sinchechéhe asánra la mé ts'e-jokoará jnkochr'ín. ¹⁷ Jehé ch'án mé Nchakuen chaxín. Tí sín chjasintajni xitjahya ts'áyéhe sín ch'án kixin t'ikonhya sín ch'án la ko chónhya sín ch'án. Kjánchó jahará ó choxinrá ch'án kixin tjejokoará ch'án la ko ts'e-jokoará ch'án jnkochr'ín. ¹⁸ Janhan na tsjtóghyará nõerá jahóra, na mé tsokjan inaá kixin ts'ejóni. ¹⁹ A ntá séhya ntá tí sín chjasintajni ts'ikonhya sín tí janhan inaá. Kjánchó jahará mé ts'ikonrá tí janhan. Ntá kjaxinrá ts'ejochónra kixin janhan na tjechuñ. ²⁰ A ntá tí yaon a chrókónohará kixin T'aná la ko janhan jnkokóá tjékjan la ko kjaxin jahará la ko janhan jnkokóá tjejóni. ²¹ Tí nkexro nohe tí nkehe tétogan la ko sinchexiteyéhe sín mé xikaha tsjákoxin sín kixin chaxín tjuèhe sín tí janhan. A ntá tí tjuèhe sín tí janhan ntá T'aná mé tsotjuèhe tí jehé sín la ko kjaxin janhan tsotjuəha sín la ko tsjákoxian nkexrí tjén janhan —ichro ch'ín Jesús.

²² A ntá tí ch'ín Judas, jehya tí ch'ín Iscariote tíha, na mé kjuanchankí ch'án kixin:

—Ínchéni, ¿nkekuèté jehóni tjákoxian, a ntá tjákoéxinhya tí chojni chjasintajni? —ichro ch'án.

²³ Ntá kjuátehe ch'ín Jesús ntáchro ch'án kixin:

—Tí nkexro tjuèhe tí janhan mé sinchexiteyéhe tí nkehe tétogan. La ko T'aná mé tsotjuèhe tí jehé sín la ntá T'aná la ko janhan ts'ejókoni sín. ²⁴ A ntá tí sín tjuèhya tí janhan la mé nchexiteyéhya sín tí nkehe tjákua. A ntá tí nkehe tjákua tjejotinhínra la jehya kuèntana. Náhí. Kuènte T'aná tí nkexro k'uètuñna k'uinka.

²⁵ Naxa tjejóni la tjetjonkará kaín tíhi. ²⁶ A ntá Nchakuen T'aná tsochr'án ch'án kjuachaxin njina mé tsjinkitsa tí jahará la ko sinchechéhe asánra la ko tsjákohará kaín nkehe la ko sinchexraxinkaonra kaín nkehe xrxanka.

²⁷ Kjuaxróxin tsjtógha la ko kjuaxróxin kuèntana tsotjahára. Jehya éxí tí kjuaxróxin chrókjuanjon tí sín chjasintajni. Náhí. Chrókóxakuenhya asánra la ko chróchrakonhyará. ²⁸ Ó kuínhínra ntáxrxan kixin sátsjiyá la ko tsokjan janhan ts'ejóni inaá. Tí chaxín tjuèhéra tí janhan ntá chrókócháhará tí kuínhínra kixin sátsjiyá tí tjen T'aná kixin antsí t'etogan ch'án la kánhyó tétogan janhan. ²⁹ Senó tjetjonkará tíhi kixin tió tsóhnen tíha la ts'ikonrá ntá tsitekáonrá jahará.

³⁰ Ntá jie la í séhya tsonixjahará kixin tí jie itsi tí ch'ín Tsochren, mé tí nkexro t'etueñhen tí sín chjasintajni. A ntá jehé ch'án la ninkehó t'etueñnahya tí janhan.

³¹ Kjánchó t'ichjánxin kixin xikaha tsóhnen ntá tí sín chjasintajni mé tsonohé sín kixin tjuəha T'aná la ko nchexiteyáha tí nkehe k'uètuñna ch'án. Ntá jie t'inkatjenrá sátsjixínni ntihi.

Tí nta t'óna to uva la ko tí chaan nta

15 'Janhan mé éxí yóhe ijnko ntanòna tjechón itsa to uva la ko T'aná mé éxí yóhe tí nkexro t'ayakonhen tí nta a. ² Tsochrínjin ch'án tí chaan nta t'ónahya to. A ntá tí chaan nta t'óna to mé nchetjuák'á ch'án kixin ntá ts'óna antsí má tsjé to. ³ A ntá jahará la kótjuáxinrá tí tanná k'uétjonkará senó. ⁴ Tí tsjtóghyará tí janhan ntá kjaxin janhan tsjtóghya tí jahará. Mé xikaha ijnko chaan nta ts'axrjentehe tsjachahya jehó ts'óna to, la ko xikaha jahóra tsjachahyará s'ich'erá tí xra kuèntana tí tsjtóghéra tí janhan.

⁵ 'Janhan na mé yóhe tí ntanòna, a ntá jahará la tí chaan tí ntanòna tsík'ayanta. Tí nkexro jnkokóá tjenkayáxinkian mé tsjacha ts'óna nchónhya to. A ntá tí tsinkáchónkihya sín tí janhan la ninkehó xra tsjachahya sín sich'e sín. ⁶ A ntá tí nkexro jnkokóáhya tjenkayáxinkian na mé éxí yóhe tí nta ch'ehya xra tsíkóchrínjin sín tsík'itjí sín chrínta tí nonte a tsqxámá ntá tsoxrejo ntá tsoche.

⁷ Ntá tí chaxín tsjtóghyará tsinkachónkirá tí janhan la ko ts'itjáyanhyará tí nkehe kjuákoará ntá tsjanchará ichrén nkehe tjinkáonra la ts'ayéhéra. ⁸ A ntá T'aná la tsóchéhe ch'án tí ts'ónará itsjé to. Mé xikaha tsjákoxinrá kixin tinkachónkirá tí janhan. ⁹ Janhan tjuəhará tí jahará éxí tjuəna T'aná. Chrókónohará kixin tjuəhará. ¹⁰ Tí tsitekáonra tí nkehe kuètuñhanrá ntá tsónohará kixin tjuəhará éxí yóhe kjaxin janhan ntaxiteyá tí nkehe k'uètuñna T'aná ntá kónòna janhan kixin tjuəna ch'án.

¹¹ 'Mé xikaha tjonkará kaín tíha kixin ntá éxí chàna mé xikaha tsjintaxín tsóchéhe asánra. ¹² Tí nkehe kuètuñhanrá la mé tíhi kixin chrótjuèhéra kíchuára éxí tjuəhará xikaha. ¹³ Ninkexró chrókóyóhe éxí tí nkexro imá tjuèhe tí sín chóxin ch'án ntá ts'enyákonhen ch'án tí jehé sín. ¹⁴ Jahará la chojni choxian tí tsitekáonra tí nkehe tétuñhanrá. ¹⁵ Ntáxrxanhyá janhan kixin jahará

chojni ch'exón xrə kixin tí chojni xikaha ch'exón xrə mé noehya sín nkehe tí xrə ch'e tí lámœe sín a. Náhí. A ntá jahará la chojni choxian kixin kaín xín nkehe kjuakona T'aná mé kjuákohará. ¹⁶ Jehya kixin jahará kjuéyará tí janhan. Náhí. Janhan mé kjuéyá tí jahará kixin tsot-jahará xrə, a ntá éxí yóhe to xé mé chrók'uaxrje jina tí xrə sich'enará kixin chrók'uitjáyanhya. A ntá T'aná mé tsotjáhará ch'án kaín xín nkehe tsjanhexínrá njina. ¹⁷ Mé xikaha tétuñhanrá kixin tsotjuèhérá kichuára.

Tí sín chjasintajni nínkakonhen sín tí ch'ín Jesús la ko tí sín tinkáchónki ch'án

¹⁸ Tí tsonínkakonhanrá tí chojni chjasintajni ntá chrókónohará kixin senó janhan nínkakonna sín. ¹⁹ Tí chrókókuèntará chjasintajni ntá tí sín chjasintajni chrótjuàhárá sín kixin naḡa kjéhyará sín. Kjánchó janhan kjuéyá tí jahará kixin chrók'uaxrjekjanxínrá tí sín síin chjasintajni. A ntá tí sín chjasintajni nínkakonhanrá sín kixin jahará jahyará kuèntará chjasintajni.

²⁰ Xráxinkáonrá tí nkehe tsítjonkará kixin tí sín ch'ehe lámœe sín xrə tjetóxinhya ts'etqan sín. [†] Éxí yóhe chónkina sín mé xikaha tsochónkíhi sín tí jahará. A ntá tí kuítekaon sín tí nkehe kjuákqoha sín ntá kjaxin tsitekaon sín tí nkehe naḡa tsjákohérá sín. ²¹ Mé xikaha sit'ahará sín kixin jahará tinkachónkirá tí janhan la ko jehe sín chónhya sín tí nkexro ichr'ánna k'uinka ntihi.

²² Tí chrók'uinkahya janhan ntihi chrónixjahya sín ntá chrókuamáhya sín jje. Ntá jje kohya nkerí tsaáxin sín kixin tí jje tinkákjasin sín. ²³ Tí sín nínkakonna mé xikaha nínkakonhen sín T'aná. ²⁴ Chróchóntahya sín jje tí chrók'uejókianhya sín ntihi chrókjuásinhya janhan kjuaxroan jje éxí tsíkjasinhya ninkexró senó. Ntá jje ó k'uíkon sín kaín tí kjuaxroan, a ntá kjónté nínkakonna sín tí janhan la ko nínkakonhen sín T'aná kjaxin. ²⁵ Mé xikaha tsonhen kaín tíha kixin ntá tsoxiteyá tí nkehe ntáchro tí ley kuènte sín kixin: “Kohya jje kjuásian janhan ntá kjónté kónínkakonna sín.” ^{††26} A ntá tsi tí nkexro tsjinkítsa la ko sinchechéhe asánrá. Tíha mé tí Nchakuen Dios chaxín. Janhan mé tsochr'an ch'án kixin tí kjuachaxin kuènte T'aná. A ntá jehe ch'án mé tsochrónka nkexrí tjén janhan ²⁷ la ko jahará kjaxinrá tsochrónkará nkexrí tjén janhan kixin tí xrankixín la k'uéjóni jnkokoá.

16 'Kaín tíhi tjetjonkará kixin chrókuítqéhyará tí nkehe kjuákohará. ² Tí sín judío tsjanjonhya sín kjuachaxin ts'ixenhenrá njnkoé sín la ko tsjixraká tí yaon kixin tí sín ts'óyán sín tí jahará tsontáchro sín kixin xikaha mé tjejóch'e sín xrə kuènte Dios, tsixro sín. ³ Mé xikaha sich'e sín kixin chónhya sín T'aná la ko chónhyana sín. ⁴ A ntá tjonkará kaín tíhi kixin tió tsjixraká tí yaon xikaha tsonhen ntá tsoxráxinkáonrá kixin ó k'uétjonkará senó a.

Tí xrə ch'e Nchakuen Dios

Tí xrankixín k'uétjonkahyará tíhi kixin jnkokoá k'uék'ejóni. ⁵ Ntá jje sátsjiyá tí tjehe tí nkexro ichr'ánna

k'uinka. Kjánchó nijnkorá tjanchankíhyará nketí sáts-sjiyá. ⁶ Ntá kjuixin tjonkará tíha ntá imá t'avará kixin kuínhínrá xikaha xrxanka. ⁷ A ntá chaxín tí nkehe tjetjonkará kixin íchá jina sátsjiyá kixin jahará jina chrók'uejorá. A ntá tí sáchrókjuíhya ntá chrókuihya tí nkexro tsjinkítsará. A ntá tí sátsjiyá janhan ntá tsétqan kixin itsi ch'án ntihi. ⁸ A ntá tió tsi ch'án mé sinchexraxinkaon ch'án tí chojni chjasintajni kixin jehe sín mé tjasin sín jje, la ko itjen ijnko ntja ntoá chrókuakja sín la ko Dios mé sinchekitqéxín tí jje kjuasin sín. ⁹ Xikaha chónka sín jje kixin tinkáchónkihya sín tí janhan. ¹⁰ A ntá tsonhe sín kixin itjen tí ntja ntoá kixin sátsjiyá tí tjehe T'aná ntá ts'ikonhyará tí janhan ínaá, ¹¹ la ko tsonhe sín kixin Dios sinchekitqéxín ijje kixin ó kjuixin kuítqéxín ijje tí nkexro t'etqan chjasintajni kixin tsjasóte.

¹² Naḡa chonta janhan itsje nkehe chrótjonkará, kjánchó chrókjuachahyará chrókiénxínrá jje. ¹³ A ntá tió tsi tí Nchakuen Dios chaxín ntoá ntá jehe tí Nchakuen Dios mé tsjáqohará ch'án kaín xín nkehe ntoá. Méxrə jehya tí nkehe kuènte ch'án tsochrónka ch'án na mé tí nkehe tsinhin ch'án mé tsochrónka ch'án tsjáqohará ch'án tí nkehe tsonhen chr'éxín. ¹⁴ Jehé ch'án mé tsjikosáyana ch'án kixin ts'áyéhe ch'án tí nkehe kuèntana ntá tsjáqohará ch'án nkehe tíha. ¹⁵ Kaínxín nkehe chónka T'aná na mé kuèntana. Mé xikaha ntáxrxan kixin tí Nchakuen Dios chaxín ntoá mé ts'áyéhe ch'án tí nkehe kuèntana ntá tsjáqohará ch'án nkehe tíha.

Senó ts'ává sín ntá chr'éxín tsochéhe sín

¹⁶ Ntá í séhya la í ts'ikonhyará tí janhan. La ko kjaxin séhya xik'ikonrá tí janhan ínaá kixin sátsjiyá tí tjehe T'aná —ichro ch'án.

¹⁷ Ntá iso tí sín k'uájiko ch'án mé kjuanchankíhi sín kichó sín kixin:

—¿Nkexrí t'axrxjén tí nkehe ntáchro ch'án kixin í séhya ts'ikonhyani ch'án la ko kjaxin séhya ntá xik'ikonni ch'án ínaá kixin sátsji ch'án tí tjehe It'é ch'án?

¹⁸ ¿Nkexrí t'axrxjén tí ntáchro ch'án kixin “í séhya”? Méxrə tienxínhya nkehe tí ntáchro ch'án —ichro sín.

¹⁹ Ntá kónohe ch'ín Jesús tí nkehe chrókjuanchankíhi sín ch'án ntá ntáche ch'án sín kixin:

—Xikaha tjonkará kixin í séhya ts'ikonhyará tí janhan la ko kjaxin séhya xik'ikonrá tí janhan ínaá. ¿Á tíha mé tjejetjanchankíhírá kichuára ní? ²⁰ Tjetjonkará ijnko nkehe chaxín kixin imá tsotsjankará la ko ts'avará. A ntá tí chojni chjasintajni la tsochéhe sín. A ntá jahará ts'avará la ko sñntaníhará kjónté chr'éxín tsocháhará má. ²¹ Éxí yóhe ijnko tjan sinchekokjíhi tjan xjeen tjan mé imá tóxakonhen tjan kixin ó kjuixraká tsjoté tjan. A ntá tsjixin tsokjíhi xjan ntá í xrxinkakonhya tjan nkexrí kjoté tjan kixin chéhe tjan kokjíhi ijnko xjan ntihi chjasintajni. ²² Mé xikaha jahará ijje t'avará. Ntá xik'íkuñ tí jahará ínaá ntá imá tsochéhe asánrá la ko tsokohya ninkexró tsakitsajahará tí kjuachéhe tsochontará.

²³ Tió tsi tí yaon a ntá tsjanchankínahyará ninkeho. Chaxín tí nkehe tjetjonkará kixin T'aná tsotjáhará

ch'án kaín nkehe tsjanchatóxiínrá nīna. ²⁴ Naxa kjuán-chatóxiínhyará ninkehó tí nīna. Ntá jie tjanchará la ts'ayéhérá, a ntá tsjintaxín tsocháhará.

**Ínchéni Jesucristo mé kjuacha ch'án k'uetōan ch'án,
ntá chjasintajni la náhi**

²⁵ Tí nkehe tjétjōnkará mé kjuíntayóaxián ó. Ntá tsjixraká tí yaon la í ninkehó sintayóaxián na mé ntoá tsojōnkará nkexrí tjen T'aná. ²⁶ A ntá tí yaon a mé ts-janchaxínrá nkehe nīna. Ntá ntáxrjanhya tíhi kixin tsonixjayákonhanrá tí tjen T'aná ²⁷ kixin jehe T'aná mé tjuahará jahará. Na mé tjuahará ch'án kixin jahará tjuanará tí janhan la ko kixin kuítekáonrá kixin janhan k'uinkaxian tí tjen Dios. ²⁸ K'uaxrjéxian tí tjen T'aná k'uinka chjasintajni. Ntá jie la ó tsitōhā chjasintajni ntá sátsjiyá ínaá tí tjen T'aná —ichro ch'án.

²⁹ Ntá ntáchro tí sín k'uájiko ch'án a kixin:

—Ntá jie ntoá tjéchronka ninkehó ncheyoéxinhya.

³⁰ Ntá jie tienxinni kixin jaha mé noha kaín xín nkehe la ko t'ichjánxinhya kixin jnkōjín nkexro chrókjuanchankíha sín ichrén nkehe. Méxra xikaha titekaonni kixin jaha mé k'uinkaxian tí tjen Dios —ichro sín.

³¹ Ntá kjuátehe ch'ín Jesús ntáchro ch'án kixin:

—¿Á jie kuítekáonrá ní? ³² Ntá tsi tí yaon na mé jie tíha na ntá tsochrakonrá jnkōjnkōrá tsoxíkará sátsjirá ntá tsitōnará janhván tsjak'é. Kjánchó jehya janhván tjén. T'aná mé tjékjan. ³³ Tjétjōnkará kaín tíhi kixin ntá kjuaxróxin ts'ejó asánrá tinkachónkirá tí janhan. A ntá ntihi chjasintajni kjōnté kjuaxróxinhya tjejorá tjejot-jasóterá kjánchó chrakonhyará kixin janhan mé ó kjuixin kjuacha tsétoan. A ntá tí chjasintajni la kjuachahya ts'etōan —ichro ch'án.

**Ch'ín Jesús chrónóehē ch'án It'é ch'án kixin
chrók'uayakonhen tí sín k'uájiko ch'án**

17 Ntá ó kjuixin chrónka ch'ín Jesús kaín tíha ntá konta ch'án nkajni ntáchro ch'án kixin:

—Jaha It'éni, ó kjuixraká tí yaon a. A ntá jie chróch-jehé tí Xjaan antsí má kjuachaxin kixin kjaxin tí Xjaan chrókjuikosáyehe tí jaha. ² Jaha tsíchjehé kjuachaxin tí Xjaan kixin ts'etūenhen ch'án kaín xín chojni na ntá jehe ch'án tsochjéhe kjuachón jnkochrínín kaín tí sín tsíchjehé ch'án. ³ Tí kjuachón jnkochrínín mé t'axrjéxín kixin tsochóxian sín tí jaha tí jnkokóá Dios chaxín tjechón la ko kjaxin tsochóxin sín Jesucristo la mé jaha kuétūenhen ch'án kui ch'án ntihi chjasintajni.

⁴ Ó kjuixin kjuikosáyaha tí jaha ntihi chjasintajni kjuixinna tí xra chjina sit'a. ⁵ A ntá jie It'éni, chjina jaha tí kjuachaxin jíé k'uéchonta janhan tí k'uéjóni jnkokóá naxa k'ónahya chjasintajni.

⁶ Ó kjuixin kjuákōhā tí sín chjina chjasintajni kixin nkexro tí jaha. Jaha mé k'uékuèntá sín tí ósé ntá jie chjina tí janhan la ó kjuákōhā sín itán la ntá ijie la ó kuítekaon sín. ⁷ Ntá jie ó kjuátsōan sín kixin kaín tí kjuachaxin chonta janhan la jaha tsíkánjuan. ⁸ Kixin ó kjuixin kjuákōhā sín tí tán chjina jaha, ntá kuítekaon sín, ntá kuénxín sín kixin mé chaxín tsík'inkaxian tí

tjen jaha, na mé kuítekaon sín kixin jaha kuétūanna k'uinka.

⁹ Janhan mé xrjanógha kixin chrók'uayakonhen tí jehe sín. Jehya kixin xrjannógha kixin chrók'uayakonhen kaín tí chojni síin chjasintajni. Náhi. Jehó xrjanógha kixin chrók'uayakonhen tí sín chjina kixin kuèntá sín. ¹⁰ A ntá kaín tí nkehe chonta janhan na mé kuèntá jaha la ko kaín tí nkehe kuèntá la mé kuèntāna kjaxin. A ntá tí kjuachaxin jíé kuèntāna mé ts'inkaséyanxín tí jehe sín.

¹¹ A ntá jie tsitōnahya janhan ntihi chjasintajni.

Kjánchó jehe sín naxa tsitōhe sín chjasintajni. A ntá jie tsjasán tí tjen jaha. Jaha It'éni imá jina jaha, t'ayakuexián sín tí kjuachaxin tí ihniá kixin ntá jnkokóá chrókjuenkayáxin sín éxi tí jaha la ko janhan jnkokóá tjenkayáxinni. ¹² A ntá tí naxa k'uéjókjan tí jehe sín ntihi chjasintajni la k'uàyakuànxián sín tí kjuachaxin tí ihniá chjina. Nijnko tí jehe sín k'uitjāyanhya sín. A ntá jnkokóá nkexro mé k'uitjāyan mé tí ch'ín xráxin ts'itjāyan kixin xikaha tsoxiteyá éxi nixja tí xroon tsíkjin sín.

¹³ Ntá jie ó tsjasán tí tjen jaha. A ntá naxa itjén janhan chjasintajni mé ntáxrjan tíhi kixin ntá tsochéhe sín éxi yóhe imá chàna. ¹⁴ Janhan mé kjuákōhā sín itán jaha, a ntá jie tí sín chjasintajni mé nínkakonhen tí jehe sín kixin jehe sín la jehya kuènte chjasintajni éxi kjaxin janhan na janhya kuèntāna chjasintajni. ¹⁵ Tjáncháha kixin chrókuakítsjehé sín chjasintajni. Náhi. Tjáncháhá kixin chrók'uayakonhen sín kixin chrókjuich'yiehya sín tí jínahya. ¹⁶ Jehe sín la jehya kuènte chjasintajni éxi yóhe janhan kjaxin janhya kuènte chjasintajni.

¹⁷ Nchetjuáxian sín tí kjuachaxin kuèntá kixin itán jaha mé tí tan chaxín ntoá. ¹⁸ Éxi yóhe jaha kuétūanna k'uinka chjasintajni mé xikaha janhan tétuānghan sín kixin chrók'uejóyákjan sín tí sín chjasintajni. ¹⁹ Jehó tí xra kuèntá chrókjuít'a kixin chrókjuinkítsa tí jehe sín, a ntá jehe sín kjaxin chrókjuich'e sín tí xra kuèntá kixin kuínhin sín itán chaxín ntoá.

²⁰ Kjánchó jehya kixin xrjanógha kixin chrókjuínkítsa tí jehó sín. Náhi. Kjaxin xrjanógha kixin chrókjuínkítsa kaín tí sín tsitekaon sín chr'éxín tsinhin sín tí nkehe tsochrónka tí sín a. ²¹ Mé xikaha xrjanógha kixin kaín tí jehe sín jnkokóá chrókjuenkayáxin sín éxi jaha It'éni la ko janhan jnkokóá tjenkayáxinni mé xikaha xrjanógha kixin kaín tí jehe sín la ko jaha la ko janhan jnkokóá chrókjuenkayáxinni. A ntá tí sín chjasintajni chrókuítekaon sín kixin jaha tsíkétūanna k'uinka ntihi. ²² A ntá tí kjuachaxin jíé chjina na mé tjahā tí jehe sín kixin ntá kaín sín jnkokóá chrókjuenkayáxin sín éxi yóhe jaha la ko janhan jnkokóá tjenkayáxinni. ²³ Janhan la ko jehe sín jnkokóá chrókjuenkayáxinni éxi jaha la ko janhan jnkokóá tjenkayáxinni. Mé xikaha tí sín chjasintajni chrókónohe sín kixin jaha kuétūanna k'uinka la ko kjaxin chrókónohe sín kixin jaha tjuèhé tí jehe sín éxi yóhe tjuāna tí jaha.

²⁴ Jaha It'éni, tí sín kjuánjuan la tjínkavan kixin tí jehe sín chrók'uejókjan sín tí tsjak'é janhan kixin chrók'uikon sín tí kjuachaxin jíé chjina; kixin xráxin naxa k'ónahya chjasintajni k'uétjuāna jaha. ²⁵ It'éni ja-

ha, imá jina jaha. Kjónté tí sín chjasintajni naxa chón-hya sín tí jaha, ntá janhan na ó xráxin choxian tí jaha la ko kaín tí sín i kjaxin ó nohe sín kixin jaha kuétuanna k'uinka. ²⁶ Ó kjuákoḡa sín kixin nkexro tí jaha la ko xikaha naxa tsjákoḡa sín, kixin éxí tjuana jaha mé xikaha chrótjuèhe sín kichó sín la ko janhan chrók'uejókjan tí jehe sín —mé xikaha chrónóḡeḡe ch'ín Jesús tí It'é ch'án.

Ch'ín Jesús sákjuíko sín ch'án tsjak'echjina ch'án
(Mt. 26.47-56; Mr. 14.43-50; Lc. 22.47-53)

18 Ó kjuixin ntáchro ch'ín Jesús kaín tíha ntá jehe ch'án la ko tí sín k'uájiko ch'án k'uaxrjexin sín ntiha k'uatòye sín tí tsaka Cedrón. Ntaha tjen ijnko nonte siín nchónhya nta k'uixenhen ch'ín Jesús la ko tí sín k'uájiko ch'án. ² Kjaxin ch'ín Judas tí ch'ín sinchekji tí ch'ín Jesús mé nohe ch'án kixin ntaha tjen tí huerto a kixin ntaha jnkoyaxón kójnkotséko ch'ín Jesús tí sín k'uájiko ch'án a. ³ A ntá ch'ín Judas ó kjuikao ch'án nchónhya sín soldado la ko iso sín policía kuènte njnko tsík'etuñhen tí sín nchat'á t'etōan la ko tí sin fariseo. Ntá kjuí sín kaín sín xraá sín chica la ko kjuikao sín xrohi t'inkaséyanxín tí kjuixin sín. ⁴ A ntá ch'ín Jesús ó nohe ch'án kaín xín nkehe ts'atsínka ch'án, ntá sákjuí ch'án kjuanchankíhi ch'án sín ntáchro ch'án kixin:

—¿Nkexro xritjéyará? —ichro ch'án.

⁵ Ntá kjuáteḡehe sín ntáchro sín kixin:

—Tjeyáni tí ch'ín Jesús tsíkixin chjasin Nazaret —ichro sín.

Ntá kjuáteḡehe ch'ín Jesús ntáchro ch'án kixin:

—Janhan tíha —ichro ch'án.

A ntá ch'ín Judas tí ch'ín tsíkjinchekji tí ch'ín Jesús mé koí tjenkákjan ch'án tí jehe sín ntiha. ⁶ A ntá tió kjuáteḡehe ch'ín Jesús kixin jehe ch'án tíha, ntá jehe sín xráchonka sín kjuítsínka sín nonte. ⁷ Ntá xíkjanchankí ch'ín Jesús inaá ntáchro ch'án kixin:

—¿Nkexro xritjéyará? —ichro ch'án.

Ntá xíntáchro sín kixin:

—Tjeyáni tí ch'ín Jesús tsíkixin chjasin Nazaret —ichro sín.

⁸ Ntá ntáchro ch'ín Jesús kixin:

—Ó kjuixin tjonkará kixin janhan tíha. Tí xritjéyará tí janhan ntá tñohérá sátsji tí í so sín xríkjan —ichro ch'án.

⁹ Mé xikaha ntáchro ch'ín Jesús kixin ntá tsoxiteyá tí nkehe tsíntáchro ch'án kixin: “Tí sín kjuanjon T'aná la ninkexró kjuintak'itjáyanhya.” ¹⁰ Ntá ch'ín Simón Pedro kuakitsje ch'án tí chica espada chrinkatoxin ch'án kóchrínjin ch'án tãtsjon chjina ijnko ch'ín it'in Malco, mé ijnko ch'ín ch'ehe nchat'á t'etōan xra. ¹¹ Kjánchó ch'ín Jesús ntáche ch'án tí ch'ín Pedro kixin:

—Chr'axenhén tjoé chica espada méḡe. Kjá ntáchrúa kixin tsjasótehyana, kjá ichrua. Kjánchó T'aná kjuanjon kjuachaxin kixin nchónhya tsjasótena —ichro ch'án.

Ch'ín Jesús kjuák'e nkayakon tí ch'ín t'etuñhen tí sín nchat'á

(Mt. 26.57-58; Mr. 14.53-54; Lc. 22.54)

¹² A ntá tí sín soldado la ko tí ch'ín comandante t'etuñhen sín la ko tí sín policía judío kuènte njnko mé itsé sín tí ch'ín Jesús kjuínchenteto sín ch'án. ¹³ A ntá sákjuíko sín ch'án ntōe ch'ín Anás ich'ee tí ch'ín Caifás mé tí nkexro tsík'áyéḡe xra nchat'á t'etōan tí nánó a. ¹⁴ A ntá tí ch'ín Caifás, jehe ch'án na mé tí nkexro tsíntáche tí sín judío kixin íchá jina kixin jnkokoá chojni chrók'uenyákonhen kaín tí sín chjasén ch'án. ¹⁵

Ch'ín Pedro kjuínchemá ch'án kixin chóxin ch'án tí ch'ín Jesús

(Mt. 26.69-70; Mr. 14.66-68; Lc. 22.55-57)

¹⁵ Ch'ín Simón Pedro la ko í jnko ch'ín k'uék'ajiko ch'ín Jesús mé kuinkáchréḡe sín ch'án. Tí ch'ín ijnko a mé chóxin ch'án tí nchat'á t'etōan. Ntá k'uixenko ch'án tí ch'ín Jesús tí ntāsin ntōe tí nchat'á t'etōan. ¹⁶ Kjánchó ch'ín Pedro kuitōhe ch'án ntója ntāsin ó. Ntá tí ch'ín ijnko a chóxin tí nchat'á t'etōan mé k'uaxrje ch'án ntāsin nixjeḡe ch'án tí tjan t'ayakonhen tí ntója ntāsin chrónóḡeḡe ch'án tjan ntá xranjon kjuachaxin ntá k'uixenhen ch'ín Pedro kjaxin. ¹⁷ Na ntá tí tjan t'ayakonhen tí ntója ntāsin kjuanchankíhi tjan tí ch'ín Pedro kixin:

—¿Á jahya kjaxin xríkoa tí ch'ín a? —ichro tjan.

Ntá kjuáteḡehe ch'ín Pedro kixin:

—Náhí, janhya —ichro ch'án.

¹⁸ Ntá imá kin ntá tí sín ch'exón xra la ko tí sín policía kjuaka sín xrohi ntaha tjejóxin toté sín tjejóchjixroḡe sín. La ko koí ch'ín Pedro tjechjixroḡe ch'án ntiha.

Tí nchat'á t'etōan mé kjuanchankíhi ch'án tí ch'ín Jesús

(Mt. 26.59-66; Mr. 14.55-64; Lc. 22.66-71)

¹⁹ Ntá tí nchat'á t'etōan kjuankíxin kjuanchankíhi ch'án tí ch'ín Jesús kixin nkexro tí sín k'uájiko ch'án la ko nkehe tí kjuakoḡe ch'án sín. ²⁰ Ntá kjuáteḡehe ch'ín Jesús ntáchro ch'án kixin:

—Noxín kjuak'é kjuákua, la ntá kaín xín chojni kuínhin sín. Xráxin k'uékjakoḡe kaín xín tí njnko ntsí la ko tí njnko jíé tójnkotséxin kaín xín sín judío. Ninkehó nkehe kjuákoḡe imó. ²¹ ¿Nkekuènté tjanchankina tí janhan xikaha? Chrókjuanchankíhí tí sín kuínhin kixin nkexrí kjuákoḡe sín. Jehe sín mé nohe sín nkehe kjuákoḡe sín —ichro ch'án.

²² Kjuixin ntáchro ch'ín Jesús tíhi ntá ijnko ch'ín policía kuènte njnko mé tjentaxín ch'án ntiha chjéhe ch'án nkayakon tí ch'ín Jesús ntáchro ch'án kixin:

—¿Á xikaha jíeḡe tsjáteḡe tí nchat'á t'etōan ní? —ichro ch'án.

²³ Ntá kjuáteḡehe ch'ín Jesús ntáchro ch'án kixin:

—Tí ntoáhya tí nkehe xrxanka ntá chrónka nkehe tí ntoáhya. A ntá tí ntoá tí nkehe xrxanka, ¿ntá nkekuènté kixin tjatena? —ichro ch'án.

† Juan 17.12

†† Juan 11.49-50

²⁴ Ntá k'ueṭoan ch'ín Anás kixin tjechróntetoxinhín ch'ín Jesús sátsji ch'án tí tjen ch'ín Caifás tí ncha'tá t'et'oan.

Ch'ín Pedro xíkjinchemá ch'án inaá kixin chóxin ch'án tí ch'ín Jesús

(Mt. 26.71-75; Mr. 14.69-72; Lc. 22.58-62)

²⁵ Ntá ch'ín Simón Pedro mé naxá tjexín toté ch'án tjechjixrohe ch'án. Ntá kjuanchankíhi sín ch'án kixin:

—¿Á kjaxinhya jaha xríkoa tí nkexro i ní? —ichro sín.

Ntá ch'ín Pedro kjuínchemá ch'án inaá ntá chro ch'án kixin:

—Náhi, janhya —ichro ch'án.

²⁶ A ntá ijnko ch'ín ch'ehe tí ncha'tá t'et'oan xra, na mé tí ch'ín a mé naxá kjéhya ch'án tí ch'ín tsíkóchrínjin ch'ín Pedro ntatsjon, na mé kjuanchankí ch'án kixin:

—¿Á jehya jaha tí k'uíkuan tjekoa ch'án tí huerto ní? —ichro ch'án.

²⁷ Ntá ch'ín Pedro xíkjinchemá ch'án inaá kixin jehya ch'án, ichro ch'án. Ntá xríñahya tuénxín itsje ijnko kochínto.

Ch'ín Jesús kjuák'e nkayakon tí ch'ín Pilato

(Mt. 27.1-2, 11-14; Mr. 15.1-5; Lc. 23.1-5)

²⁸ Ntá k'uaxrjexín sín ntøe ch'ín Caifás, sákjuíko sín ch'ín Jesús tí palacio t'et'oanxín tí ch'ín gobernador.

Ntá ó kjuankixin k'uínkaséyan kjuíji sín ntiha. A ntá tí sín judío la mé í k'uixenhya sín tí palacio kixin tí xíkaha chrók'uixenhen sín tí nchia a la chrókuamá sín tí jië siín ntiha la í xítjahya sine sín tí kia pascua, ichro sín.

²⁹ A ntá ch'ín Pilato k'uaxrjexín ch'án tí nchia t'et'oanxín ch'án kjuanchankíhi ch'án sín kixin:

—¿Nkehe tí jië chóna tí nkexro i? —ichro ch'án.

³⁰ Ntá kjuátehe sín ntá chro ch'án kixin:

—Tí chróchóntahya ch'án jië jié la chrókjuíkqahyani ch'án —ichro sín.

³¹ Ntá k'ueṭoan ch'ín Pilato kixin:

—Sátjikoará ch'án nchekitoexínrá nkerí jië chóna ch'án kixin éxí ntá chro tí ley kuéntará —ichro ch'án.

Ntá kjuátehe tí sín judío ntá chro ch'án kixin:

—Jeheni chojni judíoni la chónahyani kjuachaxin ts'óyánni ninkexró —ichro sín.

³² Mé xíkaha tsoxiteyá tí nkehe tsíntachro ch'ín Jesús kixin nkexr'í ts'enxín ch'án. ³³ Ntá ch'ín Pilato xík'ixenhen ch'án tí nchia t'et'oanxín ch'án ntá k'uíyehé ch'án tí ch'ín Jesús kjuanchankíhi ch'án kixin:

—¿Á jaha tí nkexro Rey t'etueñhen tí sín judío ní? —ichro ch'án.

³⁴ Ntá ntá chro ch'ín Jesús kjuanchankí ch'án kixin:

—Tí nkehe tjanchankiná, ¿á jahyá kjuenkayáxian xíkaha, o á í jnko nkexro kjuanchia jië kixin tí janhan? —ichro ch'án.

³⁵ Ntá kjuátehe ch'ín Pilato ntá chro ch'án kixin:

—¿Á kjanhya janhan tí judío kixin? Tí sín chjasán la ko tí sín ncha'tá t'et'oan mé kjuikaán sín tí jaha. ¿Xá nkehe kjuích'e kixin? —ichro ch'án.

³⁶ Ntá kjuátehe ch'ín Jesús ntá chro ch'án kixin:

—Tí kjuachaxin chonta janhan jehya kixin chjasintajni chrókuétoan. Náhi. Tí chrókuétoan chjasintajni ntá tí sín xríkjan chrókjuanjonko sín tí sín judío kixin chrót-séhyana sín la chrókjuikánhyana sín ntihi. Kjánchó tí kjuachaxin chonta janhan jehya kixin chjasintajni chrókuétoan —ichro ch'án.

³⁷ Ntá ntá chro ch'ín Pilato kixin:

—¿Á jaha chaxín ijnko rey? —ichro ch'án.

Ntá kjuátehe ch'ín Jesús ntá chro ch'án kixin:

—Janhan tí rey éxí ntá chrua jaha. Tí xra ó kokjina la ko tí xra ó k'uinka chjasintajni kixin tsóxrjanka nkehe tí chaxín ntoá. Kaín tí sín titekaon tí nkehe chaxín ntoá mé tjejótinhin sín tí nkehe tjákua —ichro ch'án.

³⁸ Ntá ntá chro ch'ín Pilato kixin:

—¿Xá nkehe tí nkehe chaxín ntoá, ichrua? —ichro ch'án.

Ch'ín Pilato kjuanjon kjuachaxin kixin its'en ch'ín Jesús

(Mt. 27.15-31; Mr. 15.6-20; Lc. 23.13-25)

Ntá kjuixin kjuanchankí ch'ín Pilato tíha ntá k'uaxrjexín ch'án ntiha ntá sákjuí ch'án tí tjejó tí sín judío nixjehé ch'án sín ntá chro ch'án kixin:

—K'uitjáhya ninkehó jië chóna tí nkexro i. ³⁹ Kjánchó jahará la ó kuánhanrá kixin tí kia pascua tsjánjuan kjuachaxin kixin ts'atjánta ijnko nkexro tjechjina. ¿Á tjínkáonrá kixin ts'atjánta tí ch'ín Rey t'etueñhen tí sín judío? —ichro ch'án.

⁴⁰ Ntá kaín sín k'óyako sín kjuanchia sín kixin:

—Tí ch'ín a la náhi. T'atjánta tí ch'ín Barrabás —ichro sín.

Kjánchó tí ch'ín Barrabás mé ijnko chojni chee tíha.

19 Ntá ch'ín Pilato mé k'ueṭoan ch'án kixin tsjate sín tí ch'ín Jesús. ² Ntá tí sín soldado kjuích'éna

sín ntach'í ijnko corona ntá kjuak'enkaya sín ikja tí ch'ín Jesús. La ko kjuínchek'inkáya sín ch'án ijnko ka kjátse tié kixin jehé sín tsjikosáyehe sín ch'án éxí ijnko rey, kjánchó chaxínhya tíha. ³ Ntá kóchjinehe sín tí tjen ch'án ntá chro sín kixin:

—Isé tsjak'e tsétueñhén tí sín judío —ichro sín.

Kjánchó chaxínhya tíha kjuanoá sín ch'án. La ntá tuénxín itja sín kjuatexín sín nkayakon ch'án.

⁴ Ntá ch'ín Pilato k'uaxrjexín ch'án tí nchia t'et'oanxín ch'án inaá nixjehé ch'án tí sín tsíkójnkotsé ntá chro ch'án kixin:

—Tsjeherá tsakítsjexián ch'án ntihi kixin tsonohará kixin k'uitjáhya janhan ninkehó jië chóna ch'án —ichro ch'ín Pilato.

⁵ Ntá k'uaxrjexín ch'ín Jesús ntiha tjenkáya kja ch'án tí corona tsík'óna ntach'í la ko tjenkáya ch'án tí ka kjátse tié. Ntá ntá chro ch'ín Pilato kixin:

—Tsjeherá, ntihi tjen ch'án —ichro ch'án.

⁶ A ntá tió k'uíkon tí sín ncha'tá t'et'oan la ko tí sín policía kuente njnko ntá kjuankixin sín t'óyako sín ntá chro sín kixin:

—¡Tjakénkanirá ch'án ntacruz! ¡Tjakénkanirá ch'an ntacruz! —ichro sín.

Ntá ntá chro ch'ín Pilato kixin:

—Jahará tjíkoará ch'án tjaké nkanirá ch'án ntacruz kixin janhan k'uitjáhya ninkehó jie chóna tí jehe ch'án —ichro ch'án.

⁷ Ntá kjuátehe tí sín judío kixin:

—Jeheni chojni judío mé chóntani ijnko ley t'etōan kixin chrók'uen ch'án kixin ncheyóhe ch'án asén ch'án kixin Xjeen Dios tí jehe ch'án —ichro sín.

⁸ Ntá tió kuínhin ch'ín Pilato tíha ntá antsí chrakon ch'án ⁹ ntá xík'ixenhen ch'án tí nchia t'etōanxín ch'án inaá kjuanchankíhi ch'án tí ch'ín Jesús kixin:

—¿Nketí k'uinkaxian jaha? —ichro ch'án.

Ntá ch'ín Jesús ninkehó kjuáteheya ch'án.

¹⁰ Ntá ntáchro ch'ín Pilato kixin:

—¿Jaha nkekuénté tjáteheya nkehe tjánchánkíha? ¿Á noahya jaha kixin chonta janhan kjuachaxin tsétoan tsjak'enkania ntacruz la ko kjaxin chonta janhan kjuachaxin tsontárxjan kixin sátsjia kohya nkehe tsōnhan? —ichro ch'án.

¹¹ Ntá kjuátehe ch'ín Jesús ntáchro ch'án kixin:

—Ninkehó kjuachaxin chróchontahya jaha chrókuétoan chrók'uen o sáchrókjuia tí Dios chrótjáhya tí kjuachaxin. A ntá tí chojni kjuikaána tí tjen jaha la antsí jie chóna sín, a ntá jaha la kánhyó —ichro ch'án.

¹² Ntá kuínhin ch'ín Pilato tíhi ntá kjuankixin ch'án kjuéyá ch'án nkexrí chrók'uetōan ch'án kixin sáchrókjuí ch'ín Jesús kohya nkehe chrókónhen ch'án. Kjánchó tí sín judío k'óyako sín ntáchro sín kixin:

—Kja tí tsítōhé sátsji ch'án kohya nkehe tsōnhen ch'án ntá jaha jnkokoqáhya tjenkayáxinkoa tí ch'ín t'etūenhen tí nación kuénténi. Tí nkexro ch'éna asén ch'án éxí ijnko rey mé nínkakonhen ch'án tí ch'ín t'etūenhenni —ichro sín.

¹³ Ntá kuínhin ch'ín Pilato tíhi ntá k'uetōan ch'án kixin tsakitsje sín tí ch'ín Jesús ntója ntá ch'ín Pilato kjuák'etjaxín ch'án tí silla nchekitōexín ch'án jie, mé nkiva hebreo mé it'in Gabata, mé t'axrxjín kixin tjat'ō noi jehó xrō tsík'óna. ¹⁴ Na mé ó chjina chonkixin ntá tí tsōnjín la mé ó tsjasin sín tí kia pascua. Ntá ch'ín Pilato ntáche ch'án tí sín judío kixin:

—Ntíhi itjen tí ch'ín rey kuéntará —ichro ch'án.

¹⁵ Kjánchó jehe sín k'óyako sín ntáchro sín kixin:

—¡Its'en ch'án! ¡Its'en ch'án! ¡Tsjak'enkání ch'án ntacruz! —ichro sín.

Ntá ntáchro ch'ín Pilato kixin:

—¿Á tjinkáonrá kixin janhan chrókjuakénkania ijnko ntacruz tí ch'ín rey kuéntará ní? —ichro ch'án.

Kjánchó tí sín nchat'á t'etōan mé kjuátehe sín kixin:

—Náhí. Chóntahyani í jnko rey, jehó tí ch'ín César —ichro sín.

¹⁶ Ntá ch'ín Pilato kjuanjon ch'án kjuachaxin sátsjiko sín tí ch'ín Jesús tsjak'enkání sín ch'án ntacruz. Ntá sákjuíko sín ch'án.

Kjuák'enkání ch'ín Jesús ntacruz

(Mt. 27.32-44; Mr. 15.21-32; Lc. 23.26-43)

¹⁷ Ntá sákjuíko sín tí ch'ín Jesús kuámá ch'án tí ntacruz tsjak'enkání ch'án. Ntá kjuíjiko sín ch'án ijnko tjo tjkítexín sín Hueso Kja Chojni. A ntá nkiva hebreo

mé tjkítexín sín Gólgota. ¹⁸ Ntaha mé kjuak'enkání sín ch'án tí ntacruz. Ntá kjaxin yaá sín nánánko k'uejó jnkojnko sín ntá jnkosiné kjuák'e ch'ín Jesús. ¹⁹ Ntá k'uetōan ch'ín Pilato kixin tsokjin sín ijnko ntachiso tsjak'enkání sín ikja tí ntacruz ntáchro kixin: “Ch'ín Jesús kjuixín ch'án chjasin Nazaret, mé tí ch'ín Rey kuénte tí sín judío”, tsixro. ²⁰ A ntá itsjé tí sín judío mé kjuínchekuáxin sín tí letra tsík'óna kixin chjino tí chjasin Jerusalén tsíkjak'enkání sín ch'ín Jesús ntacruz la ko iní nkiva tsíkjin sín, na mé ijnko nkiva la hebreo, la ijnko nkiva la griego, la ijnko nkiva la latín. ²¹ Ntá tí sín nchat'á t'etōan kuénte tí sín judío mé ntáche sín tí ch'ín Pilato kixin:

—Chrókjinhya jaha xíkaha kixin jehe ch'án mé tí “Ch'ín Rey kuénte tí sín judío.” Náhí. Íchá jina chrókjin jaha kixin “Jehe ch'án ntáchro ch'án kixin jehe ch'án mé tí ch'ín Rey kuénte tí sín judío” —ichro sín.

²² Kjánchó kjuátehe ch'ín Pilato kixin:

—Tí letra kuétoan k'óna la ó k'óna, kjónté xikahó tsi-tohe —ichro ch'án.

²³ Ntá tí sín soldado tió tsíkjin tsíkjak'enkání sín tí ch'ín Jesús tí ntacruz ntá kuákja sín tí ké ch'án la k'ókikayēhe sín jnkojnko ka kuákja sín kanoé sín. La ko kjaxin kuákja sín tí ka kjinjin k'uek'inkáya ch'án. Tí ka mé tsírxōnhya ka la me jnkokoqá ka tíha. ²⁴ Ntá tí sín soldado kjo sín kichó sín ntáchro sín kixin:

—Tsótséchjehyani tí ké ch'án. Íchá jina sich'exinni suerte ntá tsotsjeheni siná nkexro ts'áyéhe tí ka.

Mé xíkaha xiteyá éxí ntáchro xroon itén Dios tsíkjin sín ósé ntáchro kixin: “Kjuích'exín sín suerte ntá k'ókikayēhe sín kaná.” † Mé xíkaha kjuích'e tí sín soldado.

²⁵ A ntá chjino tí ntacruz kjuák'enkání ch'ín Jesús mé kjuák'e tí iné ch'án la ko tí tjan kichó tjan mé tjan María ichjién ch'ín Cleofas, la ko tí tjan María Magdale-na. ²⁶ A ntá tió k'uíkon ch'ín Jesús kixin itjen tí iné ch'án la ko chjino tjen tí ch'ín antsí tjuéhé ch'án k'uek'ajiko ch'án, ntá nixjehē ch'án tí iné ch'án, ntáchro ch'án kixin:

—Naná, tsjehé kixin ntaha tjen xjaan —ichro ch'án.

²⁷ Ntá nixjehē ch'ín Jesús tí ch'ín a ntáchro ch'án kixin:

—Tsjehé kixin ntaha itjen iná —ichro ch'án.

A ntá tí ch'ín a mé k'uáyéhe ch'án tí tjan a sákjuíko ch'án tjan ntōe ch'án k'óna éxí iné ch'án xíkaha.

Ik'uén ch'ín Jesús

(Mt. 27.45-56; Mr. 15.33-41; Lc. 23.44-49)

²⁸ Ntá ó nohe ch'ín Jesús kixin kaín xrā ó kjuixin xiteyá ntá tjinkaon ch'án kixin tsoxiteyá kaín nkehe ntáchro tí xroon tsíkjin sín ósé ntá xíkaha ntáchro ch'án kixin:

—Ik'uén ntā.

²⁹ Ntá ntíha tjen ijnko nchésen tsíkaón xranvino sán ntá kjuínchekjataxín sín ijnko ka tí xranvino, a ntá tí ka a kjuak'ekjen sín ijnko nta kjinjin, ntá kjuínchechriin sín

† Salmo 22.18

tí tjen ir'va ch'án. ³⁰ Ntá ik'uí ch'ín Jesús tí xranvino sán ntá ntáchro ch'án kixin:

—Ó kjuixin xiteyá kaín xín nkehe —ichro ch'án.
Ntá k'uísén kja ch'án ntá ó kjuixin k'uén ch'án.

Ijnko soldado chr'áte ch'án chica yo tí chjia ch'ín Jesús

³¹ A ntá xikaha yaon ntóye mé tí yaon kia pascua ntá tí sín judío tjinkakonhya sín kixin tí cuerpo kuènte tí sín tsík'en naxa ts'ejóyáni tí ntacruz tí yaon t'ok'éhe sín kixin tí yaon pascua mé ijnko yaon imá jíé, ichro sín. Mé xikaha kjuanchehe sín tí ch'ín Pilato kixin ts'etqan ch'án kixin tsochjenjin toté tí sín tjejóyáni tí ntacruz la ko ts'inkajin tí cuerpo kuènte tí sín tsík'en. ³² Ntá tí sín soldado sákjuí sín k'óchjenjin sín tí toté tí ch'ín saoxín tjen la ko k'óchjenjin sín tí toté tí ch'ín tjen nánko a tjejóyáni sín tí ntacruz tí tjen ch'ín Jesús. ³³ Ntá kjuíji sín tí tjen ch'ín Jesús ntá k'uíkon sín kixin ó tsíkjin tsík'en ch'án, ntá í k'óchjenjinhya sín toté ch'án.

³⁴ A ntá ijnko ch'ín soldado mé chr'áte ch'án chica yo tí chjia tí ch'ín Jesús ntá tuénxín k'uaxrje jni la ko inta. ³⁵ A ntá janhan mé tjékjan tí xroon i mé kjuak'é ntiha k'uíkuqan kixin xikaha kónhen ntá ntoá tjéxrjanka kixin jahará kjaxinrá chrókuítekaónrá. ³⁶ Mé xikaha kónhen tíha kixin tsoxiteyá tí nkehe ntáchro xroon itén Dios tsíkjin sín ntáchro kixin: “K'óchjenjinhya sín ninkehó huésqe ch'án.” ³⁷ Kjaxin itjen í jnko nketí nixja tí xroon itén Dios tsíkjin sín óse ntáchro kixin: “Tsokomá sín tí nkexro tsíchr'áte sín chica.” †

Xravá ch'ín Jesús

(Mt. 27.57-61; Mr. 15.42-47; Lc. 23.50-56)

³⁸ Ntá ó kjuixin kónhen kaín tíha ntá ch'ín José, mé ijnko ch'ín kjuixin chjasin Arimatea, mé kjuanchehe ch'án tí ch'ín Pilato kjuachaxin kixin tsjinkajinxin ch'án tí ntacruz tí cuerpo kuènte ch'ín Jesús sátsjiko ch'án tsjavá ch'án. Jehe ch'án imó kuinkáchónki ch'án tí ch'ín Jesús kixin chrakonhen ch'án tí sín judío. Ntá ch'ín Pilato mé kjuanjon ch'án kjuachaxin ntá sákjuíko ch'ín José tí cuerpo kuènte ch'ín Jesús. ³⁹ Kjaxin ch'ín Nicodemo, tí ch'ín kjuínixjehe tí ch'ín Jesús ijnko tie a mé kjuí ch'án kjuíkqao ch'án treinta kilo xroqan xraxé tjiko xroqan mirra la ko xroqan áloes. ⁴⁰ Mé xikaha ch'ín José la ko ch'ín Nicodemo k'uáyéhe sín tí cuerpo kuènte ch'ín Jesús kjuínchek'ísímá sín ijnko ka kjinjin tsíka tí xroqan xraxé a kixin xikaha k'uékinkáchónki tí sín judío k'uékjavá sín chojni tsík'en. ⁴¹ Tí kjuák'enkáni ch'ín Jesús ntacruz ntá chjinaxón ntiha tjen ijnko huer-to itjen ijnko tòye nixin naxa ninkexró tsíxrávähya ntiha. ⁴² Ntaha kjuavá sín tí ch'ín Jesús kixin chjinaxón tjen tí tòye a la ko í séhya tsoxrankixin tí yaon t'ok'éhe tí sín judío.

La ntá ó tsíxechón ch'ín Jesús

(Mt. 28.1-10; Mr. 16.1-8; Lc. 24.1-12)

20 A ntá tí yaon xrankixín semana ntá tí tjan María Magdalena naxa sítie sákjuí tjan tí tjen tí

† Salmo 34.20 † Zacarías 12.10

tòye, ntá k'uíkon tjan kixin ó tsíkjin tí xro tsík'ikjèxin tí tòye a. ² Ntá kuinká tjan sákjuí tjan tí tjen tí ch'ín Simón Pedro la ko tí ch'ín í jnko, mé tí nkexro imá k'uétjuèhe ch'ín Jesús, ntá ntáchro tjan kixin:

—Ó tsíkakitsjexín sín tòye tí cuerpo kuènte Ìnchéni ntá noehyani nketí tsíkjak'e sín —ichro tjan.

³ Ntá ch'ín Pedro la ko tí ch'ín í jnko mé kuínhin sín xikaha ntá sákjuí sín tí tjen tí tòye a. ⁴ Ntá yóí sín kuinká sín sákjuíko kichó sín. Kjánchó tí ch'ín í jnko antí tjan kuinká ch'án ntá kánhyó tjan kuinká ch'ín Pedro, ntá tí ch'ín í jnko senó ch'án kjuíji ch'án tí tjen tí tòye a. ⁵ K'uísén ch'án tsjehe ch'án nkaxenhen tí tòye a. A tí ka tsík'ísímá ch'ín Jesús mé naxa tjejó k'uíkon ch'án, kjánchó jehe ch'án k'uixenhya ch'án tí tòye a. ⁶ Ntá kjónté chr'éxin kjuíji ch'ín Simón Pedro ntá k'uix-enhen ch'án tí tòye a. Ntá kjaxin k'uíkon ch'án kixin tjejó tí ka tsík'ísímá ch'ín Jesús ⁷ la ko k'uíkon ch'án tí ka tsík'ísímá ikja ch'án na mé tí ka tsíxreya ka la ókjé tjen ka, a ntá tí í so ka na mé ókjé tjejó ka kjaxin. ⁸ Na ntá tí ch'ín í jnko k'uék'ajiko ch'ín Jesús, mé tí ch'ín tsíkjií senó na kjaxin k'uixenhen ch'án tí tòye ntá k'uíkon ch'án tí nkehe tsíkónhen ntá kuítekaon ch'án. ⁹ Kixin naxa k'uékienxinhya sín tí nkehe k'uéchronka xroon itén Dios kixin t'ichjánxin tsoxechón tí ch'ín Jesús. ¹⁰ A ntá tí sín sátsíkjitsjehe tòye la xíkjan sín ntqo sín.

Titaya k'uíkuèn tjan María Magdalena tí ch'ín Jesús

(Mr. 16.9-11)

¹¹ Ntá tjan María mé ntahó kuítqhe tjan ntója tí tòye tsjánka tjan. Naxa tsjánka tjan k'uísén tjan tsjehe tjan nkaxenhen tí tòye ¹² ntá xrinahya k'uíkon tjan yaá sín ángel tjejóyá sín ka tjóá tjejótxaxin sín tí tsíkjak'e tí cuerpo kuènte ch'ín Jesús na mé ijnko ch'ín ángel na mé tjen ch'án tí tsíkjak'e ikja ch'ín Jesús la ko tí í jnko a itjen ch'án tí tsík'ejó toté ch'án. ¹³ A ntá tí sín ángel mé kjuanchankí sín kixin:

—Naná, ¿kuènte tsjanka? —ichro sín.

Ntá kjuátehe tjan ntáchro tjan kixin:

—Sátsíkjiiko sín Ìnchéni, ntá nonahya nketí tsíkjak'e sín ch'án —ichro tjan.

¹⁴ Kjuixin ntáchro tjan tíha ntá kuinkátjía tjan ntá k'uíkon tjan kixin itjen ch'ín Jesús, kjánchó kjuátsqan-hya tjan kixin jehe ch'án. ¹⁵ Ntá ch'ín Jesús kjuanchankíhi ch'án tjan ntáchro ch'án kixin:

—Naná, ¿nkekuènté tsjanka? ¿Nkexro tjejá? —ichro ch'án.

A ntá jehe tjan kjuenkayáxin tjan kixin jehe ch'án mé t'ayakonhen ch'án tí huerto, a ntá ntáchro tjan kixin:

—Kja tí jaha sákjuíkoa ch'án ntá jie chronka nketí sákjuíkoa ch'án kixin janhan sátsjikian ch'án jie —ichro tjan.

¹⁶ Ntá ch'ín Jesús mé nixjehe ch'án tjan ntáchro ch'án kixin:

—¡María! —ichro ch'án.

Ntá kuinkátjía tjan ntá nixjaxin tjan nkiva hebreo ntáchro tjan kixin:

—¡Raboni! —ichro tjan. Tíha mé t'axrjexín kixin Maestro.

¹⁷ Ntá ntáchro ch'ín Jesús kixin:

—Tatjántana kixin naxa sátiíhya janhan tí tjen T'aná. Sátjia tjítsjehé tí sín kichiná chénka sín kixin sátsjiyá tí tjen T'aná na mé kjaxin It'ará tí jahará na mé Dios kuéntana la ko kjaxin Dios kuéntará —ichro ch'án.

¹⁸ Ntá tí tjan María Magdalena sákuichénka tjan tí sín k'uék'ajiko ch'ín Jesús chrónka tjan kixin xikaha tsík'ikon tjan Ìnchéni. La ko kjaxin chrónka tjan kixin xikaha tsíntáchro ch'án.

Tí sín k'uék'ajiko ch'ín Jesús titàya k'uikuèn sín ch'án
(Mt. 28.16-20; Mr. 16.14-18; Lc. 24.36-49)

¹⁹ A ntá ó kónjín tí yaon a mé tí yaon xrankíxixín semana, a ntá tí sín k'uék'ajiko ch'ín Jesús jnkokóá kójnkot-sé sín nkaxenhen nchia tsík'ikjehe sín ntója nchia jina kixin chrakonhen sín tí sín judío. Ntá xríñahya titàya kónohe sín k'uikon sín kixin jnkosiné tí tjejó sín itjen ch'ín Jesús, ntá nixjehe ch'án kjuajna tí sín k'uék'ajiko ch'án ntáchro ch'án kixin:

—Jina tjejorá —ichro ch'án.

²⁰ Ntá kjuixin ntáchro ch'án tíhi ntá kjuako ch'án itja ch'án la ko chjia ch'án. Ntá kóchéhe tí sín k'uék'ajiko ch'án kixin k'uikon sín Ìnchéni. ²¹ Ntá ntáchro ch'ín Jesús inaá kixin:

—Kjuaxróxin ts'ejorá. Yóhe T'aná k'uetuanna k'uinka, a ntá jie la janhan tetuanhan tí jahará —ichro ch'án.

²² Ntá k'uánote ch'án tí jehe sín ntáchro ch'án kixin:

—T'ayéherá Nchakuen Dios. ²³ Tí ts'itjayanhanrá tí jie kjuasin jnkójín chojni ntá xikaha tsjiin tí ijje sín. Ntá tí ts'itjayanhyará tí jie kjuasin jnkójín chojni ntá naxa kjuíinhyá tí ijje sín —ichro ch'án.

Ch'ín Tomás k'uikon ch'án kixin tsíxechón Ìnchéni

²⁴ A ntá tí ch'ín Tomás, ijnko tí teyóxin sín k'uék'ajiko ch'ín Jesús mé kjaxin tikitexín sín ch'ín Nohé mé kohya ch'án tí kui ch'ín Jesús. ²⁵ Ntá chr'éxin tí í so sín k'uék'ajiko ch'ín Jesús ntáche sín ch'án kixin:

—Ó k'uikonni Ìnchéni —ichro sín.

Kjánchó ntáchro ch'ín Tomás kixin:

—Tí ts'íkónhya janhan tí tsíkjiatexín chica clavo itja ch'án la ko tsochr'ánxianhya dedo tjaná ntiha la ko tí tsochr'ánxianhya tjaná tí chjia ch'án, zna mé nkexrí chrókuitekavan? —ichro ch'án.

²⁶ A ntá tí k'uátsínka ijnko semana ntá jnkokóá kójnkotsé sín nkaxenhen nchia la ko kjaxin kjuák'eko sín ch'ín Tomás. Tsík'ikjehe sín ntója nchia jina ntá xríñahya titàya kónohe sín k'uikon sín kixin jnkosiné tí tjejó sín itjen ch'ín Jesús, ntá nixjehe ch'án tí jehe sín k'uék'ajiko ch'án ntáchro ch'án kixin:

—Kjuaxróxin ts'ejorá —ichro ch'án.

²⁷ Ntá ntáche ch'án tí ch'ín Tomás kixin:

—Chr'axénhén dedo tjá tí tsíkjiatexín chica clavo tjaná la ko xrákoa tjá chr'axénhén chjiana. Chrón-táchrohya kixin chaxínhya. Tsítekávan kixin chaxín —ichro ch'án.

²⁸ Ntá kjuátehe ch'ín Tomás ntáchro ch'án kixin:

—¡Ìnchéni jaha la ko Dios kuéntana! —ichro ch'án.

²⁹ Ntá ntáche ch'ín Jesús tí ch'ín Tomás kixin:

—Jaha Tomás k'uikonjian ntá kuitekávan. Ntá antsí náxrjón tjejó tí sín kjónté k'uikonhya la titekaon sín —ichro ch'án.

Tíhi mé chrónka nkekuènte tsíkjin ch'ín Juan tí xroon i

³⁰ Ch'ín Jesús kjuasin ch'án itsjé í so kjuaxroan náxrjón k'uikon tí sín k'uájiko ch'án kjónté chrónkahya tí xroon i kixin xikaha kónhen. ³¹ Tí nkehe chrónka tí xroon i ikjian janhan kixin chrókuitekáonrá jahará kixin Jesús mé tí Cristo, mé tí Xjeen Dios kixin ntá kaín ni chróchóntani kjuachón jnkochrín kixin chrókuitekaonni ch'án.

Yato tí sín k'uék'ajiko ch'ín Jesús xríñahya titàya k'uikon sín ch'án

21 A ntá chr'éxin tí sín k'uék'ajiko ch'ín Jesús titàya xík'ikon sín tí jehe ch'án inaá chrínta ntayaon Tiberias. Mé xikaha kónhen ² kixin jnkokóá k'uéjó sín ch'ín Simón Pedro la ko ch'ín Tomás, me tí ch'ín tikitexín sín ch'ín Nohé, la ko ch'ín Natanael kuixin ch'án chjasin Caná estado Galilea, la ko tí yaá xjeen ch'ín Zebedeo la ko tí yaá sín inaá k'uék'ajiko ch'ín Jesús. ³ Ntá ntáchro ch'ín Simón Pedro kixin:

—Sátsjitsé koche —ichro ch'án.

Ntá kjuátehe sín kixin:

—Koíni sátsjikoani —ichro sín.

Ntá sákjuí sín k'uit'ótjen sín ijnko ntabárcó. Kjánchó ninkehó koche tséhya sín kuenté tie. ⁴ A ntá ó chjina ts'inkaséyan ntá xríñahya titàya k'uikon sín itjen ch'ín Jesús chrínta ntayaon, kjánchó kjuátsoanhya tí sín k'uék'ajiko ch'án kixin jehe ch'án. ⁵ Ntá kjuanchankíhi ch'án sín kixin:

—Jahará ntasoá, za naxa ninkehó koche tsehyará? —ichro ch'án.

Ntá kjuátehe sín ntáchro sín kixin:

—Naxa ninkehó ko tséhyani —ichro sín.

⁶ Ntá ch'ín Jesús ntáche ch'án sín kixin:

—Itérá tí nchísén tí nánko chjia chjina tí ntabárcó la tsotsará va —ichro ch'án.

Ntá xikaha kjuích'e sín k'ue sín nchísén ntá í tjachahya sín tsakitsjenkixin sín ntá tí nchísén kixin nchónhya koche tjinká. ⁷ A ntá tí ch'ín antsí tjuèhe ch'ín Jesús mé ntáche ch'án tí ch'ín Pedro kixin:

—¡Ìnchéni tí méhe! —ichro ch'án.

Ntá kuínhin ch'ín Simón Pedro kixin Ìnchéni tíha ntá k'uinkáya ch'án iké ch'án inaá (kixin tsíkakitsje ch'án iké ch'án) ntá kjuíankí ch'án ntá. ⁸ Tí í so sín k'uék'ajiko ch'ín Jesús mé kjuíji sín tí chrínta ntayaon kjuikao sín tí ntabárcó tinkánkákjentóxin tí nchísén tjinká koche chrítaón ntá kixin ijnko ciento metro kjínxin tí chrínta ntá k'uéjó sín. ⁹ Ntá kjuíji sín chrínta ntá ntá k'uínka-jínxin sín tí ntabárcó ntá k'uikon sín tjeche xrohi síxènkj xrinta ntá chrítaón tí xrinta tjekjen ijnko koche la ko nánko síin niqtja. ¹⁰ Ntá kjuanchia ch'ín Jesús ntáchro ch'án kixin:

—Xrákoará iso koche tsítserá nantá —ichro ch'án.

¹¹ Ntá ch'ín Simón Pedro k'ujt'ótjen ch'án tí ntabárcō kuákja ch'án tí nchísén kuinkánkákjen ch'án xrákəo ch'án tí nchísén tjinká koche iye na mé ijnko ciento cincuenta y tres va. Ntá kjónté nchónhya va la k'uichjehya tí nchísén a. ¹² Ntá ntáchro ch'ín Jesús kixin:

—Xrákirá, interá —ichro ch'án.

À ntá nijnko tí sín k'uék'ajiko ch'án chrókjuanchankíhi sín ch'án kixin nkexro tí jehe ch'án kixin ó kjuátsoan sín kixin Ìnchéni tíha. ¹³ Ntá kóchjina ch'ín Jesús kuákja ch'án tí niotjə chjéhe ch'án tí jehe sín la ko xíkaha xíkjanjon ch'án tí koche.

¹⁴ Tíhi mé níxin k'uíkon tí sín k'uék'ajiko ch'ín Jesús kixin tsíxechón ch'án. †

Ch'ín Jesús itjo ch'án tí ch'ín Simón Pedro

¹⁵ Kjuixin kjóne sín ntá kjuanchankíhi ch'ín Jesús tí ch'ín Simón Pedro kixin:

—Jaha Simón, xjeen Jonás, ¿á antsí tjuəna jaha, a ntá tí í so la kánhyó? —ichro ch'án.

Ntá kjuátəhe ch'ín Pedro ntáchro ch'án kixin:

—Jeén, Ìnchéni, ó noha kixin tjínkəvan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntəna —ichro ch'án.

¹⁶ Ntá yóxin kjuanchankí ch'ín Jesús ínaá kixin:

—Jaha Simón, xjeen Jonás, ¿á tjuəna jaha? —ichro ch'án.

Ntá kjuátəhe ch'ín Pedro ntáchro ch'án kixin:

—Jeén, Ìnchéni, ó noha kixin tjínkəvan tí jaha —ichro ch'án.

Ntá ntáchro ch'ín Jesús kixin:

—Ntá xíkaha la t'ayakonhén tí kolélo kuèntəna —ichro ch'án.

¹⁷ Ntá níxin kjuanchankí ch'ín Jesús kixin:

—Jaha Simón, xjeen Jonás, ¿á tjínkəvan tí janhan? —ichro ch'án.

À ntá k'uává ch'ín Pedro kixin níxin kjuanchankí ch'ín Jesús kixin á tjínkaon ch'án tí jehe ch'án ntá ntáchro ch'án kixin:

—Jaha Ìnchéni, ó noha kaín xín nkehe. Ó noha kixin tjínkəvan tí jaha —ichro ch'án.

† Juan 20.19,26

Ntá ntáchro ch'ín Jesús kixin:

—Ntá xíkaha t'ayakonhén tí kolélo kuèntəna. ¹⁸ Ntá ijnko nkehe chaxín tjétjonka kixin tí naxə k'uéntasoyá jaha k'uék'inkəya ká jahvá la ko k'uékjia tí k'uékóxrjínhan jaha. À ntá tió tsotáda jaha ntá tsjéntoá tjá ntá í jnko nkexro sintak'inkáya ka la ko sátsjikoa sín tí tóxrjínhya sáchrókjuia —ichro ch'án.

¹⁹ À ntá tíhi mé chrónkaxín ch'ín Jesús kixin nkexrí ts'enxín ch'ín Pedro na mé t'axrjexín nkexrí tsochjéhe ch'án Dios kjuasáya. Ntá kjuixin ntáchro ch'ín Jesús kixin:

—Chréhé tí janhan —ichro ch'án.

Nkehe tsənhen tí ch'ín antsí tjuèhe ch'ín Jesús

²⁰ Ntá kuinkátjía ch'ín Pedro ntá k'uíkon ch'án kixin tinkáchréhə tí ch'ín antsí tjuèhe ch'ín Jesús, na mé tí nkexro kjuák'e chjinaxón tí kjuák'e ch'ín Jesús tí kjóne sín tsíkjanchankíhi ch'án tí ch'ín Jesús kixin nkexro sinchekji ch'án. ††²¹ Ntá ch'ín Pedro k'uíkon ch'án kixin tinkáchréhə tí ch'ín a ntá kjuanchankíhi ch'án tí ch'ín Jesús kixin:

—Ìnchéni, ¿a ntá tí ch'ín i la nkehe tsənhen ch'án a? —ichro ch'án.

²² Ntá kjuátəhe ch'ín Jesús kixin:

—Tí tjínkəvan naxə chrókjuak'echón ch'án tí chrókjan la jaha la chrókjuiatéhya tíha. Ntá jaha la chréhé tí janhan —ichro ch'án.

²³ Ntá kjuankixin kjo tí sín k'uék'ajiko ch'ín Jesús kixin ts'enhya tí ch'ín a. Ntá jehya kixin ntáchro ch'ín Jesús kixin chrók'uenhya tí ch'ín a. Náhí. Ó jehí ntáchro ch'án kixin tí tjínkaon ch'án naxə chrókjuak'echón tí ch'ín a tí chrókjan ch'án chrókui ch'án chrókjuiatéhya tí ch'ín Pedro chrókjuanchankí ch'án nkehe tsənhen í jnko chojni.

²⁴ À ntá tí nkexro a mé tí nkexro chrónka kixin chaxín kónhen kaín tíha la ko ikjin ch'án tí xroon i. Ntá ó noheni kixin tí nkehe tsíkjin ch'án la chaxín ntoá tíha.

²⁵ Naxə síin nchónhya nkehe kjuəkoxin ch'ín Jesús kjinhya janhan. Tí chrók'óna jnkojnko jnkojnko tíha ntáxrjan kixin kjá chrókjuachahya tí chjasintajni chrók'uinka kaín tí xroon chrók'óna xíkaha. Amén. Ó tjen.

†† Juan 13.25

LOS HECHOS

Itsi Nchakuen Dios

1 Tjuaha jaha Teófilo na tí libro saoxín mé kjiān kaín nkehe kjuako ch'ín Jesús la ko tí xra kjuích'e ch'án tí xrankíxixín ² hasta tí yaon sákjuí ch'án nkaya nkajíní. A ntá ti naxa sákjuíhya ch'án nkajíní la kjueyá ch'án tí sín sich'ehe ch'án xra la ntá tí Nchakuen Dios mé kjuínkítsa ch'án ntá nixjehē ch'án sín la k'uetuēnhen ch'án sín kixin tsonohe sín nkehe tí xra chrókjuich'e sín. ³ Tió kjuixin k'uén ch'án ntá kónoxín kixin tjechón ch'án, k'uíkon tí jehe sín la ko cuarenta yaon mé k'uíkon sín ch'án jnkoyaxón. Itsjé nkehe kjuakoxín ch'án kixin tsonoexín sín kixin chaxín tjechón ch'án la ko kjuako ch'án nkexrí tí kjuachaxin kuēnte Dios.

⁴ Ti naxa kójnkotséko ch'án tí sín k'uájiko ch'án la jehe ch'án mé k'uetuēnhen ch'án sín kixin naxa sátsjixinhya sín tí chjasin Jerusalén. Chrónka ch'án kixin:

—Chróchonhénrá ntiho chrók'uayéhérá tí nkehe tsjanjon T'aná, me tí nkehe kuinhínrá xrjanka janhan. ⁵ A ntá chaxín ch'ín Juan ìntá ó kuíkítexín ch'án chojni. A ntá ijie kánhyó itsjé yaon ntá jahará la Nchakuen Dios la tsikitiáxínrá.

Sákjuí ch'ín Jesús nkaya nkajíní

⁶ Ntá ti naxa kójnkotséko sín ch'ín Jesús, kjuanchankíhi sín ch'án kixin:

—Jaha Ìnchéni, ¿á tsjánjonhya kjuachaxin jaí ts'e-tqanni chjaséni Israel ínaá? —ichro sín.

⁷ Ntá kjuátehe ch'ín Jesús kixin:

—Náhi. Chontahyará kjuachaxin tsonohará nkesá tsonhen tíha. Jehó T'aná chóna kjuachaxin ts'etqan tíha. ⁸ Ntá itsi tí Nchakuen Dios ntá ts'ayéhérá kjuachaxin sátsjichronkará nkehe tí xra kjuít'a, mé sátsjirá tsjákohérá kaín sín chjasin Jerusalén, la ko estado Judea, la ko estado Samaria, la ko kuenté chjasintajni.

⁹ Ntá kjuixin nixja ch'ín Jesús ntá xríñahya tin-kák'it'ótjen ch'án sákjuí ch'án la tjejótsjehe sín. Sákjuí ch'án hasta kjuák'enkákjan ch'án ijnko tjuí. Ntá í t'ikonhya sín nkerí kjuíji ch'án. ¹⁰ Ntá naxa tjejókonta sín tí sákjuí ch'ín Jesús nkajíní, a ntá xríñahya titàya k'uíkuèn sín yaá chojni ntoa tjejóyá sín ka tjóá tjejó sín chjínaxón tí tjejó tí jehe sín. ¹¹ Ntá tí sín a mé ntáchro sín kixin:

—Jahará chojni kjuíxínrá estado Galilea, ¿nkehe tsonhen naxa kontará nkajíní? Xíkaha tjejokontará sákjuí Jesús la ko mé xíkaha xiki ch'án ínaá —ichro sín.

Xreyá ch'ín Matías tsjiatēhe lüké ch'ín Judas

¹² Na ntá kjanxín sín tí jñá it'in Olivo na ikjan sín chjasin Jerusalén. Tíha a mé kjinhyó tjen kixin ó xíkahó k'uetqan tí ley sátsji sín tí yaon t'ok'éhe sín. ¹³ Na ntá kjuíji sín tí chjasin ntiha ntá k'uit'ótjen sín tí yóxin piso tí nchia tsíkjen sín k'uék'ejó sín. Mé ntiha tjen ch'ín Pedro, la ko ch'ín Jacobo, la ko ch'ín Juan, la ko ch'ín Andrés, la ko ch'ín Felipe, la ko ch'ín Tomás, la ko ch'ín Bartolomé, la ko ch'ín Mateo. La kjaxin ch'ín Jacobo, mé it'é ch'án it'in Alfeo, la ko ch'ín Simón, mé tí ch'ín a mé kuēnte tí partido cananista, la ko kjaxin ch'ín Judas, savé ch'án mé it'in Jacobo. ¹⁴ Kaín sín kójnkotsé sín ntiha tsonixjehē sín Dios la ko k'uéjóko sín tí kichó tí ch'ín Jesús la ko tí tjan María, ìné ch'án, la ko iso chojni chjin.

¹⁵ Ntá tí yaon a tí ch'ín Pedro k'uínkatjen ch'án kjuák'exín toté ch'án jnkosiné tí tjejó tí sín tinkáchónki Ìnchéni mé ijnko ciento ikán chojni mé tsíkójnkotsé ntiha. Ntá ntáchro ch'án kixin:

¹⁶ —Kíchóni, t'ichjánxín tsoxiteyá éxí nixja xroon itén Dios éxí tsínixja ch'ín David tsíchronka Nchakuen Dios nkehe sich'e ch'ín Judas. Tí ch'ín Judas mé kjuíkqao ch'án tí sín tsotsé ch'ín Jesús. ¹⁷ Jehe ch'án mé kjaxin k'uék'ajikoni la jnkokón xra k'uáyèkoni ch'án. ¹⁸ A ntá jehe ch'án mé sákjuík'énaxín ch'án ijnko nonte tí chichaon kjuacha ch'án kixin tí jje kjuasin ch'án. Ntá k'uánótjen ch'án la ikja ch'án k'uitja nonte la xitjehē tsee ch'án k'uaxrje kaín sñtantòé ch'án. ¹⁹ Ntá xíkaha kónohe kaín tí sín chjasin Jerusalén ntá tí nonte kjuínchek'in sín nkívēe sín Acéldama mé t'axrjexín kixin ijnko nonte siín ijñi. ²⁰ Tí xroon Salmo mé nixja xíkíhi:

Tsitqhe ntóé ch'án a,
la kohya nkexro ts'ejó ntiha.

La ko kjaxin ntáchro kixin:

Í jnko nkexro ts'áyehē tí xra kuēnte ch'án. †
Mé xíkaha tsíkjin ch'ín David.

²¹ Tí tjejóni ntihi la siín chojni ó k'uájikoni xráxín tí k'uék'ajikoni Ìnchéni Jesús ²² desde k'uíkonni nkexrí kuíkite ch'ín Juan tí jehe ch'án la ko hasta k'uíkonni sákjuí ch'án nkaya nkajíní. Ntá ijie t'ichjánxín tsoxreyá jnkojín tí sín a tsojnkotsékoni sín kixin kjaxin tsochrónka sín kixin chaxín xechón Ìnchéni Jesús —mé xíkaha chrónka ch'ín Pedro.

²³ Ntá kjuenkayáxín sín tsonoxín yaá chojni mé tí ch'ín José, t'íkōn ch'án Barsabás la ko Justo, la ko kjax-

† Salmos 69.25; 109.8

in í jnko ch'án it'in Matías. ²⁴ Ntá nixjehe sín Dios la ntáchro sín kíxin:

—Ínchéni jaha mé choxian asén kaín chojni. Tjako-héni nkexro tsonhen tocar xra tí yaá tí nkexro í kónoxín ²⁵ tsjiatehe xra apóstol kuénte ch'ín Judas. A ntá tí ch'ín Judas mé kútohe ch'án tí xra kíxin kjuasin ch'án ijje la ntá ijje sákjuí ch'án tjetjasóte ch'án —ichro sín.

²⁶ Ntá kjuích'e sín suerte ntá xrínghya kónhen tocar tí ch'ín Matías, ntá tuénxín tí hora a kuákja ch'án xra k'uéjoko ch'án tí tejnko tí sín kjuéyá Ínchéni.

Ó kui Nchakuen Dios

2 Ntá ó kui tí yaon kia Pentecostés ntá kaín tí sín tinkáchónki Jesús mé kójnkotsé sín jnkokoá tjejó sín. ² Xrínghya kuínhin sín ijnko tóvéntó kuixín nkajní. Tí tóvéntó mé éxi ijnko xrínto fuerte chjehe. Kuenté tí nchia tjejóxenhén sín mé kóvéntó kjaxín. ³ Ntá xrínghya k'uíkon sín nkehe éxi xrohi nene tsjehe. Ntá tíha xikayehe la k'uéjókjen jnkojnko kja tí jehe sín. ⁴ Na ntá kaín sín k'uáyéhe sín tí Nchakuen Dios ntá kjuankíxin sín nixja sín í jnko nkíva kíxin Nchakuen Dios kjuínkítsa sín nixja sín.

⁵ A nta tí yaon a la tí chjasin Jerusalén k'uéjok chojni judío tjinkaon sín sinchexiteyéhe sín tí nkehe tinkáchónki sín, mé tsíkijín sín nkuíxin chjasintajni. ⁶ A ntá jehe sín mé tsíkinhin sín tí tóvéntó ntá tsíkóchjina nchónhya chojni. Ntá í noehya sín nkehe chrókjuenkayáxin sín kíxin jnkojnko tí jehe sín mé kuínhin sín kíxin nixja tí sín a jnkojnko nkívee sín. ⁷ Ntá síxránkja sín, chrakon sín ntá jehe sín mé tjo sín kichó sín kíxin:

—¿Á jehya kaín tí sín tjejónixja mé tsíkijín sín estado Galilea? ⁸ La znkekuènté tjejótinhinni kíxin nixja sín jnkojnko nkíveeni? ⁹ Kíxin ntihi mé siín chojni tsíkijín chjasin Partia, la ko Media, la ko Elam, la ko Mesopotamia, la ko Judea, la ko Capadocia, la ko Ponto, la ko Asia, ¹⁰ la ko Frigia, la ko Panfilia, la ko Egipto la ko nkuíxin Africa ántsi nó ntaha Cirene. La ko kjaxín chojni romano tjejó ntihi. Iso tí sín a mé chaxín tsíkokjéxín judío, la í so la tinkáchónki sín Dios éxi tí sín judío xíkaha. ¹¹ La kjaxín siín chojni tsíkijín Creta, la ko Arabia. Mé xíkaha kaín ni tsíkijínni tí chjasin a mé tsíkinhinni tjejónixja tí sín a tí kjuaxroan kuénte Dios jnkojnko nkíveeni —mé xíkaha ichro sín.

¹² Ntá tóxakonhen kaín sín la chrakon sín ntá kjuanchankíhi kichó sín kíxin:

—¿Nkehe t'axrjéxín kaín tíha? —ichro sín.

¹³ A ntá iso sín kjuanoá sín ntáchro sín kíxin:

—Tsékoan tí sín a —ichro sín.

A ntá ch'ín Pedro chénka tí sín siín

¹⁴ Ntá jehe ch'ín Pedro mé k'uínkatjen ch'án, kjuák'exín toté ch'án la ko tí tejnko sín apóstol mé k'uínkatjen sín la ntá ch'ín Pedro mé itsen nixja ch'án. Ntáchro ch'án kíxin:

—Jahará chojni judío la ko jahará tjejórá chjasin Jerusalén. Kaínrá tjejórá tinhínra tí nkehe tsóxrjanka.

¹⁵ Tí sín tjejó ntihi la jehya tsékoan sín éxi ntáchrórá, kíxin na ntá las nueve nchítjen la kohya nkexro tsékoan. ¹⁶ Tíhi mé tsíchónka ch'ín profeta Joel:

¹⁷ Ntáchro Dios kíxin: Itsi ijnko yaon tsjixíxin ntá tsochr'an Nchakuenná ntá ts'áyéhe chojni. Ntá tí xjaaná ntoa la ko tí xjaaná chjin mé tsonixja tan kuéntana.

La ko tí sín ntasoá mé titàya ts'íkuèn sín tí nkehe tsjákoqha sín.

La ko tí sín ó tada la kotáchrién sín ts'ikonxín sín kíxin nkexrí tjinkaon Dios.

¹⁸ Tí yaon tsonhen kaín tíha la tsochr'an tí Nchakuenná ts'áyéhe kaín tí sínntoa ch'ena xra la ko tí síchjin kjaxín

la tsochrónka sín tanná.

¹⁹ Ntá janhan mé tsjákoxian ijnko kjuachrakon nkajní. A ntá chjasintajni tsjákoxian kjuaxroan: mé ts'ixin ijni la ko xrohi la ko itjuí tsík'óna ihnchi.

²⁰ Mé tí yaon la ts'inkaséyanxínhya, ts'óna ts'ixin tie. A ntá tí nitjó mé ts'óna ijni.

Xíkaha senó tsonhen ntá itsi Ínchéni.

Tíhi mé ijnko yaon imá jíe la imá náxrjón.

²¹ A ntá kaín tí nkexro tsjanchehe ihnié Ínchéni kíxin tsjinkítsa sín mé tsaá sín. †

Mé xíkaha tsíchónka ch'ín Joel.

²² Jahará chojni israelita tinhínra tí nkehe tsóxrjanka.

Tí ch'ín Jesús tsíkijín chjasin Nazaret mé Dios kjuakoxín ch'án kíxin tsích'r'án ch'án kíxin kjuasin ch'án itsjé kjuaxroan jíe k'uíkonrá la ko kjuako ch'án kíxin Dios tsíchjéhe ch'án kjuachaxin kíxin tjinkaon ch'án

chrók'uikonrá. Jahará ó jína nohará kaín tíha. ²³ Kjonté xíkaha k'uíkonrá la jahará itserá ch'án éxi tsíkjenkayáxin Dios ósé. A ntá jahará kjuínchek'ayéhérá ch'án tí sín jínahya, a ntá tí sín jínahya mé k'óyán sín ch'án, kjuak'enkani sín ch'án ijnko ntacruz. ²⁴ Kjánchó Dios la kjuínchexechón ch'án inaá la kjuatsen ch'án tí kjuatjoté kuénte kjuach'én kíxin ntá ti kjuach'én xitjahya ts'etuenhen tí jehe ch'án. ²⁵ A ntá ósé tí ch'ín rey David tsíchónka ch'án kuénte Jesús ntáchro ch'án kíxin:

Jaha Ínchéni t'íkuan kíxin jnkochr'ín tjétaón ntja tí xritjak'é janhan.

Jaha mé itjen tjaná chjina kíxin chrókohya jie chrókjuásian.

²⁶ Méxra imá chéhe asenná. Ir'va tsjexian tí nkehe náxrjón.

Ó ñona kíxin kohya nkehe ts'atsínka kjonté its'én.

²⁷ Ó ñona kíxin tí jaha tsitqéhya asenná chríkjan tí siín chojni tsík'en.

Tsjánjonhya kjuachaxin kíxin tsóxika ntóna kíxin janhan mé ijnko nkexro t'aha xra jína tjuéhe.

²⁸ Jaha mé kjuákona tí ntja tsjanjon kjuachón. Jaha mé nchekhàna kíxin t'ayakonna. ††

Mé xíkaha tsíkjin ch'ín David.

²⁹ Kíchóni tjtqhérá tsontáxrjan kíxin ch'ín David, tí nkexro k'uaxrjeníxinni mé tsík'én ch'án la ko

† 2.17–21 Joel 2.28–32 †† 2.25–28 Salmo 16.8–11

tsíkjiḡravá ch'án. Ntá naxá noheni nketí tsíxravá ch'án. ³⁰ A ntá ch'ín David mé ijnko nkexro tsíchrónka itén Dios la ó nohe ch'án kixin chaxín Dios chrónka kixin ijnko nkexro ts'axrenixin ch'án mé ts'óna rey mé ts'e-tōan éxi jehe ch'án k'uētōan ch'án. ³¹ Mé xíkaha ch'ín David la ósé ó nohe ch'án nkehe tsonhen la mé chrónka ch'án kixin tsoxechón Cristo la ko ntáχρο ch'án kixin tí asén ch'án tsitōehya tí siín tí sín tsík'en la ts'itjáyanhya tí cuerpo kuènte ch'án. ³² Méxra Dios kjuínchexechón tí ch'ín Jesús, mé k'uíkonni kaín ni la mé chrónkani kixin chaxín tíha. ³³ Ntá ijie Jesús mé sákjuiko ch'án Dios la nànto itja chjina Dios mé tjen ch'án. Ntá tsintáχρο It'é ch'án Dios kixin tsochr'án ch'án tí Nchakuen ch'án. Ntá jie ó kui la ó k'uíkonrá la ko kuínhínrá nkehe kónhen. ³⁴ Tí ch'ín David la jehya jehe ch'án sákjuí nkaya nkajní, kixin jehe David ntáχρο ch'án kixin:

Ìnchéni Dios mé ntáche tí Ìnchéni kixin:

"Tjak'e tjaná chjina ntihó tsétōan,

³⁵ tsjixinjian kaín xín tí sín nínkakonhan la tsjachahya sín ts'etōan sín kixin jahvá mé tsétōan." †
Mé xíkaha tsíkjin ch'ín David.

³⁶ Ntá kaín rá chojni israelita chrókónohará chaxín kixin jehe tí ch'ín Jesús ó kjuakénkanirá tí ntacruz la Dios mé kjuích'éna Ìnchárá ijie, mé tí Cristo —mé xíkaha chrónka ch'ín Pedro.

³⁷ Ntá tí kuínhin sín tíha ntá imá kóxakonhen asén sín. La ntá kjuanchankíhi sín ch'ín Pedro la ko tí í so sín kjueyá ch'ín Jesús. Ntáχρο sín kixin:

—Kíchóni, a ntá jie la ζnkexrí chrókjuich'eni?

³⁸ Ntá kjuátehe ch'ín Pedro ntáχρο ch'án kixin:

—Chrókjuítōhérá tí ijíará la chróxráinkáonrá Dios. Ntá chrókuikitiáxínrá ihníé Jesucristo ntá Dios mé tsjakjiinhanrá tí ijíará ntá jehe ch'án tsjanjon ch'án Nchakuen ch'án ts'ayéhérá. ³⁹ Dios mé sinchekítōnhanrá ch'án tí Nchakuen ch'án ts'ayéhérá jahará la ko xjāanrá la ko kjaxin tsochjéhe ch'án Nchakuen ch'án kaín xín tí sín tjejó ikjín. Mé jehe ch'án tsochjéhe ch'án Nchakuen ch'án jnkojnko tí nkexro tsjeyá ch'án.

⁴⁰ Mé xíkaha ntáχρο ch'ín Pedro la ko í so nkehe ntáχρο ch'án. Nta nixjehé ch'án sín inaá, ntáχρο ch'án kixin:

—Chrókjuítōhérá tí jínahya tjenkáyaxin tí chojni siín chjasintajni kixin jahará me jína chrókuaará.

⁴¹ Ntá kaín tí sín kuítekaon tí nkehe chrónka ch'án la ntá kuíkite sín la tí yaon a kóchjina iní mil chojni kjuankixin tinkáchónki Ìnchéni Jesús la k'uíto tí sín ó xráxín siín. ⁴² Ntá kaín sín mé jína k'uék'ejó sín mé kuítekaon sín tí nkehe kjuako tí sín kjueyá Jesús la kjuínkítsa sín kjuanjón sín tí nkehe chrókjóné tí í so sín la ko chjéhe sín Dios kjuasáya la ko kójnko tsé sín kixin sine sín niōtjā xraxinkakonxín sín kixin ik'uén Ìnchéni.

Mé xíkaha k'uéjó tí sín xrankíxixín tinkáchónki Ìnchéni

⁴³ La ntá kaín tí í so sín mé chrakon sín kixin tí sín tsíkijeyá Jesús kjuasin sín itsjé kjuaxroan. ⁴⁴ La kaín tí sín tinkáchónki Jesús mé jnkokōá k'uéjó sín la jnkokōá

chónta sín tí nkehe sine sín. ⁴⁵ Kjuínchekji sín tí nkehe chónta sín ntá k'óxikayéhe sín tí chichaon la chjéhe sín tí sín chóntahya. ⁴⁶ Jnkojnko yaon kójnko tsé sín tí njnko la ntá jnkojnko ntōe sín kjóneko kichó sín. La ko kjóné sín niōtjā kixin xraxinkakonxín sín kixin ik'uén Ìnchéni la ko kjuaxróxin k'uéjó sín la kohya nkexro kjuínchehnke. ⁴⁷ Kjuanchehe sín kjuasáye Dios. Ntá kaín chojni k'uéchéntehe sín kjuasáya. A ntá jnkojnko yaon Ìnchéni mé kjueyá iso chojni kixin tsōtsjé tí sín tsaá.

Kuítōhe jína ijnko nkexro xitjahya tji

3 Ijnko yaon tí ch'ín Pedro la ko ch'ín Juan mé chriin sín sákjuí sín tí tjen tí njnko. Mé kjuíji sín las tres kónjín, tí hora mé nixjehé sín Dios. ² Kaín yaon kjuák'e ntiha ijnko ch'ín tsíkokjéxín xitjahya tji. Sát-síkjiiko sín ch'án tí njnko la tsíkjak'etjāxín sín ch'án tí ntója puerta mé it'in Ntója Náxrjón. Ntaha tjetjan-chak'éhe ch'án chichaon tí sín sít'ixenhen ntiha. ³ Ntá xríngahya k'uíkon tí ch'ín xitjahya tji kjuíji tí ch'ín Pedro la ko ch'ín Juan ts'ixenhen sín njnko, a ntá kjuanchak'éhe ch'án sín chichaon. ⁴ Na ntá ch'ín Pedro la ko ch'ín Juan mé komá sín tí ch'ín a la ntá ntáχρο ch'ín Pedro kixin:

—Tsjehé ntihi.

⁵ A ntá tí ch'ín a tjetsjehe ch'án jína kixin ách'e ichrén nkehe tsjanjon tí sín a, ichro ch'án. ⁶ A ntá ch'ín Pedro ntáχρο kixin:

—Na chontahya plata ni oro kjánchó tí nkehe chonta la tsōtjāhá. Mé kjuachaxin ihníé Jesucristo, tí nkexro tsíkjiixín chjasin Nazaret, la t'inkatjen itjia —mé xíkaha ichro ch'ín Pedro.

⁷ Ntá ch'ín Pedro mé itsé ch'án tí tja chjina tí ch'ín xitjahya tji ntá k'uínkatjen ch'án. Ntá xríngahya ó kósóji tí nta ntoá toté ch'án. ⁸ Ntá tí ch'ín xitjahya tji la chrika ch'án la kjuák'exín toté ch'án ntá kjuankíxín ch'án itji ch'án. Ntá k'uixenko sín ch'án nkaxenhen njnko. Tjetji ch'án la ko chrika ch'án la chjéhe ch'án kjuasáya Dios. ⁹ Na ntá kaín tí chojni siín tí chjasin ntiha la k'uíkon sín kixin ó tji ch'án la ko chjéhe ch'án kjuasáya Dios. ¹⁰ Ntá chrakon sín kixin xíkaha tsíkónhen kixin tsíkatsōan sín kixin jehe tí nkexro kjuák'etjāxín kjuanchak'á ch'án chichaon ntója njnko it'in Ntója Náxrjón.

Nixjehé ch'ín Pedro tí chojni siín tí ntāsin Salomón

¹¹ Na tí ch'ín xitjahya tji la mé títoehya ch'án tí ch'ín Pedro la ko ch'ín Juan. Ntá kaín xín tí sín siín ntiha chrakon sín kuinká sín sákjuítsjehe sín tí ntāsin kuènte njnko it'in ntāsin Salomón kixin ntaha tjejó tí sín a.

¹² Ntá tí k'uíkon ch'ín Pedro xíkaha la ntáche ch'án sín kixin:

—Jahará chojni israelita, ζnkekuènte chrakonrá jahará la ko nkekuènte komaráni? ¿Á tjenkáyaxínrá kixin jehóni kjuínchekitōheni jína tí ch'ín i kixin jehóni chóntani kjuachaxin la ko kixin imá tinkáchónkini Dios?

¹³ Náhí. Tí Dios k'uékinkáchónki ch'ín Abraham, la ko Isaac, la ko Jacob mé imá chjéhe ch'án kjuachaxin tí

† 2.34–35 Salmo 110.1

Xjeen ch'án Jesús. Kjánchó jahará tsíkjikenhenrá ch'án tí sín t'et̄oan. Ntá tí ch'ín Pilato mé tjinkeon ch'án chrók'uatjánta ch'án tí ch'ín Jesús kjánchó jahará la tjinakonhyará xikaha. ¹⁴ A ntá jahará chrókjuanchiará chrókuítóhe sáchrókjui tí nkexro tjóá jína asén. A ntá náhi. A ntá jahará mé tjinkeonrá sátsji ijnko chojni chóna nchónhya jié. ¹⁵ A ntá jahará tsík'oyánrá tí nkexro tjanjon kjuachón. A ntá Dios mé kjuínchexechón tí jehe ch'án la mé xikaha k'uíkonni la chrónkani. ¹⁶ Tí kjuachaxiénd ihnié Jesús mé tinkáchónkani la ntá tíha mé kuítóexín jína tí nkexro k'uíkonrá la ko choxinrá. Tí ch'ín a mé kuítekaon ch'án ntá kuítóhe ch'án jína. Mé xikaha ó k'uíkonrá kaín rá.

¹⁷ Kíchóni ó nóna kixin tió jahará la ko tí sín t'et̄oan k'oyánrá Jesús la ni kónoahyará nkehe kjuich'erá. ¹⁸ Ntá ó xiteyá tí nkehe tsintáchro Dios tsínixjajín tí sín tsíchronka itén ch'án kixin tí Cristo t'ichjánxín tsjasóte ch'án. ¹⁹ Méxra tsitóherá ijjará ntá xráinkáonrá Dios ntá jehe ch'án mé ts'óxika ijjará ntá Inchéni mé sinchekitohará ch'án jína. ²⁰ Ntá jehe ch'án mé tsochr'án Jesucristo inaá la xra ó tsi kixin tsaáxinrá. ²¹ Na ntá ijie la Jesucristo la nkaya nkajni ntahó tsitóhe ch'án hasta tsjasiyóxinjian Dios kaín nkehe éxi tsintáchro ch'án tsínixjajín ch'án tí sín tsíchronka itén ch'án ósé. ²² A ntá senó tí ch'ín Moisés tsíchénka tí sín tsík'axrjenixinni kixin: "Inchéni Dios mé tsochr'án ijnko nkexro ts'axrjenixinrá tsochrónka itén ch'án éxi tsíchr'án ch'án tí janhan. T'ichjánxín tinhínrá kaín tí nkehe tsontáchro ch'án. ²³ A ntá tí chojni titekakonhya tí nixja tí nkexro a la ts'itjáyán sín la tsítóhe sín tí nación Israel," † mé xikaha tsíchronka ch'ín Moisés.

²⁴ "Kaínxín tí sín tsíchronka itén Dios kjuankíxixín ch'ín Samuel la ko kaín tí sín kui chr'éxin mé chrónka sín kixin kaín tíha tsonhen xikaha tí yaon i. ²⁵ Mé tí nkehe tsintáchro Dios tsínixjajín ch'án tí sín tsíchronka itén ch'án kixin xikaha chrók'uayéhérá jahará tí nkehe chrókjuanjon ch'án kixin chrók'uejorá jína. Dios tsík'ich'éna ch'án ijnko pacto mé nixjehé ch'án tí sín tsík'axjenixinrá mé tsintáche ch'án tí ch'ín Abraham kixin: "Kaínxín chojni chjasintajni mé tsoyaonxín sín kixin ijnko nkexro ts'axrjenixín tí jaha." †²⁶ Dios kjuínchexechón ch'án tí Xjeen ch'án la saxóxin ich'án ch'án tí tjejorá jahará israelitará kixin chrókjuintayaonrá ch'án kixin jnkojnko tí jahará chrókuítóherá tí nkehe jínahya ich'erá —ichro tí ch'ín Pedro.

Tí ch'ín Pedro la ko ch'ín Juan nkayakon tí sín t'et̄oan

4 Ch'ín Pedro la ko ch'ín Juan la naxa tjejonixjehé sín tí sín tsíkójnkotsé ntá xrínahya ikui tí sín nchat'á la ko tí ch'ín t'et̄uēnhen tí sín soldado kuēnte tí njnko la ko tí sín saduceo. ² Imá kóninkaon sín kixin ch'ín Pedro la ko ch'ín Juan kjuakohé sín tí sín tsíkójnkotsé nkexrí tsoxechón chojni tsík'en kixin xikaha xechón ch'ín Jesús. ³ Ntá kuínhin sín xikaha ntá itsé sín tí sín a ntá sákuíko sín, chr'áxēnhen sín ntóechiso. Ntahó k'uéjé sín hasta kóyāon kixin ó ntá kóntó. ⁴ A ntá nchónhya tí sín tsíkinhin tí tan a la kuítekaon sín.

† 3.22–23 Deuteronomio 18.15, 19† Génesis 22.18

Ntá kjuixraká tí número tí chojni ntoa mé in'ó mil chojni ntoa ó.

⁵ A ntá tí yaon chr'éxin kójnkotsé tí chjasin Jerusalén tí sín t'et̄oan kuēnte tí sín judío la ko tí sín tjako tí ley. ⁶ Mé kjaxin ntaha tjen ch'ín Anás, mé jehe ch'an mé tí nchat'á imá t'et̄oan, la ko ch'ín Caifás, la ko kjaxin ch'ín Juan, la ko ch'ín Alejandro, la ko kaín tí chojni kjéhya tí nchat'á t'et̄oan. ⁷ Ntá k'uētoan sín kixin síxrakoa ch'ín Pedro la ko ch'ín Juan. Ntá k'uéjé sín jnkosiné la ntá kjuanchankíhi sín ntáchro sín kixin: —¿Nkexro kjuanjon kjuachaxin o nkexro kjuachaxin ihnié kixin xikaha ich'erá tí nkehe?

⁸ Ntá ch'ín Pedro imá chóna ch'án kjuachaxin kuēnte Nchakuen Dios ntá kjuátēhe ch'án ntáchro ch'án kixin:

—Jahará chojni t'et̄oan kuēnte chjasin la ko jahará sín tada kuēnte chjasin Israel, ⁹ jahará mé tjanchankirá kixin nkexrí kuítóhe ijnko chojni níhi jína kixin tjinkeonrá tsonohará. ¹⁰ Ntá tinhínrá jína tí nkehe tsochrónkaxinni kixin kaín rá chojni chjasin Israel tsonohará kixin tí ch'ín i itjen ntihi mé kuítóhe ch'án jina kjuachaxiénd ihnié Jesucristo, tí nkexro tsík'jixín chjasin Nazaret. A ntá jahará mé tsík'akénkanirá ch'án tí ntacruz la ntá Dios kjuínchexechón ch'án inaá. ¹¹ Tí ch'ín Jesús i mé tí xro náxrxjónhya kuítóēntará tió kjuich'énará tjet'ō ntá mé jie k'óna tí xro tjetōan. ¹² Kohya í jnko nkexro chóna kjuachaxin chrókuaáxin-ni kixin kohya í jnko ihnié chojni ntihi chjasintajni chrókuinkáchónkani chrókuaáni —mé xikaha ichro ch'ín Pedro.

¹³ Tí síxreé mé k'uíkon sín kixin ch'ín Pedro la ko ch'ín Juan mé nixja sín kaín asén sín la ntá kónohe sín kixin tí sín a mé noehya sín xroon la tjetuanhya sín. Ntá chrakon tí sín t'et̄oan ntá kjuátsoan sín kixin tí sín a mé tsík'ajiko ch'ín Jesús. ¹⁴ A ntá tí ch'ín tsíkítóhe jína mé ntiha tjejóko sín ch'án. Méxra xitjahya tsjanchia sín jié tsjasóte tí sín a. ¹⁵ Ntá tí síxreé a mé k'uētoan sín kixin tí sín a ts'axrje sín ntója ntá jehó sín k'uéjóxēnhen sín nchia ikjo sín kíchó sín. ¹⁶ Ntá ntáchro sín kixin:

—¿Nkehe chrókjuich'ehe ni tí sín a? Kaínxín tí chojni ntihi chjasin Jerusalén mé ó k'uíkon sín kixin kjuínkítsa Dios tí sín a ntá kjuasin sín ijnko kjuaxroan jié ntá xitjahya tsontáchroni kixin chaxínhya tíha. ¹⁷ Í tjinakonyani kixin naxa tsochrónka sín tíha kixin naxa tsinhin chojni. Méxra ts'et̄oanni kixin í tsochénkahya sín ninkexró tí ihnié Jesús.

¹⁸ Na ntá k'uíyehé sín tí sín a inaá ntá k'uētuēnhen sín kixin ninkehó chrónixja sín la ko chrókjuako sín ihnié Jesús, ichro sín. ¹⁹ A ntá ch'ín Pedro la ko ch'ín Juan kjuátēhe sín ntáchro sín kixin:

—Tjenkayáxinrá jahará, ¿á chrókóxrjínhin Dios chrókjuintaxiteyáharáni jahará o chrókjuínchexiteyéhēni tí jehe ch'an? ²⁰ A ntá jeheni la xitjahya tsítóheni tsochrónkani tí nkehe ó k'uíkonni la ko tí nkehe kuínhinni —ichro sín.

²¹ A ntá kjónté xikaha kuínhin tí síxreé la jiéhe k'uētoan sín ntá kjuanjon sín kjuachaxin kixin sátsji tí sín a

‡ Salmo 118.22

kíxin k'uitjahya sín nkexrí sinchekjasóte sín tí sín a kixin kaín tí sín chjasin ntiha chjéhe sín Dios kjuasáya kixin tí kjuaxroan kjuich'e sín. ²² Na mé tí ch'ín kuítóhe jína kixin tí kjuaxroan mé chjina k'uaxitjehe ch'án cuarenta nánó a.

Tí sín tinkáchónki Jesús tjanchia sín kixin tsochrakonyha sín

²³ Ntá tí ch'ín Pedro la ko ch'ín Juan tsíxranjon kjuachaxin sátsji sín na ntá sákjuí sín tí tsíkójnkotsé iso tí sín chóxin sín. Ntá chrónka sín kaín nkehe k'uetōan tí sín nchat'á t'etōan la ko tí sín táda. ²⁴ Ntá kjuixin kuínhin tí sín tsíkójnkotsé na ntá kaín sín nixjehē sín Dios la ntáchro sín kixin:

— Ìnchéni, jaha mé kjuich'éna nkajní la ko chjasintajni la ko tí ntayaon la ko kaín xín tí nkehe siín. ²⁵ Jaha mé kjuachaxién Nchakuan nixjaxian ch'ín David tí nkexro kjuít'aha xrā. Ntáchro ch'án kixin:

¿Nkekuènte kixin kónínkaon kaín tí chojni nación ókjé?

À ntá tí chojni israelita mé tjenkayáxin nkehe ninkehó sínkíhya.

²⁶ Tí sín rey siín chjasintajni la ko kaín tí sín tí chjasin kójnkotsé sín

nínkakonhen sín Ìnchéni la ko Cristo. † Mé xíkaha tsíkjin ch'ín David ósé.

²⁷ Mé xíkaha chaxín ch'ín Herodes, la ko ch'ín Poncio Pilato, la ko kjaxin tí chojni tsíkjixín ókjé, la ko tí sín israelita mé tsíkójnkotsé sín tí chjasin ntihi kixin kónínkakonhen sín tí Xjaan Jesús chóntahya jje, mé tí nkexro tsíkjéyá jaha sit'aha xrā. ²⁸ Mé xíkaha kjuínchexiteyá sín tí nkehe ósé tsíkjenkayáxin kixin t'ichjánxin xíkaha tsonhen. ²⁹ À ntá Ìnchéni, tsjehé kixin imá jjehe k'uetōan tí sín a. La ntá jaha tsjínkítsa tí sín sit'aha xrā tsochrakonyha sín tsochrónka sín itán. ³⁰ La ko tí kjuachaxián sinchekitōexín jína tí chojni níhi la ko tsjákoqian kjuaxroan kjuachaxién ihnié tí nkexro Jesús t'aha xrā —mé xíkaha nixjehē sín Dios nkaya nkajní.

³¹ À ntá tí kjuixin nixjehē sín Dios a ntá tí tjejó sín mé kuínkí nonte. La ntá kaín sín antsí k'uáyéhe sín Nchakuen Dios ntá kaín asén sín kjuankíxin sín chrónka sín itén Dios.

Tí kaín nkehe siín la kaín sín mé kuènte sín

³² La kaín tí sín kuínkáchónki sín Jesús mé jnkokqá kjuenkayáxin sín. Kohya nkexro ntáchro kixin jehó kuènte tí nkehe siín. Náhí. Kaín sín mé kuènte sín. ³³ Tí sín tsíkjeyá Jesús mé kaín asén sín chrónkaxín sín kixin nkexrí xechón Ìnchéni Jesús. Ntá Dios antsí kjuíncheyaon kaín sín. ³⁴ Kohya ninkexró nóaxínhya tjejó ntiha kixin kaín tí sín chóna nontēe sín o ntōe sín kjuínchekji sín. Na ntá tsíkjkāo sín tí chichaon ³⁵ chjéhe sín tí sín kjueyá Jesús. À ntá tí sín k'óxiqayēhe sín tí chichaon, kuákja tí sín nòda. ³⁶ Mé xíkaha kjuich'e ijnko ch'ín levita it'in José. Jehe ch'án la tsíkjixín ch'án nonte Chipre jnkosiné ntayaon. Tí sín kjueyá Jesús mé

kjuínchek'in sín ch'án Bernabé, mé t'axrjexín kixin tí ch'ín nchechéhe asén chojni. ³⁷ Jehe ch'án a mé kjuínchekji ch'án ijnko nontēe ch'án ntá kjuikāo ch'án tí chichaon kjuínchek'áyéhe ch'án tí sín kjueyá Jesús.

Ijje kjuasin ch'ín Ananías la ko tjan Safira

5 À ntá í jnko ch'án mé it'in Ananías, a ntá ichjién ch'án mé it'in Safira, mé jehe sín mé kjuínchekji sín ijnko nontēe sín. ² À ntá tí ch'ín a kjuenkayáxinko ichjién ch'án ntá kuakitsjentehe sín iso tí chichaon. Ntá í so mé sákjuiko ch'án la chjéhe ch'án tí sín kjueyá Jesús la kjuanjon ch'án éxí kaín. ³ Ntá ntáchro ch'ín Pedro kixin:

—Ananías, ¿kuènté chjehé kjuachaxin tí Tsohren kixin k'uetūenhen asán? Ntá kjuich'iyehé tí Nchakuen Dios kixin kjuínchemá iso chichaon kjuínchekjixián nontāa. ⁴ ¿Á jehya nontāa tíha? Ntá tió kjuínchekjia la, tí chichaon la, ¿á jehya kuèntá? ¿Kuènte kjuenkayáxian sich'e tíha? Kjuich'iyehé Dios, jehya chojni kjuich'iyehé.

⁵ Na ntá kuínhin tí ch'ín Ananías ntá kjuítsínka ch'án ntá ik'uén ch'án. La ko kaín xín tí sín ntiha kónohe sín nkehe kónhen tí ch'ín a la imá chrakon sín. ⁶ Na ntá ikjui iso sín ntasoá la ntá kjuínchek'ísímá sín ika tí cuerpo kuènte ch'án la ntá sákjuíkō sín, sákjuikjavá sín.

⁷ Ntá k'uátsínka iní hora ntá kjuíji ichjién ch'ín Ananías k'uixenhen tjan tí nchia ntaha a. La noehya tjan nkehe tsíkónhen tí ntiha. ⁸ Ntá ch'ín Pedro mé kjuanchankíhi tí tjan a, ntáchro ch'án kixin:

—Chrónka, ¿á chaxín xíkahó kóxiqin tí nonte ó kjuínchekjirá? —ichro ch'án.

Ntá kjuátehe tjan kixin:

—Chaxín xíkahó kóxiqin.

⁹ Ntá ntáchro ch'ín Pedro kixin:

—¿Nkekuènte jnkokqá kjuenkayáxinrá kjuich'iyehérá Nchakuen Ìnchéni? Kjá ntáchrorá kohya nkehe chrókónhanrá. Ntihi ó kui tí sín ntasoá sákjuikjavá sín xia na ntá jaí sátsjiko sín tí jaha —mé xíkaha ichro ch'ín Pedro.

¹⁰ Ntá tuénxín kjuítsínka tjan Safira toté tí itjen ch'ín Pedro ntá ik'uén tjan. Ntá k'uixenhen tí sín ntasoá tí nchia a ntá k'uíkon sín kixin tsíkjixín tsík'en tjan. La ntá sákjuíkō sín tí cuerpo kuènte tjan la kjuavá sín tjan tí chjinaxón tsíxrává tí xii tjan. ¹¹ Na kaín tí sín kuènte njnko la ko tí í so sín kuínhin tí xíkaha tsíkónhen, mé imá chrakon sín.

Itsje kjuaxroan kjuakoxin sín

¹² À ntá tí sín kjueyá Jesús mé kjuakoxin sín nchónhya kjuaxroan tí siín chojni ntiha la ko kaín sín mé kójnkotsé sín tí ntasin it'in Salomón. ¹³ Chrakon iso sín k'uítóhya tí jehe sín la kjónté la kaín chojni tjikosáyehe tí jehe sín. ¹⁴ La ntá xrínahya nchónhya chojni ntoa la ko chojni chjin kjuankíxin tinkáchónki sín Ìnchéni. ¹⁵ Ntá itsje chojni mé kuakitsje sín tí chojni níhi k'uejo sín ntja. Tjejótták'á sín chrítaón cama la ko kania kixin ts'atsínka ch'ín Pedro ntá kjónté its'uēen ch'án ó ts'at-

† 4.25–26 Salmo 2.1–2

sínka tí tjejó sín mé chrókuitqexín sín jína. ¹⁶ Kjaxin tí chjasin chjino mé kjuixin nchónhya chojni ikjui sín chjasin Jerusalén la kjuikao sín tí chojni níhi la ko tí chojni chóna nchakuen tí jinahya. La kaín sín a mé kuítqhe sín jína.

Ch'ín Pedro la ko ch'ín Juan mé chónkíhi sín

¹⁷ Na ntá tí sín nchat'á t'etqan la ko tí sín kuente tí sín saduceo mé imá kóchjinqxínhin sín. ¹⁸ Na ntá itsé sín tí sín kjueya Jesús la chr'áxenhén sín ntqechiso. ¹⁹ A ntá ijnko ángel kuente Ìnchéni ikui tí tie a kuakitjehe ch'án ntója ntqechiso ntá kuakitsje ch'án tí sín a. La ntá k'uētuenhen ch'án sín kixin:

²⁰ —Sátjirá njnko la tsjakohérá kaín tí sín ntiha tí tan nixin tsjanjon kjuachón.

²¹ Kjuixin kuínhin sín ntá sákjuí sín ntá tí k'uínkaséyan k'uixenhén sín tí njnko kjuako sín.

A ntá tí nchat'á t'etqan la ko tí sín k'uejóko ch'án mé k'uíyehé sín tsojnkotsé kaín tí síxreé, mé tí sín t'etqan kuente Israel. Na ntá k'uētqan sín kixin tsoxrakoa tí sín tjejóchjina tsíkjeýá Ìnchéni. ²² A ntá kjuíji tí sín policía tí ntqechiso a ntá k'uitjahya sín tí sín a. La ntá ikjan sín la ²³ ntáchro sín kixin:

—Kjuíjini ntiha la k'uíkoni tsíkjehe jína ntqechiso a la k'uejó tí sín soldado a ntója. Ntá kuakitjehe ni ntqechiso la k'uitjahyani ninxeró tí nkaxenhén —ichro sín.

²⁴ Ntá kaín tí nchat'á t'etqan la ko tí ch'ín k'uētuenhen tí policía kuente njnko la ko i so tí sín nchat'á t'etqan mé kuínhin sín ntá ntáchro sín kixin xá nkexrí chrókónhen chrók'uitjayan tí xra kuente tí sín a. ²⁵ Na ntá tuéxín kjuíji ijnko nkexro ntáchro kixin:

—Tí sín k'uejochjinará jahará mé ó nkaxenhén njnko ntaha tjejó sín tjejótkaqhe sín chojni —ichro ch'án.

²⁶ La ntá tí ch'ín k'uētuenhen tí sín policía mé sákjuíko ch'án tí sín policía la kjuíakjín tí sín tjako. Ninkehó kjuích'ehya tí sín policía tí sín tjako kixin chrakon sín kixin ách'e tí sín síin ntiha mé tsjak'e sín xro, ichro sín. ²⁷ Na ntá tió kjuikao sín tí sín a la k'uejó sín nkayakon tí sín t'etqan ntá tí nchat'á t'etqan ntáchro ch'án kixin:

²⁸ —Jeheni kjuanjonyani kjuachaxin kixin tsjakorá ihnié tí nkexro a. ¿A ntá nkehe kjuích'erá jahará? Kuenté chjasin Jerusalén tsíkjakorá. La tjinkáonrá tsékaráni jié kixin jeheni tsík'óyánni tí ch'ín a —ichro ch'án.

²⁹ A ntá ch'ín Pedro la ko tí iso sín kjueya Jesús ntáchro sín kixin:

—A ntá jeheni t'ichjánxin sinchexiteyéheni Dios senó. A ntá chr'éxin sinchexiteyéheni chojni. ³⁰ Tí Dios tsíkinkáchónki tí sín tsík'axenjixinni ósé mé kjuínchexéchón Jesús, ti nkexro a mé kjuakénkanirá tí ntacruz tsík'oyánrá. ³¹ Ntá ijie tjeko ch'án Dios nkaya nkajní la nángo itja chjina Dios mé tjen ch'án la Dios kjuích'éna ch'án ijnko nkexro t'etqan kixin sinchekaá ch'án chojni kixin tí nación Israel chrókjan chrókuinkáchónki sín Dios ntá chrók'uitjayan tí jié chóna sín. ³² La ko kjaxin jeheni chrónkani kaín tí nkehe k'uíkoni kjuachaxién

Nchakuen Dios. Tí Nchakuen ch'án mé chjéhe Dios kaín tí nkexro chaxín sinchexiteyéhe tí jehe ch'án.

³³ La ntá tí sín t'etqan a mé kuínhin sín tíha ntá kóninkaon sín la ko tjinkaon sín chrók'óyán sín tí sín a. ³⁴ Na ntá tjen ijnko chojni fariseo mé ijnko síxreé it'in ch'án Gamaliel. Jehe ch'án mé ijnko maestro kjuako tí ley la kaín chojni chjasin ntiha chónthehe ch'án kjuasáya. Mé k'uínkatjen ch'án kjuák'exín toté ch'án la nixja ch'án k'uētqan ch'án kixin tí sín tsíkjeýá Ìnchéni mé ts'axrje sín ntója intsí, ichro ch'án. ³⁵ Na ntá nixjehe ch'án kaín tí síxreé ntáchro ch'án kixin:

—Jahará chojni israelita, tóxakonhanrá kixin kohya nkehe chrókjuích'eherá tí sín a. ³⁶ Xráxinkáonrá kixin senó kjuák'e ijnko ch'ín it'in Teudas la tónhen qsen ch'án kixin imá t'etqan ch'án. Ntá itsjé sín mé noó ciento chojni kjuíchréhe ch'án. Na ntá ókjé chojni k'óyán sín tí ch'ín a la ntá kaín tí sín kuinkáchréhe tí jehe ch'án mé xíka sín sákjuí sín ntá ntahó kjuéxín tí xra k'uejkich'e sín. ³⁷ Ntá chr'éxin tió xrenájín kaín ihnié chojni k'uejó na ntá ikjui íjnko ch'ín mé it'in ch'án Judas la kjuixin ch'án estado Galilea. Ntá itsjé chojni kjuíchréhe ch'án. La ntá kjaxin k'óyán sín ch'án la ntá kaín sín tí sín kjuíchréhe ch'án xíka sín sákjuí sín inaá. ³⁸ Méxra títqhérá tjiatéhyará tí jehe sín a. A ntá tí tjejóch'e sín xra kuente chojni ó la kjaxin ts'itjayan. ³⁹ A ntá tí chaxín tjako sín kjuachaxién Dios ntá tsjachahyará sinchek'itjayanrá tíha. Méxra títqhérá sín kixin tsjánjonkohyará Dios.

⁴⁰ Na ntá kaín tí síxreé mé kuítekaon sín la ntá k'uíyehé sín tí sín kjueya Jesús. La ntá kjuate sín la xík'etuenhen sín kixin í tsonixjahya sín ihnié Jesús la ntá kjuanjón sín kjuachaxin kixin sátsji sín. ⁴¹ Ntá tí sín kjueya Jesús mé k'uaxrjexín sín tí tjejó tí sín t'etqan kjónté xíkaha kónhen sín la chéhe sín kixin Dios kjuanjón kjuachaxin kjuasóte sín kixin tí kjuako sín ihnié Jesús. ⁴² Kuítqehya sín tsjako sín kuente Jesucristo kaín yaon tí nkaxenhén njnko la ko tí jnkojnko ntqechojni.

Kjueya sín yato chojni tsjinkitsa

6 Na ntá tí yaon a tjoka sítinkákótsjé tí sín tinkáchónki Ìnchéni. A ntá tí sín nixja nkíva griego mé kóninkakonhen sín tí sín nixja nkíva hebreo. Ntáchro sín kixin tí sín chjin k'án kuente sín la kánhyó jína k'uáyéhe tí nkehe síxikayehe sine sín jnkojnko yaon, ichro sín. ² Na ntá tí teýó tí sín tsíkjeýá Jesús mé k'uíyehé sín kaín tí sín tinkáchónki Ìnchéni. Ntá nixjehe sín, ntáchro sín kixin:

—Jeheni la jehya jína tsítqeheni tí xra tjakoni itén Dios, kixin ntá sit'aharáni xra ts'óxikayehe ni tí nkehe sine tí sín k'án. ³ Méxra jahará kichó ni tsjéýará yato chojni ntoa tí tjejórá, tí chojni jína choxinrá la ko nohe sín la ko qntsí chóna sín Nchakuen Dios mé tí sín a sinchek'áyéhe ni tí xra a. ⁴ A ntá jeheni la tsonixjehe ni Dios la ko tsinkákjakoni itén ch'án —mé xíkaha ichro sín.

⁵ La ntá kaín sín mé kuínhin sín xíkaha ntá jnkokoá kjuenkayáxin sín. La ntá kjueya sín ch'ín Esteban, mé ijnko nkexro imá tinkáchónki Ìnchéni la ko qntsí chón-

ta ch'án tí Nchakuen Dios. La kjaxin kjueyá sín ch'ín Felipe, la ko ch'ín Prócoro, la ko ch'ín Nicanor, la ko ch'ín Timón, la ko ch'ín Parmenas la ko ch'ín Nicolás. Jehe ch'án mé tsíkijxin ch'án chjasin Antioquía la ósé mé tsíkinkáchónki ch'án ti nkehe tinkáchónki tí sín judío. ⁶ Ntá kjuixin kjueyá sín tí sín a ntá kjuikao sín ti tjejó tí sín tsíkijeyá Ìnchéni. La ntá tí sín a mé nixjehe sín Dios la ko k'uejotja tja sín chrítaón tí ikja tí sín tsíkónoxín.

⁷ Tí itén Dios sítinkákji la tinkákótsjé tí sín tinkáchónki Ìnchéni chjasin Jerusalén. Kjaxin itsjé tí sín nchát'á judío kjuankíxin sín tinkáchónki sín Ìnchéni.

A ntá itsé sín ch'ín Esteban

⁸ Tí ch'ín Esteban mé ijnko nkexro k'uéchóna kjuachaxin kixin Dios tsíkjincheyaon ch'án la nchónhya kjuaxroan kjuakoxin ch'án tí síin chojni. ⁹ A ntá iso sín tsíkijxin tí njnko judío kuènte tí sín senó k'uejó esclavo sín tsíkijxin sín chjasin Cirene, la ko Alejandría, la ko Cilicia, la ko estado Asia, mé kjuankíxin sín ikjo sín ch'ín Esteban. ¹⁰ Kjonté xikaha la kjuachahya sín kixin Nchakuen Dios mé kjuínkítsa tí ch'ín Esteban nixja ch'án. ¹¹ Na ntá jehe sín mé kjuenkehe sín ókjé chojni kixin tsochrónka sín kixin kuínhin sín k'uántaxínhin ch'án ch'ín Moisés la ko Dios, ichro sín. ¹² Mé xikaha k'uixité kaín chojni la ko tí sín t'etqan kuènte njnko la ko tí sín tjako tí ley. La ntá itsé sín tí ch'ín Esteban la tinkánkákjen sín ch'án sákjuiko sín ch'án tí síin tí síxreé a. ¹³ Kjaxin kjueyá sín chojni tsochrónka kixin ntoáhya kjuako ch'ín Esteban la ntá chro tí sín a kixin:

—Tí ch'ín a mé títoehya ch'án t'ántaxínhin ch'án tí njnko kuènténi la ko tí ley. ¹⁴ Ó kuínhinni kixin chrónka ch'án kixin tí ch'ín Jesús, tí ch'ín tsíkijxin chjasin Nazaret, mé sinchek'itjayan ch'án tí njnkoeni ntihi la ko tsjitóxinhin ch'án tí nkehe tinkáchónkini mé tí nkehe tsík'etqan ch'ín Moisés —mé xikaha ichro sín.

¹⁵ Ntá tí síxreé la ko kaín tí sín sítjxin ntiha la komá sín tí ch'ín Esteban la mé k'uíkon sín kixin tí kàré ch'án mé éxí ijnko ángel mé xikaha tsjehe tí jehe ch'án.

Tí nkehe kjuátehe ch'ín Esteban

7 A ntá tí sín nchát'á t'etqan kjuanchankíhi sín tí ch'ín Esteban kixin:

—¿Á chaxín kaín tíhi tsíntáchrúa?

² Na ntá jehe ch'án kjuátehe ch'án ntá chro ch'án kixin:

—Kaínrá kichó ni Israel la ko sín tada tinhínra tí nkehe tsonáxrjan. Dios kuènteni chóna kjuachaxin mé kjuakohé ch'ín Abraham tí nkexro k'uaxrjeníxinni tió kjuák'e ch'án nación Mesopotamia tí naxa sátiyhya ch'án tsjak'e ch'án nonte Harán. ³ Dios tsíntá chro kixin: "Títoghé chjasán la ko kaín tí nkexro kjéhya. Na ntá sátiya tí nonte tsjákohá jaha." ⁴ Na ntá ch'ín Abraham k'uaxrjexín ch'án tí nonte Caldea. Ntá sákjuí ch'án kjuák'e ch'án tí nonte Harán. Na ntá kjuixin ik'uén it'é ch'án na ntá Dios kjuikao tí jehe ch'án tí nonte tjejorá jie. ⁵ Kjánchó ch'ín Abraham la kuákjahya ch'án nít'o

nonte hasta ni tí tsjak'e toté ch'án la chónahya ch'án. A ntá chrónka Dios kixin chaxín chr'éxin tió tsjixin ts'en ch'ín Abraham la tí sín ts'axrjeníxin ch'án mé ts'áyéhe sín tíha. Kjonté naxa kohya nijnko xjeen ch'án la mé xikaha ntá chro Ìnchéni. ⁶ Kjaxin tsíntá chro Dios kixin tí sín ts'axrjeníxin ch'ín Abraham la ts'ejó sín ókjé nonte, la ko sich'exón sín xra la ko náxrjónhya ts'ejó sín noó ciento nánó. ⁷ La kjaxin xíntá chro Dios inaá kixin: "Ntá chr'éxin janhan sítakjasóte tí sín kjuínchekjasóte xjaan. La ntá tí xjaan mé tsokjan sín ntihi ntá tsoxraxinkakonxín sín tí janhan," mé xikaha ichro Dios. ⁸ Na ntá Dios mé tsíkjo ch'ín Abraham kixin kaín tí chojni nto ts'axrjeníxin ch'án mé itsa sín xroye. Na ntá xikaha tió kokjíhi xjeen ch'an Isaac ntá ch'ín Abraham mé chjéhe ch'án xjan xroye tió xétjehe xjan ijin yaon. Ntá kjaxin xikaha kjuích'e ch'ín Isaac tió chóna ch'án xjeen ch'án Jacob, la ntá ch'ín Jacob la xikaha kjuích'e ch'án inaá. Ntá tí sín a mé k'óna it'é tí tejó tribu tsík'axrjeníxin tí sín Israel.

⁹ Tí xjeen ch'ín Jacob mé tí sín k'uaxrjeníxinni ósé la jehe sín k'uéchjinoxínhin sín tí kichó sín José ntá kjuínchekji sín ch'án la tí sín k'uena la sákjuiko sín ch'án nó nación Egipto, kjánchó Dios mé kjuínkítsa tí jehe ch'án. ¹⁰ Dios mé kjuínchekaá ch'án tí náxrjónhya k'uékjak'e ch'án. La ko Dios kjuanjon kjuachaxin kixin imá tsonohe ch'án. Na ntá k'uíkon ch'ín Faraón tí rey kuènte nación Egipto a xikaha tí xra jina kjuích'e ch'ín José ntá kjuanjon ch'án kjuachaxin kixin ts'etqan ch'ín José tí nación Egipto la ko tí ntq ch'án.

¹¹ Na ntá kókjinta xrinahya la náxrjónhya k'uejó tí sín nación Egipto la ko nonte Canaán la tí sín tsík'axrjeníxinni la k'uitjahya sín nkehe sine sín. ¹² A ntá tsíkinhin ch'ín Jacob kixin tí nación Egipto mé sítóxi noa trigo ntá k'uettuhen ch'án tí sín xjeen ch'án kixin sátsji sín ntiha tsjik'ena sín noa, la jehe tí sín a mé tí sín tsík'axrjeníxinni. Tíha mé tí saoxín sákjuí sín. ¹³ Ntá tí yóxin sákjuí sín ntiha ntá ch'ín José kjuínchenohe ch'án sín kixin tí sín a la savé ch'án. La ntá kjuakohé ch'án tí ch'ín Faraón tí sín naxa kjéhya ch'án. ¹⁴ La ntá k'uetqan tí ch'ín José kixin sátsjikakjín sín it'é ch'án Jacob la ko kaín tí sín kjéhya ch'án, mé ijnko setenta y cinco chojni kjéhya ch'án. ¹⁵ Mé xikaha kónhen la tí ch'ín Jacob mé sákjuí ch'án la kjuák'e ch'án nación Egipto ntá chr'éxin ntiha mé k'uénxin ch'án. La ntá chr'éxin kjaxin tí sín tsík'axrjeníxinni k'uénxin sín ntiha. ¹⁶ Ntá chr'éxin kuakitsjexín sín tòye tí huésqé tí ch'ín Jacob la sákjuiko sín tí nonte Siquem, la ntá ntiha mé kjuavá sín tí nonte tsík'ena ch'ín Abraham mé tsík'enehe ch'án tí xjeen ch'ín Hamor chjasin Siquem.

¹⁷ La ntá ó kuichjina tsoxiteyá tí nkehe tsíntá chro Dios tsíkjo ch'ín Abraham ntá tí sín Israel imá kótsjé sín nación Egipto. ¹⁸ A ntá xrinahya íjnko ch'ín rey kjuankíxin k'uetqan nación Egipto la k'uéchónhya ch'án tí ch'ín José. ¹⁹ La ntá tí ch'ín rey kjuích'iyehé ch'án tí sín naxa kjéhyani la ko kjuínchekjasóte ch'án sín. La tsík'etqan ch'án kixin tí xjan nto na ntá kokjíhi mé tsjik'itjí sín xjan kixin its'en xjan. ²⁰ Na ntá tí yaon a tsíkokjíhi ch'ín Moisés ntá imá kóxrjínhin Dios tí xjan a.

It'é la ko iné xjan mé k'uéchóna sín xjan iní nitjó koá nte sín. ²¹ Ntá chrokjuahya tsjak'ema sín xjan la ntá kjuíkjáka sín xjan. La ntá xjeen tí ch'ín rey kuénte Egipto mé kjuíkákja tjan xjan la sákjuíko tjan nte tjan la kjuínchek'ánkí tjan xjan éxi xjeen tjan xíkaha. ²² La ntá tí ch'ín Moisés mé k'uitja ch'án kaín nkehe nohe tí sín Egipto a la imá tjetooan tí nkehe k'uéntáchro ch'án la ko tí nkehe k'uékjich'e ch'án.

²³ La ntá tió chóna tí ch'ín Moisés cuarenta nánó ntá tjinkaon ch'án tsjitsjehe ch'án tí sín israelita naxa kjéhya ch'án. ²⁴ Ntaha mé k'uíkon ch'án kixin ijnko chojni Egipto kjuate ijnko chojni naxa kjéhya tí jehe ch'án. Ntá chrókjuinkitsa ch'án tí sín naxa kjéhya ch'án ntá k'oyán ch'án tí ch'ín Egipto a. ²⁵ Kjuenkayáxin ch'án kixin tí sín naxa kjéhya ch'án, mé tí sín israelita, mé tsonoeixin sín kixin Dios mé tsichr'án tí jehe ch'án sioncheaká sín ch'án. Kjánchó tí sín a kjuátsqanhya sín. ²⁶ La ntá í jnko yaon tí ch'ín Moisés k'uíkon ch'án kixin yaá sín israelita tjanjonko kichó sín. La ntá tjinkaon ch'án chrókjuít'oxin ch'án kixin chrokjuanjonhya sín. La ntáchro ch'án kixin: "Jahará jnkokoá kichuárá la, ¿nkekuénté tjanjonrá?" ²⁷ A ntá tí nkexro chóna tí jie mé kóninkaon ch'án la kótéka ch'án tí ch'ín Moisés. Ntá ntáchro ch'án kixin: "¿Nkexro kjuanjon kjuachaxin kixin jaha k'óna juez kuénténi? ²⁸ ¿A tjinkávan ts'oyáni kjaxinni éxi k'oyán tí ch'ín Egipto ijna ní?" ²⁹ A ntá kuínhin tí ch'ín Moisés tíha ntá tjoka sákjuí ch'án. Sákjuí ch'án tí nación Madián ntá ntiha kjuák'e ch'án éxi ijnko chojni tsíkjinín ókjé. Ntá ntaha tsíkótéhe ch'án la ko kjuích'ána ch'án yaá xjan ntoa.

³⁰ Na ntá k'uátsínka cuarenta nánó ntá tí nteje chjino jna it'in Sinaí mé xrinahya k'uíkon ch'án ijnko ángel tjenkákjan tí xrohi chríkjan tí ntayoa tjeche. ³¹ Ntá tí ch'ín Moisés la chrakon ch'án kixin xíkaha k'uíkon ch'án la ntá kóchjinehe ch'án kixin chrótsjehe ch'án la ntá kuínhin ch'án itén Ìnchéni ntáchro kixin: ³² "Janhan mé Dios tinkáchónki tí sín tsík'axrjeníxian mé Abraham, la ko Isaac, la ko Jacob," mé xíkaha ichro Dios. Ntá tí ch'ín Moisés la kjuankixin chrakon ch'án la síxranka ch'án ntá í tjinkakonhya ch'án tsotsjehe ch'án. ³³ Na ntá ntáchro Ìnchéni kixin: "Takítsje tokatá kixin tí nonte tinkatja la nonte tjóá chónahya jie. ³⁴ Ó k'uíkuon kixin tí sín kuéntana mé imá tjeotjasóte sín nación Egipto. La ó kuínhan kixin t'èya sín. La ntá ijie ó k'uinka kixin tsjínkítsa sín. Méxra xrákiá jaha tsétuqanhan jaha sátsjia nación Egipto," † ichro Dios.

³⁵ Tí sín israelita mé kjuanoá sín tí ch'ín Moisés. Tsín-táchro sín kixin: "¿Nkexro kjuanjon kjuachaxin kixin jaha k'óna juez?" ichro sín. Kjánchó Dios ichr'án ch'án tí ch'ín Moisés kixin ts'etqan ch'án la ko sincheaká ch'án tí sín israelita kjuachaxin tí ángel k'uíkon ch'án chríkjan tí nta. ³⁶ Ntá tí ch'ín Moisés kuakitsjexin ch'án Egipto tí sín tsík'axrjeníxinni ósé. La imá itsjé kjuaxroan kjuasin ch'án la itsjé kjuakoxin ch'án tí nación Egipto, la ko tí Ntayaon Kjátse, la ko tí nteje k'uáji sín cuarenta nánó. ³⁷ Jehe tí ch'ín Moisés a mé chénka tí sín israelita kixin: "Dios mé tsochr'án ijnko chojni tsoníxja itén Dios

ts'axrjeníxin tí sín kichuárá éxi ichr'án ch'án tí janhan. Titekákonhénra tí jehe ch'án." ††³⁸ Tí ch'ín Moisés mé kjuák'eko ch'án tí chojni tí k'uéjé sín tí nteje. Nta ijnko ángel mé nixjehe ch'án tí jna Sinaí la ko tí sín k'uaxrjeníxinni mé k'uáyéhe sín tí tan tjanjon kjuachón, ntá tí tan mé k'uátsínka tí jeheni ijie.

³⁹ A ntá tí sín k'uaxrjeníxinni ósé mé tjinkakonhya sín kixin chrókuitekaon sín la kjuanoá sín tí ch'ín Moisés la ko tjinkaon inaá chrókjan sín nación Egipto. ⁴⁰ A ntá ntáche sín ch'ín Aarón kixin: "Tjinkaonni sích'éna ijnko dios kixin tsinkáchónkini kixin í noehyani nkehe kónhen tí ch'ín Moisés, tí nkexro kjuínkítsa k'uaxrjexinni nación Egipto." ⁴¹ Ntá kjuínchekjanoya sín ijnko koxintáxjan la ntá k'oyán sín iko kjokéhe tí nkehe tsíkjanoya a la imá kóchéhe sín k'uíkon sín tí nkehe tsík'ónaxin tja chojni. ⁴² A ntá Dios mé kuitqo té jehe sín kixin tsinkáchónki sín tí konotsé síin nkajni. Tíhi mé tsíkjin ijnko nkexro k'uéchrónka itén Dios ntáchro xíkahi:

Jahará chojni Israel, ¿á k'oyánra tí iko kjókjanará tí janhan

tí cuarenta nánó k'uejora nteje ní?

⁴³ Kja náhi, jehó tí nkehe kjuich'énar mé kjókéherá tí ko a. Kjuíkoará tí njnqoe tí dios Moloc

la ko kjaxin kjuíkoará tí konotsé kuénte dios Renfán.

A ntá tí nkehe tsíkjin'énar mé jahará mé xráxinkákonxínra éxi Dios kuéntará.

Méxra janhan tsakítsjexínra tí tjejora la tsétuqanhanra sátsjira chjasin Babilonia. ††

Mé xíkaha ntáchro Dios ósé.

⁴⁴ Naxa k'uéjé tí sín k'uaxrjeníxinni tí nteje la chóna sín ijnko njnko kamantá chóna tí ley tsík'etooan Dios.

Tíhi kjuích'ána sín éxi tsík'etuenhen Dios tí ch'ín Moisés kixin sích'ána ch'án kaín nkehe k'uíkon ch'án.

⁴⁵ Ntá tí sín tsík'axrjeníxinni mé k'uáyéhe sín tí njnko kuitqonhen sín. Ntá tí sín kjuíkao ch'ín Josué mé kjuíkao

sín tí njnko tió kjuacha sín k'uáyéhe sín í jnko nonte kuénte í so chojni kuakitsje Dios, kixin ts'áyéhe tí jehe

sín. Mé xíkaha kónhen hasta tí yaon kjuankixin k'ue-tqan ch'ín David. ⁴⁶ Imá kjuíncheyaoon Dios tí ch'ín rey David la ntá tí ch'ín David mé tjinkaon ch'án sích'ána

ch'án ijnko njnko kuénte Dios mé tí Dios k'uéinkáchónki ch'ín Jacob. ⁴⁷ Kjánchó jehe ch'án

kjuích'énahya ch'án tí njnko a. Tí ch'ín Salomón mé kjuích'ána. ⁴⁸ Kjánchó Dios nkaya nkajni chrohya ts-

jak'exenhen ijnko nchia tsíkjin'énaxin chojni itja. Ntáchro ijnko ch'ín nixja itén Dios kixin:

⁴⁹ Janhan Dios nkaya nkajni itjén tétqanxián ntá chjasintajni tjekjen tótená.

¿Xá nkexéhe tí nchia chrókjuich'énar?

¿Xá nketí chrókjuak'é chrók'ok'ánaxián?

⁵⁰ ¿Xá jehya tjaná kjuít'ánaxián kaín tí nkehe ní? ††

Mé xíkaha ichro Dios.

⁵¹ A ntá jahará la icha qsanra xráxin titekákonhyará.

Jahará tinhínra kjánchó ich'erá éxi chojni chónhya Dios. Xráxin tjanjonkoará Nchakuen Dios. Jahará mé

tóyohará tí sín tsík'axrjeníxinnra ósé. ⁵² Tí sín tsík'axr-

† 7.30-34 Éxodo 3.1-10

†† Deuteronomio 18.15,18 † Éxodo 32.1 †† 7.42-43 Amós 5.25-27 †† 7.49-50 Isaías 66.1-2

jeníxinrá kjuínchekjasóte kaín tí sín tsíchrónka itén Dios. K'óyán sín tí sín k'uéchrónka kixin itsi tí nkexro chóntahya jię. A ntá ó kui tí nkexro a ntá jahará kjuínchekjirá ch'án ntá k'óyán sín ch'án.⁵³ Jahará k'uayéhérá tí nkehe k'uętoan Dios senó, mé tí nkehe chrónka tí ángel, la kjónté xikaha kuítekákonhyará —ichro ch'ín Esteban.

Ik'uén ch'ín Esteban

⁵⁴ Ntá tí kuínhin tí jehe sín tí nkehe ntáchro tí ch'ín Esteban ntá imá kónínkaon sín la netaón neno sín kixin nínkakonhen sín ch'án.⁵⁵ A ntá ch'ín Esteban antsí chónka ch'án Nchakuen Dios la konta ch'án nkajní k'uíkón ch'án kjuachaxiэн Dios la ko k'uíkón ch'án kixin ch'ín Jesús tjexín toté ch'án nánko tja chjina Dios.

⁵⁶ Ntá ntáchro ch'ín Esteban kixin:

—Tsjehérá kixin k'uíkuę kixin xitjehe nkajní la ntaha itjen tí Xjeen Dios K'óna Chojni nánko tja chjina Dios.

⁵⁷ A ntá jehe sín la k'uikjehe sín ntatsjon sín la itsen k'uixité sín ntá sákjuí sín k'uixitja sín ch'án⁵⁸ sákjuíko sín ch'án ikon chjasin ntá ixro chjéhe sín ch'án. La tí sín tjanchia jię mé kuakitsje sín iké sín la k'uejo sín toté ijnko ch'ín ntasoá it'in Saulo kixin ts'ayakonhen ch'án tí ka a.⁵⁹ La it'e sín xro ntá ch'ín Esteban mé chrónóęhe ch'án İnchéni la ntáchro ch'án kixin:

—İnchéni Jesús takjá nchakuenná.

⁶⁰ Ntá tuénxín kjuák'exín toch'in ch'án la k'uèya ch'án itsen ntáchro ch'án kixin:

—İnchéni jaha mé tahya kuentá tí jię kjuasin sín. Mé xikaha ichro ch'án ntá ik'uén ch'án.

Ch'ín Saulo chrók'óyán ch'án tí sín tinkáchónki Jesús

8 La tí ch'ín Saulo mé jnkokón kjuenkayáxinko ch'án tí sín k'óyán tí ch'ín Esteban.

A ntá tí yaon a na mé kjuankíxin sín ts'óyán sín tí sín tinkáchónki Jesús chjasin Jerusalén. La kaín xín tí sín na ntá kjuankíxin tinkáchónki Cristo mé xikayehe sín sákjuí sín nkuíxín estado Judea la ko estado Samaria. A ntá jehó tí sín tsíkjeýá Jesús mé kuítóhe sín ntiha.² Na iso sín imá tinkáchónki Dios mé kjuavá sín ch'ín Esteban la ko tsjánkámą sín ch'án la ko t'avéhe sín ch'án.³ A ntá tí ch'ín Saulo la kjuankíxin kónínkakonhen ch'án tí sín tinkáchónki Cristo. K'uixenhen ch'án jnkoinko jnkoinko ntoę sín la itsé ch'án tí sín ntoa la ko tí chojni chjin. La ntá kuínkánkájjen ch'án sín sákjuíko ch'án sín kixin ts'ejóchjina sín.

Kjuako sín itan jína tí estado Samaria

⁴ A ntá tí sín sákjuíxin chjasin Jerusalén mé xritjako sín nkexrí tí tan tsaáxinni nkuíxín tí sákjuí sín.⁵ La ijnko ch'ín it'in Felipe mé sákjuí ch'án ijnko chjasin estado Samaria la kjuankíxin ch'án chrónka ch'án itan kuente Cristo.⁶ Na ntá nchónhya chojni kójnkotsé ntiha la kaín sín kuínhin sín jína tí nkehe ntáchro ch'ín Felipe kixin ó k'uíkón sín tí kjuaxroan kjuakoxin ch'án.⁷ Itsjé chojni chónka nchakuen tí jínahya mé kuítóhe sín jína la tí nchakuen tí jínahya k'óyako k'uaxrxjén tí jehe sín.

La nchónhya tí sín chónka chin xitjahya itji la ko tí sín síxénká toté mé kuítóhe sín jína.⁸ A ntá imá kóchéhe kaín tí sín síin chjasin ntiha.

⁹ Tí chjasin a mé kjuák'e ijnko ch'ín it'in Simón mé ijnko ch'ín ósé mé k'uékjinchexroan ch'án. K'uékjich'iyehé ch'án tí sín estado Samaria ntáchro ch'án kixin ijnko chojni imá tjeoan tí jehe ch'án.¹⁰ La kaín tí sín ntiha k'uejó sín kuínhin sín jína, mé tí chánjan ntsínsí hasta tí chojni imá táda la k'uéntáchro sín kixin:

—Tí ch'ín i imá chónka ch'án tí kjuachaxin kuente Dios —ichro sín.

¹¹ K'uékitekakonhen sín ch'án kixin k'uékjinchexroan ch'án k'uékjich'iyexín ch'án sín itsjé nánó.¹² Ntá tió kuítekaon sín tí tan jína kjuako ch'ín Felipe kuente tí kjuachaxin kuente Dios la ko Jesucristo la ntá chojni ntoa la ko chojni chjin mé kuíkite sín.¹³ A ntá kjaxin tí ch'ín Simón, mé kuítekaon ch'án la kuíkite ch'án, koí ch'án. Ntá kjuankíxin k'uájiko ch'án tí ch'ín Felipe la imá chrakon ch'án kixin k'uíkón ch'án tí kjuaxroan jię kjuasin tí ch'ín Felipe.

¹⁴ A ntá tí sín apóstol, mé tí sín tsíkitoęhe chjasin Jerusalén, kuínhin sín kixin itsjé tí sín estado Samaria ó kuítekaon sín itén Dios. Ntá k'uętuęnhen sín ch'ín Pedro la ko ch'ín Juan sátsji sín ntiha.¹⁵ Ntá tió kjuíji sín ntá kjuanchehe sín Dios kixin tí sín ntiha tinkáchónki Cristo chrók'uáyéhe sín Nchakuen Dios¹⁶ kixin nijnko tí jehe sín ntiha naxą tsík'áyéhya sín Nchakuen Dios. Jehó tsíkikitéxin sín ihnié İnchéni Jesús.¹⁷ Ntá tí ch'ín Pedro la ko tí ch'ín Juan mé k'uejotja itja sín chrítaón kja tí sín a la ntá ó k'uáyéhe sín Nchakuen Dios.

¹⁸ Na ntá tí ch'ín Simón mé k'uíkón ch'án kixin tí sín apóstol k'uejotja itja sín chrítaón kja tí sín a ntá k'uáyéhe tí sín a Nchakuen Dios. La ntá xróxin ch'án chichaon¹⁹ la ntáchro ch'án kixin:

—Chjehéni jeheni tí kjuachaxin kixin kjaxin jeheni chrókjuak'etja itjani chrítaón ikja jnkójín chojni ntá chrók'uáyéhe sín Nchakuen Dios —ichro ch'án.

²⁰ Ntá ntáchro ch'ín Pedro kixin:

—Jaha la ko tí chjchakoán ts'itjáyankoa kixin tjenkayáxian kixin chrók'uena tí kjuachaxin kuente Dios.²¹ Jaha chontahya kjuachaxin ts'ixenhén tí xra a kixin ó nohe Dios kixin jaha la tjuáhya asán.²² Méxra tsitohé tí ijjá la chrónóęhé Dios kixin ách'e tsjakjinhan ch'án tí jię tjenkayáxian.²³ Ó t'íkuę kixin imá chjngoxínhin asán la ko nchónhya jię chonta —ichro ch'ín Pedro.

²⁴ La ntá ch'ín Simón kjuátęhe ch'án ntáchro ch'án kixin:

—Nixjehérá İnchéni kixin tí janhan kixin chrókónnahya tí janhan éxí tí ntáchrórą —ichro ch'án.

²⁵ Ntá kjuixin chrónka tí sín apóstol tí tan kuente Dios ntiha ntá sákjuí sín kjuako sín tí tan tsjanjon kjuachón nchónhya ti chjasin ntsínsí estado Samaria. Ntá ikjan sín chjasin Jerusalén.

Tí ch'ín Felipe la ko tí ch'ín tsíkjiixín nación Etiopía

²⁶ A ntá kjuixin tíha ntá ijnko ángel kuènte Ìnchéni mé ntáche tí ch'ín Felipe kixin:

—T'ínkatjen sáttja nó sur tsoxeta tí ntja t'inkajinxín chjasin Jerusalén hasta chjasin Gaza —ichro tí ch'ín ángel.

Na ntá tí ntja a mé ijnko ntja t'atsínka nó nteje. ²⁷ Na ntá tí ch'ín Felipe k'uínkatjen sákjuí tí ntja. La ntiha xríñahya xeta ch'án ijnko chojni tsíkjiixín nó nación Etiopía. Jehe ch'án mé ijnko chojni eunuco mé tja ch'án síin ch'ichakoen tí tjan reina Candace t'etuñhen tí nación Etiopía. Jehe ch'án sátskji ch'án chjasin Jerusalén xraxinkakonxín ch'án Dios. ²⁸ A ntá tí ch'ín a la xíkjan ch'án ínaá chjasén ch'án. Kjuák'exenhen ch'án ijnko carro la tjenchekuáxin ch'án ijnko xroon tsíkjin ch'ín Isaías, ijnko nkexro k'uéchronka itén Dios. ²⁹ La ntá tí Nchakuen Dios mé k'uetuñhen tí ch'ín Felipe ntáchro kixin:

—Sáttja tóchjina ántsí tí tjen tí carro.

³⁰ Ntá kóchjinehe tí ch'ín Felipe tí tjen tí carro a, la ntá kuínhin ch'án kixin tjenchekuáxin ti ch'ín a tí xroon tsíkjin ch'ín Isaías. La ntá kjuanchankíhi ch'án kixin:

—¿Á tiénxian tí nkehe tjenchekuáxian méhe?

³¹ La ntá kjuátehe tí ch'ín a ntáchro ch'án kixin:

—¿Nkexrí chrókuiñxian kixin kohya nkexro tsjinkit-sana tsochrónkaxín nkexrí t'axrjexín tíha? —ichro ch'án.

Ntá kjuanchia ch'án kixin tí ch'ín Felipe ts'it'ótjen la tsjak'etjaxín chjinaxón ti tjen ch'án.

³² Na tí xroon itén Dios tjenchekuáxin ch'án mé tíhi: Jehe ch'án mé sákjuíko sín éxi ijnko kolélo kjuíko sín ts'óyan sín.

La éxi ijnko kolélo tsjáñkahya tió kjínhin sín kaxree va mé xíkaha jehe ch'án ninkehó xítjeehya ir'va ch'án.

³³ K'uíkon sín ch'án éxi ijnko chojni chóna jié la ntoáhya kjuínchekjasóte sín ch'án.

Kohya nkexro tsjacha tsochrónka kuènte tí sín chrók'uaxrjenixin ch'án

kixin jehe ch'án la k'uénxín ch'án chjasintajni. † Mé xíkaha chrónka tí xroon itén Dios.

³⁴ A ntá tí ch'ín eunuco mé kjuanchankíhi ch'án tí ch'ín Felipe ntáchro ch'án kixin:

—Tsotsenkávan chrónka nkexro tsonhen tíha. ¿Á jehe ch'án tsonhen tíha o á ókjé nkexro ní? —mé xíkaha kjuanchankí ch'án.

³⁵ La ntá tí ch'ín Felipe kjuankixin chrónka ch'án kuènte tí nkehe tjenchekuáxin tí ch'ín a la chrónka ch'án tí tan jína kuènte Jesús. ³⁶ A ntá xríñahya kjuíji sín tí tjiá ntá, ntá ntáchro tí ch'ín eunuco kixin:

—Tsjehe tjiá ntá. ¿Á xitjahya chrókuiñxian? —ichro ch'án.

³⁷ Na ntá ntáchro tí ch'ín Felipe kixin:

—Ti kuítekávan kaín asán la kjá jína tsikitia.

La ntá kjuátehe tí ch'ín a, ntáchro ch'án kixin:

—Títekavan kixin tí Jesucristo la Xjeen Dios —ichro ch'án.

³⁸ La ntá tí ch'ín tsíkjiixín Etiopía a k'uetoan ch'án tsochónhen tí carro a la ntá yóí sín mé tí ch'ín Felipe la ko tí ch'ín tsíkjiixín Etiopía mé k'uínkajin sín ntá kjuíankí sín ntá la tí ch'ín Felipe kjuíkite ch'án tí ch'ín a. ³⁹ La ntá kjuixin k'uaxrjenkí sín ntá la ntá tí Nchakuen Ìnchéni sátskjiiko tí ch'ín Felipe ókjé. A ntá k'uíkonhya kichó sín ínaá. Ntá kjónté xíkaha la tí ch'ín eunuco sákjuí ch'án la ántsí chéhe asén ch'án. ⁴⁰ A ntá tí ch'ín Felipe xríñahya kjuíji chjasin Azoto. Ntá nkák'atsínka ch'án la chjasin la í chjasin la chrónka ch'án itén Ìnchéni kixin nkexrí tsaáxin sín hasta kjuíji ch'án chjasin Cesarea a.

Tí nkehe kónhen ch'ín Saulo

(Hch. 22.6-16; 26.12-18)

⁹ A ntá tí ch'ín Saulo la imá tjinkaon ch'án chrók'óyan ch'án tí sín tinkáchónki Ìnchéni Jesús. Méxra sákjuítsjehe ch'án tí ch'ín nchát'á t'etqan. ² Ntá kjuanchia ch'án ijnko xroon kixin ts'áyéhe ch'án kjuachaxin kixin sátsji ch'án tí njnko chjasin Damasco tsjeyá ch'án tí sín kuákja ntja nixin mé tí sín ntoa la ko tí síchjin la tsotsé ch'án sín la ntá sátsjiko ch'án sín chjasin Jerusalén. ³ La ntá kjuíji ch'án chjinaxón chjasin Damasco, a ntá xríñahya titàya ikui ijnko xrohi t'inkaséyan kjuíxin nkaya nkajni k'uantatjen ch'án a. ⁴ A ntá ch'ín Saulo mé kjuítsínka ch'án nonte, a ntá kuínhin ch'án nixja ijnko nkexro kixin:

—Saulo, Saulo, ¿nkekuènte ninkákonna xritjéyá tí janhan?

⁵ A ntá ch'ín Saulo kjuanchankí ch'án kixin:

—¿Xá nkexro jaha?

Ntá tí tan mé kjuátehe, ntáchro kixin:

—Janhan mé Jesús, mé tí nkexro xritjéyá jaha. ⁶ T'àyá sáttja. T'ixenhen tí chjasin Damasco, ntá ntiha mé tsínhín nkehe sích'e —ichro tí ch'ín Jesús a.

⁷ La ntá tí sín k'uájiko ch'ín Saulo la imá chrakon sín. Kuínhin sín tí itén tí nkexro kjánchó k'uíkonhya sín ninkexró. ⁸ La ntá tuénxín k'uàya ch'ín Saulo ntá kuak-itjenkí ch'án ikon ch'án kjánchó t'ikonhya ch'án. A ntá tí sín xriko ch'án tinkátséhe sín itja ch'án sákjuíko sín ch'án chjasin Damasco. ⁹ A ntá ntiha kjuák'e ch'án la iní yaon k'uíkonhya ch'án la ko kjaxin kjónehya ch'án la ko ninkehó k'uíhya ch'án.

¹⁰ A ntá chjasin Damasco mé kjuák'e ijnko ch'ín tinkáchónki Ìnchéni it'in Ananías. La ntá titàya k'uíkuèn ch'án Ìnchéni ntáchro kixin:

—Ananías.

A ntá ch'ín Ananías mé kjuátehe ch'án kixin:

—Ntihi tjenni, Ìnchéni.

¹¹ Ntá ntáchro Ìnchéni kixin:

—T'ínkatjen sáttja tí ntja it'in Ntja Ntoí. Ntá tió tsjasán ntqen ch'ín Judas tjanchankíhi sín á ntahya itjen ijnko ch'ín tsíkjiixín chjasin Tarso me it'in ch'án Saulo. Jehe ch'án mé tjechrónóña ch'án. ¹² A ntá titàya k'uíkuèn ch'án kixin tsjiji ijnko ch'ín it'in Ananías ts'ixenhen ch'án tsjak'etja tja ch'án chrítaón kja tí jehe ch'án kixin xik'ikon ch'án ínaá —ichro Ìnchéni.

¹³ Ntá kuínhin ch'ín Ananías tíha ntá ntáchro ch'án kixin:

† 8.32-33 Isaías 53.7-8

—Inchéni náhí, tsjihyani kixin ó kuínhinni chrónka nchónhya chojni kixin nkexrí xéhe tí ch'ín a. Imá tsjé nkehe jehya jína kjuích'ehe ch'án tí sín kuítekaon tí ja-ha chjasin Jerusalén. ¹⁴ A ntá jie la ó kjui ch'án ntihi kixin tsík'áyéhé ch'án kjuachaxin kuènte nchat'á t'etqan kixin tsotsé ch'án kaín tí sín tinkáchónki ihniá.

¹⁵ Kjánchó Inchéni ntáchro kixin:

—Sátjia. Janhan kjuéyá tí ch'ín a kixin tsjako ch'án tanná. Tsjakohé ch'án tí sín ókjé nación la ko tí sín rey la ko kjaxin tí sín israelita. ¹⁶ Janhan tsjáqhə ch'án kixin nchónhya tsjasóte ch'án kixin tsinkáchónkina ch'án.

¹⁷ A ntá ch'ín Ananíás sákjuí ch'án tí nchia itjen ch'ín Saulo la ntá k'uixenhen ch'án. La ntá kjuak'etja tja ch'án chrítaón ikja tí ch'ín Saulo la ntáchro ch'án kixin:

—Kíchóni Saulo, Inchéni Jesús, tí nkexro k'uikuan tí ntja k'uinkaxian, mé k'uetuanna kjuíha kixin sijn-tak'ikuan inaá la ko ts'ayéhé Nchakuen ch'án —ichro tí ch'ín Ananíás a.

¹⁸ Ntá tuénxín k'uanotjexin ikon ch'ín Saulo ijnko nkehe éxí kjoe koche xikaha. Ntá xík'ikon ch'án inaá. La ntá k'uínkatjen ch'án la ko kuíkite ch'án. ¹⁹ La ntá chr'éxin ntá kjóne ch'án la ntá ikjan asén ch'án inaá. Ntá kuitqhe ch'án iso yəon k'uéjoko ch'án tí sín tinkáchónki Inchéni chjasin Damasco.

Kjuako ch'ín Saulo chjasin Damasco

²⁰ Na ntá kjuankixin ch'ín Saulo kjuakoxin ch'án iso njnko Israel kixin Jesús mé Xjeen Dios. ²¹ La kaín tí sín tjejótinhin imá chrakon sín la ntáchro sín kixin:

—¿Á jehya tí ch'ín i tjinkaon sinchek'itjayan ch'án kaín tí chojni tinkáchónki Jesús chjasin Jerusalén? ¿Á jehya tí xra a kjuixin ch'án ntihi kixin tsotsé ch'án sín la sátsjiko ch'án sín tí tjejó tí sín nchat'á t'etqan? —ichro sín.

²² Kjánchó antsí má fuerte kjuako ch'ín Saulo kixin chaxin tí ch'ín Jesús mé tí Cristo. La tí sín judío k'uéjoko chjasin Damasco kjuachahya kjuachaxin sín ch'án.

Kjuachahya tí sín judío chrótsé sín tí ch'ín Saulo

²³ Na ntá ó k'uátsínka nchónhya yəon ntá tí sín judío kjuenkayáxin sín nkexrí chrók'óyan sín tí ch'ín Saulo.

²⁴ A ntá ó kuínhin ch'án nkehe kjuenkayáxin sín. A ntá nchakotjin la ko tie tjejóchónhen tí sín chrók'óyan tí jehé ch'án tí ntója ts'axrjexin ch'án chjasin. ²⁵ A ntá tí sín tinkáchónki Inchéni mé kjuak'enkaya sín tí ch'ín Saulo ijnkontaxra jie ijnko tie. Ntá kjuinkajinxin sín tíntaxra tjenkáya tí ch'ín Saulo nóton tí tjat'ə tsík'antatjen tí chjasin a. Ntá kuaá ch'án.

Ch'ín Saulo sákjuí chjasin Jerusalén

²⁶ Ntá tí kjuíji ch'ín Saulo chjasin Jerusalén ntá tjinkaon ch'án chrókójnkotséko ch'án tí sín tinkáchónki Inchéni. Kjánchó kaín sín chrakonhen sín ch'án kixin kuítekakonhya sín kixin á chrókóchaxin kjaxin ch'án tinkáchónki ch'án Inchéni. ²⁷ A ntá ch'ín Bernabé mé sákjuíko ch'án tí ch'ín Saulo ti tjejó tí sín apóstol la ntá chrónka ch'án kixin ch'ín Saulo mé tsík'ikon ch'án

Inchéni tí ntja sákjuí ch'án ntá Inchéni mé nixjehe ch'án. Méxra chjasin Damasco k'uékjako ch'án ihnié Inchéni la chrakonhya ch'án. ²⁸ Méxra ch'ín Saulo kuítqhe ch'án chjasin Jerusalén la ko k'uájiko ch'án tí sín a. La chrakonhya ch'án kjuako ch'án kjuachaxiéhén ihnié Inchéni Jesús. ²⁹ La ikjo ch'án tí sín judío nixja nkiva griego. A ntá jehé sín la tjinkaon sín chrók'óyan sín tí jehé ch'án. ³⁰ A ntá tí sín kíchó ni tinkáchónki Cristo mé tsíkinhin sín nkehe chrókónhen ch'án la ntá sákjuíko sín ch'án tí chjasin Cesarea la k'uetuənen sín ch'án sátsji ch'án chjasin Tarso.

³¹ Na ntá tí sín tinkáchónki Inchéni kuenté estado Judea, la ko estado Galilea, la ko estado Samaria la kjuaxróxin k'uéjoko sín la antsí má tinkáchónki sín Inchéni. K'uéchóna sín kjuasáyé Inchéni la ko tí Nchakuen Dios kjuínkítsa sín la ntá antsí má sítinkákótsjé sín.

Ch'ín Eneas kuitqhe ch'án jína

³² Na ntá tí ch'ín Pedro xritsjehe ch'án kaín tí sín tinkáchónki Inchéni. Kjaxin sákjuítsjehe ch'án tí sín kíchó ni tjejó chjasin Lida. ³³ Ntiha mé k'uitja ch'án ijnko ch'ín it'in Eneas. Ijní nánó tjetsínkaták'á ch'án cama kixin tsík'en toté ch'án. ³⁴ Na ntá ntáchro ch'ín Pedro kixin:

—Eneas, Jesucristo mé sintakitqha jína ijie. T'inkatjen tjatsiyən camá —ichro ch'án.

Na ntá ch'ín Eneas tuénxín k'uínkatjen ch'án. ³⁵ La kaín tí sín siín chjasin Lida la ko chjasin Sarón k'uíkon sín kixin kuitqhe ch'án jína la ntá kjaxin sín kuinkáchónki sín Inchéni.

Ó xechón tjan Dorcas

³⁶ A ntá tí yəon a mé kjuák'e ijnko tjan chjasin Jope tinkáchónki tjan Inchéni mé it'in tjan Tabita. Ntá nkiva griego la mé t'axrjexin kixin Dorcas. A ntá tí tjan a mé jína kjuích'e tjan tí k'uékjak'e tjan la kjuínkítsa tjan tí chojni nòa. ³⁷ Ntá ijnko yəon imá kónihi tjan ntá ik'uén tjan. La ntá kjuínchek'ónti sín cuérpoé tjan la ntá tí yóxin piso noi kjuak'e sín tjan. ³⁸ Tí chjasin Jope mé chjino tí chjasin Lida la mé ntiha kjuák'e ch'ín Pedro. A ntá tí sín tinkáchónki Inchéni mé nohe sín kixin ntiha tjen ch'án. Ntá ichr'án sín iyó chojni tsontáche sín ch'án kixin tjoka itsji ch'án í sinchexrjenhya ch'án, tsixro sín.

³⁹ Na ntá sákjuíko sín ch'ín Pedro. Ntá kjuíji sín ntiha ntá tuénxín sákjuíko sín ch'án tí tjan tí cuérpoé tí tjan tsík'en. La ntaha tjejó kaín chojni chjin k'án imá tsjánka sín. La kjuako sín tí iké sín tsíkjon tí tjan Dorcas tí naxə kjuák'e tjan. ⁴⁰ A ntá k'uetqan ch'ín Pedro kixin kaín sín ts'axrje sín ntója. Na ntá kjuák'exin toch'in ch'án nixjehe ch'án Dios. Ntá komá ch'án tí tjan tsík'en ntá ntáchro ch'án kixin:

—Tabita, t'aya.

Ntá kuakitjenkí tjan ikon tjan ntá k'uíxon tjan kixin ntaha itjen ch'ín Pedro ntá k'uàya tjan, kjuák'etjaxin tjan. ⁴¹ A ntá itsé ch'án itja tjan la k'uínkatjen tjan. La ntá k'uíyehé ch'án kaín tí sín tinkáchónki Inchéni la ko

kjāxin kaín chojni chjin k'án kixin ntá ts'ikon sín kixin ó xíxechón tjan. ⁴² Na ntá kaín sín siín chjasin Jope mé kónohe sín tí kjuaxroan kjuích'e ch'ín Pedro ntá itsjé sín kuinkáchónki Ìnchéni. ⁴³ A ntá ch'ín Pedro kuítóhe ch'án itsjé yaon tí chjasin a la kjuák'e ch'án ntøe ch'ín Simón, ijnko ch'ín nchentá tjoé iko.

Ch'ín Pedro la ko ch'ín Cornelio

10 Chjasin Cesarea kjuák'e ijnko ch'ín it'in ch'án Cornelio. Jehe ch'án mé capitán k'ueŧuēnhen tí sín soldado italiano. ² Tí ch'ín a la imá jína ch'án la kaín tí sín kjéhya ch'án mé imá xraxinkaon sín Dios. Kjāxin kjuanjon ch'án nchónhya chichaon kixin tjinkaon ch'án tsjinkitsa tí sín judío la ko xráxín nixjehe ch'án Dios. ³ La ntá ijnko yaon las tres kónjín titàya k'uikuèn ch'án ijnko ángel kuènte Dios k'uixenhen tí tjan ch'án ntáchro kixin:

—Cornelio.

⁴ A ntá tí ch'ín Cornelio komá ch'án tí ángel la chrakon ch'án kjuanchankíhi ch'án kixin:

—¿Nkehe tjinkávan jaha? —ichro ch'án.

Ntá ntáchro tí ángel kixin:

—Dios kóxrjínhin kixin tí nixjehe ch'án la ko tí jína ch'e tjinkitsa tí sín nò. ⁵ Ntá jaha tétuēnhén jnkójin chojni sátsji chjasin Jope kixin tsjikakjín sín ch'ín Simón kjāxin it'in ch'án Pedro. ⁶ Itjen ch'án ntøe ijnko ch'ín kjāxin it'in Simón. Tí ch'ín a mé nchentá tjoé iko. Mé tjan ntøe ch'án chjinaxón tí ntayaon a.

⁷ Ntá tió sákjuí tí ángel nixjehe ch'ín Cornelio la ntá jehe ch'an k'uíyehē ch'án yaá sín ch'ehe ch'án xra la ko ijnko ch'ín soldado kjāxin xraxinkaon Dios, la chón-tehe sín kjuasáya kichó sín. ⁸ Ntá kjuixin chénka ch'án kaín sín tí nkehe k'uíkon ch'án ntá k'ueŧuēnhen ch'án sín sátsji sín chjasin Jope.

⁹ Íjnko yaon chr'éxin chjina chonkixin tjejóyá sín ntja chjino chjasin Jope ntá ch'ín Pedro mé k'uit'ótjen ch'án chrítaón nchia kixin ntaha nixjeexín ch'án Dios. ¹⁰ Ntá imá k'uén ch'án kjinta la tjinkaon ch'án chrókjóne ch'án. Nachrohe tsochján tí nkehe sine ch'án la ntá titàya k'uíkuèn ch'án nkehe ¹¹ mé k'uíkon ch'án kixin xitjehe nkaya nkajní ntá ntiha k'uínkajinxín ijnko ka jí. Kanoé punté tí ka tjejóte. ¹² Tí nkaxenhen tí ka a tjinká ko noó toté la ko konche la ko kaín ko xritjaká. ¹³ Ntá kuínhin ch'án nixja ijnko nkexro ntáchro ch'án kixin:

—Pedro, t'àya, t'oyán tí ko a ntá inte.

¹⁴ Ntá ch'ín Pedro kjuátehe ch'án kixin:

—Náhí, Ìnchéni. Nunca nehyaní tí nkehe tjuáhya.

¹⁵ Ntá kjuátehe tí tan ínaá ntáchro kixin:

—Tí nkehe ó kjuínchetjóá Dios. La ntáchrohya kixin tjuáhya —ichro ch'án.

¹⁶ Xíkaha kónhen iní veces ntá tuénxín sákjuí tí ka nkaya nkajní. ¹⁷ Ntá ch'ín Pedro naxa tjenkayáxin ch'án nkehe t'axrjéxín tí k'uíkon ch'án la xríñahya ó kui tí sín ichr'án ch'ín Cornelio ntója nchia. Ó tsíkjanchankí sín nketí tjan ntøe ch'ín Simón. ¹⁸ Ntá kjuanchankí sín it-sen kixin:

—¿Á ntihi tjan ch'ín Simón kjāxin it'in ch'án Pedro?

¹⁹ Naxa tjenkayáxin tí ch'ín Pedro tí nkehe k'uíkon ch'án ntá Nchakuen Dios chrónka kixin:

—Tsjehe ó kui iní sín xritjeyá tí jaha. ²⁰ T'àya t'inkajíán sáttjiko tí sín a. Tóxakuanhya jaha, janhan mé kuétu-ānhan sín ikui sín —ichro Nchakuen Dios.

²¹ Ntá k'uínkajín tí ch'ín Pedro tí tjejó tí sín a ntá ntáchro ch'án kixin:

—Janhan tí nkexro xritjeyará. ¿Nkehe tí tsonhen tjinkáonrá?

²² Ntá kjuátehe sín ntáchro sín kixin:

—K'ueŧuēn tí ch'ín capitán Cornelio ikuini ntihi. Jehe ch'án me ijnko chojni imá jína la ko xraxinkaon ch'án Dios. Kaín tí sín judío tjikosáyehe ch'án la ko tjuēhe sín ch'án. Íjnko ángel kuènte Dios mé nixjehe ch'án chénka ch'án kixin chrók'uíyehē ch'án tí jaha kixin chrókjuia ntøe ch'án la ntá chrókuinhin ch'án tí nkehe tson-táchrua —mé xíkaha chrónka sín.

²³ Na ntá tí ch'ín Pedro kjuanjon kjuachaxin kixin ntahó chrók'ók'éhe sín ti tie a. Ntá kóyaon ntá sákjuíko ch'án sín. Kjāxin iso sín tinkáchónki Ìnchéni tjejó chjasin Jope mé sákjuíkotoxin sín.

²⁴ Na ntá íjnko yaon a kjuíji sín chjasin Cesarea. Ntiha chónhen tí ch'ín Cornelio la ko kjāxin kaín sín kjéhya ch'án la ko tí sín chóxin ch'án. K'uíyehē ch'án tí jehe sín kixin tsinhin sín. ²⁵ Ntá tió kjuíji tí ch'ín Pedro ntøe tí ch'ín Cornelio ntá k'uaxrjéxín ch'án nchia nixjehe kichó sín. Ntá kjuák'exín toch'in tí ch'ín Cornelio nkayakon tí ch'ín Pedro la kjuikosáyehe ch'án. ²⁶ A ntá tí ch'ín Pedro kjuínchek'inkatjen ch'án tí ch'ín a la ntáchro ch'án kixin:

—T'inkatjen. Tjak'exián totá. Janhan mé ijnko chojni éxí tí jaha.

²⁷ A ntá kjuixin ikjo sín la ntá k'uixenhen sín ntøe ch'án la ntá k'uíkon tí ch'ín Pedro kixin nchónhya chojni tsíkójkotsé ntiha. ²⁸ Ntá ntáchro ch'án kixin:

—Jahará nohará kixin tí jeheni judióni chóntahyani kjuachaxin tsojnkotsékoni chojni ókjé la ko chón-tahyani kjuachaxin ts'ixenhenni ntøe chojni ókjé. Kjánchó Dios kjuakona kixin xitjahya tsontáxrjan kixin tjuáhya nijnko chojni. ²⁹ Méxra tió k'uíyanará la tjoka k'uinka. Tjínkavan chrókónòna kixin nkekuènte k'uíyanará.

³⁰ Ntá kjuátehe ch'ín Cornelio ntáchro ch'án kixin:

—K'uátsínka tí noó yaon ntá tí hora kjuák'eni ntihi ntøeni kjónehyani la nixjeheni Dios. Ntá xríñahya k'uíkonni ijnko chojni chóna iké tjákjini. ³¹ La ntáchro ch'án kixin: “Cornelio, ó kuínhin Dios tí nkehe nixjehe ch'án la ó nohe ch'án kixin imá tjinkitsa jaha tí chojni nò. ³² Méxra tétuēnhén chojni sátsji chjasin Jope kixin tsjikakjín sín tí ch'ín Simón mé kjāxin it'in ch'án Pedro. Itjen ch'án ntøe ijnko ch'ín mé kjāxin it'in Simón nchentá ch'án tjoé iko. Chjino tí ntayaon a itjen ntøe ch'án,” ichro tí ángel. ³³ Méxra xíkaha tjoka ichr'ánni sín tsikjeyá sín tí jaha. Jína k'uinka ntøeni. Ntá ijie ó nohe Dios kixin kaín ni tjinkaonni tsinhinni nkehe tí k'ueŧuēnhan Ìnchéni tsochronka tsinhinni.

Ch'ín Pedro kjuakohe ch'ín Cornelio ntøe ch'án

³⁴ Ntá ntáchro ch'ín Pedro kíxin:

—Ijie ó t'íkuən kíxin jnkokón t'íkon Dios kaín sín chojni. ³⁵ Tí nkexro kaín nación titekaon la chónthe kjuasáyé Dios la mé tóxrjínhín ch'án. ³⁶ Dios mé nixjehe ch'án tí sín k'uaxrjenixin tí sín Israel la kuínhin sín tí tan tjanjon kjuaxróxin chrónka Ìnchéni Jesucristo. Jehé ch'án mé Ìnché ch'án kaín nkehe. ³⁷ Jahará ó nohará jína kaín tí nkehe tsíkónhen nkuíxín tí tjejó tí sín judío mé kjuankíxin estado Galilea tió kjuixin kjuako ch'ín Juan kíxin t'ichjánxin tsikite chojni. ³⁸ Jahará ó nohará kíxin Dios kjuanjon kjuachaxién ch'án la ko Nchakuen ch'án k'uáyéhe tí ch'ín Jesús tí nkexro tsíkíxín chjasin Nazaret. Ó nohará kíxin tí ch'ín Jesús mé k'uájí ch'án ntiha la tí nkehe jína kjuích'e ch'án kíxin kjuínchekitøhe ch'án jína kaín chojni tjasótéxín kaín tí kjuachaxién tí jínahya. Mé xíkaha jína kjuích'e ch'án kíxin Dios tjejó tí jehe ch'án. ³⁹ A ntá jeheni mé chaxín k'uíkonni kaín tí nkehe kjuích'e tí ch'ín Jesús tí estado Judea la ko tí chjasin Jerusalén. A ntá chr'éxín kjuak'enkani sín ch'án ijnko ntacruz la k'óyán sín ch'án. ⁴⁰ A ntá Dios kjuínchexechón ch'án tí níxín yaon la kjuanjon ch'án kjuachaxín kíxin k'uíkonni ch'án ínaá. ⁴¹ Jehya kíxin kaín chojni chrók'uikon sín ch'án. Náhí. Jehó tí sín tsíkjejá Dios kíxin ts'íkon chaxín xechón ch'án. Jeheni kjónekoni ch'án la ko k'uíkani ch'án tió xíxechón ch'án ínaá. ⁴² K'uetoan ch'án kíxin jeheni tsjakøhëni chojni la tsochrónkani kíxin jehe ch'án mé tí nkexro juez sinchekitøexín ijíe tí sín tjejóchón la ko tí sín ó tsík'en. ⁴³ Kaín tí sín k'uéchrónka itén Dios mé chrónka sín kíxin jnkojnko tí sín tinkáchónki Jesús mé ts'óxíka ch'án ijíe sín —ichro ch'ín Pedro.

Tí sín jehya judío k'uáyéhe sín Nchakuen Dios

⁴⁴ Naxa tjenixja ch'ín Pedro ntá kaín tí sín tjejótinhin tí nkehe kjuako ch'án k'uáyéhe sín tí Nchakuen Dios. ⁴⁵ Ntá tí sín judío kjuikotoxín ch'ín Pedro la chrakon sín kíxin Dios mé kjuanjon Nchakuen ch'án, kjaxín k'uáyéhe tí sín jehya judío. ⁴⁶ Mexas kuínhin sín nixja sín jnkojnko nkiva ókjé la ko kuínhin sín tjanchehe sín Dios kjuasáya. ⁴⁷ Ntá ntáchro ch'ín Pedro kíxin:
—Jehe sín ó k'uáyéhe sín tí Nchakuen Dios xíkaha jeheni. Ntá chrókjuanjonni kjuachaxín kíxin tsikite sín —ichro ch'án.

⁴⁸ La ntá k'uetoan ch'ín Pedro kíxin tsikite kaín sín kjuachaxién ihnjé Jesucristo. Ntá tí sín kuíkite mé kjuanchia sín kíxin chrókuitøhe tí ch'ín Pedro ntiha iso yaon.

Nixjehe ch'ín Pedro tí sín tinkáchónki Cristo chjasin Jerusalén

11 Na ntá tí sín tsíkjejá Ìnchéni la ko kaín tí sín tinkáchónki Ìnchéni k'uéjó estado Judea mé kuínhin sín kíxin tí sín jehya judío ó tinkáchónki sín itén Dios. ² Na ntá ch'ín Pedro ikjan ch'án chjasin Jerusalén.

La ntá iso tí sín judío tinkáchónki sín Ìnchéni tjonta sín ch'án. ³ Kjuanchankíhi sín ch'án ntáchro sín kíxin:

—¿Nkekuénté kjuítsjehé tí sín jehya judío, la ko kjón-tekoa tí jehe sín? —mé xíkaha kjuanchankí sín.

⁴ Ntá tí ch'ín Pedro kjuankíxin ch'án chrónka ch'án desde tí xrankixín kaín nkehe tsíkónhen ch'án. Ntáchro ch'án kíxin:

⁵ —Janhan mé kjuak'é chjasin Jope kjuak'énixjaha Dios. La ntá titàya k'uíkuèn ijnko ka jíe k'uínkajínxin nkaya nkajní. Kanoé punté tí ka tjejóte la kjuak'e chjino tí tjejó. ⁶ Ntá tsjaha jína tí nkehe la k'uíkuən kíxin tí nkaxenhen tí ka tjinká ko noó tøté la ko iko nteje la ko konche la ko iko xritjaká. ⁷ La kjaxín kuínhan itén ijnko nkexro nixjana ntáchro ch'án kíxin: “Pedro, t'aya t'oyán tí ko a ntá inte.” ⁸ A ntá kjuátaha kíxin: “Náhí, Ìnchéni. Nunca nehyani tí nkehe tjuáhya.” ⁹ A ntá kjuátehe tí tan kuíxin nkaya nkajní a ínaá chrónka kíxin: “Tí nkehe a mé ó kjuínchetjóá Dios. La ntáchrohya kíxin tjuáhya,” ichro ch'án. ¹⁰ Xíkaha kónhen iní veces. Ntá sákjuí kaín tí nkehe a nkaya nkajní ínaá. ¹¹ Ntá xrínahya tuénxín kjuíji iní chojni ntoa tí nchia tjejóni. Tsíkíxín sín chjasin Cesarea xritjejá sín tí janhan. ¹² Tí Nchakuen Dios mé k'uetoan kíxin sáchrókjuikian sín la chrókóxakonahya. Kjaxín sákjuikian injon tí sín kíchó ni tjejó i. Kaínni k'uixenhenni ntøe tí ch'ín a. ¹³ A ntá tí ch'ín ntøe ntiha mé chrónka ch'án kíxin k'uíkon ch'án ijnko ángel tjejóni tjejóte la nixja ntáchro kíxin: “Tétuénhén chojni sátsji chjasin Jope kíxin tsjikakjín sín ijnko ch'ín it'in Simón la ko kjaxín it'in ch'án Pedro. ¹⁴ Jehe ch'án mé tsonixjaha ch'án tsochrónka ch'án nkexrí tsaá jaha la ko kaín tí sín kjéhya.” ¹⁵ Ntá kjuankíxian nixjaha sín na ntá ó kui tí Nchakuen Dios k'uáyéhe sín éxí k'uáyéhe ní senó a. ¹⁶ Na ntá xraxinkaonni tí nkehe k'uénixja Ìnchéni. K'uéntáchro ch'án kíxin: “A ntá chaxín ch'ín Juan ìnta ó kuíkíxín ch'án chojni, a ntá ijie jahará tsikitiáxinrá tí Nchakuen Dios.” ¹⁷ Éxí xíkaha jeheni tió kjuankíxin kuinkáchónkini Ìnchéni Jesucristo ntá kjuanjon Dios Nchakuen ch'án k'uáyéhe ní mé xíkaha ijie la kjuanjon Dios tí Nchakuen ch'án k'uáyéhe tí jehe sín kjaxín. ¿Xá nkexro tí janhan kíxin chrókjuánjonkian Dios? —ichro ch'ín Pedro.

¹⁸ A ntá tí sín kíchó ni tjejó chjasin Jerusalén kuínhin tí nkehe tsíkónhen ntá tání sín ntá kjuanchehe sín kjuasáyé Dios. Ntáchro sín kíxin:

—Kjuanjon Dios kjuachaxín kjaxín kíxin tí sín jehya judío ts'áyéhe sín kjuachaxín kíxin tsinkáchónki sín Dios la ko tsakja sín kjuachón jnkochríxín —mé xíkaha ichro sín.

Tí nínko chjasin Antioquía

¹⁹ Tí kjuixin k'uén ch'ín Esteban ntá kjuankíxin sín chónkíhi sín tí sín tinkáchónki Ìnchéni. Ntá iso sín sákjuí sín estado Fenicia la ko Chipre jnkosiné ntayaon la ko sákjuí sín chjasin Antioquía. Kjuakohe sín tí sín judío nkexrí tjejó tan jína. A ntá tí sín jehya judío la náhí. ²⁰ A ntá í so sín tinkáchónki Ìnchéni tsíkíxín chjasin Chipre la ko tsíkíxín sín Cirene sákjuí sín chjasin Antioquía. Tió kjuíji sín ntiha mé kjuakohe sín tí sín je-

hya judío nkexrí tjen tí tan jína kuènte Ìnchéni Jesu-cristo. ²¹ Tí kjuachaxin kuènte Ìnchéni mé chóna tí jehe sín; méxra nchónhya tí sín ntiha mé kuítóhe sín tí nkehe k'uékinkáchónki sín ntá kuítekaon sín Ìnchéni Jesús.

²² Tí sín tinkáchónki Ìnchéni chjasin Jerusalén mé kuínhin sín nkehe tsíkónhen chjasin Antioquía. Ntá ichr'án sín ch'ín Bernabé sákjuí ch'án ntiha. ²³ Ntá tió kjuíji ch'án ntiha ntá k'uíkón ch'án kixin Dios imá kjuínkítsa tí sín ntiha kjaxin. Ntá imá kóchéhe asén ch'án. Ntá nixjehé ch'án sín kixin kaín asén sín ts'ejó sín tsinkáchónki sín Ìnchéni. ²⁴ Ch'ín Bernabé la ijnko chojni imá jína asén la antsí chóna ch'án Nchakuen Dios la jína tinkáchónki ch'án; méxra kóchjina nchónhya sín kuinkáchónki sín Ìnchéni.

²⁵ Kjuixin tíha a ntá ch'ín Bernabé sákjuí ch'án chjasin Tarso sákjuíkijeyá ch'an tí ch'ín Saulo. ²⁶ Ntá tió k'uitja ch'án ntá sákjuíko ch'án chjasin Antioquía. Ntá k'uejókó sín tí sín tinkáchónki Ìnchéni ntiha kuenté ijnko nánó la kjuakohé sín itsjé chojni. Ntiha chjasin Antioquía kjuankixin sín kuíkítexín sín tí sín tinkáchónki Cristo mé ihnié cristiano.

²⁷ A ntá iso sín chrónka itén Dios sákjuíxin sín chjasin Jerusalén la kjuíji sín chjasin Antioquía. ²⁸ Ijnko ch'ín it'in Agabo k'uínkatjen ch'án kjuák'exín toté ch'an tí tsíkójnkotsé tí sín tinkáchónki Jesús la kjuachaxién Nchakuen Dios chrónka ch'án kixin tsókjinta nkuíxin ntiha. Tí nkehe chrónka ch'án mé chaxín kónhen tió kjuák'e ch'ín Claudio k'uetōan ch'án. ²⁹ A ntá tí sín tinkáchónki Ìnchéni chjasin Antioquía kjuenkayáxin sín kixin jehe sín tsjinkítsa sín tí sín kíchó sín tinkáchónki Ìnchéni estado Judea. La jnkojnko sín kjuanjon sín tí nkehe chóna sín. ³⁰ Mé xíkaha kjuenájín sín chichaon sákjuíko ch'ín Bernabé la ko ch'ín Saulo chjéhe sín tí sín t'ayakonhen njnko estado Judea.

Ik'uén ch'ín Jacobo la ko kjuák'echjina ch'ín Pedro

12 A ntá tí yaon a tí ch'ín rey Herodes mé ntá kjuankixin ch'án kóninkakonhen ch'án tí sín tinkáchónki Jesús. ² La k'uetōan ch'án kixin tí ch'ín Jacobo ts'enxín ijnko chica espada tjate. Jehe ch'án mé kíchó ch'án tí ch'ín Juan a. ³ Ntá k'uíkón ch'ín Herodes kixin imá kóchéhe tí sín judío kixin xíkaha kónhen la ntá kjaxin itsé ch'án tí ch'ín Pedro. Tíha mé kónhen tí yaon kia pascua tió kjóne sín niotjā chóntahya tí xroan nchek'ánkí niotjā. ⁴ Kjuixin itsé ch'ín Herodes tí ch'ín Pedro ntá chr'áxenhén ch'án ntōechiso. Ntá ntiha mé tjejónta noó grupo soldado la mé noó soldado jnkojnko grupo. Kjuenkayáxin ch'ín Herodes kixin tsjixin ts'átsínka tí kia pascua ntá sátsjiko ch'án tí ch'ín Pedro tí siín tí sín israelita kixin ts'ikon kuenté chjasin ntiha kixin nkexrí its'en ch'án. ⁵ Méxra ch'ín Pedro naxa tjechjina ch'án la ntaha sínta sín ch'án, la ntá kaín tí sín tinkáchónki Ìnchéni la tjejónixjehé sín Dios kaín asén sín kixin tsjinkítsa Dios tí ch'ín Pedro.

Dios kjuínkítsa ch'ín Pedro k'uaxrjexín ch'án ntōechiso

⁶ Tí tie a mé kjuenkayáxin ch'ín Herodes kixin tsoyaon ntá tsakitsje ch'án ch'ín Pedro sátsjiko ch'án tí siín tí sín chjasin. A ntá ch'ín Pedro tjejua ch'án la nánánko tí jehe ch'án tjejó yaá soldado la chróntetoxín tja ch'án yaá chica cadena. Ntá í so sín soldado a tjejónta sín ntója ntōechiso. ⁷ A ntá xrinahya tuénxín ikui ijnko ángel kuènte Ìnchéni, a ntá tí nkaxenhén ntōechiso imá k'uínkaséyan ijnkòyé ntiha. Kjuak'etja itja tí ángel tí chjia ch'ín Pedro kjuínchekjayehe ch'án. Ntá k'uetōan tí ángel ntáchro kixin:

—Tjoka t'aya.

La ntá tí chica cadena tjejóchróntetoxín itja ch'ín Pedro mé k'uánótjen. ⁸ Ntá xík'etōan tí ángel ntáchro kixin:

—T'inkaya iká la tjanka tokatá.

Ntá kuítekaon ch'ín Pedro la kjetēe xík'etōan tí ángel ntáchro kixin:

—T'ítsate iká ntá chréhé sátsjini —ichro ch'án.

⁹ Ntá ch'ín Pedro chréhé ch'án iton tí ángel a ntá noehya ch'án á chaxín xíkaha kónhen tí nkehe kjuích'e tí ángel o náhí. Ntáchro ch'án kixin ách'e ijnko nkehe k'uíkonxón ch'án. ¹⁰ Ntá kjuixin k'uátsínka sín tí tjejó tí soldado saxín la kjuixin xík'atsínka sín tí tjejó tí soldado a yóxin. La ntá kjuíji sín ijnko puerta chica ijié chjinxón ntja. La ntá tí puerta chica la jehó xitjehé. Ntá k'uaxrje sín tjejótji sín ijnko ntja la ntá xrinahya tí ángel ó sákjuí la ntá jehó ch'ín Pedro kuítóhe ch'án. ¹¹ A ntá tí ch'ín Pedro kónohe ch'án kixin chaxín kónhen tíha. Ntá ntáchro ch'án kixin:

—Ntá ó noheni kixin chaxín Ìnchéni tsíchr'án tí ángel kuènte ch'án kixin sinchekaáni kixin ts'óyánhyani ch'ín Herodes la ko tsōenhyani kaín tí nkehe tjinkaon tí sín judío —ichro ch'án.

¹² Ntá ó nohe ch'án kaín nkehe kónhen ch'án ntá sákjuí ch'án ntōe ijnko tjan María, iné ch'ín Juan kjaxin tikítexín sín Marcos. Ntaha tsíkójnkotsé itsjé sín tinkáchónki Ìnchéni tjejónixjehé sín Dios. ¹³ La ntá t'ínka ch'án tí puerta chjinxón ntja la nixja ch'án. La ntá ijnko tjan it'in Rode k'uaxrje tjan kjuitsjehe tjan kixin nkexro tíha. ¹⁴ A ntá tió kjuátsōan tjan itén ch'ín Pedro ntá k'uitjāyenhén tjan kuakitjēehya tjan tí ntója a kixin imá kóchéhe tjan. Kuinká tjan sákjuíchrónka tjan kixin ntója puerta ntiha itjen ch'ín Pedro. ¹⁵ Ntá ntáchro sín kixin:

—Lontia.

La naxa chrónka tjan kixin chaxín jehe ch'án ntá xín-táchro sín kixin:

—Jehya jehe ch'án. Kjá tí xrintōe ch'án.

¹⁶ A ntá ch'ín Pedro naxa t'ínka ch'án tí ntója puerta la ntá tió kuakitjehé sín la k'uíkón sín ch'án ntá chrakon sín. ¹⁷ A ntá kjuakoxin ch'ín Pedro itja ch'án kixin tsotáni sín ntá chrónka ch'án kixin Ìnchéni mé kuakitsjexín ch'án ntōechiso. Ntá k'uetōan ch'án ntáchro ch'án kixin:

—Chenkará ch'ín Jacobo la ko kaín kíchó ni nkehe k'uátsínka janhan —ichro ch'án ntá sákjuí ch'án ókjé.

¹⁸ Ntá tí kóyaon a imá kóxakonhen tí sín soldado a kixin noehya sín nketí sátsíkji ch'ín Pedro. ¹⁹ La ntá k'uetōan ch'ín Herodes kixin sátsjikjeyá sín ch'án, kjánchó k'uitjahya sín ch'án. A ntá tí sín soldado kuamá sín tíha ntá k'uetōan ch'ín Herodes kixin its'en sín. Na ntá kjuixin tíha ntá ch'ín Herodes k'uaxrjexin ch'án estado Judea ntá sákjuí ch'án chjasin Cesarea la ntiha kjuák'e ch'án.

Ik'uén ch'ín Herodes

²⁰ A ntá ch'ín Herodes mé nínkakonhen ch'án tí sín chjasin Tiro la ko chjasin Sidón. Ntá jehe sín jnkokoá kjuenkayáxin sín kixin sátsjitsjehe sín ch'án. Ntaha itjen ijnko ch'ín it'in Blasto k'uàyakonhen ch'án ntōe ch'ín Herodes ntá kjuanchehe sín ch'án kixin tsonixjayákonhen sín ch'án tí ch'ín t'etōan. Kjuanchia sín kixin chrókónínkakuenhya sín ch'ín Herodes kixin naxa tsochr'án ch'án tí nkehe sine sín kixin chjasén ch'án sítxixín tí nkehe ine sín. ²¹ Ntá ch'ín Herodes k'uíyēhe ch'án sín kixin tsojnkotsé sín ijnko yaon. Ntá jehe ch'án k'uítsá ch'án ka náxrjón kuènte chojni t'etōan la kjuák'enkáya ch'án ijnko silla kuènte chojni t'etōan. La ntá kjuankixin ch'án nixjehe ch'án tí sín tsíkójnkotsé. ²² A ntá tí sín a kjuankixin k'uèya sín, ntáchro sín kixin: —Jehya chojni tjenixja. Dios tjenixja —ichro sín. ²³ A ntá tuénxín ijnko ángel kuènte Ìnchéni kjuíncheníhi ch'ín Herodes kixin kjuíncheyóhe ch'án asén ch'án Dios. La ntá kosjntō kjóne nkaya tsee ch'án ntá k'uén ch'án. ²⁴ La ntá itsjé chojni tinkáki nhin itén Dios la nkuíxín tinkákótsjé tí sín tinkáchónki Ìnchéni.

²⁵ La ntá tí ch'ín Bernabé la ko tí ch'ín Saulo ó kjuixinhin sín ixrā kuènte sín chjasin Jerusalén la ntá sáxíkji sín chjasin Antioquía la sákjuíko sín ch'ín Juan mé kjaxin tikítexín sín ch'án Marcos.

Ch'ín Saulo la ko ch'ín Bernabé sákjuíkjako sín

13 A ntá tí nínko chjasin Antioquía la síin iso sín nixja sín itén Dios la kjuakōhe sín chojni. Tí sín tjako mé ch'ín Bernabé la ko ch'ín Simón, kjaxin it'in ch'án Negro, la ko ch'ín Lucio, chjasen ch'án mé Cirene, la ko ch'ín Manaén, ijnko ch'ín tsík'ánkíko ch'ín Herodes tí ch'ín t'etōan estado Galilea, la ko ch'ín Saulo. ² Ijnko yaon la tjejótojnkotsé sín xraxinkaon sín Dios la kjónehya sín. Ntá Nchakuen Dios mé ntáche ch'án sín kixin:

—Tsakitsjekjan ch'ín Bernabé la ko ch'ín Saulo kixin ó kjuéyá sín tsjánjuan ijnko xra sích'e sín.

³ Ntá nixjehe sín Dios la kjónehya sín la ntá kjuixin ntá k'uejotja tja sín chrítaón ikja tí sín a la nixja sín jnkojnko sín kixin ó sátsji sín.

Ch'ín Pablo la ko ch'ín Bernabé tjako sín nonte Chipre

⁴ A ntá tí Nchakuen Dios ichr'án ch'ín Bernabé la ko ch'ín Saulo sákjuí sín chjasin Seleucia. Ntá ntaha k'uixenhen sín ijnko ntabárco sákjuí sín ijnko nonte it'in Chipre. ⁵ Ntá kjuíji sín ijnko puerto it'in Salamina. Nta-

ha kjuakōxin sín itén Dios tí nínko kuènte tí sín judío. Kjaxin kjuíjiko sín ch'ín Juan kixin tsjinkitsa ch'án. ⁶ La ntá sákjuí sín nkuíxín nonte Chipre hasta kjuíji sín chjasin Pafos. Ntaha xéta sín ijnko ch'ín nchexroan me ijnko ch'ín judío it'in Barjesús. Jehe ch'án kjuích'ia ch'án ntáchro ch'án kixin kjaxin ch'án nixja ch'án itén Dios. ⁷ A ntá tí ch'ín nchexroan a mé kjuák'eko ch'án tí ch'ín gobernador Sergio Paulo. A ntá tí ch'ín gobernador mé imá jina kjuenkayáxin ch'án. K'uíyēhe ch'án tí ch'ín Bernabé la ko tí ch'ín Saulo kixin jehe ch'án tjinkaon ch'án tsinhin ch'án itén Dios. ⁸ A ntá tí ch'ín nchexroan, nkiva griego mé tikítexín sín ch'án Elimas, mé nínkakonhen ch'án tí sín tjako a kixin tjinkakonhya ch'án kixin tí ch'ín t'etōan chrókuitekaon ch'án Ìnchéni. ⁹ A ntá tí ch'ín Saulo, kjaxin tikítexín sín ch'án Pablo, imá chóna ch'án Nchakuen Dios. La ntá komá ch'án tí ch'ín nchexroan. ¹⁰ Ntáchro ch'án kixin:

—Jaha mé chojni ch'ia, jínahya, xjeen Diablo la nínkakonhén kaín nkehe jína. ¿Nkekuènte kixin ch'éna jínahya tí ntia ntoá kuènte Ìnchéni? ¹¹ A ntá ijie la Ìnchéni sintakjasótia. Tsitōha ntakótán iso yaon la ts'ikonhya tí xrohi kuènte yaon —ichro ch'ín Pablo.

Ntá tuénxín tí ch'ín Elimas la k'uixitie tjen ch'án. La ntá kjuéyá ch'án ijnko nkexro tsinkátséhe tja ch'án sátsjiko ch'án kixin t'ikonhya ch'án. ¹² A ntá xikaha mé k'uikon tí ch'ín gobernador nkehe kónhen la ntá kjuankixin tinkáchónki ch'án Ìnchéni kixin k'uikon ch'án tí kjuachaxin kuènte Ìnchéni.

Ch'ín Pablo la ko ch'ín Bernabé tjejó chjasin Antioquía estado Pisidia

¹³ Ntá tí ch'ín Pablo la ko tí sín xriko ch'án sákjuíxin sín chjasin Pafos. K'uixenhen sín ntabárco sákjuí sín kjuíji sín chjasin Perge estado Panfilia. Ntá ntaha ch'ín Juan † kuitōhe tí jehe sín ntá kjan ch'án chjasin Jerusalén. ¹⁴ Ntá sákjuíxin ch'ín Pablo la ko ch'ín Bernabé chjasin Perge kjuíji sín chjasin Antioquía chjinaxón Pisidia. A ntá tí yaon t'ok'éhe sín ntá k'uixenhen sín tí nínko Israel na ntaha k'uejótjāxin sín. ¹⁵ Ntá kjuixin kjuínchekuáxin sín tí xroon kuènte ley la ko tí nkehe tsíkjin tí sín k'uechrónka itén Dios ntá tí sín t'etōan kuènte nínko mé k'uíyēhe sín tí sín a ntá ntáchro sín kixin:

—Kíchóni tí chonta nkehe tsochronka kixin antsí má tsochéhēni la chronka jie tsinhinni —ichro sín.

¹⁶ Ntá ch'ín Pablo k'uínkatjen ntá kjuakōxin itja ch'án kixin tsoṭání sín. Ntá ntáchro ch'án kixin:

—Chrókuinhínrá jahará chojni israelita la ko kjaxin chrókuinhínrá jahará tsíkjixínrá chjasin ókjé tí chaxín tjinkáonrá nchexiteyéhérá Dios. ¹⁷ Tí Dios tinkáchónki tí sín chjasin Israel mé kjuéyá ch'án tí sín tsík'axrjenínni. Ntá chr'éxin Dios kjuanjōn kjuachaxin kixin chrókótsjé tí jehe sín tí naxa k'uejó sín chjasin Egipto. Éxí chojni tsíkjixín ókjé k'uejó sín a ntá chr'éxin ntá kjuachaxiēn Dios kjuínkitsa sín k'uaxrjexín sín tí nonte ntiha inaá. ¹⁸ Dios kjuínkitsa sín tí cuarenta nánó k'uejó sín tí nteje. ¹⁹ Ntá chr'éxin kjuínchek'itjáyan ch'án yato

nación k'uék'ejó nonte Canaán, kixin tí sín tsík'axrjeníxinni chrók'uáyéhe tí nonte a. ²⁰ Ntá kaín sín k'uéjéjó sín ntiha ijnko cuatrocientos cincuenta nánó. K'uék'e-
toan tí sín juez hasta ikjuí tí ch'in Samuel ijnko ch'in k'uéchrónka itén Dios. ²¹ Ntá kjuanchia tí sín israelita ijnko ch'in rey ts'etuenhen sín. Ntá kjueyá Dios tí ch'in Saúl la k'uetōan ch'án cuarenta nánó. Jehe ch'án it'é ch'án mé ch'in Cis la k'uaxrjeníxin ch'án ch'in Benjamín. ²² Ntá chr'éxin Dios kuakitsjehe ch'in Saul tí xra kjuák'e ch'án ntá k'uáyéhe ch'in David tí xra rey. Ntá ntáchro Dios kixin: "Ó k'uitjá ch'in David, it'é ch'án mé Isaí. Jehe ch'án mé ijnko chojni nchechána mé sinchexiteyàna ch'án kaín nkehe tjínkavan". ²³ Ijnko tí chojni k'uaxrjeníxin tí ch'in David mé Jesús. Tíha la Dios tsíchr'án ch'án kixin sinchekaá tí sín israelita. Mé xikaha tsíntáchro ch'án. ²⁴ Naxa tjakohya ch'in Jesús ntá ch'in Juan kjuako ch'án tí tan kuínhin tí sín israelita la ntáchro ch'án kixin chrókjan sín chrórxaxinkaon sín Dios ntá chrokuikite sín. ²⁵ Ntá chjina its'en ch'in Juan ntá ntáchro ch'án kixin: "Janhan na jehya tí nkexro tjenkayáxinrá. Náhí. Chr'éxin na itsí í jnko nkexro la chrókósuàna chrókjuasintanká tí correa tokaté ch'án kixin antsí mé t'etōan tí jehe ch'án la kánhyó t'etōan tí janhan," mé xikaha tsíntáchro ch'in Juan.

²⁶ Jahará kichó ni tsík'axrjeníxinrá ch'in Abraham tinhínra la ko kaín rá chojni tsíkjin íjn nchexiteyéherá Dios, tinhínra tí tán tsaáxinrá. ²⁷ Méxra tí sín k'uék'ejó sín chjasin Jerusalén la ko tí sín t'etōan ntiha mé kónoehya sín nkexro tí ch'in Jesús la ko kuienxínhya sín tí nkehe tsíkjin tí sín k'uéchrónka itén Dios senó tió kjuínchekuáxin sín tí xroon tí nkaxenhen njnko jnko jnko tí yaon t'ok'éhe sín. Mé xikaha jehe sín tió kjuínchekjasóte sín tí ch'in Jesús la kjuínchexiteyá sín éxí nixja tí xroon a. ²⁸ Ntá k'uitjahya sín ninkehó jje kixin chrók'uen ch'án ntá kjónté kjuanchehe sín tí ch'in Pilato kixin ts'etōan ch'án kixin its'en ch'án. ²⁹ A ntá ó xiteyá tí nkehe tsíkjin tí sín ósé kuènte ch'án. Ntá kjuixin k'uén ch'án ntá kjuinkajinxin sín tí cuerpo kuènte ch'án tí ntacruz ntá kjuavá sín ch'án. ³⁰ A ntá Dios kjuínchexechón tí jehe ch'án inaá. ³¹ A ntá nchónhya yaon k'uíkon sín ch'in Jesús tí sín k'uék'ajiko ch'án tió sákjuixin sín estado Galilea la sákjuí sín chjasin Jerusalén. A ntá ijie tí sín a mé tjeónixja sín nkexrí kjuako ch'in Jesús, tjakohe sín kaín chojni.

³² A ntá jie jeheni tjakoni tí tan jína, mé tí nkehe tsíkjanjon Dios tsík'áyéhe tí sín tsík'axrjeníxinni ósé. ³³ Mé xikaha xiteyá k'uáyéheni tí jeheni tsík'axrjeníxinni tí sín a. A ntá Dios kuènte tí sín a mé kjuínchexechón tí ch'in Jesús éxí nixja tí xroon yóxin Salmo, ntáchro kixin: "Jaha mé xjanna. Janhan mé tjahá kjuachón jie." ³⁴ Ntá tsíntáchro Dios kixin sinchexechón ch'án tí ch'in Jesús kixin tsóxíkahaya cuérpōé ch'án. Mé xikaha chrónka tí xroon itén Dios. Ntáchro kixin: "Janhan mé sintaxiteyá tí nkehe chaxín tjanka ch'in David." ³⁵ La ko í jnko Salmo mé ntáchro xikihi: "Jaha tsjánjonhya kjuachaxin kixin tsóxíka tí cuérpōé tí nkexro tjóá kjuít'aha xra." ³⁶ A ntá ch'in David kjuínchexiteyá ch'án éxí tsík'etōan

Dios tí kjuák'e ch'án ntá kjónté chr'éxin ik'uén ch'án ntá xravá ch'án xikaha k'uéxravá tí sín tsík'axrjeníxinni la ntá kjónté la xíka ntōe ch'án. ³⁷ A ntá tí cuérpōé tí nkexro kjuínchexechón Dios la kótjehya. ³⁸ Méxra kichó ni t'ichjánxin tsōnohará kixin nkexrí tsjin ijjará kixin Jesús mé k'uenyákonhánrá. ³⁹ A ntá kaín nkexro tinkáchónki Jesús mé ó kjuínchetjóá ch'án asén sín. A ntá tí ley k'uetōan ch'in Moisés kjuachahya kótjuáxin tí jie. ⁴⁰ Chrókóxakonhanrá kixin chrókuànhyará xikaha éxí tsíkjin tí sín ósé xikihi:

⁴¹ Tsjehérá jahara chojni titekakonhya. Ijie la tsochraonrá kixin nkehe tsōnhen kixin janhan Dios tsjákoxiān ijnko nkehe jie ijnko yaon jánchó tsítekákonhyará kjónté ókjé nkexro chróchrónka. ††

⁴² A ntá ch'in Pablo la ko tí nkexro k'uájiko ch'án k'uaxrjexín sín nkaxenhen tí njnko, a ntá chrónōa tí sín jehya sín judío tsíkókjéxín, kjuanchia sín kixin íjnko semana tí yaon t'ok'éhe sín la inaá tsochrónka ch'án éxí tí kjuako ch'án. ⁴³ Ntá tí kjuixin xikaxín sín tí kójnkotsé sín tí njnko ntá nchónhya tí sín judío, la ko tí sín jehya sín judío, mé tí sín na ntá kuinkáchónki sín éxí tí sín judío la xraxinkaon sín Dios, la mé imá kórxjnhín sín tí nkehe kjuako ch'in Pablo la ko ch'in Bernabé la ntá sákjuíchréhe sín. A ntá jehe sín mé k'uetōan sín kixin antsí jína chrókuinkáchónki sín tí Dios tjuèhe kaín chojni.

⁴⁴ A ntá í jnko semana kjuèxin, tí yaon t'ok'éhe sín la kójnkotsé kaín tí sín sín tí chjasin ntiha kixin tjinkaon sín tsinhín sín itén Dios. ⁴⁵ A ntá k'uíkon tí sín judío a kixin nchónhya chojni tsíkójnkotsé, ntá imá kóchjínōxínhin sín, ntá kjuankíxin sín k'uántaxínhin sín tí ch'in Pablo. ⁴⁶ A ntá ch'in Pablo la ko ch'in Bernabé la íchá antsí má chrakonhya sín nixja sín ntáchro sín kixin:

—T'ichjánxin senó jahará judíorá chrókuinhínra itén Dios. Kjánchó tjinkákonhyará tsinhínra tí nkehe jína tsjanjon kjuachón jnkochrín. A ntá ijie la tsitōhárá tí jahara judíorá la ntá jeheni la sátsjini tsjákoheñi tí sín jehya judío ⁴⁷ xikaha tsík'etōan Ìnchéni. Ntáchro ch'án kixin:

Janhan ichr'an tí jahará éxí xrohi ts'inkaséyanxín kaín nación

kixin sátsjikoará tí tan tsjanjon kjuachón tsaáxin chojni hasta tí antsí má kjín kjuèxin chjasintajni. †† Mé xikaha k'uetōan Dios.

⁴⁸ A ntá kuínhin tí sín jehya sín judío tíha la kjuankíxin kóchéhe sín la ntáchro sín kixin tí tan kuènte Ìnchéni la nkehe jína, ichro sín.

La ntá kjuankíxin kuinkáchónki kaín tí sín tsíkjtōenxín sín kixin tsochóna sín kjuachón jnkochrín. ⁴⁹ Ntá xikaha xrankíxin xrako tí itén Ìnchéni nkuíxin tí chjasin ntiha. ⁵⁰ A ntá tí sín judío nixjehé sín iso chojni chjin jína tjetōan la ko tí chojni ntoa t'etōan tí chjasin ntiha la ntá kjuínchekónínkaon tí sín a la ntá kjuankíxin sín chrók'óyán sín tí ch'in Pablo la ko tí ch'in Bernabé ntá sákjuíxin sín chjasin ntiha. ⁵¹ A ntá jehe sín la kótsjénka

† Salmo 2.7 †† Isaías 55.3 † Salmo 16.10

†† Habacuc 1.5 †† Isaías 42.6; 49.6

sín tokaté sín kixin tsoxénjin tí nche chóna toté sín. Tíha mé kjuakoxin sín kixin ntoáhya kjuenkayáxin tí sín a. ⁵² A ntá sákjuí tí jehe sín chjasin Iconio. ⁵² Ntá tí sín tinkáchónki Ìnchéni la imá chéhe sín kixin antsí chóna sín Nchakuen Dios.

Ch'ín Pablo la ko ch'ín Bernabé tjejó chjasin Iconio

14 Ntá kjuíji ch'ín Pablo la ko ch'ín Bernabé tí chjasin Iconio. Ntá k'uixenhen sín ninkoe tí sín judío ntá jína kjuako sín. La ntá nchónhya tí sín judío la ko tí sín jehya judío mé kuítekaon sín tí nkehe kjuako sín. ² A ntá iso tí sín judío kuítekakonhya la ntá kjuankixin nchekónkaon sín tí chojni jehya judío kixin tsonínkakonhen sín tí sín tjako. ³ A ntá tí sín tjako la isé kuítqhe sín ntiha la chrakonhya sín nixja sín la ko tinkáchónki sín Ìnchéni Jesús. La ntá Ìnchéni kjaxin kóxrjinhin ch'án tí nkehe nixja sín kixin nkexrí tjuèheni Dios la kjuanjon ch'án kjuachaxin tsjasin sín kjuaxroan. ⁴ A ntá tí sín tjejó chjasin ntiha la jnkokónhya kjuenkayáxin sín. Iso sín kuítekakonhen sín tí sín judío la í so sín kuítekakonhen sín tí sín tsíkjejá Ìnchéni. ⁵ A ntá tí sín judío la ko tí sín jehya judío mé kjuenkayáxinko sín tí sín t'etqan kixin sinchechrakon sín tí sín tsíkjejá Ìnchéni la ko tsochjéhe sín xro. ⁶ La ntá tí ch'ín Pablo la ko tí ch'ín Bernabé kónohe sín nkehe kjuenkayáxin tí sín a ntá sákjuí sín chjasin Listra la ko chjasin Derbe estado Licaonia la nkuíxín ntiha. ⁷ La kjaxin ntaha kjuako sín tí tan jína kuènte Ìnchéni.

Chjéhe sín xro ch'ín Pablo chjasin Listra

⁸ Ntá tí chjasin Listra itjen ijnko ch'ín xitjahya tji. Nunca xitjahya k'uáji ch'án kixin tsíkokjéxín ch'án xitjahya itji ch'án. ⁹ Méxra ó tjetjaxinkoá ch'án ntá kuínhin ch'án nkehe tí tjako ch'ín Pablo. Ntá ch'ín Pablo komá ch'án tí ch'ín a ntá kónohe ch'án kixin tí ch'ín antsí tinkáchónki ch'án Ìnchéni kixin tsitqhe ch'án jína. ¹⁰ Ntá jehe ch'án itsen ntáche ch'án tí ch'ín a kixin:

—T'inkatjen, ntoá tjak'exián totá —ichro ch'án.

Ntá tuénxín k'uínkatjen ch'án, chrika ch'án, kjuák'exín ch'án toté ch'án ntá ó jína tji ch'án. ¹¹ Ntá kaín tí sín chjasin ntiha k'uíkon sín nkehe kjuích'e ch'ín Pablo, ntá kaín sín k'uíyexin sín nkívée sín Licaonia ntáchro sín kixin:

—Dios tsík'óna chojni mé tsíkixin nkajní tjejókonni ntihi —ichro sín.

¹² La ntá kjuínchek'in sín ch'ín Bernabé mé tí dios Júpiter a ntá ch'ín Pablo mé tí dios Mercurio kixin imá nixja ch'án. ¹³ Ntá tí ch'ín nch'á kuènte tí dios Júpiter mé chóna ch'án ninko tí t'ixenxinni ikon chjasin ntá kjuikqo ch'án koxinta tjeteyá tsjo. A ntá jehe ch'án la ko kaín tí chojni la chréhe sín kixin tjinkaon sín chrókjuikosáyehe sín tí sín tjako la ko tjinkaon sín chrók'óyán sín tí koxinta chrók'uáyéhe tí sín a. ¹⁴ A ntá tí sín apóstol mé ch'ín Pablo la ko ch'ín Bernabé mé kónohe sín tíha ntá kjuankixin sín kótséchje sín iké sín la sákjuíkjiakjan sín tí chojni siín ntiha la t'óyako sín ntáchro sín kixin:

¹⁵ —¿Kuènte kixin tjejóch'erá xikaha? Jeheni chojni éxí tí jahará. Tí xra ó kuini kixin tsochrónkani itén Dios kixin tsitqhéra kaín tí nkehe ninkehó sínkíhya la ntá chrókjanrá chrókuinkachónkirá Dios tjechón. Jehe ch'án mé kjuích'éna ch'án nkajní la ko chjasintajni la ko tí ntayaon la ko kaín tí nkehe siín. ¹⁶ Ntá ósé mé kuítqhe Dios chojni kixin jehó ts'aji sín ntje sín. ¹⁷ Kjóté la Dios tjakoxin ch'án kixin jehe ch'án t'etqan ch'án kixin kjuích'éna ch'án kaín nkehe. Jehe ch'án mé t'etqan kixin ts'aniá chrin ntá ts'enkani la jína ts'óneheni, la jehe ch'án tjanjon ch'án nkehe kixin jnkochrixín ts'ixin nkehe sineni, la ko jehe ch'án mé nchechéheni ch'án —mé xikaha ichro ch'ín Pablo.

¹⁸ Kjóté xikaha ichro tí sín tjako la naxa tjinkaon tí chojni chrokjuikosáyehe sín chrók'óyán sín koxinta chrókjoqhehe sín tí sín tjako.

¹⁹ A ntá ikui iso tí sín judío kjuixin sín chjasin Antioquía la ko chjasin Iconio. Nixjehe sín tí sín ntiha kixin tsitqhe sín tí nkehe jehya jína tjako tí sín a ntá kónínkaon sín ntá kjuankixin chjéhe sín xro tí ch'ín Pablo. La ntá ách'e ó kjuixin tsík'en ch'án ntá kuinkánkákjen sín ch'án sákjuiko sín ch'án ikon chjasin. ²⁰ Ntá tí sín tinkáchónki Ìnchéni mé kójnkotsé sín k'uantatjen sín tí ch'ín Pablo ntá k'uàya ch'án xíkjan ch'án tí chjasin ntiha inaá. Ntá tí yaon chr'éxin ntá sákjuiko ch'án tí ch'ín Bernabé chjasin Derbe.

²¹ A ntá ó kjuixin chrónka sín tí tan jína la ko kjuacha sín itsje chojni kuinkáchónki Ìnchéni ntiha ntá kjan sín chjasin Listra la ko chjasin Iconio la ko chjasin Antioquía. ²² Nkuíxín tí chjasin k'uátsínka sín mé kjuínchechéhe sín tí sín kuinkáchónki Ìnchéni. K'uètqan sín kixin naxa jína chrókuinkáchónki sín Ìnchéni la ntáchro sín kixin tí ts'ixenhenni tí kjuachaxin kuènte Dios t'ichjánxin tsjasóteni. ²³ A ntá ntiha kjueyá sín chojni jnkoinko ninko kixin ts'etqenhen sín tí sín tinkáchónki Jesús kixin jína ts'ejó sín. Ntá nixjehe sín Dios tí naxa kjónehya sín la ntá ntáche sín Ìnchéni kixin ts'ayakonhen ch'án tí sín ó kuinkáchónki tí jehe ch'án.

Ch'ín Pablo la ko ch'ín Bernabé ikjan sín chjasin Antioquía estado Siria

²⁴ Ntá chr'éxin k'uátsínka sín estado Pisidia la ntá kjuíji sín estado Panfilia. ²⁵ Ntá chjasin Perge kjuako sín tí tan kuènte Ìnchéni la ntá kjuixin ntá sákjuí sín chjasin Atalia. ²⁶ Ntá ntiha k'uixenxín sín ntabarco ntá sákjuí sín chjasin Antioquía tí chjasin k'uénixjehe chojni Dios k'uékjanchia sín kixin Dios tsjinkítsa tí sín a sich'e sín tí xra. La ntá ó kjuixin xiteyá. ²⁷ Ntá tió kjuíji sín chjasin Antioquía ntá kójnkotsé kaín tí sín tinkáchónki Jesús. Ntá kjuankixin chrónka ch'ín Pablo nkexrí kjuínkítsa Dios tí jehe sín la ko nkexrí kjuanjon Dios kjuachaxin tsjakqhehe sín tí chojni jehya judío kixin kjaxin sín tsitekaon sín Ìnchéni. ²⁸ A ntá tí ch'ín Pablo la ko tí ch'ín Bernabé itsje yaon k'uéjoko sín tí sín tinkáchónki Ìnchéni ntiha.

Kójnkotsé sín chjasin Jerusalén

15 A ntá iso chojni tsíkixin sín estado Judea ntá kjuíji sín chjasin Antioquía. Ntá kjuankixin sín kjuakohē sín tí sín kichó ni kixin xitjahya tsaáxin sín tí chóntahya sín tí xroye tsík'etōan ch'ín Moisés. ² Ntá tí ch'ín Pablo la ko tí ch'ín Bernabé la ko tí sín judío kjuankixin kjuanjonkoxín sín kichó sín. Ntá áxri ntá kónoxín kixin tí ch'ín Pablo la ko tí ch'ín Bernabé la ko í so chojni la sátsji sín chjasin Jerusalén. Ntaha tsonix-jehē sín tí sín apóstol la ko tí sín t'etōan ninko kixin nkexrí tsonhen tí xroye tsík'etōan ch'ín Moisés.

³ Tí sín tinkáchónki Ìnchéni chjasin Antioquía mé ichr'án sín tí sín a ntá k'uátsínka sín estado Fenicia la ko estado Samaria la tinkáchónka sín kixin nkexrí tí sín ókjé jehya sín judío kjuitoxinhin tí k'uékjenkayáxin sín ntá kuákja sín ntje Dios. Ntá kaín tí sín kichó ni imá kóchéhē sín tí kuínhin sín xikaha.

⁴ La ntá kjuíji ch'ín Pablo la ko ch'ín Bernabé chjasin Jerusalén ntá tí sín tinkáchónki Ìnchéni la ko tí sín apóstol la ko tí sín t'etōan kuente ninko mé kjuanjon sín kjuachaxin ts'ejó tí sín a. Ntá chrónka sín kixin Dios imá kjuínkítsa tí jehe sín. ⁵ Ntá iso tí sín fariseo ó tsíkitekaon Ìnchéni mé k'uínkatjen sín ntá ntáchro sín kixin:

—T'ichjánxin itsa xroye tí sín jehya judío tinkáchónki Ìnchéni la ko t'ichjánxin ts'ítuenhen sín sinchexiteyéhe sín kaín tí ley —ichro sín.

⁶ Na ntá kaín tí sín apóstol la ko tí sín t'etōan ninko mé kójnkotsé sín kjuenkayáxin sín nkexrí tsonhen kixin xikaha ichro tí sín judío. ⁷ Ntá imá nixjehē kichó sín ntá k'uínkatjen ch'ín Pedro ntáchro ch'án kixin:

—Jahará kichó ni ó nohará nkexrí kixin senó Dios tsíkjeýá tí jeheni kixin tsjakohēni kaín tí sín jehya judío kixin tsinhin sín tí tán jína kuente Cristo kixin kjaxin jehe sín tsitekaon sín. ⁸ Dios mé ó nohe ch'án nkexéhe kaín asén chojni. Kjuakoxin ch'án kixin k'uáyéhē ch'án tí sín jehya judío kixin chjéhe ch'án sín Nchakuen ch'án éxi tí xikaha k'uáyéhēni tí jeheni. ⁹ Dios la t'ikon kaín chojni jnkokón éxi tí jeheni. Ntá kjuínchetjóá ch'án asén sín kixin ó tinkáchónki sín Ìnchéni. ¹⁰ Méxra žnkekuente titekákonhyará tí nkehe kjuích'e Dios la ntá tētuēnhénra chojni sinchexiteýá sín kaín tí nkehe ixra tsitekaon sín? Ni jeheni la ko ni tí sín tsík'axrenix-inni kjuachahya sín kjuínchexiteýá sín tíha. ¹¹ Náhí. Ó noheni kixin kjuasáyé Ìnchéni Jesús mé kuaáxinni la ko kjaxin xikaha kuaáxin tí jehe sín kuítekaon —mé xikaha ichro ch'ín Pedro.

¹² Ntá kaín tí sín tsíkójnkotsé tání sín kuínhin sín nkexrí chrónka tí ch'ín Bernabé la ko tí ch'ín Pablo kixin Dios kjuínkítsa sín kjuasin sín itsjé kjuaxroan k'uíkon tí sín jehya sín judío. ¹³ Kjuixin nixja ch'ín Pablo la ko ch'ín Bernabé ntá kjuankixin nixja ch'ín Jacobo, ntáchro ch'án kixin:

—Kichóni, tinhínra tí nkehe tsoxrjanka. ¹⁴ Ch'ín Simón Pedro chrónka nkexrí kjuakoxin Dios kixin tjuēhe ch'án tí chojni jehya judío la nkexrí kjuéýá Dios iso tí sín kixin tsinkáchónki sín tí jehe ch'án. ¹⁵ Mé xika-

ha chaxin chrónka tí xroon tsíkjin tí sín k'uéchrónka itén Dios kixin:

¹⁶ Janhan mé tsokjan chr'éxin.

Tió ts'inka ntá sít'ána nixin tí nchia tsík'oya kuente David

la janhan la tsjínkítsa sín ts'etōan sín.

¹⁷ Kixin kjaxin kaín xín chojni mé tsjeýá sín Ìnchéni la ko kjaxin kaín xín tí sín ókjé nación mé tí sín kótuáxin nina mé tsinkáchónkina sín.

¹⁸ Ìnchéni mé kjuakoxin kaín tíha tí ósé la tsíkjanjon ch'án tí tan kuente ch'án. †

Mé xikaha ichro itén Dios

¹⁹ 'Méxra ntáxrjan kixin tí sín jehya judío la t'ichjánxinhya sinchexiteýá sín kuente tí ley kixin ó kuítohe sín tí nkehe kuinkáchónki sín senó kixin jína chrókjuéýá sín Dios. ²⁰ Méxra tsochr'énhenni sín ijnko xroon la jehó ts'etuenhenni sín kixin chrókjónheya sín tí nto tsíkjokehē chojni tí nkehe tsíkjanoya la ko chróchóntahya sín chojni chjin ókjé la ko chrókjónheya sín tí nto kuente ko tsíchrinjinhya ikja va la ko chrókjónheya sín ijnié va. ²¹ A ntá jnkojnko chjasin siín nkexro chrónkaxin tí ley kuente ch'ín Moisés nchekúáxin sín tí nkaxenhen ninko jnkojnko tí yaon t'ok'éhe sín —ichro ch'ín Jacobo.

²² Ntá kaín tí sín tsíkjeýá Ìnchéni la ko tí sín t'etōan kuente ninko la ko kaín tí í so sín tinkáchónki Ìnchéni kjuéýá sín iso chojni tsochr'án sín chjasin Antioquía, mé kjuéýá sín ch'ín Judas, tjkítexin sín ch'án Barsabás, la ko ch'ín Silas sátsjiko sín ch'ín Pablo la ko ch'ín Bernabé. Tí sín a mé sín tjetoan ntiha. ²³ Ntá ichr'án sín tí xroon sákjuíko tí sín a ntáchro kixin:

“Jeheni chojni tsíkjeýá Ìnchéni la ko chojni t'etōan kuente ninko ntihi la nixjeharání tí jahará, kichó ni jehya judío, tjejorá chjasin Antioquía la ko estado Siria la ko estado Cilicia. ²⁴ Ó noheni kixin iso chojni tsíkixin chjaséni kjónté k'uéchóntahya sín kjuachaxin la kjuínchexakonhanrá sín kixin ntáchro sín kixin t'ichjánxin itsará tí xroye tsík'etōan ch'ín Moisés. ²⁵ Ntá jnkokóá kjuenkayáxinni tsjeýáni nkexro tjejó ntihi kixin sáchrókjuitsjehe tí jahará la chrókjuijiko sín ch'ín Bernabé la ko ch'ín Pablo kixin imá tjuēheni sín. ²⁶ Tí sín a mé ántōsen sín kjónté chrók'uenxín sín kixin tí tinkáchónki sín Ìnchéni Jesucristo. ²⁷ Méxra tsochr'anni ch'ín Judas la ko ch'ín Silas tsjiji sín kixin jehe sín mé tsonixjahará sín tsochrónkaxin sín kaín tíha. ²⁸ Jína kixin Nchakuen Dios mé kjuínkítsani kjuenkayáxinni kixin jehya chrók'uētuānhanrání ijnko nkehe imá xra. Náhí. Jehó tí nkehe kánhyó xra t'ichjánxin sinchexiteýará mé t'etōanni: ²⁹ chrókjóntehyará tí iko tsíkjokehē chojni tí nkehe tsíkjanoya la ko kjaxin chrókjóntehyará ijnié tí ko a la ko chrókjóntehyará tí nto kuente tí ko tsíchrinjinhya kja la ko kjaxin ninkexró chrókuakjahya í jnko chojni chjin ókjé. Ntá tí sinchexiteýará kaín tí nkehe t'etōanni la jína ts'ejorá.” Mé xikaha nixja tí xroon.

³⁰ Ntá kjuixin nixja sín ntá tí sín a sákjuí sín chjasin Antioquía. Ntá tió kjuíji sín ntiha ntá kójnkotsé tí sín tinkáchónki Jesús ntá kjuanjon sín tí xroon a. ³¹ Ntá tió

† 15.16–18 Amós 9.11–12

kjuínchekuáxin tí sín kíchó ni tí xroon a ntá imá kóchéhe sín kixin xikaha chrónka tí xroon a. ³² Ntá tí ch'ín Judas la ko tí ch'ín Silas kjaxin sín ó nohe sín tsochrónkaxín sín itén Dios la nixja sín jína la imá kjuínchechéhe sín tí sín kíchó ni kixin tí nkehe nixja sín. ³³ Ntá ntahó k'uéjó sín iso yaon, ntá tió sátsji sín ntá kaín tí sín tinkáchónki Ìnchéni nixjehé sín jína ntá ó xikjan sín inaá tí tsíkixin sín tí tjejó tí sín tsíchr'án sín. ³⁴ Kjánchó ch'ín Silas kjuenkayáxin ch'án kixin ntahó chrókuitohe ch'án. ³⁵ A ntá ch'ín Pablo la ko ch'ín Bernabé kuítóhe sín chjasin Antioquía. Jehe sín la ko í so chojni mé kjuako sín la ko chrónkaxín sín itén Ìnchéni.

Ch'ín Pablo kjuankíxin tí yóxin viaje

³⁶ A ntá chr'éxin ch'ín Pablo nixjehé ch'án ch'ín Bernabé. Ntáchro ch'án kixin:

—Sátsjtsjeheni tí sín kíchó ni kaín tí chjasin kjuakox-inni itén Ìnchéni ósé. Tsjtsjeheni nkexrí tjejó sín ntiha —ichro ch'án.

³⁷ A ntá ch'ín Bernabé la tjinkaon ch'án kixin kjaxin sáchrókjuiko sín ch'ín Juan kjaxin tikítexín sín ch'án Marcos. ³⁸ A ntá ch'ín Pablo kóxrjénhaya sátsjiko sín tí ch'ín Marcos a kixin jehe ch'án kuítóhe ch'án sín estado Panfilia la kjuínkítsahya ch'án kixin naxa tsonhen tí xra. ³⁹ Méxra jnkokoáhya kjuenkayáxin sín la ntá xikayehe sín la ókjé sákjuí sín. Ch'ín Bernabé sákjuíko ch'án tí ch'ín Marcos la k'uixenhen sín ijnko ntabárcó sákjuí sín nonte Chipre. ⁴⁰ A ntá tí ch'ín Pablo la jehó ch'án mé kjueya ch'án tí ch'ín Silas ntá chr'éxin sákjuí sín. Tí sín kíchó ni ntiha kjuanchehe sín Dios kixin jína ts'ayakonhen sín ch'án la ntá sákjuí sín. ⁴¹ Ntá k'uátsínka sín estado Siria la ko estado Cilicia la kjuínchechéhe sín asén tí sín tinkáchónki Ìnchéni njnko ntiha.

Ch'ín Timoteo sákjuíko ch'án ch'ín Pablo la ko ch'ín Silas

16 Ntá kjuíji ch'ín Pablo chjasin Derbe la ko chjasin Listra. Ntá ntaha itjen ijnko ch'ín tinkáchónki Jesús it'in ch'án Timoteo. Jehe ch'án mé xjeen ijnko tjan judía tinkáchónki Ìnchéni. A ntá it'é ch'án mé ijnko ch'ín griego. ² Ntá tí sín kíchó ni tjejó chjasin Listra la ko chjasin Iconio mé nixja sín kixin jína tí ch'ín Timoteo. ³ A ntá ch'ín Pablo mé tjinkaon ch'án sáchrókjuiko ch'án tí ch'ín Timoteo. Ntá senó k'uetoan ch'án chrókua tí ch'ín Timoteo a tí xroye kixin tsonínkakhya tí sín judío tí chjasin sátsji sín kixin ó nohe tí sín a kixin it'é ch'ín Timoteo la mé griego. ⁴ Ntá sákjuí sín la kaín tí chjasin k'uátsínka sín la nixjehé sín tí sín kíchó ni la chrónkaxín sín tí nkehe tsík'etoan tí sín apóstol la ko tí sín t'etoan kuénte njnko chjasin Jerusalén. ⁵ Ntá tí chojni tinkáchónki Ìnchéni mé antsí má ntoá k'uéjó sín la ko jnkojnko yaon sítinkákótsjé sín.

Xrínahya titàya k'uikuèn ch'ín Pablo ijnko chojni estado Macedonia

⁶ Ntá Nchakuen Dios kjuanjonhya kjuachaxin kixin sátsjikjako sín itén Dios estado Asia ntá k'uátsínka sín nó estado Frigia la ko estado Galacia. ⁷ Ntá tió kjuíji sín estado Misia ntá kjuenkayáxin sín sáchrókjuí sín nó estado Bitinia. Ntá Nchakuen Jesús kjuanjonhya kjuachaxin kixin sátsji sín nó ntiha. ⁸ Méxra k'uátsínka sín ikjín tí estado Misia la ntá kjuíji sín chjasin Troas chrínta ntayaon. ⁹ Ntá ijnko tie xrínahya titàya k'uikuèn ch'ín Pablo ijnko ch'ín estado Macedonia kjuák'exín toté ch'án chrónòda ch'án kixin: "T'átsínka Macedonia tsjínkítsani," ichro ch'án. ¹⁰ Méxra tíha tsík'ikon ch'ín Pablo la ntá tuénxín kóyaxínhinni kixin sátsjini estado Macedonia kixin kónoexínni kixin Dios kjueyáni kixin ntiha tsjakoni tí tan jína tsaáxin chojni. [Janhan tí ch'ín Lucas ikjinni tí xroon i k'uéjókotoxinni kíchó ni ntiha.]

Ch'ín Pablo la ko ch'ín Silas, k'uéjó sín chjasin Filipos

¹¹ Ntá ntaha chjasin Troas k'uixenxínni ijnko ntabárcó ntá sákjuíni ntoí ijnko nonte ntsí tinkátaón ntá it'in Samotracia. Ntá tí yaon chr'éxin kjuíjini chjasin Neápolis. ¹² Ntá ntiha sákjuíxinni la kjuíjini chjasin Filipos. Tí chjasin a mé k'uéchónta tí sín romano ósé ntá ijnko chjasin antsí má tjetoan tí it'ò tí estado Macedonia. Ntaha mé k'uéjóni iso yaon. ¹³ Ntá tí yaon t'ok'éhe sín ntá k'uaxrjexínni tí chjasin Filipos ntá sákjuíni ijnko chrínta ntario mé ntiha kuénhen sín tsojnkotsé sín tsonixjehé sín Dios. Mé ntaha k'uéjótjaxinni la kjuankíxinni kjuakoheni iso chojni chjin tsíkójnksé ntiha. ¹⁴ Ntá ijnko tí jehe sín mé ijnko tjan it'in tjan Lidia la tsíkixin tjan chjasin Tiatira. Jehe tjan mé nchekji tjan ika náxrjón kjátse tié. Ntá jehe tjan xraxinkaon tjan Dios la jína tjetinhin tjan la Ìnchéni mé kjuínkítsa asén tjan kixin tsinhin tjan jína tí nkehe kjuako ch'ín Pablo. ¹⁵ Ntá jehe tjan la ko kaín tí sín tjejó ntøe tjan mé kuíkite sín. Ntá chrónóehé tjan tí ch'ín Pablo ntáchro tjan kixin:

—Tí chaxín tjátsøan kixin chaxín tinkáchónkini Ìnchéni la jína chrókuitøha ntøéni ntihi —ichro tjan.

Ntá kjónté kuítóheni ntiha.

¹⁶ Ntá ijnko yaon sákjuíni tí nó kuénhen sín nixjexín sín Dios ntá ó xétani ijnko tjan tjarisoá chóna nchakuen tí jínahya tónoexín tjan. Ó tsík'íná tjan la nchónhaya chichaon tjacha tí inché tjan kixin xikaha tónohe tjan. ¹⁷ A ntá tí tjan tjarisoá a kjuankíxin tjan tinkáchréhe tjan tí ch'ín Pablo la ko tí jeheni ntá t'èya tjan ntáchro tjan kixin:

—Tí sín i ch'ehe sín xra Dios nkaya nkajni la tjako sín ijnko ntja jína tsaáxin chojni.

¹⁸ Mé xikaha kjuích'e tjan itsjé yaon. Ntá kóchjinhin ch'ín Pablo la nkátjía ch'án nixjehé ch'án tí nchakuen tí jínahya chóna tí jehe tjan, ntáchro ch'án kixin:

—Kjuachaxièn ihnié Jesucristo tétuñhán kixin ts'axr-jéxian tí jehe tjan —ichro ch'án.

Ntá tuénxín ó k'uaxrjexín tí nchakuen tí jínahya tí jehe tjan.

¹⁹ Na ntá tí inché tí tjan a mé k'uíkon sín nkehe kónhen tjan la ó nohe sín kixin í tsjachahya sín chichaon kuènte tí xra ch'e tjan. Ntá kónínkaon sín ntá itsé sín tí ch'ín Pablo la ko ch'ín Silas la kuinkánkákjen sín sákjuíko sín tí tjejó tí síxreé nta sin tjejoan. ²⁰ Ntá kjuíkaán sín ntaha tí tjejó tí sín juez la ntáchro sín kixin:

—Tí sín i mé sín judío la imá sítjité sín chjasénni.

²¹ Tjako sín tí nkehe kuènhyani tsonoheni la tóxrjénhyani sich'eni kixin jeheni mé chojni romanoni.

²² Kaín tí sín ntiha kónínkakonhen sín tí jehe sín. Ntá tí sín juez mé k'ueṭoan ts'axrjehe sín iké sín ntá ts'ekonxín sín nta sé. ²³ Ntá tió kjuixin k'uékon sín nchónhya ntá chr'áxenhén tí sín a ntóechiso ntá k'ueṭuénhen sín tí ch'ín t'ayakonhen ntóechiso kixin jína chrók'uayakonhen sín tí sín a. ²⁴ Ntá tí ch'ín t'ayakonhen ntóechiso mé k'uáyéhe ch'án kjuachaxin ntá chr'áxenhén ch'án tí sín a ijnko cuarto chríka ntóechiso kixin ts'axrjehya sín. Ntá chr'áxenhén ch'án tóte sín tí nta tjejóxra la ko chica ye.

²⁵ A ntá tió k'áxrótjen la ch'ín Pablo la ko ch'ín Silas mé nixjéhe sín Dios la ko itsje sín himno kuènte Dios. La tí sín í so tjejóchjina mé tjejótinhin sín kixin xíkaha tjejóch'e sín tjejótsje sín. ²⁶ Ntá xrinahya tjan kuínki nonte la kjuínchekinkí kuenté tí xrankixín ntóechiso ntá tuénxín kaín tí ntója puerta mé xítjéhe la ko k'uánótjen tí chica cadena tsíchróntetoxín kaín tí sín tjejóchjina. ²⁷ Ntá tí ch'ín t'ayakonhen ntóechiso mé k'uàya ch'án. Ntá k'uíkon ch'án kixin síxítjéhe tí ntója puerta ntóechiso a. Ntá kuakitsje ch'án chica espada ntá chrók'óyan ch'án asén ch'án kixin kjuenkayáxin ch'án kixin ó kjuixin tsíkinká kaín tí sín síchjina, ichro ch'án. ²⁸ Ntá ch'ín Pablo k'uèya ch'án itsen ntáchro ch'án kixin:

—Náhí kohya nkehe ch'ehé asán kixin kaín ni naxa tjejóni ntihyó —ichro ch'án.

²⁹ Ntá tí ch'ín t'ayakonhen ntóechiso kjuanchia kixin ts'ákjen xrohi ntá k'uixenhen ch'án kuínká ch'án la síxránka ch'án chrakon ch'án ntá kjuítsínka ch'án tóte tí ch'ín Pablo la ko tí ch'ín Silas. ³⁰ Ntá tuénxín kuakitsjexín ch'án sín ntiha ntá kjuanchankíhi ch'án sín kixin:

—¿Nkexrí chrókjuít'a kixin chrókuaána? —ichro ch'án.

³¹ Ntá kjuátehe sin ntáchro sín kixin:

—Títekáván Ìnchéni Jesucristo la tsaá jaha la ko tí sín tjejó ntója.

³² Ntá kjuakóhe sín tí jehe ch'án a la ko kaín tí sín tjejó ntóje ch'án ti tan kuènte Ìnchéni. ³³ Na kjónté sítie la tí hora a sákjuíko ch'án sín kjuínchek'íjma ch'án tí tsíchrít'o sín. Ntá tuénxín jehe ch'án la ko kaín sín sín tjejó ntóje ch'án mé kuíkite sín. ³⁴ Na ntá chr'éxin tí jehe ch'án sákjuíko sín ntóje ch'án. Ntá ntiha kjuanjón ch'án nkehe sine sín. Imá chéhe ch'án la ko kaín tí sín ntóje ch'án kixin ó kuítekaon sín Dios.

³⁵ Ntá kóyáon nchítjen ntá tí sín juez k'ueṭuénhen sín tí sín policía sátsjitsjehe sín tí ch'ín t'ayakonhen

ntóechiso kixin chrókjuanjón ch'án kjuachaxin ts'axrje ch'ín Pablo la ko ch'ín Silas. ³⁶ Ntá tí ch'ín t'ayakonhen ntóechiso mé chénka ch'án tí ch'ín Pablo tí nkehe chrónka sín ntáchro ch'án kixin:

—Tí sín juez a mé tsík'etóan sín kixin tsjánjuan kjuachaxin kixin sátsjirá. Méxra sátsjirá kjuaxróxin —mé xíkaha ichro tí ch'ín a.

³⁷ Ntá ch'ín Pablo ntáche ch'án tí sín policía kixin:

—A ntá jeheni kjónté chojni romanoni mé kjuateni sín nkayakon nchónhya chojni. Jehya kixin chrókjuanchia sín nke jie chóntani. Náhí. Kjónté la chr'áxenhenni sín ntóechiso. A ntá ijie la zá imó chrókuaakitsjeni sín ní? Náhí. Tsjijia tí jehe sín tsakitsjeni sín —ichro ch'án.

³⁸ Ntá tí sín policía mé sákjuíchénka sín tí sín juez nkehe ntáchro tí sín tjejóchjina. Ntá imá chrakon sín kixin kuínhin sín kixin tí sín a mé chojni romano. ³⁹ A ntá sákjuí tí sín juez ntá chrónòhehe sín tí ch'ín Pablo la ko ch'ín Silas kixin tsonínkakonhya sín kixin xíkaha kónhen sín ntá k'uaxrjexín sín ntiha ntá chrónòla tí sín a sátxixin sín tí chjasin ntiha. ⁴⁰ Ntá ch'ín Pablo la ko ch'ín Silas tió k'uaxrjexín sín tí ntóechiso ntá kjuíji sín ntóje tí tjan Lidia. Ntá tió kjuixin sákjuítsjehe sín tí sín kichó ni la kjuínchechéhe sín ntá sákjuíxin sín ntiha.

Kónínkaon tí chojni chjasin Tesalónica

17 Ntá ch'ín Pablo la ko ch'ín Silas la k'uátsínka sín chjasin Anfípolis la ko chjasin Apolonia ntá kjuíji sín chjasin Tesalónica. Ntaha itjen ijnko nínko judío. ² A ntá ch'ín Pablo sákjuí ch'an nínko éxi kuènhén ch'án la jnkojnko yaon t'ok'éhe sín chjina iní semana ikjo ch'án tí jehe sín la chrónkaxín ch'án nkexrí ntáchro xroon itén Dios. ³ Kjuako ch'án kixin tí nkexro Cristo mé t'ichjánxin its'en la ko chr'éxin tsoxechón ch'án inaá. Ntáchro ch'án kixin:

—Tí ch'ín Jesús a mé jeheni chrónkaxínni kixin tsínhínrá jahará mé Cristo tíha.

⁴ A ntá iso tí sín judío kuítekaon sín ntá k'uító sín tí ch'ín Pablo la ko tí ch'ín Silas. Ntá kjaxin kuítekaon itsjé tí sín griego xraxinkaon Dios a la ko kjaxin nchónhya chojni chjin tjejoan kuítekaon. ⁵ A ntá iso tí sín judío tinkáchónkihya Ìnchéni mé imá kóchjio sín ntá kójnkotséko sín iso chojni jínahya ch'e, ch'ehya sín xra, ixri ntja. Ntá kaín sín k'uixité sín la kjuínchexakonhen sín tí sín síin chjasén sín. Ntá itsjé sín k'uixenhen sín ntóje ijnko ch'ín it'in Jasón kjuéyá sín ch'ín Pablo la ko ch'ín Silas kixin tjinkaon sín sáchrókjuíkohe sín tí sín a tí sín t'etóan. ⁶ A ntá k'uitjahya sín tí sín a ntá kjónté itsé sín tí ch'ín Jasón la ko í so tí sín tinkáchónki Ìnchéni ntá kuinkánkákjen sín sákjuíko sín tí síin tí síxreé tí chjasin ntiha. Ntaha nínkaon sín k'uèya sín ntáchro sín kixin:

—Tí sín i mé kjuínchexakonhen chojni kuenté chjasintajni. La ntá ó kjuí sín chjasénni ntihi kjaxin. ⁷ La ntá tí ch'ín Jasón a mé kjuanjón ch'án kjuachaxin kixin tí sín a mé ts'ejó sín ntóje ch'án. Kaín sín titekakonhya sín tí ley kuènte tí ch'ín romano t'etóan. Ntáchro sín

kíxin itjen í jnko nkexro antsí má t'etōan, ntá tíha mé Jesús —ichro sín.

⁸ Ntá tió kuínhin kaín tí sín tsíkójnkotsé la ko tí síxreé ntá k'uúixité sín kónínkaon sín. ⁹ Ntá ch'ín Jasón la ko tí sín tjejóko ch'án kjuenka sín ntá tí síxreé kuítōhe sákjuí sín.

Ch'ín Pablo la ko ch'ín Silas sákjuí sín chjasin Berea

¹⁰ Ntá tuénxín tí tie a tí sín kíchó ni mé ichr'án sín ch'ín Pablo la ko ch'ín Silas kíxin sátsji sín chjasin Berea. Ntá tió kjuíji sín ntaha k'uúixenhen sín tí n̄jnkōé tí sín judío. ¹¹ A ntá tí sín judío ntiha la antsí má jína asén sín, ntá tí sín chjasin Tesalónica la náhi. Antsí má kóxrjính̄in sín tsinhin sín tí itén Dios la jnkojnko yaon kjuínchekuáxin sín tí xroon chóna itén Dios kíxin tsgnohe sín á chaxín ntoá xíkaha tí ntáchro tí sín a. ¹² Méxra nchónhya tí jehe sín kuítekaon sín la ko k̄j̄axin nchónhya tí chojni chjin griego tjetōan mé kuítekaon la ko k̄j̄axin tí chojni ntoá. ¹³ A ntá tí sín judío chjasin Tesalónica kónohe sín kíxin ch'ín Pablo mé kjuakox̄in itén Dios chjasin Berea inaá. Ntá sákjuí sín ntiha a ntá kjuínchekóninkaon tí sín a. ¹⁴ A ntá tí sín kíchó ni tinkáchónki Ìnchéni ichr'án sín tí ch'ín Pablo sátsji nó chrínta ntayaon. A ntá ch'ín Silas la ko ch'ín Timoteo naxa kuítōhe sín tí chjasin Berea. ¹⁵ Ntá iso tí sín ntiha sákjuíko sín tí ch'ín Pablo la kjuíji sín tí chjasin Atenas. Ntá kjan sín chjasén sín kíxin k'uētōan ch'ín Pablo kíxin tsochrónka sín kíxin tjoka chrókóxakonhen tí ch'ín Silas la ko tí ch'ín Timoteo tsijji sín ntiha tsoxéta sín ch'án.

Ch'ín Pablo itjen chjasin Atenas

¹⁶ Ntá nachrohe kjuák'echónhen ch'ín Pablo kíxin itsji tí ch'ín Silas la ko tí ch'ín Timoteo chjasin Atenas ntá imá k'uává asén ch'án kíxin k'uúikon ch'án kíxin tí chjasin ntiha síin nchónhya tí nkehe tsíkjanoya. ¹⁷ Ntá tí n̄jnko ntiha kjuakōhe ch'án iso sín judío la ko iso tí chojni xraxinkaon Dios. La kaín yaon ntasin kjuák'e ch'án kjuakōx̄in ch'án tí chojni síin ntiha. ¹⁸ La iso tí sín kjuínchekuáxin tí xroon kuènte tí chojni it'in epicúreo la ko iso tí sín kjuínchekuáxin tí xroon kuènte tí chojni it'in estoico kjuankíxin nixjeh̄e sín tí ch'ín Pablo. Iso sín ntáchro sín kíxin:

—¿Nkekuènté kíxin ánta tjenixja tí nkexro a?

La í so sín ntáchro sín kíxin:

—Méxra tjenixja ch'án kuènte í jnko dios.

Mé xíkaha ichro sín kíxin kjuako ch'ín Pablo tí tán jína kuènte Jesús la ko kjuako ch'án kíxin Jesús kjónté k'uén ntá xechón. ¹⁹ Ntá sákjuíko sín ch'ín Pablo ijnko tjo it'in Areópago. Ntiha mé kuènenhen sín tójnkotsé sín kíxin tjenkayáxixin sín. Ntá nixjeh̄e sín tí ch'ín Pablo, ntáchro sín kíxin:

—Tjinkaonni tsochrónka tí nkehe n̄jxin kjuíkoa. ²⁰ It-sjé tí nkehe ókjé tjetjákua la tjinkaonni tsgnoheni nkehe t'axrjéxín kaín tíha —ichro sín.

²¹ Ntá kaín tí sín chjasin Atenas la ko tí sín tsíkjin̄in ókjé tjejó ntiha mé tóxrj̄enhya sín í jnko xra, jehí tóxr-

jính̄in sín chrókuinhin sín la ko chrónixja sín ijnko nkehe n̄jxin.

²² Ntá ch'ín Pablo k'uúinkatjen ch'án kjuák'exín toté ch'án tí síin tí jehe sín chrítaón tí Tjo Areópago. Ntá ntáchro ch'án kíxin:

—Jahará tjejórá chjasin Atenas tinhínra. Janhan ó k'uúikuān kíxin jahará la itsjé dios tinkachónkirá. ²³ Ntá tí kjuak'é ntiha k'uájia la k'uúikuān itsjé tí nketí tjásixín-rá culto ntá k'uitja ijnko altar ts'ínixin kíxin: “Ntihi xraxinkakonxínni ijnko Dios naxa chónhyani”. Méxra tí Dios xraxinkáonrá kjónté naxa chonhyará mé tí Dios a mé tjákoahará.

²⁴ Tí Dios mé kjuích'éna ch'án chjasintajni la ko kaín nkehe síin chjasintajni. Jehe ch'án mé ìnché nkajní la ko chjasintajni. La t̄j̄exenhya ch'án ijnko n̄jnko tsíkjin̄'énaxín chojni tja. ²⁵ La t'ichj̄ánx̄ienhya ch'án kíxin chojni chrókjuink̄itsa tí jehe ch'án kíxin jehe ch'án mé chjéhe kjuachón kaín chojni la ko tjanjon ch'án xr̄itō la ko kaín nkehe síin.

²⁶ Kaín tí nación k'uaxrjenixin jnkoqóá chojni kíxin chrók'uejó sín nkuixín chjasintajni. K̄j̄axin chrónka Dios nkesá la ko nketí ts'ejó chojni. ²⁷ Méxra jeheni t'ichj̄ánx̄in tsjeyáni Dios kíxin ntá tsiénxínni nkexrí ts'it-jani ch'án. Jehya imá ikj̄in itjen ch'án, chjino tí tjejóni itjen ch'án. ²⁸ Jehe ch'án tjejóchónxínni ch'án la ko nchekinkíni ch'án la jehe ch'án t'ayakonhenni ch'án. Mé xíkaha tsíntáchro jnko ch'ín chjasánra ósé kíxin: “Jeheni mé naxa kjéhya Dios.” ²⁹ Jeheni mé naxa kjéhyani Dios méxra xitjahya tsjenkayáxinnin kíxin sich'énani Dios chica oro o chica plata o xro kíxin éxí tsíkjenkayáxin chojni kíxin sich'éna sín dios kuènte sín. ³⁰ Senó Dios kónínkakonhya ch'án kíxin ó nohe ch'án kíxin naxa chónhya sín ch'án. Ntá ijie t'etūenhen Dios kaín xín chojni síin chjasintajni tsokjan sín la tsinkáchónki sín tí jehe ch'án. ³¹ Dios tsíkjejá ijnko yaon sinchekitōx̄in ijje chojni chjasintajni. Tsíkjejá ch'án ijnko chojni la kjuakox̄in kaín kjuachaxin kíxin tí nkexro kjónté tsík'en la xechón inaá —ichro ch'ín Pablo.

³² Na ntá tió kuínhin sín kíxin nkexrí tsoxechón chojni tsík'en ntá iso sín kjuanoá sín ch'án. Ntá í so sín ntáchro sín kíxin:

—Chr'éx̄in tsinhinni inaá tí nkehe ntáchrúa —ichro sín.

³³ Ntá ch'ín Pablo kuítōhe ch'án tí jehe sín. ³⁴ Na ntá iso sín kjuíchréh̄e sín ch'ín Pablo la kjuankíxin tinkáchónki sín Ìnchéni. Ijnko tí sín tinkáchónki a mé it'in ch'án Dionisio mé ijnko tí síxreé kjuínchekitōx̄in ijje chojni chrítaón tí Tjo Areópago la ko ijnko tjan tinkáchónki tjan mé it'in tjan Dámaris la ko í so sín k̄j̄axin kjuankíxin sín tinkáchónki sín Ìnchéni.

Sákjuí ch'ín Pablo chjasin Corinto

18 Ntá kjuixin tíha ntá ch'ín Pablo sákjuíxin ch'án chjasin Atenas la sákjuí ch'án chjasin Corinto.

² Ntiha mé xéta ch'án ijnko ch'ín judío it'in Aquila. Jehe ch'án mé tsíkjin̄in ch'án estado Ponto la séhya jehe ch'án la ko ichj̄iēn ch'án Priscila mé kjuix̄in sín nación

Italia kixin t'ichjánxìn ts'axrjexín sìn ntiha kixin tí ch'ín t'etōan mé it'in Claudio k'uetōan ch'án kixin kaín tí sìn judío mé ts'axrjexín sìn tí chjasin Roma. Ntá ch'ín Pablo mé kjuínixjehē ch'án sìn. ³Jnkokón xrā ch'e sìn la ko jehe ch'án, ch'éna sìn kamantá t'óna nchia. Méxrā ntá ntahó kuítōeko kichó sìn kixin jnkokōá sich'e sìn tí xrā a. ⁴Ntá jnkojnko tí yaon t'ok'éhe sìn sákjuí ch'ín Pablo tí nínko nixjehē ch'án tí sìn judío la ko tí sìn jehya judío kixin tjinkaon ch'án kixin kaín tí chojni chrókuitekaon sìn.

⁵Ntá tió ch'ín Silas la ko ch'ín Timoteo kjuixìn sìn estado Macedonia ntá ch'ín Pablo kjuák'e xrā ó kjuako ch'án itén Dios kixin tsonohē tí sìn judío kixin Jesús mé tí nkexro Cristo. ⁶Ntá tí sìn judío mé kjuankixin kóninkakonhen sìn tí ch'ín Pablo la imá k'uántaxínhìn sìn ch'án. Ntá jehe ch'án k'ótsjènka ch'án iké ch'án kixin kjuakōxìn ch'án kixin xikaha tsjasóte sìn. Ntá ntáchro ch'án kixin:

—A ntá ijie la jahará kjuéyará tí jje ts'itjáyanxínrá. A ntá janhan la í chontahya jje kixin ó kjuáqohará tí tán jína, a ntá kuítékákonhyará. A ntá ijie la íchá jína sátsjia tsjáqohá tí sìn jehya judío —ichro ch'án.

⁷Ntá k'uaxrjexín ch'án nínko ntá sákjuí ch'án ntōe ijnko chojni mé it'in Justo mé jehe ch'án xraxinkaon ch'án Dios. Ntōe ch'án mé chjinaxón nínko. ⁸Ntá ch'ín Crispo, ijnko nkexro t'etōan kuènte nínko, la ko kaín tí sìn tjejó ntōe ch'án, mé kjuankixin sìn kuítekaon sìn Ìnchéni. Kjaxin itsjé tí sìn tjejó chjasin Corinto mé kuínhin sìn tí tan la ntá kjuankixin sìn kuítekaon sìn Ìnchéni la kuíkite sìn. ⁹Ntá ijnko tie titàya k'uíkuèn ch'ín Pablo Ìnchéni nixjehē ch'án ntáchro kixin:

—Chrakonhya tjákua itan kuèntana. Tjōehya tsochronka ¹⁰kixin janhan tjejóko kichó ni kixin ninkexró kohya nkehe sit'aha. Kixin janhan la chonta itsjé chojni tí chjasin ntihi tinkáchónki tí janhan.

¹¹Méxrā ch'ín Pablo mé kuítōhe ch'án ijnko nánó ko t'ō ntiha chjasin Corinto, kjuakōhē ch'án sìn itén Dios.

¹²A ntá tí yaon k'uetōan ch'ín Galión estado Acaya, ntá itsjé tí sìn judío kóninkakonhen sìn tí ch'ín Pablo. Ntá itsé sìn ch'án sákjuíko sìn ch'án tí tjejó tí sìn t'etōan. ¹³A ntá ntáche sìn tí ch'ín t'etōan kixin:

—A ntá tí nkexro i ixri ch'án tjachroe ch'án chojni kixin ókjé nkexrí chrókuinkáchónki sìn Dios la ko tsitekakonhya sìn tí nkehe t'etōan tí ley.

¹⁴Na ntá tjinkaon ch'ín Pablo chrónixja, ntá ch'ín Galión ntáche ch'án tí sìn judío kixin:

—Tí chaxín ijnko jje jíe kjuasin tí ch'ín i ntá kjónté chrókuínhan tí nkehe ntáchrorá jahará judíorá. ¹⁵A ntá jehí tjanjonxinrá tí nkehe nixjará la ko ihnjé chojni la ko tí ley tinkachónkirá. Méxrā jahórá chrókjuíncheki-tōexínrá tíha kixin janhan tjínkakonhya ts'óna juez sijn-takitōaxian kuènte tí nkehe a —ichro ch'án.

¹⁶Ntá k'uetōan ch'án kixin sátsjixín sìn ntiha. ¹⁷Ntá tí sìn griego la kónínkaon sìn la itsé sìn tí ch'ín Sóstenes tí ch'ín t'etōan kuènte tí nínko judío, la ntahó kjuatexín sìn ch'án. Jehe ch'ín Galión a la mé kjónté k'uíkon ch'án la ántosén ch'án.

Ch'ín Pablo xíkjan ch'án chjasin Antioquía ntá sákjuí ch'án nixin viaje

¹⁸A ntá ch'ín Pablo kuítōhe ch'án chjasin Corinto itsjé yaon ntá nixjehē ch'án tí sìn kichó ni ntiha ntá k'uixenhen ch'án ntabárcō sákjuí ch'án nó estado Siria a sákjuíko ch'án tjan Priscila la ko ch'ín Aquila. Ntá kjuíji sìn chjasin Cencrea la ntá naxā k'uixenhya ch'án ntabárcō inaá la ikjín ch'án mòlōé kixin xikaha kjuakōxìn ch'án kixin kjuínchexiteyá ch'án tí nkehe chrónka ch'án. ¹⁹Ntá tió kjuíji sìn tí chjasin Éfeso ntá kuítōhe ch'ín Pablo tí tjan Priscila a la ko tí ch'ín Aquila. Ntá sákjuí ch'án ijnko nínko la ikjo ch'án tí sìn judío tsíkójnkotsé ntiha. ²⁰Ntá jehe sìn chrónòda sìn kixin chrókuitōhe ch'án isé ntiha, kjánchó jehe ch'án la chrohya ch'án. ²¹Ntá tuénxín nixjehē ch'án sìn ntáchro ch'án kixin:

—T'ichjánxìn tsjak'é chjasin Jerusalén tí yaon kia itsi. Kjánchó tsokjan inaá tsotsjahā tí jahará tí naxā tjinkaon Dios —ichro ch'án.

Ntá kuítōhe ch'án sìn ntá k'uixenhen ch'án ntabárcō sákjuíxin ch'án chjasin Éfeso. ²²Ntá tió kjuíji ch'án chjasin Cesarea ntá sákjuí ch'án chjasin Jerusalén na ntá sákjuínixjehē ch'án tí sìn tinkáchónki Ìnchéni ntiha. Ntá tuénxín xíkjan ch'án chjasin Antioquía. ²³Ntá kuítōhe ch'án ntiha itsjé yaon ntá xíkji ch'án inaá ntá xík'atsinka ch'án itsjé chjasin estado Galacia la ko estado Frigia la kjuínchechēhē ch'án kaín tí sìn tinkáchónki Ìnchéni.

Ch'ín Apolos kjuako ch'án chjasin Éfeso

²⁴Ntá tí yaon a mé ijnko ch'ín judío it'in Apolos ikui chjasin Éfeso mé tsíkjixìn ch'án chjasin Alejandría. Jehe ch'án mé ijnko nkexro antsí nohe chrónka kixin chóxin ch'án xroon itén Dios. ²⁵Jehe ch'án ó xrakōhē ch'án ntje Ìnchéni ntá imá tóxrjínhìn ch'án nixja ch'án la ko tsjako jína kuènte ch'ín Jesús. Kjánchó jehó nohe ch'án nkexrí kuíkite chojni ch'ín Juan. ²⁶A ntá ch'ín Apolos kjuák'e ch'án kjuako ch'án tí nínko la chrakonhya ch'án. Ntá tió kuínhin tí tjan Priscila la ko tí ch'ín Aquila tí kjuako ch'án ntá k'uaxrjentako sìn ch'án la kjuakōhē sìn ch'án tí nkehe naxā noehya ch'án kuènte ntje Dios. ²⁷Ntá tjinkaon ch'ín Apolos sátsji ch'án estado Acaya. Ntá tí sìn kichó ni kjuínkítsa sìn ch'án la ikjín sìn ijnko xroon chr'énhen sìn tí sìn tinkáchónki Ìnchéni tjejó ntiha kixin jína tsjanjon sìn kjuachaxin tsjak'e ch'án. Ntá tió kjuíji ch'án estado Acaya ntá kjuínkítsa ch'án kjuakōhē ch'án tí sìn tsíkjinkítsa Dios tsíkitekaon sìn ch'án. ²⁸Ntá kjuakōexín ch'án kaín chojni kixin ntoáhya ch'e tí sìn judío, la xitjahya tsontáchro sìn náhi. Kjuakōhē ch'án sìn kixin tí xroon itén Dios chrónka kixin Jesús mé tí nkexro Cristo.

Kjuák'e ch'ín Pablo chjasin Éfeso

¹⁹ Ntá naxā itjen ch'ín Apolos tí chjasin Corinto ntá ch'ín Pablo k'uatsínka ch'án nchónhya chjasin chrík'á jnā la ntá kjuíji ch'án chjasin Éfeso la ntaha xéta

ch'an nchónhya chojni tinkáchónki ntje Dios. ² Ntá kjuanchankíhi ch'an sín kixin:

—¿Á k'uayéhérá Nchakuen Dios tió kuinkachónkirá Ìnchéni? —ichro ch'an.

Ntá kjuátehe sín kixin:

—Náhi, kíenhyani á tjen Nchakuen Dios —ichro sín.

³ Ntá kjuanchankí ch'in Pablo kixin:

—¿Nkexro kjuachaxiën kuíkitiará? —ichro ch'an.

Ntá kjuátehe sín kixin:

—Éxí kjuako ch'in Juan kuíkíteni —ichro sín.

⁴ Ntá ntáchro ch'in Pablo kixin:

—Ch'in Juan mé kuíkíte ch'an chojni kixin chrókjan sín chrókuinkáchónki sín Dios la ko kjuako ch'an kixin chrókuitekaon sín tí nkexro itsi chr'èxin. Tíha mé Jesús, tí Cristo —ichro ch'an.

⁵ Ntá kuínhin sín xikaha ntá kuíkíte sín kjuachaxiën ihnié Ìnchéni Jesús. ⁶ A ntá ch'in Pablo kjuák'etja itja ch'an chritaón ikja sín ntá ikui Nchakuen Dios k'uayéhe sín ntá kjuankixin sín nixja sín itsjé nkiva ókjé la ko kjuankixin sín kjuako sín tí nkehe kjuanjon Dios. ⁷ Kaín tí sín ntoa tinkáchónki mé chjina teyó sín.

⁸ A ntá chjina iní nitjó, la ch'in Pablo k'uékji ch'an njnko la kjuako ch'an kaín asén ch'an. Nixjehé ch'an chojni la chrónka ch'an nkexrí tjen tí kjuachaxin kuènte Dios. ⁹ A ntá iso sín la kjónté la imá icha asén sín tjinkakonhya sín tsinkáchónki Ìnchéni. Ntá imá t'ántaxínhin sín tí tan jína kuènte Ìnchéni nkayakon chojni. Ntá tí ch'in Pablo k'uaxrjentako ch'an tí sín tinkáchónki Ìnchéni ntá ijnko escuela it'in Tiranno ntaha kjuakoxin ch'an kaín yaon. ¹⁰ Mé xikaha kjuák'e ch'an kjuako ch'an iyó nánó, ntá kaín tí sín k'uéjé ntiha estado Asia mé kuínhin sín itén Ìnchéni Jesús, mé tí sín judío la ko kjaxin tí sín jehya judío. ¹¹ Ntá Dios antsi má kjuakoxin kjuaxroan jíe kixin tí nixja ch'in Pablo. ¹² Ntá itsjé chojni kjuikao sín pañitogé sín la ko iké sín kuákóxin ch'in Pablo ntá sákjuiko sín kjuínchekakóxin sín tí sín níhi ntá kuitoghe sín jína la ko kjaxin nchakuen tí jínahya k'uaxrjexín tí jehé sín.

¹³ A ntá iso tí sín judío ixri sín ntáchro sín tónohe sín tsakitsje sín nchakuen tí jínahya ch'iyehé sín chojni mé tjinkaon sín tí kjuachaxiën ihnié Jesús. La ntá ntáche sín tí nchakuen tí jínahya kixin:

—Kjuachaxiën ihnié tí Jesús tjako tí ch'in Pablo t'e-togaxínni kixin jaha nchakuen jínahya sátjixian ntihi —ichro sín.

¹⁴ Mé xikaha k'uékjich'e tí yato xjeen ijnko ch'in judío it'in Esceva mé ijnko nchat'á t'etog. ¹⁵ Ntá ijnko yaon nixjehé sín nchakuen tí jínahya. Ntá tí nchakuen tí jínahya kjuátehe ntáchro kixin:

—Chóxinni nkexro ch'in Jesús la ko ó noheni nkexro ch'in Pablo. A ntá jahará, ¿la nkexro tí jahará? —ichro tí nchakuen tí jínahya.

¹⁶ Ntá tí ch'in chónka tí nchakuen tí jínahya kjaminkitaón ch'an tí jehé sín a la ntá imá tsehé ch'an kjuacha ch'an kjuíncheníhi ch'an kaín sín la imá kjoté sín. Ntá k'uaxrjexín sín ntogé sín tjóchin sín la ko síchrít'o cuérpogé sín. ¹⁷ Ntá kaín tí sín judío la ko tí sín jehya judío tjejó chjasin Éfeso mé kuínhin sín tí nkehe tsikónhen la

imá chrakon sín. Imá jíe tí kjuachaxin ihnié Ìnchéni Jesús, ichro sín.

¹⁸ Kjaxin itsjé tí sín tinkáchónki Ìnchéni mé kjuíchrónka sín kixin tí ósé k'uékjich'e sín nchónhya nkehe jínahya. ¹⁹ Itsjé tí sín k'uékjich'e nkehe jínahya k'uékjinchexroan sín la kuikao sín libro k'uékjich'exín sín xrá ntá kjuaka sín tí libro a la k'uíkon nchónhya chojni. Ntá kuákjaxin sín cuenta nkekjaín k'uíte tí libro a ntá kónohe sín cincuenta mil peso k'uíte tí libro a kjuaka sín. ²⁰ Ntá tí itén Ìnchéni síntikák'ánkí la tjakoxin kixin chaxin chónka kjuachaxin.

²¹ Ntá kjuixin tíha ntá ch'in Pablo mé kjuenkayáxin ch'an chrókjuitsjehe ch'an tí sín nó Macedonia la ko Acaya ntá ntaha sáchrókjuixin ch'an chjasin Jerusalén. Ntá kjaxin ntáchro ch'an kixin tsjixin sátsji ch'an chjasin Jerusalén ntá kjaxin t'ichjánxin sátsji ch'an chjasin Roma. ²² Ntá ichr'an ch'an iyó tí sín tjinkitsa ch'an sátsji sín estado Macedonia, mé ch'in Timoteo la ko ch'in Erasto, ntá nachrohe jehé ch'an naxa kuitoghe ch'an estado Asia iso yaon.

Kóninkaon k'uixité chojni chjasin Éfeso

²³ Ntá itsjé chojni chjasin Éfeso kóninkaon sín la k'uixité sín kixin kóxrjénhya sín tí itén Ìnchéni. ²⁴ Kixin ntiha mé itjen ijnko ch'in it'in ch'an Demetrio. Kjuích'éna ch'an nkehe chica plata tsjehe éxí njnko kuènte tí dios Diana la nchónhya chichaon kjuacha ch'an la ko tí sín kjuích'eko ch'an xrá. ²⁵ Ntá kójnokotséko sín í so sín jnkokón tí xrá ch'e sín. Ntá ntáchro ch'an kixin:

—Jahará nohará kixin tí xrá ch'eni la tjachani jína la náxrjón tjejóni. ²⁶ Kjánchó ó k'uíkonrá la ko ó kuínhinrá tí nkehe xritjako ch'in Pablo. Tjako ch'an kixin tí nkehe tsíkjangya mé jehya Dios. Kjánchó jehya chjasin Éfeso ó. Náhi, nkuíxín estado Asia kuítekaon chojni. ²⁷ Imá tóxakonhenni kixin tí xrá ch'eni ts'itjáyan la kjaxin tóxakonhenni tsontáchro sín kixin chónkó tí njnkogé tí dios Diana imá jíe la ko ts'itjáyan tí kjuachaxin kuènte tjan. Ntá í tsitekakonhya sín tí kjuachaxin kuènte tjan nkuíxín estado Asia la ko kuenté chjasintajni —ichro ch'in Demetrio.

²⁸ Ntá tí kuínhin sín xikaha la imá kóninkaon sín ntá k'uèya sín ntáchro sín kixin:

—Ts'itjáyanhya tí dios Diana kuènte sín Éfeso.

²⁹ Ntá imá tóxakonhen tí sín chjasin Éfeso la í noehya sín nkehe chrókjuich'e sín kixin kóninkakonhen sín tí ch'in Gayo la ko tí ch'in Aristarco mé iyó sín tsíkjjxin sín Macedonia. Ntá kuinkánkákjen sín kuikao sín tí nchia jíe tójnokotséxin sín xráxin. ³⁰ Ntá ch'in Pablo tjinkaon ch'an chrók'uixenhen ch'an tí nchia kixin tsonixjehé ch'an sín, a ntá tí sín tinkáchónki Ìnchéni mé chrohya sín kixin ts'ixenhen ch'an tí nchia a. ³¹ Kjaxin iso tí síxreé kuènte tí estado Asia mé chóxin sín ch'in Pablo, ntá k'uètogan sín kixin tsochenka chojni tí ch'in Pablo kixin chrókjuiatéhya ch'an tí sín sín ntiha. ³² A ntá iso tí sín tsíkójnokotsé ntáchro sín ijnko nkehe, la í so sín ntáchro sín ókjé nkehe kixin níntaon sín. La itsjé sín la í noehya sín nkehe xrá tsíkójnokotséxin sín kixin níntaon sín. ³³ La iso sín judío chénka sín ijnko ch'in

it'in Alejandro nkerí xr̄a kjuix̄in sín kixin tsonixja ch'án. Ntá kjuák'e ch'án jnkosiné ntá kjuakox̄in ch'án itja ch'án kixin tsotání sín ntá tsonixj̄ax̄in ch'án tí sín judío tsinhin kaín chojni. ³⁴ Ntá tió kjuátsoan tí sín tsíkójnkotsé kixin k̄j̄ax̄in tí ch'ín a mé judío ch'án ntá kaín sín k'óyako sín chjina iyó hora ntáchro sín kixin:

—Ts'itjáyanyha tí dios Diana kuènte tí sín chjasin Éfeso —ichro sín.

³⁵ Ntá tí ch'ín secretario kuènte tí chjasin ntiha mé k'uet̄oan ch'án tsotání sín. Ntá ntáchro ch'án kixin:

—Chojni chjasén Éfeso tinhínrá. Kuenté chjasintajni nohe sín kixin tí sín chjasin ntihi mé t'ayakonhen sín tí n̄nko kuènte tí dios Diana. Tí retrato kuènte tjan mé tsíkix̄in nkaya nkajní. ³⁶ Kohya nkexro tsontáchro kixin chaxínhya tíha. Méxr̄a tánirá. Tjenkayáxinrá jína nkehe chrókjuich'erá. ³⁷ Jahará kjuikoará tí sín a ntihi la k̄jánchó k'uántaxiñhya sín tí n̄nkoeni la ko k'uántaxiñhya sín tí tjan santo kuénténi. ³⁸ Méxr̄a ch'ín Demetrio la ko tí sín ch'eko ch'án xr̄a la tí tjanchia sín jiē jnkójn nkexro la síin juez sinchekit̄oex̄in. Méxr̄a tsochrónka sín tí tjan juez kixin jnkójnko sín la chrókuit̄oex̄in tí jiē chóna sín. ³⁹ Ntá tí síin ijnko nkehe tsjanchará ntá t'ichjánxin tsojnkotsérá la ntoá chrókuit̄oex̄in. ⁴⁰ Tóxakonnheni kixin k̄j̄á tí sín t'et̄oan ts'ekani sín jiē kixin jehya jína k'uixiténí kónínkaonni. Noehyani nkehe tsjateheni kixin tí tsjanchankí sín nkekuènte k'uixiténí, tsixro sín.

⁴¹ La ntá k'uet̄oan ch'án kixin sátsji sín kixin ó kjuix̄in tí kójnkotsé sín.

Sátsji ch'ín Pablo estado Macedonia la ko estado Grecia

20 Ntá ti kjuix̄in k'uixité sín, a ntá ch'ín Pablo k'uíyeh̄e kaín tí sín tinkáchónki Ìnchéni ntiha ntá kjuako ch'án iso kjuaxrexinkaon jína, ntá nixjeh̄e kichó sín ntá sáxíkji ch'án nó estado Macedonia. ² Ntá nkuix̄in k'uatsínka ch'án la kjuíncheh̄eh̄e ch'án tí sín tinkáchónki Ìnchéni kixin tí nkehe nixja ch'án. Ntá chr'éxin kjuíji ch'án estado Grecia. ³ Ntiha kuít̄ohe ch'án iní nitjó ntá chrók'uixenhen ch'án ijnko ntabárco ntá sáchrókjuí ch'án estado Siria. Ntá kónohe ch'án kixin iso sín judío nínkakonnhen sín tí jehe ch'án a ntá kjuenkayáxin ch'án tsokjanxin ch'án toté ch'án inaá ts'atsínka ch'án Macedonia. ⁴ Ntá tí sín sákjuíko ch'ín Pablo mé tí ch'ín Sópater mé jehe ch'án tsíkij̄xin ch'án chjasin Berea, la ko k̄j̄ax̄in ch'ín Aristarco, la ko ch'ín Segundo. Jehe sín mé tsíkij̄xin sín chjasin Tesalónica, la ko ch'ín Gayo tsíkij̄xin ch'án chjasin Derbe, la ko k̄j̄ax̄in sákjuíko ch'án ch'ín Timoteo, la ko ch'ín Tíquico, la ko ch'ín Trófimo, mé tsíkij̄xin sín estado Asia. ⁵ Ntá tí sín kichó ni a mé kuítónxin sín ntja ntá tjejóchónhen sín tí jeheni chjasin Troas. ⁶ Kjuix̄in k'uátsínka tí kia tió kjóne sín niotj̄a chónthaha tí xroan t'ánkixin niotj̄a, ntá k'uixenheni ijnko ntabárco k'uaxrjex̄inni Filipos ntá k'uátsínka in'ó yaon ntá kjuíjini chjasin Troas ntá ntiha xétani tí sín kuítónxin sín ntja. A ntá ntiha kuít̄oheni yato yaon.

Ch'ín Pablo sákjuí chjasin Troas

⁷ Ntá tí yaon xrankix̄in semana ntá kójnkotséni kixin tsochrít'ò niotj̄a tsoxraxinkakonx̄inni Ìnchéni. Ntá ch'ín Pablo nixjeh̄e ch'án kaín tí sín tinkáchónki Ìnchéni la tjinkaon ch'án sátsjixin ch'án ntiha tí yaon chr'éxin, ntá āntsí má sé tí nkehe chrónka ch'án la nax̄a tjenixja ch'án k'áxrótjen. ⁸ Tí tsíkójnkotsé sín a mé ijnko piso noi la ntiha mé síche nchónhya xrohi. ⁹ Ntá ntiha itjen ijnko ch'ín ntasoá it'in ch'án Eutico mé tjetj̄ax̄in ch'án chrítaón ventana. Ntá tí ch'ín Pablo imá sé nixja ch'án ntá tí ch'ín ntasoá mé tsíkiki ch'án kotáchrin. A ntá xrin̄ghya tsík'ajua ch'án ntá tsík'anótj̄enxin ch'án tí ventana tí nixin piso ntiha ntá sákjuík̄jatsen sín ch'án la ó tsíkix̄in tsík'en ch'án. ¹⁰ Ntá ch'ín Pablo k'uínkajin ch'án ntá kjuítsínkaták'á ch'án chrítaón tí ch'ín tsík'anótjen a la kjóa ch'án. Ntá ntáche ch'án tí sín kichó ni kixin:

—Chrakonhyará tsík'enhya ch'án, tjechón ch'án —ichro ch'an.

¹¹ Ntá ch'ín Pablo k'ujt'ótjen ch'án inaá tí k'uínkajinx̄in ch'án kixin ntiha ts'óxikayeh̄e ch'án niotj̄a sine sín tsoxraxinkakonx̄in sín Ìnchéni. Ntá nax̄a tjenixja ch'án hasta k'uínkaséyan a ntá sákjuí ch'án. ¹² Ntá tí ch'ín ntasoá tsík'anótjen sákjuiko sín la tjechón ch'án kohya nkehe xéhe ch'án ntá kaín sín imá kóchéh̄e sín.

Sákjuix̄in ch'ín Pablo chjasin Troas kjuíji ch'án chjasin Mileto

¹³ Jeheni mé kuítónx̄inni ntja saoxín la k'uixenheni ijnko ntabárco sákjuíni nó chjasin Asón kixin ntiha tsoxetani ch'ín Pablo éxí tsintáchro ch'án kixin tjinkaon ch'án sátsjixin ch'án toté ch'án ntiha. ¹⁴ Ntá ó xetani tí jehe ch'án chjasin Asón ntá k'uixenhen ch'án tí ntabárco k̄j̄ax̄in ch'án ntá sákjuíkoni ch'án nó chjasin Miti-lene. ¹⁵ Ntá tí sákjuix̄inni ntiha ntá tí yaon chr'éxin ntá k'uátsínkani estado Quío ntá tí yaon chr'éxin kjuíjini chjasin Samos. Ntá inaá k'uixenheni tí ntabárco ntá sákjuíni chjasin Trogilio ntá ntiha k'ok'éheni. Ntá xík'ix̄enheni ntabárco inaá ntá tí yaon chr'éxin kjuíjini chjasin Mileto. ¹⁶ Mé x̄ikaha kjuích'eni kixin ch'ín Pablo í tjinkakonhya ch'án chrókjuak'e ch'án isé estado Asia la í tjinkakonhya ch'án chrókjan chjasin Éfeso kixin tjinkaon ch'án tjoka chrókjuíji ch'án chjasin Jerusalén kixin ntiha chrókjuak'e ch'án tí yaon Pentecostés, ichro ch'án.

Nixjeh̄e ch'ín Pablo tí sín t'et̄uēnhen n̄nko chjasin Éfeso

¹⁷ Tí itjen ch'ín Pablo tí chjasin Mileto k'uíyeh̄e ch'án tí sín t'et̄uēnhen tí n̄nko chjasin Éfeso. ¹⁸ Ntá tió kui sín ntá ntáchro ch'án kixin:

—Tí jahará la ó nohará nkexr̄í kjuak'é la ko kjuàkua desde tí yaon xrankix̄in k'uinka estado Asia. ¹⁹ Ó nohará kixin kaín tí yaon k'uéjóni la kaín asenná kjuít'aha xr̄a Ìnchéni la kjuíntahnkehya. Imá tsjan̄ka kixin nchónhya kjuasótēna kixin tjinkaon tí sín judío

chrók'óyánna sín. ²⁰ Janhan la kujtoq̄hya kjuàkua kaín tí nkehe jína t'ichjánxin tsonohará. Mé xikaha kjuàkua tió kójnkotsérá la ko xikaha kjuikjakuaxian jnkojnko ntq̄ará. ²¹ Kjuákoq̄hā kaín chojni judío la ko kaín chojni jehya judío kixin t'ichjánxin tsítóhe sín tí jie tjasin sín la ko tsitekaon sín Dios la ko Ìnchéni Jesucristo. ²² Ntá ijie sátsjiyá chjasin Jerusalén kixin Nchakuen Dios k'ueṭu-anna la í nonahya nkehe tsonna ntiha. ²³ Ntá jehó ñona kixin kaín chjasin ts'atsínka la chrónka Nchakuen Dios kixin tsjak'echjinana la ko tsjasótena. ²⁴ Kaín tíha la tóxakonahya. Kjónté chrókjuasótexián la ninkehó sínkíhyana la janhan la chàṇā kixin tí xṛā chonta la chrókjuintaxín la chrókjuintaxiteyá tí xṛā chjina Ìnchéni Jesús kixin tsjàkua tí tan jína nkexrí tjuèhe Dios chojni.

²⁵ Ntá jie ó ñona kixin tí jahará kjuákoq̄hā kjuachaxin kuente Dios la nijkorá ts'ikonhyará tí janhan inaá. ²⁶ Méxṛā tinhínrá ijie kixin í jehya jiena kixin jnkojínrá chrók'uitjáyanrá. ²⁷ Kixin ó kjuàkua kaín tí nkehe tjinkaon Dios kixin tsonohará la í t'itjáyanhya ninkehó. ²⁸ Méxṛā xráxinkáonrá ts'ejorá jnkojína la ts'ayakonhénrá kaín tí sín tinkáchónki Ìnchéni kixin Nchakuen Dios mé tjáhará tí xṛā pastor kixin ts'ayakonhénrá tí sín kuente tí njnq̄e ch'án k'ueṇaxín ch'án tí ijñié ch'án. ²⁹ Ó ñona tió sátsjia ntá itsji í so chojni éxi kolóbo jiehe tsotjinkaon sinchek'itjáyan tí sín tinkáchónki Ìnchéni. ³⁰ La ntá kjónté jahará la isorá tjejorá ntihi tsjankixinrá tsàkorá kjuach'ia chrínki chrókjuáko-hérá kichuárá tí nkehe chaxín. A ntá tí sín tinkáchónki tsjichréhe sín tí nkehe ntoáhya. ³¹ Méxṛā chróxáxinkáonrá kixin chjina iní nánó kjuak'é kjuáko-hará nchakotjin la ko tie la kujtoq̄hya kjuintaxraxinkávan hasta kjuíncheníhi asenná nixjahará jnkojnko tí jahará.

³² A nta jie la jahará kichó ni tjetjáncháha Dios kixin t'ayakuanxínrá ch'án tí itén ch'án kixin tjuahará ch'án. Jehé ch'án imá chóna kjuachaxin tsjinkitsará ntá ts'ayéhérá kaín tí nkehe tjinkaon ch'án tsochjéhe ch'án kaín tí chojni tsíkótjóa. ³³ Janhan mé kjuakéhya asenná chjchakoen chojni o iké jnkojín chojni. ³⁴ Náhí. Jahará ó nohará jína kixin janhan na mé tjaná kjuít'axián xṛā kjuácha k'ueṇaxín tí nkehe t'ichjánxinna la ko kjaxin tí nkehe t'ichjánxinhin tí chojni k'uejókian. ³⁵ Méxṛā kjuàkuaxínrá xikaha sjch'erá xṛā kixin jína tsjínkitsará tí chojni chónahya. Xráxinkáonrá kixin tsintáchro Ìnchéni Jesús kixin: "Antsi sq̄chéhēni kixin tí nkehe chrókjuanjónni, a ntá kánhyó tsq̄chéhēni kixin tí nkehe chrók'uáyéhēni."

³⁶ Ntá kjuixin ntáchro ch'ín Pablo xikaha ntá jehé ch'an la ko kaín sin k'uejóxin toch'in sín ntá nixjehé sín Dios. ³⁷ Ntá kaín sín tsjánka sín la ko kjóa sín ch'án la ko tséhe sín tja ch'an. ³⁸ Imá k'uává sín kixin chrónka ch'án kixin í ts'ikonhya sín ch'án inaá. Ntá sákjuikotoxin sín ch'án nó tí tjen tí ntabarco sátsjiko ch'án.

Sákjuí tí ch'ín Pablo nó chjasin Jerusalén

21 A ntá tió kuítgheni tí sín kichó ni ntá k'uixenhenni ntabarco la ntá tuénxín sákjuíni estado Cos. Ntá tí yaon chr'éxin sákjuíni chjasin Rodas, ntá

ntiha sákjuíni chjasin Pátara. ² Tí chjasin Pátara la mé ntiha k'uitjani ijnko ntabarco sátsji nó estado Fenicia. Ntá k'uixenhenni tí ntabarco a ntá sákjuíni. ³ Ntá tió k'uátsínkani la k'uíkonní tí nonte Chipre itjani ikjon kuítgheni ntá k'uátsínkani estado Siria. Ntá tí ntabarco la ts'atsínka tsítóhe tí nkehe tjinká tí puerto chjasin Tiro, la jeheni la nachrohe sákjuíni tí chjasin a. ⁴ Ntá ntiha k'uitjani tí sín tinkáchónki Ìnchéni a ntá ntiha kuítghēkoni sín yato yaon. A ntá jehé sín mé kjuínchenohe sín Nchakuen Dios chénka sín tí ch'ín Pablo kixin sáchrókjuihya ch'án chjasin Jerusalén. ⁵ Ntá kjuixin k'uátsínka tí yato yaon a ntá sákjuixinni ntiha. La kaín tí sín tinkáchónki Ìnchéni la ko ichjién sín la ko xjeen sín sákjuikotoxiníni tí k'uaxrentani ikon chjasin ntá sákjuíni chrínta ntayaon. K'uejóxinni toch'inni nixjehēni Dios ⁶ ntá tuénxín nixjehēni sín jnkojína ntá tséhe tja kichó ni. Ntá k'uixenhenni tí ntabarco, a ntá jehé sín ikjan sín ntq̄e sín.

⁷ Ntahó chjasin Tiro kjuixín tí k'uixenhenni tí ntabarco ntá kjuíjini chjasin Tolemáida. Ntiha kjuínixjehēni tí sín kichó ni tinkáchónki Ìnchéni. Ntá ntiha k'uejókoni sín ijnko yaon. ⁸ Ntá tí yaon chr'éxin sákjuixinni ntiha ntá kjuíjini chjasin Cesarea. Ntá ntiha sákjuíni ntq̄e ch'ín Felipe, ijnko ch'ín kjaxin tjako itén Ìnchéni. Jehé ch'án mé ijnko tí sín yaotxin tjinkitsa tí sín kjueyá Ìnchéni. A ntá jeheni mé kuítgheni ntiha. ⁹ Tí ch'ín Felipe a mé chóna ch'án noó xjeen ch'án chjin naxa tóteq̄hya sín. Tí xjeen ch'án a mé chrónkaxín sín tí itén Dios. ¹⁰ Ntá ntaha k'uejókoni sín itsjé yaon ntá ikjui ijnko ch'ín nixja itén Dios it'in Agabo, tsíkjin ch'án estado Judea. ¹¹ Ikjui ch'án kjuínixjehē ch'án tí jeheni la ntá kuákja ch'án tí tjoq̄ t'ínkat'óxin ch'ín Pablo na ntá kjuínchēntetoxín tóte ch'án la ko itja ch'án ntá ntáchro ch'án kixin:

—Tí Nchakuen Dios mé ntáchro kixin mé xikaha chjasin Jerusalén tí sín judío sinchēnteto sín ñnché tí tjoq̄ sinchek'áyéhē sín ch'án tí sín jehya judío —ichro ch'án.

¹² Ntá kjuixin kuínhinni tíha ntá jeheni la ko tí sín chjasin Cesarea chrónóehēni tí ch'ín Pablo kixin sáchrókjuihya ch'án tí chjasin Jerusalén. ¹³ Ntá kjuátehe ch'ín Pablo kixin:

—¿Nkekuenté tsjankará la ko nkekuenté nchek'ávaráni? Janhan na chrakonhya kjónté jehya tí sinchēntetona sín ó. Náhí. Kjónté kjaxin chrók'uénxian chjasin Jerusalén tí tinkáchónkia Ìnchéni —ichro ch'án.

¹⁴ Ntá kjuachahyani nixjehēni ch'án ntá kuítgheni ch'án. Ntáchroni kixin:

—Tí nkehe tjinkaon Ìnchéni mé tsonhen —ichroni.

¹⁵ Ntá kjuixin tíha ntá kóyaxínhinni ntá sákjuíni nó chjasin Jerusalén. ¹⁶ Ntá sákjuíkoni iso tí sín tinkáchónki Ìnchéni tsíkjin chjasin Cesarea. Sákjuíkoni sín ntq̄e ijnko ch'ín tsíkjin Chipre it'in ch'án Mnasón. Jehé ch'án mé ósé tinkáchónki ch'án Ìnchéni. Ntá kjuanjón ch'án nketí kuítgheni.

Ch'ín Pablo sákjuítsjehé tí ch'ín Jacobo

¹⁷ Tió kjuíjini chjasin Jerusalén ntá tí sín kichó ni tinkáchónki Ìnchéni mé kjuanjón sín kjuachaxin k'uejóni

la chéhe sín. ¹⁸ Ntá tí yaon chr'éxín ch'ín Pablo sákjuíkoni ch'án kjuítsjeheni ch'ín Jacobo la ntaha tjejó kaín tí sín t'etōan kuènte nínko. ¹⁹ Ntá ch'ín Pablo kjuixin nixjehe ch'án sín ntá tuénxín chrónka ch'án kaín tí xrā kjuích'e Dios tió kjuakohe ch'án tí sín jehya sín judío. ²⁰ Tió kuínhin sín ntá kjuanchehe sín kjuasáyé Dios, a ntá ntáche sín ch'ín Pablo kixin:

—Kíchóni, jaha k'uíkuan kixin sín itsjé mil sín judío ó kuinkáchónki sín Jesús kjánchó kaín sín ntácho sín kixin t'ichjánxín tsitōehyani tí ley. ²¹ Ntá tsíkinhin sín kixin jaha mé tsíkjákohé tí sín judío tjejó chjasin ókjé kixin t'ichjánxienhya sinchexiteyéhe sín tí nkehe k'ue-
tōan ch'ín Moisés. La kjaxín kuínhin sín kixin jaha tsíkjákohé sín kixin tí xjeen sín t'ichjánxienhya itsa sín tí xroye la ko t'ichjánxienhya tinkáchónki sín éxí k'uékínkáchónkini ósé. ²² ¿Ntá nkehe chrókjuich'eni? Kixin tió tsinhin sín kixin kjuihá la tsojnkotsé nchónhya sín. ²³ Méxra íchá jína jaha sìnchexiteyá tíhi. Ntihi tjejó noó sín t'ichjánxín sinchexiteyá sín tí nkehe chénka sín Dios. ²⁴ Jaha sáchrókjuíkōa sín la chrókótjōá jaha la ko jehe sín. La ko kjaxín chrókjuénka tsokjín sín ntá tso-
noexín tí sín judío kixin chaxínhya tí nkehe tsíkinhin sín la ko tso-noexín sín kixin kjaxian jaha nchexiteyéhe tí ley. ²⁵ A ntá tí sín jehya judío tsíkitekōan Ínchéni la ikjinni ijnko xroon ó chr'énhenni sín. K'ue-tuenhenni sín kixin sinehya sín tí nto tsíkjokehē chojni tí nkehe tsíkjanōya, la ko kjaxín sinehya sín jni, la ko sinehya sín tí nto tsíchínjinhya isin va, la ko chrókótahya sín í jnko chojni chjin ókjé —ichro sín.

Tséxin sín tí ch'ín Pablo tí nínko

²⁶ Ntá ch'ín Pablo sákjuíko ch'án tí noó sín la ntá tí yaon chr'éxín kjuínchetjōá asén sín. Ntá kjuixin ntá k'uixenhen ch'án tí nínko kixin tsochrónka ch'án kixin ó kjuixin kjuínchexiteyá ch'an tí nkehe k'uítuenhen ch'án. Tíhi mé t'axrjexín kixin jnkojnko sín tsíkjo sín nkehe tsjanjon sín.

²⁷ Ó chjina chróétja tí yato yaon ntá iso tí sín judío tsíkjixín estado Asia mé tsík'ikon sín ch'ín Pablo nkaxenhen tí nínko. Ntá kjuínchekóninkaon sín kaín chojni chjasin ntiha ntá itsé sín tí ch'ín Pablo. ²⁸ Ntá k'uèya sín ntácho sín kixin:

—Kaínrá chojni chjasin Israel tsíjnkītsarāni kixin tsot-séni tí ch'ín i. Jehe ch'án mé ixri nkúixín xritjakōhē ch'án chojni nkehe jehya jína kuènte chjasénni, la ko titekakonhya ch'án tí ley kuènte Moisés, la ko titekakonhya ch'án nínkoeni. A ntá ijie la tsík'ixenko ch'án iso sín griego la kjuínchekjīta sín nkaxenhen tí nínko tjōá —ichro sín.

²⁹ Mé xíkaha ichro sín kixin tsík'ikon sín senó kixin chjasén sín mé xriko ch'ín Pablo tí ch'ín Trófimo tsíkjixín chjasin Éfeso. Kjuénkayáxin sín kixin ch'ín Pablo la kjá tsíkjiko ch'án tí ch'ín a nkaxenhen nínko.

³⁰ Ntá kuenté tí chjasin a kóninkaon sín la ntá kaín tí chojni kuinká sín ikui sín ntá itsé sín tí ch'ín Pablo. Ntá kuinkánkákjénxín sín ch'án nkaxenhen nínko la kuakit-sje sín ch'án ntója ntá tuénxín k'uíkjehe sín tí puerta nínko. ³¹ Ntá tjinkaon sín chrók'óyán sín ch'án ntá ijnko

ch'ín comandante k'ue-tuenhen itsjé tí sín soldado romano kuínhin ch'án kixin kuenté tí chjasin Jerusalén k'uixité nínkaon sín. ³² Ntá tí ch'ín comandante sákjuíko ch'án iso sín soldado la ko tí sín k'ue-tuenhen tí soldado a la kuinká sín sákjuí sín tí sín tí chojni. Ntá tió k'uíkon tí sín a kixin ó kjuíji tí ch'ín comandante la ko tí sín soldado a ntá kuitōhe sín, í kjuatehya sín ch'ín Pablo. ³³ Ntá tí ch'ín comandante kóchjina ch'án la itsé ch'án tí ch'ín Pablo. Ntá k'ue-tōan ch'án kixin tí sín soldado sinchentetoxín sín tí ch'ín Pablo yaá chica cade-na. Ntá chr'éxín kjuanchankíhi ch'án sín kixin nkexro tí jehe ch'ín Pablo la ko nkehe tí kjuích'e ch'án. ³⁴ A ntá tí chojni tsíkójnksé la ijnko sín k'óyako ijnko nkehe la í so sín la ókjé nkehe. A ntá tí ch'ín comandante la tienxínhya ch'án nkekuènte xíkaha kjuích'e sín kixin k'uixité sín. Ntá k'ue-tōan ch'án kixin tí sín soldado sát-sjiko sín tí ch'ín Pablo tí cuartel sín tí sín soldado. ³⁵ La ntá tió kjuíjiko sín ch'án tí t'it'ótjēnxín sín tí nchia a ntá t'ichjánxín kuámá sín tí ch'ín Pablo kixin tí chojni tjinkaon sín chrókjuate sín ch'án kixin nínkaon sín.

³⁶ Kaín tí chojni chréhe nóton t'èya sín ntácho sín kixin:

—Chrók'uen ch'án —ichro sín.

Ch'ín Pablo chrónka nkayakon chojni kixin chótahya ch'án jie

³⁷ Ntá tió sáchrókjuíko sín ch'ín Pablo tí nkaxenhen tí cuartel kuènte tí sín soldado a ntá kjuanchankíhi ch'ín Pablo tí ch'ín comandante ntácho ch'án kixin:

—¿Á jína tsonixjahani jaha intsí? —ichro ch'án.

Ntá kjuátehe tí ch'ín comandante ntácho ch'án kixin:

—¿Jaha la á noha nixja griego? ³⁸ Méxra zá jehya jaha tí chojni tsíkjixín Egipto kjuínchenínkaon chojni la ko sákjuíko nteje tí noó mil chojni tsíkjàya? —ichro ch'án.

³⁹ Ntá kjuátehe ch'ín Pablo ntácho ch'án kixin:

—Náhí, janhan mé ijnko chojni judío. Tsíkókjínaxián chjasin Tarso, estado Cilicia. Janhan me ijnko chojni tsíkjixín ijnko chjasin imá tjetōan. A ntá ijie xrxannógha kixin tsjánjuan kjuachaxin tsonixjahā tí chojni —ichro ch'án.

⁴⁰ Ntá tí ch'ín comandante kjuanjōn kjuachaxin ntá ch'ín Pablo kjuák'exín tōté ch'án tí tjen escalera ntá tja ch'án ó kjuakōxín ch'án kixin tsotání sín. Ntá tání sín ntá kjuankixin nixjāxín ch'án nkiva hebreo. Ntácho ch'án kixin:

22 —Jahará kíchó ni la ko chojni it'é xjan tinhínrá nkehe tí tsoxrjānka kixin chontahya jie —ichro ch'án.

² Ntá kuínhin sín kixin nixjāxín ch'án nkiva hebreo ntá antsí má tání sín. Ntá ntácho ch'ín Pablo inaá kixin:

³ —Janhan mé ijnko chojni judío tsíkókjínaxián chjasin Tarso estado Cilicia. K'uankixiān ntihi chjasin Jerusalén la kjuíntakuáxian tí nkehe kjuako tí ch'ín Gamaliel la titekavan tí ley tsíkinkáchónki tí sín tsík'axrjenixinni ósé. Tjínkavan chrókjuít'ahā Dios xrā kaín asenná éxí tjínkáonrá jahará ch'erá tí yaon ijie. ⁴ Ti

senó k'uénínkəkonhən chrók'oyán tí sín tinkáchónki Ìnchéni kjuíntanteto chojni ntoa la ko chojni chjin kixin chrók'uejóchjina sín. ⁵ A ntá tí sín nchət'a t'ətoan la ko kaín tí sín táda t'ayakonhen n̄nko la mé nohe sín kaín tíha kixin jehe sín mé kjuanjon sín xroon ts'áyéhe tí sín kichó ni judío tjejó chjasin Damasco. Ntá sákjuia nó ntiha kixin chrókjuíkjéyá tí sín tinkáchónki Ìnchéni kixin chrótsə sín ntá chrókjuíkian sín ntihi Jerusalén chroklusóte sín.

Ch'ín Pablo chrónka nkexrí kjuankíxin tinkáchónki ch'án Ìnchéni
(Hch. 9.1—9; 26.12—18)

⁶ A ntá tió kjuasán chjina chjasin Damasco chjina chonkíxin ntá xrinəhya k'uinkáséyan jnkotəjtén tí tjén ijnko xrohi imá t'inkaséyan kuix̄in nkajní. ⁷ Ntá kjuachr'ítsinka nonte ntá tuénxín kuñhən itén ijnko nkexro nixjana ntáchro kixin: "Saulo, Saulo, z̄nkekuènté ninkákonna xritjéyá tí janhan?" ⁸ Ntá kjuánchánkiá kixin: "¿Xá nkexro jaha?" Ntá kjuátehe ch'án ntáchro ch'án kixin: "Janhan mé tí nkexro Jesús tsíkjiñ chjasin Nazaret, mé tí nkexro xritjéyá." ⁹ La ntá tí sín k'uájkian mé k'uíkon sín tí xrohi la chrakon sín kjánchó kuénhya sín itén tí nkexro nixjana. ¹⁰ Ntá kjuánchánkiá kixin: "¿Xá nkehe tsonhen tjinkávan s̄t'aha jaha?" Ntá kjuátehe ch'án ntáchro kixin: "T'aya sátjia t'ixənhén chjasin Damasco ntá ntiha tsochrónka sín kaín nkehe s̄ich'e." ¹¹ Ntá tí xrohi a mé k'uíxənka ikuən ntá í xit-jaha t'íkuən. Ntá tí sín chríkjan mé kuinkátséna sín sákjuíkian sín chjasin Damasco.

¹² Ntá ntaha kjuák'e ijnko ch'ín it'in Ananías ijnko chojni jina kjuínchexiteyéhe ch'án tí ley kuènte ch'ín Moisés. Kaín tí sín judío siñ chjasin Damasco tjikosáyehe sín tí jehe ch'án. ¹³ Ntá ch'ín Ananías mé kuitsjehe ch'án tí janhan ntá tió kui ch'án ntáchro ch'án kixin: "Kíchóni Saulo, ijie la ts'ayéhé kjuachaxin ts'ikuan inaá." Ntá ó jina t'íkuən. ¹⁴ Ntá tuénxín ntáchro ch'án inaá kixin: "Tí Dios kuinkáchónki tí sín tsík'axr-jenixinni la ó tsíkjeýá ch'án tí jaha kixin tsonoha nkehe tjinkaon ch'án la ko kixin ts'ikuan tí nkexro jina la ko tsinhín tan k'uaxrjexín ir'va ch'án. ¹⁵ Jaha mé tsochrónka tí nkehe k'uíkon la ko tí nkehe kuínhín tsinhín kaín tí chojni chjasintajni. ¹⁶ A ntá jie la í choénhya má. T'aya la tsikitiaxián ihnié Ìnchéni kixin mé ts'ímáxin ijjá," ichro ch'ín Ananías.

Pablo chrónka kixin Dios ichr'án ch'án tsjakohe tí sín jehya sín judío

¹⁷ Na ntá tió xíkjan chjasin Jerusalén ntá sákjuia n̄nko tsonixjahə Dios ntá titəyə k'uíkuèn ¹⁸ Ìnchéni ntáchro ch'án kixin: "Tjoka ts'axrjéxian chjasin Jerusalén kixin tsitekakuénhya sín tí nkehe tjákua mé tí tan kuèntəna." ¹⁹ Ntá janhan ntátjan ch'án kixin: "Ìnchéni, jehe sín ó nohe sín kixin senó k'uék'atsínka kaín tí n̄nko la k'uétsə tí sín tinkáchónki tí jaha la sákjuíkian sín ntəochiso k'uékon sín. ²⁰ Tió k'óyán sín tí ch'ín Esteban tí nkexro k'uékjit'aha x̄ə, k'uénixja tí tan kuènta ntá janhan k̄əxin tjéntaxián ntiha la janhan

ntáxrjan kixin ó nchoxon its'en ch'án la k'uáyakonhən tí iké tí sín kjuəya." ²¹ Ntá Ìnchéni xínixja inaá, ntáchro ch'án kixin: "Tétuənhan jaha kixin sátsjia chjasin k̄in kixin tsjakohe tí chojni jehya judío."

Ntá tí ch'ín comandante k'uáyéhe tí ch'ín Pablo kixin tsjasóte ch'án

²² Ntá tí sín tsíkójnkotsé mé kuínhin sín kaín tíha ntá kjuankíxin k'uəya sín ntáchro sín kixin:

—Its'en ch'án, í tsjak'echónhya ch'án —ichro sín.

²³ Naxə t'ixratəhya sín t'óyako sín ntá tótsjénka sín iké sín la ko kuákja sín nche it'e sín. ²⁴ Ntá tí ch'ín comandante mé k'uətuənhən ch'án tí sín soldado a kixin sátsjiko sín ch'ín Pablo nkaxenhen tí cuartel kuènte sín. Ntá ntiha k'uətoan ch'án kixin tsjatexín sín ch'án chikoté ntá tsonoxín tí ch'ín comandante nkekuènte imá t'óyako sín nínkakonhen sín tí jehe ch'án. ²⁵ Ntá kjuixin kjuínchenteto sín ch'án kixin tsjate sín ch'án ntá nixjəhe ch'ín Pablo ijnko ch'ín capitán itjen ntiha ntáchro ch'án kixin:

—¿Á chontará kjuachaxin tsjaterá ijnko chojni romano, kixin naxə kjuéyáhyará nkerí jiə chonta? —ichro ch'án.

²⁶ Tió kjuixin kuínhin tí ch'ín capitán ntá sákjuíchénka ch'án tí ch'ín comandante ntáchro ch'án kixin:

—¿Nkehe s̄ich'e jaha kixin tí nkexro i mé ijnko chojni romano?

²⁷ Ntá tí ch'ín comandante mé kóchjinehe ch'án tí ch'ín Pablo la kjuanchankí ch'án, ntáchro ch'án kixin:

—¿Á jaha chaxín chojni romano? —ichro ch'án.

Ntá kjuátehe ch'ín Pablo kixin chaxín jehe ch'án.

²⁸ Ntá ntáchro tí ch'ín comandante kixin:

—¿A ntá nkexrí kixin janhan nchónhya chichaon kjuènkə kixin ts'ónana chojni romano?

A ntá ntáchro ch'ín Pablo kixin:

—Janhan na chojni ntiha tsíkókjínaxián.

²⁹ Na ntá tí sín soldado chrókjuate ch'ín Pablo mé kuínhin sín kixin ch'ín Pablo ijnko chojni romano ntá kuítəhe sín ch'án sákjuí sín ókjé. Ntá tí ch'ín comandante a mé kónohe ch'án kixin tí ch'ín Pablo a mé ijnko chojni romano ch'án chaxín. Ntá chrakon ch'án kixin tsíkjinchenteto ch'án.

Ch'ín Pablo nixjəhe ch'án tí sín t'ətoan kuènte tí sín judío

³⁰ A ntá tí kóyən ntá tí ch'ín comandante a mé tjinkaon ch'án tsonohe ch'án nkehe tí jiə chrók'ueka tí sín judío tí ch'ín Pablo. Ntá kjuasintənkə ch'án chica cadena tsíchróntetoxín tja tí ch'ín Pablo ntá k'uətoan ch'án kixin tsojnkotsé kaín tí nchət'a t'ətoan la ko tí sín t'ətoan kuènte sín judío, a ntá kuakitsje ch'án tí ch'ín Pablo la kjuak'e ch'án jnkosiné tí siñ tí jehe sín.

23 Ntá ch'ín Pablo komá tí sín t'ətoan kuènte sín judío ntá ntáchro ch'án kixin:

—Kíchóni, tí k'uékjak'é hasta ijie la Dios tjetsjehe kixin ijnko kjuaxrexinkaon jina chonta —ichro ch'án.

² Ntá tí ch'ín Ananías tí ch'ín nchat'á t'etōan mé k'uētuenhen ch'án tí sín chjino tjejó tí tjen ch'ín Pablo tsochjéhe sín ir'va ch'án. ³ Ntá kjuátēhe ch'ín Pablo kixin:

—Dios mé sinchekjasóte ti jaha kixin ntoáhya kjuich'e. Tjetjaxian méhe kixin tsjéyá nkehe tí jie chonta éxí nixja tí ley. A ntá žnkekuente kuitekákonhya tí ley, la kuētōan kixin ts'ékonna? —ichro ch'án.

⁴ A ntá tí sín siín ntiha ntáchro sín kixin:

—¿Á xikaha ts'antaxínhín tí nchat'á t'etōan kuente Dios?

⁵ Ntá kjuátēhe ch'ín Pablo ntáchro ch'án kixin:

—Kíchóni, kjuatsoanhya janhan kixin jehe ch'án mé tí nchat'á t'etōan. Ntáchro tí xroon itén Dios kixin: "Chrók'uantaxienhya tí chojni t'etuenhen chjasán" † —ichro ch'án.

⁶ Ntá ch'ín Pablo mé kónohe ch'án kixin iso chojni siín ntiha mé chojni kuente partido saduceo, ntá í so sín a mé kuente partido fariseo. Ntá itsen k'uèya ch'ín Pablo, ntáchro ch'án kixin:

—Kíchóni, janhan mé ijnko chojni fariseo la tí sín kjéhyana mé fariseo kjaxin. Jahará mé tjéyará nkehe tí jie chonta kixin janhan mé tinkachónkia kixin tsoxechón chojni tsík'en.

⁷ Ntá kjuixin ntáchro ch'án tíha ntá tí sín fariseo la ko tí sín saduceo mé kjuankixin sín ikjo kichó sín ntá xikaha jnkokónhya kjuenkayáxin tí sín tsíkójnkotsé ntiha.

⁸ Kixin tí sín saduceo a mé ntáchro sín kixin tsoxechónhya chojni tsík'en la ko kjaxin kohya sín ángel la ko kohya nchakuen. A ntá tí sín fariseo la titekaon sín kaín tí nkehe a. ⁹ Ntá kaín sín k'uèya sín la ntá iso tí sín maestro tjako ley kuente sín fariseo mé k'uínkatjen sín ntáchro sín kixin:

—Tí ch'ín i, kohya ninkehó nkehe jínahya kjuich'e ch'án. Ách'e ijnko nchakuen chojni o ijnko ángel mé nixjehe ch'án —ichro tí sín fariseo.

¹⁰ Ntá imá sítjité sín nínkaon sín. Ntá tí ch'ín comandante a mé tóxakonhen ch'án kixin chrókjuinchequen sín tí ch'ín Pablo ntá k'uētuenhen ch'án tí sín soldado a kixin sátsjikakjín sín ch'án la tsikao sín ch'án inaá tí cuartel kuente tí sín soldado.

¹¹ A ntá tí tie a na ntá xrinahya titàya k'uíkuèn ch'ín Pablo Ìnchéni nixja ch'án, ntáchro kixin:

—Chrakonhya Pablo kixin éxí chronka tanná chjasin Jerusalén la mé xikaha tsochronka chjasin Roma.

Kjuenkayáxin sín chrók'óyán sín tí ch'ín Pablo

¹² Ntá tí yaon chr'éxin a ntá iso tí sín judío a mé kjuenkayáxin sín kixin ts'óyán sín tí ch'ín Pablo. Ntá k'uákjenxin sín ihnjé Dios chaxín tsoxiteyá la sinehya sín la ko ts'ihya sín ninkehó tí naxá ts'óyánhya sín ch'án. ¹³ Chjina cuarenta sín kjuenkayáxin sín kixin xikaha sich'e sín. ¹⁴ Ntá sákjuíchenka sín tí sín nchat'á t'etōan la ko tí sín t'etuenhen kuente tí sín judío la ntáche sín kixin:

—K'uákjenxinni ihnjé Dios kixin chaxín tsoxiteyá kixin í sinehyani ninkehó tí naxá ts'óyánhyani tí ch'ín

Pablo. ¹⁵ Méxra ntá jahará la ko í so ti sín t'etuenhen tí sín judío tsonácherá tí ch'ín comandante a kixin tsjikao sín tí ch'ín Pablo ntihi tí tjejórá ntóye nchítjen kixin antsí má tsjanchankíhírá ch'án nkehe síná á chaxín tí jie t'íká ch'án. A ntá jeheni senó ts'ejóchónhenni tí tsjixín ch'án ntá ts'óyánni ch'án kixin í tsjihya ch'án ntihi —ichro sín.

¹⁶ Ntá tí xjeen tí kjave tí ch'ín Pablo a mé tsíkinhin ch'án nkehe tí tjo tí sín a. Ntá sákjuí ch'án k'uíxenhén ch'án cuartel kuente tí sín soldado kixin tsochrónka ch'án nkehe tí tjo sín kuínhin ch'án. ¹⁷ La ntá ch'ín Pablo mé k'uíyēhe ch'án ijnko tí sín capitán la ntáchro ch'án kixin:

—Sátsjikoa tí ch'ín ntasoá ti tjen tí ch'ín comandante kixin tjinkaon ch'án tsochrónka ch'án nkehe —ichro ch'án.

¹⁸ Ntá tí ch'ín capitán a mé sákjuíko ch'án ti tjen tí ch'ín comandante ntá ntáchro tí ch'ín capitán a kixin:

—A ntá tí ch'ín Pablo tjechjina mé k'uíyēhēni ch'án kixin tsjikao ni tí ch'ín ntasoá ntihi kixin tjinkaon ch'án tsonixjaha jaha —ichro ch'án.

¹⁹ Ntá tí ch'ín comandante a mé tséhe ch'án itja tí ch'ín ntasoá a ntá k'uaxrjentako ch'án jehó ch'án ntá kjuanchankíhi ch'án kixin:

—¿Nkehe tí tjinkávan tsochrónka? —ichro ch'án.

²⁰ Ntá ntáchro tí ch'ín ntasoá a kixin:

—Iso tí sín judío mé kjuenkayáxin sín kixin tsjanchara sín kixin ntóye nchítjen sátsjikoa ch'ín Pablo tí tsojnkotsé tí sín judío t'etōan. Sit'ayaha sín tsonácheró sín kixin tjinkaon sín tsjanchankíhi sín ch'ín Pablo tí nkehe antsí má xra. ²¹ A ntá jaha la chrókuitekákonhya kixin chjina cuarenta chojni tjejóchónhen sín imó la k'uákjenxin sín ihnjé Dios kixin sinehya sín la ko ts'ihya sín ninkehó tsjixinjian its'en ch'ín Pablo. Ntá ijie tjejóchónhen sín tsonohe sín nkehe tsixrua jaha —ichro ch'án.

²² A ntá tí ch'ín comandante a mé nixjehe ch'án tí tí ch'ín ntasoá la k'uētōan ch'án kixin:

—Tsochenkahya ninkexró kixin xikaha kjuichronka —ichro ch'án.

Ichr'án sín tí ch'ín Pablo tí itjen tí ch'ín gobernador Félix

²³ Ntá tí ch'ín comandante a mé k'uíyēhe ch'án yaá tí sín capitán a ntá k'uētōan ch'án kixin tsoyaxínhin sín sátsjiko sín iyó ciento sín soldado sátsjixin toté la ko setenta tí sín tsjiták'á kokate la ko iyó ciento soldado sátsjiko chica lanza, ntá las nueve tie sátsji sín chjasin Cesarea, ichro ch'án. ²⁴ La ko k'uítuenhen sín sinchekamá sín kokate tsjiták'á ch'ín Pablo la ts'ayakonhen sín ch'án jína kixin kohya nkehe tsonhen kixin tsjiji ch'án tí tjen ch'ín Félix, tí ch'ín gobernador. ²⁵ Ntá tí ch'ín comandante ikjin ch'án ijnko xroon a, ntáchro kixin:

²⁶ "Janhan mé tí ch'ín Claudio Lisias chr'anhan ijnko xroon kixin jaha ch'ín Félix ijnko gobernador jína, nixjaha. ²⁷ Tí sín judío a mé itsé sín tí ch'ín i kixin chrók'óyán sín ch'án. Ntá tió kónona kixin ijnko chojni

† Éxodo 22.28

romano tí jehe ch'án la ntá sákjuíkian sín soldado kjuíntakaá ch'án. ²⁸ Tjínkavan tsonóna nkekuènte kixin nínkakonhen sín ch'án. Ntá sákjuíkian ch'án tí tsíkójkotsé tí sín judío. ²⁹ Ntá kónoxín kixin nínkakuenxín sín ch'án kixin tí ley kuènte sín kjuínchexiteyáhya ch'án, ichro sín. Jehya jië jië tsíkjasin ch'án kixin chrók'óyán sín ch'án o chrókjuak'echjina sín ch'án. ³⁰ Ntá ó kuínhan kixin tí sín judío a mé chrók'óyán sín ch'án. Ntá méxra jie ichr'an ch'án tí tjen jaha la ko kjaxin kjuáncháha tí sín a kixin chrókjuíji sín tí tjen jaha chrókjuá sín kixin nkekuènte nínkakonhen sín ch'án. Kjuasáyá. Ó tjen."

³¹ Ntá tí sín soldado a mé kjuínchexiteyá sín éxi k'uituenhen sín a ntá sákjuíko sín tí ch'ín Pablo tí tie a chjasin Antípatris. ³² Ntá tí yaon chr'éxin tí sín soldado xrixín toté ó a mé xíkjan sín tí cuartel kuènte sín. Ntá tí sín k'uéjókjen kokate a mé naxa sákjuíko sín tí ch'ín Pablo. ³³ Ntá tió kjuíji sín tí chjasin Cesarea ntá tí sín soldado a mé kjuanjon sín tí xroon a chjéhe sín tí ch'ín gobernador la ko kjaxin kjuínchek'áyéhe sín ch'án tí ch'ín Pablo. ³⁴ Ntá kjuixin kjuínchekuáxin tí ch'ín gobernador a tí xroon ntá kjuanchankí ch'án nketí chjasén ch'ín Pablo. La ntá kónohe ch'án kixin estado Cilicia tsíkjixín tí ch'ín a. ³⁵ Ntá ntáchro ch'án kixin:

—Ntá tsínhan nkehe tsixro tí sín itsji ts'eka jië.

Ntá k'uetuenhen ch'án tí sín soldado a kixin ts'ayakonhen sín tí ch'ín Pablo tí nchia kuènte ch'ín Herodes.

Ch'ín Pablo nixjehé ch'án ch'ín Félix chrónka ch'án kixin kjuasinhya ch'án jië

24 Ntá k'uátsínka in'ó yaon, ntá ch'ín Ananías, tí nchat'á imá t'etóan, kjuíji ch'án chjasin Cesarea. Kjaxin kujkáo ch'án iso tí sín t'etóan kuènte nínko a la ko ijnko ch'ín abogado it'in Tértulo. Tí ch'ín a mé tsonixjehé tí ch'ín gobernador kixin tsjanchia sín jië kuènte ch'ín Pablo. ² Ntá tió kujkáo tí sín soldado tí ch'ín Pablo ntiha ntá tí ch'ín Tértulo kjuankíxin ch'án nixjehé ch'án tí ch'ín Félix ntáchro ch'án kixin:

—Kjuasáyá jaha gobernador kixin imá kjuínkítsa kixin kjuaxróxin tjejóni la kjuasáyá kixin imá noha kjuíncheyóxian tí nación kuènteni. ³ Kjuasáyá jaha Félix. Imá jína jaha kixin k'uáyéheni kaín tíha.

⁴ Tjínkakonhya sintak'itjáyanhan nchónhya tiempo la xrjanóaha kixin chrókjuak'é chrókuinhín intsikoa tí nkehe tsóxrjanka. ⁵ A ntá ijie ó k'uitjani kixin tí ch'ín i mé éxi ijnko chin t'óxíka kuenté chjasintajni kixin ch'iyehé ch'án tí sín judío ntá xíka sín. Jehé ch'án mé t'etóan ch'án tí sín tinkáchónki tí ch'ín tsíkjixín chjasin Nazaret. ⁶ Jehé ch'án mé kjaxin chrókjuínchekjítá ch'án tí nínko. A ntá itséni ch'án ntá chrókjuínchekitoxénni tí ijie ch'án éxi t'etóan tí ley kuènteni. ⁷ A ntá tí ch'ín comandante Lisias kjuixrónkáxin ch'án kujkáo ch'án nchónhya sín soldado la kuakítsje sín tí ch'ín Pablo.

⁸ Ntá k'uetóan ch'án kixin tí sín tjanchia jië chrókuitsjehé sín tí jaha kixin jaha chrókjuanchankíhí ch'án kixin chrókónoha jína nkexéhé tí jië chrókjuínchekjasótéxin sín ch'án —ichro tí ch'ín Tértulo.

⁹ Ntá ntáchro kaín tí sín judío siín ntiha kixin:

—Kaín tíha la chaxín —ichro sín.

¹⁰ Ntá tí ch'ín gobernador a mé kjuakoxín tja ch'án kixin tsonixja tí ch'ín Pablo a. Ntá ntáchro ch'ín Pablo kixin:

—Chéheni kixin tsonixjahani tsochrónkani kixin koha jië kjuasinni kixin ó noheni kixin jaha la juez kuènte tí nación ntiha la nchónhya nánó tétóan. ¹¹ Jaha la kjaxin ó chrókónoha kixin na ntá teyó yaon kjuíjini chjasin Jerusalén kixin ntaha tsoxráinkakónxinni Dios. ¹² Kónoxínhya kixin nijnko nkexro chrókjuachaxinni, la ko kjuínchexakuenhyani ninkexró nínko la ko ni tí nínko ntsí la ko ninketé chjasin. ¹³ Tí sín i la xitjahya tsontáchro sín kixin xíkaha tí jië kjuasinni. ¹⁴ Janhan chaxín xrjanka kixin t'ahá xra tí Dios k'uékinkáchónki tí sín tsík'axrjeníxinni mé yóhé tí ntja nixin. A ntá jehe sín ntáchro sín kixin ókjé nkehe tinkáchónkíni. Kjánchó janhan mé tinkachónkia kaín tí nkehe tsíkjin sín tí xroon kuènte ley la ko tinkachónkia kaín tí nkehe k'uénixja tí sín k'uéchrónka itén Dios. ¹⁵ Kjaxín tinkachónkia tí Dios tinkáchónki tí jehe sín kixin tjéchonhan kixin Dios sinchexechón kaín chojni jína la ko kaín chojni jínahya kjaxin. ¹⁶ Méxra tóxakonna kixin tjóá chrókjuak'é kixin chrókjuanchahya Dios jië la ko kjaxin chojni chrókjuanchahya jië.

¹⁷ Nta kjuixin k'uatsínka iso nánó ixrini ókjé ntá kjuíjini chjasénni kixin tsjanjonni chichaon la ko kjaxin tsochjéheni Dios nkehe. ¹⁸ Méxra mé xíkaha tjenni nkaxenhen nínko nta iso sín judío tsíkjixín estado Asia ó xetani ntiha. Ntá kjuínchetjóáni asénni la tsjéhya chojni k'uíkon la kohya chojni kjuánjonkoni. ¹⁹ A ntá tí sín a mé t'ichjánxin chrókui sín ntiha kixin chrókjuanchia sín jië tí nínkakonna sín. ²⁰ A ntá tí náhi la tí sín tjejó ntiha chróchrónka sín kixin nkehe tí jië k'uitjaxín sín tió kjuák'eni tí tjejó tí sín t'etóan kuènte tí sín judío. ²¹ Kjá tí tsontáchro sín kixin náxrjónhya ijnko nkehe itsen k'uèya ntáxrjan kixin: "Ijje sijnchekitoxéinra jiëna kixin sijnchekjasótenará kixin janhan tinkachónkia kixin tsoxechón chojni tsik'en" —ichro ch'án.

²² Ntá kjuixin kuínhin tí ch'ín Félix, la jehe ch'án jína kónohe ch'án kixin nkexrí tí ntja nixin. Ntá kjuínchekitoxéinnya ch'án ijie ch'ín Pablo. Ntáchro ch'án kixin:

—Tsjijia tí ch'ín comandante Lisias ntá tsochrónka ch'án nkekuènte tí jië tjanchará ntá tsonóna —ichro ch'án.

²³ Ntá k'uetuenhen ch'án ijnko ch'ín capitán kixin ts'ayakonhen ch'án ch'ín Pablo kjánchó tsítóhe sín ch'án intsí la ko tsítóhe sín ts'ixenhen tí sín chóxin ch'án, tsjitsjehe sín ch'án.

²⁴ Ntá iso yaon chr'éxin ntá kjuíjiko ch'ín Félix tjan Drusila ichjién ch'án, mé ijnko tjan judía. Ntá k'uetóan ch'án kixin tsjik'iyehé sín tí ch'ín Pablo kixin tsochrónka ch'án nkexrí tinkáchónki chojni Jesucristo. ²⁵ A ntá ch'ín Pablo mé kjuako ch'án kixin nkexrí ts'ejó chojni jína la ko nkexrí ts'etuenhen chojni asén sín kixin ch'ehya sín tí jínahya la ko nkexrí Dios sinchekitoxéin ijie

chojni tí tsjixixín. Ntá ch'ín Félix kuínhin ch'án xikaha ntá chrakon ch'án, ntáchro ch'án kixin:

—A ntá jie la sátjia. Ntá ts'iyaha tió chonta tiempo —ichro ch'án.

²⁶ A nta ch'ín Félix tjechónhen ch'án kixin kjá ch'ín Pablo tsjanjon ch'án chichaon ntá tsjanjon ch'án kjuachaxin sátsji ch'án. Ntá jnkoyaxón k'uíyehé ch'án tí ch'ín Pablo kixin tsonixjehé ch'án. ²⁷ Ntá xikahó kónhen hasta k'uátsínka iyó nánó ntá tí ch'ín Félix kuitóhe ch'án tí xrá gobernador la ntá í jnko ch'ín it'in Porcio Festo mé k'uixenhen ch'án tí xrá a ínaá. A ntá ch'ín Félix mé kuitóhe ch'án tí ch'ín Pablo tjechjina ch'án kixin tjinkaon ch'án chrókjuinchexiteyá ch'án tí nkehe tjinkaon tí sín judío.

Ch'ín Pablo nkayakon tí ch'ín Festo

25 Ntá tí ch'ín Festo kjuíji ch'án ntiha kixin ts'ixenhen ch'án tí xrá gobernador. Ntá iní yáon chr'éxin ntá sákjuixin ch'án chjasin Cesarea la kjuíji ch'án chjasin Jerusalén. ² Ntiha tí sín nchát'á t'etóan la ko tí sín judío imá tjetóan mé kjuanchia sín kixin tsjasóte ch'ín Pablo. ³ Kjuanchia sín kixin xrá ó chrók'uetóan ch'án kixin chrókjuí ch'ín Pablo ntiha chjasin Jerusalén. Kixin jehe sín ó tsíkjenkayáxin sín kixin tsochr'án sín iso chojni tsochónhen tí ntja ts'óyán sín tí ch'ín Pablo.

⁴ Kjánchó ch'ín Festo kjuátéhe ch'án ntáchro ch'án kixin ó tsíkjenkayáxin ch'án kixin í séhya tsjak'e ch'án ntiha. Méxra tí ch'ín Pablo la tjechjina ch'án chjasin Cesarea la xitjahya ts'etóan ch'án kixin tsjixrakoa. ⁵ Ntá ntáchro ch'án kixin:

—Tí chojni tjetóan kuéntará sáchrókjuikian ntiha chjasin Cesarea. A ntá tí chaxín tsíkjasin ch'án jie ntá ntiha la jina tsjanchia sín jie —ichro tí ch'ín Festo.

⁶ Ntá ch'ín Festo kjuák'e ch'án chjasin Jerusalén chjina ijní o ite yáon ntá ikjan ch'án chjasin Cesarea ínaa. Ntá tí yáon chr'éxin a kjuák'etjaxin ch'án tí tjet'etóanxín ch'án ntá k'uetóan ch'án kixin tsjikakjín sín tí ch'ín Pablo. ⁷ Ntá tió k'uixenhen ch'ín Pablo ntiha ntá tí sín judío kujxin Jerusalén kóchjinehe sín ch'án ntá kjuanchia sín nchónhya jie imá hyé. Kjánchó ijnko nkehe chaxínhya t'eka sín ch'án jie. ⁸ A ntá tí ch'ín Pablo a chrónka ch'án kixin kjuasinhya ch'án jie. Ntáchro ch'án kixin:

—Ninkehó jie kjuasinhyani mé ninkexró kjuánjonkoyani la ko kjaxin jehya chrókuitekakonhyani tí ley kuènte tí sín judío la ko jehya chrókuitekakonhyani tí njnko la ko jehya chrókuitekakonhyani tí ch'ín gobernador romano.

⁹ A ntá ch'ín Festo tjinkaon ch'án kixin tsonínkakuenhya ch'án tí sín judío ntá kjuanchankíhi ch'án tí ch'ín Pablo ntáchro ch'án kixin:

—¿Á tjínkavan sátsjia chjasin Jerusalén kixin ntaha janhan chrókjuintakitóaxián nkehe tí jie chonta jaha? —ichro ch'án.

¹⁰ Ntá kjuátéhe ch'ín Pablo kixin:

—Náhi, jeheni ó ntihi tjenni tí t'etóanxín tí sín gobierno romano la jina chrókjuinchekitóexián ijieni kixin jaha la ó noha kixin ninkehó ijie kjuích'ehyani tí sín

judío. ¹¹ Kjá tí chaxín kjuásian ichrén jie jie chrók'uenxián la chrakonhyana kjónté chrók'uéen. A ntá tí chaxínhya xikaha t'ekana sín jie la ninkexró chóntahya kjuachaxin chrók'uetóan sáchrókjuikoni tí jehe sín. A ntá tjánchíá kixin jehe tí ch'ín imá t'etóan mé sinchekitóexín tí jie —ichro ch'án.

¹² Ntá ch'ín Festo mé kjuanchankíhi ch'án iso tí sín tjinkítsa ch'án ntá ntáchro ch'án kixin:

—Jaha mé tjanchia kixin tí ch'ín imá t'etóan sinchekitóexín ch'án ijíá. Méxra tétuñhan sátsjia tí tjen tí ch'ín a —ichro ch'án.

Ch'ín Pablo nkayakon tí ch'ín rey Agripa

¹³ Ntá k'uátsínka iso yáon ntá tí ch'ín rey Agripa la ko tjan Berenice kjuíji sín chjasin Cesarea kixin tsonixjehé sín tí ch'ín Festo. ¹⁴ Ntá ntiha mé kuitóhe sín itsjé yáon ntá ch'ín Festo a mé chénka ch'án tí ch'ín rey nkehe kuènte tí ch'ín Pablo. Ntáchro ch'án kixin:

—Ntihi itjen ijnko ch'ín tjechjina tsíkítóhe ch'ín Félix.

¹⁵ A ntá tió kjuak'é chjasin Jerusalén ntá tí sín nchát'á t'etóan la ko tí sín t'etúenhen tí sín judío a mé kjuíjt-sjehe sín tí janhan ntá kjuanchia sín jie kuènte ch'ín Pablo. Kjuanchia sín kixin chrók'óyánni tí jehe ch'án.

¹⁶ Ntá janhan kjuátahá kixin: Jeheni chojni t'etóan kuènte sín romano mé kuènhyani ts'etóanni its'en ninkexró tí naxá tsochjinahya tí ch'ín kjuasin jie kixin tsontáchro ch'án á chaxín tí jie tjanchia sín o náhi.

¹⁷ Ntá tí sín judío kui ntihi ntá chuñhya má. Kjónté tí yáon chr'éxin kjuak'étjaxián tí ntakitóexián ijie chojni la kuétoan kixin síxrakoa tí ch'ín Pablo. ¹⁸ A ntá tí sín kóchjina kohya ninkehó ichro sín kuènte tí jehe ch'án éxi kjuenkayáxian janhan chróntáchro sín. ¹⁹ Jehó nínkakuenxín sín ch'án kixin tí nkehe tinkáchónki ch'án la ko nínkakuenxín sín ch'án kixin tí nkexro it'in Jesús mé ik'uéen ch'án ntá jie ntáchro ch'ín Pablo kixin tjechón ch'án ínaa. ²⁰ Janhan la nonahya nkexr' tsi-tóexín tí ijie ch'án ntá kjuánchankíhí tí ch'ín Pablo á tjinkaon ch'án sátsji ch'án chjasin Jerusalén kixin ntaha tsitóexín tí jie ch'án. ²¹ A ntá jehe ch'án tsíkjanhia ch'án kixin tí ch'ín imá t'etóan mé chrókjuinchekitóexín ch'án ijie ch'án. Ntá kuétoan janhan kixin naxá ntihyó tsjak'echjina ch'án tsononajia janhan nkesá tsétuñhan ch'án sátsji ch'án ntiha —ichro ch'án.

²² A ntá ch'ín Agripa ntáche ch'án tí ch'ín Festo kixin:

—Kjaxian janhan tjínkavan tsínhan tí nkehe tsochrónka tí ch'ín a.

Ntá kjuátéhe ch'ín Festo ntáchro ch'án kixin:

—Ntóye tsinhín nkehe tsochrónka ch'án.

²³ Ntá tí yáon chr'éxin tí ch'ín Agripa la ko tí tjan Berenice kjuíji sín la k'uixenhen sín la ko tí sín soldado t'etóan tsíkjkáo sín, la ko k'uixenko sín iso chojni tjetóan kuènte chjasin ntiha. Ntá k'uetóan ch'ín Festo kixin tsjixrakoa tí ch'ín Pablo. ²⁴ Ntá ntáchro ch'ín Festo kixin:

—Jaha ch'ín rey Agripa tinhín la ko tinhínrá kaín rá tsíkójnksérá ntihi. Tsjehérá tí ch'ín Pablo itjen ntihi. Kaín tí sín judío k'ueka sín ch'án jie tí chjasin Jerusalén la ko kjaxin chjasin Cesarea ntihi la kuitóehya sín, tjan-

chana sín kixin chrók'uen ch'án. ²⁵ A ntá tónhenni kixin kohya jje jíe kjuasin ch'án kixin chrók'uen ch'án. Kjánchó jehe ch'án mé tsíkjanchia ch'án kixin tí ch'ín imá t'etōan chrókuinchekitōexín ijje ch'án. Ntá kjuenkayáxian kixin tsétuānhan ch'án sátsji ch'án ntiha. ²⁶ Nonahya nkehe chaxín tsokjian ts'áyéhe tí ch'ín t'etōan. Ntá jie kuétōan kjuikakjín sín ch'án kjuikao sín ch'án tí tjejóni ntihi kixin tjeōan kixin jaha ch'ín Agripa la ko kaín rá tjejorá ntihi tsjanhankíhírá ch'án kixin mé tsonóna janhan nkehe tsokjian. ²⁷ Méxra náxjónhaya chróchr'an ijnko tí chojni tjechjina naxa nonahya nkehe tí jie t'eka sín ch'án.

Ch'ín Pablo nkayakon tí ch'ín rey Agripa chrónka ch'án tí jie t'eka sín ch'án

26 Ntá tí ch'ín rey Agripa a mé ntáche ch'án tí ch'ín Pablo kixin:

—Ó nchoxon jahvá tsochronka —ichro ch'án.

Ntá tí ch'ín Pablo mé kjuaya tja ch'án ntá kjuankixin nixja ch'án, ntácho ch'án xikihí:

²—Chàna kixin tsonixja nkayakuan tí jaha rey Agripa tsoxrjanka kaín tí jie t'ekana tí sín judío. ³ Ó noheni kixin jaha la ó noha jina kuente tí ley la ko tí nkehe tinkáchónki tí sín judío, la ko jaha noha nkehe tí kjuachaxin sín kichó sín. Méxra xrjannóaha kixin tjak'etinhín jina.

Chrónka ch'ín Pablo nkexrí kjuák'e ch'án tí ósé

⁴ Kaín tí sín judío la ó nohe sín nkexrí k'uékjak'é tí chjasenná la ko chjasin Jerusalén tí naxa k'uéntasoána. ⁵ Kjaxin jehe sín la ó nohe sín la kjá jina chróchrónka sín kixin tí naxa k'uéntasoána la k'uéfariseona. A ntá tí sín fariseo a mé antsí má kjuínchexiteyéhe sín tí ley kuente tí nkehe tinkáchónkini. ⁶ Ntá ijie sijnchekitōexián jiena kixin nínkaon tí sín judío a kixin tjechōnhan kixin Dios mé sinchexchón chojni inaá xikaha tsíchénka ch'án tí sín tsík'axrjenixinni. ⁷ Tí teyó tribu tsík'axrjenixín ch'ín Israel mé tjejóchōnhen sín kixin ts'ikon sín tsoxiteyá tí nkehe tsíchronka Dios. Méxra xraxinkaon sín Dios nchakotjin la ko tie. Méxra mé xikaha tjechōnhan, jaha rey Agripa, la mé xikaha nínkakonna tí sín judío ijie. ⁸ ¿Á titekákonhyará jahará kixin Dios sinchexchón chojni tsík'en?

Ch'ín Pablo k'uéninkakonhen ch'án tí chojni tinkáchónki Ìnchéni

⁹ Janhan mé kjaxin k'uékjenkayáxian nchónhya nkehe k'uéninkakonhan tí sín tinkáchónki Jesús tí nkexro tsíkijixin chjasin Nazaret. ¹⁰ Mé xikaha kjaxin k'uékjit'a chjasin Jerusalén. Tí sín nchat'á t'etōan mé kjuanjón sín kjuachaxin kixin janhan tsochr'áxanhan ntōechiso nchónhya tí sín tinkáchónki Ìnchéni. Ntá tió k'óyán sín tí sín a mé janhan la ntáxrjan kixin ó nchoxon xikaha kónhen. ¹¹ Nchónhya veces kjuintakjasóte tí sín tinkáchónki Ìnchéni kixin chrókuítóhe sín tí nkehe tinkáchónki sín. Mé xikaha k'uékjit'a kaín xín njnko kixin

imá k'uéninkakonhan tí jehe sín la xikaha k'uájichráha sín kjónté sátsikji sín chjasin ókjé.

Chrónka ch'ín Pablo nkexrí kuinkáchónki ch'án Ìnchéni (Hch. 9.1—19; 22.6—16)

¹² Méxra xra ó sákjuia janhan chjasin Damasco. Tí sín nchat'á t'etōan mé ó kjuanjón sín kjuachaxin kixin xikaha t'aha sín xra. ¹³ A ntá tí ntia a jaha rey chrókónoha kixin chonkixin k'uíkuan éxí ijnko xrohi t'inkaséyan kujixin nkaya nkajni antsí má fuerte la kánhyó fuerte tí xrohi kuente yaon la tí t'inkaséyan mé k'uantatjen tí janhan la ko tí sín xrikjan. ¹⁴ Ntá kaín ni kjuítsínkani nonte ntá xrinahya kijnhan nixja ijnko nkexro mé nkiva hebreo nixjaxin ch'án. Ntácho tí nkexro a kixin: “Saulo, Saulo, ¿nkekuente nínkakónna xritjéyá tí janhan? Jahvá nchekjasóte asán kixin tjanjónkoa tí janhan. Éxí yóhe ijnko koxinta kónínkaon va tí chriáte sín va chica yo mé xikaha jaha.” ¹⁵ Ntá kjuánchánkiá kixin: “¿Xá nkexro jaha?” Ntá tí nkexro me kjuátehe kixin: “Janhan mé Jesús mé tí nkexro chréhé jaha. ¹⁶ Ijie t'aya jaha, tjak'exián totá. Janhan kjuánjuan kjuachaxin kixin k'uíkuan tí janhan ijie kixin jaha sijnch'ena xra. Janhan kjuéyá tí jaha kixin tsochéna chojni kixin k'uíkuan tí janhan la ko tsochronka tí nkehe tsjákohá inaá tí xik'ikuan tí janhan inaá. ¹⁷ Janhan ts'ayakonhan kixin kohya nkehe sit'aha tí sín judío la ko tí sín jehya judío. A ntá jie tētoan satsjia. ¹⁸ Méxra tētoan sátsjia tí tjejó tí jehe sín kixin takítjenkia ikon sín kixin í ts'ajihya sín ntia sítíe la ts'aji sín ntia t'inkaséyan la ko tsochóntahya tí jínahya kjuachaxián ts'etuenhen tí jehe sín. Jehe sín mé tsinkáchónki sín tí janhan. Ntá janhan ts'áyáha sín la tsjiin ijje sín la ko tsjtonhen sín tí nkehe ts'áyéhe kaín tí sín tsíkjinchetjóá Dios,” ichro Ìnchéni.

Ch'ín Pablo kuítekaon ch'án tí nkehe tsík'ikon ch'án

¹⁹ Mé xikaha jaha rey Agripa kjuintaxiteyáha tí nkehe k'uíkuan kujixin nkaya nkajni. ²⁰ Saxín kjuáqoha tí sín siín chjasin Damasco, la ntá chr'éxin chjasin Jerusalén, la ko kuenté tí estado Judea ntá kjaxin kjuáqoha tí sín jehya judío. Kjuáqoha sín kixin chrókuítóhe sín ijje sín, la chrókjan sín chrókuinkáchónki sín Dios, la ko chrókjuáqoxin sín xra jina kixin chaxín ó kjuítóxinhin sín tí nkehe tinkáchónki sín. ²¹ Mé xikaha tí xra tséxina tí sín judío a nkaxenhen njnko la tjinkaon sín chrók'óyánna sín. ²² Ntá kjuasáyé Dios kjuínkítsana la ntoá itjén ijie tjáqoha kaín chojni ntsintsí la ko chojni ihyé la ninkehó k'uantaxiánhya kuente tí nkehe tsíchronka tí sín tsíchronka itén Dios la ko tí nkehe tsíchronka ch'ín Moisés tsohen, ²³ kixin t'ichjánxin its'en Cristo la ko tsoxechón ch'án inaá. Tí itén ch'án éxí ijnko xrohi ts'inkaséyanxín tí sín siín ntihi la ko tí sín siín í so nación kixin tsaáxin sín.

Ch'ín Pablo nixjehe ch'án ch'ín Agripa kixin chrókuinkáchónki ch'án Ìnchéni

²⁴ Mé xikaha ichro ch'ín Pablo kixin kohya jje kjuasin ch'án ntá tí ch'ín Festo mé itsen k'uèya ch'án kixin: —Pablo jaha la kjá tsík'ixikján. Imá tsíkjinchekuáxian mé xikaha tsíkólókoxián —ichro ch'án.

²⁵ Ntá kjuátehe ch'ín Pablo kixin:

—Jehya tsík'ixikjánna. Jaha Festo imá tjuaha. A ntá tí nkehe ntáxrjan la ijnko nkehe jina la ijnko nkehe chaxín. ²⁶ Ntíhi itjen tí ch'ín rey Agripa. Jehe ch'án mé jina nohe ch'án kaín tí nkehe a. Méxra tjenixjahá ch'án jnkojina kixin ó òna kixin jehe ch'án ó nohe ch'an kaín nkehe kónhen kixin jehya ijnko nkehe imó kónhen tíha. ²⁷ Jaha, rey Agripa, zá títekávan tí nkehe tsík-jako tí sín tsíchrónka itén Dios ósé? Janhan la ó òna kixin títekávan jaha.

²⁸ Ntá kjuátehe ch'ín Agripa ntáchro ch'án kixin:

—Ó antsíkoá chrokuacha chrókuachróena kixin chrók'ónana cristiano —ichro ch'án.

²⁹ Ntá ntáchro ch'ín Pablo kixin:

—Ntáxrjan kixin á isé tsóxrjanka o á séhya la Dios mé tjinkaon kixin jehya jahvá chrókuinkachónkia ch'an. Náhí. Kjaxin tjinkaon ch'án kixin kaín nkexro tje-jótnhin chrók'óna sín éxí tí janhan kjánchó xikahya chróhóna sín cadena.

³⁰ Ntá kjuixin nixja ch'ín Pablo ntá k'uínkatjen tí ch'ín rey, la ko kjaxin tí ch'ín gobernador, la ko kjaxin tí tjan Berenice, la ko kaín xín tí chojni tjejótxaxin ntiha. ³¹ Ntá kaín sín k'uaxrjenta sín la ikjo sín kíchó sín. Ntáchro sín kixin:

—Kohya jje tsíkjasin tí ch'ín a kixin chrók'uenxín ch'án la ko chrókjuak'echjinaxín ch'án ntóechiso.

³² Ntá tí ch'ín Agripa ntáche ch'án tí ch'ín Festo kixin:

—Ó nchoxon chrókjuánjuan kjuachaxin sáchrókjuí tí ch'ín a tí jehe ch'án chrókjuanchahya ch'án kixin tí ch'ín imá t'etóan sinchekitóexín ijje ch'án —mé xikaha ichro tí ch'ín Agripa.

Ch'ín Pablo sákjuí ch'án chjasin Roma

27 Ntá k'uetoan sín sátsjini nación Italia. Tí ch'ín Pablo la ko í so sín tjejóchjina a mé k'uáyéhe ijnko ch'ín capitán mé it'in Julio. Jehe ch'án me ijnko policía kuènte tí ch'ín t'etóan Augusto César. ² Ntá k'uixenhenni ijnko ntabárcó tsíkjinín nó puerto Adramitio, la ó chjina sátsji tí puerto nó estado Asia. Kjaxin tjejókoni tí ch'ín Aristarco tsíkjinín chjasin Tesalónica nó estado Macedonia. ³ A ntá tí yaon chr'éxín mé kjuíjini tí puerto chjasin Sidón. Ntá ch'ín Julio mé ikjo jnkojina ch'ín Pablo ntá chjéhe ch'án kjuachaxin kixin sátsjitsjehe ch'án tí chojni chóxin ch'án ntiha kixin tsjinkitsa sín ch'án. ⁴ Ntá chr'éxín sákjuixinni chjasin Sidón. Ntá kjuíjini ijnko isla it'in Chipre la nó tja kjonni kuítóhe tíha la imá chjéhe xrintó. ⁵ Ntá k'uatóyeni tí ntayaon chjinaxón chjasin Cilicia la ko Panfilia la ntá kjuíjini chjasin Mira estado Licia.

⁶ A ntá ntiha tí ch'ín capitán, tí ch'ín k'uetoenhen tí sín soldado a, mé k'uitja ch'án í jnko ntabárcó tsíkjinín nó chjasin Alejandría sátsji nó nación Italia. Ntá ntáchro ch'án kixin tíha sátsjikoni kixin tsjijini ntiha. ⁷ Nchónhya yaon kjuíjixinni kixin imá iyó la imá xra kjuíjini chjino chjasin Gnido. Ntá naxá chjéhe xrintó tsanká ntá k'uátsínkani chjinaxón Salmón ntá kuinkátjixinni chjino tí isla Creta. ⁸ Ntá xikahó imá xra k'uátsínkani chjinó chrínta ntá kjuíjini ijnko chjasin it'in Puertos Jina chjino chjasin Lasea.

⁹ Ntá k'uitjáyannkí nchónhya yaon, ntá ó kjuixraká tí yaon xitjahya sátsjiko sín ntabárcó chrítaón ntayaon kixin ó kóchjina tí nchakuen kin. Méxra ch'ín Pablo nixjehe tí sín a. ¹⁰ Ntáchro ch'án kixin:

—Tinhínrá tí nkehe tsóxrjanka. T'íkuan kixin nchónhya kjuachrakon tsonhen. Sinchek'itjáyanni tí ntabárcó a la ko tí nkehe tjinká la kjaxin jeheni chrók'uitjáyanni —ichro ch'án.

¹¹ A ntá tí ch'ín capitán kuènte tí sín soldado a mé antsí má tjinkaon ch'án chrókuinhin tí nkehe chrónka tí ch'ín tjiko ntabárcó la ko tí nkehe chrónka tí ìnché tí ntabárcó a ntá tí nkehe ntáchro ch'ín Pablo la náhí.

¹² Jehya jina kixin tí puerto ntahó chrók'uejóni ntá chrók'uatsínkajia tí nchakuen kin, ichro sín. Kaín sín kjuenkayáxin sín kixin íchá jina sátsjixinni ntiha kixin ákué xitjahya chrókjuíjini chjasin Fenice, ijnko puerto estado Creta nó chók'á noroeste la ko suroeste, la nta-ha chrók'uejóni ntá chrók'uatsínkajia tí nchakuen kin.

Tí xrintó chjéhe chrítaón ntayaon

¹³ Ntá kjuankixin chjehe xrintó kjuixin nó sur kjánchó kánhyó fuerte ntá kjuenkayáxin sín kixin kjá jina sátsjini.

Ntá sákjuixinni ntiha kjánchó kjónté naxá sákjuíni chjinaxón tí chrínta tí isla Creta a. ¹⁴ A ntá chr'éxín ikjuí ijnko xrintó kjuixin noroeste k'uíntaté tí ntabárcó. ¹⁵ La kjuankixin xrintó sákjuíko tí ntabárcó kixin ts-jachahyani sátsjini tí sítjixín tí xrintó a. Ntá t'ichjánxín kuítóheni sákjuíko xrintó tí ntabárcó tjejóxenhenni.

¹⁶ Ntá k'uátsínkani chjino ijnko isla ntsí it'in Claudia kixin ntiha mé kánhyó tjian chjéhe xrintó. Ntá imá xra k'uitjijanni tí ntabárcó ntsí t'etenixín nóton ntabárcó jíe. ¹⁷ Ntá kjuixin kjuínchek'it'ótjen sín tí ntabárcó ntsí ntá imá chrakon sín ntá kjuínchenteto sín tí ntabárcó jíe kixin kohya nkehe tsonhen. Kjaxin tóxakonhen sín chrakon sín tsíkjine nchesen tí ntabárcó tí tsjiji sín tí it'in Sirte. Ntá kuakjinjin sín tí ka chóna ntabárcó ntá kuítóhe sín sátsjiko xrintó. ¹⁸ Ntá tí yaon chr'éxín ntá naxá imá tjian chjéhe xrintó. Ntá ik'ue sín tí nkehe sítjinká tí ntabárcó a chrínta ntayaon kixin kánhyó tsoye. ¹⁹ A ntá tí yaon níxin a mé itjani ó kuakitsjexinni tí nkehe kuènte tí ntabárcó. ²⁰ Isé k'uíkonhyani yaon la k'uíkonhyani konotsé kixin imá tjian chjéhe xrintó la ko kjaxin ó k'uitjáyenhenni kaín tí tjenkayáxinni kixin naxá chrókuaáni.

²¹ Ntá ó k'uatsínka itsjé yaon kjónehyani ntá k'uínkatjen ch'ín Pablo nixjehe ch'án kaín tí sín tjejóxenhenni ntabárcó a ntáchro ch'án kixin:

—Chrókuítekáonrá tí nkehe xrxjanka kixin chrókuitóheni tí estado Creta ntá chrók'uitjáyenhyani tí nkehe tjinká tí ntabárcō a. ²² A ntá ijie la tóxakuanhyará kixin kohya nijnko tí jahará its'enrá kixin kjónté tí ntabárcō la ts'itjáyan. ²³ Ntá tí tie a mé k'uíquān ijnko ángel tsích'án Dios tinkachónkia la ko t'ahā xrā. ²⁴ A ntá tí ángel mé chrónka kixin: “Chrakonhya jaha Pablo. T'ichjánxin tsjasán tí tjen tí ch'ín César t'etōan la kjaxin Dios la tsjinkítsa jaha la ko tí sín tjejókoa kixin ts'enhya sín.” ²⁵ Méxrā chróchrakonhyará jahará kixin tí Dios tinkachónkia la chaxín nchexiteyá tíha, éxí tsíntáchro tí ángel. ²⁶ Kjónté ó jehí t'ichjánxin sátsjikoni xríntō ijnko nonte jnkosiné ntayaon —ichro ch'án.

²⁷ Kjuixin k'uatínska iyó semana ntá ijnko tie ntá kjujini ijnko ntayaon it'in Adria ntá sákjuíko tí ntabárcō ijnko lado la í jnko lado ti xríntō. Ntá chjino k'áxrótjen ntá tí sín tjiko ntabárcō mé ó kónohe sín kixin ó chjina kjuixraká sin ijnko nonte xámá. ²⁸ Ntá kjuáchrōa sín tí nkekjāin njnkaxín tí ntā mé chóna treinta y seis metro njnkaxín. Ntá sákjuíni kjínhya la ó xíkjachrōa sín la veintisiete metro ó njnkaxín. ²⁹ Imá chrakon sín kixin ts'itjáton tí ntabárcō itjō ntá kjuinkajin sín noó chica gancho tí nóton tí ntabárcō a kixin ntahó tsochónhen tí ntabárcō hasta chrók'uinkaséyan. ³⁰ Ntá tí sín tjiko ntabárcō kjuenkayáxin sín sáchrókjui sín ntá kjuankixin kjuinkajin sín tí ntabárcō ntsí chrítaón ntā éxí tjinkaon sín chrókjuinkajin sín tí gancho chóna tí kja ntabárcō. ³¹ A ntá ch'ín Pablo ntáche tí ch'ín capitán la ko kaín tí sín soldado kixin:

—A ntá tí tsitōehya tí sín i ntihi nkaxenhen ntabárcō ntá xitjahya tsaárá —ichro ch'án.

³² Ntá tí sín soldado a mé kóchríinjint'ō sín tí hno kuènte ntabárcō ntsí tsitōhe sín tsjankí ntā.

³³ Ntá chjina t'inkaséyan a ntá ch'ín Pablo nixjehe ch'án kaín tí sín siín ntiha ntáchro ch'an kixin chrókjóné sín ichrén nkehe. Ntáchro ch'án kixin:

—Ó k'uatínska iyó semana k'uejóchrinhyará la ko kjóntehyará. ³⁴ Tinhínrá t'ichjánxin chrókjónterá ichrén nkehe tí tjinkáonrá tsaárá kixin ntihi la kohya nkexro ts'itjáyan la nijnko tí kaxíhi chóna kjará ts'itjáyan.

³⁵ Ntá xikaha ichro ch'ín Pablo ntá kuákja ch'án ijnko niotjā a la ntiha tí tjejó kaín sín ntá kjuanchia ch'án kjuasáyé Dios ntá kóchrít'ō ch'án ntá kjuankixin kjóné ch'án. ³⁶ Ntá kóchéhe sín kaín sín kjuankixin kjóné sín kjaxin. ³⁷ Kaínni tsík'ixenhenni ntabárcō mé iyó ciento setenta y seis chojni. ³⁸ Ntá kjuixin kjóné sín la kókjehe sín ntá ik'ue sín tí noa trigo a tjinká tí ntabárcō a chrínki tí ntayaon a kixin kánhyó tsoye tí ntabárcō a.

Tí ntabárcō kjuixin k'uániáinkí ntā

³⁹ A ntá ó k'uínkaséyan, a ntá tí sín tjiko ntabárcō la kjuátsoanhya sín tí nonte ntá k'uíkon sín ijnko chrínta ntā. Ntáchro sín kixin ákué tsjachahya sín sátsjiko sín tí ntabárcō ntiha. ⁴⁰ Ntá kóchríinjint'ō sín tí hno síchroéxin tí gancho kixin ntahó tsitōhe chrínki ntayaon. Ntá kjuínchentá sín tí nkehe tjikoxín sín tí ntabárcō a. Ntá kjuínchek'it'ótjen sín tí ka tjiko nkayakon tí ntabárcō. A ntá tí ntabárcō kjuankixin sákjuí chrínta ntā. ⁴¹ Xrí-

nghya kjujini ntabárcō tí iyó kójnkojiéxin ntayaon ntá ntiha kjuíkiat'ó tí kja tí ntabárcō tí nchesen siín ntiha. Ntá í xitjahya nchekinkí ninkehó, a ntá nóton tí ntabárcō kjuankixin síxíka kixin imá sítji chjehe ntā a. ⁴² Ntá tí sín soldado a mé tjinkaon sín chrók'óyan sín tí sín tjejóchjina kixin tjinkakonhya sín kixin ninkexró sáchrókjui ókjé. ⁴³ A ntá tí ch'ín t'etūenhen tí sín soldado a mé tjinkakonhya ch'án kixin its'en ch'ín Pablo ntá kjuanjonhya ch'án kjuachaxin. Íchá k'uetōan ch'án kixin tí sín jina tjitaón ntā la senó sátsji sín kixin tsjiji nonte xámá ⁴⁴ la ko tí sín noehya tsjitaón ntā a mé sátsjiko sín tí ntaba o it'ō tí ntabárcō. Ntá xikaha kaín ni kjujini tí nonte xámá la ó kuaáni.

Itjen ch'ín Pablo tí isla Malta

28 Ntá tí tjejóni kaín ni kuaáni ntá kónoheni kixin tí isla la mé nchek'in sín Malta. ² A ntá tí sín chjasin ntiha mé imá jina kjuínkítsa sín kaín ni la kjuaka sín ijnko xrohi jié kixin imá kin kixin sít'aniá chrin. Ntá k'uèya sín kixin tsochjinani kaín ni tsochjixróheni. ³ A ntá ch'ín Pablo mé sákjuíkakja ch'án í so njō tsíxámá ntá kjuasinkáte ch'án tí xrohi a. Ntá xringhya k'uaxrjenkixin ijnko konche tí xrohi a kixin imá sóa ntá xringhya k'uísímá itja ch'ín Pablo. ⁴ Ntá tí sín chjasin ntiha mé k'uíkon sín tí konche kjítjānkítjen itja ch'án ntá ikjo sín kichó sín. Ntáchro sín kixin:

—Kjá tí ch'ín a la ijnko chojni tsíkjāya a kixin kjónté kuaá ch'án k'uénxinhya ch'án ntayaon la Dios la í tjinkakonhya kixin naxā tsjak'echón ch'án.

⁵ A ntá jehe ch'án kótsjénka ch'án itja ch'án chrítaón tí xrohi kixin ntiha ts'anótjen tí konche, ntá jehe ch'an la kohya nkehe kónhen ch'án. ⁶ Ntá kaín sín tjejóchónhen sín kixin ách'e ts'atjōyé itja ch'án o ách'e its'en ch'án. Ntá kjuixin k'uejóchónhen sín isé la k'uíkon sín kixin kohya nkehe kónhen ch'án ntá kjuitóxin sín tí nkehe kjuenkayáxin sín la ntáchro sín kixin jehe ch'án mé ijnko dios tíha, ichro sín.

⁷ Ntá chjino tí k'uejóni a mé itjen nontēe ijnko ch'ín t'etōan kuènte isla me it'in Publio. Mé jina kjuanjon ch'án kjuachaxin k'uejóni ntōe ch'án la kjuanjon ch'an nkehe kjóneni iní yaon. ⁸ Ntá it'é tí ch'ín Publio a mé tjetsínka ch'án kixin níhi ch'án chóna ch'án sóa la ko chinjnī. Ntá ch'ín Pablo sákjuítsjehe ch'án la kjuixin nixjehe ch'án Dios, ntá kjuák'etja itja ch'án tí ch'ín a ntá kuítōhe ch'án jina. ⁹ Mé xikaha kjaxin kóchjina í so tí sín níhi siín tí isla ntá kaín sín kuítōhe sín jina. ¹⁰ Na ntá imá kjuikosáyehe sín ch'án. A ntá chr'éxin tí kjuixin k'uixenhenni ntabárcō inaá ntá kjuanjon sín kaín nkehe t'ichjánxinhinni sátsjikoni.

Kjujini ch'ín Pablo chjasin Roma

¹¹ Ntá k'uatínska iní nitjó tjejóni tí isla ntá k'uixenhenni ijnko ntabárcō mé ntahó tsíkitohe k'uatínskajia tí nchakuen kin. Tí ntabárcō a mé tsíkjixín chjasin Alejandro la ko mé chóna nkehe tsíkjanoya chóna ihnjé dios Cástor la ko Pólux. ¹² Ntá sákjuíni ntá kjujini puerto chjasin Siracusa la ntaha kuítōheni iní yaon. ¹³ Ntá

xík'ixenhenni tí ntabárcō la k'uatsínkani chjinaxón tjen ijnko nonte ntá kjuíjini chjasin Regio. Ntá tí yaon chr'éxin a ntá kjuankíxin chjéhe xríntō kjuixín nó sur, ntá yaon yóxin ntá kjuíjini chjasin Puteoli. ¹⁴ Ntá ntiha xetani iso kíchó ni, a ntá tjinkaon sín ts'ejókoni sín ntiha. Ntá k'uéjókoni sín ijnko semana ntá chr'éxin sákjuíni chjasin Roma. ¹⁵ Ntá tí sín kíchó ni chjasin Roma la ó nohe sín kíxin tsjijini. Ntá iso sín la xetani sín ntja chjasin Foro Apio la ko í so sín xetani sín chjasin Tres Tabernas. Tió tí ch'ín Pablo k'uíkon tí jehe sín a kjuanchia ch'án kjuasáya Dios la imá kóchéhe ch'án. ¹⁶ Ntá tió kjuíji sín chjasin Roma ntá tí ch'ín capitán kjuikénhen tí sín tjejóhijina, k'uáyéhe ti ch'ín jefe ts'ayakonhen ch'án. A ntá ch'ín Pablo la kuitōhe ch'án ókjé kjuák'e ch'an la ijnko soldado a k'uáyakonhen tí jehe ch'án.

Ch'ín Pablo kjuako chjasin Roma

¹⁷ Ntá k'uátsínka iní yaon ntá tí ch'ín Pablo a mé k'uíyehē ch'án kaín tí sín judío tjetooan kuènte chjasin Roma. Ntá tió kjuixín kójnkotsé kaín sín ntá ntáchro ch'án kíxin:

—Kíchóni, kohya ninkehó jiē kjuásian kíxin chrókónínkakonna tí sín judío la jehya kíxin ninkakonxian tí nkehe k'uékinkáchónki tí sín tsík'axrjeníxinni. A ntá kjónté itséna sín kjuak'echjina sín tí janhan chjasin Jerusalén la ko kjuínchekjasótena tí sín romano a.

¹⁸ Ntá k'uitjahya sín ninkehó jiē chonta. Ntá tjinkaon sín chrók'uatjántana sín kíxin k'uitjahya sín ninkehó jiē chrók'uénxian. ¹⁹ A ntá tí sín judío a mé imá kónínkaon sín tjanchia sín jiē. Ntá t'ichjánxin tsjanchiani kíxin tí ch'ín César mé chrókjuinchekitōexín ch'án nkehe tí jiē chóntani, kjónté chóntahyani ninkehó jiē ts'eka tí sín tí naciōn kuénténi. ²⁰ Méxra k'uíyāhará kíxin tjinkaonni ts'íkuān tí jahará la ko tsonixjāharáni kíxin tinkáchónki ni tí nkexro tjejóhónhen kaín tí sín israelita mé xíkaha t'íkonrá kíxin tjechronetoxíni cadena ntihi.

²¹ Ntá ntáchro sín kíxin:

—K'uáyèhyani ninkehó xroon chrókjuixín Judea kuènte tí jaha la ko kuihya nijnko tí sín kíchó ni judío chróntáchro sín ichrén nkehe jínahya tsíkijch'e.

²² Tjinkaonni chrókuinhinni nkexrí tjenkayáxian kíxin ó noheni kíxin itsjé chjasin t'ántaxínhjn sín tí nkehe nixín tjákua —mé xíkaha ichro sín.

²³ Ntá chr'éxin kjuéyá sín ijnko yaon tsinhin sín nkehe tsochrónka ch'ín Pablo. Ntá kójnkotsé nchónhya chojni tí nchia kjuák'e ch'án. Kuenté yaon chrónka ch'án nkexrí tí kjuachaxin kuènte Dios. Nixjehē ch'án sín kíxin chrókuitekaon sín tí nkehe kjuako ch'ín Jesús, la chrónkaxín ch'án kíxin nkexrí nixja tí ley kuènte ch'ín Moisés la ko tí tsíkjin tí sín profeta ósé. ²⁴ Ntá iso tí sín mé kuítekaon sín tí nkehe ntáchro ch'ín Pablo. A ntá í so sín na kuitekakonhya sín. ²⁵ Ntá jnkokoáhya kjuenkayáxin tí jehe sín la iso sín tjinkaon sín kíxin sáchrókjui sín, ntá ch'ín Pablo mé ntáchro ch'án kíxin:

—Ntoá nixja tí nkehe chénka Nchakuen Dios tí sín tsík'axrjeníxinni ósé chrónkaxín ch'ín profeta Isaías ntáchro kíxin:

²⁶ Sátjia nixjehé tí chojni a kíxin jehe sín kjónté tjejótinhin sín la tienxínhya sín, la kjónté tjejótsjehe sín la t'íkonhya sín.

²⁷ A ntá asén tí chojni tí chjasin i la tsík'óna imá cha la ntatsjon sín la tsík'ikjehē la ikon sín la tsíchr'áto kíxin t'íkonxínhya sín kíxin tinhín sín la tjinkakonhya sín chrókuienxín sín, la tjinkakonhya chrókuienxín asén sín.

Í tjinkakonhya sín chrókjan sín chrókuinkáchónki sín tí janhan kíxin ntá janhan chrókjuintakitōha sín jína. † Mé xíkaha tsíkjin ch'ín Isaías. ²⁸ Méxra chrókónohará jahará kíxin ijie tí sín jehya judío me ts'áyéhe sín tí nkehe tsjanjon Dios tsaáxin sín kíxin jehe sín mé tsinhin sín.

²⁹ Ntá xíkaha ichro ch'ín Pablo ntá tí sín judío sákjuí sín la tinkákjo sín kíchó sín.

³⁰ A ntá ch'ín Pablo kuitōhe ch'án tí nchia tsíkjen ch'án iyó nánó. La kjuanjon ch'án kjuachaxin k'uéjō tí sín kjuíjitsjehe ch'án. ³¹ La kjuako ch'án tí kjuachaxin kuènte Dios la ko kjuako ch'án kuènte Ìnchéni Jesucristo. La kohya ninkexró k'uínkákonhen tió kjuako ch'án. Ó tjen.

† 28.26–27 *Isaias* 6.9–10

ROMANOS

Ch'ín Pablo ikjin xroon k'uáyéhe tí nínko chjasin Roma

1 Janhan Pablo mé t'ahá xrá Jesucristo mé kjian tí xroon i. Kjueyána Dios kixin sít'ahá ch'án xrá tsjàkua tí tan jína tsaáxinni.

²Tíha mé tsíntácho Dios senó kixin tsoxiteyá éxí nixja tí xroon nixjāxín tí sín tsíchronka itén ch'án ósé. ³Tí tan a mé chrónka nkexrí tjen Ìnchéni Jesucristo Xjeen Dios. Jehe ch'án mé tsík'óna ch'án chojni k'uaxrjeníxin ch'án tí sín tsík'axrjeníxin tí rey David. ⁴Tí kjuachaxin jié mé kjuakoxín kixin jehe ch'án mé chaxín Xjeen Dios kixin ó xechón ch'án la chóna ch'án Nchakuen Dios imá tjetóan. ⁵Kjuasáyé Jesucristo k'uáyéhe ni kjuachaxin kixin sich'ehe ni ch'án xrá sátsjichronkaxinni itén ch'án kixin kaín xín chojni chónhaya ch'án kuente chjasintajni chrókuitekaon sín ch'án la ko chrótjuèhe sín ch'án. ⁶Jahará k'uék'ejorá éxí tjejó tí jehe sín, a ntá jie la kjueyará Dios kixin chrókuítekáonrá Jesucristo.

⁷Janhan ikjian tí xroon chr'anhánrá kaín rá tjejórá chjasin Roma. Tjuàhará Dios la kjueyará ch'án kixin tjóá chrók'uejórá. Kjuasáyé It'éni Dios la ko Ìnchéni Jesucristo kixin kjuanjón ch'án kjuaxróxin k'uayéhérá.

Ch'ín Pablo tjinkaon chrókjuitsjehe ch'án chjasin Roma

⁸Xrankíxixín kjuachaxién Jesucristo tjánchàxian Dios kjuasáya kixin jahará ó kuítekáonrá ch'án la ko nkuíxín chjasintajni nixja sín nkexrí tinkachónkirá ch'án. ⁹Dios, tí nkexro t'ahá xrá kaín asenná xrjanka tí tan jína kuente Xjeen ch'án, mé nohe ch'án kixin xráxín xráxinkavan tí jahará tió nixjahá ch'án. ¹⁰Xráxín tjáncháha Dios kixin tí chrókjuanjón ch'án kjuachaxin la chrókjuasántsahará. ¹¹Kixin tjínkavan chrókjuasántsahará tí jahará kixin chrókjuínkítsa tí jahará kixin chrók'uitjará jína nkexrí chrók'uejórá ntoá. ¹²Me xíkaha tsóchàhará la ko tsóchàna kixin jnkokoá tinkáchónkini Ìnchéni, jahará la ko janhan.

¹³Kíchóni, tjínkavan chrókónohará kixin nchónhaya veces tjínkavan chrókjuásantsahará kjánchó naxá xitjahya tsjasán. Tjínkavan chrókjuasán kixin chrókjuít'a xrá kuente Ìnchéni kixin chrókjuachani nchónhaya chojni chrókuinkáchónki Dios éxí kjuít'a xrá í so chjasin naxá chónhaya sín Dios. ¹⁴T'ichjánxin tsjākōhā kaín chojni, á chojni griego o á chojni jehya griego o á chojni nohe o á chojni noehya. ¹⁵Mé xíkaha xrá ó tjéchonhan chrókjuasán chrókjuákohará tí tan tsaáxinrá tí jahará tjejórá chjasin Roma.

Tí kjuachaxin kuente tí tan jína

¹⁶Tósuànahya xrjanka tí evangelio kixin táha ijnko tan jína kixin chóna kjuachaxin kuente Dios chrókuaáxin kaín xín tí chojni chrókuitekaon, mé saoxín tí sín judío la ko kjaxin tí sín jehya judío. ¹⁷Kixin tí tan jína kuente Dios tjakuexín tí jeheni kixin chrókótjuáxin ijiéni kixin tinkáchónkini ch'án la jehó ch'án tinkáchónkini. Exí ntácho xroon itén Dios kixin: "Tí nkexro kótjóá kixin kuítekaon sín Dios mé táhó ts'ejóchónxin sín." †

Tí jie tjasin chojni

¹⁸Dios tjen nkaya nkajní mé tsónínkakonhen ch'án tí sín jínahya tjasin jie, mé sinchekjasóte sín ch'án. Tí jie jínahya tjasin sín mé t'inkákonhen kixin chrókónohe sín tí nkehe jína chaxín. ¹⁹Jehe sín ó nohe sín jína nkexrí tjen Dios kixin jehe ch'án kjuakuexín ch'án tí jehe sín. ²⁰Tí kjuachaxin kuente Dios kjónté t'ikonhyani la kjánchó noexinni kixin tí nkehe kjuích'éna ch'án. Kixin tí naxá k'ónahya chjasintajni kónoxín kixin jehó ch'án mé Dios t'etqan la ko chóna ch'án kjuachaxin jnkochrín. La ntá tí sín jínahya xitjahya tsontácho sín kixin k'uénoehya sín. ²¹Kjónté nohe sín kixin xíkaha itjen Dios la tjikosáyehya sín ch'án la ko ni tjanchehya sín ch'án kjuasáya. Tjenkayáxin sín tí nkehe ninkehó sínkíhya kixin jínahya asén sín la tí sítié ó kuítóhe sín. ²²Kjónté ntácho sín kixin imá nohe sín kjánchó imá lōntj sín kixin antsí kjuasin sín jie. ²³A ntá ó kjuixin kjuínki sín tí nkehe tinkáchónki sín la ko kuítekakonhya sín tí kjuachaxién Dios itjen jnkochrín, t'enhya. A ntá ijie tinkáchónki sín tí nkehe tsíkjanoya tóyóhe chojni it'en. Kjaxin tinkáchónki sín koxroxé tsíkjanoya la ko konche la ko iko chóna noó tōté.

²⁴A ntá xíkaha Dios kuítóhe ch'án tí jehe sín kixin chrókjuich'e sín tí nkehe jínahya tjenkayáxin sín ntá xíkaha ch'e sín ijnko nkehe chrókósuèxin sín ch'ehe kichó sín ²⁵kixin kuítekakonhya sín tí nkehe chaxín kuente Dios, a ntá tí nkehe jínahya mé kjueyá sín. Kjuích'éna sín dios kuente sín tí nkehe tsíkjich'éna Dios. A ntá tí nkexro kjuích'éna tí nkehe la titekakonhya sín. Jehe ch'án mé chrókjuancheheni ch'án kjuasáya jnkochrín kixin jehe ch'án mé kaín tí nkehe síin mé kuente ch'án. Amén.

²⁶La ntá xíkaha kjuích'e sín ntá Dios kuítóhe ch'án tí jehe sín kixin chrókjuich'e sín tí nkehe chrókósuèxin sín chrókjuich'e sín. Kjónté tí chojni chjin la kuítóhe sín

† Habacuc 2.4

tí ichjin sín la ntá kjuích'éna sín asén sín chojni ntoa. ²⁷ A ntá kjaxin xikaha tí chojni ntoa kuitohe sín chróchónta sín chojni chjin la tjinkaon sín tí nkehe ntoáhya. La ntá ch'e sín nkehe chrókósuèxin sín ch'e-he kichó sín jnkokón ntoa sín. Mé xikaha mé tí cuerpo kuènte sín mé tsjasótéxin sín tí jie kjuasin sín. ²⁸ Tjinkakonhya sín tsoxraxinkaon sín Dios ntá jehe ch'án mé kuitohe ch'án tí jehe sín kixin xikaha tsjenkayáxin sín tí nkehe jínahya kixin sich'e sín tí nkehe chrókjuich'ehya sín. ²⁹ Nchónhya jie chónhta sín mé tí nkehe ntoáhya ch'e sín, la tjinkaon sín chrókuakja sín í jnko chojni chjin ókjé, la ko tí nkehe jínahya ch'e sín, la ko tjinkaon sín jehó sín chróchónta sín itsjé nkehe, la ko imá tjasin sín jie, la ko jehe sín chjinoxínhin sín, la ko tjinkaon sín chrók'óyán sín kichó sín, la ko itje sín kjuanínkaon, la ko ch'ia sín la ko jínahya sín xriko sín kjuach'ia. ³⁰ T'ántaxínhin sín kichó sín la ko nínkakanhen sín Dios, la ko jehó sín chrók'uetóan sín, la ko nchehnke sín, la ko jehó sín ch'éna sín nkehe jínahya tjasixín chojni jie, la ko tjikosáyehya sín it'é sín la ko iné sín. ³¹ Tienxínhya sín la nchexiteyáhya sín nkehe nixja sín, la ko tjuèhya sín kichó sín, la ko tjinkakonhya sín sinchek'itjáyenhen sín ichrén jie kjuasinhin kichó sín, la ko tikonóghya kichó sín. ³² Jehe sín ó nohe sín jína kixin nkexrí k'uetóan Dios la jehe sín ó nohe sín kixin tí jie kjuasin sín chrók'uenxín sín, la kjónté xikaha ó nohe sín, la naxa tjasin sín jie la kjaxin chéhe sín chrók'uikon sín ókjé nkexro chrókjuasin jie xikaha.

Dios nchekitogéxin ch'án tí jie tjasin chojni

2 Mé xikaha jahará xitjahya tsontáchrórá kixin chontahyará jie a ntá tékará jie tí í so sín tjasin jie. A ntá tí xikaha ch'erá la jahará xritjéyará nkexrí chrókjuasótéxinrá kjaxin kixin jahará jnkokón jie tjásinrá. ² Ó noheni kixin ntoá sinchekitogéxin Dios tí jie kjuasin chojni kixin sinchekjasóte ch'án tí sín xikaha tjasin jie. ³ A ntá jahará la tékará jie í so chojni ntá jahará kjaxin la xikaha jnkokón jie tjásinrá. ¿Á tjenkayáxinrá kixin tsjachará tsinkehérá tí sinchekjasótiará Dios ní? ⁴ ¿Á kjonieghérá tí kjuaxróxin tsjéjehya tjanjon Dios kixin tjechónhen ch'án naxa nínkakuanhyará ch'án? A ntá jahará la kuiénxinhyará kixin Dios tjuàhará kixin tjinkaon ch'án chrókuítoghérá tí nkehe jínahya tjenkayáxinrá. ⁵ Kjánchó jahará imá icha asánrá, tjinkákonhyará chrókuítoghérá tí nkehe jínahya tjenkayáxinrá, a ntá antsí má nchek'ánkírá tí nkehe jínahya tsjasótéxinrá tí yaon tsjixixín tió tsonoxín kixin sinchekjasóte Dios chojni. ⁶ Jehe ch'án mé tsjenkehe ch'án jnkojnko chojni nkehe tí xra tsíkijich'e sín. ⁷ Tsjanjon ch'án kjuachón ts'áyéhe tí sín tjejá sín tí nkehe náxrjón la ko tí kjuachaxin ts'itjáyanhya la ko xráxin kjuích'e xra jína. ⁸ A ntá tsonínkaon Dios sinchekjasóte ch'án kaín tí sín nchehnke la ko tí sín tjinkakonhya chrókjuich'e sín tí nkehe jína. A ntá náhí, la íchá má kóxrjínhin sín kjuích'e sín tí nkehe jínahya. ⁹ Mé xikaha tsjasóte sín la ko kjuaxróxinhya tsonhen kaín tí sín kjuích'e tí nkehe jínahya, mé senó tí sín judío la ko kjaxin tí sín jehya judío. ¹⁰ A ntá Dios mé tsjanjon

kjuachaxin la ko tsjanjon ch'án kjuaxróxin la ko tsjikosáyehe ch'án kaín tí sín kjuínchexiteyéhe ch'án kjuích'e tí nkehe jína, mé senó tí sín judío la ko kjaxin tí sín jehya judío.

¹¹ Dios la t'ikon kixin kaín chojni la jnkokón sínkí. ¹² Kaín tí sín tjasin jie kixin noehya sín tí ley tsíkjin ch'ín Moisés la kjónté chónhya sín tí ley la its'en sín. A ntá tí sín ó nohe tí ley tsíkjin ch'ín Moisés ntá tjasin sín jie, la tí ley a mé tsjanchia jie tsjasótéxin sín. ¹³ Jehya tí sín ó chrókuinhón tí ley la ó chrókótjuáxin ijié sín. Náhí. Tí sín sinchexiteyéhe sín tí nkehe k'uetóan Dios mé tsotjuáxin ijié sín. ¹⁴ A ntá tí sín jehya judío chónthaha sín tí ley t'etuènen sín la ntá tió jehó sín chrókjuinchexiteyéhe sín éxi nixja tí ley la jehí jehó sín t'etuènen asén sín. ¹⁵ Kixin tí kjuínchexiteyá sín ch'e sín tí nkehe jína mé tjakoxin sín kixin asén sín xraxinkakonxin sín tí nkehe ntoá la ko asén sín tjan-chankíhi sín á jína tjejó sín o náhí. ¹⁶ Itsi tí yaon la Dios mé sinchekitogéxin kjuachaxin Ínchéni Jesucristo kaín nkehe imó kjuích'e chojni éxi nixja tí tan jína tjákua janhan.

Tí sín judío la ko tí ley tsíkjin ch'ín Moisés

¹⁷ A ntá jahará ntáchrórá kixin jahará judíorá la tinkachónkirá tí ley tsíkjin ch'ín Moisés la ko nchehnkerá kixin tinkachónkirá Dios. ¹⁸ Ó nohará tí nkehe tjinkaon Dios la ko tí ley ó kjuakohará kixin chrókjuéyará tí nkehe jína. ¹⁹ Ihnkerá kixin nohará tsjákohérá tí sín t'ikonhya la ko jahará mé xrohi ts'inkáséyanxín tí sín ixri sítié, ichrorá. ²⁰ Ntáchrórá kixin nohará tsjákohérá tí sín noehya la ko tsjínkítsará tí sín tienxínhya kixin jahará chontará tí ley chrónka kjuaxrexinkaon jína la ko tí nkehe chaxín, ichrorá. ²¹ Jahará tjákohérá í so chojni, a ntá jahará, ¿nkekuènté tjákoéhyará asánrá xikaha? Jahará tjákohérá chojni kixin chrókueéhya sín, a ntá jahará la, ¿nkekuènté tjeerá? ²² Ntáchrórá kixin xitjahya tsochónhta chojni yaá chojni chjin, a ntá jahará la, ¿nkekuènté xikaha ch'erá? Ntáchrórá kixin titekákonhyará tí nkehe tsíkjanoya, kjánchó jahará, ¿nkekuènté tjeerá tí nkehe tjete síin nkaxenhen njnko? ²³ Nchehnkerá kixin chontará tí ley, a ntá jahará chontahyará kjuasáyé Dios kixin kjuínchexiteyéhyará éxi k'uetóan tí ley. ²⁴ Ntoá ntáchró tí xroon itén Dios kixin: "Tí sín jehya judío la t'ántaxínhin sín Dios kixin tí ijiárá." ²⁵ A ntá tí chaxín kjuínchexiteyará tí ley tsíkjin ch'ín Moisés la ntá jehya chónkó tsíkará xroye. A ntá tí kjuínchexiteyéhyará tí ley la éxi tsíkahyará ninkehó xroye. ²⁶ A ntá tí sín tsíkahya xroye kjánchó titekaon sín nkexrí t'etóan tí ley la tjejó sín éxi ó tsíka sín xroye kjónté chaxínhya chónhta sín. ²⁷ A ntá tí nkexro kuáhya xroye tí cuerpo chónhta kjánchó nchexiteyéhe tí ley, mé jehe sín tsjanchia sín jie tí jahará kixin jahará kuítekákonhyará kjónté chontará tí xroon nixja tí ley la ko kjónté ó tsíkará xroye. ²⁸ A ntá tí xikaha la chaxínhya judío jahará kixin ó ntója ó chontará xroye la chaxínhya tsíkará xroye kixin chrítaón cuéporá ó, chontará. ²⁹ A ntá tí chojni chaxín judío la t'ichjánxin chróchónhta sín xroye nkaya asén sín. Jehya tí ley chrók'uetóan

xikaha chrókonhen. Náhí. Táha la Nchakuen Dios. Jehya kixin chojni chrókóxrjnhjn kixin ó nchoxon. Náhí. Dios mé tsoxrjnhjn kixin nchoxon tíha.

3 ¿A ntá nkehe tsonhen kixin ntáchro sín kixin judío sín la ko nkehe tsonhen kixin tsíka sín xroye?

² Chaxín xikaha jína kixin Dios kjuanjon tí itén ch'án saoxín k'uáyéhe tí sín judío kixin chrókjuinchexiteyá sín. ³ A ntá ¿nkehe tsonhen tí jnkojín tí jehe sín chrókjuinchexiteyáhya sín? Kjónté xikaha chrókjuich'e sín la, ¿á chrókuítóhe Dios chrókjuinchexiteyáhya ch'án tí nkehe tsintáchro ch'an? ⁴ Kjá náhí. Dios la sinchexiteyá kaín nkehe tsintáchro ch'án kjónté kaín chojni chrókjuich'ia. Ntáchro xroon itén Dios kixin: Tsontáchro chojni kixin ntoá tí nkehe ntáchroa.

Tíha mé tsjachaxian tí tsjanchia sín jie. [†]
⁵ Tí jie chóntani mé tjakoxin kixin Dios mé nohe nkexrí sinchekitoexín ch'án ijíe chojni. ¿A ntá nkehe chróchroni? ¿A ntoáhya chrókjuich'e Dios kixin chrókjuinchekjasóteni ní? (A ntá janhan nixja éxí nixja chojni ó.) ⁶ Kjá náhí. A ntá tí jehya ijnko nkexro jína tí jehe ch'án, ¿ntá nkexrí chrókjuinchekitoexín ch'án ijíe chojni chjasintajni?

⁷ A ntá tí chrókjuinkítsa tí kjuach'ia kuèntana kixin chróknoaxínrá tí nkehe chaxín kuènte Dios, ¿a ntá nkekuènté ts'ékaráni jie kixin janhan mé ijnko chojni chóna jie? ⁸ Tí xikaha la, ¿á chrókjuich'eni tí nkehe jínahya kixin ntá chrókui tí nkehe jína? Mé xikaha ichro iso chojni t'ekani jie kixin xikaha tjakoni, ichro sín. Tí sín a chrókjuasóte sín kixin xikaha ichro sín.

Kaínni chóntani jie

⁹ ¿Ntá nkexrí? Jeheni judíoni la, ¿á antsí má tjetooani, a ntá tí sín í so la, á náhí? Kjá náhí. Kixin kaín ni chojni judíoni la ko tí sín jehya judío mé kaín ni kjuínchexiteyéhéni tí jie kjuasinni. ¹⁰ Ntáchro tí xroon itén Dios kixin:

Kohya ninkexró chrókjuich'e tí nkehe jína, la kohya njnko chojni.

¹¹ Kohya ninkexró tienxín,
Kohya ninkexró chrókjueyá Dios.

¹² Kaín chojni k'uék'aji sín tí ntja jínahya la ko kaín chojni jnkokón k'uáji sín ntoáhya,
kohya ninkexró chrókjuich'e tí nkehe jína la kohya njnko chojni. ^{††}

¹³ Tí isin chojni la éxí tòye tsíxrankehe tsíxravá chojni kixin tí nejen chojni ch'iyaxín.

La tí veneno kuènte konche chóna ir'va chojni. [‡]

¹⁴ Tí ir'va chojni tsíkaón nkehe jínahya la ko kjuanínkaon. ^{‡‡}

¹⁵ Xritinká sín kixin tjinkaon sín chrók'óyán sín chojni.

¹⁶ Tí ntja k'uáji sín tió xikaha kjuích'e sín mé kjuínchek'itjáyan sín kaín kjuaxróxin k'uéchóna ókjé chojni.

¹⁷ Chónhya sín tí ntja tjanjon kjuaxróxin ^{‡‡}

¹⁸ Kixin kjuenkayáxinhya sín chróchrakõnhen sín Dios. ^{‡‡‡}

[†] Salmo 51.4 ^{††} 3.10–12 Salmo 14.1–3, Salmo 53.1–3 [‡] Salmo 5.9, 140.3 ^{††} Salmo 10.7 ^{‡‡} Isaías 59.7–8 ^{‡‡‡} Salmo 36.1

Mé xikaha ntáchro itén Dios.

¹⁹ Ó noheni kixin kaín tí nkehe nixja tí xroon chóna tí ley mé k'uètuènen kaín tí sín tinkáchónki tí ley kixin ntá kaín chojni chjasintajni chrótáni sín kixin kaín chojni tsjasóte kixin Dios mé sinchekitoexín ijíe kaín chojni. ²⁰ Kixin ninkexró chrókjuacha chrókótjuáxin ijíe sín kixin chrókjuinchexiteyéhé sín tí nkehe t'etõan tí ley. Tí ley la jehó ch'e xra tsoñoexinni kixin chóntani jie.

Tsaáxinni kixin tinkáchónkini Cristo

²¹ A ntá jehya tí ley chrókuaáxinni. La ntá ó kónoxín nkexrí Dios tsaáxinni la kjaxin tí xroon chóna ley la ko tí nkehe nixja tí sín profeta la ó nixja xikaha.

²² Tsotjuáxin ijíeni kixin titekaonni Jesucristo kixin kaín chojni chrókuaáxin tí tsitekaon sín tí jehe ch'án kixin t'ikon ch'án kixin jnkokón tsjehe kaín chojni. ²³ Kixin kaín xín chojni kjuasin jie la k'uáyéhya sín tí kjuachaxin chrókuaáxin sín. ²⁴ A ntá kjuasáyé Dios kixin k'uenyákonhenni Cristo Jesús la kótjuáxin ijíeni. ²⁵ Dios mé ich'án ch'án Cristo, kuámá ijíeni, k'uenyákonhenni ch'án kixin chrókuinkáchónkini ch'án ntá chrókuaáxin. Mé xikaha kjuích'e Dios kixin kjuakoxin ch'án kixin ntoá kjuenkayáxin ch'án kixin kónínkakõnnya ch'án kjónté nchónhya jie tsíkjasinni senó. ²⁶ Xikaha kónhen kjuakoxin Dios kixin jína ch'án ijie la naxa tjechõnhen ch'án sinchetjóá ch'án ijíe tí sín kuítekaon Jesús.

²⁷ A ntá ¿nkekuènté chrókjuinchehnkeni? Xitjahya sinchehnke chojni nkayakon Dios kixin jehya kixin kjuínchexiteyéhéni tí nkehe k'uètuõan tí ley ntá chrókuaáxinni. Náhí. Kixin Ìnchéni kuítekaonni ntá kuaáni. ²⁸ Mé xikaha ó noheni kixin tsotjuáxin ijíeni tí tsitekaonni Dios kixin Dios tahya cuenta á kjuínchexiteyéhéni tí nkehe k'uètuõan tí ley.

²⁹ ¿Xá Dios mé kuènte tí sín judío ó? ¿A kjaxinhya Dios kuènte tí sín jehya judío? Kjá kjaxin Dios mé kuènte tí sín jehya judío. ³⁰ Kixin kohya í jnko Dios la jehé ch'án sinchetjóá ch'án ijíeni kixin tinkáchónkini ch'an la tahya ch'an cuenta á chóntani xroye o náhí. ³¹ A ntá tí tinkáchónkini Ìnchéni, la ¿á í chrókjuinchexiteyáhyani tí ley? Kjá náhí. Íchá antsí má jína chrókjuinchexiteyéhéni tí ley.

Tí kjuakoxin ch'ín Abraham

4 ¿Nkehe tsixroni kixin nkehe k'uitja ch'ín Abraham, tí nkexro k'uaxrjenixinni ósé? ² Ntá ch'ín Abraham tí chrókótjuáxin ijíe ch'án kixin tí xra kjuích'e ch'án ntá chrókóhnke ch'án, kjónté jehya nkayakon Dios. ³ A ntá ntáchro xroon itén Dios kixin: "Ch'ín Abraham kuítekaon Dios ntá táhó kuaáxin ch'án la ko kótjuáxin ijíe ch'án." ^{‡‡‡} Jnkojín chojni kjuích'e xra la jehya k'uáyéhekoá ch'án tí chichaon. Náhí. Táha la tí xra kjuích'e ch'án mé kjuacha ch'án. ⁵ A ntá kjónté jnkojín chojni kjuích'ehya ninkehó xra ntá chrókuítekaon ch'án Dios a ntá Dios la sinchetjóá ch'án kjónté tí nkexro chóna jie, kixin tí kuítekaon ch'án Dios la táhó mé kuaáxin ch'án. ⁶ Mé kjaxin tsintáchro ch'ín David

^{‡‡‡} Génesis 15.6

kíxin náxrjón tí nkexo kótjóa kíxin Dios kuáhya kuentá nkerí jje tsíkjasin ch'án. ⁷ Ntáchro ch'ín David kíxin:

Náxrjón tjejó tí nkexo kjuíncheyaon Dios kjónté jí-nahya kjuích'e sín la kjuakjiiin ch'án ijje sín.

⁸ Náxrjón tjejó tí nkexo kíxin Ìnchéni kuáhya ch'án kuentá tí jje k'uéchónta sín. †

⁹ ¿Á jehó tí sín ikuá xroye la náxrjón tjejó sín o á kjax-in náxrjón tjejó tí sín chóntahya xroye? Ó chrónkani kíxin Dios la kuikonóhehé tí ch'ín Abraham kíxin kuítekaon tí jehe ch'án la táhó mé kótjuáxin ijje ch'án.

¹⁰ ¿A ntá nkesá tsíkjincheyaon Dios tí ch'ín Abraham? ¿Á ó tsíka ch'án xroye o náxa náhí? Kjá náxa náhí. Senó tsíkjincheyaon Dios tí jehe ch'án. ¹¹ Ntá chr'éxin ch'ín Abraham ikuá ch'án tí xroye éxi ijnko sello kjuakoxin Dios kíxin ó kótjuáxin ch'án kíxin kuinkáchónki ch'án Dios. Kíxin ntá xikaha ts'óna ch'ín Abraham xjeen kaín chojni tinkáchónki Dios, kjónté chojni tsíkaha xroye. Ntá kjaxin jehe sín la Dios sinchetjóá ijje sín. ¹² La ko jehe ch'ín Abraham mé ts'axrjenixin ch'án kaín tí sín tsíka xroye kíxin ntá chrókuinkáchónki sín éxi kuinkáchónki tí jehe ch'án kjónté náxa tsíkaha ch'án xroye.

Tí nkehe tsintácho Dios la tsoxiteyá kíxin tinkáchónki sín tí jehe ch'án

¹³ Dios tsintáche ch'ín Abraham kíxin jehe ch'án la ko tí sín ts'axrjenixin ch'án ts'áyéhe sín chjasintajni ts'ejó sín. A ntá tí nkehe ts'áyéhe ch'ín Abraham la jehya kíxin kuítekaon ch'án tí ley. Náhí. Ts'áyéhe ch'án tíha kíxin kuítekaon ch'án Dios la ntá Dios mé kjuínchetjóá ijje ch'án. ¹⁴ A ntá tí jehó tí sín tsíkjinchexiteyéhe tí ley ó chrók'uáyéhe sín tí nkehe chrókjuanjon Dios, a ntá tí nkehe tinkáchónkini la ó chrókóchónkó xikaha la ko tí nkehe tsintácho Dios la kjá ninkehó sínkíhya tí xikaha. ¹⁵ Kíxin tí ley la tjikao kíxin tsjasótexín chojni, a ntá tí chrókókohya ley la chrókókohya nkehe chrókjuanchia jje.

¹⁶ Méxra tí nkehe tsintácho Dios la kjuasáyé ch'án tsjanjon ch'án kíxin kuinkáchónki ch'ín Abraham tí jehe ch'án la ntá Dios sinchekitonhen tíha kaín tí sín tsík'axrjenixin ch'án. Jehya jehó tí sín tinkáchónki tí ley chrók'uáyéhe sín tí nkehe tsjanjon Dios. Náhí. Kjaxin tí sín tsitekaon éxi kuítekaon ch'ín Abraham mé ts'áyéhe sín tíha. A ntá jehe ch'án mé k'óna ch'án it'é kaín ni. ¹⁷ Éxi nixja xroon itén Dios kíxin: "Janhan kjuánjuan kjuachaxin kíxin jaha ts'óna it'é nchónhya chojni chjasintajni." ‡ Mé xikaha tjetsjehe Dios kíxin jína kuítekaon ch'ín Abraham tí jehe ch'án. Tí Dios a mé sinchexechón tí chojni tsík'en la ko t'etqan ch'án kíxin ts'óna tí nkehe náxa kohya.

¹⁸ Kjónté k'uéchóntahya ch'ín Abraham xjeen ch'án la kuítekaon ch'án la chónhen ch'án kíxin ts'óna ch'án it'é nchónhya chojni éxi tsíchronka Dios kíxin xikaha nchónhya chojni ts'axrjenixin ch'án. ¹⁹ Ch'ín Abraham k'uéchónta ch'án chjina ijnko ciento nánó la kjánchó k'uíjtáyenhya ch'án tinkáchónki ch'án Dios, kjónté jehe ch'án la ko tjan Sara mero its'en sín la ko ó má táda

nána sín kíxin náxa chróchónta sín xjeen sín. ²⁰ Ch'ín Abraham la kóxakuenhya ch'án la ko chrakonhya ch'án kíxin tí nkehe tsjanjon Dios. Náhí. Íchá antsí má kuinkáchónki ch'án Dios la ko kjuanchehe ch'án kjuasáyé Dios. ²¹ Ó nohe ch'ín Abraham kíxin Dios chónta kjuachaxin sinchexiteyá kaín nkehe tsintácho ch'án. ²² Dios k'uíkon kíxin jehe ch'ín Abraham kuítekaon ch'án ntá Dios kjuínchetjóá ijje ch'án.

²³ La jehya kíxin tsík'óna tí xroon kíxin tí ch'ín Abraham ó. ²⁴ Náhí. Tsíkjin sín xroon kíxin kjaxin jeheni chrókótjuáxin ijje kíxin tsitekaonni Dios. Tíhi mé tí nkexo kjuínchexechón Ìnchéni Jesucristo. ²⁵ Jehe ch'án mé k'uenyákonhenni ch'án kíxin tí jje chóntani. Ntá xechón ch'án ínaá kíxin tsotjuáxin ijje kíxin ó kuítekaonni tí jehe ch'án.

Kótjuáxin tí jje chóntani

5 Kótjuáxin tí jje chóntani kíxin tinkáchónkini Cristo la kjuaxróxin ts'ejókoni Dios kíxin k'uenyákonhenni Ìnchéni Jesucristo. ² Kjuasáyé Cristo kíxin jína tsochjineheni Dios kíxin tinkáchónkini ch'án ntá ts'áyéhe kjuachaxin kuente ch'án. Ntá tí kjuachaxin la jína tsjinkítsa kíxin jína ts'ejóni la ko tsochéheni ts'ejóchónhenni kíxin ntá tsjintaxín ts'áyéhe tí kjuachaxin jíe kuente Dios. ³ Kjaxin jehya táhó. Náhí. Kjaxin tsochéheni kjónté nchónhya nkehe tsohenni kíxin ó noheni kíxin xikaha tsohenni kíxin ntá ts'itjani tsoínkakonhyani. ⁴ A ntá tí xikaha jína chrók'uejóni ntá tsjachani kíxin jína ts'ejóchónhenni. ⁵ A ntá tí tjejóchónhenni la tósuèhyani kíxin Dios imá tjuèheni ch'án la tí Nchakuen ch'án kjuanjon ch'án mé nchechéhe asenni.

⁶ Tí jehóni xitjahya chrókuaáni. A ntá tió ikui Cristo la k'uenyákonhenni ch'án kíxin tí jje chóntani. ⁷ Kjá ninkexró chróntácho chrók'uenyákonhen sín í jnko chojni kjónté ijnko chojni imá jína tjuèhe kichó. Kohya nkexo xikaha chrókjuich'e. ⁸ A ntá Dios mé kjuakoxin kíxin imá tjuèheni ch'án kíxin kjónté náxa chóntani jje la Cristo k'uenyákonhenni. ⁹ A ntá Dios mé kjuínchetjuáxin ch'án ijje kíxin Cristo k'uenyákonhenni ch'án ntá ó noheni kíxin jehe ch'án tsaáxinni ch'án kaín tí nkehe chrókjuasótexinni. ¹⁰ Kjónté náxa k'uenínkakonhenni Dios la jehe ch'án mé kjuanjon ch'án kjuaxróxin kíxin k'uenyákonhenni tí Xjeen ch'án. A ntá chaxín tsaáxinni ch'án kíxin tjechón ch'án la ntá ijje kjuaxróxin tjejókoni ch'án. ¹¹ La jehya chrókótíhó. Kjaxin tsochéheni kíxin tinkáchónkini Dios kíxin kjuasáyé Ìnchéni Jesucristo kíxin Cristo chóntaxinni kjuaxróxin tí tjen Dios.

Adán la ko Cristo

¹² Mé xikaha ó jnko nkexo kjuasin jje ntá k'uíxin jje kuenté chjasintajni. Mé xikaha kjuankíxin k'uén chojni ntá kaín chojni kjuankíxin k'uén kíxin kaín sín kjuasin sín jje. ¹³ Kíxin ósé la k'uékohya ley ntá ó xráxin k'uíxin jje chjasintajni kjánchó náxa kohya ley chrókjuanchia jje chrókjuasótexín sín. ¹⁴ Desde kjuák'e ch'ín Adán

† 4.7-8 Salmo 32.1-2 †† Génesis 15.6 ‡ Génesis 17.5

hasta kjuák'e ch'ín Moisés la k'uéchónta kjuachaxin tí kjuach'én kixin tí jie kjuasin sín mé k'uenxín sín. Kjánchó tí jie kjuasin sín la yóghya tí nkehe kjuích'e ch'ín Adán, kuítékakonhya ch'án tí nkehe k'uetōan Dios. Ntá ch'ín Adán yóghē tsotsjehe éxí tí nkexro tsi chr'éxín.

¹⁵ Ntá tí jie kjuasin ch'ín Adán la xitjahya chrókóyóghē tí nkehe tsjanjon Dios kixin tí jie kjuasin jnkokoá chojni la ntá nchónhya chojni k'uenxín. A ntá tí tsaáxinni la kjuasáyé Dios ichr'án jnkokoá nkexro mé Jesucristo la antsí má jína tíha kixin tsaáxin nchónhya chojni. ¹⁶ A ntá tí jie kjuasin jnkokoá chojni la tóyóghya tí nkehe tsjanjon Dios tsaáxinni. Kixin tí jie kjuankixin kjuasótéxín chojni kixin kjuasin jnkokoá chojni jie. A ntá tí tsaáxinni la kjuasáyé Dios sinchekaáni ch'án la ko nchetjóá ch'án tí jie chóntani kjónté nchónhya jie kjuasin chojni. ¹⁷ Tí kjuach'én la k'uéchónta kjuachaxin kixin tí jie kjuankixín kjuasin jnkokoá chojni. A ntá kjuasáyé Dios kjuínchetjóá ch'án tí jie chóntani la ntá antsí tsochóntani kjuachaxin ts'ejóni jína kixin k'uenyákonhenni jnkokoá nkexro, mé Cristo tíha.

¹⁸ A ntá tí jie kjuasin ch'ín Adán la ntá kaín chojni kjuasin sín jie chrokjuasótéxín sín. A ntá ijie la Cristo mé kótjuáxín ijie kaín chojni kixin tí jína ch'án k'uenyákonhenni ch'án. ¹⁹ Mé xíkaha kuítékakonhya jnkokoá chojni, mé Adán tíha, ntá nchónhya chojni kjuasin jie. A ntá jnkokoá nkexro jína kuítekaon kjuakoxín, mé Cristo tíha, a ntá nchónhya chojni tsaáxin tí jehe ch'án kjónté k'uéchónta sín jie.

²⁰ Ikui tí ley kuínhin sín ntá kónoxín kixin íchá antsí kjuasin sín jie. A ntá antsí k'uíxín jie la kjónté xíkaha la antsí má kuíkonógheni Dios kixin jehe ch'án tsjinkít-sani ch'án tsaáxinni. ²¹ Mé xíkaha tí jie k'uíxín k'uéchónta kjuachaxin kjuíkao kjuach'én chrók'uenxín. A ntá kjuasáyé Dios kjaxín antsí má chóntha ch'án kjuachaxin sinchetjóá ch'án tí ijieni la ko tsjanjon ch'án kjuachón jnkochr'ín kixin Ìnchéni Jesucristo ikui ch'án k'uenyákonhenni ch'án, tsaáxinni.

Ó k'uén tí jie ntá Cristo kjuínchexechónni

6 A ntá ijie ¿nkehe tsixroni? ¿A naxa chrókjuasinni jie kixin ntá Dios naxa chrókjuakoxín ch'án kixin chrókjuíkonógheni ch'án? ² Kjá náhi. A ntá jeheni la éxí chojni tsík'en chrokjuahya tsjasin jie. ¿A ntá nkeuente naxa chrókjuasinni jie ínaá? ³ ¿Á noahyará jahará kixin tí kuíkiteni kixin tinkáchónkini Cristo la yóghē k'uénkoni ch'án? ⁴ Tí kuíkiteni la éxí yóghē xravákoni Cristo la ko tsík'enkoni ch'án kixin ntá ó xechónni ntá chrók'uajini ijnko ntja nixín mé xíkaha Cristo xechónxin ch'án tí kjuachaxin jie chóntha tí It'é ch'án.

⁵ Kixin tí chaxín k'uenxínni éxí ik'uén tí jehe ch'án la ntá kjaxín tsoxechónni éxí xechón tí jehe ch'án. ⁶ Ó noheni kixin nkexrí k'uejóni senó mé táha mé k'uenxín Cristo kjuák'enkánixín ch'án ntacruz kixin ntá chrók'uitjáyanxín kaín tí jie k'uékjasinni kixin ijie í chrókjuínchexiteyéhiani tí jie. ⁷ Tí nkexro ó k'uén la ntá ó kuítóhe tí jie. ⁸ A ntá jeheni tí k'uenxínni Cristo la ó noheni kixin ts'ejókoni tí jehe ch'án. ⁹ Kixin ó noheni

kixin Cristo jnkokoá vez xechón ch'án a ntá í ts'enhya ch'án ínaá kixin tí kjuach'én í chóntahya kjuachaxin kixin naxa ts'óyán tí jehe ch'án. ¹⁰ Tí ik'uén Cristo la ó naá ik'uén ch'án kixin k'uenyákonhenni ch'án kixin tí ijieni. Ntá xechón ch'án ijie kixin tsjak'eko ch'án Dios.

¹¹ A ntá kjaxín jahará chrókjuenkayáxinrá kixin ik'uén-rá, xitjahya tsjásinrá jie kixin ntá ijie la xíxechonrá chrókjuích'eherá xra Dios kixin tinkachónkirá Cristo Jesús, mé Ìnchéni tíha.

¹² Méxra chrókjuítoéghyará kixin chrókjan tí jie chrók'uetuēnhen tí cuérporá ínaá kixin tí jie chrók'uetōan kixin chrókjuínchexiteyéhérá tí nkehe tjenkayáxinrá. ¹³ Tjánjonhyará tí cuérporá kixin chrók'óna nkehe chrókjuásixínrá jie. A ntá íchá jína chróchjehérá asánrá Dios éxí ijnko chojni tsík'en ó xíxechón ínaá. Chjehérá Dios tí cuérporá ts'óna ijnko nkehe sich'exín ch'án xra jína. ¹⁴ Kixin tí jie la í chóntahya kjuachaxin ts'etuēnhen tí jahará. Jehya tí ley ts'etōan ijie. Náhi, jehó kjuasáyé Dios.

Kjuíncheyóexín ch'ín Pablo nkexrí tí chojni ch'exón xra

¹⁵ A ntá ijie ¿nkexrí? ¿A chrókjuasinni jie kixin í t'etuēnhyani tí ley? Kjá náhi. Kjuasáyé Dios tsaáxinni la kjá í chrókjuasinhiani jie. ¹⁶ Jahará ó nohará jína kixin tí sich'ehe ni ijnko lámō xra la tsitekakonhenni ch'án la tí xíkaha la t'ichjánxín ch'ehe ni xra tí lámō la t'ichjánxín sinchexiteyéhēni ch'án. Mé xíkaha tónhen tí naxa sinchexiteyéhēni tí jie la táha mé ts'énxínni. A ntá tí tsitekaonni Dios la mé chrók'uejóni jnkójina. ¹⁷ Jahará la ósé k'uékjásinrá jie, a ntá ijie kjuasáyé Dios kuíkonóghar á ch'án kixin kaín asánrá kuítekaonrá tí nkehe xrakohará. ¹⁸ A ntá ó kuítóhérá tí k'uékjínchexiteyéhérá tí jie. A ntá ijie ó kjuánjonrá asánrá kixin sich'erá xra jína kuente Ìnchéni. ¹⁹ A ntá jie nixja éxí ijnko chojni ó kixin jahará la tiénxinhyará jína tí nkehe i. A ntá xíkaha tí senó kjuínchexiteyéhérá tí nkehe ntoáhya la ko jínahya kixin sich'erá tí nkehe jínahya. A ntá ijie la xíkaha chrókjuánjonrá tí cuérpo kuéntará kixin chrókjuích'exínrá tí xra jína éxí tjinkaon Dios kixin ntá jehe ch'án chrókjuínchetjóará ch'án.

²⁰ A ntá tí jahará tió naxa kjuínchexiteyéhérá tí jie la ntá xitjahya sich'erá tí xra jína ntoá. ²¹ ¿A ntá nkehe chrókjuachará kixin xíkaha kjuích'erá tí nkehe chrókó-suàxinrá ó? Ntá xíkaha kjuéyará tí nkehe ts'énxínrá ó. ²² Na ntá ijie ó kjuíin tí nkehe k'uék'etuanhanrá k'uékjásinxínrá jie. A ntá ijie ch'eherá xra Dios. Táha la tsjinkítsa kixin ts'ejoxínrá jína kixin ntá tsjixixín tsotjuáxinrá ts'ayéhérá kjuachón jnkochr'ín. ²³ A ntá tí chrókjuasinni jie la chrókjuachani kixin éxí chrók'uenni ó. A ntá tí nkehe chrókjuínchekítōnhenni Dios la kjuachón jnkochr'ín kixin tinkáchónkini Ìnchéni Cristo Jesús.

Kjuíncheyóexín ch'ín Pablo kuente tí sín tsíkótehe

7 Kíchóni, jahará ó choxinrá tí ley la ó nohará kixin tí ley chóntha kjuachaxin ts'etuēnhen tí chojni naxa tjejóchón ó. ² Tíha mé ts'axrjexín éxí ijnko chojni chjin

tsíkótehe la tí xii tjan chóna kjuachaxin ts'etuenhen tjan kixin naxa tjechón ch'án. A ntá tió tsík'en tí xii la ntá tí tjachjin la ó kuítóhe tí k'uek'etuenhen ch'án tjan. ³ A ntá tí jehe tjan chrókuakja í jnko chojni ntoa tí naxa tjechón xii tjan la ó chrókjuasin tjan jje. A ntá tió tsík'en xii tjan la jehe tjan la ó kuítóhe tí k'uek'etuenhen ch'án tjan la jina tsótehe tjan í jnko chojni ntoa la jehya jje tíha.

⁴ Mé xikaha jahará kichó ni mé k'uenyákonhenni Cristo la ntá jahará la éxi tsík'enrá kixin í t'etuanyará tí ley la éxi chrókuákjára í jnko xiara la mé xikaha tin-kachónkirá Cristo. Cristo mé xechón ch'án inaá kixin ntá jina chrókjuich'ehe ni xra Dios. ⁵ Tió naxa k'uek-jasinni jje a ntá tí ley chrókjuich'e xra kixin chrókjuasinhyani jje, a ntá íchá antsí má kjuasixinni jje tí cuerpo kuenténi, la táha mé kjuixin tí ts'enixinni. ⁶ A ntá ijie la éxi yóhe ik'ueenni, a ntá tí ley chónahya kjuachaxin naxa ts'etuenhenni. A ntá ijie í kohya nkehe t'inkákonhen kixin jina sich'ehe ni xra kixin k'ónani ijnko chojni nixin kixin tí Nchakuen Dios k'uáyeheni. A ntá í t'etuenhyani tí ley ntaxin tsík'óna.

Tí jje naxa chonta

⁷ A ntá tí xikaha la, ¿nkehe chróchroni? Kixin tí ley la, ¿á jje táha ní? Kja náhi. Kjánchó janhan chrókónonahya nkehe tí jje tí chrókohya tí ley chróchronka. Chrókónonahya kixin tí nkehe ókjé chrókjuakéhya asenná tí chróchronkahya tí ley kixin chrókjuakéhya asenná tí nkehe ókjé. ⁸ A ntá tió kónóna tí ley a ntá tí jje antsí kjuacha k'uetan. La ntá k'uixin kaín nkehe ntáchro asenná. A ntá tí chrókohya ley la chrókónoxínhyani tí jje chrók'uenxian. ⁹ A ntá tí ósé la nonahya nkehe tí ley. A ntá tió nóna nkehe tí ley, a ntá antsí kjuásian jje la ntá ó nóna kixin tí jje kjuásian me ts'énxian. ¹⁰ Mé xikaha kónhen kixin tí ley chrókjuanjon kjuachón ntá kjuikao tí ts'enixinni. ¹¹ Ntá tí jje mé kjuacha k'uetan kixin sjntaxiteyáhya tí ley. A ntá tí ley mé kjuanchia jje ts'énxian.

¹² Mé xikaha tí ley la chaxin jina la ko tí nkehe t'etan Dios la kjaxin jina. ¹³ Mé xikaha tí nkehe jina la ¿á táha chrók'uenxian? Kja náhi. Tí jje kjuásian mé ts'énxian. Mé xikaha kjuakoxin tí nkehe jje kixin tsonoxin tí jje kixin tí ley la jina. Mé xikaha kjuakoxin tí ley kixin tí jje tjasin chojni mé imá jinahya tíha.

¹⁴ Ó noheni kixin tí ley la kuente Dios tíha. A ntá janhan la kjuintaxiteyáha tí ntáchro asenná kixin tí jje kjuacha k'uetanna. ¹⁵ A ntá tí janhan la tí nkehe tjét'a la kjaxin naxa tjanxinhya kixin janhan la t'ahya tí nkehe tjínkavan chrókjuít'a, a ntá ijie mé it'a tí nkehe tóxrjinhya chrókjuít'a. ¹⁶ A ntá tí nkehe tjínkavonhya chrókjuít'a la tíha me it'a la mé xikaha tjátsogaxián kixin tí ley la jina. ¹⁷ A ntá jehya janhan it'a tíha. Náhi tí jje chonta mé ch'e tíha. ¹⁸ Kixin janhan ó nóna kixin tí ntáchro asenná la kohya nkehe jina chrókjuít'a. Tjínkavan chrókjuintaxiteyá tí nkehe jina kjánchó tjachahya sjt'a tíha. ¹⁹ T'ahya tí nkehe jina chrókjuít'a. Tí nkehe jinahyahya tjínkavonhya chrókjuít'a mé it'a. ²⁰ A ntá tí it'a tí

nkehe jinahya tjínkavonhya chrókjuít'a la ntá jehya janhan it'a tíha. Náhi. Tí jje chonta mé ich'e tíha.

²¹ Tónóna tíhi. Tí tjínkavan chrókjuít'a tí nkehe jina la mé íchá antsí it'a janhan tí nkehe jinahya. ²² Kjónté xikaha la tóxrjinna chrókjuintaxiteyáha tí ley kuente Dios. ²³ T'íkuon kixin tí nkehe ntáchro asenná mé t'inkákonhen tí nkehe tjínkavan chrókjuít'a. A ntá tí jje chonta mé éxi tjéchinaxián tíha.

²⁴ Nóna tí janhan. ¿Xá nkexro chrókjuatsen tí jje chóna tí cuerpo kuentana chrók'uenxian? ²⁵ Kjuasáya tjahe Dios kixin ikui Inchéni Jesucristo kuaáxinni. Mé xikaha tí janhan la it'óna tjenkayáxian kixin chrókjuintaxiteyáha Dios a ntá tí t'óna mé ntáchro asenná chrókjuintaxiteyáha tí nkehe kuente tí jje.

Tjejóchónxinni Nchakuen Dios

8 A ntá ijie tí sín tinkáchónki Cristo Jesús la kohya jje chrókjuasótexin sín. Jehe sín í tjinkakonhya nchexiteyá sín xikaha ntáchro asén sín. Jehó tjinkaon sín sinchexiteyéhé sín Nchakuen Dios. ² Kixin tí nkehe t'etan Nchakuen Dios mé tjanjon kjuachón kixin tinkáchónkini Cristo Jesús. Tíha mé kjuatsen tí nkehe kuente jje chrók'uenxinni. ³ A ntá Dios kjuich'e tí nkehe kjuachahya kjuich'e tí ley kuente ch'ín Moisés kixin jeheni kjuachahyani chrókjuinchexiteyéhéni tíha. A ntá Dios mé ich'án ch'án Xjeen ch'án k'óna éxi chojni. La xra ó kui ch'án k'uenyákonhen ch'án tí ijieni kaín ni ntihi chjasintajni la kjuatsen ch'án tí jje chrók'uitjáyanxinni. ⁴ Mé xikaha kónhen kixin ntá jeheni jina chrókjuinchexiteyéhéni tí nkehe t'etan tí ley la chrókjuinchexiteyéhyaní tí nkehe ntáchro aséni ó. Náhi. Chrókjuinchexiteyéhéni tí nkehe ntáchro Nchakuen Dios.

⁵ A ntá tí sín tjinkaon nchexiteyéhé tí nkehe ntáchro asén sín ntá táhó tjenkayáxin sín. A ntá tí sín tjinkaon nchexiteyéhé Nchakuen Dios la ntá xritjeyá sín tí nkehe kuente Nchakuen Dios. ⁶ A ntá tí sín tóxakonhen tí nkehe ntáchro asén sín la táhó ts'énxín sín. A ntá tí sín tóxakonhen tí nkehe kuente Nchakuen Dios la tsochóntaxín sín kjuachón la ko kjuaxróxin. ⁷ A ntá tí sín imá tóxrjinhin tí nkehe ntáchro asén sín ó la mé nínkakonhen sín Dios kixin tjinkakonhya sín la ko titekakonhya sín tí ley. ⁸ Tí sín tóxrjinhin sín tí nkehe ntáchro asén sín ó la xitjahya sinchexéhé sín Dios.

⁹ A ntá jahará la nchexiteyéhéyará tí nkehe ntáchro asánrá. Náhi. Jahará nchexiteyéhéyará Nchakuen Dios tí chaxin chontará Nchakuen Dios. A ntá tí nkexro chónahya Nchakuen Cristo la í tinkáchónkihya sín Cristo. ¹⁰ A ntá tí Cristo tjejókoará tí jahará la tí asánrá la tjechón kixin Dios kjuikonogahará, kjuinchetjóá ch'án tí ijjará, kjánchó tí cuerpo la éxi tsík'en kixin tí jje chontará. ¹¹ A ntá jahará ó chontará Nchakuen Dios, tí nkexro kjuinchexechón Cristo Jesús. Tí Dios a mé kjuinchexechón Cristo la ntá kjaxin tsochjéhe ch'án kjuachón nixin tí cuerpo kuentará kjónté chóna jje kixin tí Nchakuen Dios chontará jahará.

¹² Mé xikaha kichó ni, ó chóntani nkehe sinchexiteyéhéni, kjánchó í chrókjuenkayáxinhyani tí nkehe

ntáchro asénni. ¹³ A ntá jahará tí chrók'uejorá éxi ntáchro asánrá la tíha la mé chrók'uenxínrá. A ntá jahará ó chontará Nchakuen Dios ntá chrók'uen tí nkehe ntaxin kjuenkayáxinrá la ntá jehó Nchakuen Dios chrók'uejochonxínrá.

¹⁴ Kaín tí nkexro t'etuēnhen Nchakuen Dios la mé ó k'óna xjeen Dios. ¹⁵ Ntá Nchakuen Dios ó k'uayéherá jahará la jehya tí nchakuen tí nkehe k'uék'etuānhanrá ósé kixin chróchrakonrá. Náhí. Ntá tí Nchakuen chón-tani la k'ónaxínni xjeen Dios. A ntá tí Nchakuen ch'án nchexraxinkaonni tsonáchroni kixin: "It'éni Dios kuéntá tí jeheni." ¹⁶ Tí Nchakuen Dios tónoexín nchakuenni kixin k'ónani xjeen Dios. ¹⁷ A ntá ó k'ónani xjeen ch'án la kjaxin tsjanjon ch'án tí nkehe ts'áyéheni éxi tsín-táchro ch'án ósé. Mé ts'áyèkoni Cristo tí nkehe tsjanjon Dios. Tí chaxín tsjasóteni éxi Cristo kjuasóte ntá chr'èxin ts'ejókoni ch'án kjuaxróxin.

Tí kjuachaxin jíé itsi chr'èxin

¹⁸ A ntá ijie la tóxakuenhyani kjónté nkehe ts'at-sínkani tsjasótexínni kixin tíha la ninkehó sínkíhya kixin tíha la xitjahya tóyóhe tí nkehe ts'áyéheni chr'èxin kixin antsí má jína náxrjón tíha. ¹⁹ Tí nkehe tsík'óna tjejóhónhen kixin ts'ikon tí sín tsík'óna xjeen Dios. ²⁰ Kjónté kaín nkehe tsík'óna síin la ts'itjáyan tíha la jehya kixin xikaha tjinkaon tí nkehe tsík'óna. Náhí. Jehí xikaha tsík'etōan Dios. Ntá tjejóhónhen kaín nkehe tsík'jich'éna Dios ²¹ kixin chróchóna kjuachaxin chrók'uitjáyanhya. Ntá náxrjón ts'ixin kaín nkehe éxi náxrjón ts'ejó tí sín tsík'óna xjeen Dios. ²² Ó noheni kixin kaín tí nkehe kjuích'éna Dios la naxa tsjasóte éxi yóhe tjetéxin ijnko chojni nchekokjéhi xjeen. ²³ A ntá jehya jehó tí nkehe tsík'óna t'ikon chojni chrókjoté. Náhí. Kjaxin jeheni tjasóteni kjónté chón-tani Nchakuen Dios kixin tí Nchakuen Dios la mé tí nkehe xrankixín kuák-jani la naxa ts'áyéheni inaá tí nkehe naxa tsjanjon Dios. Tjejótjasóteni la ko tjejóhónhenni kixin tsjintaxín ts'ónani xjeen Dios la ko ts'áyéheni tí cuerpo chónhya ts'en. ²⁴ Mé ó kuaáxinni la naxa tjejóhónhenni tí nkehe t'ikonhyani. Tí k'uíkonni tí nkehe tjejóhónhenni ntá t'ichjánxínhya chrók'uejóhónhenni. Tí nkehe ó t'ikonni la t'ichjánxínhya chrók'uejóhónhenni naxa chrók'uikonni inaá. ²⁵ A ntá tí chónhenni tí nkehe naxa t'ikonhyani la ntá t'ichjánxín tsonínkakonhyani tsochónhenni.

²⁶ Mé kjaxin xikaha tí Nchakuen Dios tjinkítsani tí noehyani nkexrí tsonixjeheni Dios kixin chaxín noehyani tsonixjeheni ch'án éxi chrónixjani. A ntá tí Nchakuen Dios tjinkítsa nixjaxín ch'án tí jeheni kjónté noehyani nkexrí tsochrónóaxinni éxi tjinkaon ch'án. ²⁷ Dios mé nohe ch'án nkehe tónhen asénni la nohe ch'án nkehe ichro tí Nchakuen ch'án kixin tí Nchakuen ch'án mé chrónóaxin éxi tjinkaon Dios la nixjaxín ch'án tí sín tinkáchónki Dios.

²⁸ Ó noheni kixin Dios la k'uetōan kaín nkehe chrók'uaxrje jína kixin tí sín tjuēhe ch'án kixin tsík'jeyá ch'án sín kixin xikaha tjinkaon ch'án. ²⁹ Tí sín tsík'jeyá Dios ósé la ntá tsík'iyēhe ch'án kixin ts'óna sín éxi tí

Xjeen ch'án kixin ntá tí Xjeen ch'án mé ts'etuēnhen nchónhya tí sín kíchó ch'án. ³⁰ Mé xikaha tí sín tsík'jeyá Dios ósé mé kjaxin k'uíyēhe ch'án sín la ko tí sín k'uíyēhe ch'án la kjuínchetjóá ch'án ijíé sín la ntá tí sín kjuínchetjóá ch'án ijíé la kjuanjon ch'án kjuachaxin kuēte ch'án tsochóna sín.

³¹ ¿A ntá nkehe chróchroni tí xikaha? Tí Dios tjuēhe tí jeheni, ¿a ntá nkexro chrókjuacha chrókónínkakonhen tí jeheni? ³² Kixin Dios la kjiakuēnnya tí Xjeen ch'án. Kjuanjon ch'án k'uenyákonhenni kaín ni, a ntá tí ó kjuanjon ch'án Xjeen ch'án la ká kaín nkehe chrókjuanjon ch'án. ³³ ¿Nkexro chrókjuacha chrókjuanchia jje chrókónínkakonhen tí sín kjuelyá Dios? Kixin Dios la ó kjuínchetjóá ijíé tí sín a. ³⁴ ¿Nkexro chrókjuinchekjasóte tí jehé sín? Kixin Cristo la ó k'uenyákonhēn sín la kjaxin xechón ch'án inaá la itjen ch'án tí tja chjina Dios tjen nkaya nkajni la tjechronòa ch'án kixin kaín tí jeheni. ³⁵ ¿Xá nkexro chrókuakitsjeheni tí tjuēheni Cristo? Kjónté ichrén nkehe chrókónhenni la ko chrókónínkakonhen chojni tí jeheni la ko kjónté chrók'uenxínni kjinta la ko chróchónahyani ikéni o kjónté tí kjuaxikaon chrók'uenxínni la chrókuítōehya ch'án tí jeheni. ³⁶ Éxi ntáchro xroon itén Dios kixin:

Tí tinkáchónkini tí jaha la síin kjuaxikaon kaín yaon chrók'uenxínni.

Chrók'óyánni sín éxi t'óyán sín kolélo tí matanza. † ³⁷ Kaín tíha la antsí chrókjuachaxínni kixin kjuachaxiēn tí nkexro tjuēheni. ³⁸ Ó noheni kixin ninkehó nkehe tsjachahya tsakitsjeheni tí tjuēheni Dios. Kjónté tí its'en-ni, o kjónté tí tjejóhónni, o kjónté tí sín ángel, o tí kjuachaxiēn tí jínahya, o kjónté tí nkehe sítónhen ijie, o tí nkehe tsonhen chr'èxin, ³⁹ o kjónté tí nkehe síin nkaya nkajni, o tí nkehe imá njnka síin chjasintajni, o í jnko nkehe kjuích'éna Dios. Mé kohya nijnko tí nkehe a tsjacha tsakitsjeheni tí tjuēheni Dios kjuakōxin tí jehé ch'án kixin k'uenyákonhenni Ìnchéni Jesucristo.

Dios kjuelyá tí sín Israel

9 Ntoá xrxanka kixin janhan ijnko chojni tinkáchónki Cristo la t'ayahya. Tí nkehe tjenkayáxian la Nchakuen Dios nchexraxinkaonna kixin chaxín. ² Imá t'ává asenná la ko náxrjónhya tjèn ³ kixin tjínkavan kjónté chrók'uitjáyanxinna tí tinkáchónkia Cristo kixin ntá jína chrókuinkáchónki Cristo tí sín kichíná naxa kjéhyana. ⁴ Jehé sín mé tsík'axrjeníxin sín tí sín Israel la Dios k'uáyéhe sín éxi xjeen ch'án la ko Dios chónthehe tí jehé sín la kjuanjon kjuachaxiēn ch'án la kjaxin k'uáyéhe sín tí nkehe k'uetōan Dios la ko ti ley tsíkjin ch'ín Moisés la ko k'uáyéhe sín kjuachaxin ts'etōan sín kixin nkehe tí xra tsonhen nkaxenhen njnko la ko k'uáyéhe sín tí nkehe tsintáchro Dios. ⁵ Tsík'axrjeníxin sín tí sín tsík'axrjenínni ósé la kjaxin Cristo tsík'axrjeníxin tí sín israelita tió k'óna ch'án chojni. Jehé ch'án mé Dios kuēte kaín nkehe la tinkáchónkini ch'án jnkochríxin. Amén.

† Salmo 44.22

⁶ A ntá tí nkehe chrókuakja tí sín Israel kjuanjon Dios la jehya kíxin chróxiteyáhya tíha. Náhí. Kíxin jehya kaín tí sín tsík'axrjeníxin tí sín israelita mé chrók'óna sín chojni chjasin Israel. ⁷ Kíxin kénhya tí sín k'uaxrjeníxin ch'ín Abraham chrók'óna xjeen ch'án. Dios mé tsíntáche ch'ín Abraham kíxin: "Tí sín ts'óna kjéhya jaha mé ts'axrjeníxin sín ti ch'ín Isaac." ⁸ Tíhi mé tienxínni kíxin ninkexró xitjahya ts'óna xjeen Dios kíxin tí tsík'axrjeníxin sín chojni ó. Náhí. Jehó tí sín tinkáchónki tí nkehe tsíchenka Dios tí ch'ín Abraham mé jehe sín mé chaxín tsík'axrjeníxin sín ch'án. ⁹ Tí nkehe tsíchenka Dios tí ch'ín Abraham mé tíhi: "Itsi ijnko yaon mé tjan Sara sich'éna tjan ijnko xjan." ^{††}

¹⁰ A ntá jehya táhó. Náhí. Kjaxin tí yaá chánjan tsík'jich'éna tjan Rebeca mé chóna jnkokoá it'é xjan mé it'in Isaac, mé tsík'axrjeníxinni ch'án. ¹¹ A ntá tí xjan la naḡa kokjéhya xjan la ninkehó nkehe jína o jínahya kjuích'e xjan. Ntá kjuakoxin Dios kíxin chóna ch'án kjuachaxin éxi tsíkjenkayáxin ch'án tsjeyá ch'án nkexro ts'íyehé ch'án la tahya ch'án kuentá nkehe tí xra kjuích'e sín. ¹² Ntá kjónté la ntá chenka ch'án tí tjan Rebeca kíxin: "Tí ch'ín saó mé sich'ehe xra tí ch'ín tsoyo." ^{†††} ¹³ Mé kjaxin xíkaha ichro xroon itén Dios kíxin: "Tjuahá Jacob, a ntá Esaú la náhí." ^{††}

¹⁴ ¿A ntá nkehe chróchroni? ¿Á ntoáhya tjenkayáxin Dios? Kjá náhí. ¹⁵ Kíxin tsíntáche Dios tí ch'ín Moisés kíxin: "Tsojtuahá tí nkexro tjínkavan tsojtuahá la ko tsíkonógha tí nkexro tjínkavan tsíkonógha." ^{†††} ¹⁶ Jehya éxi tjinkaon chojni o jehya kíxin tí nkehe ch'e chojni. Náhí. Ó jehí Dios tsíkikonóhéhé ti jehe sín. ¹⁷ Tí ntáchro xroon itén Dios mé nixjehé Dios tí ch'ín rey Egipto kíxin: "Kjuánjuan kjuachaxin kíxin jaha k'óna rey kíxin tjínkavan chrókjuákoxiān kjuachaxin kuéntana kíxin ntá kuenté chjasintajni chrókónohe la chrókuitekaon tí njina." ^{†††} ¹⁸ Mé xíkaha tí tjinkaon Dios tsíkonóhéhé ch'án chojni la tsíkonóhéhé ch'án, a ntá tí nkexro tjinkakonhya ch'án tsíkonóhéhé ch'án la tsíkonóhéhya ch'án.

¹⁹ A ntá tsontáchorá kíxin: "A ntá tí xíkaha la, ¿nkekuèté t'eka Dios chojni jje? ¿Nkexro chrókjuacha chrókjuanjonko tí nkehe t'etōan Dios?" ²⁰ ¿Xá nkexro tí jahará kíxin chróntácherá Dios xíkaha? ¿Á ti chj tsík'óna nchetje chróntáche tí ñché chj kíxin: "¿Nkekuèté xíkaha kjuích'énani?" chróchro. ²¹ A ntá kjaxin tí nkexro ch'éna chj mé chóna kjuachaxin tjinkaon sich'éna ch'án tí nkehe tóxrjínhín ch'án sich'éna ch'án, tí tjinkaon ch'án nchetje sich'éna ch'án nkehe imá náxrjón o tjinkaon ch'án sich'éna ch'án nkehe náxrjónhya.

²² Tjinkaon Dios chrókjuakoxin ch'án tí kjuachaxin kuènte ch'án chrókjuinçekjasóte ch'án chojni la kjónté xíkaha kónhen la kjuacha ch'án kónínkakonhya ch'án la kujkonóhéhé ch'án tí sín chrókjuinçekjasóte ch'án kíxin chrókjuinçek'itjáyan ch'án sín. ²³ Mé xíkaha kjuích'e ch'án kjuakoxin ch'án tí kjuachaxin imá jíe chóna ch'án kíxin jehe ch'án kujkonóhéhéni ch'án kíxin xíkaha tsíkjenkayáxin ch'án ósé kíxin náxrjón chrók'uejókoni tí jehe ch'án. ²⁴ Mé xíkaha Dios tsík'jeyá ch'án iso

tí sín judío la ko iso tí sín jehya judío. ²⁵ Mé xíkaha ntáchro tí xroon tsíkjin ch'ín Oseas kíxin:

Tí sín jehya chjasenná la mé sñntak'ian chjasenná. La tí sín k'uétjuahya mé tsojtuahá sín ijie. ^{†††}

²⁶ Tí chjasin ntiha tsíntáchro ch'án kíxin: "Jahará jehya chjasenná",

a ntá ijie sñntak'ian xjeen Dios tjechón. [§]

Mé xíkaha ichro itén Dios. ²⁷ Kjaxin nixja ch'ín Isaías kuènte tí sín israelita tsíntáchro ch'án kíxin: "Nchónhya chojni ts'axrjeníxin tí sín Israel éxi tí nchónhya nchesen síin ntayaon kjánchó tsjéhya tí jehe sín tsjacha sín tsaá sín. ²⁸ Ntá tjoka tsonhen tí nkehe tsíntáchro Ìñchéni sinchexiteyá ch'án." ^{†††} ²⁹ Ntá kjaxin ch'ín Isaías tsíntáchro ch'án ósé kíxin:

Tí Ìñchéni chóna kaín kjuachaxin kuítqehya chrók'uitjáyan kaín tí sín k'uaxrjeníxin Israel éxi k'uitjáyan tí sín chjasin Sodoma la ko Gomorra. ^{†††}

Tí sín judío la ko tí tan jína

³⁰ ¿Ntá nkehe tsixroni? Tí sín jehya judío kjueyáhya sín Dios sinchetjóá ijie sín ntá kjónté la k'uitja sín kíxin tsojtojá ijie sín kíxin tinkáchónki sín Cristo. ³¹ A ntá tí sín israelita chrókjuinchexiteyéhé sín ley kíxin chrókótjuáxin ijie sín kjánchó kjuachahya sín kjuínchexiteyéhé sín tíha. ³² ¿A ntá nkekuèté kíxin xíkaha k'uitjahya sín nkexrí chrókuinkáchónki sín Dios? Kíxin kjueyáhya sín nkexrí chrókjuinchetjóá ch'án ijie sín kíxin tinkáchónki sín ch'án. Jehó tí xra kjuích'e sín chrókuaáxin sín, ichro sín. La méxra xíkaha tjen tí xro kóténkíxin sín. ³³ Mé xíkaha chronkaxín xroon itén Dios kíxin:

Mé xíkaha kjuaké tí xro chjasin Jerusalén mé tí xro tsóténkíxin sín la ko tí tjō ts'ánótjēnxin sín.

A ntá tí sín chrókuitekaon tí jehe la chrókósuèhya sín. ^{§†}

10 Kíchóni, kaín asenná níxjahá Dios kíxin tjínkavan kíxin tí sín israelita chrókuaá sín. ² Janhan ntáxrjan kíxin tí sín israelita imá tjinkaon sín chrókjuích'ehe sín xra Dios kjánchó chaxínhya kíxin jehe sín la tienxínhya sín. ³ Kjaxin noehya sín kíxin nkexrí chrókjuinchetjóá Dios tí ijie sín. A ntá jehó sín xritjeyá sín nkexrí chrókótjóá sín la tjinkakonhya sín chrókjuinchexiteyéhé sín Dios. ⁴ A ntá Cristo mé kjuínchexiteyá kaín nixja tí ley. A ntá ijie kaín tí sín kuítekaon tí jehe ch'án mé sinchetjóá ch'án ijie sín.

⁵ A ntá tí chrókótjóá ijie sín kíxin tí ley la ch'ín Moisés mé tsíkjin ch'án xíkíhi: "Tí nkexro chrókjuinchexiteyéhé kaín tí ley la táhó chrókuaáxin sín." ^{†††} A ntá tí chrókjuínchetjóá Dios tí ijie ní kíxin tí tinkáchónkini ch'án ó mé ntáchro xíkíhi: "Ntáchrohyará kíxin, ¿Xá nkexro sáchrókjuí nkaya nkajni? (Tí xíkaha la t'axrjéxin kíxin naḡa chrókui Cristo.) ⁷ La ko ntáchrohyará kíxin: ¿Xá nkexro chrók'uinkajin tí imá njinka?" (Mé t'axrjéxin tíha kíxin chrókjuíakjín sín Cristo chrók'uaxrjetaón ch'án kíxin itjen ch'án tí síin tí sín tsík'en, ichro sín.) ⁸ ¿A ntá nkehe ichro? Ntáchro kíxin: "Itén Dios la chji-

† Génesis 21.12 †† Génesis 18.10 ‡ Génesis 25.23 †† Malaquías 1.2-3 †† Éxodo 33.19 ††† Éxodo 9.16

††† Oseas 2.23 § Oseas 1.10 §† Isaías 10.22-23 §†† Isaías 1.9 §† Salmo 118.22 §†† Levítico 18.5

naxón tjen tí tjejórá kixin ó nohará la ko xraxinkaon asánrá." † Tí tan a mé tí nkehe tinkáchónkini kjuakoni. 9 Tí ir'va tsonáchroxian kixin choxian Jesucristo mé Ìnchéni la ko tí asán tsitekaon kixin Dios kjuínchexechón ch'án ntá kjaxian tsaá. 10 A ntá tí asán tsitekaon la nta Dios sinchetjóá ch'án tí jaha la ko tí ir'va tsonáchroxian kixin choxian Jesucristo ntá sinchekaá ch'án tí jaha.

11 Ntá chro xroon itén Dios kixin: "A ntá tí sín chrókuitekaon tí jehe ch'án la chrókósuèhya sín." ††12 Dios la t'ikon jnkokón tsjehe kaín chojni á tí sín judío o á tí sín jehya judío. Tí Ìnchéni la mé Ìnché kaín chojni la tsjanjon ch'án kaín nkehe t'ichjánxinhin kaín tí sín tjanchehe ch'án nkehe. 13 Mé xikaha ntá chro xroon itén Dios kixin: "Kaín tí sín tjanchaxín nkehe ih-njé Ìnchéni la tsaá sín." ††14 A ntá nkexrí chrókjuanchehe sín ch'án kixin chrókjuinkitsa ch'án sín tí naxa kuítekakonyha sín ch'án? A ntá nkexrí chrókuitekaon sín tí jehe ch'án tí naxa kuíenhyha sín nkexro tí jehe ch'án? A ntá nkexrí chrókuinhin sín tí kohya nkexro tsjakohé sín tí itan a? 15 La nkexrí chrókjuichronka sín tí tan tí kohya nkexro ichr'án sín sátsji? Éxí ntá chro xroon chóna itén Dios kixin: "Náxr-jón tí sín xrichronka itan jína." ††

16 Kjánchó kénhyha sín titekaon sín tí itan tsaáxinni. Tsintá chro ch'ín Isaías kixin: "Ìnchéni çá nkexro ó kuítekaon tí tan xrichronkani?" ††17 Méxra t'ichjánxín tsinhin sín, a ntá chrókuitekaon sín, a ntá tí tan tsinhin sín mé itén Cristo.

18 A ntá tjánchánkía kixin: ¿A kuíenhyha sín tí tan? Kjá ó kuínhin sín. Ntá chro xroon itén Dios kixin:

A ntá tí nkehe kjuako sín la ó kuínhin chojni kuenté chjasintajni.

Tí nkehe nixja sín la ó kjuixraká hasta kjuèxin chjasintajni." ††

19 Ntá tjánchánkía inaá: ¿Xá tí sín Israel la naxa kíenxínhyha sín ní? Senó ntá chro ch'ín Moisés kixin:

Ijnko chjasin jehya chjasin kuèntana la tsoninkákonhénra sín

kixin injnko chjasin tjinkakonhyha tsinhin la tsoninkákonhénra sín. ††

20 Ntá ntá chro ch'ín Isaías kixin:

Tí sín xritjeyáhyha tí janhan la mé tí sín a mé k'uitja sín tí janhan.

La ko kjuákuaxian tí sín kjuanchankíhyha kixin nkexro tí janhan. †

21 La ko nixja ch'ín Isaías kuènte tí sín israelita kixin: "Kuenté yaon k'uíyahá injnko chjasin siín chojni titekakonhyha sín la ko jjehe sín." ††

Tí sín Israel tsíkjeyá Dios

11 A ntá ijie tjánchánkía kixin: ¿Dios la á kuítóhe ch'án tí sín Israel? Kjá náhi, kixin janhan kjaxian israelitana la t'ikiníxinna ch'ín Abraham la ko k'uaxreníxinna ch'ín Benjamín. 2 Kixin ósé tsíkjeyá Dios tí sín

† Deuteronomio 30.12–14 †† Isaías 28.16 † Joel 2.32 †† Isaías 53.1 †† Isaías 53.1 ††† Salmo 19.4 ††† Deuteronomio 32.21 † Isaías 65.1 †† Isaías 65.2

israelita kixin ts'óna sín chjasén ch'án. A ntá ijie la kjá sinchek'itjáyanhyha ch'án sín. ¿Á noahyará jahará nkexrí nixja xroon itén Dios tí chrónka ch'ín profeta Elías nkexrí nixjehé ch'án Dios tjanchia ch'án jie kuènte tí sín Israel? Mé ntá chro xikihí: 3 "Ìnchéni, jehe sín k'óyán sín tí sín chrónka itán la ko k'óxíka sín tí altar kuèntá ntá jehóni kuítóheni tjechónni la tjinkaon sín kjaxin chrók'óyán sín tí jeheni." ††4 A ntá Dios kjuátehe ch'án kixin: "Naxa kuítóhe yato mil chojni kuítekaon sín tí janhan kjuixienhyha sín toch'in sín tí nkehe tsíkjanoya Baal." ††5 Ntá kjaxin xikaha ijie naxa kuítóhe iso tí sín naxa tinkáchónki Dios. Kjuasáyé Dios kixin kuíkonóhehe ch'án tí sín la tsíkjeyá ch'án kixin tsaá iso tí jehe sín. 6 Mé xikaha kjuasáyé Dios sinchekaá ch'án tí jehe sín kixin jehya tí xra kjuích'e sín chrókuaáxin sín. Náhi. Kjuasáyé Dios mé sinchekaá sín ch'án. Kixin tí xra chrókjuich'e sín ntá chrókuaáxin sín la jehya kjuasáyé Dios tí xikaha.

7 A ntá tí xikaha la, ¿nkexrí? Tí sín israelita la k'uitjehya sín tí nkehe xritjeyá sín. A ntá tí sín kjuéyá Dios la k'uitja sín. A ntá tí sín í so a la icha asén sín la kuítekakonyha sín. 8 Éxí ntá chro xroon itén Dios kixin: "Dios kjuanjonyha kjuachaxin chrókienxín tí sín a la ko mé kjaxin xikaha naxa sítonhen tí yaon ijie. La kjuanjonyha ch'án kjuachaxin kixin chrók'uikon sín la ko chrókienxín sín." ††9 Kjaxin tsintá chro ch'ín David kixin:

Tí kia tjasin sín mé tjasixín sín jie, tsjasótexín sín.

10 Tí ikon sín ts'ikonxínhyha sín kixin ts'óna sín ntakótán

ntá tí jie kuènte sín mé jnkochrín yámá sín. ††

Tsaá tí sín jehya sín judío

11 A ntá ijie tjánchánkía: Tí sín judío la tí kjuasin sín jie la çá ó naá kuítóexón Dios tí jehe sín? Kjá náhi. Tió kuítekakonyha tí sín judío a ntá tí sín jehya judío la mé kjuacha sín kuaá sín. A ntá tí sín israelita la kónínkaon sín kixin kjuachahya sín. 12 A ntá tí jie kjuasin tí sín judío, a ntá kuítóhe Dios tí jehe sín, a ntá tí sín jehya judío antsí k'uitja sín nkexrí tsinkáchónki sín Dios. A ntá tí nkehe ntoáhyha kjuích'e tí sín judío ntá tí sín jehya judío kjuacha sín kuaá sín. A ntá tí chrókjan tí sín judío chrókuitekaon sín Cristo la antsí má náxrjón tíha.

13 Chonta iso nkehe chrókuinhínra jahará jehya judiorá kixin Dios mé chr'ánna kixin tsjakohá tí sín jehya judío la antsí tjetóan tí xra kuènte Ìnchéni chrókjuít'a. 14 Tjínkavan kixin tí sín chjasená chrókóchjínxinhin sín kixin jahará tinkachónkirá Dios kixin ntá chrókjuacha chrókuaá iso tí jehe sín. 15 Kuítóhe Dios tí sín judío, a ntá iso tí sín jehya judío k'uitja sín tí kjuaxróxin kuènte Dios. A ntá tí chrókuitekaon tí sín judío kjaxin la yóhe éxí chróxechón chojni tsík'en tí jehe sín. 16 Tí chrókjuinchetjóá Dios tí niotja xrankixín chrók'óna tí ich'o la ntá kuenté tí ch'o chrókjuinchetjóá ch'án. A ntá kjaxin tí chrókjuinchetjóá ch'án tí nuèé

††† 1 Reyes 19.10, 14 ††† 1 Reyes 19.18 ††† Deuteronomio 29.4; Isaías 29.10 †† Salmo 69.22–23

ijnko nta la kjaxin kaín tí chaon tí nta chrókjuinchetjóá ch'án.

¹⁷ Ntá isó tí sín judío la éxí iso chaon tí nta olivo mé xikaha tsichrinjin la ntá jahará la éxí ijnko chaon nta olivo nteje tsík'óna injerto mé xikaha ts'ejóchónxin tí nta chaon tí tronco tí nta olivo jína xráxín tjechón.

¹⁸ Ntáchrohyará kixin tí chaon tí nta la antsí jína. Íchá jína tsontáchrórá kixin jehya tí nta t'etuenhen ti nuèé nta. Náhí. Tí nuèé mé tsjinkitsa tí nta mé xikaha tí jahará.

¹⁹ Ntá jahará tsontáchrórá kixin: "A ntá tí chaon tí nta la tsichrinjin kixin ntá jeheni tsitoheni lùké tí nta chaon tsichrinjin". ²⁰ Tíha la chaxín. Kjánchó chrínjin kixin kuítেকakonhya Dios. A ntá jahará la tjejorá ntiha kixin tinkachónkirá Dios. A ntá chrokjuinchehnkehýará. Íchá jína chróchrakonrá. ²¹ Kixin Dios la kuikonóghya ch'án tí nta chaon kuènte tí nta tronco la ntá mé xikaha kjaxin tí jahará la tsikonóghýará ch'án. ²² Tsjeherá kixin Dios la imá jína kjánchó kjaxin sinchekjasóte ch'án tí sín titekakonhya. A ntá jína ch'án la kjuínkítsa ch'án tí jahará. Kjánchó chrók'uejorá jnkojína éxí tjinkaon tí jehhe ch'án. A ntá tí náhi la chaxín jahará la tsitohará ch'án. ²³ A ntá tí sín judío tsitohé sín tí nkehe ntoáhya k'uékjich'e sín ntá jehhe ch'án kjónté senó kóchrínjin ch'án la ntá ijie sinchetséxin ch'án tí tronco inaá kixin jehhe ch'án la imá chóna ch'án kjuachaxin kixin xikaha sich'e ch'án. ²⁴ A ntá jahará jehya judíorá mé tsíkóchrínjinrá ch'án nta olivo nteje. A ntá antsí má xra tsotséxin tí nta olivo jína. A ntá tí sín judío la nta chaon kuènte tí tronco nta olivo jína la antsí xrahya tsjatsuenhen tsotséxin kichó inaá kixin ó nta chaon kuènte.

Tí tsjixín ntá tsaáxin tí sín Israel

²⁵ Kichóni, tjínkavan tsonohará tí nkehe jehó Dios nohe kixin sinchehnkehýará jahórá kixin ó nohará. Mé tí sín Israel tsitekakonhya sín hasta ts'ixenjian kaín tí sín jehya judío tsitekaon. ²⁶ Tió xikaha tsonhen ntá kaín tí sín Israel tsaá sín kixin tí xroon itén Dios ntáchro kixin: Tí nkexro sinchekaáni mé tsixín ch'án chjasin Jerusalén

la tsjatsen ch'án ti jje kuènte tí sín tsík'axrjeníxin ch'ín Jacob.

²⁷ Tíhi mé kjuachaxin nixin kuèntana ts'áyéhe tí jehhe sín

kixin janhan mé kjuatsiyen ijje sín. †

²⁸ Xikaha kixin tí tan nixin tsaáxinni ntá tí sín judío mé tsonínkakonhen sín Dios kixin ntá jahará ts'ayéhérá tí nkehe kuènte Dios. Kjánchó Dios naxa tjuèhe tí jehhe sín judío kixin jehhe ch'án tsík'jeyá ch'án tí sín tsík'axrjeníxin tí jehhe sín. ²⁹ Kixin tí kaín nkehe kjuanjon Dios la tsakitsjehya ch'án la ko tsitohéya ch'án tí sín tsík'iyéhe ch'án. ³⁰ Senó la jahará k'uékitekákonyará Dios a ntá ijie la tí sín judío titekakonhya sín. A ntá jahará la kjónté la kuikonóghýará Dios. ³¹ Mé xikaha jehhe sín kuítেকakonhya sín Dios la ntá kjónté xikaha la jehhe ch'án tsikonóghé tí jehhe sín éxí kuikonóghýará ch'án. ³² Kixin

Dios la kuítohé ch'án kaín chojni kixin chrókjuasin sín jje kixin ntá tsjakoxin ch'án tí kjuachaxin kuènte ch'án kixin sinchetjóá ch'án kaín sín kjónté chojni chóna jje.

³³ A ntá tí kjuachaxin kuènte Dios la imá jje la ko imá nohe ch'án. Ninkexró tsjachahya tsochronkaxín nkexrí tjenkayáxin ch'án la ko ninkexró tsjachahya tsienxín tí ntja kuènte ch'án. ³⁴ Ntáchro xroon itén Dios kixin: "¿Xá nkexro chrókienxín nkexrí tjenkayáxin Ìnchéni la xá nkexro chrókjuinkítsa chrókjuakohe tí jehhe ch'án?

³⁵ ¿Xá nkexro kjuanjon nkehe senó k'uáyéhe Dios a ntá ijie tjinkaon chrók'uáyéhe inaá?" †³⁶ Kixin kaín nkehe la tjxin tí tjen Dios kixin kaín nkehe la kjuich'éna ch'án kixin jehhe ch'án chóna ch'án. Mé xikaha tjancheheni kjuasáyé Dios jnkochrín. Amén.

Chjehérá cuérporá Dios kixin sinchetjóá ch'án

12 Mé xikaha kichó ni, xrjanóghará kixin Dios ó kuikonóghýará ch'án ntá jahará chróchjehérá cuérporá Dios éxí ijnko nkehe tjechón kixin jehhe ch'án ó kjuíntatjóará ch'án la mé xikaha chrókóxrjinhin ch'án. Tíhi mé ijnko nkehe ntoá t'ichjánxin chróchjeheni ch'án. ² Chrókóxrjíanhyará tí nkehe siín chjasintajni. Náhí. Chrókónixín tí nkehe tjenkayáxinrá kixin jína chrókjuenkayáxinrá. Xikaha ntá chrókónohará kixin nkexrí tjinkaon Dios kixin ntoá chrók'uejorá éxí tóxrjinhin ch'án.

³ Kjuasáyé Dios kjuanjon ch'án tí xra tjét'ahá ch'án. Mé xikaha nixjahará kaín rá kixin chrókjuenkayáxinhyará kixin imá tjetoaná. Náhí. Chrókjuenkayáxinrá jína éxí tí kjuachaxin tjáhará Dios éxí nkexrí tinkachónkirá ch'án. ⁴ Mé xikaha ijnko cuerpo la nchónhya parte chóna. A ntá tí parte la jehya jnkokón xra chrókjuich'e. ⁵ Mé kjaxin xikaha tí jeheni kjónté nchónhyani la ts'ónani jnkokóá cuerpo kuènte Cristo. Mé xikaha jnkokóá chrókjuenkayáxinni kixin ó l'ónani jnkokóá cuerpo.

⁶ Dios kjuanjon nchónhya clase xra éxí tjinkaon ch'án chróchjehé ch'án jnkojnko chojni tí xra. Ntá t'ichjánxin jína sich'eni tí xra kjuanjon ch'án. A ntá tí kjuanjon ch'án kjuachaxin kixin tsochronkaxinni tí tan kuènte ch'án ntá t'ichjánxin sich'eni tí xra éxí titekaonni ch'án. ⁷ A ntá tí kjuanjon ch'án xra tsjinkítsani í jnko nkexro ntá t'ichjánxin jína sich'eni tí xra a. A ntá tí nkexro tsík'áyéhe kjuachaxin tsjako la t'ichjánxin jehó tí xra a chrókjuako. ⁸ Tí nkexro tsík'áyéhe kjuachaxin nchexraxinkaon í jnko nkexro la kaín asén chrókjuich'e ch'án tí xra a. A ntá tí nkexro tsjanjon ichrén nkehe la chrókójjehya chrókjuanjon ch'án. A ntá tí nkexro t'etotan la jína chrókjuich'e ch'án xra la ko tí nkexro chrókjuinkítsa tí sín chónahya la kjuaxróxin chrókjuinkítsa sín.

Tí nkehe chrókjuich'e tí sín tinkáchónki Cristo

⁹ Kaín asánrá chrótjuèherá kichuárá. Chrókjuítóherá tí nkehe jínahya tjenkayáxinrá la chrókjuenkayáxinrá tí

† Salmo 14.7, Isaías 59.20

†† Isaías 40.13-14

nkehe jína. ¹⁰ Chrótjuèherá kichuárá la ko chaxín chrókjuikosáyehérá kichuárá.

¹¹ Chrókósáhyará la chrókjuich'eherá Ìnchéni xra kaín asánrá.

¹² Chrókócháhará kixin tjejóchonhénra la chrókóninkákonhyará kjónté chrókjuasótiará. Chrókju-tóehyará chrónixjehérá Dios.

¹³ Chrókjuinkítsará tí sín tinkáchónki Ìnchéni tí chón-tahya sín nkehe sine sín. Chjehérá kjuachaxin ts'ejó tí sín tsjijinixjehará sín.

¹⁴ Nixjehérá Dios la tsjanchehérá ch'án kixin sincheyaon ch'án tí sín chonkíhará. Tjanchehérá Dios tsjinkítsa tí jehe sín la jehya kixin chrókóninkákonhén-rá sín.

¹⁵ Tócháhaakoárá tí sín tjejóchéhe sín la ko tí tjejóts-jánka sín la koirá chrótsjankará.

¹⁶ Kjuaxróxin chrók'uejorá. Chrókjuinchehnkehyará. Náhi. Chrókóyóhará éxi tí sín ña. Chrókjuinchehnkehyará kixin nohará.

¹⁷ Chrókjuich'ehyará jínahya tí sín kjuít'ahará ichrén nkehe jínahya. Náhi. Íchá jína chrókjuákoxinrá nkehe jína kixin chrók'uikon kaín chojni. ¹⁸ Chrókjuéyará jnko-jína chrók'uejorá. Éxi nkexrí chrókjuachará la kjuaxróxin chrók'uejorá kaín rá. ¹⁹ Tjuahará kichó ni, la chrókjuinchekjásótehyará jahorá tí sín ichrén nkehe kjuít'ahará. Náhi. Tjtohérá kixin Dios sinchekjasóte tí sín a. Ntáchro xroon itén Dios kixin: "Ixrā kuèntāna sijn-takitōaxián tíha. Janhan tsjénkahā tí sín a, ichro Ìnchéni." ²⁰ Kjaxin ntáchro xroon itén Dios kixin: "Tí sín nínkakonhan t'enxín sín kjinta la chróchjehé sín nkehe chrókjóne sín la tí t'enxín sín ntā la kjaxin chróchjehé sín nkehe chrók'ui sín. Mé xikaha chrókjuich'e kixin chrókósuèhe sín kixin tí nkehe kjuích'e sín."

²¹ Chrókjuítóehyará kixin chrókjuacha tí nkehe jínahya chrók'uejōnhanrá. Náhi. Chrókjuich'erá tí nkehe jína kixin chrókjuachahya tí nkehe jínahya chrók'uejōan.

13 Kaín chojni t'ichjánxin sinchexiteyéhe sín tí gobierno kixin tí kjuachaxin chóna sín la Dios tsík-janjon kixin kohya nijnko gobierno chrók'uejó tí jehya kjuachaxién Dios. ² Mé xikaha tí sín tjanjonko tí sín t'etōan la kjaxin nínkakonhen sín tí nkehe k'uejōan Dios. A ntá tí sín xikaha ch'e la mé jehe sín tjejá sín jje ts-jasótexín sín. ³ A ntá tí sín gobierno t'etōan la sinchek-jasótehya sín tí nkexro titekaon ch'e nkehe jína. Náhi. Tsóninkakonhen sín tí nkexro ch'e tí jínahya. Tí tjinkáonrá tsóninkakuanhyará sín la chrók'uejorá jnko-jína. Chrókjuinchehiteyéherá sín kixin chrókóninkakuanhyará sín. ⁴ Kixin Dios k'uejōan tí xra tjejóch'e sín kixin ntá jahará la jína chrók'uejorá. A ntá tí chrókjuich'erá nkehe jínahya la chróchakonrá kixin jehya chónkó tjejó tí gobierno. Náhi. Chóna sín kjuachaxin sinchekjasótiará sín kixin jehe sín la Dios k'uejōan tjejó sín tí xra a kixin sinchekjasóte sín tí sín jínahya tjenkayáxin. ⁵ Mé xikaha t'ichjánxin sinchexiteyéherá tí gobierno la jehya jehí kixin chrókjuinchekjásótiahayará sín. Náhi. Ó jehí jahará chróxráinkáonrá kixin t'ichjánxin sinchexiteyéherá sín. ⁶ La kjaxin jehya

táhó. Náhi. T'ichjánxin chrókjuenkehérá gobierno tí chichaon kuènte tí xra ch'erá tjanchia sín kixin tí gobierno la Dios k'uejōan tjejó sín t'etōan sín.

⁷ Kjaxin chrókjuenkehérá kaín chojni tjasikéhérá. Tí nkexro síká kuènte xra la chrókjuenkā sín kuènte tí xra, la tí nkexro síká ichrén nkehe nchekji ntá tíha kjaxin chrókjuenkā sín, la kjaxin chrókjuikosáyehérá tí sín t'etōan. ⁸ Kjaxin chrókjuasikéhyará nkexró. T'ichjánxin chrótjuèherá kichuárá kixin tí nkexro tjuèhe kichó la mé xikaha kjuínchexiteyá tí nkehe k'uejōan tí ley. ⁹ Kixin ntáchro tí mandamiento kixin: "Tjakéhya asánrá í jnko chojni chjin la ko t'oyánhyará kichuárá la ko tje-hyará la nixjahyará kjuach'ia kuènte í jnko chojni. La ko tjaké hya asánrá nkehe ókjé." ¹⁰ Kaín tíha la ko í so nkehe t'etōan Dios mé tienxínni t'axrjexín kixin: "Chrótjuèheni kichó ni éxi tjuèxin asénni." ¹⁰ Tí chojni tjuèhe kichó la ninkehó nkehe jínahya sich'ehe kichó. Mé xikaha chrótjuèhe kichuárá la mé xikaha mé chróx-iteyá jína tí nkehe nixja tí ley.

¹¹ Kaín tíha chrókónoheni tí tjejóni kixin ó kui tí hora chrók'uejósjeheni chrók'uajuahyani. Tí nkexro tsaáx-inni la í séhya itsi ch'án ijie, a ntá tí kjuankixinni kuítekaonni itén ch'án la ísé tsjxin ch'án. ¹² A ntá tí tie la í séhya tsjak'e kixin ó tsi tí t'inkáséyan la chrókuí-tōheni tí nkehe ch'eni kuènte sítié la chróchóntani kjuachaxin kuènte Nchakuen Dios kixin tsjinkítsa ts'ajini tí t'inkáséyan, éxi ijnko soldado t'inkáyate ch'án ka tsík'óna chica kixin kohya nkehe tsōnhen ch'án.

¹³ Chrók'uejóni jnkojína éxi nkexrí chrók'uajini chaxín ntoá tí t'inkáséyan a. Chrókjuasinhyani kia chrókjuanjōnxin chojni la ko chrókókoanhyani la ko chrókjuenkayáxinhyani chróchóntani nchónhya chojni chjin la ko chrókjuenkayáxinhyani tí nkehe ntáchro asénni la ko chrókjuéyáhyani kjuanínkaon la ko chrókóchjinoxienhyani. ¹⁴ A ntá jahará tákjará tí kjuachaxin kuènte Ìnchéni Jesucristo tsjinkítsará la tíha mé éxi chrók'uínkayará nkehe tsík'óna chica kixin kohya nkehe chrókónhanrá. La ko chrókjuenkayáxinhyará tí nkehe ntoáhya tjenkayáxin chojni jínahya.

Tjontahyará kichuárá

14 A ntá kjónté ijnko chojni kánhyó tinkáchónki Ìnchéni la chrók'uejokoará ch'án la ko chrókjón-tahyará ch'án kjónté kánhyó nohe ch'án. ² A ntá iso sín chaxín nohe sín la tjinkaon sín chrókjóne sín kaín nkehe. A ntá tí sín kánhyó tinkáchónki sín Ìnchéni ntá tjinkaon sín chrókjónehya sín nto, ntá kayoa ó chrókjóne sín. ³ Tí nkexro chrókjóne kaín nkehe chrókjoniehya tí nkexro tjinkaon chrókjónehya nkehe. A ntá tí sín chrókjónehya nkehe chrókjontahya sín tí sín chrókjóne sín kaín nkehe kixin kjónté xikaha la Dios tsakja tí jehe sín. ⁴ ¿Xá nkexro jaha kixin chrókjónta tí nkexro ch'ehe xra í jnko nkexro? Tíha la xra kuènte tí lámgé ch'án tsontáchro á jína kjuích'e ch'án xra o náhi. A ntá kjá tsjak'e ch'án jína kixin Ìnchéni chóna ch'án kjuachaxin tsjinkítsa ch'án tsjak'e tí ch'ín a jína.

† Deuteronomio 32.35 †† Proverbios 25.21–22

‡ Éxodo 20.13–15, 17; Deuteronomio 5.17–19, 21; Levítico 19.18

⁵ Iso sín tjenkayáxin sín kixin imá tjettoan ijnko yaon a ntá í jnko yaon la náhí. La í so sín ntáchro sín kixin kaín yaon la ó jnkokón. Ntá jnkojnko sín la jehó sín chrókjuenkayáxin sín kixin nkehe tí chaxín titekaon sín. ⁶ Tí sín xraxinkaon tí yaon la tjikosáyehe sín Ìnchéni la kjaxin tí sín tinkáchónkihya sín xikaha la tjikosáyehe sín Ìnchéni kjónté xraxinkakonhya sín tí yaon. Kjaxin tí sín ine kaín nkehe la ine sín kixin xikaha tjikosáyehe sín Ìnchéni la kjaxin tjanchehe sín kjuasáyé Dios. A ntá kjaxin tí sín nehya kaín nkehe la xikaha mé tjikosáyehe sín Ìnchéni la kjaxin tjanchehe sín kjuasáyé Dios.

⁷ Nijnko tí jeheni tjejóni kixin jehóni chrók'uejótanni la ko jehya jehí chrók'uenni. ⁸ Tí tjejóni la tjejóni kixin sich'ehe ni xra Ìnchéni la kjónté its'enni la kuènte ch'án tí jeheni. Méxra kjónté chrók'uejóhónni o kjónté chrók'uenni la kuènte ch'án tí jeheni. ⁹ Méxra xikaha ntá Cristo la ik'uén ch'án la ko xechón ch'án inaá kixin k'óna ch'án Ìnchéni tí sín tsík'en la ko tí sín tjejóhón.

¹⁰ A ntá jahará la, ¿nkeuènte tjejótará tí kichuárá o nkeuènte chontehyará kaín sín kjuasáya? Kixin kaín ni tsochjinani tí tjen Dios kixin tsontáchro ch'án á jína xra kjuích'eni o náhí. ¹¹ Ntáchro xroon itén Dios kixin:

Méxra janhan takjénxian asenná, ichro Ìnchéni, kixin tí tjeñ la ts'ejóxin toch'in kaín chojni kixin kaín chojni la tsjanchia sín kjuasáya kixin janhan mé Dios kuènte sín. †

¹² Mé xikaha jnkojnkonni chrókónoheni kixin tsochenkani Dios nkexrí kjuích'eni.

Tjachruehyará kichuárá

¹³ Méxra chrókjontahyará kichuárá. Íchá jína kixin ninkehó nkehe chrókjuích'ehyará kixin ntá tí sín kichó ni chrókjuasinxinhya sín jie kixin tí chrókjuasin sín jie ntá xikaha chrók'uitjáyaxín tí tinkáchónki sín Ìnchéni.

¹⁴ Janhan tinkáchónkia Ìnchéni Jesús la ntá xikaha ó nõna kixin kohya ninkehó nkehe jehí tjuáhya. A ntá ijnko nkexro tjenkayáxin kixin jehya nkehe jína tíha ntá chaxín tjuáhya tí nkehe kixin xikaha tjenkayáxin ch'án.

¹⁵ Tí tjenkayáxin tí kichuá kixin tí nkehe inte la ntoáhya a ntá tí xikaha ch'e la tjuèhya tí kichuá. Kixin jehya tí nkehe chrókjonte ó chrókjuínchek'itjáyaxián tí kichuá kixin Cristo k'uenyákonhen ch'án kjaxin.

¹⁶ Chrókjuích'ehyará nkehe jínahya kixin ntá xikaha chrók'uántaxínhin sín tí nkehe jína tinkáchónkirá.

¹⁷ Kixin tí kjuachaxièn Dios la jehya tí nkehe chrokjóneni o tí nkehe chroku'ui. Náhi. Tí tjen tí kjuachaxièn Dios la chrók'uejóni jnkojína la ko kjuaxróxin chrók'uejóni la ko chrókóchéheni kixin chóntani Nchakuen Dios. ¹⁸ Tí nkexro ch'ehe Cristo xra mé chrókjuínchek'itjáyaxián la ko chrókjuínchek'itjáyaxián chojni.

¹⁹ Mé xikaha chrókjuéyáni kaín tí nkehe tjikao kjuaxróxin kixin ntá tsjinkitsani tí sín kichó ni kixin ntá kjaxin sín antsí chrókuinkáchónki sín Ìnchéni.

²⁰ Chrókjuínchek'itjáyaxiánhyará tí xra kuènte Dios kixin tí nkehe chrókjónterá ó kixin kaín nkehe chrókjónterá la

ó tsíkjinchetjóá Dios. Tí jínahya la tí chrókjóneni ókjé nkehe ntá xikaha la í so chojni chrók'uitjáyaxín tí nkehe tinkáchónki sín. ²¹ Ntá íchá jína chrókjontehyará into la ko chrók'uihyará vino la ko ninkehó nkehe chrókjuích'ehyará tí xikaha chrókjuasixin jie kichuárá. ²² Tí nkehe tinkáchónkirá la jahórá chrókónohará kixin Dios la tjetsjehe ch'án. A ntá jína tsjak'e tí nkexro tí chrókjuasixinhya ch'án jie tí nkehe tjenkayáxin ch'án. ²³ A ntá tí nkexro ine nkehe la tjenkayáxin sín kixin tsjasixín sín jie ntá chaxín xikaha yámá sín jie kixin kénhya asén sín kjóne sín tí nkehe. La tió kénhya asén sín tjenkayáxin sín la ó kjuasin sín jie.

Nchechéhérá kichuárá la jehya jahórá

15 Tí antsí tinkáchónkini Ìnchéni ntá chrókjuínkitsani tí sín kánhyó tinkáchónki tí jehe ch'án la chrókjuích'ehyani tí nkehe chrókóchéheni jehóni. ² Kjaxin kaín ni chrókjuínchek'itjáyaxián kichó ni kixin chrók'uejó sín jína la ko kixin antsí chrókuinkáchónki sín Ìnchéni. ³ Kixin kjaxin Cristo kjuích'ehya ch'án tí nkehe chrókóchéheni ch'án jehó ch'án. Náhi. Kjuínchexiteyá ch'án éxi ntáchro xroon itén Dios kixin: "K'uinka kjuasótexinna kaín tí kjuanínkaon chóna tí sín nínkakonhen Dios." †⁴ Kaín nkehe chrónka xroon itén Dios senó la tsíkjin sín ósé kixin chrókónoheni kixin ntá chrók'uejóhónhenni la chrókóninkakonhyani kixin tíha mé nchechéheni. ⁵ Dios, mé tí nkexro tsjinkitsani la ko nchechéheni, la kjaxin tsjinkitsa ch'án tí jahará kixin ts'ejorá jnkojína la ko jnkokón tsjenkayáxinkoará kichuárá kixin xikaha kjuakoxin Cristo Jesús. ⁶ Kixin kaín ni jnkokogá chrók'uákjénxinni Dios la chrókjuancheheni kjuasáyé ch'án mé jehe ch'án mé It'É Ìnchéni Jesucristo.

Tí tan jína xrakohé tí sín jehya judío

⁷ Chrókjuánjonrá kjuachaxin ts'ejó í so chojni la chrótjuèherá sín kixin éxi Cristo tsík'áyéhe ch'án tí jahará mé xikaha tsjikosáyehérá Dios. ⁸ Janhan jína chróntáxrjan kixin Cristo ikui sich'ehe xra tí sín judío kixin tsoxiteyá tí nkehe tsíchenka Dios tí sín tsík'axrjenixinni ósé kixin xikaha tsjakoxin kixin Dios la jína ch'án la sinchexiteyá ch'án tí nkehe tsintáchro ch'án.

⁹ La kjaxin ikui ch'án kixin kjónté tí sín jehya sín judío la chrokuanchehe sín kjuasáyé Dios kixin kuikonóhe ch'án sín éxi chrónka tí xroon itén Dios kixin:

Janhan la ko tí sín tjejó ókjé nación mé tsjancheheni kjuasáyé Dios

la ko tsotsjeni himno kixin ts'ákjénxinni ihnié ch'án. †

¹⁰ Kjaxin ntáchro í jnko parte xroon itén Dios inaá kixin:

Tsocháhaokará kaín tí sín kuènté Dios. †

¹¹ Kjaxin ntáchro xroon itén Dios inaá kixin:

Tjanchehérá kjuasáyé ìnchéni Dios kaín rá kjónté jehya judíforá

mé kaín chojni chrókjuanchehe sín kjuasáyé Dios. †

¹² Kjaxin ch'in Isafas tsíkjin kixin:

†† Salmo 69.9 † 2 Samuel 22.50; Salmo 18.49 ††
Deuteronomio 32.43 †† Salmo 117.1

† Isaías 45.23

Ts'axrjenixin ch'ín Isaí ijnko nkexro la ts'etuenhen ch'án kaín tí sín jehya judío, a ntá tí sín a mé tsinkáchónki sín tí nkexro a. † Mé xíkaha ichro itén Dios.

¹³ Dios mé tjetjanjon ch'án kjuachaxin tjejóchónhenni la jehe ch'án nchechéheni ch'án la tjanjon ch'án kjuaxróxin ts'ejóni kixin titekaonni tí jehe ch'án kixin ntá ts'ánkí tí kjuachéhe tjejóchónhenni kjuachaxièn Nchakuen ch'án.

¹⁴ Kíchóni, chaxín tónóna kixin jahará la jína tjejórá la kaín xín kjuaxrexinkaon jína tjenkayáxinrá la nohará tsjinkítsará chénkará kíchuará. ¹⁵ La kjónté xíkaha la chrakónhya ikjían tí xroon i chr'anhánrá xrjanka kaín tí nkehe kixin chrók'uitjáyanhyará chróxráxinkáonrá kaín nkehe. Mé xíkaha it'a tí xrá kixin kjuasáyé Dios kjuanjon ch'án tí xrá. ¹⁶ Kixin sít'ahá Jesucristo xrá tsotjanka tí sín jehya judío tí itén Dios. Tí xrá mé tjákua tí tan jína tsaáxin chojni kixin ntá janhan tsánjuan tí sín jehya judío ts'áyéhe Dios éxí ijnko nkehe tsóxrjínhjin ch'án kixin Nchakuen ch'án kótjuáxin sín.

¹⁷ Janhan mé ijnko chojni tinkáchónki Cristo Jesús la mé xíkaha siín kjuachaxin tsóchàna kixin t'ahá xrá Dios. ¹⁸ Chrokjuahya tsóhnke tsontáxrjan í jnko nkehe. Jehó tsóxrjanka nkexrí tí kjuachaxin kjuanjon Cristo chjína kixin tsotjanka tí sín jehya judío tí itén ch'án kixin tsitekaon sín Dios. Ntá xíkaha kuítekaon sín kixin tí itan kjuákua la ko tí nkehe jína kjuít'a. ¹⁹ Kixin tí kjuachaxièn Dios mé kjuákoxiàn tí kjuásian kjuaxroan la ko kjuákoxiàn tí kjuachaxin kuènte Nchakuen Dios. Mé xíkaha kjuintaxiàn kjuákua tí tan jína tsaáxin chojni Cristo xrankixiàn chjasin Jerusalén la nkuíxín chjinxón ntiha la hasta estado Ilírico. ²⁰ Mé xíkaha tjínkavan tsjékjákua tí tan tsaáxinni tí chjasin naxá tienhyé sín ihnié Cristo kixin tí janhan tjínkakhonya tsjírónkaxiàn tí xrá kuènte í jnko chojni xráxín tjech'e xrá. ²¹ Íchá jína éxí ntáchro xroon itén Dios kixin:

Chrókuinhin tí sín naxá kienhyé sín tí tan kuènte ti jehe ch'án.

La ko chrókienxín tí sín naxá kienhyé tí tan kuènte ch'án. ††

Ch'ín Pablo tjenkayáxin ch'án sátsji ch'án chjasin Roma

²² Nchónhya veces tjínkavan chrókjuasántsjaḡa tí jahará kjánchó naxá xitjahya kjuasán ntiha. ²³ Kjánchó ijie la ó kjuixinna tí xrá nkuíxín tí tjèn ntihi. Ntá itsjé nánó tjínkavan chrókjuasántsjaḡa tí jahará ²⁴ a ntá ijie ts'atsínka tsonixjahirá tí sátsjia nación España. Ntá tsóchàna ts'íkuàn tí jahará ntá tsjixin ntá chr'éxin tjínkavan kixin jahará tsjinkítsará tí sátsjia. ²⁵ A ntá ijie la sátsjija chjasin Jerusalén, sátsjikian tí nkehe tsjinkítsa tí sín kíchó ni ntiha. ²⁶ Kixin tí sín estado Macedonia la ko estado Acaya kjuenkayáxin sín tsjejo sín chichaon kixin tsóchr'énhen sín tí sín kíchó ni ntiha tsóchjéhe tí sín nóa tjejó chjasin Jerusalén. ²⁷ Jehe sín kóxrjínhjin sich'e sín xíkaha kixin tí sín judío tinkáchónki Cristo kjuínkítsa tí jehe sín tsonhe sín itén Dios. Ntá ijie la je-

he sín chrókjuinkítsa sín inaá chrókjuanjon sín iso tí nkehe chóna sín chrók'uáyéhe tí sín judío tinkáchónki Ìnchéni. ²⁸ A ntá tió tsjixin tí xrá la ts'áyéhe sín tí chichaon la ntá janhan sátsjia España la ts'atsínkua tsonixjahirá. ²⁹ Ó nóna kixin tió sátsjia la Cristo mé imá sincheyaon ch'án tí janhan la ko tí jahará.

³⁰ Kíchóni kjuasáyé Ìnchéni Jesucristo la ko tí Nchakuen ch'án tjanjon kjuachaxin tsotjuèheni kíchó ni mé xrjannóḡahará kixin jnkokoḡa chrókjuenkayáxinni kixin tí xrá tjét'a la ko chrónixjehérá Dios kixin tí janhan. ³¹ Tjanchehérá Dios kixin tsjinkítsa ch'án tí janhan kixin kohya nkehe tsónna kixin kaín tí sín titekakhonya Dios siín chjasin Judea. La ko tjanchiará kixin jína sátsjikian tí nkehe tsjinkítsa tí sín kíchó ni tjejó chjasin Jerusalén kixin jína chrók'uáyéhe sín. ³² Ntá tí tjínkaon Dios la tsóchàna tsjasán tí tjejórá jahará la ko kjuaxróxin tsjak'é tí tsjasántsjaḡará. ³³ Dios tjanjon kjuaxróxin ts'ejokoará kaín rá. Amén.

Ch'ín Pablo nixjéhe ch'án tí sín chóxin ch'án

16 Tétuḡanhanrá tsjinkítsará tí tjan kíchó ni Febe ch'e tjan xrá njnko chjasin Cencrea ² mé tjánjonrá kjuachaxin tsjak'e tjan kjuachaxièn ihnié Ìnchéni éxí ch'eherá í so sín kíchó ni tinkáchónki Ìnchéni. Tsjinkítsará tjan ichrén nkehe t'ichjánxinhin tjan kixin jehe tjan kjaxin kjuínkítsa tjan nchónhya chojni la kjaxin kjuinkítsa tjan tí janhan.

³ Nixjehérá tjan Priscila la ko ch'ín Aquila. Jehe sín jnkokoḡa kjuích'ekoni xrá kixin kjaxin sín mé ch'ehe sín Cristo xrá. ⁴ Jehe sín chrók'uenxín sín kixin kjuínkítsana sín tí janhan mé xíkaha tjaḡa sín kjuasáya la jehya janhván, kjaxin kaín sín kíchó ni njnkoé tí sín jehya judío. ⁵ Nixjehérá kjaxin kaín kíchó ni tóchjina ntōe tjan Priscila la ko ch'ín Aquila. Nixjehérá tí ch'ín choxian jína Epeneto mé jehe ch'án la saoxín kuítekaon ch'án Cristo estado Acaya. ⁶ Nixjehérá tjan María kixin kjaxin tjan kjuích'e tjan xrá tí tjejórá ntiha. ⁷ Kjaxin nixjehérá tí sín tsíkixiàn chjasenná mé ch'ín Andrónico la ko ch'ín Junias. Tí k'uíkjèna ntōechiso la kjaxin tí jehe sín k'uikjehe sín. Kjaxin kaín tí í so sín apóstol la tjikosáyehe sín tí sín a. Jehe sín senó kuinkáchónki sín Cristo ntá chr'éxin janhan.

⁸ Nixjehérá ch'ín Amplias kixin jehe ch'án mé ijnko nkexro choxian la ko tjuḡahá tinkáchónki Ìnchéni. ⁹ Nixjehérá ch'ín Urbano kixin jnkokoḡa kjuít'akian ch'án xrá kuènte Jesucristo la ko nixjehérá tí ch'ín choxian Estaquis. ¹⁰ Nixjehérá ch'ín Apeles. Jehe ch'án la kjónté nchónhya nkehe kónhen ch'án kjuasóte ch'án kixin tinkáchónki ch'án Cristo. Kjaxin nixjehérá tí sín kjéhya ch'ín Aristóbulo. ¹¹ Kjaxin nixjehérá tí ch'ín kjéhyana Herodión la ko kjaxin nixjehérá kaín tí sín kjéhya ch'ín Narciso kixin kjaxin sín tinkáchónki sín Ìnchéni. ¹² Nixjehérá tjan Trifena la ko tjan Trifosa. Kjaxin jehe sín kjuích'e sín xrá kuènte Ìnchéni la ko nixjehérá kjaxin tí tjan kíchó ni Pérsida. Kjaxin kjuínkítsa tjan kjuích'e tjan xrá kuènte Ìnchéni. ¹³ Kjaxin nixjehérá ch'ín Rufo, ijnko chojni tsíkjejá Ìnchéni la ko nixjehérá tí iné ch'án kjaxin kixin kjaxin tjan kjuínkítsa tjan tí janhan la éxí naná

† Isaías 11.10 †† Isaías 52.15

k'uíkuañ tí jehe tjan. ¹⁴ Kjaxin nixjehérá ch'ín Asíncrito la ko ch'ín Flegonte la ko ch'ín Hermas la ko ch'ín Patrobas la ko ch'ín Hermes la ko tí í so sín kíchó ni tjejóko tí jehe sín ntiha. ¹⁵ Nixjehérá kjaxin ch'ín Filólogo la ko tjan Julia la ko ch'ín Nereo la ko tí tjan kíchó ch'án la ko ch'ín Olimpas la ko kaín tí sín kíchó ni tinkáchónki Ìnchéni tjejóko sín ntiha.

¹⁶ Kjaxin tsehérá tja kichuárá kjuachaxin ihnjé Ìnchéni. Kaín tí sín n̄nko kuènte Cristo ntihi xraxinkaon sín tí jahará la nixjahará sín.

¹⁷ Kíchóni, xrjanóahará kixin chrótsjehérá nkexro tí sín tjixrónkaxin chrók'óxíka tí sín jnkokóá tinkáchónki Ìnchéni. Jehe sín titekakonhya sín tí itén Dios kjuáko-hárá k'uitjará. Tí xíkaha ch'e sín la chrók'uaxrjekjanxín-rá ntiha. ¹⁸ Tí nkexro xíkaha ch'e la jehya Ìnchéni Jesucristo ch'ehe xra. Náhi. Jehí tjinkaon sín chrókjuixrónkaxin sín la nixja sín tí nkehe náxrjón ó la xíkaha ch'iyehé sín asén tí chojni naxa noehya. ¹⁹ Kaín chojni ó nohe kixin jahará la ó kuítekáonrá Ìnchéni. Mé xíkaha chàna tí janhan la tjinkavan chrókóxakonhanrá chrókjuich'erá xra jina. Jehya kixin chrókjuich'erá nkehe jínahya. ²⁰ Tí Dios tjanjon kjuaxróxin mé tjoka tsinkátja Satanás, í ts'etuñehya. A ntá Ìnchéni Jesucristo mé sintayaonrá ch'án.

²¹ Ch'ín Timoteo nixjahará ch'án. Jehe ch'án jnkokón ch'ekoni xra. La kjaxin ch'ín Lucio la ko ch'ín Jasón la ko ch'ín Sosípater, tí sín chjasenná, mé nixjahará sín.

²² Janhan Tercio ikjian tí xroon i k'uetoan ch'ín Pablo la kjaxin nixjahará kjuachaxién Ìnchéni.

²³ Ch'ín Gayo nixjahará ch'án. Jehe ch'án kjuanjon kjuachaxin kjuak'é janhan ntøe ch'án la ko kaín tí sín kuènte n̄nko tójnkotsé ntøe ch'án. La ko nixjahará ch'ín Erasto. Jehe ch'án mé tesorero kuènte chjasin la ko tí ch'ín kíchó ni Cuarto kjaxin nixjahará ch'án.

²⁴ Ìnchéni Jesucristo sincheyaon ch'án kaín tí jahará. Amén.

²⁵ Ntá ijie tsjancheheni kjuasáyé Dios kixin jehe ch'án tjinkjtsa ch'án kixin jina chrók'uejorá éxí chrónka tí tan jina tsaáxinni la ko éxí kjuakoni kuènte Jesucristo. Tíha mé chaxin chrónka éxí Dios k'uetoan nchenoheni ch'án tí nkehe ninkexró k'uénoehya desde k'óna chjasintajni. ²⁶ A ntá ijie kaín ni tsoñoexínni nkexrí nixja xroon ikjin tí sín profeta kixin nkexrí k'uetoan Dios itjen jnkochrín. Ntá kaín nkehe k'uénoehya ninkexró a ntá tsochóxin kuenté chjasintajni kixin tsinkáchónki sín la ko tsitekaon sín Dios.

²⁷ Itjen jnkokóá Dios la jehó ch'án imá nohe ch'án la jehó ch'án mé tjancheheni kjuasáya kixin tinkáchónki ni Ìnchéni Jesucristo jnkochrín. Amén. Ó tjen.

1 CORINTIOS

Ch'ín Pablo mé ikjin ch'án xroon ichr'án ch'án tí n̄nko chjasin Corinto

1 Janhan Pablo mé kjueyána Dios tjinkaon ch'án kixin kjuachaxin kuènte Ìnchéni Jesucristo mé chrókjuít'ahā ch'án xrā. Janhan la ko kichó ni Sóstenes mé ² ikjinni tí xroon i chr'ánhanráni tí jahará tójnkot-sérá n̄nko chjasin Corinto. Ó kjuínchetjóará Ìnchéni Jesucristo na mé kjueyará Dios tí jahará kixin chrók'uaxr-jekjanxínrá tí sín tjasin j̄e kixin tjinkaon ch'án tí jahará kixin tjóá chrók'uejorá la ko x̄ikaha kjueyá ch'án kaín xín tí sín tjanchehe sín ìnchéni Jesucristo kixin chrókjuink̄itsa ch'án sín, tíha mé Ìnché sín la ko Ìnchéni. ³ Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Ìnchéni Cristo mé tjencheyaon tí sín ntiha

⁴ Jnkochr̄ixín tjáncháha Dios kjuasáya kixin sintayaonrá ch'án tí jahará kixin tinkachónkirá Ìnchéni Cristo Jesús. ⁵ Na mé Dios tjáhará kjuachaxin kuènte ch'án ntá x̄ikaha āntsí j̄ina nohará chr̄onkaxínrá kixin nkexr̄i tinkachónkirá Ìnchéni la ko k̄jāxin āntsí j̄ina tiénxinrá kaín nkehe chaxín ntoá. ⁶ Tí nkehe kuínhínrá kixin nkexr̄i t̄jen Cristo na ntá jie jahará tjákoxinrá. ⁷ Ntá jahará ó chontará kaín xín tí kjuachaxin kuènte Nch̄akuen Dios, la í ninkehó t'it̄jáyankíhya tí kjuachaxin kuènte ch'án k'uayéhérá nachrohe t̄jechohnhénrá tsokjan Ìnchéni Jesucristo. ⁸ Ntá Ìnchéni ts'ayakonhanrá ch'án kixin ts̄it̄oéhyará tí tinkachónkirá ch'án hasta ts̄jixraká tí yaon ts̄jixixín. Ntá ninkexr̄ó ts'ekahyará jie kixin ntoáhya t̄jechoherá, tsixro sín, tí yaon tsokjan ch'án. ⁹ Ó noheni kixin Dios chaxín sinchexiteyá ch'án tí nkehe ntáchro ch'án kixin jehe ch'án mé ts̄ik̄jeyará ch'án kixin chrókjuinkachónkirá tí X̄jeen ch'án Jesucristo, mé Ìnchéni tíha.

Jnkokoáhya kjuenkayáxin tí sín tinkáchónki Cristo ntiha chjasin Corinto

¹⁰ Kichóni, xr̄janóaxínrá tí kjuachaxin ih̄nié Ìnchéni Jesucristo kixin jnkokoá chrókjuenkayáxinrá la ko chrók'uaxr̄jentahyará ókjé na mé jnkokoá chrókjuenkayáxin̄koará kichuárá. ¹¹ Kichóni, ó kūnhan tí nkehe chrónka tí sín kjéhya ch'ín Cloé kixin síin kjuanínkaon tí t̄jedorá tójnkotsérá ntiha. ¹² Na mé ntáxr̄jan kixin isorá ntáchrorá kixin jahará chréhérá tí janhan Pablo, la ko í sorá ntáchrorá kixin jahará chréhérá tí ch'ín Apolos, la ko í sorá ntáchrorá kixin ja-

hará chréhérá tí ch'ín Pedro, la ko í sorá ntáchrorá kixin chréhérá Cristo. ¹³ ¿Xá nkekjáin Cristo síin kixin? ¿Á jehya jnkokoá Cristo tinkáchónkini? ¿Á janhan Pablo k'uényákonhanrá ní? ¿Á kuíkitexínrá tí n̄ina ní? ¹⁴ Tjáncháha Dios kjuasáya kixin nijnko tí jahará kuíkiti-ahyará ntiha. Jehó ch'ín Crispo la ko ch'ín Gayo mé kuíkit̄e janhan. ¹⁵ Na mé nijnkorá xitjahya tsontáchrorá kixin n̄ina kuíkitexínrá. ¹⁶ K̄jāxin jehó kuíkit̄e tí ch'ín Estéfanas la ko tí sín kjéhya ch'án. Xr̄axink̄akonhya á kuíkit̄e í so sín o náhi. ¹⁷ Kixin tí xrā ch̄jina Cristo jehya kixin chrókjuíkit̄e chojni. Náhi. Tí xrā ch̄jina Ìnchéni kixin ts̄oxr̄jan̄kaxián tí tan tsaáxinni. Tj̄ink̄akonhya kixin chrókjuákoxiān palabra náxr̄jón noi kixin x̄ikaha chrókjuákua ntá chrókjuíntamá tí kjuachaxin j̄ié kónoxín tí k'uénxin Ìnchéni Jesús tí ntacruz, kjuák'enkáni ch'án, k'uenyákonh̄enni ch'án.

Cristo mé tjákoxin tí kjuachaxiēn Dios la ko tjákoxin ch'án kixin imá nohe Dios

¹⁸ Chronkaxínni kixin k'uenyákonh̄enni Cristo tí ntacruz. A ntá tí tsinhin tí sín xr̄axín ts'it̄jáyān ntá ts'ikon sín tíha éxi nkehe chónkó. A ntá kaín ni chojni kuaáni mé t'ikonni kixin kjuachaxin j̄ié tíha. ¹⁹ Mé x̄ikaha ntáchro xroon it̄en Dios ts̄ik̄jin sín ósé kixin Dios mé sinchek'it̄jáyān tí nkehe t̄jenkayáxin tí sín imá nohe, la ko ts̄it̄oenta ch'án tí nkehe ntáchro tí sín imá tiénxín sín. †

²⁰ ¿Mé nkehe ts̄onhen ntáchro sín kixin imá nohe sín la ko nkehe ts̄onhen tjako sín la ko nkehe ts̄onhen tí imá nohe sín nixja sín? Táha la nkehe síin chjasintajni ó. A ntá Dios mé t'ikon ch'án kixin l̄ont̄i sín kixin x̄ikaha ichro sín. ²¹ Kixin Dios āntsí nohe ntá x̄ikaha kuít̄oehya ch'án kixin kjuachaxin kuènte sín ó chrókjuacha sín chrókóxixín sín ch'án. Ntá kóxr̄jinh̄in Dios chrókjueyá ch'án chrókjuinchekaá ch'án tí sín kuítekaon tí tan tsaáxinni mé tí nkehe ó chónkó, ichro tí sín ókjé.

²² Tí sín judío mé tjinkaon sín chrók'uikon sín kjuaxroan j̄ié, ichro sín. A ntá tí sín nkiva griego mé xrit̄jeyá sín kixin āntsí chrókónohe sín, ichro sín. ²³ A ntá jeheni kaín ni tinkáchónkini Cristo la tj̄inkakonhyani chrókónoheni kaín tíha la mé jehó Cristo tjákoxin̄ni. Chronkani kixin ijnko ntacruz kjuák'enkáni ch'án, k'uénxin ch'án. A ntá tí sín judío ntáchro sín kixin ijnko nkehe chrókósuēh̄eni chrókjuinkáchónkini tíha, ichro sín. A ntá tí sín jehya judío ntáchro sín kixin chojni l̄ont̄i tí jeheni kixin x̄ikaha tinkáchónkini, ichro sín. ²⁴ A ntá tí sín kjueyá Dios, kjónté judío sín na o griego sín, la kaín

† *Isaías 29.14*

ni ntáchroni kixin Cristo mé k'uenyákonhenni ch'án. Mé xikaha tjákoxin Dios tí kjuachaxin jié la ko tí kjuaxrexinkaon jina kuènte ch'án. ²⁵ Ntá jehe sín ntáchro sín kixin éxi ijnko nkehe chónkó tí nkehe kjuenkayáxin Dios, na kjónté xikaha la antsí tjetóxin nohe Dios. A ntá tí sín imá nohe ntihi chjasintajni tsjachahya sín sincheyóhē sín ch'án. La ko kjaxin ntáchro sín kixin jiéhya tí kjuachaxin chóna Dios. A ntá tí sín antsí má chóna kjuachaxin ntihi chjasintajni kjónté la tóyóehya sín Dios kixin antsí chóna ch'án kjuachaxin t'etōan ch'án. ²⁶ Kíchóni, xráxinkáonrá nkexrí k'uéjorá ntá kjónté kjueyará Dios tí jahará. Na mé tsjéhyará imá kónohará éxi t'ikon tí sín chjasintajni la kjónté kjueyará Dios tí jahará. La ko tsjéhyará imá kuétōanrá la ko tsjéhyará k'uaxrjeníxinrá tí sín imá k'uék'etōan. ²⁷ Ntá kjónté Dios mé kjueyá iso tí sín noehya éxi t'ikon tí sín chjasintajni kixin xikaha tjinkaon ch'án chrókjuinch-esuèhē ch'án tí sín imá nohe ntihi chjasintajni. La ko kjaxin kjueyá Dios iso tí sín chónahya kjuachaxin éxi t'ikon tí sín chjasintajni kixin xikaha tjinkaon ch'án chrókjuinchesuèhē ch'án tí sín imá chóna kjuachaxin ntihi chjasintajni. ²⁸ Dios mé kjueyá ch'án iso tí sín t'etōanhya la ko iso tí sín ninkehó sínkíhya tónhen sín ntihi chjasintajni kixin jehe ch'án mé chrókjuincheht'itjāyan ch'án kjuachaxiēn tí sín jehó chrók'uetōan. ²⁹ Méxra xikaha ninkexró tsjachahya sinchehnke tí tjen Dios. ³⁰ A ntá tí kjuachaxin kuènte Dios mé tinkachónkirá Cristo Jesús, a ntá chónatáxinni Cristo kjuaxrexinkaon jina, la ko tí kjuachaxin kuènte ch'án kóxíka tí jie kuènteni, la ko tí kjuachaxin kuènte ch'án sinchetjuáxinni ch'án, la ko tí ijnié ch'án k'ue-naxínni ch'án. ³¹ Mé xikaha éxi chrónka tí xroon tsíkjin sín ósé ntáchro kixin: "Tí nkexro tjinkaon chrókjuinchehnke ch'án la chrókjuinchehnkehya ch'án la jehó chrókjuákoxin ch'án kixin imá t'etōan tí kjuachaxin kuènte Dios." †

Ch'ín Pablo mé tjako ch'án kixin Jesucristo kjuák'enkáni ch'án ntacruz

2 Kíchóni, tió kjuasán ntiha chjasánrá níxjhará chrókjuákoáxinrá. ² Kixin tió k'uéjóni jnkokóá ntiha kjuenkayáxinhya janhan kixin í so nkehe chrók'uitja chróxrjanka la jehó tjínkavan chróxrjanka kixin Jesucristo la kjuák'enkáni ch'án tí ntacruz. ³ K'uéjóni jnkokóá ntiha la ntá jahará ó nohará kixin janhan kjuak'é éxi chrókjuachahya kixin síxrankána, chrákon-na. ⁴ Tí kjuankíxian níxjhará la ko xrjankaxián tí tan tsaáxin chojni, la tjínkakhonhya chrókjuáchruáxinrá tí nkehe náxrjón níxja chojni tsíkónohe má. Náhí. Tió kjuákohárá kónoxín kixin tjékjan Nchakuen Dios la ko kónoxín tí kjuachaxin jié kuènte ch'án, ⁵ kixin jehya kjuaxrexinkaon kuènte chojni tsíkónohe má chrókuinkachónkirá. Náhí. Tí kjuachaxin kuènte Dios mé chrókuinkachónkirá.

† Jeremías 9.23

Nchakuen Dios mé tsöchóxixinni ch'án

⁶ Kjánchó tió tjákoħa tí sín chaxín ó nohe sín tin-káchónki Ìnchéni mé xrjanka tí kjuaxrexinkaon antsí noi. Na mé jehya tí nkehe nohe tí sín chjasintajni, la ko jehya tí nkehe nohe tí sín t'etōan chjasintajni, na mé tí kjuachaxin kuènte sín la tjoka ts'itjāyan. ⁷ Jeheni mé antsí chrónkani tí nkehe jehó Dios nohe, na mé tí nkehe tsíkjenkayáxin ch'án naxa k'ónahya chjasintajni kixin nkexrí tsaáxinni. ⁸ Nijnko tí sín t'etōan chjasintajni kienxínhya sín tí nkehe tsíkjenkayáxin Dios. A ntá tí chrókienxín sín tíha la ntá chrókjuak'enkanihya sín Ìnchéni tjetōan tí ntacruz. ⁹ Éxi ntáchro xroon itén Dios tsíkjin sín ósé kixin:

Naxa k'uíkonhya chojni la ko naxa kíenhya chojni, la ko naxa kjuenkayáxinhya chojni kixin nkexrí síin kaín xín nkehe kjuích'éna Dios ts'áyéhe tí sín tjuèhe ch'án. ††

¹⁰ A ntá Dios mé nchenoexínni kaín tíha kixin chónatani Nchakuen ch'án. Na mé tí Nchakuen Dios mé tjetsjehe kixin nkexrí síin kaín xín nkehe la ko kjaxin nkexrí tjen tí nkehe tjenkayáxin Dios.

¹¹ Na mé ninkexró mé noehya nkexrí tjenkayáxin asén chojni. Na mé jnkojnko chojni mé nohe kixin nkexrí tónhen asén. Méxra xikaha kjaxin kohya nkexro nohe nkexrí tjenkayáxin Dios la jehó tí Nchakuen ch'án mé nohe. ¹² A ntá jehya tí nchakuen chojni chjasintajni k'uáyéheni. Náhí. Tí Nchakuen kuíxin tí tjen Dios mé k'uáyéheni kixin ntá tsonoexínni kixin kaín xín nkehe kjuínchehtōnhenni Dios. ¹³ Kjaxin jeheni chrónkani tíhi, a ntá jehya chronkaxínni tí nkehe tsíkónohe chojni ó. Náhí. Tí Nchakuen Dios mé nchenoexínni nkexrí tsjákoexínni tí sín chóna Nchakuen ch'án.

¹⁴ Kjánchó tí sín naxa chónahya Nchakuen Dios mé xitjahya ts'áyéhe sín tí nkehe tjanjon Nchakuen Dios. Na mé éxi lóco t'ikon sín kaín tíha kixin jehó tí sín chóna Nchakuen Dios mé tsjacha sín tsienxín sín tíha. ¹⁵ A ntá tí nkexro chóna Nchakuen Dios mé chrókjuacha chrókónohe nkexrí síin kaín xín nkehe. Kjánchó tí nkexró chónahya Nchakuen Dios tsjachahya tsjanchia jie tí jehe ch'án. ¹⁶ Méxra ntáchro xroon itén Dios kixin: ¿Xá ninkexró chrókónohe kixin nkexrí tjenkayáxin Ìnchéni kixin chrókjuacha sín chrókjuákoħe sín ch'án inaá? † Kjánchó jeheni la ó chónatani tí kjuaxrexinkaon kuènte Cristo.

Tí sín jnkokóá kjuích'ehe sín Dios xra

3 Mé xikaha, kíchó ni, kjuachahya janhan chrónix-jahará éxi chojni t'etūenhen asén sín Nchakuen Dios. Náhí. Éxi chojni naxa nchexiteyéhe sín tí nkehe ntáchro asén sín, na mé éxi xjan ntsíntí na ntá kjuankíxin kuinkáchónki Cristo mé xikaha tí jahará. ² Janhan na kjuákoáxinrá nkehe xrahya éxi yóħe ijnko xjanhtē tí jahará naxa nchekakí inē tsjen kixin naxa xitjahya sine nkehe cha. Mé xikaha tí jahará naxa xitjahya sinterá nkehe cha ³ kixin naxa éxi chojni ó nchex-

†† Isaías 64.4 ‡ Isaías 40.13

iteyéhérá tí nkehe ntáchro asánrá kixin tí naxa siín kjuachjinoxínhin la ko siín kjuanínkaon la ko jnkokoáhya tjenkayáxinrá, la mé tjejoch'erá éxí ch'e kaín xín chojni chjasintajni. ⁴ Isorá ntáchrorá kixin chréhérá tí janhan Pablo, la ko í sorá ntáchrorá kixin chréhérá tí ch'ín Apolos. Na mé éxí chojni chjasintajni ó tjenkayáxinrá.

⁵ ¿Xá nkexro tí Pablo la ko nkexro tí Apolos? A ntá jeheni ó jehí ijnko chojni kjuích'ehe Dios xra, a ntá jahará kuinkachónkirá Ìnchéni kixin janhan kjuákoahará. Jnkojnkoní kjuích'eni tí xra kjuanjon Ìnchéni. ⁶ Janhan kuènká, a ntá ch'ín Apolos intá kjuáka ch'án, a ntá Dios la mé kjuínchek'ánkí ch'án tí nkehe a. ⁷ Méxra tí nkexro k'uènkaxin la ko tí nkexro tjáka ntá la kánhyó tjetooan kixin Dios mé chóna kaín kjuachaxin la jehe ch'án nchek'ánkí kaín nkehe siín. ⁸ A ntá tí sín t'enká la ko tí sín tjáka ntá la ó jnkokón ch'e sín xra, a ntá Dios mé tsjenkehe sín jnkojnko tí xra kjuích'e sín. ⁹ Méxra jeheni mé jnkokoá ch'eheni Dios xra, a ntá jahará mé éxí tí nontee Dios, ntaha ch'e ch'án xra, la ko kjaxin jahará mé tí nchia tjech'ena ch'án. ¹⁰ Janhan mé tí maestro ch'ena nchia kixin Dios kjuanjon kjuachaxin tsjaké tí xro xrankixín, a ntá í jnko nkexro sich'ena nchia chrítaón tí xro a. A ntá jnkojnko nkexro t'ichjánxín ntoá chrókjuích'ena sín nchia chrítaón tí xro a, ¹¹ kixin kohya ninkexró tsjacha tsjak'e í jnko xro xrankixín tí nchia a kixin táha la ó tsíkjin tsík'óna, kixin Jesucristo tíha. ¹² A ntá chrítaón tíha mé tsjacha sich'ena chojni nchia tsík'óna chica oro, la ko chica plata, la ko xro nárxjón tjeje, la ko inta tabla, la ko kanj, la ko ntaxro. ¹³ Na mé tsonoxín nkehe tí xra kjuích'e jnkojnko chojni tió tsi tí yaon tsjixín. Kixin tí yaon a mé tsi xrohi. A ntá tí xrohi mé tsjakoxín nkexéhe tí xra tsoche la ko nkexéhe tí xra tsochehya. ¹⁴ A ntá tí jnkojín chojni kjuích'ena ijnko nchia tsochehya la mé tsjacha ch'án tí xra kjuích'e ch'án. ¹⁵ A ntá tí chróche tí nchia kjuích'ena ijnko chojni, ntá chrók'uitjayan kuenté. A ntá tí nkexro kjuích'ena nchia la tsaá éxí yóhe chrókuinkéhe ch'án xrohi.

¹⁶ ¿Á noahyará kixin jahará kaín rá na mé ijnko njnko Dios la ko Nchakuen Dios mé chóna asánrá? ¹⁷ A ntá jnkojín nkexro tjinkaon ts'óxika tí njnko Dios na mé Dios mé sinchek'itjayan tí nkexro xikaha sich'e kixin tí njnko Dios la tjóá tíha. A ntá tí njnko a mé jahará tíha.

¹⁸ Ninkexró chrókjuenkayáxin kixin imá nohe. Tí jnkojínrá tónhen asánrá kixin imá nohará éxí nohe chojni chjasintajni ó, na ntá chrókjanrá chrók'ónará éxí chojni noehya kixin ntá chrók'uitjára chrók'ónará ijnko chojni chaxín nohe. ¹⁹ Tí nkehe nohe tí chojni chjasintajni la mé ijnko nkehe lontj t'ikon Dios. A ntá ntáchro tí xroon itén Dios tsíkjin sín ósé kixin: "Tí nkehe tsík'itjá sín ch'iyaxín sín la tíha mé tsokjan ts'enxín sín." ^{†20} La ko kjaxin ntáchro xroon itén Dios kixin: "Ìnchéni la ó nohe ch'án kixin kaín nkehe tjenkayáxin tí sín ntáchro sín kixin imá nohe sín la mé ijnko kjuaxrexinkaon lontj tíha, ichro Dios." ^{†21} Méxra chrókjuinchehnkehyará jahará kixin chréhérá ijnko chojni imá nohe, kixin kaín

xín nkehe siín la kuèntará jahará, ²² mé janhan Pablo, la ko ch'ín Apolos, la ko ch'ín Pedro, la ko tí chjasintajni, la ko tí kjuachón, la ko tí kjuach'én, la ko tí nkehe sítónhen jie, la ko tí nkehe tsonhen chr'éxín, la kaín la kuèntará tí jahará. ²³ A ntá jahará la Cristo mé t'ayakonhanrá. Kixin Cristo la jehe ch'án la mé kuènte Dios.

Tí xra kjuích'e tí sín kjueyá Ìnchéni

4 Jahará chrók'uikonrá tí jeheni éxí chojni ch'ehó Cristo xra k'uáyéhéni tí xra tjakoni tí nkehe kuènte Dios ninkexró k'uénoehya. ² A ntá ijnko chojni k'uáyéhe xra ts'etooan chrókjuakoxín kixin jína ch'án la ko jína ch'e ch'án xra. ³ A ntá janhan tóxakonnahya tí nkehe chróntáchrorá jahará chrókjuanchiará jie tí janhan kixin tí xra t'ahá Dios, la ko kjaxin tóxakonnahya tí nkehe chróntáchro í so chojni chjasintajni, chrókjuanchia sín jie tí janhan. Kjaxin janhan la tékahya jie asenná. ⁴ Kjánchó janhan tjenkayáxinhya kixin chonta jie. Kjánchó jehya xikaha tsontáxrjan kixin Dios t'ikon kixin chontahya jie janhan. Náhí. Jehe Ìnchéni mé tsotsjehe ch'án nkehe tí jie chonta janhan. ⁵ Méxra naxa kjuixrakáhya yaon chrókjuinchekitgexínrá ichrén jie. Chonhénrá tí tsi Ìnchéni kixin jehe ch'án mé sinchenoxín ch'án kaín tí nkehe síma ti sítíé, la ko sinchenoxín ch'án kaín xín nkehe imó tjenkayáxin asén chojni. A ntá Dios mé tsjanjon ch'án tí nkehe tsjacha jnkojnko chojni.

⁶ Kíchéni, nijjahará tí nkehe i kixin jína chrók'uejorá jahará ntá xikaha kjujntayóaxian éxí ch'ín Apolos la ko éxí janhan kixin chrók'uitjará kixin chrókjuenkayáxinrá jehó tí nkehe tsíkjin sín ósé, kixin nijnko nkexro chrókjuinchehnkehya kixin chréhe sín ijnko chojni, a ntá tsochóntehya sín kjuasáyé tí í jnko chojni. ⁷ ¿Méxra nkexro ntáchro kixin jahará antsí tjetooanrá? ¿Xá nkehe chontará naxa kjuanjonhya Dios kixin? Tí kjuanjon Dios kaín nkehe chontará, ¿ntá nkeuènte nchehnkerá kixin jahórá tsíkjeyará tíha?

⁸ Jahará tónhanrá kixin imá rícorá. Na mé chaxín chontará kaín xín nkehe tjenkayáxinrá. Ntá jie tónhen asánrá éxí ijnko rey, la í t'ichjánxianhyará ninkehó tí jeheni kixin naxa chrókjuinkitsani. Tí chrókóchaxín chrók'ónará ijnko rey chaxín ntá kjaxinni chróchóntani kjuachaxin chrók'uetooanni. ⁹ Ntá tónhen asenná kixin jeheni chojni kjueyá Ìnchéni mé kjuanjon Dios kixin jeheni chrókjuixín chrók'uejóni éxí chojni kuítónhenni kixin noxín chrók'uenni ts'ikon kaín xín chojni chjasintajni la ko ts'ikon tí sín ángel kjaxin. ¹⁰ A ntá jeheni tinkáchónkini Cristo, a ntá xikaha t'ikon sín tí jeheni éxí chojni lontj. A ntá t'ikon sín tí jahará éxí imá nohará. Jeheni la éxí chóntahyani kjuachaxin, a ntá jahará la éxí imá chontará kjuachaxin. Jeheni la tjikosáyehyani sín. A ntá jahará la imá tjikosáyahará sín. ¹¹ A ntá kjónté naxa jie jeheni t'enxínni kjinta, la ko t'enxínni ntá, la ko chóntahyani ikéni, la ko nínkakonhenni chojni, la ko chóntahyani nkerí ts'ejóni. ¹² La ko tóxrjéni kixin itjani ch'exínni xra. A ntá tió t'ántaxínhínni sín la tjanchehni Dios kixin sincheyoon ch'án tí jehe sín. La ko tió

† Job 5.13 † Salmo 94.11

chónkíhi sín tí jeheni la tóninkakuenhyani sín. ¹³ Tió t'ántaxínhínni sín la jnkojína tjátēheni tí jehe sín. T'íkon sín tí jeheni éxí chjínínó ntihi chjasintajni, na mé éxí ijnko nkehe ninkehó sínkíhya la ko mé xíkaha naxa sítónhen tí yaon jie.

¹⁴ Ikjian tíhi na jehya kixin chrókjuíntasuaàhará. Náhí. Tjínkavan chrókjuíntaxráxinkáonrá kixin éxí xjanna t'íkuān tí jahará, tjuāhará. ¹⁵ Kjónté chróchontará ite mil chojni chrókjuākōhará nkexrí tjen Cristo la chontahyará itsjé it'árá. Ntá janhan mé k'óna it'árá tí jahará tió kuítekáonrá Cristo Jesús kixin kjuákōhará tí tan jína tsaáxinni. ¹⁶ Mé xíkaha xrxānōāhará kixin chrókjuākōx-ínrá éxí tí janhan.

¹⁷ Méxra kuétuānhan tí ch'ín Timoteo kixin tsjiji ch'án ntiha. Na mé éxí xjanna t'íkuān tí jehe ch'án, tjuāhā ch'án, kixin kjuákōhā ch'án ntá kuítekaon ch'án Ìnchéni ntá xráxín jína ch'e ch'án xra. Ntá tsjiji ch'án sintaxráxinkáonrá ch'án nkexrí tjákoxiān tí ntje Cristo éxí xráxín tjákua kaín xín njnko t'atsínka tí janhan.

¹⁸ Ntá iso tí jahará imá ihnerá kixin tjenkayáxinrá kixin chaxínhya chrókjuasántsahará. ¹⁹ A ntá tjoka chrókjuasántsahará tí chaxín xíkaha tjinkaon Ìnchéni. A ntá jehya jehó tí nkehe nixja tí sín xriko kjuahnke mé chrókuīnhan. Náhí. Na mé ts'íkuān á chaxín chóna sín kjuachaxin kixin xíkaha nixja sín. ²⁰ A ntá tí kjuachaxiēn Dios la jehya tí nkehe tsonixjani ó. Náhí. Tí tjákoxiīnni la tí kjuachaxiēn Dios. ²¹ ¿Nkehe tjinkáonrá tí jahará, kixin á chrókjuasán chrókjuíntakjasótiará? o ¿á tjinkáonrá kixin jnkojína chrókjuasán?

Tsitōxín ijnko jie tjaçehē kichó chojni

5 ¿Á chaxín tsík'íkon sín kixin tí tjejorá ntiha la ijnkorá mé chontará nājoanrá éxí ichjiānrá? Tíha mé ijnko jie jíé, la mé kjónté tí sín chónhya Dios la xíkahya ch'e sín. ² A ntá kjónté xíkaha tsíkónhen la imá ihnerá. Íchá jína imá chrók'uavará. A ntá tí xíkaha ch'e ijnko chojni ntá chrókuétuēnhénrá ch'án sáchrókjuí ch'án, chrók'uejokoahyará ch'án ntiha. ³ A ntá ntáxrjan janhan kjónté tjenhya cuerpo kuētāna tí tjejorá ntiha la tí tjenkayáxian la ntaha tjēn éxí chrókjuak'é janhan, ntá t'ākjénxian ihnié Ìnchéni Jesu-cristo la ntáxrjan kixin ó kjuixin kjuenkayáxian kixin nkexrí chrókjuasóte tí ch'ín xíkaha tsíkijich'e. ⁴ Tió tsojnkotsérá kaín rá ntiha la éxí koyá tsjak'é ntiha la kjánchó nchakuēnā ó la ko kóí tí kjuachaxiēn Ìnchéni Jesús ts'ejókoará ntiha. ⁵ A ntá tí ch'ín a la nchek'ayéhérá tí ch'ín Tsochren kixin tsjasóte tí cuerpo kuēnte ch'án. Ntá tió tsokjan Ìnchéni mé tsaá asén ch'án.

⁶ Jahará chrókjuínchehnkehyará kixin tí nkehe tsíkónhen ntiha. ¿Á noahyará nkehe ntáchro sín, kixin tí ch'o a mé tjiko intsíkoá tí xroān nchek'ánkí niotjā, ntá kjónté la tsosán kaín tí ch'o? ⁷ Méxra chrókuakítsjerá ntója kaín tí xroān ntaxin nchek'ánkí niotjā, kixin ntá jahará ts'ejorá éxí niotjā tsík'óna ch'o nixin tsíkjikohya xroān nchek'ánkí niotjā. Éxí niotjā ine sín tí yaon pascua, mé jahará tíha. Kixin jehe Cristo, éxí ijnko kolélo t'óyán sín tí yaon pascua, mé k'uenyákonhēnni ch'án. ⁸ A ntá

chrókjuasinni tí kia a la kaín asénni chróxráxinkáonni, tíha la éxí tí niotjā chóntahya xroān nchek'ánkíxín. La jehya kixin chrókjuasinni tí kia naxā chróchóntani kjuanínkaon kixin táha la yóhē tí xroān ntaxin nchek'ánkí tí niotjā a.

⁹ A ntá í jnko xroon chr'anhánrá k'uéntáxrjan kixin ninkehó chrók'uítohyará tí sín tjasin jie chóna chojni chjin ókjé. ¹⁰ Ntá jehya kixin kuétuānhanrá kixin chrók'uítohyará tí sín chjasintajni tjasin jie chóna chojni chjin ókjé, la ko tí sín tjinkaon jehó sín tsochóna itsjé nkehe, la ko tí chojni teé, la ko tí sín tinkáchónki tí nkehe síkjanōya. Náhí. Tí xíkaha chrókjuích'erá la t'ichjánxín chrók'uaxrxéxinrá tí chjasintajni. ¹¹ Méxra ó kuétuānhanrá kixin chrók'uítohyará ninkehó jnkojín chojni ntáchro sín kixin kichó ni tí jehe sín, ntá naxā tjasin sín tí jie chóna sín chojni chjin ókjé, la ko tjinkaon sín jehó sín tsochóna sin itsjé nkehe, la ko tí sín naxā tinkáchónki sín nkehe síkjanōya, la ko tí sín naxā tinkáchónki kjuach'ia, la ko tí sín tókoan, la ko tí sín teé chichaon, la mé tí chojni xíkaha ch'e la chrókjóntekoahyará sín. ¹² Jehya xra na chrókjuíntakitoxiān tí ijje tí sín jehya kuēnte njnko ntiha. A ntá tí xra kuētárá jahará kixin chrókjuínchekitoexínrá tí ijje tí sín kichó ni tójnksoté njnko ntiha. ¹³ A ntá Dios mé sinchekitoexín ch'án ijje tí sín jehya kuēnte njnko. Méxra, takítsjekjanxínrá tí ch'ín jínahya kjuasin jie tí tjejorá ntiha.

Chrókjuíkjançahya sín jie nkayakon tí ch'ín juez tinkáchónkihya Ìnchéni

6 A ntá jnkojínrá chrókjuánjonkoará kichuárá chrókjuíkjançahyará jie nkayakon tí ch'ín juez tinkáchónkihya Ìnchéni. Íchá jína chrókjuírá chróchenkará tí sín tinkáchónki Dios. ² ¿Á noahyará kixin tí sín tinkáchónki Ìnchéni mé sinchekitoexín sín ijje kaín xín chojni chjasintajni? A ntá xíkaha sinchekitoexínrá ijje kaín xín chojni chjasintajni, ¿ntá nkekuēnte tsjachahyará sinchekitoexínrá kjónté ijnko jie ntsí? ³ ¿Á noahyará jahará kixin kjónté tí sín ángel tsotsjeheni nkehe tí xra kjuích'e sín? A ntá ijnko nkehe intsí ntihyó, la ¿á xitjahya chrókjuásiyóxinrá? ⁴ A ntá xíkaha chrókjuánjonkoará kichuárá, ¿ntá nkekuēnte tjíkjançhiará jie nkayakon tí sín tikíníxinhya kuēnte njnko? ⁵ Ntáxrjan xíkaha kixin chrókjuíntasuaàhará. ¿Xá kohya ninkexró kichó ni ntiha chóna kjuaxrexinkaon jína tsjacha sincheyóxinhin ijje kichó ni? ⁶ Jahará jnkokoá kichuárá ntá tjanjonrá, la ko kjaxin sátjíkjançhiará jie nkayakon tí ch'ín juez tinkáchónkihya Ìnchéni.

⁷ Kjónté ijnko jie ntsí ntá imá tjanjonkoáxinrá kichuárá; tíha mé t'óna ijnko jie jíé. Íchá jína chrókóninkákonhyará kixin tí nkehe jínahya kjuít'ahará sín. Íchá jína chrókuitōhérá sín kjónté tsaáhará sín. ⁸ Kjánchó kjaxin jahará ntoáhya tjejoch'erá kixin kjónté jnkokoá kichuárá la tjeherá sín.

⁹ ¿Á noahyará kixin tí sín jínahya ch'e la ts'áyèhya sín kjuachaxin kuēnte Dios? Chrókuítōéhyará chrókjuít'áyahará sín, chrókónohará kixin tí sín

tjasinko jie tí chojni chjin ókjé, la ko tí sín tinkáchónki sín nkehe tsíkjanoya, la ko tí sín tjachéhe kichó sín, la ko tí chojni t'ò chjin, t'ò ntoa, la ko tí sín jnkokón ntoa sín tóxrjínhín kichó sín, ¹⁰ la ko tí xíchee, la ko tí sín tjinkaon sín jehó sín tsochónta sín itsjé nkehe, la ko tí sín tókoan, la ko tí sín ch'éna kjuach'ia, la ko tí sín ixri ch'ia sín kixin tsjacha sín chichaon, na mé ts'áyèhya sín kjuachaxin kuènte Dios. ¹¹ Xíkaha k'uéjórá isorá senó. Ntá jie ó k'uíjmárá, kjuínchetjóará Dios, ntá ó xíka ijjárá kjuachaxin ihnié Ìnchéni Jesucristo la ko kjuachaxin kuènte Nchakuen Dios.

Tí cuerpo ó tsikótjóa

¹² Síin kjuachaxin kaín nkehe chrókjuít'a, kjánchó iso nkehe la ó chónkó. Síin kjuachaxin kaín nkehe chrókjuít'a, kjánchó chrókuítòghya ninkehó nkehe chrók'uetuanna. ¹³ Chaxín tí nkehe ntáchro sín kixin ó k'óna tí nkehe sineni kixin tseeni ó sátsji, la ko ó tsik'óna tseeni kixin ts'inka nkehe sineni. Kjánchó Dios mé sinchek'itjáyan yóí tíha. A ntá k'ónahya tí cuerpo kuènteni kixin chrókjuasixínni jie. Náhí. Tí cuerpo kuènteni mé k'óna kixin tsochjéxínni Ìnchéni kjuasáya, la ko jehe Ìnchéni mé ts'ayakonhen ch'án tí cuerpo kuènteni. ¹⁴ Méxrā Dios mé kjuínchexechón Ìnchéni, mé xíkaha sinchexechónxinni ch'án tí kjuachaxin kuènte ch'án.

¹⁵ ¿Á noahyará kixin jnkojnko cuerpo kuèntará mé it'ò tí cuerpo kuènte Cristo? ¿Á chrókjuít'a janhan kixin it'ò tí cuerpo kuènte Cristo chrók'óna it'ò cuerpo kuènte ijnko chojni chjin ch'iyehé nchónhya chojni ntoa? Méxrā kjá náhí. ¹⁶ ¿Á noahyará kixin tió ijnko chojni ntoa chrókuakja ijnko chojni chjin chóntha nchónhya chojni ntoa, ntá tí jehe sín yóí sín chrók'óna sín jnkokóá cuerpo? Kixin ntáchro xroon itén Dios kixin: "Yóí sín la ts'óna sín jnkokóá chojni." ¹⁷ A ntá tí jnkójín chojni tinkáchónki Ìnchéni, ntá jehe la ko Ìnchéni mé ts'óna jnkokóá.

¹⁸ Méxrā chrókuítòghérá chróchontahyará chojni chjin ókjé. Tí í so jie tjasin chojni na mé jehya tí cuerpo kuènte sín nchekjasóte sín. A ntá tí sín tjasinko jie chojni chjin ókjé la mé nchekjasóte sín tí cuerpo kuènte sín. ¹⁹ ¿Á noahyará kixin jnkojnko cuerpo kuèntará mé éxí ijnko njnko itjen Nchakuen Dios kjuanjon ch'án k'uayéhérá, la ko chontará tí Nchakuen ch'án tjóá? Jahará la jehya ìnché tí cuerpo kuèntará ²⁰ kixin jahará la tjete k'uenaxínrá Dios. Méxrā chjeéxinrá kjuasáyé Dios tí cuerpo kuèntará la ko tí nchakónrá kixin yóí la kuènte Dios.

Chenka ch'án tí sín tsikótehe kixin nkexrí chrók'uejé sín

7 A ntá jie tsjatahā tí nkehe tsíkjinrá kjuanchankinará, na mé ntáxrjan kixin chaxín chrókójína kixin tí chojni ntoa chrókuakjahya ichjién. ² Kjánchó tí xíkaha imá tjinkaon sín tsochónta sín itsjé chojni chjin tsjasinko sín jie, la íchá jína jnkojnko chojni ntoa chróchónta jnkojnko ichjién kuènte la ko jnkojnko cho-

jni chjin chróchónta jnkojnko xii kuènte. ³ Tí chojni ntoa la ko tí chojni chjin chrókjuinchexiteyéhe sín kichó sín. ⁴ Tí chojni chjin jehya ìnché tí cuerpo kuènte tjan, na mé kuènte xii tjan. Ntá kjaxin xíkaha tí chojni ntoa la jehya ìnché tí cuerpo kuènte ch'án, na mé kuènte ichjién ch'án. ⁵ Chrókjuíncheniéhýará kichuárá, jehí jnkokóá chrókjuenkayáxinrá yóirá kixin tsochonteherá iso yaon kixin ntá kaín asánrá chrónixjehérá Dios. Ntá tsjixin ntá chrókóchjineherá kichuárá inaá kixin chrókuítòghýará kixin ch'ín Tsochren chrókjuacha chrókjuachroerá ch'án chrókjuásinrá jie.

⁶ Kaín tíhi tjonkará kixin tsonohará kixin síin kjuachaxin xíkaha na kjánchó jehya kixin xíkaha tétuānhanrá. ⁷ A ntá janhan ntáxrjan kixin chrókójína kixin kaín rá chojni ntoará chrókóyóghará éxí tí janhan. Kjánchó Dios chjéhe kjuachaxin jnkojnko chojni, la iso la ijnko nkehe tjenkayáxin, la í so la í jnko nkehe tjenkayáxin.

⁸ A ntá tí sín naxā tóteehya la ko tí chojni tsíkók'án na ntátjan sín kixin chrókójína kixin xíkahó chrók'uejé sín chrókóteehya sín éxí tí janhan xíkaha. ⁹ Kjánchó tí chrókjuachahya sín tí tjak'e asén kichó sín, naxā chrókjuasin sín jie, ntá íchá jína chrókótehe sín kixin jehya jína kixin jnkochríxín chrókjuak'ó asén sín.

¹⁰ A ntá jahará ó tsíkjin tsikótahará, la tétuānhanrá tíhi: a ntá jehya kixin kjuachaxin kuèntana tétuānxinrá. Náhí. Kjuachaxin kuènte Ìnchéni mé tétuānxinrá kixin tí chojni chjin chrókjuákehya xii. ¹¹ A ntá tí chrókjuákehé ijnko chojni chjin tí xii, ntá xíkahó chrókuitòghé tjan jehó tjan la ko chrókójína chrókóyóxin, chrókjuuihin tí kjuanínkaon kixin tí kjuákehé kichó sín. Kjaxin xíkaha tí chojni ntoa la chrókjuákehya tí ichjién.

¹² A ntá tí nkehe tétuānhan tí í so sín jaí la kuèntana janhvàn, jehya kuènte Ìnchéni, kixin tí tjen ijnko ch'ín kichó ni chóntha ch'án ichjién ch'án tinkáchónkihya Ìnchéni, na kjónté naxā tjinkaon tjan chrókjuak'eko tjan tí jehe ch'án la chrókjuákehya ch'án tí jehe tjan.

¹³ La ko tí tjen ijnko tjan kichó ni chóntha xii tjan tinkáchónkihya Ìnchéni, ntá kjónté naxā tjinkaon ch'án chrókjuak'eko ch'án tí jehe tjan, ntá chrókjuákehya tjan tí jehe ch'án. ¹⁴ Kixin tí xii tjan tinkáchónkihya Ìnchéni ntá jie ó kótjóa ch'án kixin tí ichjién mé tinkáchónki Dios, la ko tí ijnko tjan tinkáchónkihya Ìnchéni ntá jie ó kótjóa tjan kixin tí xii tjan mé tinkáchónki Dios. A ntá tí xikahya, la tí xjeen sín chrókótjuáhya, na ntá jie la mé ó kótjóa tí xjeen sín.

¹⁵ A ntá tí ch'ín ntoa o tí tjachjin tinkáchónkihya Ìnchéni tjinkaon chrókjuákehé kichó sín, la ája nohe sín tjákehé kichó sín, kixin Dios tjinkaon kixin kjuaxróxin chrók'uejórá. ¹⁶ Jahará chojni chjinrá, ¿nkexrí chrókónohará kixin nkexrí chrókuaá xiará? La ko jahará chojni ntoará, ¿nkexrí chrókónohará kixin nkexrí chrókuaá ichjiánrá?

¹⁷ A ntá jnkojnko chojni chrók'uejé sín éxí tsíkjanjon Ìnchéni kjuachaxin tsík'áyéhe sín, la ko éxí tí k'uéjé sín tió k'uíyehé sín Dios, kjánchó chrókuítòghya sín tí jehe ch'án. Mé xíkaha tétuānhan kaín tí njnko. ¹⁸ Tí

chrók'uíyehē Dios ijnko ch'ín chóna xroye, ntá xikahó chrókuitōhe ch'án. A ntá tí chrók'uíyehē Dios ijnko ch'ín chóntahya tí xroye a, ntá kjónté chrókuaahya ch'án tí xroye a. ¹⁹ Na mé tjetuanhya á chóna chojni tí xroye o á chóntahya chojni tí xroye. Na mé tí nkehe tje-toan kixin chrókjuinchexiteyéhēni tí nkehe k'ueṭoan Dios. ²⁰ Chrók'uejóni jnkojnkoní éxí k'uejóni tí k'uíyehēni Dios. ²¹ A ntá tió Dios k'uíyaha jaha, kjónté jaha ijnko chojni ch'exón xra, ntá chrókóxakuanhya kjónté xikahó tjech'e xra. Kjánchó tí chrók'uitjá tí tsaáxian la chrókúákjá tíha. ²² Kixin tí nkexro kjuích'exón xra tió k'uíyehē Ìnchéni kixin tsinkáchónki ch'án, la mé jie chóna ch'án tí kjuachaxin tjanjon Ìnchéni. Kjaxin tí nkexro k'uítuenhya tió k'uíyehē Ìnchéni la mé jie mé ch'ehe ch'án xra Cristo. ²³ Dios imá tjeete k'ueṇaxin ch'án tí jahará. Méxra chrókjuán-jonhyará kjuachaxin kixin ókjé chojni chrók'óna ìnchárá. ²⁴ Méxra kichó ni, éxí k'uejorá tió k'uíyehará Dios kixin tsinkáchónkirá ch'án, la xikahó naṅa chrók'uejorá jie kixin chontará Ìnchéni tsjinkítsa.

²⁵ A ntá tí chojni naṅa tóteehya sin na mé janhan chontahya nkehe kuènte Ìnchéni chrókúetuānhan sín. Kjánchó tsoxrjanka tí nkehe tjenkayáxian janhvàn, a ntá chrókúitekáonrá tí janhan kixin kuikonóna Ìnchéni. ²⁶ Mé xikaha tónna kixin chrókójína kixin jnko-jnko chojni chrókuitōhe sín éxí tjejó sín chrókóteehya sín, kixin ijie la kjuaxróxinhya tjejóni. ²⁷ A ntá tí chontará ichjiánrá ntá chrókjuakéehyará tjan. A ntá tí chontahyará ichjiánrá ntá íchá jína chrókjuéyáhyará. ²⁸ Kjánchó tí chrókótahará la jehya jie tíha, la ko tí chrókótehe ijnko tjan tjarisoá la kjaxin jehya jie. A ntá tí sín tsíkótehe la tsochóna sín kjuaxikaon, mé xikaha janhan chrókjuinkítsa sín kixin chróchóntahya sín kjuaxikaon.

²⁹ Mé xikaha tjetjonkará kichó ni kixin tsjéhya yaon naṅa t'itjáyan tsokjan Ìnchéni. Mé xikaha tí chojni ntoa chóna ichjién sín, la antsí tje-toan saoxín chróxaxinkaon sín Ìnchéni, la ntá chr'éxin chrótjuèhe sín ichjién sín. ³⁰ A ntá tí sín tsjánka la chrók'uejó sín éxí chrótsjánkahya sín. La ko tí sín chéhe la chrók'uejó sín éxí chéhya sín. La ko tí sín t'ena nkehe la chrók'uejó sín éxí chóntahya sín tí nkehe tsík'ena sín. ³¹ La ko tí sín kjuacha nkehe siín chjasintajni la chrók'uejó sín éxí ninkehó chróchóntahya sín, kixin kaín nkehe t'ikonni chjasintajni ntihi mé tjoka tsjeje.

³² Tjínkakonhya kixin jahará chrókóxakonhanrá. Tí ch'ín ntoa chóntahya ichjin antsí má tóxakonhen tí xra kuènte Ìnchéni chrókjuinchexiteyéhē ch'án tí nkehe tóxrjinhin Ìnchéni. ³³ A ntá tí ch'ín tsíkótehe antsí tóxakonhen tí nkehe siín chjasintajni kixin xikaha mé sinchechéhe ch'án ichjién ch'án. ³⁴ Ókjé tjenkayáxin tí tjan tsíkótehe la ko tí tjan tsíkóteehya kixin tí tjan tsíkóteehya la antsí má tóxakonhen tjan tí xra kuènte Ìnchéni kixin tjinkaon tjan kixin Dios sinchetjóá tí cuerpo kuènte tjan la ko tí asén tjan. A ntá tí tjan tsíkótehe mé tóxakonhen tjan tí nkehe siín chjasintajni kixin xikaha sinchechéhe tjan xii tjan.

³⁵ Tjetjonkará tíhi kixin tjínkavan kixin jína chrók'uejorá, jehya kixin xikaha chrókúetuānhanrá. Náhí. Tjínkavan kixin kjuasáya chrók'uejorá jnkojína la jehó Ìnchéni chrókjuich'eherá xra.

³⁶ A ntá jnkojínrá tjenkayáxinrá kixin chrókójína chrókótehe ijnko xjaanrá chjin kixin ó tsícha tjan, la ntá tí xikaha la ó nchoxon tsoṭehe tjan na mé jehya jie. ³⁷ A ntá jnkojínrá tjínkáonrá kaín asánrá kixin chrókóteehya xjaanrá chjin la kjaxin tjan xikaha tjenkayáxin tjan la antsí jína tíha. ³⁸ Mé xikaha tí tjtōhérá xjaanrá chjin kixin tsoṭehe tjan la ó nchoxon. La ko kjaxin tí tjínkakonhya tjan kixin chrókótehe tjan na mé antsí jí-na tíha.

³⁹ Tí tjan tsíkótehe mé k'uítuénxín tjan kjuachaxin tí ley kixin tsjak'eko tjan tí xii tí naṅa tjechón ch'án. A ntá tí chrók'uen ch'án ntá tsochóna tjan kjuachaxin tsoṭehe tjan ínaá tí nkexro tsoxrjinhin tjan, kjánchó jehó ijnko nkexro tinkáchónki Ìnchéni mé chrókótehe tjan. ⁴⁰ Kjánchó antsí chrókóchéhe tjan tí jehó tjan chrókuitōhe tjan, tí í chrókóteehya tjan. Méxra xikaha tjenkayáxian janhan la ko kjaxin tónna janhan kixin chonta janhan tí kjuachaxin kuènte Nchakuen Dios.

Tí nkehe ine sín tjokehe sín tí nkehe tsíkjanoya

8 A ntá jie tsoxrjanka kuènte ti ko its'en tjokehe sín tí nkehe tsíkjanoya. Na mé chaxín kaín ni noheni tíha. Ntá chrókóxakonheni kixin tí chrók'uitjani má ntá chrókóhnkeni má. Antsí tje-toan chrótjuèheni kichó ni kixin xikaha antsí chrókúinkáchónkini Ìnchéni. ² Tí jnkojín nkexro ntáchro kixin nohe ch'án, na mé chaxín-hya tíha la naṅa t'itjáyan tí nkehe chrókónohe ch'án. ³ A ntá jnkojín nkexro tsoṭjuèhe Dios la Dios tsochóxin tí jehe ch'án.

⁴ A ntá tí chrókjóneni nto tsíkjokehe sín tí nkehe tsíkjanoya, la ó noheni jína kixin tí nkehe tsíkjanoya la t'etuānhya ninkehó ntihi chjasintajni, la ko ó noheni kixin jnkokoá Dios tjan. ⁵ A ntá siín nkehe nchek'in sín díos nkaya nkajni la ko chjasintajni na, kjánchó tí xikaha la kjá chrók'uixin itsjé díos la ko itsjé ìnché sín. ⁶ A ntá jeheni chóntani jnkokoá Dios na mé It'eni tíha, la jehe ch'án mé kjuích'éna ch'án kaín xín nkehe la ko tjejóni kixin chrókjuinchexiteyéhēni ch'án. La ko kjaxin itjen jnkokoá Ìnchéni Jesucristo, na mé kaín xín nkehe siín la kjuích'éna ch'án la ko kjaxin tí jeheni tsíkjich'éna ch'án.

⁷ Kjánchó kénhya chojni nohe sín tíhi. Na mé iso sín ó kuènten sín kuinkáchónki sín tí nkehe tsíkjanoya, a ntá jie tió ine sín tí nkehe tsíkjokehe chojni tí nkehe tsíkjanoya na mé tjenkayáxin sín kixin ó tsík'áyehē ijnko díos, kixin naṅa noehya sín má, ntá ntáchro sín kixin ó kuámá sín tí jie kuènte tí nkehe tsíkjanoya. ⁸ Ó noheni chaxín kixin jehya kixin chrókóxrjinhin Dios tí jeheni kixin tí nkehe jína chrókjóneni. Náhí. Jehya kixin chrók'uejóxinni jína kixin tí nkehe chrókjóneni na ko tí nkehe chrókjónehyani. ⁹ Méxra tjtōhéyará kixin tí kjuachaxin chontará sinterá kaín xín nkehe mé xikaha chrókjuachroe ijnko chojni kichó ni naṅa noehya jína tinkáchónki Ìnchéni ntá tíha chrókjuasixín sín jie. ¹⁰ A

ntá tí chrók'uikon sín kixin jahará ó nohará jína ntá ts'ejorá sinterá nkehe nkaxenhen ijnko nínkqe nkehe tsíkjanoya, ntá tí chojni kichó ni naxa noehya jína ntá chrók'uikon sín xikaha ntá kjaxin jehe sín tsojtinkaon sín sine sín tí nkehe tsíkjokehē chojni ijnko dios chaxínhya. ¹¹ A ntá jahará ó nohará jína ntá xikaha tje-joch'erá itsará sijnchek'itjáyánrá tí kichó ni naxa noehya jína tinkáchónki Ìnchéni kixin Cristo k'uenyákonhen tí jehe ch'án kjaxin. ¹² Méxra tí xikaha chrókjuich'erá la chrókjuásinhínra jie tí sín kichó ni naxa tinkáchónkihya sín Ìnchéni jína, na mé xikaha kjaxin chrókjuásinrá jie chrókuitekákuenhyará Cristo. ¹³ Méxra tí xikaha chrókjuasixín jie ijnko kichó ni kixin tí nkehe chrókjóneni, ntá íchá jína chrókjónehyani nto inaá kixin xikahya ntá chrókjuichroexín tí sín kichó ni ntá chrókjuasixín sín jie.

Tí kjuachaxin chóna ijnko apóstol

9 Chaxín janhan la kohya nkexro t'etuanna kixin janhan la chonta kjuachaxin kixin ijnko apóstol tsíkjeýá Ìnchéni kixin janhan k'uikuñ ch'án. Jahará mé tjáqoxínrá tí xra kjuít'a kuènte Ìnchéni. ² Iso sín ntáchro sín kixin tjátsoanhyana sín kixin ijnko apóstol tsíkjeýá Ìnchéni. Ntá jahará kaín rá mé chrókjuátsoanrá tí janhan kixin tí kuítekáonrá kuinkachónkirá Ìnchéni mé xikaha tjáqoxínrá kixin chaxín janhan tsíkjeýána ch'án.

³ Méxra janhan jína chrókjuátaha tí sín xritjontana, chróntáxrjan kixin: ⁴ Janhan chonta kaín kjuachaxin chrók'uayáha nkehe chrókjonè la ko chrók'uia. ⁵ Kjaxin chonta kjuachaxin chróchonta ijnko chojni chjin tinkáchónki Ìnchéni chrók'uajikian éxi chóna tí í so sín tsíkjeýá Ìnchéni, la ko tí sín kichó Ìnchéni, la ko éxi chóna ch'ín Pedro. ⁶ ¿Á tjenkayáxinrá kixin ch'ín Bernabé la ko janhan jehóni chóntahyani kjuachaxin tsítóheni tí xra sich'exínni tjani? ⁷ ¿Nkexro ch'e xra soldado ntá chichakqen ch'án ó chrókuicháxinhin? Nkexro k'uengká nta to uva ntá kjonehya ch'án to? ¿La ko nkexro t'ayakonhen kolélo ntá k'uíhya tí tsjen t'énhen sín va? ⁸ Ntáchrohyará kixin janhvàn kjuenkayáxian tíha kixin kjaxin xroon tsíkjin ch'ín Moisés xikaha nixja. ⁹ Méxra kjaxin ntáchro tí xroon tsíkjin ch'ín Moisés óse kixin: "Chrókjuéjójáhyará kampoxa ir'va koxinta tí tsinkátja va noatrigo tió tsónkéhe sín noa." † Tíha mé t'axrjexín kixin jehya koxinta ó tóxakonhen Dios. ¹⁰ Náhí. Tóxakonhen ch'án kixin tí jeheni. Méxra xikaha nixja tí xroon kixin chrók'uejóxinni jína. A ntá tí nkexro kjuínchentá nche la ko tí nkexro tsónkéhe noa, yóí sín la chróchónhen sín chrók'uáyéhē sín tí nkehe k'óna. ¹¹ A ntá tí k'uengkani tí itén Dios asánrá, la kjá chróchóntani kjuachaxin chrókjuanchaharáni ichrén nkehe t'ichjánxinhinni. ¹² A ntá tí xikaha í so sín chóna sín tí kjuachaxin tjanchia sín nkehe ts'áyéhē sín, ntá jeheni antsí má chóntani kjuachaxin chrók'uáyéhēni nkehe.

Kjonté chóntani kjuachaxin xikaha la kjuanchahyani nkehe, kjonté kánhyó náxrjón k'uéjóni kixin tjinkakon-

hyani chrókjuanchiani nkehe chrók'uichjánxinhinni kixin ách'e xikaha ntá chrók'uinkákonhen tí itén Cristo chrókjuakoni. ¹³ Jahará ó nohará kixin tí sín ch'e xra kúente nínko mé ntaha xránjon nkehe ine sín. La ko tí sín t'óyáxin sín ko tí altar tsochjéhe sín Dios kjaxin ine sín tí ntqe tí ko t'óyáxin sín ntiha. ¹⁴ Méxra xikaha kjaxin k'uetqan Ìnchéni kixin tí sín ch'e tí xra ó chrónka sín tí tan tsaáxinni na mé tí xra a chrók'uaxrjenixin tí nkehe chrókjóné sín. ¹⁵ Kjonté janhan síin kjuachaxin xikaha chrókjuít'a, la xikahya kjuít'a la ko kjaxin xikahya ikjian tí xroon i kixin jahará chróchjinará ichrén nkehe. Náhí. Kjonté chrók'uénxian kjinta chrókjuáncháhyará nkehe kixin tjínkqonhya kixin ninkexró chrókuakitsjena tí kjuachéhē chonta.

¹⁶ Jehya kixin chrokujintahnke chrókjuakua tí tan tsaáxinni. Náhí. Janhan na ó jehí sít'a tí xra a. Nòda tí janhan tí chrókjuákohya tí tan jína chrókuaáxin chojni. ¹⁷ A ntá tí janhvàn tjínkqan chrókjuakua la xikahó chrókjuacha janhan. A ntá tí tjákua itén Dios kixin xikaha kuituanna ntá xikahó ntaxiteyá tí xra chjina Dios.

¹⁸ ¿A ntá nkehe chrókjuacha janhan? Tíha mé chrókjuacha janhan kixin chrókóchàna má kixin chrókjuakua tí itan tsaáxinni la ninkehó chrókjuáncháhya chrókjuacha la ntá tí xikaha la chrókuákjaáhya tí kjuachaxin tí chrókjuakua.

¹⁹ Méxra kohya nkexro t'etuanna. Kjánchó ó jehí chrókjuít'ahá kaín xín chojni xra kixin xikaha antsí tsjé chojni chrókjuacha janhan kixin chrókuitekaon sín Cristo. ²⁰ Ti tjèn tí síin tí sín judío ntayóha éxi jehe sín xikaha janhan kixin xikaha chrókjuacha jnkojín sín chrókuitekaon sín. Na mé t'axrjexín kixin tí chrókjuacha iso ti sín nchexiteyéhē tí ley k'uetqan ch'ín Moisés, la t'ichjánxín kixin kjaxin janhan chrókjuíntaxiteyá tí ley kjonté janhan la xikahya t'etuanna tí ley. ²¹ A ntá tí chrókjuacha jnkojín tí sín nchexiteyèhya tí nkehe k'uetqan ch'ín Moisés la ntayóha éxi tí jehe sín xikaha janhan kjaxin, kjonté chaxín t'etuanna tí nkehe k'uetqan Dios méxra ntaxiteyá tí nkehe k'uetqan Cristo. ²² Tió tjèn tí síin tí sín tienxínhya jína, ntá kjaxin janhan t'óna éxi tí jehe sín kixin xikaha chrókjuacha jnkojín tí jehe sín chrókuitekaon sín. Méxra ntayóha éxi kaín xín chojni xikaha janhan kixin xikaha chrókjuacha janhan kixin chrókuaá iso tí jehe sín. ²³ Mé xikaha kaín tíha tjét'a kixin chrókuinhin sín tí tan chrókuaáxin sín la ko kjaxinna antsí má chrókjuintayaonna Dios.

²⁴ Jahará ó nohará kixin tió itsjé sín tsinkáko kichó sín la kjánchó ójnkó nkexro tsjacha tí tsítqonhen nkehe. A ntá jahará xikaha chrókuinkará kixin chrók'uayéhérá tí nkehe chrókuítqonhanrá. ²⁵ Tí sín tinkáko kichó sín na mé jína t'ayakonhen sín asén sín, títohe sín kaín xín nkehe chrókjuich'ehe sín daño kixin tjinkaon sín chrókjuacha sín, chrók'uáyéhē sín kjonté ijnko corona tsík'óna kayoa ó tjoka tsqxámá. Kjánchó jeheni ch'eni xra kuènte Ìnchéni kixin ntá ts'áyéhēni ijnko nkehe chónhya tsqxámá. ²⁶ A ntá janhan jehya éxi ijnko chojni t'ikonhya chrókuinka. Jehya éxi xrínto ó chrókjuánjonkian. ²⁷ Náhí. Janhan tjánjonkian tí cuerpo kuèntana, tétuqanhan kixin jína chrókjuinchexiteyàna kixin

† Deuteronomio 25.4

tóxakonna kixin chrókjuásian ichrén jie ntá janhan chrókjuachahya kjónté senó kjuákoḡa itsjé chojni.

Tí nkehe t'etōan ch'án kuènte tí nkehe tsíkjanōya

10 Tjínkavan janhan kixin chrókónohará kichó ni kixin tí sín k'uaxrjeníxinni ósé, kaín sín k'uíxinkánkí sín chrínkí tí tjuj, la ko kaín sín k'uátòye sín Ntayaon Kjátse, ² la ko kaín sín k'uéchréhe sín ch'ín Moisés éxí yóḡe chrókuikite sín kixin jnkokoá k'uéjó sín tí tjen tí tjuj la ko tí ntayaon la ko kjuínchexiteyéhe sín ch'án kixin jehe ch'án k'uék'etōan ch'án. ³ La ko kaín sín kjóne sín jnkokón nkehe kuixín nkaya nkajní ⁴ la ko kaín sín ik'ui sín jnkokón nkehe kjuanjon Dios kixin ik'ui sín ntá k'uaxrjexín ijnko tjo kjuíncheyaon Dios, na mé tí tjo a la mé t'axrjexín kixin Cristo tíha. ⁵ Kjánchó itsjé tí jehe sín kjuínchechēhya sín Dios, méxra kónínkaon ch'án la tí nteje ó k'uénxin tí sín a.

⁶ Kaínxín tíha kónhen kixin chrórxaxinkakonxínni jeheni, chróntáchrohya asénni chrókjuich'eni tí nkehe jí nahya éxí kjuích'e tí jehe sín. ⁷ Méxra chrókuinkachónkihyará jahará nkehe tsíkjanōya éxí k'uékinkáchónki iso tí jehe sín, éxí ntáchro tí xroon itén Dios tsíkjin sín ósé kixin: "Kaín sín k'uéjótjaxín sín kjóne sín la ko ik'ui sín, ntá kjuixín la k'uínkatjen sín la ité sín". ⁸ Méxra chrókjuasinkohyani jie chojni chjin ókjé éxí kjuích'e iso jehe sín ntá ik'uén sín, ventitres mil sín, jnkokoá yaon. ⁹ Kjaxin chrókjuinchekóninkakonhyani Inchéni éxí kjuích'e sín ntá ik'uén sín kixin kjónehe sín konche, ¹⁰ la ko chrók'uántaxíenhyani Dios éxí k'uántaxínḡin tí jehe sín ntá tí ángel kuènte kjuach'én mé kui k'óyán sín. †

¹¹ Kaín tíha kónhen tí sín k'uaxrjeníxinni ósé kixin chrókónoexínni la ko k'óna xroon chrónka xikaha kixin nchexraxinkaonni tí jeheni tjejóni jie kixin í séhya tsjixixín tsjeje chjasintajni. ¹² A ntá tí nkexro ntáchro kixin ntoá tjen na chrókóxakonhen kixin chrókjuichroehya. ¹³ Jahará naxa k'uatsinkahyará ninkehó nkehe tí chrókjuachahya chojni chrókónhen. Méxra jahará chrórxáxinkáonrá Dios kixin jehe ch'án chrókuítqehya ch'án tí jahará kixin chrók'uatsínkará nkehe imá xra chrókjuachahyará. Méxra tí itsi ichrén nkehe tsonhanrá la Dios tsjinkít-sará ch'án kixin chrókjuachará chrók'uatsínkará tí nkehe chrókónhanrá.

¹⁴ Méxra tjuahará jahará kichó ni, la ntá ntáxrjan kixin chrókuítqohérá tí nkehe tsíkjanōya. ¹⁵ Nixjahará jahará kixin jahará chojni ó tienxín. Méxra jahórá chrokJuenkayáxinrá kixin á jína tí nkehe ntáxrjan. ¹⁶ Tí tjanchiani kjuasáya kixin tí nkehe it'ini na mé kaín ni jnkokoá tjákoḡinni tí ijnjé Cristo ó k'uítji. La ko tió tóchrít'oni tí niotja ineni, na mé kaín ni jnkokoá tjákoḡinni tí cuerpo kuènte Cristo. ¹⁷ Kjónté nchónhyani jeheni la kaín ni na jnkokoá niotja ineni kixin kaín ni jnkokoá k'ónani cuerpo kuènte Cristo.

¹⁸ Chrókónohará nkexrí ch'e tí sín chjasin Israel, na mé ine sín tí ko tsíkjoḡeḡe sín Dios ntá xikaha tjákoḡin sín kixin xikaha tinkáchónki sín. ¹⁹ Ntáxrjanhya kixin tí

nkehe tsíkjanōya la chóna kjuachaxin, la ko ntáxrjanhya kixin tí nto tsíkjoḡeḡe sín tí nkehe tsíkjanōya la antsí chóna kjuachaxin. ²⁰ Náhi. Ntáxrjan kixin tí nkehe tjanjon tí sín chónhya Dios na mé tjoḡeḡe sín tí nchakuen tí jínahya la jehya Dios tjoḡeḡe sín tíha. Méxra janhan tjínkakonhya kixin xikaha chrókjuich'erá jahará chrórxáxinkáonrá tí nchakuen tí jínahya. ²¹ Tí its'ini tí nkehe xraxinkakonxínni ijnjé Inchéni ntá kjaxin tí chrók'uini tí nkehe xraxinkakonxín sín tí nchakuen tí jínahya la jehya jína tí xikaha chrókjuich'eni chrók'uini. Tí sineni tí nkehe xraxinkakonxínni tí cuerpo kuènte Inchéni ntá kjaxin tí chrókjóneni tí nkehe xraxinkakonxín sín tí nchakuen tí jínahya la jehya jína tí xikaha chrókjuich'eni chrókjóneni tí nkehe. ²² ¿A jína chrókjuinchekóninkaonni Inchéni ní? ¿Á jeheni antsí chóntani kjuachaxin la ntá jehe ch'án la náhi ní?

Chóntani kaín kjuachaxin kaín xín nkehe na kjónté antsí tjetōan tsotjuèheni kichó ni

²³ Siín kjuachaxin ichrén nkehe chrókjuich'eni. Kjánchó jehya kixin kaín nkehe la jína. Siín kjuachaxin ichrén nkehe chrókjuich'eni na kjánchó kénhya nkehe chrókjuinkítsa chrókónoheni tí nkehe kuènte Dios. ²⁴ Chrókjuéyáhyará tí nkehe chrók'uejóxínrá jína jahórá. Náhi. Kjaxin chrókjuéyárá tí nkehe chrók'uejóxín jína í so chojni.

²⁵ Chrókjónterá kaín nto sítóxin la chrókjuanchankíhyará ninkehó kixin tí xikaha ntá ntoáhya chrókjuenkayáxinrá, ²⁶ kixin kuènte chjasintajni la kaín xín nkehe siín la kuènte Inchéni.

²⁷ A ntá jnkojín chojni tinkáchónkihya Inchéni chrók'uíyáhará sín kixin chrókjóntekoará sín la ko tjínkáonrá sáchrókjuirá ntaha la ntá ó nchoxon chrókjónterá tí nkehe tjáhará sín la chrókóxakuanhyará chrókjuanchankíhyará ninkehó. ²⁸ Kjánchó tí chróntáchro jnkojín sín kixin tí nto la ó tsíkjoḡeḡe sín ijnko nkehe tsíkjanōya, ichro sín, ntá tí xikaha la chrókjóntehyará jahará, chrókóxakonhanrá kixin ntoáhya chrókjuenkayáxin tí nkexro chrónka xikaha. ²⁹ Méxra ntáxrjan tíhi kixin tjínkakonhya kixin ntoáhya chrókjuenkayáxin chojni ókjé, jehya kixin ntoáhya chrókjuenkayáxinrá jahará.

Kjánchó isorá tsjanchankínará kixin nkekuènte chrókóxakonhanrá nkehe chrókjuenkayáxin ókjé chojni kixin tí kjuachaxin chontará. ³⁰ Tí tjáncháḡa Dios kjuasáya kixin tí nkehe inè, ¿ntá nkekuènte kixin chrókjontana chojni kixin kuènte kjonè? ³¹ Tí chrókjónterá nkehe la ko chrók'uirá nkehe la ko ichrén xra chrókjuich'erá la chrókjuákoḡinrá kixin Dios kjuínkít-sará. ³² Ch'ehyará ninkehó nkehe chrókjuichroexin í so chojni kjónté judío sín la kjónté jehya judío sín la o tí chojni njnkoḡe Dios. ³³ Janhan mé tjéyá kixin kaín xín xra tjét'a chrókóxrjínḡin kaín xín chojni, na mé jehya kixin tjéyá kixin janhvàn chrókjuak'é jína. Náhi. Kjaxin tjínkavan kixin chrókuaáxin í so chojni.

11 Chrókjuákoḡinrá jahará éxí kjuákoḡian janhan kixin janhan mé kjuákoḡian éxí kjuákoḡin Cristo.

† Éxodo 32.6 †† Números 25.6-9 ‡ Números 21.5-6 †† Números 16.41-49

Jína chrók'uejó tí chojni chjin tió tójnkotsé chojni

² Kíchóni, chàna kixin xráxin xráxinkáonrá tí janhan la ko nchexiteyéhérá tí nkehe kjuákohará. ³ A ntá tjínkavan kixin chrókiénxinrá kixin Cristo t'etuēnhen jnkoinko chojni ntoa, la ko kjaxin xikaha jnkoinko chojni ntoa mé t'etuēnhen tí ichjién, la ko kjaxin xikaha Dios mé t'etuēnhen Cristo. ⁴ A ntá tí jnkoin chojni ntoa xrasixin kachjinke ch'án tí tjenixjehē ch'án Dios, o xrasixin ch'án kachjinke ch'án tí tjechronka ch'án iten Dios, mé xikaha tjakoxin ch'án kixin chóntehya ch'án kjuasáyé tí Ìnchéni t'etuēnhen ch'án. ⁵ A ntá ijnko chojni chjin tjóhín kja tjan tí tjenixjehē tjan Dios la o tjóhín kja tjan tí tjechronka tjan iten Dios, mé xikaha tjakoxin tjan kixin chóntehya tjan kjuasáyé tí xii tjan. Mé tóyóhé éxí tsíkjin tjan xikaha. ⁶ A ntá tí chojni chjin tjinkakonhya kixin chrók'uiáxin kja tjan nkehe mé chrókjin tjan. Kjánchó tí chrókósuēhē tjan chrókjin tjan, ntá chrók'uiáxin kja tjan tóte tió tójnkotsérá. ⁷ Kixin tí chojni ntoa chrókjuasinhya ch'án kachjinke ch'án kixin jehe ch'án mé éxí retratqé Dios la ko t'inkaséyanxín ch'án tí kjuachaxin kuēnte Dios. A ntá tí chojni chjin mé t'inkaséyanxín tjan tí kjuachaxin kuēnte tí xii tjan. ⁸ Kixin tí chojni ntoa saoxín k'óna mé k'uaxrjeníxinhya ch'án chojni chjin. Náhí. Tí chojni chjin mé k'uaxrjeníxin tí chojni ntoa. ⁹ Chaxín k'ónahya tí chojni ntoa kixin jehó tsjak'e ch'án. Náhí. Tí chojni chjin mé k'óna kixin tsjak'ekotoxin ch'án. ¹⁰ Ntá t'ichjánxin kixin tí chojni chjin ts'íáxin kja sín tóte chrókjuakoxin sín kixin t'ítuenhen sín kixin xikaha ts'ikon tí sín ángel. ¹¹ Kjánchó kaín ni tinkáchónkini Cristo t'ichjánxin kixin tí chojni ntoa chrókjuinkitsa tí chojni chjin la ko tí chojni chjin chrókjuinkitsa tí chojni ntoa. ¹² Kixin chaxín tí chojni chjin na tí chojni ntoa k'uaxrjeníxin. A ntá jie tí chojni chjin na mé t'axrjeníxin tí chojni ntoa. A ntá kaín ni k'uaxrjeníxinni Dios.

¹³ Jahará nkechorá, z'á ó nchoxon kixin ijnko chojni chjin tjóhín kja tjan chrónixjehē tjan Dios? ¹⁴ Jahóra chrókónohará kixin chrókósuēhē tí chojni ntoa chóna kaxihi kijnjin. ¹⁵ A ntá tí chojni chjin chóna kaxihi kijnjin la mé ntoá tíha kixin ó kuítuēnxin tjan kixin tsochóna tjan kaxihi tjan kijnjin kixin tsojtóhínhya kja tjan. ¹⁶ A ntá tí tjan jnkoin nkexro titekakonhya tíha xikaha ntá chrókónohará kixin jeheni la ko kaín xín tí sín njnkqē Dios la xikahó kuēnhenni.

Ntoáhya kjóne sín tí niotja xraxinkakonxín sín Ìnchéni

¹⁷ Méxra tí nkehe tjékjian la mé ijnko nkehe tóxrjínahya tjejoch'erá. Tió tójnkotsérá ntiha la ijnko nkehe jína chrókjuich'erá. A ntá náhí la ijnko nkehe jínahya tjejoch'erá. ¹⁸ Na mé saoxín na mé ntáchro sín kixin tió tójnkotsérá la jnkokoáhya tjenkayáxinrá. Ntáxrjan kixin ách'e chaxín xikaha tjejoch'erá. ¹⁹ Z'á t'ichjánxin kixin chrók'uaxrjentará kixin chrókónoexínni kixin nkexro chaxín tinkáchónki Ìnchéni la ko nkexro tí náhí? ²⁰ Méxra tí xikaha jnkokoáhya tjenkayáxinrá ntá tió tójnkotsérá chrókjónterá niotja la chaxínhya

xraxinkakonxínrá Ìnchéni tí xikaha. ²¹ Kixin tió sinterá la senó isorá tjejoch'erá tí nkehe tsíkjasánkoará, la isorá la kjónté naxá t'énxinrá kjinta, la í sorá la tsíkókoanrá. ²² Z'á chontahyará nchia ntqará? Ntahó chrókjónxínrá la ko chrók'uíxinrá nkehe. Mé xikaha chontahyará kjuasáyé tí njnkqē Dios la ko nchesuēhérá tí sín nòna chónthaha ninkehó. Z'Nkehe tsontáxrjan? Z'Á tsontáxrjan kixin jína tjejoch'erá? Kjá náhí. Jehya jína tjejoch'erá.

Jína chróxraxinkakonxínni Ìnchéni

(Mt. 26.26-29; Mr. 14.22-25; Lc. 22.14-20)

²³ Kixin Ìnchéni mé chjina ch'án tí nkehe kjuákohará: kixin tí tie tsíkóxi ch'án na mé jehe ch'án kuákja ch'án tí niotja ²⁴ ntá kjuixin kjuanchia ch'án kjuasáya ntá kóchrít'o ch'án tí niotja ntá ntáchro ch'án kixin: "Tíhi mé ntqna xránjon its'en kixin jína ts'ejóxin tí jahará. Méxra xikaha s'ich'erá kixin tsoxraxinkakonxínrá tí janhan", ichro ch'án. ²⁵ La ko kjaxin xikaha tió kjuixin kjóne sín ntá kuákja ch'án tí vaso la ntáchro ch'án kixin: "Tíhi mé tjakoxin kixin chaxín tsoxiteyá ijnko nkehe njxin kuēnte Dios kixin ts'ítji jnina. Tió its'irá tíhi mé tsoxraxinkakonxínrá tí janhan", mé chro ch'án. ²⁶ Kixin tí interá tí niotja la it'irá tí inté to uva mé xikaha tjejotjákoxinrá kixin xikaha k'uénxin Ìnchéni. Mé xikaha tsjákoxinrá tsjixrakájia yaon tsokjan ch'án.

Ntoá chrókjóneni tí niotja kuēnte Ìnchéni

²⁷ A ntá jnkoin nkexro chjini chrókjóné sín tí niotja la ko chrók'ui sín tí inté to uva xraxinkakonxínni Ìnchéni, mé xikaha chrókjuasin sín jie chrókjuikosáyehya sín tí cuerpo la ko tí ijnie Ìnchéni. ²⁸ Méxra jnkoinkoni chrókjuenkayáxinni senó kixin á chónthayani jie na ntá chrókjóneni tí niotja la ko chrók'uini tí inté to uva. ²⁹ A ntá tí xikaha chjini chrókjóneni la ko chjini chrók'uini la chaxínhya chróxraxinkakonxínni tí cuerpo kuēnte Ìnchéni la mé tí xikaha chrókjuich'eni la chrókjuasótexínni tíha. ³⁰ Mé xikaha itsjérá níhará la ko itsjérá tsankahyará la ko jnkoinrá k'uénrá. ³¹ A ntá tí chrókjuatsqanni nkexrí tjan asénni jeheni ntá Ìnchéni t'ichjánxienhya chrókjuinckekjasóteni ch'án. ³² A ntá kjónté chrókjuinckekjasóteni Ìnchéni ntá chrók'uitjani chrókjuinckexiteyéhēni ch'án, ntá chrókjuasótehyani éxí tsjasóte tí í so chojni chjasintajni.

³³ Méxra kíchó ni, tió tójnkotsérá sinterá la chróchonhénrá chrókui tí í so sín ntá chrókjóntekoará sín jnkokoá. ³⁴ A ntá tí nkexro ik'uén kjinta la íchá jína senó chrókjónexín nkehe ntqē ó kixin ntá chrókjuinckekjasótehyará Dios kixin xikaha ntoáhya tójnkotsérá. A ntá tí í so nkehe la tsjásiyóxian janhan tió tsjasánts-jahará.

Nchakuen Dios mé chjéhe kjuachaxin jnkoinko chojni

12 Kíchóni, tjínkavan kixin tsoqohará jína kixin nkexrí siín tí kjuachaxin tjanjon Nchakuen Dios t'áyehē jnkoinko chojni.

²Jahará ó nohará jína kixin tió naxa kuinkachónkehyará Ìnchéni na mé kuinkachréhérá tí nkehe tsikjanoya nixjahya. ³Méxra chrókónohará kixin nijnko nkexro nixjixin kjuachaxin Nchakuen Dios tsjacha ts'ántaxínhìn Jesús, la ko nijnko nkexro tsjacha tson-táchro sín kixin Jesús mé Ìnché sín tí nixjixinhya sín tí kjuachaxin Nchakuen Dios.

⁴À ntá nchónhya xra kuènte kjuachaxin Nchakuen Dios siín la kjánchó jnkokóá Nchakuen Dios mé tjetjanjon. ⁵La ko siín nchónhya nkexrí sich'ehe ni xra Ìnchéni, kjánchó Ìnchéni la ójnkó nkexro tíha. ⁶La ko nchónhya nkehe t'axrjexín tí xra ch'e jnkojnko chojni la kjánchó jnkokóá Dios tjetjanjon tí kjuachaxin ch'exínni xra kaín ni. ⁷Jnkojnko chojni mé kujtonhen kixin chrókjuakoxin kjuachaxin kuènte Nchakuen Dios kixin xikaha chrókjuinkitsa kichó. ⁸Iso chojni mé ts'áyéhe kjuachaxin tsonixja sín kjuaxrexinkaon jína kixin tjinkitsa Nchakuen Dios, la ko í so chojni ts'áyéhe kjuachaxin tsochrónka ijnko nkehe kuènte Dios noehya tí í so sín kixin Nchakuen Dios mé tjinkitsa sín tsonixja sín. ⁹La ko í so chojni mé ts'áyéhe kjuachaxin antsí tsinkáchónki Dios kixin Nchakuen Dios mé tjinkitsa. La ko í so chojni mé ts'áyéhe kjuachaxin sinchekitohe chojni jína. ¹⁰La ko í so chojni mé ts'áyéhe kjuachaxin tsjasin sín kjuaxroan, la ko í so chojni mé ts'áyéhe kjuachaxin kixin Dios sinchenohe sín ijnko nkehe tsochenka sín tí í so kichó ni, la ko í so chojni mé ts'áyéhe kjuachaxin tsjatsqanxín á kjuachaxin kuènte Nchakuen Dios ó á kjuachaxin kuènte ijnko nchakuen jínahya chronkaxín ijnko chojni, la ko í so chojni mé ts'áyéhe kjuachaxin kixin ijnko nkiva ókjé naxa k'uitjahya sín tsonixjixin sín ijnko nkehe kuènte Dios, la ko í so chojni mé ts'áyéhe kjuachaxin tsochronkaxín nkexrí t'axrjexín tí nkehe ókjé nkiva tsíchronka tí í jnko chojni. ¹¹Kjánchó kaín tíha jnkokóá Nchakuen Dios mé tjinkitsa, na mé k'uáyéhe jnkojnko chojni jnkojnko kjuachaxin éxí tjinkaon tí Nchakuen Dios nkerí xra chrókjuich'e sín.

Kaínni k'ónani jnkokóá cuerpo kuènte Cristo

¹²Cristo la éxí yóhe ijnko cuerpo chóna nchónhya parte. À ntá ijnko cuerpo la jnkokóá kjánchó nchónhya parte chóna. Kjonté nchónhya parte chóna tí cuerpo la tí cuerpo la ójnkó. Mé xikaha Ìnchéni Cristo la ójnkó tí jehe ch'án. ¹³Kaínni kjonté chojni judío la kjonté chojni jehya judío, la kjonté chojni ch'exón xra, la kjonté chojni t'ítuenhya, kaín ni na mé jnkokóáxón Nchakuen Dios kuíkitexínni, na kaín ni k'ónani jnkokóá cuerpo kuènte Cristo, na mé éxí jnkokóá nkehe ik'uíni kaín ni na mé k'uáyéhe ni tí jnkokóá Nchakuen Dios.

¹⁴Kixin tí cuerpo kuènteni la jehya jnkokóá parte chóna. Náhí. Itsjé parte chóna tí cuerpo. ¹⁵Tí chrón-táchro tí tóteni kixin: "Jehya itja tí jeheni na mé jehya jeheni kuènte tí cuerpo", na mé chaxínhya tíha kixin ó jehe cuerpo kuènte. ¹⁶Kjixin tí chróntáchro ijnko ntatsjoni kixin: "Jehya ikon tí jeheni na mé jehya jeheni kuènte tí cuerpo a", na mé chaxínhya tíha kixin ó jehe cuerpo kuènte. ¹⁷Tí chaxín kuenté cuerpo kuènteni chrók'óna ikonni, ¿ntá nkexrí chrókuinhinni? À ntá tí

chaxín kuenté cuerpo kuènteni chrók'óna ntatsjoni, ¿ntá nkexrí chrókókaxraxéheni? ¹⁸À ntá Dios kjuanjon ch'án kjuachaxin nkexrí ch'e xra jnkojnko nkehe kuènte cuerpo kuènteni kixin jehe ch'án nkexrí tjinkaon ch'án cóxrjínhìn ch'án. ¹⁹À ntá tí chrók'óna jnkokóá nkehe tíha, ¿a ntá nkexrí chrókjuak'e tí cuerpo a? ²⁰Kjánchó jie nchónhya parte chóna tí cuerpo kuènteni la ó jnkokóá tíha.

²¹Tí ikonni la mé xitjahya tsontáche tí tjani kixin: "T'ichjánxienhyani tí jaha", la ko kjaxin tí kjani xitjahya tsontáche tí tóteni kixin: "T'ichjánxinnahya tí jaha." ²²Náhí. Tí nkehe kuènte tí cuerpo tónhenni kixin tjetuanhya na mé kjonté antsí má t'ichjánxín ²³la ko í so nkehe kuènte tí cuerpo la kánhyó chóntheni kjuasáya na kjánchó antsí nchek'ítsáni ka. La ko í nkehe náxrjónhya la antsí tóxakonhenni kixin tsonoxínhya. ²⁴À ntá tí nkehe náxrjón na mé t'ichjánxienhya ka ts'ítsá. Mé xikaha Dios kjuíncheyóxin kaín tí nkehe kuènte tí cuerpo kuènteni la ko jehe ch'án antsí chjéhe ch'án kjuasáya tí nkehe chrókjuikosáyehyani jeheni ²⁵kixin ninkehó xitjahya chrókikayehe tí cuerpo kixin kaín tí nkehe la jnkokón tjinkitsa kichó. ²⁶Tió tsíkónfhi ijnko parte kuènte tí cuerpo la kaín tí í so parte la kjaxin tjeté; la ko tió tjikosáyehye sín ijnko parte la kuenté tsochéhe.

²⁷À ntá jahará na mé kuènte tí cuerpo kuènte Cristo la ko jnkojnkorá mé ijnko parte kuènte tí cuerpo kuènte ch'án. ²⁸Méxra Dios kjueyá ch'án chojni sich'ehe ch'án xra kuènte nijnko, na mé saoxín kjueyá ch'án tí sín apóstol; la ko yóxin kjueyá ch'án iso chojni chjéhe ch'án kjuachaxin tsochrónka sín ijnko nkehe kjuínchenohe sín ch'án. La ko níxin kjueyá Dios iso chojni chjéhe ch'án kjuachaxin tsjako sín itén ch'án, la ko kjaxin kjueyá ch'án iso chojni chjéhe ch'án kjuachaxin tsjasin sín kjuaxroan, la ko kjaxin kjueyá ch'án í so chojni chjéhe ch'án kjuachaxin sinchekitohe chojni níhi jína, la ko kjaxin kjueyá ch'án í so kjojni chjéhe ch'án kjuachaxin antsí tjinkitsa kichó, la ko kjaxin kjueyá ch'án í so chojni chjéhe ch'án kjuachaxin ts'e-tqan xra kuènte ch'án, la ko kjaxin kjueyá ch'án í so chojni chjéhe ch'án kjuachaxin tsonixjixin sín í jnko nkiva. ²⁹Kénhya chojni tsík'óna apóstol, la ko kénhya chojni chóna kjuachaxin sinchenohe sín Dios ijnko nkehe tsochrónka sín, la ko kénhya chojni chóna kjuachaxin tsjako sín itén Dios, la ko kénhya chojni chóna kjuachaxin tsjasin sín kjuaxroan, ³⁰la ko kénhya chojni chóna kjuachaxin sinchekitohe sín chojni jína, la ko kénhya chojni chóna kjuachaxin tsonixjixin sín ijnko nkiva ókjé, la ko kénhya chojni chóna kjuachaxin tsochronkaxín sín nkexrí t'axrjexín tí nkehe chrónka tí sín nixjixin ijnko nkiva ókjé. Chaxín kjá nahí. ³¹Méxra tjeýará tí kjuachaxin antsí jína chrótjáhará Dios. Ntá jie tsjákohará ijnko ntja antsí jína chrók'uejorá.

Chrótjuèheni kichó ni

13 Tí chrónixja nkivee chojni ó la ko kjaxin chrónixja éxí nixja tí sín ángel, ntá naxa chrótjuahya

kíchó ni la ó chónkó tíha la mé éxí chrókóyòna chica tsjánka ó la ko éxí ijnko chica platillo nchevékjan sín ó, kixin ninkehó sòn chóntahya. ² La ko tí chrónixjā itén Dios, la ko tí chrókianxian kaín nkehe kuènte Dios naxa noehya chojni, la ko tí chrókónòna kaín nkehe, la ko antsí chrókuinkachónkia Dios ntá chrókjuacha chróntátjan ijnko jnā sáchrókjui ókjé, kjónté tí xíkaha ntá naxa chrótjuahya kichó ni, ntá ninkehó sínkíhya tí janhan. ³ Tí chrókjuintakitonhan tí sín nòa kaín nkehe chonta, la ko tí chrókjuánjuan kjuachaxin kixin chróchena kuenténa, kjónté tí xíkaha ntá naxa chrótjuahya kichó ni la ntá ninkehó sínkíhya tíha.

⁴ Tí tjuèheni kichó ni na ts'ejóchónhenni kichó ni, tsonínkakuenhyani kichó ni, la ko sinchejína asénni, la ko tsochjinoxíenhyani, la ko sinchehnkehyan, la ko tsohnkehyan, ⁵ la ko ch'ehyan ninkehó nkehe náxrjónhya, la ko tjeýáhyani nkehe kuènteni ó, la ko tsonínkakonhyani tjoka, la ko tsochóntahyani kjuanínkaon isé, ⁶ la ko kjaxin tsochèhyani tió í jnko chojni tjasin jie. Náhí. Chrókóchéheni tió ijnko nkehe jina sítónhen. ⁷ Tí tjuèheni kichó ni la kjónté kaín nkehe chrókjuasótexínni la chrókuitekaonni kixin jina sín la ko naxa chrok'uejóchónhenni chrókóninkakonhyani.

⁸ Tí tjuèheni kichó ni la jnkochrín tsjak'e ts'itjáyanya. A ntá itsi ijnko yaon í t'ichjánxinhya tsochrónka chojni itén Dios, la ko tsokohya kjuachaxin tsonixjāxin chojni ókjé nkiva, la ko tsokohya kjuachaxin tsoñohe chojni má. ⁹ Naxa t'itjáyán tí nkehe chrókónoheni la ko naxa t'itjáyán tí nkehe chróchronkaxínni. ¹⁰ A ntá tió tsoñohe kaín xín nkehe ntá tí nkehe ntoáhya k'uénoheni la mé ts'itjáyán.

¹¹ Tió naxa chánjan janhan k'uéníxjā éxí chánjan la ko k'uékjenkayáxian éxí chánjan. Ntá kóntetona ntá kuitohā tí nkehe kuènte chánjan. ¹² Méxra éxí ijnko xrosentā t'ikonxínhyani jina jie, ntá tsi ijnko yaon chr'éxjín ntá ts'ikonxínni jina kaín nkehe. Ijie naxa t'itjáyán tí nkehe chrókónòna; ntá tsi ijnko yaon tsonòna jina kaín xín nkehe éxí xíkaha kjaxin Dios chóxin ch'án tí janhan. ¹³ Méxra, iní nkehe tjejó jnkochrín, la mé ts'ejó chojni tsinkáchónki Dios, la ko ts'ejó chojni tsochónhen sín, la ko ts'ejó chojni tsotjuèhe kichó. A ntá iní nkehe siín, la kjánchó antsí má t'ichjánxín tsotjuèheni kichó ni.

Tí nixjāxin chojni ókjé nkiva

14 Chrókóxakonhanrá kixin chrótjuèhérá kichuárá la ko kjaxin chrókjuéyará kixin Nchakuen Dios chrótjāhará kjuachaxin. Kjánchó antsí chrótjinkáonrá tí kjuachaxin tsochronkārā ijnko nkehe kuènte Dios. ² Méxra, tí nkexro nixjāxin ijnko nkiva ókjé mé nixjehé sín Dios ó la ntá chojni la náhí, kixin kohya ninkexró tienxín tí nkehe nixja sín la mé nchakuen sín ó mé chronkaxín sín ijnko nkehe kuènte Dios noehya tí í so sín. ³ A ntá tí nkexro chronkaxín ijnko nkiva tienxín tí í so sín ijnko nkehe kuènte Dios mé nixjehé chojni ntá xíkaha tjinkítsa tí í so sín kixin antsí chrók'uitja sín nkehe kuènte Dios la ko chrókóchéhe sín. ⁴ A ntá tí nkexro nixjāxin ijnko nkiva ókjé la mé tjinkítsa jehó ch'án antsí

tsoñohe tí kjuachaxin kuènte Dios. A ntá tí nkexro chronkaxín ijnko nkehe kjuínchenohe Dios mé tsjinkítsa tí sín kuènte njnko kixin antsí chrók'uitja sín nkehe kuènte Dios.

⁵ Tjínkavan kixin kaín rá chróchontará kjuachaxin chrónixjāxinrá ijnko nkiva ókjé. Kjánchó antsí tjeoan chróchontará kjuachaxin chróchronkārā ijnko nkehe kjuínchenohará Dios. A ntá kánhyó tjeoan chrónixjāxinrá ókjé nkiva tí noahyará tsochronkaxínrá nkexrí t'axrjexín tí nkehe chróchronkārā kixin chrókuinhin kaín tí sín tinkáchónki Inchéni kixin antsí chrók'uitja sín nkehe kuènte Dios. ⁶ A ntá kichó ni, tí chrókjuasántsahará chrónixjāáxinrá ijnko nkiva ókjé la ó chónkó tíha. Íchá jina chrónixjāáxinrá ijnko nkiva tiénxinrá chróxrjānkaxián ijnko nkehe kjuínchenòna Dios la chróxrjānkaxián ijnko nkehe kuènte Dios naxa noahyará, la chróxrjānkaxián ijnko nkehe tjinkaon Dios chrókónohará, la chrókjuákoáxinrá ókjé nkehe nixín.

⁷ Kixin kjaxin tí ison flauta la ko tí isón arpa, tí jnkokónhya chróntáchro jnkoinko sòn, ntá chrókjuachahyani chrókjuatsòanni nkehe tí ntáchro tí sòn a. ⁸ La ko éxí yóhē tí siín guerra, tjanjonko kichó sín, la ntá ntoáhya chrók'uánoa sín tí chica trompeta, ntá kohya nkexro chrókóyaxínhin sín sáchrókjuikjanjonko kichó sín. ⁹ Kjaxin xíkaha tí jahará tí nixjahyará ijnko tan tienxín sín, ¿ntá nkexrí chrókónohe sín nkehe tí ntáchorá? Mé xíkaha tjejonixjará éxí chjéhe xrinto ó. ¹⁰ Chaxín siín itsjé nkiva chjasintajni la ko kaín nkiva la siín chojni tienxín sín. ¹¹ Kjánchó tí chrókianxinhya janhan tí nkehe tsontáchro ijnko nkexro, ntá tí nkexro a ts'ikon tí janhan éxí ijnko nkexro tsíkjixín ókjé la ko kjaxin janhan ts'íkuān tí jehe ch'án éxí ijnko nkexro tsíkjixín ókjé. ¹² Méxra jahará imá tjinkáonrá chrók'uayéhérá ijnko xra kuènte Nchakuen Dios, ntá chrókójina chrókjuéyará tí xra chrókjuinkítsa tí í so sín kuènte njnko kixin antsí chrók'uitja sín ijnko nkehe kuènte Dios.

¹³ Méxra tí nkexro nixjāxin ijnko nkiva ókjé la chrókjuanchehe Dios kixin chrókjuinkítsa chróchronkaxín ch'án nkexrí t'axrjexín tí tan a. ¹⁴ Kixin tí tsonixjāxian Dios ijnko nkiva ókjé, ntá tí nchakuenná ó mé tjenixjehé Dios, la ntá tí kjuaxrexinkaon kuèntāna la ókjé tjen. ¹⁵ A ntá tí xíkaha, ¿nkehe chrókjuít'a? Íchá jina chrónixjāxian Dios tí nchakuenná la chrókianxian janhan, la ko tió chrótsje janhan himno la chrótsjexian nchakuenná la ko chrókianxian janhan. ¹⁶ Kixin tí tsochjééxinrá kjuasáya Dios nchakuanrá ó ntá tjejótinhin í so chojni, ¿ntá nkexrí kixin tí sín naxa kienxínhya sín tí nkehe nixjehérá Dios chróntáchro sín "Amén, ó nchoxon"? ¹⁷ Kjónté imá náxrjón tí chrókjuanchehérá Dios kjuasáya la ntá chrókienxínhya tí sín tjejótinhin, ntá chrokjuinkítsahya kixin chrók'uitja sín nkehe kuènte Dios. ¹⁸ Tjáncháha Dios kjuasáya kixin antsí chonta janhan kjuachaxin tsonixjāxian ókjé nkiva, la ntá jahará la kánhyó nixjará xíkaha. ¹⁹ Kjánchó tió tójnkotsé chojni kichó ni la mé ntáxrjān kixin antsí tjínkavan chrónixjā janhan kjónté in'ó palabra ó tienxín sín kixin xíkaha chrókjuákuāxian sín, la ntá kán-

hyó chrókójína kjónté ite mil palabra chrónixjāxian ijnko nkiva ókjé tienxínhya chojni.

²⁰ Kíchóni, chrókjuenkayáxinhyará éxí chánjan. Kjánchó chrók'uejorá éxí chánjan naxá noehya nkehe jínahya. A ntá chrókjuenkayáxinrá éxí chojni nteto. ²¹ Tí xroon tsíkjin sín ósé nkexrí k'uetōan Dios mé ntáchro kixin: "Janhan tsonixjāxian ókjé nkiva la ko itén chojni ókjé kixin tsinhin tí naciōn Israel na kjónté tsitekakonhya sín, xíkaha ichro Ìnchéni." ²² A ntá tí kjuachaxin tsonixjāxīn chojni ókjé nkiva mé xránjon kixin chrókjuākoxin chojni chrókuinhin tí sín tinkáchónkihya Ìnchéni, jehya kixin t'ichjānxīn chrókuinhin tí sín tinkáchónki Ìnchéni. A ntá tí kjuachaxin tsochronka chojni ijnko nkehe kjuínchenohe sín Dios mé xránjon kixin chrókjuākoxin chojni chrókuinhin tí sín tinkáchónki Ìnchéni, jehya kixin chrókuinhin tí sín tinkáchónkihya Ìnchéni. ²³ A ntá tió tójnkotsérá kaín rá tinkáchónkirá Ìnchéni, a ntá kaín rá chrónixjāxīnrá ókjé nkiva, a ntá tí chrók'uixenhen nchia ijnko chojni naxá kuénhya sín xíkaha, o chrók'uixenhen nchia ijnko chojni naxá tinkáchónkihya Ìnchéni ntá chrókuinhin sín xíkaha la kjá tsontáchro sín kixin ó k'uixikjānrá. ²⁴ Kjánchó tí chróchronkará kaín rá ijnko nkehe kjuínchenohará Dios ntá chrók'uixenhen nchia ijnko nkexro tinkáchónkihya Ìnchéni, o chrók'uixenhen ijnko chojni naxá tienhyé, ntá chrókuinhin sín nkehe tjejonixjará kaín rá ntá chrórxaxinkaon sín tí jīe chóna sín ntá chrókuítóhe sín kaín jīe chóna sín. ²⁵ Ntá tsonoxín tí nkehe mó tjenkayáxin sín nkaya asén sín ntá ts'ejóxin toch'in sín tsoxaxinkaon sín Dios la ko tsontáchro sín kixin chaxín tjejókoará Dios.

Ntoá chrókjuich'eni kaín xín nkehe tió tójnkotséni

²⁶ A ntá kichó ni, ¿nkehe chrókónhen? Tió tójnkotsérá na mé isorá chrótsjerá salmo, la ko isorá chrókjuàkorá, la ko isorá chróchronkará ijnko nkehe kjuínchenohará Dios, la ko isorá chrónixjāxīnrá ijnko nkiva ókjé, la ko isorá chróchronkaxīnrá nkexrí t'axrjexín tí nkehe nixjāxīn tí í so sín ókjé nkiva. Kjánchó kaín tíha tsonhen kixin tí sín kuente njnko chrók'uitja sín nkehe kuente Dios. ²⁷ A ntá tí chrónixjāxīn sín ijnko nkiva ókjé na mé yaá o iy'á chojni chrónixja sín la ko chrók'uixinkí chojni tsonixja, la ko t'ichjānxīn kixin jnkojín nkexro nohe tsochronkaxín nkexrí t'axrjexín tí nkehe nixja sín. ²⁸ A ntá tí kohya ninkexro tí njnko ntaha tsjacha tsochronkaxín nkexrí t'axrjexín tí nkehe chrónixja sín, ntá chrónixjāxīnhya sín ókjé nkiva tí tjejótójnkotsé sín, na mé chrónixjehé sín asén sín ó la ko chrónixjehé sín Dios ó. ²⁹ Tjānjonrá kjuachaxin kixin tsonixja yaá o y'á chojni k'uáyéhé sín kjuachaxin tsochronka sín nkehe kjuínchenohe sín Dios. A ntá tí sín tjejótinhin mé chrókjuenkayáxin sín á ó nchoxon tí nkehe kuínhin sín. ³⁰ A ntá tí xrínahya chrókjuínchenohe Dios ijnko nkehe ijnko nkexro tjetjāxīn ntá chróchronka ch'án tíha. A ntá tí nkexro senó kjuankíxin chrónka nkehe la chróchónhen ch'án chrónixjahya ch'án. ³¹ Ó nchoxon jnkojnkorá chróchronkará nkehe tjáhará Dios kixin xíkaha kaín rá

chrók'uitjará la ko chrókócháhará. ³² A ntá tí nkexro k'uáyéhé kjuachaxin tsochronka nkehe kjuínchenohe Dios kjaxin t'ichjānxīn chróchónhen tsochronkaxín í jnko nkexro. ³³ Kixin Dios tjanjon tí kjuaxróxin, a ntá tjnkakonhya ch'án kixin yóxinhya chrók'uejóni.

Tiό tójnkotsé chojni kichó ni tinkáchónki Ìnchéni ³⁴ chrónixjahya tí chojni chjin jnkosiné servició. Kohya kjuachaxin xíkaha, na mé chrókjuinchexiteyéhé sín tí sín ntoa éxí t'etōan tí ley kuente Dios. ³⁵ Tí tjinkaon sín tsonohe sín nkehe na mé chrókjuanchankíhi sín xii sín tió tjiji sín ntōe sín. Náxrxónhya chrónixja ijnko chojni chjin nkehe jnkosiné servició.

³⁶ Chrókónohará kixin tí itén Dios xrankíxíxínhya tí tjejorá la ko jehya jahorá k'uayéhérá tíha. ³⁷ A ntá tí tjen jnkojín nkexro tjenkayáxin kixin nixja itén Dios o tjenkayáxin kixin tí Nchakuen Dios tjinkítsa tí jehe ch'án ntá chrókónohe ch'án kixin tí nkehe tjejkian mé ijnko nkehe tsík'etōan Ìnchéni. ³⁸ A ntá tí nkexro itekakonhya tíhi na ntá jahará chrókuitekákuénhyará ch'án kjaxin.

³⁹ Méxra kichó ni, chrókjuéyará kixin chrók'uayéhérá kjuachaxin chróchronkará nkehe kjuínchenohará Dios la ko chrókuijtohérá tsonixjāxīn chojni ókjé nkiva.

⁴⁰ Kjánchó kaín xín nkehe la jnkojína la ko kjuasáya chrókónhen.

Tsíxechón Cristo

15 A ntá jie kichó ni, tjínkavan chrórxaxinkáonrá nkehe tí tan kuaáxinrá kjuákohará. Tíha mé kuítekáonrá, la mé tíha mé tjejóxinrá jína. ² Kjaxin tí nkehe kjuákohará mé kuaáxinrá, tí tjtōéhyará tí nkehe kjuákohará; tí la náhi la chónkó kuinkachónkirá tí nkehe kjuákua.

³ Saōxin, kjuákohará tí nkehe k'uayáhā kixin Cristo k'uenyákonhen ijjéni, na mé xíkaha kjuínchexiteyá ch'án tí nkehe ntáchro tí xroon itén Dios ⁴ la ko tsíkjavá sín ch'án la ko tsíxechón ch'án tí nixin yaon éxí ntáchro tí xroon itén Dios. ⁵ Ntá k'uíkon ch'ín Pedro tí jehe ch'án, ntá chr'éxin ínaa tí teyó sín k'uék'ajiko ch'án k'uíkon sín tí jehe ch'án. ⁶ A ntá chr'éxin chjina quinientos chojni kichó ni jnkokoá k'uéjé sín k'uíkon sín ch'án. A ntá jie itsjé tí sín a naxá tjejó sín, a ntá jnkojín sín na ó tsík'en sín. ⁷ Chr'éxin k'uíkon ch'ín Jacobo tí jehe ch'án, la ko k'uíkon kaín tí í so sín apóstol ínaa.

⁸ A ntá kjuixixín janhan k'uíkuān Ìnchéni éxí ijnko xjan naxá xetjahya yaon chrókokjíhi. ⁹ Kjánchó janhan kánhyó tjetōan la mé tōyóehya tí í so sín tsíkjejá Ìnchéni la ko tōsuāna chrók'óna ijnko nkexro ch'ehe xra Ìnchéni kixin janhan mé k'uéninkakonhan tí sín njnkōe Dios. ¹⁰ Kjónté jínahya kjuít'a la kjuasáyé Dios la ko kjuachaxin kuente ch'án mé kjuítōxīnhin tí kjuenkayáxian, na mé chónkóhya kuíkonōana ch'án, kixin tjetóxin kjuít'a xra la kaín sín la kánhyó. Kjánchó jehya janhan kjuít'a xra. Náhi. Dios kjuínkítsana ch'án kjuít'a xra. ¹¹ Kjánchó tjetuanhya á janhan o á jehe sín kjuako sín, kixin xíkaha tí itan kjuakoni, a ntá kuítekáonrá.

Tsoxechón tí sín tsík'en

¹² A ntá tí tjakoni kixin Cristo la xechón, ¿ntá nkekuènte ntáchrorá jnkójínrá kixin tsoxechónhya chojni tsík'en? ¹³ Tí chrókóchaxín tí nkehe ntáchrorá kixin tsoxechónhya chojni tsík'en, ntá kjaxin chróxechónhya Cristo. ¹⁴ A ntá tí chaxínhya xechón Cristo, ntá chónkó tí nkehe tjakoni la ko ninkehó sínkíhya la ko chónkó tí nkehe kuítekáonrá. ¹⁵ A ntá tí chaxínhya xikaha tsíkónhen, la jeheni la ijnko chojni ntoáhya chrónka kuènté Dios, kixin ó chrónkani kixin Dios kjuínchexechón Cristo. A ntá tí chrókóchaxínhya kixin chróxechón Cristo, ntá kjaxin chrókóchaxínhya kixin chróxechón chojni tsík'en ¹⁶ kixin tí chróxechónhya tí chojni tsík'en, ntá kjaxin Cristo chróxechónhya ch'án. ¹⁷ A ntá tí Cristo chróxechónhya ch'án ntá chrókóchónkó tí kuítekáonrá tí jehe ch'án kixin naxa chrókjuinhya tí ijjárá. ¹⁸ La ko tí chrókóchaxín tíha ntá chrók'uitjáyán tí sín kuítekaon Cristo ik'uén sín. ¹⁹ Méxra tí chrókuinkáchónkini Cristo kixin chrókjuinkitsa ch'án tí jeheni chjasintajni ntihyó, ntá kohya chojni chrókóyóhę tí jeheni, imá chrókónðéni chrók'uejóni kaín ni.

²⁰ Kjánchó náhí, la chaxín ó xechón Cristo. Jehe ch'án éxí tí nkehe tsík'óna saxín kixin jehe ch'án saxín xechón ch'án. ²¹ Méxra jnkokóá chojni ntoa kjuankíxin kjuasin jje, ntá kjuankíxin k'uén kaín xín chojni chjasintajni, la ko kjaxin jnkokóá chojni ntoa xechón, ntá xikaha tsoxechón kaín chojni tsík'en. ²² Kixin tí jje kjuasin ch'ín Adán ntá kaín xín chojni sí'tenxín sín. A ntá Cristo la kaín ni tsochóntaxínni kjuachón. ²³ Jnkójnkoni éxí tsonhenni tocar, na mé saxín xechón Cristo, a ntá chr'éxin tíó tsokjan ch'án ntá tsoxechónni kaín ni kuítekaonni tí jehe ch'án. ²⁴ A ntá ó tsi yaon tsjixixín ntá sinchek'itjáyán Cristo kaín xín nkehe t'etóan la ko kaín xín kjuachaxin ókjé, ntá tsjanjon ch'án tí xra t'etóan kixin ts'áyéhę It'é ch'án Dios. ²⁵ Na mé t'ichjánxin ts'etóan Cristo tsjixrakájia tí yaon tsjachahya tí sín nínkakonhen ch'án. ²⁶ A ntá tí nkehe tsjixixín ts'itjáyán la mé tí kjuach'én. ²⁷ A ntá Dios kjuanjón kjuachaxín kixin kaín nkehe síín mé chrók'uetuēnhen Cristo. † Kjánchó tíó xikaha ntáchro tí xroon itén Dios tsíkjin sín ósé kixin kaín xín nkehe mé ts'etuēnhen ch'án, ntá ó noheni jína kixin jehya kixin Dios la chrók'uituēnhen ch'án inaá. Náhí. Jehe ch'án mé chjéhe Xjeen ch'án kaín kjuachaxin ts'etuēnhen ch'án kaín xín nkehe. ²⁸ A ntá tíó tsjixín tsjacha Cristo ts'etuēnhen ch'án kaín xín nkehe, ntá Cristo, mé tí Xjeen Dios, la kjaxin sinchexiteyéhę ch'án It'é ch'án Dios kixin ntá Dios mé ts'etuēnhen ch'án kaín xín nkehe.

²⁹ A ntá í jnko nkehe, la iso sín tikiteyákonhen tí sín tsík'en. ¿Nkekuènte xikaha ch'e sín tí titekakonhya sín kixin tí sín tsík'en tsoxechón sín inaá?

³⁰ A ntá tí xikaha, ¿nkekuènte kixin kaín yaon kjuaxróxinhya tjejóni nínkakonhenni chojni? ³¹ A ntá kichó ni, kaín yaon síín kjuachrakon chrók'uén janhan. Chaxín tíhi, kjánchó chàna kixin jahará kjaxinrá tin-

† Salmo 8.6

kachónkirá Ìnchéni Jesucristo. ³² Kjonté kónínkakonna chojni chjasin Éfeso éxí iko jjehe la kjonté kjuak'é ntiha, ¿la ntá nkehe chrókjuacha tí janhan tí chrókóchaxínhya chróxechón chojni tsík'en? Tí xikaha la ó nchoxon tí nkehe ntáchro tí sín titekakonhya Ìnchéni kixin chrókjóne sín la ko chrók'ui sín kixin ijje la o ntóye chrók'uen sín.

³³ Chrókujtoéhyará chrokjuít'áyahará sín. Éxí ntáchro sín kixin: "Tí chrók'uejókotoxínni chojni jínahya ntá chrók'uitjáyán tí nkehe jína tjenkayáxinni." ³⁴ Chrókjanrá ntja jína ntoá la chrókjuásinhyará jje. Méxra isorá naxa chonhyará Dios. Na mé ntáxrjan tíhi kixin chrókó-suàhará.

Nkexrí tsoxechón tí sín tsík'en

³⁵ Kjá jnkójínrá tsjanchankínará kixin: "¿Nkexrí tsoxechón tí sín tsík'en la ko nkexrí tsotsjehe tí cuerpo tsochónta sín?" ³⁶ Lontjirá tjanchankínará xikaha. Tí noatje t'enkanı nonte t'ichjánxin its'en ts'itjáyán kixin tsjak'echón tí nkehe ts'ayan. ³⁷ Tí nkehe t'enkanı la jehya tí ka a. Náhí. Tí nkehe t'enkanı la noatrigó o í jnko tje. ³⁸ Kjánchó Dios kjuanjón kjuachaxin kixin jnkójnko nta ts'óna éxí tjinkaon ch'án, la ko jnkójnko nta tsochónta tje kuènte. ³⁹ A ntá jehya kaín tí cuerpo la jnkokon. Náhí. Ijnko la cuerpo kuènte chojni, la ko í jnko la cuerpo kuènte ko, la ko í jnko la cuerpo kuènte koxroxe, la ko í jnko la cuerpo kuènte koche. ⁴⁰ Na mé kjaxin xikaha síín cuerpo kuènte tí sín ángel tjejó nkaya nkajní la ko síín cuerpo kuènte chojni tjejó chjasintajni. A ntá tí cuerpo kuènte tí sín ángel la náxrjón tsjehe la ko kjaxin tí cuerpo kuènte tí chojni la náxrjón tsjehe, kjánchó ókjé nkexrí tsjehe. ⁴¹ Ókjé nkexrí t'inkaséyanxín tí yaon la ko ókjé nkexrí t'inkaséyanxín tí nitjó la ko kjaxin konotsé la ókjé nkexrí t'inkaséyanxín la ko kjonté itsje konotsé la ókjé t'inkaséyanxín jnkójnko. ⁴² Kjaxin xikaha tsonhen tí chojni tsík'en tsoxechón sín. Tí nkehe tsoxravá la mé ijnko nkehe tsotje, a ntá tí nkehe tsoxechón la mé ijnko nkehe ts'itjáyánhya. ⁴³ Tí nkehe tsoxravá la ijnko nkehe náxrjónhya tíha, la ntá tí nkehe tsoxechón la ijnko nkehe imá náxrjón. Tí nkehe tsoxravá la ijnko nkehe chónthahya kjuachaxin, la ntá tí nkehe tsoxechón la ijnko nkehe tsochónta kjuachaxin. ⁴⁴ Tí nkehe tsoxravá la mé cuerpo kuènte chojni chjasintajni ó. La ntá tí nkehe tsoxechón la mé cuerpo antsí tsochónta kjuachaxin kuènte Nchakuen Dios. A ntá tí chóntani cuerpo kuènte chojni chjasintajni ó na mé kjaxin tsochóntani cuerpo antsí tsochónta kjuachaxin kuènte Nchakuen Dios.

⁴⁵ A ntá éxí ntáchro tí xroon itén Dios kixin: "Tí chojni ntoa k'óna saxín mé ch'ín Adán tíha mé k'uáyéhę ch'án kjuachón ó." †† A ntá tí ó kjuixixín ikui í jnko ch'ín éxí yóhę Adán, kjánchó jehe ch'án mé chónthahya ch'án nchakuen tjanjon kjuachón. ⁴⁶ Kjánchó jehya saxín k'óna tí cuerpo antsí chónthahya kjuachaxin kuènte Nchakuen Dios. Náhí. Saxín k'óna cuerpo kuènte chojni chjasintajni ó, la ntá chr'éxin k'óna cuerpo antsí

†† Génesis 2.7

chóna kjuachaxin kuènte Nchakuen Dios. ⁴⁷ Tí nkexro k'óna sɔoxín la k'óna nche na mé kjuák'e ch'án chjasintajni ó. A ntá tí nkexro k'óna yóxin na mé nkaya nkajíní kuixín ch'án. ⁴⁸ Tí cuerpo siín chjasintajni mé yóhɛ tí cuerpo k'uéchóna tí nkexro tsík'óna nche. A ntá tí cuerpo siín nkaya nkajíní mé yóhɛ tí cuerpo chóna tí nkexro kuixín nkaya nkajíní. ⁴⁹ Éxí senó tóyóhɛni tí nkexro k'óna nche, ntá xíkaha chr'éxín tsoyóhɛni tí nkexro kuixín nkaya nkajíní.

⁵⁰ Ntá tsɔtjonkará nkehe, kíchó ni. Tí cuerpo k'óna nto la ko hueso chóntani jie xitjahya sátsjikoni tí tjen Dios t'ɛtoan ch'án. Na mé tí nkehe tsjeje xitjahya ts'áyéhɛ tí nkehe tsjejehya. ⁵¹ A ntá tsɔtjonkará ijnko nkehe ninkexró noehya, kixin kénhyani its'enni. Kjánchó kaín ni ts'ixitóxínhin tí cuerpo chóntani. ⁵² A ntá xrínahya titàya tjejóni ntá éxí chróchr'áton konni la ko chrókuakitjenkíni konni xíkaha tió tsjixixín tsinhinni tsontácho trompeta, la ntá kaín chojni tsík'en tsoxechón, í ts'enhya sín, la ko kjaxin jeheni kaín ni ts'ixitóxínhin tí cuerpo chóntani. ⁵³ A ntá tí cuerpo chóntani la tsjeje, ntá t'ichjánxín ts'inkáya nkehe chónhya tsjeje. La ko tí cuerpo chóntani la ts'en ntá t'ichjánxín ts'inkáya nkehe chónhya ts'en. ⁵⁴ A ntá tió tí cuerpo chóntani la tsjeje, na mé t'ichjánxín ts'inkáya tí nkehe chónhya tsjeje, la ko tió tí cuerpo chóntani la ts'en, na mé t'ichjánxín ts'inkáya tí nkehe chónhya ts'en. Ntá tí xíkaha na ntá tsoxiteyá éxí nixja tí xroon itén Dios ntácho kixin: "Tsjachahya tí kjuach'én la mé tsjacha tí kjuachón." ^{†55} "Jaha kjuach'én, ¿kjá tí kjuachaxin kuènta kixin chrókjuacha jaha? Jaha kjuach'én, ¿kjá tí kjuachaxin kuènta kixin chrók'oyánni?" ^{†56} Tí jie tjasin ni mé kuixín tí ts'enni. A ntá tí ley k'uɛtoan ósé antsí k'uíxixín jie. ⁵⁷ A ntá tjancheheni Dios kjuasáya kixin ichr'án ch'án Ìnchéni Jesucristo kixin táha mé tsaáxin ni.

⁵⁸ A ntá jahará kíchó ni, imá tjuahará. Chrókuitoéhyará tinkachónkirá Ìnchéni. Jnkochríxín chrókjuich'e-hérá Ìnchéni xrá antsí jína kixin ó nohará jahará kixin tí xrá ch'eheheni Ìnchéni jehya chónkó tíha.

Tí ofrenda tjenájín sín tsochr'énhen sín tí sín tjejó chjasin Jerusalén

16 A ntá tí chichaon tjenájínrá kixin tsjínkĩtsará tí sín kíchó ni tinkáchónki Ìnchéni na mé chrókjuich'erá éxí kuétuənhən tí sín njnko estado Galacia. ² Jnkojnko domingo jnkojnkorá chrókuakit-sjentehérá nkerí síká chichaon kjuachará tí semana kjuich'erá xrá kixin t'ichjánxínhya chrókjuasánjia janhan ntá chrókjuénájínrá chichaon. ³ A ntá tió tsjasán janhan tsétuənhən tí sín tsjéyará kixin sátsji sín chjasin Jerusalén, na ntá tsokjian xroon tsjikoxín sín tí chichaon tsíkjenájínrá tsjikaán tí sín kíchó ni ntiha. ⁴ A ntá tí chrókójína kjaxin janhan sáchrókjuiyá, a ntá sáchrókjuíkian tí jehe sín kjaxin.

Tjenkayáxin ch'ín Pablo nkexrí sátsji ch'án

⁵ Tí sátsjia la t'ichjánxín ts'atsínka janhan estado Macedonia ntá chr'éxín tsjasán ntiha chjasin Corinto. ⁶ Ach'e ntahó chrókuitona chrók'uatínkajia nchakuen kin. A ntá jahará chrókjuínkĩtsará tí janhan tió sátsjia ókjé chr'éxín. ⁷ Méxra tjínkəkonhya chrók'uatínkoá chrótsjahará ó. Náhi. Tjínkəvan chrókuitona iso yaon tí tjejórá ntiha tí Ìnchéni chrókjuanjon kjuachaxin. ⁸ Kjánchó tsitona chjasin Éfeso tsjixrakájia yaon Pentecostés, ⁹ kixin ntiha antsí chonta kjuachaxin chrókjuít'a xrá kuènte Ìnchéni la ko jína chrókónhen tí xrá kjónté nchónhya chojni nínkakonna.

¹⁰ A ntá tí tsjiji ch'ín Timoteo ntiha la antsí jína chrónixjehérá ch'án kixin kjuaxróxin chrók'uejokoará ch'án kixin jehe ch'án kjaxin ch'ehe Ìnchéni xrá éxí janhan. ¹¹ Kaín tí jahará chróchonteherá ch'án kjuasáya. Tjínkĩtsará ch'án kixin jína itsi ch'án ntiha tsitsjehe ch'án tí janhan kixin tjéchnəhən chrókui ch'án la ko tí í so sín kíchó ni.

¹² A ntá tí kíchó ni Apolos la imá xrjanóəhə ch'án kixin kjaxin chrókjuijiko ch'án tí í so kíchó ni, kjánchó tjínkəkonhya ch'án jie. Chr'éxín tsjiji ch'án tió ts'ixranka.

Kjuixixín nixja ch'ín Pablo

¹³ Chrókjuenkayáxinrá la ko chrók'uejotsjehérá. Chróchrakonhyará la ko chrókuitoéhyará tí tinkachónkirá Ìnchéni. ¹⁴ Kaín nkehe chrókjuich'erá la koí chrótjuèhérá kichuárá.

¹⁵ Na ntá kíchó ni, ó nohará kixin tí sín kjéhya ch'ín Estéfanos sɔoxín kuinkáchónki sín tí tan tsaáxin chojni tí estado Acaya, la ko jehe sín kuákja sín xrá a tjínkĩtsa sín tí sín kíchó ni tinkáchónki Ìnchéni. ¹⁶ Tjínkəvan kixin chrókjuínchexiteyéhérá tí sín tjínkĩtsa éxí tí jehe sín la ko kaín tí sín ch'e xrá. ¹⁷ Chàna kixin ó kui ch'ín Estéfanos la ko ch'ín Fortunato la ko ch'ín Acaico, kixin jahará kjónté tjejóhyará. ¹⁸ A ntá jehe sín kjuínchechéhe sín əsenná éxí kjuínchecháhará sín. Chróchonteherá kjuasáyé chojni xíkaha.

¹⁹ Tí sín tójnkotsé estado Asia xraxinkaon sín tí jahará. Kjaxin ch'ín Aquila la ko tjan Priscila la ko tí sín tójnkotsé ntəe sín ima xraxinkaon sín tí jahará kixin tinkachónkirá Ìnchéni. ²⁰ Kaín tí sín kíchó ni ntiha xraxinkaon sín tí jahará. Nixjehérá kichuárá kaín rá tsehérá tja kichuárá jnkojína.

²¹ Janhan Pablo xráxinkəvan tí jahará ikjian xroon chr'anhánrá la tjaná kjínxiən tí letra i.

²² Tí nkexro tjuèhya Ìnchéni Jesucristo la tsjasóte. A ntá jeheni, la Ìnchéni xrákiá.

²³ A ntá kjuasáyé Ìnchéni Jesucristo mé sintayaonrá ch'án. ²⁴ Tjuahará kaín rá kixin kaín ni tinkáchónkini Cristo Jesús. Amén. Ó tjen.

2 CORINTIOS

1 Janhan Pablo mé kjueyána Dios kixin sít'aha Ìnchéni Jesucristo xra, la ko kichó ni Timoteo ikjin- ni tí xroon i chr'ánhanráni tí jahará njnkoq Dios chjasin Corinto la ko kaín tí í so kichó ni tinkáchónki Ìnchéni tjejorá nkuíxín estado Acaya. ² Kjuasáyé It'éni Dios la ko Ìnchéni Jesucristo chrókjuintayaonrá ch'án la ko chrótjáhará ch'án kjuaxróxin.

Tí kjuasóte ch'ín Pablo

³ Tjancheheni kjuasáyé Dios It'é Ìnchéni Jesucristo. Jehe It'éni mé tikonóeheni ch'án la ko xráxin nchechéheni ch'án. ⁴ Jehe ch'án mé nchechéhe ch'án kaín tí jeheni tió tsi ijnko kjuaxróxinhya kixin ntá ts-jachani sinchechéheni í so chojni kjuaxróxinhya ts'at-sínka sín éxi yóhe jehe ch'án kjuínchechéhe ch'án tí jeheni. ⁵ Mé xikaha tjejtjasóteni éxi yóhe kjuasóte Cristo ntá kjaxin jehe ch'án imá sinchechéheni ch'án kixin tinkáchónkini ch'án. ⁶ Tjejtjasóteni kixin tí jahará chrókóchàxinrá la ko chrókuaáxinrá. A ntá Dios nchechéhe tí jeheni kixin kjaxin jahará chrókócháhará kixin ntá chrókjuachará kjónté chrókjuasóterá éxi tjasóteni jeheni. ⁷ Na mé ó noheni kixin chaxín ntoá tinkachónkirá Ìnchéni kixin ó noheni kixin jnkokón tjejtjasóteni kaín ni ntá kjaxin jnkokón sinchechéhe Dios tí jeheni kaín ni.

⁸ Kichóni, tjinkaonni kixin chrókónohará kixin nkexrí imá kjuasóteni tí k'uéjóni tí estado Asia. Imá náxrjónhya kjuasóteni la chrókjuachahyani, la k'uitjáyenhenni tí tjenkayáxinni kixin chrók'uaxrjexinni ntiha naxa chrók'uejóhónni. ⁹ Ó kónoheni kixin chrók'uenxinni ntiha. Mé xikaha kónhenni kixin chrókónoexinni kixin tí jehóni la chrókjuachahyani tíha. Náhí. Chrókuinkáchónkini Dios, mé tí nkexro nchexchón chojni tsík'en. ¹⁰ Jehe Dios mé kjuínchekaáni ch'án la ko naxa sinchekaáni ch'án kixin tí nchónhya nkehe chrók'uenxinni. Méxra ó noheni kixin chaxín jehe ch'án sinchekaáni ch'án ¹¹ tí tjínkjsaráni tjanchehéra Dios kixin tsjinkjtsani ch'án. A ntá tí tsjé chojni chrókjuanchehe Dios kixin tsjinkjtsani ch'án ntá chr'éxin itsjé chojni tsjanchehe sín ch'án kjuasáyé kixin xikaha jehe ch'án kjuínkjsani ch'án.

Nkeuènte sákjuíhya ch'ín Pablo tí chjasin Corinto

¹² Chéheni kixin noheni kixin ntoá k'uéjóni ntihi chjasintajni kjuích'iyehyani chojni, mé xikaha k'uéjókoaráni. Ntá jehya kjuachaxin kuènteni kjuachaxinni xikaha. Náhí. Kjuachaxin kuènte Dios mé kjuínkjsani kixin xikaha k'uéjóni. ¹³ Tió chr'ánhanráni

xroon, kjinhyani nkehe chrókiénxinhyará. Náhí. Jehó tí nkehe chrókjuínchekuáxinrá chrókiénxinrá. Tjéchonhan kixin chrókiénxinrá jína. ¹⁴ A ntá ó tinkakiénxinrá ntsí kixin tió tsokjan Ìnchéni Jesús tsqcháhará kixin xikaha kjuakqoharáni jeheni la ko kjaxin tsqchéheni kixin jahará kuítekáonrá.

¹⁵ Mé xikaha kjuenkayáxian kixin saoxín chrókjuasántsahará tí jahará kixin chrókócháhará kixin yáya chrókjuasántsahará. ¹⁶ Kjuenkayáxian janhan chrókjuasántsahará saoxín tió sáchrókjuia estado Macedonia la ko chrókjuasántsahará inaá tió chrókjanxian ntiha. Mé xikaha chrókjuínkjsarána tió sáchrókjuiyá janhan estado Judea. ¹⁷ ¿Á tjenkayáxinrá kixin ntoáhya kjuenkayáxian chrókjuasán ntiha ní? ¿Á tjenkayáxinrá kixin iyó nkehe kjuenkayáxian kixin jnkokqá chróntáxrjan kixin chrókjuasán la ko chrókjuasánhya? ¹⁸ Méxra tjetsjehe Dios kixin xikahya kjuáteheni tí jahará kixin chrókjuíjini la ko chrókjuíjinyani. ¹⁹ Kixin Cristo Jesús mé Xjeen Dios, na mé tí nkexro kjuakqoxin ch'ín Silvano la ko ch'ín Timoteo la ko kjuakqoxian janhan tí k'uéjóni ntiha, mé xikahya k'uéchronka ch'án, kjuích'iyahya ch'án ninkehó. Náhí. Kaín nkehe tjakoni kuènte Cristo la chaxín tíha. ²⁰ Kixin kaín nkehe tsíchronka Dios la mé jehe Cristo kjuínchexiteyá ch'án. Mé xikaha tió tjancheheni Dios kjuasáya la mé ntáchroni "Amén, ó nchoxon" kixin tí kjuachaxin kuènte Cristo Jesús. ²¹ A ntá Dios mé kjuínkjsa ch'án tí jeheni la ko tí jahará kixin kaín ni ntoá chrókuinkáchónkini Cristo la ko jehe ch'án mé kjueyáni ch'án. ²² Kjaxin jehe ch'án tsíkjinchekani ch'án xroye, na mé kjuanjon ch'án Nchakuen ch'án tsochón-ta asénni senó kixin tsoñoexinni kixin chaxín ts'áyéheni nkehe chr'éxin.

²³ A ntá tí naxa kjuasánhya janhan chjasánrá Corinto éxi kjuenkayáxian la tjetsjehe Dios kixin tjínkqonhya kixin chrókóxakonhanrá tí chrókjuéntuáhárá tí jahará inaá. ²⁴ Jehya kixin chrókuétuánhanrá kixin nkexrí chrókuinkachónkirá Ìnchéni kixin ó nòna kixin ntoá tinkachónkirá ch'án. Ó jehí tjinkaonni chrókjuínkjsaráni kixin antsí má chrókócháhará.

2 Mé xikaha kjuenkayáxian kixin chrókjuasánhya janhan ntiha inaá tí naxa xrásinrá kjuanínkaon. ² A ntá tí naxa chrókjuíntak'ávárá, ¿a ntá nkexro chrókjuínchechána inaá tí chrókjuínchechánahyará jahará kixin janhan kjuíntak'ávárá? ³ Mé xikaha ikjian tí xroon chr'anhanrá senó kixin tjínkqonhya chrókjuasán chrókjuínchekóxakonhará inaá. Náhí. Jahará chrókjuínchecháhará. Méxra ó nòna kixin tí chrókóchána janhan ntá chrókócháhará kaín rá.

⁴ Kjánchó tió ikjian tí xroon a chr'anhánrá senó la imá kóxakonhen asenná tsjanka kjaxin. Kjánchó jehya kixin ikjian tí xroon a chr'anhánrá kixin chrókjuintak'ávará. Náhí. Ikjian tí xroon chr'anhánrá kixin chrókónoaxinrá kixin imá tjuahará tí jahará.

Ch'ín Pablo chrókjuinçek'itjáyenhen ch'án tí jie kjuasin tí nkexro a

⁵ A ntá tí nkexro kjuínchexakonna la jehya janhvàn kóxakonna. Náhí. Kaínrá kóxakonhanrá. Kjánchó tjínkakonhya tjetóxin tsontáxrjan tíha. ⁶ Na mé itsjé tí jahará nixjehérá ch'án kóyakoterá ch'án kixin chrókjuasinhya ch'án jie xikaha la táhó la ó tjen. ⁷ Ntá jie chrók'uitjáyanhanrá tí jie kjuasin ch'án, chrókjuinkitsará ch'án, kixin tí náhí la ts'itjáyanxín ch'án tí kjuancheníhi. ⁸ Méxra xrxanóahará kixin chrókjuákoxinrá inaá kixin chaxín tjuéhérá ch'án. ⁹ Mé xikaha senó ikjian xroon chr'anhánrá kuènte tí kjuanínkaon chontará kixin tsononaxian á chrókjuínchexiteyànará kaín nkehe chrókuétuaghánrá. ¹⁰ A ntá tí sinçek'itjáyenhenrá ijnko chojni ichrén jie kjuasin ch'án ntá janhan kjaxian sintak'itjáyanhan ch'án tí jie kjuasin ch'án. Méxra tí chaxín k'ué ichrén jie chrókjuintak'itjáyanhan ijnko chojni la ó kjuixin kjuintak'itjáyanhan ch'án tí jie a kixin chrók'uejorá jnkojína. Kjaxin xikaha tjetsjehe Cristo, ¹¹ kixin ntá tí ch'ín Tsochren na tsjachahya ch'án tsjachroe ch'án tí jeheni, kixin ó noheni nkexrí ch'ia tí ch'ín Jínahya.

Kóxakonhen ch'ín Pablo tí kjuák'e ch'án chjasin Troas

¹² A ntá tió kjuasán tí chjasin Troas chrókjuákua tí tan jína kuènte Cristo la antsí xránjon kjuachaxin kixin chrókónhen xra kuènte Ìnchéni. ¹³ Kjánchó náxrjónhya tjen asenná kixin k'uitjahya tí kichó ni Tito. Ntá tuénxín níxjahá tí jehe sín tjejó ntiha ntá sákjuia tí estado Macedonia.

Ntá ó tsjacha sín tsochónta sín kjuachaxin kuènte Cristo

¹⁴ Kjuasáyé Dios kixin xráxín jehe ch'án tjinkitsani ch'án ntá tjachani kixin chóntani tí kjuachaxin kuènte Cristo Jesús. Ntá kaín nketí sáchrókjuini mé tjákoxinni tí tan kuènte ch'án éxi ijnko nkehe xraxé náxrjón chrókóxrjínhjn kaín xín chojni. ¹⁵ Kaínni la éxi yóhe tí xraxé náxrjón kuènte chjincó chrókjuanjon Cristo chrók'uáyéhe Dios kixin tíha mé chrókónoexín tí sín tsaá la ko kjaxin chrókónoexín tí sín ts'itjáyan. ¹⁶ Tí sín ts'itjáyan mé tókaxraxéhe sín éxi ts'enxín sín tí xraxé a. A ntá tí sín tsaá mé tóxrjínhjn sín kixin ijnko nkehe tsjanjon kjuachón tíha. ¿Xá nkexro chrókjuacha chrókjuich'e tíha? ¹⁷ A ntá jeheni mé xrinçekjihyani nkexrí nixja itén Dios éxi ch'e nchónhya chojni chrókjuacha sín chichaon. Náhí. Kaín asenni tjakoni itén Dios kixin kjueyáni ch'án sich'eheeni Cristo xra, la ko tjetsjehe ch'án tí xra tjejóch'eni.

Tí pacto nixin

³ A ntá xikaha ntáchroni, ¿á tjenkayáxinrá kixin kjuankixinni tsochronkani inaá kixin jína tí jeheni, ó á t'ichjánxin kixin chrókjuijikoni xroon kixin tsonoaxinrá kixin jína tjakoni? ¿Xá t'ichjánxin kixin chrókjuanchaharáni ijnko xroon tsochronka kixin jína tjakoni? ¿Xá t'ichjánxin kixin chrókjuanchaharáni ijnko xroon tsochronka kixin jína tí jeheni éxi ch'e í so sín? ² Náhí. T'ichjánxienhyani nijnko xroon kixin jahará mé éxi yóhe ijnko xroon tsíkjinni xrikoni chróchóxin la ko chrókjuinçekuáxin kaín xín chojni tsonoexín sín kixin jeheni mé ch'eheeni Cristo xra. ³ T'ikon sín noxín kixin tí jahará mé éxi yóhe ijnko xroon tsíkjín Ìnchéni Cristo xrikoni nchekuáxin chojni. Kjánchó jehya ntáhni tsíkjínxin ch'án. Náhí. Kjuanjon ch'án Nchakuen ch'án tjechón chontará la kjaxin jehya xrotabla tsíkjín ch'án. Náhí. Táha la asén chojni.

⁴ Ntá ó noheni chaxín tíhi kixin tinkáchónkini Dios kixin tjinkitsani Cristo. ⁵ Jehya kixin ó jehí chróchóntani kjuachaxin kixin chrókjuich'eni xra. Náhí. Kaín tí xra ch'eni na Dios tjetjanjon kjuachaxin. ⁶ Jehe ch'án mé kjuanjon ch'án kjuachaxin kixin chrókjuich'eheeni ch'án xra tsochenkani chojni tí tan nixin kui. Tíha jehya ijnko nkehe tsíkjín chojni chrókjuinçekiteyéhéni. Náhí. Tíha mé kjuachaxin kjuanjon Nchakuen Dios kixin sinchexiteyéhéni ch'án. Kixin tí ley ntáchro kixin its'en chojni. Kjánchó tí Nchakuen Dios la mé tjanjon kjuachón.

⁷ Tí ley tsík'óna letra xrotabla mé imá kuikao t'inkaséyan la mé kjuachahya tí sín israelita chrókomá sín ikon ch'ín Moisés kixin imá tjákinni tsjehe ikon ch'án. [†] Kjánchó tí t'inkaséyan kjuankixin ó tinkák'anka. Méxra tí xikaha tí ley tjanjon kjuach'én mé kuikao ijnko t'inkaséyan imá náxrjón. ⁸ ¿á chrókójehya kixin antsí má t'inkaséyan kuikao tí tan nixin kuixín kjuachaxin Nchakuen Dios? ⁹ Méxra xikaha tí ley k'uéchónta kjuachaxin jie kjónté ntáchro kixin its'en chojni, a ntá antsí má jína tí tan chrónka Dios kixin tsotjuáxin tí jie chóntani. ¹⁰ Méxra tí kjuachaxin k'uéchónta tí ley k'uék'etóan ósé la ninkehó tóyóehya tí kjuachaxin jie tjen jie. ¹¹ A ntá tí k'uéchónta kjuachaxin tí nkehe séhyó ntá tinkákjeje, a ntá antsí má chónta kjuachaxin tí nkehe tsjak'e jnkochrín.

¹² Mé xikaha tí nkehe tsjejehya tjejóchónhenni ntá chrakonhyani chronkaxinni kaín tíha. ¹³ Ch'ehyani éxi kjuich'e ch'ín Moisés k'uikjèxin ch'án ka ikon ch'án kixin tsonoehya tí sín israelita kixin ó tinkákjeje tí t'inkaséyan chónta ch'án. ¹⁴ Kjánchó jehe sín naxa kienxínhya sín la ko naxa xikaha tjejó sín ijie tió nchekuáxin sín tí nkehe k'uítuenhen sín ósé kixin tí ka naxa t'inkákonhen tí chrókienxín sín kixin naxa kjuiinhyá tí ka. A ntá tí chrókuinkáchónki sín Cristo la ntá jehe ch'án chrókjuatsen tí ka a. ¹⁵ A ntá kjónté jie tió nchekuáxin sín tí xroon tsíkjín ch'ín Moisés la tjejó sín éxi naxa t'inkákonhen tí ka a kixin tienxínhya sín. ¹⁶ A ntá tió ijnko chojni tsjankixin tsinkáchónki Ìnchéni ntá tí ka t'inkákonhen la tsjin. ¹⁷ A ntá Ìnchéni mé

† Éxodo 34.29-35

Nchakuen Dios tíha. A ntá tí tjen Nchakuen kuènte Ìnchéni Dios la ntiha kohya nkehe ts'inkákonhèn. ¹⁸ A ntá jeheni kaín ni kohya nkehe t'inkákonhèn ikonni la mé tjejóni éxí xroséntá tjákini tí kjuachaxin kuènte Ìnchéni, na mé tinkák'ixitóxin tí kjuaxrexinkaon kuènténi kíxin ántsí chrókóyóhèni éxí tí jehe ch'án kíxin ántsí tsochóntani tí kjuachaxin kuènte ch'án, kíxin Ìnchéni, na tí Nchakuen a, mé xíkaha ch'e xra.

4 Méxra xíkaha chrókóxrjéhyani chrókjuich'eni tí xra kjuanjon Dios kíxin jehe ch'án kuíkonóhèni ch'án. ² Ó kuítóhèni kaín nkehe imó la ko kaín nkehe chrókósuèxinni, la ko ch'iyehyani kíchó ni, la ko tjitoxjenhyani itén Dios. Náhí. Jehí tí nkehe ntoá chrónkani. A ntá xíkaha chrókónoèxín kaín xín chojni kíxin ntoá tjejóni éxí tjinkaon Dios. ³ A ntá jeheni mé tjakoni tí itan tsaáxinni, kjánchó iso sín kjónté xíkaha tinhin sín mé tienxínnya sín kíxin xráxín jehe sín la ts'itjáyan sín. ⁴ A ntá jehe sín kuítekakohya sín, a ntá tí dios kuènte chjasintajni mé kjuínchek'ikonhya sín kíxin chrókienxínnya sín, kíxin ntá chrók'uikonhya sín tí t'inkaséyan kuènte tí tan kuènte Cristo, mé tí nkexro chóna kjuachaxin, a ntá jehe ch'án la mé yóhè éxí tsjehe Dios. ⁵ Tió tjakoni na mé jehya tjakoni kíxin jeheni chrókuitekáonrá. Náhí. Chronkaxínni kíxin chrókuitekáonrá Jesucristo mé Ìnchéni la ko chrónkani kíxin jeheni mé t'aharáni xra tsjinkítsani tí jahará kíxin tjuahará Jesús. ⁶ Na mé jehe Dios k'uetóan kíxin tí xrohi ts'inkaséyanxín tí sítié a na mé kjaxin jehe ch'án kjuanjon ch'án xrohi ts'inkaséyanxín nkaya asénni kíxin chrókjuachani chrókónoheni nkexrí tjen tí kjuachaxin jíe kuènte Dios t'inkaséyanxín Ìnchéni Jesucristo.

Nkexrí chrók'uejóni kíxin tinkáchónkini Ìnchéni

⁷ A ntá tí cuerpo kuènteni la yóhè ijnko ch'í tsík'óna nchetje tjinká nkehe tjete, mé xíkaha ts'ikon sín kíxin tí kjuachaxin jíe chóntani la kujxin tí tjen Dios kíxin jehya kuènteni tíha. ⁸ Chóntani nchónhya kjuaxikaon la kjónté tsjachahya tí kjuaxikaon a. Imá tóxakonhèni la kjónté títoehyani tinkáchónkini ch'án. ⁹ Kjónté chónkíhi sín tí jeheni kjánchó Dios la kuítóehya ch'án tí jeheni. Kjónté k'uékoni kjuítsínkani kjánchó kjuínchek'itjáyanhyani sín. ¹⁰ Kjónté nketí sájtini xráxín chrók'uenxínni éxí k'uénxin Ìnchéni Jesús, kíxin xíkaha tjákoxínni tí kjuachón chóna ch'án. ¹¹ Méxra jeheni naxa tjejóhónni la xráxín síin kjuaxikaon kíxin chrók'uenxínni kíxin tinkáchónkini Jesús kíxin kjaxin xíkaha chrókjuákoxínni tí kjuachón chóna ch'án kjónté chrók'uen tí cuerpo chóntani. ¹² Kjónté xíkaha chrók'uenxínni, a ntá jahará tsochontará kjuachón.

¹³ Éxí ntáchro tí xroon itén Dios tsíkjin sín ósè kíxin: "Kuítekavan ntá xíkaha xrjanka." [†] A ntá kjaxin jeheni kuítekaonni ntá xíkaha chrónkani. ¹⁴ A ntá ó noheni kíxin Dios mé tí nkexro kjuínchexechón tí Ìnchéni Jesús kjaxin sinchexechón ch'án tí jeheni koíni. A ntá jehe ch'án tsjiko ch'án tí jeheni la ko tí jahará kjaxinrá tí tjen Dios. ¹⁵ Kaín tíha kónhen kíxin jahará jína chrók'uejoxinrá. La ko kjaxin xíkaha nchónhyará chrók'uayéherá tí

kjuasáyé Dios, ntá ántsí tsjé chojni ts'ejóni ts-jancheheni Dios kjuasáyé kíxin tí kjuachaxin jíe chóna ch'án.

¹⁶ Méxra chrókóxrjéhyani kjónté tinkákjeje tí cuerpo chóntani kíxin ó noheni kíxin jnkojnko yaon Ìnchéni mé tjenchek'ánkí ch'án tí kjuaxrexinkaon kuènténi. ¹⁷ A ntá tí nkehe tjasótexínni tí tjejóni ntihi jie mé tíha la tjoka ts'atsínka la ts'áyèxinni ijnko nkehe imá jíe la ko í tsjejehya tíha. ¹⁸ Ntá chrókomáhyani tí nkehe síin chjasintajni ntihyó. Náhí. Chrókjuéyáni tí nkehe naxa t'ikonhyéni kíxin tí nkehe t'ikonxínni ikonni na mé nkehe chóxin tsjeje. A ntá tí nkehe t'ikonhyani mé nkehe tsjejehya.

5 A ntá ó noheni kíxin tió tsjeje tí cuerpo chóntani na mé yóhè éxí ijnko nchia tjoka tsjeje, a ntá Dios mé kjuích'éna jnkojnko nchia tjoka tsjeje, a ntá Dios mé jnkochríxín nkaya nkájni kíxin jehya tjá chojni kjuích'é-naxín tíha. ² Tí naxa chóntani cuerpoéni ntihi la náxrjónhya tjejóni tjinkaonni tí ókjé cuerpo tsochóntani nkaya nkájni ³ kíxin táha ts'inkáyani éxí ijnko ka, ntá xitjahya chrókótjóhínni. ⁴ Tí naxa tjejóhónxinni tí cuerpo chóntani jie la náxrjónhya tjejóni tjasóteni. Tjinkakonhyani xíkahó chrókuitóekoni tí cuerpoéni ntaxin, na mé tjinkaonni kíxin tí cuerpoéni ntaxin chrókónixín ó. Ntá chrók'uitjáyan tí chrók'uenxínni la ntá chrókuakjani tí kjuachón nixín. ⁵ Dios mé kjuenkayáxín ch'án kíxin xíkaha sinchekítóhèni ch'án ntá kjuínchekítóhèni ch'án tí Nchakuen ch'án kíxin ntá chrókónoèxínni kíxin chaxín ts'áyéhèni tí nkehe tsjanjon ch'án.

⁶ Mé xíkaha xráxín ó noheni kíxin tí naxa tjejóni ntihi naxa chóntani cuerpoéni ntá naxa tjejókohyani Ìnchéni. ⁷ A ntá jeheni tjejóni tinkáchónkini ch'án kjónté t'ikonhyani ch'án. ⁸ Kjánchó jeheni na imá chéhèni tjinkaonni chrókuítóhèni tí cuerpoéni chóntani jie kíxin sáchrókjuíni tí tjen Ìnchéni, chrók'uejókoni ch'án ntiha. ⁹ Méxra xíkaha tjinkaonni chrókjuinchechéhèni Ìnchéni kjónté naxa chróchóntani cuerpoéni ntihi la o í chróchóntahyani, la naxa chrókuinkáchónkini ch'án. ¹⁰ Kíxin kaín ni t'ichjánxin tsochjineheni Cristo tí tjen ch'án t'etóan ch'án kíxin nkehe ts'áyéhèni jnkojnkonni kíxin nkerí xra kjuích'eni á jína o náhí tí naxa k'uéchóntani cuerpoéni ntihi chjasintajni.

Tí tan tjanjon kjuaxróxin

¹¹ Méxra xíkaha noheni chróchrakonhèni tí kjuachaxin jíe kuènte Ìnchéni ntá tóxakonhèni tjákohe chojni kíxin chrókuinkáchónki sín ch'án. Ó nohe Dios kíxin nkexrí tjejóni la ko tjinkaonni kíxin kjaxinrá chrókónohará. ¹² Jehya kíxin chrótjonkará inaá kíxin jína ch'eni xra. Náhí. Jehí ntáchroni kíxin síin nkehe chrókóhàxinrá kíxin tí jeheni ntoá chrónkani kíxin chrókónohará nkexrí chrókjuátèherá tí sín imá nchehnke sín kíxin imá náxrjón nixja sín a ntá xraxinkakonhya sín tí jie chóna asén sín. ¹³ A ntá tí lóconi na mé tíha kíxin tjinkaonni chrókjuich'eheni Dios xra. A ntá tí jehya lóco tí jeheni la mé jehí tjinkaonni chrókjuinkítsani tí jahará. ¹⁴ Kíxin Cristo la imá tjehe

† Salmo 116.10

kaín xín chojni ntá t'etuñhenni ch'án kixin ó noheni jí-na kixin jehó ch'án k'uenyákonhenni ch'án tí ijjéni kaín ni kixin éxi kjaxinni ik'uénni kaín ni kixin jehe ch'án k'uenyákonhenni ch'án. ¹⁵ Mé xíkaha Cristo mé k'uenyákonhen ch'án kaín ni. Na ntá jeheni tjejóchónni mé tjejóchónxinni ch'án la jehya tí kjuaxrexinkaon kuènteni chrókjuinchexiteyéheni. Náhí. Chrókjuinchexiteyéheni ch'án kixin k'uenyákonhenni ch'án la ko xechón ch'án ínaa kixin tsaáxinni ch'án. ¹⁶ A ntá jie jeheni tjenkayáxinhanyi éxi tjenkayáxin chojni chjasintajni ó. Kjánchó senó k'uéchóxinni Cristo kixin nkexrí kjuák'e ch'án chjasintajni ó, a ntá jie la xíkaha t'ikonni ch'án. ¹⁷ Méxra tí nkexro tinkáchónki Cristo mé k'óna ijnko chojni nixin. A ntá kaín nkehe ntaxin la ó kjuixin k'uátsínka la ntá jie la kaín nkehe ó k'óna nixin.

¹⁸ Kaín tíha mé tí xra kjuích'e Dios. Jehe ch'án mé kjuanjon ch'án kjuaxróxin kixin jína chrók'uejókonni ch'án kixin k'uenyákonhenni Cristo. Ntá jie jeheni k'uáyéheni tí xra tsochénkani í so chojni kixin kjuaxróxin chrók'uejóko sín ch'án. ¹⁹ A ntá ó noheni kixin Dios ichr'án Cristo k'uenyákonhenni ch'án, ntá xíkaha Dios tjinkaon kixin kjuaxróxin chrók'uejóko ch'án tí sín chjasintajni, la ko jehe ch'án tahya ch'án kuentá kaín tí jie chóna chojni, a ntá jeheni k'uáyéheni tí xra tsjakoni itén ch'án. ²⁰ Ntá jeheni kjuachaxin kuènte Cristo chronkaxinni kixin Dios chrónóaxínrá ch'án tí jeheni. Mé xíkaha tí kjuachaxin kuènte Cristo chrónóaxínráni kixin kjuaxróxin chrók'uejókoaró Dios. ²¹ A ntá Cristo la ninkehó jie kjuasinhya ch'án, ntá ijjéni k'uénxin ch'án. Kjánchó Dios k'uíkon kixin éxi tí jehe Cristo chóna ch'án jie, kjuenkayákonhen ch'án kaín tí jie k'uéchóntani.

6 Ntá kaín ni jnkokóá ch'ehe Dios xra, ntá chrónóaharáni kixin chrókuitoéhyará tí kjuasáyé Dios kjuakuaxínrá ch'án. ² Kixin ntáchro xroon itén Dios kixin:

A ntá tí yaon kóxrjínhin Dios kuínhin ch'án tí nkehe chronòá chojni;

Tí yaon tsaáxin chojni mé kjuínkítsa ch'án tí jehe sín. † A ntá jie ó kui tí yaon kjueyá Dios. A ntá jie ó kui tí yaon tsaáxin chojni.

³ Ch'ehyani ninkehó nkehe jínahya kixin ntá chrók'uántaxínhin sín tí xra tjejóch'eni. ⁴ Náhí. Kaín nkehe ch'eni tjakoxínni kixin ch'ehe Dios xra. Na mé tjachani tóninkakonhyani kjónté nchónhya nkehe tjasótéxinni, la kjónté ichrén nkehe t'ichjánxinhinni, la kjónté ichrén kjuaxikaon síin. ⁵ Na mé k'uékonní, la k'uéjóchjinani, la nchónhya k'uíxite chojni kóninkakonhenni sín, la ko tí xra kjuích'eni la imá xra. Kjaxin k'uájuaahyani la ko kjónehanyi. ⁶ Tjakoxínni kixin tjóá tjenkayáxinni, la ko tjakoxínni kixin ó noheni tí nkehe chaxín, la ko tjakoxínni kixin tóninkakonhyani, la ko tjakoxínni kixin ch'eni tí jína. La ko chóntani Nchakuen Dios, la ko kaín asénni tjuèheni kichó ni, ⁷ la ko chrónkani tí tan ntoá kuènte Dios, la ko tjakoxínni kixin chóntani tí kjuachaxin kuènte ch'án. Ntoá tjejóni ntá xíkaha tsjachani ntá kohya nkehe tsonhenni. ⁸ Iso sín

náxrjón nixjehe sín tí jeheni la ko iso sín náxrjónhya nixjehe sín, la ko iso sín jína nixja sín nkexrí tjejóni la ko iso sín t'ántaxínhinni sín. Iso sín t'ikon sín tí jeheni éxi chojni ch'ia la ko iso sín ntáchro sín kixin jeheni chojni ntoá chrónka. ⁹ Iso sín ntáchro sín kixin chónhya sín tí jeheni kjónté chóxinni sín. Iso sín tjinkaon chrók'óyánni sín la kjónté naxa tjejóchónni. Kjuateni sín na kjónté k'óyanhyani sín. ¹⁰ T'ávani la kjónté xraxinkaonni kixin Ìnchéni t'ayakonhenni la chéheni. Éxi nòani jeheni na kjónté chénkani itsje chojni tí itén Dios tsaáxin sín éxi chróchjéheni sín ijnko nkehe imá tjehe xíkaha. Éxi chóntahyani ninkehó nkehe la kjónté la kaje nkehe chóntani.

¹¹ Kichóni tjejórá chjasin Corinto, ntoá chrónkani nix-jaharáni la ninkehó t'ayaharáni la mé kaín asénni tjuáhará. ¹² Jehya jeheni chrók'uitjáyan kixin chrótjuáhará. Náhí. Jahórá t'itjáyan kixin chrótjuèhéra tí jeheni. ¹³ Janhan xrjanóahará éxi ijnko it'é xjan chrónóehé tí xjeen ch'án kixin kjaxínrá kaín asánrá chrótjuèhéra tí jeheni éxi tjuèheni tí jahará.

Jeheni mé éxi njnke Dios tjechón

¹⁴ Chrók'uitohyará tí sín tinkáchónkihya Ìnchéni kixin tíha mé éxi yóhe ijnko yunta, jnkokónhya koxinta. ¿La ko nkexrí chrók'óyóhe ijnko chojni ó kótjóá la ko ijnko chojni naxa náhi? ¿La ko nkexrí chrók'óyóhe tí t'inkáséyan la ko tí sítié? ¹⁵ Xitjahya chrók'uixin kjuaxróxin tí tjen Cristo la ko tí Tsochren. Xitjahya ts'e-jóko kichó ijnko chojni tinkáchónki Cristo la ko ijnko chojni tinkáchónkihya. ¹⁶ Xitjahya chrók'uito tí njnke Dios la ko tí nkehe tsíkjanoya. Kixin jeheni mé tí njnke Dios tjechón, kixin jehe ch'án tsintáchro ch'án kixin:

Ntaha tsjak'é la ko xritjak'é tí tjejó tí jehe sín, a ntá janhan mé ts'óna Dios kuènte sín la ko jehe sín mé ts'óna chjasin kuèntana. ††

¹⁷ Méxra xíkaha kjaxin ntáchro Ìnchéni kixin: T'axrjekjanxínrá tí jehe sín na ókjé tjejórá; tsehyará tí nkehe tjuáhya.

A ntá janhan mé ts'ayáha tí jahará. ‡

¹⁸ Ntá janhan mé ts'óna It'ará,

a ntá jahará ts'ónará xjanna ntoa la ko xjanna chjin, ichro Ìnchéni Dios chóna kaín kjuachaxin. ††

7 Mé xixaha kichó ni, tí nkehe i mé tsintáchro Dios tsjanjon ch'án. Méxra t'ichjánxín kixin tjóá chrók'uejóni, chrókuítóheni kaín nkehe chrókjuinchekjita tí cuérpoéni la ko tí asénni. Ntá chrókóxakonhenni chróchrakonhenni Dios la t'ichjánxín chrókjuancheheni ch'án chrókjuinchetjóáni ch'án kixin jehó ch'án chrókuinkáchónkini.

Tí sín Corinto kjuitoxínhin sín ntje sín

² Chrókjuánjonrá kjuachaxin kaín asánrá chrókuinhínra tí nkehe chróchronkani. Ninkehó jie chóntehyani ninkexró, la ko kjuích'iyehyani ninkexró. ³ Jehya ntáchroni tíhi kixin chrókuékará jie. Náhí. Ó nohará

† *Isaias 49.8*

†† *Levítico 26.12, Ezequiel 37.27 ‡ Isaias 52.11 †† Oseas 1.10*

kixin ósé chrónkani kixin kaín asénni tjuèheni tí jahará kixin jnkokoá chrók'uejóni la ko jnkokoá chrók'uenni. ⁴Janhan la imá tjikosáyahará tí jahará la ko imá chàna kixin jína tjejórá. Kjónté kaín nkexrí tjejótjasóteni na imá chàna.

⁵ A ntá tió kjuíjini estado Macedonia la xitjahya chrók'ok'éheni kixin nkuixín siín chojni nínkakonnheni la ko kóxakonhen asénni. ⁶ Kjánchó Dios na mé tí nkexro nchechéhe asén kaín tí sín tsíkóxrjé mé kjuínchechéhe ch'án asénni kixin ó kjuíji ch'ín Tito. ⁷ Ntá jehya kixin tí kjuíji ch'án ó chrókóchéhinni. Náhí. Chéheni kixin jahará kjuínchechéhérá ch'án. Chrónka ch'án kixin imá tjinkáonrá chrók'uikonrá tí janhan la ko chrónka ch'án kixin tóxakonhanrá kixin tí jie kjuásinrá la ko kjaxin tóxakonhanrá chrókjuich'erá tí nkehe kuétuanhanrá. Mé kuínhan kaín tíha ntá antsí má kóchána.

⁸ Kjuíntak'ávára kixin tí xroon kjian chr'anhánrá la kjónté la ntá jie í tóxakonnahya. Na mé senó kóxakon na ntá k'uíkuān kixin tí xroon kjuíntaxakonhanrá kjánchó kánhyó isé tíha. ⁹ Ntá jie chàna, kjánchó jehya kixin tí nkehe kjuíntak'ávára. Náhí. Chàna kixin tí kjuat'ává a ntá ikjanrá kuinkachónkirá Dios. Kjuachará kjónté tí kjuat'ává ntá kjanrá kuinkachónkirá Dios la kóxrjínhin ch'án. Méxra xikaha jeheni la ninkehó nkehe jínahya kjuít'aharáni. ¹⁰ A ntá tí kjuat'ává kjuacha chojni ntá sinchechéhe sín Dios kixin kjuítóxinhin sín tí nkehe tjenkayáxin sín la ntá xikaha mé tsaáxin sín ntá ts'áváhya sín chr'éxin. A ntá tí sín kuítqehya tí nkehe kuènte chjasintajni mé t'ává sín kixin táhó ts'enxín sín. ¹¹ A ntá jahará kjuachará k'uátsínkará tí kjuat'ává éxi kóxrjínhin Dios, a ntá jie kónohará kixin jína tjejórá, la ó ntoá tjenkayáxinrá, ntá jie chrónkaxínrá nkexrí k'uékjich'erá. Tí nkehe kuinhínrá ntá kjuínchechónínkaonrá la ko kjaxin kjuínchechrakonrá. Ntá chr'éxin ntá tjinkáonrá chrók'uikonrá tí janhan. Ntá kjuíncheckjasóterá tí nkexro kjuasin jie. Kaín tíha kjuákoxinrá kixin chontahyará ninkehó jie tí nkehe tsíkónhen. ¹² A ntá tí nkehe kjian la jehya kixin kjuenkayáxian janhan kuènte tí ch'ín kjuasin jie, la ko jehya kixin kjuenkayáxian janhan kuènte tí ch'ín k'uává ó. Náhí. Íchá jína kixin jahará chrókjuákoxinrá nkayakon Dios kixin imá tóxakonhanrá kixin jeheni xikaha k'uetqanni. ¹³ Mé xikaha kjuich'erá ntá kóchéheni.

Kjánchó antsí má kóchéheni kixin k'uíkonni kixin kóchéhe ch'ín Tito kixin jahará kaín rá kjuínkítsará kixin kjuaxróxin kjuák'e ch'án ntiha. ¹⁴ Janhan k'uétjanka tí ch'ín Tito kixin chàna kixin tí jahará la jehya kjuach'ia tíha la kósuànahya. Náhí. Kaín nkehe k'uétjónkará la chaxín la ko kjaxin kaín nkehe k'uéntátjan ch'ín Tito la chaxín kixin chéheni kixin kuítekáonrá. ¹⁵ A ntá jie antsí tjuahará ch'án kixin xráxinkaon ch'án kixin nkexrí jína kuítekáonrá la ko nkexrí imá kjuíkosáyehérá ch'án kjuánjonrá kjuachaxin kuítqhe ch'án ntiha. ¹⁶ Ntá imá chàna kixin ó nõna kixin jahará sijnchexiteyànará.

Antsí má chrókjuínkítsa sín kichó sín

8 Ntá jie kichó ni, tjinkaonni chrókónohará kixin nkexrí tí sín tinkáchónki Ìnchéni tójnkotsé sín es-tado Macedonia kjuákoxin sín nkexrí tí kjuasáyé Dios. ² Kjónté nchónhya nkehe tsíkónhen sín la kjónté la kóchéhe sín; la ko kjónté nõda sín la antsí má kjuínkítsa sín tí sín í so éxi chojni chóna itsjé chichaon xikaha kjuich'e sín. ³ Chaxín k'uíkuān kixin kjuanjon sín éxi tí nkehe chóna sín la ko antsí má xíkjanjon sín inaá kixin xikaha kjuenkayáxin sín. ⁴ Nchónhya chrónóhehe sín tí jeheni kixin chrókjuanjonni kjuachaxin kixin chrókjuínkítsa sín tí sín kichó ni tinkáchónki Dios. ⁵ Na mé antsí má kjuanjon sín la xikahya kjuenkayáxinni kixin xikaha chrókjuanjon sín, na mé senó kuinkáchónki sín Ìnchéni, ntá kjuixin ntá kjuínchexiteyéhé sín tí jeheni éxi tóxrjínhin Dios. ⁶ Méxra chrónóhehe tí ch'ín Tito kixin chrókjuenájín ch'án chichaon tí tójnkotsérá ntiha éxi kjuankixin ch'án senó. ⁷ A ntá jahará la tjákoxinrá jína kixin antsí tinkachónkirá Ìnchéni, la ko antsí k'uitjará chrónkaxínrá itén Dios, la ko antsí k'uitjará nkehe kuènte Dios, la ko antsí chontará kjuachéhe, la ko antsí tjuéhérá tí jeheni. Méxra xikaha antsí chrókjuákoxinrá tí xra jína chrókjuínkítsará tí sín kichó ni.

⁸ Jehya ntáxrjan tíhi kixin chrókuétuanhanrá xikaha. Náhí. Jehí tjínkavan chrókónohará nkexrí jína kjuich'e tí í so sín kixin kjaxinrá chrókjuákoxinrá kixin tjuéhérá kichuára. ⁹ Kixin ó nohará nkexrí tí kjuasáyé Ìnchéni Jesucristo kixin k'uéríko ch'án la ntá kónõda ch'án kixin imá tjuèhe ch'án tí jahará kixin tí kónóaxin ch'án mé jahará kórikóxinrá.

¹⁰ Méxra tsotjónkará tí nkehe tjenkayáxian janhan kuènte tí xra i kixin jahará tí nánó k'uátsínka kjuankixinrá kjuínkítsará kjuánjonrá nkehe, la mé jehya kixin ó jehí kjuínkítsará sín. Náhí. Kjaxin imá kócháhará kixin kjuínkítsará sín. ¹¹ A ntá jie chrókjuíntaxín chrókjuánjonrá éxi tí chrókjuachará chrókjuánjonrá éxi xrankixín tsíkateherá tsjínkítsará tsjánjonrá nkehe. ¹² Mé xikaha tí chaxín tjinkaon jnkojín chojni chrókjuanjon sín nkehe, ntá tsóxrjínhin Dios tí tjanjon sín tí nkehe chóna sín. Dios la tjanahya ch'án tí nkehe chónahya chojni.

¹³ Jehya kixin xikaha tí í so sín chrók'uejó sín jína kixin tí nkehe kjuínkítsará sín la ntá jahará chrók'uitjayan nkehe t'ichjánxinhanrá. Náhí. ¹⁴ Chrókójina chrókóyóhe chróchontará nkehe jnkokón. A ntá jie jahará chontará tí nkehe chónahya tí í so sín. A ntá í jnko yaon jehe sín tsochóna sín tí nkehe tsochontahyará. Chrókjuínkítsará tí sín chónahya kixin chróchontará nkehe jnkokón. ¹⁵ Éxi ntáchro xroon itén Dios kixin: "Tí sín kjuenájín sín nchónhya la mé xèhya sín ninkehó, la ko tí sín kjuenájín sín tsjéhya na mé kjónté tsjéhya la kjuacha tí nkehe kuicháxinhin kjuenájín sín." †

† Éxodo 16.18

Ch'ín Tito la ko tí sín k'uájiko ch'án

¹⁶ A ntá kjuasáyé Dios kixin kjuínchexraxinkaon ch'án tí ch'ín Tito ntá kóxakonhen ch'án éxí tóxakonna kixin tí jahará. ¹⁷ Ntá kóxrjínhín ch'án tí nkehe k'uetuēnheni ch'án, la ntá kjaxin jehe ch'án kóxakonhen ch'án kixin á jina tjejorá, ntá jehe ch'án tjinkaon ch'án chrókjuijtsjehe ch'án tí jahará.

¹⁸ Kjaxin k'uetuēnani sátsjikotoxin tí ch'ín Tito í jnko kichó ni, na mé kaín chjasin tí sín tinkáchónki Ìnchéni mé chóxin sín ch'án kixin tí xra jina tjech'e ch'án tjako ch'án tí tan tsaáxinni. ¹⁹ La ko kjaxin tí sín kaín tí njnko ntihi kjuéyá sín tí nkexro kichó ni kixin sátsjikotoxin ch'án tí jeheni tí xra sátsjikoni tí chichaon tsjikénneni tí sín nò. Na mé tí xra ch'eni kixin xikaha tsjikosáye-heni Ìnchéni la ko xikaha tjákoxin kixin tjinkaonni chrókjuinkitsani sín. ²⁰ Tjinkaonni kixin tsokohya nkexro chrók'uántaxínhinni kixin tí chichaon xrenájín kjuíjijikoni. ²¹ Méxra tjinkaonni chrókjuich'eni tí nkehe ntoá, jehya jehó tí nkehe chrókóxrjínhín Ìnchéni. Náhí. Kjaxin tjinkaonni kixin chrók'uikon chojni kixin jina tjejóch'eni.

²² La ko kjaxin k'uetuēnheni sín sátsjikotoxin sín í jnko kichó ni, na mé ijnko nkexro nchónhya nkexrí kjuákoxin ch'án kixin chéhe ch'án chrókjuínkítsa ch'án kixin itsjé xra kjuich'e ch'án. A ntá jie antsí má chrókjuich'e ch'án xra kixin chóxin ch'án tí jahará. ²³ A ntá jnkojin sín tsjančankí sín kixin nkehe tí xra ch'e ch'ín Tito la mé chenkará sín kixin jehe ch'án mé tjinkítsa ch'án tí janhan kixin xikaha tjinkítsa ch'án tí jahará. A ntá tí tsjančankí sín kixin nkehe tí xra ch'e tí í so kichó ni ntá chenkará sín kixin tí sín kaín njnko k'uetuēn sín kixin sátsji sín ntiha kixin mé xikaha tsjikosáyehe sín Cristo. ²⁴ Méxra chrókjuákoxin kixin chaxín tjuéhérá kichuárá kixin tsonohe tí sín kichó ni í so njnko la ko kjaxin tsonohe sín kixin chaxín chéheni kixin tí jahará.

Tí chichaon xrenájín tsjinkítsa tí sín kichó ni

9 A ntá tí xrenájín chichaon kixin tsjinkítsará tí sín kichó ni tinkáchónki Ìnchéni, la t'ichjánxienhya tsokjian xroon tsochr'anhánrá ² kixin xráxín kónona kixin jahará tjinkáonrá chrókjuínkítsará, na mé xikaha chàna la tjanca tí sín tjejó estado Macedonia kixin jahará chojni estado Acaya desde tí nánó k'uátsínka xráxín tjejorá tjinkáonrá chrókjuínkítsará. A ntá antsí tsjé sín estado Macedonia tjinkaon sín chrókjuinkítsa sín kixin jahará xikaha kjuákoxin nkexrí tjinkáonrá chrókjuínkítsará. ³ A ntá ich'an tí sín kichó ni kixin tjínkavan kixin tsontáchrohya sín kixin chaxínhya tí nkehe jina ntátjan sín senó. Mé xikaha jahará chrókóyaxínhanrá chrókjuínkítsará tí sín kichó ni éxí ntátjan sín senó. ⁴ Kixin tí chrókjuasánkian iso tí sín Macedonia ntá tí chrókónoxín kixin naxa kohya nkehe tsjánjonrá ntá chrókósuēheni tí jeheni kixin imá chóxinni kichó ni la ko kjá chrókósuēhará kjaxinrá. ⁵ Méxra xikaha tóna kixin t'ichjánxin tsontátjan tí sín kichó ni

kixin sátsji sín tsitónxin sín ntja tsjijitsjehe sín tí jahará senó tsjinkítsa sín kixin tsjenájínrá tí chichaon tsín-táchrórá senó kixin chrókjuánjonrá. A ntá chrókóyaxínhanrá kixin chrókjuánjonrá tí chichaon éxí ijnko nkehe chaxín tjinkáonrá chrókjuánjonrá la jehya éxí ijnko nkehe chrókjuanchaharáni afuerza.

⁶ Xráxinkáonrá kixin tí nkexro k'uenka tsjéhya na mé tsjéhya tsotjá. A ntá tí nkexro k'uenka itsjé mé tsotjá itsjé. ⁷ Méxra jnkojnko chojni chrókjuanjon tí nkehe kjuenkayáxín sín asén sín. Na mé tjinkakonhya Dios kixin kénhya asénni chróchjéheni ch'án nkehe, kixin Dios mé tjuéhe ch'án tí nkexro chéhe tjanjon nkehe. ⁸ A ntá Dios chóna kaín kjuachaxin jie ntá tsotjáhará ch'án kaín nkehe t'ichjánxinhanrá kixin tsochontará nkehe tsochjehérá í so chojni chónahya kixin xikaha sích'erá kaín xra jina. ⁹ Éxí ntáchro tí xroon itén Dios kixin:

Tí nkexro t'ókikayéhe ch'án itsjé nkehe nchekitonhen ch'án tí sín nò

na mé nunca tsjejeheya tí xra jina ch'e ch'án. †

¹⁰ Dios mé tjanjon noatje kixin ts'inka la ko jehe ch'án mé tjanjon nkehe sineni, la ntá kjaxin tsotjáhará ch'án kaín nkehe t'ichjánxinhanrá la ko jehe ch'án sinček'ánki ch'án tí nkehe ts'ènkará la ko jehe ch'án sinček'ánki ch'án tí xra jina tjejóch'erá. ¹¹ A ntá tsochontará kaín nkehe tjeje kixin ntá antsí tsjachará tsjinkítsará tí í so sín kichó ni. A ntá xikaha tsjijikenheni sín tí nkehe tsochjehérá tí sín kichó ni ntá tsjanchehe sín Dios kjuasáya. ¹² Kixin xikaha chrókjuínkítsará tí sín kichó ni na jehya kixin chrók'uáyéhe sín tí nkehe t'ichjánxinhin sín ó, la mé kjaxin chróchjéhe sín Dios kjuasáya. ¹³ Mé xikaha tsjanchehe sín Dios kjuasáya kixin tí nkehe kjuánjonrá kjuákoxin kixin nchexiteyéhérá tí tan kuente Cristo. Kjaxin tsjikosáyehe sín Dios kixin tí í so nkehe kjuánjonrá k'uáyéhe sín la ko tí nkehe k'uáyéhe í so chojni. ¹⁴ La ko jehe sín tsjanchehe sín Dios kixin tsjinkítsa ch'án tí jahará kixin jehe sín tjuahará sín kixin t'ikon sín kixin tjákoxinrá kixin tí kjuasáyé Dios chontará. ¹⁵ Tjancheheni Dios kjuasáya kixin kjuínchekitonheni ch'án ijnko nkehe imá jie tsaáxinni la tsjachahyani tsochronkaxínni kaín tíha.

Kjuachaxin chóna ch'ín Pablo kixin tsík'óna ch'án apóstol

10 Janhan Pablo tió xrjanóghará nkehe la jnkojina xrjanóghará la mé tjákoxian éxí toxrjínhín Cristo. Ntáchrórá kixin tió tjèn tí tjejorá ntiha la tósuàna, a ntá tí kjin tjèn la imá jiēna, ichrorá. ² Méxra xrjanóghará kixin tí tsjasántsahará tjínkakonhya kixin chrókjuínchekóninkáonráni kixin ntá tsónínkakonhánrá jnkojínrá kixin tsékaráni jie kixin ixria éxí chojni chjasintajni ó, tsixrorá. A ntá xra ó tsjasán tsjentuáha tí jehe sín. ³ Chaxín tjejóni éxí chojni ó, na kjánchó tió tjanjonni la tjanjonhyani éxí tjanjon chojni chjasintajni. ⁴ Kixin tí nkehe xraáni tjanjonxinni jehya nkehe kuente chjasintajni. Náhí. Táha la kjuachaxin kuente Dios la

† Salmo 112.9

tíha mé tsjacha sinchek'itjáyan kaín kjuachaxin kuènte tí Jínahya. ⁵ Na mé tsjachani sinchek'itjáyani tí nkehe ntoáhya tjenkayáxin chojni la ko kaín nkehe nchehnkexín sín t'inkákonhen kixin chrókóchóxin chojni Dios. ⁶ A ntá kjuachaxin kuènte Cristo tjakoheni kaín chojni kixin ntá tsítóhe sín kaín nkehe ntoáhya tjenkayáxin sín, a ntá chrókuitekakonhen sín tí jehe ch'án ⁶ la ko tjejóchóhenni sinchekjasóteni kaín tí sín ntiha naxa tjinkakonhya sín chrókuinchexiteyá sín tí tsjixin tsonoheni kixin á chaxín tsjachará sijnchexiteyará jína.

⁷ A ntá jahará tékaráni jje kixin tí nkehe t'ikonrá ó. A ntá tí nkexro tjenkayáxin kixin chaxín ch'ehe Cristo xra la mé kjaxin chrókjuátsqan kixin kjaxinni jeheni la ch'eheni Cristo xra. ⁸ A ntá tí chrókjuintahnkena ntsí kixin tí kjuachaxin chonta janhan ntá chrókósuánahya kixin Ìnchéni kjuanjon tí kjuachaxin kixin chrókjuínkítsa tí jahará kixin antsí chrók'uitjará kuènte Dios, la mé jehya kixin chrókjuíntak'itjáyanrá. ⁹ Tjínkakhonya kixin chrókjuíntachrakonxínrá tí xroon chr'anhánrá. ¹⁰ Kixin ntáchro sín kixin ixra la ko jiehe tí nkehe ikjian janhan, a ntá tí chrókjuak'é ntiha la jienahya la ko kánhyó chonta janhan kjuachaxin tí nixja janhan. ¹¹ Kjánchó tí nkexro xikaha ntáchro chrókónohe ch'án kixin jnkokón nixja janhan éxi nixja tí xroon tsíkjian kjónté ikjín tjèn la ko kjónté tí chrók'uejóni ntiha.

¹² Tjínkakhonyani chrókjuenkayáxinni kixin chrókóyóhenni tí í so sín ntáchro sín kixin jína tí jehe sín. Jehe sín mé lontj sín kixin ncheyóhe sín asén sín í so chojni. ¹³ A ntá jeheni la chrókjuinchehnkexínhyani ijnko xra jehya xra kuènteni. Dios mé kjuako nketí sich'eni xra la kjuanjon ch'án kjuachaxin kixin kjujini kjuích'eni xra tí tjejorá chjasin Corinto. ¹⁴ Jehya kixin chrókóntahyani kjuachaxin chrók'uetuqhanrání. Tí chaxín jehya jeheni saxón kjujini tí tjejorá ntá xikaha chrókóntahyani kjuachaxin. Ntá náhí, kixin jeheni saxón kjujini ntiha kjuakoharáni itan kuènte Cristo. ¹⁵ Chrókjuinchehnkexínhyani ijnko xra kjuích'e ókjé chojni éxi xra chrókjuich'eni jeheni. Náhí. Tjínkaonni kixin antsí chrók'uitjará tsinkachónkirá Ìnchéni ntá xikaha la antsí chrókjuínkítsani tí jahará kixin jehó tí xra k'uáyéheni tjejóch'eni. ¹⁶ Kjaxin tjínkaonni chrókjuakoni tí itén Ìnchéni chrókuaáxin chojni í so chjasin sáchrókjuini la ko kjaxin chrókjuinchehnkexínhyani tí xra chrókjuich'e ókjé chojni.

¹⁷ A ntá jnkojín sín tjínkaon sín chrókjuinchehnke sín ntá jehó chróntáchro sín kixin kjuachaxin Ìnchéni mé chóna sín. ¹⁸ Kixin tóxrjénhya Dios ijnko nkexro jehó chróntáchro kixin jína ch'án. Náhí. Ìnchéni mé tson-táchro ch'án nkexro chaxín jína.

Ch'ín Pablo la ko tí sín chaxínhya apóstol

11 Tjínkavan chrókuinhínrá ntsí tí lontjina. ¿Á chrókjuachará chrókuinhínrá nkehe tsontáxrjan? ² Janhan tjínkakhonya kixin í jnko nkexro chrókuinkachónkirá. Kjaxin xikaha tjinkakonhya Dios. Ó ikjuá Cristo kixin chrókuakja ch'án tí jahará. Tjínka-

van chrókjuánjuan tí jahará chrókuakja tí jehe ch'án éxi yóhe ijnko tjan tjarisoá chrókótehe jnkokoá xii. ³ Tóxakonna kixin éxi tí konche tí kjuach'ia xriko ntá kjuích'iehe tjan Eva, ntá xikaha kjaxinrá jahará tsj-tóhéra sit'ayahará ókjé chojni ntá tsjtóhéra tí nkexrí kaín asánrá tinkachónkirá Cristo. ⁴ A ntá jahará cháhará tjánjonrá kjuachaxin tjiji ókjé chojni ntiha chronkaxín sín í jnko Jesús ókjé jehya éxi tí chronkaxín-ni jeheni, la ko kjaxin cháhará k'uayéhéra ókjé nchakuen jehya tí Nchakuen Dios k'uayéhéra saxo, la ko cháhará chrókuitekáonrá ijnko nkehe ókjé chrókuaáxinrá jehya éxi tí nkehe kuitekáonrá senó. ⁵ Ó nõna kixin chaxínhya ninkehó sínkíhyana janhan, a ntá antsí sínkí tí sín chréhéra jahará, ichrorá. ⁶ Kjónté kánhyó náxrjón nixja janhan la jehya kixin kánhyó chrókónona chrókjuàkua. A ntá tjákoáxinrá jahará tíhi kixin kaín nkehe t'a.

⁷ ¿Á ntoáhya kjuít'a janhan xrjanxaxián tí tan tsaáxin-ni kixin ninkehó kjuáncháhya chrókjuacha la ko éxi ijnko chojni nõé kjuak'é janhan kixin tjínkavan chrókjuínkítsará chrók'uitjará? ⁸ Tí sín í so njnko kjuínkítsana sín kjuanjon sín chichaon k'uayáha kixin tsjak'é tsjakohará jahará. ⁹ Tí kjuak'é tí tjejorá jahará la kjónté t'itjáyan nkehe la ninkexró kjuáncháhya nkehe. Jehó tí sín kichó ni kjuixín estado Macedonia kjuikao sín tí nkehe t'ichjánxinna. Méxra tjínkakhonya kixin chrótjehará xra tí jahará la ko xikaha naxa tjet'a jie. ¹⁰ Xikaha chaxín choxian tí tan chaxín ntoá kuènte Cristo, a ntá kohya ninkexró nkuixín estado Acaya tsjacha tsakitsjena tí kjuachéhe chonta. ¹¹ ¿Nkekuènte xikaha ntáxrjan? ¿Á xikaha ntáxrjan kixin tjuahyará tí jahará ní? Náhí. Dios la ó nohe kixin imá tjuahará.

¹² Kjánchó ó jehí tsjintaxín xikaha sjt'a kixin tjínkakhonya tsjánjuan kjuachaxin kixin nchehnkexín tí sín ixri ntáchro kixin jnkokón kjuachaxin chóna tí nkehe tjákua la ko tí nkehe tjako sín. ¹³ Kjánchó jehe sín ijnko apóstol chaxínhya mé ch'ia sín ncheyóhó sín éxi chojni kjueyá Cristo. ¹⁴ Jehya ijnko kjuachrakón tíha kixin kjaxin ch'ín Tsochren kjaxin xikaha ncheyóhe ch'án éxi ijnko ángel kuènte tí t'inkaséyan. ¹⁵ Méxra xikaha kjaxin kuènnen tí sín ch'ehe tí Jínahya xra mé ncheyóhe sín tí sín jína. Ntá tsjixixín mé tsjasótexín sín tí xra jínahya kjuích'e sín.

Kjuasóte ch'ín Pablo kixin apóstol tí jehe ch'án

¹⁶ Ntáxrjan inaá kixin nijnkorá chrókjuenkayáxinrá kixin lócona. Kjánchó tí xikaha tjenkayáxinrá la tj-tóhéra tsonixja janhan éxi lócona kixin kjaxinna jína chrókjuíntahnke ntsí. ¹⁷ Tí xikaha ntáhnkexián la jehya kjuachaxin kuènte Ìnchéni ntáxrjanxian tíha. Náhí. Jehí éxi ijnko chojni lóco nixja. ¹⁸ A ntá nchónhya chojni síin nchehnkexín sín tí nkehe nohe sín a ntá jie la kjaxin janhan sjntahnke. ¹⁹ Kixin jahará ntáchrorá kixin imá nohará ntá cháhará tjejó tí sín lóco. ²⁰ Kixin tjánjonrá kjuachaxin t'etuqhanrá sín la nchexiteyéhéra sín la ko takitsjahará sín tí nkehe chontará la ko ch'éna asén sín éxi Ìnché sín tí jahará, la ntá kjoníehyará sín la ko tjate

sín nkaya ikonrá. ²¹ Kjonté chrókósuàna tsontáxrjan kíxín jeheni la kánhyó jjehe k'uętuanharráni.

Kjánchó tí nkehe nchehnkexín sín la janhan ntáhnkexián kjáxinna, kjonté ntáxrjan tíhi éxí ijnko chojni lóco. ²² ¿Á chojni hebreo jehe sín? Kjáxin janhan. ¿Á chojni israelita jehe sín? Kjáxin janhan. ¿Á k'uaxr-jeníxin sín ch'ín Abraham? Kjáxin janhan k'uaxrjeníxian ch'án. ²³ Ch'ehe sín Cristo xrá kjánchó janhan la antsí má la jehe sín la kénhyó, kjonté ntáxrjan tíhi éxí ijnko chojni lóco. Janhan la antsí má kjuít'a xrá a ntá jehe sín la kénhyó, la ko antsí má kjuak'échjina ntęechiso a ntá jehe sín la kénhyó, la ko antsí má kjuatena chojni a ntá jehe sín la kénhyó, la ko nchónhya veces k'uíxin kjuaxikaon kíxín chrók'uén. ²⁴ In'ó veces tí sín judío kjuatena sín la ko treinta y nueve tí kjuatjoté. ²⁵ Níya kjuatexinna sín inta la ko íjnko vez kjuak'e sín xro. Níya k'uániánki ntabarco ntá ntá ijnko yaon la ko ijnko tie tjénkataván ntayaon. ²⁶ K'uájia má, k'uikuon kjuaxikaon chrók'uénxian tí ntario la ko chrók'óyánna tí xíchee la ko chrók'óyánna tí sín chjasenná la ko tí sín tsíkijixín ókjé. K'uikuon kjuaxikaon tí chjasin jje la ko tí ntęje la ko tí ntayaon la ko chrók'óyánna tí sín chaxín-hya tinkáchónki Inchéni. ²⁷ Kóxrjéna kíxín tí xrá kjuít'a la ko itsjé nkehe náxrjónhya kónna. Itsjé tie kjuak'échrinhya jína la ko itsjé yaon ik'uén kjinta la ko ik'uén ntá la ko itsjé yaon kjónęhya ninkehó la ko kókinna la ko chontahya kaná.

²⁸ Kjonté kaín tíha la ko í so nkehe kónna la mé jnko-jnko yaon imá tóxakonna kíxín kaín tí sín tójnkotsé sín kaín tí nínko. ²⁹ ¿Á tjen jnkojínrá níhará? A ntá tí xikaha la koína éxí nina. ¿Á tjen jnkojínrá kjuásinrá jje? A ntá tí xikaha la kjáxin tóxakonna. ³⁰ Tí chrókjuíntahnkexian nkehe la mé tjínkavan kíxín jehó chrókjuákoxián kíxín kánhyó jje. ³¹ Dios, It'é Inchéni Jesucristo, na mé tí nkexro chróxraxinkaonni jnkochríxín mé ó nohe ch'án kíxín chaxín tí nkehe ntáxrjan. ³² Ntá tí kjuak'é chjasin Damasco la mé tí ch'ín gobernador kjuích'ehe ch'ín rey Aretas xrá mé k'uętuęnen ch'án tí sín soldado kíxín tsochónhen sín tí ntója tí chjasin kíxín chrótséna sín chrókjuak'échjina. ³³ Kjánchó síin nkexro k'uínkajinxin-na ijnko ntaxra ijnko ventana tí tjet'o k'uantatjen chjasin la mé xikaha kuaána, tséhyana sín. †

Tí nkehe k'uíkon ch'ín Pablo

12 Ninkehó tsjachahya tí nkehe tsoxrjanka kuęntana ó. Íchá jína tsoxrjanka tí nkehe k'uíkuon la ko tí nkehe kjuínchenóna Inchéni. ² Choxian ijnko nkexro tinkáchónki Cristo. A ntá k'uátsínka catorce nánó sátsíkji ch'án tí níxin nkajní. Nonahya á sátsíkjiko ch'án cuerpo kuęnte ch'án o asén ch'án ó. Jehó Dios mé nohe. ³ Méxra ó nóna kíxín xikaha sátsíkji ch'án la ntá nonahya á koí cuerpo kuęnte ch'án o asén ch'án ó. Jehó Dios mé nohe. ⁴ A ntá sátsíkji ch'án nkajní. La ntá tí palabra kuínhin ch'án la kohya kjuachaxin nijnko chojni tsochronka. ⁵ Jína chrókjuíntahnkexián kíxín xikaha kónhen tí nkexro a. A ntá tí chrókjuíntahnkexián kíxín kjuachaxin kuęntana la jehya jína tíha. Íchá jína

chrókjuákoxián kíxín janhvàn la chontahya kjuachaxin. ⁶ Tí chrókjuíntahnkexián tí nkehe kónna la chrókólócohyana kíxín chaxín tí nkehe chróxrjanka. Kjánchó xikahya t'a kíxín tjínkakonhya kíxín xikaha chrókjuenkayáxin chojni kíxín antsí jína janhan. Náhí. Tjínkavan kíxín tí xrá t'ikon sín la ko tí nkehe tinhin sín mé chrókjuenkayáxixín sín kíxín á jína tí janhan, tsixro sín.

⁷ Méxra chrókjuíntahnkexinhyana ntá xikaha xránjon kjuachaxin kíxín chrók'uayáha ijnko kjuatjoté éxí ijnko ch'í kuikjiáte cuerpo kuęntana mé ijnko nkehe tsík'ętuęnen ch'ín Tsochren ikui kjuínchekjoténa. ⁸ Iní veces xrjanóaha Inchéni kíxín chrókjuatşen ch'án tí kjuatjoté chonta. ⁹ Kjánchó ntáchro Inchéni kíxín jehó tí kjuachaxián ch'án chrókjuachaxián janhan. Kíxín tí kjuachaxián ch'án antsí tsjakęexin chojni fuertehya. Méxra ntá chàna kíxín fuertehyana kíxín ntá xikaha tsjakęoxián tí kjuachaxin kuęnte Cristo. ¹⁰ Méxra chàna kjonté fuertehyana la ko kjonté t'ántaxina sín la ko kjonté t'ichjánxinna nkehe la ko kjonté chónkina sín chrók'óyánna sín la ko kjonté síin kjuaxikaon chrókjuasótexinna kíxín tí tinkachónkia Cristo. Chàna kíxín fuertehyana na mé fuerte janhan kíxín Cristo tinkachónkia.

Tóxakonhen ch'ín Pablo kíxín tí sín tjejó nínko chjasin Corinto

¹¹ ¿Á lócona kíxín xikaha xrjanka? Kjánchó jahará kuítekákonhyará ntá xikaha xrjanka. Jahará chróchronkara xikaha kíxín jína janhan. Jehya kíxín kánhyó sínkina la ntá tí sín chréhérá la antsí sínkí sín. Náhí. Kjonté janhan la chaxín ninkehó sínkíhyana. ¹² Kjuásian itsjé kjuaxroan jje la jína kjuak'é kónínkakonhya kjuákoxián kíxín chaxín janhan ijnko nkexro tsíkjeýá Inchéni. ¹³ ¿Xá k'uíkuon tí jahará éxí kánhyó sínkírá a ntá tí í so nínko la antsí sínkí sín kíxín tí kjuasán janhan la ninkehó xrá tjaáhyará? A ntá tí xikaha ntoáhya kjuít'a la tóninkákonhyará.

¹⁴ A ntá ijie ó yaxinna tí níxin vez chrókjuasántsahará la ko tjaáhyará ninkehó xrá. Janhan la tjéyahya tí nkehe chontará. Tí nkehe tjéýá janhan la mé jahará kíxín jahará éxí yóhe xjanna t'íkuon. Méxra tí sín it'é xjan chrókjuenájín sín chichaon chrók'uayakuęnín sín xjeen sín. Jehya xrá kuęnte tí xjan chrókjuenájín xjan chichaon chrók'uayakuęnín sín tí it'é xjan. ¹⁵ Tóxakonahya kjonté chrókjuíntakjeje kaín nkehe chonta janhan o kjonté chrók'uénxian kíxín tí jahará la jína chrók'uejorá. A ntá janhan imá tjuahará la kjánchó éxí tóna janhan kíxín jahará kánhyó tjeherá tí janhan.

¹⁶ Méxra kjonté janhan tjaáhyará ninkehó xrá la kjonté xikaha ntáchrorá kíxín kjuít'ayahará, ichrorá. ¹⁷ ¿Xá kjuít'ayahará kíxín jnkojín sín ichr'an kjuíjitsjehe sín tí jahará? ¹⁸ Kjuáncháha tí ch'ín Tito kíxín tsjijitsjehe ch'án tí jahará la ko kjáxin kuętuęnhan tí íjnko kíchó ní sátsjikotoxin ch'án. ¿Á kjuít'ayahará ch'ín Tito ní? ¿Á chaxínhya jína k'uéjóni yóini ntiha kíxín jnkokón Nchakuen Dios chóntani?

† Hechos 9.23-25

¹⁹ ¿Á tjenkayáxinrá kixin xikaha kjuátēheni kixin chóntani jje ní? Kjánchó xikaha. Dios tjetsjehe kixin nixjani éxi chojni tinkáchónki Cristo. Kíchóni tjuahará la kaín tíha ntáxrjan kixin tjínkavan kixin antsí chrókuinkachónkirá Ìnchéni. ²⁰ Tóxakonna kixin tió tsjasántsjahará la tsóxrjinnahya nkexrí tjejorá la ko kjaxinrá tsóxrjánhyará tí nkehe tsontáxrjan. Tóxakonna kixin náxa ts'ixin kjuanínkaon la ko náxa ts'ixin kjuachjínqínhin la ko tsóninkákonhénrá kichuárá la ko chrókuétoanrá jahórá la ko náxa tsinkachónkirá kjuach'ia la ko náxa ts'ántaxínhínrá kichuárá la ko náxa chontará kjuahnke la ko jnkokoáhya tsjenkayáxinrá. ²¹ Tóxakonna kixin tió tsjasántsjahará ínaá la tí Dios kuéntana mé sinchesuàna tí tjejorá la ntá imá tsotsjan-ka kixin itsjérá tsíkjasínrá jje tí ósé la náxa titoéhyará tí nkehe tjuáhya ch'erá la ko náxa titoéhyará chontará chojni chjin ókjé tjásinkoará jje la ko titoéhyará kaín tí í so nkehe jínahya k'uékjich'erá ósé.

Nhexraxinkaon ch'án sín la ko tsjixixín nixja ch'án

13 A ntá jie la níyaxín tsjasántsjahará. A ntá tí kaín nkehe tjínkáonrá tsónona la mé chróchrónka yaá o iy'á chojni tsík'ikonxín kon sín tí nkehe tsíkónhen. ² Nixjahá tí sín tsíkjasin jje ósé, la ko nixjahará kaín rá kixin kjónté ikjín tjèn la ínaá nixjahará éxi nixja tí kjuak'é k'uéjóni tí iyó kjuasántsjahará kixin tió tsjasán ínaá la í tsíkonóghya tí sín kjuasin jje. ³ Jahará tjínkáonrá tsinhínrá á chaxín níxjaxian kjuachaxin kuente Cristo. Jehya kixin Cristo tsjachahya tsjakoxin ch'án tí kjuachaxién ch'án tí tjejorá ntiha. Náhí. Chaxín tjakoxin ch'án tí kjuachaxin chóna ch'án tí tjejorá ntiha. ⁴ Chaxín tí k'uénxin ch'án tí ntacruz la mé éxi chón-tahya ch'án kjuachaxin. Kjánchó ijie tjechónxin ch'án tí kjuachaxin kuente Dios. Kjaxinni jeheni éxi kjuák'e ch'án k'uéchóntahyani kjuachaxin la ntá ijie tin-

káchónkini tí jehe ch'án la tjejóchónxinni tí kjuachaxin kuente Dios kixin jína tsjinkitsani tí jahará.

⁵ Jahará chrókjuenkayáxinrá á nchoxon tjejorá, á kaín asánrá tinkachónkirá Ìnchéni. ¿Á noahyará kixin tje-jokoará Jesucristo? A ntá jahará tsónohará á chaxín tinkachónkirá o náhí. ⁶ Kjaxin tjínkavan chrókónohará kixin jeheni la jehya chojni chaxínhya tinkáchónki Ìnchéni. ⁷ Nixjeheni Dios kixin chrókuítóehya ch'án tí jahará kixin ninkehó nkehe jínahya chrókjuich'erá. Jehya kixin chrókjuakoxinni kixin jína tí jeheni. Náhí. Jehí tjínkaonni kixin jahará chrókjuich'erá nkehe jína. Ántosenni kjónté tsóntáchro sín kixin chóntani jje.

⁸ Ninkehó nkehe chrókjuich'eni kixin chrókjuinchek'itjáyanni tí nkehe chaxín. Kaín nkehe ch'eni la tjikosáyeheni tí nkehe chaxín. ⁹ Méxra chrókóchéheni tí t'ichjánxinhya imá chrók'uetóanni, tí tsjasán la ts'ichjánxinhya náxa sínchekóninkáonrána tsonixjaxian tí kjuachaxin chonta janhan. Kixin Ìnchéni mé chjina tí kjuachaxin jehya kixin chrókjuin-tak'itjayanrá. Náhí. Kjuanjon ch'án tíha kixin jahará antsí chrókuinkachónkirá Ìnchéni.

¹¹ Na ntá kichó ni, chrókócháhará. Tjeyará kixin jína chrók'uejorá. Chrókjuinchechéhérá kichuárá la jnkokoá chrókjuenkayáxinrá la ko kjuaxróxin chrók'uejorá. Kixin Dios mé ts'ejokoará ch'án. ¹² Nixjehérá kichuárá jnkójina la tsehérá tja kichuárá. ¹³ A ntá kaín tí sín tinkáchónki Ìnchéni ntihi mé xraxinkaon sín tí jahará.

¹⁴ Kjuasáyé Ìnchéni Jesucristo la Dios tjuahará la ko tí Nchakuen Dios tjejókoará tjinkitsará kaín rá. Amén. Ó tjen.

GALATAS

Ch'ín Pablo ikjin xroon k'uáyehé tí nínko chjasin Galacia

1 Janhan Pablo mé tsíkjeýána Ìnchéni tsjàkua itén ch'án. Janhan la jehya chojni kjuéyána la ko jehya chojni ichr'ánna. Náhí. Kjuéyána Jesucristo la ko It'éni Dios, mé tí nkexro kjuínchexechón Jesús. ² Janhan la ko kaín tí sín kíchó ni tjejókoni ntihi ikjinni tí xroon ts'áyehé tí nínko síin estado Galacia. ³ Tjancheheni It'éni Dios la ko Ìnchéni Jesucristo kjuasáyé ch'án chrókjuincheyaonrá ch'án la ko chrók'uayéhérá tí kjuaxróxin kuènte ch'án. ⁴ Jesucristo mé k'uenyákonhen ch'án ijje ní ntá kuaáxinni la mé ijie tsjachahya tí nkehe jínahya síin chjasintajni tsjachroeni mé xíkaha tjinkaon It'éni Dios. ⁵ Tjáncháha Dios kjuasáya jnkochrín mé xíkaha tsoxiteyá. Amén.

Kohya í jnko tan tsaáxinni

⁶ Janhan tóxakonna kixin jahará imá tjoka tinkakj-tóhéra Dios kjuéyará kjuasáyé Cristo. Jahará la tjoka ó kjuankixínra chréhérá ókjé tan chrókuaáxinrá. ⁷ A ntá chaxínhya xíkaha. Kohya í jnko tan tsaáxinni. Jehí iso chojni tjinkaon nchexakonhanrá la ko tjinkaon sín chrókjuitóxinhin sín tí tan chrókuaáxinni kuènte Cristo. ⁸ A ntá tí jnkojín nkexro chrókjuakohará ókjé tan chrókuaáxinrá yóghya tí nkehe ó kjuakoni la tí xíkaha la Dios mé sinchekjasóte tí sín kixin xíkaha sich'e sín, kjónté á janhan o ijnko ángel chrókuijín nkaya nkajní. ⁹ Senó xrxanka la inaá tsoxrxanka kixin jnkojín nkexro chrókjuako ijnko tan ókjé tsaáxinrá yóghya tí tan ó kuítekáonrá la mé Dios sinchekjasóte tí jehe sín. ¹⁰ Janhan la tjéyáhya kixin chrókóxrjínhin chojni tí xra t'a. Náhí. Tjínkavan kixin Dios mé chrókóxrjínhin tíha. Tí chrókótjínkavan chrókóxrjínhin chojni ó a ntá xíkaha la jehya ijnko nkexro ch'ehe xra Cristo.

Ch'ín Pablo k'óna ijnko chojni tjako itén Dios

¹¹ Jahará kíchó ni chrókónohará kixin tí tan tjàkua tsaáxinni mé jehya ijnko nkehe kjuenkayáxin chojni ó. ¹² Jehya chojni chjina tí tan la jehya chojni kjuakona. Náhí. Jesucristo mé kjuakona. ¹³ Jahará la kjá ó kuinhínra nkexrí k'uékjak'é tíó naxa k'uéchráha tí sín judío. Ó nohará kixin k'uéchonkíha tí sín tinkáchónki Ìnchéni la ko tjínkavan chrókjuin-tak'itjáyán sín. ¹⁴ Tí naxa k'uék'ájikian tí sín judío la antsí má k'uénóna. A ntá kaín tí sín chjasenná jnkokón nánó k'uéchontakian sín la kánhyó k'uénohe sín. Antsí

† Hechos 8.3; 22.4-5; 26.9-11

má k'uékítekavan tí nkehe k'uék'etqan tí sín tsík'axr-jeníxinni. ¹⁵ Kjánchó Dios kjuéyána kjónté naxa tókjínahya la kjuasáyé ch'án kjuéyána ch'án kixin xíkaha kóxrjínhin ch'án. ¹⁶ Kjuínchenóna ch'án nkexrí tjen tí Xjeen ch'án kixin tsjákoha tí sín jehya judío tí tan tsaáxinni. Tió kjuéyána Dios la ninkexró kjuakonahya. ¹⁷ La ko kjaxin kjuítsjàhya janhan tí sín tsík'óna apóstol síin chjasin Jerusalén. Náhí. Janhván tuénxín sákjuia chjasin Arabia, a ntá chr'éxin ikjan tí chjasin Damasco. ¹⁸ A ntá iní nánó chr'éxin na ntá sákjuiyá chjasin Jerusalén kixin tsochoxian ch'ín Pedro la ntá ntiha mé kjuák'ekian ch'án quince yaon. ¹⁹ Kjánchó k'uíkqonhya tí í so sín apóstol. Jehó k'uíkuan ch'ín Jacobo kíchó Ìnchéni. ²⁰ Ó tjetsjehe Dios kixin tí nkehe ikjian la mé chaxín tíha.

²¹ A ntá chr'éxin ntá sákjuia nó estado Siria la ko Cilicia. ²² A ntá tí sín kíchó ni tinkáchónki Cristo tjejó estado Judea la naxa tjatsqanhyana sín. ²³ A ntá ó kuinhón sín kixin tí nkexro k'uéchréhe sín chrók'óyan sín la ntá ijie mé tjako tí tan chrókjuinchek'itjáyán ch'án. ²⁴ A ntá ijie tjanchia sín kjuasáya kixin janhan ó tinkáchónkia Ìnchéni.

Tí iso sín kjuéyá Jesús k'uáyehé sín ch'ín Pablo

2 La ntá catorce nánó chr'éxin ntá sákjuiyá chjasin Jerusalén inaá la sákjuíkian ch'ín Bernabé la ko kjaxin ch'ín Tito. ² Sákjuiyá ntiha kixin Dios kjuínchenóna kixin sáchrókjuiyá. Ntiha chjasin Jerusalén la kójnkotsékoni tí sín t'etqan nínko ntiha la ntá xrxankaxián nkexrí tí tan tsaáxinni tjákoha tí sín jehya judío. Mé xíkaha kjuít'a kixin janhan tjínkavan jnkokoá chrókjuenkayáxinni kixin ntá tí xra kjuít'a la jehya chrókóchónkó. ³ A ntá kjónté tí ch'ín Tito kjuák'ekian ch'án la jehe ch'án mé griego ch'án la k'uetaqanhya sín kixin chrókua ch'án xroye. ⁴ A ntá iso tí sín kíchó ni chaxínhya tinkáchónki Ìnchéni k'uéjókoni sín la jehe sín imó tsík'ixenhen sín kixin tsáyeheni sín kixin tsotsjehe sín nkexrí kixin tí sín kuènte Cristo chóna kjuachaxin. A ntá jehe sín tjinkaon sín kixin chrókjuinchexiteyéheni inaá tí nkehe k'uék'etqan tí ley. ⁵ A ntá tahyani kuenté nkehe tí tjejóchro sín kixin jehí tjinkaonni kixin tí tan tsaáxinni la ntoá chrókuinkachónkirá jahará.

⁶ A ntá tí sín kónoxín t'etqan kjuakonahya sín ninkehó. A ntá jeheni la tahyani kuentá á chojni t'etqan o náhí kixin Dios la jnkokón t'ikon ch'án kaín chojni. ⁷ A ntá kjuátsqan sín kixin Dios ó chjina tí xra tjákoha tí sín jehya judío tí tan jína éxí yóghé tsíchjéhe Dios xra ch'ín

Pedro tjakohē ch'án tí sín judío. ⁸ Tí Dios tsík'etuēnhen ch'ín Pedro ts'óna apóstol tsjakohē ch'án tí sín judío la ko kjaxin tsík'etuanna ch'án ts'óna apóstol tsjakohā tí sín jehya judío.

⁹ Méxra ch'ín Jacobo la ko ch'ín Pedro la ko ch'ín Juan, mé tí sín t'etōan kuēnte nīnko, mé kjuátsoan sín kixin Dios tsíkjanjon tí kjuachaxin. Ntá kóchéhe sín kixin jnkokón ch'eni xra la itsé sín tjani la ko itsé sín itja ch'ín Bernabé. Ntá kjuenkayáxinkoni sín kixin jeheni la tsjakohēni tí sín jehya judío la jehe sín nachrohe tsjakohē sín tí sín judío. ¹⁰ Jehó k'uetōan sín kixin tsoxraxinkaonni la ko tsotjuēheni tí sín nōa la xráxin tōxakonhenni sinchexiteyáni tíha.

Ch'ín Pablo kjuentuéhe ch'án tí ch'ín Pedro chjasin Antioquía

¹¹ A ntá tió kjuíji ch'ín Pedro chjasin Antioquía la kjuentuáha ch'án kixin ntoáhya kjuích'e ch'án. ¹² Senó k'uékjineko ch'án iso chojni kjónté jehya sín judío. Ntá ikui iso sín kuixin tí tjen ch'ín Jacobo. A ntá kjuankixin k'uaxrjenta ch'án la kuítōhe kjónekohya ch'án tí sín jehya judío a. Xikaha kjuích'e ch'án kixin chrakōnhen tí sín kui kixin tí sín neko ch'án naxā tsíkahya sín xroye. ¹³ Tí iso sín kichó ni judío kjaxin kuítekakonhen sín tí ch'ín Pedro kjónté ntoáhya kjuenkayáxin ch'án. Kjaxin ch'ín Bernabé la kjuacha kjuachroe sín ch'án kixin tí nkehe ntoáhya kjuích'e sín. ¹⁴ A ntá tió k'uíkuān kixin tí nkehe kjuakoxin sín la tóyóehya tí chrónka tí tan jína tsaáxinni tjako sín la ntá níxjahā tí ch'ín Pedro nkayakon kaín tí sín tsíkójnko. Ntáxrjan kixin: "Jaha mé ijnko chojni judío la kjónté itjen éxi jehya ijnko chojni judío. ¿A ntá kuēnte tētuēnhén tí sín jehya judío kixin chrók'uejó sín éxi chrókóyóhe tí sín judío?"

Tí sín judío la ko tí sín jehya judío la jnkokón tsaá sín kixin chóna sín fe

¹⁵ Jeheni la k'uaxrjenixinni chojni judío desde tí kokjixinni la jeheni na chónahyani jje éxi tí í so chojni chónhya Dios. ¹⁶ Kjónté xikaha la ó noheni kixin tsotjuáxinhya ijje chojni tí nkehe tsík'etōan ch'ín Moisés. Jehó tí sín tinkáchónki Jesucristo mé tsotjóá ijje sín. Méxra kjaxinni tinkáchónkini Jesucristo kixin tjinkaonni sinchetjóá ch'án ijje kixin titekaonni ch'án. Méxra ninkexró tsjachahya tsotjuáxin ijje sín kixin chrókjuinchexiteyéhe sín tí nkehe t'etōan tí ley.

¹⁷ Tí tjinkaonni tinkáchónkini Cristo kixin tsotjuáxin ijje, a ntá jeheni kjaxin xraxinkaonni kixin ó kjuasinni jje. A ntá í jehya Cristo k'uetōan kixin chrókjuasinni jje. Kjá chaxín náhi. ¹⁸ Tí kuítōheni tí ley la ntá naxā chrókjanni chrókuinkáchónkini tí ley inaá la tíha la ó jje kuēnteni tíha. ¹⁹ A ntá tí ley la kjuanchia jje k'uénxian. A ntá ijje la tjéchuān kixin tinkáchónkia Dios. ²⁰ Janhan la ó tsík'en kixin ó k'uénkian Cristo. A ntá ijje la janhya tjéchuān. Cristo mé tjechónxin tí janhan. La ntá jie la tjéchōnxian tí cuerpo chonta kixin tinkáchónkia tí Xjeen Dios kixin jehe ch'án la tjuāna ch'án la k'uenyákonhenni ch'án. ²¹ Tjinkakonhya tsjanoá tí

kjuasáyé Dios. Tí chrókótjuáxin ijje chojni tí ley tsík'etōan ch'ín Moisés, a ntá ó chónkó ik'uén Cristo tí xikaha.

Tí ley o tí fe

3 Jahará kichó ni gálatas imá lōntjirá. ¿Nkexro kjuít'ayahará? Kixin tí nkehe kjuákohará mé kuinhínrá kixin Cristo k'uenxín tí ntacruz k'uenyákonhenni ch'án. ² Jnkokóá nkehe tjinkāvan chrókjuateherá. ¿Á k'uayéxínrá Nchakuen Dios kixin kuítekáonrá tí nkehe tsík'etōan ch'ín Moisés o á k'uayéxínrá Nchakuen Dios kixin kuítekáonrá tí tan chrónkani kuinhínrá? ³ Imá lōntjirá jahará. Tí kjuankixínrá la kuítekáonrá kjuachaxiēn Nchakuen Dios. A ntá jie la tjinkáonrá jahorá sinchetjintaxínrá tí xra. ⁴ ¿Á chónkó kaín tí nkehe tsík'atsínkará? Kjá chrókjuinkjtsa chrókjuich'e xra tíha. Jehya chónkó tí nkehe kjuasótiaxínrá. ⁵ ¿Nkekuēnté kjuanjon Dios tí Nchakuen ch'án la ko kjuasin ch'án kjuaxroan k'uíkonrá? Jehya k'uayéxínrá tíha kixin kuítekáonrá tí nkehe tsík'etōan tí ley. Náhi. K'uayéxínrá tí nkehe kixin kuinkáchónkirá tí tan kuinhínrá.

⁶ Ch'ín Abraham kuítekaon tí nkehe k'uetōan Dios ntá Dios k'uíkon kixin jína ch'án. ⁷ Méxra chrókónohará jahará kixin tí sín chaxín tikinixin sín ch'ín Abraham a mé tí sín a chaxín tinkáchónki Dios. ⁸ Tí xroon itén Dios mé chrónka kixin tí sín jehya judío mé sinchetjóá Dios ijje sín kixin tsinkáchónki sín ch'án. Mé xikaha Dios mé chénka ch'ín Abraham ósé tí tan jína, ntáchro ch'án kixin: "Tjnko nkexro ts'axrjenixin tí jaha mé tsoyaonxín kaín nación." ¹⁹ Mé xikaha kjaxin kaín sín tinkáchónki Dios mé tsoyaon sín jnkokón éxi kóyaon ch'ín Abraham kixin kuítekaon ch'án.

¹⁰ Kaín sín jehó tinkáchónki tí nkehe tsík'etōan ch'ín Moisés la tsjasóte sín kixin ntáchro xroon itén Dios kixin: "Tsjasóte kaín tí sín tsjachahya sinchexiteyéhe tí nkehe tsík'etōan tí xroon chóna ley." ^{††1} Ntá ó ntoá ntáchro kixin kohya nkexro tsotjuáxin ijje sín tí tsitekaon sín tí ley. Xroon itén Dios ntáchro kixin: "Tí nkexro tsíkótjóá la tjejóchónxin sín kixin tinkáchónki sín Dios." ^{††2} Ntá tí chrókuinkáchónkini tí ley tsík'etōan ch'ín Moisés la chrókuinkáchónkihyani Cristo. Ntáchro xroon itén Dios kixin: "Tí nkexro sinchexiteyá tí ley la táhó chrók'uejóchónxin sín." ^{††}

¹³ A ntá Cristo kjuatsen ch'án kaín tí chrókjuasótexinni tí ley. Tí náhi la chrókjuasóteni kixin chrókjuachahyani sinchexiteyéheni tí ley. Jehe ch'án kjuenkā ch'án tí ijje kixin k'uenyákonhenni ch'án. Ntáchro xroon itén Dios kixin: "Kaín tí chojni chóna jie ts'ejótjjan sín ijnko nta ntá its'en la mé xikaha k'uáyéhe sín tí kjuanínkaon kuēnte Dios." ^{††} Mé xikaha k'uíkon sín tí ch'ín Jesús. ¹⁴ Mé xikaha kónhen kixin ntá tí nkehe chénka Dios tí ch'ín Abraham senó mé ts'áyéhe tí sín jehya judío kixin kjuachaxiēn Cristo Jesús. Ntá xikaha kaín ni ts'áyéheni tí Nchakuen Dios kixin tinkáchónkini ch'án mé xikaha tsintáchro ch'án.

† Génesis 12.3 †† Deuteronomio 27.26 † Habacuc 2.4 †† Levítico 18.5 †† Deuteronomio 21.23

Tí ley la ko tí nkehe kjuanjon Dios

¹⁵ Kíchóni, tíhi mé sjntayóaxian kuènte chojni ó. Tió ijnko chojni ch'éna ijnko xroon tsochóna firma kuènte sín la ntá xitjahya ts'óxíka í jnko nkexro la xitjahya í jnko nkexro sich'éna í so nkehe. ¹⁶ A ntá Dios mé tsíkjo ch'án tí ch'ín Abraham kixin tsjanjon ch'án nkehe ts'áyéhe tí nkexro ts'axrjenixin ch'án. Tí xroon itén Dios ntáchrohya kixin kaín nkexro ts'axrjenixin ch'ín Abraham chrók'uáyéhe tíha. Náhí. Ntáchro kixin ts'áyéhe jnkokoá nkexro ts'axrjenixin ch'án la mé Cristo tíha. ¹⁷ Méxra xrxanka tíhi. Dios chénka tí ch'ín Abraham ijnko nkehe chaxín la tsoxiteyá tíha kixin éxi yóhé ijnko xroon chóna firma tíha. A ntá cuatrocientos treinta nánó chr'éxin la ntá ikui tí ley k'uéchrónka ch'ín Moisés. La ntá kjónté xikaha la xitjahya tsoxíka tí nkehe tsíchrónka Dios o tsontáchro chojni kixin tje-toanhya tí nkehe tsíntáchro ch'án. ¹⁸ Tí chrókjuanjon Dios nkehe kixin chrókjuinchexiteyáni tí nkehe k'ue-
tqan tí ley la ntá tí nkehe tsíntáchro Dios senó mé chróxiteyáhya. A ntá Dios mé tsíchénka ch'ín Abraham kixin sinchekitonhen ch'ín Abraham tí nkehe kjuasáyé ch'án.

¹⁹ ¿A ntá xikaha la nkehe tsonhen tí ley tsík'etqan ch'ín Moisés? Chr'éxin kjuanjon Dios tí ley kixin tsq-noexinni nkehe tí jie tjasinni. K'uetqan Dios sinchexiteyéhe chojni tí nkehe tsík'etqan ch'ín Moisés tsijia tí nkexro ts'axrjenixin ch'ín Abraham, mé tí nkexro kjuéyá Dios kixin xikaha tsoxiteyá tí nkehe chrónka ch'án. A ntá tí ley mé chrónka tí sín ángel ntá k'uáyéhe ch'ín Moisés la ó chrónkaxón ch'án. ²⁰ A ntá tí nixjehe Dios tí ch'ín Abraham la jehó ch'án la ko jehó Dios la méxra t'ichjánxinha í jnko nkexro.

Tí xra kuènte tí ley

²¹ ¿A ntá á chrók'uaxrxén kixin tí ley tsík'etqan ch'ín Moisés chrókjuanjonko tí nkehe tsjanjon Dios? Kjá náhí. Tí chrók'uixin ijnko ley chrókjuanjon kjuachón la ntá chrókótjuáxin ijéni tí chrókuitekaonni tí nkehe t'etqan tí ley. ²² A ntá tsíntáchro xroon itén Dios kixin tí jie mé t'etuenhen kaín xín chojni kixin ntá tí sín chrókuinkáchónki Jesucristo ntá chrók'uáyéhe sín tí nkehe tsíchrónka Dios.

²³ A ntá tí naxa kuihya Cristo la ntá tí ley la k'uetuenhen kaín ni la k'uejóchónhenni kixin chrókónoxín tí nkehe chrókuinkáchónkini. ²⁴ Tí ley la éxi ijnko maestro kuènte chánjan k'uetqan. A ntá jie ikui Cristo la jehe ch'án mé kótjuáxin ch'án kixin titekaonni ch'án. ²⁵ A ntá ijie ó titekaonni Cristo la í nchexiteyèhyani kaín tí nkehe t'etoan tí ley.

²⁶ A ntá jahará ó k'ónará xjeen Dios kixin ó tinkáchónkirá Jesucristo. ²⁷ Kaínrá kuíkitiáxinrá kjuachaxién Cristo mé xikaha jehe ch'án kótjuáxinrá ch'án. ²⁸ A ntá jehya tje-toan á chojni judío o á chojni jehya judío o á chojni ch'exón xra o á chojni t'etqan o á chojni ntoa o á chojni chjin. Kaínni la ó k'ónani jnkokoá kixin tin-

káchónkini Cristo. ²⁹ A ntá tí tinkáchónkini Cristo chaxín la ntá tí xikaha ó chaxín tsík'axrjenixin ch'ín Abraham la ts'áyéhe ní tí nkehe tsíchrónka Dios.

⁴ Mé xikaha ntáxrjan tíhi. A ntá ijnko chánjan tió chrók'uen tí it'é ntá chrókuitqeko tí nkehe kuènte tí it'é la jehe ch'án la tóyóhó ijnko nkexro ch'exón xra kixin tí jehe la xitjahya t'etqan xra kjónté chaxín kuènte ch'án kaín tí nkehe a. ² Síin nkexro t'ayakonhen ch'án la t'etqan tí xra kuènte ch'án tsjixrakájia tí yaon tsíntáchro tí it'é. ³ Mé xikaha kónhen tí jeheni. Kixin tí naxa k'uéchánjanni la kuitekaonni kaín tí nkehe kuènte chjasintajni. ⁴ A ntá ó kjuixraká tí yaon ntá Dios ichr'án tí Xjeen ch'án ikui ch'án k'uaxrjenixin ch'án ijnko chojni chjin. La kjuínchexiteyá ch'án kaín tí nkehe tsík'etqan tí ley kuènte Moisés. ⁵ Ikui ch'án xikaha kixin tsaáxin ch'án kjónté senó k'uék'etuenhenni tí ley. A ntá jie la chrók'uáyéhe Dios tí jeheni éxi xjeen ch'án.

⁶ A ntá kjuakoxin Dios kixin jeheni mé xjeen ch'án mé ichr'án Dios tí Nchakuen Xjeen ch'án tsochóna asenni la tí Nchakuen ch'án mé t'eyaxín: "It'eni jaha mé kuèntá tí jeheni." ⁷ Méxra xikaha jahará la jehya ijnko nkexro ch'exón xra. Náhí. Jahará mé xjeen Dios. Jahará mé xjeen ch'án la jehe ch'án tjinkaon sinchekitonhanrá tí nkehe kuènte ch'án kixin tinkáchónkirá Cristo.

Ch'ín Pablo tóxakonhen ch'án kixin tí sín tinkáchónki Ìnchéni

⁸ Ósé la jahará k'uéchonhyará Dios la kjuinchexiteyéhérá tí dios chaxínhya. ⁹ A ntá ijie la ó choxínrá Dios, o íchá jína chróntáchroni kixin Dios la ó chóxin ch'án tí jahará. A ntá jehya jína kixin naxa chrókuinkáchónkirá inaá tí nkehe chónahya kjuachaxin la ko tí nkehe chónkó kixin tí xikaha naxa chrókjuinchexiteyéhérá tí nkehe tinkáchónki chojni.

¹⁰ A ntá jahará la tjásinrá kia ichrén tí yaon la ko tí nitjó la ko tí yaon kia tí nánó. ¹¹ Imá tóxakonna kixin á chónkó tí xra kjuít'a kjuákohará.

¹² Kíchóni, xrxanóahará kixin chrókóyóhara éxi tí janhan kixin janhan mé tóyóhe éxi k'uejorá senó kixin t'etuenhyani tí ley. Janhan la tékahyará ninkehó jie. ¹³ Ó nohará kixin tió saxín kjuákohará tí tan tsaáxin la k'uétsankahyana kixin k'uénina k'uéchonta ijnko chin k'uékjínchekjoténa. ¹⁴ Kjónté xikaha k'uénina la jahará kjuanoáhyará tí janhan la k'uéchontará kjuasáya tí janhan. A ntá jahará la jína kjuánjonrá kjuachaxin kjuak'é ntiha. Éxi chrók'uayéhérá ijnko ángel kuènte Dios o éxi chrók'uayéhérá jehe Ìnchéni Jesucristo mé xikaha kjuak'é jína ntiha. ¹⁵ ¿Nkehe kónhen tí kjuachéhe k'uéchontará? Kixin ntáxrjan kixin jína tí jahará kixin tjinkáonrá kjónté ikonrá chrókuakítsjerá chróchjinará tí janhan. ¹⁶ A ntá ijie la, ¿á ninkákónnará jehó kixin kuinhínrá tí nkehe ntoá xrxanka?

¹⁷ Tí sín í so a la imá tjinkaon sín tí jahará. Kjánchó ntoáhya tí nkehe tjenkayáxin sín kixin jehe sín tjinkaon sín kixin chrókuítqohérá tí jeheni kixin ntá tjinkaon sín kixin jahará chróchréhérá tí jehe sín. ¹⁸ Jína chrókótjinkáonrá tí í so sín kjánchó ntoá chrókjuenkayáxinrá kixin jehya tí chrókjuak'é tí tjejorá

ó chrókuítekáonrá jína. ¹⁹ T'ikonna tí jahará éxí xjeenni. Ijie la imá kjuíncheníhi asenná kixin tóxakonna tí jahará. Éxí yóhe ijnko ínè xjan tsjoté tjan tió sinchekokjíhi tjan xjeen tjan mé xíkaha janhan la naxa tsjasótena kixin tjínkavan kixin Cristo chrókjuinchetjóá tí jahará. ²⁰ Chrókójina ijie naxa chrókjuak'é ntiha ntá ókjé nkexrí chrónixjahará ntá ijie la nonahya nkehe tí tjenkayáxinrá.

Kjuíncheyóexín ch'ín Pablo tí tjan Agar la ko tí tjan Sara

²¹ A ntá jie chrónkará nkehe. Jahará naxa tjínkáonrá chrókjuínchexiteyéherá tí ley tsík'etqan ch'ín Moisés la zá kuíenhyará nkehe chro tí ley? ²² Ntáchro kixin ch'ín Abraham mé chóna ch'án yaá xjeen ch'án la ijnko mé xjeen tjan ch'exón xra la tí í jnko mé xjeen ichjién ch'án mé ijnko tjan t'ítuenhya. ²³ Tí xjeen tjan ch'exón xra kokjíhi ch'án éxí tokjíhi chojni ó. A ntá tí xjeen tí tjan t'ítuenhya la mé ó kokjíhi ch'án kixin tsoxiteyá tí nkehe tsíntáchro Dios. ²⁴ Tíhi mé ntayóaxián. Tí yaá chojni chjin mé tóyóexín tí yaá nkehe tsík'etqan Dios. Tí tjan Agar mé tóyóexín tí ley xránjonxín ijna Sinaí. La ntá tí sín titekaon tíha mé éxí chojni ch'exón xra tí jehe sín kixin t'ítuenhen sín. ²⁵ Mé xíkaha tí tjan Agar mé tóyóexín tí jna Sinaí nación Arabia la tíha tóyóexín tí chjasin Jerusalén kixin tí chjasin la ko tí sín tjejó ntiha la mé t'ítuenhen sín la ko kaín xjeen sín. ²⁶ A ntá tí chjasin Jerusalén itjen nkaya nkajní la mé t'ítuenhya. Náhí. Mé jeheni la kuénteni tíha. ²⁷ Ntáchro xroon itén Dios kixin:

Jaha chojni chjin chontahya chánjan kjónté chrokócháha.

Jaha k'uíkonhya ninkehó kjuatjoté kixin kjuínchekokjéhye xjan la kjónté chrokócháha.

Tí tjan kuítsinkehe na mé nchónhya ínté tjan ts'ikon tjan,

á ntá tí tjan kjuák'eko xii tjan la kánhyó ts'ikon. ††

²⁸ Kíchóni jeheni la éxí yóhèni ch'ín Isaac kixin kaín ni la xjeen Dios kixin xíkaha tsíntáchro ch'án. ²⁹ A ntá éxí senó tí xjan kokjíhi éxí tokjíhi chojni ó la jehe ch'án k'uéchónkíhi ch'án tí xjan kokjéxín kjuachaxién Nchakuen Dios. Mé xíkaha kjaxin sítónhen jie. ³⁰ A ntá ntáchro tí xroon itén Dios kixin: "Tétuènhén tí tjan ch'exón xra sátsji tjan la ko tí xjeen tjan kixin tí xjeen tjan la ts'áyèhya ch'án tí nkehe tsítònhen tí xjeen tí tjan t'ítuenhya." ³¹ Méxra kichó ni, kaín ni la jehya xjeen ijnko tjan ch'exón xra. Náhí. Jeheni mé xjeen tí tjan t'ítuenhya.

Jína chrók'uejorá kixin kuaáxinrá

5 Cristo mé kuaáxinni la ntá ó tí ley la t'etuehyani. Méxra jína chrók'uayakonhénrá tí nkehe kuaáxinrá la í chrókjanhyará chrók'ónará chojni t'ítuenhen inaá.

² Tinhínrá, janhan Pablo mé ntáxrjan kixin tí chrókuará tí xroye á ntá ó chónkó chrókuinkachónkirá Cristo. ³ Tjínkavan tspxrjanka inaá kixin tí jnkojín

nkexro itsa tí xroye la jehe ch'án mé t'ichjánxin sinchexiteyéhe ch'án kaín tí ley tsíkjin ch'ín Moisés. ⁴ A nta jahará la xritjéyará tsotjuáxin ijjará kixin sinchexiteyéherá tí ley la ntá ó kuítqohérá Cristo la ko ó kuítqohérá tí kjuasáyé Dios tjuahará. ⁵ A ntá jeheni la tinkáchónkini Cristo la chóntani Nchakuen Dios la ntá tjejóchónhenni kixin tsjintaxín tsotjóá ijieni. ⁶ Jeheni mé tinkáchónkini Jesucristo la ntá kánhyó tjeoan tí xroye. Añsít tjeoan chrókuinkáchónkini Ìnchéni la ntá tí tinkáchónkini Ìnchéni la chrótjuèheni kichó ni.

⁷ Jahará la jína kjuankixinrá tinkachónkirá Ìnchéni. ¿A ntá nkexro k'uetqan kixin chrókuítqohérá tí nkehe chaxín? ⁸ Jehya nkehe kuénte Dios tí tjejoch'erá méhe. Méxra jehe ch'án la kjueyará ch'án. ⁹ Ntáchro sín kixin tí ch'o t'óna niqtja tsjiko intsíkoá tí xroan nchek'ánki niqtja, á ntá ts'ánki kaín tí ch'o. ¹⁰ A ntá janhan tinkachónkirá Ìnchéni la ko ó nòna kixin jahará kjaxin tinkachónkirá ch'án la kjá í chrókjuenkayáxinhyará í jnko nkehe. A ntá Dios mé sinchekjasóte ch'án tí nkexro ixri tjiXRónkaxín kixin Dios la chrakuenhya ch'án ninkexró.

¹¹ Kíchóni, tí naxa chrókuétqan chrókua chojni xroye la ntá tí sín judío chrókónínkakonnahya sín. Tí xíkaha la chrók'uántaxiènyha sín tí tan jína chrónka nkexrí k'uenxín Cristo tí ntacruz. ¹² Méxra tí sín ntaxakonhanrá la t'etqan sín itsará xroye la íchá jína naá chrók'uát-sínkó chrókóchrít'q sín kaín.

¹³ Jahará kichó ni, la Dios mé kjueyáni kixin tsaáni kjánchó chóntahyani kjuachaxin ch'eni tí nkehe jínahya. Náhí. Chrókjuinkjtsani kichó ni la ko chrótjuèheni kichó ni. ¹⁴ Mé xíkaha tí ley mé t'axrxjén kixin: "Chrótjuèherá kichuárá éxí tjuèxinrá asánrá." ¹⁵ A ntá tí chrókjóntehérá kichuárá la ko chrókjónterá kichuárá la ntá chrókóxakonhanrá kixin tí xíkaha la chrókjuínchek'itjayanrá kichuárá.

Tí jie chrókjuasin chojni la ko tí nkehe t'etqan Nchakuen Dios

¹⁶ A ntá ntáxrjan kixin chrók'uejorá éxí tjínkaon Nchakuen Dios, á ntá chrókjuéyáhyará tí nkehe jínahya chrókjuenkayáxinrá. ¹⁷ A ntá tí nkehe jínahya tjenkayáxinrá la tjanjonko Nchakuen Dios kixin Nchakuen Dios la tjanjonko tí nkehe jínahya la tí iyó nkehe tjenkayáxinrá la tjanjonko kichó. Méxra jahará la xitjahya ch'erá tí nkehe tjínkáonrá chrókjuich'erá. ¹⁸ A ntá tí Nchakuen Dios tjetjinkjtsará, á ntá jehya tí ley t'etuanhanrá jie.

¹⁹ Xrahya ts'ikonni tí jie tjasin chojni jínahya tjenkayáxin. Mé tíha la tí sín tjasinko jie chojni chjin ókjé, la ko tí chojni ch'e tí nkehe jínahya, la ko tí chojni náxrjónhya tjenkayáxin, ²⁰ la ko tí chojni tinkáchónki nkehe tsíkjanqoya, la ko tí chojni nchexroan, la ko tí chojni nínkaon, la ko tí chojni itje kjuanínkaon, la ko tí chojni chjio, la ko tí chojni xrahya tónínkaon, la ko tí chojni tjínkaon jehó tsochóna itsjé nkehe, la ko tí chojni tjínkaon ts'axrjenta, la ko tí chojni t'óxika kichó, ²¹ la ko tí chojni chjinoxínhin, la ko tí chojni tjáya, la ko tí chojni tókoan, la ko tí chojni kóchjinka, la í so nkehe

† Génesis 16.15; 21.2 †† Isaías 54.1 ‡ Génesis 21.10

†† Levítico 19.18

tóyóhē xíkaha. Na mé éxí yóhē senó mé k'uétjonkará la ko ijie la xíkaha tjétjonkará inaá kixin tí nkexro xíkaha tinkákjasin jje mé xitjahya ts'áyéhe sín tí kjuachaxin kuènte Dios.

²² A ntá tió chóntani Nchakuen Dios ntá tsotjuèhēni kichó ni, la ko tsöchéhēni, la ko kjuaxróxin ts'ejóni, la ko tsochónhēni tsóninkakonhyani, la ko jnkojína ts'e-jókoni kichó ni, la ko nchexiteyáni jnkojína. ²³ La ko tsohnkehyan, la ko ts'etuēnhēni asénni kixin tsjasinhyani jje. Kohya nijnko ley chrókjuinchekjasóteni kixin tí jína chrók'uejóni xíkaha. ²⁴ Mé tí chojni tinkáchónki Jesucristo la kaín jje k'uéchónta sín la ko tí jínahya k'uékjenkayáxin sín la ó kjuenkā Ìnchéni kjuák'enkáni ch'án ntacruz. ²⁵ A ntá tí tzejókoni Nchakuen Dios t'ichjánxin tsítóhēni kixin Nchakuen Dios ts'etuēnhēni.

²⁶ Méxra chrókjuinchehnkehyan, la ko chrókjuachaxinhyani kichó ni la ko chrókóchjinoxienhyani.

Tjínkĩtsará kichuárá

6 Kichóni, a ntá tí chrók'uíkonrá jnkojín nkexro kjuasin ichrén jje a ntá tí jahará tí chaxín chontará Nchakuen Dios la chrókjuéntuéhérá sín la chrókjuínkĩtsará sín. A ntá jnkojína chrónixjehérá sín, a ntá jahará la chrókóxakonhanrá kixin xíkahya chrókónhanrá chrókjuásinrá jje kjaxin. ² Tsjínkĩtsará kichuárá kixin jóhya tsamárá tí nkehe ye. Kixin tí xíkaha la ó chrókjuinchexiteyáni tí nkehe t'etqan Cristo.

³ Ntá jnkojín nkexro ntáchro kixin imá tjeotan tí jehe ch'án la chaxínhya tíha la jehó ch'iyēhe asén. ⁴ Jnkojniko chojni chróxraxinkaon á nchoxon tjenkayáxin la chrókónohe kixin ó nchoxon la jehya jehó chrókjuikosáyehe asén. Náhí. Chrókjuikosáyehe í so chojni. ⁵ Kixin jnkojnko chojni yámá tí jje kuènte.

⁶ Tí nkexro xrakohē tí tan jína la chrókjuinkĩtsa sín chrókjuanjon sín nkehe chrók'uáyéhe tí nkexro tjako.

⁷ Sích'iyéhyará asánrá. Kohya ninkexró tsjacha tsjanoá Dios. Tí nkehe ts'enkā chojni la mé xíkahó tsotjá.

⁸ Tí t'enkā chojni tí nkehe jínahya tjenkayáxin sín la tí

nkehe jínahya tsjacha sín mé ts'enxín sín. A ntá tí nkexro ts'enkā tí nkehe tjinkaon Nchakuen Dios la Nchakuen Dios mé tsjanjon tí kjuachón jnkochrín ts'áyéhe sín. ⁹ Mé xíkaha chrókóxrjéhyani chrókjuich'eni kaín nkehe jína kixin tí tsóxrjéhyani la ntá chaxín tsjixraká tí yaon tsjachani ts'áyéhe ní nkehe jína. ¹⁰ Méxra xíkaha xráxin chrókjuich'eni nkehe jína la antsí t'ichjánxin chrókjuinkĩtsani tí sín kichó ni tinkáchónki Ìnchéni.

Ch'ín Pablo nchexraxinkaon tí sín ntiha la ko kjuixín nixja ch'án

¹¹ Tsjehérá kixin imá ihyé tí letra tjékjinxian tjaná. ¹² Tí sín tjinkaon ts'etuāhanrá kixin chrókuará xroye la jehí tjinkaon sín tsjikosáyehe sín chojni la tjinkakonhya sín kixin chrókjuasótēxin sín tí ntacruz kuènte Cristo.

¹³ Kjonté tí sín tsíka xroye la nchexiteyáhya sín kaín tí nkehe t'etqan tí ley. A ntá tjinkaon sín kixin chrókuará xroye kixin ntá kjaxin sín tsohnke sín kixin tsontáchro sín kixin jahará kjaxinrá tjinkáonrá tsochontará xroye tí cuerpo kuèntará. ¹⁴ A ntá janhan mé tóxrjínahya sijn-tahnke ninkehó. Íchá jína chróntáxrjan kixin Cristo k'uenyákonhēni. A ntá xíkaha k'uenxín Cristo tí ntacruz la ntá tí nkehe k'uék'etqan kuènte chjasintajni la kjaxin k'uitjayan la ko janhan kjaxin kuítqahá tí nkehe kuènte chjasintajni. ¹⁵ La ntá ninkehó sínkíhya á tsíka chojni xroye o náhí. Tí nkehe sínkí la chrók'ónani ijnko chojni njxin. ¹⁶ A ntá tí sín ts'áyéhe kjuaxróxin kixin kuikonóhē Dios tí jehe sín la mé kaín tí sín kuítekaon tí nkehe t'etqan ch'án mé kaín tí sín chaxín tsík'óna xjeen ch'án.

¹⁷ A ntá ijie la tjínkakonhya kixin chrók'uekana jje ninkexró. Janhan mé chaxín chonta tí tsíkatsōenxín tsíchrit'o cuerpo kuèntana kixin kjuasótēxinna kixin kjuít'ahā xrā Ìnchéni Jesús.

¹⁸ Kichóni tjáncháhā Ìnchéni Jesucristo kixin kjuasáyé ch'án chrókjuincheyaon ch'án kaín rá. Mé xíkaha tsoxiteyá. Amén. Ó tjen.

EFESIOS

Ch'in Pablo ikjin xroon k'uáyéhe tí n̄nko chjasin Éfeso

1 Janhan Pablo tsíkjeýána Jesucristo kixin xikaha tjinkaon Dios tsjàkua itén ch'án. Janhan mé ikjian tí xroon chr'anhánrá tí jahará tjejorá chjasin Éfeso tinkachónkirá Dios la ko títekáonrá Cristo Jesús. ²Tjéjtáncháha It'éni Dios la ko Ìnchéni Jesucristo kixin kjuasáyé ch'án chrókjuintayaonrá ch'án la ko chrótjáhará ch'án kjuaxróxin.

Ts'áyéheni tí nkehe jína kuènte Cristo

³ Chjéheni kjuasáya Dios mé It'é Ìnchéni Jesucristo. Jeheni mé tinkáchónkini Jesucristo la mé xikaha jehe ch'án mé kjuíncheyaonni ch'án kixin kaín nkehe jína t̄xin nkaya nkajní kjuanjón ch'án. ⁴ Dios mé kjueyá ch'án tí jeheni kixin chrókuinkáchónkini Cristo tí naxa t'ónahya chjasintajni. Tjinkaon ch'án kixin chrók'uejóni tí t̄jen ch'án ntá kjuínchetjójáni ch'án kixin kaín jie kjuatsenhenni ch'án. ⁵ Imá tjuèhe Dios tí jeheni ntá tsíkjeýáni ch'án kixin ts'ónani xjeen ch'án kixin kuinkáchónkini Jesucristo. Mé xikaha tsíkjenkayáxin ch'án kixin xikaha kóxrjính̄in ch'án. ⁶ Méxra imá tjancheheni kjuasáya Dios kixin kjuíncheyaonni ch'án kixin ó tinkáchónkini tí Xjeen ch'án, imá tjuèhe ch'án. ⁷ Imá tjuèhe Dios tí jeheni la xikaha kuaáxinni ijn̄ié tí Xjeen ch'án k'uít̄ji la xikaha tsj̄iixín kaín ijjéni. ⁸ Dios kjuakox̄in ch'án kixin imá tjuèheni ch'án. Kjuanjón ch'án kaín kjuachaxin kixin chrókuienx̄inni jína la ko kjuanjón ch'án kjuaxrexinkaon jína. ⁹ Dios kjuínchenoheni tí nkehe jehó ch'án t̄jenkayáxin ch'án, mé tí nkehe tóxrjính̄in ch'án tsoxiteyá. ¹⁰ Tí nkehe tsíkjenkayáxin ch'án la tsoxiteyá tí yaon tsíchrónka ch'án. La ntá jehe ch'án tsjanjón kjuachaxin kixin Jesucristo ts'et̄uēnhen ch'án kaín xín nkehe siín nkaya nkajní la ko chjasintajni.

¹¹ Dios kjueyáni kixin chrókuinkáchónkini Cristo la ntá xikaha chrók'uáyéheni tí nkehe tsík'áyéhe ch'án. Kaín tíha la mé xikaha t̄sonhen éxí tóxrjính̄in Dios.

¹² Mé xikaha kjuích'e ch'án kixin ntá jeheni kuítekaonni Cristo saox̄in chrók'uejóni chrókjuancheheni kjuasáya Dios kixin tí kjuachaxin jie chón̄ta ch'án. ¹³ A ntá k̄j̄axin jahará ó kuinhínrá tí tan jína ntoá chrónka nkexr̄i tsaáxinni, a ntá ó kuinkachónkirá Cristo. La ntá jnkokóá k'uáyéheni Nchakuen Dios k'ónani xjeen ch'án kixin tinkáchónkini ch'án. Mé xikaha ó xiteyá tí nkehe tsintáchro ch'án. ¹⁴ Tí Nchakuen Dios kuj̄tonhenni mé kjuínchenoex̄inni Dios kixin tsakjani kaín nkehe tsjanjón ch'án tió tsaáxin kaín ni tinkáchónkini

ch'án. Ntá xikaha kaín ni tsjancheheni kjuasáyé ch'án kixin tí kjuachaxin jie chón̄ta ch'án.

Ch'ín Pablo kjuanchehe Dios kixin ant̄sí chrókónohe tí s̄in tinkáchónki Ìnchéni

¹⁵ Méxra ó kuinh̄an kixin imá tinkachónkirá Ìnchéni Jesús la ko imá tjuèhéra kaín tí í so s̄in tinkáchónki Dios. ¹⁶ Ntá janhan nunca t̄tuahya nixjah̄a Dios tjáncháha kjuasáya kixin ó tinkachónkirá ch'án. ¹⁷ Tjénixjah̄a Dios, mé jehe ch'án mé ichr'án Ìnchéni Jesucristo, mé It'éni imá t̄jetoan la tjéjtáncháha ch'án kixin tsotjáhará ch'án kjuaxrexinkaon jína kuènte Nchakuen ch'án kixin ntá ant̄sí chrókuiénx̄inrá jína tí nkehe kuènte ch'án kixin ntá ant̄sí má chróchox̄inrá ch'án. ¹⁸ K̄j̄axin tjéjtáncháha Dios kixin tsjink̄itsa ch'án tsjanjón ch'án ijnko kjuaxrexinkaon jína kixin ntá t̄sonohará ts'ejochonhénra kixin xikaha kjueyará ch'án. La ko t̄sonohará kixin imá t̄jetoan tí nkehe sinchek̄itonhenni ch'án kixin jeheni mé tinkáchónkini ch'án. ¹⁹ La ko k̄j̄axin tjéjtáncháha Dios tsjink̄itsará ch'án t̄sonohará kixin tí kjuachaxin kuènte ch'án mé ijnko nkehe imá jie noehyani nket̄í kjuèx̄in. Tí kjuachaxién ch'án mé nchexraxinkaon tí s̄in tinkáchónki ch'án. Jnkokón tí kjuachaxin chón̄tani la ko tí kjuachaxin imá jie kjuakox̄in ch'án ²⁰ tió kjuínchexechón ch'án Cristo. Ntá Cristo sákjuj̄ kjuák'et̄j̄axin ch'án t̄ja ch̄jina tí It'é ch'án it̄jen nkaya nkajní. ²¹ Mé xikaha kjuanjón Dios kjuachaxin kixin Cristo ts'et̄uēnhen ch'án kaín xín gobierno la ko kaín tí s̄in t'et̄oan. Ijie t̄jet'et̄uēnhen ch'án kaín xín nkehe siín chjasintajni la ko chr'èx̄in ts'et̄oan ch'án k̄j̄axin. ²² Cristo k'uáyéhe ch'án kjuachaxin ts'et̄uēnhen kaín xín nkehe siín. Jehe ch'án mé ts'et̄uēnhen kaín tí s̄in k'óna n̄nkoé ch'án. ²³ Tí n̄nko mé éxí tí cuerpo kuènte ch'án la jehó ch'án mé t'et̄uēnhen ch'án. Jehó ch'án mé kuènte ch'án kaín xín nkehe siín.

Kuaáxinni kjuachaxién Dios

2 La ntá ijie Dios mé kjuínchek̄itonhanrá tí kjuachón jnkochr̄ix̄in kixin tinkachónkirá Cristo. Senó la jahará la éxí tsík'enrá kixin tí jínahya k'uék̄j̄ich'erá la ko tí jie k'uék̄j̄ásinrá. ² Mé xikaha k'uék̄chréhérá éxí s̄itónhen chjasintajni. K'uék̄j̄inchesiteyéhérá éxí tóxrjính̄in tí nchakuen jínahya t'et̄uēnhen tí xr̄int̄o la ko t'et̄uēnhen kaín xín tí chojni titekakuenhya Dios. ³ Kaínni xikaha k'uék'ejóni tí ósé a naxa kjuínchexiteyéhēni tí nkehe ntáchro as̄enni la ko kjuínchexiteyáni tí kjuaxrexinkaon jínahya k'uéchón-

tani. A ntá tí naxá xikahó chrókjuich'eni la Dios imá chrókjuinchekjásóteni éxí tsjasóte tí í so sín. ⁴ A ntá Dios mé imá kúikonóeheni ch'án la ko imá tjuèheni ch'án. ⁵ La ntá kjuanjón ch'án tí kjuachón éxí chóna Cristo. Jeheni la éxí chojni tsík'en k'uék'ejóni xikaha kixin tí jie k'uékjasinni. A ntá jie kjuasáyé Dios tsaáxin-rá ch'án. ⁶ Dios mé kjuínchexechón Cristo Jesús la ko kjaxin jeheni tsoxechónni kixin ts'ejókoni ch'án nkaya nkajní. ⁷ Mé xikaha kjuích'e ch'án kjuakoxin ch'án la naxá tjetjakoxin ch'án kixin tjuèheni ch'án la ko kjuínkítsani ch'án kixin tinkáchónkini Cristo Jesús. ⁸ Kjuasáyé Dios kixin kuaáxinrá ch'án kixin tinkáchónkirá ch'án kixin táha la jehya jahorá k'uitjará tíha. Náhí. Táha la mé kjuasáyé Dios kixin tjáhará ch'án. ⁹ Kixin jehya ichrén nkehe jina kjuích'eni kixin chrókjuinchehnkexinni. ¹⁰ Dios mé kjuích'éna tí jeheni ntá chr'éxin kjuínkítsa ch'án kixin tsinkáchónkini Cristo Jesús, kixin ntá chrókjuich'eni tí xrá jina kixin xikaha tsíkjenkayáxin ch'án tí senó a.

Kjuaxróxin tjejóni kixin tinkáchónkini Cristo

¹¹ Méxrá jahará la jehya chojni judíora. Mé tí sín judío nta'ínrá sín chojni chóntahya tí xroye tí jahará. A ntá tí sín judío, mé tí sín itsa sín xroye cuerpo kuènte sín, mé nchek'in sín asén sín tí chojni chóna xroye. ¹² Xráxinkáonrá kixin tí senó la k'úechonhyará Cristo. Jahará la jehya kuènte tí nació Israel la xikaha k'uéchonhyará tí nkehe tsík'etóan Dios la ko tí nkehe tsín-táchro ch'án tsjanjón ch'án. Mé xikaha k'uék'ejorá la k'uéchonhyará Dios la k'uéchoénhyará kixin chrókuaará. ¹³ La ntá ijie la ó tinkáchónkirá Cristo Jesús. Jahará tí ósé imá ikjín k'uék'ejorá. La ntá jie la ó kóchjineherá ch'án kixin k'uenyákonhánrá ch'án, k'uitji ijní ch'án. ¹⁴ Jehe Cristo mé tjejóxinni kjuaxróxin. La ntá tí sín judío la tí sín jehya sín judío ntá jie jnkokóá chrókjuenkayáxin sín kixin k'óna éxí jnkokóá chjasin. Cristo k'óxíka ch'án tí kjuanínkaon éxí ijnko tjat'ó k'uínkákónhen. ¹⁵ Jehe ch'án kjuasóte ch'án, la kjuat-sen ch'án tí ley. Tí iyó chjasin k'uéj kjuích'éna ch'án jnkokóá chjasin nixin kixin tinkáchónki sín ch'án. Mé xikaha kjuanjón ch'án kjuaxróxin. ¹⁶ Mé xikaha k'uenyákonhenni ch'án k'uenxín ch'án tí ntacruz la kjuakjiin ch'án tí kjuanínkaon k'uék'ixín tí iyó chjasin k'uékjanjón sín kixin ntá kjuaxróxin ts'ejóko sín Dios la kaín sín jnkokóá k'óna éxí jnkokóá cuerpo kuènte ch'án. ¹⁷ Cristo mé ikui la kjuakoxe ch'án kaín chojni tí tan jina kixin kjuaxróxin ts'ejóni kaín ni, mé tí jahará kjónté k'uék'ejorá ikjín tí tje Dios la ko kjaxin tí sín chjinaxón k'uéj. ¹⁸ A ntá kjuachaxin kuènte Cristo la kaín ni kjónté jeheni ó í so chojni mé tsochjineheni It'eni Dios kixin jnkokóá k'uáyéhéni Nchakuen ch'án. ¹⁹ A ntá jahará la tóyóahyará chojni tsíkjin ókjé la ko jahará la jehya ókjé chjasin tjejorá. Kaínni la chóntani kjuachaxin kixin kaín ni la tinkáchónkini Dios la kaín ni la k'ónani chojni kjéhya ch'án. ²⁰ Jahará la mé tsík'ónará ijnko nchia tjat'ó jie k'óna chrítaón tí xró k'uejo tí sín kjuéyá Jesús la ko tí sín tsíchr'án Dios chrónka itén ch'án ósé. La ntá

Jesucristo mé tí xró imá t'etóan kuènte tí tjat'ó a. ²¹ Tí xrankíxín mé Cristo la chrítaón k'óna kuènté nchia la tinkák'ánki tí nchia kixin jina tsjak'e, ntá tsjixraká kixin ts'óna ijnko njnko tjóá kuènte Ìnchéni. ²² Mé xikaha jahará tinkáchónkirá Cristo la tsojnkotsérá kaín rá ts'óna éxí ijnko nchia kuènte Dios la ntaha tsjak'exenhen tí Nchakuen ch'án.

Ch'ín Pablo k'uáyéhe ch'án tí xrá tsjakoxe ch'án tí sín jehya judío tí tan jina

3 Mé xikaha janhan Pablo mé tjechjinaxián tí tjákua itén Cristo Jesús kixin jina ts'ejorá kjónté jehya chojni judío tí jahará. ² Chrókónohará kixin kjuasáyé Dios kjuanjón ch'án tí xrá k'uayáha kixin tsjakohará. ³ Dios mé kjuakoxin tí nkehe tjenkayáxin ch'án ninkexró noehya mé kjuínchenóna tíha la ntá xikaha ikjian ijnko xroon kánhyó tsjé nixja k'uayéhérá. ⁴ Tíó sijnchekuáxinrá tíha ntá tsojnohará kixin ó nóna tí nkehe kuènte Cristo ninkexró k'uénoehya. ⁵ Tí nkehe la ninkexró k'uénoehya tí ósé a. A ntá jie kjuachaxin kuènte Nchakuen Dios la Dios kjuínchenoexín tí sín kjuéyá Jesús ch'ehe ch'án xrá la ko tí sín chrónka itén ch'án. ⁶ Tí nkehe ninkexró k'uénoehya la tíhi: Kuínhin tí sín jehya judío tí tan jina kixin nkexrí tsaáxin sín la ntá tí sín jehya judío la ó jnkokón ts'áyéhe sín nkehe jina éxí ts'áyéhe tí sín judío. La ntá jnkokóá ts'óna sín tí cuerpo kuènte Cristo la jnkokón ts'áyéhe sín kaín tí nkehe tsíchrónka Dios sinchexiteyá Cristo Jesús.

⁷ Janhan k'uékítekakónhya, a ntá jie kjuasáyé Dios kjuanjón ch'án tí xrá i sít'a kixin tsjakua tí itén ch'án kixin tí kjuachaxin kuènte ch'án. ⁸ Janhan mé kánhyó tjeoan kixin janhan la imá intsína la kaín tí í so sín tsíkjinchetjóá Dios la antsí tjeoan sín. Kjónté la Dios mé kjuínchekjónna tí xrá imá tjeoan kixin tsojtjanka tí sín jehya sín judío tí tan jina nkexrí imá tjeoan tí nkehe kuènte Cristo. ⁹ La k'uayáha tí xrá tsojtjanka kaín xín chojni nkexrí tsíkjenkayáxin Dios tí ósé kixin nijnko nkexro k'uénoehya tíha. Mé jehe ch'án mé kjuích'éna ch'án kaín xín nkehe. ¹⁰ Mé xikaha kónhen kixin ntá tí sín kuènte njnko tsjakuexin sín kaín xín tí sín t'etóan nkaya nkajní kixin tsojnohe sín kixin xikaha kaín nkehe jina tsíkjenkayáxin Dios. ¹¹ Kaín tíha kjuích'e Dios éxí tsíkjenkayáxin ch'án ntá Ìnchéni Jesucristo la ó kjuínchexiteyá tíha. ¹² Kjuasáyé Cristo ntá ó chóntani kjuachaxin tsochjineheni Dios kixin tinkáchónkini ch'án. ¹³ Méxrá xrjanóahará kixin chrókujtoéhyará chrókuinkáchónkirá ch'án kjónté tjetjasótena kixin kaín tíha kónhen kixin jahará chrók'uejoxinrá jina.

Cristo imá tjuèheni

¹⁴ Méxrá xikaha tjak'éxian tóch'ian nkayakon It'é Ìnchéni Jesucristo. ¹⁵ Mé tsík'áyéhe ihnié Dios kaín xín chojni tinkáchónki ch'án mé tí sín síin nkaya nkajní la ko tí sín síin chjasintajni. ¹⁶ Tjancháha It'eni kixin tsjanjón kjuachaxin kuènte ch'án ts'ayéhérá kjuachaxién Nchakuen ch'án ¹⁷ kixin Cristo chróchóna asánrá kixin tinkáchónkirá ch'án la ntá ntoá chrók'uejorá éxí ijnko

nta tsíkji nuèe ninka la chrótjuèhéra kichuára. ¹⁸ Ntá jahará la ko tí í so sín tinkáchónki Ìnchéni mé chrókuiénxinrá nkexrí tonxín la ko kójnxín la ko nínkaxín la ko ntétoxin kixin nkexrí tjuèheni Cristo.

¹⁹ Tjáncháha Dios kixin antsí chrókónohará nkexrí imá tjuèhe ch'án tí jeheni mé antsí má tjuèheni ch'án la tsjachahyani tienxinni kaín tíha. A ntá tí jehe ch'án chrókjuinkitsani ch'án la antsí chrókuiénxinni tí kjuachaxin kuènte ch'án.

²⁰ Ijie la chjéheni kjuasáya Dios kixin jehe ch'án chón-ta kjuachaxin tsjanjon ch'án antsí má tsjé nkehe que tí nkehe kjuanchiani o tí nkehe kjuenkayáxinni. Mé tsjanjon ch'án kaín tíhi kjuachaxin kuènte ch'án mé tsjinkitsa tí jeheni. ²¹ Kjuasáyé Dios itjen jnkochrín kixin Cristo Jesús kjuínchekaá ch'án tí nínko, mé xikaha ó xiteyá jnkochrín. Amén.

Jína chrók'uejókoni kichó ni kixin chóntani Nchakuen Dios

4 Janhan mé tjéchjinxian tí xra kuènte Ìnchéni. Méxra xranóahará kixin jína chrók'uejorá kixin xikaha Dios tsíkjeýá tí jahará. ² Méxra chrókjuínchehnkehyará la ko chrókójiyahará la ko chrókójinará chrókóninkákonhyará la ko chrótjuèhéra kichuára. ³ Méxra jína chrók'uejokoará kichuára kixin chrókjuinkitsa Nchakuen Dios kjuaxróxin chrók'uejorá la ko jnkokoá chrókjuenkayáxinrá. ⁴ Itjen jnkokoá cuerpo la ko itjen jnkokoá Nchakuen Dios la ko Dios k'uíyehé kaín ni kixin jnkokoá nkehe ts'ejóchónhenni. ⁵ Chóntani jnkokoá Ìnchéni la ko jnkokoá nkehe tinkáchónkini la ko ó jnkokoá vez kuíkiteni. ⁶ Itjen jnkokoá Dios la jehe mé It'é kaín chojni. Jehe ch'án mé t'ayakonhen ch'án kaín nkehe la ko t'etuèhenen ch'án kaín nkehe.

⁷ Jnkojnkonni k'uáyéheni kjuachaxin sich'ehe ni Dios xra kixin xikaha kjuanjon Cristo. ⁸ Méxra xikaha nixja xroon itén Dios kixin:

“Jehe ch'án sákjuj ch'án nkaya nkajní la ko sákjujko ch'án tí sín tjejóchjina,

la ntá kjuínchekitonhen ch'án chojni jnkojnko kjuachaxin kuènte ch'án.” †

⁹ ¿Ntá nkexrí t'axrjéxin kixin sákjuj ch'án? Tíhi mé t'axrjéxin kixin jehe ch'án mé senó k'uínkajinxín ch'án nkaya nkajní la kjuák'e ch'án chjasintajni. ¹⁰ Jehe ch'án mé k'uínkajinxín ntiha mé ntá jie sákíkjí ch'án tí nkajní imá noi. La ntá tjet'etuèhenen ch'án kaín xín nkehe.

¹¹ Jehe ch'án mé kjuínchekitonhen ch'án ijnko kjuachaxin jnkojnko chojni. Kjuéyá ch'án iso chojni k'óna apóstol la ko í so sín tsochrónka sín tí nkehe kjuínchenohe sín Dios la ko í so sín tsochrónka sín tí tan tsaáxinni. La ko kjuéyá ch'án í so sín ts'óna pastor la ko í so sín tsjako sín itén ch'án. ¹² Mé xikaha tí xra k'uáyéhe tí sín kjuéyá ch'án kixin sich'ehe sín ch'án xra kixin ntá ts'ánkí tí sín k'óna tí cuerpo kuènte Cristo.

¹³ Ntá xikaha kaín ni jnkokoá tsinkáchónkini tí Xjeen Dios la ko tsochóxinni ch'án jína kixin ntá xikaha ts'ónani chojni ntoá nchexiteyá la ko chrókónoheni éxi

nkexrí tjinkaon Cristo. ¹⁴ Méxra chrók'ónahyani éxi xjan ntsínsí. Tí xjanntsí la xrahya tsjinkí kjuaxrexinkaon éxi ijnko nkehe sákjuiko xrinto xikaha kixin sich'iyehé sín chojni ijnko nkehe nixin la xrahya titekaon sín. Tí chojni ch'ia tjinkaon sín tsjachroeni sín ijnko ntja ntoáhya kixin chok'uitjáyenheni Cristo ntá chrókjuasinni jie. ¹⁵ A ntá íchá jína chrónixjani tí nkehe chaxín ntoá la kaín asénni chrótjuèheni kichó ni ntá xikaha chrókónoheni kixin xikaha tjinkaon Cristo. Jehe ch'án mé tí kja t'etuèhenen tí cuerpo kuènte ch'án. ¹⁶ A ntá kjuachaxièn Cristo kuenté tí cuerpo, tí ch'e xra jnkokón la tjinkitsa kuenté. Ntá jnkojnkonni jína ch'eni xra la mé xikaha ts'ánkí tí xra kuènte ch'án la mé jína chrótjuèheni kichó ni.

Tí kjuachaxin nixin kuènte Cristo

¹⁷ Tíhi mé ntáxrjan la ko tétuèhanhá kjuachaxièn ih-nié Ìnchéni. Ijie la chrók'uejohyará éxi ch'e tí sín chónhya Dios. Kaín nkehe tjenkayáxin sín la ntoáhya tíha.

¹⁸ Tí nkehe tjenkayáxin sín la sítié la chónhya sín tí kjuachón tjanjon Dios kixin tienxínnya sín kixin chrohya tsitekaon sín Dios. ¹⁹ Ó tsíkjinchek'itjáyan sín tí kjuaxrexinkaon kuènte sín la í tósuehya sín chrókjuasin sín jie. Imá tóxrjínjin sín chrókjuich'e sín kaín nkehe jínahya. ²⁰ A ntá jahará xikaha xrakohará tí nkehe kjuako Cristo, ²¹ tí chaxín kuinhínrá kuènte ch'án la ko tsíxrakohará tí nkehe chaxín ntoá kuènte ch'án. ²² Méxra tjtóhéra tí kjuaxrexinkaonntaxin k'uék-jenkayáxinrá ósé k'uék'ejorá mé ijnko nkehe jínahya naxa t'ayahará. ²³ Jahará t'ichjánxin kixin chrókónixín tí kjuaxrexinkaon kuèntará la ko tí nchakuanrá. ²⁴ Méxra chrókuákjára tí kjuaxrexinkaon nixin kjuích'éna Dios xikaha tjinkaon ch'án la ntá chrókjuákoxinrá ijnko ntja jína ntoá.

²⁵ Méxra chrókujtóhéra tí kjuach'ia. Méxra jnkojnkorá chrónixjehéra kichuára ntoá kixin kaín ni tsík'ónani jnkokoá cuerpo.

²⁶ Tí chrókóninkáonrá la chrókjuásinhyará jie la chrókóninkákonhyará kuenté yaon. ²⁷ Chrókujtóéhyará kixin Tsochren chrókjuít'ayahará.

²⁸ Tí jnkójínrá kuèrá la tjtóhéra kjuachee. Íchá jína kixin itjára chrókjuich'exínrá xra kixin tsochontará chichaon sijnchekitonhénra jnkójín nkexro t'ichjánxinhin.

²⁹ Nixjahyará tí nkehe náxrjónhya. Nixjará ijnko tan jína kixin tsjinkitsará ts'ánkí kjuaxrexinkaon kuènte kichuára la xikaha tsjinkitsará tí sín tjejótinhin.

³⁰ Nchek'ávahyará tí Nchakuen Dios kixin tíha mé k'uayéxinrá éxi ijnko xroye kixin tsonoaxínrá kixin jahará mé tinkáchónkirá Dios la ko tsochonhénra tí yaon itsi ch'án ntá tsjintaxín tsaará.

³¹ Tjtóhéra tí kjuanínkaon chontará la ko tjtóhéra tí nkehe ntoáhya tjenkayáxinrá la ko tjtóhéra tí kjuang-ton la ko kaín nkehe jínahya. ³² A ntá chrókójinará chrókujkonóhéra kichuára. Sijnchek'itjáyenhénra ijie kichuára kixin Dios kjuatsen tí jie chontará kixin tinkáchónkirá Cristo.

† Salmo 68.18

Jína chrók'uejó tí sín k'óna xjeen Dios

5 Jahará ó k'óna xjeen Dios la tjuahará ch'án. Méxra chrókóxakonhanrá chrókjuákoxinrá éxi kjuákoxin tí jehe ch'án. ² Chrótjuèhérá kichuára éxi Cristo tjuèhe tí jeheni kixin jehe ch'án la k'uenyákonhenni ch'án, éxi yóhe ijnko kolélo xikaha kjokehé sín Dios la kóchéhe Dios k'uáyéhe ch'án tí xraxé náxrjón. ³ Ntá jahará mé tsík'ónará chojni kuènte Dios la ntá chrónixjahyará kuènte í jnko chojni chjin ókjé chrókjuásinkoará jje la ko chrókjuenkayáxinhyará ninkehó nkehe náxrjónhya la ko chrókjuakéhya asánrá tí nchónhya nkehe chróchontará. ⁴ Chrónixjahyará ijnko nkehe náxrjónhya o ijnko nkehe chónkó o ijnko nkehe tjuáhya kixin jehya kuènte Cristo tíha. Íchá jína antsí má chrókjuancheherá Dios kjuasáya. ⁵ Ó nohará kixin tí nkexro tjasinko jje í jnko chojni chjin ókjé la ko tí nkexro ch'e tí nkehe tjuáhya la ko tí nkexro tjak'e asén sín tí itsjé nkehe chróchóntha sín la mé tíha ó yóhe tí nkexro tinkáchónki nkehe tsíkjanoya xikaha. Mé tí nkexro xikaha ch'e mé tsjachahya ts'ixenhen tí tjet'etjan Cristo la ko Dios. ⁶ Méxra tjánjonhyará kjuachaxin sit'ayahará ninkexró chrónka tí nkehe chónkó. Méxra xikaha ntá itsi tí kjuáninkaon kuènte Dios la tsjasóte tí sín titekakuenhya sín tí jehe ch'án. ⁷ Méxra chrók'uítohyará tí sín xikaha ch'e. ⁸ Senó la k'uék'ájirá ntja sítié. A ntá ijie ó k'ónará chojni kuènte Ìnchéni la ó xritjejórá tí ntja t'inkaséyan kuènte ch'án. Méxra tjenkayáxinrá jína éxi tí sín xritjejórá tí ntja t'inkaséyan. ⁹ Tí t'inkaséyan t'axrjeníxin kaín nkehe jína la ko tí nkehe chaxín la ko tí nkehe ntoá. ¹⁰ Tóxakonhanrá chrókjuich'erá tí nkehe tóxrjínhjn Ìnchéni. ¹¹ Tankiéhyará tí sín ch'e xra náxrjónhya mé tí sín a ch'e xra tí sítié. Íchá jína tsjákoxinrá tí xra tí itjen tí t'inkaséyan. ¹² Chrókósuèhèni chrónixjani kuènte tí nkehe imó ch'e tí sín jínahya. ¹³ Tí t'inkaséyan mé tsonoxíxin kaín xín nkehe la mé tí xrohi ts'ikonxínni jína kaín nkehe. ¹⁴ Mé xikaha ntáchro xikihi: T'áya jaha tjéchrían t'inkatjenxian tí síin tí sín tsík'en. Cristo mé tjetjoka xrohi. ¹⁵ Méxra imá chrókóxakonhanrá jnkojína chrók'uejórá. Jehya éxi tí sín noehya chrók'uejórá. Náhí. Chrók'uejórá éxi ijnko chojni nohe má. ¹⁶ Chrókóxakonhanrá chrókjuich'erá xra tí jie kixin itsi ijnko yaon jínahya xitjahya s'ich'erá xra. ¹⁷ Chrókólontjhyará. Chrókóxakonhanrá chrókuiénxinrá tí nkehe tóxrjínhjn Ìnchéni. ¹⁸ Chrókókoanhyará kixin tíha mé chrók'uitjáyanxinrá. Íchá jína chrókjuánjonrá kjuachaxin chrók'uetuanhanrá Nchakuen Dios. ¹⁹ Chrónixjéxinrá kichuára tí salmo la ko tí himno la ko chrótsjerá la xikaha kaín asánrá chrókjuancheherá kjuasáye Ìnchéni. ²⁰ Jnkochríxín chjehérá kjuasáya It'éní Dios kixin kaín nkehe kjuanjón ch'án la ko chrókjuanchaxínrá kjuasáya kjuachaxién ihnié Ìnchéni Jesucristo.

Jína chrók'uejókoní tí sín kjéhyani kixin tinkáchónkini Ìnchéni

²¹ Titekákonhénrá kichuára kixin ó tinkachónkirá Ìnchéni. ²² Tí chojni chjin chrókjuinchexiteyéhe xii sín éxi nchexiteyéhe sín Ìnchéni. ²³ Tí chojni ntoa chóntha kjuachaxin ts'etuenhen ichjién éxi Cristo mé ikja t'etuenhen tí njnko. Kjaxin jehe ch'án kjuínchekaá ch'án tí njnko, mé tí cuérpóé ch'án. ²⁴ Méxra éxi tí njnko nchexiteyéhe Cristo mé xikaha kjaxin tí chojni chjin chrókjuinchexiteyéhe tí xii. ²⁵ Tí chojni ntoa chrótjuèhe tí ichjién kixin éxi Cristo la tjuèhe tí njnko la k'uenyákonhen ch'án. ²⁶ Mé xikaha kjuích'e Cristo kixin sinchetjóá ch'án tí njnko mé kjuínchetjuáxin ch'án tí ntá kuikitexín sín kjuachaxién itén ch'án. ²⁷ Ntá tsjanjon ch'án tí jeheni éxi ijnko njnko imá jína chónthahya jje la ko chónthahya ninkehó nkehe náxrjónhya, mé ijnko njnko tjóá la ko ntoá. ²⁸ Mé xikaha tí chojni ntoa chrótjuèhe tí ichjién sín éxi tjuéxín ch'án cuérpóé ch'án. Tí nkexro tjuèhe ichjién mé kjaxin tjuèhe asén ch'án. ²⁹ Kohya ninkexró nínkakonhen tí cuerpo kuènte. Kaín chojni la ine sín la t'ayakonhen sín cuérpóé sín la mé xikaha Cristo t'ayakonhen tí njnko. ³⁰ Kaínni mé k'ónani cuerpo kuènte ch'án. Jeheni mé ntóe ch'án la ko huésóé ch'án. ³¹ Ntáchro kixin: "Méxra ijnko chojni ntoa mé tsítóhe it'é la ko iné kixin tsakja ichjién la yóí sín mé ts'óna éxi jnkokóá chojni." ³² Tíhi mé ijnko nkehe imá jíé tienxínhya ninkexró. Mé janhan xrxanka kuènte Cristo la tíha mé njnkoé ch'án. ³³ Méxra kjaxin tjéxrjanka kixin chojni ntoa t'ichjánxin tsotjuèhe ichjién sín éxi tjuéxín asén sín la tí chojni chjin chróchónthehe sín kjuasáya tí xii sín.
6 Jahará chánjanrá la t'ichjánxin s'inchexiteyéhérá it'ará la ko inára kixin tjuèherá Ìnchéni kixin tí xikaha mé jína. ² Tí nkehe saxóxín tsík'ítuenhenni kixin chrókuitekaonni ntá chrókjuanjón Dios nkehe mé tíhi: "Chrókjuíkosáyehérá it'ará la ko inára ³ kixin mé náxrjón chrók'uejórá la isé chrók'uejórá ntihi chjasintajni." ^{††}
⁴ Jahará it'é xjan la chrókjuínchekónínkakonhyará tí xjaanrá. Íchá jína kixin s'inchek'ánkíxinrá xjaanrá ijnko kjuaxrexinkaon jína kixin ts'ánkíxin xjan tsinkáchónki xjan Ìnchéni.
⁵ Jahará chojni ch'e xra mé chrókuítekákónhénrá tí lámóará ntihi chjasintajni la chróchontehérá sín kjuasáya. S'ich'eherá sín xra éxi ch'eherá xra Ìnchéni Cristo.
⁶ Chrókjuich'erá xra jína la jehya kixin tí tjejó sín tjejótsjehe sín kixin ntá xikahó ntá jína chrók'uejoxínrá. Náhí. Éxi ch'eherá xra Cristo kaín asánrá s'ich'erá xra kixin mé xikaha tóxrjínhjn Dios. ⁷ Kaín asánrá chrókjuich'erá xra éxi ch'eherá xra Ìnchéni la jehya éxi chojni ó chrókjuich'eherá xra. ⁸ Ó nohará kixin jnkojnko nkexro kjónté ch'exón xra o kjónté chojni t'ítuenhya mé jnkojnko sín ts'áyéhe sín tí nkehe tsjanjon Ìnchéni kixin nkexrí tí xra jína kjuích'e sín.

† Génesis 2.24 †† Éxodo 20.12; Deuteronomio 5.16

⁹ Tí jahará chojni lamó mé jnkójina chrókuétuēnhén-
rá tí sín t'ahará xr̄a la séchrókóninkákonhénrá sín.
Xr̄axinkáonrá kixin jahará la ko jehe sín mé jnkokón
chrókjuinchexiteyéhérá Ìnchéni itjen nkaya nkajní kixin
kaín chojni la jnkokón t'ikon ch'án.

**Tí nkehe tjinkĩtsa t'ayakonhen tí sín tinkáchónki
Ìnchéni**

¹⁰ A ntá jie kichó ni, nchefuérte ʒsánrá kixin tjejókoni
Ìnchéni la tjetooan tí kjuachaxin kuente ch'án.

¹¹ Chrókuaáxinrá kaín tí kjuachaxin tsjanjon Dios kixin
ntá xikaha jina chrók'uejorá la chrókjuít'ayahará
Tsochren. ¹² Jehya tjanjonkoni chojni tsík'óna into la ko
hueso. Náhí. Jeheni tjanjonkoni kaín tí nchakuen tí jí-
nahya síin chjasintajni. Tíha mé tjinkaon chrók'uetʒan
tí chjasintajni sítié. ¹³ Méxr̄a chrókuákjárá kaín tí
kjuachaxin kjuanjon Dios kixin ntá chrókjuachará tí itsi
tí yʒon jínahya ntá tí xikaha chrókjuich'erá la chr'éxin
la jina chrók'uejorá. ¹⁴ Nchefuérte ʒsánrá. Jina
chrók'uejorá. Chrókuítekáonrá tí itan chaxín kixin tí
nkehe ntoá mé chrók'uayakonhanrá. ¹⁵ Méxr̄a listo
chrók'uejorá sátsjichronkará tí tan tjanjon kjuaxróxin.
¹⁶ La ʒntsí tjetooan chrókuinkachónkirá Ìnchéni. Tíha
mé chrok'uinkákonhen tí chica flecha tsochr'án
Tsochren. ¹⁷ Tí chrókuaáxinrá la táha éxí yóhē ijnko chi-
ca casco t'ayakonhen ikja chojni la tí itén Dios la éxí
yóhē ijnko chica espada mé tjanjon Nchakuen Dios.

¹⁸ La ko kjaxin chrókjuitoéhyará chrónixjehérá Dios la
jnkochrínin chrókjuancheherá ch'án kaín nkehe
t'ichjánxinhanrá la chrokjuanchatóxixínrá Nchakuen
ch'án. Chrók'uejotsjehérá la chrókjuanchiará kixin
tsjinkĩtsa Dios kaín tí sín tinkáchónki ch'án.

¹⁹ Chrónóehérá ch'án kixin kjaxin janhan tsjinkĩtsana
ch'án tsjanjon ch'án tí tan t'ichjánxin tsonixja janhan
kixin ntá janhan ʒntsí jina chrónixja kixin ntá tsinhin
sín tí nkehe ninkexró k'uénoehya kixin nkexrí tjen tí
itén ch'án tsaáxin chojni. ²⁰ Dios mé ichr'ánna tsoxrjan-
ka tí itén ch'án, mé xikaha tjéchjinaxián ijie. Nixjehérá
ch'án kixin jina tsoxrjanxaxián tí itén ch'án la ko
ninkexró tsochrakuanhya.

Kjuixixín nixja ch'ín Pablo

²¹ Kichóni Tíquico, tí nkexro imá tjuèheni la ko xráxin
ch'ehe xr̄a Ìnchéni mé tsochenkará ch'án tí jahará
nkexrí tjén la ko nkexrí tí xr̄a tjét'a. ²² Mé xikaha tétu-
ʒnhan ch'án sátsjitsjehe ch'án tí jahará kixin tsochrón-
ka ch'án nkexrí tjejóni la xikaha chrókócháhará.

²³ Tjánháh̄a It'éni Dios la Ìnchéni Jesucristo kixin
tsochjéhe ch'án kaín kichó ni kjuaxróxin kixin
tsojtjuèhe kichó sín la ko tsinkáchónki sín ch'án. ²⁴ La
ko kjuasáyé tí jehe ch'án sincheyaon ch'án kaín tí sín
chaxín tjuèhe Ìnchéni Jesucristo. Mé xikaha tsoxiteyá.
Amén. Ó tjen.

FILIPENSES

Ch'ín Pablo ikjin xroon k'uáyéhe tí nínko chjasin Filipos

1 Janhan Pablo la ko Timoteo ch'ehe ni xra Jesu-cristo, mé ikjinni tí xroon i chr'anhánrá kaín tí jahará kichó ni tinkachónkirá Cristo Jesús tjejórá chjasin Filipos la ko tí sín t'etōan kuènte nínko ntiha. ² Tjanchi-ani kixin It'eni Dios la ko Ìnchéni Jesucristo kjuasáyé ch'án imá chrókjuincheyaonrá ch'án la ko chrók'uayéhérá kjuaxróxin.

Ch'ín Pablo tjechrónóhe ch'án Dios kixin tí sín tin-káchónki Jesús ntiha

³ A ntá tió xráinkavan tí jahará la imá tjahā Dios kjuasáya ⁴ la ko níxjahā Dios la imá chàna tjáncháha ch'án kixin tsjinkĩtsa ch'án kaín tí jahará. ⁵ Jahará la kjuínkĩtsarā tió kjuàkua tí tan jína tí sōoxín kuinhínrá itén Dios la naxā tjejórá tjejórá ijie. ⁶ Ó nòna chaxín kixin xikaha Dios ó kjuankixin ch'án ch'e ch'án xra jína kixin kuítekáonrá mé xikaha naxā tsjintaxín sich'e ch'án tsjixrakájia tí yāon tsokjan Jesucristo. ⁷ Jína kixin tjejkayáxian kuènte kaín tí jahará. Méxra xikaha imá tjuahará. Jahará la ko janhan la jnkokón kjuachaxin k'uáyéhe ni la kjónté janhan tjééhjina o itjén tí tjejó tí sín t'etōan tjejrjanka kixin jína tí tan tsaáxinni. ⁸ Dios la ó nohe kixin imá tjínkavan chrók'uíkuān kaín tí jahará kixin éxi tjuaxinrá Cristo. ⁹ Tjáncháha Dios kixin tsjinkĩtsa ch'án tí jahará kixin āntsí má chrótjuéhérá ch'án la ko chrók'uánki tí kjuaxrexinkaon kuèntará kixin āntsí chrókuiénxinrá kaín nkehe. ¹⁰ La ntá chrókónohará chrókuákjára tí nkehe jína. A ntá tí xikaha chrókjuich'erá la jína tjóá chrók'uejórá la ko kohya nkehe chrókjuanchia jie tió tsokjan Jesucristo. ¹¹ Méxra jahará chrókjuich'erá xra jína éxi ijnko nkehe jína chrók'óna kixin kjuasáyé Jesucristo la ntá xikaha la chrókjuikosáyehérá Dios.

A ntá janhan la tjééhjixian Cristo

¹² Kichóni tjínkavan tsonohará kixin tí nkehe kjuasó-texinna la kjuínkĩtsa kixin kuinhin chojni tí itén Dios tsaáxinni. ¹³ Kaínxin tí chojni siín palacio la ko kaín tí í so sín mé nohe sín kixin tjééhjixian kixin tinkachónkia Jesucristo. ¹⁴ A ntá tí tjééhjina la itsjé tí sín kichó ni āntsí má kóxrjínhjn sín tjako sín itén Ìnchéni la í chrakonhya sín tinkachónki sín ch'án.

¹⁵ A ntá chaxín iso sín nixja sín itén Cristo kjánchó chjínqínhin sín kixin tjinkaon sín chrókjuachaxinna sín. A ntá í so sín tjako itén ch'án kixin tjinkaon sín jína chrókjuinkĩtsana sín. ¹⁶ Kjánchó iso sín tjinkaon sín

chrókjuako sín kixin chrókjuacha sín la ntá kénhya āsén sín tjako sín. Mé xikaha ch'e sín kixin tjinkaon sín chrók'uekana sín āntsí má jie kixin naxā tjééhjina. ¹⁷ La í so sín nixja sín kuènte Cristo kixin tjuèhe sín ch'án la ko tjuāna sín la ó nohe sín kixin ntihi tjén kixin tsōxr-janka tí itan tsaáxinni. ¹⁸ Kjánchó āntōsenná kjónté á chaxín kaín āsén sín tjako sín o náhi, la imá chàna kixin chrónka sín tí tan jína kuènte Cristo la āntsí má chéhe āsenná.

¹⁹ Ó nòna janhan kixin kjónté kaín nkehe tsonna la kjónté xikaha la tsaáxinna kixin kjuasáyarā jahará tje-jónixjehérá Dios la ko tí Nchakuen Jesucristo mé tjetjinkĩtsana. ²⁰ Jína tjééhjixian kixin Dios la tsitōehya tí janhan kixin ichrén nkehe jínahya chrókóna. Tjínkavan tsochonta kjuachaxin kixin jína tsonixjā kaín āsenná nkayakon chojni. Ntá xikaha senó la xikaha ijie tió ts'ikon chojni tí janhan la tsonoxín sín kixin Cristo imá chóna kjuachaxin kjónté á naxā tjééhjixian o á ó tsík'e-na. ²¹ Kixin janhan na Cristo tjééhjixian la ntá kjónté ts'énxian xikaha la mé chrókjuácha. ²² A ntá tí naxā tsjak'é naxā tjééhjixian ntá naxā jína sīt'ahā Ìnchéni xra. Nonahya nkehe tí chrókuákjaá, á chrók'uén o á chrókjuak'échéhjan. ²³ Imá xra chrókjuenkayáxian chrókuákjaá tí yaá nkehe. Janhan na tí chrók'uén la chrókjuak'ékjan Cristo. A ntá janhan la ntáxrjan kixin íchá jína tíha. ²⁴ Kjánchó t'ichjínxin naxā chrókjuak'é kixin naxā chrókjuinkĩtsa tí jahará. ²⁵ Méxra ó nòna kixin naxā tsitōna tí tjejórá kixin chrókjuínkĩtsa tí jahará kixin ntá āntsí chrókónohará la chrókócháhará kixin jína chrókuinkachónkirá Ìnchéni. ²⁶ Ntá tió tsjasán janhan ts'ejóni inaá la imá tsocháhará la tsjanchehérá kjuasáyé Jesucristo.

²⁷ A ntá jahará chrókjuákoxinrá chrók'uejórá jína éxi ntáchro tí tan kjuakoxin Ìnchéni Cristo. Mé xikaha tí tsjasántsahará o náhi la tjínkavan chrókuiénhjan kixin naxā imá tinkachónkirá Cristo la ko jnkokoá tjejkayáxinrá la ko jnkokoá tjejóch'erá xra tjàkorá tí itan jína tsaáxinni. ²⁸ Chrókuijōéhjará kixin tí sín nínkakonhanrá chrókjuintachrakonrá sín. Tí xikaha chróchrakon-hyará la chrókónoxín sín kixin ts'itjāyan sín, a ntá chrókónoxín kixin jahará mé chaxín tsaárá. Tíha mé Dios tsjinkĩtsarā. ²⁹ Ó kuñtonhanrá tí kjuachaxin kixin tsinkachónkirá Jesucristo la ko kjaxin kuñtonhanrá kjuachaxin tsjasótiaxinrá kixin jahará mé tinkachónkirá ch'án. ³⁰ Jahará la ko janhan jnkokón ch'eni xra. Jahará ó k'uíkonrá senó nkexrí kjuít'a xra la ó kuinhínrá ijie kixin naxā tjet'ā xra kjónté nínkakonna sín.

Kuítohe Jesús tí kjuachaxin chrók'uętoan ch'án ntá ijie imá tјetoan ch'án

2 Tí chaxín tí Cristo nchexraxinkaonrá la tí chaxín Cristo tјuàhará ch'án nchecháhará ch'án la tí chaxín tí Nchakuen ch'án xrikoárá la tí chaxín nohará kixin tјikonóğahará ch'án ² la nchechànará kixin jnkokoğá chrók'uejokoará kichuárá la ko jnkokoğá chróktјuèhérá kichuárá la ko jnkokoğá chrókјuenkayáxin nchakuanrá la ko jnkokoğá xřa chrókјuich'erá. ³ Chrókјuenkayáxin-hyará chrókuétoganrá la ko chrókјuinchehnkehýará. Náhí. Chrók'ónará chojni t'ętoanhya. Chrók'uikonrá éxi antsí tјetoan tí í so sín, a ntá kánhyó tјetoan tí jahará. ⁴ Ninkexró chrókјueýá tí nkehe kuènte jehó. Náhí. Chrókјueýará tí nkehe chrókјuinkįtsa tí í so chojni. ⁵ Jahará chrókјuenkayáxinrá éxi kјuenkayáxin Cristo Jesús. ⁶ Jehe ch'án chóna ch'án kaín kjuachaxin kuènte Dios la kјónté xįkaha la tјinkakonhya ch'án chrókјuincheyóhe ch'án éxi Dios. ⁷ A ntá kuítóhe ch'án ntáha tí kjuachaxin k'uéchóna ch'án la k'óna ch'án ijnko chojni ntoa chjasintajni la ko kјuich'e ch'án xřa. ⁸ La éxi ijnko chojni k'uętoanhya kјuák'e ch'án la kјuínchexiteýehe ch'án Dios kaín asén ch'án kixin ik'uén ch'án, mé k'uénxin ch'án tí ntacruz. ⁹ Méxřa Dios imá kјuikosáyehe tí jehe ch'án la ko kјuínchek'in ch'án ijnko ihnié imá tјetoan. ¹⁰ Kixin ntá tsinhin kaín chojni tí ihnié Jesús ntá ts'ejóxin toch'in sín, mé tí sín siín nkaya nkajní la ko ti sín siín chjasintajni la ko tí chojni siín chrínki nche. ¹¹ La ko kaín xín chojni tsochrónka sín kixin Jesucristo mé İnché sín mé xįkaha tsjikosáyehe sín It'eni Dios.

Tí sín tinkáchónki Cristo tóyóhe éxi xrohi t'inkaséyanxín chjasintajni

¹² Jahará kichó ni imá tјuàhará la xráxin kјuínchexiteýànará tí k'uék'ejóni. A ntá ijie la chrókјuínchexiteýànará kјónté ikjín tјén. Chrókuítóéhyará tí nkehe tsjanjon kjuachón la chrók'uayakonhénrá jnkojína ¹³ kixin Diosntaxraxinkaonrá sįch'erá tí nkehe jına tјinkaon ch'án.

¹⁴ Kaín xřa ch'erá la chrókóninkákuénhyará kichuárá la ko chrókјóntahýará kichuárá ¹⁵ kixin tsokohya ninkexró tsontáchro kixin jahará la chontará jię. Kixin jahará la mé tí xjęn Dios chróchontahýará jię, la tјejorá tí siín tí sín jínahya tјasin jię. Na ntá jahará chrók'uinkaséyanxín tí jehe sín éxi tí konotsé t'inkaséyanxín tí chjasintajni sítié. ¹⁶ Méxřa jahará chrók'uayakonhénrá jına tí tan tјanjon kjuachón. Tí xįkaha chrókјuínchexiteýárá jnkojína ntá tió tsi Cristo tsochéhe asenná kixin xįkaha xřa tјejoch'erá kixin ntá tsonóna kixin jehya ó chónkó kjuak'ékįt'a xřa. ¹⁷ Kјónté chrók'uénxian la éxi nkehe chrókјuanchatóxixínrá Dios chrók'uikonrá tí janhan. Mé xįkaha chrókјuintaxín tí nkehe chróchjehérá ch'án kixin tinkachónkirá ch'án, la ntá mé janhan mé tsochàna la ko tјínkavan kixin kaín rá xįkaha chrók'uayéhérá kjuachéhe. ¹⁸ Méxřa

chrókócháhará jahará kјaxin la chrók'uayéhérá éxi tí kjuachéhe chonta.

Ch'ín Timoteo la ko ch'ín Epafrodito

¹⁹ Chonhan kixin tí tsjanjon İnchéni Jesús kjuachaxin ntá tjoka tsochr'an ch'ín Timoteo tsjįitsjehe ch'án tí jahará kixin ntá tsochàna tsįnhan nkexrí tјejorá. ²⁰ Kohya í jnko nkexro chrókјuenkayáxin éxi tí janhan la ko chrókóxakonhen kixin jahará chrók'uejorá jına. ²¹ Kaín tí í so sín tјeyá sín tí nkehe tóxrjínhįn sín ó la jehya tí nkehe tóxrjínhįn Jesucristo. ²² A ntá jahará ó nohará kixin ch'ín Timoteo ó kjuakoxin ch'án kixin jına asén ch'án kixin jehe ch'án kјuít'akian ch'án xřa kjuakoni tí tan jına. Éxi ijnko xјanna xįkaha kјuínkįtsana ch'án. ²³ Mé xįkaha tјínkavan tsochr'an ch'án tsjįitsjehe ch'án tí jahará tió tsonóna nkexrí tјji tí xřa kuèntana. ²⁴ La ko kјaxin chonhan kixin İnchéni tsjinkįtsana kixin tjoka tsjasán kјaxinna.

²⁵ A ntá kјaxin tónhen asenná kixin t'ichjánxin tsochr'an kichó ni Epafrodito tsjįi ch'án tí tјejorá. Jehe ch'án mé jnkokoğá ch'ekoni ch'án xřa kјónté nínkakonhenni chojni. Jahará k'uéchr'anrá ch'án ntihí kixin jehe ch'án tsjinkįtsana ch'án kaín nkehe tјínkavan. ²⁶ Imá tóxakonhen ch'án tsjįitsjehe ch'án tí jahará kixin ó nohe ch'án kixin tsíkinhínrá kixin k'uénihi ch'án. ²⁷ Chaxín k'uénihi ch'án ó mero chrók'uen ch'án, a ntá Dios kuįkonóehe tí jehe ch'án kјánchó jehya jehó ch'án, kјaxin kuįkonóana Dios tí janhan kixin kánhyó chrók'uavá. ²⁸ Méxřa tјínkavan tsochr'an ch'án kixin ó nóna kixin tsocháhará ts'ikonrá ch'án inaá la ko xįkaha janhan í kánhyó chrók'uavá. ²⁹ Imá chrókócháhará chrókјuįi ch'án kixin jehe ch'án mé ijnko kichó ni tinkáchónki İnchéni la ko chrókјuikosáyehehérá ch'án éxi chrókјuikosáyehehérá kaín tí í so sín éxi jehe ch'án. ³⁰ Jehe ch'án ó mero chrók'uenxín ch'án tí ch'ehe ch'án xřa Cristo. Mé siín kjuaxikaon chrók'uenxín ch'án kixin jehe ch'án kјuínkįtsana ch'án kixin jahará xitjahya ts'inkará tsjinkįtsará tí janhan.

Tí nkehe chaxín sínkí

3 A ntá ijie, kichó ni, chrókócháhará kixin jahará la kuènte İnchéni. A ntá tí janhan la xřahya tsokјatee tsokjian tí nkehe ó kјian kixin tíha la chrókјuinkįtsa tí jahará. ² Chróchontará cuidado ti sín ch'e jínahya éxi konįa la tóchrít'ę sín cuérpóé sín. ³ A ntá tí chojni chaxín chóna xroye la mé tí jeheni kixin jeheni chaxín xraxinkakonxinni Dios kjuachaxién Nchakuen ch'án la ko imá chéhe ni kixin tinkáchónkini İnchéni Jesucristo. Jehya kixin chrókuinkáchónkini kixin tí cuérpóeni chrókóchrínjinni. ⁴ A ntá janhan kјaxin jına chróntáxřan kixin chrókóchrít'ę tí cuérpóé chojni. Ninkexró antsí chróchóna kjuachaxin kixin chrókuitekaon tí nkehe a. ⁵ Janhan mé tsíkana xroye tí k'uéchonta ijní yagon la ko janhan mé tikinixian tí sín israelita la tsík'axrjenixinna tí sín tsík'axrjenixin ch'ín Benjamín la kјaxin janhan mé hebreo la ko t'aná la naná la hebreo sín. La ko janhan mé tinkachónkia tí ley éxi tinkáchónki

tí sín fariseo. ⁶ A ntá imá k'uénínkəkonhən k'ué-chonkíhə tí sín tinkáchónki Jesús la ko imá kjuíntax-iteyáhə tí ley la kohya ninkexró tsonáchro kixin chaxínhya tíha. ⁷ Ntá kaín tíha la tí ósé k'uékjenkayáxi-an janhan kixin sínkí tíha, a ntá ijie la tinkachónkia Cristo la ntá tí nkehe k'uékóxrjínna k'uékjít'a la ntá jie la ninkehó sínkíhya. ⁸ La kjaxin kaín xín nkehe t'íkuən éxí chónkó tíha kixin əntsí má tjetooan tsochoxián Ìnchéni Jesucristo. Kaín kjuaxrexinkaon jínahya k'ué-chonta la kjuíntak'itjáyán kixin ijie ó tinkachónkia Cristo la kaín xín tí nkehe k'uéchonta la t'íkuən éxí chjínínó ó kixin ntá xíkaha jína chrókjuak'ékian Cristo. ⁹ Chrókóchəna kixin jnkokoá chrók'uejókoni ch'án. Tjéyáhya kixin tí ley chrókjuíinxín ijíeni tí chrókjuinchehiteyéhəni. Náhí. Tinkachónkia Cristo la tsaáxinni kixin Dios la tsjakjín tí ijíeni kixin tinkáchónk-ini ch'án. ¹⁰ Tí nkehe tjínkəvan na tsochoxián Cristo la ko tsochonta tí kjuachaxin kjuəkoxín ch'án tió xechón ch'án la ko tjínkəvan tsjasótexinna éxí kjuasóte ch'án la ko kjónté chrók'uénna éxí k'uénxin ch'án ¹¹ kixin ntá tjínkəvan tsjácha tsoxechónna ínaá.

Ch'ín Pablo tjinkaon chrókjuacha ch'án

¹² Ntáxrjanhya kixin kjuácha kaín tíha la ko ntáxrjanhya kixin imá ntoá tjén. Kjánchó janhan tjínkəvan tsjácha kaín tíha kixin Cristo Jesús mé kjueyána ch'án senó xíkaha. ¹³ Kíchóni, ntáxrjanhya kixin janhván kjuácha tíha. Náhí. Janhan mé ts'itjáyanna kaín xín tí nkehe ó kuítəhe senó la t'ichjánxín kaín əsenná tjichráhə tí nkehe naxə t'itjáyán tsjácha. ¹⁴ Kixin xíkaha ntá chrókjuácha chrók'uayáhə kaín tí nkehe jína tsjanjon Dios. Jehe ch'án la sinchexiteyá kaín tíha kixin tinkachónkia Jesucristo.

¹⁵ Kaínni tí tinkáchónkini Jesús kaín əsenni la méxra xíkaha chrókjuenkayáxinni. A ntá tí ókjé nkexrí tjenkayáxinrá la Dios mé nchexraxinkaonrá ch'án kixin ntoáhya tíha. ¹⁶ A ntá t'ichjánxín chrók'uejóni éxí tí nkehe ó kjuachani.

¹⁷ Kíchóni, chrók'uejorá éxí kjuak'é janhan la ko chrótsjehérá nkexrí tjejó tí í so chojni tjejóch'e éxí kjuakoni kixin xíkaha kjuəkoəharáni tí jahará. ¹⁸ Nchónhya xrjənkaxián senó la ntá xrjənkə ínaá la imá tsjənkə kixin siín nchónhya sín tjejó sín éxí nínkakonhen sín tí Cristo k'uénxin ntacruz. ¹⁹ Tí sín a mé ts'itjáyán sín. Tí dios kuènte sín la mé tí nkehe ntáchro əsén sín ó la ko tjinkaon sín chrókjuinchehnkexín sín tí nkehe chrókó-suèxin sín. Jehó tjenkayáxin sín tí nkehe siín chjasintajni ó. ²⁰ A ntá jeheni kaín ni la mé chojni kuènte nkəjní la tjejóchónhenni kixin ts'inkajinxín nkaya nkəjní tí nkexro tsaáxinni, mé Ìnchéni Jesucristo. ²¹ Ntá jehe ch'án mé tsjinkí ch'án tí cuerpo náxrjónhya chóntani kixin ntá tí cuerpo chóntani tsoyóhə éxí tí cuerpo náxrjón chóna ch'án. Tíha mé tsoxiteyá kjuəchəxién ch'án jíe kixin ó chóna ch'án kjuachaxin ts'ətuənhən ch'án kaín xín nkehe.

Jnkochríxín chrókóchəhará kixin tinkachónkirá Ìnchéni

⁴ Jahará kíchó ni imá tjuəhará la ko imá tjínkəvan chrókjuasántsjahará tí jahará kixin jahará imá nchechənará kixin jahará mé éxí ijnko nkehe ó kjuácha. Méxra jína chrók'uejorá chrókuinkachónkirá Ìnchéni kixin tjuəhará kíchó ni.

² Xrjanóəhə tjan Evodia la ko tjan Síntique kixin jnkokoá chrókjuenkayáxin sín kixin jehe sín la jnkokoá kíchó sín kixin tinkáchónki sín Ìnchéni. ³ Jaha la jína k'uéjóni kjuích'eni xra, méxra xrjanóəha tjínkítsa tí sín chjin kíchó ni kixin jnkokoá chrókjuenkayáxin sín. Jehe sín kjaxin kjuích'e sín xra tió kjuakoni tí tan jína tsaáxinni. Koí tí ch'ín Clemente la ko í so sín kjuích'ekoni xra. Tí ihnié sín la ó ts'ínixín ts'ínixín ihnié chojni tsaá.

⁴ Nchechéhérá əsənrá jnkochríxín kixin tjejókoará Ìnchéni. Ínaá kjetəe xrjənkə nchechéhérá əsənrá.

⁵ Kaín chojni chrókónohe kixin jahará la chojni jínará. Chrórxáinkəonrá kixin í séhya tsokjan Ìnchéni.

⁶ Tóxakuanhyará ninkehó. Íchá jína chróchenkará Dios kaín xín nkehe la chrókjuancheherá ch'án kaín nkehe t'ichjánxínhanrá la kjaxin chrókjuancheherá ch'án kjuasáya. ⁷ A ntá jehe ch'án mé tsotjáhará kjuaxróxin. Jeheni tsjachahyani tienxinni tí kjuaxróxin kuènte ch'án kixin imá ijie tíha. Tí kjuaxróxin mé ts'ayakonhen əsənrá la ko ts'ayakonhen tí kjuaxrexinkaon kuèntará kixin jnkokoá tinkáchónkirá Cristo Jesús.

Tjenkayáxinrá tí nkehe jína

⁸ Méxra tsjixixín tétuəhanhá kíchó ni. Tjenkayáxinrá kaín tí nkehe chaxín, la ko kaín tí nkehe kjuasáya, la ko tí nkehe ntoá la ko tí nkehe jína. Mé xíkaha tjenkayáxinrá kaín xín tí nkehe náxrjón la ko tí nkehe tóxrjínhín Dios.

⁹ Chrókjuích'erá kaín tí nkehe kjuákoəhará la ko tí nkehe kuínhínrá xrjənkə la ko tí nkehe kuétuəhanhá la ko tí nkehe k'uíkonrá kjuít'a, mé kaín tíha chrókjuinchehiteyará la ntá tí Dios tjanjon kjuaxróxin mé ts'ejókoará ch'án.

Tí ofrenda kjuanjon tí sín filipenses tsjinkítsa sín tí ch'ín Pablo

¹⁰ Ìnchéni imá nchechəna kixin jahará xráxinkəonrá tí janhan ínaá. Ntáxrjanhya kixin tsík'itjáyánhanrá tí janhan kixin jahará xitjahya k'uékjínkítsará tí janhan. ¹¹ Jehya kixin ntáxrjan tíha kixin imá t'ichjánxínna kixin janhan na ó kuənnə kjuaxróxin tjén kjónté tí nkehe chonta ó. ¹² Janhan ó kuənnə tjeén kjónté nóana la ko kjaxin ó kuənnə tsochonta itsjé nkehe. Kjónté ichrén nkehe ts'átsínka la ó tsjácha kjónté á kjoné jína o náhí la kjónté á chróchonta ichrén nkehe o á chróchontahya ninkehó la ántəsenna. ¹³ Kaín xra tsjácha sjít'a kixin Cristo tsjinkítsana. ¹⁴ Kjánchó jahará jína kjuích'erá kixin kjuínkítsará kjuánjonrá nkehe t'ichjánxínna.

¹⁵ Tió sákjuíxiə estado Macedonia la kjuankixian kjuəkua tí tan tsaáxinni ínaá la jahórá tí njnko chjasin

Filipos ichr'anrá chichaon k'uayáha kixin cháhará kjuákohará itén Dios. ¹⁶ Kjaxin tió naxa kjuak'é chjasin Tesalónica la jahará ichr'anrá chichaon iso veces kixin kjuínkĩtsará tí nkehe k'uichjánxinna ntiha. ¹⁷ La jehya kixin tjínkavan kixin jehó nkehe chrók'uayáha. Náhí. Jehí tjínkavan kixin jahará antsí má chrókjuich'erá tí nkehe tjinkaon Dios kixin ntá antsí chrókjuachará. ¹⁸ Ó k'uayáha kaín nkehe tsíkánjonrá la antsí itsjé chonta. Ó k'uayáha tí nkehe tsíchr'anrá mé tí nkehe kujkao ch'ín Epafrodito, la kaín tíha la ó tsjácha. Tíha la éxí yóhē ijnko nkehe xraxé náxrjón chróchjehérá Dios mé éxí ijnko iko chrók'oyánrá imá chrókóxrjinhin ch'án. ¹⁹ Tí Dios kuèntana mé tsotjáhará kaín xín nkehe naxa

t'itjáyan tsákjára kixin chóna ch'án kaín xín nkehe imá náxrjón tjete la tsjanjon ch'án kixin jahará la tinkachónkirá Cristo Jesús. ²⁰ Kjuasáyé It'éni Dios jnkochrín. Mé xjkaha tsoxiteyá. Amén.

Tsjixín nixja ch'ín Pablo

²¹ Janhan tjínkavan tsonixjehérá kaín tí sín tinkáchónki Dios la ko Jesucristo ntiha. Tí sín kichó ni tjejókoni ntihi nixjehará sín. ²² Kjaxin kaín tí sín tinkáchónki Dios la ko tí sín ch'ehe xra tí ch'ín t'etōan romano mé nixjehará sín. ²³ Tjáncháha kixin Ìnchéni Jesucristo mé chrókjuintayaonrá ch'án kaín rá. Amén. Ó tjen.

COLOSENSES

Ch'ín Pablo ikjin xroon k'uáyéhe tí nínko chjasin Colosas

1 Janhan Pablo tsíkjeýána Jesucristo t'ahā ch'án xrā kixin xikaha tjinkaon Dios, la ko kichó ni Timoteo ² mé ikjinni tí xroon i tsochr'ánharáni tí jahará tsíkjinchetjóará Dios la ko kuítekáonrá Jesucristo tje-jorá chjasin Colosas. Kjuasáyé It'éni Dios chrókjuin-tayaonrá kixin kjuaxróxin chrók'uejorá.

Ch'ín Pablo tjanchehe ch'án Dios kjuasáya kixin kaín tí sín tinkáchónki Cristo

³ Jnkochr'ín tjancheheni kjuasáya Dios la ko tjan-chiani kixin chrókjuinkitsa ch'án tí jahará mé jehe ch'án It'é Ìnchéni Jesucristo. ⁴ Ó kuínhinni kixin jína tinkachónkirá Ìnchéni Jesucristo la ko tjuèhéra kaín tí sín ó tsíkjinchetjóá Dios. ⁵ Mé xikaha tjejochonhéna kixin ts'ayéhéra tí nkehe chóna Dios tjen nkaya nkajní. Jahará la xikaha tjejochonhéna kixin tjejotinhínra tí tan chaxín kuènte Dios tsaáxinni. ⁶ Tí tan i mé kuínhin chojni la itsjé sín tinkáki tekaon sín la tinkák'ánkí tí kjuachaxin kuènte Dios kuenté chjasintajni. Mé xikaha kónhen tió kuínhínra la ko kuítekáonrá kixin chaxín tjuahará Dios. ⁷ Tíhi mé kjuaqohará kichó ni Epafras. Jehe ch'án la jnkokóá kjuích'ekoni ch'án xrā kixin jehe ch'án la jína ch'ehe ch'án xrā Cristo kixin xikaha tjinkitsa ch'án tí jahará. ⁸ Jehe ch'án mé kui ch'án ntihi chrónka ch'án nkexrí tjuèhéra kichuárá kixin Nchakuen Dios tjinkitsa tí jahará.

⁹ Méxrā xikaha tí yaon tió kuínhinni nkexrí tjejorá la títoehyani tjancheheni Dios kixin tsjinkitsa tí jahará kixin tsonohará jína nkexrí tóxrjínhjn ch'án la ko tjanchiani kixin tsjanjon ch'án kjuachaxin kixin tsiénx-inrá kaín nkehe kuènte ch'án. ¹⁰ Tjancheheni ch'án kixin jína chrók'uejorá kixin tinkachónkirá Ìnchéni la ko chrókuítóéhyará chrókjuich'erá éxí tóxrjínhjn tí jehe ch'án. Ntá jína chrókjuachará chrókjuich'erá xrā kuènte ch'án la ntá chrókónohará jína nkexrí tjen Dios. ¹¹ Tjanchiani kixin jehe ch'án chrókjuinkitsa kixin chrók'uejorá fuerte kixin tí kjuachaxin jié kuènte ch'án kixin ntá chrókjuachará la kjónté ichrén nkehe chrókónhanrá la chrókóninkákonhyará. ¹² La ko chrókócháhará chróchjehéra kjuasáya It'éni Dios kixin kjuanjon ch'án kjuachaxin kixin ts'áyéhe ni tí nkehe tí tjen tí t'inkaséyan mé tí nkehe ts'áyéhe kaín tí sín tsíkjinchetjóá tí jehe ch'án. ¹³ Jehe ch'án mé kuakitsjek-janxínni ch'án tí sítíe la ntá kjuanjon ch'án kjuachaxin ts'ejóni tí t'etōan tí Xjeen ch'án, tjuèhe ch'án. ¹⁴ Jehe

ch'án kjuínchekaáni ch'án kixin k'uenyákonhenni ch'án la tí ijnié ch'án mé kjuenka ch'án tí ijíeni.

Kjuaxróxin ts'ejókoni Dios kixin k'uenyákonhenni Cristo

¹⁵ Éxí tsjehe Cristo mé xikaha tsjehe Dios kjónté xit-jahya t'ikonni tí jehe ch'án. Cristo la ó xráxín tjen tí naxā t'ónahya ninkehó. ¹⁶ Kjuachaxién tí jehe ch'án kjuích'énaxín Dios kaín tí nkehe siín nkajní la ko chjas-intajni la ko kaín tí nkehe naxā t'ikonhyani la ko tí nkehe ó t'ikonni. Kjaxin kaín tí sín ángel t'etōan la ko chóna kjuachaxin la mé jehe ch'án kjuích'éna ch'án kixin sich'ehe sín ch'án xrā. ¹⁷ Cristo la ó xráxín tjen kjónté naxā t'ónahya ninkehó la jehe ch'án t'ayakonhen ch'án kaín nkehe siín kixin tí kjuachaxin kuènte ch'án. ¹⁸ La kjaxin jehe Cristo mé tí kja t'etuehenen tí cuerpo mé tíha mé tí nínko. Jehe ch'án senó xechón ch'án kixin jehe ch'án mé ts'etuehenen ch'án kaín nkehe siín. ¹⁹ Dios tjinkaon chróchjéhe ch'án tí Xjeen ch'án kjuachaxin éxí tí kjuachaxin chóna tí jehe ch'án.

²⁰ Kjaxin tjinkaon Dios kixin kjuachaxién Cristo chrók'uixin kjuaxróxin nkuíxín mé chjasintajni la ko nkaya nkajní. Mé xikaha tsjasin ch'án kjuaxróxin kixin jehe ch'án kjuák'enkáni ch'án ntacruz ik'uen ch'án.

²¹ Jahará la ósé ikjín k'uék'ejorá la k'uéninkákonhén-rá Dios kixin tí nkehe jínahya k'uékjich'erá. A ntá jie la kjuaxróxin tjejokoará Dios ²² kixin k'uenyákonhánra Cristo, kjuasóte tí cuérpōé ch'án. Mé xikaha kónhen ch'án kixin ntá tsjanjon ch'án tí jahará ts'áyéhe Dios kixin kjuíntatjóará ch'án, a ntá jie la chontahyará ninkehó jie. ²³ Méxrā xikaha chrókuítóéhyará chrókuinkachónkirá Ìnchéni la ko chrókuítóéhyará tí nkehe tjejochonhéna kixin ó kuínhínra tí tan tsaáxinni. Tí tan i mé ó chrónka chojni kuenté chjasintajni la ko janhan Pablo kjaxin tjinkitsa xrjanka xikaha.

Ch'ín Pablo ch'e ch'án xrā kuènte nínko

²⁴ Méxrā ijie la tjasótexinna kixin tí jahará la chána kixin xikaha mé tsjintaxín tjasóte janhan kixin tí nkehe t'itjáyán tí naxā chrókjuasóte Cristo kixin jehe ch'án mé kjuasóteyákonhen ch'án tí nínko mé tí cuérpōé ch'án. ²⁵ Mé xikaha Dios kjuéyána kixin sít'a xrā kuènte nínko kixin xikaha tí xrā k'uetuanna ch'án kixin ntá jína chrók'uejoxínra tí jahará kixin chrókjuintaxín chróxr-jankaxián tí itan kuènte Dios. ²⁶ Tí nkehe ninxeró k'ué-noehya tjemá ósé nchónhya nánó a ntá ijie kjuínchenohe Dios kaín tí sín tinkáchónki tí jehe ch'án. ²⁷ Dios tjinkaon chrókjuinchenohe tí jehe sín tí nkehe

tjemá náxrjón tjete ts'áyéhe tí sín Jehya judío ijie. Tí nkehe k'uénoehya chojni la mé Cristo tjejókoará la jehe ch'án mé tjanjon kjuachaxin ts'ejochonhénrá ts'ayéhérá tí kjuachaxin jié kuènte ch'án.

²⁸ Jeheni mé chronkaxínni nkehe kuènte Cristo la nchexraxinkaonni kaín chojni la ko tjákoheñi sín kixin chrókuienxín sín jína. Ntá jnkojnko sín chrók'uánkí kjuaxrexinkaon kuènte sín kixin tinkáchónki sín ch'án. ²⁹ Méxra xíkaha tí xra it'a la kaín asenná it'a xra tí kjuachaxién chjina Cristo.

2 Tjínkavan chrókónohará kixin nchónhya xra kjuít'a kixin chrókjuínkítsa tí jahará la ko kjaxin tí sín tjejó chjasin Laodicea la ko kaín tí í so sín naxa t'ikonhya tí janhan. ² Tjínkavan kixin jehe sín chrókóchéhe asén sín la ko jnkokoá chrókjuenkayáxin sín chrótjuèhe sín kichó sín. Mé xíkaha chrók'uánkí kjuaxrexinkaon kuènte sín chrókuienxín sín jína kixin ntá chrókónohe sín tí nkehe ninkexró k'uénoehya kuènte It'eni Dios, mé Cristo tíha. ³ Jehe ch'án chóna kaín xín kjuaxrexinkaon kuènte Dios la jehe ch'án mé nohe ch'án kaín nkehe. ⁴ Kaín tíha xrxanka kixin ntá ninkexró chrókjuít'ayahará tí jahará kixin tí náxrjón chrónixja sín ó. ⁵ Kjonté tjenhya tí cuerpo kuèntana tí tjejorá la ntá nchakuenná la mé tjen ntiha kixin xráxinkavan tí jahará la chàna kixin t'íkuan kixin jína tjejorá naxa tinkachónkirá Cristo.

⁶ Méxra xíkaha kuinkachónkirá Ìnchéni Jesucristo la mé xíkaha jnkokoá chrókjuenkayáxinkoará tí jehe ch'án. ⁷ Éxí ijnko nta tsíkji nuèé njnka mé xíkaha chrókuinkachónkirá tí jehe ch'án éxí kjuakohará ch'án la ko chrókjuanchehérá Dios kjuasáya jnkochríxín.

Cristo tjanjon ijnko ntja nixin

⁸ Chrókujtóehyará kixin ninkexró chrókjuít'ayahará kixin tí nkehe ntoáhya chrókjuakohará sín. A ntá jehe sín chrónkahya sín éxí tjinkaon Cristo. Náhí. Tjako sín tí nkehe tjenkayáxin chojni chjasintajni ó la ko tjako sín tí kjuachaxin kuènte tí nkehe jínahya síin chjasintajni.

⁹ Kaínxín kjuachaxin chóna Dios mé chóna Cristo kjónté k'óna ch'án chojni. ¹⁰ La jahará chontará kaín kjuachaxin kuènte Dios kixin ó tinkachónkirá Cristo. Jehe ch'án t'etuñhen ch'án kaín nkehe síin la ko t'etuñhen ch'án kaín nchakuen t'etōan. ¹¹ Kjaxin tió kjuankixínrá tinkachónkirá Cristo ntá jehe ch'án kjuanjon ch'án jnko xroye k'uayéhérá kjánchó Jehya tí xroye kuènte tí cuerpo. Náhí. Kjuakjiin ch'án tí jié k'uékóxr-jínhanrá la kjuíntakaará ch'án, mé tíha mé tí xroye kjuanjon Cristo. ¹² Tí kuíkiterá jahará mé xíkaha éxí xravákoará Cristo. Ntá ó xechón tí jehe ch'án la kjaxínrá xechónrá kixin ó kuítekáonrá tí kjuachaxin kuènte Dios kixin Cristo la ó xechón ch'án ínaá. ¹³ Jahará ósé la éxí tsík'en asánrá k'uék'ejorá kixin tí jié k'uéchontará kixin k'uéchonhyará Dios la k'uéchontahyará xroye kuènte ch'án. A ntá ijie la éxí xechónrá kixin Cristo kjuatsen tí jié chontará. ¹⁴ Mé Dios kjuatsen ch'án kaín tí nkehe tsík'etōan ch'án ósé kjuachahyani nchexiteyáni la ko kjuatsen ch'án kaín tí jié k'uéchóntani kixin Cristo kjuák'enkání ch'án tí ntacruz la xíkaha kjuat-

senxin ch'án tíha. ¹⁵ Cristo k'uenyákonhenni ch'án la ntá kjuachaxin kuènte Dios kjuacha la kjuachahya ninkehó tí kjuachaxin k'uéchóna tí nchakuen jínahya kixin jehe ch'án kjuínchesuèhe ch'án tí sín jínahya noxín kixin jehe ch'án mé kjuacha ch'án.

Tjéyará tí nkehe síin nkaya nkajní

¹⁶ Méxra ninkexró chrókjontahyará kixin tí nkehe chrókjónterá o tí nkehe chrók'uirá o á tjíkosáyehérá tí yaon kia o tí nitjó nixin o tí yaon t'ok'éheni. ¹⁷ Kaín tí nkehe a la ó tóyóhó tí nkehe itsi. A ntá tí nkehe chaxín la mé Cristo tíha. ¹⁸ Méxra chrókujtóehyará kixin ninkexró chróntácho sín kixin ts'itjayanrá kixin tinkachónkihyará tí sín ángel, tsixro sín. Tí sín a mé chrónkaxín sín tí nkehe éxí kotáchrién sín t'ikonxín sín la nchehnke sín kixin tí nkehe t'axrjenixin kja sín ó. ¹⁹ A ntá jehe sín la chaxínhya tinkáchónki sín Cristo kixin jehe ch'án mé tí kja t'etuñhen kaín ni la jehe ch'án mé ch'éna ch'án jnkokoá cuerpo kuènte ch'án kaín ni la nchek'ánkí ch'án tí cuerpo kixin jehe ch'án t'ayakonhenni ch'án kixin xíkaha tjinkaon Dios.

²⁰ A ntá jahará la ó k'uénkoará Cristo la kujtóhérá tí nkehe k'uék'etōan kuènte chjasintajni ó. ¿A ntá nkekuènté naxa tjejorá éxí tí chojni síin chjasintajni chrókjuínchexiteyará tí nkehe t'etōan sín? ²¹ Mé xíkaha t'etōan sín kixin jahará chrótsehyará tíha la chrókjóntehyará tí nkehe la chrókuákjáhyará nkehe. ²² Kaín tí nkehe ntáchro sín mé nixja kuènte tí nkehe tsjeje la tíha mé t'axrjenixin ikja chojni ó. ²³ Chaxín kixin jehe sín ntáchro sín kixin jína xíkaha sinchexiteyá sín kixin tinkáchónki sín tí sín ángel la nchehnkehya sín la ko itsjé nkehe ch'ehe sín cuérpōé sín, kjánchó kaín tí nkehe ch'e sín xíkaha la chónkó kixin tjínkítsahya kixin chrókuítōhe sín tí nkehe ntoáhya tjenkayáxin sín.

3 A ntá tí jahará la ó tsíxechónkoará Cristo. Méxra chrókuéyará tí nkehe síin nkaya nkajní kixin Cristo la ntiha tjetjaxín ch'án tí tja chjina Dios. ² Chrókjuenkayáxinrá tí nkehe síin nkaya nkajní. Chrókjuenkayáxinhyará tí nkehe síin chjasintajni. ³ Kixin jahará la ó ik'uenrá la ntá ijie la Cristo la ko Dios chónthehe tí kjuachón kuèntará. ⁴ Jehe Cristo mé chontaxínrá kjuachón jahará la tió tsokjan tí jehe ch'án ntá kjaxínrá ts'ejókoará ch'án ntá ts'íkonrá tí kjuachaxin jié kuènte ch'án.

Tí ntja ntaxin la ko tí ntja nixin

⁵ A ntá chrókujtóhérá kaín tí jié tjenkayáxinrá chjasintajni. Ninkexró chrókjuasinko jié chojni chjin ókjé, la ninkexró chrókjuich'e nkehe jínahya, la ko ninkexró chrókjuich'e ninkehó tí nkehe ntáchro asén sín, la ko kjaxín chrókóxrjienhya sín chróchóna sín itsjé nkehe kixin tíha mé yóhe tí chróxrxinkaon sín tí nkehe tsíkjanoya. ⁶ Méxra tí nkexro titekakonhya tí nkehe t'etōan Dios la tsóninkakonhen Dios tí jehe sín la sinchekjasóte sín ch'án. ⁷ Mé xíkaha k'uékjich'era jahará tí ósé. ⁸ Méxra ijie chrókujtóhérá kaín tí kjuanínkaon la ko tí nkehe tjak'e asánrá la ko tí nkehe jínahya la ko tí t'an-

taxinhínra kichuára la ko tí nkehe jínahya t'axrjexín ir'vará. ⁹ Chrókjuich'iyéhyará kichuára kixin ósé xíkaha k'uékjich'erá a ntá jie la ó chrókuítóhéra kaín tí nkehe ntaxin k'uékjich'erá. ¹⁰ A ntá jie la ó tsík'ónará ijnko chojni nixin. Dios tinkánchetjóará ch'án kixin ts'ónará éxí tí jehe ch'án kixin jehe ch'án kjuích'ena ch'án tí jahará. Mé xíkaha chrókjuixraká chróchoxinrá tí jehe ch'án jína. ¹¹ Jehya tjetóan á chojni judío o náhí o á chojni tsíka xroye o náhí o á chojni tsíkjin kjin o náhí o á chojni noehya o á chojni ch'exón xra o á chojni t'etóan. Tí nkehe tjetóan la tinkáchónkini Cristo la jehó ch'án t'etúenhen kaín nkehe.

¹² Dios la tjuéhe ch'án tí jahará la tsíkjeýará ch'án kixin tsinkachónkirá ch'án. A ntá jahará la ó k'ónará ijnko chojni nixin la chrókuikonóhéra kichuára la jína chrók'uejorá la ko chrókjuinchehnkehyará la ko chrókójahyará la ko chrókóninkákonhyará.

¹³ Chrókóninkákuénhyará kichuára la chrók'uitjáyanhanrá ichrén jie kjuasinhanrá íjnko chojni kixin Cristo la k'uitjáyenhen ch'án tí jie kjuásinrá la kjaxin jahará la xíkaha chrókjuich'erá. ¹⁴ Mé xíkaha chrótjuéhéra kichuára la jnkokoá chrókjuenkayáxinrá. ¹⁵ Tí kjuaxróxin kuénte Cristo mé chrók'uetúenhen asánra kixin xíkaha kjuenkayáxin Dios k'uíyáhará ch'án kixin chrók'ónará jnkokoá cuerpo kuénte ch'án mé xíkaha chrókjuancheherá ch'án kjuasáya.

¹⁶ Tí tan kuénte Cristo jnkochrín chróchóna asánra. Mé xíkaha chrókjuákohéra kichuára la chrókjuinchechéhéra kichuára kaín kjuaxrexinkaon jína. Chrótsjerá salmo la ko himno la ko canto kuénte Dios la chrókjuancheherá Dios kjuasáya kaín asánra.

¹⁷ Kaín xra chrókjuich'erá la ko tí nkehe chróntáchrórá la kaín táha chrókjuanchaxínra ihnjé Ìnchéni Jesús la chrókjuanchehéra kjuasáya It'éni Dios kjuachaxién Jesucristo.

Jnkojína chrók'uejóko kichó tí sín tinkáchónki Cristo

¹⁸ Jahará chojni chjin la chrókjuinchehiteyéhéra tí xiyará kixin mé t'ichjánxin xíkaha chrókjuich'erá kixin tinkachónkirá Ìnchéni. ¹⁹ Jahará chojni ntoa la chrótjuéhéra tí ichjiánra la chrókóninkákuénhyará tí jehe tjan. ²⁰ Jahará chánjanra la chrókjuinchehiteyéhéra it'ára la ko inára kaín nkehe chrók'uetóan sín kixin xíkaha mé tóxrjinhin Ìnchéni. ²¹ Jahará it'é xjan la chrókjuinchekóninkakonhyará tí xjaanra kixin tí xíkaha la chrókjuinchek'áváhyará tí jehe xjan. ²² Jahará chojni ch'exón xra chrókjuinchehiteyéhéra tí lámóará ntihi chjasintajni. Jehya kixin tí tjejótsjehe sín ó chrókjuich'erá xra kixin ntá jína chrók'uejoxínra. Náhi. Kaín asánra chrókjuich'erá xra kixin ó nohará kixin xíkaha ch'eherá Ìnchéni xra. ²³ Kaín nkehe chrókjuich'erá la kaín asánra chrókjuich'erá xra éxí chrókjuich'eherá xra Ìnchéni la jehya kixin éxí chojni ó chrókjuich'eherá xra. ²⁴ Ó nohará kixin Ìnchéni la sintakítóhanra tí nkehe chóna ch'án kixin jahará ch'eherá Cristo xra la jehe ch'án mé chaxín Ìnchéni. ²⁵ A ntá tí sín ch'e tí jínahya tsjacha sín tí nkehe jínahya kjuich'e sín kixin Dios la tikónóehya ninkexró ch'e tí nkehe jínahya.

4 Méxra jahará lámorá la jína chrónixjehéra tí sín t'ahará xra. Chróxráinkáonra kixin kjaxinra jahará chontará ijnko Dios tjan nkaya nkajni.

² Chrókuítóhéhyará nixjehéra Dios la ko chrókjuanchehéra ch'án kjuasáya. ³ Kjaxin tjanchehéra ch'án tsjinkitsa tí jeheni kixin tsjanjon Ìnchéni kjuachaxin chrókuinhin chojni tsochrónkaxinni tí itén Cristo. Tí xra k'ueñoehya ninkexró mé tjéchinaxián jie. ⁴ Tsjanchehéra Dios kixin tsjinkitsa ch'án tí janhan kixin chrókjanxian jína chrókjuákua éxí tjinkaon Dios.

⁵ A ntá jahará la jína chrókjuákohéra itén Dios tí sín kixin tsjakorá. ⁶ Chrónixjehéra sín jnkojína kixin chrókóxrjinhin sín la chrókónohará chrókjuáteherá nkexrí tsixro jnkojnko chojni.

Kjuixin nixja ch'ín Pablo

⁷ Kichóni Tíquico, mé ijnko nkexro jína tjinkitsa tí janhan ch'ehe Ìnchéni xra, mé tsjiji ch'án tsochrónka ch'án nkexrí tjan janhan. ⁸ Méxra kuétuánhan ch'án tsjiji ch'án tí tjejorá kixin tsonohará kixin nkexrí tjejóni kixin chrókócháhará. ⁹ Jehe ch'án la ko kjaxin ch'ín Onésimo mé tjuéhéni kichó ni la ko jehe ch'án mé kjaxin jína ch'e ch'án xra, la mé tsjijitsjehe sín tí jahará. Jehe ch'ín Onésimo mé sín chjasánra. Jehe sín mé tsochrónka sín kixin nkehe sítóhen tí tjejóni ntihi.

¹⁰ Ch'ín Aristarco mé jnkokoá tjechjinakian ch'án ntóechiso mé nixjahará ch'án la ko kjaxin ch'ín Marcos mé tí ch'ín a mé naxa kjéhya ch'án ch'ín Bernabé. Ó nohará chrók'uayakonhéna tí ch'ín Marcos tí tsjijitsjehe ch'án tí jahará la chjehéra ch'án kjuachaxin tsjak'e ch'án jína. ¹¹ Kjaxin nixjahará ch'ín Jesús, kjaxin tikitexín sín ch'án Justo. Jehó tí sín a mé sín judío tinkáchónki Cristo, a ntá ijie tjinkitsa sín tí xra tjet'a la chrónkaxín sín nkehe kuénte tí kjuachaxin kuénte Dios. La tí sín a mé imá kjuínchechána sín tí janhan. ¹² Ch'ín Epafras nixjahará ch'án. Mé jehe ch'án ch'ehe ch'án xra Cristo la jehe ch'án mé sín chjasánra. Jehe ch'án jnkochrín chrónóehé ch'án Dios tjinkaon ch'án kixin kaín asánra chrókuinkachónkirá Dios éxí tjinkaon ch'án. ¹³ Ó nòna kixin ch'ín Epafras la tóxakonhen ch'án kixin tí jahará la ko tí sín tjejó tí chjasin Laodicea la ko Hierápolis. ¹⁴ Ch'ín Lucas, mé tí ch'ín ch'e xroan, la kjaxin nixjahará ch'án la ko kjaxin ch'ín Demas nixjahará ch'án.

¹⁵ Nixjehéra tí sín kichó ni tjejó chjasin Laodicea la kjaxin nixjehéra tjan Ninfas la ko tí sín tójnkoaté ntóe tjan. ¹⁶ Tíó tsjixin sinchekuáxinra tí xroon tsíkjií tí tjejorá ntiha la ichranra xroon sátsji sinchekuáxin tí sín tjejó nínko chjasin Laodicea la ko kjaxin sinchekuáxinra tí xroon tsíkjiíhi tí jehe sín tíó tsjiji tí xroon tí tjejorá. ¹⁷ Kjaxin chenkará ch'ín Arquipo kixin chrókjuinchehiteyá ch'án jína tí xra tsíkjanjon Ìnchéni sich'e ch'án.

¹⁸ Janhan Pablo tjaná kjinxian tí palabra nixjahará. Jahará chróxráinkáonra kixin janhan la tjéchinna la Dios mé chrókjuintayaonra. Amén. Ó tjan.

1 TESALONICENSES

Ch'ín Pablo nixjehę ch'án tí sín Tesalónica

1 Janhan Pablo la ko ch'ín Silvano la ko ch'ín Timoteo ikjinni tí xroon i chr'anhánrá kichó ni nįnko chjasin Tesalónica kixin jnkokóá tinkáchónkini It'eni Dios la ko Ìnchéni Jesucristo. Kjuasáyé It'eni Dios la ko Ìchéni chrók'uejorá.

Tí sín ókjé chjasin mé kjuíncheyóhę sín tí sín Tesalónica

2 Jnkoyaxón chjeheni Dios kjuasáya la ko t'ákjenxinni tí jahará kaín rá kixin jehe ch'án mé chrókjuinkįtsa ch'án tí jahará. ³Tió nixjeheni It'eni Dios xraxinkaonni kixin kaín asánrá kuítekáonrá Ìnchéni, a ntá tjejoch'erá xřa la ko imá tjuèhérá kichuárá ntá jnkokóá tjejochonhénrá tsokjan Ìnchéni Jesucristo. ⁴Kíchóni jahará, imá tjuahará Dios la ó noheni kixin jehe ch'án tsíkjeýará ch'án tí jahará. ⁵Na mé xįkaha tió kjuįjini chjasánrá kjuąkọhąráni tí tan jına nįxin tsaáxinni chrónkani na jehya iténni ó. Náhí. Kjixin kjuąchąxién Nchąkuen Dios kjuąkọxinni la ko tí Nchąkuen Dios mé kjuínchenoheni kixin tí itan kjuakoni la chaxín ntoá. Jahará la ó nohará jına kixin nkexrí k'uejóni tí tjejorá kixin xįkaha chrók'uejorá chrókjuáąkọxinnrá.

⁶Mé xįkaha kjuįncheyóhérá tí jeheni la ko kjuįncheyóhérá tí Ìnchéni Jesucristo. A ntá tió kuínhínrá tí itén Dios ntá kaín asánrá kuinkachónkirá Ìnchéni la ko kócháhąrá kixin tí Nchąkuen Dios mé t'ętuęnen asánrá kjónté nchónhya nkehe k'uatsínkará. ⁷Mé xįkaha kjuákuęxinnrá kaín tí sín tinkáchónki Ìnchéni ntiha estado Macedonia la ko tí sín estado Acaya. ⁸Jahará kjuáąkọxinnrá tí itén Dios la jehya jehó estado Macedonia la ko tí estado Acaya kjuáąkọxinnrá. Náhí. Na mé kaín chjasin chjinaxón ntiha kuínhin sín kixin nkexrí tinkachónkirá Dios. A ntá jeheni na í t'ichjánxinhya í jnko nkehe nąxą chróchronkani, ⁹kixin ijie jehe sín mé tjejóchronka sín kixin nkexrí kjuįjini chjasánrá a ntá kaín rá kjuánjonrá kjuachaxin k'uejóni la ko kuítekáonrá tí itén Dios kjuąkọhąráni la ntá kuįtọhérá kaín tí nkehe tsíkjanoya kixin ntá kjuankixinrá kuinkachónkirá Dios tjechón chaxín. ¹⁰La ko kjixin tjejóchronka sín kixin jahará tjejochonhénrá tsokjanxin nkaya nkajní tí Xjeen Dios na mé Jesús. Ó kjuínchexechón Dios tí Xjeen ch'án Jesús ntá jehe ch'án mé sinchekaáni kixin chrókjuasótexínhyani tí nkehe jínahya chrókjuasótexinni itsi.

Tí xřa tsíkjich'e ch'ín Pablo tí chjasin Tesalónica

2 Kónohará kaín rá kichó ni kixin jehya chónkó kjuįjini chjasánrá. ²Ó kónohará kixin senó tí sín chjasin Filipos k'uekjinchekjasóteni sín la ko k'uek'ántaxínhįnni sín. Kjánchó Dios mé kjuínkįtsa ntá chrakonhyani kjuąkọhąráni tí tan tsaáxinni kuènte Dios kjónté imá k'ueńínkakonhenni sín. ³Kónohará kixin jehya ntoáhya kjuąkọhąráni la ko jehya ijnko nkehe náxrjónhya kjuakoni la ko kjuít'ayahyaráni ninkehó. ⁴Náhí. Dios mé kjueýá ch'án tí jeheni kixin chrókjuakoni tí tan tsaáxinni, mé xįkaha ntoá tjakoni. Jehya kixin chojni ó nchechéhęni. Náhí. Nchechéhęni Dios tí nkexro nohe nkehe tónhen asénni. ⁵Ó nohará kixin kjuích'iyaxínhyani itan imá náxrjón kixin xįkaha chrókuakitsjexinni chichaon chrókjuachani. Náhí. Dios la ó nohe ch'án kixin xįkahya kjuích'eni. ⁶Tjeýáhyani kixin chojni chrókjuikosáyeheni sín la á jahará la o í so chojni. Náhí, xįkahya ch'eni, kjónté chóntani kjuachaxin chrók'ueętuęnhanráni kixin chrókjuánjonrá nkehe chrók'uaýéhęni kixin jeheni ch'eheni xřa Cristo. ⁷Jnkójına k'ueńixjahanráni k'uek'ejóni. Éxí yóhę ijnko iné xjan t'áyakonhen xjeen kixin ts'ánkį xjan mé xįkaha jeheni k'uaýakonhanráni tí jahará. ⁸Imá tjuàhąrá ntá jehya jehó tí itén Dios chrókjuąkọhąráni. Náhí. Kjónté chrók'uenxinni tí tjąkọhąráni kixin xįkaha imá tjuąhąrá. ⁹Kíchóni, chrórxaxinkáonrá kixin tió k'uejóni chjasánrá la mé nchónhya xřa kjuích'eni nchąkotjin la ko tie ntá kjuachani chichaon k'ueńaxinni nkehe sineni kixin tjinkakonhyani kixin chrótjáharáni xřa chrókjuánjonrá nkehe chrókjoneni nachrohe k'uejóni ntiha kjuąkọhąráni itén Dios.

¹⁰Jahará la ó nohará la ko ó nohe Dios kixin chaxín jına k'uejókoaráni jahará chojni tinkáchónki Ìnchéni. Nijnko nkexro ts'ekahyani jię kixin ichrén nkehe jínahya chrókjuich'eni. ¹¹Jahará ó nohará kixin kjuąkọhąráni la ko kjuínchechéhęni tí jahará jnkojnkorá éxí ch'e ijnko it'é xjan tjuèhe xjeen ch'án. ¹²La ko k'ueętuęnhanráni kixin jına chrók'uejorá éxí tjinkaon Dios chrók'uejó tí sín tinkáchónki ch'án kixin jehe ch'án ó k'uíyáhará ch'án kixin chrók'uaýéhérá tí kjuachaxin kuènte ch'án.

¹³Méxřa jnkochrįxín tjancheheni Dios kjuasáya kixin tió kuínhínrá tí tan jına kuènte ch'án kjuąkọhąráni na ntá kjuátsąonrá kixin chaxín tí tan jına kuènte Dios ntá jehya tan kuènte chojni a ntá kaín rá ó kuítekáonrá tí tan a ntá k'uíxítóxįn ntjará. ¹⁴Mé xįkaha jahará kichó ni kjuasótiará kónínkakonhanrá tí sín chjasánrá éxí yóhę kónhen tí sín kuènte Dios tinkáchónki Ìnchéni Cristo

Jesús tí estado Judea kixin tió kjuankíxin kuinkáchónki sín Ìnchéni ntá tí sín judío chjasén sín mé kjuankíxin sín kóninkakonhen sín chrók'óyán sín. ¹⁵ A ntá tí sín judío a mé tsík'óyán sín Ìnchéni Jesús la ko tsík'óyán sín tí sín tsíchronka tí itén Dios ósé la xíkaha kjaxin k'uinkíténi sín. A ntá xíkaha kjuich'e sín la kóninkakonhen sín kaín chojni. A ntá Dios la kóxrjéñhya ch'án kixin xíkaha kjuich'e sín. ¹⁶ A ntá tjinkaonni kixin chrókjuakoheni tí sín jehya judío tí tan jína chrókuaáxin sín a ntá tí sín judío tjinkakonhya sín chrókjuakoni. Na mé xíkaha imá nchek'ánkí sín tí jje kuènte sín. A ntá xíkaha kjuich'e sín ntá Dios sinchekjasóte ch'án tí jehe sín.

Ch'ín Pablo tjinkaon ch'án sáchrókjuitsjehe ch'án inaá tí sín chjasin Tesalónica

¹⁷ Kíchóni, tió kuitoheni tí jahará a ntá kjónté ókjé k'uéjóni la k'uéraxinkaonni kaín asénni tí jahará la ko imá tjinkaonni chrókjuijitsjeheni tí jahará inaá. ¹⁸ Na mé xíkaha janhan Pablo itsjé veces mé tjínkavan chrókjuasántsajahá tí jahará, a ntá tí ch'ín Tsochren mé k'uínkàkònna ntá xitjahya tsjasán. ¹⁹ ¿Nkehe tsoñhen tí xra tjejóch'eni tjejóchóenxinni la ko nkekuènte tjejóchéheni? Jahará mé tsochéxinni tió tsi Ìnchéni Jesucristo kixin kuítekáonrá ch'án. ²⁰ Méxra jahará mé kóchéxinni kixin kuítekáonrá.

3 Ntá imá kóxakonhenni. Ntá kjuenkayáxinni kixin chrókójína jehóni chrókuitoheni chjasin Atenas ² na ntá ichr'ánni tí kíchó ni Timoteo a tsjijitsjehe ch'án tí jahará kixin kjaxin ixra kuènte Dios tjech'e ch'án tjejókoni ch'án tjako ch'án tí tan kuènte Cristo tsaáxinni. Ntá ichr'ánni ch'án kixin sintaxraxinkaonrá ch'án tí itén Ìnchéni la ko sinchekhéhé ch'án asánrá ³ kixin tsoxrjéñhya asánrá má kixin tí kjuaxróxinhya tjejóat-sínkará. Kixin xíkaha ó nohará kixin t'ichjánxìn tsjasótexínni tí xra kuènte Ìnchéni. ⁴ Naxa k'uéjóni jnkokó ntiha la ó tjónkará kixin kaín ni kjuaxróxinhya tsoñheni tsjasóteni. A ntá jie la ó nohará kixin chaxín xíkaha kónhen. ⁵ Méxra imá kóxakonna ntá ichr'an kíchó ni Timoteo kjuijitsjehe ch'án nkexrí tjejórá, á naxa tinkachónkirá Ìnchéni o ách'e ch'ín Tsochren chrókjuachroerá chrókuitohérá tí ntje Ìnchéni a ntá chrókóchónkó kaín tí xra kjuich'eni kjuakoharáni.

⁶ Na ntá ó kjanxin ch'ín Timoteo chjasánrá Tesalónica chrónka ch'án kixin jína tjejórá naxa tinkachónkirá Ìnchéni, la ko naxa tjejórá tjuèhérá kíchuará la ko chrónka ch'án kixin xraxinkáonrá tí jeheni tjinkáonrá chrókjuijitsjeheni tí jahará. Kjaxin jeheni xíkaha tjinkaonni chrók'uikonni tí jahará. ⁷ Mé xíkaha kíchó ni tjejóat-sínkani kjuaxróxinhya ntihi na ntá kjónté kóchéhé asénni kuínhinni kixin kaín asánrá naxa tinkachónkirá Ìnchéni. ⁸ A ntá kuínhinni xíkaha kixin jína tjejórá naxa tinkachónkirá Ìnchéni Jesús a ntá antsí kóchéheni. ⁹ Ntá imá tsjancheheni Dios kjuasáya kixin xíkaha imá chéhé asénni kixin tí jahará tinkachónkirá ch'án. ¹⁰ Tie la ko nchakotjin chronóeheni Dios kixin tsjanjon ch'án kjuachaxin tsjijitsjeheni tí jahará inaá kixin

naxa t'itjáyan iso nkehe chrókjuakoharáni naxa chrók'uitjárá nkexrí jína chrókuinkachónkirá Ìnchéni.

¹¹ Tjejójtjancheheni T'eni Dios la ko Ìnchéni Jesucristo kixin chrókjuinkítsani ch'án chrókjuijitsjeheni tí jahará ¹² la ko tjancheheni Ìnchéni kixin chrókjuinkítsa ch'án tí jahará kixin antsí má chrótjuèhérá kíchuará la ko chrótjuèhérá kaín xín chojni éxi yóhé tjuàhará. ¹³ Tjancheheni ch'án kixin sintaxraxinkaonrá ch'án kixin kaín asánrá chrókuitekáonrá ch'án kixin ntá tsochóntahya asánrá ninkehó jje nkayakon It'eni Dios tió tsokjan Ìnchéni Jesús tsíkao ch'án kaín tí sín ó tsíkótjóa.

Nkexrí tóxrjinhin Dios chrók'uejóni

4 Jahará kíchó ni chronógharáni la ko ntaxraxinkaonráni tí kjuachaxin ihnjé Ìnchéni Jesús kixin jína chrók'uejórá tinkachónkirá Ìnchéni éxi tjejóch'erá jie kixin éxi kjuakoharáni. Mé xíkaha jína sinchekhéhérá Dios.

² Ó nohará tí nkehe kjuakuaxinráni kjuachaxin kuènte Ìnchéni Jesús. ³ Tí nkehe tjinkaon Dios kixin jína tjóa chrók'uejórá la ko chrókjuásinkoahyará jje í jnko chojni chjin ókjé. ⁴ Jnkojnkorá chrókónohará chróchon-tará jnkojnko ichjiánrá la ko jína chrók'uejórá chrótjuèhérá kíchuará. ⁵ Jehya kixin chrókjuakérá asánrá tí nkehe jínahya chrókjuich'erá éxi ch'e tí chojni chónhya Dios. ⁶ Nijnkorá chrókjuich'iyehérá ichjién kíchuará xíkaha kixin Ìnchéni mé imá sinchekjasóte ch'án tí chojni xíkaha sich'e mé xíkaha kjuín-taxraxinkaonráni senó. ⁷ Dios mé k'uíyeheni ch'án kixin jína chrók'uejóni, jehya kixin naxa chrókjuasinni jje. ⁸ A ntá tí sín chóntehya kjuasáyé tí nkehe tjakoni na mé jehya kixin chóntehya sín kjuasáyé chojni. Náhí. Chóntehya sín kjuasáyé Dios, tí nkexro kjuanjon tí Nchakuen chóntani.

⁹ A ntá tí tjuèhérá kíchuará la í t'ichjánxinhya naxa chrókjinni tsochronkani kixin nkexrí chrótjuèhérá kíchuará kixin jehe Dios mé tjetjākōhārā ch'án nkexrí chrótjuèhérá kíchuará. ¹⁰ Xrácín xíkaha tjejóch'erá tjuèhérá kaín tí sín kíchó ni tjejó estado Macedonia. Kjánchó chronógharáni kíchó ni kixin antsí má chrótjuèhérá kíchuará. ¹¹ Tóxakonhanrá kixin kjuaxróxin chrók'uejórá. Jnkojnkorá nohará nketí xra chrókjuich'exínrá tjára éxi k'uetuānhanráni. ¹² Na mé xíkaha chrók'uikon tí sín chónhya Dios ntá chróchóntahará sín kjuasáya la ko chrók'uitjáyanhya ninkehó nkehe chrókuicháxinhanrá.

Itsi Ìnchéni Jesús

¹³ Kíchóni, tjínkavan kixin chrókónohará nkehe tsoñhen tí sín tsík'en. Na mé tjínkavan kixin kánhyó chróts-jankamará sín chrókóyóghyará tí sín tinkáchónkihya sín Ìnchéni naxa chónhya sín kixin chróxechón sín inaá. ¹⁴ Kuítekaonni kixin ik'uén Ìnchéni Jesús la ko xechón ch'án inaá la ko kjaxin titekaonni kixin Dios kjuínchexechón Jesús la ko tió tsokjan Jesús ntá

sinchexechón Dios kaín xín tí sín tsík'en kuítekaon sín tí jehe ch'án.

¹⁵ Méxra chénkani ti jahará tí nkehe kjuako Ìnchéni kixin tí naxa tjejóchónni tió tsi ch'án na kjónté naxa tsitónxinhanyi ntja, naxa tsochónhenni tí sín tsík'en. ¹⁶ Jehe Ìnchéni mé ts'inkajinxin ch'án nkaya nkajní la ko itsen tsonixja ch'án kixin tí kjuachaxin jié kuènte ch'án la ko ts'èya tí ángel t'etqan la ko tsontácho tí trompeta kuènte Dios. A ntá kaín tí sín tsík'en kuítekaon sín Ìnchéni Cristo la senó tsoxechón sín. ¹⁷ A ntá chr'èxin kaín xinni tjejóchónni la ko kaín xín tí sín tsíxechón mé jnkokqa tsochriinni kixin tí kjuachaxin jié kuènte Ìnchéni. A ntá xríkjan tjuí tsoxetani ch'án. Mé xikaha ts'ejókoni ch'án jnkochrixin. ¹⁸ Méxra xikaha chrókjuinchechéxínrá kichuára tí tan i kixin xikaha tsonhen tió tsokjan Ìnchéni.

5 A ntá tí yaon tsonhen tíhi kichó ni t'ichjánxinhya naxa tsokjinni í jnko nkehe tsinhínrá. ² Jahará ó nohará jina kixin titàya itsi tí yaon tsokjan Ìnchéni éxi yóhe chrókui ijnko xichee tí tie a. ³ Ts'ejó sín itsjo sín kixin ijie kjuaxróxin tjejó sín kaín sín la ko ninkehó nkehe tsonhen sín. Ntá xrinahya titàya itsi tí kjuaxikaon jié la ko kjuachakon mé ts'itjayanxín tí kjuachón chróchóna sín éxi yóhe ijnko tjan tjejá xrinahya titàya tsjankixin ts'óntáki tjan kixin sinchekokjhi tjan xjeen tjan na mé jehe tjan xitjahya tsontácho tjan "Náhí", mé xikaha jehe sín chóntahya sín nkerí tsaáxin sín. ⁴ Ntá jahará kichó ni sítíehya tjejorá ntá chróchrakonhyará tí yaon itsi Ìnchéni. Tí náhí chróchrakonrá éxi chrókui ijnko xichee chrókjuintachakonrá. ⁵ Ntá jie kaín rá mé tjejorá tí ntja t'inkáséyan. Jeheni la jehya tjejóni tí ntja sítí a. ⁶ Méxra xikaha chrók'uejójuahyani éxi tjejójua tí sín í so na mé chrók'uejótjeheni chrókjuenkayáxinni jina. ⁷ A ntá tí sín t'ajua la tjejójua sín tí sítí ó la ko tí sín tókoan la tókoan sín tí sítí a. ⁸ A ntá jeheni na tjejóni tí ntja t'inkáséyan t'ichjánxin kixin jina chrók'uejóni chrókjuasinhyani jie. Chrókuinkáchónkini Ìnchéni la ko chrótjuèheni ch'án. Ntá jeheni na Ìnchéni ts'ayakonhenni ch'án tsaáxinni ch'án éxi tí ch'ín soldado t'inkáya ka tsík'óna chica kixin kohya nkehe tsonhen ntakuin ch'án. La ko chrók'uejóchónhenni itsi Ìnchéni tsaáxinni ch'án na mé éxi tí ch'ín soldado a xrasín ch'án nkehe tsík'óna chica t'ayakonhen kja ch'án kixin kohya nkehe tsonhen kja ch'án. ⁹ Kjueyáhya Dios tí jeheni kixin chrókjuinchekjásóteni ch'án. Náhí. Kjueyá ch'án tí jeheni kixin chrókuaáxinni Ìnchéni Jesucristo. ¹⁰ Jehe Jesucristo mé k'uenyákonhenni ch'án kixin chrók'uejókoni ch'án jnkochrixin kjónté naxa tjejóchónni o kjónté ó tsík'enni tió tsokjan ch'án. ¹¹ Méxra xikaha chrókjuinchechéxínrá kichuára la ko

chrókjuinkjtsará kichuára kixin jina chrók'uejó sín éxi xráxin tjejoch'erá.

Ch'ín Pablo mé nchexraxinkaon ch'án tí sín tinkáchónki Cristo

¹² Kichóni chronoàharáni kixin chróchontehérá kjuasáyé tí sín tjejóch'e sín xra kuènte Dios ntiha tjejójtitaón sín ntja chrónka sín itén Ìnchéni. ¹³ Na mé chróchontehérá sín kjuasáya la ko chrótjuèhérá sín má kixin tí xra tjejóch'e sín. A ntá jahará kaín rá jnkójina chrók'uejokoará kichuára.

¹⁴ Méxra tétuñhanráni kichó ni kixin chrókjuéntuéhérá tí sín tjinkakonhya sich'e sín xra la ko chrókjuinchechéhérá asén tí sín kóxrjé asén sín la ko chrókjuinkjtsará tí sín naxa noehya sín jina la ko chrókóninkákuénhyará ninkexró.

¹⁵ Tóxakonhanrá kixin chrókjuich'ehyará jinahya tí sín jinahya kjuít'ahará. Íchá jina chrókjuákoxinrá nkehe jina chrókjuich'erá kixin ts'ikon kaín xín chojni chjasintajni kixin jina tjejtjenkayáxinrá.

¹⁶ Méxra nchechéhérá asánrá jnkochrixin. ¹⁷ Chrókjuitpéhyará chrónixjehérá Dios jnkochrixin. ¹⁸ Kjónté ichrén nkehe chrókónhanrá la chróchjehérá Dios kjuasáya kixin xikaha mé tjinkaon ch'án chrókjuákoxinrá kixin tinkáchónkirá Ìnchéni Cristo Jesús.

¹⁹ T'ók'ankahyará tí xrohi t'inkáséyanxín Nchakuen Dios. ²⁰ Chontehérá kjuasáyé nkehe tjako tí sín kichó ni chronkaxín sín kjuachaxin kuènte Nchakuen Dios.

²¹ Chrótsjehérá jina tí nkehe tjejóch'e sín. A ntá tí jina na chrókuítekáonrá. ²² Chrókjuitpohérá kaín xín nkehe jinahya.

²³ Dios mé tjanjon kaín kjuaxróxin ntá tjancheheni ch'án kixin jehe ch'án sinchetjóará ch'án la ko ts'ayakonhen ch'án nchakuanrá la ko asánrá la ko cuerpo kuéntará kixin tsochóntahya ninkehó jie tió tsi Ìnchéni Jesucristo. ²⁴ Dios tí nkexro kjueyá tí jahará mé jina ch'án la ko kaín tí nkehe ntácho ch'án la tsoxiteyá.

Ch'ín Pablo kjuixixín nixjehe ch'án sín la ko tjanchehe ch'án Dios kixin chrókjuincheyaon tí jehe sín

²⁵ Kichóni chrónóehérá Dios kixin tsjinkjtsani ch'án kaín ni.

²⁶ La ko nixjehérá kaín xín tí sín kichó ni ntiha tsehérá tja sín.

²⁷ T'etqanxinni tí kjuachaxin kuènte Ìnchéni kixin nchekuáxinrá tí xroon chr'anhánrá tsinhin kaín xín tí sín kichó ni ntiha.

²⁸ Kjuasáyé Ìnchéni Jesucristo sintayaonrá ch'án. Amén. Ó tjen.

2 TESALONICENSES

Ch'ín Pablo nixjehe ch'án tí sín Tesalónica

1 Janhan Pablo la ko ch'in Silvano la ko ch'ín Timoteo ikjinni tí xroon i chr'anhánrá kichó ni njnko ch-jasin Tesalónica kixin jnkokoá tinkáchónkini It'éni Dios la ko Ìnchéni Jesucristo. ² Kjuasáyé It'éni Dios la ko Ìnchéni Jesucristo chrókjuintayaonrá ch'án kixin kjuaxróxin chrók'uejorá.

Dios sinchekitoexín ch'án tí ijje chojni tió tsokjan Ìnchéni Cristo

³ Kíchóni chrókjuancheheni Dios kjuasáya jnkochrín kixin tí jahará. Na mé jína xikaha chrókjuich'eni kixin tinkák'ánkí tí tinkáchónkirá Ìnchéni Jesús la ko tinkák'ánkí tí tjuèhéra kichuára tjejorá ntiha. ⁴ Ntá chéheni chenkaní tí sín kichó ni kaín tí njnko Dios kixin naxa tjákoxinrá kixin naxa tinkáchónkirá Ìnchéni kjónté síin chojni nínkakonhanrá la ko kjónté t'at-sínkará itsjé kjuaxróxinha. ⁵ Tíha mé tjákoxinrá kixin tjinkaon Dios tsotsjehe ch'án kixin á tsjachará ts'ikonrá tí kjuachaxin kuènte ch'án. Méxra xikaha tjejetjasó-texínrá jie.

⁶ Méxra ó nchoxon kixin sinchekjasóte Dios tí sín tje-jónchekjasótiará jie. ⁷ Ntá tsjanjon ch'án kjuachaxin kixin ts'ok'áhará kixin ó kjuasótiará la ko kjaxin jeheni ts'ok'éheni tí yaon itsi Ìnchéni Jesús ts'inkajinxin ch'án nkaya nkajni tsjkaon ch'án kaín tí sín ángel t'etjan kuènte ch'án na mé tsjkaon ch'án xrohi nene. ⁸ Mé xikaha itsi ch'án kixin sinchekjasóte ch'án tí sín kuítekakuenhya Dios la ko kuítekakonhya tí tan jína kuènte Ìnchéni Jesucristo chrókuaáxin sín. ⁹ A ntá tí sín kuítekakonhya mé tsjasóte sín jnkochrín ts'ítuenhen sín ts'axrjenta sín tí kohya Ìnchéni, í ts'ikonhya sín tí kjuachaxin t'etjanxín ch'án. ¹⁰ Xikaha tsjnenhén tí yaon itsi Ìnchéni tsjikosáyehe ch'án kaín xín tí sín kjuínchetjóá ch'án la ko kaín tí sín kuínkáchónki sín ch'án la ts'ikon sín tí kjuachaxin jie kuènte ch'án. Mé xikaha kjaxinrá jahará kixin ó kuítekáonrá tí nkehe kjuakoharáni.

¹¹ Mé xikaha jnkochrín tjancheheni Dios kixin jína chrók'uejorá éxi tjinkaon ch'án chrók'uejó tí sín kjueyá ch'án, la ko tjancheheni Dios kixin chrótjáhará ch'án kjuachaxin kuènte ch'án kixin chrókjuinkjtsará ch'án kixin chrókjuachará ch'erá kaín tí xra jína tjinkáonrá chrókjuich'erá kixin tinkáchónkirá ch'án. ¹² Mé xikaha kaín xínrá tsjikosáyeherá tí ihnié Ìnchéni Jesucristo la ko jehe ch'án mé kjaxin tsjikosáyahará ch'án kixin tin-

kachónkirá ch'án. Mé xikaha kjuasáyé Dios la ko Ìnchéni Jesucristo kixin kujkonóeheni ch'án.

Tsonoxín ijnko ch'ín jínahya

2 Kíchóni, a ntá tí tsi Ìnchéni Jesucristo la ko tsojnkotséni tí tjen ch'án jehe ch'án, méxra xikaha chrónóaharáni ² kixin chrókjuítóxinhyará tjoka tí nkehe chrókjuenkayáxinrá, la ko ní chróchrakonhyará tí chróntáchro jnkójín nkexro tónohe sín kixin ó kjuixraká tí yaon itsi Ìnchéni, la ko chróchrakonhyará xikaha chrókuínhínrá chróchronka ijnko chojni tjako, la ko chróchrakonhyará tí tsochronka sín kixin ó k'uáyéhe sín ijnko xroon éxi jeheni tsíkjanjonni chrónka kixin xikaha tsonhen. ³ Tjtoéhyará kixin jnkójín nkexro chrókjuít'ayahará xikaha. Naxa tsihya tí yaon ntá senó itsjé chojni tsonínkakonhen sín Dios, la ko tsonoxín ijnko ch'ín jínahya chóna jie, na ntá tíha mé tsjasóte jnkochrín. ⁴ Tsjak'e ch'án tsjanjonko ch'án kaín xín nkehe tinkáchónki chojni, mé tsjak'etjaxin ch'án nkaxenhen tí njnko Dios kixin jehe ch'án mé sich'éna asén ch'án éxi Dios tí jehe ch'án.

⁵ Á xráxinkákonhyará kixin xikaha k'uéxrjanka senó tí naxa k'uéjóni jnkokoá? ⁶ Ntá jahará ó nohará nkehe tí kjuachaxin naxa chónthehe kixin naxa tjexrakáhya tí yaon tsonoxín tí ch'ín jínahya. ⁷ Ntá jie imó ch'e xra tí kjuachaxin jínahya. Kjónté naxa t'itjayan kixin sáchrókjuj tí nkexro chónthehe. ⁸ A ntá tí ch'ín jínahya tsonoxín ch'án. Ntá tió tsi Ìnchéni Jesús ntá tí itén ch'án ts'axrjexin ir'va ch'án ó mé ts'enxín tí jínahya a kixin mé xikaha sinchek'itjayanxín ch'án tí jínahya tí kjuachaxin jie tsjkaon ch'án. ⁹ Méxra tí ch'ín jínahya mé tsjkaon ch'án tí kjuachaxin kuènte ch'ín Tsochren la mé xikaha tsochóna ch'án kjuachaxin jie tsjakoxin ch'án sich'iyaxín ch'án tsjasin ch'án kjuaxroan ntoáhya. ¹⁰ Mé xikaha kaín nkehe jínahya sich'iyexín ch'án tí sín xráxin ts'itjayan sín kixin chrohya sín chrókuitekaon sín tí tan chaxín ntoá chrókuaáxin sín. ¹¹ Méxra tsítqhe Dios tí jehe sín kixin tsitekaon sín kaín nkehe chaxínhya ¹² kixin ntá tsjasóte kaín tí sín kuítekakonhya sín tí tan chaxín chrókuaáxin sín na mé antsi kóxrjinhin sín chrókjuasín sín jie tsjasótexín sín.

Dios mé kjueyá tí jehe sín kixin chrókuaá sín

¹³ Ntá jeheni chrókjuancheheni Dios kjuasáya jnkochrín kixin jahará kichó ni chojni tjuahará Ìnchéni kixin tí tsíkjejá Dios tí jahará kixin senó chrókuaáxinrá tí Nchakuen ch'án tsotjuáxinrá la ko tí itén ch'án chaxín ntoá kuítekáonrá. ¹⁴ Méxra xikaha

k'uíyahará Dios kixin chrókuaáxinrá tí itén ch'án tjakoni kixin ntá tsjachará ts'ikonrá tí kjuachaxin jié kuènte Ìnchéni Jesucristo.

¹⁵ Mé xíkaha kíchó ni, jína chrók'uejorá chrók'uitjáyanhýará tí nkehe kjuakoharáni tió k'uéjóni jnkokoá la ko tí nkehe chrónka tí xroon ikjinni k'uayéhérá. ¹⁶ Ntá Ìnchéni Jesucristo la ko It'éni Dios na mé tí nkehe kjuasáyé ch'án tjuèhe ch'án tí jeheni la ko nchechéhe ch'án asénni jnkochrín la ko kjuasáyé ch'án tjejóchónhenni itsi Ìnchéni ¹⁷ na mé sinchechéhe ch'án asánrá la ko tsjanjon ch'án kjuachaxin kixin ntoá chrók'uejorá ntá jína chrónixjará la ko kaín xrá jína chrókjuich'erá.

Nixjehérá Dios kixin tsjinkítsa kaín ni

3 Méxra kjuixixín chrónógharáni kíchó ni kixin chrókjuanchehérá Dios kixin chrókjuinkítsa ch'án tí jeheni kixin tjoka sáchrókjuikjakoni itén Ìnchéni nkuixín kixin ntá tsinhin chojni la tsjikosáyehe sín ch'án éxí yóhe kuítekáonrá jahará. ² Kjaxin nixjehérá Dios kixin chrókjuinkítsani ch'án kixin kohya nkehe chrókónhenni tí siín chojni jínahya nínkakónhenni kixin kénhya sín tinkáchónki Ìnchéni. ³ Ntá Ìnchéni mé chaxín jína ch'án la jehe ch'án tsítqehya ch'án tí jahará naxá tsjinkítsará ch'án kixin jína ts'ejorá la ts'ayakonhanrá ch'án kixin kohya nkehe jínahya tsonhanrá. ⁴ Ó noheni kixin Ìnchéni la tsjinkítsa ch'án tí jahará kixin naxá sich'erá xrá éxí k'uətuəhanránani. ⁵ Ìnchéni tsjinkítsará ch'án tsonohará kixin Dios la tjuahará ch'án la ko tsjinkítsará ch'án kixin chrókóninkákonhýará éxí kónínkakónhya Cristo.

T'ichjánxín chrókjuich'eni xrá

⁶ Kíchóni t'ətoənxínni tí kjuachaxin ihnié Ìnchéni Jesucristo kixin chrók'uaxrjekjanxínrá tí sín kíchó ni tjinkakónhya sich'e xrá la ko xrihya sín éxí

kjuakoharáni. ⁷ Ó nohará kixin nkexrí chrók'uejorá chrókjuákoxinrá éxí k'uéjóni tí jeheni kixin tí k'uéjokoarání la jehya kixin kjuích'ehyani xrá. ⁸ Jehya kixin kjóneni niotjé jnkójín nkexro ntá chrókjuenkahyani. Náhí. Kóxakónhenni nchakotjin la ko tie kjuích'eni xrá kixin ninkehó chóntiəxínhyani tí jahará kixin chrókjuánjonrá tí nkehe chrókjóneni. Náhí. ⁹ Kjónté chóntani kjuachaxin chrókjuanchaharáni kixin chrókjuinkítsará tí jeheni kjánchó jeheni na kjuích'eni xrá kjuákoxinni kixin xíkaha jahará chrókjuích'erá xrá. ¹⁰ Kixin tí naxá k'uéjóni jnkokoá ntiha k'uətoənni kixin: Tí nkexro tjinkakónhya ch'e xrá la kjaxin chrókjonehya. ¹¹ Ó kuínhinni kixin tjejorá jnkójínrá ninkehó xrá ch'ehýará ə ntá kjuach'ia ó xríkoará. ¹² A ntá tí kjuachaxién Ìnchéni Jesucristo t'ətoənxínni la ko chrónóəxínni tí sín a kixin chrókóninkakónhya sín chrókjuich'e sín xrá kixin chrókjuacha sín chichaon chrók'uite tí nkehe chrókjone sín.

¹³ Ntá jahará kíchó ni, chrókóxrjehýará chrókjuích'erá tí nkehe jína. ¹⁴ A ntá tí tjen jnkójín nkexro titekakónhya tí nkehe t'ətoənxínni tí xroon i la tsjehérá jína nkexro tíha la ntá chrók'uitohýará ch'án la ntá chrókósuèhe ch'án. ¹⁵ Kjánchó jehya kixin chrókjuánjonkoará ch'án. Náhí. Chrókjuíchexraxinkáonrá ch'án jnkójína éxí ijnko chojni kíchó ni.

Ó kjuixixín nixja ch'ín Pablo

¹⁶ Ìnchéni mé tjanjon tí kjuaxróxin la ko naxá tsotjáhará ch'án kjuaxróxin jnkochrín kjónté ichrén nkehe chrók'uatsínkará. Jehe ch'án mé t'ayakonhanrá ch'án kaín rá.

¹⁷ Janhan Pablo tjaná mé kjinxian tí nkehe nixjahará. Mé xíkaha chrókjuátsoənxínrá tí letra kaín carta tsíkjan.

¹⁸ Ntá Ìnchéni Jesucristo mé kjuasáyé sintayaonrá ch'án kaín rá. Amén. Ó tjen.

1 TIMOTEO

Ch'ín Pablo nixjehę ch'án tí ch'ín Timoteo

1 Janhan Pablo kjueyána Jesucristo la ko Dios mé tsík'ętuanna mé jehe ch'án mé tí nkexro nchekaá chojni. La ko kjaxin k'ętuanna Ìnchéni Jesucristo tí nkexro tjejóchónhenni itsi. ² Ikjian tí xroon chr'anhan jaha Timoteo. T'íkuan éxí xjanna tí jaha kixin jaha tinkachónkia Cristo Jesús. Kjuasáyé It'éni Dios la ko Ìnchéni Jesucristo chrókjuintayavan ch'án la ko chrókuikonógha ch'án kixin kjuaxróxin tsjak'e jaha.

Chrókjuinchehráxinkaon ch'án sín kixin chrókuitekakuenhya sín tí nkehe chaxínhya

³ Éxí xrjannógha tíó sákjuia estado Macedonia la mé jaha chrókuitgha tí chjasin Éfeso la ntaha chrókuétuęnhén iso tí sín ntiha kixin chrókjuakohya sín tí nkehe ntoáhya. ⁴ La ko chrókuétuęnhén sín kixin chrókjuahya sín kuenté tí cuento tsíchronka chojni tí ósé a. Tí tinhin sín tíha la imá tjachaxin kichó sín la ó chónkó tíha. Kaín tíha la í sjinkįtsahya kixin sinchexiteyeheni Dios kixin tinkáchónkini ch'án.

⁵ Tí nkehe tjinkaonni la chrótjuęhenni kichó ni kaín ni kixin ó kótjóa ąsenni la ko ó noheni kixin jına tjenkayáxinni la ko kaín ąsenni tinkáchónkini Cristo. ⁶ Iso sín la kjuíchròe sín kixin itjo tí nkehe chónkó. ⁷ Tjinkaon sín chrók'óna sín maestro chrókjuako sín tí ley ą ntá jehe sín tienxínhya sín tí nkehe tjako sín kjánchó ntáchro sín kixin ó ntoá tí nkehe tjako sín, ntá chaxínhya.

⁸ A ntá jeheni la ó noheni kixin tí ley la jına tí chrokjuakoni éxí tjinkaon Dios. ⁹ Ó noheni kixin tí sín tjasinhya jię t'ichjánxienhya sín tí ley tsík'ętuann Moisés. Tíhi la t'ichjánxinhin tí sín titekakonhya la ko tí sín jięhe la ko tí sín jínahya tjasin jię la ko tí sín chóntahya kjuasáyé Dios la ko tí sín t'óyan it'é la ko ìné sín la ko kaín tí sín tjàya. ¹⁰ La ko tí sín tjasinko jię ijnko chojni chjin ókjé la ko tí sín jnkokón ntoa sín takja kichó sín la ko tí sín teé chojni ntá nchekji, la ko tí sín ch'ia la ko tí sín nchenohe Dios ntá chaxínhya. Mé tí ley mé chrókuinhin kaín tí sín ch'e tí nkehe jínahya la nínkakohenen tí nkehe jına tjakoni. ¹¹ Tí nkehe tjakoni mé chaxín tí tan jına sinchekaá chojni la tí Dios tjetoan mé k'ętuanna kixin tsjákua tíha.

Ch'ín Pablo kjuanchehe ch'án kjuasáyé Dios

¹² Tjánchágha kjuasáyé Ìnchéni Jesucristo kixin imá kjuínkįtsana ch'án la ko k'uikon ch'án kixin jına sít'ahá ch'án xrą ntá chjina ch'án tí xrą i. ¹³ Mé xįkaha kjueyá-

na ch'án kjónté senó imá k'uék'ántaxínhan tí sín tinkáchónki ch'án la ko k'uéchonkígha sín la ko chrók'oyán sín. Kjónté la Dios imá kujkonóghę ch'án tí janhan kixin ó nohe ch'án kixin k'uékinkachónkihya janhan tí jehe ch'án la ko k'uénonahya nkehe tí xrą k'uékjít'a.

¹⁴ Méxrą Ìnchéni ąntsí má kjuíncheyanna kixin ntá kjuanjon ch'án kjuachaxin kixin tsinkachónkia ch'án la ko tsotjuagh ch'án. Mé xįkaha kaín ni chóntani tí kjuachaxin tinkáchónkini Cristo Jesús.

¹⁵ Tíhi mé chaxín la kaín ni chrókuitekaonni. Ikui Jesucristo chjasintajni kixin sinchekaá ch'án tí sín kjuasin jię. Ntá janhan mé ąntsí má kjuásian jię. ¹⁶ Kjónté xįkaha kjuít'a la Dios ąntsí má kujkonógha ch'án tí janhan kixin xįkaha kjuakoxin Jesucristo kixin kónínkakonhya ch'án. Mé xįkaha tsjakuaxian kaín nkexro tsitekaon tí jehe ch'án kixin tsochóna sín kjuachón jnkochrín. ¹⁷ Ntá jnkochrín tsochónteheni kjuasáyé tí Rey t'ętuann. Jehe ch'án mé ijnko nkexro xráxin tjen la mé ijnko nkexro chónhya ts'en la xitjahya ts'ikonni ch'án. Jehó ch'án mé Dios la imá nohe ch'án. Amén.

¹⁸ Timoteo, éxí xjanna t'íkuan tí jaha, la kaín tí xrą i tjaha kixin tsjanjonkoa tí jínahya la tsjacha kixin tinkachónkia jına Ìnchéni la ko tjenkayáxian tí nkehe jına. Mé xįkaha sinchexiteyá tí nkehe kuínhín senó kixin tí sín kichó ni chrónkaxín ihnié Dios. ¹⁹ Í so sín la kjuenkayáxinhya sín tí jına ntá kjuíchròe sín kuítghę sín tí nkehe tinkáchónki sín. ²⁰ Mé xįkaha kónhen ch'ín Himeneo la ko ch'ín Alejandro. Janhan kjuánjuan kjuachaxin kixin ch'ín Tsochren mé sinchekjasóte sín kixin mé xįkaha ts'itja sín kixin í ts'ántaxiénhya sín Dios.

Nkexrí chrónixjeheni Dios

2 A ntá saoxín la xrjanógha kixin kaín chojni chrónixjehę sín Dios la chrókjuanchehe sín kjuasáyé ch'án kixin chrókjuinkįtsa ch'án kaín xín chojni. ² Chrókjuanchia sín kixin Dios imá chrókjuinkįtsa ch'án kaín tí sín t'ętuann la ko tí sín gobierno kixin ntá kjuaxróxin ts'ejóni la ko sinchexiteyeheni Dios la ko ntoá ts'ejóni. ³ Xįkaha mé imá jına la tóxrjnhin Dios, mé tí nkexro tsaáxinni. ⁴ Jehe ch'án mé imá tjinkaon ch'án kixin tsaá kaín xín chojni la ko tjinkaon ch'án kixin tsohohe chojni tí nkehe chaxín ntoá. ⁵ Mé itjen jnkokóaxón Dios la ko itjen jnkokóaxón nkexro nixjayákonhenni kixin tsochóxinni Dios. Tíha mé Jesucristo mé k'óna chojni ikui ch'án chjasintajni. ⁶ Jehe Jesucristo mé k'uenyákonhenni kaín xinni, kjuenkayákonhęn ch'án ijieni kixin tsaáxinni ch'án.

Táha mé xiteyá tí tsíntáchro Dios ósé kixin xikaha tsonhen ch'án. ⁷ Méxra tí xra mé kjueyána Dios kixin tsjikákoha tí sín jehya judío kixin tsinkáchónki sín Jesucristo la ko tsonhe sín tí nkehe chaxín. Janhan mé tinkáchónkia Cristo la xrjanka tí nkehe chaxín mé t'ayahya.

⁸ Méxra tjínkavan kixin kaín tí sín ntoa mé chrónixjehe sín Dios la chrókjuaya sín tja sín la chrókótjóa asén sín la ko chrókónínkakonhya sín la ko chrókjuéhya sín kjuanínkaon. ⁹ A ntá tí chojni chjin mé ntoá chrók'uitsa sín ka la chrókjuinchehnkehya sín la ko chrókjuasin chóntahya sín kaxíhi sín nkehe tjete xroxrjo náxrjón la ko chrók'uitsahya sín ika imá tjete. ¹⁰ Íchá jína kixin tí chojni chjin chrókjuich'e sín tí xra jína éxí chrókjuich'e kaín tí sín tsikjinchetjóa Dios. ¹¹ Tí chojni chjin t'ichjánxin chrókuinhin sín itén Dios la chrónixjahya sín la ko chrók'uetqanhya sín. ¹² A ntá janhan tjánjonhya kjuachaxin kixin chojni chjin chrókjuako tí nchónhya chojni síin la ko tjánjonhya kjuachaxin chrók'uetuēnhen sín chojni ntoa. Jehé sín la táni sín chrók'uejó sín ¹³ kixin saoxín la Dios kjuích'éna ch'án tí ch'ín Adán la ntá chr'éxin kjuích'éna ch'án tjan Eva. ¹⁴ A ntá ch'ín Adán la ninkexró kjuích'iyehya ch'án. Náhí. Tí tjachjin mé tsíkitekakonhen tjan tí nkexro tsikjich'iyehé tjan ntá xikaha xrankíxixín k'uíxin jje. ¹⁵ A ntá tí chojni chjin la kjónté xikaha kjuích'e sín la Dios sinchekaá sín tí jína ts'ayakonhen sín xjeen sín la tí chaxín tinkáchónki sín Dios la ko tjuēhe sín ch'án la ko ntoá ts'ejó sín la ko jína tsjenkayáxin sín.

Jína chrók'uejó tí sín t'etuēnhen tí ninko

3 Ijnko nkehe chaxín tjónka. Tí nkexro tjínkaon sich'e xra kuēnte ninko mé imá jína xra tjínkaon ch'án. ² Tí ch'ín chrók'uetqan mé ntoá chrókjuak'e ch'án kixin kohya nkexro chrók'ueka ch'án jje la ko kjāxin chróhónta ch'án jnkokóá ichjién ch'án ó la ko kjāxin chrókjuak'e ch'án jína la ko chrókjuenkayáxin ch'án jína la ko chróhónta ch'án kjuasáyé ch'án la ko kjāxin jína chrónixjehe ch'án tí nkexro tjiji ntqē la ko kjāxin chrókónohe ch'án tí nkehe chrókjuako ch'án. ³ La ko kjāxin chrókókoanhya ch'án la ko chrókjuéhya ch'án kjuanínkaon la ko kjāxin chrókóxrjienhya ch'án kixin chrókjuacha ch'án nchónhya chichaon. A ntá chrókójiēhya ch'án la ko kjuaxróxin chrókjuak'e ch'án la ko chrókóxrjienhya ch'án chróhónta ch'án itsjé chichaon. ⁴ Jehé ch'án mé kjāxin jína chrók'uetuēnhen ch'án tí sín tjejó ntqē ch'án la ko chrókjuentuēhe ch'án xjeen ch'án kixin tsitekaon xjan la tsjikosáyehe xjan it'é xjan. ⁵ Tí tsjachahya ch'án ts'etuēnhen ch'án tí sín tjejó ntqē ch'án la zntá nkexrí chrók'uetqan ch'án tí ninko kuēnte Dios? ⁶ Íchá jína kixin jehya injko nkexro na ntá k'uíxenhen chrókjuako kixin tí nkexro na ntá k'uíxenhen la imá chrókjuinchehnke ch'án la ntá chrókjuasin ch'án jje éxí kjuasin ch'ín Tsochren ijje senó. ⁷ Kjāxin t'ichjánxin kixin kaín xín tí sín naxa tinkáchónkihya Ìnchéni mé tsochónta sín kjuasáyé tí ch'ín t'etqan a. Tí náhi la ts'eka sín ch'án jje ntá tí xika-

ha la ch'ín Tsochren tsjacha tsjachróde tí ch'ín a ntá tsjasin ch'án jje.

Nkexrí chrók'uejó tí sín tsjinkítsa tí xra kuēnte ninko

⁸ Kjāxin tí sín diácono ch'e xra kuēnte ninko la kjāxin ntoá chrók'uejó sín kixin chróhóntehé sín kjuasáyé chojni. Kjāxin t'ichjánxin kixin chrókjuinchexiteyá sín tí nkehe ntáchro sín la ko chrókókoanhya sín la ko kjāxin chróhóntiāxinhya sín itsjé chichaon chrókjuacha sín. ⁹ T'ichjánxin chrókónohe sín jína tí nkehe tinkáchónki sín kixin jehe sín chróxraxinkaon sín á nchoxon tí xra ch'e sín. ¹⁰ Saoxín chrótsjehe kaín chojni á ninkehó jje chóntahya tí nkexro la ntá tí chaxín jína jehe ch'án la ninkehó jje chóntahya ch'án ntá jína ts'ixenhen ch'án tí xra kuēnte ninko. ¹¹ La ko kjāxin tí chojni chjin mé chrók'uejó sín jína kixin chróhónta sín kjuasáyé sín. Kjāxin chrókuínkáchónkihya sín kjuach'ia la ko jína chrók'uejó sín la ko chrókjuinchexiteyá sín kaín nkehe. ¹² Tí sín diácono la mé chróhónta sín jnkokóá ichjién sín la jína chrók'uetuēnhen sín xjeen sín la ko jína chrók'uetqan sín ntqē sín. ¹³ T'ichjánxin injko xra jína sich'e sín kixin ntá tsjacha sín ts'áyéhe sín injko nkehe jína tsjanjon ìnchéni la ko kjāxin tsosuehya sín tsochrónka sín nkexrí tinkáchónki sín Cristo Jesús.

Dios mé kjuínchenoheni tí nkehe k'uékiēnxínhyani

¹⁴ Tjínkavan tjoka chrókjuasántsjahā tí jaha kjánchó senó tsokjian tí xroon i. ¹⁵ A ntá tí tsoxrjenna isé ntá kjónté tsonoha nkexrí chrók'uejó tí sín naxa kjéhya Dios mé tí sín t'óna ninkqē Dios tjechón. Jeheni kaín ni mé tjejót'ayakonhenni tí tan chaxín ntoá. ¹⁶ Ninkexró chróntáchrohya kixin chaxínhya tí nkehe tinkáchónkini mé injko nkehe imá jje tíha la ninkexró k'uénoehya tí senó a.

Dios mé ikui k'óna chojni;
ikui ch'án kjuāqxín ch'án kjuāchaxiēn Nchākuen
Dios chónta ch'án kixin jína tí jehe ch'án.
La ntá tí sín ángel mé k'uíkon sín ch'án
la kuenté chjasintajni mé ó kuínhin sín nkehe chrónka
ch'án
ntá itsjé sín kuítekaon sín ch'án.
Ntá Dios k'uáyéhe tí jehe ch'án nkaya nkajní.

Tí sín kuítqhe tinkáchónkihya Cristo

4 A ntá ntáchro Nchākuen Dios kixin tí chjina tsjeje chjasintajni mé iso sín mé tsítqhe sín í tsinkáchónkihya sín Ìnchéni la ntá tsitekaon sín nchākuen tí jínahya sich'iyehé sín la ko tsitekaon sín tí nkehe tjako tí sín demonio. ² Mé tsinhin sín tí nkehe tjako tí chojni tjuáhya la ch'ia sín. Kjónté imá tsjasin sín jje la í tsosuehya sín kixin éxí tsíchján tí tjenkayáxixín sín la í tjenkayáxinhya sín jína. ³ Jehé sín mé tjinkakonhya sín kixin chrókótehe chojni la ko kjāxin tjinkakonhya sín kixin chrókjóneni nto. A ntá jeheni ó noheni kixin Dios mé kjuích'éna ch'án kaín xín nkehe ineni la tjínkaon ch'án kixin tí jeheni tinkáchónkini ch'án la ó noheni tí tan chaxín ntoá mé chrókjuancheheni ch'án

kjuasáya ntá chrókjoneni. ⁴ Méxra kaín xín tí nkehe kjuích'éna Dios la jína la kohya nkehe chróntáchroni kixin jehya jína sineni. Chrókjuancheheni Dios kjuasáya la ntá jína chrókjoneni ⁵ kixin tió tsoxraxinkaonni itén Dios la tsonixjeheni ch'án la ntá sincheyaon ch'án tí nkehe sineni.

Ijnko chojni jína ch'ehe xra Jesucristo

⁶ Jaha tjákohe tí sín kíchó ni kaín tí nkehe i la ntá xikaha imá jína sích'ehe xra Jesucristo la ko antsí tsjinkitsa ch'án ts'ánki kjuaxrexinkaon kuéntá tí tinkáchónkia tí tan kuénté ch'án la ko naxa tjákua tí nkehe jína ó xrákoha. ⁷ Jaha mé tahya kuénté tí cuento chónkó la ko tí nkehe ntoáhya tinkáchónki iso sín. A ntá jaha la chrókujtóehya chrókuinkáchónkia Dios. ⁸ Tí chojni tsítán la jína tíha kjánchó antsí má tjeoan chróxaxinkaonni Dios. Tíha la tsjinkitsa kixin jína xrit-jejóni ijie la ko kjaxin tsjinkitsa kixin ts'áyeheni kjuachón jnkochrín tió tsokjan Ìnchéni. ⁹ Kaín tíhi mé chaxín la kaín chojni chrókuitekaon. ¹⁰ Mé xikaha kjónté t'ántaxínjinni chojni la jína ch'eni tí xra i kixin tinkáchónkini Dios tjechón. Jehé ch'án chaxín sinchekaá ch'án kaín tí chojni titekaon tí jehe ch'án.

¹¹ Kaín tíha mé t'ichjánxin tsétoan la ko tsjàkua. ¹² Jaha chrókujtóehya kixin chrokuanoá sín kjónté naxa ntasoyá. Chrókjuákoxián tí sín tinkáchónki Ìnchéni nkexrí chrónixja sín la ko nkexrí ntoá chrók'uejó sín la ko nkexrí chrótjuèhe sín Dios la ko nkexrí chrókuitekaon sín Ìnchéni la ko nkexrí tjóá chrók'uejó sín. ¹³ Nachrohe tsjasán la jaha sínchekuáxian tí xroon itén Dios kixin tsinhin kaín sín la ko sínchexraxinkávan kaín tí sín kíchó ni la ko tjákohe sín. ¹⁴ Síncek'itjáyanyha tí kjuachaxián Dios k'uayéhé tió tí sín t'etóan kuénte njnko kjuachaxián Dios k'uejotja tja sín chrí-taón ikjá.

¹⁵ Chrókóxakonhan chrókjuínchexiteyá kaín tíha kixin kaín chojni tsotsjehe sín kixin jína noha.

¹⁶ Chrókjuenkayáxian jína tí nkehe tjákua kixin jína chrókjuak'e jaha, chrókjuínchexiteyá kaín nkehe la ntá tí xikaha sích'e la tsaá jaha la ko tí sín tjejótinhin tjákua la tsaá sín kjaxin sín.

Jína chrók'uejó tí sín tinkáchónki Cristo

⁵ Jaha la chrókóninkákuenhya tí sín ó táda. Náhí íchá jína chrónixjehé sín jnkojína éxí chrónixjehé it'á. La kjaxin tí sín ntasoá chrónixjehé sín éxí chrónixjehé kichuá mero. ² A ntá tí sín ó nána la mé chrónixjehé sín éxí chrónixjehé iná xikaha. Kjaxin tí sín tjarisoá mé jnkojína chrónixjehé sín éxí chrónixjehé kichuá mero la kjaxin chróchóntehé sín kjuasáya.

³ La ko kjaxin chrókjuinkitsa tí síchjin tsíkók'án la ko nchekitonhén sín nkehe sine sín tí chaxín kohya nkexro tsjinkitsa sín. ⁴ A ntá tí chojni chjin tsíkók'án chóna xjeen o chóna inté, a ntá tí jehe sín mé chrók'uitja sín chrókjuinkitsa sín kixin sine sín kjehya sín. Tíha mé chrókjuenkaxin sín tí it'é, iné sín kixin kjuínchek'ánki sín, kixin xikaha mé jína tóxrjinhin Dios.

⁵ Tí tjan chaxín tsíkók'án na jehó tjan tjan tjan mé jehó Dios tinkáchónki tjan la imá chrónóehé tjan Dios tie la ko nchakotjin. ⁶ A ntá tí sín tsíkók'án ixri sín tjasin sín jie la kjónté tjejóchón sín la éxí tsík'en sín xikaha tjejó sín. ⁷ Tétuènhén tí sín kixin sinchexiteyá sín kaín tíha kixin tsókohya nkexro tsjanchia jie. ⁸ A ntá tí nkexro tóxakuenhya kixin tí sín naxa kjéhya la ko kjaxin tóxakuenhya kixin tí sín tjejó ntóe ch'án mé xikahó tjákoxin kixin ninkehó tinkáchónkihya ch'án Dios. Mé xikaha antsí chóna ch'án jie a ntá tí sín tinkáchónkihya Ìnchéni la kénhyó.

⁹ Tí ts'ínixín ihnié tí sín tsíkók'án la chrók'uínixín jehó tí sín chóna sesenta nánó la ko tí sín k'uéchóna sín jnkokoá xii. ¹⁰ Kjaxin chrókjuákoxin tjan kixin jína ch'e tjan xra la ko chrókjuákoxin tjan kixin jína kjuínchek'ánki xjeen tjan la ko kjaxin jína nixjehe tjan tí nkexro tjiji ntóe tjan la ko kjaxin k'uàyakonhen tjan tí sín tinkáchónki Cristo la nchehnkehya tjan la ko kjaxin kjuínkitsa tjan tí sín níhi la ko í so xra jína kjuích'e tjan.

¹¹ A ntá chrók'uenixínhya ihnié tí sín tsíkók'án naxa tsjéhya nánó chóna kixin tsontáchro asén sín kixin í jnko chojni ntoa tsótehe sín inaá la ntá tsítóhe sín ixra kuénte Cristo. ¹² Ntá xikaha tsjasin sín jie kixin sinchexiteyáhya sín tí nkehe tsíntáchro sín. ¹³ Kjaxin sátsji sín jnko nchia la í jnko nchia la ntá tsósehe sín la ntá kjaxin xriko sín kjuach'ia la ko ch'éna sín kjuach'ia la kaín nkehe nixja sín la jehya jína tí xikaha chrónixja sín.

¹⁴ Méxra tí sín tsíkók'án naxa tjarisoá sín la íchá jína chrókótehe sín chróchóna sín xjeen sín la ko chrók'uàyakonhen sín ntóe sín. A ntá tí xikaha la tí sín nínkakonhan la chrókjontahya sín tí jaha. ¹⁵ A ntá iso tí sín tsíkók'án ó kuítóhe sín tinkáchónki sín Ìnchéni kixin ch'ín Tsochren tsíkjachro sín.

¹⁶ A ntá jnkojín chojni tinkáchónki Cristo ts'ikon sín kixin tsíkók'án tí síchjin kjéhya sín ntá t'ichjánxin tsjinkitsa sín kixin sine sín a kixin tsochóntiahya sín tí njnko tsjinkitsa. Méxra jehó tí sín chaxín tsíkók'án chónahya ninkechró tsjinkitsa mé chrókjuinkitsa tí njnko.

¹⁷ Tí nkexro jína t'etóan xra kuénte njnko la jehe sín chrókjuacha sín la ko kjaxin antsí chrókjuikosáyehe chojni tí sín chaxín xra ó tjejóchronkaxín sín la ko tjako sín. ¹⁸ Kixin xroon itén Dios mé ntáchro kixin: "Chrók'uejóyáhyará kampoaxa ir'va tí koxinta tjejóch'e xra", la ko kjaxin ntáchro kixin: "Tí sín ch'e xra la síin kjuachaxin chrókjuacha sín." †

¹⁹ Chrókuahya kuénté jnkojín nkexro tsjikao kjuach'ia t'eka jie tí nkexro t'etóan xra kuénte njnko. T'ichjánxin tsónoxín yaá o iy'á sín tsochónka kixin chaxín chóna jie tí nkexro a. ²⁰ Chrókjuéntuéhé tí sín tjasin jie nkayakon kaín sín kixin ntá tsinhin tí í so sín kixin tsochakon sín, í tsjasinhya sín jie. ²¹ Tétuènxian kjuachaxián Dios la ko Ìnchéni Jesucristo la ko tí sín ángel kjuéyá ch'án kixin jnkokón tsjéntuéhé kaín chojni la ko jnkokón tétuènhén sín kaín tí nkehe xrxanka.

²² Chrókjuéyáhya chjini jnkojín sín kixin ts'etóan sín xra kuénte njnko kixin tí chróchóna sín jie la kjaxin jaha

† Deuteronomio 25.4; Mateo 10.10; Lucas 10.7

chrókuamá tí jię. A ntá jaha chrókuıtóhé kaín nkehe jí-nahya.

²³ Jaha la jnkoyaxón tóníha tјoté tsąa. Jehya intą ó chrók'uia. Kјaxin intsí xranvino chrók'uia ntá chrókuıtoxián jína.

²⁴ Tí ijіé jnkoјín chojni la t'ikonni noxín tí naxą kuít-tęoxínhya ijіé sín. A ntá í so sín nóxinhya tјasin sín jię kјánchó tí tsјixixín la tsónoxín tí jię tјasin sín. ²⁵ Mé xіkaha kјaxin ó t'ikonni kіxin iso chojni imá ch'e sín tí xřą jína. A ntá í so sín kјónté t'ikonhyani la xitјahya ts-jak'má sín tí nkehe jína ch'e sín.

6 Tí sín ch'exín xřą mé t'ichjánxın tsochóntehe sín kјuasáya tí lamo kuente sín, kіxin ntá tí í so sín la ts'ántaxięnhya sín ihnjé Dios la ko ts'ántaxięnhya sín tí nkehe tјakoni. ² A ntá tí sín ch'exín xřą la chónta sín lámęé sín tinkáchónki Cristo la mé chrókuıtęehya sín tsјikosáyehe sín tí lamo kіxin jnkokoą kіchó sín. La mé ąntsí jína chrókuinkіtsa sín kіxin ó nohe sín kіxin tјinkіtsa sín ijnko nkexro tinkáchónki Cristo la chrótјuehe sín kіchó sín. Jaha mé tјákohé sín kaín tíha.

Tí nkehe tinkáchónkini tsochěxinni

³ Iso sín tјako tí nkehe jehó sín tјenkayáxin sín la tóyóęhya tí nkehe jína kјuako Ìnchéni Jesucristo la ko jehya tí nkehe tinkáchónkini. ⁴ Ó jehí nchehnke sín la nínkehó noehya sín. Tí ntoáhya nixja sín la tíha mé éxi ijnko chin chónta sín la tíha mé tјixın tí kјuachјinnoxín-hin la ko tјanjonko kіchó sín la ko t'ántaxínhın sín kіchó sín la ko chóntehya sín kіchó sín kјuasáya. ⁵ Mé tí sín la náxrјónhya tјenkayáxin sín la jnkochrіxín tјanjonko kіchó sín la noehya sín tí nkehe chaxín. Mé tјenkayáxin sín kіxin tinkáchónki sín Ìnchéni kіxin xіkaha chrókuacha sín nchónhya chichaon, ichro sín. Jaha la chrókuıtóhé tí sín xіkaha ch'e. ⁶ Tí tinkáchónkini Ìnchéni la ijnko nkehe imá tјetoan la ko tјete tíha ą ntá kјuaxróxin chrók'ueјóni kјónté tí nkehe chóntani ó. ⁷ A ntá tí kokјihini la ninkehó kuikohyani tí kuini chјasintajni la kјaxin tíó ts'enni la ninkehó nkehe xitјahya sátsјikoni. ⁸ A ntá tí chóntani nkehe sineni la ko chóntani ikéni la kјónté táhó la chrókóchéhęni. ⁹ A ntá tí sín tјinkaon sín imá chrókóríko sín mé tí sín a mé tsјichròe sín la lontј sín kіxin xіkaha tјenkayáxin sín, la mé ts'itјáyanxín sín tíha. ¹⁰ Tí imá tјuehęni chichaon la tíha mé nuéé kaín nkehe jínahya. Jnkoјín chojni imá tјinkaon sín tsochónta sín chichaon ntá tsјichròe sín tsítóhe sín tsinkáchónki Ìnchéni la tíha mé imá sinchekјasótęxín sín ąsén sín.

Jína tí nkehe tinkáchónkini

¹¹ Jaha mé tinkachónké Dios la tјtóhé kaín tí nkehe i. Chrókјuak'e ntoá la ko kaín ąsán chróxráxinkávan Dios la ko chrókuinkachónkia ch'án la ko chrótјuehé kіchua la ko chrókónínkákonhya tјoka la ko chrókјuınchehnkehya ąsán. ¹² Tјanjonkoa kaín nkehe jehya tí jína la ko kaín ąsán tinkachónkia Ìnchéni kіxin ntá chrókјuacha chrók'uayéhé tí kјuachón jnkochrіxín kіxin mé xіkaha k'uíyaha Dios tí jaha. Jaha la ó tsíchronka kіxin tinkachónkia Ìnchéni la ó kuínhin la ko k'uíkon nchónhya chojni. ¹³ Nkayakon Dios, tí nkexro chјéhe kјuachón kaín xín tí nkehe síchón, la ko Jesucristo, tí nkexro tsíchronka jína nkayakon ch'ín Poncio Pilato, mé tétuąnhan ¹⁴ kіxin sınchexiteyá kaín tí nkehe t'ętąn Dios kіxin í chrókјuínkíhya tí nkehe chrókuinkachónkia la ntá tsokohya ninkexró ts'eka jię tíó tsјixrakájia tí yąon tsokјan Ìnchéni Jesucristo.

¹⁵ Tsјixraká tí yąon kјueyá Dios ntá jehe ch'án mé tsјanjon ch'án kјuachaxin kіxin itsi Jesucristo. Dios la jehó ch'án mé chónta ch'án kјuachaxin ts'ętąn ch'án. Jehe ch'án mé tí Rey t'ętuęnhen kaín xín tí sín rey la ko jehe ch'án mé Ìnché kaín chojni. ¹⁶ Jehó Dios mé chónhya ts'en la tí tјen ch'án la imá t'inkaséyan la ko kohya nínkexró tsјacha tsochјina tí tјen ch'án. Nínkexró k'uíkonhya tí jehe ch'án la ko ninkexró xitјahya ts'ikon tí jehe ch'án. Tsјikosáyehęni ch'án kіxin jehe ch'án chónta ch'án kјuachaxin ts'ętąn jnkochrіxín. Amén.

¹⁷ Tí sín chónta itsјé nkehe chјasintajni mé tétuęnhén sín kіxin sinchehnkehya sín la ko tétuęnhén sín kіxin tsochóntiaxínhya sín tí nkehe chónta sín kіxin jnkochrіxínhya tsochónta sín tíha. Íchá jína chrókuinkáchónki sín Dios tјechón kіxin jehe ch'án tјanjon ch'án kaín xín nkehe kіxin mé xіkaha tјinkaon ch'án tsochéhęni. ¹⁸ Tétuęnhén sín kіxin chrókјuich'e sín tí nkehe jína kіxin tí chaxín chrókóríko sín la chrókјuinkіtsa sín kіchó sín la chrók'óxikayęhe sín tí nkehe chónta sín. ¹⁹ Mé xіkaha chrókјuacha sín tí nkehe tјete kіxin chr'ęxın la jína chrók'ueјó sín kіxin chrókјuacha chróchónta sín tí kјuachón jnkochrіxín.

Kјuixixín k'uítuęnhen ch'ín Timoteo

²⁰ Jaha Timoteo t'ayakonhén tí xřą la tięnhya tí nkehe ntoáhya nixja chojni. Ntáchro sín kіxin imá nohe sín kјánchó chaxínhya tíha. ²¹ Iso sín ó xіkaha ntáchro sín kіxin imá nohe sín la ntá kјuіchròe sín í tinkáchónkihya sín Ìnchéni. Dios chrókјuintayavan tí jaha. Amén. Ó tјen.

2 TIMOTEO

Ch'ín Pablo nixjehe ch'án tí ch'ín Timoteo

1 Janhan Pablo mé kjueyána Jesucristo t'ahā ch'án xra kixin xikaha tjinkaon Dios kixin mé xikaha ó chrónka ch'án kixin tsjanjon ch'án kjuachaxin tsochón-ta chojni kjuachón jnkochrín tí tsinkáchónki sín Jesucristo. ² Ikjian tí xroon i chr'anhan jaha kichó ni Timoteo. T'íkuān éxi xjanna tí jaha mé imá tjuaha. Kjuasáyé It'eni Dios la ko Ìnchéni Jesucristo chrókjuintayavan ch'án la ko chrókujikonòaha ch'án la ko chrótjáha ch'án kjuaxróxin.

Chróchronka ch'án kixin tinkáchónki ch'án Jesucristo

³ Xráxinkāvan tí jaha tió níxjahā Dios nchakotjin la ko tie la ko tjetjáncháha kjuasáyé Dios kixin imá tinkáchónkia ch'án. Jehe ch'án mé t'ahā xra kaín asenná éxi xikaha mé k'uékjich'e tí sín tsík'axrjeníxinna.

⁴ Xráxinkāvan jnkochrín nkexrí tsjanka la tjínkāvan kixin chrótsjahā tí jaha inaá kixin tsochéhe asenná. ⁵ Ó nòna kixin kaín asán tinkáchónkia Jesucristo. Kjaxin náchrja tjan Loida la ko ìná tjan Eunice mé saoxín kuinkáchónki sín Ìnchéni Jesús la ntá ó nòna kixin kjá kjaxin jaha xikaha tinkáchónkia ch'án.

⁶ A ntá ijie ntaxráxinkāvan kixin chrók'uitjáyanhya tí kjuachaxién Dios kjuanjon ch'án k'uayéhé tió kjuaké tjaná chrítaón tí jaha. ⁷ Dios la kjuanjonhya Nchakuen ch'án kixin tsochrakonni. Náhí. Kjuanjon ch'án tí Nchakuen ch'án kixin tsochóntani kjuachaxin la ko jína tsotjuèheni ch'án la ko jína tsjenkayáxinni. ⁸ Chrókó-suàhya chróchronka kixin tinkáchónkia Ìnchéni la ko kjaxin chrókósuàhya chróchronka kixin janhan tjéchi-naxián tí xrxanka itén ch'án. Kjónté la íchá jína chrókjuasótexián tí tjàkua tí tan tsaáxinni kixin tí kjuachaxin kuènte Dios ó k'uayéhé. ⁹ Jehe Dios mé kuaáxinni la ko kjuéyá ch'án tí jeheni kixin jína chrók'uejóni. La jehya tí xra jína kjuích'eni ntá chrókuaáxinni. Náhí. Kjuasáyé Dios kjuéyá ch'án tí jeheni kixin tsinkáchónkini Jesucristo. Tí naxā xrankíx-ixínhya chjasintajni mé tsíkjenkayáxin ch'án tíha kixin jehe ch'án mé imá tjuèheni ch'án. ¹⁰ Ntá jie ó kjuakoxin Dios kixin tjuèheni ch'án kixin ó kui tí nkexro tsaáxinni mé Jesucristo. Kjuínchek'itjáyan ch'án tí kjuachaxin k'uéchóna tí kjuach'én kixin kjuacha ch'án xechón ch'án inaá. Chronkaxín itén ch'án nkexrí tsaáxinni ntá ó kónoexínni kixin tí kjuachón kjuakoxin ch'án mé xit-jahya ts'itjáyan.

¹¹ Dios mé k'uetuanna sátsjixrxanka itén ch'án la ko kjuéyána ch'án tsjákoḡa tí sín jehya sín judío tí tan jína.

¹² Mé xikaha tjetjasótexinna kaín tí nkehe i la kjónté tó-suànahya kixin ó choxian jína tí nkexro tinkáchónkia. Mé ó nòna kixin chóna ch'án kjuachaxin ts'ayakon-henni ch'án tsjixrakája tí yaon tsokjan ch'án. Méxra janhan tjàhā ch'án asenná kixin ts'ayakonhen ch'án.

¹³ T'itjáyanhya tjàkua kaín nkehe jína ó kjuákḡa. Naxā titekāvan la ko tjuèhé kíchuará kixin tinkáchónkia Cristo Jesús. ¹⁴ Kjuachaxién tí Nchakuen Dios chóntani jnkoinkoni mé t'ayakonhén jína tí tan tjàkua kjuíntakitonhan Dios k'uayéhé.

¹⁵ Jaha mé ó noha kixin kaín tí sín estado Asia mé jehe sín kuítḡa sín la ko kjaxin tí ch'ín Figelo la ko ch'ín Hermógenes. ¹⁶ Tjáncháha Ìnchéni kixin imá tsikonóḡe ch'án tí sín tjejó ntḡe tí ch'ín Onesiforo kixin jehe ch'án mé imá kjuínkítsana ch'án la ko kósuèhya ch'án ikui ch'án kjónté tjéchi. ¹⁷ Tí nantá kjuíji ch'án chjasin Roma ntá kuítḡehya ch'án kjuéyána ch'án has-ta k'uitjana. ¹⁸ Tjáncháha Ìnchéni kixin tí yaon itsi ch'án ntá chrókujikonóḡe ch'án tí ch'ín a kixin jaha ó noha jína kixin nkexrí kjuínkítsa ch'án tí janhan tí chjasin Éfes-o kjaxin.

Kjuíncheyóḡxin ch'ín Pablo kixin jeheni éxi yóḡe ijnko soldado jína kuènte Jesucristo

2 Jaha xjeenni tákjá tí kjuachaxin kjuasáyé Jesucristo kjuanjon ch'án kixin tsjinkítsa kixin tinkáchónkini ch'án. ² Tí nkehe kuínhín kjuàkua nkayakon nchónhya chojni mé xikaha chjehé tí xra tí sín jína choxian jína ch'e xra kixin ntá jehe sín mé xikaha chrókjuakḡe sín í so chojni inaá.

³ Jaha la kjónté nchónhya nkehe kjuasótia la chrókjuacha kixin ijnko soldado jína kuènte Jesucristo. ⁴ Kohya nijnko soldado jína ch'e xra chrók'uixenhen ókjé xra kixin t'ichjánxin jnkójinxón xra sich'e ch'án kixin éxi tjinkaon tí nkexro t'etuēnhen ch'án. ⁵ Mé xikaha éxi yóḡe ijnko nkexro tsotsítán. Ntá tsjachahya ts'áyéhe ch'án nijnko nkehe tí sinchexiteyèhya ch'án tí sín t'etḡan. ⁶ La éxi yóḡe ijnko nkexro ch'e xra nonte ntá chóna ch'án kjuachaxin saoxín tsakja ch'án tí nkehe ts'óna. ⁷ Chrórxaxinkāvan jína kaín tí nkehe xrxanka la ìnchéni mé tsjinkítsa tsiénxian kaín nkehe.

⁸ Xráxinkāvan kixin Jesucristo la ó xechón ch'án. Jehe ch'án mé k'uaxrjeníxin ch'án ch'ín rey David. Tíha mé tí tan jína tsaáxinni tjetjàkua. ⁹ Tí tan tjejrjanka mé tjasótexinna. Tíha mé tjéchronetoxinna cadena éxi ijnko chojni tsíkjàya la kjónté tí itén Dios la jehya tjechronetoxín cadena. ¹⁰ Méxra kjónté nchónhya t'at-sínka tí janhan la ntaxiteyá kixin tí í so sín kjuéyá Dios

tsaáxin sín ch'án kixin tsochóna sín kjuachón jnkochrín kixin tinkáchónki sín Jesucristo.

¹¹ Tíhi mé chaxín:

Tí jehe ch'án k'uénxinni ch'án a ntá chr'éxín ts'e-jókoni ch'án.

¹² La tí tsjasótexínni tí jehe ch'án la ntá kjaxin ts'áyéhēni kjuachaxin kuēnte ch'án ts'etōanni.

A ntá tí chrókjuinchemáni tí jehe ch'án na ntá kjaxin ch'án la xíkaha sích'e ch'án.

¹³ Kjóté nchexiteyēhyani ch'án la jehe ch'án tjenchexiteyá ch'án

kixin Dios la xitjahya sích'ia ch'án.

Chrókjuich'eni tí xrā jína

¹⁴ Nchexraxinkávan sín kaín tí nkehe i. Dios tjetsjehe tētūēnhén sín kixin chrókuítōhe sín tí nixja sín tjan-jonxín sín kixin ó chónkó tíha la ninkehó sínkíhya. Tí xíkaha ch'e sín la sinchek'itjáyan sín tí sín tjejótínhin.

¹⁵ Sích'e xrā jína kixin tsōxjrínhin Dios tí xrā tjech'e a.

Ntoá chrókjuákua tí tan jína chaxín kixin ntá chrók'uichjánxínhya chrókósuàha.

¹⁶ La tītōhé tí nkehe náxrjónhya la ko chónkó nixja iso sín kixin tí sín nixja xíkaha la āntsí tsinkák'ánkí tí nkehe jínahya nixja sín.

¹⁷ Tí nkehe jehya jína tjako sín mé éxí yóhē ijnko itōn sóa sítinkáchr'enka. Mé xíkaha tjako tí ch'ín Himeneo la ko ch'ín Fileto.

¹⁸ Jehe sín mé ó kjuixin kuítōhe sín tí ntja ntoá la ntáchro sín kixin ó kjuixin k'uátsínka tí tsoxechón chojni.

Ntá xíkaha ch'iyēhe sín tí í so sín la tsjitōxínhin sín tí nkehe tinkáchónki sín.

¹⁹ Kjánchó tí sín tinkáchónki Dios éxí yóhē tí xrō xrankíxín tját'ō xitjahya tsoxíka la chóna éxí ijnko sello tí itén Dios

ntáchro kixin: "Ínchéni mé tjatsoan ch'án tí chojni kuénté ch'án", † la kjaxin ntáchro kixin: "Kaín tí sín tinkáchónki Cristo mé t'ichjánxín chrókuítōhe sín kaín

nkehe jínahya," mé xíkaha ichro itén Dios.

²⁰ Ijnko nchia jíé kuēnte tí sín rico la síin vaso tsík'óna chica oro la ko vaso tsík'óna chica plata. La kjaxin síin

nkehe tsík'óna ntachiso la ko nkehe tsík'óna nchetje. Iso la xrā ó tsík'óna kuēnte tí xrā tjetōan la í so la

tsík'óna kuēnte tí xrā tjetuanhya.

²¹ A ntá ijnko chojni chrókuítōhe kaín jíē chrókóyóhē éxí ijnko vaso tjóá jína kixin chrókuicháxinhin Ínchéni.

A ntá tí nkexro xíkaha chrókjuich'ehya tí nkehe jínahya kixin chrókuicháxinhin Ínchéni tí xrā jína.

²² Tītōhé kaín tí nkehe jehya tí jína tóxjrínhin í so tí sín ntasoá a. Chrókjuak'e tí ntja ntoá la ko kaín āsán

chrókuinkachónkia Cristo la ko chrótjuéhé kaín chojni la ko kjuaxróxin chrók'uejokoa kaín sín.

Mé xíkaha chrók'uéjō kaín sín tí sín kótjōá āsén mé kaín tí sín tinkáchónki Ínchéni.

²³ Jaha chrókuahya kuénté tí sín lōntj tjenkayáxinhya jína kixin jaha ó noha kixin xrāhya chrókjuanjonko kichó sín.

²⁴ A ntá ninkebro ch'ehe xrā Ínchéni chrókjuanjonko kichó sín kixin jína chrókjuinkitsa kichó sín.

Chrókónohe sín kaín nkehe jína chrókjuako sín la ko chrókónínkakuenhya sín kichó sín.

²⁵ Kaín āsén sín jnkójina chrónixjēhē sín tí sín titekakonhya kixin chróchónhen sín kixin Dios

chrókjuinkitsa tí sín a chrók'uixínki tí ntoáhya tjenkayáxin sín kixin ntá chrókónohe sín tí nkehe

chaxín ntoá chrókjuich'e sín ²⁶ kixin t'ichjánxín

chrókónohe sín nkexrí chrókuaáxin sín kixin ch'ín

Tsohren tjinkaon chrókjuich'iyēhe sín ntá chrókjuasin sín jíē.

Nkexrí ts'ejó tí chojni chjasintajni tí yaon tsjixín

3 T'ichjánxín chrókónoha kixin tí yaon tsjixín ntá itsi tí yaon kjuaxróxinhya ts'ejó chojni.

² Tí sín chjasintajni tsinkáchónkihya Ínchéni mé imá chrók'ue-tōan sín jehó la ko imá tsōxjrínhin sín chichaon la ko

sinchehnke sín la ko imá ts'ántaxínhin sín Dios.

Sinchexiteyēhya sín it'é sín la ko iné sín la ko tsochón-tahya sín kjuasáya la ko tsinkáchónkihya sín ninkehó

dios.

³ Tsojtjuēhya sín kichó sín la ko tsíkónóēhya kichó sín la ko tsjonta sín kichó sín la ko ninkebro

tsochrukuenhya sín la ántōsén sín tsjasin sín jíē, la ko imá tsōjīēhe sín la ko imá tsōnínkakonhen sín kaín

nkehe jína.

⁴ Jehe sín mé sinchekji kichó sín la ko tsjenkayáxinhya sín jína la ko sinchehnke sín.

Tsojtinkaon sín tsjeyá sín tí nkehe ntáchro āsén sín ó a ntá tsjeyáhya sín Dios.

⁵ Jehe sín la éxí chojni tinkáchónki Dios xíkaha ts'ejó sín. Kjánchó chaxínhya.

Tsinkáchónkihya sín tí kjuachaxin kuēnte Dios chaxín ntoá.

Méxrā jaha la chrókuankíēhya tí chojni ch'e xíkaha.

⁶ Iso tí sín a mé ixri sín t'ixenhen ntōē ókjé chojni la ch'iyēhe sín tí chojni chjin lōntj tjasin jíē la nchex-

iteyēhē sín kaín tí ntáchro āsén sín.

⁷ La xráxín ó tinkák'itja sín kjánchó nunca kuénxínhya sín tí nkehe chaxín ntoá.

⁸ A ntá éxí yóhē tí sín k'uékjinchexrōan mé ch'ín Janes la ko ch'ín Jambres mé k'uénínkakon-

hen sín ch'in Moisés mé xíkaha tí sín tjako ijie nínkakonhen sín tí nkehe chaxín ntoá.

Imá jínahya tí kjuaxrexinkaon kuēnte sín la ko titekakonhya sín tí nkehe chaxín tinkáchónkini.

⁹ Kjánchó tsjachahya sín sích'ia sín isé kixin kaín chojni tsoñohe kixin tí sín a mé lōntj sín kixin éxí xíkaha tsíkónhen tí yaá sín

k'uékónínkakonhen ch'ín Moisés.

Tí nkehe kjuixín k'uētūēnhen ch'ín Pablo tí ch'ín Timoteo

¹⁰ A ntá jaha mé ó kuítekávan tí nkehe kjuákua. Ó noha nkexrí kjuak'é janhan la ko ó noha tí xrā kjuít'a janhan.

Ó noha nkexrí tinkachónkia Ínchéni la ko noha kixin tjokahya kónínkavan la ko noha nkexrí tjuāhā chojni.

Ó noha kixin kjóté kónínkaon chojni la kuítōāhya tí xrā a ¹¹ kjóté chónkina sín la ko kjuasótena. Ó noha nkehe kónna tí chjasin Antioquia la ko Iconio

la ko Listra. Chrók'óyánna sín la kjuínchekjuasótena sín kjánchó Ínchéni mé kjuínkítsana kjóté kaín tí nkehe chrókónna.

¹² Kaínxín tí sín tjinkaon tjóá chrók'u'ejó sín nchexiteyēhē Cristo Jesús la t'ichjánxín tsjasóte sín.

¹³ A ntá tí sín jínahya la ko tí sín ixri ch'ia sín mé ts'óna sín āntsí jínahya. Jehe sín xrich'ia sín la ch'iaxín sín nkehe jínahya.

¹⁴Jaha la jína chrókjuak'e la í chrókjuínkíhya tí nkehe k'uíjtá la ko tí nkehe ó kuítekávan. Jaha la ó noha tí nkexro kjuakoha. ¹⁵Jaha la desde xjanntsia k'uíjtá nkexrí nixja xroon itén Dios la tíha mé tónoexínni kixin Cristo Jesús tsaáxinni kixin tinkáchónkini ch'án. ¹⁶Ntá kuenté xroon Biblia kjuachaxién Nchakuen Dios kjuínkítsa tí nkexro ikjin la tíha mé jína tsoxrácuexinni tí nkehe chaxín la ko tíha mé jína tsjentuéheni la ko tsjinkítsani tsonoheni nkexrí chrók'uejóni ntoá ¹⁷kixin tí nkexro tinkáchónki Dios chrókónohe jína la ko chrókjuacha sich'e kaín tí xra jína.

4 Kjuachaxién Dios la ko Ìnchéni Jesucristo, tí nkexro itsi éxí ijnko rey la sinchekitōexín ijje kaín chojni tjejóchón la ko tí chojni tsík'en, ²mé tétuanhan chrókjuakua itén Dios kaín asán kjónté á chrókuinhin sín o náhí. Nixjehé sín jnkojína kixin tsitekaon sín la ko tjéntuéhé sín jnkojína. Chrókóninkákonhya chrókjuákohé sín. ³Itsi ijnko yaon ntá tsojinkakonhya sín tsinhin sín tí nkehe jína. A ntá sinchexiteyēhé sín tí nkehe ntáchro asén sín ó. Tsjejá sín nchónhya maestro tsjakohē sín jehó tí nkehe tóxrjínhin sín chrókuinhin sín. ⁴Méxra tsítōhe sín tí nkehe chaxín ntoá la ntá itsa sín kuénté kaín nkehe chaxínhya. ⁵Méxra jaha jína chrókjuenkayáxian la chrókjuacha kjónté tsjasótia. Chrókjuintaxín chrókjuich'e xra chrókjuákohé chojni itén Dios tsaáxinni mé xikaha sinchexiteyá jína tí xra chonta.

⁶Ntá janhan ó kjuixraká tí hora tsjasótena la ko ó kjuixraká tí hora its'èn. ⁷Ó kjuánjonkian jína kaín tí nkehe jínahya la ko ó kjuixinna tí xra kuéntana la ko kuítóahya jína kuinkachónkia Ìnchéni. ⁸A ntá ijie la tí nkehe tsitōnna mé tjechónhen kixin jína kjuak'é ntihi. Tíha mé tsjanjon Ìnchéni tí yaon itsi ch'án. Jehé ch'án mé ijnko juez jína. Jehya kixin janhván tsákjaá tí nkehe tsjanjon ch'án. Náhi, kjaxin kaín tí nkexro kuítekaon sín ch'án la ko chéhe sín tjejóchónhen sín tió tsi ch'án.

Ch'ín Pablo k'ueṭoan tsjijitsjehe sín ch'án

⁹Jaha chrókóxakonhan tjoka chrók'uinkatsjehé tí janhan ¹⁰kixin ch'ín Demas la kuítóhe ch'án tí janhan kix-

in imá cóxrjínhin ch'án tí nkehe kuénte chjasintajni. Sátsíkji ch'án chjasin Tesalónica. Ch'ín Crescente mé sátsíkji ch'án chjasin Galacia a ntá ch'in Tito sátsíkji ch'án chjasin Dalmacia. ¹¹Jehó ch'ín Lucas naxa tjékian ch'án. Tjíkjéyá ch'ín Marcos la tsjikuana ch'án ntihi kixin jehe ch'án mé jína tsjinkítsa ch'án tí xra chonta ntihi. ¹²A ntá ch'ín Tíquico mé kuétuanhan ch'án sátsji ch'án chjasin Éfeso. ¹³Tió ts'inka ts'inkakuana tí ka t'ítsate kuítóha chjasin Troas ntōé ch'ín Carpo la ko kjaxin ts'inkakuana tí libro kuéntana la ko koí tí tjoé iko tsík'óna xroon.

¹⁴Tí ch'ín Alejandro tí ch'ín ch'e xra chica mé nchónhya nkehe jínahya kjuích'ena ch'án. Kjánchó Ìnchéni mé tsjenkehe ch'án kaín nkehe kjuích'e ch'án. ¹⁵Jaha mé tóxakonhan kixin tí jehe ch'án kixin imá nínkakonhen ch'án tí nkehe tjakoni.

¹⁶A ntá tí saoxín k'uèya tí síxree tí kjuia tí tjejó sín la ninkexró kjuínkítsahyana. Kaín sín me kuítóna sín janhván. Kjónté xikaha la tjáncháha Dios kixin chrókquahya ch'án kuéntá kixin xikaha kjuích'e sín.

¹⁷Kjánchó Ìnchéni mé chaxín kjuínkítsana ch'án la kjuanjon ch'án kjuachaxin kixin tsjachana naxa jína tsjakua itén ch'án. Ntá kuínhin kaín tí sín jehya judío. A ntá Ìnchéni kjuínkítsana kixin kjónehyana koxra.

¹⁸Ìnchéni mé tsjinkítsana kixin naxa tsonnahya kaín nkehe jínahya. Jehé ch'án mé ts'ayakonna ch'án ts'ixanhan tí tjet'etōan ch'án nkaya nkajní. Kjuasáyé ch'án kixin xikaha jnkochrín tsoxiteyá. Amén.

Ch'ín Pablo kjuixixín nixja ch'án

¹⁹Jaha nixjehé tí tjan Prisca la ko ch'ín Aquila la ko nixjehé tí sín siín ntōe ch'ín Onesíforo. ²⁰Kuítóhe ch'ín Erasto chjasin Corinto. A ntá ch'ín Trófimo kuítóhe chjasin Mileto kixin kónihi ch'án. ²¹Tóxakonhan chrók'uinka naxa t'ixenhya nchakuen kin. Tí ch'ín Eubulo la ko ch'ín Pudente la ko ch'ín Lino la ko tjan Claudia la ko kaín sín kíchó ni ntihi nixjaha sín jnkojína.

²²Ìnchéni Jesucristo chrók'uajikoa ch'an la Dios chrókjuintayaonrá kaín rá mé xikaha tsoxiteyá. Amén. Ó tjen.

TITO

Ch'ín Pablo nixjehe tí ch'ín Tito

1 Janhan Pablo mé t'ahā xrā Dios la ko tsíkjejána Jesucristo kixin tsjákoḥā tí í so sín tsíkjejá Dios kjaxin kixin ts'itja sín tsoṇohe sín kixin nkexrí chrókuinkáchónki sín tí nkehe chaxín. ² Ntá ts'ejóchónhen sín tsochónṭa sín kjuachón jnkochríxín. Dios la xitjahya sich'ia la kaín tí nkehe tsíchrónka ch'án ósé tí naḥā k'ónahya chjasintajni la mé xíkaha tsoṇhen. ³ Ntá tí yaon tsíntáchro Dios la mé jie ó xiteyá la ntá kónoxín tí tan kuènte ch'án. A ntá Dios tí nkexro tsaáxinni mé k'ueṭoan kixin siṭ'ahā ch'án xrā tsjákuā itén ch'án. ⁴ Ikjian tí xroon i chr'anhan jaha Tito. T'íkuān éxí chaxín xjanna tí jaha kixin yóini tinkáchónkini Jesús. Kjuasáyé It'eni Dios la ko Jesucristo tí nkexro tsaáxinni, chrókjuintayavan la ko chrókuikonóḥa ch'án la ko chrótjáha ch'án kjuaxróxin.

Tí xrā sich'e tí ch'ín Tito chjasin Creta

⁵ Kuitḥa jaha tí isla Creta kixin jaha chrókuētuēnhén tí sín síin ntiha kixin nkexrí chrók'uejé sín la ko chrókónoxín nkexro ts'etḥoan kuènte jnkojnko njnko jnkojnko chjasin éxí tí kuētuṇhan jaha. ⁶ T'ichjánxin kixin tí nkexro ts'etḥoan xrā kuènte njnko la jína chrókjuak'e kixin kohya nkexro chrók'ueka jie, la ko chróchónṭa jnkogá ichjién la ko tí xjeen sín chrókuinkáchónki Ìnchéni kixin tsokohya nkexro chrókjuanchia jie kixin jehya tí jína tjejóch'e sín, la ko kjaxin chrókójieḥya sín. ⁷ Mé xíkaha tí nkexro ts'áyéhe tí xrā ts'etḥoan xrā kuènte njnko mé ts'etḥoan nkexrí tsoṇhen xrā kuènte Dios la ntá t'ichjánxin ijnko nkexro tsjenkayáxin jína, chrókjuasinhya jie. La chrókjuinchehnkehya la ko chrókóninkakonhya tjoka. La ko kjaxin jehya ijnko nkexro tókoan la ko jehya ijnko nkexro tjejá kjuanínkaon la ko chrókóxrjienhya sín chrókjuich'ia sín ntá chrókjuacha sín chichaon. ⁸ Kjaxin jína chrókjuak'e ch'án kixin tí tsjiji ijnko nkexro ntḥe ch'án chrókjuanjon ch'án kjuachaxin chrókjuak'e tí nkexro a. La ko jína chrókjuak'e ch'án la ko jína chrókjuenkayáxin ch'án kixin ijnko nkexro ó tsíkjinchetjóá Dios la ko chróchónṭa ch'án kjuasáyé ch'án. ⁹ Kjaxin t'ichjánxin chrókuitḥeḥya ch'án tí tan jína xrákoḥe ch'án kixin ntá jína tsjákoḥe ch'án í so chojni tí nkehe ntoá la kjónté nkexro tjinkakonhya tsinhin la jína chróchenka ch'án chrókuinhin.

¹⁰ Síin itsjé tí sín nínkaon mé tí sín a la mé tí sín judío la mé nixja sín éxí loṇṭi sín mé xíkaha ch'iehe sín chojni. ¹¹ Tí sín a la chrók'uíkjeḥeni ir'va sín kixin tjachròe

sín nchónhya chojni kixin tjako sín tí nkehe jehya jína kixin chrókjuich'ia sín chrókjuacha sín nchónhya chichaon.

¹² Ijnko ch'ín kuènte chjasin Creta la mé tsíchrónka ch'án nkexrí tjejó tí sín chjasén ch'án. Ntáchro ch'án kixin: "Kaín tí chojni chjaséni mé imá ch'ia sín la ko imá jiehe sín la ko imá kóchjinka sín la ko séhe sín", mé xíkaha chrónka ch'án. ¹³ Tí nkehe tsíchrónka ch'án mé chaxín ntoá. Méxrā antsí fuerte chrókjuéntuéhé sín kixin ntá jína chrók'uejó sín chrórxaxinkaon sín Dios. ¹⁴ Nixjeḥé sín kixin chrókuaḥya sín kuènte kaín tí nkehe tsík'axrenixin kja tí sín judío tjako la ko chrókuitekakonhya sín tí nkehe t'etḥoan tí sín nínkakonhen tí nkehe chaxín.

¹⁵ Tí sín chaxín tjóá kjuaxrexinkaon kuènte sín ntá kaín nkehe ch'e sín la jína. A ntá tí nkexro titekakonhya la tjuáḥya kjuaxrexinkaon kuènte la kohya ninkehó nkehe jína tí kjuaxrexinkaon kuènte sín la kaín nkehe tjenkayáxin sín mé tjuáḥya. ¹⁶ Ntáchro sín kixin chóxin sín Dios a ntá tí t'ikonni nkexrí ch'e sín ó noexinni kixin chaxinhya tíha la ch'ia sín. Jehhe sín mé ntoáḥya tjenkayáxin sín la ko jiehe sín la ko titekakonhya sín. A ntá tí xíkaha ch'e sín la, ¿nkexrí chrókjuich'e sín tí xrā jína?

Chrókjuako ch'ín Tito tí tan chaxín

2 A ntá jaha chrókjuákua éxí tí chrónka tí tan jína chaxín. ² Tjákoḥé tí sín ó táda kixin chrókókoanhya sín la ko jína chrók'uejó sín la ko chróchónṭa sín kjuasáyé sín la ko chróchónṭa sín ijnko kjuaxrexinkaon jína la ko jína chrókuinkáchónki sín tí nkehe chaxín la ko chrótjuèhe sín kichó sín la ko chrókóninkakonhya sín kjónté tsjasóte sín. ³ A ntá kjaxin xíkaha tí sín ó nána la kjaxin jína chrók'uejó sín la kjaxin chrókjuinchekuáxinhya sín chrókuinkáchónki sín kjuach'ia la ko kjaxin chrókókoanhya sín. Chrókjuakoxin sín ijnko kjuaxrexinkaon jína ⁴ kixin xíkaha chrókjuakuexin sín tí chojni chjin tjarisoá a kixin chrótjuèhe sín xii sín la ko chrótjuèhe sín xjeen sín ⁵ la ko chrókjuich'e sín xrā jína la ko ntoá chrókjuenkayáxin sín la ko jína chrók'uàyakonhen sín nchia ntḥé sín la ko chrókójína sín la ko chrókuitekakonhen sín xii sín. Tí xíkaha chrókjuich'e sín chrókjuinchehiteyá sín la kohya nkexro chrók'uántaxinhin tí itén Dios tinkáchónkini.

⁶ Kjaxin xíkaha chrókjuinchehraxinkávan tí sín ntasoá kixin jína chrók'uejó sín chróchónṭa sín kjuasáyé sín. ⁷ Jaha mé chrókjuákoéxian sín kaín nkehe jína la ko chrókjuákoḥé sín kixin ntoá chrók'uejó sín. ⁸ Jaha la

chrónixja tí nkehe jína kixin kohya nkexró chrók'uántaxín la ntá xíkaha chrókósuèhè tí sín nínkaon la ntá kohya nkehe jínahya chróntáchro sín kuènte tí jeheni.

⁹Tétuènhén tí sín xrich'exón xrá kixin chrókjuinchexiteyéhe sín tí lamo kuènte sín la ko chrókójina sín la ko chrónixjankjehya sín tí nkexro ch'ehe sín xrá ¹⁰la ko kjaxin chrókueéhya sín kixin jehya ijnko chojni chee tí jehe sín. Ntá kaín chojni chrók'uikon sín kixin tjákoxin sín kixin náxrjón tí itén Dios chrókuaáxinni.

¹¹Kixin Dios mé kjuákoxin ch'án kixin nkexrí tjuèheni ch'án kixin jehe ch'án mé tsaáxin kaín chojni.

¹²Kjuasáyé Dios mé tjákohe ni ch'án kixin chrókuítóheni kaín nkehe jíe la ko kaín tí nkehe jínahya tjenkayáxinni. La ko jína chrók'uejóni chjasintajni la ko ntoá chrók'uejóni la ko chrókuinkáchónkini Dios.

¹³Kjaxin chrók'uejóni jína kixin chrókóchéheni chrók'uejóchónhenni tí yaon kjuachaxién Dios jíe itsi Dios la ko Jesucristo tí nkexro tsaáxinni. ¹⁴A ntá jehe ch'án mé k'uenyákonhenni ch'án kixin tjinkaon ch'án tsaáxinni ch'án kixin tsotjuáxin kaín jíe chóntani kixin ntá jeheni mé ts'ónani ijnko chojni sich'ehe ch'án xrá la ko tsqrxjínhinni sich'eni kaín xrá jína tjinkaon ch'án.

¹⁵Tíhi mé chrókjuàkua la ko chrókjuinchexraxinkávan sín la ko chrókuétuènhén sín kjuachaxién Dios. Chrókuítóéhya kixin ninkexró chrókókjóniéhya tí nkehe tjákua jaha.

Jína chrók'uejó tí sín tinkáchónki Cristo

3 Chrókjuinchexraxinkávan sín kixin sinchexiteyéhe sín tí gobièrno la ko tsitekaon sín ichrén xrá ts'e-tqan tí síxreé kixin chrókjuich'e sín kaín xrá jína ts'e-tqan tí sín a. ²La ko chrók'uántaxiéhya sín ninkexró la ko kjuaxróxin chrók'uejó sín la ko chrók'óna sín ijnko chojni jína la ko chrókjuákoxin sín kixin jehya ijnko chojni nchehnke la chrókjuikosáyehe sín kaín chojni.

³Jeheni kjaxin ósé k'uélontjini la ko k'uékitekakonhyani Dios. Chjini k'uék'ajini la k'uékóxrjínhinni kaín nkehe jínahya. La ko jehya jína k'uék'ejóni la ko k'uéchóntani kjuachjínqínhin la ko k'uéchjínnoxienheni í so chojni. ⁴A ntá tí Dios tsaáxinni mé kjuákuèxinni ch'án kixin jína ch'án la ko tjuèhe ch'án kaín chojni.

⁵Jehe ch'án kuaáxinni ch'án la jehya kixin ichrén xrá jína chrókjuich'ehe ni ch'án. Náhí, ó jehí kujkonóéhèni

ch'án la ntá kjuínchekaáni ch'án la ko kjuínchetjóáni ch'án. Ntá kokjínini nixin kixin tí Nchakuen ch'án la mé k'uáyèxinni kjuachón nixin. ⁶Kjuasáyé Jesucristo tí nkexro tsaáxinni ntá kjuínchekjtonhenni Dios Nchakuen ch'án kixin tsochóntani kjuachaxin kuènté ch'án. ⁷A ntá xíkaha kjuasáyé ch'án kjuínchetjóáni ch'án kixin ntá tjejóchónhenni tí kjuachón jnkochríxin tsjanjon ch'án.

⁸Kaín tíha mé chaxín. Tjínkavan kixin jaha chrókuétqan kaín tíha kixin ntá kaín tí sín tinkáchónki Dios mé chrókuitekaon sín chrókjuich'e sín kaín nkehe jína. Kaín tí nkehe la mé jína la ko tsjinkjtsa kaín chojni. ⁹A ntá jaha mé tjtohé tí sín tjachaxin kichó sín lontj sín la ko tjtohé tí nkehe tinkáchónki sín kuènte tí sín tsík'axrjeníxin sín la ko tjtohé tí sín tjanjonxin tí ley kuènte Moisés. Kaín tíha la ó chónkó la ninkehó kjuaxrexinkaon chóntahya.

¹⁰Jnkójín nkexro tjinkaon tsjixrónkáxin tí tójnkotsé njnko ntiha la nixjehé ch'án jnkójina senó la ko yóxin ínaá ntá tí titekakonhya ch'án ntá tjtohé sátsji ch'án ¹¹kixin ó noha kixin tí chojni xíkaha a mé ntoáhya tjenkayáxin sín kixin jehó sín nchek'ánkí sín íjé sín.

Tí nkehe k'uetqan ch'ín Pablo

¹²Tí tsétuènhan ch'ín Artemas la ko ch'ín Tíquico kixin tsjiji sín tí tjen jaha la ntá tjoka chrók'uinkatsjehé tí janhan chjasin Nicópolis kixin ntiha tsjak'é ts'atsinkajia tí nchakuen kin. ¹³Jína chrókjuinkjtsa jaha tí ch'ín Zenas tí ch'ín nixjayákonhen í jnko chojni la ko tí ch'ín Apolos la ko chróchjehé sín kaín tí nkehe t'ichjánxínhin sín tió sátsji sín kixin ninkehó nkehe chrók'uitjáyanhya tí t'ichjánxínhin sín. ¹⁴Ntá tí sín í so chrók'uitja sín nkexrí sich'e sín tí xrá jína la ko chrókjuinkjtsa sín kichó sín ichrén nkehe t'ichjánxínhin sín kixin chrókjuákoxin sín kixin jína tjejó sín.

Ó kjuixixín nixja ch'ín Pablo

¹⁵Kaín tí nkexro tjékian janhan ntihi nixjahá sín jnkójina. Jaha mé nixjehé kaín tí sín tinkáchónki Inchéni ntiha mé kaín tí sín imá tjuèheni sín. Dios mé chrókjuincheyaonrá ch'án kaín rá. Amén. Ó tjen.

FILEMÓN

Ch'ín Pablo nixjehe ch'ín Filemón

1 Janhan Pablo tjéhhjinaxián tí xrā kuènte Cristo Jesús tjékjian tí xroon i la ko kichó ni Timoteo kixin tí jaha Filemón ts'ayéhé. Jaha mé tjuəha kixin jnkokón tjejóh'eni xrā kuènte Dios. ² Kjaxin chrókuinhin kaín tí sín tinkáchónki Ìnchéni tójnksé ntəa la ko tí tjan kichó ni Apia la ko tí ch'ín kichó ni Arquipo, mé tí ch'ín ch'e xrā éxí tí jeheni. ³ Kjuasáyé It'eni Dios la ko Ìnchéni Jesucristo chrókjuintayaonrá ch'án kixin chrótjáhará ch'án kjuaxróxin.

Ch'ín Filemón tjuèhe ch'án chojni la ko tinkáchónki ch'án Jesús

⁴ Xrāxín tjáncháha kjuasáyé Dios tí xrāxinkavan tí jaha tí nixjahā Dios ⁵ kixin ó kujnhān kixin imá tinkachónkia Ìnchéni Jesucristo la ko imá tjuèhé ch'án la ko kaín tí sín tinkáchónki Dios. ⁶ Tjáncháha Dios kixin tsjinkitsa ch'án tí sín kuítekaon tió kjuákohe sín kixin ntá tsienxín sín jina nkexrí kaín tí nkehe chóntani kixin kjuíncheyaoonni Cristo Jesús. ⁷ Imá chàna kixin ó nòna kixin jaha kichó ni imá tjuèhé tí sín kichuá ntiha la ko imá kjuinchechéhé asén tí sín tinkáchónki Ìnchéni.

Ch'ín Pablo chrónóhehe tí ch'ín Filemón kixin tsikonóhehe ch'án tí ch'ín Onésimo

⁸ Janhan na kjueyána Jesucristo t'əhā ch'án xrā méxrā chonta kjuachaxin tsétuənhan jaha tí nkehe chrókjuich'e. ⁹ A ntá íchá jina jehó xrjənnóəha tsitekávan kixin jaha tjuèhé tí janhan. Janhan Pablo mé ó tádana la ko tjéhhjinaxián tí xrā kuènte Jesucristo. ¹⁰ Méxrā xrjənnóəha tsjinkitsa tí ch'ín Onésimo. Jehe ch'án mé t'íkuan éxí xjəna kixin kjuankixin ch'án tsinkáchónki ch'án Jesucristo tí tjéhhjinakian ch'án ntihi. ¹¹ A ntá tí ósé ch'ín Onésimo mé kjuít'ahya xrā jina. A ntá ijie ó nòna kixin imá jina sit'aha ch'án xrā tí jaha la ko jina sich'ena ch'án xrā kjaxin. ¹² Ntá ijie tsétuənhan ch'án tsijji ch'án tí tjen jaha inaá. Chrótjuèhé ch'án éxí chrótjuèhé tí janhan. ¹³ Janhan tjínkavan chrókuinakian ch'án ntihi kixin chrókjuinkitsana ch'án chrínki

tí chrókjuak'e jaha kixin tjéhhjinaxián tí itén Jesucristo. ¹⁴ Kjánchó tjínkəkonhya tsjáncháha xikaha tí tjínkəkonhya jaha. Jehya kixin jaha chrókjuinkitsani kixin chrókuétuənhan xikaha. Náhí. Jehí tjinkaonni éxí jaha tóxrjínhan chrókjuich'e. ¹⁵ Tí ch'ín Onésimo kuítəha ch'án iso yaon ə ntá jie la tsochonta ch'án jnkochrín. ¹⁶ Ijie la jehya éxí ijnko chojni tsík'íná chrók'uikuan ch'án. Náhí. Ntá jie la éxí ijnko nkexro ch'e xrā əntsí jína mé éxí ijnko kichua chrótjuèhé ch'án. Janhan na tjuəhā ch'án kjánchó tí jaha la əntsí má chrótjuèhé ch'án. Jehya éxí chojni ó chrók'uikuan ch'án. Náhí. Chrók'uikuan ch'án éxí ijnko kichua kuènte Ìnchéni.

¹⁷ Méxrā tí chaxín t'íkuan tí janhan éxí kichó ni jnkokəá tinkáchónkini Ìnchéni ntá chrók'uayéhé ch'án éxí chrók'uayéhé tí janhan. ¹⁸ A ntá tí ichrén nkehe kuaáha ch'án ə ichrén nkehe síkáha ch'án la janhan tsjénkəha tíha. ¹⁹ Janhan Pablo mé tjaná kjinxiān tí xroon i na mé janhan tsjénkəha tíha. A ntá janhan tjínkəkonhya chrókjuintaxraxinkávan tí jaha kixin kaín tí nkehe tjasikəna tí janhan kixin kjuákohá jaha. ²⁰ Méxrā kichó ni tsotsenkávan s'ich'e tí nkehe tjáncháha chaxín tinkachónkia Ìnchéni. Mé xikaha s'incechéhé asenná kixin jaha mé kichó ni tinkachónki Cristo.

²¹ Méxrā ikjian tí xroon i chr'anhan kixin ó nòna kixin jaha la s'inchexiteyá tíha la ko ó nòna kixin jaha la s'ich'e əntsí má que tí nkehe tjáncháha jaha. ²² Kjaxin tjáncháha kixin tjéyá ijnko nchia tsjak'é. Tjéhhjənhān kixin jahará la nixjəhérá Dios la ntá Dios chrókjuanjən kjuachaxin kixin chrókjuasəntsahará.

Kjuixixín nixja ch'ín Pablo

²³ Kjaxin ch'ín Epafra mé nixjahará ch'án jnkójina. Jehé ch'án mé tjéhhjinakian ch'án jnkokəá tí ntəéchiso ntihi kixin kjaxin tinkáchónki ch'án Cristo Jesús. ²⁴ Ch'in Marcos la ko ch'ín Aristarco la ko ch'ín Demas la ko ch'ín Lucas mé kaín sín nixjaha sín jnkójina. Jehé sín mé tjinkitsana sín tí xrā.

²⁵ Tjéttjáncháha Ìnchéni Jesucristo kixin sintayaonrá ch'án kaín rá. Amén. Ó tjen.

HEBREOS

Dios nixjəxɪn ch'án tí Xjeen ch'án

1 A ntá tí imá ósé Dios mé nixjehe tí sín tsík'axr-jenixinni nchónhya veces kixin nchónhya nkexrí chrókiénxín sín, nixjəxɪn ch'án tí sín k'uéchrónka tí itén ch'án. 2 A ntá jie tió tsjixixín Dios nixjəxɪn ch'án tí Xjeen ch'án, na mé Dios kjuích'éna ch'án kaín xín nkehe síin kixin kjuachaxién tí Xjeen ch'án, mé tí nkexro k'uáyéhe kaín xín nkehe. 3 Jehé ch'án mé t'inkaséyanxín ch'án tí kjuachaxin kuènte Dios, la ko jehe ch'án mé kjaxin éxi tsjehe Dios xikaha tsjehe tí jehe ch'án. Jehe ch'án t'aykonhen ch'án kaín xín nkehe síin kixin tí kjuachaxin jie chóna tí tan nixja ch'án. A ntá kjuixin kjuínchetjóa ch'án tí jie chónani, ntá sákjuj ch'án kjuák'etjəxɪn ch'án tí tja chjina It'é ch'án tí tjen ch'án t'ətoan ch'án nkaya nkajní.

Tí Xjeen Dios imá t'ətoan, a ntá tí sín ángel la kénhyó

4 Tí Xjeen Dios k'uáyéhe ch'án kjuachaxin ts'ətuənhen tí sín ángel, kixin tsík'áyéhe ch'án tí kjuachaxin kuènte It'é ch'án, a ntá imá t'ətoan ch'án, a ntá tí jehe sín la náhi. 5 Méxra Dios ntáchehya nijnko ángel kixin: Jaha mé Xjanna, janhan mé kjuít'ána tí jaha ijie. la ko kjaxin ntáchrohya Dios kuènte nijnko ángel kixin: Janhan mé chrók'óna It'é ch'án, la ko jehe ch'án mé chrók'óna xjanna. † 6 A ntá tió kui tí jnkokóá Xjeen Dios chjasintajni, ntá ntáchro Dios kixin: Kaín tí sín ángel kuènte Dios chrókjuikosáyehe tí jehe ch'án. †† 7 A ntá ntáchro Dios kuènte tí sín ángel kixin: Tí sín ángel ch'éna ch'án éxi xrinto kixin nchakuen sín ó, la ko tí sín ch'ehe ch'án xra la ch'éna ch'án éxi xrohinene. ‡ 8 A ntá ntáche ch'án tí Xjeen ch'án kixin: Tí trono kuéntá itjen jnkochrín, jaha Dios, la mé jaha mé ijnko nkexro t'ətoan jína. 9 Jaha tóxrjínhan tí nkehe jína, a ntá ninkákonhén tí nkehe jínahya. Mé xikaha tí Dios tsíkjeýá jaha, la Dios kuéntá kjuín-tacháha má, a ntá tí í so sín k'uájikoa la kánhyó. †† 10 Kjaxin ntáchro kixin: Jaha Ìnchéni, tí xrankixín kjuich'éna chjasintajni,

† Salmo 2.7; 2 Samuel 7.14; 1 Crónicas 17.13 †† Deuteronomio 32.43 ‡ Salmo 104.4 †† 1.8-9 Salmo 45.6-7

la ko jaha kjuich'éna nkajní.

11 Táha mé ts'itjáyán, a ntá jaha la tsjak'e jnkochrín.

Kaín tíha tsontaxín éxi iké chojni,

12 éxi ijnko iké chojni xikaha tsoxrat'ə,

ts'ixinkí éxi ijnko iké chojni.

A ntá jaha la ts'ixitóxinhya jnkochrín tsjak'e,

a ntá tí kjuachón chonta jaha la nunca tsjejehya. ††

13 Dios la ntáchehya nijnko tí sín ángel kuènte ch'án kixin chrók'uejó sín tja ch'án chjina ntahó chrók'ue-toan sín, tsjixinjian kaín xín tí sín nínkakonhen sín la chrókjuachahya sín chrók'ue-toan sín. †††14 Kaín tí sín ángel mé nchakuen sín ó mé ch'ehe Dios xra mé k'uituenhen sín tsjinkitsa tí sín ts'áyéhe kjuachaxin tsaá sín.

Chrókjoniehyani tí nkehe tsaáxinni

2 Mé xikaha chrókjuenkayáxinni jína tí nkehe ó kuínhinni kixin chrókuítəehyani tí ntja ó kuákjani. 2 A ntá tí tan tsíchronka tí sín ángel ósé la mé tsíkónoxín kixin chaxín tíha. A ntá tí sín kuítেকakonhya sín tí tan jína kuínhin sín la kjuasin sín jie, na mé kjuasóte sín la táhó mé kjuacha sín. 3 ¿Xá nkexrí chrókuaáni tí chrókuaahyani kuentá tí nkehe jie chrókuaáxinni? Jehé Ìnchéni tsíchronka ch'án saoxín nkexrí chrókuaáxinni, a ntá chr'əxɪn tí sín tsíkinhin mé kjuakəhe sín tí jeheni. 4 Méxra Dios kjuakoxɪn ch'án kjuaxroan jie la ko kjuachaxin jie kixin chaxín tíha, la ko noexinni kaín tí kjuachaxién Nchakuen ch'án tsík'áyéheñi éxi tjinkaon ch'án tsjanjon ch'án.

Jesucristo k'óna ch'án chojni

5 Dios la tsíchjéhya tí sín ángel kjuachaxin kixin chrók'ue-toan chjasintajni chr'əxɪn éxi tí jie tjeónixjani. 6 Náhi. Éxi nixja xroon itén Dios chronkaxín kixin: ¿Xá nkexéhe tí chojni a, jaha It'eni Dios, kixin imá xráxinkávan tí jehe ch'án? ¿Xá nkexro tíha kixin imá tóxakonhan kixin tí jehe ch'án? 7 Jaha tsíkjič'héna ch'án éxi ijnko chojni t'ətuanhya kjánchó kánhyó isé, a ntá tí sín ángel antsí má k'uéchóna sín kjuachaxin, a ntá jie la imá kjuíkosáyehe ch'án; 8 la jaha tsíchjéhe ch'án kjuachaxin kixin kaín nkehe ts'ətuənhen ch'án. ††† Mé xikaha ntáchro tíha kixin tsíchjéhe Dios tí chojni kjuachaxin kixin chrók'ue-tuənhen ch'án kaín xín nke-

†† 1.10-12 Salmo 102.25-27 ††† Salmo 110.1 ††† 2.6-8 Salmo 8.4-6

he, ntá Dios kuítgehya ninkehó nkehe chrókuitekakuenhya ch'án. Kjánchó naxa t'ikonhyani kixin á kaín nkehe titekakonhen ch'án. ⁹ Kjánchó ó noheni kixin Jesús la tsíkijich'ena Dios éxi chojni t'etqanhya kjánchó kánhyó isé, a ntá tí sín ángel antsí má k'uéchónta sín kjuachaxin. Dios mé tjuèhe kaín xín chojni ntá tjinkaon ch'án kixin ch'ín Jesús chrók'uenyákonhen kaín chojni. A ntá jie tsík'áyéhe ch'án kjuachaxin náxrjón la ko Dios tjikosáyehe tí jehe ch'án kixin tí kjuasóte ch'án, ik'uén ch'án.

¹⁰ Kaín nkehe siín la kuènte Dios la ko tjejó kixin tí kjuachaxin kuènte tí jehe ch'án. A ntá Dios tjinkaon ch'án kixin kaín xín tí xjeen ch'án chrók'uejó sín tí tjen ch'án tí t'inkaséyan. Méxra Dios kjuanjón Inchéni Jesu-cristo kixin tsjasóte ch'án kixin ntá jína kjuakoxin ch'án kixin ntá jehe ch'án tsaáxinni ch'án. ¹¹ Kaín tí sín tsíkótjódá la ko tí nkexro kjuínchetjódá na mé chóna jnkokoá It'é. Méxra tí Xjeen Dios tósuèhya ch'án tson-táchro ch'án kixin kichó ch'án tí jehe sín. ¹² Éxi ntáchro tí xroon itén Dios kixin:

Tsochénkani tí sín kichó ni kixin nkexro tí jaha, tsjikosáyahani tsotsjeni himno tí tójnkotsékoni tí sín kichó ni. †

¹³ Kjaxin ntáchro kixin:

Janhan titekavan Dios. ††

La ko kjaxin ntáchro inaá kixin:

Ntihi tjejian tí xjeen Dios tsíkjanjon ch'án tsík'ayáha. ‡

¹⁴ A ntá tí xjeen chojni mé jnkokoá kichó la k'óna nto la ko ijni; la kjaxin ch'ín Jesús xikaha tsík'óna ch'án nto la ko ijni kixin jína its'en ch'án kixin jína sinchek'itjáyán ch'án tí nkexro chóna kjuachaxin t'óyán chojni, na mé t'axrjéxín kixin diablo tíha, ¹⁵ mé xikaha chrókjuinchekaá ch'án kaín tí sín chrakonhen sín tí kjuach'en, tjejó sín éxi t'ítuenhen sín kaín yaon tjejó sín. ¹⁶ Kjaxin kuihya ch'án kixin chrókjuinkitsa ch'án tí sín ángel. Náhi. Ikui ch'án kixin tsjinkitsa ch'án tí sín tsík'axrjenixin ch'ín Abraham. ¹⁷ A ntá t'ichjánxin chrókóyóhè ch'án éxi tí sín kichó ch'án kixin jína chrók'óna ch'án nchat'á t'etqan kuènte Dios la chrókjuikonóeheni ch'án, ntá jína tsjatsen ch'án ijie kaín chojni kixin k'uenyákonhenni ch'án. ¹⁸ Kixin jehe ch'án kjuasóte ch'án la ko tí jínahya tjinkaon chrókjuachroe ch'án la kjuachahya, a ntá jie la jína tsjinkitsa ch'án tí sín chrókjuachroe tí jínahya kixin chrókjuasinhya sín jie.

Antsí tjeoan ch'ín Jesús, a ntá ch'ín Moisés la kánhyó

3 A ntá kichó ni, jahará la tsíkótjódá, la mé Dios tsík'iyahará ch'án kixin ts'ónará xjeen ch'án, a ntá chrórxaxinkáonrá jína Cristo Jesús na mé jehe ch'án mé tí apóstol la ko tí nchat'á t'etqan kuènte tí nkehe tinkáchónkini. ² Tí ch'ín Jesús jína kuítekakonhen ch'án Dios, mé tí nkexro tsík'jeyá ch'án sich'ehe ch'án xra, éxi kjaxin ch'ín Moisés jína kjuích'e ch'án xra k'uáyakonhen ch'án ntqe Dios. ³ Dios antsí kjuikosáyehe tí ch'ín Jesús, a ntá ch'ín Moisés la kénhyó, éxi antsí tjikosáyehe sín tí nkexro kjuích'ena ijnko nchia, a ntá tí nchia la

kénhyó tjikosáyehe sín. ⁴ Jnkojnko nchia k'óna kixin siín nkexro kjuích'ena, kjánchó Dios mé kjuích'ena kaín nkehe siín. ⁵ Ch'ín Moisés jína kjuích'e ch'án xra k'uáyakonhen ch'án tí nchia kuènte Dios. Tí xra kjuích'e ch'án mé k'uénixja ch'án kuènte tí nkehe tson-táchro Dios chr'éxin. ⁶ A ntá Cristo la mé Xjeen Dios tí jehe ch'án, ntá kjuínchexiteyá ch'án jína la t'ayakonhen ch'án tí nchia kuènte Dios, la tíha mé jeheni, kixin tí tsítqehyani ch'án la naxa tsinkáchónkini ch'án ntá tsochéhèni kixin tí nkehe tjejóchónhenni.

Ts'ok'éheni tí tjen Dios

⁷ Mé xikaha éxi ntáchro Nchakuen Dios nixja xroon itén Dios kixin:

A ntá jie tí chrókuinhínrá tí nkehe ntáchro Dios,

⁸ chrókjuích'ehyará éxi kjuích'e tí sín ósé kuítekakonhya sín Dios

tí yaon kjuích'ehe sín prueba Dios tí nteje.

⁹ A ntá ntaha tí sín tsík'axrjenixinrá ósé kjuích'ena sín prueba,

kjonté cuarenta nánó k'uikon sín tí xra kjuít'a.

¹⁰ Méxra kónínkakonhan tí chojni a, ntáxrjan kixin: "Xrácín xrichoe asén sín, tjinkakonhya sín tsochóxin sín ntjaná."

¹¹ Méxra kónínkakonhan tí jehe sín, ntátjan sín kixin chaxín tsoxiteyá kixin ts'ixenhya sín ts'ok'éhe sín tí tjeen janhan. ††

¹² Kichóni, chrókóxakonhanrá kixin chrókókohya njnko tí jahará chróchontará asánrá jínahya chrókju-tqhéra Dios tjechón chrókuitekákuenhyará tí jehe ch'án. ¹³ Chrókjuínchechéhéra kíchuára jnkojnko yaon naxa tjen tiempo kixin njnko tí jahará chrókjuenkayáxinrá kixin naxa chrókjuásinrá jie, í chróntáchrohya asánrá kixin naxa chrókójjahará. ¹⁴ A ntá tí chrók'uejóni jnkojína hasta tsjixixin éxi kuinkáchónkini tí xrankixixin, ntá siín kjuachaxin ts'ejókoni Cristo.

¹⁵ Mé xikaha ntáchro kixin:

A ntá jie tí chrókuinhínrá jahará tí nkehe ntáchro Dios,

chrókjuích'ehyará éxi kjuích'e tí sín ósé kuítekakonhya sín Dios. ††

¹⁶ ¿A ntá nkexro tí sín kuínhin itén Dios, a ntá tí chr'éxin kuítekakonhya sín? ¿Á jehya kaín tí sín tsíkakitsjéxín ch'ín Moisés tí nación Egipto? ¹⁷ ¿A ntá nkexro tí kónínkakonhen Dios tí cuarenta nánó? ¿Á jehya tí sín kjuasin jie k'uénxin nteje? ¹⁸ ¿A ntá nkexro ntáche Dios kixin chaxín tsoxiteyá kixin ts'ixenhya sín ts'ok'éhe sín tí tjeen tí jehe ch'án? ¿Á jehya tí sín kuítekakonhya? ¹⁹ A ntá ó noheni kixin kjuachahya sín k'uixenhen sín kixin kuítekakonhya sín.

4 Méxra, tsintáchro Dios kixin tsjanjon ch'án kjuachaxin ts'ixenhenni ts'ok'éheni tí tjeen ch'án, a ntá tóxakonhenni kixin ách'e jnkojín tí jahará chrókjuachahyará chrók'uixenhenrá ntiha. ² Kixin kjaxin jeheni kuínhinni itén ch'án tsaáxinni éxi kuínhin tí jehe sín, kjánchó tí jehe sín la ninkehó kjuínkitsahya sín tí tan jína kuínhin sín, kixin kjonté kuínhin sín tí tan

† Salmo 22.22 †† Isaías 8.17,18 ‡ Isaías 8.17,18

†† 3.7-11 Salmo 95.7-11 †† Salmo 95.7-8

na kuítekakonhya sín. ³ A ntá jeheni kuítekaonni, ntá ts'ixenhenni ts'ok'éheni ntaha, éxí tsíntáchro Dios kixin:

Méxra kóninkakonhan sín tí jehe sín ntátjan sín kixin chaxín tsoxiteyá

kixin ts'ixenhya sín ts'ok'éhe sín tí tjén janhan. [†] Kixin Dios la tió kjuixinhin ch'án xra kjuích'éna ch'án chjasintajni ntá kjuák'e ch'án k'ok'éhe ch'án. ⁴ Mé xikaha í jnko nketí nixja tí xroon itén Dios chrónka kuènte tí yaon yatoxín ntáchro kixin:

Kjuixinhin Dios kaín xra ntá kjuák'e ch'án k'ok'éhe ch'án tí yaon yatoxín. ^{††}

⁵ A ntá inaá ntáchro tí xroon itén Dios kixin:

Ts'ixenhya sín ts'ok'éhe sín tí tjén janhan. [‡]

⁶ Kjánchó naxa t'itjayan jnkójín chojni chrók'uixenhen sín chrók'ok'éhe sín. A ntá tí sín saoxín kuínhin tí tan chrókuaáxin sín la k'uixenhya sín kixin kuítekakonhya sín tí tan a. ⁷ Méxra Dios tsíkjejá ch'án í jnko yaon, mé tí yaon jie, a ntá chr'éxin nixjaxín ch'án tí nkehe tsíchronka ch'ín David éxí ntáchro tí xroon itén Dios kixin:

A ntá jie tí tsinhírá tí nkehe ntáchro Dios, chrókjuínchexiteyará. ^{‡†}

⁸ Kixin tí chrókujanjon ch'ín Josué kjuachaxin kixin chrók'ok'éhe tí sín israelita, ^{‡‡} ntá Dios la í chrónixjahya ch'án kuènte í jnko yaon. ⁹ A ntá naxa tjechónhen tí ts'ok'éhe tí sín tinkáchónki Dios; ¹⁰ kixin tí nkexro ts'ixenhen ts'ok'éhe tí tjen Dios tsíkjinhin ch'án tí xra kuènte ch'án éxí yóhe kjaxin Dios kjuixinhin ch'án tí xra kuènte ch'án ntá kjuák'e ch'án k'ok'éhe ch'án. ¹¹ T'ichjánxin kixin kaín asénni chrókjueyáni nkexrí chrók'uixenhenni chrók'ok'éheni, kixin chrókóyóghyani éxí tí sín kuítekakonhya.

¹² Kixin tí itén Dios la mé tjechón la ko chóna kjuachaxin. Tíha la imá taté, a ntá kánhyó taté tí chica espada yánjín taté, la tíha mé t'ixenhen tí ninka asén chojni la ko nchakuen chojni hasta tí nkaya asén chojni. Tíha mé nchexaxinkaon chojni kaín nkehe tjenkayáxin sín la ko kaín nkehe ntáchro asén sín.

¹³ Kohya ninkehó nkehe tsíklich'éna Dios tsjacha chrók'uejóméhe tí jehe ch'án kixin kaín nkehe la noxín síin t'ikon tí nkexro ts'áyéhe kuentá.

Jesús mé tí nchat'á imá tjetooan

¹⁴ Jesús tí Xjeen Dios mé tí nchat'á tjetooan kuènténi mé k'uixenhen tí tjen Dios la méxra chrókuítoghanyi tí tinkáchónkini tí jehe ch'án. ¹⁵ Méxra jehe ch'án mé tí nchat'á tjetooan kuènténi mé tsjinkítsa ch'án tí jeheni kixin fuértehyani kixin kjaxin tí Jínahya chrókjuachroe tí jehe ch'án éxí sítónhen tí jeheni, kjánchó jehe ch'án la ninkehó jie kjuasinhya ch'án kjónté xikaha kónhen ch'án. ¹⁶ Méxra kaín asénni chrókóchjineheni Dios tí tjen ch'án t'etooan ch'án kixin chrókuikonógheni ch'án la ko chrókjuinkítsa ch'án tí jeheni tí nkehe chrók'uichjánxinhinni.

⁵ Kaín nchat'á t'etooan tsíkónoxín la chojni ó, tsík'áyéhe xra tsonixayákonhen chojni nkayakon Dios, la ko tsjanjon nkehe la ko iko its'en kixin ts'itjayanxín tí jie kuènte chojni. ² Kjaxin tí nchat'á a la fuértehyani kixin chojni ó, a ntá chrókóninkakuenhya ch'án tí sín noehya la ko tí sín tsíklichroe. ³ Kjaxin jehe ch'án, kixin fuértehyani ch'án t'ichjánxin tsjanjon ch'án iko its'en kixin tí jie chóna ch'án jehe ch'án éxí tjanjon ch'án nkehe kuènte tí í so chojni chóna jie.

⁴ Ninkexró xitjahya jehó sich'éna asén nchat'á t'etooan. Náhí. Jehó tí sín tsíkjejá Dios tsík'áyéhe tí xra éxí tsík'áyéhe ch'ín Aarón. ⁵ Mé xikaha Cristo, kjuích'énahya ch'án jehó ch'án asén ch'án nchat'á t'etooan. Náhí. Dios mé kjuikosáyehe ch'án mé tsíkjanjon tí xra éxí tsíntáchro kixin:

Jaha mé xjanna;

Janhan mé kjuít'ána ijie. ^{‡‡}

⁶ Kjaxin í jnko nketí nixja xroon itén Dios ntáchro kixin: Jaha mé ijnko nchat'á tsjak'e jnkochrín, éxí yóhe k'uékjak'e ch'ín Melquisedec. ^{‡‡‡}

⁷ Tió kjuák'e Cristo ntihi chjasintajni imá tsjánka ch'án la ko itsen chrónógheni ch'án Dios, kixin Dios chóna kjuachaxin chrókjuínchekaá ch'án kixin chrók'uenhya ch'án; la Dios la kuínhin kixin xikaha kuítekaon ch'án. ⁸ Méxra Cristo, kjónté Xjeen Dios, la kuítekaon ch'án kjuínchexiteyá ch'án kjónté tí kjuasote ch'án. ⁹ Mé kjuínchexiteyá ch'án, ntá kjuacha ch'án k'óna ch'án tí nkexro sinchekaá jnkochrín kaín tí chojni sinchexiteyéhe tí jehe ch'án. ¹⁰ A ntá Dios mé tsíklich'éna ch'án nchat'á t'etooan éxí yóhe kjuák'e ch'ín Melquisedec.

Jehya jína chrókuítogheni tí tinkáchónkini Ìnchéni

¹¹ Chóntani nchónhya nkehe chróchrónkani kuènte tíha, kjánchó imá xra chróchrónkaxinni tíha kixin tiénxinyará jahará. ¹² Ntá k'uátsínka nchónhya tiempo, a ntá ó jína chrók'ónará maestro, ntá náhi kixin naxa t'ichjánxinhanrá nkexro chrókjuakohará inaá tí nkehe xrahya kuènte itén Dios. Éxí xík'ónará lóntjirá, t'ichjánxin chrók'uirá tsjen inaá kixin xitjahya sinterá nkehe cha. ¹³ A ntá tí sín it'i tsjen ó, na mé yóhe chánjan takí tsjachahya sín tsjeyá sín nkexrí chrók'uejó sín jína. ¹⁴ A ntá tí nkehe cha mé ine tí chojni nteto kixin ó nohe sín tí nkehe jína la ko tí nkehe jínahya.

⁶ Naxa chrókjueyáni kixin jína chrókjuenkayáxinni éxí chojni nteto. Chróchenkahyani tí jahará ijie tí nkehe kánhyó xra tsíxakohará tí xrankixín kuènte Cristo. Náhí. T'ichjánxinhya naxa chrókjuakoharáni kixin chrókuítoghérá tí jie k'uékjásinrá chrók'uénxinrá, la ko nkexrí chrókuinkachónkirá Dios, ² la ko nkexrí chrókuikite chojni, la ko nkexrí ts'ejotja tjára chrítaón tí sín tinkáchónki Cristo, la ko nkexrí tsoxechón chojni tsík'en, la ko nkexrí chrókuítoghénin ijje chojni. ³ A ntá tí Dios chrókjuanjon kjuachaxin la chrókjuakoni í so nkehe.

⁴ A ntá tí sín ó tsík'áyéhe sín tí xrohi, la ko ó tsjéxin sín tí nkehe kjuanjon Dios, la ko tsík'áyéhe sín tí Nchakuen Dios, ⁵ la ko kóxrjínhin sín tí nkehe jína

† Salmo 95.11 †† Génesis 2.2 ‡ Salmo 95.11 †† Salmo 95.7-8 ‡‡ Josué 22.4

‡‡† Salmo 2.7 ‡‡‡ Salmo 110.4

kuènte itén Dios, la ko kónohe sín nkexrí tí kjuachaxin tsochónta tí chjasintajni chr'éxín, ⁶ a ntá tí chrókuítoghe sín Dios, í chrókuinkáchónkihya sín, ntá xitjahya tsokjan sín inaá, kixin tí xíkaha la éxí chrókjuak'enkani sín ntacruz tí Xjeen Dios inaá la ko chrókjuanoá sín ch'án nkayakon nchónhya chojni. ⁷ Éxí nonte jnkojnko vez t'aniá chrin la tsjátan la ts'óna jína, a ntá kjuacha tí sín kjuích'e xrá kixin Dios kjuíncheyaon ntiha. ⁸ A ntá tí t'óna ntach'í la ko kach'í la ninkehó sínkíhya la tsonínkakonhen Dios, la tí tsjixixín mé tsoche.

Tí nkehe tjejóchónhenni mé tjinkítsa kixin jína ts'ejóni

⁹ Kjonté nixjani xíkaha, kichó ni, ó noheni kixin chaxín jína tjejorá k'uitjará tí ntja tsaáxinrá. ¹⁰ Kixin Dios la jína, la ts'itjáyenyha ch'án tí xrá jína tjejoch'era kixin tjuèherá kichuára, mé xíkaha kjuákoxinrá kixin kjuínkítsará tí kichuára tinkáchónki Cristo la naxa tjejótkjitsará sín xíkaha. ¹¹ Tjinkaonni kixin jnkojnkorá chrókjuákoxinrá hasta tsjixixín kixin chontará kjuachéhe chrókjuínkítsará kichuára kixin chaxín ts'ayéhérá tí nkehe tjejochonhénra. ¹² Tjinkakonhyani kixin chrókjanrá chrókósáhará. Náhí. Tjinkaonni kixin chrókjuákoxinrá éxí tí sín chaxín tinkáchónki Ìnchéni tjejóchónhen sín ts'áyéhe sín tí nkehe tsintácho Dios kixin tsjanjon ch'án.

¹³ A ntá Dios, tió tsintácho ch'án kixin tsjanjon ch'án nkehe ts'áyéhe tí ch'ín Abraham la jehó Dios k'uák-jenjín asén kixin kohya nkexro antsí tjejoan chrók'uák-jenjín ch'án. ¹⁴ Ntácho ch'án kixin chaxín sincheyaon ch'án tí ch'ín Abraham la ko nchónhya chojni ts'axr-jenín tí jehe ch'án. ¹⁵ Ch'ín Abraham kjuák'echónhen ch'án isé kixin ts'áyéhe ch'án tí nkehe tsintácho Dios. ¹⁶ A ntá tió t'ákjenjín chojni ijnko nkexro la mé t'ák-jenjín sín ijnko nkexro antsí tjejoan, a ntá jehó sín la náhi. A ntá ts'ákjenjín sín tí xíkaha kixin ijnko nkehe tsoxiteyá, a ntá kohya nkexro tsontácho ninkehó. ¹⁷ Méxrá Dios k'uákjenjín ch'án asén ch'án tsintácho ch'án kixin chaxín tsoxiteyá, kixin tjinkaon ch'án chrókjuákoxin ch'án noxín kixin chrókónohe tí sín ts'áyéhe tí nkehe tsjanjon ch'án kixin sinchexiteyá ch'án tí nkehe tsintácho ch'án la í tsjitóxiénhya ch'án ninkehó tíha. ¹⁸ Mé xíkaha siín yaá nkehe xitjahya ts'ix-itóxién, kixin Dios la xitjahya sich'ia; kixin tíha Dios nchenoexínni kixin chaxín tsoxiteyá, la mé jeheni kjuancheheni ch'án kixin chrók'uayakonhenni ch'án la ko tjejóchónhenni tí nkehe tsjanjon ch'án. ¹⁹ Tí tjejóchónhenni xíkaha la jína ts'ejó asénni éxí yóhe tí ntabarco chóna gancho tjechruéxin kixin kohya nketí sátsji. Méxrá xíkaha kjaxin tí nkehe tjejóchónhenni la sátsíkji hasta nóton tí ka cortina tje nkaxenhen njnko tje nkaya nkajni, ²⁰ tí senó k'uixenhen Jesús kuakit-jehe ch'án ijnko ntja ts'ixenxínni. Mé xíkaha jehe ch'án k'óna ch'án nch'at'á t'etqan jnkochr'ixín éxí yóhe kjuák'e tí ch'ín Melquisedec.

Ch'ín Jesús mé nch'at'á éxí yóhe k'uékjak'e ch'ín Melquisedec

7 Tí ch'ín Melquisedec mé k'ué rey kuènte chjasin Salem la ko nch'at'á kuènte Dios tje nkaya nkajni. A ntá tió ch'ín Abraham kjanxin ch'án tí tsíkjkjanjonko ch'án tí í so sín rey, kjuacha ch'án, ntá ch'ín Melquisedec kjuíxinhin ch'án ntja ikui ch'ín Abraham, ntá jehe ch'ín Melquisedec kjuíncheyaon ch'án tí ch'ín Abraham. ² A ntá tí ch'ín Abraham chjéhe ch'án tí ch'ín Melquisedec diezmo kaín xín nkehe tsíkjača ch'án tí tsíkjkjanjonko ch'án tí sín rey. [†] A ntá ihnjé ch'ín Melquisedec mé t'axrjéxin saoxín kixin "ijnko rey jína"; a ntá jehe ch'án k'ué rey kuènte chjasin Salem, tíha mé t'axrjéxin kixin "kjuaxróxin", la mé xíkaha jehe ch'án mé "ijnko rey tjanjon kjuaxróxin". ³ A ntá ch'ín Melquisedec la noehya sín nkexro it'é ch'án la ko nkexro iné ch'án la ko nkexro tsík'axrjenín ch'án; la ko noehya sín nkesá tsíkókjihi ch'án la ko nkesá tsík'en ch'án. Mé xíkaha tóyóhe tí Xjeen Dios kixin jehe ch'án mé ijnko nch'at'á jnkochr'ixín.

⁴ A ntá jie, tsjehérá kixin imá t'etqan tí ch'ín Melquisedec kixin tí ch'ín Abraham k'uaxrjeníxinni, la tsíchjéhe ch'án tí ch'ín Melquisedec diezmo tí nkehe tsíkjača ch'án tí tsíkjanjonko ch'án tí sín rey. ⁵ Éxí nixja ley tsík'etqan ch'ín Moisés, kixin tí sín nch'at'á tsík'axr-jenín tí ch'ín Leví chóna sín kjuachaxin tsjanchehe sín kaín xín chojni diezmo kjonté naxa kjéhya sín, tsík'axrjenín sín tí ch'ín Abraham éxí tí jehe sín. ⁶ A ntá ch'ín Melquisedec, kjonté tsík'axrjenínhya ch'án tí ch'ín Leví, na mé kjuích'ehe ch'án cobra tí ch'ín Abraham, mé tí ch'ín tsík'áyéhe tí nkehe tsintácho Dios. Mé xíkaha tí ch'ín Melquisedec tsíkjincheyaon ch'án tí ch'ín Abraham. ⁷ Kohya nkexro tsontácho kixin chaxínhya kixin tí nkexro ncheyaon la antsí má t'etqan, a ntá tí nkexro tsíkóyaon la t'etqanhya. Náhí. ⁸ A ntá tí tjejóni, tí sín t'áyéhe tí diezmo la mé chojni ts'en ó. Kjánchó ntácho tí xroon itén Dios kixin tí ch'ín Melquisedec mé ijnko chojni naxa tsík'enhya, la naxa tjechón. ⁹ Mé t'axrjéxin kixin ch'ín Leví la ko kaín xín tí sín nch'at'á tsík'axrjenín ch'án, mé tí sín t'áyéhe sín diezmo jie, la mé kjaxin jehe sín tsíkjenkehe sín diezmo tí ch'ín Melquisedec tió tsíkjenka ch'ín Abraham, ¹⁰ kixin naxa tjiko cuerpo kuènte ch'án tí sín ts'axr-jenín ch'án, naxa kokjehya sín tió xeta ch'án tí ch'ín Melquisedec.

¹¹ Tí sín nación Israel tsík'áyéhe sín tí ley kixin tí sín nch'at'á levita, mé tsík'axrjenín sín tí ch'ín Aarón. A ntá jie tí chaxín chrókjuacha sín chrókjuentoá sín tí sín tinkáchónki tí ley, la í t'ichjánxinhya naxa chrókónoxín í jnko nch'at'á í chrókóyóehya éxí tí ch'ín Aarón. A ntá kjuachahya sín xíkaha ntá t'ichjánxín chrókónoxín ijnko nch'at'á chrókóyóhe éxí tí ch'ín Melquisedec. ¹² A ntá tí chrók'uixinkí tí nch'at'á la kjaxin chrók'uixinkí tí ley. ¹³ A ntá tí xroon itén Dios chrónka tíhi kuènte Ìnchéni. A ntá jehe ch'án la tsík'axrjenín ch'án í jnko nkexro kuènte Israel la kohya ninkexró tsík'óna

† Génesis 22.16-17

†† 7.1-2 Génesis 14.17-20

nchať'á tsík'axrjeníxin tí sín a. ¹⁴ Kíxin ó noxín kíxin Ìnchéni tsík'axrjeníxin ch'án tí ch'ín Judá, a ntá ch'ín Moisés la chrónkahya ch'án ninkehó kuènte tí sín ts'axrjeníxin tí ch'ín a tió nixja ch'án kuènte tí sín nchať'á.

¹⁵ A ntá tíhi la ańtsí má kónoxín kíxin tí nchať'á nixin la tóyóhe éxi ch'ín Melquisedec ¹⁶ kíxin tió k'óna ch'án nchať'á la jehya kíxin xíkaha chrók'ueťoan ijnko ley kíxin nkexro chrók'uaxrjeníxin ch'án. Náhi. Ó jehí k'óna ch'án nchať'á kíxin tí kjuachaxin chóna ch'án la xitjahya ts'itjáyán. ¹⁷ Kíxin nixja Dios kíxin nkexrí tjen tí jehé ch'án, ntáchro kíxin:

Jaha mé ijnko nchať'á tsjak'e jnkochríxin,
éxi yóhe k'uékjak'e ch'ín Melquisedec. †

¹⁸ Méxra tí nkehe k'uék'etóan senó mé ch'ehya xra jie kíxin kánhyó kjuachaxin k'uéchóna la ko kjuachahya, ¹⁹ kíxin tí nkehe k'ueťoan ch'ín Moisés kjuachahya kjuínchetjóá ninkehó nkehe. A ntá jie chónani ijnko nkehe ańtsí jína tjejóchónhenni kíxin tíha mé ańtsí jína tsochjinexíni Dios.

²⁰ A ntá tió ntáchro Dios tíha la tsík'ákjenxín ch'án asén ch'án jehó ch'án. ²¹ La ntá tí í so nchať'á, tió tsíkónoxín sín, tsík'ákjenxínhya Dios asén ch'án. A ntá tió tsíkónoxín tí nchať'á í la Dios tsík'ákjenxín ch'án asén ch'án. A ntá ntáchro xroon itén Dios kíxin:

Ìnchéni tsík'ákjenxín asén ch'án
a ntá ts'ixitóxínhya tí nkehe tsintáchro ch'án:
"Jaha mé ijnko nchať'á tsjak'e jnkochríxin
éxi yóhe k'uékjak'e ch'ín Melquisedec." ††

²² Méxra ch'ín Jesús ntáchro kíxin tí pacto t'etóan ch'án la ańtsí má jína, a ntá tí pacto senó la náhi. ²³ Ntá k'uíxin nchónhya sín nchať'á, kjánchó nkák'en sín, ntá xitjahya naxa chrókjuich'e sín tí xra a. ²⁴ A ntá ch'ín Jesús la ts'enhya ch'án la t'ichjánxínhya kíxin í jnko nkexro chrókuakja tí xra kuènte ch'án chrók'óna nchať'á.

²⁵ Méxra jehé ch'án tsjacha sinchekaá ch'án jnkochríxin tí sín tsochjinehe Dios kíxin tinkáchónki sín tí jehé ch'án kíxin itjen ch'án jnkochríxin chrónóehé ch'án Dios kíxin chrókjuinchekaáni ch'án.

²⁶ Mé xíkaha Jesús mé tí nchať'á t'etóan t'ichjánxínhinni; jehé ch'án mé ijnko nkexro tjóá, chónahya ninkehó jie, la ko tjenkákjanhya ch'án tí sín tjasin jie, a ntá sákjuj ch'án nkaya nkajní. ²⁷ Ntá tóyóehya tí í so nchať'á t'etóan, kíxin t'ichjánxín ts'óyán sín iko tsjanjon sín tsochjéhe sín Dios kaín yaon, saoxín kíxin tí jie kuènte sín, a ntá chr'éxín kíxin tí jie chóna tí í so chojni. A ntá ch'ín Jesús jnkokoxón vez kjuanjon asén ch'án ik'uén ch'án. ²⁸ Tí ley k'uék'etóan ch'ín Moisés t'etóan kíxin chojni naxa chóna jie chrók'óna nchať'á, a ntá Dios tsík'ákjenxín asén ch'án tió kjuixin k'óna tí ley, ntáchro ch'án kíxin tí Xjeen ch'án mé ts'óna nchať'á t'etóan kíxin jína kjuínchexiteyá ch'án jnkochríxin.

Ch'ín Jesús nixjxín ch'án ijnko pacto nixin

8 Tí nkehe ańtsí má tjetóan chrónkani la mé tíhi kíxin tí nchať'á kuènteni mé t'etóan ch'án, la ko

† Salmo 110.4 †† Salmo 110.4

tjetjaxín ch'án nkaya nkajní, nó chjina tí trono t'etóanxín Dios, ² k'óna ch'án nchať'á tí nínko chaxín tsíkjich'éna Ìnchéni, la jehya chojni tsíkjich'éna tíha. ³ Kaín nchať'á t'etóan tsík'áyéhe xra kíxin tsjanjon nkehe la ko iko its'en. Méxra Jesucristo t'ichjánxín kíxin tsjanjon ch'án ichrén nkehe. ⁴ Tí chrókjuak'e ch'án chjasintajni, chrók'ónahya ch'án nchať'á kíxin naxa síin nchať'á tjanjon nkehe k'ueťoan tí ley tsík'áyéhe ch'ín Moisés. ⁵ A ntá tí sín nchať'á k'uékjanjon nkehe tóyóhó tí nkehe síin nkaya nkajní. Noheni kíxin tóyóhó kíxin tió ch'ín Moisés chrókjuich'éna ch'án nínko la ntáche Dios tí jehé ch'án kíxin: "Tjenkáyaxian jína, a ntá sích'énna jaha éxi tí nkehe kjuákuáxian chrítaón jna." ⁶ A ntá tí nchať'á t'etóan kuènteni tjech'e ch'án xra ańtsí jína kíxin jehé ch'án mé tí nkexro nixjxín tí pacto nixin tsintáchro Dios chrónka tí nkehe jína tsonhen chr'éxín.

⁷ A ntá tí pacto tsík'etóan saoxín la tí chróxiteyá jína, la t'ichjánxínhya chrók'óna yóxin pacto. ⁸ A ntá Dios k'uikon kíxin kjuínchexiteyáhya tí sín a, éxi ntáchro xroon itén Dios kíxin:

Ntáchro Ìnchéni kíxin: Itsi ijnko yaon
mé tsjánjuan ijnko pacto nixin tsochóna tí sín nación Israel la ko tí sín chjasin Judá.

⁹ Jehya xíkaha tí pacto kuétuanhan tí sín tsík'axrjeníxinrá ósé,

tí yaon kjuínkítsa sín k'uaxrjéxin sín tí nación Egipto;
kjánchó kjuínchexiteyáhya sín tí pacto kuétuanhan
sín,
méxra kuitóha sín, ichro Ìnchéni.

¹⁰ Tí pacto tsétuanhan tí sín chjasin Israel tió ts'atsínka tí yaon a, mé xíkaha tíhi, ichro Ìnchéni:
Sintaxáinkavan asén sín tí ley tsétóan,
a ntá tí kjuaxrexinkaon kuènte sín tsokjian tí nkehe tsétuanhan sín.

A ntá janhan ts'óna Dios kuènte sín,
a ntá jehé sín mé ts'óna chjasin kuèntana.

¹¹ Ts'ichjánxínhya naxa tsjakohé kichó sín
kíxin chróchóxin sín Ìnchéni,
kíxin kaín sín tsochóxinna sín,
kjónté chojni imá ntsínsí la ko chojni imá hyé.

¹² Sintak'itjáyán tí nkehe jínahya kjuích'e sín
la ko í tsoxráinkakonhya ínaa tí jie chóna sín. ††

¹³ Xíkaha nixja Dios kuènte tí pacto nixin ts'etóan ch'án kíxin tsíkóntaxin tí pacto saoxín k'ueťoan ch'án, tíha mé tinkákóntaxin la ko tinkákjeje, na í séhya ts'itjáyán.

Tí nínko chjasintajni la ko tí nínko nkaya nkajní

9 A ntá tí pacto saoxín t'etóan nkexrí chróxaxinkaonni Dios, kíxin tí nínko ntihyó chjasintajni. ² A ntá tí nínko k'uékjak'e mé tí cuarto saoxín k'uekjínchek'in sín tí Cuarto Tjóá, tí kjuák'e tí candelero la ko tí mesa tjejókjen tí niotja k'uéxraxinkakonxín sín Dios. ³ Nóton tí yóxin ka cortina kjuák'e tí cuarto k'uekjínchek'in sín tí Cuarto Ańtsí Tjóá. ⁴ Ntiha k'uékjak'e tí altar tsík'óna chica oro k'uékjakaixin sín tí chjincó la ko k'uékjak'e tí ntacajón chr'ísímá chica oro tjenkáya tí pacto. Nkaxenhen tí nta-

‡ Éxodo 25.40 †† 8.8-12 Jeremías 31.31-34

cajón k'uékjak'e ijnko nchésen tsík'óna chica oro k'uék'inka maná k'óna niotja, la ko kjaxin k'uékjak'e tí nta k'uékjixin ch'ín Aarón kjuankíxin k'uayan nta ntahte, la ko kjaxin ntiha kjuák'e tí xṛə chóna tí tan k'ueṭəon Dios. ⁵ Chritaón tí ntacajón k'uék'ejó yaá ángel tsíkjanoya tsíkjentoá kanenee chritaón tí kjuák'e tí kjuachaxin kuente Dios; ntaha k'uékjixin tí jie k'uéchóna chojni. A ntá ijie la t'ichjánxinhya naxa tsonixjani kuente tíha.

⁶ A ntá xikaha k'uéjé tí nkehe a, a ntá tí sín nchat'á jnkoyaxón t'ixenhen sín tí cuarto saoxín kuente njnko kixin tí xṛə ch'e sín kuente njnko. ⁷ A ntá tí yóxin cuarto jehó tí nchat'á t'etəon t'ixenhen ch'án jnkokoá vez jnkoinko nánó; a ntá tí t'ixenhen ch'án t'ichjánxin ts'ixenko ch'án ijnié iko tsochjé ch'án Dios tsotjuáxin ijie ch'án la ijie tí i so chojni. ⁸ A ntá tí Nchakuen Dios nchenoexínni tíhi kixin nachrohe k'uékjich'e xṛə tí cuarto saoxín la naxa tjexrankehya kixin chrók'uixenhenni tí Cuarto Antsí Tjóá. ⁹ Kaín tíha tjakoxin ijnko nkehe chrókónoheni jie, kjánchó tí nkehe chjéhe sín Dios la ko tí ko t'óyan sín xitjahya nchenoexín sín kixin á chaxín kótjóá tí jie k'uéchóna sín kixin xikaha k'uéxaxinkaon sín Dios. ¹⁰ A ntá tíha jehó t'etəon kuente tí nkehe chrókjóné sín la ko tí nkehe chrók'ui sín la ko tí chrók'ónti sín kixin chrókótjuáxin ijie sín, kaín tíha mé k'uítuenhen sín kuente cuerpo ó la jehó k'uéchóna kjuachaxin tí naxa kjuinkíhya Dios nkexrí chróxaxinkaon sín ch'án.

¹¹ A ntá ó kui Cristo, jehe ch'án mé nchat'á t'etəon kuente tí nkehe antsí jína itsi. A ntá tí njnko ch'e ch'án xṛə la antsí jína la ko antsí ntoá, la jehya chojni tsíkjich'éna tíha kixin jehya chjasintajni ntihi tjen. ¹² Tió k'uixenhen Cristo tí Cuarto Tjóá, la jehya kixin chrókjuanjon ch'án ijnié kotəntsə la ko ijnié koxintáxjan. Náhí. Ijnié ch'án kjuanjon ch'án; mé xikaha k'uixenhen ch'án jnkokoá vez ntiha mé xikaha kjuenkə ch'án kixin chrókuaáxinni jnkochrín. ¹³ A ntá tí ijnié koxinta la ko ijnié kotəntsə la ko tí nteso kuente tí koxintáxjan tsíchexín tí altar tikitexín tí sín tjuáhya la mé tíha chóna kjuachaxin tsotjuáxin tí chritaón ó. ¹⁴ A ntá tí xikaha, la kjá antsí má chóna kjuachaxin tí ijnié Cristo. Kixin tí kjuachaxin Nchakuen Dios tjen jnkochrín, la Cristo kjuanjon asén ch'án ik'uén ch'án k'uáyéhe Dios, la jehe ch'án la ninkehó jie chónahya ch'án. A ntá ijnié ch'án nchetjóá tí nkehe kjuích'eni senó chrók'uenxínni kixin ntá jie la jína chrókjuich'e-heni xṛə Dios tjechón.

¹⁵ Méxṛə Jesucristo nixjaxin ch'án tí pacto nixin k'ueṭəon Dios. Kixin k'uenyákonhenni Cristo ntá tsotjuáxin tí jie kjuasinni kjuínchexiteyáhyani tí pacto k'uítuenhenni senó; kixin tí sín k'uíyehə Dios la jína chrók'uáyéhe sín tí nkehe tsjejehya kixin jehe ch'án xikaha tsintáchro ch'án tsjanjon ch'án. ¹⁶ A ntá tí siín ijnko nkehe tsintáchro ijnko chojni kjuák'e na ntá ik'uén la t'ichjánxin tsonoxín kixin chaxín tsík'en tí nkexro tsíkjich'éna. ¹⁷ A ntá tí nkehe tsintáchro ch'án la sínkíhya tí naxa tjechón tí nkexro tsíkjich'éna; jehó tió chrók'uen ch'án mé sínkí. ¹⁸ Méxṛə tí pacto xrankíxin

tsík'etəon Dios kjuankíxin kjuích'e xṛə kixin k'uítji ijni. ¹⁹ Ch'ín Moisés tsíchronka ch'án kaín nkehe tsík'etəon tí ley kuínhin kaín tí chojni; a ntá chr'éxin kuákja ch'án ichjoén kolélo kjátse la koí ntarama hisopo, ntá kjuínchekjatjaxin ch'án ijnié koxintáxjan la ko ijnié kotəntsə tsíkjiko intə, ntá kuikjanjin ch'án tí libro chóna ley la ko kuikjanjin ch'án kaín tí chojni. ²⁰ A ntá ntáchro ch'án kixin: "Tí jni i tsoxiteyáxin tí pacto k'ueṭəon Dios chrókjuínchexiteyéhérá jahará." ²¹ Tí ch'ín Moisés kjaxin kuikjanjin ch'án jni tí njnko la ko kaín nkehe t'ichjánxin tí nkaxenhen njnko. ²² Kixin xikaha ntáchro tí ley kixin kaín nkehe la chrókótjuáxin tí jni; a ntá xitjahya chrókótjóá tí jie tí chrók'uijkanjinhya jni.

Tí ik'uén Cristo mé tsjinxín ijieni

²³ Méxṛə t'ichjánxin kixin ik'uén iko kótjuáxin tí nkehe a, táha mé tóyóhó tí nkehe siín nkaya nkajni; a ntá tí nkehe chaxín kuente nkaya nkajni t'ichjánxin ijnko nkehe antsí jína chrók'uen. ²⁴ A ntá Cristo k'uixenhya tí njnko tsíkjich'énoxín chojni tja, táha mé ijnko nkehe tóyóhó tí njnko chaxín. Náhí. Jehe ch'án mé k'uixenhen ch'án tí nkaya nkajni, a ntá jie mé tjen ch'án tí tjen Dios nixjaxin ch'án kaín ni. ²⁵ A ntá jehe ch'án la jehya jnkoyaxón k'uixenhen ch'án ntiha k'uenyákonhenni ch'án. Náhí. A ntá tí nchat'á t'etəon t'ixenhen tí Cuarto Tjóá jnkoinko nánó kixin tsjanjon ch'án ijnié ko ó. ²⁶ A ntá tí xikaha chrókónhen Cristo la t'ichjánxin kixin jnkoyaxón chrók'óyan sín ch'án desde tí k'óna tí chjasintajni. A ntá jie la ó chjina, tsjixraká tsjeje chjasintajni, a ntá kónoxín Cristo la ik'uén ch'án jnkokoá vez kixin tsjinxín ijieni. ²⁷ Mé xikaha kaín ni its'enni jnkokoá vez, a ntá chr'éxin tsitəoxín ijieni. ²⁸ Mé xikaha kjaxin Cristo jnkokoá vez ik'uén ch'án kixin tsjinxín ijie nchónhya chojni. A ntá chr'éxin itsi ch'án inaá, jehya kixin naxa tsjatsen ch'án ijie chojni. Náhí. Sinchekaá ch'án tí chojni ó tsíkótjóá tjejóchónhen itsi ch'án.

10 A ntá tí ley k'ueṭəonxín ch'ín Moisés la tóyóhó tí nkehe jína tsi la jehya tí nkehe chrókuaáxinni. Méxṛə tí ley kjuachahya kjuínchetjóá tí sín kóchjinehe Dios kjuanjon sín iko its'en jnkoinko nánó. ² A ntá tí chrókjuacha tí ley chrókjuínchetjóá ijie sín, ntá chrókjuenkayáxinhya sín kixin naxa chróchóna sín jie, la chrókuítəhe sín, í chrókjuanjonhya sín iko its'en. ³ A ntá xikaha ich'e sín t'óyan sín ko, la jnkoinko nánó xraxinkakonxín sín tí jie tsíkjasin sín ⁴ kixin ijnié koxinta la ko ijnié kotəntsə xitjahya tsjinxín ijie chojni.

⁵ A ntá tió Cristo kui chjasintajni ntáche ch'án Dios kixin:

Tjinkákonhya jaha iko its'en la ko tjinkákonhya jaha ninkehó nkehe chrók'uayéhé. Náhí.
Jaha tsíkjich'éna ijnko cuerpo kixin tsochonta janhan.
⁶ Jaha tóxrxjánhya iko tsíchján la ko tí i so nkehe chrókjuanjonni chrókjuakjinxian ijie.

⁷ A ntá ntátjan ch'án kixin: "A ntá ijie la ntihi tjen janhan kixin sjntaxiteyá tí nkehe tóxrxjánhan jaha Dios, éxi nixja xroon chrónka nkexrí chrókjuít'a." ††

⁸ Senó ntáchro kixin Dios tjinkakonhya la ko tóxrjjenhya ch'án iko its'en chrókjuanjoni la ko ninkehó nkehe chrókjuanjoni chrókjuinixín ijiéni kjónté tí ley k'ueṭoan kixin xikaha chrókónhen. ⁹ A ntá chr'éxjín tsintáchro kixin: "A ntá k'uinka janhan kixin sintaxiteyá tí nkehe tóxrjínhan jaha Dios," ichro ch'án. Mé xikaha kjuatsen ch'án tí ko k'uék'óyán sín ósé, a ntá jehe ch'án kjuanjon ch'án ijnko nkehe nixin. ¹⁰ Dios kjuínchetjuáxinni kixin Jesucristo kjuínchexiteyá éxí tóxrjínhjn Dios kixin tí cuerpo kuènte ch'án kjuanjon ch'án ik'uén ch'án jnkokoáxón vez para jnkochrixin.

¹¹ A ntá kaín nchat'á judío tí xra ch'e sín jnkojnko yaon la jnkokón nkehe its'en tjanjon sín kjánchó tíha la xitjahya tsjiinxín ijié chojni. ¹² A ntá Jesucristo mé jnkokoá vez k'uenyákonhenni ch'án kixin tsotjuáxin ijiéni la tíha mé sich'e xra jnkochrixin. A ntá kjuixin ntá sákuju ch'án kjuák'etjaxin ch'án nó tí tja chjina kuènte Dios. ¹³ A ntá ntaha tjechónhen ch'án tsjixinjian kaín tí sín ninkakonhen ch'án tsjachahya sín ts'etōan sín. ¹⁴ Mé xikaha jnkokoá nkehe kjuich'e ch'án chjéhe ch'án Dios, kixin jina ts'ejó tí sín ó tsíkótjóá. ¹⁵ A ntá tí Nchakuen Dios nchenoheni tíhi kixin senó tsintáchro kixin:

¹⁶ Tí pacto tsotjahá tí jehe sín tió ts'atsínka tí yaon a, ichro Inchéni;

Sintaxráxinkavan asén sín tí ley tsétoan, a ntá tí kjuaxrexinkaon kuènte sín tsokjian tí nkehe tjinkavan. †

¹⁷ Kjaxin ntáchro kixin:

Í tsoxráxinkakonhya inaá tí ijié sín la ko tí nkehe jinahya kjuich'e sín. ††

¹⁸ Mé xikaha tí ó kótjóá ijiéni la t'ichjánxinhya í so nkehe chrókjuanjoni chrókótjuáxin tí ijiéni.

Méxra t'ichjánxjn tsochjineheni Dios

¹⁹ Kichóni, a ntá la í kohya kjuachrakon ts'ixenhenni tí Cuarto Antsí Tjóá tí tjen Dios kixin kjuachaxién ijnié Jesucristo, ²⁰ chréheni tí ntja nixin mé tí ntja tjechón kuakitjehé ch'án nóton tí ka cortina, tíha mé tí cuerpo kuènte ch'án. ²¹ Jesús mé tí nchat'á tjetoan kuènteni t'etōan tí ntōe Dios. ²² Méxra xikaha chrókóchjineheni Dios kaín asénni chrókuinkáchónkini ch'án chaxín kixin jehe ch'án tsíkjinchetjóá ch'án asénni kixin chrókuenkayáxinhanyi kixin naxa chóntani jje kixin tí cuerpo kuènteni kótjuáxin tí ntā jehó. ²³ Chrókuítōehyani chrók'uejóchónhenni tí nkehe tinkáchónkini kixin Dios la chaxín sinchexiteyá ch'án tí nkehe tsintáchro ch'án. ²⁴ Chrókjueyáni nkexrí chrókjuinkitsani kichó ni kixin chrótjuèheni kichó ni la chrókjuich'eni tí nkehe jina. ²⁵ Chrókuítōehyani chrókójnkotséni, chrókóyóehyani éxí tí sín í tójnkotséhya sín. Náhí. Chrókjuinchechéheni kichó ni antsí má jie kixin ó noheni kixin í séhya tsokjan Inchéni.

²⁶ A ntá tí naxa chrókjuenkayáxinni chrókjuasinni jje tí ó noheni tí nkehe chaxín, la kohya í jnko nkexro chrók'uenyákonhenni chrókótjuáxin tí jje chóntani. ²⁷ A

ntá jehó itjen tí kjuachrakon jje tsitōexín jje la ko tí xrohi tjeche ts'itjáyánxín tí sín ninkakonhen Dios. ²⁸ A ntá tí tjen jnkojín nkexro titekakonhya tí ley k'ueṭoanxín ch'ín Moisés, la tsonoxín yaá o y'á tí sín tsík'ikon tí jje tsíkjasin sín, tíha mé ts'enxín sín la kohya nkexro tsíkónóehé tí jehe sín. ²⁹ ¿Á tjenkayáxinhayar kixin antsí má chrókjuasóte tí sín kuítékakuenhya tí Xjeen Dios la ko chóntehya sín kjuasáya tí ijnié ch'án la ko t'ántaxínhjn sín tí Nchakuen Dios tjuèheni? Kixin tí jni chrónkaxín kixin ts'etōanxín tí pacto la ko tí jni k'uíjmáxinni. ³⁰ Noheni kixin tsintáchro Inchéni kixin: "Janhan mé tóna tocar sintakitōaxián ijié chojni la ko janhan tsjénkahá sín." †† Kjaxin tsintáchro kixin: "Inchéni sinchekitōexín ijié tí sín tinkáchónki ch'án." †††³¹ Méxra kjuachrakon jje chrók'uanótjenyáni tí tja Dios tjechón.

³² A ntá chróxráxinkáonrá jahará tí nkehe tsíkónhen ósé kixin tió jahará nantá tsík'ayéhérá tí nkehe t'inkaséyan, a ntá kjuachará kjónté tí nchónhya nkehe tsíkónhanrá. ³³ A ntá jnkojín tí jahará k'uántaxínhanrá sín la ko kjuatiará sín nkayakon nchónhya chojni, a ntá í so sín la kjuínkítsa tí sín tsík'ekon. ³⁴ A ntá jahará kuíkonóehérá tí sín tjejóchjina ntōechiso, a ntá jahará kóninkákonhyará kjónté k'uaxrjahará kaín nkehe chontará, kixin ó nohará kixin nkaya nkajni chontará nkehe antsí jina chónhya tsjeje. ³⁵ Chrókuítōehyará tí nkehe tinkáchónkirá kixin ó nohará kixin tíha mé ts'ayéxinrá nkehe chr'éxín. ³⁶ Kjaxin jahará t'ichjánxjn chrók'uejóchónhénrá chrókóninkákonhyará kjónté ichrén nkehe chrókónhanrá, kixin sich'erá tí nkehe tjinkaon Dios, kixin xikaha chrók'uayéhérá tí nkehe tsintáchro tí jehe ch'án. ³⁷ Kixin xikaha ntáchro xroon itén Dios kixin:

Kánhyó sé
itsi tí nkexro tsi, í sinchexrjenhya.

³⁸ Tí sín kótjóá asén mé tjejóchónxin sín kixin tinkáchónki sín Dios;

a ntá tí sín tsitōhe tí janhan la í tsōchànahya tí xikaha ch'e sín. †††

³⁹ Kjánchó jeheni jehya xikaha chrókuítōeheni chrókuinkáchónkiyhanyi tí jehe ch'án kixin ntá chrókjuasinni jje chrók'uitjáyánxinni. Náhí. Tinkáchónkini ch'án la tíha chrókuaáxinni.

Tí fe

11 Tí fe chóntani la mé noexinni chaxín kixin tsoxiteyá ts'áyéheni tí nkehe tjejóchónhenni, la ko noexinni chaxín kixin kjónté ijnko nkehe t'ikonhyani la chaxín tjen. ² Tí sín tsík'axrjenixinni ósé la kóxrjínhjn Dios kixin k'uéchónta sín fe.

³ Tí fe mé noexinni kixin Dios tsíkjich'éna kaín nkehe tí kjuachaxin tí nixja ch'án la ko noexinni kixin tí nkehe t'ikonni mé tsík'óna tí nkehe t'ikonhyani.

⁴ A ntá tí fe k'uéchónta ch'ín Abel mé k'óyán ch'án ijnko kolélo chjéhe ch'án Dios. Tíha ijnko nkehe antsí jina kjuanjon ch'án, a ntá tí nkehe tsíkjanjon ch'ín Caín

† 10.16-17 Jeremías 31.33-34 †† 10.16-17 Jeremías 31.33-34
‡ Ezequiel 36.25

†† Deuteronomio 32.35-36 ††† Deuteronomio 32.35-36 †††
10.37-38 Habacuc 2.3-4

la náhi. Méxra Dios kóxrjinhin tí nkehe kjuanjon ch'ín Abel ntá ntáchro Dios kixin jína tí ch'ín a. Kjonté ó tsík'en ch'ín Abel la tí nkehe tsík'ich'e ch'án naxa tjaqoxin kixin jína tí fe k'uéchonta ch'án. †

⁵ A ntá tí fe k'uéchonta ch'ín Enoc la Dios sátsík'jiko tí jehe ch'án la k'uénhaya ch'án, a ntá k'uitjahya sín ch'án kixin Dios sátsík'jiko. Naxa sákjuihya ch'án la xráxin kóxrjinhin Dios nkexrí k'uékjak'e ch'án. ††⁶ A ntá tí chróchontahyani fe la xitjahya chrókjuinchechéheni Dios, kixin t'ichjánxin kixin tí sín chrókóchjinehe sín Dios chrókuitekaon sín kixin chaxín itjen ch'án la ko jehe ch'án tsjenkehe ch'án tí sín xritjeyá sín tí jehe ch'án.

⁷ A ntá tí fe k'uéchonta ch'ín Noé tí Dios chénka tí jehe ch'án tí nkehe naxa k'uíkonhaya ch'án tsonhen, la kuitekaon ch'án kjuích'éna ch'án ntabárcó kixin tsaáxin ch'án la ko tí sín naxa kjéhya ch'án. Tí fe k'uéchonta ch'án kjuáqoxin kixin tí í so chojni chjasintajni la jí-nahya sín tsjasóte sín. A ntá kóxrjinhin Dios tí jehe ch'án kixin kuitekaon ch'án la tí xra kjuích'e ch'án mé kuaáxin ch'án. ‡

⁸ A ntá tí fe k'uéchonta ch'ín Abraham tí k'uíyehé Dios tí jehe ch'án la kuitekaon ch'án sákjuí ch'án tí nonte tsjanjon Dios ts'áyéhé ch'án, ntá k'uaxrjéxin ch'án chjasén ch'án kjonté noehya ch'án nketí nó sátsji ch'án. ††⁹ A ntá tí fe k'uéchonta ch'án k'uékjak'e ch'án tí nonte chrókjuanjon Dios, éxí jehya nontee ch'án tíha. Kjuák'e ch'án nchia tsík'óna ka, la ko kjaxin xikaha k'uéchonta ch'ín Isaac la ko ch'ín Jacob la ko kjaxin jehe sín tsík'áyéhé sín tí nkehe tsintáchro Dios. ††¹⁰ A ntá ch'ín Abraham k'uékjak'echónhen ch'án tí chjasin tsík'ich'éna Dios ts'itjáyanyha.

¹¹ A ntá tí fe k'uéchonta tjan Sara kjonté ó nána tjan, k'uáyéhé tjan kjuachaxin sich'éna tjan ijnko xjan; a ntá kjuích'éna tjan ijnko xjan kixin kuitekaon tjan kixin Dios sinchexiteyá tí nkehe tsintáchro ch'án. †††¹² Kjaxin xikaha ch'ín Abraham, kjonté ó mero chrók'uen ch'án kixin ó táda ch'án, la k'uaxrjeníxin ch'án nchónhaya chojni éxí konotsé siín nkajní ó éxí nchesen siín chrínta ntayaon, xitjahya ts'ekini. †††

¹³ A ntá kaín tí chojni a ik'uén sín k'uáyéhya sín tí nkehe tsintáchro Dios kixin chrók'uáyéhé sín, a ntá k'uéchonta sín fe, la kjonté ikjín k'uíkon sín la ko kuitekaon sín kóchéhé sín. Mé xikaha k'uéchrónka sín kixin tí chjasintajni jehya chjasén sín. ¹⁴ Mé xikaha k'uénixja sín la tienxínni jína kixin naxa xritjeyá sín nketí chrók'óna chjasén sín. ¹⁵ A ntá tí chrórxaxinkaon sín tí chjasin tsík'axrjéxin sín ntá jína chrókjan sín ntiha inaá. ¹⁶ Kjánchó tjinkaon sín ijnko chjasin antsí má jína, tíha mé chjasin nkaya nkajní. Méxra Dios la tósuéhya ch'án kixin chrókjuinchek'in sín ch'án tí Dios kuènte tí jehe sín, kixin ó tjechónhen tí chjasin ts'áyéhé tí jehe sín.

¹⁷ A ntá fe k'uéchonta ch'ín Abraham kixin Dios kjuích'e prueba tí jehe ch'án kjuanchia tí xjeen ch'án Isaac, a ntá kjuikao ch'án chrók'óyán ch'án, chrókjuan-

jon ch'án. Tjechónhen ch'án chrókjuanjon ch'án kjonté jnkokoáxon xjeen ch'án tsíkjanjon Dios ⁵ tsintáchro kixin: ¹⁸ "Tí ch'ín Isaac ts'axrjeníxin nchónhaya xjan." ††¹⁹ A ntá ch'ín Abraham kjuátsqan ch'án kixin Dios imá chóna kjuachaxin, la kjonté chojni tsík'en na nchex-echón ch'án, la éxí yóhé chrók'uen tí xjeen ch'ín Abraham ntá chrók'uáyéhé ch'án inaá.

²⁰ A ntá tí fe k'uéchonta ch'ín Isaac kjuíncheyaon ch'án tí xjeen ch'án ch'ín Jacob la ko Esaú, kixin jína ts'ejó sín. †††²¹ A ntá tí fe k'uéchonta ch'ín Jacob tió chjina its'en ch'án kjuíncheyaon ch'án jnkojnko tí xjeen ch'ín José, a ntá tí nta tjixin ch'án kjuisójjixin ch'án nix-jehé ch'án Dios. †††²² A ntá tí fe k'uéchonta ch'ín José tió chjina its'en ch'án tsintáchro ch'án kixin tí sín israelita la chr'éxin ts'axrjéxin sín chjasin Egipto, tsík'etqan ch'án kixin tió sátsji sín la sátsjiko sín tí huesóé ch'án. †††

²³ A ntá tí fe k'uéchonta it'é la ko iné ch'ín Moisés tió kokjhi ch'án kjuak'emá sín ch'án iní nitjó kixin tsík'ikon sín kixin ijnko xjan ntoa náxrjón tsjehe ch'án, la ko chrakuenhaya sín tí nkehe tsík'etqan tí ch'ín rey kixin chrók'óyán sín xjan. †††²⁴ A ntá tí fe k'uéchonta ch'ín Moisés tió konteto ch'án la chrohya ch'án its'in ch'án xjeen tí tjan xjeen ch'ín rey Egipto. †††²⁵ Náhi. Kjuéyá ch'án kixin kjonté chrókjuasóteko ch'án tí sín tinkáchónki Dios, la kóxrjénhaya ch'án kixin séhya náxrjón chrókjuak'e ch'án chrókjuasin ch'án jie. Náhi. ²⁶ Kjuenkayáxin ch'án kixin antsí tjeoan chrókjuasó-texin ch'án tí tinkáchónki ch'án tí Cristo itsi chr'éxin, a ntá kánhyó tjeoan chróchóna ch'án kaín nkehe tje te siín chjasin Egipto. Kjuenkayáxin ch'án kixin chrók'uáyéhé ch'án tí nkehe chrókjuanjon Dios. ²⁷ A ntá tí fe k'uéchonta ch'ín Moisés sákjuixin sín tí chjasin Egipto, †††† chrakonhaya ch'án kjonté kóninkaon tí ch'ín rey, a ntá kuítqehya ch'án tí tinkáchónki ch'án Dios kixin éxí t'ikon ch'án tí Dios ninkexró t'ikonhaya.

²⁸ A ntá tí fe k'uéchonta ch'ín Moisés kjuasin ch'án tí kia pascua, k'uétqan ch'án kixin chrókuikjanjin sín jni tí puerta, kixin tí ángel t'óyán chojni chrókjuincheníehya nijnko tí xjan saó kuènte tí sín Israel. ††††²⁹ A ntá tí fe k'uéchonta tí sín israelita k'uátòye sín tí Ntayaon Kjátse kixin k'óna nche xamá, a ntá tió tí sín Egipto tjinkaon sín chróchréhé sín xikaha la kjánchó kjuínhin sín tí ntá a. ††††

³⁰ A ntá tí fe k'uéchonta tí sín israelita la xitjen tí tjat'o t'inkákuènxín tí chjasin Jericó, tió kjuixin k'uántatjen sín yato yaon tí chjasin a. ¹⁸³¹ A ntá tí fe k'uéchonta tí tjan Rahab, na mé ijnko tjan k'uéchonta nchónhaya chojni ntoa, ntá k'uénkohya tjan kaín tí sín jiehe kuitekakonhaya, kixin tsíkjanjon tjan kjuachaxin kixin kjuaxróxin tsíkitohe ntqé tjan tí sín israelita kjuijitsàya sín tí chjasin Jericó. ¹⁹

³² ¿Nkehe naxa chróntáxrjan? Sintak'itjayan tiempo naxa chrónixja kuènte ch'ín Gedeón, la ko ch'ín Barac,

† Génesis 4.3–10 †† Génesis 5.21–24 ‡ Génesis 6.13–22
†† Génesis 12.1–5 ††† Génesis 35.27 †††† Génesis 18.11–14;
21.2 ††††† Génesis 22.17

§ Génesis 22.1–14 ††††† Génesis 21.12 ††††† Génesis
27.27–29,39–40 ††††† Génesis 47.31–48.20 ††††† Génesis 50.24–25
††††† Éxodo 1.2; 2.2 ††††† Éxodo 2.10–12 ††††† Éxodo 2.15 ††††† Éx-
odo 12.21–30 ††††† Éxodo 14.21–31 18 Josué 6.12–21 19 Josué
2.1–21

la ko ch'ín Sansón, la ko ch'ín Jefté, la ko ch'ín David, la ko ch'ín Samuel, la ko tí sín profeta. ³³ Kíxin tí fe k'uéchonta tí jehe sín kjuacha sín k'uetōan sín jína ókjé chjasin, la ko jína kjuínchekitōexín sín ijíé chojni, la ko k'uáyéhe sín tí nkehe tsintácho Dios kíxin tsjanjon ch'án, la ko k'uikjehe sín ir'va koxra, ³⁴ la ko k'uanka tí xrohi chróchexín sín, la ko kjuachahya tí espada chrók'uenxín sín. A ntá tí sín chrakon la kófuerte sín, k'óna sín chojni tsehe kjuacha sín kjuánjonko sín tí sín soldado tsíkijxin ókjé. ³⁵ Kjaxin k'uék'ixin chojni chjin k'uáyéhe inaá tí chojni tsík'en kuente sín tsíxechón inaá.

A ntá í so sín la kjuasote sín k'uénxin sín kíxin kjuínchemáhya sín kíxin kuinkáchónki sín Dios kíxin ó nohe sín kíxin tsoxechón sín antsí jína inaá. ³⁶ A ntá í so sín kjuasóte sín la nchónhya chojni kjuanoá tí jehe sín, la ko tsík'ekon sín la ko kjaxin cadena chróntetoxín sín k'uejóchjina sín. ³⁷ Í so sín la ixro k'uénxin sín, la í so sín cierra chrít'oxin sín, la í so sín la nchónhya nkehe kjuasótexín sín, la í so sín k'uénxin sín espada, la í so sín k'uék'aji sín tsík'inkáya sín tje kolélo la ko tje koténtsō, nōa sín, kjuasóte sín, kjuaxróxinhya la náxr-jónhya k'uéjō sín. ³⁸ A ntá tí sín chjasin ntiha kjuikosáyehya tí sín a la ntá k'uínkíté sín, la tí sín a la chónthaha chjasén sín la sákjuj sín nteje, la ko jna, la ko tjo síxra la ko tòye. ³⁹ Káin tí sín a kónhen sín prueba kíxin á chaxín chóna sín fe la kjónté xikaha k'uáyèhya sín tí nkehe tsintácho Dios kíxin tsjanjon ch'án ⁴⁰ kíxin Dios kjuenkayáxin ch'án ijnko nkehe antsí jína kíxin jehó jnkokōá chrók'uáyèkoni sín tí nkehe tsjanjon ch'án.

Jehó Cristo chrókuinkáchónkini

12 Méxra tí jeheni la tsík'antátjenni nchónhya chojni tsíkjakoxin sín tí fe k'uéchonta sín, la ntá chrókuítōheni ntáha káin tí nkehe t'inkákonhen, la ko tí jje chrókjuachroeni, a ntá chrókjuich'eni jína tí xra chónthani la ntá chrókjuachani antsí má chrókónoheni. ² Jehó Jesús chrókuinkáchónkini kíxin jehe ch'án kjuanjon tí fe chónthani kíxin jína kjuakoxin ch'án kjuínchexiteyá ch'án, la kjuasótexín ch'án tí ntacruz, la kuáhya ch'án kuentá kósuèhya ch'án tí nkehe kónhen ch'án ik'uén ch'án, kíxin nohe ch'án kíxin tsjixin tsjasóte ch'án ntá náxrjón tsjak'e ch'án la ko tsqchéhe ch'án kíxin tsjak'etjaxin ch'án tí tja chjina tí trono kuente Dios.

³ Méxra chrókjuenkayáxinrá jahará nkexrí kjuakoxin ch'ín Jesús. Tí sín chóna jje imá kjuínchekjasóte tí jehe ch'án la kjónté jahará xikaha chrókjuasóterá la chrókóxrjéhyará chrókuinkáchónkirá ch'án. ⁴ A ntá jahará naxa k'uénxinhyará tí tjanjonkoará tí jje. ⁵ A k'uitjyanhanrá tí jahará tí nkehentaxraxinkaonrá Dios kíxin éxi xjeen ch'án t'ikon ch'án tí jahará? Éxi ntácho xron itén Dios kíxin:

Xjeenni, tóninkákonhya tí nkehe tjentuáha Ìnchéni, chrók'uaváhya tí chrókjuentuáha ch'án.

⁶ Kíxin Ìnchéni mé tjentuéhe tí sín tjuèhe ch'án la ko nchekjasóte káin tí sín ts'áyéhe ch'án ts'óna xjeen ch'án. †

⁷ Chrókuítekáonrá tí nkehe t'etōan Dios kíxin Dios t'ikon kíxin éxi xjeen ch'án tí jahará. ¿Á síin ijnko it'é xjan chrokjuentuéhya tí xjeen? ⁸ A ntá tí chrókjuentuáhyará Dios tí jahará éxi tjentuéhe ch'án káin tí xjeen ch'án, ntá jahará kjá jehya xjeen ch'án chaxín. ⁹ A ntá tí naxa k'uéchánjanni, na mé it'éni ntihi chjasintajni kjuentuéhe tí jeheni, la jeheni kjuikosáyeheni sín. A ntá xikaha antsí chrókjuinchexiteyéhéni It'éni tjen nkaya nkajni kíxin chróchóntaxinni kjuachón. ¹⁰ It'éni ntihi chjasintajni kjuentuéheni ch'án kjónté kánhyó sé éxi nkexrí kóxrjínhjn ch'án; a ntá It'éni Dios tjuentuéheni ch'án kíxin jnkójina chrók'uejóni, kíxin chrók'ónani tjóá kíxin jehe ch'án la tjóá ch'án.

¹¹ Chaxín ninkehó xikaha chrókjuinchekjasóte Dios tí jeheni chrókóxrjínhjn tí nantá chrókónhenni kíxin tí kjuatjoté. A ntá xikaha ts'itjaxinni tí kjuaxróxin éxi ijnko nkehe náxrjón kjuachani.

Tí sín tjanoá tí kjuasáyé Dios

¹² Méxra tjisójirá tí tjára tsikóxrje la ko tóch'inrá chónthaha fuerza, ¹³ la ko chrókjuéyará tí ntja ntoá. A ntá tí totará níhi xitjahya tjxinrá chrókuitōhe jína la ko chrókóníehya inaá.

¹⁴ Chrókóxakonhanrá kíxin kjuaxróxin chrók'uejorá káin rá, jnkójina tjóá chrók'uejorá. A ntá tí tjuáhya chrók'uejorá la xitjahya ts'ikonrá Ìnchéni. ¹⁵ Chrókóxakonhanrá kíxin nijnkorá chrókuitōéhyará tí kjuasáyé Dios la ko nijnkorá chrók'ónahyará éxi ijnko nuèe ka tsjá chóna veneno chrókóníexín tí í so chojni. ¹⁶ Nijnko tí jahará chrókjuásinkoará jje ijnko chojni chjin ókjé, la ko chrókjoniéhyará tí nkehe tjóá éxi kjuích'e ch'ín Esaú, kíxin jnkokōá comida kjuínchekjixin ch'án tí nkehe chróchóna ch'án kíxin xjan saō jehe ch'án. ††¹⁷ Jahará ó nohará kíxin chr'éxin, tió tjinkaon ch'án kíxin chrókjuincheyaon it'é ch'án tí jehe ch'án la í xitjahya tsoyaon ch'án kíxin kohya nkexrí chrók'uixitóxin tí nkehe tsíkijch'e ch'án kjónté imá chrótsjánka ch'án. ‡

¹⁸ A ntá jahará la jehya kóchjinará éxi kóchjina tí sín israelita tí jna jína chrótsé sín tí síchr'ákjen xrohi, tí tjen tí sítie t'inkaséyanhya la ko tí chjéhe xrintō. ¹⁹ Na ni tsíkíenhyará tí tsintácho trompeta, la ko tí itén Dios nixja. A ntá tí sín tsíkinhin tí tan a na mé chronōa sín kíxin í chrónixjahya ch'án inaá, ††²⁰ mé xikaha ichro sín kíxin tsjachahya sín sinchexiteyá sín tí nkehe k'uetōan ch'án kíxin "Tí nkexro tsinkátja tí jna mé its'en, la ixro la o chica lanza chrók'óyánxin sín, la kjónté ijnko ko tsinkátja va tí jna la chrók'uen." ††²¹ Ijnko kjuachrakon jje tí nkehe k'uikon sín la kjónté ch'ín Moisés tsintácho ch'án kíxin: "Kjaxin síxrankana chrakonna." †††

²² A ntá jahará tsíkóchjineherá tí jna Síon, tí chjasén Dios tjechón, mé tí Jerusalén itjen nkaya nkajni, la ko nchónhya miles ángel ²³ tsíkójnksé sín kíxin

† Job 5.17; Provérbios 3.11-12 †† Génesis 25.29-34 ‡ Génesis 27.30-40 †† Éxodo 19.16-22, 20.18-21 †† Éxodo 19.12-13 ††† Deuteronomio 9.19

tsochjéhe sín kjuasáya Dios, la ko tí sín tsíkójkotsé sín tsík'óna sín xjeen Dios s̄oxín ts'ínixín ihnié sín nkaya nkajní. Jahará tsíkóchjineherá Dios, jehe ch'án mé Juez sinchekitoexín ch'án ijjé kaín chojni, la ko tsíkóchjineherá tí nchakuen chojni jína ó tsíkjinchetjóá Dios, ²⁴ la ko tsíkóchjineherá ch'ín Jesús, jehe ch'án mé nixj̄axín ch'án tí pacto n̄ixin k̄ixin tí ijnié ch'án k'úitji kjuínchetjuáxinni ch'án. A ntá antsí jína chrónkaxín tí ijnié ch'án, a ntá kánhyó tí ijnié ch'ín Abel.

²⁵ Chrókóxakonhanrá chrókuítekákonhénrá tí nkexro tjenixja. K̄ixin tí sín kjuanoá Dios tió kjuínchexraxinkaon ch'án tí jehe sín ntihi chjasintajni ó la kuaáhya sín; a ntá antsí má xitjahya chrókuaáni tí chrókuítekakuenhyani tí nkexro nchexraxinkaonni kuj̄xin nkaya nkajní. ²⁶ A ntá tí itén Dios tí yaon a kjuínchekinkí nonte. A ntá jie tsíntáchro ch'án k̄ixin: "A ntá inaá jehya nonte ó s̄intakinkíá. Náhí. K̄j̄axín nkajní s̄intakinkíá", ¹²⁷ A ntá tí tsíntáchro ch'án k̄ixin "ínaá" mé t'axrjexín k̄ixin tsjakj̄in ch'án tí nkehe jína tsinkí, a ntá tsítóhe ch'án tí nkehe xitjahya tsinkí. ²⁸ A ntá tí ts'áyéhēni tí kjuachaxín kjuanjōn Dios la xitjahya ts'ixinkí tíha. Méxra chróchjéhēni Dios kjuasáya chrórxaxinkaonni ch'án chróchrahonhēni ch'án ²⁹ k̄ixin tí Dios kuènteni mé éxi ijnko xrohi tsjacha sinchek'itjāyan kaín nkehe. ††

Nkexrí chrók'uejóni k̄ixin chrókóchéhe Dios

13 Méxra chrókuítóéhyará chrótjuèherá k̄ichuárá. ² Chrók'uitjāyanhyará chrókjuánjonrá kjuachaxín chrókuitōhe ntōará tí sín tsík̄j̄xin k̄j̄in. Mé x̄ikaha kjuích'e iso sín la kjónté ángel tsík'áyéhē sín la kónoehya sín. ‡

³ Xr̄áxinkáonrá tí sín tjejóchjina éxi k̄j̄axínrá chrók'uejochjinakoará tí jehe sín. Xr̄áxinkáonrá tí sín tsík'ekon éxi k̄j̄axín tí jahará x̄ikaha chrókonhanrá k̄j̄axín.

⁴ Kaínrá chróchonteherá kjuasáya tí kótehe chojni. A ntá jahará tsíkótahará la jína chrók'uejokoará k̄ichuárá chrótjuèherá k̄ichuárá. A ntá tí sín tjinkaon tsochónta chojni chjin ókjé la Dios sinchekjasóte sín k̄ixin x̄ikaha ich'e sín.

⁵ Kénhyó má chrókóxrjínhanrá itsjé chichaon. Chrókócháhará kjónté tí kánhyó tsjé chontará; k̄ixin tsíntáchro Dios k̄ixin: "Janhan na tsítóahya tí jahará la ko ts'itjāyannahya tí jahará." ††⁶ Mé x̄ikaha chrakonhyani tsontáchroni k̄ixin:

Ínchéni mé tjink̄itsani, méxra chróchrakonhyani kjónté ichrén nkehe chrókjuich'ehe ni chojni. ††

⁷ Chrórx̄áxinkáonrá tí sín kjuínk̄itsa tí jahará kjuakohará sín itén Dios, chrókjuenkayáxinrá nkexrí k'uejó sín ntá x̄ikaha chrókóyohará sín éxi tí fe k'uechónta sín.

⁸ Jesucristo mé itjen ch'án ijna la ko ijie la ko jnkochr̄ixín. ⁹ Chrókuítóéhyará chrókjuakohará chojni ijnko nkehe ókjé chrókuinkachónkirá. Íchá jína tí asánrá chrók'úáyéhē fuerza k̄ixin Dios tjuahará la jehya tje-

† Hageo 2.6 †† Deuteronomio 4.24 ‡ Génesis 18.1-8, 19.1-3 †† Deuteronomio 31.6 †† Salmo 118.6

toan chrókjuinchexiteyéhēni tí nkehe t'etōan nkehe sineni. Mé x̄ikaha tí sín kjuích'e x̄ikaha kjuinchexiteyá tí nkehe k'úituenhen sín nkexrí chrókjónē sín la ninkehó kjuínk̄itsahya tíha.

¹⁰ A ntá jeheni chóntani í jnko altar k̄ixin k'uenyákonhēni Cristo la ntiha kohya kjuachaxín chrókjónēxín tí nchāt'á kjuích'e x̄ra nkaxenhen n̄inko ósé. ¹¹ A ntá tí nchāt'á t'etōan judío kjuíko sín tí ijnié ko nkaxenhen tí Cuarto Antsí Tjóá k̄ixin tí nkehe la tsjatsen tí ijjé sín. A ntá tí cuérpōé tí ko kjuakaxín sín ikon tí chjasín k'uejó sín. ¹² K̄j̄axín Ínchéni Jesús kjuasóte ch'án k'uénxín ch'án ikon chjasín k̄ixin tsotjuáxin kaín ijjé chojni tí ijnié ch'án. ¹³ Tsochréhēni Ínchéni Jesús éxi k'uénxín ch'án ikon chjasín kjónté tsjasóteni éxi kjuasóte tí jehe ch'án kjuikosáyehya sín tí jehe ch'án. ¹⁴ A ntá ntihi chjasintajni chóntahyani nijnko chjaséni chrók'uitjāyanhyā; a ntá xritjeyáni tí chjasín itsi chr'éxin. ¹⁵ Méxra chrókuitōehyani chrókjuikosáyehēni Dios k̄ixin Jesucristo k'uenyákonhēni ch'án. Tí xr̄axinkaonni ch'án la yóhē tí ko tsík'en tsíchjéhē sín Dios. Yóhē x̄ikaha chrókjuanjōnni k̄ixin ir'vani ó chrókjuikosáyexínni ch'án. ¹⁶ Chrók'uitjāyanhyará chrókjuich'erá x̄ra jína la ko chrókjuínk̄itsará k̄ichuárá. Tí x̄ikaha chrókjuich'erá la imá tóxrjính̄in Dios.

¹⁷ Chrókuítekákonhénrá tí sín tjakohará chrókjuinchexiteyéhérá tí jehe sín. Jehe sín mé t'ayakonhen sín asánrá k̄ixin jehe sín la ó nohe sín k̄ixin tsjanjon sín kuéntá tí tjen Dios. Tsjínk̄itsará sín k̄ixin tsochéhe sín sich'e sín x̄ra la tsonínkakonhya sín. A ntá tí chrókjuinchek'ávárá sín, ntá ninkehó tsjachahya sín tsjink̄itsa sín tí jahará.

¹⁸ Nixjehérá Dios k̄ixin tí jeheni kaín ni, k̄ixin chaxín jína kjuenkayáxin la ko tjinkaonni k̄ixin jína chrók'uejóni. ¹⁹ Tjānchá x̄ra ó k̄ixin chrónixjehérá Dios k̄ixin chrókjuanjōn ch'án kjuachaxín k̄ixin tjoka chrókjan janhan chrók'uejóni.

Tjanchia ch'án k̄ixin chrókóyaon sín

²⁰ Tí Dios tjanjon kjuaxróxin, mé tí nkexro kjuínchexechón Ínchéni Jesucristo kjónté tsík'en ch'án, jehe Jesucristo mé tí Pastor tjetōan t'ayakonhen tí kolélo, la tí ijnié ch'án mé tsoxiteyáxin tí pacto sich'e x̄ra jnkochr̄ixín, ²¹ jehe Dios mé tsjink̄itsa tí jahará k̄ixin jína chrók'uejorá la ko kaín x̄ra jína chrókjuich'erá k̄ixin x̄ikaha tjinkaon ch'án; k̄ixin jehe ch'án t'etueñhēni ch'án kaín nkehe nkexrí tjinkaon ch'án k̄ixin tí kjuachaxín chóna Jesucristo. Mé x̄ikaha chjéhēni Cristo kjuasáya jnkochr̄ixín. Amén.

²² Kíchóni, xr̄janóahará k̄ixin tóninkákonhyará k̄ixin tí palabra xr̄janka s̄intaxraxinkáonrá. Méxra ikjian tí xroon kjónté kánhyó tsjé nixja ts'ayéhérá. ²³ Chrókónohará k̄ixin kíchó ni Timoteo la í tjechjinahya ch'án jie. Tí tjoka tsi ch'án la tsjasánkian ch'án tí tsjasantsjahará tí jahará.

²⁴ Nixjehérá jnkójina kaín tí sín tjítaón ntja tjako la ko kaín tí sín kíchó ni tinkáchónki Dios. Tí sín tinkáchónki Ínchéni tjejó Italia mé nixjahará sín.

²⁵ Dios sintayaonrá ch'án kaín rá. Amén. Ó tjen.

SANTIAGO

Tí ch'ín Santiago tsíkjin ch'án xroon ts'áyéhe kaín tí sín tsíxikayéhe

1 Janhan Santiago mé t'ahá xrá Dios la ko Ìnchéni Jesucristo nixjahá kaín tí sín tsík'axrjeníxin tí teyó xjeen ch'ín Israel tsíxikayéhe sátsíkji kuenté chjasintajni.

Dios mé tsjanjon tí kjuaxrexinkaon jína

2 Jahará kichó ni, chrókócháhará kjónté chrók'uat-s'ínkará ichrén nkehe náxrjónhya. **3** Ó nohará kixin tí ichrén nkehe chrókónhanrá kixin tinkachónkirá Ìnchéni la t'ichjánxin chrókjuachará la chrókóninkákonhyará. **4** Chrókónohará kixin tí chrókóninkákonhyará la tíha mé ijnko xrá jína chaxín kixin ntá jahará ijnko chojni chaxín kjuacha titekaon la í t'itjáyanhya ninkehó.

5 Tí jnkojín tí jahará t'itjáyan kjuaxrexinkaon la chrókjuancheherá Dios la Dios mé chrótjáhará ch'án tíha. Jehe ch'án mé xráxin tsjanjon ch'án kaín nkehe ts'áyéhe tí chojni tjanchia la tsonínkakonhya ch'án. **6** Tió chrókjuancheherá Dios nkehe la kénxin asánrá chrókjuanchiará la chrókjóhya asánrá ninkehó. A ntá tí chojni tjo asén la éxi ntayaon tjiko xrinto ijnko lado la í jnko lado. **7** A ntá tí xikaha itjo asén sín la chróntáchrohya sín kixin chrók'uáyéhe sín ichrén nkehe chrókjuanjon Ìnchéni. **8** A ntá tí nkexro xikaha tjenkayáxin ijnko nkehe ijie la í jnko nkehe ntóye la jnkokoáhya nkehe tjenkayáxin.

9 Tí kichó ni tinkáchónki Cristo la kjónté nòa chón-tahya itsjé nkehe chjasintajni la kjónté xikaha chrókóchéhe kixin tí tinkáchónki ch'án Ìnchéni la antsí má sínkí tíha. **10** A ntá tí nkexro rico kjónté chrók'uitjáyan tí nkehe chóna la antsí chrókóchéhe kixin tinkáchónki ch'án Ìnchéni, kixin tí nkehe chóna ch'án la kánhyó sínkí la ts'itjáyan éxi itsjo tsík'óna ka. **11** Tió tsjiton yáon la tsosóa imá la tí ka tsoxámá la ko tí tsjo la ts'ánótjen la tí náxrjón tsjehe la tsjeje. Mé xikaha tsonhen tí ch'ín rico, ts'itjáyan ntá tsítóhe ch'án tí xrá k'uéchóna.

Tí nkehe tsonhen chojni

12 Náxrjón tí nkexro tsjacha ts'atsínka tí nkehe náxrjónhya tsonhen. A ntá tí tsjacha ch'án ts'atsínka kaín tí nkehe náxrjónhya tsonhen ntá ts'áyéhe ch'án tí corona kuènte kjuachón kixin Dios tsíntáchro ch'án kixin tíha mé tsochjéhe ch'án tí sín tjuèhe ch'án. **13** A ntá jnkojínrá tí chróntáchro asánrá chrókjuich'erá ichrén

nkehe jínahya, la chróntáchrohyará kixin Dios tsíkjanjon kjuachaxin xikaha sích'erá kixin Dios la tjinkakonhya chrókjuich'e ch'án nkehe jínahya la ko tjinkakonhya ch'án chrók'uetqan ch'án kixin ninkexró chrókjuich'e ijnko nkehe jínahya. **14** A ntá jnkojín chojni tí ó jehó tjenkayáxin asén tí jínahya la mé xikaha tsjachroe, tsjasin sín jie. **15** Mé xikaha tí nkehe jínahya tjenkayáxin chojni mé tjixín tí jie. La mé xikaha ts'ánkí tí jie la ntá tíha ts'énxin chojni.

16 Kichóni, chrókjuich'iyéhyará asánrá. **17** Kaín nkehe jína ntoá t'áyéheni mé tjixín nkajní tí tjen Dios tí nkexro kjuich'éna kaín tí xrohi kuènte nkajní. Jehe ch'án mé Dios jnkochrín la jehe ch'án mé xitjahya ts'ixitóxín. **18** Jehe ch'án kjuanjon ch'án kjuachón k'uáyéheni kixin tí tan ntoá nixja ch'án, kixin éxi tí nkehe senó tsík'óna, mé xikaha tjinkaon ch'án chrók'óna tí jeheni.

Tí nkehe chaxín chrókuinkáchónkini

19 Méxrá chróxráinkáonrá tíhi jahará kichó ni. Kaínrá chrók'uejorá chrókuinhínrá jína la tjokahya chrónixjará kixin tjokahya chrókóninkáonrá. **20** A ntá tí chojni tjoka tónínkaon la ch'ehya tí xrá jína éxi tóxrjínhin Dios.

21 Méxrá tjtóhérá tí nkehe tjuáhya la ko tí nkehe jínahya kjuachjínnoxínhin síin nkuixín la chrókjuinchehnkehyará, chrók'uayéhérá tí itén Dios chrók'uinka nkaya asánrá. Tí tan a mé chóna kjuachaxin kixin chrókuaáxinrá.

22 Jehya kixin chrókuinhónrá; jahará chrókjuich'erá éxi tí nkehe tjako tí tan a. A ntá tí náhi la jahorá ch'iyehérá asánrá. **23** A ntá tí chojni tsinhón tí tan la ntá sinchexiteyáhya la éxi ijnko chojni tsjéxin xrosentá tí kon ó. **24** A ntá tí k'uikon tí kon la sátsji la tuénxin k'uitjáyenhen nkexrí tsjehe. **25** A ntá tí nkexro k'uitjáyenhya tí nkehe kuínhin la mé tsjehe ch'án jína tí ley chaxín ntoá, mé tí nkehe chaxín tsaáxinni la titekaon ch'án jína la ich'e ch'án nkehe t'etqan tíha la ntá náxrjón tsjak'e kixin kjuínchexiteyá ch'án.

26 A ntá jnkojín nkexro tjenkayáxin kixin imá tinkáchónki ch'án Dios kjánchó tí noehya tsochjéhe freno nejen la jehó ch'iyehé asén la ninkehó sínkíhya tí nkehe tinkáchónki ch'án. **27** A ntá tí nkexro tinkáchónki Dios chaxín jína la ko tjasinhya jie nkayakon It'éni Dios la mé tíhi: mé chrókjuinkítsa tí chojni nòé la ko tí chojni k'án chónahya nkehe sine sín o níhi sín, la ko chrókjuasinhya tí jie jínahya síin chjasintajni.

Jnkokón chrókjuikosáyehe kíchó ni

2 Kíchóni, jahará tinkáchónkirá Ìnchéni Jesucristo imá tjetóan la t'ichjánxìn chrókjuikosáyeherá kaín chojni jnkokón. 2 Éxi ijnko chojni rico chrók'uixenhen tí tójnkoťsérá la chónťa koch'áninko oro la ko chónťa iké náxřjón, a ntá nťiha křaxin chrók'uixenhen ijnko chojni nòa chónťa iké nťaxin. 3 A ntá tí chrókjuikosáyeherá tí chojni t'itsa ka jína la tsonťacherá ch'án kixin: "Nťihi antsí jína tjak'e." A ntá tí chojni nòa tsonťacherá ch'án kixin: "Jaha la tjak'éxian totá nťiha o tjak'e nonte ó." 4 Mé xikaha la jnkokónhya tjikosáyeherá kichuárá la tí nkehe jínahya tjenkayáxinrá.

5 Kíchóni tjuahará, tsinhínrá tíhi: Dios tsíkjeýá tí sín nòa nťihi chjasintajni kixin antsí má tsinkáchónki sín tí jehe ch'án kixin ts'áyéhe sín tí kjuachaxin kuènte ch'án éxi tsintáchro ch'án tsochjéhe ch'án tí sín tjuèhe ch'án. 6 A ntá jahará mé tjikosáyeheará tí sín nòa. A ntá tí sín rico mé tjikosáyeherá. ¿Á jehya tí sín rico tjančia sín jje sátjiko sín tí jahará nkayakon tí sín t'etóan ní? 7 ¿La á jehya jehe sín t'ántaxínhìn sín tí ihnjé Cristo tjikosáyehe ni?

8 A ntá jahará la jína tjejoch'erá tí nchexiteýará éxi t'etóan tí ley éxi nixja tí xroon itén Dios kixin: "Chrótjuèherá kichuárá éxi tjuèxíná asánrá". 9 A ntá tí jnkokónhya tjikosáyeheará chojni la ntá xikaha la tjasínrá jje la nchexiteýehyará éxi tí nixja tí ley kuènte Dios. 10 A ntá ijnko nkexro titekaon kaín tí ley la ntá kjuínchexiteýáhya jnkokoá tí nkehe tjetóan la mé tí xikaha la kjuínchexiteýéhya kaín tí nkehe t'etóan tí ley. 11 Ntá Dios tsintáchro kixin: "Chrókuákjahyará í jnko chojni chjin ókjé", la křaxin tsintáchro ch'án kixin: "T'oyánhyará kichuárá." A ntá tí nkexro kuákjahya í jnko chojni chjin ókjé kjánchó kjuàya la kjuínchexiteýéhya tí nkehe t'etóan tí ley. 12 A ntá jahará chrónixjará la ko chrókjuínchexiteýará kixin chrókjuanchiahya jje tí ley sinchekaáni. 13 A ntá tí nkexro kuikonóehya í jnko chojni la křaxin tsikonóehya Dios tí jehe. A ntá tí nkexro kuikonóehé kichó la mé xikaha tsjacha tsaáxin ch'án tí yaon tsjixixín tsitóexín jje.

Tí fe ch'ehya xřa la tsík'en

14 Kíchóni, ¿nkehe tsonhen ntáchrorá kixin chontará fe a ntá ninkehó nkehe jína tjákoxínhyará? ¿Á ntáchrorá kixin xikahó chrokuaáxinrá? 15 Éxi ijnko kichó ni ntoa o kichó ni chjin chónťahya iké o chónťahya nkehe sine sín t'ichjánxínhìn sín jnkojín yaon. 16 Ntá jnkojín tí jahará tsonťacherá sín kixin: "Sátjia jnkojína la ko ts'itsa ká la ko sinte jína." A ntá tí kjuánjonhyará tí nkehe t'ichjánxínhìn tí cuerpoé sín la sínkihya tí nkehe ntáchrorá. 17 La mé xikaha tónhen tí fe la tí tjákoxínhyará ninkehó nkehe jína kjuich'erá la éxi nkehe tsík'en tí ntáchrorá.

18 A ntá jnkojín chojni tsonťachro kixin: "Jaha chonta fe a ntá janhan it'a tí xřa jína." Tí xikaha la jaha tjákoxian tí fe kjointé kohya xřa la janhan tsjákoxian tí fe la ko tí xřa jína tjet'a. 19 Jaha titekávan kixin jnkokoá Dios it-

jen la chaxín jína xikaha, kjánchó křaxin tí jínahya titekaon tíha la ko síxřankřa chrakon. 20 T'ónahyará lonťi. Jahará la nohará kixin tí fe ch'ehya xřa la chónkó tíha. 21 Dios kóxrjínhìn tí nkehe chrókjuich'e ch'ín Abraham, tí nkexro k'uaxřenixinni ósé, tió chrók'óyan ch'án tí xjeen ch'án Isaac la chrókjuanjon ch'án chrók'uáyéhe Dios. 22 Chrókónohará kixin tí fe k'úechónťa ch'ín Abraham la kjuakoxín ch'án tí xřa kjuich'e ch'án la ntá xikaha kjuakoxín ch'án kixin antsí má kuinkáchónki ch'án Dios. 23 Mé xikaha xiteýá éxi ntáchro xroon itén Dios kixin: "Abraham kuítekaon Dios la ntá Dios ntáchro kixin jína ch'án", la ntá Dios kjuínchek'in ch'án amigo kuènte ch'án.

24 Chrókónohará jahará kixin Dios la t'áyéhe ch'án chojni la nchetjóá ch'án kixin tí xřa jína ch'e sín la jehya kixin jehó chrókuinkáchónki sín ch'án. 25 Mé křaxin xikaha kónhen tí tjan Rahab, tí tjan k'úechónťa nchónhya chojni ntoa. Jehe tjan kjuanjon tjan kjuachaxin kuítohe nťoje tjan tí sín kjuítsjehe chjasén tjan la ko kjuínkřtsa tjan sákjuixin sín ókjé nťja, a ntá Dios la kóxrjínhìn tí nkehe kjuich'e tjan. 26 Éxi tí cuerpoé chojni chónťahya nchakuen la tsík'en la křaxin xikaha tí fe la tsík'en tí ninkehó tjákoxínhya tí nkehe jína chrókjuich'e sín.

Tí kjuachaxin chónťa nejen chojni

3 Kíchóni, chrók'ónahya tí jahará nchónhya maestro kixin tí ntoáhya chrókjuakorá la tíha mé chrókjuasótiaxinrá imá. 2 Kaínni chónťani jje, a ntá tí nkexro ninkehó jje ntáchrohya la ijnko chojni jína tíha la ó tsjacha ch'án ts'etuenhen ch'án kuènte tí cuerpo kuènte ch'án. 3 Éxi tí kokře tsochónťa chica freno tí ir'va va kixin tsitekaon va la sáťsiko tí inché va la tsjacha ch'án ts'etuenhen kuènte tí cuerpo kuènte va. 4 Tjenkayáxinrá křaxin nkexři tjejó tí ntabáro kjointé imá jje la tsjacha tí xřnto chjéhe tjan sáťsiko, la ntá tí ch'ín tjiko la kjointé ijnko nta nťsí la tsjacha ch'án sáťsikoxín ch'án tí tjinkaon ch'án sáťsiko ch'án. 5 Mé xikaha tí ir'va chojni. Kjointé ijnko nkehe imá nťsí kuènte tí cuerpo kjánchó nchónhya nkehe jínahya ntáchro éxi ijnko xrohi nťsí la tsjacha tsochéxin kuènte ijnko jnřa jje. 6 Mé xikaha tí ir'vani la éxi ijnko xrohi kixin nchónhya jje t'axřjexín la éxi ijnko veneno ncheníhi cuerpo mé xikaha mé tsjasixín kuènte cuerpoé chojni jje. La tí kjuachaxin kuènte ir'vani la mé tjjixín tí infierno la tíha mé tjjixín tí ts'itjáyaxinni. 7 Tí chojni la tsjacha sinchesáncho kaín ko jjehe la ko tí ko xřitjaká la ko tí konche la ko tí ko sínkankí nťayaon la mé xikaha kjuacha sín nchesáncho sín va. 8 A ntá tí ir'va chojni la kohya nijnko chojni tsjacha sinchesáncho. Tíha mé jínahya la xitjahya tsósáncho. Tíha mé éxi ijnko nkehe chónťa nchónhya veneno ts'enxín chojni. 9 Tí ir'vani la křaxin tjikosáyexinni It'eni Dios la tíha křaxin t'ántaxínxinni chojni tsíkřich'éna Dios éxi tsjehe tí jehe ch'án. 10 Křaxin tí ir'vani t'axřjexín tí nkehe itsjeni kuènte Dios la křaxin tíha t'ántaxínxinni. Kíchóni, xikahya chrókjuich'erá. 11 Jnkokoá tóye xitjahya ts'axřje nťa xé la ko křaxin nťa tsjá. 12 Kíchóni, ¿á jína tí nta

higuera chrók'óna to aceituna o tí nta to uva chrók'óna to higo? Kjaxin xitjahya ijnko tòye chrók'uaxrje ntà xijnta la ko ntiha kjaxin chrók'uaxrje ntà xé.

Tí kjuaxrexinkaon jína

¹³ Tí tjen jnkojín nkexro tí tjejórá nohe jína la ko tienxín la chrókjuakoxín ch'án jnkojína la ko chrókjuinchehnkexínhya ch'án tí nkehe imá nohe ch'án. ¹⁴ A ntá tí jahará chóna kjuachjinoxínhin asánra la tjinkáonrá jahóra chrókuétoanrá. A ntá tí xikaha la chrókjuinchehnkexínhyará tí nkehe nohará kixin tí xikaha la ch'iyará la tjinkáonhyará chróchronkará tí nkehe chaxín ntoá. ¹⁵ A ntá tí xikaha sinchehnkerá la jehya tí kjuaxrexinkaon kujxin tí tjen Dios. Tí xikaha la kjuachaxin kuente chojni chjasintajni ó la ko kuente ch'ín Tsochren. ¹⁶ A ntá tí xikaha síin kjuachjinoxínhin la ko tjinkaon chojni jehó chrók'uetōan la ntá xitjahya tsonhen xra yóxin kixin xikaha síin nkehe jínahya. ¹⁷ A ntá tí síin kjuaxrexinkaon jína tsíkixín tí tjen Dios la saxín tjejó chojni jína la ko kjaxin kjuaxróxin tjejó sín la ko náxrjón tjejó sín la ko jnkojína nixjehe kichó sín la ko kjaxin tikonóhehe kichó sín la ko tí xra jína tjejóch'e sín la tí nkehe ntoá nixja sín. ¹⁸ Tí nkexro tjejá tí kjuaxróxin xikaha chrók'ueñka sín kjuaxróxin la ko xikaha chrótja sín tí nkehe jína.

Tí tjanjonxin chojni

4 ¿Nketí tjiñin tí guerra la ko tí kjuanínkaon tjanjonkoaxínra kichuára? Táha la mé jahóra t'axrenixínra kaín tí kjuanínkaon a. ² Jahará tjinkáonrá tsochontará ichren nkehe ntá chontahyará ntá tóninkáonrá t'oyánra kichuára. Tóchjinoxínhanrá kixin tsjachahyará sincheyóherá í so chojni ntá tóninkáonrá. Jahará ts'ayéhyará tí nkehe tjinkáonrá kixin tjanchehyará Dios. ³ La tí tjanchará la ts'ayéhyará kixin ntoáhya kjuanchiará kixin tjinkáonrá chrókuicháxinhanrá ó la chrókjuinchehnkexínra. ⁴ Jahará chojni titekakonhya Dios. ¿Á noahyará tí jahará kixin tí imá tsotjuèhéra chjasintajni la ntá tsoninkáonhénra Dios? A ntá tí jnkojínra tjinkáonrá tsotjuèhéra chjasintajni la tsokjanrá tsoninkáonhénra Dios. ⁵ ¿Á tjenkayáxinra kixin ti nkehe ntáchro xroon itén Dios la á chónkó? Ntáchro xikíhi: "Tí Nchakuen Dios kjuanjon ch'án k'uayéhéra la tjua hará ch'án la tsonínkaon tí tsitohéra ch'án." Mé xikaha ichro Dios. ⁶ Kixin Dios la imá tjinkítsani ch'án, méxra ntáchro xroon itén Dios kixin: "Dios la nínkakonhen tí chojni nchehnke a ntá tjinkítsa ch'án tí chojni nchehnkehya." ⁷ Méxra chrókjuinchehnkehyará. Íchá jína chrókuítekáonrá Dios la chrókjuánjonhyará kjuachaxin tí jínahya chrók'uetuānhanrá ntá chrók'uikon tí jínahya kixin chrók'uetuānhyá ntá sáchrókjuí. ⁸ Chrókóchjineherá Dios, la tí jehe ch'án kjaxin tsochjinahará ch'án. Jahará chojni chóna jje la chrókjonemará tjára. Chrókjuinchetjóára asánra kixin chrótjuèhéra Dios la kánhyó chrótjuèhéra chjasintajni. ⁹ Chrók'uavará la ko chrótsjankará. Chrókjuínkirá tí

tjanorá la chrótsjankará la chrókjuínki tí cháhará la chrók'uavará. ¹⁰ Chrókjuinchehnkehyará chróxráxinkáonrá Inchéni a ntá jehe ch'án chrókjuínkítsa ch'án antsí chrókónohará.

Chrók'uántaxiēnyani kichó ni

¹¹ Kichóni, chrók'uántaxiēnyará kichuára. A ntá tí nkexro t'ántaxínhin ijnko kichó la ntá jehe ch'án t'ántaxínhin ch'án tí ley, la t'eka jje tí ley. A ntá tí t'eka ch'án jje tí ley la mé t'óna juez chrínki chrókuitekaon tí ley. ¹² Kixin jnkokóá nkexro kjuanjon tí ley la tí nkexro a mé tí juez la jehe ch'án sinchekaá ch'án chojni la ko sinchekjasóte ch'án chojni. ¿A ntá nkexro tí jaha kixin chrókjuanchéhé jje tí kichuá?

Í noehyani nkehe tsonhen ntóye

¹³ A ntá jje jahará chrókuinhínra tíhi kixin tsín-táchorá kixin: "Ijje o ntóye sáchrokuini ijnko chjasin la ntiha chrók'uejóni ijnko nánó chrókjuinchejnini nkehe chrókjuachani chichaon." ¹⁴ A ntá jahará noahyará nkehe tsonhen ntóye kixin tí tjejóchónni la éxi ijnko tjuj nonte ts'ikonni a ntá tuénxín ts'itjayan. ¹⁵ Íchá jína chróntáchorá kixin: "Tí tjinkaon Inchéni la naxa chrók'uejóchónni la chrókjuich'eni tíhi o tíha." ¹⁶ A ntá jahará tí nixjará la imá ihnkerá la kaín tí kjuahnke la mé jínahya. ¹⁷ A ntá tí nkexro nohe chrókjuich'e tí nkehe jína la ntá ch'ehya xikaha la mé antsí tjasin jje.

Tí nkehe chrókuinhin tí sín rico

5 Jahará rícorá chrókuinhínra tíhi. Chrótsjankará la ko chrók'uíyatorá kixin tí nkehe tsonhanrá tsjasótíar. ² Tí nkehe rícoxínra la ó tsíkótje la ko tí ka chontará la ó tsík'in kué. ³ Tí oro la ko tí plata chontará ó tsíkóchjisen. Tíha mé tjakoxin kixin nkexrí tsonhen ntōará tsoche. ¿Nkehe tsonhen kjuásintonrá nkehe kixin ó tsi tí yaon tsjixín? ⁴ A ntá tí nkehe chrókjuacha tí sín kjuít'ahará xra la kjuénkehyará sín la ntá tjanchia sín jje tí jahará la t'èya sín, ntá Inchéni imá t'etōan mé kuínhin kixin xikaha ichro tí sín kjuích'e xra. ⁵ A ntá ntihi chjasintajni la náxrjón tjejórá la kaín nkehe tóxrjínhanrá ch'erá la éxi iko imá jína ine la tsíkótsanká la ntá itsji yaon ntá its'en la mé xikaha tsonhanrá. ⁶ Kixin jahará la kjuinchekjásóterá la k'oyánra chojni ninkehó jje chónahya kjónté kohya nkehe kjuít'ahará sín.

Chrókóninkakonhyani chróchónhenni la chrónixjeheni Dios

⁷ Méxra kichó ni, chrókóninkáonhyará chróchonhénra tsokjanjian Inchéni. Éxi tí ch'ín ch'e xra nontee chónhen xrakoa chrin senó la ko tí chrin tsjixín ntá tsotjá ch'án tí nkehe náxrjón k'óna. ⁸ Mé xikaha jahará la kjaxin chrókóninkáonhyará chróchonhénra chrókóxrjéhyará kixin tí yaon itsi Inchéni la ó chjina tsi. ⁹ Kichóni, chrókóninkáonhyará kichuára kixin ntá chrókjuanchahya Dios jje tí jahará kixin Dios la mé tí juez la ó tjen ch'án tí ntója puerta. ¹⁰ Kichóni, chrókuankíhírá éxi tí sín k'uéchronka itén Dios

k'uéchrónkaxín sín kjuachaxin ihnié Ìnchéni. Jehe sín kjónté kjuasóte sín la kóninkakonhya sín. ¹¹ A ntá jeheni ntáchroni kixin kóchéhe tí sín a kjónté kjuasóte sin la kjuacha sín. Jahará la ó kuinhínrá kixin nkexrí kónhen ch'ín Job. Ó nohará kixin Ìnchéni kjuínkítsa ch'án hasta kjuixixín kixin Ìnchéni la imá jína ch'án la kujkonóehé ch'án tí ch'ín a.

¹² A ntá kichó ni, chrókuakjénxínhyará ihnié Dios tjen nkaya nkajní la ko ni chjasintajni la nijnko nkexro chrók'uakjénxínhyará. Tí chróntáchorá chaxín la chaxín la tí náhí la náhí kixin Dios la chrókjuinchekjasótiahýará.

¹³ A ntá jnkojín tí jahará náxrjónhya tjejórá la chrónix-jehérá Dios, a ntá jnkojínrá náxrjón tjejórá la chrótsjerá kuènte Dios. ¹⁴ A ntá tí jnkojín nkexro níhi la chrók'uíyehé sín tí sín táda t'etqan kuènte njnko kixin ntá chrónixjehé sín Dios kixin tí sinníhi la ko chróchjéhe sín aceite tí sín a kjuachaxín ihnié Ìnchéni.

¹⁵ Chrónixjehérá Dios kaín asánrá kixin tí sinníhi

chrókuítóhe jína la ntá Ìnchéni chrókjuinkítsa sín, a ntá ichrén jié kjuasin sín la jehe ch'án sinček'itjáyan tíha.

¹⁶ Méxra chróchenkará kichuárá tí jié chontará la ko chrónixjehérá Dios kixin chrókuítóhará jína. Tí nixjehé Dios ijnko chojni jína tinkáchónki Ìnchéni la chóna nchónhya kjuachaxin tíha. ¹⁷ Tí ch'ín Elías, tí nkexro k'uéchrónka itén Dios, mé ijnko chojni éxí tí jeheni la jehe ch'án kjuanchehe ch'án Dios kaín asén ch'án kixin ts'aniáhya chrin la ntá k'uániáhya chrin chjasintajni iní nánó ko t'ó. ¹⁸ A ntá chr'éxín kjuanchehe ch'án Dios kixin ts'aniá chrin la ntá k'uániá chrin inaá chjasintajni la jína k'óna tí nkehe k'uenka sín.

¹⁹ Kichóni, tí jnkojín chojni chrókjuichroe chrókuítóhe tí nkehe ntoá la í jnko nkexro chrókjuinkítsa kixin chrókjan tí nkexro a ²⁰ la chrókónohará tí jahará kixin jnkojín chojni tjinkítsa ijnko nkexro chóna jié tsokjanxin tí ntia jínahya k'uék'aji ch'án la ntá ó kjuínkítsa kixin tsaáxin asén tí ch'ín a kixin ts'itjáyanhya ch'án la ntá chrók'uitjáyan tí nchónhya jié k'uéchóna ch'án. Ó tjen.

1 PEDRO

Ch'ín Pedro ikjin ch'án xroon chr'énnen ch'án tí sín tin-káchonki Ìnchéni tjejó ókjé

1 Janhan Pedro, mé kjueyána Jesucristo t'ahá ch'án xra mé ikjian tí xroon chr'anhánrá jahará sátsíkjirá ókjé chjasin tjejórá, mé tjejórá estado Ponto, la ko Galacia, la ko Capadocia, la ko Asia, la ko Bitinia.
2 Kjueyará It'éni Dios kixin jehe ch'án tsíkjenkayáxin ch'án ósé xikaha. Kótjuáxinrá Nchakuen ch'án kixin chrókuítekáonrá ch'án la ko kótjuáxinrá ijné Jesucristo. Kjuasáyé ch'án chrókjuintayaonrá ch'án kixin antsí chrókuákjárá tí kjuaxróxin kuènte ch'án.

Tjejóchónhenni kixin jehe ch'án sinchekaáni ch'án

3 Tjancheheni kjuasáyé Dios mé It'é Ìnchéni Jesucristo kixin kjuasáyé jehe ch'án kujkonóhēni ch'án kixin éxi kokjéxínni nixin kixin xechón Jesucristo. Mé xikaha tjejóchónhenni sinchekaáni ch'án. **4** Mé xikaha ts'ayéhérá jahará tí nkehe tsjanjon Dios chóna ch'án nkaya nkajni mé ijnko nkehe chónhya ts'itjáyan, la ko chónhya tsokjita, la ko chónhya tsoxámá. **5** Dios mé t'ayakuanxínrá ch'án tí kjuachaxin kuènte ch'án kixin jahará tinkachónkirá ch'án kixin ntá tsjacha tsaará éxi tsíkjenkayáxin ch'án ósé mé tjinkaon ch'án kixin chrókuaará tí tsjixín tsjeje chjasintajni.

6 Méxra xikaha chrókocháhará kjónté ichrén nkehe chrókónhanrá iso yaon kixin jehí t'ichjánxin xikaha it-sjé nkehe chrókónhanrá. **7** Méxra tí tinkachónkirá Ìnchéni la t'ichjánxin tsjachará nchónhya nkehe chrókónhanrá éxi yóhē chica oro xikaha t'ichjánxin ts'atsínka tí siín xrohi tsotsjexín sín á chaxín jina kohya nkehe tsōnhen. A ntá antsí má sínkí tí tinkachónkirá Ìnchéni a ntá tí chica oro la kénhyó sínkí kixin tí chica oro la chóxin tsjeje. Mé xikaha tí tinkachónkirá Ìnchéni t'ichjánxin xikaha tsōnhanrá kixin tsontácho Dios kixin jina kjuachará ntá ts'ayéhérá kjuachaxin tió tsi Jesucristo.

8 Jahará tjuéhérá Jesucristo kjónté k'uíkonhyará ch'án. Ijie tinkachónkirá ch'án kjónté t'ikonhyará ch'án la ko tócháhará ijnko kjuachéhē imá jie kohya nkehe sincheyóhēni kixin imá náxrjón tíha. **9** Mé xikaha k'uitjará nkexrí tsaáxin asánrá. Tíha mé tí nkehe tjejochonhénrá tinkachónkirá.

10 Mé xikaha tí sín profeta tsíki ósé la kjueyá sín nkexrí chrókuaáxin chojni la ko k'uéchrónkaxín sín tí nkehe kjuasáyé Dios chrókjuanjon ch'án chrók'uayéhérá tí jahará. **11** Nchakuen Cristo kjuínchenohe tí sín k'uéchrónka itén Dios kixin Cristo

tsjasóte la ko chr'éxin ts'áyéhē ch'án tí kjuachaxin jie. A ntá tí sín k'uéchrónka mé tjinkaon chrókónohe sín nkexro tíha la ko nkesá tsōnhen tí nkehe chrónkaxín Nchakuan Ìnchéni. **12** Kjánchó Dios kjuínchenohe tí jehe sín kixin tí nkehe chrónka sín jehya kixin tjoka chróxiteyá tí k'uéjé sín. Náhí. Hasta tí tjejóni jie mé ó xiteyá tíha. Tí nkehe chrónka sín la mé yóhē tí nkehe kuínhínrá, mé tí tan tsaáxinni k'uéchrónkaxín tí sín kjuakohará kixin tí kjuachaxin Nchakuen Dios kujxin nkaya nkajni mé kjuínkítsa tí jehe sín. Kjaxin tí sín ángel tjinkaon sín chrók'uikon sín nkexrí tíha.

Dios k'uíyehē ch'án tí jeheni kixin tjóá chrók'uejóni

13 Méxra chrókjuenkayáxinrá jina nkehe chrókjuich'erá kixin chrók'uejórá jnkójina. Kaín asánrá chrók'uejochonhénrá kixin tí nkehe sintakjtonhanrá Dios tió tsi Ìnchéni Jesucristo. **14** Éxi ijnko xjan titekaon mé xikaha jnkójina chrók'uejórá jahará, chrókjuenkayáxinhyará éxi k'uékjenkayáxinrá senó naxá k'uéchonhyará Dios. **15** Náhí. Jnkójina tjóá chrók'uejórá kixin Dios k'uíyáhará la mé jina ch'án la ko tjóá ch'án. **16** Kixin ntácho xroon itén Dios kixin: "Jahará chrók'uejórá tjóá kixin janhan na mé ijnko nkexro tjóá." †

17 Tí ntáchorá jahará kixin It'ará mé Dios la ko ó nohará kixin jehe ch'án sinchekitōxín ch'án ijné jnkójnko chojni, kixin t'ikon kixin jnkokón sínkí jnkójnko chojni, a ntá jahará chróxráxinkáonrá ch'án jnkochrín tí naxá tjejóchónrá ntihi chjasintajni. **18** Dios mé kjuíntakaará ch'án kixin chrók'uejohyará éxi k'uék'ejó tí sín tsík'axrjenínrá. Jahará ó nohará jina kixin tí nkehe k'uínáxinrá tsaáxinrá jehya ijnko nkehe chrókjuēje éxi chica oro o chica plata. **19** Náhí. Ná mé k'uínáxinrá ijné Jesucristo imá tjeje. Jehe ch'án mé k'óyán sín la k'uáyéhē Dios éxi ijnko kolélo ninkehó xéhya va. **20** Kixin Cristo mé ósé tsíkónoxín ch'án tí naxá k'ónahya chjasintajni. Kjánchó jehya tuénxín kónhen tíha hasta tí chr'éxin ntá kónoxín ch'án kixin jina chrók'uejoxínrá tí jahará.

21 Ntá xikaha kónhen Cristo a ntá jie jahará la kuítekáonrá Dios, mé tí nkexro kjuínchexechón Cristo la ko kjuikosáyehe ch'án. Mé xikaha jahará tinkachónkirá Dios la ko tjejochonhénrá sintakaará ch'án.

22 A ntá jie ó kuítekáonrá tí tan chaxín ntoá kixin tjinkítsará Nchakuen Dios. Tíha mé kótjuáxin asánrá kixin ntá tsotjuéhérá kichuárá. Mé xikaha chrótjuéhérá kichuárá kaín asánrá. **23** Méxra jahará kokjihará nixin, jehya kixin naxá chrók'uaxrjenínrá it'ará chjasintajni

† Levítico 11.44

ntihó ts'itjáyan. Náhi. Kokjíaáxínrá itén Dios itjen jnkochríxín. ²⁴ Kíxín ntáchro xroon itén Dios kíxín:

Kaín chojni chjasintajni tóyóhē kayoa ó, a ntá tí kjuachaxin chóna la tóyóhē itsjo t'óna kayoa. Tí ka la tsqxámá a ntá tí tsjo la ts'anótjen

²⁵ a ntá tí tan kuènte Ìnchéni la tsjak'e jnkochríxín. † Tí tan í mé tsaáxinni la kuinhínrá tí jahará.

2 Méxra tjtóhéra kaín nkehe jínahya, la ko kaín kjuach'ia, la ko tí ntoáhya tjenkayáxínrá, la ko tí kjuachjínóxínhin, la ko tí xrikoará kaín xín kjuach'ia. ² Chrók'uejorá éxi chánjan na ntá tsíkókjíhi la itsjen ó chrók'ui, mé xíkaha jahará chrókjuéyará itén Dios, tíha mé chrókónohará la chrók'uánkíxín kjuaxrexinkaon kuéntará kíxín chrókuaáxínrá, ³ tí chaxín kjuátsqanrá kíxín Ìnchéni la jína.

Cristo mé tí xro tjechón

⁴ Chrókóchjineherá Ìnchéni, mé jehe ch'án me éxi tí xro tjechón. A ntá tí chojni la kuítékakonyha tí xro a, a ntá Dios la kjuéyá ch'án tí xro a imá tje té sínkí. ⁵ Mé xíkaha Dios kjuích'énará tí jahará éxi xro tjechón la Dios chrókjuích'éna ch'án tí jahará jnkokóá nínko kuènte ch'án, la mé ts'ónará nchát'á tsíkjinchetjóá Dios, a ntá chrókjhéhéra ch'án tí nkehe tóxrjínhin ch'án kíxín tinkachónkirá Jesucristo. ⁶ Mé xíkaha kjaxin xroon itén Dios ntáchro kíxín:

Tsjaké chjasin Jerusalén ijnko xro t'etqan ts'óna nchia, ijnko xro tsíkónoxín imá tje té sínkí

a ntá tí sín tsitekaon tí jehe ch'án mé tsosuehya sín. ††

⁷ A ntá jahará títekáonrá tí xro kíxín imá tje té. A ntá tí sín kuítékakonyha, la mé tsoxiteyá éxi ntáchro xroon itén Dios kíxín:

Tí xro náxrjónhya kuítqenta tí sín ch'éna tját'o, mé ijie mé k'óna tí xro tje toan. ‡

⁸ La ko kjaxin tsoxiteyá tí nkehe ntáchro xroon itén Dios kíxín:

Tí xro mé tsóténkixín sín la mé tíha ijnko tjo tsjit-sínkaxín sín. ††

Kjánchó jehe sín kóténkixín sín tí xro kíxín kuítékakonyha sín tí itén Dios mé xráxín tsíkítqenxín sín xíkaha tsqonhen sín.

Tí sín tinkáchónki Dios

⁹ A ntá jahará tsík'axrjeníxínrá tí sín tsíkjeýá Dios la ko tsík'ónará nchát'á ch'eherá xra tí rey, la ko tsík'ónará ijnko nación tjóá, la ko tsík'ónará ijnko chjasin kuènte Dios kíxín ntá tsochronkará tí xra náxrjón kuènte Dios. K'uíyáhará ch'án kíxín ts'axrjéxínrá tí sítié ntá ts'ixénhénrá tí síin xrohi náxrjón t'inkaséyan kuènte ch'án. ¹⁰ A ntá jahará tí ósé la jehya chjasén Dios, a ntá jie la tsík'ónará chjasén ch'án. Tí ósé la Dios k'uékíkonóahyará. A ntá jie la kuíkonóahyará Dios.

Chrók'uejóni ch'ehe ni xra Dios

¹¹ Kíchóni, xrganóahará tí jahará kíxín éxi chojni tsíkjixín ókjé chrók'uejorá ntihi chjasintajni chrókjuán-jonhyará kjuachaxin chrókóxrjínhin asánrá tí nkehe síin chjasintajni, mé tí nkehe tjanjonko asánrá. ¹² Jína chrók'uejorá tí síin tí sín chónhya Dios kíxín kjónté t'ántaxínhanrá sín éxi chojni jínahya chóna jie tí jahará, ichro sín, la ntá tí chrók'uikon sín kíxín jína tje-joch'erá xra ntá tsjanchehe sín Dios kjuasáya tsjixraká tí yaon tsjanchia ch'án nkehe tí xra kjuích'erá.

¹³ Jahará tinkachónkirá Ìnchéni chrókjuínchex-iteyéhéra kaín tí sín t'etqan kuènte chjasintajni, á tí ch'ín rey kíxín imá t'etqan ch'án, ¹⁴ o á tí ch'ín gobernador ichr'án Dios kíxín sinchekjasóte ch'án tí sín tjasin jie, a ntá tsjikosáyehe ch'án tí sín ch'e tí nkehe jína. ¹⁵ Dios tjinkaon kíxín jína chrók'uejorá kíxín tí sín noehya la ko tí sín lqntj la kohya jie ts'ekará sín tí jahará.

¹⁶ Chrók'uejorá éxi chojni t'ítuenhya, a ntá tí kjuachaxin chontará jehya kíxín chróchontaxínrá kjuachaxin kíxín chrókjuích'erá tí jínahya. Náhi. Chrókjuáqoxínrá éxi chojni ch'ehe Dios xra.

¹⁷ Chrókjuíkosáyeherá kaín chojni. Chrójtuehéra tí sín kíchó ni, la ko chróchonteherá Dios kjuasáya, la ko chrókjuíkosáyeherá tí ch'ín gobierno t'etqan.

Tóyóexin éxi tí nkehe kjuasótexin Cristo

¹⁸ Jahará chojni ch'exón xra, chrókjuínchexiteyéhéra tí lámqará, chróchonteherá kjuasáye sín, kjónté tí sín jína la o tí sín jínahya. ¹⁹ Tíha mé ijnko nkehe jína chrókjuáqoxínrá kjónté chrókjuasótiaxínrá ijnko nkehe jínahya kíxín xíkaha mé chrókjuínchexiteyéhéra Dios.

²⁰ A ntá tí tjejoch'erá ichrén nkehe jínahya, ntá nchekjasótiaxínrá sín la ¿nkehe tsqonhen kíxín chrókóninkákonhyará? A ntá tí chrókjuasótiaxínrá ijnko nkehe jína la ntá chrókjuachará chrókóninkákonhyará, la tíha mé tóxrjínhin Dios. ²¹ Méxra xíkaha k'uíyáhará Dios kíxín Cristo kjuasóteyákonhánrá. Tíha mé kjuáqoxín ch'án kíxín mé xíkaha chrókjuích'erá.

²² Kíxín Cristo la ninkehó jie kjuasinhya ch'án la ko ninkexró kjuích'iyehya ch'án, ²³ la ko ninkehó kjuátqehya ch'án tió k'uántaxínhin sín ch'án; a ntá tió kjuínchekjasóte sín ch'án la ninkehó k'ókjanxínhya ch'án. Náhi. Jehe ch'án kjuanchia ch'án kíxín Dios ts'ayakonhen tí jehe ch'án kíxín Dios mé ntoá nchekitqexín ijie chojni. ²⁴ Cristo mé kuamá ch'án tí ijieni kíxín tí cuérpóé ch'án kjuák'enkáni ntacruz kíxín éxi tsík'en-ni k'uék'ejóni kíxín tí jie k'uéchóntani, a ntá jie chrók'uejóni jnkójina. Kíxín Cristo kjuasóte ch'án, chrít'o ch'án kíxín jahará chrókuítqaxínrá jína. ²⁵ A ntá jahará k'uék'ejorá éxi kolélo tsíkjichroe. A ntá jie k'uitjará tí nkexro ts'ayakonhen asánrá.

Nkexrí chrók'uejó tí sín tsíkótehe

3 Kjaxin jahará chojni chjin ó tsíkótahará chrókuítékákonhénrá tí xiyará, kíxín kjaxin jnkójín

† 1.24-25 *Isaías* 40.6-8 †† *Isías* 28.16 ‡ *Salmo* 118.22 †† *Isaías* 8.14

tí sín titekakonhya itén Dios chrókuitekaon sín kixin jí-na tjen tí tjachjin, kjónté t'ichjánxinha chróchrónka tjan kixin jina tjen tjan, ² kixin chrók'uikon sín xikaha kixin jina tjen tí tjachjin chóna kjuasáyé tjan.

³ Chrókjuinchehnkexinhyará nkehe náxrjón chróchon-tará la ko tí nkehe náxrjón chróchóna kaxihará la ko nkehe náxrjón tsík'óna chica oro la ko tí ikará imá náxrjón. ⁴ Náhí. Chrókjuinchejinará asánrá, kixin tí nkehe náxrjón chrók'uitjáyanhya na mé tí asén chojni tójehya la ko náxrjón. Tíha mé imá sínkí nkayakon Dios. ⁵ A ntá tí ósé xikaha k'uékjenkayáxin tí chojni chjin jina. Jehe sín mé kuinkáchónki sín Dios la ko kjuínchexiteyéhe sín xii sín. ⁶ Mé xikaha kjuích'e tjan Sara kjuínchexiteyéhe tjan tí ch'ín Abraham, mé kjaxin ntácho tjan kixin inché tjan tí jehe ch'án. A ntá tí jahará tí xjeen tí jehe tjan la chrókjuinchehiteyará jina la ko ninkehó kjuachakon chróchontahará.

⁷ Kjaxin jahará chojni ntoará tsíkótahará chróchonte-hérá ichjiánrá kjuasáya kixin ó nohará kixin kánhyó tsehe tjan la ko ó nohará kixin yóirá tjáhará Dios tí kjuachón. Xikaha chrókjuich'erá ntá tió chrónixjehérá Dios la kohya nkehe chrók'uinkákonhen.

Tí sín tjasótexín sín kixin jina kjuích'e sín

⁸ Méxra, jnkokqá chrókjuenkayáxinrá kaín rá chrókjuikonóghérá kichuárá, chrótjuèhérá kichuárá. Jnkójina chrónixjehérá kichuárá la chrókjuinchehnke-hyará asánrá. ⁹ Tí ichrén nkehe jínahya chrókjuít'ahará sín la jahará la xikahya chrókjuich'ehérá sín. Tí chrók'uantaxínhanrá sín la jahará chrók'uantaxien-hyará sín. Náhí. Íchá jina chrókjuancheherá Dios kixin chrókjuincheyaon ch'án sín kixin Dios la k'uíyahará ch'án kixin chrók'uayéhérá kjuachaxin kuènte ch'án.

¹⁰ Kixin:

Tí nkexro tjinkaon tsotjuèhe asén kixin jina chrókjuak'e kaín yaon

la chrónixjahya ch'án ninkehó nkehe jínahya la ko ninkehó kjuach'ia chrók'uaxrjexínhya ir'va ch'án.

¹¹ Tí nkexro la chrókuítqhe tí nkehe jínahya la íchá jina chrókjuich'e tí nkehe jina,

la ko íchá jina chrókjueyá ch'án kjuaxróxin chrókjuak'e ch'án.

¹² Kixin Ìnchéni t'ayakonhen tí nkexro jina la ko tinhin ch'án tí nixjehé sín ch'án,

a ntá tí sín ch'e tí jínahya la tjinkitsahya ch'án. †

¹³ ¿Xá nkexro chrókjuít'ahará nkehe jínahya tí jahará tjejoch'erá nkehe jina? ¹⁴ Kjónté chrókjuasótexínrá tí nkehe jina tjejoch'erá kjónté la chrókócháhará chróchrakuenhyará ninkexró la ko chróchrakonhyará.

¹⁵ Náhí. Íchá jina chrókjuíkosáyehérá Cristo nkaya asánrá kixin Ìnchárá. Chrók'uejorá listo chrókjuáteherá tí nkehe chrókjuanchankíhará kaín chojni kixin nkexrí tinkachónkirá Ìnchéni, la chrókjuinchehnkehyará la kjuasáya chrókjuáteherá. ¹⁶ Chróchontará ijnko kjuaxrexinkaon jina kixin ntá tí sín xrich'ia sín t'án-taxínhanrá sín kjónté jina tjejorá tinkachónkirá Cristo

† 3.10-12 Salmo 34.12-16

la mé chrókósuèhe sín kixin tí nkehe ntácho sín la ntoáhya. ¹⁷ Íchá jina chrókjuasótiaxinrá kixin tí jina tjejoch'erá tí xikaha tjinkaon Dios, a ntá chrókósuèhará chrókjuasótiaxinrá tí ichrén jje chrókjuich'erá.

¹⁸ Kixin Cristo kjuasóte ch'án la ko k'uénxin ch'án tí jje kuèteni, ónaá k'uén ch'án kixin para jnkochrín. Jehe ch'án la jina ch'án la kjuasóteyákonhenni ch'án kjónté jínahyani, kixin ntá jina sáchrókjuikoni ch'án tí tjen Dios. A ntá ik'uén ch'án éxi chojni, a ntá Nchakuen ch'án la k'uénhya mé xechón inaá, ¹⁹ kixin tí Nchakuen ch'án sákjuílkjakohe tí nchakuen tí sín tsík'en tjejóchjina. ²⁰ Tí sín a mé kuitekakonhya sín tí ósé tió kjuák'e ch'ín Noé na mé Dios la kóninkakonhya ch'án kjuák'echónhen ch'án nachrohe sít'óna tí arca, na mé ijníkqá chojni kuitekaon sín mé kuaa sín tí kuíte sín ntá. ²¹ Tí ntá a mé tóyóhe tí tikitexín chojni ijje kixin tí xikaha tsonhenni la tsaáxinni ijje. A ntá tí tikite chojni la jehya kixin tsotjuáxin tí cuerpo. Náhí. Tsjancheheni Dios kixin sinchetjóá ch'án tí tjenkayáxinni. A ntá tí nkehe tsaáxinni la mé tí xechón Ìnchéni Jesucristo, ²² mé tí nkexro sátsíkji nkaya nkajní itjen ch'án itja chjina Dios. A ntá jehe ch'án la mé t'etuenhen tí sín ángel la ko tí sín t'etqan.

Chrókjuich'ehe ni Dios xra éxi tí kjuachaxin kjuanjon ch'án

⁴ Méxra éxi Cristo kjuasóte tí cuérgqé ch'án ntá kjaxinrá kjónté xikaha chrókjuasóterá chrókóx-akuanhyará kixin tí nkexro kjuasóte tí cuérgqé la ó kuítqhe tí jje. ² A ntá tí naxa chrók'uejochónrá intsí la chrók'uejorá éxi tóxrjínjin Dios. Jehya éxi k'uékóxrjínhanrá. ³ A ntá tí ósé nchónhya nkehe k'uékjich'erá éxi ch'e tí sín naxa chónhya Dios. K'uék'ejorá k'uékjenkayáxinrá tí nkehe jínahya la ko k'uékjásinrá jje k'uéchontará ókjé chojni chjin la ko k'uékókoanrá la k'uékjásinrá kia ntá ntiha kjuánjónxin chojni la ko k'uékinkachónkirá tí nkehe tsíkjanqya. ⁴ A ntá ijje la jahará t'itohyará tí sín a kixin tí jínahya ch'e sín. Méxra xikaha t'ántaxínhanrá sín. ⁵ A ntá tí jehe sín tsjanjon sín kuentá tsochénska sín tí nkexro tjechónhen sinchekitqexín ijje tí sín tjejóchón la ko tí sín tsík'en. ⁶ Méxra kjónté tí sín tsík'en tsíxrákohe sín tí itén Dios kixin tí nchakuen sín chrók'uejó éxi tjinkaon Dios kjónté naxa k'uéjó sín ntihi chjasintajni la kuítqexín tí ijje sín éxi tsi-tqexín ijje kaín chojni.

⁷ Ó kuichjina tsjeje chjasintajni a ntá xikaha chrók'uejorá jnkójina la ko chrók'uejotsjehérá chrónixjehérá Dios. ⁸ Tí nkehe imá tjetoan kixin antsí chrótjuèhérá kichuárá. A ntá tí tjuèhérá kichuárá la mé tíha chrók'uitjáyanxín tí nchónhya jje chonteherá kichuárá. ⁹ Chrókjuánjonrá kjuachaxin chrókuitqhe jnkójin kichuárá ntqará chrókóninkákuénhyará nijnko tí jehe sín. ¹⁰ Jnkójnkorá nkehe tí xra tjáhará Dios k'uayéhérá chrókjuínkjisar kichuárá. Xikaha jina chrókjuákoxinrá tí kjuasáyé ch'án tjáhará ch'án kixin nchónhya xra k'uayéhérá. ¹¹ Tí jnkójinrá tjinkáonrá chrónixjará ichrén nkehe la chrónixjará éxi nixja itén Dios. Tí jnkójinrá tjinkáonrá chrókjuínkjisar la chrókjuákoxinrá tí

kjuachaxin tjáhará Dios. Kaín tí xr̄á chrókjuich'erá chrókjuancheherá Dios kjuasáya kixin kjuasáyé Jesucristo tinkachónkirá tí jehe ch'án. Kixin jehe ch'án la kaín tí kjuachaxin síin la kuènte ch'án jnkochrín. Mé xikaha chaxín. Amén.

Íchá jína chrókjuasótéxinni kixin tí tinkáchónkini Cristo

¹² Kíchóni, chrókóxakuanhyará kjónté ichrén nkehe jínahya chrókónhanrá. Ó jehí t'ichjánxin xikaha tsonhanrá. Chróntáchrohyará kixin ókjé nkehe tjasótiaxín-rá. ¹³ Náhí. Íchá jína chrókócháhará kixin xikaha chrókjuasóterá éxí kjuasótéxín Cristo, kixin kjaxinrá tsocháhará imá tió ts'ikonrá tí kjuachaxin tsikao Ìnchéni tí itsi ch'án. ¹⁴ Chrokócháhará tí t'ántaxínhanrá sín kixin tinkachónkirá Cristo kixin tí Nchakuen Dios chóna kjuachaxin t'ayakonhanrá. Jehe sín t'ántaxínhin sín ch'an, a ntá jahará tjíkosáyehérá ch'án. ¹⁵ A ntá tí jnkójínrá tjejtjasóterá chrókójehya kixin ichrén nkehe chrókjuich'erá chrókjuàyará o chrókueerá o ichrén nkehe jínahya chrókjuich'erá o chrókjiatérá kjuanínkaon kuènte ókjé chojni. ¹⁶ Náhí. A ntá jnkójínrá chrókjuasótiaxínrá kixin tinkachónkirá Cristo la chrókósuàhyará. Náhí. Chrókjuancheherá Dios kjuasáya kixin xikaha kónhanrá.

¹⁷ Ntá jie ó kui tí tsitōexín ijíe chojni mé xrankíxixín tí sín tsík'óna xjeen Dios. A ntá tí xikaha tsitōexín ijíe tí jeheni xrankíxixín, a ntá íchá tí ó tsjixixín tí sín titekakonhya tí itén Dios. ¹⁸ Íchá tí sín jína la ko xikaha tsonhen sín ntá tsaá sín a ntá íchá tí sín jínahya chóna jie kjá antsí tsjasóte sín. ¹⁹ A ntá tí nkexro tjasóte éxí tjinkaon Dios la kjónté xikaha la naxá chrókjuich'e sín nkehe jína la ko chrókjuanjon sín asén sín chrók'uayakonhen Dios mé tí nkexro kjuíchéna sín la mé jehe ch'án xráxin jína ch'án.

Tí k'uítuenhen tí sín t'etōan kuènte ninko

5 Tjínkavan tétuanhan tí chojni t'etōan kuènte tí ninko tjejorá ntiha kixin kjaxin janhan tétōan kuènte ninko éxí tí jehe sín, a ntá janhan mé k'uíkuan kixin nkexrí kjuasóte Cristo, la ko kjaxin janhan mé tsochonta kjuachaxin kuènte Dios éxí tsochóna tí jehe sín tió itsi Ìnchéni chr'éxin. ² Jahará chrók'uayakonhénrá tí kolélo kuènte Dios ntiha kixin xikaha tí xr̄á k'uayéhérá. Jnkójína chrókjuínkítsará sín éxí tjinkaon Dios la jehya

† *Proverbios 11.31*

kixin ijnko chojni chrók'uetuanhanrá chrókjuich'erá xr̄á, la ko kjaxin jehya kixin imá chrókóxrjínhanrá chichaon. Náhí. Kaín asánrá chrókjuich'erá xr̄á jína. ³ Jehya jahará kuèntará tí jehe sín kixin chjini chrókuétuēnhénrá sín. Náhí. Jnkójína chrókjuákoéxínrá tí jehe sín. ⁴ A ntá tió tsi tí Pastor chaxín t'etōan ntá jahará ts'ayéhérá ijnko corona náxrjón tsjehehya.

⁵ Kjaxin jahará ntasoará chrókjuínchexiteyéhérá tí sín t'etōan kuènte ninko. Kaínrá chrókjuínchexiteyéhérá kichuárá chrókjuínchehnkehyará kixin:

Dios la tsonínkakohen tí sín nchehnke, a ntá tí sín nchehnkehya mé tsjinkítsa ch'án. ††

⁶ Méxr̄á chrókjuínchehnkehyará, chrókjuínchexiteyéhérá Dios kixin jehe ch'án imá ts'etōan ch'án kixin tsjixraká tí yaon mé jehe ch'án tsojtáhará ch'án kjuachaxin kixin tsétōanrá. ⁷ Chróhjeherá Dios kaín tí kjuaxrexinkaon chontará kixin kjaxin jehe ch'án tóxakonhen ch'án tí jahará.

⁸ Chrókóxakonhanrá jína chrók'uejorá. A ntá ijie ixri tí nkexro nínkakonhanrá mé tí ch'ín Tsochren éxí ijnko koxr̄á tsjánka va xritjeyá va nkehe sine va. ⁹ Tjánjonhyará kjuachaxin kixin jehe ch'án chrókjuacha ch'án chrókjuachroerá ch'án, kixin ó nohará kixin kaín tí sín kichuárá nkuixín chjasintajni xikaha tjejtjasóte sín kixin tinkáchónki sín Ìnchéni. ¹⁰ Kjánchó kánhyó sé tsjasótiará, a ntá Dios antsí tsjinkítsará ch'án kixin tsjachará ts'ejorá jína. A ntá jehe Dios a mé tjuahará ch'án la k'uíyáhará ch'án kixin ts'ejokoará ch'án jnkokoá tí tjen Jesucristo chóna kjuachaxin jnkochrín. ¹¹ Jehe ch'án tsjancheheni ch'án kjuasáya kixin chóna ch'án kjuachaxin ts'etōan ch'án jnkochrín. Amén.

Kjuixixín nixja ch'ín Pedro

¹² Ch'ín Silvano mé t'íkuan ijnko kichó ni jína mé kjuínkítsa ikjinni tí xroon kjónté kánhyó tsjé nixja, la ntáxraxinkáonrá kixin kjuíntayaonrá Dios ntá xikaha kjuakoxin ch'án kixin chaxín tjuahará ch'án. Méxr̄á xikaha jína chrók'uejorá kixin tjuahará ch'án.

¹³ Tí ninko tjen Babilonia mé tsíkjejá Dios éxí tsíkjejá ch'án tí jahará nixjahará sín la ko kjaxin nixjahará ch'ín Marcos, mé éxí xjanna t'íkuan tí jehe ch'án.

¹⁴ Nixjehérá kichuárá jnkójína. Kjuaxróxin chrók'uejorá tinkachónkirá Jesucristo. Amén.

†† *Proverbios 3.34*

2 PEDRO

Ch'ín Pedro chr'énhen ch'án tí xroon tí sín tinkáchónki Cristo

1 Janhan Simón Pedro, na mé t'ahā xrā Jesucristo. Ikjian tí xroon ts'ayéhérá jahará ó tinkachónkirá Ìnchéni éxí tinkáchónkini jeheni kixin Dios la ko Jesucristo tí nkexro sincheakaáni na mé jína ch'án. ² Sintayaonrá Dios la ko antsí ts'ayéhérá kjuaxróxin kixin ó nohará nkexrí tjen Dios la ko Ìnchéni Jesús.

Jína chrók'uejó tí sín tinkáchónki Jesús

³ Dios kjuanjon kjuachaxin tsochóntani kaín nkehe t'ichjánxinhinni kixin chrók'uejóni jína chrórxaxinkaonni tí jehe ch'án. Kixin ó noheni nkexrí tjen tí nkexro k'uíyeheni kixin tí kjuachaxin jié chóna ch'án la ko tí xrā imá jié kjuich'e ch'án. ⁴ Mé xikaha kjuanjon ch'án kaín xín tí nkehe a, táha la mé imá jié la ko imá tjete sínkí. Mé xikaha kjuaxróxin ch'án kixin chrók'uejéhérá kjuachaxin chrók'uejorá éxí tjinkaon ch'án la ko chrókujtóhérá tí nkehe jínahya kixin chrók'uitjáyanxínhyará tí nkehe k'uékjenkayáxinrá síin chjasintajni. ⁵ A ntá jahará tinkachónkirá Ìnchéni la kjaxin chrók'uejorá kixin chrók'uejorá jnkojína; a ntá tí jína tjejorá ntá chrókjuachará antsí chrókónohará; ⁶ a ntá tí kónohará ntá chrókjuachará chrókjuenkayáxinrá jína; a ntá tí tjenkayáxinrá jína ntá chrókjuachará chrókóninkákonhyará tjoka; a ntá tí tóninkákonhyará ntá chrókjuachará chaxín xráxinkáonrá Dios; ⁷ a ntá tí chaxín xráxinkáonrá Dios ntá chrókjuachará chrótjuèhérá kichuárá; a ntá tí tjuèhérá kichuárá ntá chrókjuachará chrótjuèhérá kaín chojni.

⁸ A ntá xikaha tjejoch'erá tinkák'ánkí tí kjuaxrexinkaon kuèntará, ntá jehya kixin chónkó kuinkachónkirá Ìnchéni Jesucristo. ⁹ A ntá tí nkexro ch'ehya xikaha la mé éxí jnko chojni t'ikonhya o jnko chojni t'ikonhya jína, kixin ó k'uitjáyenhen kixin Ìnchéni ó kjuixin kjuínchetjóá tí jje k'uéchóna ósé. ¹⁰ Méxrā xikaha kichó ni jnkojína chrók'uejorá kixin ntá tsonohará jína kixin Dios tsík'uejorá tí jahará la ko tsík'iyahará ch'án kixin xikaha jína chrókjuenkayáxinrá, a ntá xitjahya chrókjuichroerá. ¹¹ A ntá xikaha chrókuítekaonrá ntá tsojtáhará Dios kjuachaxin ts'ixenhenrá tí tjen Ìnchéni Jesucristo t'etqan ch'án jnkochríxín. Jehe ch'án mé tí nkexro kjuíncheakaáni.

¹² Méxrā tjtóghya ntáxráxinkáonrá kaín tí nkehe i, kjónté ó nohará tí nkehe ntoá kjuákoahará. ¹³ Ntáxřan kixin jína tí naxā tjen chrókjuíntaxráxinkáonrá kaín tí nkehe a ¹⁴ kixin Ìnchéni Jesucristo kjuínchenóna kixin í

séhya its'én janhan. ¹⁵ Na mé kaín tíha tjét'a kixin tió its'én, ntá jahará tsoxráxinkáonrá jnkochríxín kaín tí nkehe kjuít'a.

Tí sín k'uíkon tí kjuachaxin kuènte Cristo

¹⁶ Tí nkehe kjuakqoharáni kuènte tí kjuachaxin kuènte Ìnchéni Jesucristo la ko nkexrí itsi ch'án na mé jehya jnko cuento kjuích'éna chojni chrókjuich'iyaxín. Náhí. Ikonni k'uíkonxínconi Ìnchéni la ko tí kjuachaxin kuènte ch'án. ¹⁷ K'uíkonni tíha tió It'eni Dios kjuikosáyehe ch'án tí Xjeen ch'án, la ntá kuínhinni nixja Dios tjen nkaya nkajni ntáchro ch'án kixin: "Tíhi mé xjanna tjuahā ch'án. Imá chàna kixin nchexiteyá ch'án éxí tjínkavan janhan," ichro Dios. ¹⁸ Mé kuínhinni itén Dios kujixín nkaya nkajni kixin xikaha ntáchro tió k'uejókoni Ìnchéni chrítaón tí jnā tjóá.

¹⁹ Mé xikaha k'uechrónka tí sín tsíkjin itén Dios ósé ntá noxínni kixin chaxín tsoxiteyá. A ntá jahará chrók'uejorá chrókuinhínrá jína nkehe k'uéntáchro sín kixin tí tan mé éxí jnko xrohi t'inkaséyanxín tí sítie tsjixrakájia tí yaon ts'inkaséyan itsi tí konotsé t'inkaséyanxín tí nchítjen mé xikaha ts'inkaséyanxín nkaya asánrá. ²⁰ A ntá tjetooan chrókónohará tíhi: kixin ninkehó xroon itén Dios tsík'óna jehó chojni chrókjuacha chrókiénxín. ²¹ Náhí. Tí sín k'uechrónka itén Dios la nixjahya sín tí nkehe jehó sín chrókjuenkayáxin sín. Náhí. Tsíkjinchetjóá Dios tí jehe sín, a ntá Nchakuen Dios kjuínkítsa k'uenixja sín itén Dios.

Tí sín tjako kjuach'ia

(Judas 4–13)

2 Kjaxin k'uek'ixin tí sín ntoáhya k'uechrónka itén Dios tí chjasin Israel, mé kjaxin xikaha tí jie ts'ixin maestro sit'ayahará. Jehe sín tsochr'ákjenhen sín iso nkehe ntoáhya ts'itjáyanxín tí nkehe chaxín tsaáxinni la xikaha sinchemá sín tí Ìnchéni chrókuaáxinni. Tíha mé tsjixin tsjasótexín tí jehe sín. ² Nchónhya chojni tsochréhe sín tí nkehe jínahya ch'e sín. A ntá tí xikaha ch'e sín la ts'ántaxíénxín chojni tí ntja ntoá kuènte Ìnchéni. ³ Tsoxřjínhín sín tsochóna sín nchónhya chichaon, ntá tsjanchiaxínrá sín chichaon tí nkehe ntoáhya tsjakqohará sín. A ntá tí nkehe ts'itjáyanxín sín tjechónhen la kohya nkerí tsaáxin tí jehe sín kixin ósé tjechónhen xikaha tsonhen sín.

⁴ Dios la kjónté tí sín ángel kjuasin jje la kujkonóehya ch'án sín la k'uetqan ch'án kixin sátsji sín tsjasóte sín sátsjik'ikjehé sín tí sítie na tjejóchjina sín tsjixrakájia tí

tsitoxén ijjé sín. ⁵ La ko kjaxin kuikonóghya Dios tí sín k'uéjé chjasintajni ósé ntá ichr'án ch'án ntá kuíteé tí sín jínahya, a ntá Dios kjuíncheakaá jehó tí ch'ín Noé, na mé tí nkexro kjuako tí tan jína la ko kjuíncheakaá ch'án tí yato sín ó. ¹⁶ Kjaxin Dios kjuínchek'itjáyan tí chjasin Sodoma la ko tí chjasin Gomorra iche hasta k'óna nte-so, kixin chrókónohe chojni jínahya ts'ejó chr'éxin kixin xikaha tsonhen sín. ¹⁷ Kjánchó Dios kjuíncheakaá ch'án tí ch'ín Lot kixin ijnko chojni jína tí jehe ch'án la ko imá kóxakonhen ch'án tí k'uíkon ch'án tí jié kjuasin tí sín jínahya. ⁸ Tí ch'ín Lot mé jína asén ch'án mé k'uékjak'e ch'án tí síin tí sín jínahya ntá kaín yaon kóxakonhen asén ch'án k'uíkon ch'án la ko kuínhin ch'án tí nkehe jínahya k'uékjich'e sín. ⁹ A ntá Ìnchéni na sincheakaá ch'án tí sín kaín asén kuítekaon tí jehe ch'án kjónté nchónhya kónhen sín. A ntá tí sín jínahya la sinchekjásóte ch'án tí yaon tsitoxén ijjé chojni.

¹⁰ Dios antsí sinchekjásóte ch'án tí sín nchexiteyéhe tí nkehe jínahya ntácho asén sín a ntá nchexiteyéhe sín tí nkehe t'etōan Ìnchéni. Titekakonhya sín la ko chrakonhya sín chrók'uántaxínhin sín tí sín ángel chóna kjuachaxin. ¹¹ A ntá tí sín ángel imá tsehe sín la ko imá chóna sín kjuachaxin la kjónté tjinkakonhya ts'ántaxínhin sín a nkayakon Ìnchéni.

¹² A ntá tí chojni a la éxi yóhe iko tjenkayáxinhya ninkehó la nchexiteyéhe tí nkehe ntácho asén, la kokjíhi kixin ts'óyán kichó ó. T'ántaxínhin sín tí nkehe tienxínhya sín, mé xikaha its'en sín éxi its'en tí ko a. ¹³ Tíha mé tsjasótexin sín kixin jehe sín kjuínchekjasóte í so chojni. Xrácín tóxrjínhin sín ich'e sín tí nkehe ntácho asén sín. Ijnko kjuatósuèhe kixin tjejóntaxin sín ntekoará sín tí kia chontará la kjónté tí xikaha la naxa tjasin sín jié.

¹⁴ Kohya nijnko chojni chjin chrokuasinkohya sín jié. Tóxrjéhya sín tjasin sín jié tsjasótexin sín. ¹⁵ Kuítóhe sín tí ntja ntoá ntá chréhe sín ntja kuènte ch'ín Balaam xjeen ch'ín Beor, kixin kóxrjínhin ch'án chrókjuacha ch'án nchónhya chichaon tí nkehe jínahya chrókjuich'e ch'án. ¹⁶ A ntá t'ichjánxin tsjasóte ch'án kixin tí jié kjuasin ch'án. A ntá ijnko kolócho chjin xitjahya nixja la xrínahya nixja itén chojni la kjuentuéhe tí ch'ín Balaam kixin tí jié chóna ch'án ntá kuítóhe ch'án tí nkehe jínahya chrókjuich'e ch'án. ¹⁷

¹⁷ Tí chojni tjako mé éxi yóhe tòye tjiáhya ntá la ko éxi tjuj tjakáko xríntō ó; ó kjuixin k'uítuenhen sín sátsji sín tí imá sítié tsjasóte sín jnkochríxín. ¹⁸ Kaín nkehe jínahya nixja sín, a ntá tí jié tjasin sín tóxrjínhin sín chojni chjin ókjé ntá tjachroexin sín tí sín na ntá tjinkaon chrókuítóhe sín tí jié. ¹⁹ Chrónka sín kixin kaín nkehe jínahya la jína, kixin jehe sín nchexiteyéhe sín tí nkehe jínahya ntoáhya; kixin jnkojnko chojni mé nchexiteyéhe tí nkehe kjuacha k'uētuenhen sín. ²⁰ A ntá tí nkexro ó chónin Ìnchéni Jesucristo tsaáxinni mé kuítóhe sín tí nkehe chrók'uitjáyanxín sín kuènte chjasintajni. A ntá chr'éxin tí chrókuakja sín ntja jínahya inaá tí chrókjuacha tí jínahya chrókjuachroe sín, a ntá antsí

má jínahya chrókónhen tí jehe sín. ²¹ Íchá jína chrókónoehya sín tí ntja jína. A ntá jehya jína tí ó nohe sín ntá tsitōhe sín tí nkehe k'uētōan Dios kuínhin sín. ²² A ntá tí jehe sín kjuínchexiteyá sín éxi ntácho tí proverbio kixin: "Tí koniā t'ókjan ntá xikjan xikjine inaá, ²³ la ko tí cochino na ntá tsík'ónti tjóá ntá xikjan kjánkí tí nchet'ō kjita."

Tió tsi Ìnchéni

3 Kíchóni tjuahará tíhi la xroon yóxin ikjian ts'ayéhérá. Yóí tí xroon a ntáxráinkáonrá kixin jína chrókjuenkayáxinrá. ² Chróxráinkáonrá tí nkehe tsíchrónka tí sín k'uéchrónka itén Dios ósé la ko tí nkehe k'uētōan Ìnchéni, mé tí nkexro tsaáxinni, kjuakohará tí sín kjueyá ch'án.

³ Tjetoan chrókónohará tíhi kixin tí yaon tsjixixín la it-si chojni tsjanoá tí tan jína kuènte Ìnchéni, la sinchexiteyéhe sín kaín nkehe jínahya ntácho asén sín. ⁴ Ts-janchankí sín nkehe kónhen tí nkehe tsíntácho Cristo kixin tsokjan ch'án, kixin desde ik'uén tí sín tsík'ax-jenixinni k'uéjé ósé la xikahó naxa sítónhen éxi tió k'óna chjasintajni. ⁵ Tí sín a titekakonhya sín kixin ósé k'uénixja Dios ntá k'óna nkajni la ko chjasintajni na mé kjuin tí ntá ntá kuítóhe nonte xámá. ⁶ A ntá tí ntá k'uitjáyanxín chjasintajni inaá. ⁷ A ntá tí nkajni la ko tí chjasintajni naxa tjejó jie tjejóchónhen tsoche kixin xikaha k'uētōan Dios kixin xrohi tsochexin tí yaon tsjixixín tsitoxén ijjé chojni la ko kaín tí sín jínahya tsjasóte sín.

⁸ A ntá kichó ni, chrók'uitjáyanhyará kixin Ìnchéni tí ijnko yaon t'ikon ch'án éxi mil nánó la ko mil nánó t'ikon ch'án éxi ijnko yaon ó. ⁹ Ntá Ìnchéni í séhya sinchexiteyá ch'án tí nkehe tsíntácho ch'án la jehya éxi tjenkayáxin í so chojni kixin ó má sé tjejóchónhen sín. Náhí. Jehí tjechónhen ch'án kixin ninkexró chrók'uitjáyanhya kixin tjinkaon ch'án kixin kaín chojni chrókjan sín chrókuinkáchónki sín Dios.

¹⁰ A ntá tí yaon tsokjan Ìnchéni mé tsí éxi xíchee itsi tí tie. A ntá tí nkajni ts'itjáyan, la mé nchónhya kjuachrakon ts'ixikónhen ts'ixikóvékjan. A ntá kaín nkehe sínkáni nkajni na mé ts'itjáyan tsoche, la ko tí chjasintajni tsoche la ko kaín nkehe síin.

¹¹ A ntá tí xikaha kaín nkehe ts'itjáyan, a ntá jahará la jína chrók'uejorá chróxráinkáonrá Dios. ¹² Chrók'uejochonhénrá tí yaon itsi Dios chrókóxakonhanrá chrókjuich'erá xra kixin ntá tjoka chrókui Ìnchéni. A ntá tí yaon tsjixixín mé ts'itjáyan nkajni tsoche, la ko kaín nkehe tsóxika ts'itjáyan kixin imá tsósó. ¹³ A ntá jeheni tjejóchónhenni nkajni nixin la ko chjasintajni nixin éxi tsíntácho Dios kixin tsjanjon ch'án. A ntá ntiha la mé imá náxrjón la ko kjuaxróxin ts'ixin tí chojni jína.

¹⁴ Méxra xikaha kichó ni, nachrohe tjejochonhénrá kixin itsi tí yaon tsonhen xikaha la kaín asánrá chrókjuéyará jnkojína chrók'uejorá kixin ts'ikon Dios kixin kjuaxróxin tjejorá chontahará jié. ¹⁵ Chrókónohará kixin naxa tjechónhen Ìnchéni, tjokahya itsi ch'án

† Génesis 6.1-7.24; 8.18†† Génesis 19.24‡ 2.7-8 Génesis 19.1-16, 29†† Números 22.35-46

‡‡ Proverbios 26.11 ‡‡‡ Salmo 90.4

kíxin í so chojni naxa chrókuitekaon sín ch'án. Kjaxin xikaha tsíkjin tí kichó ni Pablo tí xroon chr'ánhanrá ch'án éxí tí kjuachaxién Dios tsík'áyéhe ch'án chrónka xikaha. ¹⁶Jnkojnko tí xroon tsíkjin ch'án nixja xikaha la imá xra chrókienxín chojni. A ntá tí sín noehya la ko tí sín kánhyó tinkáchónki Inchéni ntá tienxínhya sín la ntá ntoáhya tjako sín nkexrí t'axrjexín tí nixja tí xroon tsíkjin ch'án la ko kjaxin ntoáhya tjako sín í so nkehe nixja xroon itén Dios. Ntá xikaha jehó sín tjejá sín nkehe ts'itjáyanxín sín.

¹⁷Méxra kichó ni, ó nohará tí nkehe senó, ntá chrókóxakonhanrá kíxin chrókjuachruèhyará tí kjuach'ia xriko tí sín jínahya ntá chrókujtohéra tí nkehe jína ntoá tinkáchónkirá. ¹⁸Ichá jína antsí má chróchoxínrá Inchéni Jesucristo, mé tí nkexro sinchekaáni la ko antsí chrók'uánkí tí kjuachaxién ch'án chróchon-tará. Méxra tsjikosáyeheni ch'án ijie la ko jnkochrín. Amén. Ó tjen.

1 JUAN

Tí tan tjanjon kjuachón

1 Ikjinni tí xroon i ts'ayéhérá kixin tsonohará kuènte tí nkexro xráxín kjuák'e tí naxa t'ónahya chjasintajni, mé tí nkexro kuínhinni nixja la ko tí nkexro k'uíkonxín konni. Kixin tí nkexro mé k'uíkonni la ko tí nkexro kuákóxìn tjani, mé tí nkexro nixja tí tan tsjanjon kjuachón. ² Kjuakoxìn ch'án nkexrí kjuák'e ch'án, a ntá kaín tí jeheni k'uíkonni ch'án, mé xíkaha chrónkaxínni nkexrí kjuák'e ch'án; a ntá tjakuexinni tí jahará nkexrí tjen tí kjuachón jnkochrín, la mé jehe ch'án k'uékjak'eko ch'án It'é ch'án Dios, a ntá ikui ch'án ntihi chjasintajni. ³ Chrónkaxínni tí nkehe k'uíkonni la ko tí nkehe kuínhinni, kixin kjaxinrá jnkokqá chrókuinkachónkirá éxí tinkáchónkini tí jeheni, éxí tí jeheni jnkokqá tinkáchónkini It'éni Dios la ko tí Xjeen ch'án Jesucristo. ⁴ Mé xíkaha ikjinni tí nkehe i, kixin chrókuuintaxín chrókócháhará la ko chrókóchéhëni.

Dios mé tí xrohi

⁵ Tí tan i mé Ìnchéni Jesucristo kjuakohë tí jeheni, a ntá jie tjakoharáni tí jahará, kixin Dios mé tí xrohi, a ntá kohya ninkehó sítié tí tjen tí jehe ch'án. ⁶ A ntá tí tsontáchroni kixin tinkáchónkini tí jehe ch'án, a ntá naxa ixrini tí ntja sítié, na mé xíkaha ch'iani kixin ch'e-hyani tí nkehe ntáchroni. ⁷ A ntá tí xritjéjóni tí t'inkaséyan kixin tí Dios mé jehe ch'án tí t'inkaséyan, na mé xíkaha jnkokqá tinkáchónkini ch'án, a ntá tí ijnjé Xjeen ch'án Jesucristo mé ts'ijmáxín kaín jie chóntani.

⁸ Tí chróntáchroni kixin ninkehó jie chóntahyani, mé xíkaha la jehóni ch'iyeheni asénni, a ntá tí nkehe chaxín la chóntahyani. ⁹ A ntá tí tsontáchroni kixin chóntani jie, a ntá tsonoheni chaxín kixin itjen ijnko Dios la jína ch'án la ts'itjáyenhen ch'án kaín jie chóntani la ko sinchetjóáni ch'án kixin kaín tí nkehe jínahya kjuích'eni. ¹⁰ A ntá tí tsontáchroni kixin kjuasinhyani ninkehó jie, la éxí chróntáchroni kixin Dios la ch'ia ch'án, a ntá tí xíkaha tsixroni la chaxínhya tsík'áyéhëni tí tan kuènte ch'án.

Cristo mé tsonixjayákonhëni ch'án

2 Kíchóni, éxí xjanna t'íkuən tí jahará, a ntá tjékjian tí xroon ts'ayéhérá tsochrónka kixin chrókjuásinhyará jie. A ntá tí jnkojínrá chrókjuásinrá jie la chóntani ijnko nkexro tsonixjayákonhëni nkayakon It'éni Dios, tíha mé Jesucristo, la jehe ch'án mé ijnko nkexro jína. ² Jesucristo mé k'uenyákonhëni ch'án kixin tí jie chón-

tani; a ntá jehya ijéni ó. Náhí. Ijie kaín chojni síin chjasintajni.

³ Tí tsitekaonni tí nkehe k'uetqan Dios ntá tsonoxín-chaxín kixin chóxinni ch'án. ⁴ A ntá jnkojín nkexro ntáchro kixin chóxín Dios, a ntá titekakonhya tí nkehe tsík'etqan Dios, la mé ch'ia la noehya tí nkehe chaxín. ⁵ A ntá tí nkexro titekaon tí nkehe tsík'etqan Dios la chaxín tjuèhe Dios; mé xíkaha noheni kixin chaxín jnkokqá tjejókoni ch'án. ⁶ Tí nkexro ntáchro kixin chaxín tinkáchónki Dios chrókjuak'e éxí kjuák'e Jesucristo.

Tí mandamiento nixin

⁷ Kíchóni, méxra tí nkehe tjékjian jehya ijnko nkehe nixin tsík'etqan Dios. Náhí. Tíha mé tí nkehe k'uayéhérá tí xrankíxixín, mé tí mandamiento ósé tjen, mé tí nkehe ó tsíkinhínrá. ⁸ Kjánchó tí nkehe ikjian mé yóhë ijnko nkehe nixin, éxí kjuakoxìn Cristo mé xíkaha tjakoxinni, kixin tí sítié la tinkák'itjáyan kixin ijie la ó t'inkaséyanxín tí xrohi chaxín.

⁹ A ntá tí nkexro tsontáchro kixin ixri tí t'inkaséyan, a ntá naxa nínkakonhen kíchó, na mé tí xíkaha naxa itjen tí sítié a. ¹⁰ A ntá tí nkexro tjuèhe kíchó mé tjen tí t'inkaséyan, a ntá xíkaha jína tjen, chóntahya jie la chrókjuachruèhya ch'án nínkexró kixin chrókjuasin sín jie inaá. ¹¹ A ntá tí nkexro nínkakonhen kíchó mé tjejó sín la ko ixri sín tí sítié a la ko noehya sín nketí nó sátsji sín kixin tí sítié la kjuích'ëna ntakótán sín.

¹² Éxí xjanna t'íkuən tí jahará, la méxra tjékjian tí xroon ts'ayéhérá kixin tsonohará kixin kjuachaxin ih-nié Dios kjuínchetjuáxinrá tí ijjárá kixin k'uenyákonhëni Ìnchéni Jesucristo. ¹³ Jahará it'é xjan, ikjian tí xroon ts'ayéhérá jahará kixin chojínrá tí nkexro tjen tí xrankíxixín. A ntá jahará ntasoírá kjaxin ikjian tí xroon ts'ayéhérá jahará kixin kjuachará kixin kjuachahya tí Jí-nahya chrók'uetqanhanrá.

Ikjian tí xroon ts'ayéhérá jahará chánjanrá, kixin chojínrá It'éni. ¹⁴ A ntá jahará it'é xjan ikjian tí xroon ts'ayéhérá kixin ó chojínrá tí nkexro itjen tí xrankíxixín tí naxa t'ónahya chjasintajni. Ikjian tí xroon ts'ayéhérá jahará ntasoírá, kixin naxa fuérterá, la ko k'uayéhérá tí itén Dios, la ko kjuachará kixin kjuachahya Tsochren chrók'uetqanhanrá.

¹⁵ Chrójtjuèhyará tí chjasintajni la ko ni tí nkehe síin chjasintajni. A ntá tí chojni tjuèhe tí chjasintajni, na mé chaxínhya tjuèhe sín It'éni Dios. ¹⁶ Kixin ninkehó tí nkehe chrókjuanjon chjasintajni chrókuijìn tí tjen It'éni Dios. Tí nkehe tjinkaon tsjanjon chjasintajni na mé tíhi,

mé tí nkehe jínahya chrókjuich'eni, la ko tí chrókjuak'e asénni tí nkehe ts'ikonni, la ko tí kjuahnke xrikoni kixin itsjé nkehe chróchóntani. ¹⁷ A ntá tí chjasintajni sítinkákjeje la ko tí nkehe jínahya tjenkayáxin chojni; a ntá tí nkexro nchexiteyá tí nkehe tóxrjínhin Dios mé ts'ejó sín jnkochrín.

Tí nkehe chaxín la ko tí nkehe kjuach'ia

¹⁸ Éxí xjanna t'íkuan tí jahará, la chrókónohará kixin ó kuichjina tí yaon tsjixixín. Jahará ó kuínhínra kixin ó tsi tí nkexro nínkakonhen Cristo. A ntá ijie tinkákónoxín nchónhya tí sín a, mé noexínni kixin ó kuichjina tí yaon tsjixixín. ¹⁹ Jehé sín tsík'axrjekjanxín sín tí tjejóni; kjánchó chaxínhya kuinkáchónki sín éxí tinkáchónkini. Náhí. Tí chaxín chrókuinkáchónki sín éxí tinkáchónkini la chrók'uaxrjekjanxínhya sín tí tjejóni, naxa chrók'uejókoni sín jnkokóá. A ntá xikaha kónhen k'uaxrjekjan sín kixin tsonoxín kixin kuinkáchónkihya sín éxí tinkáchónkini.

²⁰ A ntá jahará la Cristo tsíkjanjon Nchakuen ch'án tsík'ayéhérá kaín rá, ntá jie tiénxinrá intsí kuènte ch'án. ²¹ Ikjian tí xroon ts'ayéhérá kixin ó nohará tí nkehe chaxín, jehya kixin chrókónoahyará; jahará la ó nohará kixin nijnko kjuach'ia tixínhya tí nkehe chaxín.

²² ¿Xá nkexro tí ch'ia? Mé tí nkexro ntáchro kixin Jesús la jehya tí Cristo. Tí nkexro a mé nínkakonhen Cristo, mé titekakonhya It'éni Dios la ko tí Xjeen ch'án. ²³ A ntá tí nkexro titekakonhya tí Xjeen Dios la kjaxin chón-tahya sín tí It'é ch'án, a ntá tí nkexro chrónka kixin chóxin tí Xjeen Dios mé kjaxin chóxin sín tí It'é ch'án.

²⁴ Méxra tí nkehe tsíkinhínra tí xrankixixín la chróxráinkáonra jnkochrín. A ntá xikaha tí chróxráinkáonra jnkochrín tí nkehe tsíkinhínra tí xrankixixín, la kjaxin xikaha jnkokóá chrókuinkachónkirá tí Xjeen Dios la ko tí It'é ch'án.

²⁵ Kixin Jesucristo tsíntáchro ch'án kixin tsjanjon ch'án tí kjuachón jnkochrín.

²⁶ Méxra xikaha tjékjan tí xroon i ts'ayéhérá kixin chrókónohará kuènte tí sín tjinkaon chrókjuít'ayahará.

²⁷ Kjánchó jahará la ó chontará Nchakuen Dios tsítjáhará Jesucristo, a ntá xikaha la í t'ichjánxínhya kixin ókjé nkexro chrókjuakohará, kixin tí Nchakuen Dios mé tjakohará kaín xín nkehe, mé tjako tí nkehe jína la jehya kjuach'ia tíha. A ntá chaxín chrókuinkachónkirá Cristo éxí kjuako tí Nchakuen ch'án.

²⁸ A ntá jie éxí xjanna t'íkuan tí jahará, chrókuítóéhyará chrókuinkachónkirá Cristo, kixin tió tsi ch'án la antsí chróchoxínra ch'án la ko chrókósuàhyará chrókóchjinará tió tsi ch'án, ²⁹ kixin ó nohará kixin Jesucristo la jína ch'án. A ntá chrókónohará kixin kaín nkexro jína la xjeen Dios tíha.

Tí sín xjeen Dios

3 Chrókónohará kixin It'éni Dios, imá tjuèhe tí jeheni kixin nchek'in ch'án xjeen ch'án tí jeheni, la mé chaxín jeheni tíha. Mé xikaha tí sín chjasintajni chónhya sín tí jeheni kixin jehe sin la xráxin chónhya

sín Dios. ² Mé xikaha kichó ni, ó tsík'ónani xjeen Dios, a ntá naxa tjakoxínhya ch'án nkehe tsonhenni tí tsjixixín. Kjánchó ó noheni kixin tió itsi Inchéni Jesucristo la ts'ónani éxí tí jehe ch'án, kixin ts'ikonni kixin nkexrí tjen tí jehe ch'án. ³ A ntá kaín nkexro tjejóchónhen tí tsi ch'án la chrókuítóhe sín ijie sín kixin tsotjóá sín kixin jehe ch'án la tjóá ch'án.

⁴ Kixin kain tí nkexro tjasin jie mé jínahya ch'e sín, kixin tió tjasin chojni jie la mé xikaha kuítetekakonhya sín tí ley a. ⁵ Jahará ó nohará kixin Jesucristo kui chjasintajni kixin tsjatsen ch'án tí ijieni, a ntá jehe ch'án la ninkehó jie chóntahya ch'án. ⁶ Mé xikaha kaín tí sín chaxín tinkáchónki tí jehe ch'án la mé tjasinhya sín jie; a ntá kain tí sín tinkákjasin jie la tsík'ikonhya sín ch'án la ko xráxin chónhya sín ch'án. ⁷ Éxí xjanna t'íkuan tí jahará; méxra chrókuítóéhyará kixin ninkexró chrókjuít'ayahará; a ntá tí nkexro ch'e nkehe jína la jína ch'án, kixin Inchéni la jína ch'án. ⁸ A ntá tí nkexro xritjasin jie la mé kuènte tí Jínahya; kixin tí Jínahya mé kjuankixin kjuasin jie desde tí xrankixixín k'óna chjasintajni. Méxra tí Xjeen Dios mé kui chjasintajni kixin sinchek'itjáyan ch'án kaín tí xra kjuich'e tí Jínahya.

⁹ Nijnko tí chojni tsík'axrjenixín Dios naxa chrónkákjasin jie, kixin ó chóna tí kjuachón kjuanjon Dios; la í xitjahya naxa chrókjuasin jie kixin ó tsík'óna xjeen Dios. ¹⁰ Mé xikaha tónoxín kixin nkexro tí xjeen Dios la ko nkexro tí xjeen tí Jínahya, kixin tí nkexro ch'ehya tí jína la ko tjuèhya kichó mé jehya xjeen Dios tíha.

Chrótjuèheni kichó ni

¹¹ Méxra tí tan tsíkinhínra tí xrankixixín mé tíhi, kixin chrótjuèheni kichó ni. ¹² Chrókjuich'ehyani éxí kjuich'e ch'ín Caín, kixin jehe ch'án mé kuènte tí Jínahya, kixin k'óyan ch'án tí kichó ch'án. ¿Nkekuènte kixin k'óyan ch'án? Kixin tí ch'ín Caín la tí nkehe jínahya kjuich'e ch'án, a ntá tí kichó ch'án la kjuich'e ch'án tí nkehe jína.

¹³ Kichóni, chróchrakonhyará tí nínkakonhanrá tí sín siín chjasintajni. ¹⁴ A ntá noheni kixin k'uatsínkani tí kjuach'én, a ntá kjuachón, mé noexínni tíhi kixin tjuèheni kichó ni. Tí nkexro tjuèhya kichó la éxí tsík'en sín xikaha xritjejó sín. ¹⁵ Kaín tí nkexro imá nínkakonhen kichó na mé chojni tjàya tíha, la ko ó nohará kixin ijnko chojni tjàya la xitjahya tsochóna kjuachón jnkochrín. ¹⁶ Ó noheni kixin nkexro tí tjuèheni, kixin Inchéni Jesucristo mé k'uenyákonhenni ch'án; kjaxin jeheni kjónté chrók'uenyákonhenni tí sín kichó ni. ¹⁷ A ntá tí tjen ijnko nkexro rico t'ikon kixin ijnko tí kichó ch'án t'ichjánxínhin nkehe, a ntá tí tsjinkítsahya tí kichó, ¿a ntá nkexrí chrótjuèhe ch'án Dios kaín asén ch'án? ¹⁸ Éxí xjanna t'íkuan tí jahará, méxra chrótjuèxínhyani tí kichó ni tí tan náxrjón chrónixjani ó. Náhí. Chrókjuakoxínni tí nkehe jína chrókjuich'eni.

Jína tsqchjineheni tí tjen Dios

¹⁹ Tíha mé noexínni kixin chaxín ntoá tjejóni, a ntá chrókónoheni kixin chaxín tjejóni éxí tjinkaon Dios. ²⁰ A

ntá tí tjoni asénni kixin chóntani ichrén jie, a ntá Dios la imá nohe ch'án la nohe ch'án kaín nkehe tónhen asénni. ²¹ Mé xikaha kichó ni, tí tjohya asénni kixin nax-a a ichrén nkehe jínahya tjenkayáxinni, a ntá antsí jína tsochjineheni tí tjen Dios, ²² a ntá jehe ch'án tsjanjon ch'án kaín nkehe tsjancheheni ch'án, kixin nchex-iteyéhēni tí nkehe k'uetōan ch'án la ko ch'eni tí nkehe tóxrjinhjīn ch'án. ²³ Tí nkehe tsík'etōan ch'án la mé tíhi kixin chrókuitekaonni tí Xjeen ch'án Jesucristo, la ko chrótjuèheni kichó ni éxí k'uetōan ch'án. ²⁴ Tí nkexro nchexiteyéhē tí nkehe k'uetōan ch'án mé tjejóko tí jehe ch'án, la ko jehe ch'án tjen tí tjejó sín. Tíhi mé noexínni kixin jehe ch'án tjejókonni ch'án kixin tí Nchakuen ch'án tsíkjanjon ch'án.

Tí Nchakuen Dios la ko tí nchakuen tí nkexro nínkakonhen Cristo

4 Kichóni, chrókuitekákonhyará kaín tí sín ntáchro sín kixin Nchakuen Dios mé nixjajin tí jehe sín. Náhí. Chrótsjehérá tí nkehe ch'e sín kixin chrókónohará kixin á chaxín chóna sín Nchakuen Dios o náhi, kixin tí chjasintajni la ixri nchónhya chojni ch'ia, ntáchro sín kixin nixja sín tí itén Dios. ² A ntá xikaha mé chrókónoaxínrá kixin á chaxín chóna sín Nchakuen Dios kixin kaín tí sín chaxín titekaon sín kixin Jesucristo ikui éxí chojni mé chóna sín Nchakuen Dios. ³ A ntá tí nkexro titekakonhya kixin xikaha tsíki Jesús, na chóntahya sín Nchakuen Dios. Náhí. Chóna sín tí nchakuen tí nkexro nínkakonhen Cristo. Jahará ó kuínhínrá kixin itsi tí nchakuen a, a ntá jie ó tsíki chjasintajni.

⁴ T'íkuan tí jahará éxí xjanna, kixin jahará la ó titekáonrá Dios, a ntá kjuachará kixin kjuachahya tí sín ch'ia chrók'uetōan, kixin tí nkexro tjejókoará la imá t'etōan, a ntá tí nkexro t'etōan chjasintajni la kánhyó t'etōan. ⁵ Kixin jehe sín la kuènte chjasintajni ó, méxra nixja sín tí nkehe kuènte chjasintajni ó. A ntá tí chojni kuènte chjasintajni ó mé tjejótinhin sín. ⁶ A ntá jeheni mé xjeen Dios. A ntá tí sín chóxin Dios mé tjejótinhin sín tí nkehe tjakoni. A ntá tí nkexro chónhya Dios mé tjinkakonhya sín chrókuinhin sín tí nkehe tjakoni. A ntá tíha mé tjatsqanxínni nkexro chóna tí Nchakuen tí nkexro chaxín la ko nkexro chóna tí nchakuen tí nkexro xrich'ia.

Dios mé tjuèheni

⁷ Kichóni, méxra chrótjuèheni kichó ni, kixin tí tjuèheni kichó ni mé tixjīn tí tjen Dios. Kaín nkexro tjuèhe kichó mé xjeen Dios, la ko chóxin Dios. ⁸ A ntá tí nkexro tjuèhya kichó na mé chónhya Dios kixin Dios la xráxín tjuèhe chojni. ⁹ Dios la ó kjuakoxin ch'án kixin tjuèhe tí jeheni kixin tsíchr'án ch'án tí jnkokoá Xjeen ch'án chjasintajni kixin tsochóntaxínni kjuachón tí jehe ch'án. ¹⁰ A ntá tí tjuèheni Dios la mé tíhi: jehya kixin jeheni k'uetjuèheni tí jehe ch'án. Náhí. Jehe ch'án mé xráxín tjuèhe ch'án tí jeheni, a ntá ichr'án ch'án xjeen ch'án k'uenyákonhēnni kixin tsotjuáxin tí jie chóntani.

¹¹ Kichóni, a ntá tí xikaha Dios tjuèhe tí jeheni, a ntá kjaxinni jeheni xikaha chrótjuèheni kichó ni. ¹² A ntá Dios la ninkexró k'uíkonhya. Kjánchó tí chrótjuèheni kichó ni la Dios ts'ejókonni ch'án, a ntá tsjinkitsa ch'án kixin chaxín tsotjuèheni kichó ni. ¹³ Tíhi mé noexínni kixin tjejókonni Dios la ko jehe ch'án tjejóko tí jeheni kixin tsíkjanjon ch'án tí Nchakuen ch'án chóntani. ¹⁴ Jeheni mé k'uíkonxín konni la mé chrónkaxínni kixin It'éni Dios tsíchr'án ch'án Xjeen ch'án kixin tsaáxin chojni síin chjasintajni. ¹⁵ A ntá jnkojín nkexro titekaon la ko chrónkaxín kixin Jesús mé Xjeen Dios mé tjejóko Dios la ko Dios mé tjejóko tí jehe sín.

¹⁶ Mé xikaha mé noexínni la ko titekaonni kixin Dios la tjuèhe tí jeheni. Dios mé xráxín tjuèhe chojni, a ntá tí nkexro tjuèhe Dios mé tjejóko Dios la ko Dios tjejóko tí jehe sín. ¹⁷ Mé xikaha chaxín chrótjuèheni Dios kixin ntá chróchrakonhyani tí yaon tsitoexín ijíeni kixin ó noheni kixin Jesucristo la tjuèheni ch'án la ko jeheni la kjaxin tjuèheni tí jehe ch'án. ¹⁸ Kixin tí tjuèheni Dios la kohya kjuachrakon. Tí chaxín tjuèheni Dios la tíha mé tsakitsje tí kjuachrakon. A ntá chojni chrakon mé chaxín tsjasóte. A ntá jnkojín chojni chrakon la mé chaxínhya tjuèhe Dios.

¹⁹ A ntá jeheni la tjuèheni Dios kixin jehe ch'án senó tjuèhe ch'an tí jeheni. ²⁰ A ntá jnkojín nkexro ntáchro kixin jehe mé tjuèhe Dios, a ntá tuénxín nínkakonhen kichó mé kjuach'ia xriko. Tí tjuèhya ch'án tí kichó chóxin ch'án, la kjaxin xitjahya tsotjuèhe Dios kixin tsík'ikonhya ch'án Dios. ²¹ Tíhi mé tsík'etōan Jesucristo kixin tí nkexro tjuèhe Dios la mé kjaxin chrótjuèhe kichó.

Tí tinkáchónkini Dios la tsjachahya tí chjasintajni

5 Kaín nkexro titekaon kixin Jesús mé tí Cristo la jehe mé tsík'axrjeníxin Dios; a ntá tí nkexro tjuèhe tí it'é tí xjan mé kjaxin tsotjuèhe tí xjeen tí nkexro a. ² A ntá tí tjuèheni Dios la ko nchexiteyáni tí nkehe t'etōan ch'án, a ntá noheni kixin kjaxin tjuèheni tí sín tsík'óna xjeen Dios. ³ Tí tjuèheni Dios la t'ichjánxin kixin chrókuitekaonni tí nkehe k'uetōan ch'án, kixin tí nkehe t'etōan ch'án la jehya ijnko nkehe imá xra ⁴ kixin kaín chojni tsík'óna xjeen Dios tsjacha, la ntá tí chjasintajni la náhi. A ntá tí tinkáchónkini Inchéni la mé tsjachaxin-ni la tsjachahya tí chjasintajni. ⁵ A ntá tí sín tinkáchónki kixin Jesús mé tí Xjeen Dios mé tsjachahya tí chjasintajni ts'etuenhen sín.

Tí nkehe chrónkaxín nkexrí tjen tí Xjeen Dios

⁶ Tió kui Jesucristo la kjuakoxin tí inta la ko tí jni. La jehya kixin jehó tí inta kjuakoxin ch'án. Náhí. Kjaxin inta la ko ijni kjuakoxin ch'án. A ntá tí Nchakuen Dios mé chrónkaxín tíha, kixin tí Nchakuen Dios la chaxín ntoá. ⁷ Siín iní nkexro chrónkaxín nkaya nkajni: ijnko la It'éni, la ijnko la tí Palabra, la ijnko la tí Nchakuen ch'án. Tíha mé iní, kjánchó jnkokoá nkexro tíha. ⁸ A ntá síin iní tí nkehe chrónkaxín ntíhi chjasintajni, mé tí Nchakuen Dios, la ko tí inta la ko tí jni; a ntá tí iní mé jnkokón

chrónka. ⁹ ¿Á chrókuitekaonni tí nkehe chrónka chojni ó? A ntá tí nkehe tsíchrónka Dios, antsí má tjetóan kixin táha la Dios tsíchrónkaxín kixin nkexrí tjen tí Xjeen ch'án. ¹⁰ Tí nkexro titekaon tí Xjeen Dios na mé asén ó tónoexín tíha. A ntá tí sín titekakonhya sín Dios, la ntáchro sín kixin Dios la ch'ia ch'án kixin kuítekakonhya sin tí nkehe tsíntáchro Dios kixin nkexrí tjen Xjeen ch'án. ¹¹ Tí nkehe tsíchrónka Dios mé tíhi kixin tsjanjon ch'án kjuachón jnkochrín, a ntá tí kjuachón mé chón-ta tí Xjeen ch'án. ¹² A ntá tí nkexro chón-ta tí Xjeen Dios mé kjaxin chón-ta kjuachón; a ntá tí nkexro chón-tahya tí Xjeen Dios la mé chón-tahya kjuachón.

Chrónkaxín nkehe kuènte kjuachón

¹³ Tí nkehe mé kjinni kixin jahará ó titekáonrá tí Xjeen Dios, kixin mé tsonoaxínrá kixin chaxín chontará kjuachón jnkochrín.

¹⁴ Tíhi mé chóxixínni Dios kixin noheni kixin ichrén nkehe tsjancheheni ch'án éxí tjinkaon ch'án la jehe ch'án la tsinhin ch'án. ¹⁵ A ntá tí xíkaha ó noheni kixin Dios tjetinhin tí nkehe nixjeheni ch'án, a ntá kjaxin ó noheni kixin ó chón-tani tí nkehe kjuancheheni ch'án.

¹⁶ A ntá jnkójínrá ts'ikonrá ijnko kichuárá tjasin jie, a ntá tí jehya ijnko jie chrók'uenxín ch'án, la chrókjuancheherá Dios kixin chrókjuinchexraxinkaon ch'án kixin kjuasin ch'án jie, a ntá Dios chrókjuanjon ch'án kjuachón, tí chaxín jehya ijnko jie chrók'uenxín chojni. A ntá tí jie chrók'uenxín chojni la ntáxrjan kixin íchá jína chrókjuanchehyará Dios kixin chrókjuinkítsa tí ch'ín a. ¹⁷ Kaín nkehe jínahya la ijie tíha. Kjánchó síin jie ts'enxínhya chojni.

¹⁸ Ó noheni kixin tí nkexro tinkáchónki It'éni Dios tjasinhya sín jie, kixin tí Xjeen Dios tjinkítsa tí jehe sín, a ntá tí jínahya tsjachahya tsjachroe tí jehe sín.

¹⁹ Ó noheni kixin Dios t'ayakonhen tí jeheni, a ntá tí jínahya chón-ta kjuachaxin t'etuñhen kuenté chjasintajni.

²⁰ Ó noheni kjaxin kixin Xjeen Dios kui, la ko kjuínkítsa ch'án tí jeheni kixin chrókónoheni nkexrí tjen Dios chaxín. A ntá tjejókoni jnkokoá tí nkexro chaxín, tíha mé Jesucristo tí Xjeen Dios. Tíha mé Dios chaxín, la tsochóntaxínni ch'án kjuachón jnkochrín. ²¹ Éxí xjan-na t'íkuñ tí jahará, la tjtóherá tí dios tsíkjanoya. Amén. Ó tjen.

2 JUAN

¹ Janhan mé ijnko nkexro ó táda t'ayakonhen n̄jnko mé ikjian tí xroon ts'áyéhe tí sín tsíkjeýá Dios tójnkotsé sín ntiha, la mé chaxín tjuəhə sín: a ntá jehya janhván, la kjaxin kaín tí sín chóxin tí tan chaxín.

² Tjuəhará tí jahará kixin tí tan chaxín ó chóna asénni, tíha mé ts'ejókoni jnkochrín. ³ It'éni Dios la ko Ìnchéni Jesucristo mé Xjeen Dios chrókjuintayaonrá ch'án la ko chrókujkonóəhərá ch'án la ko chrótjáhará ch'án kjuaxróxin kixin chaxín tjuahará ch'án.

⁴ Imá chàna k'uíkuə kixin isorá tjejórá títekáonrá tí nkehe chaxín, éxí tsík'ətoan It'éni Dios. ⁵ A ntá jie jahará kichó ni, xrjanóəhərá kixin chrótjuèhérá kichuára. Méxra xikaha tjékjian tí xroon i, la jehya ijnko nkehe nixin tsík'ətoan Dios. Náhí. Tíha la mé tí nkehe tsík'áyéheni tí kjuák'e Ìnchéni Jesucristo. ⁶ A ntá tí tjuèheni kichó ni la mé tíhi kixin chrók'uejóni éxí tsík'ətoan Dios; a ntá tí nkehe tsík'ətoan Dios la mé ó tsíkinhínra jahará tí senó kixin chrótjuèheni kichó ni.

Tí chojni xrich'ia

⁷ Nchónhya chojni chjasintajni xrich'ia sín titekakonhya sín kixin Jesucristo kui k'óna chojni. A ntá tí chojni

xikaha mé ixri xrich'ia la ko nínkakonhen Cristo.

⁸ Chrókóxakonhanrá kixin chrók'uitjáyanhya tí xra kjuich'erá kixin naxa chrók'uayéhérá tí nkehe tsjintaxín ts'ayéhérá.

⁹ A ntá tí síin ijnko nkexro kuítəhe tí nkehe kjuako Cristo ntá kjuichroe la mé chónahya sín Dios; a ntá tí nkexro títoəhya tí nkehe kjuako Cristo mé chóna sín It'éni Dios la ko tí Xjeen ch'án. ¹⁰ A ntá jnkojín sín chrókjuijitsjehe tí jahará, a ntá ntoáhya chrókjuako sín, la chrókjuánjonhyará kjuachaxin chrókuitəhe tí sín a ntəará la ko ni chrónixjeéhyará sín jnkojína. ¹¹ A ntá tí nkexro tsonixjehe tsontáchro kixin: “¿Á jína k'uinka?” na mé éxí tóxrjinh̄n sín tí nkehe jínahya ich'e tí sín a.

Tí tan tsjixín

¹² Chonta nchónhya nkehe chrókuinhínra jahará, kjánchó tjínkəkonhya chrókjian xroon ó. Náhí. Tjínkəvan kixin tjoka chrókjuasántsahará tí jahará tsonixjahará kixin chrókjuintaxín chrókóchéheni.

¹³ Tí sín kichuára tójnkotsé kuente n̄jnko ntihi, mé tí sin kjaxin tsíkjeýá Dios, mé nixjahará sín. Amén. Ó tjen.

3 JUAN

¹ Janhan mé tí nkexro t'ayakonhen nínko mé tjékjian tí xroon ts'áyéhe tí ch'ín choxian, mé tí ch'ín Gayo tí ch'ín chaxín tjuaha.

² Kíchóni, tjáncháha Dios kixin éxi jaha jina tjen tin-kachónkia Ìnchéni la jina chrók'uaxrje kaín xra ch'e la ko jina chrókjuak'e jaha. ³ Imá kóchàna tió kui iso tí sín kíchó ni chrónka sín kixin jina tjákoxian tí tan chaxín.

⁴ Kohya ijnko nkehe antsí má nchechàna éxi tió kuinhan kixin tí sín t'íkuān éxi xjanna tjejóititekaon sín tí tan chaxín

⁵ Kíchóni, chaxín jina tjech'e xra tjínkítsa tí sín kíchó ni la ko antsí tjínkítsa tí sín tsíkjin ókjé chjasin. ⁶ A ntá tí tsíkójkotsé tí sín kíchó ni la tsíchrónka sín kixin nkexrí tjuéhé tí jehe sín. Jaha chrókjuínkítsa tí nkehe t'ichjánxin sín tí sátsji sín. Xíkaha mé tóxrjinhin Dios. ⁷ Tió sákjuí sín kjuankixin sín chrónka sín itén Ìnchéni la chrohya sín chrók'uáyéhe sín ninkehó nkehe kuente tí sín chónhaya Dios. ⁸ Méxra tí jeheni t'ichjánxin chrókjuinkítsani tí jehe sín kixin tsjacha sín tsochrónkaxín sín tí tan chaxín ntoá.

Ntoáhya kjuako ch'ín Diótrefes

⁹ Janhan ikjian ijnko xroon k'uáyéhe tí sín tójkotsé ntiha. Kjánchó ch'ín Diótrefes kuitekakonhaya ch'án tí nkehe k'uētūnhenni ch'án kixin tjinkaon ch'án chrók'uētōan ch'án jehó ch'án. ¹⁰ Méxra xíkaha tí sá-

sia ntiha tsonixjaha ch'án kixin tí kjuach'ia ntáchro ch'án t'ántaxinhin ch'án tí jeheni. Jehya táhó ich'e ch'án. Kjaxin tjanjonhaya ch'án kjuachaxin ts'ejó tí sín kíchó ni tjiji; a ntá tí sín tjinkaon chrókjuanjōn kjuachaxin la t'ētōan ch'án kixin tsjanjonhaya sín kjuachaxin la ko t'ētōan ch'án kixin tsōchjinahaya sín tí tójkotsé tí chojni.

¹¹ Kíchóni chrókjuákoxinhaya tí nkehe jínahaya. Íchá jí-na chrókjuákoxian tí nkehe jina. Tí nkexro ich'e nkehe jina na mé kuente Dios. A ntá tí nkexro ich'e nkehe jínahaya la mé tsík'ikonhaya sín Dios.

Jina tjákoxin tí ch'ín Demetrio

¹² Kaín sín ntáchro sín kixin jina tjákoxin tí ch'ín Demetrio la mé chaxín tíha. Kjaxin tí jeheni chrónkani tíha la ko jahará ó nohará kixin tí nkehe ntoá chrónkani.

Kjuixixín nixja ch'án

¹³ Janhan chonta nchónhaya nkehe tsontáxrjan, kjánchó tjínkakonhaya tsokjian ó ¹⁴ kixin tjínkavan tjoka ts'íkuān tí jaha, a ntá tsjoni.

¹⁵ Kjuaxróxin chrókjuak'e jaha. Kaín nkexro choxian ntihi nixjaha sín. Tétuānhan nixjehé jnkōjnko tí sín chóxinni.

SAN JUDAS

1 Janhan Judas, t'aha xra Jesucristo, la sana mé Jacobo la mé ikjian tí xroon í ts'áyéhe tí sín tsíkjejá It'éni Dios tsíkjinchetjóá ch'án kixin tsinkáchónki sín ch'án. Mé xikaha Jesucristo t'ayakonhen ch'án tí jehe sín. ² Imá kuikonóahará ch'án ntá ts'ayéhérá kjuaxróx-in kixin tjuahará ch'án.

Tí sín ntoáhya tjako (2 Pedro 2.1-17)

³ Kíchóni, imá tjínkavan tsokjian tí xroon ts'ayéhérá tsochrónka nkexrí tsaáxinni kaín ni. A ntá t'íkuqan kixin t'ichjánxin tsokjian tí xroon ts'ayéhérá tsqxranóaxínrá kixin jína chrókiénxinrá nkehe chrókjuátēherá kixin nkexrí tinkachónkirá Ìnchéni kixin tí fe la mé ónaá tsík'áyého tí sín tsíkjinchetjóá Dios. ⁴ A ntá jie ó kuik'ix-enhen iso sín ch'ia tí tjejorá. A ntá ósé nixja xroon itén Dios kuènte tí sín a kixin tsjasóte sín. Jehe sín la chojni jínahya ntá ntáchro sín kixin tinkáchónki sín Dios la ó ch'iaxón sín ntá imá tjasin sín jie. La titekakonhya sín Dios, jehó t'etqan, la ko titekakonhya sín Ìnchéni Jesucristo.

⁵ Jahará kjónté ó nohará la jehí tjínkavan sin-taxráxinkáonrá ínaá kixin Ìnchéni Dios kuakitsjexín ch'án Egipto tí sín chjasin Israel, ntá kjónté xikaha la chr'éxin kjuínchek'itjáyan ch'án tí sín kuítékakonhya sín tí jehe ch'án. ⁶ Kjaxin tí sín ángel kuítékakonhya sín tí k'uētqan Dios ntá kuítqhe sín tí kjuachaxin tsíkjanjon Dios tsík'áyéhe sín la ko kuítqhe sín tí k'uék'ejó sín jína, a ntá jie Dios k'uētqan ch'án kixin ts'ejóchjina sín tí sítíe la ts'ejóchónhen sín tsijia tí yaon tsitqexín ijíe sín. ⁷ Kjaxin tí sín chjasin Sodoma la ko tí sín chjasin Gomorra la ko tí sín chjasin chjinaxón kóyóhe sín tí sín ángel kuítékakonhya la kjuasinko sín jie chojni chjin ókjé la ko kjuasinko sín jie kichó sín kjónté jnkokónntoa sín. Tíha mé chrórxaxinkakonxín kaín chojni kixin nkexrí tsonhen tí sín titekakonhya tsjasótexín sín tí xrohi jnkochrín sín ts'ankahya.

⁸ Méxra kjaxin tí chojni a kotáchrién sín tsík'ikonxín kixin ó nchoxon chrókjuasinko sín jie chojni chjin ókjé la ko chrókuítékakonhya sín tí kjuachaxién Ìnchéni la ko chrók'uántaxínhín sín tí sín ángel chóna kjuachaxin t'etqan. ⁹ A ntá tí ch'ín arcángel Miguel kjuánjonko ch'án tí ch'ín Tsohren la ko ikjo sín kjuánjonxin sín nkehe tsonhen tí cuerpo kuènte ch'ín Moisés. ¹⁰ A ntá jehe ch'án kjónté xikaha la kjuínchekjasótehya ch'án tí ch'ín Tsohren. Jehó ntáche ch'án kixin: "Ìnchéni mé tsjentuáha tí jaha." ¹⁰ A ntá tí chojni i t'ántaxínhín sín tí

nkehe tienxínhya sín la tjenkayáxin sín éxí ko tienxínhya nchexiteyéhe tí nkehe ntáchro asén, mé xikaha tí nkehe jínahya kjuích'e sín ts'itjáyanxín.

¹¹ ¡Nò! tí jehe sín! Chréhe sín éxí kjuích'e ch'ín Caín. † Tjinkaon sín chrókjuacha sín chichaon ntá ntoáhya kjuích'e sín éxí kjuích'e Balaam, la ko its'en sín éxí ik'uén ch'ín Coré kixin kuítékakonhya sín. †† ¹² Ijnko kjuatósuèhe kixin tjejóyákjanxín sín tí síin kia náxrjón chontará, kixin tjejóne sín la ko tjejót'i sín chéhe sín la kjónté xikaha la ninkehó kjuasáya chóntahya sín. Tjejó sín éxí tí sín t'ayakonhen kolélo kjánchó jehe sín t'ayakonhen sín asén sín ó. Jehe sín la éxí tjuí chóntahya ntá tjakáko xrinto; la ko éxí ijnko nta t'ónahya to tí nitjó chrók'óna to, éxí yáya tsík'en tsík'axrjenkixin nuéé. ¹³ Jehe sín na mé éxí ntayaon jiehe síxróji lóxrjo ó chóntahya ntá jína mé xikaha chónkó tí nkehe ch'e sín mé ijnko kjuatósuèhe tíha; la ko éxí konotsé kjuíchroe sákjuí ókjé; a ntá tjechónhen sátsji sín tsjasóte sín sítíe jnkochrín.

¹⁴ A ntá kjuák'e ch'ín Adán, a ntá yatqxin chr'éxin kui ch'ín Enoc nixjaxin kjuachaxién Dios ntáchro ch'án kixin k'uíkon ch'án itjen Ìnchéni kuíkqao nchónhya mil tí sín ángel kuènte ch'án, ¹⁵ kixin sinchekitqexín ch'án ijíe kaín tí sín jínahya kixin kaín tí jínahya kjuích'e sín la ko kaín nkehe k'uénixja tí sín jínahya k'uántaxínhín sín tí jehe ch'án. ¹⁶ Xráxín tóxrjénhya sín nkehe sítónhen la ko ixri sín tjonta kichó sín. Jehó xritjeyá sín tí nkehe tóxrjínhín sín tjenkayáxin sín. Ihnke sín nixja sín la ko itjo sín jína chojni kixin ntá tí sín a chrókjuinkqtsa jehe sín.

Nchexraxinkaon ch'án tí sín tinkáchónki Cristo

¹⁷ A ntá jahará kichó ni, xráxinkáonrá kixin tí sín tsík-jeyá Ìnchéni Jesucristo ¹⁸ ntáchro sín kixin tí yaon tsjixixín tsjejexin chjasintajni ts'ixin chojni tsitekakonhya sín ts'ántaxínhín sín tí nkehe tjinkaon Dios la ko tsojtinkaon sín sinchexiteyéhe sín tí nkehe jínahya ntáchro asén sín ó. ¹⁹ Tí sín a mé tjinkaon ts'óxika tí sín jnkokqá tjejótójnksé kixin naxá tóxrjínhín sín sich'e sín nkehe síin chjasintajni kixin chóntahya sín Nchakuen Dios.

²⁰ A ntá jahará kichó ni tjuahará, antsí jína chrók'uejorá tinkachónkirá Ìnchéni. Chrónixjeexínrá Dios tí kjuachaxin kuènte Nchakuen ch'án. ²¹ Jína chrók'uejorá kixin tjuahará Dios ts'ejochonhénrá tí yaon tsokjan Ìnchéni Jesucristo kixin kjuasáyé ch'án tsojtáhará ch'án kjuachón jnkochrín.

† Éxodo 12.51 Números 14.29-30 †† Deuteronomio 34.6

‡ Génesis 4.3-8 †† Números 31.16 †† Números 16.1-3

²² Chrókuikonóghérá tí sín naxá tienxínhya. ²³ Jnkojín sín chrókuinchekaáraá chrókuakitsjekjanxínrá sín chríkjan xrohi, la ko chrókuikonóghérá í so sín kjánchó chróchontará cuidado tí jehe sín kixin kjónté ti iké sín kjaxin chóna jje.

Tjanchia ch'án kjuasáya

²⁴ Jnkokóá Dios tjen mé imá nohe ch'án la ko sinchekaáni ch'án la chóna ch'án kjuachaxin

ts'ayakonhenni ch'án kixin chrókjuasinhyani jje la ko tió tsjjini tí tjen ch'án la ninkehó jje chróchóntahyani, imá tsóchéhēni tí tjen ch'án ntiha. Kjuasáyé Dios imá chóna ch'án kjuachaxin t'etqan ch'án la ko kjuínchekaáni ch'án kjuachaxin Ìnchéni Jesucristo. Jehe ch'án jnkochrín tjen ch'án chóna ch'án kénxín kjuachaxin. Amén. Ó tjen.

APOCALIPSIS

1 ¹⁸ Kaín tí nkehe i mé chénka Dios Jesucristo kixin jehe ch'án tsochénka tí sín ch'ehe ch'án xr̄a tí nkehe tjoka tsoñhen. Ntá Jesucristo kjuínchenohe ijnko ángel kuènte ch'án kixin nkexrí chrókónohe tí ch'ín Juan ch'ehe ch'án xr̄a. ² A ntá jehe ch'án mé k'uítuhen ch'án ntá chrónkaxín tí nkehe chaxín tsíntáchro Dios la ko tí nkehe chrónka Jesucristo la ko kaín tí nkehe tsík'ikon ch'án nkexrí kjuakoxín Dios.

³ Nájrxón tjejó tí sín nchekuáxin tí xroon i la ko kjaxín tí sín tjejótinhin tí palabra chrónka nkehe tsoñhen la ko tóxrjínhin sín titekaon sín nkehe nixja tí xroon i kixin ó kuichjina tí hora tsoxiteyá tíha.

Ch'ín Juan ikjin ch'án xroon ts'áyéhe tí yato nínko

⁴ Janhan Juan ikjian tí xroon tsochr'anhan tí yato nínko tjejó estado Asia. Jahará chrók'uayéhérá kjuasáyé Dios la ko kjuaxróxin. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án ínaá la ko kjaxín tí yato Nchakuen ch'án tjejó tí trono t'etoxanxín ch'án mé tjanjon kjuaxróxin. ⁵ La ko kjaxín kjuasáyé Jesucristo. Jehe ch'án chaxín chrónka kaín nkehe ntoá la ko jehe ch'án mé xrankixín xechón kjónté tsík'en kixin tjeotoan ch'án kixin t'etueñhen ch'án kjónté kaín tí sín rey la ko tí sín t'etoxan síin chjasintajni. Jehe ch'án mé tjuèheni ch'án la ko tí ijnié ch'án mé k'uíjmáxinni kaín tí jje chóntani. ⁶ Jehe ch'án mé tsíkjanjon kjuachaxín tsík'ónani nch'at'á kixin sich'ehe ni xr̄a It'éni Dios. Tí kjuachaxín kuènte ch'án me ts'etoxan jnkochríxin. Mé xikaha tsoxiteyá. Amén.

⁷ Ts'ikon chojni kixin Cristo la ó tsi chríkjan tjuj. Kaín chojni ts'ikon ch'án la ko kjaxín tí sín k'uékóninkakohen tí jehe ch'án tsíkjinchekjasóte sín ch'án mé ts'ikon sín ch'án la ko kaín chojni chjasin síin chjasintajni tsotsjánka sín tió ts'ikon sín tí jehe ch'án. Mé xikaha tsoñhen. Amén.

⁸ Janhan mé tí xrankixín la ko tí tsjixín éxi tí letra xrankixín A la tsjixín Zeta. Mé xikaha ichro Ìnchéni Dios, tí nkexro imá t'etoxan. Jehe ch'án mé itjen ch'án la ko xráxin tjen ch'án la ko jehe ch'án mé xiki ch'án ínaá.

Ch'ín Juan tsík'ikon ch'án kixin Cristo chónka kjuachaxín

⁹ Janhan Juan mé ijnko kichó tí jahará mé tjékian Jesús la ko tí kjuachaxín kuènte Dios chonta la mé jahará la ko jeheni jnkokón tjejóttjasóteni la jehe ch'án tjinkitsani kixin tsjachani. Kjuákua itén Dios éxi chrónka Jesucristo la mé tíha kjuak'échjinaxián tí isla it'in

Patmos. ¹⁰ A ntá ijnko yaon xraxinkakonxínni Ìnchéni la ikui kjuachaxín Nchakuen Dios tí tjén tí janhan la kuñhan kixin nóton tí janhan ijnko nkexro nixja imá itsen éxi itén ijnko trompeta. ¹¹ Mé ntáchro ch'án kixin:

—Janhan mé tí xrankixín la ko tí tsjixín éxi tí letra xrankixín A la tsjixín Zeta. Mé tsokjian jaha ijnko xroon kaín tí nkehe k'uíkuan kixin tsochr'enhén tí yato nínko tjejó tí estado Asia na mé tí nínko tjen chjasin Éfeso, la Esmirna, la Pérgamo, la Tiatira, la Sardis, la Filadelfia, la ko Laodicea —ichro ch'án.

¹² Ntá nkátjá tsjahá kixin nkexro itén tí tjenixjana ntá xringhya k'uíkuan yato candelero tsík'óna chica oro.

¹³ A ntá chríkjan tí yato candelero k'uíkuan ijnko nkexro éxi yóhe Xjeen Dios tsík'óna chojni. Ntá tí iké ch'án la ika kijnjin tjenkáya ch'án hasta tsíkóyóhe toté ch'án la ko mé chónka ijnko cinta jehó oro tjenkáni ntakuin ch'án. ¹⁴ Tí kaxihí ch'án la tjóá éxi kaxree kolélo tjóá o éxi chrinta tsjehe la ko tí ikon ch'án la éxi xrohi nene tsjehe. ¹⁵ Ntá tí toté ch'án la éxi chica sine tjákini na ntá tsík'axrxjén tjá. A ntá tí itén ch'án la itsen éxi tóvéntó nchónhya ntario. ¹⁶ A ntá tí tjá ch'án chjina mé chónka yato konotsé. A ntá tí ir'va ch'án k'uaxrxjén chica espada iyo, yánjin taté. A ntá imá tjákini tsjehe ikon ch'án la éxi yaon t'inkaséyanxín imá.

¹⁷ A ntá tí k'uíkuan xikaha la kjuáchr'ítsinka toté ch'án éxi tsík'énna. A ntá jehe ch'án kjuak'etja tjá ch'án chjina chrítaón tí janhan ntá nixjana ch'án ntáchro ch'án kixin:

—Chrakonhya jaha. Janhan mé tí xrankixín la ko tí tsjixín. ¹⁸ Janhan tí nkexro tjechón. Ik'uén, a ntá ijie la tjechuán ínaá la itjén jnkochríxin. Amén. Janhan chonta llave kuènte chojni its'en la ko kuènte tí síin tí sín tsík'en. ¹⁹ Méxr̄a ikjian jaha tí nkehe k'uíkuan mé tí nkehe síin ijie la ko tí nkehe tsoñhen chr'éxin.

²⁰ Ninkexró k'uékienxínhya nkexrí t'axrxjén tí yato konotsé k'uíkuan chonta tjana chjina, la ko tí yato candelero tsík'óna chica oro. Mé tí yato konotsé t'axrxjén kixin tí yato ángel t'ayakonhen tí yato nínko la ko tí yato candelero k'uíkuan me kjaxín t'axrxjén tí yato nínko.

Tí tan k'uáyéhe tí yato nínko: Tí tan k'uáyéhe tí sín chjasin Éfeso

2 'Tsokjian tí nkehe ts'áyéhe tí ángel t'ayakonhen tí nínko Éfeso: "Xikaha ichro tí nkexro chónka yato konotsé itja ch'án chjina la ko xritjak'e ch'án jnksiné tí yato candelero tsík'óna oro. Ntáchro xikahi: ² Janhan nõna kaín tí xr̄a ch'erá la ko nõna kixin tóxrjíanhyará tí

sín jínahya. Janhan la ó ñona kíxin kjuich'erá prueba tí sín ntáchro kíxin apóstol tí jehe sín la ntá jehya la ntá kónoxin kíxin xrich'ia tí jehe sín. ³ Nchónhya kjuasó-tiará la kjónté chonhénrá kóninkákonhyará la imá kjuich'erá xrá kíxin tinkachónkirá nina la ko nunca kóxrjéhyará. ⁴ Kjánchó tjánchía ijnko jie tí jahará kíxin tinkachónkihyará éxi kjuankíxixínrá k'uétjuanará. ⁵ Méxra chróxráxinkáonrá kíxin ó kuitohérá tí k'uétjuanará la ntá chrókuínkirá tí nkehe tjenkayáxinrá la ko chrókjuich'erá xrá éxi tí kjuankíxixínrá. A ntá tí náhi, la tjoka tsjasán la tsjakiyan tí candelero tí tjejorá tí nunca tsjinkíhyará tí nkehe jínahya tjenkayáxinrá la tí tsokjanhyará tsoxráxinkáonrá Dios. ⁶ Kjánchó chrókónohará kíxin tóxrjina tí nkehe tjejoch'erá kíxin tóxrjíanhyará tí xrá ch'e tí sín nicolaítas kíxin kjaxin janhan nínkakonhan tí nkehe ch'e sín. ⁷ Tí nkexro tjinkaon chrókuinhin la chrókuinhin sín tí nkehe nixjehé Nchakuen Dios tí njnko ntáchro kíxin: Tí sín tsjacha sinchexiteyána sín la tsotjahá sín kjuachaxin sine sín tí to t'óna tí nta tjanjon kjuachón itjen tí tjen Dios."

Tí tan k'uáyéhe tí sín chjasin Esmirna

⁸ 'Ikjian tí nkehe ts'áyéhe tí ángel t'ayakonhen tí njnko Esmirna: "Xíkaha ichro tí nkexro xrankíxixín la tsjixixín, mé tí nkexro ik'uén la ntá jie tjechón: ⁹ Janhan la ó ñona kaín nkehe tjejoch'erá. Ó ñona kíxin nkexrí tjejótjasótiará la ko ó ñona kíxin ñonará kjánchó jehya. Náhi. Jehe sín mé tójnksé sín tí njnkoé tí jínahya. ¹⁰ Kjánchó chrakonhyará kjónté tsjasótiará. Tí ch'ín Tsochren tsochr'ánxanhanrá ntöechiso jnkojín tí jahará kíxin tsotsjexín nkexrí tí jahará ntá t'ichjánxin tsjasótiará iso yaon. Kjánchó chrókuitóghyará Dios kjónté chrók'uenrá ntá janhan tsotjáhará tí kjuachón chr'éxin. ¹¹ Tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko: Tí nkexro tsjacha sinchexiteyána sín la í tsjasótehya, la tí yóxin it's'en chojni la í ts'enhya tí jehe sín."

Tí tan k'uáyéhe tí sín chjasin Pérgamo

¹² 'Tsokjian tí nkehe ts'áyéhe tí ángel t'ayakonhen tí njnko Pérgamo: "Mé xíkaha ichro tí nkexro chóna chica espada yánjín taté: ¹³ Janhan ó ñona kaín nkehe tjejoch'erá la ko ó ñona nketí tjejorá kíxin tí tjejorá la t'etöan ch'ín Satanás la kjónté la jína kuinkachónkirá tí janhan jahará kuitóghyará kuinkachónkirá tí janhan kjónté tí yaon tsík'en ch'ín Antipas, ijnko nkexro kjuínchexiteyána jína. Jehe sín tsík'óyáxin sín ch'án tí tjejorá ntiha kíxin ntaha t'etöan ch'ín Satanás. ¹⁴ Kjánchó janhan tjánchía ijnko jie tí jahará kíxin iso nkehe ntoáhya ch'erá. Siín ntiha chjasin Pérgamo tí tjejorá iso sín tjinkakonhya sín tsítöhe sín tí nkehe k'uékjako ch'ín Balaam, tí nkexro k'uék'etuenhen ch'án tí ch'ín Balac kíxin tí sín israelita chrókjuasin sín jie chrókjóné sín tí nkehe tsíkjökehe sín tí nkehe tsíkjangya la ko chróchóna sín chojni chjin ókjé chrókjuasinko sín jie. ¹⁵ Kjaxin xíkaha tí tjejorá la siín iso sín tjinkakonhya sín tsítöhe sín tí nkehe tjako tí sín

nicolaítas. Janhan mé tjinkakonhya tí sín a. ¹⁶ Méxra chrókjanrá chrókuinkachónkirá Dios. A ntá tí náhi, la tjoka tsjasán tí tjejorá la tsjánjonkianxian sín tí espada t'axrxjexín ir'va. ¹⁷ Tí nkexro tjinkaon chrókuinhin la chrókuinhin sín tí nkehe nixjehé Nchakuen Dios tí njnko ntáchro kíxin: Tí nkexro tsjacha sinchexiteyána sín la tsotjahá sín kjuachaxin chrókjóné sín maná tjechónhen la ko tsotjahá sín ijnko xrö tjóá la tí xrö la ts'ínixín ihnié sín njxin chónhya ninkexró. Jehó tí nkexro ts'áyéhe mé tsonohe."

Tí tan k'uáyéhe tí sín chjasin Tiatira

¹⁸ 'Tsokjian tí nkehe ts'áyéhe tí ángel t'ayakonhen tí njnko chjasin Tiatira: "Mé xíkaha chro tí Xjeen Dios, tí nkexro ikon éxi yóhe xrohi nene sít'axrxjexín la ko toté éxi chica sine tjákjini tsjehe. ¹⁹ Janhan ó ñona kaín tí nkehe tjejoch'erá la ko ó ñona kíxin tjuanará la ko tinkachónkirá tí janhan la ko ó ñona tí xrá tjejoch'erá la ko ó ñona kíxin tjejochonhénrá tóninkákonhyará. La ko ó ñona kíxin antsí tjejoch'erá xrá ijie ntá tí kjuankíxixínrá la kénhyó. ²⁰ Kjánchó tjánchía ijnko jie tí jahará kíxin tjánjonrá kjuachaxin tjako tí tjan Jezabel. Kjaxin ntáchro tjan kíxin nixja tjan itén Dios kjánchó ch'iyehé tjan tí sín ch'ena xrá kíxin kjaxin sín chrókjuasinko sín jie chojni chjin ókjé la ko chrókjóné sín tí nkehe tsík'óyán sín tsíkjökehe sín tí nkehe tsíkjangya. ²¹ A ntá janhan ó kuitöghá tjan intsí kíxin chrókjuinkí tjan tí tjenkayáxin tjan kjánchó tjinkakonhya tjan sich'e tjan xíkaha la tjinkakonhya tjan chrókuítöhe tjan tí jie tjasinko tjan chojni ntoa. ²² A ntá jie tsjánjuan kjuachaxin tsoníhi tjan tsjak'eták'á tjan cama la ko kjaxin tsjasóte kaín tí nkexro kjuasinko tjan jie tí nunca tsítöehya sín tí nkehe tjinkaon tjan sich'e tjan. ²³ A ntá janhan ts'oyán tí xjeen tí jehe tjan. Ntá kaín tí njnko tsonoxén sín kíxin janhan choxian nkehe tónhen asén kaín chojni. A ntá jnkojnko tí jahará la tsjénkahará nkexrí tí xrá kjuich'erá. ²⁴ A ntá tí í sorá tjejorá chjasin Tiatira tí chréhyará tí nkehe ntoáhya tjako sín la ko tjinkákonhyará chrókónohará tí nkehe jínahya kuènte ch'ín Tsochren la xíkahó la í tsétuághyará í jnko xrá. ²⁵ A ntá jahará la tí nkehe ó chontará la t'ayakonhénrá hasta tsokjan janhan. ²⁶ A ntá tí sín tsjacha sinchexiteyána sín la ko xíkaha sich'e sín hasta tsjixixín kíxin janhan tjínkavan xíkaha chrókjuich'e sín na mé janhan tsjánjuan kjuachaxin ts'etuenhen sín kaín nación. ²⁷ Na mé xíkaha T'aná mé chjina kjuachaxin tsétöan la kjaxin xíkaha jehe sín mé ts'etuenhen sín tí nación yóhe chróchóna sín ijnko chica vara kíxin chróchjéhe sín tí chj chrók'ókuen tí chj tsík'óna nchetje. ²⁸ Me kjaxin tsotjahá sín tí konotsé tí tji nchítjen. ²⁹ A ntá tí nkexro tjinkaon chrókuinhin la chrókuinhin tí nkehe nixjehé Nchakuen Dios tí njnko."

Tí tan k'uáyéhe tí sín chjasin Sardis

3 'Tsokjian tí nkehe ts'áyéhe tí ángel t'ayakonhen tí njnko chjasin Sardis: "Xíkaha ichro tí nkexro chóna yato Nchakuen kuènte Dios la ko chóna tí yato

konotsé: Janhan nõna kaín nkehe ch'erá, ó nõna kixin éxí tsík'en tí xrá ch'erá kjónté nchehnerá kixin tje-jochónrá. ² T'àyará. Naxá t'ayakonhénrá kjónté í tsjéhya tí nkehe kuítõhe kixin kjáxin tíha mero its'en. Ó k'uíkuã kixin tí xrá ch'erá la t'ikon tí Dios kuéntana kixin ntoáhya. ³ Chróxráinkáonrá tí nkehe tsíxrakohará la ko tíha chrókjuich'erá la chrókjanrá chróxráinkáonrá Dios. A ntá tí naxá tjejochrinrá la titáyá tsjasán éxí ijnko síchẽe la tsonoahyará nkesá tíha. ⁴ Kjánchó naxá síin iso chojni ntaha chjasin Sardis naxá kjuínchekjitàhya sín iké sín la jehe sín la ts'ájkian sín kixin chóna sín ka tjóá kixin jehe sín la jina sín. ⁵ Tí sín tsjacha sinchexiteyána sín la ts'áyéhe sín ka tjóá ts'inkáya sín la ko tsoxíkaha ihnié sín chóna tí libro ts'inixín ihnié tí sín tsaá la ko tsochoxian sín nkayakon T'aná la ko nkayakon tí sín ángel kuènte ch'án. ⁶ Tí nkexro tjinkaon chrókuinhin la chrókuinhin tí nkehe nixjehẽ Nchakuen Dios tí ninko."

Tí tan k'uáyéhe tí sín chjasin Filadelfia

⁷ Tsokjian tí nkehe ts'áyéhe tí ángel t'ayakonhen tí ninko chjasin Filadelfia: "Xíkaha ichro tí nkexro tjóá la ko chaxín mé tí nkexro chóna llave kuènte ch'in rey David. A ntá tí tsakitjehẽ ch'án puerta la ninkexró tsjachahya ts'ikjéhe, a ntá tí ts'ikjéhe ch'án puerta la ninkexró tsjachahya tsakitjehẽ. ⁸ Janhan ó nõna kaín nkehe tjejoch'erá. Kjuaké tí tjejorá ijnko puerta xitjehẽ la ninkexró xitjahya ts'ikjéhe. Kjónté intsíkoá kjuachaxin chontará la jahará kjuínchexiteyará tí nkehe kjuákua la ko kjuínchemáhyará tí janhan. ⁹ Tí sín tsíkitekaon Satanás la ntáchro sín kixin judío sín kjánchó jehya sín, xrich'ia sín la chr'éxin tsétuanhan sín ts'ejóxin toch'in sín chrínkí totará la ntá tsonhe sín kixin chaxín janhan tjuahará. ¹⁰ Ó kuítékáonrá tí nkehe kuétuanhanrá la jina tjejorá la mé xíkaha janhan ts'ayakonhanrá tí ichrén nkehe tsonhanrá tió tsi tí nkehe tsonhen kuenté chjasintajni kixin ó jehí xíkaha tsonhen kaín chojni tjejó chjasintajni. ¹¹ Janhan mé tjoka ts'inca. Méxra t'ayakonhénrá tí nkehe chontará kixin ninkexró chrókuakitsjahará tí nkehe ó kjuachará. ¹² Tí nkexro tsjacha sinchexiteyána la ts'óna sín columna kuènte ninko kuènte Dios kuéntana la nunca xitjahya sátsjixin sín ntiha. La janhan tsokjian ihnié tí Dios kuéntana tsjiko sín la ko tsokjian ihnié chjasén Dios kuéntana mé tí Jerusalén nixin tsixin nkajní tí tjen Dios kuéntana. Kjáxin tsokjian njina nixin tsochóna sín. ¹³ Tí nkexro tjinkaon chrókuinhin la chrókuinhin tí nkehe nixjehẽ Nchakuen Dios tí ninko."

Tí tan k'uáyéhe tí sín chjasin Laodicea

¹⁴ Tsokjian tí nkehe ts'áyéhe tí ángel t'ayakonhen tí ninko chjasin Laodicea: "Xíkaha ichro tí nkexro chaxín ntoá mé tí nkexro chrónka tí nkehe chaxín. Tí kjuachaxién ch'án kjuích'énoxín Dios kaín nkehe. ¹⁵ Ó nõna kaín nkehe tjejoch'erá. Ó nõna kixin jahará la ní jehya kinrá o sóará. Chrókóchaxín chrókókinrá o chrókóchaxín chrókósóará. ¹⁶ A ntá jahará la yásorá la

jehya ikinrá la jehya sóará. A ntá ijie ir'va ó tsíkia tí jahará la ts'itjia. ¹⁷ Ntáchrórá kixin jahará rícorá la imá jí-na tjejorá la ko ninkehó t'itjáyanhya tí tjejorá, ichrorá. Kjánchó chontahyará kjuachéhe la ko jehya jina tjejorá la ko nõará la ko ntakótánrá la ko tjóchínrá. ¹⁸ Méxra ijie ntáxraxinkáonrá janhan sintakjihará tí nkehe oro náxrjón ts'ík'axrjexín tja kixin ntá chaxín ts'ónará rico. La ko janhan sintakjihará ika tjóá kixin ts'ínkayará ntá tsjiinhanrá kjuatósuehe kixin í tjóchínhyará. La ko janhan tsjánjuan xroã kolirio tsjankí ikonrá kixin ts'ikonrá. ¹⁹ Janhan mé tsjéntuáha kaín tí sín tjuahá. Méxra íchá jina chrókjan sín chrókuinkáchónki sín Dios. ²⁰ Tsjehérá janhan itjén ntója puerta, tjét'eya. A ntá jnkojín nkexro chrókuinhin tí tanná ntá chrókuakitjehẽ tí puerta ntá chrók'uixanhan ntõe sín la chrókjónekian sín la ko jehe sín la ko janhan. ²¹ A ntá tí sín chrókjuacha chrókjuinchexiteyána la tsjánjuan kjuachaxin ts'ejókin sín tí tétõanxian ntiha la éxí xíkaha janhan kjuacha ntá T'aná kjuanjon kjuachaxin tjékjan ch'án tí tjen ch'án t'etõan ch'án ntiha. ²² Tí nkexro tjinkaon chrókuinhin la chrókuinhin tí nkehe nixjehẽ Nchakuen Dios tí ninko."

Tí sín tjikosáyehe Dios nkaya nkajní

4 Ntá chr'éxin janhan k'uíkuã ijnko puerta tjejrankehẽ nkaya nkajní. Ntá kuínhan ijnko itén nkexro éxí trompeta mé tí nkexro nixjana tí xrankíxixín, ntá jehe ch'án nixjana ch'án, ntáchro ch'án kixin: —T'it'ótjen ntihi ntá tsjákoã kaín nkehe tsonhen chr'éxin.

² Ntá tuénxín ikui tí kjuachaxin kuènte Nchakuen Dios k'uayáha ntá k'uíkuã tí trono itjen nkaya nkajní ntá ntiha tjetjaxín ijnko nkexro. ³ A ntá tí ch'ín tjetjaxín tí trono mé tjákini tsjehe éxí ixro jaspe o ixro cornalina. A ntá jnkontatjen tí trono itjen ijnko konchẽchã tjákini tsjehe éxí ijnko xro esmeralda. ⁴ A ntá kjáxin jnkontatjen tí trono k'uíkuã í so veinticuatro trono kjáxin tjejótjaxín veinticuatro sín táda, iké sín la tjóá la ko tjejóya kja sín corona tsík'óna chica oro. ⁵ A ntá tí trono kuènte Dios la ntiha sít'axrjexín tí sítjónkixín la ko sítjonta. A ntá nkayakon tí trono a kjáxin tjejóche yato xrohi la mé tí yato Nchakuen Dios. ⁶ A ntá nkayakon tí trono la kjáxin itjen ijnko ntayaon éxí xroxro tsjehe.

A ntá tí jnkosiné la ko jnkontatjen tí trono tjejó noó nkexro tjejóchón chóna nchónhya ikon nkayakon la ko nóton. ⁷ A ntá tí nkexro tjechón k'uíkuã saoxín mé éxí koxra tsjehe. A ntá tí nkexro yóxin tóyõhe éxí koxinta, a ntá tí nkexro nixin tsjehe éxí chojni. A ntá tí noóxin la éxí kotjuanhnko xritjaká tsjehe. ⁸ A ntá jnkojnko tí noó nkexro tjejóchón chóna injon kanẽne sín la chóna nchónhya ikon nóton la ko nkaxenhen, la nchakotjin la ko tie títoehya sín ntáchro sín kixin: Santo, santo, santo,

Inchéni Dios, jaha chonta kaín kjuachaxin, jaha xráxin tjen la ko itjen ijie la ko jaha ts'inca inaá.

⁹ A ntá tí nkexro tjejóchón jnkoyaxon tió tjanchia sín kjuasáyé Dios la ko tjikosáyehe sín ch'án la ko nixjehẽ sín ch'án chjehẽ sín kjuasáyé tí nkexro tjetjaxín tí trono

mé tí nkexro tjechón jnkochrín. ¹⁰ La ntá tí veinticuatro tí sín táda tjejóxin toch'in sín nkayakon ch'án ntiha la tjikosáyehe sín tí jehe ch'án kixin jehe ch'án tjechón jnkochrín la ko tjakjinjin sín corona tjoka sín tí tjen tí trono la ntáchro sín kixin:

¹¹ Ìnchéni Dios kuènteni, jaha la imá jína la t'ayéhe kjuasáya kixin tjikosáyahani tí jaha kixin tí kjuachaxin chonta;

kixin jaha kjuich'éna kaín nkehe síin kixin jaha kóxr-jínhan xíkaha k'óna.

Tí libro la ko tí Kolélo

5 A ntá tí tja chjina tí nkexro tjetjaxin tí trono, k'uíquàn ijnko libro mé tsíkjin sín nkaxenhen la ko nóton la ko mé tsíkjèxin yato sello. ² La k'uíquàn ijnko ángel chóna kjuachaxin ntá kjuanchankí ch'án itsen ntáchro ch'án kixin:

—¿Nkexro tí jína chrókjuacha chrókuakitjehé tí libro la ko chrókóchrítõn tí sello chóna?

³ La ninkexró ní nkajní ɔ ní chjasintajni ɔ ní chrínkí nonte tsjachahya tsakitjehé tí libro la ní komáhya sín.

⁴ A ntá janhan la imá tsjanka kixin naxá tónoxínhya ninkexró chrókjuacha chrókuakitjehé tí libro ɔ chrókjuinchekuáxin tí libro ɔ chrókomá nkehe tí ntáchro tí libro. ⁵ Ntá ijnko tí sín táda ntá nixjana ntáchro kixin:

—Tsjankahya, tsjehé ntihi tí Koxrā k'uaxrjenixin Judá la ko tsík'axrjenixin rey David. Mé kjuacha la ó tsjacha tsakitjehé tí libro la ko tsóchrítõn tí yato sello —ichro ch'án.

⁶ A ntá jnkosiné tí trono la ko tí tjejó tí noó tí nkexro tjejóchón la ko jnkosiné tí tjejó tí sín táda ntaha mé k'uíquàn tjexín toté ijnko Kolélo tsjehe éxí tsík'óyán sín mé chóna yato ntèé la ko yato ikon. A ntá tí kon mé tí yato Nchakuen Dios la táha mé tsík'ítuenhen t'ayakonhen kuenté chjasintajni. ⁷ A ntá tí Kolélo a kuákja tí libro itjen tja chjina tí nkexro tjetjaxin tí trono. ⁸ A ntá tí k'uáyéhe ch'án tí libro la ntá tí noó sín tjejóchón la ko tí veinticuatro tí sín táda k'uéjóxin toch'in sín nkayakon tí Kolélo. A ntá kaín tí jehe sín chóna sín ison arpa la ko xraá sín ihnti tsík'óna chica oro tsíkaón chjincɔ. Tíha mé oración nixjehé Dios kaín tí sín tsíkjinchetjóá ch'án. ⁹ Itsje sín nkehe nixin ntáchro kixin:

Jaha mé ijnko nkexro jína kjuacha kuákja tí libro la ko kóchrítuan tí sello;

kixin tsík'óyán sín tí jaha la ko tí ijniá k'uēnaxian tí jeheni ts'áyéhe Dios,

mé ts'áyéhe ch'án kenxín chojni kjónté nkexrí tsjehe sín la ko kjónté nkexrí nixja sín la ko chojni kénxín chjasin la ko kaín nación.

¹⁰ Jaha tsíkjinchenani reyes la ko nchat'á sich'ehe xra Dios kuènteni,

la ko jaha tsíkjánjuan kjuachaxin ts'etõanni chjasintajni.

Mé xíkaha ichro sín.

¹¹ Ntá tuénxín k'uíquàn la ko kuínhan itén nchónhya sín ángel tjejó sín jnkontajten tí trono la ko tí sín tje-

jóchón la ko tí veinticuatro tí sín táda. Nchónhya millones la ko millones tí jehe sín. ¹² Itsen nixja sín ntáchro sín kixin:

Tí Kolélo tsík'óyán sín,

tíha mé kjuacha k'uáyéhe kjuachaxin ts'etõan la ko k'uáyéhe tí nkehe tjehe kuènte Dios,

la ko tí kjuaxrexinkaon jína la ko kjuachaxin sich'e xra la ko mé xíkaha tjikosáyeheni ch'án.

¹³ Kjaxin kuínhan kixin kaín nkehe kjuich'éna Dios síin nkajní la ko chjasintajni la ko tí nkehe síin chrínkí nonte la ko kaín nkehe síin ntayaon la kaín tíha mé ntáchro kixin:

Chjeheni kjuasáya tí nkexro tjetjaxin tí trono la ko tí Kolélo

kixin chóna kjuachaxin jnkochrín.

¹⁴ A ntá tí noó sín tjejóchón ntáchro sín kixin:

—Xíkaha tsõnhen. Amén.

La ko tí veinticuatro tí sín táda k'uejóxin toch'in sín la chjehé sín kjuasáyé tí nkexro tjechón jnkochrín.

Tí yato sello

6 A ntá k'uíquàn kixin tí Kolélo kóchrítõn tí xránkixixín tí yato sello ntá kuínhan ijnko tí noó tí noó tí sín tjejóchón nixja ch'án éxí kjónta, la ntáchro ch'án kixin:

—Xrákiá tsjehé.

² Ntá k'uíquàn ijnko kokatē tjóá. A ntá tí nkexro tjejen tí kokatē chóna ch'án ijnko arco tí tja ch'án la tsík'áyéhe ch'án ijnko corona. Jehe ch'án mé kjuacha ch'án la naxá xikjacha ch'án inaá.

³ A ntá tí Kolélo kóchrítõn tí yóxin sello ntá kuínhan tí nkexro yóxin tjechón ntáchro kixin: —Xrákiá tsjehé.

⁴ Ntá sákjuí í jnko kokatē kjátse. A ntá tí ch'ín tjejen k'uáyéhe ch'án kjuachaxin tsjakjin tí kjuaxróxin síin chjasintajni kixin ntá chojni mé ts'óyán kichó sín kixin jehe ch'án mé tsík'áyéhe ch'án ijnko espada ijié.

⁵ A ntá tí Kolélo kóchrítõn tí níxin sello la ntá kuínhan nixja tí níxin nkexro tjechón ntáchro kixin:

—Xrákiá tsjehé.

Ntá k'uíquàn ijnko kokatē tié. A ntá tí nkexro tjejen tí kokatē chóna itja ch'án ijnko báscula. ⁶ La ntá kuínhan itén ijnko nkexro jnkosiné tí tjejó tí noó sín tjejóchón mé ntáchro kixin:

—Jehó ijnko kilo trigo ijnko chichaon denario la ko iní kilo cebada ijnko chichaon denario. Kjánchó chrókjuinchek'itjáyanyha tí aceite la ko tí vino. (Tíha mé t'axrjexín tsokjinta.)

⁷ A ntá tí Kolélo kóchrítõn tí noóxin sello ntá kuínhan tí noóxin tí nkexro tjechón ntáchro kixin:

—Xrákiá tsjehé.

⁸ Ntá k'uíquàn ijnko kokatē sine. A ntá tí ch'ín tjejen va a mé it'in ch'án Muerte. A ntá nóton tí jehe ch'án la ikui nkehe tóyóhe tí tjejó tí sín tsík'en. Jehe ch'án k'uáyéhe kjuachaxin ts'etõan ch'án noóxin parte chjasintajni kixin ntá ts'óyán kichó sín la tsokjinta la ko ts'enxín sín ichin la ko kaín ko jjehe síin chjasintajni mé tsjaya va.

⁹ A ntá tí Kolélo kóchrítón tí n'óxin sello ntá k'uíquān chrínkí tí altar tí asén tí sín tsík'enxín tí tan kuènte Dios tsíchrónka sín. ¹⁰ Ntáchro sín itsen kixin:

—Jaha mé Ìnchéni tjóá jína la jaha mé sìnchexiteyá tí nkehe tsintáchrúa, ¿la nkesá sìnchekitoexián ijíé tí sín sín chjasintajni tsík'óyán tí jeheni? —ichro sín.

¹¹ A ntá tí sín a mé k'uáyéhe sín iké sín tjóá ntá k'uituenhen sín naxá ts'ók'éhe sín í so yaon tsoxetajia tí número tí kichó sín ch'ehe xra Cristo naxá ts'enxín sín éxí k'uén tí jehe sín.

¹² A ntá tí Kolélo kóchrítón tí injonxin sello ntá xri-nahya imá kuínkí nonte. A ntá tí yaon la kótié éxí ika tjiko chojni tsík'en. A ntá nitjó k'óna kjátse éxí jni. ¹³ A ntá konotsé sít'ánótjēnxin nkajni sítjitsínka nonte éxí yóhe tí inta t'óna to higo la sixènjín tí to yoa tió tsjixraya tí nta kixin tí imá fuerte chjéhe xrinto. ¹⁴ A ntá nkajni k'uitjāyan éxí ijnko xroon tsíxrēya. Ntá kaín jnā la ko tí nonte ntsínsí siín jnkōsiné ntāyaon sákjuí ókjé. ¹⁵ A ntá kaín tí sín reyes siín chjasintajni la kjaxin tí sín t'etōan la ko chojni rico la ko comandante la ko tí sín chóna kjuachaxin la ko kaín tí sín ch'exón xra la ko tí chojni náhi mé k'uixenhen sín tjo siín netjē ts'ejómáxin sín. ¹⁶ Ntáche sín tí jnā la ko tí tjo kixin:

—Xrákiá xrátja tí jeheni nchemáni kixin chrók'uikonhyani tí nkexro t'etōan tjetjāxin trono la ko chrókjuasótehyani tí kjuachrakon jíé tsjanjon tí Kolélo.

¹⁷ Kixin ó kui tí yaon imá jíé kuènte kjuachrakon la, ¿xá nkexro chrókjuacha chrók'uejó ntiha?

Tí sín israelita chóna sello

7 A ntá chr'éxin k'uíquān noó sín ángel tjejóxin toté sín la jnkōjnko sín tjejó sín tí chrínta chjasintajni chónthehe sín tí noó xrinto kixin tsochjéhya xrinto chjini chrítaón chjasintajni la ko ní chrítaón ntāyaon la ko ni-jnko tí nta yoa. ² Kjaxin k'uíquān í jnko ángel kjuixin nó tjitōxin yaon la chóna sello kuènte Dios tjechón. Ntá tí ángel mé k'uíyēhe ch'án itsen tí noó ángel tsík'áyēhe kjuachaxin sincheníhi nonte la ko ntāyaon. ³ Ntáchro ch'án kixin:

—Náhi, sìncheníehya nonte la ko ntāyaon la ko kjaxin tí nta la náhi tí naxá tsíkahya sello totjen tí sín ch'ehe xra Dios kuènteni.

⁴ Kuínhan tí número tí sín tsíka sello la me ciento cuarenta y cuatro mil káin tí sín tsík'axrjeníxin tí sín israelita. ⁵ Teyó mil tí sín tsíka sello tsík'axrjeníxin tí Judá la ko teyó mil tí sín tsíka sello tsík'axrjeníxin sín Rubén la ko teyó mil tí sín tsíka sello tsík'axrjeníxin sín Gad ⁶ la ko teyó mil tí sín tsíka sello tsík'axrjeníxin sín Aser, la ko teyó mil tí sín tsíka sello tsík'axrjeníxin sín Neftalí la ko teyó mil tí sín tsíka sello tsík'axrjeníxin sín Manasés ⁷ la ko teyó mil tí sín tsíka sello tsík'axrjeníxin sín Simeón la ko teyó mil tí sín tsíka sello tsík'axrjeníxin sín Leví la ko teyó mil tí sín tsíka sello tsík'axrjeníxin sín Isacar ⁸ la ko teyó mil tí sín tsíka sello tsík'axrjeníxin sín Zabulón la ko teyó mil tí sín tsíka sello tsík'axrjeníxin sín José la ko teyó mil tí sín tsíka sello tsík'axrjeníxin sín Benjamín.

Siín nchónhya chojni chóna ka tjóá

⁹ Ntá kjuixin tíha ntá k'uíquān nchónhya chojni kaín xín nación la ko kaín xín nkexrí tsjehe sín la ko kaín xín nkiva la ko kaín xín chjasin mé tjejóxin toté sín nkayakon tí trono la ko nkayakon tí Kolélo. Nchónhya sín la kohya ninkexró tsjacha ts'ekin nkekjāin tí jehe sín la tjejóya sín ka tjóá la tjejóya kajni tja sín. ¹⁰ Kaín sín itsen nixja sín ntáchro sín kixin:

Dios kuènteni mé kjuínchekaáni.

Jehe ch'án mé tjetjāxin tí trono tí tjen tí Kolélo kjuínchekaáni.

¹¹ Kaín tí sín ángel tjejóxin toté sín jnkōtājten tí trono la ko jnkōtājten tí sín táda la ko tí noó sín tjejóchón la ntá k'uejóxin toch'in sín la k'uísen sín hasta káxin ika sín nonte nkayakon tí trono la tjanchehe sín kjuasáye Dios. ¹² Ntáchro sín kixin:

Amén. Kjuíncheyaonni Dios la tsochjéheni Dios kjuasáya kixin kaín tí kjuaxrexinkaon jína tjanjon ch'án la ko tjancheheni ch'án kjuasáya.

Tsjikosáyeheni tí kjuachaxin kuènte ch'án kixin tjinkit-sani ch'án jnkochrín. Amén.

¹³ A ntá ijnko tí sín táda kjuanchankina, ntáchro kixin:

—A ntá tí sín tjejóya ika tjóá la, ¿xá nkexro tíha? la ko ¿xá nketí tsíkjixín sín?

¹⁴ Ntá janhan ntáxrjan kixin:

—Ìnchéni, jaha ó noha. Ntá jehe ch'án ntáchro ch'án kixin:

—Tí sín í tsíkjixín sín tí kjuaxróxinhya k'uék'ejó sín, la tí sín a mé tsíjen sín iké sín la ko tsíkótjuáxin ijnié tí Kolélo. ¹⁵ Méxra xíkaha ntá ijie tjejó sín nkayakon tí trono kuènte Dios la tjejóch'ehe sín xra Dios nchākotjin la ko tie tí nkaxenhen njnko kuènte ch'án. A ntá tí nkexro tjetjāxin chrítaón tí trono mé t'ayakonhen ch'án sín. ¹⁶ A ntá tí sín a mé ts'enxinhya sín kjinta la ko ts'enxinhya sín intā la ko tsochjānxinhya sín yaon la ko ni sóa kohya nkehe sich'ehe sín. ¹⁷ Kixin tí Kolélo tjen jnkōsiné tí trono mé t'ayakonhen ch'án tí jehe sín éxí iko kuènte ch'án la ko sātjiko ch'án tí tjā ntā tjanjon kjuachón la Dios mé sìnchexámá kaín tí ntākon tí jehe sín.

Tí yatōxin sello la ko tí ihnti oro

8 A ntá tí Kolélo kóchrítón tí yatōxin sello kuènte tí libro la ntá kohya ninkehó ruido nkajni chjina it'ō hora. ² Ntá tuénxín k'uíquān yato ángel tjejóxin toté nkayakon Dios la jnkōjnko sín k'uáyéhe sín jnkōjnko trompeta. ³ Ntá chr'éxin ikui í jnko ángel xraá ihnti tsík'óna chica oro la kjuák'exín toté nkayakon tí altar. K'uáyéhe ch'án nchónhya chjincō tsjak'e ch'án kixin sátsjiko tí oración kuènte kaín tí sín tsíkjinchetjóá Dios kixin tsjak'e chrítaón tí altar oro nkayakon tí trono. ⁴ A ntá tí ihnti kuènte chjincō chrínxín tja tí ch'ín ángel tí tjen Dios la ko kjaxin tí oración kuènte chojni tsíkjinchetjóá Dios. ⁵ A ntá tí ch'ín ángel kuákja ch'án tí ihnti kjuínchekaón ch'án xrinta kuènte xrohi kuènte tí

altar la ik'ue ch'án chjasintajni. La ntá kjónta la ko nchónhya ruido la ko sítjónkíxín la ko kuínkí nonte.

Tí trompeta

⁶ A ntá tí yato ángel mé chóntha sín jnkojnko trompeta ó yaxínhin sín kixin ts'ánoa sín.

⁷ A ntá tí ángel saoxín k'uánoa trompeta ntá k'uániá toni la ko xrohi tsínkíkjan jni mé xíkaha ikui chrítaón chjasintajni. A ntá iche níxin parte nonte la ko níxin parte tí nta la ko kaín tí kayoa síin.

⁸ A ntá tí yóxin ángel k'uánoa trompeta la ijnko nkehe yóhe tsjehe éxí ijnko jna jíe tjeche la sákjuí kjuíankí ntayaon la ntá níxin parte tí ntayaon la k'óna jni. ⁹ A ntá tí níxin parte kaín tí nkehe síin tí ntayaon la ik'uén la ko níxin parte kaín tí ntabárcq la síka.

¹⁰ A ntá tí níxin ángel k'uánoa trompeta la ntá xrínaḡhya k'uánótjen ijnko konotsé jíe k'uánótjenxin nkajní mé tjeche éxí ijnko xrohi jíe. K'uánótjen chrítaón níxin parte ntario la ko tí sít'axrje ntá. ¹¹ Tí konotsé mé it'in Itsjá la tsíkjiankí níxin parte tí ntá ntá kótsjá tí ntá la nchónhya chojni ik'uén kixin tí ntá xíkaha tsíkótsjá.

¹² A ntá tí noóxin ángel k'uánoa trompeta la kjuíncheníhi ijnko níxin parte tí yaon la ko níxin parte tí nitjó la ko níxin parte tí konotsé. Méxra tí níxin parte kúitqhe sítié la í kohya t'inkaséyan tí níxin parte tí nchakotjin la ko tí tie.

¹³ Ntá tuénxín k'uíkuḡ la ko kuínhan ijnko ángel tjetjaká jnkosiné nkajní t'èya ch'án itsen, ntáchro ch'án kixin:

—Nòda tí sín tjejó chjasintajni tió tsontáchro tí trompeta ts'ánoa tí iní ángel inaá.

⁹ A ntá tí n'óxin ángel k'uánoa trompeta la k'uíkuḡ ijnko konotsé tsík'ánótjenxin nkajní chrítaón chjasintajni ntá k'uáyéhe tí llave kuènte tí tòye njnka. ² A ntá tuénxín xitjehé tí tòye njnka ntá ntiha chriinxín nchónhya ihnchi kuènte tjá ntá tí t'inkaséyanxín yaon la ko tí xrinto k'uúxin tié kixin tí ihnchi kuènte tí tòye. ³ A ntá tí ihnchi mé k'uaxrjexín kochjoa xritjaká chrítaón chjasintajni. A ntá tí kochjoa k'uáyéhe kjuachaxin éxí tí chóntha konchija síin chjasintajni. ⁴ K'uútuénhen va kixin sincheníehya va tí kayoa síin chjasintajni la ko ninkehó nkehe yoa la ko ninkehó ntayoa. Jehó chojni chónthahya sello kuènte Dios tí totjen mé sincheníhi va. ⁵ Kjánchó k'uáyèhya va kjuachaxin ts'óyan chojni. Jehó sinchekjoté va chojni hasta in'ó nitjó la tí kjuatjoté mé yóhe kjuatjoté éxí chojni tsíkjinehe konchija. ⁶ A ntá tí yaon a tsotjinkaon chojni chrók'uen sín la ntá xitjahya its'en sín. Kjónté tjinkaon sín chrók'uen sín la tí muerte sátsíkji ókjé.

⁷ A ntá tí kochjoá éxí kokate tsjehe, listo tjen sátsjikjanjon va. A ntá tí ikja va itjen nkehe tóyóhe ijnko corona tsík'óna oro la ko tí kàré la tóyóhe éxí kàré chojni.

⁸ A ntá tí kaxree va tsjehe tóyóhe éxí kaxihi chojni chjin, a ntá tí neno va la tóyóhe neno koxra. ⁹ A ntá tí cuérpóé la tjeckjanjin nkehe tsík'óna chica kixin kohya nkehe tsonhen va. A ntá ruido kuènte kanenee la éxí nchónhya carro tinkánkákjen kokate tió xritinká tí síin kjuanínkaon. ¹⁰ A ntá tí ntané va mé tsjiate chojni la éxí

ntané konchija, la tíha mé tsochóntha kjuachaxin sincheníhi chojni hasta in'ó nitjó. ¹¹ A ntá tí kochjoá mé chóntha ijnko nkexro t'etqan mé ijnko ángel kuènte tí tòye njnka. Tí ángel mé nkiva hebreo mé it'in Abadón la nkiva griego la mé Apolión mé t'axrjexín kixin táha mé sinchek'itjayan nkehe.

¹² Mé xíkaha kónhen tí kjuachrakon xrankíxixín. A ntá naxa t'itjayan yaá inaá.

¹³ A ntá tí injonxin ángel k'uánoa trompeta la kuínhan ijnko itén nkexro k'uaxrjexín tí tjejó tí noó ntéé kuènte tí altar oro tí tjen Dios. ¹⁴ A ntá tí itén tí nkexro ntáche tí injonxin ángel chóntha trompeta kixin:

—Tjasintankehé tí noó ángel kuènte tí jínahya tjejóchroé chjinaxón tí ntario jíe it'in Eufrates.

¹⁵ Ntá xíkaha xintankehe tí noó sín ángel kixin ts'óyan sín tí níxin parte chojni. Mé xíkaha yaxínhin sín sátsji sín tí hora la tí yaon la tí nitjó la tí nánó. ¹⁶ Ntá kuínhan tí número tí soldado la ko tí kokate la doscientos millones.

¹⁷ Mé xíkaha xrínaḡhya k'uíkuḡ tí kokate. A ntá tí sín tjejókjen kokate la tí ntakuin sín chóntha nkehe tsík'óna chica kjátse la azul la sine. A ntá tí kokate la ikja la éxí kja koxra la tí ir'va la k'uaxrjexín xrohi la ko ihnchi la ko azufre. ¹⁸ A ntá níxin parte chojni tsík'enxín tí iní clase tí chin tsík'axrjexín ir'va kokate mé xrohi la ihnchi la azufre. ¹⁹ Tí kjuachaxin chóntha tí kokate la k'uaxrjexín ir'va va la ko tí ntané va. A ntá ntané la éxí konche tsjehe la tí kja va mé sincheníhi chojni.

²⁰ A ntá tí í so chojni kúitqhe k'uénxinhya tí chin a la kjónté kjuinkíhya sín tí nkehe tjenkayáxin sín la kúitqehya sín tinkáchónki sín nchakuen jínahya la ko tí nkehe tsíkjanqya chica oro la ko chica plata la ko chica bronce la ko ixro la ko inta, mé tí nkehe t'ikonhya la ko tienhya la ko tjihya. ²¹ La kjónté xíkaha la kúitqehya sín tí nkehe jínahya ch'e la ko tí chrók'óyan kichó la ko tí nchekjiko kichó la ko tí chóntha sín chojni chjin ókjé la ko tí tjinkaon sín chrókueé.

Ijnko ángel la ko tí librito ntsí

¹⁰ Ntá k'uíkuḡ í jnko ángel imá chonta kjuachaxin k'uínkajinxín nkajní tjenkakjan ch'án tjuí la ko ijnko konchexa chrítaón tí ikja ch'án. A ntá tí kàré ch'án imá tjákini tsjehe éxí yaon, a ntá tí toté la éxí xrohi síchr'ákjen. ² Tjexraá ch'án ijnko libro ntsí tjeckrankehe, la ntá toté ch'án chjina la chrítaón ntayaon la ntá toté ch'án kjon la chrítaón nche. ³ Ntá xrínaḡhya k'uèya ch'án itsen éxí ijnko koxra tsjánka va tí tónínkaon va mé xíkaha k'uèya la yato kjónta kjuatéya tí itén ch'án. ⁴ Ntá kjuixin ntáchro tí yato kjónta la chrókjian ntá kuínhan ijnko itén nkexro nkaya nkajní ntáchro kixin:

—Chróchronkahya tí nkehe ntáchro tí yato kjónta la ko ni chrókjinhya tíha.

⁵ Ntá tuénxín tí ángel k'uíkuḡ ijnko toté tjeckjen ntayaon la ijnko toté tjeckjen nche ntá kjuaya tja chjina nó nkajní. ⁶ Ntá kjuasin ch'án testigo tí nkexro tjen jnkochríxín mé tí nkexro a mé kjuích'èna nkajní la ko

chjasintajni la ko ntayaon la ko kaín xín nkehe siín la ntáchro ch'án kixin:

—Í séhya má naxa tsoxrjen ⁷ ntá tsjixraká tí yaon tí yaotxin ángel ts'ánoa trompeta ntá tsoxiteyá tí nkehe jehó Dios nohe kixin xikaha tsíchénka ch'án tí sín k'uékjich'ehe ch'án xra ósé k'uéchrónka sín itén ch'án.

⁸ A ntá tí itén nkexro kuinhān k'uaxrjexín nkaya nkajní ntá xínixjana inaá ntáchro kixin:

—Sátjia tákjá tí libro ntsí tjexrankehē tjexraá tí ángel itjen toté ch'án chrítaon ntayaon la ko chrítaon nche.

⁹ Ntá sákjuia kjuáncháha tí ángel tí libro ntsí ntá jehe ch'án ntáchro ch'án kixin:

—Tákjá la inte. A ntá tí ir'va la tsqxé éxí tsjen kjánchó tí tsaa la tsotsjá.

¹⁰ Ntá kuákjaá tí libro ntsí tjexraá tí ángel ntá kjonè. A ntá ir'va kóxe éxí tsjen ntá chr'éxin la kótsjá nkaya tse-na. ¹¹ Ntá tuénxín k'uetuanna ch'án kixin:

—Inaá tsochrónkaxián itén Dios tsinhin nchónhya chjasin la nación la ko nkiva la ko tsinhin tí sín reyes.

Iyó testigo

11 A ntá chjina ch'án ijnko ntavara éxí tji tsjehe tsjáchrōaxián ntá ntáchro ch'án kixin:

—T'àyá tjáchrōa nkaxenhen njnko kuènte Dios la ko tí altar la tékia nkekjaín nkexro tjejó ntiha tinkáchónki Dios. ² Kjánchó tí ntāsin itjen ntója njnko la tjáchrōahya kixin táha ó tsík'áyéhe tí sín tsíkjixín kjín la ntá jehe sín tsjikosáyehya sín tí chjasin tjóá Jerusalén ijnko cuarenta y dos nitjó. ³ A ntá mé janhan tsochr'an iyó testigo kuèntana tsonixjāxinnā mil doscientos sesenta yaon. Tí iké sín la ika tié ts'ejóya sín.

⁴ Tí yaá testigo i mé iyó nta olivo la ko iyó candelero tjejó tí tjen Ìnchéni kuènte chjasintajni. ⁵ A ntá tí jnko-jín sín tjinkaon sich'ehe sín daño la jehe sín la xrohi ts'axrjexín ir'va sín la tsoche kaín tí sín nínkakonhen sín la mé xikaha its'en kaín tí sín tjinkaon sich'ehe sín daño tí jehe sín. ⁶ A ntá tí testigo i chóna kjuachaxin ts'ikjehē nkaya nkajní kixin í ts'aniáhya chrin tí tsonixja sín kuènte Dios la ko kjaxin chóna sín kjuachaxin tsontáche sín tí ntā kixin ts'óna jnī la ko sinchekjasótexín sín chojni chjasintajni nchónhya clase chin nchónhya veces éxí tí tjinkaon sín. ⁷ A ntá tí kjuixinhin sín tí xra ntá tí ko jjehe ts'axrjexín tí tòye njnka mé ts-jankixín tsjanjonko tí jehe sín ntá tsjacha va ts'óyán va tí jehe sín. ⁸ A ntá tí cuérpōé sín tsitōhe sítsínka tí calle kuènte chjasin jié tí tsíkjak'enkani sín Ìnchéni ntacruz mé tí chjasin mé kjaxin nchek'in sín Sodoma la ko Egipto. ⁹ A ntá iní yaon ko t'ō la kaín chojni itsjé chjasin la ko kaín nkexrí tsjehe sín la ko nchónhya nkiva la ko nchónhya nación ts'ikon sín tí chojni tsík'en tjejótsínka sín ntiha la ko tsjanjonhya sín kjuachaxin tsoxravá tí chojni tsík'en a. ¹⁰ A ntá tí sín tjejó chjasintajni tsōchéhe sín kixin xikaha tsík'en tí sín a la antsí má tsōchéhe sín la tsochr'án sín nchónhya nkehe nchekj-tonhen kichó sín kixin xikaha ik'uén tí yaá sín k'uéchrónka itén Dios kixin jehe sín kjuaxróxinhya k'uék'ixín sín tí chjasintajni tí k'uék'ejó tí sín a. ¹¹ A ntá chr'éxin ó k'uátsínka iní yaon ko t'ō la ntá Dios

kjuínchexechón tí iyó tí sín a inaá la k'uàya sín inaá la ntá kaín chojni k'uíkon la imá chrakon sín. ¹² Ntá tuénxín tí iyó sín testigo kuínhin sín ijnko nkexro nixja itsen nkaya nkajní ntáchro kixin:

—Chriyan xrákiá antsí ntihi.

Ntá chríinxín sín nkajní ijnko tjuj. A ntá kaín tí sín nínkakonhen sín la k'uíkon sín kixin xikaha kónhen sákjuj tí iyó sín a. ¹³ Ntá tuénxín imá kuínkí nonte la ntá ijnko ite parte chjasin ntiha la k'uítjāyan la yato mil chojni tsík'en kixin tí kuínkí nonte. A ntá kaín tí sín xéhe imá chrakon sín la kjuankixin sín tinkáchónki sín Dios la tjanchia sín kjuasáya.

¹⁴ Mé xikaha kónhen tí yóxin kjuaxikaon la ntá tuénxín itsi tí nixin kjuachrakon inaá.

Tí yaotxin trompeta

¹⁵ A ntá tí yaotxin ángel k'uánoa trompeta ntá kuínhin sín ijnko tan nkajní itsen ntáchro kixin:

A ntá tí sín k'uáyéhe kjuachaxin kuènte chjasintajni la ó kjaxin nchexiteyéhe sín

Ìnchéni Jesucristo

kixin jehe Jesucristo mé ts'etōan ch'án jnkochríxín.

¹⁶ A ntá tí veinticuatro tí sín táda tjejótxāxín sín trono nkayakon Dios la mé k'uísén sín hasta káxin ikja sín nonte la tjanchehe sín kjuasáya Dios. ¹⁷ Ntáchro sín kixin:

Tjáhani kjuasáya jaha Ìnchéni Dios imá chonta kjuachaxin.

Jaha itjen la ko xráxin tjen la ko jaha ts'inka inaá. Kixin jaha k'uayéhe kjuachaxin jié kixin xráxin tétōan.

¹⁸ A ntá kaín tí nación kónínkaon, a ntá ó kui tí yaon jaha sinchekjasóte sín la ko kjaxin jaha sinchekitōexián ijje tí sín tsík'en la ko tsjénkehé tí sín kjuít'aha xra chrónkaxín itán la ko tí sín ó kjuínchetjóá la ko tí sín kjuikosáyehe tí ihnjá,

mé tí chojni nteto la ko tí sín chánjan ntsínsí.

Jaha tjoka sinchek'itjāyan tí sín chrókuinchek'itjāyan chjasintajni.

¹⁹ A ntá xitjehē tí njnko Dios tjen nkaya nkajní, a tí nkaxenhen kónoxín tí caja tjinká tí nkehe tsík'etōan Dios. A ntá sítjónkixin la ko nchónhya ruido sítjonta la ko kuínkí nonte la ko imá tsankā k'uániá toni.

Tí chojni chjin la ko tí dragón

12 A ntá kónoxín nkajní ijnko kjuaxroan jié mé ijnko chojni chjin iké tjákiní éxí yaon tsjehe la chrínkí toté tjan itjen nitjó. A ntá tí kja tjan tjenkáya ijnko corona chóna teyó konotsé. ² A ntá tí chojni chjin a mé tjejá tjan la t'èya tjan kixin tjeté tjan kixin sinchekokjīhi tjan xjeen tjan. ³ Kjaxin kónoxín í jnko kjuaxroan nkajní mé ijnko dragón kjátse chóna yato kja la ite ntèe la jnkojnko corona jnkojnko kja. [Tí dragón mé ijnko kots'aja jié.] ⁴ Tí ntané mé nkánkákjen nixin parte konotsé kuènte nkajní la ik'ue chrítaon chjasintajni. A ntá tí dragón kjuák'e chók'exín tí tjen tí chojni chjin mero tsokjīhi xjeen kixin tjinkaon tjoka

chrókjóné tí xjan tsokjíhi. ⁵ A ntá tí xjan kjuínchekokjíhi tjan mé xjan ntoa kíxin jehe ch'án mé ts'etueñhen ch'án kaín nación la tsochónta ch'án ijnko vara chica ts'etuanxín ch'án. Ntá tí xjeen tjan la mé Dios sákjuíko tí tjen ch'án t'etuan ch'án. ⁶ A ntá tí chojni chjin la kuinká tjan sákjuí tjan nteje kíxin tsíkjincheyóxin Dios nketí sátsji tjan kíxin ntaha tsoxranjon nkehe sine tjan mil dos cientos sesenta yaon.

⁷ Ntá chr'éxin xrinañya k'uúixin kjuanínkaon jié nkajní la mé tí arcángel Miguel la ko tí í so ángel xriko ch'án mé kjuánjonko sín tí dragón, la tí dragón la ko tí ángel kuènte mé kjuánjon sín. ⁸ Kjánchó kjuachahya tí dragón la kohya lugar kuènte nkaya nkajní. ⁹ Mé xíkaha kuakitsjexín sín tí dragón nkajní. Jehe mé tí konche ósé ikjí mé nchek'in sín diablo la ko Satanás. Jehe mé k'uékjich'iyehé tí chojni kuenté chjasintajni. Jehe la ko tí sín ángel kuènte k'uaxrjexín ntiha la kjuitsínka chjasintajni.

¹⁰ Ntá kujñhan itén ijnko nkexro nkaya nkajní itsen nixja ntáchro kíxin:

—Ó kui ti tsaáxinni tí kjuachaxién tí Dios kuènténi la ko tí kjuachaxin t'etuan Cristo kíxin ó k'uaxrjexín nkajní tí nkexro t'eka jje tí kichó ni mé kjuanchia jje nchakotjin la ko tie nkayakon Dios kuènténi. ¹¹ Tí sín kichó ni la kjuacha sín kuaáxin sín kíxin tí ijníé tí Kolélo k'úitji la ko kíxin jehe sín chrónkaxín sín tí tan tsík'áyehé sín la chrakonhya sín kjónté chrók'uenxín sín. ¹² A ntá jie la tócháhará kaín rá tjejorá nkajní. Ntá nòla tí sín tjejó chjasintajni la ko ntayaon kíxin k'uínkaon jíni tí ch'ín diablo la imá nínkaon ch'án kíxin ó nohe ch'án kíxin í kánhyó sé tsjak'e ch'án.

¹³ Ntá tí ch'ín dragón ó nohe kíxin k'uánótjenxin nkajní ikui chjasintajni ntá sákjuíchréhe tí chojni chjin chóna tí xjan ntoa kíxin chrókjuinchek'itjáyan tjan. ¹⁴ Kjánchó tí chojni chjin k'uáyehé yaá kanengee kuènte kotjuañhko ijíé kíxin jína tsjaká tjan sátsji nteje kíxin ntá ikjín tsitqhe tí konche. Sátsji tjan kíxin ntiha tsoxranjon nkehe sine tjan iní nánó ko t'q. ¹⁵ A ntá tí konche mé k'uaxrjexín ntá ir'va kíxin ts'óna ijnko ntario kíxin tjinkaon va chrók'uátjoáko tí tjan a tí ntá a. ¹⁶ A ntá tí nonte kjuínkítsa tí tjan a kíxin xitjehe ir'va nonte la kaín tí ntá k'uaxrjexín ir'va tí konche la ntahó sákjuí k'uúixenhen. ¹⁷ A ntá tí dragón la imá kóninkakonhen tí tjan a ná imá kónínkaon kjuánjonko tí í so sín naxa kjéhya tí tjan a kíxin naxa titekaon sín tí nkehe tsík'etuan Dios la naxa tinkáchónki sín tí nkehe tsíchrónka Jesucristo.

Tí yaá bestia

13 Tí kjuak'é chrínta ntayaon ntá ntaha k'uúikuñ chriínxín ijnko bestia chóna yato kja la ko ite ntéé chojni t'ántaxínhin Dios. ² Tí bestia k'uúikuñ mé tóyóhe kotigre la chóna toté éxi toté ko oso la ko tí ir'va la éxi ir'va koxra. Tí dragón kjuanjón kjuachaxin imá ts'etuan tí bestia a. ³ A ntá ijnko kja tí bestia chóna ijnko tsíchrít'q jíé chóna chrók'uenxín ntá tsíkitohe jína ntá kuenté chjasintajni la chrakon chojni ntá chréhe sín tí bestia. ⁴ Kjuikosáyehe sín tí dragón kíxin jehe

kjuanjón tí kjuachaxin k'uáyehé tí bestia ntá kjañin kjuikosáyehe sín tí bestia la ntáchro sín kíxin:

—¿Xá nkexro chrókóyóhe tí bestia la xá nkexro chrókjuacha chrókjuanjónko tí jehe?

⁵ Kjañin tí bestia k'uáyehé kjuachaxin tsontáchro kíxin chóna kjuachaxin má la ts'ántaxínhin Dios la tsochónta kjuachaxin cuarenta y dos nitjó. ⁶ Ntá mé xíkaha kjuích'e k'uántaxínhin Dios la ko k'uántaxínhin ihníé Dios la ko k'uántaxínhin tí nínko tjan nkaya nkajní la ko kaín tí sín tjejó ntiha. ⁷ Kjañin tsík'áyehé kjuachaxin tsjanjonko tí sín tinkáchónki Dios hasta tsjacha ts'etueñhen tí sín ntá k'uáyehé kjuachaxin ts'etueñhen kaín xín nkexrí tsjehe chojni la ko kaín xín chjasin la ko kaín xín tan la ko kaín xín nación. ⁸ A ntá tí bestia mé kaín xín chojni síin chjasintajni mé tsjikosáyehe sín tí bestia. Tí chojni a mé ts'ínixínhya ihníé tí óna chjasintajni, mé ts'ínixínhya ihníé sín tí libro ts'ínixín ihníé tí sín tsaá. Tí xroon a mé chóna tí Kolélo tsík'óyán sín.

⁹ La jnkojín nkexro tjinkaon chrókuinhin la chrókuinhin tíhi. ¹⁰ Tí nkexro sátsjiko tsjik'ikjehe í so chojni la kjañin ch'án ts'ikjehe ch'án la tí nkexro tsjayañin espada la kjañin espada ts'enxín. A ntá tí nkexro tinkáchónki Dios la t'ichjánxin tsonínkakonhya la ko tsochónta fe.

¹¹ A ntá chr'éxin k'uúikuñ í jnko bestia k'uaxrjexín nonte, chóna yaá ntéé éxi tsjehe ntéé coronta la mé nixja éxi nixja tí dragón. ¹² Tí bestia la chóna kaín xín kjuachaxin éxi k'uéchóna tí bestia saoxín tí k'ué la t'etueñhen tí sín síin chjasintajni kíxin tinkáchónki sín tí bestia saoxín mé tí bestia tsíchrít'q kja ntá tsíkitohe jína. ¹³ Kjañin kjuasin kjuaxroan jíé hasta xrohi k'uánótjenxin nkajní ikui nonte ntá nchónhya chojni k'uúikonxín kon sín kíxin xíkaha kónhen. ¹⁴ Mé xíkaha tí bestia tsík'áyehé kjuachaxin kjuasin kjuaxroan tí tjan tí bestia saoxín la kjuích'iyehé nchónhya chojni síin chjasintajni. La ntá k'uétueñhen tí sín síin chjasintajni sich'éna sín ijnko nkehe tsíkjanoya éxi yóhe tsjehe tí bestia tsíchrít'oxin espada la kjónté xíkaha naxa kjuák'echón. ¹⁵ A ntá tí yóxin bestia k'uáyehé kjuachaxin tsochjéhe kjuachón tí nkehe tsíkjanoya tóyóhe tí bestia saoxín kíxin ntá tí nkehe tsíkjanoya la jína tsonixja la ko jína ts'etuan its'en kaín nkexro tinkáchónkihya tí jehe. ¹⁶ Kjañin ts'etuan kíxin kaín chojni tsochónta marca, á chojni hyé q chojni ntsíntsi, la á chojni rico, la á chojni nòla la á chojni ch'exón xra la ko chojni náhi, mé kaín sín tsochónta sín marca, á tja sín chjina q totjen sín. ¹⁷ Ntá ninkexró xitjahya ts'ena la ko ninkexró xitjahya sinchejki tí chónahya sín marca q ihníé tí bestia q chónahya sín número kuènte ihníé tí bestia. ¹⁸ T'ichjánxin chrókienxínrá tíhi. Tí nkexro tienxín la chrókónohe tí número chóna tí bestia kíxin tíhi mé tí número chóna ijnko chojni la mé tí número mé seiscientos sesenta y seis.

Tí nkehe itsje tí ciento cuarenta y cuatro mil

14 A ntá k'uúikuñ tí Kolélo tjexín toté chrítaón tí jna Jerusalén. Jehe ch'án tjeko ch'án ciento cuarenta

y cuatro mil chojni ts'ínixín totjen sín ihnié tí Kolélo la ko ihnié It'é ch'án. ² Ntá tuénxín kuñhān ijnko itén nkexro kuixin nkaya nkajni mé ijnko ruido éxi nchónhaya ntario la ruido éxi sítjonta itsen la éxi ijnko ruido nchónhaya chojni it'in sín isón arpa. ³ Itsje sín nkehe nixin nkayakon tí trono la ko nkayakon tí noó nkexro tjejóchón la ko tí sín táda. Nijnko nkexro chrók'uitjahya tí nkehe tjejótsje sín; jehó tí sín ciento cuarenta y cuatro mil mé sín tsíkaá k'uék'ejó chjasintajni. ⁴ Tí sín a mé k'uéchóntahya sín itsje chojni chjin la tjóá sín la chréhe sín tí Kolélo kjónté nketí k'uáji. Tí sín a mé kuaá sín tí k'uék'ixín chojni k'uékjasin jje la ko tí sín a mé éxi ijnko ofrenda xrankixixín k'uáyéhe Dios la ko tí Kolélo kjaxin. ⁵ Kónoxínhaya ninkehó kjuach'ia k'uaxrjexínhaya ir'va sín. La tí sín la ninkehó jje chóntahya sín tí tjejó sín nkayakon tí trono kuènte Dios.

Tí nkehe chrónka tí iní ángel

⁶ A ntá k'uíquān í jnko ángel tjetjaká jnkosiné nkajni chrónka tí tan tsaáxinni jnkochrín sín hin tí sín siín chjasintajni, mé tsinhin kaín nación la ko kaín nkexrí tsjehe chojni la ko kaín xín tan la ko kaín chjasin. ⁷ Ntá t'èya itsen ntáchro kixin:

—Chróchrakonrá la chróchráxinkáonrá Dios la chróchjehera ch'án kjuasáya kixin ó kjuixraká tí yaon sinchekitoxín ch'án ijje chojni. Tjikosáyeherá ch'án kixin jehe ch'án kjuich'èna ch'án nkajni la ko chjasintajni la ko ntayaon la ko tí sít'axrje ntá.

⁸ Ntá xíki yóxin ángel, ntáchro kixin:

—Ó kjuixin kjuítsínka, ó kjuixin kjuítsínka tí chjasin jje Babilonia. Mé ntiha kuixin tí vino kókuānxin sín kaín nación ntá kjuasin sín jje chóna sín chojni chjin ókjé.

⁹ Ntá xíki tí nixin ángel nixja itsen, ntáchro kixin:

—Jnkojín sín tsjikosáyehe sín tí bestia la ko tí nkehe tsíkjanoya kuènte o tsítóhe sín tsochóna tí marca tí totjen sín o tí tja sín, ¹⁰ mé t'ichjánxin its'i sín tí vino tsjasótexín sín kuixin tí tjen Dios kixin xikaha tjechónhen tí kjuanínkaon kuènte Dios ntá ntiha tsjasótexín sín tí xrohi la ko azufre mé xikaha tsonhen tí sín a ts'ikon tí sín ángel kuènte Dios la ko tí Kolélo. ¹¹ Tí ihnchi kuènte xrohi sítjasótexín sín síchrii jnkochrín la tí sín a kuinkáchónki tí bestia la ko tí nkehe tsíkjanoya kuènte o chóna sín ihnié kuènte. ¹² A ntá tí sín tinkáchónki Dios la kuítekaon sín tí nkehe k'uētoān ch'án la ko naxā jína tinkáchónki sín Jesús mé t'ichjánxin chrókuítōehya sín titekaon sín ch'án.

¹³ Ntá kuñhān itén ijnko nkexro kuixin nkajni ntáchro kixin:

—Ikjian tíhi: “Náxrjón tjejó tí nkexro kjónté its'en sín ijje o chr'éxin kixin tinkáchónki sín Ìnchéni.” Kjá jína, ichro Nchakuen Dios, kixin tí jehe sín ts'ok'éhe sín kixin ó kjuich'e sín xra la tí xra kjuich'e sín mé kjuacha sín.

Tí nkehe tsík'óna chjasintajni

¹⁴ Ntá xrínahya k'uíquān ijnko tjuj tjóá la chrítaón tí tjuj tjetjaxin ijnko nkexro éxi yóhe tsjehe tí Xjeen Dios Tsík'óna Chojni tjenkáya ijnko corona tsík'óna chica

oro tí kja ch'án la ko ijnko chica hoz imá taté tjeextraá ch'án. ¹⁵ A ntá nkaxenhen njnko mé k'uaxrjexín í jnko ángel itsen nixja ch'án nixjehe ch'án tí nkexro tjetjaxin chrítaón tjuj ntáchro ch'án kixin:

—Tjankíxian tjetexian chica hoz kixin ó kjuixraká tí yaon tsotjá tí nkehe siín chjasintajni kixin tí nkehe tsík'óna chjasintajni la ó tsícha.

¹⁶ Ntá tuénxín tí nkexro tjetjaxin chrítaón tjuj ntá kjuínchek'átsínka ch'án chica hoz kuenté chjasintajni la kjuenájín ch'án nkehe tsík'óna chjasintajni.

¹⁷ Ntá k'uaxrjexín í jnko ángel tí njnko tjen nkaya nkajni la kjaxin sákjuíko ch'án ijnko chica hoz imá taté.

¹⁸ Ntá sákjuíxin í jnko ángel tí tjen altar la chóna ch'án kjuachaxin kuènte xrohi la itsen k'uíyēhe ch'án tí nkexro chóna tí chica hoz imá taté la ntáchro ch'án kixin:

—Tjankíxian tjetexian tí chica hoz taté la tjankíxian itja tí racimos to uva tsík'óna chjasintajni kixin ó tsíchjé to —ichro ch'án.

¹⁹ A ntá tí ángel kjuínchek'atsínka tí chica hoz chrítaón tí nonte ntá chrínjin tí to uva tsík'óna tí nonte ntiha. Ntá sákjuík'ēnka ch'án to tí tjet'ō ts'ényaxín sín to. Tíha mé t'axrjexín kixin xikaha Dios sinchekjasóte chojni. ²⁰ A ntá tí to uva tsík'ényaxín sín tjet'ō tí ikon chjasin a ntá tí tjet'ō a mé k'uaxrjexín nchónhaya jni noixín éxi tí freno tjinká ir'va kokate la trescientos kilómetro kijnxin sátsíkji tí jni a.

Tí yato tí ángel la ko tí chin tsjixixín

15 Ntá k'uíquān tí nkajni í jnko kjuaxroan jje mé ijnko kjuachrakon: mé tí yato sín ángel kuikao tí yato chin tsjixixín tsonéxin chojni. Tíha mé tí kjuanínkaon kuènte Dios tsjixixín.

² Kjaxin k'uíquān ijnko nkehe tóyóhe ijnko ntayaon tsík'óna éxi xrosentā tsínkíkjan xrohi. La tí sín tsíkjacha kixin kuinkáchónkihya sín tí bestia la ko tí nkehe tsíkjanoya kuènte la ko kuáhya sín tí número kuènte ihnié tí bestia mé tjejóxin toté sín chjinaxón ntayaon tsík'óna éxi xrosentā la ko chóna sín isón arpa tsíkjanjon Dios tsík'áyēhe sín. ³ Itsje sín isón k'uésje ch'in Moisés, tí nkexro kjuich'ehe xra Dios la ko isón kuènte tí Kolélo la mé ntáchro kixin:

Imá ijje tí kjuaxroan kuéntá kixin kaín nkehe tsíkjich'èna.

Jaha Ìnchéni Dios kaín kjuachaxin chonta.

Ntoá la ko chaxín tí ntja kuéntá.

Jaha mé ijnko Rey t'ētoān kuènte chjasintajni.

⁴ ¿Xá nkexro chrakuanhya tí jaha Ìnchéni?

¿Xá nkexro tjáhya kjuasáya kixin jaha mé ijnko nkexro jína tjóá?

Kuenté chjasintajni tsjikosáyehe sín tí jaha kixin k'uikón sín tí xra tsíkjich'e la jína tíha.

⁵ Kjuixin tíha la k'uíquān nkajni tjebrankehē tí njnko la ko tí cuarto tjóá t'inkachjina tí nkehe tsík'ētoān Dios.

⁶ A ntá tí njnko a k'uaxrjexín yato ángel kuikao yato chin. Tí iké sín la ika tjeje tjóá tjákini. A ntá tí cinta chóna ntakuin sín mé jehó oro. ⁷ A ntá ijnko tí noó tí nkexro tjejóchón mé kjuanjon ijnko copa k'uáyēhe

jnkojnko ti yato ángel mé copa tsík'óna chica oro tsíkaón tí nkehe tsjasótexín chojni kuixín tí tjen Dios tí nkexro tjechón jnkochrín. ⁸ A ntá tí nkaxenhen nínko la tsíkaón ihnchi kuixín tí kjuachaxin jíe kuènte Dios la nijnko nkexro xitjahya ts'ixenhen ntiha tsjixinjian ts'át-sínka tí yato tí chin kuikao tí yato ángel.

Tí copa tjinká nkehe tsjasótexín chojni

16 Ntá kuinhan ijnko itén ijnko nkexro imá itsen k'uaxrjexín nkaxenhen nínko, ntáche tí yato sín ángel kixin:

—Sátjia tikíkanjian chrítaón chjasintajni tí nkehe tjia tí yato copa la táha mé tsjasótexín chojni kuixín tí tjen Dios —ichro ch'án.

² A ntá tí ángel saoxín sákjuik'itji tí nkehe tjia tí copa chrítaón chjasintajni. A ntá kaín tí chojni chóna marca kuènte tí bestia la ko tjikosáyehe sín tí nkehe tsík-jangya kuènte tí bestia mé tsík'ayan sín tosóa, imá tjtóhé sín.

³ A ntá tí yóxin ángel sákjuik'itji tí nkehe tjia copa chrítaón ntayaon. A ntá tí ntayaon la k'óna jni éxí ijnié ijnko chojni tsík'óyán kichó la kaín ko sínkánkí ntayaon ik'uén.

⁴ A ntá tí níxin ángel sákjuik'itji tí nkehe tjia copa chrítaón ntario la ko chrítaón tí ntá sít'axrje tòye, la ntá tí ntá k'óna jni. ⁵ Ntá tuénxín kuinhan nixja tí ángel kuènte ntá ntácho kixin:

—Jaha mé ijnko nkexro jina kixin kjuinchekitoxián ijie chojni. Ìchéni jaha ijnko Dios jina, ósé tjen la ko naxa tjen ijie ⁶ kixin jehe sín k'óyán tí sín tinkáchónki tí jaha la ko tí sín tsíchrónka itan la ntá jaha Ìchéni chjehé sín ijni its'i sín kixin mé xikaha sítjasóte tí jehe sín.

⁷ Kjaxin kuinhan nó altar ijnko nkexro ntácho kixin:

—Chaxin Ìchéni Dios, jaha mé chonta kaín kjuachaxin la ntoá jina kjuinchekitoxián tí ijie a.

⁸ A ntá tí noóxin ángel sákjuik'itji tí nkehe tjia copa chrítaón yaon, a ntá tí yaon antsí k'uáyéhe kjuachaxin tosóa kixin tsochjánxin chojni tí sóa kuènte. ⁹ A ntá kaín chojni chjánxin tí imá sóa kuènte yaon la k'uántaxínjin sín ihnié Dios mé jehe ch'án mé tí nkexro chóna kjuachaxin kuènte tí chin a. La kjónté kjuinkíhya sín tí nkehe tinkáchónki sín la xraxinkakonhya sín Dios.

¹⁰ A ntá tí in'óxin ángel sákjuik'itji tí nkehe tjia copa chrítaón tí trono t'etoxánxín tí bestia. A ntá kaín tí k'uéchóna kjuachaxin k'uék'etoxan tí bestia la k'uíxin tié. A ntá tí chojni a la netja nejen sín kixin tjtóhé sín.

¹¹ La kjónté xikaha la kjuinkíhya sín tí nkehe jínahya ch'e sín. Náhí. Íchá má k'uántaxínjin sín Dios tjen nkaya nkajni kixin tjtóhé sín kixin xikaha kónhen sín.

¹² A ntá tí injonxin ángel sákjuik'itji tí nkehe tjia copa chrítaón ijnko ntario jíe it'in Eufrates. A ntá tí ntario la kjuixié kixin jina tsakitjehe sín ijnko ntia tsjixin tí sín rey tsjixin nó tjitoxin yaon.

¹³ A ntá k'uíkuan kixin ir'va tí dragón la ko ir'va tí bestia la ko ir'va tí profeta ntoáhya tjako mé k'uaxrjexín iní nchakuen tí jínahya éxí korána tsjehe. ¹⁴ Tíha mé

nchakuen tí jínahya kjuasixín sín kjuaxroan. A ntá sákjuikjinchekójnksé kaín rey síin chjasintajni kixin tsjanjon sín ijnko yaon jíe kuènte Dios chóna kaín kjuachaxin. ¹⁵ “Tsjehe, janhan titaya ts'inké éxí ijnko xichee. Chéhe tí nkexro tjejótseje la t'ayakonhen tí iké kixin ts'itjányanhya kixin chrók'uajihya sín tjóchin sín la chrókósuèhya sín kixin chrókónoxín kixin tjóchin sín.” ¹⁶ A ntá tsojnksé tí sín rey tí nonte it'in Armagedón nkiva Hebreo.

¹⁷ A ntá tí ángel yatoxin sákjuik'itji nkehe tjia copa chrítaón tí xrinto ntá nkaxenhen nínko nkaya nkajni k'uaxrjexín ijnko itén chojni itsen nixja mé kuixín tí tjen tí trono la ntácho kixin:

—Ó kjuixin kónhen tíha.

¹⁸ A ntá sítjónkixin la ko ruido sítjonta la ntá imá kuínki nonte fuerte. La desde tí kjuankixin k'uíxin chojni chjasintajni la xikahya kónhen kuínki nonte a ntá jie antsí fuerte kuínki nonte. ¹⁹ A ntá tí chjasin jíe xitjehe nonte la iní k'óna, chjenca. La koí kaín chjasin síin chjasintajni tsík'oya. A ntá Dios xraxinkaon kixin chrókjuinchekjásote tí sín síin tí chjasin jíe Babilonia la k'uetoan ch'án its'i sín tí vino tsjasótexín sín kixin mé xikaha kóninkaon ch'án. ²⁰ A ntá kaín tí nonte sínkátáon ntayaon k'uániankí ntá la ko tí jna k'uitjayan. ²¹ A nta nkajni k'uánótjenxin toni ijie xratja chojni mé cuarenta kilo yexín jnkojnko toni. A ntá chojni na antsí má k'uántaxínjin sín Dios kixin tí xikaha kónhen sín xratja sín toni la imá kjoté sín.

Tsjasóte tí tjan jínahya

17 A ntá ikui ijnko tí yatoxin ángel chóna tí yato copa la ntácho ch'án kixin:

—Xrákiá tsjáqoha nkexri tsjasóte tí chojni chjin tjasin jie tjetjaxin tjan chrítaón tí nchónhya ntá. ² Tí sín rey t'etoxan chjasintajni kjuasinko tjan jie la ko tí chojni síin chjasintajni kokuaxin sín tí vino a mé kjaxin kjuasixín sín jie.

³ A ntá tuénxín Nchakuen Dios sákjuikian nteje ntá k'uíkuan ijnko chojni chjin tjetjaxin chrítaón ijnko bestia kjátse la kuenté tí ko a la síma ihnié náxrjónhya tsík'ántaxiexín sín Dios la chóna yato kja la ko ite nté. ⁴ A ntá jehe tjan chóna tjan iké tjan morado la ko kjátse la teya tjan chica oro la ko xro náxrjón la ko perla. Tjexraá tjan ijnko copa tsík'óna chica oro tsíkaón nkehe jínahya tsjasixín tjan jie. ⁵ Tí totjen tjan ts'ínixín ijnko ihnié kohya nkexro tienxín. “Tíha mé tí chjasin jíe Babilonia, mé iné tí chojni chjin tjasin jie la ko kain chojni jínahya ch'e síin chjasintajni.” ⁶ Ntá kónona kixin tí tjan a la tsékanxin tí ijnié tí sín tinkáchónki Dios la ko tí ijnié tí sín tsík'enxín tí chrónka sín kixin tinkáchónki sín Jesús. Ntá k'uíkuan xikaha imá chrakonna. ⁷ A ntá ijnko ángel ntácho ch'án kixin:

—¿Nkekuènté chrakuan? Ntá ijie sntanoha tí nkehe tienxínhya chojni kuènte tí tjan a la ko kuènte tí bestia tjejen tjan chóna yato kja la ko ite nté. ⁸ Tí bestia k'uíkuan jaha kjuák'e ósé la ijie tjechónhya kjánchó senó tsochriinxín tí tòye ninka ntá chr'éxin ts'itjayan. A ntá tí sín síin chjasintajni ts'ínixínhya ihnié sín tí libro

ts'ínixín ihnjé chojni tsaá desde k'óna chjasintajni, la mé jehe sín tsochracon sín tió ts'íkon sín tí bestia kjuák'e ósé la tsík'en la ntá ijie xikjan inaá.

⁹Tí jnkojín nkexro chrókienxín la mé tí yato kja la t'axrjexín yato jnā tjejen tí chojni a. ¹⁰Δ ntá tí kja kjaxin t'axrjexín yato rey la ntá in'ó tí sín rey la í t'etuñhaya sín ijie la ijnko tí jehe sín t'etōan ijie la í jnko naxā tji-hya. Δ ntá tió tsji tí yatōxín la í kánhyó sé ts'etōan. ¹¹Δ ntá tí bestia kjuák'e senó la ijie tjechónhaya mé tí jnixin rey la jehe ch'án kuente tí yato rey la chr'éxín la ts'itjáyan.

¹²Δ ntá tí ite ntéé tsík'íkuan mé ite rey naxā t'etuñhaya. Δ ntá ijie la ts'áyéhe sín kjuachaxin ts'etōanko tí bestia kjánchó kánhyó sé. ¹³Tí ite tí rey la jnkokoá tsjenkayáxin sín la tsjanjon sín kjuachaxin kuente sín kixin ts'etōan tí bestia. ¹⁴Tsjanjonko sín tí Kolélo a ntá tí Kolélo la tsjacha ts'etōan kixin jehe ch'án mé Ìnché kaín chojni la ko jehe ch'án mé tí Rey ts'etuñhen kaín rey la ko tí sín tjejóko ch'án mé tsík'íyehé Dios la tsík-jeyá ch'án sín la jína nchexiteyá sín.

¹⁵Kjaxin ntáchro tí ch'ín ángel kixin:

—Tí ntā k'uíkuan la chrítaón tjetjāxín tí chojni chjin tjasin jje la mé t'axrjexín kixin nchónhaya chjasin la ko nchónhaya chojni la ko nchónhaya nación la ko nchónhaya nkiva. ¹⁶Δ ntá tí bestia k'uíkuan la ko tí ite ntéé la tíha mé tsonínkakonhen tí tjan tjasin jje la tsitōhe tjan tjóchín tjan la sine tí bestia tí nto chóna cuérpōé tjan la ko tsoche tí huésōé tjan. ¹⁷Dios tsík'etuñhen asén sín kixin xikaha sich'e sín éxí tjinkaon ch'án kixin jnkokoá tsjenkayáxin sín la ko tsjanjon sín kjuachaxin kuente tí sín rey kixin ts'etōan tí bestia tsoxiteyája tí nkehe tsintáchro Dios. ¹⁸Δ ntá tí chojni chjin k'uíkuan la táha mé tí chjasin jje t'etōan tí sín rey t'etōan chjasintajni.

Kjuítsínka chjasin Babilonia

18 Ntá chr'éxín k'uíkuan í jnko ángel k'uínkajinxín nkajní chóna nchónhaya kjuachaxin ntá chjasintajni antsí k'uínkaséyanni tí tjákini tsjehe ch'án. ²Ntá k'uíyato ch'án itsen ntáchro ch'án kixin:

—Ó kjuítsínka, ó kjuítsínka tí chjasin jje Babilonia.

Ntá tí jínahya ó kjuacha k'uíxnen t'etōan ntiha la ntiha siín kaín xín clase nchakuen jínahya la ko siín kāké ko xritjaká tjuáhya la ko jínahya. ³Δ ntá kaín xín nación kókuñxín tí vino kjuínchekji tjan ntá kjuasinko tjan sín jje la ko tí sín rey t'etōan chjasintajni kjaxin kjuasinko tjan jje. La tí sín nchekji nkehe chjasintajni kóríkoxín sín kixin k'uena tjan nchónhaya nkehe.

⁴Ntá kuñhān í jnko itén nkexro kuixín nkaya nkajní ntáchro kixin:

—T'axrjéxinrá tí chjasin ntiha kixin tí jahará tinkachónkirá tí janhan kixin chrók'uícahyará tí ijje sín la ko chrókjuasótexínhyará tí nkehe tsonhen sín. ⁵Kixin tí nchónhaya jje tinkák'ánkí hasta kjuixraká nkajní la Dios ó nohe tí jje chóna sín. ⁶Ch'eherá tjan éxí tí jehe tjan kjuích'ehe tjan í so chojni kixin xikaha tsjasótexín tjan. Chrókjuenkehérá tjan iyó veces éxí tí tsíkijch'ena tjan ik'ui í so chojni. ⁷Antsí chrókjuasóte tjan tóyohé tí nke-

he kjuích'e tjan kixin kjuínchehnke tjan la ko k'uéchón-ta tjan kaín nkehe tóxrjínhín tjan. Jehe tjan ntáche asén tjan kixin: "Ntihi tjetjāxian éxí ijnko reina. Jehya ik'ána kixin chrókjuasótena." ⁸Mé xikaha kjaxin jnkokoá yaon itsi tí kjuaxikaon tsonhen tjan mé its'en tjan la ko tsjasótexín tjan kjinta la tsoche tjan kixin Ìnchéni imá chóna kjuachaxin la jehe ch'án sinchekjasóte ch'án tjan.

⁹Δ ntá tí sín rey siín chjasintajni tsíkjasinko sín tjan jje la ko nchónhaya nkehe kjuínchexenko sín tjan la mé tsotsjánka sín la ts'èya sín tió ts'íkon sín ts'aya ihnchi tió tsoche tjan. ¹⁰Ntá jehe sín tsitōhe sín ikjín kixin chracon sín kixin xikaha tsjasóte tjan la tsontáchro sín kixin:

—Nòa tí jaha chjasin jje Babilonia, chjasin imá t'etōan kixin titāya kjuasótia.

¹¹Tí sín xrinchekji nkehe la kjaxin tsjánka sín, t'èya sín kixin xikaha kónhen tí chjasin ntiha kixin kohya nkexro ts'enehe sín tí nkehe sinchekji sín. ¹²Kjuínchekji sín chica oro la chica plata la ko ixrō náxrjón la ko perla la ko ika náxrjón lino la ko ka seda la ko ika color morado la kjátse la ko kjaxin kaín xín clase nta náxrjón xraxé la ko tí nkehe tsík'óna neno elefante la ko inta náxrjón la ko bronce la ko ixrō chica la ko ixrō mármol. ¹³Kjaxin xrinchekji sín canela la ko xroñ xraxé náxrjón la ko chjincō la ko xroñ mirra la ko crema la ko vino la ko aceite la ko harina náxrjón la ko noa trigo la ko iko tamá nkehe la ko kolélo la ko kokatē la ko carreta la ko chojni ch'exón xrā kjaxin kjuínchekji sín. ¹⁴Tsontáche sín tí chjasin a kixin:

—Í chontahya kain to tjeje imá k'uékóxrjínhan. Ó k'uitjáyan kaín nkehe náxrjón tjeje k'uéchonta.

¹⁵Tí sín k'uékjinchekji tí nkehe la kóricó sín kixin kjuacha sín tí xrā kjuích'e sín tí chjasin ntiha. Ikjín k'uéjo sín kixin chracon sín kixin xikaha kónhen kjuasóte tí chjasin. Tsjánka sín la t'èya sín ¹⁶la tson-táchro sín kixin:

—Nòa tí chjasin jje. Éxí ijnko chojni chjin tsík'itsa ka lino náxrjón la ko ika morado la kjátse la ko teyá nkehe oro la ko xro náxrjón tjeje la ko perla. ¹⁷Δ ntá jnkorato koá kjuixin kjuéje tí nkehe imá tjeje —ichro sín.

Kaín tí nkexro t'etōan tí ntabárcō la ko tí sín tsík'ixenhen tí ntabárcō la ko tí sín ch'e xrā chrítaón ntāyaon kuítōhe sín ikjín ¹⁸la tió k'uíkon sín tí ihnchi síche tí chjasin ntiha la k'óyako sín kixin:

—¿Xá nkexéhe í jnko chjasin chrókóyóhe tí chjasin jje i?

¹⁹La tjíkanjin kja sín nche la tsjánka sín t'èya sín kixin:

—Nòa tí chjasin jje. Kóricó tí sín k'uéchóna ntabárcō chrítaón ntāyaon kixin tí chjasin i la ntá jnkorato koá kjuixin k'uitjáyan tí nkehe chóna sín.

²⁰Δ ntá jahará tjejorá nkajní tócháhará kixin xikaha kónhen tí chjasin a. Tócháhará jahará k'uájikoará Ìnchéni la ko jahará k'uéchronkará itén Dios la ko kaín rá kuinkachónkirá tí jehe ch'án kixin Dios kjuínchekjasóte tí chjasin a kixin tí jje kjuasin sín kjuínchekjasótiará sín tí jahará.

²¹ A ntá ijnko ch'ín ángel chóna kjuachaxin kjuatsen ijnko xṛó éxí ijnko xṛó jié kuènte molino la k'uenkí ch'án ntayaon la ntá ntáchro ch'án kixin:

—Mé xikaha tsonhen tí chjasin Babilonia, tí chjasin jié la nunca ts'ikonhya chojni chr'éxin. ²² Nunca tsienhya sín música kuènte isón arpa la ko flauta la ko trompeta tí ntja la ko ninkexró xitjahya sich'e ninkehó xṛá ntiha la ko kjaxin tsienhya sín ninkehó tóvéntó xṛó molino. ²³ Í ts'inkaséyanxínhya xrohi kuènte ninkehó lámpara la kjaxin í tsienhya sín ts'ixin kia tsotehe chojni ntiha. Tí sín k'uékjinchekji nkehe ntiha la imá k'uék'etqan kuènte chjasintajni la tí sín k'uékjich'iyehé tí sín siín chjasintajni la k'uékjich'e sín jínahya, k'uéd-kjinchexroan sín.

²⁴ A ntá tí chjasin jié ntiha tsíkónoxín ijnié tí sín tsík'en k'uéchrónka itén Dios la ko tí sín tinkáchónki tí jehe ch'án la ko kain tí sín tsík'énxín chjasintajni.

19 Ntá chr'éxin ntá kuñhan itén nchónhya nkexro tjejó nkaya nkajni iten nixja, ntáchro sín kixin: ¡Aleluya! Kjuasáyé Dios kuaáxinni la ko jehe ch'án t'inkaséyanxín ch'án tí jeheni la imá chóna kjuachaxin Dios kuènteni.

² Kixin jehe ch'án ntoá kjuínchekjasóte ch'án tí tjan kjuasin nchónhya jie kixin jehe tjan kjuachroe tjan chojni siín chjasintajni kixin tí nkehe jínahya k'uékjich'e tjan.

Dios kjuínchekjasóte tjan kixin k'óyan tjan tí sín k'uékjich'ehe ch'án xṛá.

³ La ntá kjaxin inaá xintáchro kixin:

—¡Aleluya! Kjuasáyé Dios kixin tí ihnchi síchexín tí jehe tjan tsitqehya chriin hasta tí ntihi.

⁴ A ntá tí veinticuarto tí sín táda la ko tí noó nkexro tjejóchón tjejóxin toch'in sín hasta káxin kja sín nonte kjuikosáyehé sín Dios tí nkexro tjetjaxin tí trono la ntáchro sín kixin:

—¡Amén! ¡Aleluya! ¡Kjuasáyé Dios!

⁵ Ntá xrinahya kuñhin sín itén ijnko nkexro tjan nó trono ntáchro kixin:

Chjehérá kjuasáya tí Dios kuènteni kaín rá ch'ehérá ch'án xṛá

la kuítékákonhénra ch'án,
mé kaín tí jahará kjonte chánjan ntsíntí o chojni nte-to.

Tí kia tsotehe tí Kolélo

⁶ Kjaxin kuñhan nkehe éxí itén nchónhya chojni éxí nchónhya ntario sitóvéntó la ko imá iten sitjonta la ntáchro kixin:

¡Aleluya! Kjuasáyé Inchéni ó kjuankixin t'etqan Inchéni Dios kuènteni chóna kaín kjuachaxin.

⁷ Chrókóchéheni la chrókjuikosáyeheni Dios kixin ó kjuixraká tí yaon ts'ixin kia kuènte Kolélo.

La tí tjan tsotehe la tsíkóyaxínhin tjechónhen,
⁸ mé tsík'áyehé kjuachaxin tsík'itsa ka lino náxrjón tjóá tjákiní.

A ntá tí ka lino náxrjón a mé t'axrjexín kixin tí jina k'uéjó tí sín tinkáchónki Dios.

⁹ Ntá tí ch'ín ángel k'uetoan ch'án kixin:

—Ikjian tíhi: “Náxrjón tjejó tí nkexro k'uáyehé kjuachaxin sátsji tí kia tsotehe tí Kolélo.”

A ntá ntáchro ch'án inaá kixin:

—Tí palabra a mé chaxín ntoá nixja Dios.

¹⁰ Ntá kjuak'éxian toq'hian toté tí ángel kixin chrókjuikosáyehé ch'án, kjánchó jehe ch'án ntáchro ch'án kixin:

—Xikahya chrokjuich'e kixin janhan kjaxian t'ahá xṛá Dios éxí tí jaha la ko éxí tí sín kichuá kuítqehya kuítekaon tí tan jina chrónka Jesús. Jehó Dios mé chrókjuikosáyehé jaha.

Tí nkehe k'uéchrónka Jesús mé k'uéchrónka tí sín profeta.

Tí nkexro kjuák'ekjen kokate tjóá

¹¹ Ntá k'uikuán kixin nkajni tjejránkehé la ntaha kónoxín ijnko kokate tjóá la ko tí nkexro tjejkjen va mé it'in jina la ko Chaxín kixin ntoá kjuínchekitqexín ch'án ijje chojni la ko ntoá kjuánjonko ch'án chojni. ¹² A ntá tí ikon ch'án mé tjákiní éxí xrohi nene xikaha tsjehe. A ntá tí kja ch'án la chóna nchónhya corona la ko ts'ínixín ijnko ihnié ijnko nkexro la jehó ch'án mé nohe ch'án tíha. ¹³ Tjenkáya ch'án ijnko ka tsík'ixikjanjin jni ntá ihnié ch'án mé Itan Kuènte Dios. ¹⁴ Chréhe tí sín soldado kuènte nkajni. Iké sín mé ka lino náxrjón tjóá la tjejókjen sín kokate tjóá. ¹⁵ Ir'va tí jehe ch'án k'uaxrjexín espada imá taté kixin táha mé tsjik'óyanxín ch'án tí sín siín kaín nación la ko ts'etqanxín ch'án ijnko chica vara. Jehe ch'án mé sinchekitqexín ch'án ijje sín éxí t'énxín sín to uva toté sín mé xikaha ts'etqenhen ch'án kixin its'i sín vino tsjasótexín sín kixin mé xikaha tsjxin tí kjuanínkaon kuènte Dios chóna kaín kjuachaxin. ¹⁶ Iké ch'án mé ts'ínixín kixin jehe ch'án me Rey t'etqenhen kaín rey la ko jehe ch'án mé Inché kain chojni.

¹⁷ Ntá tuénxín k'uikuán ijnko ángel tjejin toté tí tjan yaon la k'uéyato ch'án iten k'uéyatohe ch'án tí ko xritjaká, ntáchro ch'án kixin:

—Xrákirá tójnoktsérá ntihi kixin Dios tsjanjon nkehe sinterá ijje. ¹⁸ Sinterá cuerpo kuènte reyes la ko sinterá cuerpo kuènte tí sín comandante la ko cuerpo kuènte chojni jjehe la ko ntqé kokate la ko cuerpo kuènte tí sín tsíkjiták'á va la ko cuerpo kuènte kaín chojni libre o chojni ch'exón xṛá la chojni hyé o chojni ntsíntí.

¹⁹ K'uikuán tí bestia la ko tí sín reyes t'etqan chjasintajni la ko tí soldado kuènte sín, tsíkójnoktsé sín tsjanjonko sín tí nkexro tjejkjen kokate la ko koí tí sín soldado kuènte ch'án. ²⁰ A ntá itsé sín tí bestia kixin sátsji tsjasóte la ko kjaxin itsé sín tí nkexro ntoáhya k'uékjako itén Dios la ko k'uékjasin ch'án kjuaxroan náxrjón nkayakon tí bestia mé xikaha kjuich'e tí nkexro ntoáhya kjuako, kjuich'iyehé ch'án tí sín tsíkítqhe tsíka marca kuènte tí bestia la ko kjuikosáyehé sín tí nkehe tsíkjangya kuènte tí bestia. Ntá tí bestia la ko tí nkexro ntoáhya kjuako itén Dios mé k'uítuenhen sín sátsji tí siín xrohi tsoche tjejóchónxinhín sín tsochéxin azufre. ²¹ A ntá tí í so sín la ts'énxín tí espada k'uaxrjexín tí ir'va tí nkexro tjejkjen tí kokate tjóá la kaín ko xritjaká

ts'ixin tí siín tí cuerpo kuènte tí jehe sín la hasta tsok-jehe va sine va.

Tí mil nánó

20 Ntá xrínahya k'uíkuān ijnko ángel k'uínkajinxin nkajní tjexraá llave kuènte tí tōyē ninka la ko ijnko cadena jíe tjexraá ch'án. ² A ntá tí ángel a itsé tí dragón mé tí konche ósé kíj mé tíha tí ch'in diablo la ko Satanás la kjuak'ēchroé ch'án ijnko mil nánó. ³ Ich'án ch'án sákjuí tōyē ninka ntá k'uikjehe ch'án la ko kjuak'e ch'án ijnko sello chrítaón puerta kíxin ntá tí dragón chrókjuich'iyehya tí chojni siín kaín nación hasta chrók'uatsínkajia tí mil nánó. A ntá ts'atsínka tí mil nánó ntá tsoxintankehe kjánchó séhya its'e.

⁴ Ntá tuénxín k'uíkuān tí trono la ko tí sín tjejtjāxin tsík'áyēhe sín kjuachaxin sinchekitōexín ijje chojni. Kjāxin k'uíkuān āsén chojni tsíchrínjin kja kíxin kuítekaon sín Jesús la ko tsíchrónkaxín sín itén Dios. Jehe sín la kuinkáchónkihya sín tí bestia la ko tí nkehe tsíkjanōya kuènte la ko kuítōehya sín ikuá sín marca tí totjen sín o tí itja sín. Mé k'uíkuān kíxin tsíxechón sín la ko ts'etōanko sín Cristo ijnko mil nánó. ⁵ Ntá í so chojni tsík'en la nāxā xechónhya hasta ts'atsínkajia tí mil nánó. Tíha mé xrankíxín tsoxechón chojni. ⁶ Nāxrjón tjejó tí sín tsíkjinchetjóá Dios mé tí sín a mé senó tsoxechón sín. A ntá tí yóxin chrók'uen sín la tíha chón-tahya ninkehó kjuachaxin nāxā xíkaha chrókónhen sín. Jehe sín mé nch'á kuènte Dios la ko kuènte Cristo la ts'etōanko sín ch'án tí mil nánó.

⁷ A ntá ts'átsínka tí mil nánó ntá ch'in Satanás tsoxintankehe tí kjíchroé. ⁸ La sátsjikjich'iyehya tí chojni siín kuenté chjasintajni la ko sátsjikjich'iyehya tí chjasin Gog la ko Magog. La tsōjnkotsé sín kíxin tsjanjōn sín la ko tí soldado kuènte tí jehe sín. Nchónhya sín tsōjnkotsé ntiha éxí tí nchesen siín ntāyaon. ⁹ Mé xíkaha sátsji sín tí tonxín la ko tí tekāxin nonte la ts'ántatjen sín tí tjejó tí sín tsíkjinchetjóá Dios mé tí chjasin jíe tjuèhe ch'án. A ntá xrohi tsíxin nkajní kíxin tsochexín tí sín jínahya ts'itjāyanxín sín. ¹⁰ A ntá tí diablo tsíkjich'iyehya tí jehe sín kjāxin sátsji tsochexín xrohi la ko azufre tí sátsíkji tsíchexín tí bestia la ko tí nkexro ntoáhya kjuako itén Dios. Mé ntiha mé tsjasótexín nchakotjin la ko tie jnkochrín.

Tsitōexín ijje chojni tí tjen tí trono jíe tjóá

¹¹ Ntá k'uíkuān ijnko trono jíe tjóá la ko tí nkexro tjetjāxin nó ntiha. A ntá tí tjen ch'án ntiha la ó k'uitjāyankoá nonte la ko nkajní la í kónoxínhya inaá tí nonte. ¹² Ntá k'uíkuān tí sín tsík'en; chojni hyé la ko chojni ntsínsí tjejóxin tōté sín nkayakon Dios la ntá xitjēhe iso libro la ko xitjēhe í jnko libro ts'ínixín ihnié tí sín tsaá. Ntiha tsitōexín ijje chojni tsík'en éxí nixja tí í so libro nkehe tí xrā kjuich'e sín ts'ínixín ntiha. ¹³ Tí sín tsík'enxín ntāyaon la ntiha xrakuāxin sín la tí sín sátsíkji tí siín chojni tsík'en la ntiha xrakuāxin sín kaín sín tsochjina sín tsitōexín ijje jnkōjnko sín kíxin nkexrí tí xrā kjuich'e sín. ¹⁴ Ntá tí kjuachaxin kuènte kjuach'én la

ko tí tsík'ejó tí āsén tí sín tsík'en sátsji tsoche tí xrohi tsochexín, mé tí muerte yóxin tíha. ¹⁵ La ko ntaha sátsji tí chojni ts'ínixínhya ihnié sín tí libro ts'ínixín ihnié chojni tsaá.

Nkajní nixin la ko nonte nixin

21 Ntá k'uíkuān ijnko nkajní nixin la ko ijnko nonte nixin kíxin tí nkajní sōoxín la ko tí nonte sōoxín tsík'itjāyan la ko kjāxin kohya ntāyaon. ² Janhan Juan k'uíkuān tí chjasin jíe tjóá. Táha mé tí Jerusalén nixin k'uínkajinxin nkajní kuixín tí tjen Dios la kuenté tsíkóyóxin éxí ijnko chojni chjin tsōtēhe tsík'itsa kíxin tsákja tí xí. ³ Ntá kuinhān ijnko itén ijnko nkexro itsen kuixín nkajní ntáchro kíxin:

—Dios itjen tí siín chojni, la ts'ejóko sín tí jehe ch'án la jehe sín mé ts'óna chjasén ch'án la Dios a mé ts'ejóko sín ntiha la mé ts'óna Dios kuènte sín. ⁴ Jehe ch'án mé sinchexámá kaín ntākon sín la í tsōkohya nkexro its'en la tsōkohya nkexro tsotsjānka la ko ts'áváhya sín la ko tsōkohya kjuatjoté kíxin kaín tí nkehe k'uékónhen ósé la ó kjuixin k'uátsínka.

⁵ A ntá tí nkexro tjetjāxin tí trono ntáchro ch'án kíxin: —Janhan mé t'ána kaín nkehe nixin.

Kjāxin ntáchro ch'án kíxin:

—Ikjian tíha kíxin tíha mé palabra chaxín la chrókuítekávān kaín tíha.

⁶ Ntá chr'éxjin chrónka ch'án kíxin:

—Kaín nkehe la ó kjuixin tsík'óna. Janhan la tí xrankíxín la ko tí tsjixín éxí tí letra xrankíxín A la ko tsjixín Zeta. Tí nkexro t'enxín ntā la janhan tsōtjāha sín tí ntā its'i sín mé tí ntā tjanjōn kjuachón la ninkehó ts'ixinkíehya sín tíha. ⁷ Tí nkexro tsjacha ts'ōtōehya tí janhan la ts'áyēhe sín kaín tí nkehe tsōtjāha sín. La janhan mé ts'óna Dios kuènte sín, a ntá jehe sín mé xjāna ts'íkaān tí jehe sín. ⁸ A ntá tí chojni chrakon la chojni titekakonhya la tí sín chjīngxínhin la ko tí chojni ts'óyān kíchó la ko tí chojni tsákja chojni chjin ókjé la ko tí chojni xrinchexrōān la ko chojni tinkáchónki nkehe tsíkjanōya la ko káin chojni ch'ia mé tí sín a mé ts'ítuenhen sátsji sín tí siín xrohi tsochexín sín azufre tío itsi tí yóxin muerte.

Tí Jerusalén nixin

⁹ Ntá ikui ijnko tí yātoxin ángel chóna tí yātoxin copa tsíkaón tí yātoxin chin tsjixín tsjasótexín chojni. Ntá ntáchro ch'án kíxin:

—Xrákia tsjākōha tí tjan tsōtēhe tí Kolélo.

¹⁰ Ntá k'uíkuān ijnko nkehe kjuākōxin Nchakuen Dios la ntá tí ángel sákjuikian ijnko jnā jíe la ko noi la kjuākōna ch'án tí chjasin jíe tjóá mé tí Jerusalén ts'inkajinxin nkajní tsíkixín tí tjen Dios. ¹¹ A ntá tí chjasin a mé tjákinixin kjuachaxin kuènte Dios. A ntá tjákiní éxí ijnko xro imá náxrjón tjeje éxí xro jaspe éxí xrosentā tsjehe. ¹² A ntá jnkōtatjen tí chjasin chóna tját'ō noi la chóna teyó puerta la jnkōjnko ángel jnkōjnko puerta tjejónta la ihnié tí teyó tí sín tsík'axrjenixin sín Israel ts'ínixín jnkōjnko puerta. ¹³ La iní puerta la

nó tjitoxin yaon la iní puerta la nó norte la iní puerta la nó tjiatóxin yaon la iní puerta la nó sur. ¹⁴ Tí tjat'ò tsík'antatjen tí chjasin chóna teyó xro chóntaxin fuerza tí tjat'ò la jnkajnko ihnié tí teyó tí sín k'uájiko tí Kolélo a mé ts'ínixín jnkajnko tí xro a.

¹⁵ A ntá tí ángel tjenixjana chóna ijnko nta vara oro, éxi tji tsjehe, tsjachqaxín tí chjasin la tí puerta kuènte chjasin la ko tí tjat'ò t'inkákuènxin. ¹⁶ Tí chjasin la cuadrada la tí kjinjinxín jnkokón la ko tonxín la jnkokón. A ntá tí ángel kjuachqaxín tí chjasin tí nta vara éxi tji tsjehe tsíkjachqaxín ch'án tí chjasin mé chóna dos mil dos cientos kilómetro tí kjinjinxín la ko tí nte-toxín la ko tí tonxín la jnkokón. ¹⁷ Ntá tsíkjachqaxín ch'án tí tjat'ò tsíkajintajin tí chjasin a la chóna sesenta y cuar-to metro kixin éxi tjachroa chojni chjasintajni mé xikaha kjuachqaxín tí ángel.

¹⁸ Tí tjat'ò tsík'antatjen tsík'óna xro jaspe, a ntá tí chjasin tsík'óna jehó chica oro tóyóhe jehó xrosentá tjóá. ¹⁹ Tí xro tsík'óna xrankixín tsík'antatjen tí tjat'ò la nchónhya xro chjini náxrjón tsínkíkjan. A ntá tí xro xrankixín la jaspe, a ntá tí xro yóxin la zafiro, la tí xro nixin la ágata, a ntá tí noóxin la esmeralda. ²⁰ A ntá tí n'óxin xro la xro mármol la tí injonxín la cornalina, la tí yaqoxín la crisólito, a ntá tí nixín la berilo, la tí xro naxín la topacio, la tí texín la crisoprasa. A ntá tí tejnkoxín la jacinto, a ntá tí teyóxin la amatista. ²¹ A ntá tí teyó puerta mé tjejó perla la jnkajnko puerta tsík'óna jnkokoxá perla. A ntá tí ntja jíe kuènte chjasin la tsík'óna jehó chica oro éxi xrosentá tsjehe.

²² Ntaha la k'uíkonhya ninkehó njnko tí chjasin a, kixin Ìnchéni Dios chóna kaín xín kjuachaxin la jehe ch'án la ko tí Kolélo mé tí njnko ntiha. ²³ Tí chjasin a mé t'ichjánxinhya yaon la ko ni nitjó ts'inkaséyanxín. Kixin tí t'inkaséyanxín la Dios la ko tí Kolélo mé tí xrohi kuènte. ²⁴ A ntá tí chojni kuènte kaín nación tsíkaá la ts'ikonxín tí xrohi kuènte tí chjasin la tí sín tsík'óna reyes chjasintajni la ntiha tsjanjon sín tí nkehe k'uéchóna sín. ²⁵ A ntá tí puerta kuènte chjasin la tsík'jehya tí nchakotjin la ntaha la tsokohya ts'ixín tie. ²⁶ Ntaha sátsjiko kaín xín nación tí nkehe náxrjón k'uéchóna sín chjasintajni. ²⁷ A ntá ntaha mé xitjahya ts'ixenhen ninkehó nkehe tjuáhya, la ninkexró chjinoxínhin o chojni ch'ia. Jehó ts'ixenhen tí sín ts'ínixín ihnié tí libro ts'ínixín ihnié tí sín tsaá, mé tí libro chóna tí Kolélo.

22 A ntá tí ángel kjuákona ijnko ntario tjóá, a ntá tí ntá a mé tjanjon kjuachón. Táha mé t'ikonxínni éxi xrosentá la mé k'uaxrjexín tí trono kuènte Dios la ko tí Kolélo. ² A ntá jnkosiné tí calle tjeoan kuènte tí chjasin a la ko nanánko tí ntario ntiha itjen tí inta tjanjon kjuachón mé t'óna to teyó veces jnkajnko nánó kixin t'óna to jnkajnko nitjó. Tí ka kuènte tí nta la xroan tsitqexín jina tí nación siín ntiha. ³ La mé ntiha tsokohya ninkehó kjuachjinoxínhin la tí trono kuènte Dios la ko kuènte tí Kolélo la ntiha tjen tí chjasin. La tí sín ch'ehe ch'án xra la mé tsjikosáyehe sín ch'án. ⁴ Ts'ikon sín tí kàré Dios la ko tsochóna sín ihnié ch'án tí totjen sín. ⁵ Ntiha la tsokohya ts'ixín tie la tí sín siín ntiha la

t'ichjánxinhya sín xrohi kuènte lámpara la ko ni xrohi kuènte yaon kixin Ìnchéni Dios mé ts'inkaséyanxín sín ntiha la ko tsochóna sín kjuachaxin kuènte Dios jnkochrín.

Tí itsi Ìnchéni la kánhyó sé

⁶ A ntá tí ángel mé nixjana ch'án ntácho kixin:

—Tí itan a mé chaxín la chrókuitekákohén tí tan a.

La ko Ìnchéni mé tí Dios nchexaxinkaon tí sín nixja kjuachaxin ihnié ch'án mé ichr'án ch'án tí ángel kuènte ch'án kixin tsjakuexín ch'án tí sín ch'ehe ch'án xra, tí nkehe tjoka tsonhen.

⁷ —Tjoka ts'inka janhan!

Náxrjón tjejó tí sín titekaon tí itén Dios nixja tí libro i.

⁸ Janhan Juan, kujnhan la ko k'uíkuñ tíha. A ntá chr'éxin kjuixin kujnhan la ko k'uíkuñ tíha ntá kjuak'éxiñ toq'hian chrínkí toté tí ángel kixin xikaha kjuakona la ntá chrókjuikosáyaha ch'án. ⁹ A ntá jehe ch'án ntácho ch'án kixin:

—Xikahya sich'e kixin janhan kjaxin t'ahá xra Dios éxi tí jaha xikaha la ko éxi tí sín kichuá mé tí sín nixja itén Dios la ko kaín tí sín tjinkaon chrókuitekaon nkexrí nixja tí libro i. Mé jehó Dios chrókjuikosáyehé.

¹⁰ Kjaxin k'uetuñna ch'án kixin:

—Chrókjuak'echjinahya tí nkehe jahvá kuinhín kuènte Dios éxi nixja tí libro i kixin ó kuichjina tí yaon tsoxiteyá. ¹¹ A ntá tí sín ch'e jínahya ája nohe sín ch'e sín tí jínahya. A ntá tí nkexro ntoáhya ch'e la ája nohe ch'e tí nkehe ntoáhya. A ntá tí nkexro ch'e nkehe tóxrjinhín Dios la naxá chrókjuich'e xikaha la ko tí nkexro tsíkjinchetjóá Dios la naxá jina chrók'uejó sín chrókuitekaon sín tí jehe ch'án.

¹² —Chaxín tjoka ts'inka janhan la ts'inkakian tí nkehe tsotjahará jnkajnkorá kixin nkexrí tí xra chuich'erá. ¹³ Janhan mé tí xrankixín la ko tí tsjixín la janhan mé tí saoxín la ko tí tsjixín éxi tí letra xrankixín A la tsjixín Zeta.

¹⁴ Náxrjón ts'ejó tí nkexro tsíkjen iké kixin tsochóna sín kjuachaxin tsqchjinehe sín tí nta tjanjon kjuachón kixin jina ts'ixenxín sín tí puerta kuènte chjasin. ¹⁵ A ntá ntója tsitqhe tí chojni jínahya kuitekakonhya la ko tí chojni nchexroan la ko tí sín chóna nchónhya chojni chjin la ko tí chojni tjàya la ko tí chojni tinkáchónki tí nkehe tsíkjanoya la ko tí chojni tóxrjinhín xrich'ia.

¹⁶ —Janhan Jesús mé ichr'an tí ángel kuèntana kixin tsochénka kaín njnko kaín tíha. Janhan mé k'uaxrjenixian tí rey David la ko janhan tí konotsé itji tí chjina t'inkaséyan. ¹⁷ Tí Nchakuen Dios la ko tí sín tinkáchónki tí Kolélo ntácho kixin:

—Xrákiá.

La tí sín tjejótinhin la ntácho sín kixin:

—Xrákiá.

A ntá tí nkexro t'enxín ntá tjinkaon ntá la chrók'ui tí ntá tjanjon kjuachón la ninkehó ts'ixinkíhya tíha.

¹⁸ Kaín nkexro tjejótinhin itén Dios ts'ínixín tí libro i la chrókonohe sín tíha: Jnkajín sín chrókjuich'éna í so nkehe chrónixja la Dios mé antsí sinchekjasóte tí jehe sín tsoníhi sín éxi nixja tí libro i. ¹⁹ A ntá jnkajin nkexro

tsjatsen jnkojín palabra chóna tí libro i la Dios tsjatsen
tí nkehe chrók'uáyéhe sín chóna tí libro ts'ínixín ihñié
tí sín tsaá la ko Dios tsjatsen tí nkehe chróchóna sín tí
tjen tí chjasin tjóá kixin éxí nixja tí libro i.

²⁰ A ntá tí nkexro chrónkaxín tí tan i mé ntáchro kixin:
—Tjoka ts'inka janhan.

Amén. ¡Xrákiá. Ìnchéni Jesús!

²¹ Ìnchéni Jesucristo mé sincheyonrá kaín rá. Amén.